



Wængongui nänö Apæneginö

Worani New Testament

Contents

Itota Codito ingantedö ante Mäateo nänö watapæ ante yewæmongainta	1
Itota Codito ingantedö ante Mäadoco nänö watapæ ante yewæmongainta	91
Itota Codito ingantedö ante Odoca nänö watapæ ante yewæmongainta	145
Itota Codito ingantedö ante Wäö nänö watapæ ante yewæmongainta	239
Itota nänö da godongainäni Näni Cægainö	306
Odömänoidi inänite Pabodo nänö cadota ante yewæmongainta	391
1 Coodintoidi inänite Pabodo cadota ante tänota nänö yewæmongainta	430
2 Coodintoidi inänite Pabodo cadota ante ayænta nänö	467
Gadataidi inänite Pabodo nänö cadota ante yewæmongainta	491
Epetoidi inänite Pabodo nänö cadota ante yewæmongainta	505
Pidipenteidi inänite Pabodo nänö cadota ante yewæmongainta	519
Codotenteidi inänite Pabodo nänö cadota ante yewæmongainta	529
1 Tetadönitenteidi inänite Pabodo cadota ante tänota nänö yewæmongainta	538
2 Tetadönitenteidi inänite Pabodo cadota ante ayænta nänö yewæmongainta	546
1 Tımoteo ingante Pabodo cadota ante tänota nänö yewæmongainta	551
2 Tımoteo ingante Pabodo cadota ante ayænta nänö yewæmongainta	562
Tito ingante Pabodo cadota ante nänö yewæmongainta	570
Pidemöö ingante Pabodo cadota ante nänö yewæmongainta	576
Ebedeoidi inänite cadota ante näni yewæmongainta	578
Tantiago cadota ante nänö yewæmongainta	610
1 Pegodo cadota ante nänö tänota yewæmongainta	620
2 Pegodo cadota ante nänö ayænta yewæmongainta	631
1 Wäö cadota ante nänö tänota yewæmongainta	637
2 Wäö cadota ante nänö ayænta yewæmongainta	647
3 Wäö cadota ante nänö tömanta yewæmongainta	649
Codaa cadota ante nänö yewæmongainta	651
Wäö ingante Itota Codito Nänö Odömongainö	655



Wəngonguĩ nānō Apānegainō

New Testament in Waorani (EC:auc:Waorani)

Language: Waorani

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2009 Wycliffe Bible Translators, Inc.

Copyright © 2009 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

cfdaed6a-a839-5d8d-8534-cff15a210dff

ISBN: 978-1-5313-0061-6

Itota Codito ingantedö ante

Mäateo

nänö watapæ ante yewæmongainta

Itota Codito wæmäidi

(Odoca 3.23-38)

1 Nê Ponguingä, ante dodäni nani nê angaingä inömö Itota Codito inongä ingampa. Tömengä inömö Abadäo wodi päingä nê ingaingä inte Awënë Dabii wodi päingä mönö inongä ingacäimpa. Tömengä wæmäidi iimaï ëmongadänimpa, ante yewæmonte ongompa.

² Abadäo wodi wengä Itæca ëñagacäimpa.

Ayæ wææ Itæca wodi wengä Aacobo ëñagacäimpa.

Ayæ wææ Aacobo wodi wënäni Oodaa nani caipæ ëñagadänimpa.

³ Ayæ wææ Oodaa wodi Tämata ingante monte Pade tönö Dada inate tapæigacäimpa.

Ayæ wææ Pade wodi wengä Etedöö ëñagacäimpa.

Ayæ wææ Etedöö wodi wengä Adäma ëñagacäimpa.

⁴ Ayæ wææ Adäma wodi wengä Äminadabo ëñagacäimpa.

Ayæ wææ Äminadabo wodi wengä Näatöö ëñagacäimpa.

Ayæ wææ Näatöö wodi wengä Tädämöö ëñagacäimpa.

⁵ Ayæ wææ Tädämöö wodi pæte Adacaba ingante möninque Boodo ingante tapæigacäimpa.

Ayæ wææ Boodo wodi pæte Odoto ingante monte Obedo ingante tapæigacäimpa.

Ayæ wææ Obedo wodi wengä Yæte ëñagacäimpa.

⁶ Ayæ wææ Yæte wodi wengä Dabii ëñate pædinque awënë odeye bagacäimpa.

Ayæ wææ Dabii wodi pæte Odiya wodi nänöogängä iningä ingante möninque Tadömöö ingante tapæigacäimpa.

⁷ Ayæ wææ Tadömöö wodi wengä Doboäo ëñagacäimpa.

Ayæ wææ Doboäo wodi wengä Abiya ëñagacäimpa.

Ayæ wææ Abiya wodi wengä Ata ëñagacäimpa.

⁸ Ayæ wææ Ata wodi wengä Ootapato ëñagacäimpa.

Ayæ wææ Ootapato wodi wengä Oodäo ëñagacäimpa.

Ayæ wææ Oodäo wodi wengä Otiya ëñagacäimpa.

⁹ Ayæ wææ Otiya wodi wengä Ootäo ëñagacäimpa.

Ayæ wææ Ootäo wodi wengä Acadæ ëñagacäimpa.

Ayæ wææ Acadæ wodi wengä Etequiya ëñagacäimpa.

¹⁰ Ayæ wææ Etequiya wodi wengä Mänatee ëñagacäimpa.

Ayæ wææ Mänatee wodi wengä Ämöö ëñagacäimpa.

Ayæ wææ Ämöö wodi wengä Ootiya ëñagacäimpa.

¹¹ Ininque Ootiya wodi quëwengäñedë idægoidi inänite babidöniaini ponte ö æ gobæ wabæca mäodäni gogadänimpa.

Ayæ wææ Babidöniabæ nani goyedë Ootiya wodi wënäni Eecöniya nani caipæ ëñagadänimpa.

¹² Mänii Babidöniabæ ö ænte godäni ate ayæ wææ Eecöniya wodi wengä Tadatiedo ëñagacäimpa.

Ayæ wææ Tadatiedo wodi wengä Dodobabedo ëñagacäimpa.

¹³ Ayæ wææ Dodobabedo wodi wengä Abiodo ëñagacäimpa.

Ayæ wææ Abiodo wodi wengä Ediaquimö ëñagacäimpa.

Ayæ wææ Ediaquimö wodi wengä Atodo ëñagacäimpa.

¹⁴ Ayæ wææ Atodo wodi wengä Tadoco ëñagacäimpa.

Ayæ wææ Tadoco wodi wengä Aquii ëñagacäimpa.

Ayæ wææ Aquii wodi wengä Ediodo ëñagacäimpa.

¹⁵ Ayæ wææ Ediodo wodi wengä Edeadado ëñagacäimpa.

Ayæ wææ Edeadado wodi wengä Mäatäo ëñagacäimpa.

Ayæ wææ Mäatäo wodi wengä Aacobo ëñagacäimpa.

¹⁶ Ayæ wææ Ootee wodi ingante Aacobo tapæigacäimpa.

Ayæ Ootee wodi ëñate pæte wææ Itota badä inguingä ingante Mäadiya ingante mongacäimpa.

Mäadiya ingante mongä ate tömengä wæætë Itota ingante mangacäimpa. Tömengä iñömö Awënë bacæcäimpa, ante cædinqe Wængongui oginguipæ gao cæcä ate edæ, Codito, ante nänö në pemongaingä ingacäimpa.

¹⁷ Mänömai i incæ Abadäo wodi pæinäni wææ nänömoidi wææ, önompo tipæmpoga wææ mempoga go mempoga mänimpoga näni yebæñedë ate Abadäo wodi pæingä Dabii ëñagacäimpa. Ayæ wææ Awënë Dabii wodi pæinäni wææ nänömoidi wææ, önompo tipæmpoga wææ mempoga go mempoga mänimpoga näni yebæñedë ate Oodeoidi inänite wabæca Babidöniabæ ænte gogadänimpa. Ayæ Babidöniabæ ænte godäni ate tömënäni pæinäni wææ nänömoidi wææ, önompo tipæmpoga wææ mempoga go mempoga mänimpoga näni yebæñedë ate mönö Codito nänö ponguinge ëñagacäimpa.

Itota Codito ëñacampa

(Odoca 2.1-7)

¹⁸ Itota Codito iimai ëñagacäimpa. Wäänä Mäadiya wodi nänö baquecänedë Ootee wodi tömengä ingante do, Monguimo, angä ëñëningä inte ayæ mönämai iñongante Wængongui Tæiyæ Waëmö Önöwoca angä ëñëninge do yædëmadä bacä adänitapa.

¹⁹ Yædëmadä ingä adinqe Ootee cöwë nö cædongä inte, Pïinte änäni wæcæ wæ, ante wædinqe, Awëmö pango cæcæboimpa, ante pönengantapa.

²⁰ Ante önöwënenque pönëninge möwocodë wiimöñongä Wængongui tömengä anquedo ingante da pönongä pöninqe anquedo iñömö iimai angantapa. “Ootee, Awënë Dabii pæimi inömi inte bitö nänöogängä Mäadiya ingante guiñënamai æncæbiimpa. Tömengä iñömö Wængongui Tæiyæ Waëmö Önöwoca angä ëñente beyænque ënengä adinqe bitö iñömö tömengä ingante ee moncæbiimpa. ²¹ Tömengä Wëñängä onguinängä ingante mancæcäimpa. Mangä pæcä ate tömengä iñömö, Botö guidëmini mini wæquinqe wënæ wënæ cæminipa, ante adinqe botö æmo beyænque quëwencæminimpa, ante cæcæcäimpa cæbii. Bitö tömengä ëmöwo ante, Në Ængä iñongä ingampa, ante Itota pemoncæbiimpa,” ante anquedo Wængongui nänö në da pönöningä ponte Ootee ingante angacäimpa.

²² Iininqe Wængongui beyæ në apænegaingä iimai ante nänö yewæmongainö bai ante iinque batimpa.

²³ “Baquecā incæ yædēmadā badinque

Wēñængā onguīñængā ingante mancæcāimpa.

Mangā ēñacā adinque tōmengā ěmōwo, ěmānoedo, ante godō pemoncædānimpa.”
Ante nāni yewæmongainō bai cædinque tōmengā ěmōwo, “Wængonguī mōnō weca quēwengampa,” ante, ěmānoedo, ante pemonte inongāimpa.

²⁴ Ootee māniī wīimonte nāni ōmæmongā ate Wængonguī nānō da pōnōningā anquedo nānō āmai ēñente cædinque oncōnē ænte gocā incæte guēa mōnāmai ingadaimpa. ²⁵ Edæ bamoncadengā ēñacā ate, Itota, ante pemonte ate tōmēna māniñedē ate guēa mongadaimpa.

Nē ēñēnāni Itota weca ēñacæ pōnānipa

2 Itota Bedēē nāni quēwēñōmō ēñacā ate māniñedē edæ Edode Oodeabæ awēnē odeye nānō iñedē edæ nē nō ēñēnāni gobæ nænque tamōnō quēwēnāni inte Edotadēē pongadānimpa. ² Ponte āninque,

—Oodeo Awēnē Odeye iñōmō nōwocā ēñadingā iñōmō æyōmōnō owocāā, ante ēñencæte ante wæmōnipa. Edæ nænque tamōnō quēwēñōmōni Awēnē nēmō ta ñongæ adinque mōnitō tōmengā weca ædæ wææninque edæ, Bitō Wængonguī imidō anguēnē, ante watapæ apæneceæ pōmōni imōnipa, ānānitapa.

³ Ayæ, Wacā Awēnē Odeye ēñacampa, ante tededāni ēñente wædinque māniōmæ tōmāmæ awēnē odeye Edode wæætē pīinte bayongā Eedotadēē quēwēnāni tōmānāni tōmengā tōnō godongāmæ guīñente wædānitapa. ⁴ Īninque, Wængonguī quī, ante nē godōnāni nænænāni tōnō Wængonguī nānō wææ angainō ante nē odōmōnāni tōnō tōmānāni inānite Edode āñecā godongāmæ pōnānitapa. Pōnāni ate tōmengā, Codito nāni angaingā iñōmō æyōmōnō ēñaquingāā, ante æbānō yewæmonte ōñō amīni. ⁵ Āñongante,

—Oodeabæ iñōmō Bedēē nāni quēwēñōmō māniñōmō ēñacæcāimpa, ante Wængonguī beyæ nē apæneceā incæ iīmai ante yewæmongacāimpa, ante apænedānitapa.

⁶ “Oodabæ awēnē gobedōnadodoidi tæiyænāni iñōnāni mīnitō adobæca Oodabæ quēwēninque Bedēē iñōmō mīni quēwencabo iñōmō mēa pōni imīni incæte edæ wīi ōnōmīnique incæmīnimpa.

Īñæmpa Wēñængā adocanique ēñate pædinque nē Awēnē bate taodinique nē aacā bai inongā inte botō guidēnāni idægoidi inānite aacæcāimpa.”

Ante yewæmongā amōnipa.

⁷ Ante apænedāni ēñente wædinque Edode wæætē nē nō ēñēnāni inānite awēmō āñete pōnāni ate, Nēmō æyedēnō mā pōni tamō amīnitawo. Āñongante tōmēnāni, Māniñedē tamō atamōnipa, ante apænedāni. ⁸ Ēñēninque Edode iñōmō,

—Mīnitō wæætē Bedēē iñōmō māo nē ēñadingā ingante diqui diqui mīnte aedāni. Tōmengā ingante adinque wæætē adodō pōninque apænemīni ēñēmoedāni. Edæ mīnitō gote æbānō wēñæ ingante apænemīni bai botō adobai edæ gote ædæ wææninque edæ, Wængonguī Awēnē imidō anguēnē, ante watapæ apæneceæte ante āmopa, ante Edode ōnonque ante pōnēninque apænegacāimpa.

⁹ Angā ēñēninque nēmō nē adīnāni iñōmō Bedēē taadō gote æmō ayōnāni edæ ado nēmō tōmēnāni nænque tamōnō quēwēninque nāni adīmō incæ wo go adinque edæ tē wocā goyōnānite nēmō Wēñæ owoyōmō oncōmanca tæcædæca inō næ gongæ adānitapa. ¹⁰ Adinque tōmēnāni edæ, Mōnō acæ pōnongā iñōmō ongongampa, ante pōnēninque watapæ togadānimpa. ¹¹ Māniī nāni adincōnē go guīte ayōnāni

Wēñængä iñömö wäänä Mäadiya tönö ongongä adinque tömēnāni Wēñængä weca ædæ wææninqe, Bitö Wængongui Awēnē imidö anguēnē, ante watapæ apænedāni-tapa. Ayæ tömēnāni nāni ænte pōnincoo wi æmpodinqe oodo tönö ogui waa qui tönö tī nā ōni pæqui tönö, Bitö qui impa, ante pædæ godōnāni ængacäimpa. ¹²Idæwaa adinque tömēnāni möwocodē wīimōñōnānite wacä ponte apænecantapa. Mīnitö awēnē Edode weca ocæ emænte godāmai iedāni, angä ēñēninque tömēnāni wæætē yaatænque godinque tömēnāni omæ wadæ gogadānimpa.

Ooteidi Equitobæ wodii wīnōnānipa

¹³Godāni ininque edæ Ootee wīimōñongä Wængongui anquedo ingante da pōnogä ponte apænedinqe, “Edode do Wēñængä ingante wænoncæte ante diqui mincæcäimpa cæbii. Ængæ gantite Wēñængä nāna badancaya inate ö ænte Equitobæ wodii goe. Ayæ gote quēwēñōmīni botö ämo ate pōedāni,” angä.

¹⁴Ēñēninque Ootee tömengä nānō wīimōönæ ayaönænēña incæ ængæ gantidinqe Wēñængä nāna badancaya inate ö æninque edæ Equitobæ gocantapa. ¹⁵Godinque Ootee nāni wencabo iñömö Edode nānō wænguinganca quēwēncæ gogadānimpa. Go quēwēnāni ininque mōnō Awēnē Wængongui iīmai ante nānō apænegainö ante iinque batimpa. “Botö Wēñængä Equitobæ quēwēñongante añebo pongantapa,” ante Wængongui beyæ nē apænecä nānō yewæmongainö bai edæ do iinque batimpa.

Wēñænāni inānite Edode angä wænōnāni wænānipa

¹⁶Edode guiquēnē, Nēmö nē nō ēñēnāni botö āninö ante ēñēnāmai inte dæ godānipa, ante adinque edæ ængui bacantapa. Ængui badinque tömengä, Wēñænāni inānite māo wænōedāni, angantapa. Āninque tömengä, Mēa wadepo iñonte nēmö ta atamōnīpa, ante nē ēñēnāni nāni ānimpoga ante pōnēninque, Mēa wadepo ēñadīnāni tönö ayæ ēñadīnāni tönö Bedēē quēwēnāni incæ Bedēē eyequei quēwēnāni incæ onguīñænānique inānite māo wænōedāni, angantapa. Īninque nē wænōnāni wæætē awēnē nānō adīnānique inānite capo ado tedæ wænōnāni wængadānimpa. ¹⁷Wænāni wædāni ininque Wængongui beyæ nē apænegaingä Eedēmiya wodi iīmai ante nānō angainö bai edæ iinque batimpa.

¹⁸“Nāmaa nāni quēwēñōmö nē Ca ca wæwēnā nānā Ca ca wæpāmo ēñēnānitapa.

Wäänä nē Yæ yæ ānōnā inte,

Daquedä iñömö, Botö wēñænāni, ante wædä ēñēnānitapa.

Dæ ānāni pōnente wædinque wäänä ædö cæte piyænē cæquinää,”

ante Eedēmiya wodi yewæmongacäimpa.

¹⁹Ayæ ate awēnē Edode wængä ininque Ootee iñömö Equitobæ ayæ quēwēninque wīimōñongä Wængongui anquedo ponte a ongōninque tömengä ingante apænecantapa. ²⁰“Ootee ēñēmi. Wēñængä ingante wænoncæ ānōnāni incæ dobæ wænānipa cæbii. Ængæ gantite Wēñængä nāna badancaya inate Idægobæ adodö ænte gocæbi-impä,” angä.

²¹Ēñēninque Ootee iñömö edæ ængæ gantidinqe nāna badancaya inate Idægobæ adodö ænte gocantapa. ²²Māniñedē wæmpo Edode wængä ininque, Wæætē tömengä wengä Adoquedao Oodeabæ awēnē odeye bacantapa, ante tededāni ēñente wædinque Ootee iñömö, Botö Oodeabæ ædö cæte wæætē goquīmoo, ante guiñente wæcantapa. Wæætē tömengä möwocodē wīimōñongä wacä angä ēñēninque Oodeabæ wodo tebæ godinque Gadideabæ gocantapa. ²³Godinque Ootee nāni wencabo

Näatadeta ponte quëwënanitapa. Ìninqe, Näatadëno ingampa, ante pemoncädän-
impa, ante Wængonguï beyä nê apënegaingä nänö angainö bai cædinqe wadäni
ñöwo mönö Codito ingante, Näatadëno, ante pemonte bai apënegadänimpa.

Wäo önömæca ponte apëneçä ëñënanipa

(Mäadoco 1.1-8; Odoco 3.1-9, 15-17; Wäo 1.19-28)

3 Mäniñedë Wäo mönö nê apëne guidönongä inte Oodeabæ önömæca ponte
apëneçä ëñengadänimpa. ²Ponte apënedinqe tömengä, “Öönädë Awënë
incæ inguipoga tömämæ Awënë Odeye bacæcäimpa cæminii. Minitö wënæ wënæ
cædinö ante, Anca wæwente awädö, ante ñimpo cædäni,” ante Wäo apëneçä
ëñënanitapa.

³Mänömainö ante nê apëneçä ingantedö ante Wængonguï beyä nê apënegaingä
Itaiya wodi iimaï ante do yewæmongacäimpa.

“Önömæca iñömö adocanque ogæ tedete aa pecæcäimpa.

‘Awënë nänö ponguinö ante minitö tee moncate bai cædäni.

Taadö töinö pinonte bai cædinqe minitö wënæ wënæ mini cædinö ante edæ wido
cædäni,’ ante aa pecä ëñengäimpa,”

⁴Ante Itaiya wodi nänö nê angaingä inte Wäo ñöwo pongantapa. Tömengä weo-
coo ante cämeyo ocaguincoo nonte badonte wëñate mongëninque pacadeyænta
ante æmontai badonte encadeyænongåimpa. Tömengä cænguï ante ñäwäique cæn-
inqe tömengä bequï ante guïñëmænque ade bete quëwënongåimpa. ⁵Quëwëñongä,
Eedotadë quëwënanii tönö Oodeabæ tömäo quëwënanii tönö Oododänonga biyönæ
tömäo quëwënanii tönö tömengä weca tate bee téninqe änänitapa. ⁶Bitö ämaï
näwangä wënæ wënæ cæte quëwëmöni inte wæmönipa, ante wädäni ëñëninque
Wäo Oododänö apëne guidongä guiidänitapa.

⁷Ayæ Paditeoidi tönö Tadoteoidi guiquënë Wäo nänö guidöñömö pönäni adinqe
tömengä ayæ wæætë tömënanii inänite angantapa. “Tæntæ pæimini bai inömini inte
minitö iñömö ëñënamäi cæte quëwëminipa. Oo pönii wænompadäni, ante æcänö
wææ angä ëñëninque wodii winonte pöminii. ⁸Ïnæmpa Wængonguï Awënë gämænö
minitö dicæ ocæ ëmænte poncæ cæminiyaa. Nö cæte pömini ininqe minitö nê
ocæ ëmænte pönäni nänii waa cædö bai adobaï waa cædäni. ⁹Ayæ nämä wææ än-
inqe, ‘Mönitö adomönique docä Abadäo wodi pæimöni inte möni quëwenguinque
imönipa,’ ante mini tedewëno ante pönënamäi inguënë quëwëminii. Ïnæmpa Wæn-
gonguï, Botö pæinänii bacädänimpa, angä bai dicæcoo incæ dobæ tömengä pæinänii
bai bacädönimpa. ¹⁰Edæ awæ yecæte ante awænca nänii mä yequinca eyewa pönii
näænänii bai Wængonguï nänö panguinca næænte bai do edæ a ongongampa.
Tömengä wainca ante a ongöñongä ömæcawæ bai wii pönente cædäni adinqe
awæncaca wægo yete godö gongapamö iya tante bai cæcæcäimpa, ante ämo
ëñëmaimäinipa.”

¹¹Ayæ, “Minitö wënæ wënæ mini cædinö ante wido cæcæminimpa, ante cædinqe
botö minitö iminite apëne guidömo guimäinipa. Incæte botö mänömaï cæbo ate
wacä ayæ poncæcäimpa. Tömengä iñömö täi ëmongä ewocadongä iñongante botö
wæætë wädämo inömo inte tömengä awæncata incæ ædö cæte godö ænte nææmäi-
moo. Tömengä da pönongä pöninqe Wængonguï Tæiyæ Wæmö Önöwoca incæ pö
guidinque minitö mimö mënongacæcäimpa. Ayæ minitö wënæ wënæ cædinö ante
gonga tante bai tömengä cæcæcäimpa. ¹²Waocä, Todigo tömëmö wati wati täñön-

inque botō tǣnōnīñōmō ōnōmancaque baquinque botō apǣnte ænīnque waiña tōmāmō oncōnē da wencæboimpa, ante timpodæ nǣante wo æantodō wo æantodō cædinque ontapocoo wǣæincoo wadæ ñēmænte wo ewengampa. Waocā mānōmaī wo ewencæte ante timpodæ nǣængā bai mōnō nē Ponguingā iñōmō adobaī oo pōnī apǣnte ancæcāimpa. Todigo waiñacooque oncōnē da wente nē mangā bai tōmengā adobaī nē waēmō iñāni iñānite apǣnte ængā ate tōmēnāni tōmengā nempo guiicædānimpa. Wǣætē wadæ ñēmænte wo ewente bai cædinque tōmengā nē ontapocoo wǣæincoo bai iñāni iñānite cōwē bæcoyōmō iya tangā gonte wæcædānimpa,” ante Wāō apǣnegacāimpa.

Itota æpǣnē guicampa

(Māadoco 1.9-11; Odoca 3.21-22)

¹³ Wāō ayæ apǣneyongā Itota iñōmō Gadideabæ quēwēnīnque, Wāō botō imote æpǣnē guidongā guicæboimpa, ante cædinque Oododānonga pongantapa. ¹⁴ Ponte, Guidōmi guiboē, āñongante Wāō wǣætē wææ ānīnque,

—Botō waēmō imopa diyæ bitō imite guidōmo guiquimii. Bitō wǣætē botō imote guidōmi guibo bai waa incædōnimpa.

¹⁵ Ante wæyongante Itota wǣætē,

—Cōwē ee cæbi, āmopa. Wængonguī nānō ānō ante tōmānō ēñente nō cæmō inguēnēmō imopa.

Ante apǣnecā ēñēnīnque Wāō Ao ante ee guidongā guigacāimpa. ¹⁶ Guiite æpǣdo tao gongǣnte æmō ayongā iñontobæ oōnæ incæ wēā godōmonte bayō Wængonguī Ōnōwoca incæ equemō wææ bai tōmengāa wææ pō guicā acantapa. ¹⁷ Wææ guicā ayongā edæ oōnædē iñō apǣnedīnque, “Māningā iñōmō botō Wēñængā iñongā inte botō nē waadecā ingampa. Tōmengā ingante adīnque botō watapæ to-bopa,” ante oōnædē iñō apǣnecā ēñengacāimpa.

Itota incæ wēnæ wēnæ cæcæcāimpa, ante wēnæ cæcampa

(Māadoco 1.12-13; Odoca 4.1-13)

4 Ayæ māniñedē edæ, Itota iñōmō wēnæ angā ēñente æbānō cæquingāā, ante Wængonguī Ōnōwoca incæ Itota ingante ōnōmæca mæicā æigacāimpa.

² Æi quēwēnīnque tōmengā wantǣpiyæ coadenta ēōnæ mānimpoōnæ itædē woyotæ cænāmaī quēwēnīnque gue ænente wægacāimpa. ³ Gue ænente wæyongā wēnæ awēnē, Wēnæ wēnæ cæe, ante nē ānewengā iñongā inte Itota weca pōnīnque,

—Bitō Wængonguī Wēmi imitawo. Nāwangā i iñīnque dica incæ pāō āmi ba cæmāimipa.

⁴ Āñongante Itota iñōmō,

—“Cænguinque cænte ædō cæte quēwēnguīi. Wængonguī nānō apǣnedō tōmāne ēñente cædinque waocā cænguī cænte bai quēwencæcāimpa.” Mānōmainō ante Wængonguī beyæ yewæmonte ongō apa ānewēē, ānīnque Baa angantapa.

⁵ Wēnæ awēnē ayæ Itota ingante Eedotadēē tǣiyæ waēmō nāni quēwēñōmō ænte māocā gocantapa. Ayæ Wængonguī oncō ñānænconga wænōmēnæca ænte mæi gōnongā næ gongængantapa. ⁶ Næ gongæñongante wēnæ awēnē wǣætē,

—Bitō Wængonguī Wēmi imitawo. Nāwangā i iñīnque bitō to wæibi ate dodāni iimāinō ante nāni yewæmongāinō bai iīnque ba abaimpa.

“Bitō beyæ ante cædinque Wængonguī tōmengā anquedoidi iñānite angā pōnīnque,

tömənäni bitö imite wææ aate iñæ æmpodäni ate
bitö dicaa tee tēwadāmaï incæbiimpa,”
ante yewæmonte ongompa cæbii.

⁷ Æñongante Itota,

— Æñæmpa godömenque ante yewæmongatimpa. “Bitö Awënë bitö Wængongui iñongante bitö wæætē edæ, ‘Æñēnāmaï cæbo incæte mönō Awënë Wængongui æbänō cæqinggää,’ ante acæte ante cædāmaï incæbiimpa,” ante adobaï wææ yewæmonte ongō apa ænewēē, ante Itota angantapa.

⁸ Ayæ wæætē wēnæ awënë Itota ingante æibæ pōni onquiyaboga mæicä æcantapa. Æi ongōñongä wēnæ awënë iñömō awënë odeye ömæcoo inguipoga tömäo ongōñömæcoo adoyömō a ongonte baï ado tedæ odömöninque awënë odeyeidi waa pōni nāni emönō adobaï odömongä acantapa. ⁹ Itota ingante apænedinque wēnæ awënë,

— Bitö botö weca ædæ wææninque, Tatänabi bitö Wængongui Awënë baï iñömi imipa, ante watapæ apænebi æñemoe. Mänömainö ante apænebi æñēninque botö wæætē, Mäniömæ tömäo ongōñömæ pönömo æninque bitö tömämae Awënë babaimipa, ante wēnæ incæ ænewengantapa.

¹⁰ Ænewēñongante Itota wæætē,

— “Bitö Awënë Wængongui weca ædæ wææninque tömengä ingante, Bitö Wængongui imidö anguënë, ante watapæ apænebiimpa. Ayæ tömengä adocanque ingante nē cæbi incæbiimpa,” ante Wængongui beyæ yewæmongatimpa cæbii. Botö weca ongönāmaï gobæwe, angantapa. ¹¹ Angä go ate Wængongui tömengä anquedoidi pöninque Itota beyæ pönö waa cægadänimpa.

Gadideabæ ponte Itota mä apænecampa

(Mäadoco 1.14-15; Odoca 4.14-15)

¹² Ayæ quēwēñongä, Wäö ingante dobæ tee mönedänipa, ante tededäni æñente wædinque, Itota wæætē Gadideabæ wadæ gogacäimpa. ¹³ Wadæ godinque tömengä Näatadeta ponte wodo pænta godinque godömenque go gäwapæ yæwedeca Tabodöoidi tönö Nempatadiidi nāni owogaimæ iñömō pöninque edæ Capēnaömō nāni quēwēñömō ponte quēwengantapa. ¹⁴ Itota mäniñömō ponte quēwengä iñinque Itaiya wodi Wængongui beyæ nē apæneca nänö angainö baï mäniñedē iñinque batimpa.

¹⁵ “Tabodöömæ tönö Nempatadiibæ ingaiñömō,

Gäwapæno gämænö godö,

Oododänö æmæmäa iñömō,

Gadideabæ iñömō wii oodeoidi wadäni nāni quēwēñömō impa.

¹⁶ Nē æñēnāmaï ināni wēmō iñömō contayönäni,

tömənäni weca ñäo guinæ tamö baï adänitapa.

Tömənäni nāni wænguimämo oo iñonte wēmō iñömō contayönäni,

mönö Codito ñäo emongä inte do pongä adänitapa.”

Ante Itaiya wodi nänö yewæmongainö baï ante cædinque Itota mäniñömō ponte apæneca æñēnänitapa.

¹⁷ Itota mäniñedē iïmaï ante mä apæneca æñēnänitapa. “Öönädē Awënë incæ inguipoga tömämae Awënë Odeye oo bacæcäimpa cæminii. Minitö wēnæ wēnæ cædinö

ante, Ancaa wæwente awædö, ante pönente ñimpo cædäni,” ante cöwë apæneccä ëñengadänimpa.

Në gæyæ dadöwënäni inänite Itota aa pecampa

(Mäadoco 1.16-20; Odoca 5.1-11)

¹⁸ Ayæ mäniï pöningue Itota gäwapæ Gadideapæ yæwedeca gote cægonte ayongä Timönö Pegodo nani änongä tönö Æntade nana caya inate acantapa. Në gæyæ dadöwëna inöna inte tömëna ñowo dicamöñæ æpænë wo guitodonte dadöwëñöna Itota gote acantapa. ¹⁹ Tömëna inate Itota,

—Inäna, botö miñæ edæ tee empo pöeda, ämopa. Në dadonte ænte pömïna inte botö weca pönöminate botö pönö cæbo ate minatö wæætë në apænemïna badinque waodäni inänite në ænte pömïna bacæminaimpa, angantapa.

²⁰ Angä ëñëningue tömëna dicamöñæ do ëmö cæte godinque Itota miñæ edæ tee empo wadæ godatapa.

²¹ Mänïñömö ongonde wadæ godinque Itota wada inate Tebedeo wëna Tantiago tönö Wäö nana caya inate acantapa. Tömëna mæmpo tönö wipodë ongonde dicamöñæ tadömoncöna adinque Itota tömëna inate, Botö miñæ pöeda, angä.

²² Æñëningue tömëna Ao äninque Tebedeo wëna Tantiago tönö Wäö wæmpocä ingante wæætë, Mæmpo ëñëmi, änatapa. Në cædäni tönö wipodë owote cæyöminite mönatö bitö imite ëmö cæte godinque Itota miñæ gomönapa, äninque adodaque wadæ gogadaimpa.

Tæiyænäni inänite Itota odömonte apæneccä ëñënanipa

(Odoca 6.17-19)

²³ Ayæ Gadideabæ tömämæ godinque Itota iñömö Wængonguï apæneccä nani ëñente yewæmongainta ate odömöincönë go guite odömonte apænegacäimpa. Öönädë Awënë incæ inguipoga tömämæ Awënë oo badinque waa cæte aacæcäimpa, ante apæneccä ëñengadänimpa. Ayæ waodäni wënæ wënæ inte nani wæwënö ante ayæ quïëmë beyæ wæncæ cæte wædäni incæ Itota tömënäni nani wædö ante pönö cæcä ate tömänäni waa badänitapa. ²⁴ Adinque, Itota mänömaï cæcampa, ante Tidiabæ tömämæ gode änäni ëñëningue waodäni pöningue në wënæ wënæ inte wæwënäni inänite tömengä weca ænte pönänitapa. Ayæ nantate wæwënäni tönö wënæ inte quëwënäni inänite ænte pöningue dowante inäni tönö cömäinäni inänite tömengä weca ænte pönäni adinque tömengä godö cæcä ate në wënæ wënæ inänäni inte tömänäni waa bagadänimpa.

²⁵ Ayæ Gadideabæ quëwënäni tönö Decapodibæ quëwënäni pönönäni wadäni Ee-dotadë quëwënäni tönö Oodeabæ quëwënäni ayæ Oododänö æmämäa quëwënäni tæiyænäni pöningue tömengä miñæ tee empote gogadänimpa.

Itota änanquidi æite apæneccä ëñënanipa

5 Tæiyænäni pönäni adinque Itota iñömö änanquidi æi tæ contayongä tömengä miñæ në godäni pönäni. ² Ate tömengä iñæ ænete nanguï tedete iïmaï ante odömonte apæneccä ëñengadänimpa.

Waočä iïmai cæte watapæ tote quëwencæcäimpa, ante

(Odoca 6.20-23)

³“Waočäni, Botö waëmö ewocabopa diyæ öönædë Awënë weca go guiquimoo, ante në wædäni iïömö tömënäni nani watapæ toquinque edæ öönædë Awënë Odeye nempo tömënäni quëwenguinö do ëadänipa,” angantapa.

⁴“Në wæwente quëwënäni iïömö tömënäni nani watapæ toquinque wædänipa. Edæ Wængongui tömënäni inänite waadete godö cæcä ate tömënäni wampo pönencädänimpa.”

⁵“Në gänë pönente ædæmö cæte quëwënäni iïömö tömënäni nani watapæ toquinque edæ inguipoga tömämæ æninque awënëidi bai bacädänimpa.”

⁶“Wængongui nö pönäi nänö entawënö bai adobai entawencæboimpa, ante æcänö cængui cæinente bai wæda, æcänö tepæ gæwænte bai wæda tömënäni iïömö nani watapæ toquinque wædänipa. Edæ tömënäni tömo cænte bai Wængongui nänö nö entawënö ænte ædæmö entawente tocädänimpa,” ante Itota apænecantapa.

⁷“Wadäni quëwencädänimpa, ante në godö waadete waa cädäni iïömö tömënäni nani watapæ toquinque cädänipa. Edæ mänömai në cädäni inänite wadäni wæætë, Quëwencæminimpa, ante näëmæ apænedinque godö waadete waa cæcädänimpa.”

⁸“Mimö nãö bai në entawënäni iïömö tömënäni nani watapæ toquinque edæ Wængongui ingante do acädänimpa,” ante apænecantapa.

⁹“Guëadö guëa piinämai iedäni, ante në wææ wææ änäni iïömö tömënäni nani watapæ toquinque edæ wææ änänipa. Tömënäni inänite wadäni edæ, Minitö Wængongui wëñämäni iminipa, ante do apænedäni ënente tocädänimpa.”

¹⁰“Nö cädäni beyænque wadäni piinte pänäni në wæwënäni iïömö edæ tömënäni nani watapæ toquinque wæwënänipa. Tömënäni öönædë Awënë Odeye nempo nani quëwenguinö edæ do ëadänipa.”

¹¹“Wadäni botö beyæ piinque minitö iminite babæ ante änänitawo. Minitö iminite edæ togænte pänänitawo. Inique edæ mini watapæ toquinque impa. Ayæ, Në wiwa cæmini iminipa, ante wadäni piinte anewënäni wæmini inique edæ mini watapæ toquinque impa. ¹²Edæ, Öönædë mönö ænguino ante nangui ongompa, ante pönëninque minitö nõwo wadäni nani piinte cæyedë incæ watapæ toedäni. Edæ minitö iminite piinte pänäni bai minitö ayæ dæ änedë Wængongui beyæ në apænecänäni inänite adobai piinte pangadänimpa, ante toquënë wæwëminii,” ante Itota odömonte apænecäcäimpa.

Cati bai iminipa. Nãö bai iminipa, ante

(Mäadoco 9.50; Odoca 14.34-35)

¹³Godömenque apænedinque Itota, “Minitö iïömö inguipoga quëwënäni beyæ cati quimonte cæi bai inte ongöminipa. Inique minitö cati bai yæpæ emonte bai inömini inte wæætë edæ nongæmonte bai badämai iedäni. Cati iïömö yæpæ emönämai nongæmonte ba adinque edæ æbänö cæte wæætë yæpæ waa emonguii. Waa impa cænguinäni angüënë. Iñæmpa wido cæte nani pinä gawate cægonquinque babaimpa,” ante odömonte apænecantapa.

¹⁴Ayæ, “Nãö bai emömini inte minitö iïömö edæ inguipoga quëwënäni beyæ tica enente bai cædinque, Edonque acädänimpa, ante cæmini iminipa. Änanquidi tæiyänäni mænonte quëwënäni inique edæ ædö cæte wë womonte inguii. Edæ

edonque abaimpa. ¹⁵ Waocä ædö cæte tī wodönote godö cængænë boo cæcaquingää anguënë. Edæ, Mönö quëwencabo edonque acæimpa, ante cædinque waocä tī wodönodique wænömënæcapaa cö cæcä ate edonque bæco aquinäni. ¹⁶ Minitö guiquënë, Wadäni mönö waa cædinö adinque mönö Mæmpo öönædë në quëwengä ñäö bai tömengä nänö ëmönö ante waa ate apænecädänimpa, ante cædinque cöwë ñäö bai pönëninque waa cæte quëwëedäni,” ante Itota odömonte apænecantapa.

Wængonguï nänö wææ angainö ante

¹⁷ Ayæ iïmai ante godömenque odömonte apænecantapa. “Wængonguï, iïmai cædäni, ante Möitee wodi ingante angä ëñëninque tömengä nänö wææ yewæmongainö ante ayæ Wængonguï beyæ në apænedäni näni yewæmongainö ante minitö, Mäninö ante Itota wido cæcæte ante pongampa, ante ædö cæte pönëminii. Iñæmpa wii wido cæcæte ante pönimo inte botö tömënanäni näni angainö bai iinque cæbo bacæimpa, ante pömo imopa. ¹⁸ Edæ näwangä ämopa. Inguipoga tönö öönæ iinque baganca Wængonguï, iïmai cædäni, ante nänö wææ angainö inonte adodeque pönï wë womonte badämai ingæimpa. Edæ guiyä tänoncai incæ picæ yewæmönï incæ adodeque cöwë wadæ cædämai inonte tömengä nänö angainö bai tömänö adodö iinque cæte bacæimpa. ¹⁹ Iinque Wængonguï nänö wææ angainö ante æcänö adodeque pönï ante ëñënämai cæda inömö tömengä inömö edæ öönædë Awënë Odeye nempo quëwengä incæte önonganque pönï inguingänö anguënë. Ayæ adobai Wængonguï nänö wææ angainö adodeque pönï ante odömöninque, Mänine ante ëñënämai cædäni, ante æcänö odömonte apæneda tömengä inömö öönædë Awënë Odeye nempo quëwengä incæte önonganque inguingänö anguënë. Wæætë mäninö Wængonguï nänö wææ angainö ante në ëñente cædinque æcänö adodö ante odömonte apæneda guiquënë tömengä wæætë öönædë Awënë Odeye nempo quëwëninque ñænængä pönï inguingänö anguënë. ²⁰ Incæte minitö iminite iïmai ämopa. iïmai cædäni, ante näni wææ yewæmongainö ate në odömönäni näni cægancaque nö cæminï incæte Paditeoidi näni cægancaque nö cæminï incæte minitö wii godömenque nö cæminï iinque minitö edæ öönædë Awënë Odeye nempo ædö cæte guiite quëwëmaimïni,” ante Itota odömonte apænecantapa.

Piinte näni änö ante Itota odömonte apænecampa

(*Odoca 12.57-59*)

²¹ Mänömainö ante apænedinque Itota godömenque odömonte apænecantapa. “Möitee wodi inömö, ‘Wacä ingante godö wænönämai ië. Në wænongä nänö apænte pante wæquinque impa,’ ante dodäni inänite tömengä nänö wææ angainö ante minitö inömö do ëñëninque Ao äminitawo. ²² Botö inömö edæ godömenque ante nö ämopa. Näni caipæ inönäni æcänö tömengä töninacä ingante piina inömö tömengä nänö apænte pante wæquinque cæcampa. Ayæ tömengä töninacä ingante æcänö, Eñënämai imipa, äna edæ tömengä ingante në Apænte näni Äincabo weca nänö panguinque ænte gönöncädänimpa. Edæ wacä ingante æcänö, Bitö mimö ömädëmi inte wii ëñencädö, ante në äna inömö tömengä tadömengadænguipo gonga bæcoyömö nänö wido cæquinque angampa töö,” ante Itota apænecäimpa.

²³ Ayæ, “Mänömai beyæ bitö, Wængonguï quï, ante näni iya täimoga godoncæte ante tæcæ cædinque, Æ, botö töninacä ingante edæ wënæ wënæ cæbo piingampa, ante pönëmi iinque, ²⁴ bitö godonguincoo näni iya täimoga gäänë nönöninque bitö

töniñacä weca täno gote nö apäneyömi minatö guëa piyänë cæmīna ate bitö iñömö adodö ponte godöe,” angantapa.

²⁵ Ayä, “Bitö imite nē piinte cæcä iñömö nē apænte anguiñani weca gönoncæte ante ænte idömæ goyongä bitö tömengä ingante waa apänebi ëñëninque tömengä wæætë piyänë cædinque ee abaingampa. Edæ taadö godinque guëa waa apänedinque piyänë cædämaï imīna iñinque tömengä iñömö nē awënë apænte anguingä weca ænte mäocä gobaïmipa. Ayä awënë nē apænte angä ingante pædæ godongä æninque tömengä bitö imite wæætë wææ wänongä ingante angä ëñëninque tömengä wæætë bitö imite bæi ongonte do tee mönebaingampa. ²⁶ Tee mönecä iñinque edæ bitö godonte æinta tömanta pöni pædæ godonte tabaïmipa, ante ämo ëñëmaïmipa,” ante Itota apänegacäïmpa.

Näni godö towëmämo ante Itota odömonte apänegacäïmpa

²⁷ Ayä apänedinque, “Möitee wodi, ‘Bitö nänöogængä inämaï iñongante bitö godö mönämaï incæbiïmpa,’ ante nänö wææ angainö ante ëñëninque minitö Ao ämīnitawo. ²⁸ Botö godömenque apänedinque nö ämopa. Onquiyængä ingante wiwa toïnente adingä iñömö tömengä nänöogængä inämaï iñongante do godö monte bai mimö dobæ wentamö entawengampa.”

²⁹ Ayä, “Bitö tömëmö inö incæ adinque wënæ wënæ toïnente babi iñinque tömëmi adimö incæ o togæmonte bai cædinque wënæ wënæ bitö cædinö ante wido cæbi waa imaimpa. Wæætë bitö wënæ wënæ adimö wido cædämaï iñinque bitö baö tömäo tadömengadænguipo wido cæte baquïnö anguënë. ³⁰ Adobai bitö önopoca tömëmæ inö incæ wënæ wënæ cædimi inte tömëmi cædimpo incæ aa wi æmpote bai cædinque bitö wënæ wënæ cædinö ante wido cæbi waa imaimpa. Edæ a wi æmpote wido cædämaï imi iñinque bitö baö tömäo tadömengadænguipo wido cæte baquïnö anguënë,” ante Itota apänegacäïmpa.

Näni pämänte wädö ante Itota odömonte apänegacäïmpa

(Mäateo 19.9; Mäadoco 10.11-12; Odoca 16.18)

³¹ Godömenque odömonte apänedinque Itota, “Ayä, ‘Onquiyængä ingante æcänö pämäñinëna tömengä iñömö yewämöinta ænte yewämöninque, Bitö imite æmäwo pämämpa, ante yewämonte onquiyængä ingante godongä æncæcäïmpa,’ ante dodäni näni angainö ante do ëñëninque Ao ämīnitawo. ³² Botö edæ wadö ante iïmaï ante nö ämopa. Onquiyængä awëmö todämaï ee quëwëñongante tömengä nänöogængä godö pämängä iñinque onquiyængä nē towengä nänö baquinque wacä ingante godö möwengampa. Ayä onquiyængä pämänte goyongä wacä onguïñængä tömengä ingante godö möninque adobai nē towengä bacampa, ante apänebo ëñëmaïminipa,” ante Itota apänegacäïmpa.

Cöwë baquïnö anguënë, ante näni änewënö ante

³³ “Ayä wæætë edæ, ‘Botö Wængongui cöwë quëwengä bai botö äno cöwë baquïnö anguënë, ante ämi iñinque Wængongui ëñengä beyænque bitö äninö ante cöwë cædinque bitö wadö cædämaï incæbiïmpa,’ ante Möitee wodi dodäni inänite angacäïmpa. Minitö iñömö tömengä nänö wææ angainö ante ëñëninque Ao ämīnitawo. ³⁴ Botö wadö ante nö ämo ëñëedäni. Edæ mäninö, Botö äno nöingä baquïnö anguënë, ante änämaï iedäni. Ayä mäninö ancæte ante minitö Wængongui

ēmōwo ante apænedāmaï imīni incæte mīnitō, Öönæ tæï ongō baï impa, ante apænedāmaï iedāni. Ìnæmpa, Öönæ, ante ämīni ìninqe mīnitō Wængonguï öönædē waa pōnī nānō contayōmō ante apænebaïmīni apa änewēmīni. ³⁵ Ayæ Wængonguï êmōwo ante änāmaï ìninqe mīnitō, Ìmæca cōwē ongō baï botō änō cōwē baquīnō anguënē, ante adobaï apænedāmaï iedāni. Ìnæmpa, Ìmæca, ämīni ìninqe mīnitō Wængonguï pī cæwate nānō ongōñōmō ante apænebaïmīni apa änewēmīni. Ayæ, Eedotadēē cōwē ongō baï botō änō cōwē baquīnō anguënē, ante apænedāmaï iedāni. Ìnæmpa Eedotadēē ìñōmō mönō Tæiyæ Awënē Odeye ongongä apa änewēmīni. ³⁶ Ayæ adobaï, Botō änō nöngä baquīnō anguënē, ancæte ante bitō, Tömēmo ocabo tæï ongō baï impa, ante mīni änewënō ante änāmaï ie. Ìnæmpa bitō ocaguï wentamō encabi ìninqe bitō ædō cæte adoguinque pōnī godō cæbi näämænta baquī. Ayæ näämænta encabi ìninqe bitō ædō cæte adoguinque pōnī godō cæbi wentamō baquī anguënē. ³⁷ Ìninqe mīnitō Ao äinēmīni inte ‘Ao’ äninque mäninqe äedāni. Ayæ edæ Baa äinente wædinque ‘Baa’ äninque edæ mäninqe äedāni. Godōmenque äninque mīnitō edæ nē wīwa cædongä angä beyænque äminipa töö,” ante Itota odōmonte apænegacäïmpa.

Näemä wænæ wænæ nāni cædō ante

(*Odoca 6.29-30*)

³⁸ Ayæ godōmenque odōmonte apænedinque Itota, “Ìimaï ante dodāni nāni angainō ante ëñëninque Ao ämīnitawo. ‘Bitō godō cæbi beyæ wacä awinca tæigæmongä bacä ìninqe tömengä näemä cæcä beyænque bitō awinca adobaï tæigæmömi bacæbiïmpa. Ayæ bitō godō cæbi beyæ wacä бага tä tobæ gogacä ìninqe tömengä näemä cæcä beyænque bitō бага adobaï tä tobæ gogacæbiïmpa.’ ³⁹ Botō wæætē wadō ante nō ämo ëñëedāni. Nē wīwa pōnō cæcä ingante näemä cædāmaï iedāni. Edæ wacä bitō tömempaga ìnō pōnō tamongä wædīmi inte bitō wæætē æmæmpaga ìnō dadi ëmæmonte ee ongōmi wæætē tamongæ. ⁴⁰ Ayæ wacä, Bitō ìmite nē apænte angä weca ænte godinque botō bitō weocoo æncæboïmpa, ante cæyongä bitō mänincooque tömengä ingante pædæ godōninque wacoo bitō yabæ mongæncoo tönō ee abi ö æncæcäïmpa. ⁴¹ Ayæ wacä bitō ìmite, Bado, mäninganca mongænte mäobi goboe, angä ëñëninque bitō tömengä nānō äninganca mäobi goyongante ayæ adoganca godōmenque mongænte mäobi gocæ. ⁴² Ayæ nē, Pönōmi æmoe, angä ingante godōmi ængæ. Ayæ wacä, Bitō quinca pönōmi ænte cæte ate wæætē pönōmo æe, ante nē angä ingante bitō pæ gompodāmaï incæbiïmpa,” ante Itota apænegacäïmpa.

Nē piinte änāni inänite waadete cæedāni, ante

(*Odoca 6.27-28, 32-36*)

⁴³ Ayæ apænedinque Itota, “Mīnitō dodāni nāni angainō ante do ëñëninque edæ Ao ämīnitawo. Tömënāni ìñōmō, ‘Bitō guidengä ingante waadete cæe,’ äninque edæ, ‘Nē piingä ingante näemä piinte cæe,’ ante wææ änānitapa. ⁴⁴ Botō ìñōmō edæ wadō ante nō ämo ëñëedāni. Mīnitō ìmīnite nē piinte cædāni inänite mīnitō wæætē waadete cæedāni. Ayæ mīnitō ìmīnite nē togænte pänāni beyæ ante Wængonguï ingante apæneedāni. ⁴⁵ Mänōmaï cædinque mīnitō mönō Mæmpo öönædē nē quëwengä wëñämīni bacæminïmpa. Edæ nē wīwa cædāni beyæ incæ nē waa cædāni beyæ incæ Mæmpo Wængonguï angä nænque tamompa. Ayæ nē nō cædāni

beyä incæ në nõ cædämaï inäni beyä incæ Wængongui angä cöönæ cæpa. ⁴⁶ Minitö guiquënë minitö iminite në waadedänique inänite waadete pönëmini ininque minitö mini cædinö beyä ante dicæ paga ænguiminyaa. Ìnæmpa odömäno awënë beyä në æwënëni incæ minitö waadete pönenganca adoganca cædinque tömënëni inänite në waadete pönënënique inänite waadete pönënënipa töö. Bitö godömenque cæbita-wogaa. ⁴⁷ Ayä minitö töninädanique inänite waadete apænedinque minitö dicæ godömenque cæminiyaa. Ìnæmpa wadäni në, Nämä cæte quëwenguïmo, ante në ëñenämaï cædäni incæ mini cædö bai adoganca cædäni apa quëwëmini. ⁴⁸ Mönö Mæmpo öönädë quëwengä në nõ waa cædongä ingä bai minitö adobai cædinque picæmini badinque nõ waa cæte quëwëedäni,” ante Itota odömonte apænegacäimpa.

Æbänö cæte waa cæquï, ante Itota apænecampa

6 Itota ayä godömenque iïmaï ante odömonte apænegacäimpa. “Minitö edæ, Wængongui nänö änö ëñente nõ cæbote, ante cæminitawo. Ìninque minitö, Waodäni botö imote waa acædänimpa, ante änämaï inte wii waodäni ayönäni cædinque waa cædäni. Edæ, Waodäni botö imote waa acædänimpa, ante pönëninque cæmini ininque mönö Mæmpo öönädë në quëwengä iñömö minitö cædi beyä wæætë pönönämaï imaingampa,” angantapa.

² Ayä, “Wadäni në wadö ante wadö cædäni guiquënë, Ömaadäni inte në wædäni qui, ante pædæ godoncæte ante cædinque, Botö æbänö waa pönï cæboo, ante tömänäni ponte waa acædänimpa, ante pönente todompeta nani ancadeca we we öönänipa. Tömënëni minitö odömöincönë go guiite ongöninque ayä taadö gote cægöninque, Botö waa pönï cæbo aedäni, ante yedæ änäni ëñente godongämæ pönäni ate tömënëni tömänäni ayönäni godönänipa. Bitö iñömö tömënëni nani, Pönö waa acædänimpa, wædö bai wædämaï inte edæ pæ wëenete godöe. Tömënëni waodänique godö waa adäni æninque mäninque ænänipa. Wængongui guiquënë waa adämaï incæcäimpa. Näwangä ämopa. ³ Bitö iñömö, Ömaadäni inte në wædäni qui, ante godoncæte ante cædinque bitö guidengä eyequeï pönï ongongä incæ adämaï incæcäimpa, ante wææ cæe. ⁴ Mänömaï wææ cædinque awëmö godömi æncædänimpa. Mänömaï cæbi adinque bitö Mæmpo në wëmö iñömö në acä inongä inte awëmö bitö godöni ante wæætë eyepæ pönongä æncæbiimpa,” ante Itota angacäimpa.

Wængongui ingante æbänö apænequï, ante Itota apænecä

(Odoca 11.2-4)

⁵ Ayä godömenque apænedinque, Itota, “Wadäni Wængongui ingante apænedinque nämanque ante nani cæbai minitö iñömö wii adobainö ante Wængongui ingante apæneedäni. Mäninäni guiquënë, Botö apænebo adinque waodäni pönö waa acædänimpa, ante pönëwëninque minitö odömöincönë go guidinque næ gongæninque Wængongui ingante apænedänipa. Ayä tömënëni nani quëwëñömö nænquedæmpo iñömö gote næ gongæninque Wængongui ingante apænedänipa. Näwangä ämopa. Tömënëni waodänique godö waa adäni æninque mäninque ænänipa. Wængongui guiquënë waa adämaï incæcäimpa. ⁶ Bitö iñömö tömëmi oncönë guiite odemö tee mönedinque mönö Mæmpo në awëmö quëwengä ingante apænee. Mänömaï cæbi adinque bitö Mæmpo wëmö iñömö në acä inongä inte

awëmö bitö cædinö ante wæatë eyepæ pönongä æncæbiimpa,” ante Itota odömonte apænecantapa.

⁷ Ayæ, “Nämä cæte quëwenguimo, ante nê änäni önonque näni tedewënö bai tededämaï inte mînitö nö cædinque Wængonguï ingante apæneedäni. Tömënäni iñömö, Wantæpiyæ tedebo beyænque Wængonguï ëñencæcäimpa, ante babæ ante pönëninque önöneque tedewënanipa cæmîni. ⁸ Mînitö iñömö edæ tömënäni önöneque tedete näni cædö bai edæ cædämaï iedäni. Iñæmpa mönö Mæmpo ingante apænedämaï iñömonte tömengä mönö anguiñö ante wëenënedë do ëñengä apa tedewëmîni. ⁹ Iñinque edæ iïmaï ante Wængonguï ingante apæneedäni.

‘Mönitö Mæmpo nê öönädë quëwënömi inte ëñëmi.

Bitö ëmöwo Tæiyæ Waëmö ëmömi adinque mönitö bitö ëmöwo ante waa adinque apænemönipa.

¹⁰ Bitö öönädë Awënë nê ingaïmi inte inguipoga Awënë Odeyebi edæ bitö baquinque quingæ pöe.

Öönädë owodäni ëñente cædäni bai inguipoga adobai bitö änö ante edæ ëñente cæte bacäimpa.

¹¹ Mönitö imönite bitö, Cænguï, ante iïmö iñö iïmö iñö bitö pönöni ñöwoönæ incæ eyepæ pönömi ænte cæmönie.

¹² Mönitö imönite nê waa cæquënënanï inte pönö wënæ wënæ cædäni adinque mönitö godö ñimpo cæmöni quëwënäni bai bitö nê panguënëmi incæ adobai cædinque

mönitö nê waa cæquënëmöni inte wënæ wënæ cæmöni adinque pönö ñimpo cæbi quëwëmönie.

¹³ Ayæ mönitö wënæ wënæ cæñente wædö ante bitö pönö wææ cæbi ate mönitö taadö oda cædämaï inte wënæ wënæ cædämaï incæmönimpa.

Edæ nê wiwa cædongä nempo ongonte wæyömönite bitö gä peyæmpote æmi quëwencæmönie, ämönipa.

Tömëmique edæ Awënë Odeye tæi piñæmi iñömi mönitö bitö nempo ongömönipa.

Nämä ñäö bai entawëmi inte bitö cöwë tæi ëmömi iñömi imipa.

Amëë, ante, Näwangä impa, ante apænemönipa.’

Mänömainö ante Wængonguï ingante apæneedäni,” ante Itota odömonte apænegacäimpa.

¹⁴ Ayæ godömenque odömonte apænedinque Itota iïmainö ante apænegacäimpa. “Mînitö imînite wënæ wënæ cæyönänite mînitö godö ñimpo cæmîni iñinque mönö Mæmpo nê öönädë quëwengä adobai mînitö wënæ wënæ cædinö ante pönö ñimpo cæcä quëwëmaïminipa. ¹⁵ Wæatë mînitö woadäni näni wënæ wënæ cædinö ante ñimpo cædämaï imîni adinque edæ mönö Mæmpo adobai mînitö wënæ wënæ cædinö ante ñimpo cædämaï inte pönö piincæcäimpa,” ante Itota apænegacäimpa.

Wængonguï beyæ ante æbänö cænämaï i, ante

¹⁶ Ayæ odömonte apænecantapa. “Wadö ante nê wadö cædäni guiquënë iïmaï ante mä pönëninque cædänipa. Wængonguï beyæ ante ee ate cænämaï inte botö wæwente bai ëmömo adinque wadäni botö imote waa acædänimpa, ante awinca nämönänipa. Mînitö iñömö Wængonguï beyæ ante cædinque ee ate cænämaï imîni iñinque tömënäni näni cæbai cædämaï iedäni. Wæatë nämönämaï inte Wængonguï beyænque ante cænämaï iedäni. Näwangä mînitö imînite ämopa. Tömënäni

waodänique godö waa adäni änninque männinque ännänipa. Wængongui guiquënë waa adämaï incäcäimpa. ¹⁷ Bitö guiquënë Wængongui beyænque ante ee ate cänämaï inte cäbi ïnninque awinca ñä mëmonte ayä ocabo öni päcate cæ. ¹⁸ Bitö ee ate cänämaï ïmi ïnninque, Waodäni edonque acädänimpa, ante änämaï inte wæætë, Mæmpoque acäcäimpa, ante mänömaï cæ. Bitö mänömaï cäbi adinque mönö Mæmpo në wëmö ïñömö quëwengä ïnongä inte wëmö ïñömö edonque adinque awëmö bitö cädinö ante wæætë eyepä pönongä æncäbiimpa,” ante Itota apænecäimpa.

Öönädë mini waa pöni manguincoo ante

(Odoca 12.33-34)

¹⁹ Godömenque odömonte apänedinque Itota, “Tömëmo mäincoo, ante mancæte ante wædinque minitö inguipogaque cayä cænte to tamonte ïñömö cabo tē gæte da wënämaï iedäni. Edæ në ö ännäni bæ tate näni ö ænguinque inguipogaque da wëmini apa quëwëmini. ²⁰ Öönädë ongoncoo guiquënë to tamönämaï impa. Cayä guidämaï ï ïnninque mäincoo wodämaï ongompa. Ayä në ö ænguinäni adobaï mäniñömö bæ tate guidämaï inäni ïnninque mäincoo cöwë wë wodönämaï ee ongompa. ïnninque, Waadete mini cädincoo cabo tē gæte bai cädinque minitö öönädë waa pöni incoo mini ænte manguinque ñöwo ïñömö waodäni inänite waadedinque ee cædäni. ²¹ Edæ waa pöni minitö mäincoo ongöñömö minitö mäniñömö adoyömö quëwencæte ante wëmini iminipa, ante adinque botö mänömainö ante apänetabopa,” ante Itota odömonte apænecantapa.

Awinca wainca mönö ëmönö ante

(Odoca 11.34-36)

²² Ayä odömonte apänedinque, “Baonga quëwënninque mönö edonque adinque cæcäimpa, ante mönö awinca ëmömompa. ïnninque awinca wainca ëmonte edonque ate bai bitö mimöno adobaï ñäö entawënninque, Nö cæbote, ante pönëmi ïnninque bitö baonga nö cæte quëwëmaïmipa. ²³ Wæætë edæ awinca wii wainca ëmöninque adämaï inte bai wentamö entawëmi ïnninque bitö, Wiwa cæbote, ante mimöno pönëñömite bitö baonga wiwa cæbaïmipa. Edæ mimö ñäö entawëñömi wentamö ba ïnninque bitö quëwenguimämo mäë mëmonte bai baquinö angüënë,” ante Itota apænecantapa.

Wængongui beyä cädinque mäincoo beyä cæqui

(Odoca 16.13)

²⁴ Ante apänedinque Itota ayä odömonte apænecantapa. “Mënaa awënëna bayö-nate waocä ïñömö mënaa awënëna nänä änö ante ædö cæte ëñente cæquiringä. ïñæmpa adocanque ingante piïnninque tömengä wacä ingante waadebaingampa. Wæætë iingä miñä tee empo godinque tömengä mäningä ingante edæ wiwa adinque ëmö cæte gobaingampa. Minitö adobaï Wængongui beyä ante në cæmini inte ædö cæte mäincoo beyä ante cæte quëwenguimini,” ante Itota angacäimpa.

Mæmpo Wængonguĩ mönõ imonte aacampa, ante
(*Odoca 12.22-31*)

²⁵ Äninqe, Itota ayæ godongämæ odõmonte apænedinque, “Mänõmaĩ beyæ botõ mĩnitõ imĩnite iĩmaĩ ämopa, angantapa. Mĩnitõ inguipogaque mĩni quëwenguimåmo ante wædåmaĩ iedåni. Cænguĩ bequĩ ante ayæ weocoo ante wædåmaĩ iedåni. Cænguĩ cænte beyænque mönõ dicæ quëwëmongaa. Weocooque mönõ mongænõ beyænque dicæ quëwëmongaa. Mönõ quëwëmåmo iñõmõ godõmenque impa. ²⁶ Ayamõidi awænæca nê cæwodåni inånite amĩnitawo. Tõmënåni dicæ tõmëmõ minte pæ ate tå pete daga wente månåniyaa. Incæte mönõ Mæmpo õõnædë quëwënongå inte wæætë tõmënåni inånite eyepæ godongå cænåni aedåni. Mĩnitõ guiquënë ayamõidi inåmaĩ iñõmĩnite Wængonguĩ mĩnitõ imĩnite godõmenque waa adinque eyepæ põnongå cænte apa wæwëmĩni. ²⁷ Edæ Wængonguĩ nånõ anganca quëwenguënemĩni inte mĩnitõ, Wantæ iño incæ godõmenque quëwëmote, ante wæwëmĩni incæte edæ ædõ cæte nãmå cædinque godõmenque wantæpiyæ quëwenguimĩni.”

²⁸ Äninqe Itota godõmenque odõmonte apænecantapa. “Iñinqe mĩnitõ, Weocoo quincodõ wëñaquĩ, ante põnente quĩnante wæwëmĩni. Iñæmpa ongaicoo õmædë pæ iñõmõ weocoo ante daque daque dadåmaĩ inte wodonte tinåmaĩ tõmenque pæ aedåni. ²⁹ Incæte Awënë Tadõmõõ wodi waëmoncoo põni ëñagaingå incæ wĩ ongai baĩ ëñagacåmpa. Ongai iñõmõ godõmenque waëmõ põni ënodånipa. ³⁰ Gaguimæ iñõmõ iimõ ate edæ gongapamõ guitodonte tanguinque pæ incæte nõwoonæ Wængonguĩ põnongå waëmõ wëñate ënopa. Iñinqe, Waëmõ ënodõ nê põnongå inte Wængonguĩ mönõ imonte godõmenque eyepæ põni põnongå ænte wëñacåmpa, ante põnëmĩniyaa. ³¹ Iñinqe mĩnitõ, ‘Quimõnõ impa cænguimõõ,’ ante, ‘Quimænõ impa bequimõõ,’ ante ayæ, ‘Quincodõ impa wëñaquimõõ,’ ante põnëninque guĩñente wæwënamåĩ iedåni. ³² Måninõ ante wadåni nê ëñenåmaĩ inåni nåni cabo nåni cabo wædåni incæte mĩnitõ guiquënë, Mönõ æinente wædõ ante mönõ Mæmpo iñõmõ edæ do ëñengampa, ante põnëninque edæ guĩñente wædåmaĩ incæminimpa. ³³ Wæætë edæ, Wængonguĩ Awënë Odeye nempo quëwencæboimpa, ante nanguĩ cædinque mĩnitõ, Tõmengå nõ cæte nånõ waa quëwënõ baĩ adobaĩ nõ cæte waa quëwencæboimpa, ante adobaĩ nanguĩ cæedåni. Månõmaĩ quëwencæte ante tåno wæmĩni adinque Mæmpo Wængonguĩ måninõ ante do edæ eyepæ põni põnongå æñõmĩni månincooque mĩni wædõ ante adobaĩ eyepæ põnongå æncæminimpa. ³⁴ Månõmaĩ i ñinqe, Iimõ ate æbånõ cæquĩ, ante guĩñente wædåmaĩ iedåni. Edæ iimõ ate måninõ ante põnëninque eyepæ põnente inguimpa. Iñinqe mĩnitõ, Nõwoonæque æbånõ cæquĩ, ante guĩñente põnëninque måninganca põnente quëwëedåni,” ante Itota odõmonte apænecacåmpa.

Wadåni inånite apænte ånåmaĩ iedåni, ante

(*Odoca 6.37-38, 41-42*)

7 Månõmainõ ante odõmonte apænedinque Itota godõmenque apænecacåmpa. “Mĩnitõ wacå ingante, Wænæ wænæ imipa, ante apænte ånåmaĩ iedåni. Edæ mĩni apænte wæquinque mĩnitõ wadåni inånite apænte åminipa. ² Mĩnitõ wadåni inånite tee mante godõmĩni nåni ænganca wæætë adoganca põnõnåni æncæminimpa. Ayæ mĩni apænte anganca adoganca apænte ånåni wæcæminimpa. ³ Bitõ tõniñacå wædænque wænæ wænæ cæcå iñongante bitõ guiquënë nanguĩ bitõ wænæ

wënæ cædinö ante pönënamai inte quinante tömengä ingante piinte änewëmii. Tömengä edæ awinca guiyä mä owo ëmongä bai entawente wæyongante bitö wæætë awæmpa wææ ëmongä bai wææ entawëmi inte ædö cæte ate bai tömengä ingante apænte ämii. ⁴Edæ tömëmi awinca awæmpa wææ ëmonte bai bitö wënæ wënæ adimö ëmömi inte bitö töninäcä ingante, ‘Biwī, bitö awinca guiyangä mä owo bai ate æ wimömoe,’ ante edæ abipa diyæ æ wimonguimii. ⁵Īnæmpa wadö tedete wadö cædömi inte bitö edæ tömëmi awinca awæ wææ ongompa täno wido cæte ate edonque adinque bitö töninäcä awinca guiyä mä owodö æmoncæbiimpa.”

⁶Äninqe Itota godömenque apænedinque, “Guintaidi inänite, Tömënanī cængui, ante tæiyæ waëmö cængui godönänitawoo. Edæ godönämai inäni bai minitö adobai Wængongui nänö tæiyæ waëmö apænedö ante nē Baa änäni inänite apænedämai iedäni. Ayæ odæ wängänäidi weca wadäni wamoncoo waa pönī ëmoncoo wæantodönämai inäni bai minitö adobai Wængongui beyæ waa pönī nāni apænegainö ante nē ënente cædämai inäni inänite apænedämai iedäni. Edæ odæ wängänä pinä gäwa baö wänä næante bai cædinque tömënanī ënënamai inte cædinque dadi ëmænte tömëmini baö wangö pocænte bai piimainänipa, ante minitö apænedämai niine cædäni,” ante Itota apænegacäimpa.

Pönömi æmoe, ante mönö angæimpa, ante

(Odoca 11.9-13; 6.31)

⁷Ayæ apænedinque Itota, “Pönömi æmoe, ante nē angä bai cædinque minitö mini ænguino ante Wængongui ingante apæneedäni. Æyömönö iī, ante nē diqui diqui mingä bai cædinque minitö, Æbänö iī, ante ædæmö ënencæte ante Wængongui ingante wede pönente apæneedäni. Odemö mönitö beyæ wi ænecæimpa, ante aa pecä bai cædinque minitö, Æbänö cæquimoo, ante ënencæte ante Wængongui ingante nanguī apæneedäni. ⁸Edæ, Pönömi æmoe, ante nē änäni iñömö edæ do ænänipa. Nē diqui diqui minäni adobai do adänipa. Ayæ odemö ponte nē aa pedäni tömënanī nāni guiquinque edæ do wi ænete bai bacæimpa.”

⁹Ayæ, “Bitö waobi inömi inte ënëmi. Bitö wëñængä cængui ante päö angä ënëninque bitö dicæ dicaque pædæ godömiyaa. ¹⁰Gæyæ angä ininque bitö tæntæ incæ dicæ pædæ godömiyaa. ¹¹Mini waocabo nē wiwa cædömini incæ, Quinö waa ī, ante ënëninque minitö wëñænäni inänite waëmoncooque godömini ænänipa. Īninque mönö Mæmpo öönædë nē quëwengä iñömö nē änäni inänite waëmoncooque ante godömenque pönongampa,” ante Itota odömonte apænecantapa.

¹²Ayæ, “Minitö, Wadäni botö imote waa cædäni æninque waa tobaimopa, ante wæminitawo. Īninque mini ante wædö bai ante minitö tömënanī inänite adobai waa cædäni. Mäninonque ante wææ ancæte ante dodäni, Īimai cædäni, ante wææ angadänimpa. Ayæ Wængongui beyæ nē apænedäni adodö ante ancæte ante yewæmongadänimpa. Īninque botö änö bai cædinque minitö tömënanī nāni angainö bai do edæ cæbaiminipa,” ante Itota odömoncæte ante apænecantapa.

Odemö guiyänemö ante

(Odoca 13.24)

¹³Itota godömenque odömoncæte ante iīmai apænecantapa. “Minitö guiyänemö guiidinque quëwenguino taadonque pöedäni. Wænguino godö guiquinemö guiquënë yabæ inö nænænemö ongö adinque tæiyænäni önonque pö guite edæ

tömənäni nāni wænguinque ñænænnonque godānipa. ¹⁴Wæætē wædænque ināni guiquēnē diqui minte guiyānemō adinque quēwenguinō guiyānō guite pōnānipa,” ante Itota apænecantapa.

Awæ æbānō iwæ, ante tömenca bete ēñengäimpa, ante

(*Odoca 6.43-44*)

¹⁵Itota ayæ godömenque odömonte apænecantapa. “Pancadāniya, Wængongui beyæ nē apænemōni imōnipa, ante nē babæ apænedāni inōnānite mīnitō gomō ate tömənāni inānite ēñēnāmaī iedāni. Tömənāni inōmō edæ mēneidi bai ināni incæ obega æmontai bai wēñate bai babæ cædānipa. Obega ee quēwēnāni bai ee cæmōni imōnipa, ante edæ babæ ante pōnāni tamēñedāni. ¹⁶Edæ tömenca adinque mīnitō, Awæ æbānō iwæ, ante tā pete bete do ēñēmīni bai, ināni ædānidō ināni, ante ēñencæte ante tömənāni nāni cædinō adinque edæ do ēñencæmīnimpā.”

“Yowemō æncæte ante waodāni dicæ daa mongæwāa tā pete ænāniyaa. Iigowæñeca æncæte ante waodāni dicæ wæntowāa edæ tā pete ænāniyaa. ¹⁷Waiwæ tömāwæ wainca incapa. Baawæ wæætē baaca incapa. ¹⁸Waincawæ incæ ædō cæte baaca incaquii. Wæætē wiwa iwæ incæ ædō cæte wainca incaquii. ¹⁹Awæ quiwæmenque wainca incadāmaī i ininque māniwæ tömēwæ mā yete gongapamō gutodōnāni gonguinque ñongæmpa. Tömənāni adobai nāni gonte wæquinque babæ cædānipa. ²⁰Ininque, Awæ æbānō iwæ, ante tömenca adinque do ēñēnāni bai waocā nānō cædō ante adinque, Tömengä æbānō ingäa, ante edæ do ēñencæmīnimpā,” ante Itota apænecäimpa.

Wii tömānāni öönædē guiquināni, ante

(*Odoca 13.25-27*)

²¹Ayæ godömenque odömonte apænedinque Itota iimaī apænecantapa. “Botō imote, ‘Awēnē, bitō botō Awēnē imipa,’ ante nē tededāni nāni tededō beyænque ædō cæte öönædē Awēnē Odeye ömæ guiquināni. Wæætē mōnō Mæmpo öönædē quēwengä nānō änō bai nē cædingä inōmō tömenganque guicæcäimpa. ²²Ininque bayonte pancadāniya botō imote, ‘Awēnē, Awēnē,’ äninque, ‘Bitō beyæ apænegamōniī ae, ancædānimpā. Ayæ, Bitō emōwo apænedinque wēnæ inte wido cægāmōniī ae. Bitō emōwo apænedinque mōnitō, Ate pōnencædānimpā, ante bamōnengæ cædinque nanguī waa cægāmōniī ae,’ ancædānimpā. ²³Ēñēninque botō wæætē, ‘Inæmpa botō mīnitō imīnite cōwē adāmaī inte tæcæ abopa. Nē ēñēnāmaī cædimīni inte botō weca ongōnāmaī gobæwedāni,’ ancæboimpā,” ante Itota apænecäimpa.

Nē mænōna inate ante

(*Mäadoco 1.22; Odoca 6.47-49*)

²⁴Ayæ wæætē odömōninque Itota iimaī apænecantapa. “Ininque edæ botō apænebo ēñēninque nē ēñente cædāni inōmō tömənāni waocā nē ēñengä inte nānō nō ēñente cæi bai cædānipa. Nē ēñengä inōmō tæēmoncaa mænongampa. ²⁵Tæēmoncaa mænongä ate cōönæ nanguī cæ ate æpæ eyede äninque pō tapæmpa. Ayæ woboyæ nanguī pæmænte pō incæte oncō tæēmoncaa mænonte ongō ininque ædō cæte cabænte bobænte guiquii. Nē ēñente cædāni inōmō māniñōmō mænongä bai inte todānipa. ²⁶Wæætē botō apænebo ēñēninque nē ēñēnāmaī cædāni guiquēnē

tömänäni iñömö waocä ocai ömæcacä nänö ëñënamäi cæi bai cædanipa. Në ömæcacä iñömö ëmonaiya aqui iñömö mäsongampa. ²⁷ Aquii iñömö mäsongä ate cöönæ nanguü cæ ate æpæ eyede ante tapæmpa. Ayæ woboyæ nanguü päemænte pö adinque mänincö öñonte ætæwo goquinque edæ do acapowate bogocæ tæ go wææmpa. Në ëñënamäi cædäni iñömö mäniñömö mäsongä bai inte wædanipa,” ante Itota odömonte apænegacäimpa.

²⁸ Mäninganca ante iinque apæneceä ëñëninque tömänäni, Quinö bai angää, ante guüñente wædinque, ²⁹ Wü mönö imonte në odömönäni nani odömönö bai tömengä iñömö në angä inte bai edæ godömenque nöingä ante odömongä ëñëmompä, ante tedegadänimpa.

Në baadingä ingante Itota wadæ caacampa

(Mäadoco 1.40-45; Odoca 5.12-16)

8 Mänü änanquidi ongöninque iinque apænete wæængä adinque tæiyänäni tömengä miñæ wæængadänimpa. ² Tömengä miñæ tee empote wææ goyönäni wacä baate ëñawengä inongä inte eyepæ pö bee téninque Itota önöwa gäänë ædæ wææninque apæneçantapa.

—Awënë, Bitö Ao ämi inte wadæ caabi iinque botö waintai baabaimopa.

³ Äñongante Itota pædæ wææmpo gampo caadinque,

—Ao ämopa. Bitö waintai baacæbiimpa.

Angä iinque nömæintai nänö ëñadintai dæ baadinque tömengä waintai edæ do baacantapa. ⁴ Itota edæ tömengä ingante,

—Botö æbänö cæboo, ante wadäni inänite mäo apænedämäi imäwe. Wæætë, Näwangä impa, ante acædanimpa, ante cædinque bitö, Wængongü quü, ante në godongä weca töingä godinque waintai bitö baadintai odömömi acæcäimpa. Ayæ Möitee wodi wææ ante nänö angaincoo bai ænte pöninque bitö waintai bitö baadi beyæ ante edæ, Wængongü quü, äninque në godongä ingante pædæ godömi æncæcäimpa, ante Itota angacäimpa.

Capitäö ingante në cæcä ingante Itota cæcä waa bacampa

(Odoca 7.1-10)

⁵ Mänü pöninque Capënaömö pö guiiyongä odömäno tontadoidi awënë capitäö incæ, Itota pönö cæcæcäimpa, ante apæneceæte ante pongantapa. ⁶ Pöninque tömengä,

—Awënë, botimote në cæcä iñömö cömäingä badinque nanguü pöni nantate oncönë öñongampa cæbii.

⁷ Ante äñongante Itota,

—Gote cæbo waa bacä ae.

⁸ Angä ëñëninque,

—Awënë ëñëmi. Botö waëmö imopa diyæ bitö botö oncönë pö guiiquümi. Edæ bitö adoyömö ongöninque ämi iinque botö imote në cæcä waa bacæcäimpa. ⁹ Bitö iñömö Awënë Wængongü ingante në ëñente cædömi imi bai botö adobai wacä awënë ingante në ëñente cæbo imopa. İninque botö awënë ëabo inte botö awënë beyænque ämo ëñëninque tontadoidi wæætë guüñente wædinque botö änö ante ëñente cædanipa. İninque adocanque ingante botö, Goe, ämo ëñëninque edæ do

gocampa. Wacä ingante, Pöe, ämo ëñente pongampa. Ayä botö imote në cæcä ingante, Cæe, ämo ëñëninque edæ do cæcampa.

¹⁰ Ante tontado capitäo nanguï ëñengä inte apäñecä ëñente wædinque Itota wæætë tömengä miñä tee empo pönäni inänite apäñedinque,

—Minitö iminite näwangä ämopa. Mönö idægocabo iñömönte mäningä wede pöningä ingä bai adocanque incæ edæ dæ angä awædö, angantapa. ¹¹ Incæte iimaïñö ante apäñebo ëñëedäni. Mönö wæmæidi Abadäo wodi Itæca wodi Aacobo wodi öönædë Awënë Odeye ææmæe ponte waa beyönäni edæ nænque tamönö gämænö quëwënäni tönö nænque guidö gämænö quëwënäni iñömö idægoidi inämaï inäni incæ tæiyænäni adoyömö pöninque mönö wæmæidi tönö godongämæ becädänimpa. ¹² Wæætë Wængongui Awënë Odeye ömæ në guiquëñänäni guiquënë tömëñäni wëmö iñömö, nani guingo imonte Yæ yæ wæyömö mäniñömö guitodonte wæquïñänidö angüënë.

¹³ Äninque Itota wæætë tontado capitäo ingante,

—Nöwo wadæ goe. Bitö pönëñö bai do bacäimpa.

Ante äñongä adoyedë Itota nänö äniñedë incæ awënë ingä në cæcä do waa bagacäimpa.

Pegodo nänöögängä badä ingante Itota cæcä waa bacä

(Mäadoco 1.29-31; Odoca 4.38-39)

¹⁴ Ayä Itota mäniñömö pöninque Pegodo oncönë pö guiite ayongä Pegodo nänöögängä wäänä daicawo gawænte möimoga öñongä acantapa. ¹⁵ Adinque tömengä önompo pædæ wææmpote bæi ongongä ate onquiyängä wæætë gançæ badinque ængæ gantidique Itota beyä pönö cæcantapa.

Nantate wæwënäni inänite Itota cæcä waa badänipa

(Mäadoco 1.32-34; Odoca 4.40-41)

¹⁶ Mäniönæ gawadecä ba ininque wënæ tönö quëwënäni tæiyænäni inänite ænte pönäni adinque adodeque äninque Itota wënæ inte wido cæcantapa. Ayä quiëmë quiëmë nantate wæwënäni inänite, Waa baedäni, angä waa badänitapa. ¹⁷ Itota mänömaï cæcä ininque Wængongui beyä në apäñecä Itaiya wodi do iimaï ante nänö angäinö bai iinque batimpa. “Mönö nantate wæwëmämo ö äninque mönö daicawoidi teëmente gote mäo wido cæte bai cædinque tömengä teëmente wængä beyænque quëwëmö imopma,” ante Itaiya nänö angäinö bai Itota cægacäimpa.

Itota miñä në goinëna

(Odoca 9.57-62)

¹⁸ Itota iñömö, Tæiyænäni godämæ gongænäni awædö, ante pönëninque tömengä miñä në godäni inänite, Gäwapæ æmæ wedeca mantamini taoboedäni. ¹⁹ Äninque ayä ongöñongante wacä tömëñäni nani wææ yewæmongainö ante në adingä inte në odömöngä inongä inte Itota weca pöninque,

—Awënë në Odömömi ëñëmi. Bitö ædömë goyömite botö bitö miñä pö gocæboimpa.

²⁰ Angä ëñëninque Itota wæætë edæ,

—Babæ guintaidi iñömö ontatodë mongui ëadäni inänipa. Ayamöidi ongonta ëadäni inänipa. Botö Waobo ëñagaïmo guiquënë mongui ömaabo imo apa poncæ ämii, ante Itota wææ apænegacäimpa.

²¹ Ayæ wacä tömengä ëmiñængä incæ tömengä ingante,

—Awënë ëñëmi. Botö täno gote botö wæmpo wængä ate daga wente ate pömoe.

²² Äñongante Itota wæætë,

—Ïñæmpa në wæwocadäni incæ tömënäni guidënäni wænäni ate ee abi daga wencädänimpa. Bitö wæætë botö miñä ee pöe, angacäimpa.

Itota angä ëñente woboyä æpæ næ gongæmpa

(Mäadoco 4.35-41; Odoca 8.22-25)

²³ Mänii tao gocæte ante wipodë guiiyongä tömengä miñä në godäni godongämäë guidinqe tömengä tönö tao godänitapa. ²⁴ Tao wogaa goyönäni woboyä iñontobæ nangui pöni pæmäniñque æpæ mængonta mængonta pöniñque gao gao goyonte wipo ñänæ ñänæ æi guidentapa. Itota iñömö mö ñongantapa. ²⁵ Mö ñongä adinqe tömengä tönö godäni iñömö tömengä weca gote, Ömämoncæcäimpa, ante tao cædinque,

—Awënë, bete wæncæ cæmompæ cæbii.

²⁶ Ante äñönäni,

—Mini pönëgade, quimæ guiñewëminii.

Äniñque tömengä ængä gantidinqe, Woboyä pæmäenämaï imäwe. Gäwapæ incæ cädämaï næ gongämäwe, angä ëñente woboyä pæmäenämaï iñö gäwapæ incæ næ gongæniñque ñancæ ñancæ gongämäniñque. ²⁷ Äñongä tömënäni ancai guiñëniñque nämäneque tededinqe,

—Æcämë inte angä ëñente woboyä incæ æpæ incæ gongæmpa, ante guiñente wægadänimpa.

Guedatabæ iñömö wænæ inte në ënempoda

(Mäadoco 5.1-20; Odoca 8.26-39)

²⁸ Mänii æmämma tao ti wæænte Guedatabæ pönongä wænæ inte quëwëna iñömö wao wodido quëwente pöniñque Itota ingante mämö bee ténatapa. Tömëna iñömö, Waodäni taadö godämaï incädänimpa, ante wææ cæcæte ante në piinte cädöna inte edæ, ²⁹ pö bee tëniñque ogæ tededatapa.

—Bitö Wængongui Wëmi inömi incæ quimæ mönatö weca pöwëë. Ïniñque bayedë möna pante wæquënëno ante pönëniñque bitö ñöwo do pancæte ante pömitawo, ante wædatapa.

³⁰ Ante äñönote odæ wængänäidi nangui inäni a ongonte cænäni adinqe, ³¹ wænæidi guiquënë Itota ingante äniñque,

—Bitö cöwë wido cæcæte ante pönëmi ininqe edæ odæ wængänäidi baönë ämi gobäimönipa.

³² Ante ancaa tedete äna ëñëniñque Itota,

—Gobäewedäni, angä.

Ëñëniñque tömënäni tao godinqe odæ wængänäidi baönë guiiyönäni odæncato wæætë ontadäa wæänömëmö iñömö gäwapæno pogodo wæi guite becadote capo wængadänimpa.

³³ Bécadote wänäni adinque odæ wængänäidi në aadinäni guiquënë pogodo wodii winonte tömënäni quëwëñömö mäo, Itota mänömaï cæcä wæmönipa, ante ted-edänitapa. Ayæ, Wënæidi tönö në quëwënina inate Itota mänömaï cæcampa, ante wæmönipa, ante apänedäni. ³⁴ Ëñëninque tömänäni Itota ingante bee tencæte ante tömënäni nani quëwëñömö tate pönänitapa. Tömengä ingante adinque, Mönitö ömä iñömö quëwënämaï gobäwe, ante nanguï angadänimpa.

Në cömäingä ingante Itota angä dao dao gocampa

(Mäadoco 2.1-12; Odoca 5.17-26)

9 Mäninö ante änäni ëñëninque Itota wadæ godinque wipodë go guidinque imämäa tate tömengä quëwëñömö pongacäimpa. ² Pongä adinque wadäni në cömäingä möimpataa öñöñongante edæ æmatæ æmatæ bæi ongöninque tömengä ingante näæante pönänitapa. Näæante pönäni adinque, Në näæante pöninäni tönö në cömäingä wede pönente pönänipa, ante adinque Itota iñömö në cömäingä ingante, —Botö wëmi ëñëmi. Wënæ wënæ bitö cædimämo ante ñöwo ñimpo cætimpa.

³ Ante apäneca ëñëninque edæ në wææ odömönäni guiquënë pancadäniya nämäneque pönente tededinque, “Íngä iñömö Wængongui ingampa diyæ mänömaï cæquiringä. Edæ babæ ancædö.” ⁴ Ante pönëñönäni Itota tömënäni nani pönëwënö ante öñöwëninque do ëñëninque edæ,

—Minitö mimöno quimæ wiwa ante pönëwëminii. ⁵ “Në cömäingä nanö wënæ wënæ cædimämo ante do ñimpo cætimpa,” ante botö Wængongui bai ämo ëñëninque minitö guiquënë, Wængongui ingampa diyæ mänömaï cæquiringä, ante pönëminipa. Ayæ wæætë, “Ængæ gantidique dao dao gocæcäimpa,” ante botö Wængongui bai cæbo adinque minitö edæ, Wængongui ingampa diyæ mänömaï cæquiringä, ante adobai pönëminii imaïminipa, ante awædö. Ínæmpa mänömainö ante pönëminii ininque minitö edæ æbänö cæquënëmo imo äminii. ⁶ Incæte waodäni nani wënæ wënæ cædimämo ante botö Waobo ëñagaïmo inte inguipoga quëwëninque në ämo inte ñimpo cæbo quëwënänipa, ante minitö edæ ëñencæminimpa, ante botö iïmaï cæbopa.

Äninque edæ në cömäingä ingante edæ,

—Ængæ gantidique bitö möimpata topo cædinque ænte tömëmi oncönë näæante goe.

⁷ Angä ëñëninque cömäingä íningä incæ edæ ængæ gantidique tömengä oncönë wadæ gocantapa. ⁸ Dao dao gocä ate wædinque godongämæ ongönäni iñömö, Æbänö cæcäi, ante ëñënämaï inte guïñente wædinque, Wængongui pönö cæcä beyänque waocä ñöwo në angä badinque mänömaï cæcä amönipa, ante pönëninque, Wængongui bitö ñäö bai ëmömi inte tæi piñænte cæbi amönipa, ante watapæ apänegadänimpa.

Mäateo ingante Itota angä tee empote gocampa

(Mäadoco 2.13-17; Odoca 5.27-32)

⁹ Itota edæ mäninö godömenque gocæ cæte ayongä adocanque Mäateo iñömö, Odömäno awënë qui bacæimpa, ante godonte æinta nani æincönë ongonte cæcä adinque Itota guimö adinque Mäateo ingante angantapa.

—Botö miñæ pöe, angä.

Ēñēninque Mäateo edæ do ængæ gantidique Itota miñæ tee empote wadæ gocantapa.

¹⁰ Ayæ ate Itota tömengä miñæ në godäni tönö Mäateo oncönē go guiite cængöñönäni odömāno awenē beyæ në æwēnāni tönö në ēñēnāmaï cædāni tönö nanguï ināni ponte godongāmæ cænānitapa. ¹¹ Adinque Paditeoidi guiquenē tömengä miñæ në godäni inānite äninque,

—Minitö Awenē në Odömongä iñömö odömāno awenē beyæ në æwēnāni tönö në ēñēnāmaï cædāni tönö quimæ godongāmæ cæwengäa.

¹² Änāni ēñēninque Itota,

—Nē waa ingä guiquenē, Cæbi waa baboe, änāmaï ingampa. Nē wēnæ wēnæ inte wæcä guiquenē dotodo ingante, Cæbi waa baboe, ante do aa pecampa. ¹³ Pancadāniya, Nämä incæ nö entawēmo imopa, ante në änāni inānite adinque botö në dotodo bai adobai inömo inte tömēnāni inānite aa pedāmaï incæboimpa. Wadāni guiquenē, Nämä wēnæ wēnæ cæbo imopa, ante në änāni guiquenē, Wængongui gämänö poncædānimpa, ante botö tömēnāni inānite aa pecæ pönomoimpa. “Baö, Wængongui qui baquimpa, ante në iya tånāni inānite wii ainēwædö, wæætē godö waadete waa cædāni inānite ainēmo imopa,” ante Wængongui angä apa quēwēnāni. Nöwo edæ godinque Wængongui nänö änö æbänö ante angä ēñente pömæwedāni, ante Itota apænægacäimpa.

Èe ate cænāmaï ingäimpa, ante në änāni

(Mäadoco 2.18-22; Odoca 5.33-39)

¹⁴ Mäniñedē Wäö miñæ në godäni pöninque Itota ingante äninque,

—Paditeoidi tönö Wäö miñæ möni gocabo tönö mönitionque Wængongui beyæ ante ee ate wii cæmönipa. Bitö miñæ në godäni guiquenē quinante Wængongui beyæ ante cædāmaï inte edæ do cænāni.

¹⁵ Änāni ēñēninque Itota wæætē,

—Onguñængä në monguingä nänö wente ænte në pönāni bai inönāni inte botö miñæ në godäni iñömö ædö cæte wæwente bai cænāmaï inguināni. Wæætē ayæ ate guiquenē, Monguingä, nāni në änogä bai iñömote wadāni ponte botö imote ö ænte gocædānimpa. Mänömaï cædāni ate botö miñæ në godäni iñömö mäniñedē ate wæætē cænāmaï inte wæcædānimpa, ante apænedinque Itota godömenque iimāi ante apænægacäimpa.

¹⁶ “Waacä dicæ miincoo æninque pedæncooğa pönö tadömonguingäa. Mänömaï cæcä ininque edæ miincoo incæ dobæ gāni tamonte guipite ate godömenque wänä tente baquenē. Minitö, Awente bai cænāmaï inte waa quēwengäimpa, ante mini änewenö guiquenē pedæncoo bai inte ewenguincoo bai enepa. Codito nempo watapæ quēwengäimpa, ante botö apænedö guiquenē miincoo bai inte quēwenguine enepa. İninque ewenguine tönö quēwenguine edæ ædö cæte adoyömö ēñente cæquii. ¹⁷ Ayæ adobai yowepæ biñömæ nāni ämæ miimæ æninque waodāni ædö cæte picæ æmontaicadedē godö pe niñænguināni. Edæ picæ æmontaicadedē pe niñænāni ininque yedæ æninque ætæwo goquinö anguenē. Wæætē edæ æmontai miincadedē pe niñænte ate yedæ æninque tæi æbænāmaï ee ongöñö edæ miimæ tönö æmontaicade adobai ee ongongäimpa, apa quēwēmīni,” ante Itota apænægacäimpa.

Gaido wēñængä beyä cæcæ goyongante

onquiyængä Itota weocoo gampocampa

(Mäadoco 5.21-43; Odoca 8.40-56)

¹⁸Tömēnāni inānite tæcæ apæneyongä wacä tömēnāni odömöincö awēnē inongä inte Itota weca ponte ædæ wææninqe apæncantapa.

—Botö wēñængä baquecä inñömö edæ dobæ wænca cæcampa cæbii. Bitö ponte tömängä ingante gampobi ate quēwencæcäimpa.

¹⁹Angä ēñēninqe Itota inñömö ængæ gantidinqe tömängä tönö goyöna tömängä mīñæ nē godāni godongāmæ godānitapa. ²⁰Idömæ goyönāni edæ wacä onquiyængä wantæpiyæ dote wadepo cōwē wepæ wantæ bidāmaī wææ wæwēningä inñömö ñōwo Itota önōñabæ inö pōninqe tömängä weocoo yæwedecooque gampocantapa. ²¹“Tömängä weocooque gampote waa bawēnēmote,” ante onquiyængä nämä pönēninqe gampocantapa. ²²Gampocä ate Itota dadi emæmonte adinqe,

—Onquiyæmi, wæwēnāmaī ie. Bitö wede pönēnö beyä edæ wantæ bawēnēmipa.

Ante añongä do edæ wantæ bawēnengacäimpa.

²³Itota mänii godinqe awēnē oncönē go guite ayongä nē ööña bai öönāni tönö nanguī ināni cægonte Yæ yæ wædāni inānite adinqe, ²⁴tömēnāni inānite,

—Gä goedāni, äninqe, Inñampa inñömö wēñængä wodi wii æmäwo wængampa. Önonque edæ mö ñongampa.

Angä ēñēninqe tömēnāni, Angantedö amīni, ante tömängä ingante badete todānitapa. ²⁵Ayæ mänii angä taodāni adinqe Itota pö guidinqe wēñængä baquecä wodi ingante pædæ wææmpo bæi ongonde töö æmängä ate wēñængä ængæ ganticantapa. ²⁶Mänömaī cæcä adinqe nē adāni inñömö gode ä gode ä cædāni ate mäninñömö quēwēnāni tömānāni ēñengadānimpa.

Babetamöna inate Itota gampomongä waa adapa

²⁷Itota wadæ gote godömenque goyongä babetamöna tee empo ponte aa pedinqe,

—Awēnē Dabii pæimi inömi inte mönatö imönate pönö waadete waa cæbi æmönæ, ante ancaa aa pedatapa.

²⁸Aa peyöna tömängä edæ oncönē go guicä adinqe adoyömö pö guidatapa. Guida adinqe Itota tömēna inate,

—Mina änö ante nö waa cæquimo, ante pönēmīna.

Äñongante,

—Ao. Awēnē, bitö änö bai cæcæbiimpa, ante pönēmönapa.

²⁹Apæneda ēñēninqe Itota pædæ gopo gampomöninqe,

—Nē pönēmīna inīmīna inte mīna pönenganca do waa bacämīnaimpa.

³⁰Ante añongä edæ tömēna awinca wi æmonte bai adatapa. Itota inñömö edæ,

—Botö cædinö ante apænedāmaī inguēnē quēwēmīnaa. Edæ pæ wēēneyömīna ēñēnāmaī incædānimpa, ante nanguī angantapa.

³¹Ininqe wadæ godinqe Itota nānö äninö ante wii ēñente cædinque tömēna, Itota mänömaī cæcä waa bamontamönapa, ante tömāmæ mäo apæneda ēñengadānimpa.

Wënæ inte wido cæyongä babetadecä iningä tedecampa

³²Wadæ goyöna edæ wënæ tönö cæcä inte babetadecä inongä ingante Itota weca ænte pönäni. ³³Adinque wënæ ingante Itota wido cæyongä babetadecä iningä iñömö edæ do tedecä adinque tömänäni ancai guiñëninque,

—Itota nänö cædö bai mönö idægocabo adocanque incæ dicæ cæcä atamongaa, ante wädänitapa.

³⁴Paditeoidi guiqüënë,

—Wënæidi awënë tönö cædingä inte tömengä wido cæcä apa änewënäni, ante piingadänimpa.

Itota waodäni inänite waadete waa acampa

³⁵Itota iñömö nangui nänäni quëwëñömö ayæ wædænque nänäni quëwëñömö wayömö wayömö godinque Wængongui angä nänäni ëñente yewæmongainta ate odömöincönë go gui go gui cædinque odömongä adänitapa. Ayæ, Mönö Awënë Odeye inguipoga oo ponguinö angüënë, ante nänö waa pönäni äninö ante apænecä ëñënanitapa. Ayæ quiëmë daicawo cæpämö adinque quiëmë wæncæ cæte wæwënö adinque tömengä godö cæcä waa badänitapa. ³⁶Cæningancoo bai waodäni incæ bacoo inäni iñönäni në aadingä dæ angä bai inänipa, ante acantapa. Mänömai inäni inte babæidi wiñaate wædinäni bai ængæ gantidämai inäni bai waodäni incæ wæwëñönäni Itota tömënanäni tönö godongämæ wæwente bai pönengantapa. ³⁷Ayæ tömengä miñæ në godäni inänite apænedinque,

Tömëmoncoo bacoo bai inäni iñönänite tä pete inäni bai në gode änäni iñömö mënäniya pönäni inänipa cæminii. ³⁸Tömëmoncodë gæqui angä Awënë iñongante minitö tömengä ingante apænedinque, Tömëmoncodë në gæquinäni da godömi gote gæte bai äñete poncädänimpa, ante Wængongui ingante apæneedäni, ante Itota apænegacäimpa.

Itota angä ate dote ganca inäni në gode änäni badänipa

(Mäadoco 3.13-19; Odoca 6.12-16)

10 Ayæ ate tömengä miñæ në godäni önompo tipæmpoga go mënäniya mänimpodäni iñönänite Itota äñecä pönäni ate tömengä, Botö pönö cæbo ate minitö në äminäni badinque wënæidi në wentamö ëwocadäni inänite wido cæcæminimpa, angantapa. Ayæ, Quiëmë daicawo gawænäni incæ quiëmë beyæ wæncæ cæte wæwënäni incæ minitö eyepæ inte godö cæminäni ate në wæwëninäni waa bacädänimpa, ante pönö cægacäimpa.

²Itota nänö në da godöninäni önompo tipæmpoga go mënäniya mänimpodäni inänipa, ante adinque, Dote, ante nänäni gocabo inänipa, ante tededänipa. Tömënanäni iïmai ëmönäni inänipa. Tänäda Timönö Pegodo mönö änongä tönö Æntade nänä caya inapa. Ayæ Tebedeo wëna Tantiago tönö Wäö nänä caya inapa. ³Pedipe tönö Batodömëe mënaa inapa. Odömäno awënë beyæ në æwëningä Mäateo tönö Tömato mënaa inapa. Adepeo wengä Tantiago tönö Tadeo inapa. ⁴Wacä, Mönö ömä ingæäimpa, ante në nangui cædingä incæ wacä Timönö ingampa. Ayæ Itota ingante odömönte në godonguingä Codaa Icadote mönö änongä ingacäimpa. Mänimpodäni Itota miñæ nänäni, Dote, ante gocabo inänipa.

Wængonguī Awēnē ingantedō ante apæneedāni, ante Itota angā godānīpa

(Māadoco 6.7-13; Odoca 9.1-6)

⁵Īnīnque Itota mīñæ nāni, Dote, ante gocabo īñōnānite tōmengā, “Mīnitō idæ-goidi īnāmaī īnāni taadō godāmaī inte edæ Tāmadiaidi nāni quēwēñōmō go guī-idāmaī īedāni, ante da godongantapa. ⁶Edæ cæningāidi obegaidi gueogæ gote bai īñōnāni inte mōnō idægocabo taadō oda cædinque tōmēnāni nāni wē womonte wænguinō godānīpa, ante adīnque mīnitō tōmēnāni weca gote cædāni. ⁷Godīnque mīnitō, Ōōnædē Awēnē Odeye oo poncæcāīmpa cæmīnī, ante māo apænemīni ēñencædānīmpa. ⁸Ayæ quīēmē beyæ nantate wæwēnāni adīnque godō cæmīni ate waa bacædānīmpa. Do wænīnāni īnānite godō cæmīni ate nāni ōmæmoncædānīmpa. Baate īnāni īnānite godō wadæ caamīni waintai baacædānīmpa. Wēnæidi inte godō wido cædāni. Botō ōnonque ānāmaī inte pōnō cæbo ænīmīni inte mīnitō botō cæbo bai adobaī cædinque wadāni īnānite ānāmaī inte ōnonque godō cæmīni æncædānīmpa,” ante Itota angantapa.

⁹Ayæ, “Mīnitō gocæ cædinque, Godonte æinta, ante tīguitamō incæ oodo incæ pa-data incæ edæ wente æincadedē da wente ænāmaī īedāni. ¹⁰Edæ wadāni beyænque nē cæcā īñōmō tōmengā eyepæ ænte quēwencæcāīmpa cæmīnī. Māīncoo da wenguīncade ænāmaī inte goedāni, Weocoo mīni ēñācooque ēñate awæncata mīni ēwataque ewate ongonto mīni nææntoque næænte goedāni,” angantapa.

¹¹Ayæ apænedīnque Itota tōmengā mīñæ nē godāni īnānite angantapa. “Nan-guī pōnī nāni quēwēñōmō incæ wædænque īnāni nāni quēwēñōmō incæ mīnitō mānīñōmō go guīdīnque waocā nē nō cæcā ingante ante dīquī mīnte adīnque māningā oncōnē go guīte owodīnque wayōmō mīni go quēwenganca mānīncō-nenque quēwēedāni. ¹²Mānīncōnē go guīdīnque, Īñānāni, waa quēwēedāni, æedāni. ¹³Ayæ ānīnque, Mīnitō weca æbānō pō guīte quēwenguīmōnī, āñōmīni Ao ānāni ate mīnitō tōmēnāni weca go guīte gānē pōnēnīnque ee quēwēedāni. Wæætē nō cædāmaī īnāni adīnque mīnitō edæ ee quēwēnāmaī edæ wadæ gomīni wæcædānīmpa. ¹⁴Edæ, Pōedāni, ānāmaī īnāni adīnque ayæ mīnitō apænemīni ēñēnāmaī īnāni īnīnque mīnitō wæætē tōmēnāni oncodo tao godīnque, Mīnitō quēwēñōmō nāwate awædō, ante odōmoncæte ante cædinque ōnōwa wadæ wadæ cæwate wadæ goedāni. ¹⁵Edæ nāwangā āmopa. Botō apænte anguīōnæ īñonte Todōmā īñōmō quēwengāīnāni tōnō Gōmoda īñōmō quēwengāīnāni tōnō nanguī pante wæwēñōnāni mīnitō īmīnite nē Baa ānāni guīquēñē godōmenque pante edæ wæwencædānīmpa,” ante Itota tōmēnāni īnānite da godongā godānītapa.

Togænte pancædānīmpa, ante

¹⁶Ayæ ānīnque Itota, “Cōwā æedāni, angantapa. Mīnitō īñōmō nē cæningāidi bai īñōmīnite botō īñōmō mēñe bai īnāni weca da godōmo godīnque mīnitō tæntæ nāmā wææ cæcæte ante nānō ēñente cæbaī adobaī ēñente cædāni. Wæætē edæ equemō nānō ee cæbaī mīnitō adobaī pīīnāmaī inte ee cæte quēwēedāni. ¹⁷Ayæ edæ mīnitō īmīnite bæi ongōnīnque waodāni tōmēnāni nē apænte ānāni weca māo pædæ godōnāni æncædānīmpa. Ayæ godōmenque tōmēnāni odōmōīncōnē māo ænte godīnque mīnitō īmīnite tæi tæi pancædānīmpa cæmīnī. Īnīnque mīnitō edæ, Æbānō cæquīnānī, ante do ēñēmīni inte edæ nāmā wææ aedāni. ¹⁸Ayæ, Awēnēidi tōnō nē ēñēnāmaī īnāni adobaī ēñencædānīmpa, ante cædinque botō āmo ēñē-

inque mīnitō īmīnite māo pancabaa awēnēidi gobedōnadodoidi weca ayæ tōmāmæ awēnēidi odeyēidi weca gōnōnāni gongæninque mīnitō botō beyæ apænecæmīnīmpa. ¹⁹ Māniñedē tōmēnāni nāni ænte māo gōnōñedē, Quīnō baī apænequīmoō, ante guīñēnete wædāmaī īedāni. Māniñedē edæ quīnō baī apænequīī, ante do ēñencæmīnīmpa. ²⁰ Īñæmpa wīī nāmā pōnēninque apænequīmīni wæætē mōnō Wæmpo Ōnōwoca incæ apænecā ēñēninque apænequīmīni īmīnīpa,” ante Itota apænecacāīmpa.

²¹ Ayæ godōmenque apænedīnque Itota, “Māniñedē edæ nāna caya īñōnate adocanque nāēmæ pīīnīnque, Wænoncæ, ānīnque tōmengā tōniñacā ingante da godongā gocacāīmpa. Nāna wencaya īñōnate mæmpocā īñōmō nāēmæ pīīnīnque, Wænoncæ, ānīnque tōmengā wengā ingante da godongā gocacāīmpa. Ayæ wēñānāni incæ wæmpoda īnate nāēmæ pīīnīnque māo apænedāni ēñēninque wadāni tōmēnāni wæmpoda īnate māmō wænōnāni wæncædaīmpa. ²² Ayæ, Coditoidi īmīnīpææ, ante tōmānāni botō ēmōwo beyænque mīnitō īmīnite nangui pīīncædānīmpa. Pīīnāni wæwēmīni incæ æcānō īīmæca īīnque baganca wæntædāmaī inte botō ēmōwo beyæ pīīnte badāmaī ingāā tōmengā ingante botō æmo beyænque quēwencæcāīmpa. ²³ Māniñedē ate wadāni togænte pancæte ante mīni quēwēñōmō pōnāni ate wædinque mīnitō īñōmō wayōmō wadāni nāni quēwēñōmō wodii winōedāni, āmopa. Edæ nāwangā āmopa. Edæ mōnō Idægobæ wayōmō wayōmō wodii winōnīnque pancayōmōnga goyōmīni botō Waobo ēñagaīmo inte edæ do poncæboīmpa,” ante Itota apænecacāīmpa.

²⁴ Ayæ, “Nē odōmongā ingante pīīnte cæyōnāni tōmengā mīñæ nē gocā ingante edæ ædō cæte pīīnte cædāmaī inguīnānīi. ²⁵ Awēnē nē odōmongā wæwente quēwēñongā tōmengā mīñæ nē gocā guīquēnē ædō cæte wæwēnāmaī quēwenguīngāā. Edæ nē cæcā tōmengā awēnē baī bacā īīnque idæwaa edæ īmāīmpa. Botō oncō ēacā baī nē Awēnē īmo īñōmote wadāni, Wēnæ awēnē Beedeboobi īmidō anguēnē, ante pīīnāni incæ mīnitō botō tōnō mīni quēwencabo īñōmīnite wadāni godōmenque wēnæ wēnæ ante pīīncædānīmpa,” ante Itota apænecā ēñengadānīmpa.

Guīñēnāmaī īedāni, ante

(*Odoca 12.2-7*)

²⁶ Ayæ apænedīnque, “Incæte tōmēnāni īnānite guīñēnāmaī īedāni. Īñæmpa, Adāmaī incædānīmpa, ante quīēmē wē womonte ī incæ īīncayæ ate tōmāā wi ænete bayonte edonque pōnī bacæīmpa. Ayæ quīēmē awēmō cæteī incæ īīncayæ ate edonque pōnī acædānīmpa. ²⁷ Botō wēmō īñōmō mīnitō īmīnite apænēbo ēñente ate mīnitō botō apænedō ante nāō apāiyōmō apænecæmīnīmpa. Ayæ godō wæntæ botō ānīnō ēñente ate mīnitō æībæ oncōmanca æīdīnque ogæ tedete apænēmīni ēñencædānīmpa. ²⁸ Ayæ nē baonque wænōnāni inte ōnōwoca wænōnāmaī īnāni īnānite adīnque mīnitō tōmēnāni īnānite guīñēnāmaī īedāni. Wæætē edæ baō tōnō ōnōwoca tadōmengadænguīpo nē ōmæe ēwēnongā ingante guīquēnē mīnitō tōmengā ingante guīñēnēte wæedāni.”

²⁹ Ānīnque, Itota godōmenque apænecantapa. “Wacā ayamōīdi ōnōmpo æmæmpoque mānīmpodāni beyæ tīguitamō adotamonque ante pædæ godongā amīnitawo. Incæte mīnitō Mæmpo ānāmaī īñonte ayamō adocanque incæ yæīpodē wæēnāmaī ingampa. ³⁰ Mōnō ocaguī incæ æpoguīnō encamōō, ante Mæmpo Wængonguī do ēñēninque mōnō īmōnte aacampa. ³¹ Edæ, Ayamōīdi bacoo pōnī īīnque ōnonque

inänipa, ante nē äningä inte mönō Mæmpo inōmō mīnitō imīnite wæætē waa acā apa guinēwēminii,” ante Itota apænecäiŋpa.

Waadäni ēñēñönäni mönō Itota ingante Ao angäiŋpa, ante

(Odoca 12.8-9)

³² Godömenque apænedinque Itota, “Æcänō waodäni ēñēñönäni botō imote Ao äninque, Bitō botō Awēnē inōmi imipa, ante äna tömengä öönädē æiyongante botō tömengä ingante wæætē edæ Ao äninque, Bitō inōmō botō miñä nē gogaïmi inōmi imipa, ante botō Mæmpo ēñēñongä ancæboiŋpa. ³³ Wæætē waodäni ēñēñönäni botō imote nē Baa angaingä ingante guiquēnē botō Mæmpo öönädē nē quēwengä ēñēñongä botō tömengä ingante adobaï edæ Baa ancæboiŋpa,” ante Itota apænecäiŋpa.

Botō beyænque guëa piincädäniŋpa, angampa

(Odoca 12.51-53, 14.26-27)

³⁴ Ayä apænedinque Itota, “Inguipoga quēwēnāni piyänē cæte wæætēdō wæætē cädämaï inte quēwencädäniŋpa, ante cæcæte ante Itota imæca pongaingä ingampa, ante mīnitō pönēmīnitawo. Inæmpa yaēmē näænte bai pōmo imopa.

³⁵ Botō apænedō beyä onguinäna nāna wæmpocaya incæ näëmä piincädäiŋpa, ante pōmo imopa. Onquiyäna adobaï nāna badancaya incæ näëmä piincädäiŋpa. Nāna wæntecaya incæ näëmä waadedämaï inte piincädäiŋpa, ante pōmopa. Mänōmaï cæbo imopa, ante pönēmīniyaa. ³⁶ Inique, botō änō beyä nāni owocabo incæ näëmä waadedämaï piincädäniŋpa,” ante apænecäiŋpa.

³⁷ Ayä apænedinque Itota iïmaï apænecantapa. “Edæ æcänō mæmpo tönō wäänä inate ædæmō waadedinque botō imote wæætē pönömenque waadeda inōmō tömengä inōmō botō nē emiñängä ædō cæte baquingä. Adobaï wēñängä ingante ædæmō waadedinque botō imote pönömenque nē waadecä inōmō tömengä wæætē botō nē emiñängä ædō cæte baquingä. ³⁸ Ayä æcänō botō miñä pöinēna tömengä inōmō edæ, Awæ botō wænguiwæ, ante näænte ponte bai cædinque, Wänönäni wæmo incæte Itota miñä cōwē gocæboiŋpa, ante poncæcäiŋpa. Wæætē æcänō mänōmaï cädämaï ina guiquēnē tömengä ædō cæte botō nē emiñängä inguingä. ³⁹ Æcänō nāmanque pönente, Imæcaque waa quēwenguïmo, ante änaa tömengä inōmō quēwēnāmaï incæcäiŋpa. Wæætē edæ, Wæmo incæ wæwëmo incæ botō öönädē Awēnē angä ēñente cōwē cæcæboiŋpa, ante æcänō äna guiquēnē tömengä inōmō edæ cōwē quēwencæcäiŋpa,” ante Itota apænecäiŋpa.

Nē pönengä nänō waa cædinō beyä eyepä æncæcäiŋpa

(Mäadoco 9.41)

⁴⁰ Ayä apænedinque, “Mīnitō imīnite Ao äninque waocä botō imote do edæ Ao äningä ingampa. Ayä botō imote Ao äninque botō imote nē da pönongaingä ingante do edæ Ao äningä ingampa. ⁴¹ Wængongui beyä nē apænecä ingante bitō, Wængongui beyä nē apænēbi inte pōe, ämi inique Wængongui beyä nē apænecä nänō paga ænganca bitō adopo æncæbiŋpa. Ayä nē nō cæcä ingante, Bitō nē nō cæbi inte pōe, ämi inique nē nō cæcä nänō paga ænganca bitō adopo æncæbiŋpa. ⁴² Näwangä ämopa. Bitō Itota miñä nē gobi inte æpæ becæbiŋpa, ante bitō guiyangä ingante

pædæ godömi ængä inique bitö godöni beyæ eyepæ æncæbiimpa,” ante apæned-
inque Itota tömënäni inänite da godongä gogadänimpa.

Wäo tömengä miñæ nē goda inate da pönongä pönapa

(Odoca 7.18-35)

11 Ayæ tömengä miñæ nāni, Dote, ante gocabo inänite iinque apænedinque
Itota wadæ godinque tömënäni nāni quëwëñömö odömoncæte ante ayæ,
Ëñencädänimpa, ante apænecæte ante wayömö wayömö gocantapa.

²Mäniñedē edæ Wäo iñömö tee mönete ongöñongante wadäni tömengä weca pön-
inque, Mönö Codito iimaï cæcampa, ante tededäni ëñente wædinque Wäo wæætē
tömengä miñæ goda inate Itota weca da godongä godatapa. ³Iinque Wäo beyæ
ancæte ante pöninque tömëna iimaïnö ante Itota ingante apænedatapa.

—Bitö iñömö dodäni nāni, Nē Ponguingä, ante nē angaimi adobi imitawo. Wæætē
tömënäni nāni nē angaimi inämaï imi inique bitö wæætē, Wacä ponguingä,
ante wänö cödäni, ämitawoo. Æbänö mönitö cæquimönii, ante ëñencæte ante
wæmönipa.

⁴Ante äñönote Itota wæætē, “Minatö ponte ëñëñömina botö æbänö apænebo
ëñëminatawo, ante ayæ, Botö æbänö cæbo aminatawo, ante minatö wæætē Wäo
weca gote mäo apænemina ëñengæda. ⁵Botö godö cæbo ate babetamö ininäni incæ
waa bamonte adäni aminapa. Cömante ininäni incæ waa bate dao dao godäni ami-
napa. Baate ininäni incæ æmontai waëmонтаi baadäni aminapa. Babetamonca inäni
iñönänite botö godö cæmömo ate önömonca waa bamoncate ëñëñäni aminapa. Do
æmæwo wænte önönäni iñönänite botö godö cæbo ate nāni ömæmönäni aminapa.
Ömaadäni inte wæyönänite botö Wængongui waa pönï nänö pönö cægainö ante
apænebo ëñente todäni aminapa. ⁶Ayæ, Botö beyæ waocä wii püinte wadæ gocä
iñömö tömengä watapæ nänö quëwenguinque edæ oda cædämaï incæcäimpa, ante
apænebo ëñëninque minatö Wäo ingante mäo adodö ante apænemina ëñengæda,”
ante Itota angantapa.

⁷Angä ëñëninque Wäo beyæ nē äñina wadæ goyöna edæ Itota wæætē tömänäni
inänite, Wäo æbänö ingää, ante apænecantapa. “Minitö guiquenē quïnö acæte ante
önömæca gominitapa. Cæwipa woboyæ pæmænte ate æmænö ædæ æmænö ædæ
gobaingä ingante minitö dicæ acæ gominitawogaa. ⁸Iinque edæ quingänö ingante
acæte ante gominitapa. Waocä weocoo waëmoncoo mongængä ingante minitö
dicæ acæ gominitawogaa. Iñæmpa waëmoncoo mongængä iñömö awënë oncönē
quëwengä apa quëwëñänii. ⁹Iinque edæ quinante gominitawo. Minitö mini nē go
acæ cædongä iñömö edæ Wængongui beyæ nē apænecä ingantawo. Näwangä impa.
Wængongui beyæ nē apænecä Wäo ingampa. Incæte tömengä wii Wængongui beyæ
nē apænëgainäni bai inongä inte godömenque nangui cæcä ingampa, ante apænebo
ëñëmaimäni. ¹⁰Wængongui iimaï angampa, ante yewæmongatimpa.

‘Botö beyæ nē apænecä ingante da pönömo pöninque tömengä taadö täno beyænte
bai cæcæcäimpa.

Tömengä bitö Codito imi beyæ ante taadö waa pinonte bai waa cæcæcäimpa.’

Mänömaïnö ante dodäni adocä Wäo ingantedö ante pönëninque yewæmongadän-
impa. ¹¹Nöwo iñömö ämo ëñëedäni. Imæca mini ëñagaincabo iñöminite apænē
mönö nē guidönongä Wäo adocanque nñænængä iñongante wacä tömengä bai
edæ dæ angampa. Incæte öönædē Awënë Odeye nempo quëwëñäni iñönäni ado-

canque guiyangä pöní ingä incæte Wäö pönömenque wædangä ingampa,” ante Itota apænecantapa. ¹² Ayä iimaí ante godömenque apænecantapa. “Wäö tãno nãno apænedöñedë ayä godömenque ñowo ganca tæi piñænãni pogodo pöningue, Öönädë Awënë Odeye nempo mönö wäänë guicæimpa, ante tee tate guuite bai cædinque, Mönö Awënë incæcæimpa, ante edæ ö ænte bai cædãnipa. ¹³ Edæ Wængongui beyä nê apænegainãni tönö, iimaí cæedãni, ante nê wææ angaingä tönö tömënãni tömãnãni edæ, Awënë poncæcæimpa, ante cöwë Wäö nãno ponganca apænegadãn-
impa. ¹⁴ Ìnningue, Ediya wodi ayä poncæcæimpa, ante nãni nê ãnongä Wäö iñömö adocã ingampa, ante pönëminiyaa. ¹⁵ Èamonca ongonte ëñeedãni,” angantapa.

¹⁶ Godömenque apænedinque Itota iimaí angantapa. “Inguipogaque ante nê quëwënãni iñömö quingãmë bai inãnipa. Quiëmë bai edæ quëwënãnipa. Wëñænãni mönö godonte æiñömö tæ contate owempodãni nãni owempodö bai edæ adobai cædãnipa, ante awædö. Wëñænãni nãni owempote cæcabo incæ ææmæ cæte bai owempote cædinque wadãni inãnite aa pedãnipa. ¹⁷ ‘Minitö beyä ööña we we ööñömöni minitö wæætë edæ äwadãmai iminitapa töö,’ ante owempodique wëñænãni piinte tedewënãnipa. Ayä wæætë, Waocã do wængä ate nãni wæbai ante wëñænãni nãni owempote cæcabo iñömö, ‘Mönitö Ca ca wæyömöni minitö wæætë edæ wædãmai imini wæmönipa,’ ante piinique aa pedãni bai ñowodãni iñömö edæ adobai piinte tedewënãni inãnipa. ¹⁸ Iimaí edæ impa. Wëñænãni nãni wædö bai Wäö iñömö cængui cænãmai tepæ bedãmai ponte quëwëñongante ñowodãni guiquënë, Wënæ tönö Wäö quëwengampa, ante piinãnipa. ¹⁹ Ayä wæætë botö Waobo ëñagaimo inte edæ ponte nê cænte bete quëwëmo adinque botö imotedö ante minitö iñömö, Cæowæobi inte cæmipa. Beowæobi inte bebipa, ante badete tomìnipa. Ayä godömenque, Odömãno awënë beyä nê æwënãni tönö nê ëñënãmai cædãni iñönãnite bitö tömënãni æmigo imipææ, ante botö imote piinique minitö wëñænãni nãni piinte aa pedö bai anewëminipa töö. Incæte, Nê nö ëñënãni iñömö nö cædãnipa, ante adinque, Nãwangä nö ëñënãnipa, ante mönö ëñengæimpa,” ante Itota apænegacæimpa.

Në ëñënãmai cædãni inãnite Itota piingampa

(*Odoca 10.13-15*)

²⁰ Ayä, Minitö quëwëñömö botö bamönengæ nanguí cæbo adimini incæ minitö wënæ wënæ mini cædinö ante, Ancaa wæwente awædö, ante dicæ wæminitawogaa, ante piinique Itota wayömö wayömö tömengä nãno nanguí cædiñömö quëwënãni inãnite iimaínö ante mã piingantapa. ²¹ “Codatü iñömö quëwëmini ëñeedãni. Betaida iñömö quëwëmini ëñeedãni. Minitö mini wæwenguinque ëñënãmai cæte quëwëminidö anguënë. Edæ botö minitö weca tæi piñænte botö cædi bai Tido nãni quëwengaiñömö Tidö nãni quëwengaiñömö adobai cæbo bai mãniñömö quëwengainãni iñömö tömënãni dobæ wënæ wënæ nãni cægainö ante ñimpo cædinque weocoo gömæ ëmoncoo wëñadinque gönai öni pæcate Ca ca wæcægadãnimpã. ²² Ìnningue minitö iminite ämopa. Wængongui nãno apænte anguiönæ iinque bayonte Tido iñömö quëwengainãni tönö Tidö iñömö quëwengainãni inãnite nanguí pangä wæwënãni incæte tömengä minitö iminite godömenque pangä wæwencæminimpã. ²³ Ayä Capënaömö iñömö quëwëmini ëñeedãni. Minitö iminite Wængongui dicæ öönädë wo ææntodongä æi gote toquiminiyaa. Ìñæmpa tadömengadænguipo wææntodongä guii wæcæminimpã. Edæ botö minitö weca tæi piñænte botö cædi bai

Todömä näni quëwengaiñömö adobaï cæbo bai tõmënäni näni quëwengaiñömö edæ godömenque nõwo ganca edæ mä ongoncædönimpa. ²⁴ Ìnque edæ ämo ëñeedäni. Wængongui nänö apænte anguiönæ iinque bayonte Todömä quëwengaiñäni inänite nanguï pangä wædäni incæte mïnitö imïnite godömenque pangä wæcæmïnimpa,” ante Itota tõmënäni inänite piingacäimpa.

Botö weca pö guëmæedäni, angampa

(Odoco 10.21-22)

²⁵ Ayæ mäniñedë Wængongui ingante apænedinque Itota, “Mæmpo ëñëmi. Wadäni nämä ocai encadäni tõnö nanguï adinque nê ëñënäni tõnö mäninö bitö ëñengainö ante ëñënämaï incädänimpa, ante cædinque bitö cægainö ante wë wodonte bai pæ wënegabiimpa. Wæætë edæ wëñænäni nänö pönönö bai nê pönënäni inänite wæætë bitö edonque odömömi adinque do ëñënänipa. Bitö öönædë Awënë ingaimi inte inguipoga Awënë adobi inömi inte edæ mänömaï cæbipa, ante adinque botö bitö imite waa ate pönëninque apænebopa. ²⁶ Mæmpo, bitö tõmëmi änö bai cædinque waa cæbi adinque botö Ao ämopa,” ante Wængongui ingante waa apænegantapa.

²⁷ Wængongui ingante iinque apænedinque Itota godongämæ ongönäni inänite wæætë apænegantapa. “Botö Mæmpo nõ ëñengä inte pönö odömongä beyænque botö iñömö tõmänö ante nê ëñëmo imopa. Ayæ, Botö tõmengä Wëñæmo iñömote botö Mæmpoque botö imote nê againgä iñongante wadäni adämaï inänipa. Wæætë edæ Mæmpocä ingante botö tõmengä Wëñæmo inömo inte adoboque nê agaïmo imopa. Ìnque, Botö abo bai iñänique adobaï ate bai pönencædänimpa, ante cædinque botö mïnitö imïnite odömömo adinque mïnitö adobaï Mæmpocä ingante nê ate bai pönëmïni bamïnipa.”

²⁸ “Teëmë mongænte bai nangæ batawëmïni iinque mïnitö botö weca pömïni ate botö wæætë teëmë mongænte mïni wæwënö ante ö æmo ate mïnitö wæætë gancæ pönente guëmancæmïnimpa. ²⁹ Edæ botö mïmöno gänë pönëninque nämä beyænque änämaï quëwëmo adinque mïnitö botö weca pömïni iinque botö mïnitö tõnö iñacabo cæcæboimpa. Edæ wagadada awæmpaa goti wïmoncate äämencaque goda bai möna guëa cæcaya bayömöna botö nõ ëñënömo inte pönö odömonte apænebo ëñëninque mïnitö önöwoca wampo pönente guëmancæmïnimpa. ³⁰ Edæ botö tõnö äämencaque bai cædinque bitö iñömö oo wïmoncadimpa mongænte bai edæ do cæcæbiimpa. Botö mongæncoo wodæï iñonte bitö wæætë edæ wodæï mongænte gote bai nangæ badämaï incæbiimpa,” ante Itota iinque apænegacäimpa.

Guëmanguïönæ iñonte tõmëmö tä pete ænänipa

(Müadoco 2.23-28; Odoco 6.1-5)

12 Mäniñedë guëmanguïönæ iñonte Itota tõmëmoncodë tæcæguedencodë go-cantapa. Goyongä tõmengä miñæ nê godäni guiquënë gæwænte wædinque tõmëmö tä pe tä pe æninque tæcæ cænca cædäni. ² Adinque Paditeoidi guiquënë Itota ingante wæætë,

—Bitö miñæ nê godäni æbänö cædänii, ante cöwä aquënë. Ìñæmpa, Guëmanguïönæ iñonte mäninö bai cædämaï iedäni, ante dodäni näni wææ angainö ante ëñënämaï inte iñäni iñömö do cædänipa töö.

³ Ante piñönänite Itota,

—Minitö iñæmpa docä Dabii wodi tönö godongämæ godäni tönö gæwænte wædäni iñinque tömengä æbänö cægacäi ante yewæmonte ongö incæte minitö iñömö adämaï inte bai änewëmini awædö. ⁴Tömengä iñömö Wængonguï oncönë go guicantapa. Mänincönë, Wængonguï quï, ante në godönäni cænguï impa, ante wææ nani angainö bai cædinque tömënäni, Wængonguï quï, ante päö ñoncæ ñoncæ cædönänimpa. Incæte mänii päö wii Dabiidi cænguï iñi incæ Dabii do cægantapa. Ayæ tömengä tönö cægönäni adobaï godongämæ cængadänimpa. ⁵Ayæ, Wængonguï quï, ante në godönäni iñömö Wængonguï oncönë ñænæncönë iñömö önönæque nani cæbai guëmanguïönæ iñonte adobaï cædäni incæte wentamö entwënämaï önonque cæcädänimpa, ante Möitee wodi wææ yewæmongacäimpa. Minitö iñömö mäninö ante adämaï inte bai änewëminipa töö, angantapa.

⁶“Ayæ apænebo ëñëdäni. Minitö, Wængonguï oncö ñænæncö waa pöni ongoncompa, ante ayömini edæ botö ñöwo minitö weca në ongömo guiquënë wii Wængonguï oncö bai ongömo inte wii önömoque ongömopa. Wæætë edæ nämä nö cædömo inte botö iñömö edæ godömenque waa pöni ongömo apa quëwëmini. ⁷Incæte, Wængonguï iimainö ante apænecampa. ‘Wængonguï quï, äñinque mini iya tånö ante pönömenque waa adinque botö në waadete mini godö waa cædö ante godömenque waa abopa,’ ante Wængonguï angampa. Ìinque minitö iñömö Wængonguï nänö angainö ante ëñëmini inte bai iñäni wentamö mongænämaï iñönänite, Mini pante wæquinque mänömaï cæminipa, ante apænte piinämaï incædöminimpa. ⁸Botö iñömö Waobo në ëñagäimo iñömö Tæiyæ Awënë inömo imopa. Ìinque botö në guëmanguïönæ Awënë inömo inte edæ, Guëmanguïönæ iñonte edæ æbänö cæquii, ante adobo në Ämo imopa,” ante Itota apænægacäimpa.

Ni cömampoingä

(Mäadoco 3.1-6; Odoca 6.6-11)

⁹Äñinque wadæ godinque Itota iñömö Wængonguï angä nani ëñente yewæmongainta ate oodeoidi nani odömöincönë go guigacäimpa. ¹⁰Mäniñömö ni cömampoingä a ongongå adinque Paditeoidi guiquënë, Itota wapiticæ cæcä iñinque mönö mao piinte angæimpa, ante në äñäni inte tömengä ingante äñänitapa.

—Guëmanguïönæ iñonte wacä waa bacæcäimpa, ante cædäni, ante Wængonguï wææ angantawo.

¹¹Ante Itota ingante äñönänite tömengä wæætë,

—Guëmanguïönæ iñonte waocä tömengä cæningä ontatodë goyæ guii adinque mini waocabo imini incæ æcämë pædæ guipote äñämaï imaingä. ¹²Cæningä önonganque iñongante waocä iñömö waemö pöni ingampa, ante adinque guëmanguïönæ i incæte waodäni beyæ cöwë waa cæcäimpa, ante ämo ëñëmaiminipa.

¹³Äñinque ni cömampoingä ingante wæætë,

—Pædæ pompobi, angä.

Ëñëninque tömengä pædæ gopodinque æmæmpo bai waa empocä bacantapa.

¹⁴Adinque edæ Paditeoidi guiquënë wadæ godinque, Æbänö cæte tömengä ingante wænömö wænguingä, ante godongämæ pönëninque tedegadänimpa.

Codito æbänö cæquingä, ante Itaiya nänö apænëgainö

¹⁵Tömënäni, Wæñongæimpa, ante pönente tededäni wædinque Itota iñömö wadæ gocantapa. Wadæ goyongä tæiyëñäni tee empo godäni ate wædinque tömengä godö

cæcä ate nê wênæ wênæ inte wæwêninâni tōmânâni waa badânitapa. ¹⁶ Ayæ nê waa badinâni inânite, Minitō, Botō æbodō imo, ante mæo apænedæmaï iedâni, ante wææ angantapa. ¹⁷ Ìninqe Itaiya wodi Wængongui beyæ nê apænecä iïmainō ante nânō yewæmongainō bai iinque cætimpä.

¹⁸ “Wængongui iïmaï ante apænecampa. Botō imote nê cæquingä incæcäimpa, ante botō nê apænte ænongä iñömō a ongongä aedâni.

Adocä botō nê waadedongä iñongante botō tōmengä ingante adinque watapæ tobopa.

Botō Önōwoca ingante da pönōmo ænte ewocadinque botō imo nê cæcä iñömō, Botō nō cæte apænte ancæboimpa, ante tōmengä oodeoidi inâmaï inâni inânite mæo apænecæcäimpa.

¹⁹ Incæte tōmengä wii wæætedō wææte piincæcäimpa. Ogæ tededæmaï incæcäimpa. Waodâni taadō godinque tōmengä dicæ Yæ yæ ante tedecä ëñenâniyaa.

²⁰ Cæwipa bede næænimpa wä tadæmaï inâni bai waocä wæwengä iñongante tōmengä adobai nê wæwengä ingante wido cædæmaï ingampa.

Ayæ gongapæncade cōmencagui mini tente tēemāmoque go adinque pi ongömōnâmaï inâni bai tōmengä adobai waocä wæntæye bayongante tōmengä ingante godō piinâmaï ingampa.

Adocä botō imote nê cædongä ingaingä inte tōmengä nê Awënë nânō baganca cōwë nõingä ante apænte äninque cōwë waa cæcæcäimpa.

²¹ Ayæ botō imote nê cædongä nê Awënë bacä adinque wadâni oodeoidi inâmaï inâni incæ, Tōmengä emōwo beyænque mōnō quëwengæimpa, ante pōnencædänimpa,”

ante Itaiya wodi Wængongui beyæ nânō yewæmongainō bai Itota mōnō Codito nōwo ponte waa cæcä ingampa.

Wênæ tönō cæcä imaingampa, ante wapiticæ änänipa

(Mäadoco 3.20-30; Odoca 11.14-23, 12.10)

²² Mäniñedë wacä wênæ tönō quëwënongå inte babetamongä babetadecä badingä iñongante wadâni tōmengä ingante ænte mämōnâni pongä adinque Itota godō cæcä ate tōmengä awinca adinque nê tedecä bacantapa. ²³ Cæcä waa bacä adinque tōmânâni, Æbânō cæcää, ante guiñente wædinque, “Awënë Dabii wodi pæingä wabânō imaingampa,” ante pōnente wægadänimpa.

²⁴ Mänōmainō ante wædâni ëñeninqe Paditeoidi guiquënë, “Ìñæmpa wænæidi awënë Beedeboo tönō nê cæcä inongä inte Itota wænæidi inânite wido cæbaingampa,” ante tedewënanitapa.

²⁵ Wapiticæ tōmënâni pōnënō ante ëñente wædinque Itota tōmënâni inânite, “Awënë odeye nempo quëwënâni iñömō næëmæ wæætedō wææte cædâni ininque awënë odeye nânō omædempote wæquinque tōmënâni nämä ewente cæbainänipa. Ayæ adocōnë owocabo incæ adoyōmō godongämæ quëwëninâni incæ næëmæ wæætedō wææte cædâni ininque tōmënâni oncō woquinque nâwæ gobainänipa. ²⁶ Ayæ Tatâna nempo quëwënâni iñömō edæ næëmæ piininqe wæætedō wææte cædinque tōmengä ingante wido cædâni ininque Tatâna dicæ tōmënâni awënë odeye imaingää. ²⁷ Minitō, Beedeboo tönō cædinque Itota wænæidi inânite wido cæcampa, ante tedewëminipa. Mäninō mini anewënō nâwangä i bai minitō miñæ nê godâni guiquënë æcânō tönō cæte wido cædâni. Ininque minitō miñæ nê godâni incæ mini

ānewēnō beyænque ante näēmä pīninqe mīnitō īmīnite wæætē apænte āninqe pīncædānīmpa angüenē. ²⁸ Botō īñōmō Wængonguī Ōnōwoca tōnō cæte wēnæidi īnānite wido cæbo apa ānewēmīni. Mānōmaī ī īninqe botō Wængonguī Awēnē Od-eye īnōmo inte mīnitō weca do pōmo aedāni,” ante Itota apænegacāīmpa.

²⁹ Ayæ apænedīnque tōmengä, “Nē tæī pīñængä ingante wīī goto wīninqe waocä ædō cæte tōmengä oncōnē guiite māīncoo ö ænguingäā. Edæ nē ēacä ingante bæi ongote goto winte ate pō guiite ö ænāni baī botō īñōmō wēnæ inte nē bæi ongote wido cæbo īmpa,” angantapa.

³⁰ Ayæ, “Botō tōnō æcānō wīī godongāmæ cæcä īñōmō tōmengä īñōmō edæ Baa ante botō īmote pīīnte cæcä ingampa. Ayæ botō, Waodāni botō miñæ poncædānīmpa, ante cæyōmo waocä botō tōnō wīī cæcä īñōmō tōmengä wæætē botō miñæ poncæ cæyōnānite tatodongä wadæ godānīpa,” ante apænecantapa.

³¹ Ayæ, “Īninqe apænebo ēñeedāni, angantapa. Mīni waocabo wēnæ wēnæ cæmīni incæ Mæmpo Wængonguī ingantedō ante babæ ante godō wīwa āmīni incæte Wængonguī wæætē tōmānō beyæ pōnō nīmpo cæcä beyænque quēwencæmīnīmpa. Wæætē edæ Wængonguī Ōnōwoca ingante babæ ante godō wīwa āmīni īninqe Wængonguī mānīnō ante cōwē nīmpo cædāmaī incæcāīmpa. ³² Ayæ botō Waobo ēñagaiīmo īñōmote botō īmotedō ante waocä pīninqe adodeque angä incæte Wængonguī godō nīmpo cæcä ate quēwencæcāīmpa. Wæætē botō Tæiyæ Waēmō Ōnōwoca ingantedō ante æcānō pīninqe babæ āna guiquenē tōmengä īnguipoga nānō quēwengāñedē incæ wænte ate nānō goyedē incæ Wængonguī tōmengä nānō wēnæ wēnæ ānīnō ante cōwē nīmpo cædāmaī incæcāīmpa,” ante Itota apænegacāīmpa.

Awæ æbānō īwæ, ante tōmenca bete ēñengæīmpa, ante

(Odoca 6.43-45)

³³ Ayæ waomō mōnō cædinō ante awæ incate baī īmpa, ante odōmoncæte ante Itota īīmaī ante apænegacāīmpa. “Awæ æbānō īwæ, ante ēñencæte ante mōnō tōmenca tā pete bete ēñengæīmpa. Awæ waiwæ īwæ īninqe tōmenca wainca incaquīwæ īmpa. Wæætē awæ baawæ īwæ īninqe edæ tōmenca baaca incaquīwæ īwæmpa, ante ēñengæīmpa. ³⁴ Mīmōnē mōnō pōnēmāmo eyede tate baī tao godedīnque mōnō mānīmāmoque ante pōnēninqe tedemompa. Īninqe mīnitō tæntæ pæīmīni baī īmīni īñōmō wīwa cæte quēwēmīni inte mīnitō ædō cæte waa ante apænequīmīni. ³⁵ Ayæ waa pōnī māīncoo da wente ate tadonte ænāni baī cædinque nē waa cæcä īñōmō mīmōnē waa pōnī nānō entawēnīnō ante pōnēninqe waa pōnī tedete waa cæcampa. Nē wīwa cæcä guiquenē mīmōnē wīwa nānō entawēnīnō ante pōnēninqe wīwa tedete wēnæ wēnæ cæcampa.”

³⁶ “Edæ apænebo ēñeedāni. Wængonguī tōmengä nānō apænte anguiōnæ īñonte, Mānīne quīnante ōnonque tedebītawo, ante angä ēñēninqe mīni waocabo edonque apænequēnēmīni īmīnīpa. ³⁷ Īninqe mīni tedepāmo tōmāmāmo ante Wængonguī apænte āninqe edæ pancamīniya īmīnite nīmpo cædinque edæ pancamīniya īmīnite, Mīni panguīnque tedewēmīnīpa, ancæcāīmpa,” ante Itota apænegacāīmpa.

Mä cæte odömömi amönie, ante änänipa

(Mäadoco 8.11-12; Odoca 11.29-32)

³⁸ Apænecä ëñëninque në odömönäni tönö Paditeoidi pancadäniya Itota ingante apænedinque,

—Awënë në Odömömi ëñëmi. Pönencädänimpa, ante mä cæte bitö odömönö ante mönitö äinente wæmönipa.

³⁹ Äñönäni Itota wæætë,

—Mïni në wïwa cæcabo inte Wængonguï ingante ëmö cæte pangote bai mïni wadæ godincabo iñömö mïnitö, Mä cæte odömömi adinque pönëmaimönipa, ante ancaa ämïni awædö. Näwangä ämo ëñëedäni. Nöwomïni imïnite mä cæte odömönämaï ingäïmpa. Cönäö wodi beyä nänö cægäinö ante edæ mäninque mïni aquinque cæcäïmpa änewëmïni. ⁴⁰ Mëönaa go adoönæque iñonte gæyæ cæncadë Cönäö wodi nänö ongongäi bai edæ botö adobäi Waobo ëñagäimo inte edæ mëönaa go adoönæque adopoönæ wao wodido ongoncæboïmpa. ⁴¹ Cönäö wodi Wængonguï beyä apænecä ëñëninque Ninebaidi wënæ wënæ nänö cægäinö ante ñimpo cædinque Wængonguï gämænö pongadänimpa. Cönäö wodi wædangä iñongante botö në ñænæmo inte nö ante apænëbo ëñëninque mïnitö wæætë ëñënamäi imïnipa. Ìninque Nïnebaidi Wængonguï gämænö në pongäinäni incæ Wængonguï në apænte angä weca pöninque mïni ñöwo quëwencabo tönö godongämæ gongænte ongöninque, Mïni panguinque ëñënamäi ingamïnipa töö, ante apænte pïinänidö angüënë.

⁴² “Ayä adobäi betamonca gämænö ömæ awënë onquiyängä iñömö awënë Tadömöö wodi nanguï ëñente nänö apænedö ante ëñencæte ante doönæ quëwëninque pongacäïmpa. Tadömöö wædænque ëñengä iñongante botö godömenque nanguï ëñëmo inte mïnitö weca ongöñömote mïnitö iñæmpa wïi ëñëmïnipa töö. Ìninque mäningä onquiyängä incæ Wængonguï në apænte angä weca pöninque mïni ñöwo quëwencabo tönö godongämæ ongöninque, Mïni panguinque ëñënamäi ingamïnipa töö, ante apænte pïincæcäïmpa,” ante Itota apænëgacäïmpa.

Wënæ waodë owote godingä inte adodö pongampa, ante

(Odoca 11.24-26)

⁴³ Ayä apænedinque Itota iïmaï ante apænecantapa. “Waoçä baönë owote ate tao godinque wënæ iñömö edæ, Quingänö baönë go guiïdinque edæ guëmante quëwenguïmoo, ante diqui diqui minte ayongä önömæca to amïnte i ate wædinque edæ, ⁴⁴ ‘Botö tao godincönë adodö go guiïte quëwencæboïmpa,’ ante pönëninque adodö pongampa. Ponte ayongä waoçä önonganque bayongante wacä önöwoca tömengäa owodämäi ingä adinque wënæ wæætë, Æ waoçä botö owodincö bai inongä inte ñöwo önonconque bai wadæ ñëmænte mäincoo cabo tē gæte bai ömæwocacä ingä abopa. ⁴⁵ Ante adinque tömengä wæætë godinque wënæidi godömenque wïwa cædäni tiæte ganca mänimpodäni inänite ænte pongampa. Tömënanäni tömänäni waoçä baönë godongämæ pö guiïte owodäni ate waoçä iñömö wënæ yewëninque godömenque wæwengampa. Nöwomïni guiüënë wïwa mïni cæcabo adobäi bate wæwencæmïnipa,” ante Itota apænëgacäïmpa.

Itota badä tönö tömengä biwiidi

(Mäadoco 3.31-35; Odoca 8.19-21)

⁴⁶ Itota oncönë a ongöninque nangui inäni inänite apäneyongä tömengä nänö biwiidi tönö tömengä wäänä tömengä ingante bee tente apäneceate ante oncodo ponte a ongönäni. ⁴⁷ Adinque wacä añecä ponte apänecantapa.

—Bitö badä bitö biwiidi bitö imite apäneceate ante oncodo ponte yabæque ongönänipa cæbii.

⁴⁸ Äñongante Itota wæætë,

—Botö badä ædänö inää ante ämoo. Ayæ botö biwiidi ædänidö inänii ante ämoo, ante pönëminii.

⁴⁹ Äninqe, Itota tömengä miñä në godäni gämänö oo cæmöninque,

—Iñäni iñömö botö badäidi botö biwiidi inönäni inänipa, ante mänömainö ämo abaiminipa. ⁵⁰ Mönö Mæmpo öönädë në quëwengä nänö änö bai ëñente æcänö cæte quëwëna mäningä edæ botö biwi ingampa. Mäningä botö biwinque ingampa. Mäniñä botö badä inampa, ante pönencæboimpa, ante Itota apänegacäimpa.

Waocä nänö quiyadö ante odömonte apänecampa

(Mäadoco 4.1-9; Odoca 8.4-8)

13 Mäniönä edæ Itota oncodo tao godinque gäwapæ wedeca godinque tä contagacäimpa. ² Tömengä nänö tä contate ongönömö nangui inäni tömäo goto ponte ongönäni adinque tömengä wæætë wipodë go guiite tä contate wäi wocænte owoyongä tömënanä ayæ gäwapæ yæwedecaque ömaaque ongönänitapa. ³ Ayæ ömaaque ongönäni inänite apänedinque tömengä, Wængongui Awënë nempo quëwëninque æbänö cæquiï, ante ëñencæminimpa, ante botö imæca quëwënanä nani cædönö ante odömonte apänebo ëñëedäni.

Äninqe Itota nangui apänecantapa. “Waocä në quiyacä iñömö quiyacæ go-campa. ⁴ Gote quiyayongä pancamonga taadö iñömö wææmompä. Taadö wæænte eyepodimö öñöñonte ayamöidi pöninque dobæ ade cænänipa. ⁵ Pancamonga guiquënë dicamontaa onguipoi woyedömö iñömö eyepote wææmpä. Onguipoi woyedömö öñömö inte pæquinämaï quingæ tä bocate pædinque æmonga æipa. ⁶ Edæ guingo icate æmäwo näñe wæmpä. Iñinque oguimento yæyämë guiwadämaï inte cöñe bawadämaï iñonte nænque ti näwänö wänä cacadinque edæ guingo icate näñe wæmpä. ⁷ Pancamonga guiquënë ömentacodë nänö eyepodimö iñömö pæquinämaï tä bocate gä æiyonte ömentacoo pö incootonque ganta cæca ate näñe wæmpä. Wampo incapa pæquiï. ⁸ Waëmonguipoga quiyadimö guiquënë tä bocate waa pædinque tömëmö nangui pöni incapa. Incate pancawæncaa tiëë ganca, pancawæncaa tetenta ganca, pancawæncaa todëinta ganca mänimpomö incapa. Quiyacä nänö quiyadö ante edæ botö mäninque ante apänebopa. ⁹ Ämonca ongonte ëñëedäni,” ante Itota apänegacäimpa.

Önömoncaque ëñente pönënamäi inänipa, ante

(Mäadoco 4.10-12; Odoca 8.9-10)

¹⁰ Ayæ tömengä miñä në godäni tömengä weca ponte apänedinque, Itota ëñëmi. Bitö tömënanä inänite inguipoga quëwënanä nani cæinö ante odömöninque quinänte mäninge ante odömonte apänebitawo.

¹¹ Āñōnānite Itota, “Ōōnædē Awēnē Odeye nempo æbānō quēwenguī, ante mīni waocabo wēnēnēdē mīni ēñēnāmaī ingainō ante botō ñōwo mīnitō imīnite pōnō edonque apænebo ate mīnitō adomīnique nē ēñēmīni bamīnīpa. Wæætē tōmēnāni inānite guiquēnē botō mānīnō ante godō apænedāmaī imopa. ¹² Edæ nē ēacā ingante godōnāni nānō godōmenque æī baī botō nē ēñēngā ingante godō apænebo ate tōmēngā godōmenque waa pōnī ēñente bacæcāimpa. Wæætē nē ōmæpocā inongā ingante wædænque nānō ēadī incæ ō ænāni baī nē ēñēnāmaī ingā guiquēnē adobaī wædænque nānō ēñēnō incæ ō ænte baī ewente baī baquīnō anguēnē. ¹³ Incæte edæ awincaque adinque nē adāmaī ināni inte tōmēnāni ōnōmoncaque ēñēninque nē ēñēnāmaī ināni inte pōnēnāmaī inānīpa. Inīnque botō, Wængonguī Awēnē nempo æbānō quēwenguī, ante ēñēnāmaī incædānīpa, ante cædinque imæca quēwēnāni nāni cæinonque ante odōmonte apænebopa, angantapa. ¹⁴ Edæ Wængonguī beyæ apænedīnque Itaiya wodi iīmaī ante nānō yewæmongainō baī ñōwo quēwēnāni incæ iīnque cædānīpa.

‘Nāwangā ēñecæte ante cædinque mīnitō ōnōmoncaque ēñēninque pōnēnāmaī imīni inte ēñēnāmaī incæmīnīpa.

Nāwangā acæte ante cædinque mīnitō awincaque adinque wæætē pōnēnāmaī imīni inte adāmaī incæmīnīpa.

¹⁵ Mānīnāni, Wīi ainēwædō, ante awinca mōnæ guimonte baī cædinque, Ōnōmonca wīi ēñēinēwædō, ante tee mōmoncate baī cædinque, Mīmōnē wīi pōnēinēwædō, ante mīmō ōmædē ināni inānīpa.

Wīi mānōmaī ī baī tōmēnāni awinca adinque ōnōmonca ēñēninque mīmōnē pōnencædōnānīpa.

Ayæ tōmēnāni nāni waa baquinque edæ dadī ēmæninque botō gāmænō poncædōnānīpa.’

Ante Itaiya wodi nānō angainō baī iīnque cætīpa,” ante Itota apænegacāimpa.

¹⁶ Ante Itota tōmēngā mīñæ nē godāni inānite apænecantapa. “Mīnitō guiquēnē awinca do adinque ōnōmonca do ēñēninque mīni toquinque impa. ¹⁷ Nāwangā āmopa. Wængonguī beyæ nē apænegaināni tōnō nē nō cægaināni tōnō ñōwo mīni adō ante nanguī ainente wædāni incæte adāmaī ingadānīpa. Ayæ mīni ñōwo ēñēnō ante nanguī ēñēnente wædāni incæte ēñēnāmaī ingadānīpa,” ante Itota apænegacāimpa.

Quiyacā nānō cædō ante pōnente iīmaī impa

(*Māadoco 4.13-20; Odoca 8.11-15*)

¹⁸ Itota ayæ tōmēnāni inānite godōmenque apænecantapa. “Mānīi quiyacā nānō quiyainō ante apænedīnque botō, Wængonguī Awēnē ingante æbānō ēñenguī, ante odōmoncæte ante apæneyōmo mīnitō ēamonca ongonte ēñēedāni, angantapa. ¹⁹ Awēnē Wængonguī Odeye nempo æbānō cæte quēwenguī, ante mōnō apænedō ante ōnōmoncaque ēñēninque waocā mīmōno pōnēnāmaī ingā inīnque tōmēngā mīmōno nānō ēñēnīnō incæ wēnæ nē wīwa cæcā inongā inte pō ō ængampa. Māningā nē pōnēnāmaī ingā iñōmō taadō wedeca eyepodīmō baī ingampa. ²⁰ Woyedōmō dicamontaa eyepodīmō baī ingā guiquēnē tōmēngā Wængonguī nānō apænedō ēñēninque quīngæ Ao ante watapæ tocampa. ²¹ Ayæ ate adocā incæ tōmēmō woyedōmō baī oguimento yæyæmē guīwadāmaī baī ingā inte wantæ iñō quēwengampa. Wængonguī nānō apænedō beyæ pīnāni wæyongā tōmēngā in-

gante wënæ wënæ cæcæte ante togænäni ate wædinque tömengä guiñente wædinque edæ ëmö cæte gocampa,” angantapa.

²² Ayæ, “Ömentacodë wæænte pædimö bai ingä guiquënë tömengä ëñëninque godömenque quëwëñongä inguipoga quëwente quiëmë beyænque mönö wæpämö pönninque ayæ, Mäincoo beyænque toquïmo, ante näni oda cæte wæwëmämö pönninque ömentacoo ñancate cæ bai cæyonte Wængongui nänö apænedinö incæ incadämaï bai bapa. ²³ Onguipoga wainguipoga quiyadimö bai ingä guiquënë tömengä Wængongui nänö apænedö ëñente wede pönëninque edæ tömëwæ incate bai Wængongui beyæ nanguï cæcampa. Pancadäniya edæ tiëë ganca incate bai nanguï cædänipa. Wadäni guiquënë tetenta ganca incate bai cædänipa. Ayæ wadäni todëinta ganca incate bai cædänipa,” ante Itota apænecä ëñëñänitapa.

Waimö tönö ömentacoo quiyate pæmö ante odömongampa

²⁴ Ayæ wæætë inguipoga quëwënäni näni cæinö ante odömönninque Itota godömenque apænegacäimpa. “Öönädë Awënë Odeye iñömö gönea tömëmö waimö në quiyacä bai ingampa. ²⁵ Tömengä quiyate gocä ate waodäni mö ñöñönäni wacä në piinte cædongä inte wæætë tömengä nänö quiyadiñömö awëmö ponte, Ömentacoo pæcäëimpa, ante adoyömö pönö ni quiyate wadæ gocä. ²⁶ Ate waimö tänä nä bocate waiwæ pædinque tömëmö incayö adoyömö tæcæguedë ömentacoo pæ. ²⁷ Adinque në cædäni guiquënë në ëacä weca pönninque, ‘Awënë, bitö gönea quiyadiñömö tömëmö waimö minämaï imitawo. Ædönö ponte ömentacoo adoyömö pæ, ante wæmönipa.’ ²⁸ Ante äñönäni, ‘Wa. Mönö piinte äñongä cæbaingampa. Wabänö ii.’ Ante pönëñongä tömënäni, ‘Ininque bitö ämi godinque abæ wiquimöni, ämitawo.’ ²⁹ Änäni ëñëninque në ëacä wæætë edæ, ‘Inæmpa mänömaï cæmini ininque waiwæ tönö ömentacoo guëa abæ wite babaimpa. ³⁰ Ininque minitö ñöwo edæ ömæ widämaï inte to amiña peganca ee amini guëa pæcäëimpa. Amiñayedë edæ në pedäni inänite botö, Ömentacoo täno tæ gæte topo cæte iya täninque tömëmö waimö guiquënë tä pete mämö ñönödäni, ancæboimpa,’ ante në ëacä apænecampa.” Mänömainö ante odömoncæte ante Itota apænegacäimpa.

Möotatamö guidimö ante odömonte apænecampa

(Mäadoco 4.30-32; Odoca 13.18-19)

³¹ Ayæ wæætë inguipoga mönö adö ante odömönninque Itota godömenque apænedinque, “Waocä möotatamö tömëmö ænte mäo tömëmoncodë quiyacä bocate pæ aminitawo. Mänimö guidimö inte ñænæ pæ bai Wængongui Awënë Odeye nempo mini quëwencabo iñömö adobaï yebænte pæpa. ³² Edæ möotatamö mini ænte quiyamö guidimö pöni i bai wamö mini quiyamö adomonque incæ adobaï guiyämö pöni i iñömö edæ dæ ampa. Incæte möotatamö iñömö tä bocate pædinque möotatawæ edæ ocäñequi doyæ pæwæ bapa. Wiï tömäa ocäñequi mini quiyadiwæ bai edæ ocäa inämaï inte möotatawæ iñömö edæ ñænæ awæ i adinque ayamöidi ponte awænëmæ ongönänipa. Möotatamö guidimö incæ mänömaï pæ bai Wængongui Awënë nempo quëwënäni iñömö wædænque ininäni incæ nanguï yebænguïnäni inänipa,” ante odömönninque Itota apænegacäimpa.

Päo yedæ æmpoquĩ da wenguĩ ante odõmonte apænecä

(Odoca 13.20-21)

³³ Ayæ wæætè inguipoga quëwënäni nãni cæinõ ante odõmõninqe Itota godõmenque iĩmaĩ ante apænecantapa. “Päo yedæ æmpocæimpa, ante onquiyængä ñænængade tee manguincade ænte tee mäningque ædĩna nãni ämõ ænte mempoga go adopoque da wëningque ayæ yedæ æmpoquĩ ænte pönõ da wëningque wempo wempo ædæmõ cædengä ate päõmo yedæ æmpote tõmão nããmænta bapa. Yedæ æmpote ate päõmo tõmão nããmænta ba baĩ õõnædë Awënë Odeye nempo mĩni quëwencabo iñõmõ tõmãmĩni nõ ëñente bamĩnipa,” ante odõmõninqe Itota apænecacäimpa.

Inguipoga nãni cæi baĩ impa, ante Itota odõmongampa

(Mäadoco 4.33-34)

³⁴ Nanguĩ inãni mäniñõmõ ongõnãni iñõnãnite Itota inguipoga quëwënäni nãni cæinõ ante odõmõninqe mäningque ante tõmënãni inãnite apænecantapa. ³⁵ Edæ Wængonguĩ beyæ në apænegaingä iĩmainõ ante doyedë apænecacäimpa. “Wængonguĩ æbãno cæcää, ante botõ inguipoga quëwënäni nãni cæinõ ante odõmõninqe botõ iñæ ænete apænecæboimpa. Wængonguĩ nãno badongaiñedë ayæ godõmenque ñõwo ganca nãno wë wodonte ëñengainõ ante botõ ñõwo apænecæboimpa,” ante docä nãno angainõ baĩ ñõwo iñõmõ iinqe cæquinque Itota odõmonte apænecacäimpa.

Ömentacoo ante iĩmaĩ ante impa

³⁶ Ayæ nanguĩ inãni inãnite ëmõ cæte godinqe Itota oncõnë põ guicä adinqe tõmengä miñæ në godãni guiquënë tõmengä ingante mãmõ änãnitapa. Gönea ömentacoo quiyadincoo ante apænedinque bitõ æbãno ante odõmoncæte ante apænëbii. Edæ edonque apænëbi ëñëmõnie.

³⁷ Äñõnãnite tõmengä, “Tõmëmõ waĩmõ në quiyadingä botõ äningä iñõmõ botõ Waobo ëñagaĩmo inte mäningä baĩ imopa. ³⁸ Gönea botõ äniñõmõ baĩ iĩnguipo impa. Tõmëmõ waĩmõ botõ änimõ baĩ inãni guiquënë Awënë Odeye ingante nãni ëñencabo inãnipa. Ömentacoo botõ änincoo baĩ inãni guiquënë wënæ inte në ëñënãni iñõnãni ³⁹ në piĩnte quiyacä botõ äningä baĩ iñõmõ edæ wënæidi awënë ingampa. Amiña baĩ guiquënë inguipoga iinqe bayedë ingæimpa. Ayæ amiña tä pete baĩ cædãni guiquënë Wængonguĩ anquedoidi inãnipa.”

⁴⁰ “Iĩninqe edæ nãni amiña bayedë ömentacoo tẽ gæte topo cæte nãni iya täi baĩ edæ adobai iinqe bayedë baquinõ anguënë. ⁴¹ Mäniñedë edæ Waobo ëñagaĩmo inte botõ anquedoidi inãnite ämo põninqe tõmënãni gönea iñõmõ ömentacoo tẽ gæte baĩ cæcædänimpa. Botõ nempo quëwënäni pancadãniya oda cæte ëñënãmaĩ cædãnipa. Iĩninqe, Oda cæcædänimpa, ante në cædãni tõnõ në ëñënãmaĩ cædãni tõnõ tõmãnãni inãnite botõ anquedoidi iñõmõ abæ wite baĩ tẽ gæte mãmõ, ⁴² gongapamõ nãni ämogate Ca ca wæyõmõ wido cæcædänimpa. ⁴³ Mäniñedë edæ në nõ entawëmĩni guiquënë mõnõ Mæmpo Awënë Odeye iñongä tõmengä nempo në quëwëmĩni iñõmõ edæ nænque tamõ guinæ gongæ baĩ adobai guinæ edæ gongæncæmĩnimpa. Ëamonca ongonte ëñeedãni,” ante Itota angacäimpa.

Waëmoncoo wë wodonte mäincoo, ante

⁴⁴ Godömenque odömöninque Itota iïmainö ante apäñecantapa. “Öönädë Awënë Odeye nempo mïni quëwencabo iïñömö waëmoncoo onguipodë äë wote nani wë wodonte mäincoo bai impa. Waocä gote mäincoo adinque adodö äë wote äëninque wayömö wë wodongampa. Wodonte ate tömengä watapë todinque tömengä äadincoo tömancoo godonte eyepë äëninque tömengä waëmoncoo nänö wë wodönimä äencæte ante ömæ në äadingä weca do godinque mänimä tömämä beyä ante edæ eyepë pædæ godöninque ængampa. Waocä mänömaï tömengä äadincoo tömancoo nänö godöni bai cædinque öönädë Awënë Odeye iïñömö, Botö nempo quëwencæminipa, ante tömengä Wëñængä ingante eyepë godöninque inguipoga tömäo quëwëñäni inänite ængacäimpa,” ante Itota apäñegacäimpa.

Wamö adomonque pönï waëmö iimö ante

⁴⁵ Ayä godömenque, “Öönädë Awënë Odeye nempo guicæte ante cæcä iïñömö wamoncoo pededamö nani ämoncoo godonte äencæte ante në diqui diqui mingä bai ingampa. ⁴⁶ Ìninque wamö pededamö nänö äëñënimö adomonque waëmö pönï i ate tæcæ adinque waocä wadæ gote tömengä nänö äadincoo tömancoo godonte eyepë äëninque wæætë mänimö wamö inca godonte ængampa,” ante Itota odömonte apäñegacäimpa.

Dicamöñä ante odömonte Itota apäñecampa

⁴⁷ “Ayä wæætë edæ, Öönädë Awënë Odeye iïñömö edæ dicamöñä gäwapä nani dadöi bai tömää gæyæidi ænte bai cæcampa. ⁴⁸ Dicamöñä eyede dadöninque yæwedeca wëä manta cönöninque tæ contate apænte adinque, Näwääquingä i, adinque ö äë otodë da wëninque, Baacä i, adinque wido cædäni bai Wængonguï Awënë adobaï cæquingänö anguënë. ⁴⁹ Edæ iinque bayedë Wængonguï anquedoidi pöninque në nö cædäni inänite apænte äëninque në wiwa cædäni inänite adinque nänënë gönongä ⁵⁰ ongöñöñänite gongapamö edæ guitodongä guicædänimpa. Tömëñäni edæ mäniñömö guiite ongöninque ämogate wædinque Ca ca wæcædänimpa,” ante Itota odömonte apäñegacäimpa.

Waëmoncoo inca miincoo tönö pedæncoo ante

⁵¹ Mäninö ante iinque odömonte apäñedinque Itota tömëñäni inänite,
—Botö odömonte apäñedö tömänö ante edonque ëñëminitawo.

Äñongante,

—Ao ëñentamönipa.

⁵² Ante apäñedäni ëñëninque tömengä apäñecantapa.

—Ìninque æcänö, Öönädë Awënë Odeye æbänö cæcää, ante ædæmö ëñëninque në odömonte apäñeda i tömengä iïñömö waëmoncoo në da wente mangä bai adobaï inongä inte Wængonguï nänö äñö ante entawengä ingampa. Ayä edæ në äacä nänö da wëncade wi äëñedinque miincoo tönö pedæncoo tadonte odömongä bai në odömonte apäñecä iïñömö adobaï cæcampa. Edæ doyedë nänö ëñëñö inca ñöwo nänö ëñëñö inca mimönë waa pönï nänö entawëñö ante edonque odömonte apäñecampa, ante Itota mäninque ante idæwaa apäñegacäimpa.

Näatadeta iñömö ponte Itota apäñecampa

(Mäadoco 6.1-6; Odoca 4.16-30)

⁵³ Wængongui Awënë æbänö cæcää, ante odömoncæte ante imæca quëwënäni näni cæinö ante nänö odömöninö tömänö ante iinque apäñedinque Itota wadæ go-cantapa. ⁵⁴ Tömengä nänö pægaiñömö ponte tömënäni odömöincönë pö guiddinque mäniñömö quëwënäni inänite odömonte apäñecantapa. Eñëninque tömënäni ancai guñëninque,

—Iingä iñæmpa, æbänö cæte nanguï eñengä ingää, änänitapa. Tömengä edæ æbänö cæte tæi piñæninque bamönengæ cæcää, ante eñencæte ante wæmönipa. ⁵⁵ Iingä iñæmpa awæmpa në timöwengä wengä imaingä inte bamönengæ mänömai cæcampa, ante awædö. Tömengä wäänä emöwo Mäadiya ingampa, ante awædö. Tömengä biwiidi önönäni Tantiago tönö Ootee, Timönö tönö Codaa inämai inänita-wogaa. ⁵⁶ Tömengä biwinqueidi mönitö tönö tömänäni ongönäni aedäni. Iinque tömengä wæætë æbänö cæte nanguï eñengä badinque edæ nanguï cæcää.

⁵⁷ Ante pönente wædinque tömënäni tömengä beyæ ante piinte badänitapa. Piinte badäni adinque Itota tömënäni inänite angantapa.

—Iñæmpa Wængongui beyæ në apäñecä iñömö tömengä tömämæ gote apäñeyongante tömengä ingante waa adänipa. Wæætë tömengä nänö pægaiñömö pöninque oncönë pö guite apäñeyongä edæ mäniñömonque tömengä ingante wiwa adänipa töö, ante apäñegacäimpa.

⁵⁸ Incæte, Pönenämai iñönänite botö ædö cæte nanguï mä cæquimoo, ante pönente wædinque tömengä tömënäni weca edæ wædænque pönï cægacäimpa.

Wäö æpäñë në guidönongä wængampa

(Mäadoco 6.14-29; Odoca 9.7-9)

14 Tömänäni mäniñedë, Itota æbänö cæcää, ante mäo änäni eñëninque pancabaa awënë Edode do eñengacäimpa. ² Tömengä iñömö tömengä ingante në cædäni inänite apäñecantapa. “Wäö wodi æpäñë në guidönongä incæ iingä Itota iñömö adocä inte a ongongä awædö. Tömengä do wænte ñäni ömämöninque pongampa töö. Mäniñö beyænque tömengä tæi piñænte entawëngä inte në nanguï cæcä ingampa,” ante awædö, angantapa.

³ Wäö wodi iñömö iimaï wængacäimpa. Do iñedë awënë Edode iñömö tömengä biwi Pedipe manguiwëningä Ædodiya ingante ö ænte möningä inongäimpa. Mäningä Ædodiya Wäö ingante piingä beyænque Edode iñömö Wäö ingante bæi ongonte goti winte tee mönedongäimpa. ⁴ Edæ Wäö iñömö nänö caate wænguinque Edode ingante iimainö ante do wææ äningä inongäimpa. “Edode eñëmi, bitö Wængongui nänö angainö bai eñënëmai inte edæ mäningä onquiyängä ingante manguiwëmipa töö,” ante cöwë wææ äningä inongäimpa.

⁵ Angä eñente piinque Edode, Wäö ingante botö æbänö cæte wænonguimo, ante cædongäimpa. Incæte tömänäni, Wængongui beyæ në apäñedongä Wäö ingampa, ante tededäni eñëningä inte Edode, Botö imote piinäni wæcæ wæ, ante guñente wædinque Wäö ingante wænönämai inte ata cæpodongäimpa. ⁶ Incæte Edode nänö eñagaiönæ iinque bayö wadäni ponte godongämæ bete ayönäni edæ Ædodiya wengä baquécä tode pete äwacä adinque Edode wæætë nanguï todongäimpa. ⁷ Iinque tömengä, Wængongui ayongä näwangä ämopa, ante baquécä ingante änogäimpa.

Waa pōnī bitō tode pete āwadi beyæ bitō quiēmē ante æinente āmi adinque botō bitō ānō ante cōwē pōnōmo æncæbiimpa, ānongāimpa. ⁸ Angā ēñēninque baquēcā wæætē wāānā weca gote, Æbānō anguimoo, ante āñongā wāānā guiquēnē, Īmaī æe, angā ēñēninque baquēcā wæætē Edode ingante,

—Īmaī pōnō cæbi æmoe. Wāō æpænē guidōnongā ingante wangō tamencate tōmengā ocabo ĩnī coyomēnætaca cō cæte ænte māmō pædæ pōnōmi æmoe.

⁹ Angā ēñente wædinque awēnē odeye ĩñōmō, Æ ēñente awædō. Quinō nōwo cæquiimoo, ante nanguī wædongāimpa. Incæte godongāmæ becōnāni ēñēñōnānite, Wængonguī ayongā cōwē godoncæboimpa, ante nē āningā inte nē wæñongā ingante tōmengā, Baquēcā nānō āninō bai cædāni, ānongāimpa. ¹⁰ Angā ēñēninque nē wæñongā tee mōneincōnē go guidinque edæ Wāō ingante māo bæi ongōn- inque wangō tomencadongāimpa. ¹¹ Ayæ Wāō ocabo ĩnī coyomēnætaca cō cædinque baquēcā weca ænte māmō pædæ pōnōnāni æninque baquēcā wæætē wāānā ĩnante godongā æñōnāimpa.

¹² Ayæ Wāō wodi tōmengā miñæ nē godināni pōninque tōmengā baō ĩnī ænte māo daga wēninque wæætē Itota weca pōninque, Wāō wodi mānōmaī wængā wæmōnipa, ante tōmengā ingante apænegadānimpa.

5.000 ganca ĩnāni ĩnānite Itota godongā cænānipa

(Māadoco 6.30-44; Odoca 9.10-17; Wāō 6.1-14)

¹³ Wāō wodi do wængāimpa, ante apænedāni ēñente wædinque Itota wæætē edæ, Ōnōmæca gocæboimpa, ante wipodē guī contate wogaa gocantapa. Gocā ate, Māniñōmō gocæ cæcampa, ante tededāni ēñēninque tæiyænāni tōmēnāni nāni quēwēñōmō wacōnē ta wacōnē ta ōmaaque oo pænta tāno gote mæ ongōnānitapa.

¹⁴ Itota ĩñōmō wipodē wogaa pō ti wæænte ayongā nanguī ĩnāni dobæ ponte mæ ongōnāni adinque, Æbānō cæte quēwenguīnāni, ante tōmēnāni tōnō godongāmæ wæte bai pōnengantapa. Ayæ daicawo gawænāni ĩnānite godō cæcā ate waa badānitapa. ¹⁵ Gāwadecæ bayō tōmengā miñæ nē godāni tōmengā weca pōninque,

—Nōwo wēmō bacæ cæpa cæbii, ānānitapa. Ayæ, Ōnōmæca incæ cænguī dæ ā adinque bitō godongāmæ ongōnāni ĩnānite āmi waodāni quēwēñōmō gote cænguī godonte ænte cæncædānimpa.

¹⁶ Āñōnānite Itota,

—Goquināni, ante quinante āminii. Minitō wæætē godōmini cæncædānimpa, āmopa.

¹⁷ Āñongante,

—Īnæmpa pāō ōnōmpo æmæmpoque gæyæ mēa pōnī ĩ. Cænguī nææmōnipa diyæ godōmōni cænguīnāni.

¹⁸ Ante wææ āñōnāni Itota ĩñōmō,

—Mānimpodānique nææmīni incæ ænte māmō pædæ pōnōmini æmoedāni, angantapa.

¹⁹ Ayæ godongāmæ mæ ongōnāni ĩnānite angā gaguimāa tæ contadāni ate tōmengā pāō ōnōmpo æmæmpoque gæyæ mēa æninque ōñædē ĩnō æmō adinque, Wængonguī, bitō waa pōnōmi ænte cæmōnipa. Ante apænedinque pāō pā æ pā æ cædinque tōmengā miñæ nē godāni ĩnānite pædæ pōnongā æninque tōmēnāni wæætē godōmenque tōmānāni ĩnānite di mæñæ di mæñæ cædāni ænte cænānitapa.

²⁰ Mānōmaī pōnō cæcā æninque tōmānāni tōmo pōnī cænānitapa. Cænte ate edæ

tömänäni ao mäe ao mäe näni ñönöni ee õñoncoo pædæ wææmpo ö æ da da wente æninque tömengä miñæ nê godäni iñömö otodê õnompo tipæmpoga go mentodêa cængui eyede da wënäni contagatimpa. ²¹ Nê cænäni iñömö edæ onguiñænäninque incæ tincó miido ganca mänimpodäni iñönäni onquiyænäni tönö näni wencabo tönö godömenque nangui inäni inte cængadänimpa.

Itota æpæ yædopæno dao dao gocampa

(Mäadoco 6.45-52; Wäö 6.16-21)

²² Tömänäni iinque cænäni ate Itota tömengä miñæ nê godäninque inänite do angantapa. Minitö täno wipodê guii contate æmäe wedeca tao goyömini botö wæætê godongämæ ongönäni inänite ämo godäni ate ayæ poncæboimpa. ²³ Angä Ao ante tao goyönäni tömengä wæætê wadäni inänite, Nöwo goedäni, angä wadæ godänitapa. Ayæ tömengä Wængongui ingante apænecæte ante änanquidi æcantapa. Æite apænedinque wëmö bayö tömengä adocanque a ongongacäimpa. ²⁴ Tömengä miñæ nê godäni guiquënë taocæte ante cædinque edæ tæcætibæ wiyate cæwoyönäni edæ woboyæ pæmænte nangui pönö edæ æpæ incæ incæ cæte mængonta mængonta cæyonte wipo wäi wocæntapa. ²⁵ Ayæ tawadiya nänö peyedê bayonte edæ Itota iñömö æpæ yædopænoque edæ dao dao pongä adänitapa. ²⁶ Yædopæno edæ dao dao pongä gomö adinque tömengä miñæ nê godäni edæ ancai guiñëninque,

—Quiëmê imai. Waocä wænte babæningä wabänö cængongä, ante Yæ ante guiñente wædänitapa.

²⁷ Ante wæyönäni edæ Itota iñömö,

—Ee piyænê cæte guiñënamai iedäni. Botö imo apa guiñëwëminii.

²⁸ Ante äñongä, Pegodo guiquënë,

—Awënë, bitö imitawo. Nö nö imi inte bitö æpæ yædopæ bitö weca ämi pömoe.

²⁹ Angä ëñëninque,

—Pöe.

Äñongä Pegodo wipodê ongöninque edæ ti wææninque yædopæno edæ dao dao gote Itota weca tæcæ obo ponte ayongä, ³⁰ woboyæ nangui nangui pæmäe ate wædinque ancai guiñëninque æpænê tæi guiidinque Yæ wæcantapa.

—Awënë, æpæ bete wæncæbointaye.

³¹ Ante wæcä adinque Itota tömengä ingante edæ quingæ pædæ gopo töö æmæninque,

—Iñampa botonque iñömote pönëninque pöe, antabopa. Quinante wapiticæ edæ pönëmitapa, angantapa.

³² Ayæ wipodê guida ate woboyæ iñontobæ nä pæmænämaï gongæ. ³³ Adinque wipodê ongönäni wæætê Itota weca ædæ wæænte apænedinque,

—Nawangä bitö Wængongui Wëñæmi inömi imipa, ante watapæ apænedänitapa.

Caate wædäni inänite Itota cæcä waa badänipa

(Mäadoco 6.53-56)

³⁴ Ayæ æmæmäa taodique tömönäni Guënetadetebæ ti wæænänitapa. ³⁵ Ti wæænäni adinque mäniömæ quëwënäni guiquënë, Tömengä Itota ingampa, ante do adinque tömämæ mäo gode ä gode ä cædäni ëñëninque wënæ wënæ inäni inänite tömönäni inänite tömengä weca ænte mämönäni pönänitapa. ³⁶ Itota ingante, Bitö weocoo ämi yæwedecooque gampote waa bacædänimpa. Änäni wæd-

inque tömengä Ao angä ëñëninque në gampo gampo cädäni iñömö tömänäni edä waa inäni bagadänimpa.

Mimöno tao godi beyænque waocä wentamö ewocacampa

(Mäadoco 7.1-23)

15 Dodäni näni wææ angainta ate në odömönäni tönö Paditeoidi pancadäniya Eedotadëë quëwëninque mäniñedë Itota weca pöninque iïmai änänitapa.

²—Bitö miñäë në godäni iñömö dodäni näni angainö ante quïnante ëñënämai inte wapiticä cädäni wämönipa. Tömënäni iñæmpa mempodämai inte wentamö nam-pote cænguï cænäni awædö.

³Ante piïnäni wædinque Itota wæætë,

—Minitö guiquënë dodäni näni angainonque ante ëñente cæcæte ante cædinque Wængongui nänö wææ angainö ante edä quïnante ëñente cädämai iminii. ⁴Wængongui, “Bitö wæmpo ingante bitö badä inante waadedinque waa cæe,” angacäimpa. Ayä, “Wæmpocä ingante wäänä inante në piinte wiwa angä ingante wænömini wæncæcäimpa,” ante wææ angacäimpa. ⁵Minitö guiquënë iïmai änewëninque edä wææ cæminipa. Waocä mæmpocä ingante waa cæquënegä iñongante wäänä inante adobai waa cæquënegä iñongante minitö wæætë wææ äninque, Waocä wæmpocä ingante wäänä inante iïmainö ante apænecæcäimpa, änewëminipa. Wæætë edä “Mæmpo, bitö quï, ante, Badä, minö quï, ante botö pönömo mina ænguënenö incæ ñöwo wæætë edä, Wængongui quï, ante do edä godonte impa.” ⁶Ante apänedinque waocä wæmpoda inate wiï godonguënegä ingampa, ante minitö iñömö edä wææ änewëmini awædö. Iñæmpa mänömainö ante wææ änewëninque minitö edä dodäni näni angainonque ante cæcæte ante cædinque Wængongui nänö wææ angainö ante edä, Önöneque impa, ante bai cæminipa töö. ⁷Minitö waa cæmini inte bai në änewëmini iñöminite edä ämo ëñëedäni. Mini cædö ante Wængongui iïmai ante apænecampa, ante Itaiya wodi nöingä ante yewæmongacäimpa.

⁸“Iñäni iñömö botö imote önöneque waa apänete bai tededäni incæte, tömënäni mimöno æmæ pönente edä gobæ ongonde bai inäni awædö.

⁹Ayä botö weca ædæ wæænte waa ate bai tededinque tömënäni, Wængongui imidö anguënë, ante önöneque tedewëninque ononque edä cädänipa.

Waodänique näni wææ änönö ante odömonte apänedänipa töö.”

Ante Wængongui piingampa, ante yewæmongacäimpa.

¹⁰Mänömainö ante apänete ate Itota wæætë nanguï ongönäni inänite aa pecä pönäni adinque apänegacäimpa.

—Botö apänebo ëñëninque ocaidë pönente ædæmö ëñëedäni, angantapa.

¹¹Önönë guidi beyænque waocä mimö wentamö entawënämai ingampa. Wæætë mimönë wiwa pönëninque nänö önöne tao gode beyænque tömengä wentamö mongængampa, ante apänebo ëñëedäni.

¹²Ante apäneca ate tömengä miñäë në godäni iñömö tömengä weca ponte änänitapa.

—Bitö mänömainö ante apänebi ëñëninque Paditeoidi iñömö guingo imonte piïnäni apa änewëë.

¹³Äñönäni tömengä,

—Awæ botö Mæmpo minämai iwæ to wite bai wido cæte bacäëimpa. Paditeoidi iñömö wiï botö Mæmpo quïnäni inönäni inte adobai edä wido cæte wæcädänimpa.

¹⁴ Edæ babetamönāni bai ēñēnāmaī ināni inte tömēnāni iñōmō wadāni adobaī babetamönāni bai ināni inānite nē ænte māodāni ināni apa cæminii. Tömēnāni inānite gomō aedāni. Edæ babetamongā ingante wacā adobaī babetamongā inongā ingante ænte māocā gocā iñinque tömēna nāna babetamoncaya guēa ontatodē mongæncadæ guilibaīnāpa.

¹⁵ Ante apæneceā ēñēninque Pegodo,

—Mänōmaīnō ante odōmonte apænedinque bitō æbānō ante odōmoncæte ante apænebitāpa, ante apænebi ēñēmōnie.

¹⁶ Āñongante Itota,

—Minitō incæ ocai ōmæcadāni bai inōmīni inte ēñēnāmaī iminitawo. ¹⁷ Edæ quincōomē ōnōne guiidincoo incæ cæncadē guite ate goiwāa ogā mente wido cæte ba apa ānewēmīnii. ¹⁸ Wæætē ōnōne waocā nānō tedewēnō guiquēnē mīmōnē nānō wīwa pōnēnō beyænque tao godepa. Iñinque waocā ōnōwoca māninō beyænque wentamō ēwocacāmpa. ¹⁹ Edæ waocā mīmōnē nānō entawente taodinō beyæ wīwa ante pōnengāmpa. Mīmōnē nānō piinte pōnēnō beyænque waocā godō wænongāmpa. Mīmōnē towēinente tömengā nānōogængā ināmaī iñongante godō mongāmpa. Ayæ æcāmenque iñongante mīmōnē towēinente beyænque waocā godō mongāmpa. Mīmōno æinente wædinque wacā qui awēmō ængāmpa. Mīmōnē wīwa pōnēninque wacā ingante godō babæ wapiticæ apænecampa. Ayæ wacā ingante piinte tedecāmpa. ²⁰ Iñinque mīmōno tao godī beyænque waocā wentamō ēwocacāmpa. Wæætē mempodāmaī inte nānō cænō beyæ waocā wentamō ēwocadāmaī ingāmpa, ante edæ Itota apænegacāimpa.

Onquiyængā oodeocā ināmaī inte wede pōnente angāmpa

(Māadoco 7.24-30)

²¹ Māniñōmō quēwente wadæ godinque Itota Tido nāni quēwēñōmō Tidōo nāni quēwēñōmō eyequeī pongacāimpa. ²² Māniñōmō ponte quēwēñongā onquiyængā Cānaāmæ nē ēñate pædingā inte adoyōmō quēwente tadinque tömengā weca pōninque aa pecantāpa.

—Awēnē bitō Awēnē Dabii wodi pæimi inōmi inte ēñēmi. Botō beyæ pōnō waadete waa cæe. Botō wēñængā onquiyængā wēnæ inte quēwente wæwengāmpa cæbii.

²³ Ante mänōmaī aa pecā wædinque Itota pæ wēēnecantāpa. Pæ wēēnecā adinque tömengā miñæ nē godāni guiquēnē tömengā weca pōninque wææ apænedānitāpa.

—Mōnō miñæ tee empote Yæ yæ nē ānewēnongā ingante āmi gocæe.

²⁴ Ante wææ ānāni ēñēninque Itota wæætē,

—Cænīnāni obegaidi gueogæ gote wæwēnāni bai mōni idægocabo adobaī inte wē wōmonte wædāni adinque Mæmpo Wængongui, Tömēnānique inānite cæquīmi goquīmi, āninque botō imote da pōnongā wīi pontawoo.

²⁵ Angā ēñēninque onquiyængā iñōmō wæætē Itota ōnōwa gäänē ædæ wæænīnque apænecantāpa.

—Awēnē, botō beyæ cæbi waa bacæe, angantāpa.

²⁶ Āñongante Itota wæætē,

—Wēnāni cænguī inguēnē waocā dicæ guintamōidi cænguī ante wææntodonguingāā. Bitō edæ wabi iñōmite botō bitō beyæ ædō cæte cæquīmoo.

²⁷ Angā ēñēnte wædinque,

—Awënë iñæmpa në éadáni náni cænte eyepodimö wæænte ænömengadæmpa inö öñöñö guintamöidi ade cæmpa.

²⁸ Æñongante Itota,

—Onquiyæmi êñemi. Bitö nanguï pönëni iñömite bitö änö ante do cæte impa. Ante tæcæ apæneyongä tömengä wengä edæ do adoyedë edæ waa bagacäimpa.

Caate wædäni inänite Itota cæcä waa badänipa

²⁹ Mäniñömö quëwëninque wadæ godinque Itota Gadideapæ ömaaque pö änanquidi æi tæ contacantapa. ³⁰ Tæ contate ongöñongä nanguï inäni godongämæ pöninque wënæ wënæ inte wædäni inänite ænte pönänitapa. Pæ opa pæ opa godäni tönö tente tobænte wædäni inänite babetamö inäni tönö babetade inäni inänite Itota weca ænte mämö ñö cædänitapa. Ñö cædäni ongöñönänite Itota tömänäni inänite godö cæcä ate waa badänitapa. ³¹ Godongämæ ongönäni guiquënë, Itota godö cæcä ate babetade inänäni incæ tededäni êñëmönipa, ante guïñente wædänitapa. Tente tobænte wædinäni incæ waa badäni amönipa. Pæ opa pæ opa godäni ininäni incæ waa bate godäni amönipa. Babetamö ininäni incæ waa adäni wæmönipa, ante guïñente wædinque edæ Wængonguï ingante apænedinque, Möni idægocabo Wængonguï inömi inte edæ bitö adobique ñäö bai ëmömi inte edæ tæi piñænte cæbi ämönipa, ante watapæ apænegadänimpa.

4.000 ganca inäni inänite Itota godongä cænänipa

(*Mäadoco 8.1-10*)

³² Mäniñedë Itota tömengä miñæ në godäni inänite aa pecä pönäni ate apænecantapa.

—Inäni botö weca ongönäni iñömö mëönaa go adoönæque iñonte botö weca ongöñönäni tömënanäni cænguï ömæpodäni badäni ate wædinque botö tömënanäni tönö godongämæ wæte bai pönëmopa. Cænämäi inte gue ænente wæyönänite botö, Oncönë goedäni, ämo gote bai tömënanäni edæ idömæ godinque nangæ badinque edæ bocæ bocæ cæte wæcædönänimpa.

³³ Angä wædinque tömengä miñæ në godäni wæætë,

—Ënodäni inäniyaa. Önomæca incæ päö impa æninque godömöni cænguïnänii.

³⁴ Ante wæyönänite Itota,

—Minitö päö æpodö nææmini.

Æñongante,

—Päö önompo æmæmpoque go mëa gæyæ guiyä pöni mëa pöni më ongompa, ante edæ apænedänitapa.

³⁵ Itota iñömö godongämæ ongönäni nanguï inäni iñönänite angä tæ contadänitapa. ³⁶ Ininque päö önompo æmæmpoque go mëa tönö gæyæ tönö nani næænincoo pædæ godönäni æninque tömengä Wængonguï ingante, Bitö waa pönömi cæncæmönimpa, ante apænedinque pä æninque tömengä miñæ në godäni inänite pædæ pönongä æninque tömënanäni wæætë wadäni inänite pædæ pædæ godönäni ænänitapa. ³⁷ Æninque tömänäni godongämæ cæninque tömo pöni cænänitapa. Idæwaa cænäni ate tömënanäni pä ænte nani cænte ñönöni ee öñoncoo wente æninque Itota miñæ në godäni otodë pönö da wënänitapa. Ininque önompo æmæmpoque go mentodëa cænguï eyede contagatimpa. ³⁸ Në cænänäni iñömö onguïñænänique coatodo müido ganca iñönäni onquiyænäni tönö nani wencabo tönö tömënanäni

æpodänimë godömenque nangui pöni inönänimpa. ³⁹ Inque cænäni ate Itota inömo, Goedäni, angä godäni ate tömengä wipodë guii contate imämäa Mäagadabæ pongacäimpa.

Mä cæte odömömi amönie, änänipa

(Mäadoco 8.11-13; Odoca 12.54-56)

16 Itota pongä adinque Paditeoidi tönö Tadoteoidi inömo, Mönö ämö ëñen- inque tömengä oda cæbaingampa, ante cædinque Itota ingante apænedinque, Bitö, Pönencädänimpa, ante öönädë mä cæi bai cæbi amönie. ² Änani ëñeninque tömengä wæætë,

—Minitö inämpa gawadecä inönte ämö adinque, “Baänæ watamö bacæ wiñadä pöni gongæmpa,” ante do ëñëminipa. ³ Ayä ñäö bayö edæ, “Cöönæ cæcæ guinä wepæ bai gongæmpa,” äninque minitö, Öönæ æbänö ëönæpa, ante adinque do edæ ëñëminipa. Ininque, Wængongui quinä cæcæ cæcampa, ante quinänte wii ëñëmini. ⁴ Nöwomini inömo edæ në wiwa cæmini inte minitö Wængongui ingante pangocæte bai ëmö cæte gomini iminipa. Edæ, Mä cæte odömömi adinque pönëmaimönipa, ante anca ämini awädö. Incæte Cönäö wodi mä pöni nänö cægäinö ante adinque minitö pönenguënëmini inöminite mäninque mini aquinque ante odömönte ingäëimpa.

Äninque Itota tömënäni inänite ëmö cæte wadæ edæ gogacäimpa.

Wapiticæ näni apænedö yedæ æmpoqui bai impa, ante

(Mäadoco 8.14-21)

⁵ Tömengä miñä në godäni guiquënë tao gocæ cædinque päö wii pönente äenämai inte ämämäa tao ti wæänänitapa. ⁶ Itota inömo mäniü päö tömënäni näni äenämai inö ante wii tededinque wadö ante pönente iimaï apænecantapa.

—Päö yedæ æmpoqui, ante Paditeoidi tönö Tadoteoidi näni da wente cæi ate gomö aedäni.

⁷ Angä ëñente wædinque tömengä nänö në ëmiñänäni wæætë näni caboque tededinque,

—Päö ænte pönämai imöimpa, ante Itota wabänö mänömai beyä ämaingampa.

⁸ Ante nämäneque tededäni wædinque Itota inömo,

—Mini pönëgade. Päö äenämai inte mini pöninö ante quimä tedewëmini. ⁹ Awincaque adinque adämai iminitawo. Edæ päö önonpo æmæmpoque äninque botö godömo äninque tinco müido ganca inäni näni cæninö ante awincaque adimini inte minitö mimöno pönënämai imini awädö. Ayä cænte ate näni wææntodönincoo wente ænte mini contadinö inömo cængui æpotodënö ongotawo, ante pönëminiyaa. ¹⁰ Ayä ate botö önonpo æmæmpoque go mä päö ænte godömo äninque coatodo müido ganca inäni näni cæninö ante adinque minitö inömo edæ ëñënëmai iminitawo. Ayä edæ ñänä otodë mini wente ænte contadinö cængui æpotodënö ongotawo, ante pönëminiyaa. ¹¹ Mäninö ñöwo botö, Gomö aedäni, ante wææ äninque botö wii päonque ante apænetabopa, ante quinänte wii ëñëminii. Incæte botö, Päö yedæ æmpoqui, ante Paditeoidi tönö Tadoteoidi näni da wente cæi ate gomö aedäni, ante wææ ämopa.

¹² Angä ëñente pönente wædinque tömënäni, Gomö aedäni, ante apænedinque Itota wii önonque päö da wente cæinque ante wææ angampa. Wæætë edæ Tado-

teoidi tönö Paditeoidi wapiticæ ante nāni odömönte apænedö ante tömengä, Gomö aedäni, ante wææ angampa, ante do ëñëñanitapa.

Bitö Coditobi inömi imipa, ante Pegodo angampa

(Mäadoco 8.27-30; Odoca 9.18-21)

¹³ Mänii imæmäa tate ate Tetadea Pidipobæ eyequei pöningue tömengä miñä në godäni inänite apænedinque Itota,

—Botö Waobo ëñagaïmo inömotote wadäni botö imotedö ante tededinque, Æbodö imoo, ante apænedäni ëñëminii.

¹⁴ Äñongante tömëñäni wæætë apænedänitapa.

—Bitö imitedö ante apænedinque pancadäniya, Æpäñë në guidongaingä Wäö wodi incæ Itota adocä imaingampa, ante tededänipa. Wadäni guiquënë, Ediya wodi incæ Itota inongä imaingampa, ante apænedänipa. Wadäni guiquënë, Eedëmiya wodi ingampa, ante apænedänipa. Ayä, Wii Eedëmiya ingä iningue Itota Wængongui beyä në apænegainäni inönänite adocä imaingä ingampa, ante tededänipa.

¹⁵ Ante tömengä miñä në godäni apænedäni ëñëningue Itota wæætë,

—Minitö diyä, Æbodö imoo, ante pönëminii.

¹⁶ Äñongante Timönö Pegodo wæætë,

—Wængongui në quëwengä Wëmi ingaïmi inte bitö inömö Coditobi inömi imipa.

¹⁷ Ante apæñecä ëñëningue Itota inömö,

—Timönö bitö Öönata wëmi inömi inte ëñëmi. Wii waocä apæñecä beyä bitö mänömainö ante ëñëmitapa. Wæætë bitö nangui toquinque edæ botö Mæmpo öönädë në quëwengä incæ bitö imite pönö odömönte apæñecä ëñëmitapa. ¹⁸ Ayä edæ iïmai ante bitö imite ämopa. Bitö dicamö bai inömi imipa, ante pönëningue botö bitö ëmowo ante Pegodo pönö pemömo ëmömipa. Incæte dicabo täimö i bai bitö nö äñinö inömö edæ täine i inönte botö mänimoga täi mäenönte bai pönö badömo ate minitö mini pönencabo bacëminimipa. Iningue minitö, Itota në Codito ingampa, ante mini pönencabo inömö täi ëmömïni badinque mänimoga täi ongönte bai wede pönëñömïnite në täi piñänäni tadömengadænguiipo owote ta pönäni incæ ædö cæte godömenque mämö bæ taquinänii. ¹⁹ Edæ öönädë Awënë Odeye nempo guiquinque ante odemö wi änequï bai botö bitö imite pönömo æncæbiimipa. Æmi ate bitö në ämi badïmi inte inguipoga bitö wææ änö incæ öönädë dobæ wææ angainö inte ongongäimipa. Ayä bitö quiëmë inguipoga ñimpo cæbi i inönte mänii adobai öönädë dobæ ñimpo cæte ongongäimipa.

²⁰ Ante iinque apænedinque Itota tömengä miñä në godäni inänite iïmainö ante wææ angantapa. Minitö inömö botö imotedö ante apænedinque, Codito inongä ingampa, ante gode änämai inte edæ pæ wëëneedäni, angacäimipa.

Itota, Iïmai cädäni wæncæboimpa, ante apæñecampa

(Mäadoco 8.31-9.1; Odoca 9.22-27)

²¹ Ayä Itota mänïñedë mä odömöningue tömengä miñä në godäni inänite apænedinque, Botö cöwë Eedotadëë goquënëmo imopa, angantapa. Gobo ate ood-eoidi në aadäni nāni Picæncabo tönö, Wængongui qui, ante në godönäni ñänänäni tönö në odömönäni tönö godongämä cædinque botö imote wënæ wënæ cädäni wæwæncæboimpa. Ayä botö imote godömenque wänönäni wæncæboimpa. Incæte Wængongui angä beyænque botö mëönaa go adoönæque inönte edæ ñäni

ömæmonte quëwencæboimpa, ante apænecäiimpa. ²²Mänömainö ante apænecä ëñëñönäni Pegodo guiquënë Itota ingante nänënë mäo godinque Itota ingante pïingantapa.

—Awënë, quimæ wæncæ änewëë. Wængongui pönö wææ aacä beyä bitö caate wädämaï incæbiimpa.

²³Ante wææ äñongante Itota dadi ëmäinque Pegodo ingante näëmæ pïinque,

—Bitö Tatänabi bai inömi inte edæ botö weca ongönämaï wadæ gobæwe, angantapa. Bitö wïi Wængongui nänö pönënë ante pönëmi inte wæætë edæ waodänique nani pönëwënë bai pönëninque mänömainö ante bitö botö imote ægodawaquï ñöonte bai cædinque wææ änewëmi awädö, angacäiimpa.

²⁴Ayæ tömengä miñæ në godäni inänite apænecantapa.

—Æcänö botö miñæ pöinëna ina tömengä inömö nämä beyä ante pönënämaï inte edæ botö miñæ tee empote poncæcäiimpa. Nämä nänö wænguiwæ mongante ponte bai cædinque tömengä, Botö wæmo incæ caate wæbo incæ Itota ingante cöwë tee empote gocæboimpa, ante poncæcäiimpa. ²⁵Edæ æcänö, Nämä wææ gompodinque quëwencæboimpa, ante cædinque botö miñæ pönämaï ingä guiquënë tömengä inömö edæ quëwënämaï incæcäiimpa. Wæætë edæ, Wænönäni wæmo incæte botö Itota miñæ tee empote cöwë gocæboimpa, ante æcänö äna guiquënë tömengä wæætë quëwencæcäiimpa. ²⁶Edæ waocä inguipoga ongoncoo tömancoo ö æncæte ante cædinque nämä önöwoca incæ pædæ godongä wë womonte ba ininque edæ tömengä nänö ömæwocate wæquinque æmaingampa. Inæmpa eyepä godongampa diyä önöwoca wæætë æmaingäa.

²⁷Ante Itota inömö, “Edæ botö Waobo ëñagaïmo inte botö Wæmpo nää tömäo guinë gongæñonte botö edæ botö anquedoidi tönö edæ godongämæ poncæboimpa. Ayæ pömo ate botö tömämini minitö cægaï ganca ante eyepä pædæ pönömo æncæminimpa. ²⁸Edæ näwangä ämopa. Minitö inömö ongömini pancaminiya inömö ayæ wænämaï miimini quëwëñömini botö Waobo ëñagaïmo inte Awënë Od-eye bate ponte a ongömo adinque minitö botö nempo quëwencæminimpa,” ante Itota apænecäiimpa.

Itota waëmö pönï nää bai ëmongä bacä adänipa

(Mäadoco 9.2-13; Odoca 9.28-36)

17 Mäninö ante apænecä ate Itota önompo æmæmpoque go adoönæque inönte Pegodo ingante ayæ Tantiago tönö Wäö nana caya inate mänimpodäni inänite änanquidi mäicä adodänique æigadänimpa. ²Æite ongöñönäni edæ Itota awinca tömënäni ayönäni edæ wïi cöwë nänö ëmönö bai waëmö pönï nää bai edæ ëmongä bamongä adänitapa. Edæ nænque ti näwante nää bai bate ëmongä ininque tömengä weocoo näämænta nää incoo ëñacä adänitapa. ³Ayæ ayönäni edæ doyedë pönï në æigaina inömö Möitee wodi tönö Ediya wodi incæ inöntobæ a ongöinque Itota tönö godongämæ tedegönäni. ⁴Adinque edæ Pegodo guiquënë Itota ingante apænecantapa.

—Awënë ëñëmi. Inömö mönö waa pönï ongonde awädö. Bitö Ao ämi ininque botö oncontaioco mentaiya go adotaique mäenöinque bitö oncontai ante adotaique Möitee oncontai ante adotaique Ediya oncontai ante adotaique mäenömaïmopa.

⁵Ante ayæ tedeyongä boguimämo waëmö pönï ocabogadäni obo wææninque guinë gongæ ayönäni boguimämodë önönepämoque apænecantapa.

—Īngä ĩñömö botö Wengä ĩnogä inte botö nē waadegaingä ĩnogä ingampa. Tömengä ingante adinque botö watapæ tobopa. Minitö tömengä pönö apæneçä ēñēdāni.

⁶ Angä wædinque tömengä miñæ nē æidāni ĩñömö ançai guiñēninque do do wæate bai cædinque guidömēmæ tæ go wæænānitapa. ⁷ Go wæænāni adinque Itota tömēnāni weca ponte godö gampodinque,

—Guiñēnāmai inte ængæ gantiedāni, angantapa.

⁸ Ayæ æmō ayōnāni Itotaque adocanque ongonçā agadānimpa.

⁹ Ayæ ānanquidi ĩnō wææ pōñōnāni Itota tömēnāni ĩnānite angantapa.

—Minitö mä pōni botö emōnō wīimonte bai mini adinō ante gode ānāmai pæ wēneyōmīni botö ĩñömö Waobo nē ēnagaïmo inte eðæ wænte ate nāni omæmonçæboimpa. Nāni omæmōmo ate mīnitö eðæ māniñedē ate apæneçemīnimpa.

¹⁰ Angä ēñente wædinque tömengä tönō nē æidānāni tömengä ingante ānānitapa.

—Mānōmai ĩ ĩnīnque, Ediya wodi tāno ponçæçāimpa, ante nē odōmōnāni ĩñæmpa quīnante apænedāni.

¹¹ Āñōnāni Itota wæætē,

—Ediya wodi nāni ānogä ĩñömö tāno pongä ingampa. Nāwangä ĩmpa. Pōnīnque tömengä, Doyedē ingai bai nōwo wæætē adobai bacæimpa, ante badongampa.

¹² Botö wæætē ĩmaīnō ante apænebo ēñēdāni. Nōwocā mōnō Ediya ĩnogä inte do pongäimpa ante aquēnē. Do pōningä ingante eðæ awinçaque adinque, Æcānō ingäa, ante ēñēnāmai inte cædāni guiquēnē quiēmē nāni cæinēnō inçæ eðæ do cædānipa. Ayæ adobai, Tömengä ingante nāni cædi bai botö Waobo ēnagaïmo ĩñōmote botö ĩmote adobai wēnæ wēnæ cædāni wæçæboimpa, ante apænebo ēñēdāni.

¹³ Ante apæneçä ēñēninque tömengä tönō nē æidānāni ĩñömö eðæ, Æpænē mōnō guidōningä Wäo ingantedö ante apæneçampa, ante tæçæ ēñēnāni inte wægadānimpa.

Itota wēnæ ingante angä go ate wēñængä waa bacampa

(Mäadoco 9.14-29; Odoca 9.37-43)

¹⁴ Māniī ānanquidi æidānāni inte adodö wæænīnque nanguī pōni ĩnāni weca pōnāni adinque wacā onguiñængä Itota weca ponte da guicapodinque angantapa.

¹⁵ —Awēnē ēñēmi. Botö wengä onguiñængä ingante waadete waa çæ āmopa. Tömengä ĩñömö eðæ ançā quidi quidi dowænte wæwēninque wantæ wantæ ĩñō gongapamō tæ wææ tæ wææ çæçampa. Ayæ apænē tæi guii tæi guii çæçampa.

¹⁶ Ante wædinque, Botö wengä ingante pönō çæmīni waa bacæçāimpa, ante botö bitö miñæ nē godāni weca ænte pōmo adinque tömēnāni ædö çæte çæquīnāni.

¹⁷ Āñongante Itota tömēnāni ĩnānite,

—Nōwomīni mini ædæmō cædāmai incabo mini pōnēegade ĩmpa, angantapa. Minitö weca æpogadö quēwēmoī. Wapiticæ çæmīni ĩñōmīnite æpogadö piyænē çæte wæwēmoī. Eðæ wēñængä ingante ĩñömö botö weca ænte māmōmīni pongædāni, angantapa.

¹⁸ Ayæ wēnæ ingante piīninque Itota, Tao gobāwe, angä tao gocā ate wēñængä ĩñömö dobæ waa bacantapa.

¹⁹ Ayæ ate tömengä miñæ nē godāni adodānique Itota weca pōninque tömengä ingante,

—Mönitö guiquenē bitō bai wido cæcæ cædinque edæ quinante wido cædāmai intamōnii.

²⁰ Ante wæyönänite,

—Wede pönēmīnīpa diyæ wido cæquīmīnī. Edæ mīni pönēnō mōotatamō bai guiyā pōnī ewocamīni ininque mīnitō ānanquidi iñōmō ongonquidi adinque, Nānēnē gobāwe, ante āmīni bai edæ ānanquidi incæ do gā gote wayōmō gongæncædōn-impā. Edæ quiēmē cæcæte ante āmīni ininque tōmānō edæ do cæte babaimpa, ante nāwangā apænebo ēñēedāni. ²¹ Incæte mānīi wēnæ inte wido cæcæte ante cædinque cængui wantæpiyæ cænāmai inte Wængongui ingante apænete ate edæ wido cæqui impa, ante Itota apæneçā ēñēnānitapa.

Wænōnāni wæncæboimpa, ante Itota adodō ante apæneçā

(Māadoco 9.30-32; Odoca 9.43-45)

²² Mānīi Gadideabæ pōninque godongāmæ goyönänite Itota iimainō ante apænecantapa. Adocanque, Waocā nē ēñagaingā iñōmō æyōmōnō ongongāā, ante godō odōmōninque botō imote waodāni nempo pædæ godongā æncædānimpa. ²³ Nē ænāni wæætē botō imote wænōnāni nāñe wæncæboimpa. Ayæ mēōnaa go adoōnæque iñonte edæ Wængongui angā beyænque botō edæ ñāni omæmonte quēwæncæboimpa.

Itota mænōmainō ante apæneçā ēñēninque tōmengā miñæ nē godāni wæætē edæ nanguī wæwente bagadānimpa.

Wængongui oncō beyæ, ante Itota eyepæ godongampa

²⁴ Mānīi pōninque tōmēnāni Itota tōnō godongāmæ Capēnaōmō nāni quēwēñōmō pōñōnāni wadāni guiquenē Wængongui oncō beyæ ante tiguitamō didacōma nāni ānontamō mentamonga ante nē ānōnāni inte Pegodo weca ponte ānānitapa.

—Mīnitō Awēnē nē Odōmongā guiquenē Wængongui oncō beyæ ante didacōma tiguitamō cōwē pōñōnāmai ingantawo.

²⁵ Āñōnānite Pegodo,

—Cōwē nē pōnongā ingampa.

Āninque oncōnē pō wāānē guiyongante Itota tāno apænecantapa.

—Timōnō, æbānō ante pōnēmīi, angantapa. Īmæca nē quēwēmō mōnō eyepæ ænte quēwængæimpa, ante ĩmæca awēnē odeyeidi iñōmō edæ tōmēnāni nempo nē quēwēnāni inānite, Pōnōmīni æmoedāni, ānānitawo. Wæætē edæ wadāni inānite ānānitawo. Ædānidō inānite ānāni, ante pōnēmīi, ante Pegodo ingante Itota angantapa.

²⁶ Āñongante Pegodo,

—Wadāni inānite ānānīpa.

Ante apæneyongā Itota wæætē edæ,

—Mānōmai ī ininque edæ mōnō Awēnē Wængongui nempo nē quēwēnōmō inte wīi godonguēnēmō imōmpa. ²⁷ Incæte wīi piinte bacædānimpa, ante botō iimāi āmōpa. Bitō gāwapāa māo dadonte wēā tadōñōmi gæyæ tānocā tacā æe. Āninque gæyæ önōneca wi ænete ayōmi adotamonque incæ coatodo didacōma emontamō incæ edæ gæyæ önōne ongontamō adinque bitō tadonte æncæbiimpa. Mānintamō ænte māo bitō beyæ botō beyæ eyepæ godōmi æncædānimpa, angā gote Pegodo cægacāimpa.

Æcänö ñænængä inte në angä inguingää, ante tededänipa*(Mäadoco 9.33-37; Odoca 9.46-48)*

18 Mäniñedē Itota miñä në godäni tömengä weca ponte apänedinque, —Bitö öönädē Awënë Odeye iinque bayömi æcänö bitö nempo quëwēn- inque ñænængä pönī ñongä inte në angä inguingää, änänitapa.

²Itota iñömö wēñængä guiyangä ingante edæ aa pecä pongä ate tömengä ingante tæcæguedē goncædinque tömēnāni inānite wæætē apäñecantapa.

³—Nāwangä ämo ēñēedāni. Minitö öönädē Awënë Odeye nempo guicæte ante wapiticæ mīni pönēwēnō wido cædinque wēñænāni nāni piyænē cæte pönēnō bai pönēedāni. Mänömaī cædāmaī iimīni ininque Awënë Odeye nempo cōwē guidā- maī inte wæbāimīnīpa. ⁴Incæte iingä wēñængä, Önömoque imopa, ante pönengä bai æcänö adobainō ante pönente quëwēna guiquēñē tömengä iñömö edæ öönädē Awënë Odeye nempo quëwēninque ñænængä pönī inte edæ në angä ingampa. ⁵Ayæ æcänö botö emöwo apänedinque mäningä bai wēñængä ingante, Pöe, ante godö waa cæcä iñömö tömengä iñömö edæ botö imote edæ do, Pöe, ante pönö waa cæcä ingampa, ante Itota apäñegacäimpa.

Wacä oda cæcæcäimpa, ante nāni wæquinque cædänipa*(Mäadoco 9.42-48; Odoca 17.1-2)*

⁶Itota ayæ apäñecantapa. “Wadāni godö cædāni beyæ botö imote në pönēnāni incæ pancadāniya edæ dobæ oda cæte wēnæ wēnæ cædänipa. Ininque, Wēñængä adocanque guiyangä pönī ingä incæ oda cædāmaī incæcäimpa, ante wææ cæcæte ante cædinque në godö cæcæ cædingä ingante iūmaī cædāni ininque tömengä to- quēnengä imaingampa. Waodāni nāni dacæ godö dacæ godö cæquinca ñænænca æninque tömengä önömenca æ wēmencadinque tömengä ingante tæcætibæ wido cædāni ininque tömengä edæ, Wēnæ wēnæ cædāmaī inte becadote wæmo beyænque Wængonguī botö imote wīi godömenque pangampa, ante wædinque waa to- quēnengä imaingampa. ⁷Quiēmē beyæ oda cædinque inguipoga quëwēnāni nāni wæquinque wēnæ wēnæ cædänipa. Në pönēnāni incæ pancadāniya wīi ēñente do oda cædänipa. Cōwē mänömaī impa. Incæte, Oda cæcæcäimpa, ante në cæcä iñömö edæ tömengä nanguī nänö caate wæquinque cæcampa,” ante apäñegacäimpa.

⁸Ayæ, “Bitö önompoca cædinque wēnæ wēnæ cæbi ininque önompo aa wi æmpote wido cæte bai cædinque wēnæ wēnæ bitö cædinö ante wido cæbæwe. Bitö önöwa wapiticæ godinque wēnæ wēnæ cæbi ininque bitö önöwa aa wi æwate wido cæte bai cædinque wēnæ wēnæ bitö cædinö ante wido cæbæwe. Ìñæmpa inguipoga quëwēn- inque bitö æmæmpoque empobi incæte æmæntique entibi incæte bitö öönädē æid- inque cōwē wænāmaī quëwēmi ininque waa imaimpa. Edæ tipæmpoga empobi inte tipæntiya entibi inte edæ bitö gonga cōwē bæcote wæwenguīñömö wīi æmæwo wido cæte wæquīmidö angüēñē. ⁹Ayæ bitö awinca wīwa adinque wēnæ wēnæ cæbi in- inque bitö awinca oo togæmonte wido cæte bai cædinque wēnæ wēnæ bitö cædinö ante wido cæbæwe. Ìñæmpa inguipoga quëwēninque bitö æmæmonque emömi inte bitö godömenque quëwēmi ininque waa imaimpa. Edæ wīi tipæmonga emömi inte edæ bitö tadömengadænguipo gonga cōwē bæcote wæwenguīñömö wīi wido cæte wæquīmidö angüēñē,” ante Itota angacäimpa.

Bodego wē womonte ba, ante odōmonte apænecampa

(*Odoca 15.3-7*)

¹⁰ Ayæ, “Íngä guiyangä iñömö önonganque ingampa, ante mīnitö adocanque ingante incæ piinte adāmai imæwewedāni. Iñæmpa tömēnāni inānite nē aadāni anquedoidi incæ öönædē quēwēninque botö Mæmpo nē öönædē quēwengä awinca cōwē adānipa cæmīni. ¹¹ Edæ botö Waobo ēñagaīmo inte edæ wē womōnāni inānite diqui mīnte æncæte ante pōmo imopa,” ante Itota apænecantapa.

¹² Ayæ, “Æbānō ante pōnēmīni edæ. Waocä obegaidi tiēē ganca ēacä ongōñōnāni adocanque pangocæte nānēnē gocä adinque nē ēacä iñömö nöobenta i nöebe ganca ināni ānāmēnē ongōñōnānite ēmō cæte diqui mincæ wīī goquingä, ante pōnēmīni. Cōwē edæ diqui diqui mincæ gocæcäimpa. ¹³ Godinque nē pangocæ godingä ingante ēadente acä ininque nē ēacä waa tobaingampa. Edæ pangocæ godāmai ināni nöobenta i nöebe ganca ināni inānite adinque cōwē tocä inongä inte tömengä tæcæ nānō adingä beyæ godōmenque tocampa. ¹⁴ Mīnitö Mæmpo öönædē nē quēwengä adobaingä, Guiyangä wē womonte wænāmai incæcäimpa, ante cōwē diqui diqui mingampa,” ante Itota odōmonte apænecäimpa.

Nē wēnæ wēnæ cæcä ingante pīnāmai inte waadecäimpa

(*Odoca 17.3*)

¹⁵ Godōmenque odömōninque Itota apænecantapa. “Bitö tōniñacä bitö imite wēnæ wēnæ cæcä wædinque bitö tömengä weca gote āmi adomīnaque nānēnē gote ongōeda. Ongōñōmīnate bitö tömengä ingante, Mānōmai cæbitapa, ante āmi ēñengæ. Mānōmai āmi ēñengä ininque tömengä waadete babaingampa,” ante apænecäimpa. ¹⁶ Ayæ godōmenque apænecantapa. “Wæætē tömengä ēñēnāmai inte waadedāmai ingä ininque bitö Wængonguī angä ēñente nāni yewæmongainō bai cæe. Waocä æbānō cæcäa, ante adinque waoda mēnaa ina incæ mēnaa go adocanque ināni incæ adoyōmō ante apænedāni ininque tömēnāni nāni apænedō beyænque ante mönō, Nö impa, ante ēñengæimpa, ante Wængonguī beyæ yewæmongatimpa. Ininque bitö, Mönō adoyōmō ante apænecäimpa, ante waoda mēnaa inate āmi incæ adocanque ingante āmi incæ æcāmenque bitö tōnō goda tömengä adoyōmō ante nōinō ante apænecæcäimpa. ¹⁷ Ayæ apænemīni ate nē wēnæ wēnæ cædingä cōwē ēñēnāmai ingä ate wædinque bitö iñömö, Itota nē Codito ingampa, ante mīni pōnencabo weca gote apænebi ēñenguīnāni. Ayæ tömēnāni wæe ānāni ate tömengä godōmenque ēñēnāmai ingä ininque tömengä, Nāmā cæte quēwenguīmo, ante nē ēñēnāmai cædāni bai ingampa. Ayæ, Odōmāno awēnē beyæ nē æwengä bai ingampa cæbii. Tömengä ēñēnāmai cæcäinō anguēnē, ante bitö edæ tömengä ingante gomö ae,” ante Itota angantapa.

¹⁸ Ayæ apænedinque, “Nāwangä āmopa. Mīnitö inguipoga nē āmīni inte apænte āmīni ininque mīni apænte ānīnō incæ öönædē dobæ apænte ante impa. Ayæ inguipoga mīnitö apænte ānīnque nīmpo cæmīni ininque mīni cædō bai öönædē adobai do nīmpo cæte ingæimpa.”

¹⁹ Ante apænedinque Itota ayæ apænedinque, “Mīnitö imīnite iīmai āmopa, angantapa. Inguipoga mēmīnaa guēa adoyōmō pōnente apæneyōmīna botö Mæmpo öönædē nē quēwengä iñömö mīna āmai ante tömānō cæcæcäimpa. ²⁰ Edæ mēmīnaa imīna incæ mēmīnaa go adocanque imīni incæ æpomīnimē inōmīni incæ mīnitö

adoyömö ponte botö emöwo apänete ongönömini edæ botö adoyömö munitö tönö godongämæ ongoncæboimpa,” ante Itota apänegacäimpa.

²¹ Ayæ ate Pegodo tömengä weca ponte äninque,

—Awënë, botö töninacä botö imote wënæ wënæ cæcä adinque botö tömengä ingante æpogadö godö ñimpo cæbo ee goquingä. Edæ onompo æmæmpoque go mem-poga mänimpoga ñimpo cæbo ee goquingä, ämii.

²² Äñongante Itota,

—Ïñæmpa, wii onompo æmæmpoque go mempogaque anguii. Edæ godömenque bitö änimpoga pïinämaï inte ñimpo cæbi ate wæætë adopoga wæætë adopoga ayæ cöwë tetenta ganca wæætë wæætë ñimpo cædinque coatodo tiento nöobenta ganca mänimpoga pïinämaï inte ñimpo cæbi goquingä. Mänömaï ante Itota tömengä miñæ nê godäni inänite, Cöwë pïinämaï inte ñimpo cæquimini, angacäimpa.

Në cædongä nänö waadedämaï cædö ante odömongampa

²³ Itota ayæ apänecantapa. “Mäninö beyæ bitö änö bai cædäni wædinque imæca awënë odeye nänö apænte ämaï öönædë Awënë Odeye incæ tömengä ingante nê ëñëmini iminite æbänö apænte angampa, ante odömömo aquimini, angantapa.

²⁴ Imæca awënë iñömö, Botö imote nê cædäni incæ botö imote debe inäni inte eyepæ pönönäni æncæboimpa, ante cæyongä adocanque tadento ñænængade nani godonte äinta incæ diete müido ganca nänö pönongä æni beyæ wæætë pönönämaï debe ingä adinque tömengä ingante ænte mämönäni pongampa. ²⁵ Pongä adinque tömengä awënë iñömö, Ömæpocä inte tömengä ædö cæte pönongä ænguimoo, ante pönente wædinque iïmaï angantapa. Wacä ingante nê cædäni tömengä nani wencabo bacædäniimpa, ante cædinque botö nê pönönämaï ingä nana gæncaya nani wencabo tömänäni inänite bæi ongonte wacä ingante godonte eyepæ ænguimoo, angä. ²⁶ Eñente wædinque edæ nê cæcä iñömö tömengä weca ædæ wææninqe edæ, ‘Awënë, waadete cædinque ee abi adinque botö ayæ ate botö debe inganca tömanta pönömo æncæbiimpa.’ ²⁷ Ante wæcä ëñëninque awënë iñömö nê cæcä ingante guëa wæte bai pönëninque, Tömää edæ godonte impa, äninque godö ñimpo cæcä abæ tawænte gocantapa.

²⁸ “Incæte tömengä tönö wadäni nani godongämæ cæcabo iñönäni wacä guiquënë adocä ingante tiëë tiguitamö ganca nänö pönongä æni beyæ wæætë pönönämaï debe inongäimpa. Adinque nê abæ tawænte godingä incæ tömengä ingante debe ingä ingante godö yao ongonte ñimämencate cædinque, ‘Do bitö æninta pönömi æmo töö.’ ²⁹ Ante piingä wædinque tömengä tönö nê cæcä inte nê debe ingä wæætë nê äningä weca da guicapodinque, ‘Bitö waadete cædinque ee abi ininque botö ayæ ate pönömo æncæbiimpa.’ ³⁰ Ante wæyongä edæ Baa äninque tömengä, Tömanta edæ cöwë pönömi æmo ate tabaimipa, äninque edæ tee mönecä ongongantapa.”

³¹ “Adinque edæ tömëna tönö nê cædäni guiquënë, Mänömaï cæcä, ante wædinque piininque awënë weca gote, Mänömaï cæcampa, ante wæmönipa. ³² Änäni ëñëninque wënæ wënæ nê cædingä ingante äñecä pongä ate tömengä ingante awënë, ‘Botö imo nê cædimi inte nê wënæ wënæ cæbitapa töö. Ïñæmpa bitö nan-gui ämi beyænque botö edæ, Tömanta edæ godonte impa, ante ñimpo cæbo abæ tawænte gobitapa. ³³ Ïninque botö guëa wæte pönente cæbo bai bitö tönö nê cæcä ingante bitö adobaï guëa wæte pönëmi bai waa incædönimpa.’ ³⁴ Äninque awënë äingä badinque, Tömengä tömanta nänö æninta botö imote adodö nänö pönonguin-

ganca botö, Tömengä ingante ænte pancæminimpa, ämopa. Äninqe tömengä ingante tee mönete oncönë në pänäni inänite pædæ godongä ännänpa.”³⁵ Mäninqe ante odömönte apænedinqe Itota godömenque apænecantapa.

—Edæ mîni waocabo iñömînite mînitö wacä nänö wënæ wënæ cædinö ante godö ñimpo cædämaï imîni adinqe awënë nänö apænte änö bai botö Mæmpo öönædë në quëwengä iñömö adobaï mînitö wënæ wënæ cædinö ante ñimpo cædämaï inte tömänö ancæcäimpa, ante apænegacäimpa.

Nänöogængä ingante nâni pämænö ante

(Mäadoco 10.1-12; Odoca 16.18)

19 Mänî Gadideabæ quëwente iinqe apænete ate Itota Oododänö ämämäa godinqe Oodeabæ pongacäimpa.² Pongä adinqe nanguï inäni tee empo goyönäni tömengä gampocä waa badänitapa.

³ Paditeoidi guiquënë, Godö ämö ëñëninque Itota wabänö adodeque oda cædete wæcä tocäi, ante pönëwënäni inte tömengä weca pöninge ännänitapa.

—Wængongui æbänö ante wææ angacäi. Waocä tömengä nänöogængä ingante quiëmë beyænque pämængä iinqe edæ nö cæte intawo.

⁴ Ante äñönäni Itota,

—Mînitö iñæmpa Wængongui beyæ ante nâni yewæmöinta adämaï inte ämînitawo. Wëenëñedë edæ waocä ingante në Badongaingä iñömö, “Onguïñængä ingampa, ante ayæ, Onquiyængä ingampa, ante badongacäimpa,” ante yewæmongatimpa.⁵ Ayæ, “Mänömaï beyæ waocä mæmpocä ingante ëmö cæte wäänä inante ëmö cæte godinqe onquiyængä ingante, Botö nänöogængä, ante ämæwo moncæcäimpa. Iinqe mënaa inäna incæ tömëna nâna gæncaya badinqe adocanque bai bacædäimpa,” ante yewæmongatimpa.⁶ Iinqe tömëna nâna gæncaya adocanque bai badinqe nänënë mënaa inämaï inapa. Mänömaï beyæ Wængongui, Adocanque bai inapa, ante nâna gæncaya nänö në badongaïna iñönte waocä wæætë pango cædämaï incæcäimpa.

⁷ Äñongante tömënäni wæætë,

—Iinqe, Ämæwo pämæmo goquimi, ante yewæmöninqe mäninta bitö yewæmöninta onquiyængä ingante godömi ængä ate bitö önonque pämæncæbiimpa, ante Möitee wodi quinante wææ angacäi, ante ëñencæte ante mönitö wæmönipa.

⁸ Änäni ëñëninque Itota edæ,

—Iñæmpa, Mîmö ömædëmîni inöminî inte mînitö wënæ wënæ cæinëminî iminipa, ante wædinque edæ Möitee, Nänöogængä ingante pämænguimi, ante yewæmongacäimpa. Wëenëñedë iñömö edæ wîi mänömaï ingatimpa.⁹ Wæætë onquiyængä wacä ingante godö todämaï iñongante tömengä ingante në pämëningä iñömö tömengä dobæ nänö towenguinque edæ wacä onquiyængä ingante godö mongampa. Ayæ onquiyængä pämænte goyongä wacä onguïñængä tömengä ingante godö möninqe adobaï në towengä bacampa, ante ämö pönëmaimînipa.

¹⁰ Angä ëñëninque tömengä miñæ në godäni guiquënë,

—Iñæmpa nâna gæncaya ina inte pämænämaï ingæimpa, ante bitö änö bai nö i iinqe edæ waocä wëmö cæcä bai waa imaimpa, ante pönente wæmönipa.

¹¹ Ante wæyönänite Itota,

—Wēmō cæcä, ante mīni änō bai ante waocä ædō cæte cæquiringä. Wængonguī nänō äninänique mäninō ante Ao ante mōnāmaī inänipa. ¹² Edæ ædänidō mōnāmaī inguīnänii, ante pancadāniya guiquēnē wäänä cæncadē ēñayedē edæ ongænca babetamiñænāni ēñagaināni inte mōnāmaī ināni. Pancadāniya wæætē waodāni cædāni beyænque babetamiñænāni badinque mōnāmaī inänipa. Ayæ pancadāniya guiquēnē öönädē Awēnē Odeye nempo beyæ ante nāmā pōnēninque Ao ante edæ mōnāmaī inänipa. Edæ æcänō botō änō ēñente Ao äna, tōmenganque mänōmaī cæcæcäimpa, ante Itota odōmongä ēñengadänimpa.

Wēñænāni inänite gampo cæcadinque waa apænecampa

(Mäadoco 10.13-16; Odoca 18.15-17)

¹³ Ayæ ate, Wēñænāni inänite Itota pōnō gampo cæcadinque tōmēnāni beyæ Wængonguī ingante apænecæcäimpa, ante cædinque wadāni tōmengä weca ænte pō ænte pō cædāni adinque tōmengä miñæ nē godāni guiquēnē, Ænte pōnāmaī iedāni, äninque Baa Baa änāni. ¹⁴ Ate wædinque Itota iñōmō edæ,

—Wēñænāni inänite ee amini poncædänimpa. Edæ mänināni nāni pōnēnō bai adobai pōnēnāni inte edæ öönädē Awēnē Odeye nempo do quēwēnāni inänipa. İninque mīnitō iñōmō wēñænāni inänite Baa änāmaī iedāni.

¹⁵ Äninque wēñænāni inänite pædæ gopo gampo cæcadinque wadæ gogacäimpa.

Mäincoo nē nanguī äcä Itota weca ponte apænecampa

(Mäadoco 10.17-31; Odoca 18.18-30)

¹⁶ Ayæ wacä Itota weca pōninque,

—Awēnē nē Odōmōmi apænebi ēñēmoe, angantapa. Botō æbänō waa cæbo ininque cōwē wænāmaī wantæpiyæ quēwēmaimoo.

¹⁷ Ante äñongä Itota edæ,

—Wængonguī adocanque nē waa cæcä ingä incæte bitō botō imonte äninque, Æbänō waa cæquīmo, ämii. Incæte, Quēwenguīmo, ante wæbi ininque bitō, İmaī cædāni, ante Wængonguī nänō wææ angainō ante ēñente cæe.

¹⁸ Angä wædinque,

—Ædedō ante ämii.

Äñongante Itota wæætē,

—İmaī. “Wacä ingante godō wænōnāmaī. Bitō nänōogängä ināmaī iñongante godō mōnāmaī. Wacä quī awēmō ænāmaī. Wacä æbänō cæcää, ante godō babæ wapiticæ änāmaī. ¹⁹ Wæmpocä ingante wäänä inante waa adinque godō waa cæe. Ayæ, Nāmā ante bitō waadete cæbi bai wadāni inänite adobai godō waadete cæe.”

²⁰ Angä ēñēninque edēningä iñōmō,

—Botō mäninō bitō änō bai do cæte pægäimo inte botō quino edæ godōmenque cæquīmoo.

²¹ Äñongante Itota wæætē,

—Bitō, Ædæmō nō cæbo bacæboimpa, ämi ininque edæ öönädē bitō waëmoncoo ænguinque edæ nōwo godinque imæca bitō mänincoo tōmancoo godonte äninque bitō æninta wæætē ömæpodāni inte wædāni inänite tōmanta godōmi æncædänimpa. Ayæ edæ botō imote tee empote pöe.

²² Angä ēñēninque edēningä iñōmō edæ, Botō mäincoo, ante nänō nanguī äcaco ante pōnente wæwente wædinque wadæ gogacäimpa.

²³ Gocá ïninqe edæ Itota tõmengä miñæ nè godäni ïnänite apænedinque,

—Nawangä ämo ëñeedäni, angantapa. Öönædë Awënë Odeye nempo guiite quëwencæte ante cædinque waodäni ömæpodäni inte botö miñæ pönänipa. Mäincoo nanguï éacä guiquënë æbänö cæte ömæpocä inte botö miñæ ponte guiite quëwengu-ingää, angantapa. ²⁴ Ayæ cämeyo ïñömö guiyangä ingampa diyæ daagö guiyampite pædæ tacää. Cämeyo ñænængade ïnogä inte pædæ tadämaï ingä baï nè éacä adobaï ingampa. Tömengä nämä ayongä ñænængä ïnogä inte edæ æbänö cæte Wængonguï Awënë Odeye nempo do wäänë guiite quëwenguingää.

²⁵ Ante apænecä wædinque tõmengä miñæ nè godäni wæætë ancai guïñëninque,

—Ïñæmpa mänömaï ï ïninqe æcänö wäänë guiite quëwenguingää, änanitapa.

²⁶ Itota tõmënäni ïnänite cöwä adinque apænecantapa.

—Waomïniqe incæ nämä mïni cædö beyænque ædö cæte quëwëmaïmïni. Wæætë Wængonguinqe nämä tõmännö do cæcä ingampa.

²⁷ Angä ëñente wædinque Pegodo guiquënë,

—Mönitö ïñömö edæ möni éadincoo owæ caate bitö miñæ ömæpomöni inte pömöni abipa. Ömæpomöni ïmöni inte edæ quinö ænguïmöni.

²⁸ Äñongante Itota wæætë tõmënäni ïnänite angantapa.

—Nawangä ämopa. Botö badömo ate tõmancoo miincooque ïinque bayonte botö Waobo ëñagaimo ïñömö edæ tõmëmö ñäö ëmönö ëmöninque edæ pö tæ contacæboimpa. Ïninqe mïnitö botö ïmote nè tee empogaimïni inte mänïñedë ate tõmëmïni tæ containpaa tipæmpoga go mempaa pö tæ contadinque awënëidi badinque edæ idægoidi tipæmpoga go mencabodäniya ïnänite apænte ancæmïnimpa.

²⁹ “Ayæ godömenque ämopa. Mïnitö nawangä oncodo tao godinque mïnitö tönïñadäni ïnänite ëmö cæte godinque badä ïnante mæmpocä ingante wënëni ïnänite botö ëmöwo beyænque ëmö cæte pömïnitapa. Ïninqe ïïmaï ante nawangä ämopa. Æcänö botö beyænque mänömaï cædinque tõmengä nänö éadï ömæ ëmö cæte goda ïñömö tõmengä nänö ëmö cæte godincoo baï adopocoo æncæcäimpa. Wïï adopogaque edæ æninque tõmengä wæætë edæ godömenque adopocoo adopocoo æninque tiëë ganca mänimpoga æncæcäimpa. Ayæ botö pönö cæbo æninque tõmengä cöwë wantæpiyæ wænämaï quëwencæcäimpa. ³⁰ Incæte edæ täno yæcado ongöninäni pancadäniya wæætë yæmiñæ gote ongönäni bacædänimpa. Ayæ yæmiñæ ongöninäni inte wæætë yæcado ponte ongoncædänimpa,” ante Itota apænægacäimpa.

Në cædäni æbänö cædäni, ante odömonte apænecampa

20 Itota ayæ edæ, Öönædë Awënë Odeye nempo æbänö quëwënëni, ante odömoncæte ante ïïmaï apænægacäimpa. “Wacä nè ömæ éacä nänö cæbaï Öönædë Awënë Odeye incæ adobaï cæcampa. Nè éacä ñäö bayö oncodo taodinque, Æcänö ñöwoönæ botö yowementacodë cæquïnaa. ² Ante adinque tõmengä beyæ nè cæcædäni ïnänite, Mïnitö tõmäa itädë cæmïni ate botö adocanque ingante deënadïo tigitamö adotamonque pönöninque wacä ingante wacä ingante adotamonque adotamonque pönömo æncæmïnimpa, äñongante Ao ante yowementacodë cæcæ godänipa. ³ Gote cæyönäni tõmantadæ æñonte nè éacä tõmënäni nänï godonte æïñömö gote ayongä wadäni önonque cædämaï a ongönäni. ⁴ Adinque tõmengä, ‘Mïnitö adobaï gote cæmïni ate eyepæ godömo æncæmïnimpa.’ Angä ëñëninque Ao ante godänipa. ⁵ Ayæ tæcæbæcä ïñonte adobaï tõmengä wadäni ïnänite

angā godāni ate wæætē ædæ wæicā iñonte adobaī taodinqe wadāni inānite angā godāni. ⁶ Ate edæ awæncabo wæiyongante edæ adocā tao ayongā wadāni ononque a ongönāni adinqe tömengā tömēnāni inānite, ‘Quinante tömäā itædē edæ cædāmaī a ongöminī.’ ⁷ Ante āñongā, ‘Īñæmpa mönitō imönite, Cæedāni, ānānīpa cæquimönii.’ Ānāni ēñēninqe, ‘Mīnitō adobaī edæ botō yowementacodē gote cæedāni,’ angā godānitapa,” ante Itota odömōnte apænecantapa.

⁸ Ayæ, “Gāwadecæ pōnī bayonte nē ēacā iñömō tömengā beyæ nē apænecā ingante āninqe, ‘Botō beyæ nē cædāni inānite aa pebi pönāni ate bitō tömēnāni nāni cædī beyæ godōmi eyepæ æncædānīmpa. Awæncabo wæiyongā nõwo pōnī gote cædīnāni inānite edæ tāno godōmi ænāni ate wæætē wēēnē gote cædīnāni inānite edæ ayæ ate godōmi æncædānīmpa.’ ⁹ Angā ēñente aa peyongā awæncabo wæiyongā gote cædīnāni inte tāno pönāni ate deñadio tiguitamō adotamonque adotamonque godongā ænāni. ¹⁰ Ate adinqe tāno gote cædīnāni guiquēnē, Mönō godōmenque ænguī impa, ante pönēñönāni tömengā godongā æninqe edæ deñadio tiguitamō incæ adotamonque adotamonque adopo adopo ænānīpa. ¹¹ Æninqe tömēnāni nē ēacā ingante pīinte tedinque, ¹² ‘Mönitō tömäā itædē nāwancate cæmōni incæ iñæmpa cæbii. Ayæ pönāni guiquēnē wantæ iñō adoque ooda ganca cædāni incæ mönitō baī adopo godōmi ænāni wæmönīpa töö.’ ¹³ Ante pīñönāni nē ēacā wæætē adocanque ingante apænedinqe, ‘Īñæmpa botō bitō imite wænæ wænæ cæbogaa. Edæ, Deñadio tiguitamō adotamonque pönōmo æncæbiīmpa, āñōmo Ao ānāmaī imitawoo. ¹⁴ Bado, bitō qui incæ ænte goe. Edæ bitō æni baī ayæ ponte cædingā ingante adopo godonguēnēmo intabopa. ¹⁵ Edæ botō ēadincoo incæ, Æcānō ingante godonguīmo, ante pönente wædinque ædō cæte tömēmo incæ ānāmaī inguīmo. Botō nē waa cæbo iñömote bitō guiquēnē edæ pīinte abi awædō,’ ante nē ēacā angampa.”

¹⁶ Māninganca ante odömōnte apænedinqe Itota iñömō, “Mānōmaī cædāni ininqe botō, Tāno yæcado ongönināni inte wæætē yæmiñæ gote ongoncædānīmpa, antabopa. Ayæ, Yæmiñæ ongönināni inte wæætē yæcado ponte ongoncædānīmpa, ante apænētabopa,” ante apænēgacāīmpa.

Itota, Wæncæboīmpa, ante wæætē adodō ante apænecā

(Māadoco 10.32-34; Odoca 18.31-34)

¹⁷ Mānīi godinqe Eedotadēē gocæ cædinque tömengā miñæ, Dote, ante nāni gocabo inānite Itota nānēnē ænte māodinqe idōmæ goyönāni apænecantapa.

¹⁸ —Nõwo iñömō edæ mönō Eedotadēē iñömō æicæīmpa. Æi gote ongömō ate adocanque, Waocā nē ēñagaingā æyömönō ongongāā, ante wadāni inānite godō odömōngā bæi ongonguīnāni. Ayæ, Wængonguī qui, ante nē godönāni ñænænāni tönō nē odömönāni nempo tömengā botō imote pædæ godongā æninqe tömēnāni wæætē botō imote apænte āninqe, Cöwē wæncæcāīmpa, ancædānīmpa. ¹⁹ Ayæ edæ, Awæ ñænquedimæ cædinque tömengā ingante timpote wænōedāni, ante tömēnāni oodeoidi ināmaī ināni nempo botō imote wæætē māo godönāni æncædānīmpa. Æninqe tömēnāni wæætē botō imotedō ante badete todinqe ayæ tæi tæi pāninqe awāa timpodāni wæncæboīmpa. Nāñe wæmo ate Wængonguī angā beyænque botō mēōnaa go adoönæque iñonte ñāni ömæmoncæboīmpa, ante Itota apænēgacāīmpa.

Tantiago tönö Wäö badä, Botö ämaï ante cæe, angampa

(Mäadoco 10.35-45)

²⁰ Tebedeo wëna Wäö tönö Santiago iñöna tömëna badä iñömö tömëna wëna tönö Itota weca ponte ædæ wææninqe edæ, Botö ämaï ante cæe, ante apænecä. ²¹ Eñëninque Itota,

—Minö quïnö apænecæte ante pömii.

Äñongante,

—Bitö Tæiyä Awënë Odeye bate tæ contadinqe edæ botö wëñæna inate ämi ate adocanque bitö tömëmæmi inö adocanque dipæmæmi inö tæ contaquïna ämopa, angantapa.

²² Eñëninque Itota wæætë,

—Iñampa adämaï inte minitö ämini awædö. Botö nantate wæwenguimæ bai becabo bai minatö edæ adotaca becate bai Ao ante botö beyä nantate wæwenguimïnaa. Edæ æpænë guuite bai botö wænguimæ bai guïñënämaï iminapa diyä botö beyä wænguimïnaa.

Äñongante,

—Ao ante guïñënämaï cæcæmönaimpa, änatapa.

²³ Itota wæætë,

—Botö nanguï caate wæwëmo bai minatö adotaca bete bai äanque bai caate wæcæminaimpa. Näwangä impa. Incæte æcänö botö tömëmæ inö æcänö botö dipæmæ inö tæ contaquïna botö edæ pönö änämaï imopa. Wæætë botö Mæmpo do, Mäninaque mänimpaa tæ contaquïna, ante në badongaingä inte tömengä adocanque godö angä contaquïna, ante Itota apænegacäimpa.

²⁴ Mänömainö ante tededapa töö, ante eñëninque wadäni diete ganca tömengä miñä në godäni guiquënë iñäna näna caya inate edæ piñänitapa. ²⁵ Piñäni ininque Itota aa pecä pönäni ate tömënäni inänite iïmaï apænecantapa.

—Oodeoidi inämaï inäni awënëidi æbänö cædänipa, ante do eñëmïnipa. Tömënäni iñömö nämä beyænque ante cædinqe nanguï piïnte änäni wædinqe tömënäni nempo quëwënäni wæætë do eñente cædänipa. Ayä tömënäni weca në ñænænäni inönäni iñömö, Tömëmoque ämo eñente cædäni, ante piïnte änäni wædänipa. ²⁶ Minitö guiquënë tömënäni nämä beyænque ante nanguï änäni bai wii adobaï cæquënëmïni imïnipa. Wæætë mini cabo iñömïni adocanque ñænængä pönï ingä bacæte ante cædinqe tömengä wæætë edæ minitö beyä në cæcä baquënegä ingampa. ²⁷ Ayä yæcado ongöïnente wæcä iñömö tömengä yæcado ongoncæte ante cædinqe wæætë edæ yæmiñä pönï gote tömänäni inänite në cæcä badinqe tömengä nämä beyä ante cædämaï inguënegä ingampa. ²⁸ Edæ Waobo eñagaimo inte adobaï, Botö beyä pönö cæcædänimpa, ante wii pömo imopa. Wæætë wadäni beyä godö cæcæte ante pömoimpa. Ayä edæ nanguï inäni tee mönete bai wæwëñönäni botö wæætë, Tömënäni wibænete tacædänimpa, ante tömëmo wepæ incæ godoncæte ante pömo imopa, ante Itota apænegacäimpa.

Babetamöna iñönote Itota gampomongä waa bamönapa

(Mäadoco 10.46-52; Odoca 18.35-43)

²⁹ Itota mäninö godinqe Eedicoo näni quëwëñömö ponte tayönäni tömengä miñä nanguï inäni tee empote godänitapa. ³⁰ Goyönäni onguïñæna babetamöna

iñömö taadö wedeca tæ contate a ongöñöna, Itota pongampa, änäni ëñëninque aa pedatapa.

—Awënë, bitö Dabii wodi pæimi inömi inte mönatö imönate pönö waadete waa cæe.

³¹ Ante äñöna godongämæ godäni guiquënë, Apocænë inguënë quëwënaa, änäni inca godömenque yedæ aa pedinque,

—Awënë, bitö Dabii wodi pæimi inömi inte mönatö imönate pönö waadete waa cæe, änatapa.

³² Itota iñömö næ gongæninque äñecä pöna adinque,

—Mínatö imínate quínö cæbo ämínaa.

³³ Angä ëñëninque,

—Awënë gampomömi awinca wi ænete baí aquímöna, ante wæmöna.

³⁴ Äñöna Itota tömëna godongämæ wæte baí pönëninque edæ pædæ gopo gampomongantapa. Gampomongä ate tömëna waa ada badinque Itota miñæ do godatapa.

Itota Eedotadëë iñömö pongampa

(Mäadoco 11.1-11; Odoca 19.28-40; Wäö 12.12-19)

21 Mänii gote Eedotadëë obo pöninque Odibowænquidi ontacamö goimö Betapaguee näni quëwëñömö ganca pönönäni Itota tömengä miñæ næ goda mënaa inate da godöninque angantapa. ²Tömëna inate,

—Mänii näni quëwëñömö ongö amína. Tömëñömö go guíte ayömína bodo onquiyæ nana wencaya nãni nãï a ongö acæmínaimpa. Nãni nãï a ongö adinque mínatö mänina inate nï cæyænte botö weca ænte pöeda. ³Ayæ mínatö imínate wææ änäni ëñëninque mínatö wæætë edæ, Awënë nänö ænguënëno ante ænte gomónapa, ante apæneeda. Ayæ, Tömengä iinque cæte ate do da pönongä æncæmínaimpa, ante apæneeda, angantapa.

⁴Do iñömö Wængonguí beyæ næ apænecä iimainö ante nänö apænegainö ante edæ iinque bacæimpa, ante mänömai cætimpä.

⁵“Tiöno iñömö quëwënäni inänite iimai äedäni,

‘Badogaa, minitö Awënë Odeye ñöwo minitö weca pongä aedäni.

Edæ mönö mäincoo mongæwënongå bodo wengäa tæ contate mönö Awënë pongampa.

Tömengä gänë pönengä inte bodoga contate pongä aedäni,’ ante ancæmínaimpa.”

Ante docä nänö apænegainö ante ñöwo iinque cætimpä.

⁶Mänömainö ante angä ëñente godinque tömengä miñæ næ goda iñömö Itota nänö äninö baí do cædinque, ⁷bodo nana wencaya inate töi töi ænte pöninque tömëna weocoo yabæcooque æidämæ wo cæyabæda ate Itota wænömënæca inö æi yiyæ tæ contacantapa. ⁸Adinque edæ nangui inäni, Itota nänö ponguinö, ante tömënanäni weocoo yabæcooque ñö cædinque bee podöwayönäni wadäni guiquënë gönea gote yæpæma öñabo tapænte mämö bee bee podöwadäni ate tömengä podöwainonque gocantapa. ⁹Gocä adinque täno godäni tönö ayæ pönäni tönö godongämæ godinque nangui inäni yedæ äninque,

—Bitö Awënë Dabii wodi pæimi inömi inte pömi adinque, Möni quëwënguinque impa, ante, Badogaa, ante tomönipa. Awënë Wængonguí ëmöwo beyænque pömi

inque bitö toquinque edæ Wængongui bitö imite waa cæcæcäimpa. Ayæ öönædë iñömö adobaï, Badogaa, möni quëwenguinque, ante ingæimpa.

¹⁰ Ante mäniï cædinque pöñönäni, Itota Eedotadëë pongä adinque mäniñömö quëwënäni ancai guiñëninque,

—Mäningä æcänö ingää.

¹¹ Ante wæyönäni godongämæ pönäni iñömö,

—Itota ingampa. Tömengä iñömö Wængongui beyæ nê apænecä inongä inte Gadeabæ Näatadeta quëwente pongä ingampa, ante apæneganimpa.

Wængongui oncö tæiyæ waëmö bacæimpa, ante cæcä

(Mäadoco 11.15-19; Odoco 19.45-48; Wäö 2.13-22)

¹² Itota iñömö Wængongui oncö ñænæncönë yabæcönë pö guidinque mäniñömö mäincoo mänäni tönö wadäni nê godonte ænäni tönö ongönäni adinque tömengä tömänäni inänite, Oncodo taoedäni, äninque da tadongä oncodo tao godänitapa. Ayæ campio ante näni godonte æimpa tönö equemö godoncæte ante nê mänäni näni cönöimpa tönö bæ tacä tömampaa guidömëmæ tæ go wæantapa. ¹³ Ayæ tömënäni inänite angantapa.

—Wængongui beyæ iïmainö ante yewæmongatimpa. “Waadäni botö oncönë pö guidinque botö imote apænecädänimpa,” ante Wængongui angä incæte minitö wænæ wænæ cæmini beyænque Wængongui oncö incæ nê awëmö ö ænäni näni womöincönë bai wentamö bapa töö.

¹⁴ Äninque Itota ayæ Wængongui oncö ñænæncönë yabæcönë ongöñongä pæ opa pæ opa godäni tönö babetamönäni tömengä weca pönäni adinque tömengä godö cæcä ate waa badänitapa. ¹⁵ Mänömaï mä cæcä waa badäni ate wædinque, Wængongui qui, ante nê godönäni ñænænäni tönö nê odömönäni guiquënë piïnte badänitapa. Ayæ wëñænäni Wængongui oncö ñænæncö yabæque ongöninque yedæ äninque, “Badogaa, Awënë Dabii pæimi inömi adinque möni quëwenguinque impa,” ante Yæ änänitapa. Änäni ëñëninque nê godönäni ñænænäni tönö nê odömönäni ængui badinque ¹⁶ Itota ingante änänitapa.

—Wëñænäni æbänö änäni ëñënämaï imitawo.

Äñönäni Itota,

Do ëñëmopa. Iñæmpa minitö guiquënë Wængongui beyæ ante iïmainö ante yewæmonte ongö adämaï inte änewëminitawo.

“Bitö tæcæ ëñädäni tönö goömæ nê gänäni inänite apænëbi ëñente, tömënäni Ao ante nö pönï tededinque,

Wængongui tæiyæ waëmö ingänö, ante watapæ apænedänipa.”

Mänömainö ante yewæmonte i apa änewëminii.

¹⁷ Äninque Itota edæ tömënäni inänite ëmö cæte wadæ godinque Betänia näni quëwëñömö gote mongacäimpa.

Iigowæ ömæcawæ i adinque Itota piïngampa

(Mäadoco 11.12-14, 20-26)

¹⁸ Näö bayö Eedotadëë näni quëwënö gämænö adodö pöninque Itota gæwænte wæcantapa. ¹⁹ Gomö adinque iigowæ a ongö ponte ayongä öñaboque ëmä adinque,

—Ömæcabi iïmi cöwë incädämaï incæbiimpa.

Āñongā iigowæ incæ guiñē wænimpa. ²⁰ Guiñē wæ adinque tōmengā miñæ nē godāni iñōmō,

—Quimæ iigowæ iñontobæ guiñē wæ amōō.

²¹ Ante wæyönāni Itota iñōmō edæ,

—Nāwangā ante mīnitō imīnite apænebopa. Wīi æmæ pōnēmīni inte wede pōnēmīni ininque mīnitō iigowæ inte botō cæbaī adobaī do cæbaīmīni. Ayæ godōmenque cædinque mīnitō ānanquidi ongō ate, “Ānanquidi ēñēmi, āninque, Bitō cabænte wo gote gāwapænē guie,” ante āmīni ininque edæ mīnitō ānīnō baī do babaimpa. ²² Wængonguī ingante wede pōnēmīni ininque quīēmē incæ ante tōmengā ingante apænemīni incæ mīni ānīnō tōmānō æncæmīnimpa, ante apænecāimpa.

Awēnē imipa, ante æcānō ānai, ante Itota ingante ānānīpa

(Māadoco 11.27-33; Odoca 20.1-8)

²³ Itota ayæ Wængonguī oncō ñænæncōnē yabæcōnē pō guidinque odōmonte apænecā ēñēñōnāni, Wængonguī qui, ante nē godōnāni ñænænāni tōnō oodeoidi inānite nē aadāni, Nāni Picæncabo, nāni ānāni tōnō tōmengā weca pōninque ānānitapa.

—Æcānō nē angā inte bitō imite angā cæbii. Īñæmpa, Nē āmi bacæbiimpa, ante æcānō pōnō āna ēñente nē āmi inte baī cæbii, ante ēñencæte ante wæmōnīpa.

²⁴ Ānāni ēñēninque,

—Mīni āmaī botō adodeque āmo ēñēninque mīnitō tāno apænemīni ēñente ate māniñedē ate botō wæætē, Æcānō nē āna inte pōnō angā cæboo, ante apænebo ēñēmaīmīnīpa. ²⁵ Wāō wodi ingante guiquēnē, Bitō æpænē guidoncæbiimpa, ante æcānō āna ēñente guidongāi, ante pōnēmīni. Wængonguī oōnædē apænecā ēñente cæcantawo. Wæætē edæ waodānique ānāni ēñente cæcantawo. Ædō ante pōnēmīni.

Itota angā ēñēninque tōmēnāni nāmāneque wæætēdō wæætē tedecōninque, “Wa, æbānō anguiī, ante wædānitapa. Īñæmpa, Wængonguī angā ēñēninque Wāō cægacāimpa, āmō baī Itota wæætē mōnō imonte, ‘Quinante pōnēnāmaī imīnitawo,’ ancædongāimpa,” ante wædānitapa. ²⁶ Wæætē edæ, “Waodāni tōmānāni, Wængonguī beyæ nē apænecā Wāō wodi ingacāimpa, ante pōnēnānīpa, ante pōnente wædinque Itota ingante nē ānāni iñōmō, Wadāni pīnāni wæcæ wæ, āninque, Waodānique ānāni ēñente Wāō cægacāimpa, ante mōnō ædō cæte anguiī.”

²⁷ Ante pōnēninque tōmēnāni Itota ingante edæ,

—Wa, ēñēnāmaī imōnīpa.

Ante wæyönāni Itota edæ,

Īninque botō adobaī, Æcānō nē angā inte pōnō angā cæboo, ante mīni ānīnō ante apænedāmaī incæboimpa, angacāimpa.

Mæmpocā wēna æbānō cæda, ante odōmongampa

²⁸ Itota odōmoncæte ante apænedinque,

—Mīnitō guiquēnē odōmonte tedebo ate āmo ēñente apænemīni ēñēmoedāni. Īi-māi impa. Waocā tōmengā wēna mēnaa iñōna adocanque weca godinque mæmpocā iñōmō, “Botō wēmi, bitō ñōwoōnæ yowementacodē cæte pōe.” ²⁹ Āñongā edæ, “Wīi goinēmo,” angampa. Wæætē edæ ayæ ate pōnencōninque edæ, Botō ædō cæte Baa āninque quēwēmoo, ante pōnēninque edæ mæmpocā nānō ānīnō ante ēñēninque

edæ cæcæ gocampa. ³⁰ Ayæ ate mæmpocä wæætë wacä wengä weca adobaï mäo äñongä tömengä edæ, “Bitö mæmpobi ämi ëñente gocæboimpa,” ante apænecä incæte edæ godämaï ingampa. Mäninque ante tedebo. ³¹ Nöwo minitö iminite ämopa, Mæmpocä nänö äno bai æcänö cæcäi, ante pönëmini.

Äñongante,

—Tänocä.

Ante apäneyönäni Itota tömënäni inänite wæætë,

—Näwangä ämopa. Minitö Awënë Wængongui Odeye nempo pö guidämaï iñöminite odömäno awënë beyä nê æwënäni tönö onquiyänäni mäincoo beyä ante nê towente quëwënäni tönö täno ponte do guicädänimpa. ³² Edæ Wäö wodi minitö weca ponte nö cæte töinö ante odömönongante minitö iñömö pönëminitawogaa. Ayæ godömenque awënë beyä nê æwënäni incæ mäincoo beyä ante nê towente quëwënäni tönö incæ do pönänänpa. Ayæ minitö mänömaï cädäni adimäni incæte wæætë wënæ wënæ mini cädinö ante wädämaï inte wii pönëminitapa töö, ante Itota apänegacäimpa.

Nê aadäni inguënänäni incæ wiwa cädänipa, ante

(*Mäadoco 12.1-12; Odoca 20.9-19*)

³³ Ayæ godömenque apänedinque Itota, “Wængongui Awënë æbänö cæcäa, ante ëñencæminimpa, ante botö imæca quëwënäni nänä cæinö ante odömönte apänebo ëñëedäni. Edæ iïmaï impa. Ömæ ëacä yowementacodë da da mäo da caate wææ cædinque, Tömëmö ænte pinä pinä gäwate wæ yopænte tömëmæ ænguiñömö ante cædinque ææ wote badongantapa. Ayæ, Yowementacodë awëmö guidämaï incädänimpa, ante cædinque æi wänömënæca gomö aquïñömö mäñongä ate nê ëacä iñömö wabæca gocæ cædinque wädäni ömæ wite nê aate tä pedäni inänite apänecantapa. Botö yowementacodë incæ minitö ömæ wite aadäni. Aayöminite botö, Minitö qui, ante pancamonga pönömo æncæminimpa, angä Ao äñönäni wadæ gocantapa. ³⁴ Ayæ yowedepo wodo bayonte tömengä ingante nê cädäni inänite, Minitö yowementacodë nê aadäni weca godinque botö yowemö incæ pancamonga ämini æn- inque botö weca wæætë mämömini æmoedäni, angä godänitapa. ³⁵ Angä godinque pönäni adinque yowementacodë nê aadäni guiquënë nê æncæ pönäni inänite bæi ongöninque adocanque ingante nangui tæi tæi päninque wacä ingante godömenque wänönäni wængä ate ayæ wacä ingante dicaca tacädäni. ³⁶ Adinque mäo apänedäni wædinque nê ëacä iñömö wæætë godömenque nangui inäni da godongä gote pönäni adinque nê aadäni guiquënë adobaï cädäni wädänitapa.”

³⁷ Ayæ godömenque odömöninque Itota apänecantapa. “Iñinque nê ëacä iñömö, ‘Tömëmö wengä ingante da godömo gocä adinque tömënäni guïñente wædinque ee abainänipa,’ äninque tömengä ingante da godongä tömangä pönäni gocantapa. ³⁸ Yowementacodë nê aadäni guiquënë gomö ayönäni nê ëacä wengä dicæ pongä adinque, ‘Tömengä ingampa. Wæmpocä mäincoo iñi edæ iingä iñömö nê ænguingä ingampa cæmöö. Mönö edæ mäo wänömö wængä ate edæ mönö qui babaimpa.’ ³⁹ Änewëninque tömënäni nê ëacä wengä ingante edæ bæi ongönte yowementacodë wææ cæte iñömö yabæque edæ, Ömäe, ante wänönäni wængantapa.”

⁴⁰ Ante mäninganca odömönte apänedinque Itota iñömö tömengä ingante nê äninäni inänite angantapa. “Iñinque minitö iñömö, Nê ëacä pöninque edæ yowementacodë nê aaquënänäni inänite æbänö cæquingäa, ante pönëmini.”

⁴¹ Ante äñongante tömënäni wæætë,

—Ömäe, ante nē wænönināni inānite tömengä näemäe edæ, Ömäe, ante wænongä wæncædänimpa. Ayæ wæætë, Ædänidö nö cædinque yowedepo iñö yowedepo iñö tä pete pönönāni ænguimoo, ante adinque awënë, Minitö wæætë aacæminimpa, angä Ao ante aacædänimpa, ante apænedänitapa.

⁴² Itota ayæ tömënäni inānite,

—Wængongui angä ëñente nāni yewæmongaintaa æbänö ongö ante minitö adāmaï inte äminī awædö, angantapa.

“Dica ænte adinque, Wænæ wænæ inca, ante nē mænönāni nāni wido cædinca incæ gomonga waëmonca inca ininque täno nāni ñönöninca bæbængapa do bacapa.

Wængongui Awënë incæ mänömaï cæcä adinque mönö waocabo guñente wædinque waa amompa,”

Ante yewæmonte impa abaiminipa. ⁴³ Mäninö mini ëñenāmaï inö beyæ minitö Awënë Wængongui Odeye nempo quëwente mini cæquënönö incæ ö ænte bai cæcä wæcæminimpa. Ayæ wæætë wadāni inānite tömëmö wainca incate bai nö cædāni inānite godö angä ëñëninque tömënäni wæætë tömengä nempo quëwente waa cæcædänimpa. ⁴⁴ Botö iñömö mänii dica waëmonca bai inömo inte ämo ëñëninque nē wæcä iñömö tömengä iñömö mänincaa tä go wææninque wædænque tobænte wæcä bai inongä inte botö önöwa gäänë ædæ wææncæcäimpa. Wæætë æcänö ingante Wængongui piinte mänincaca tacacä inaa tömengä guiquënë quïëmë bai yain-tai bai goquino anguënë, ante pönëminiyaa.

⁴⁵ Ante nē aaquënänāni nāni cæinö ante odömöninque Itota apæneccä ëñente wædinque, Wængongui qui, ante nē godönāni ñænänāni tönö Paditeoidi iñömö, Ìñæmpa mönö imonte piinte angä awædö, ante pönente wædinque, ⁴⁶ Quinö cæte tömengä ingante bæi ongonte ö ænguui, ante cöwä adänitapa. Incæte, Waodāni tömānāni, Wængongui beyæ nē apæneccä Itota inongä ingampa, ante pönänānipa, ante wædinque, Piināni wæcæ wæ, äninque edæ ñimpo cægadänimpa.

Monguimæno ante odömonte apæneccampa

(Odoca 14.15-24)

22 Wængongui Awënë æbänö cæquingää, ante ëñencæminimpa, ante imæca awënë nänö cæinö ante Itota tömānāni inānite wæætë odömonte apænegacäimpa.

² “Inguipoga awënë odeye tömengä wëñæ beyæ monguimæno ante nänö cæbai öönædë Awënë Odeye iñömö adobai cæcampa. ³ Inguipoga awënë iñömö tömengä ingante nē cædāni inānite, Wëenë botö änināni inānite wente ænte pödāni. Angä tē tē wente änanī ëñëninque edæ, Wii pönëwædö, änanī. ⁴ Ëñente wædinque awënë wæætë wadāni tömengä ingante nē cædāni inānite da godöninque, ‘Wëenë botö änināni weca godinque botö beyæ iimainö ante apænemini ëñencædänimpa. Botö wengä monguimæno ante wagadaidi onguiñænāni tönö cæninanī oguimo pöni ināni inānite do wænöninque botö ææmænoca do eyepæ cæbopa. Botö wengä monguimæno pö beedāni, ante mæmpocä angampa, ante edæ botö beyæ apæneedāni.’ ⁵ Angä ëñëninque gote apæneyönāni tömënäni ëñenāmaï inte önönque wadæ godinque pancadāniya gönea ante goyönāni wadāni godonte æncæte ante godänitapa. ⁶ Wadāni ayæ ongönāni guiquënë ëñenāmaï inte awënë nänö da

godonte nē cædāni inānite pīinte wēnæ wēnæ cædāni wæyōnāni māo wænōnāni wænānitapa.”

⁷“Mānōmaī cædāni ate wædinque awēnē odeye iñōmō äingā badinque tōmengā tontadoidi inānite angā ēñēninque nē wænōnīnāni inānite māo capo wænōnāni. Wænāni adinque godōmenque onconcoo tōmēnāni nāni ēadincoo iya tānāni. ⁸Īn-
inque edæ awēnē wæætē tōmengā ingante nē cædāni inānite, ‘Monguimæno do eye-
pæ cæte ongō incæte botō nē ānīnāni waa cædānipa diyæ āmo bequīnānii. ⁹Īn-
inque mīnitō wæætē edæ iyænompoga iyænompoga māo godinque æcāmenque ingante
bee tēninque tōmēnāni tōmānāni inānite āmīni ææmæno pō becædānipa.’ ¹⁰Angā
ēñente cædinque nē cædāni taadonque pō bee bee bee tēninque waa cædāni incæ
wīwa cædāni incæ tōmānāni inānite āñete ænte māmōnāni pō monguimæno oncōnē
pō guidinque eyede goto gongænte bedānitapa.”

¹¹Ayæ, “Awēnē odeye iñōmō ēñacæ pō bedāni inānite acæ guiyongā edæ
adocanque monguimæno bequī weocoo awēnē odeye nānō pōnōnincoo incæ
wēñadāmaī inte ōnoncooque ee mongængā. ¹²Adinque, ‘Æmigo, bitō ædō cæte
monguimæno weocoo wēñadāmaī inte ōnoncooque ee mongænte guibii,’ ante
āñongā edæ pæ wēnecā. ¹³Adinque awēnē odeye iñōmō nē aadāni inānite ān-
inque, ‘Nē monguimæno weocoo wēñadāmaī ingā ingante mīnitō goti wimpote
wææ goti wēwate edæ wēmō iñōmō nāni guingo imonte Yæ yæ ante wæyōmō māo
wido cæedāni,’ ante awēnē odeye angampa. ¹⁴Mānōmaī nāni cædō baī adobaī impa.
Edæ nanguī ināni inānite Wængonguī, Pōedāni, angā incæte edæ wædænque ināni
inānite apænte Ao ante ængampa,” ante Itota apænegacāimpa.

Tæiyæ Awēnē nānō äintamō ante tededānipa

(Mäadoco 12.13-17; Odoca 20.20-26)

¹⁵Itota mānōmaī apænecā ēñente wædinque Paditeoidi wadæ godinque
godongāmæ ponēē cōninque, Mōnō pīinte apænte anguinque ante quīnō cæmō ate
Itota adodeque wapiticæ tededinque oda cæquingā. ¹⁶Ante pōnēninque tōmēnāni
nē ēmīñænāni tōnō Edodeidi inānite da godōnāni godinque Itota weca pōninque,

—Awēnē nē Odōmōmi ēñēmi. Bitō nō pōnente cæbi imipa, ante do ēñēmōnipa.
Ayæ bitō ayōmi mōnitō tōmāmōni ōnōmōnique imōni adinque bitō, Waodāni æbānō
anguīnānii, ante ayæ, Æbānō cæquīnānii, ante wædāmaī inōmi inte edæ Wæn-
gonguī taadō ante guīñēnāmaī inte nō odōmonte apænebipa. ¹⁷Īn-
inque bitō æbānō pōnēmii. Odōmāno gobiedōno beyæ ante tæiyæ awēnē Tetædo tiguitamō nānō
ānintamō ante æbānō wææ yewæmonte i, ante ēñencæte ante wæmōnipa edæ.
Godonte edæ waa cæte intawo. Wæætē wēnæ wēnæ cæte intawo, ante apænebi
ēñencæmōnimpa.

¹⁸Āñōnāni Itota iñōmō tōmēnāni do, Cæmō wapiticæ tedecæcāimpa, ante nāni
ānīnō ante do ēñēninque tōmēnāni inānite wæætē edæ,

—Mīni wadō tedete wadō cæcabo iñōmō edæ quīnante botō imote, Æbānō cæmō
oda cæquingā, ante cæmīnii. ¹⁹Tetædo tiguitamō nānō ānintamō odōmōmīni
aquīmo.

Āñongā deēnadio tiguitamō adotamonque ænte pōnāni. ²⁰Adinque tōmēnāni
inānite Itota,

—Æcānō awinca baī yewæmonte badonte i. Edæ æcānō emōwo ante yewæmonte
i.

²¹ Äñongante,

—Awënë Tetædo awinca bai yewæmonte badonte impa. Adocä emöwo ante yewæmonte ongö amönipa.

Änani eñenique Itota iñömö edæ,

—Awënë Tetædo qui i inique edæ Tetædo ingante godongæimpa. Wæætë Awënë Wængongui qui i inique Wængongui ingante godongui i apa anewëminii.

²² Ante Itota nänö äninö eñente beyæ, Quiëmë bai angää, ante ancai guñente wædinque wadæ gogadänimpa.

Ædö cæte ñani ömæmonguü, ante wædänipa

(Mäadoco 12.18-27; Odoca 20.27-40)

²³ Mäniönæ adoönæ iñonte Tadoteoidi në, Waocä wæninque ñani ömæmönämai æmæwo wængampa, ante në anewënanii inte Itota weca pöninque, ñimainö ante eñencæte ante wæmönipa, äñanitapa.

²⁴ —Awënë në Odömömi eñëmi. Möitee wodi mönö beyæ ante wææ yewæmöninque iimai ante yewæmongacäimpa. Waocä möninque wëñæ tapæidämai inte wængä ate tömengä töninacä wæætë owæmpoingä ingante möninque wëñæ tapæidinque, Botö töninacä wodi wængä ingampa, ante pæpogacæcäimpa, ante yewæmongacäimpa. ²⁵ Nöwo iñömö möni cabo iñömönite adodäni nani caipæ önompo æmæmpoque go mënaa inäni iñönäni bamoncadengä möninque wëñæ tapæidämai manguiwëninque edæ näne wængä ate ayæmengä wæætë owæmpodingä ingante mongä. ²⁶ Inique ayæmengä incæ adobai wëñæ ömæpocä näne wængantapa. Ayæ wææ wacä ayæmengä adocä ingante monte ate wëñæ adobai tapæidämai inte edæ näne wængantapa. Ayæ wææ wacä adobaingä, ayæ wææ wacä tapæidämai inte näne, ayæ wææ wacä, ayæ wææ ayæmengä pöni adocä ingante möninque wëñæ tapæidämai inte näne wængantapa. ²⁷ Onquiyængä guiquënë owæmpote wædinque tömengä pöni näne wængantapa. ²⁸ Inique, Mönö ñani ömæmonguionæ, ante mini äönæ iñonte mäningä owæmpoingä iñömö æcänö nänöogængä baquingää. Edæ tömengä ingante iñömö edæ tömänäni manguiwengadänimpa. ²⁹ Äñönänite Itota wæætë,

—Minitö iñæmpa. Wængongui angä eñente nani yewæmöinta adämai inte bai ämini awædö. Wængongui adocanque täi piñængä inte edæ tömää cæcampa, ante pönënamai inte edæ oda cæte ämini awædö. ³⁰ Edæ Wængongui anquedoidi öönæde cöwë owodäni bai inönäni inte waodäni ñani ömæmöninque godö ñänönämai inäni inte edæ mönämai inguinänidö angüënë. ³¹ Wæætë do wængainäni nani ñani ömæmonguinö ante eñencæminimpa, ante Wængongui beyæ yewæmonte ongö adämai iminitawo. ³² “Botö iñömö Abadö Wængonguimo ingäimo inte ayæ Itæca Wængonguimo ingäimo inte botö Acobo Wængonguimo adobo imo angüënë,” angacäimpa. Ante në angaingä inte edæ æmæwo wæninäni tömënanii Wængonguingä ædö cæte inguingää. Wæætë edæ miï quëwënanique tömënanii Wængongui inongä ingampa. Inique edæ në wænte godinäni incæ ayæ miinäni quëwënanii inäni, ante pönenguënë anewëminii.

³³ Ante apænecä eñenique godongämæ eñengönäni guiquënë, Æbänö cæte Itota waa pöni odömönte apænecä eñëmönii, ante wægadänimpa.

Wængongui nänö wææ angaine mēnea tæineda pōni ēnepa

(Mäadoco 12.28-34)

³⁴Tadoteoidi guiquēnē, Ædō cæte gomonga anguii, ante edæ pæ wēenedānitapa. Mänōmaī Itota nänö nō āninō beyæ pæ wēenedānipa, ante tededāni ēñēninque Paditeoidi wæætē godongāmæ pōnānitapa. ³⁵Itota æbānō cæte wapiticæ āmaingāā, ante pōnēñōnāni adocanque idægoidi nāni wææ angainō ante nē ate ēñēnongā iñōmō Itota ingante angantapa.

³⁶—Awēnē nē Odōmōmi ēñēmi. Wængongui, Īimaī cæedāni, ante nänö wææ angainecoo ante pōnēninque ædedō tæine pōni ī iñonte mōnō nanguī ēñente waa cæquīi.

³⁷Āñongante Itota iñōmō,

—Īimainō ante nänö wææ angaine iñōmō edæ tæine pōni iñonte mōnō nanguī ēñente waa cæcæimpa. “Wængongui mōnō Awēnē ingante bitō mīmō entawente waadedinque bitō ocai encabi inte nō pōnēninque bitō önōwoca ewocabi inte edæ tōmengā ingante ædēmō waa waadete pōnēe.” ³⁸Mānīne nänö wææ angainō waa pōni ī iñinque mānīne tāno waa cæquī impa. ³⁹Ayæ wade nänö angainō adobaī nanguī waa ēñente cæquī impa. “Bitō nāmā bitō waadete waa cædō bai adobaī pōnēninque wadāni inānite adobaī waa waadete cæe.” ⁴⁰Īimaī cæedāni, ante Mōi-tee wodi nänö wææ angainō ayæ Wængongui beyæ nē apānedāni nāni angainō cæcæte ante cædinque edæ mānīne Wængongui mēnea nänö wææ angaine ēñente cæte beyænque edæ tōmānō edæ do eyepæ cæte impa, ante Itota apænegacäimpa.

Codito æcānō pæingā iñongā ingāā, ante apænecampa

(Mäadoco 12.35-37; Odoca 20.41-44)

⁴¹Mānīi Paditeoidi adoyōmō ponte ayæ ongōñōnāni Itota tōmēnāni inānite angantapa. ⁴²Itota iñōmō tōmēnāni inānite,

—Codito iñōmō æcānō ingāā, ante pōnēmīni. Æcānō Wengā iñongā ingāā, ante pōnēmīni.

Ante āñongante Paditeoidi wæætē,

—Awēnē Dabii pæingā iñongā ingampa.

⁴³Āñōnānite Itota edæ,

—Awēnē Dabii pæingā iñongā iñongante edæ Dabii tōmē edæ Codito ingantedō āninque quīnante, Awēnē ĩmipa, angacäimpa.

⁴⁴“Awēnē Wængongui inçæ botō Awēnē ingante apānedinque,

Botō tōmēmæ inō tæ contayōmi,

bitō ĩmite nē piināni inānite bæ tabo ate

bitō önōwa gāānē ongōñōnānite bitō pinā gāwacæbiimpa, angacäimpa.”

Ante Wængongui Önōwoca apæncä ēñēninque Dabii wodi yewæmongacäimpa.

⁴⁵Codito nē Awēnē ingampa, ante awēnē Dabii wodi nänö nē angaingā iñongā inte edæ adocā Codito iñōmō ædō cæte nāēmæ Awēnē Dabii wodi pæingā inguingāā, ante pōnenguēnē ānewēmīni.

⁴⁶Ante āñongā edæ tōmānāni, Mōnō ædō cæte wæætē anguii, āninque ēñēnāmaī inte edæ pæ wēnegadānimpa. Ayæ iincayæ ate, Apænebi ēñēmōnīi, ante ædō cæte anguimoo, ante edæ tōmānāni guiñente wædinque ānāmaī ingadānimpa.

Paditeoidi tönö nē odömönäni inänite Itota püinte angä

(Mäadoco 12.38-40; Odoca 11.37-54, 20.45-47)

23 Pæ wëenedäni adinque tömengä miñä nē godäni godongämä ongönäni nangui inäni tönö ongöñönäni Itota tömänäni inänite apänegacäimpa.

²“Nē odömönäni tönö Paditeoidi iñömö Möitee wodi nänö angainö ante nē eñenäni inte nē nō odömonte apänedäni inänipa. ³Mänömaï inäni adinque minitö iñömö tömēnāni äninö ante tömänö ante cöwē eñente cædäni. Wæatē tömēnāni nāni cæi bai cædämaï iedäni. Edæ, Iïmaï cædäni iïmaï cædäni, ante nāni änö ante tömēnāni nämä incæ eñenāmaï cædänipa. ⁴Edæ mäincoo teëmencoo mö paate wadäni önönancapæ cö cædancapänäni bai cædinque tömēnāni, Wadäni guëmancædänimpa, ante cædämaï inäni inte önompogonca adopogoncaque incæ gä äncapänämaï inänipa.”

⁵“Quiëmē cædäni incæ tömēnāni cöwē, Wadäni botö imote waa acædänimpa, ante cædänipa. Wadäni, Bitö Wængongui beyä nāni yewæmongainta nangui abi imipa, ante pönëninque mönitö imönite waa acædänimpa, ante babæ cædinque mäninta ämontaicaade ñænä pöni badonte mini tente önöncaipoga wo cæte encapodänipa. Ayä, Bitö Wængongui ingante nangui apänebi imipa, ante pönencædänimpa, ante cædinque tömēnāni weocoo ñä cæwate ñä cæwate doyä guënë ëwa badöninque doyä pöni wëñate mongänänipa. ⁶Ayä äämä beca godinque tömēnāni, Botö täno bete tocæboimpa, ante waëmompaa pöni tæ contate bete todänipa. Ayä Wængongui angä nāni eñente yewæmongainta ate odömöincönē pö guidinque tömēnāni nämanque ante pönëninque waëmompaa pöni tæ contate todänipa. ⁷Ayä waodäni nāni godonte äiñömö wainö pancadē goyönäni wadäni pö bee tēninque, Nē odömömi, bitö imite waa amönipa, ante apänedäni eñëninque edæ nē odömönäni iñömö nangui todänipa,” ante Itota apänegacantapa.

⁸Ayä apänedinque, “Minitö guiquënë minitö Awënë nē Odömongä adocanque pöni iñongä mini caipæ iñöminite wadäni, Awënë nē odömömi imipa, ante änämaï incædänimpa, ante wææ cædäni. ⁹Ayä mönö Mæmpo adocanque pöni öönädē quëwengä ingä adinque minitö waocä ingantedö ante apänedinque, Mönö mæmpo ingampa, ante änämaï iedäni. ¹⁰Ayä, Mönö Awënë nē Odömongä iñömö adocanque pöni Codito inongä ingampa, ante eñëmini iñöminite wadäni, Nē ämi imipa, ante änämaï incædänimpa, ante wææ cædäni. ¹¹Ayä edæ mini cabo iñöminite wacä beyä wacä nē godö cæcä iñömö ñænängä pöni ingä incæcäimpa. ¹²Edæ nämä ængö cæte bai cædinque æcänö, Botö botö, äna tömengä iñömö edæ wææntodonte bai önönque bacæcäimpa. Wæatē æcänö, Botö botö, änämaï inte, Önömoque imopa, äna iñömö edæ tömengä ingante ængö cæte bai cædäni adinque wadäni tömengä ingante waa acædänimpa,” ante Itota tömengä miñä nē godäni inänite apänegacäimpa.

¹³Ayä nē odömönäni tönö Paditeoidi inänite Itota püinte angantapa. “Minitö iñömö mini pante wæquinque edæ wadö tedete wadö cæmini iminipa. Wadäni öönädē Awënë Odeye nempo guidämaï incædänimpa, ante minitö odemö tee mönete bai wææ cæminipa. Tömëmini guidämaï imini inte minitö wadäni guicæ cæyönänite edæ tömēnāni nāni guidämaï wæquinque edæ wææ cæminipa. ¹⁴Nē odömömini tönö Paditeoidi imini mini wadö tedete wadö cædincabo inte mini wæquinque impa. Owæmpoïnäni oncö ö ämini incæte minitö, Wantæpiyæ botö

tedebo beyænque wadäni botö imote waa acädänimpa, ante Wængongui ingante wantæpiyæ nê tedemini inte godömenque mini panguinque ingäimpa,” ante Itota angacäimpa.

¹⁵ Ayæ apænedinque, “Nê odömömini tönö Paditeoidi imini mini wadö tedete wadö cædincabo inte mini wæquinque. Edæ, Adocanque incæ mönitö emiñængä bacæcäimpa, ante minitö æpæ tömämæ wogaa gote diqui diqui mininque inguipoga taadö tömänö gote diqui diqui minte ayömini adocanque Ao angä adinque minitö tömengä ingante godö odömömini. Eñëninque tömengä guiquenê minitö wænæ wænæ goquino godömenque godinque gomonga nê wænæ wænæ cæcä badinque tadömen-gadænguipo nänö gomonga panguinque minitö miñæ tee empote gocampa töö.”

¹⁶ Ayæ, “Babetamömini mini wæquinque babæ ante mäomini ate edæ oda cæte godänipa. Ìñæmpa iimaï änewëminipa. ‘Botö äno nöingä baquinö anguenê, ancæte ante æcänö, Wængongui tæiyæ waëmö oncö tæi ongö bai impa, äna tömengä önonque tedete apænecampa, ante änewëminipa. Wæætê edæ, Wængongui tæiyæ waëmö oncö oodo mä ongö bai impa, ante æcänö äna guiquenê tömengä nö angä inte cæcæcäimpa,’ ante minitö iñömö babæ wapiticæ äminipa. ¹⁷ Mini babetamö incabo mimö ömædê incädö. Edæ Wængongui tæiyæ waëmö oncönê oodo öñö adinque, Oodo incæ godömenque waa pöni impa, ante babæ ante pönëminipa. Ìñæmpa oodo æninque, Wængongui oncö waëmö emonguinta, ante ænte badönäni beyænque oodo tæiyæ waëmö bapa, ante pönëminiyaa.”

¹⁸ “Ayæ edæ minitö babæ apænedinque, ‘Botö äno nöingä baquinö anguenê, ancæte ante waocä, Wængongui qui, ante baö nani iya täimpaa tæi ongö bai impa, ante æcänö äna önonque tedecampa. Wæætê mäninö ancæte ante, Baö iya täimpaa nani iya tanguingä bai impa, ante æcänö äna iñömö tömengä nö ante cæcæcäimpa,’ ante minitö babæ wapiticæ äminipa. ¹⁹ Mini babetamö incabo ämini eñëmoedäni. Ædö waa intawo. Nani iya täimpaa incädö tæiyæ waëmö intawo. Wæætê edæ baö nani iya tanguingä incæ tæiyæ waëmö intawo. Æbänö ante pönëmini. Ìñæmpa baö æninque, Wængongui qui, ante iya tänäni beyænque baö näwaaquingä bacampa, ante pönëminiyaa. ²⁰ Ìninque, Botö äno nöingä baquinö anguenê, ancæte ante waocä, Nani iya täimpaa tæi ongö bai impa, ante æcänö äna tömengä, Iya täimpaa tönö baö nani iya tanguingä tönö tömäa beyæ, ante bai dobæ angampa. ²¹ Ayæ æcänö, Wængongui tæiyæ waëmö oncö beyænque ante näwangä baquinö anguenê, äna tömengä Wængongui oncö beyæ ayæ mänincönê nê owocä beyæ adobaï dobæ angampa. ²² Ayæ æcänö, Öönædê beyænque näwangä baquinö anguenê, äna tömengä edæ Wængongui nänö contaimpaa beyæ ayæ contaimpaa nê Contacä beyæ adobaï dobæ angampa,” ante apænecäimpa.

²³ Ayæ apænedinque Itota, “Nê odömömini tönö Paditeoidi incæ mini wadö tedete wadö cædincabo inte mini wæquinque impa. Tömëmini mini minte pædimö tönö guimö ogui wayabo tönö tömëmö mini tä pete ænimö tê gæte diete ganca mini cabo tê gædincoo ñö cædinque adocooque æninque, Wængongui qui, ante godöninque waa cæminipa. Incæte edæ Wængongui, Nö cædäni, ante nänö äno ante, Godö waadete waa cædäni, ante nänö äno ante, Wede pönente cædäni, ante nänö äno ante minitö mini wæquinque eñente cædämaï iminipa. Iimaï täno waa cæquenëmini inte minitö mänincoo ayæ godömenque Wængongui ingante godömini inguenëmini iminipa. ²⁴ Babetamömini babæ ante mäomini ate edæ oda cæte godänipa. Minitö, Diete ganca minitö mäincoo ongö adinque adocooque cöwê

godonguí i, áanique owætaca bequĩñömö guincawæ owoyö tæ wedote baĩ cæminipa. Wæatê edæ Wængonguí nänö äno baĩ cædámaĩ inte minitö edæ cæmeyo ñænængade pönĩ owoyö önonque ade bete baĩ pönênämaĩ inte cæminipa, ante awædö,” ante Itota apænægacäimpa.

²⁵ Ayæ nè odömönäni tönö Paditeoidi inänite godömenque áanique tömengä, “Mĩni wadö tedete wadö cæcabo inte mĩni wæquinque impa. Owæta tönö cængæ yabætaque ñongate baĩ minitö wadäni ayönäni nè waa cæmĩni inte wæatê edæ cæncadenta inö wentaga engate baĩ cæminipa. Mĩni wacä quĩ ö æinënö ayæ nãmanque ante mĩni towënö beyæ owæta cæncadenta inö opogö tagate eyede baĩ impa diyæ. ²⁶ Bitö Paditeobi babetamömi êñemi. Cæncadenta inö tãno ñã mënongabi ininque yabæta inö ñongate wainta baquinö anguënê,” angacäimpa.

²⁷ Ayæ, “Nê odömöminĩ tönö Paditeoidi incæ mĩni wadö tedete wadö cædin-cabo inte mĩni wæquinque impa. Minitö wao wodido baĩ yabæque waëmö paate baĩ ñõnte cæncadê inö wao bayetoca ñömænte öö wayömö baĩ entawëminĩ iminipææ. ²⁸ Ininque wadäni yabæque adinque, Minitö nõ entawëminĩ iminipa, ante pönëñönäni minitö wiwa mĩni pönënö beyæ wadö tededinque wadö cædinque edæ mimö wentamö entawëminipa,” ante Itota piingacäimpa.

²⁹ Tömënäni inänite ayæ piiniquẽ, “Nê odömöminĩ tönö Paditeoidi incæ mĩni wadö tedete wadö cædincabo inte mĩni wæquinque. Edæ Wængonguí beyæ nè apænægainäni wodido, ante minitö do mænönomĩnipa. Ayæ, Nê nõ cægainäni wodido, ante mænöninque minitö oncontai waëmö pönĩ paadomĩnipa. ³⁰ Ayæ, ‘Mæmæidi nãni quëwengaiñedê quëwëmöni baĩ mõnitö tömënäni tönö, Wængonguí beyæ nè apænedönäni inänite mao wænönämaĩ inte ee quëwencædömönimpa,’ ante äminipa. ³¹ Mänömainö ante apænedinque minitö, Wængonguí beyæ nè apænægainäni inänite nè wænongainäni pæimöni imönipa, ante nãmä incæ edonque pönĩ apænte äminipa. ³² Edæ minitö wæmæidi nè wænongainäni inte nãni pe ñĩñængaimämo wĩ eyepæ inte baĩ cædinque minitö ñöwo godömenque eyede pe ñĩñænte baĩ capo wænömæwedäni,” ante Itota badete baĩ angacäimpa.

³³ Ayæ áanique, “Mĩni tæntæcabo pæimĩni baĩ imĩni êñeedäni. Mĩni obecabo pæimĩni baĩ imĩni êñeedäni. Minitö tadömengadænguiipo mĩni pante wæquënënö ante æbänö cæte aamö cæte edæ tabaĩminiyaa. ³⁴ Ininque Wængonguí beyæ nè apænedäni tönö nè nõ êñënäni tönö nè odömönäni inänite botö ñöwo minitö weca da pönömo pönänpa. Adinque minitö ññömö edæ pancadäniya inänite wænöminĩ wæncædänpa. Pancadäniya inänite minitö awaa timpomĩni wæncædänpa. Ayæ pancadäniya inänite minitö odömöincönê bæi ongöninque tæi tæi päminĩ caate wædinque tömënäni wayömö quëwënäni weca wayömö quëwënäni weca wodii goyönäni minitö tee empo tee empo togænte goquimĩni, ante awædö. ³⁵ Mänömaĩ wænæ wænæ cæyöminĩ edæ ñöwomini beyænque tömää inguipoga wepæ aa bedinque nãate baquimĩnidö anguënê. Edæ Adäö wodi wengä Abedo nè nõ cægaignä wepæ tönö ayæ quëwente nè êñente cædäni inänite godö wænönäni wængainäni tönö tömënäni tömännäni wepæ beyæ minitö nãate wæcæminimpa. Ayæ minitö Wængonguí oncö ñænæncö boyæ iya tämpaa gäänê ongöninque Bedequiya wengä Tacadiya ingante godö wænöminĩ wængä ininque tömengä wepæ nãate wæminipa. ³⁶ Nöwomini mĩni wepæ nãate wæquinque tömanguipo aa betinö anguënê, ante ämo êñeedäni,” ante Itota tömënäni inänite idæwaa piĩnte apænægacäimpa.

Eedotadëë quëwënäni beyä ante Itota wæcampa

(*Odoca 13.34-35*)

³⁷ Ayä Eedotadëë iñömö quëwënäni beyä ante pönëninque Itota, “Eedotadëë quëwëmini ëñëedäni, angantapa. Wængongui beyä nê apänedäni inänite mini wænongaincabo inte ayä Wængongui nänö da pönönäni inänite dicaca tacamini iñöminite botö iñömö minitö iminute waadete pönö cæinente nanguï wæbopa. Tawadiya wæmönä iñömö, Botö wënäni, ante gompodinque tæcæënëmä wëä pönö ö äenä bai botö adobaï, Botö wënäni pöedäni, ante æpogadö äñömote minitö, Wïi pöinente awædö, ante Baa ämini wætabopa. ³⁸ Nöwo iñömö edæ mini quëwëñömö önonconcoque baconcoo tamëñedäni. ³⁹ Nöwo iñömö edæ botö dæ äñömo minitö, ‘Awënë Wængongui ëmöwo beyænque pöninque bitö toquinque edæ waa cæcæbi-impä,’ ante mini anguinganca minitö edæ botö imote adämaï incæminimpa ante ämo ëñëedäni,” ante Itota apänegacäimpa.

Wængongui oncö ñænæncö bæ tate bacäimpa, ante

(*Mäadoco 13.1-2; Odoca 21.5-6*)

24 Itota Wængongui oncö ñænæncö oncodo tao gocantapa. Wadæ gocæ cæy-ongä tömengä miñä nê godäni iñömö, Wængongui oncö ñænæncö æbänö waa pönï mänonte iï, ante odömoncæte ante tömengä weca pönäni. ² Ate wædinque Itota wæætë,

—Minitö guiqüënë mänincoo tömancoo edæ waa aminitawo. Näwangä ante minitö iminute apänebopa. Mänincoo mini acoo incæ tömanca bæ tadäni wæænca adinque panguimä panguimä godinque dica adocaque pönï incæ wænömënæca ongönämaï ingäimpa, ante apänegacäimpa.

Oo iinque bacäimpa, ante æbänö ate ëñenguïi, ante

(*Mäadoco 13.3-23; Odoca 21.7-24, 17.22-24*)

³ Mänïi taodinque Odibowænquidi pö æite tæ contate ongöñongä tömengä miñä nê godäni adodänique tömengä weca ponte apänedänitapa.

—Bitö äñö ante æyedëñö iinque baquïi, ante ëñencæte ante wæmönipa. Edæ bitö ponque æyedëñö ponguïmii, ante ayä mönö ingui-poga quëwënö æyedëñö æmæwo iinque baquïi, ante ëñencæte ante wæmönipa. Iinque, Æbänö mä odömonte bai ba adinque edæ, Oo pönï impa, ante wædinque ëñenguïmönii, ante ëñencæte ante wæmönipa.

⁴ Äñönäni Itota,

—Wapiticæ odömöñönäni minitö wæætë, Mönö oda cædämaï ingäimpa, ante nämä wææ aquënë quëwëminii. Edæ iïmaï baquï i ataqueedäni. ⁵ Edæ wadäni nanguï inäni botö ëmöwo ante babæ tedete pöninque, “Botö Codito inömo imopa,” ante apänedinque wapiticæ mäodäni godinque edæ nanguï inäni tömënäni miñä oda cæte wapiticæ gocädänimpa. ⁶ Edæ, Wabæca awënë tönö pö bee téninque wææt-edö wæætë cædapa, ante tededäni ëñencæminimpa. Ayä wayömö nani guädö guëa cæte wænönö ante tededäni incæte edæ guïñente wædämaï iedäni. Edæ mäninö botö äñinö bai cöwë bacäimpa. Ba incæte mönö ingui-poga quëwënö iñömö mänïñedë wïi æmæwo iinque bacäimpa. ⁷ Adobæca quëwënäni iñönänite wabæca quëwënäni ponte bee téninque guädö guëa cæquïnäni inänipa. Adobæca awënë odeye nempo

quēwēñōnānite wabæca awēnē odeye tōmengā nānō ēnempodāni māmō bee tēn-
 inque guēadō guēa cæte wēnonte wænguināni inānīpa. Ayæ waodāni nāni cæinente
 wænguinque cænguī incæ tōmāā capo wængæimpa. Ayæ wayōmō wayōmō goinque
 pō wæcædānīpa. ⁸Incæte māniī nāni wæwēnō ba īnīnque edæ ōnonque mā pōni
 nāni wæwenguī inguīnō anguēnē.

⁹Mānōmainō ante Itota godōmenque apænegacāimpa. “Māniñedē edæ mīnitō
 īmīnite mīni wæquinque ō ænte māo godōnāni wæyōmīni godōmenque wænōnāni
 wæncæmīnīpa. Ayæ māniñedē botō ēmōwo apænemīni beyæ tōmāmæ quēwēnāni
 mīnitō īmīnite pīncædānīpa. ¹⁰Ayæ adoyedē mīni pōnencabo incæ pancadāniya
 guingo imonte bai badīnque edæ pōnēnāmaī inte Baa anguīnāni. Ayæ mīni cabo
 incæ nāēmæ pīnīnque pancadāniya, Nānō wænguinque, ante wacā ingante nāēmæ
 godoncædānīpa. ¹¹Ayæ nē babæ ante apænedāni ponte, Wængonguī beyæ nē
 apænemōni imōnīpa, ante odōmōnāni adīnque pancadāniya edæ oda cæte wadō pō-
 nente baquīnāni inānīpa. ¹²Ayæ ēñēnāmaī inte nāni cæpāmo godōmenque yebænte
 bai nanguī ba ate wædinque nē pōnēnīnāni inte wodo tōmānāni edæ Baa ān-
 inque waadedāmaī bacædānīpa. ¹³Edæ æcānō īimæca īinque baganca wæn-
 tædāmaī inte botō ēmōwo beyæ pīinte badāmaī īnaa tōmengā edæ botō æmo
 beyænque cōwē wænāmaī quēwencæcāimpa. ¹⁴Ayæ edæ, Awēnē Odeye nempo
 watapæ quēwengæimpa, ante mīni pōnencabo tōmāmæ quēwēnāni inānite māo
 apænemīni ēñncædānīpa. Mānōmaī apænedīnque īinque cæmīni ate māniñedē
 ate edæ īinque baquīnō anguēnē,” ante Itota tōmengā mīñæ nē godāni inānite
 apænegacāimpa.

¹⁵Ayæ apænedīnque Itota, “īnīnque, Wængonguī beyæ nē apænegaingā Daāniedo
 wodi, Nōmæī bai ōō wadō nāni wo ēwenguīmāmo incæ Wængonguī oncō tæiyæ
 wæmoncōnē ænte māmō cō cæquinānidō anguēnē, angacāimpa. Daāniedo nānō
 yewæmongainta adīnque nē adīngā īñōmō tōmengā do ēñēmaingampa. Īncayæ
 ate mānōmaī cō cædāni ongō adīnque, ¹⁶māniñedē Oodeabæ quēwēmīni īñōmō
 edæ ānanquidi do wodii wīnonte æibæwedāni. ¹⁷Ayæ oncōmanca ongōmīni īn-
 inque māincoo æncæte ante oncōnē wæi guīdāmaī inte oncōmancaque oncōman-
 caque wodii wīnōmæwedāni. ¹⁸Ayæ tōmēmoncodē cæmīni īnīnque yacoo æncæte
 ante oncōnē ocæ ēmānāmaī inte godōmenque wodii wīnōmæwedāni. ¹⁹Māniñōnæ
 īinque bayedē nē yædēmadā ināni tōnō goōmæ nē gānōnāni tōnō tōmēnāni nāni
 wæquīmāmo baquīnō anguēnē. ²⁰Ayæ mīnitō mīni wodii wīnonguīōnæ ante pōnēn-
 inque edæ Wængonguī ingante, Wīī edæ cōōnædepo bacæimpa, ante ayæ, Guēman-
 guīōnæ īñonte badāmaī ingæimpa, ante æedāni. ²¹Edæ māniñedē waodāni nan-
 guī nāni wæwēmāmo nāni angā baquīnō anguēnē. Edæ Wængonguī nānō badon-
 gaiñedē mānōmaī nāni wæwēmāmo bai dæ āñonte ayæ godōmenque ñōwo ganca
 dæ ānōmpa. Ayæ godōmenque īinque baganca mānōmaī nāni wæwenguīmāmo
 bai dæ anguīnō anguēnē. ²²Edæ wantæpiyæ nāni wæwenguī impa, ante ad-
 inque Wængonguī, Mānīpōōnæque edæ wæwencædānīpa, ante pōnōmenque
 ante ānāmaī ingā bai quīngānō quēwenguēnē dæ ancædōnānīpa. Incæte, Nē
 quēwenguīnāni botō angāināni wīī wantæpiyæ wæwencædānīpa, ante cædinque
 Wængonguī dobæ pōnōmenque ānīnque, Idæwaa impa, ancæcāimpa,” ante Itota
 apænegacāimpa.

²³Ayæ, īinque bayonte æbānō inguīī, ante apænedīnque Itota godōmenque īi-
 maī ante apæncantapa. “Māniñedē wadāni mīnitō īmīnite, ‘Īñōmō mōnō Codito

ponte ongongä tamēñedäni,' ante ayä, 'Wayömö ponte a ongongä atamönipa,' ante tededäni ēñēninqe mīnitō iñömō edä ēñēnāmaï imäewedäni. ²⁴ Wadäni māññedē ponte a ongōninqe nāmā incä ante, Tömēmo Codito iñōmo imopa, ante babæ ante tedequīnāni. Ayä, Wængonguī beyä nē apænebo iñōmo imopa, ante babæ ante tedequīnāni. Tömēnāni, Wængonguī nānō apænte ængaināni incä æmæwo oda cædinque wapiticæ gocædānimpā, ante cædinque bamōnengæ bai cædinque öönædē cæi bai cædinque nō odōmonte bai cæquīnāni inānīpa. Incæte Wængonguī nē apænte ængaingā inte edä ee aqingä diyä æmæwo oda cædinque wapiticæ goquīnāni. ²⁵ Edä iinque badāmaï iñonte botō nōwo do apænebo ēñēdäni. ²⁶ Iinque, pōnente quēwēñōmīni wadäni, 'Cōwä aedäni, öñōmæca mæ ongongampa,' ante ānāni ēñēninqe mīnitō acæ taodāmaï iedäni. Ayä, 'Oncō guimongacōnē a ongongä apa quēwēedäni,' ante ānāni incæte pōñēnāmaï iedäni. ²⁷ Edä nænque tamōnō gāmænō nāninque guīdō gāmænō quingæ gote bai edä tōmānāni edonque ayōnāni botō Waobo ēñagaïmo inte botō ponque poncæboimpā. ²⁸ Edä abadæidi ñōmæingāa weëo pōnāni bai mīnitō tōmāmīni adoyedē iñontobæ botō weca ponguīmīni imīnīpa," ante Itota apænecāimpā.

Waoçä ēñagaïgä iïmaï pōninqe cæcæcāimpā, ante

(Mäadoco 13.24-37; Odoca 21.25-33, 17.26-30, 34-36)

²⁹ Ayä godōmenque apænedinque Itota, "Māññi nāni wæwēmāmo nāni angä iinque go ate nænque iñontobæ wēmō badinque apāicä apāidāmaï ingæimpā. Nē-moncoo öönædē iñō wæä tæ wæäninqe waa tæ waa tæ wæængæimpā. Öönædē tæi ongongaincoo incä wançæ wançæ cæte bai wapiticæ goquīnō anguēñē. ³⁰ Māññedē ate botō Waobo nē ēñagaïmo inte oo pōñōmo öönædē ate bai ba adinque wabæca nāni cabo wabæca nāni cabo tōmāmæ quēwēñāni Ca ca wæcædānimpā. Wæyōnāni botō Waobo nē ēñagaïmo inte boguīmancodē māmō pōninqe botō tæi pōni pñæmo inte ñāo apāite bai wæmō emonte wææmo acædānimpā. ³¹ Māññedē todompeta mönō acadeca yedæ ænete bai we öññonte botō anquedoidi inānite da godōmo godinque tōmēnāni boguīmā æmænō betamonca æmænō betamonca nānō pō goinō godinque öönædē tōmāne godinque edä Wængonguī nānō apænte ængaināni inānite añete poncædānimpā," ante Itota apænecantapa.

³² Ayä, "Wængonguī Awēñē æyedēñō ponguingäa, ante botō iigowæ æbānō iwæ ante odōmonte apænebo ēñēdäni. Tömēwæ mīiwæ badinque iigowæ wayabo tånä nā boca adinque mīnitō, Öñābo nānō bocaïnepo inte nænque nāwantedæ baquinque bocapa, ante pōñēninqe edä do ēñēmīnīpa. ³³ Ayä adobai māññō botō apænedinō bai edä do ba adinque mīnitō, Waoçä nē ēñagaïgä iñömō edä do odemō pōni ongōninqe edä oo poncæcāimpā, ante ēñencāmīnīmpā. ³⁴ Nāwangä ämopa. Nō-womīni ayä mīīmīni quēwēninqe wænte godāmaï iñōmīni māññō botō apænedinō bai tōmānō edä do iinque baquinō anguēñē. ³⁵ Öönædē ongōñōmō inguīpoga tōnō wo ewente bai dæ ba incæte botō angaiñonque guiquēñē edä dæ badāmaï inte edä cōwē tæi ongongæimpā," angantapa.

³⁶ Ayä, "Māññōnæ æyedēñō i, ante, Māññepo ædepodō i, ante ēñencæte ante mīni wædinō ante æcāmenque incä ēñēnāmaï ingampa. Tōmānāni ēñēnāmaï iñōnāni edä Wængonguī anquedoidi incä ēñēnāmaï inānīpa. Wæmpocä Wēmo incä ēñēnāmaï iñōmote Wæmpocä iñömō tōmengä adocanque incä edä nē ēñengä ingampa," ante Itota apænecāimpā.

³⁷ Ayä godömenque iimaï ante apäñecantapa. “Waobo në ëñagaïmo inte botö ponguïönä iinque bayedë guiqüënë Nöwee wodi Docä nani angaingä nänö quëwëñedë dodäni nani quëwengai bai adobai edä quëwenguinani inänipa. ³⁸ Mäniñedë apä ayä änämaï iñedë në quëwengainani iñömö önonque cante bete, Monguingä, ante godonte ate möninqe tömëñani Docä Nöwee oncö bai wipo mäñonte nänö guiquïönä iinque baganca quëwencægadänimpa. ³⁹ Tömëñani inänite apä änte gocä cæganca tömëñani, Æpæ anguimpa, ante ëñänämaï nani quëwengai bai adobai ëñänämaï cæyönani botö Waobo ëñagaïmo inte adobai edä iñontobä poncæboimpa. ⁴⁰ Mäniñedë waoda tömëmoncodë guëa cæyöna adocanque ingante ö äñani goyongä adocanque wæätë a ongoncæcäimpa. ⁴¹ Ayä onquiyäna guëa apo cæyöna adocanque ingante ö äñani goyongä adocanque wæätë a ongoncæcäimpa,” ante Itota odömonte apäñecantapa.

⁴² Ayä, “Awënë äyedëñö ponguingäa, ante ëñänämaï imini inte minitö müimini inte edä cöwä aquënë quëwëñäni. ⁴³ Në awëmö ængä äyedëñö ponguingäa, ante ëñente bai në ëcäcä iñömö, Bæ tate guidämaï incæcäimpa, ante wææ wänoncædongäimpa, ante ëñente quëwëedäni. ⁴⁴ Wao Wëmo ëñagaïmo inte botö adobai minitö ëñänämaï iñömini do iñontobä ponguïmo imo ante minitö botö ponguïno ante wänö cöedäni,” ante Itota angacäimpa.

Awënë quincoo ante në ædämö aacä

(Odoca 12.41-48)

⁴⁵ Ayä Itota iimaï apäñecantapa. “Inguipoga awënë iñömö, Æcänö në ëñengä inongä inte botö quincoo ante ædämö aacä inguingäa, äninque, Mänömaï inte cæcä ingante adinque botö ämo ate tömengä në angä badinque botö oncönë quëwëñäni inänite ædämö aadinque cængui eyepä iñonte godongä cæncædänimpa, angampa. ⁴⁶ Ante awënë wayömö gote ponte ayongä, Në cæcä botö änö ante ëñente cæcampa, ante adinque awënë wæätë tömengä ingante godö waa cæcä tömengä ingante godö waa cæcä ate në waa cæcä iñömö edä waa tocæcäimpa. ⁴⁷ Minitö iminute näwangä ante apäñebopa. Në ëñente cædingä ingante awënë, Bitö botö mäincoo tömancoo edä në aabi bacæbiimpa, ancæcäimpa.”

⁴⁸ “Wæätë edä tömengä ingante në cæcä incæ wënæ wënæ cæcä inongä inte mimöno pönëwëñinque, Botö awënë wabänö wantæpiyæ pönämaï imaingampa, ante pönengä iinque æbänö babai. ⁴⁹ Tömengä edä wadäni nani cæcabo iñönänite näëmæ piininqe tæi tæi pangä iinque ayä në ti nämæ bete quidi quidi dowante badäni tönö godongämæ cante becä. ⁵⁰ Iinque tömengä, Æönädö ponguingäa, ante wädämaï iñongante, Æyedëñö ponguingäa, ante ëñänämaï iñongante edä awënë iñontobä pongä wæbaingampa. ⁵¹ Pöninqe awënë iñömö ëñänämaï cædingä ingante baö wido wido todinque tömengä ingantedö äninque, Në wadö tedete wadö cædinäni nani panguïno gote tömëñani tönö godongämæ ongonte wæcæcäimpa. Ante cædinque awënë tömëñani nani guingo imonte Ca ca wæyömö wido cæcä wæcæcäimpa,” ante Itota apäñegacäimpa.

Baquedäni nani cæinö ante odömongampa

25 Mäninganca apäñedinque Itota ayä godömenque odömonte apäñegacäimpa. “Mäniñedë öönädë Awënë Odeye nempo quëwëñäni iñömö baquedäni diete ganca nani cæi bai adobai cæcædänimpa. Baquedäni iñömö, Edën-

ingä nõwoónæ monguingä, ante tica ênëincade äninque tömengä ingante bee tencæte ante tao godänipa. ²Baquedäni incæ tömënäni tinco ganca inäni në êñënäni iñönäni edæ adoganca tinco ganca inäni në êñënämaï inäni inänipa. ³Në êñënämaï inäni guiquënë tömënäni tica ênëincade äninque gongapæncade ænämaï goyönäni, ⁴në êñënäni guiquënë gongapæncadedë godö pe ñiñænte gongapæ eyepæ ænte godänipa. ⁵Mänömaï ænte gote ayönäni në monguingä wantæpiyæ pönämaï dæ angä adinque tömënäni tömänäni edæ möïmente ædo ædo cædinque mö ñönänipa.”

⁶“Mö ñöñönäni ayaönænëña pöñi bayonte edæ, ‘Në monguingä pongä ataqueedäni. Tao bee tengüenë quëwëminii.’ ⁷Ante aa pedäni êñëninque edæ baquedäni tömänäni ængæ gantidinque, Tica ênëincade waëmö ti wodönote bacæimpa, ante wadæ wadæ cædänipa. ⁸Cæyönäni në êñënämaï inäni guiquënë në êñënäni inänite, ‘Mönitö tica ênëincade edæ wodo mönæ ëmompæ cæminii. Minitö näænimæ incæ pancapaa pönömini æncæmönimpa.’ ⁹Äñönäni, ‘Inæmpæ, mönitö beyæ minitö beyæ adobaï wii eyepæ imaimpa, ante awædö. Edæ godoncæte ante në mänäni weca gote godonte æedäni.’ ¹⁰Änäni ëñente godonte æncæ goyönäni edæ në monguingä do pongä adinque në ëñente eyepæ näæninäni iñömö monguingä tönö godongämæ monguimæno oncönë becæ guidäni ininque edæ odemö tee mönete intapa. ¹¹Ayæ ate edæ wadäni gongapæ eyepæ ænte pöñönäni do tee mönete i adinque tömënäni, ‘Awënë, awënë êñëmi. Odemö wi ænebi guiimönie.’ ¹²Ante wæyönäni awënë wæætë, ‘Minitö iminute näwangä ämopa. Minitö æminidö iminii, ante botö cöwë adämaï imopa,’ angampa.” Mäninque ante odömoncæte ante Itota iïmaï angantapa.

¹³“Minitö guiquënë, Æönædö i, æyedëno i, ante êñënämaï imini inte edæ wänö conte quëwëedäni,” angacäimpa.

Tadento näni godonte äinta ante odömongampa

(*Odoca 19.11-27*)

¹⁴Ayæ æbänö baquii, ante odömoncæte ante Itota, Waocä në ëacä nänö cæi bai bacæimpa, ante apænegacäimpa. “Në ëacä wayömö gocæte ante cædinque tömengä ingante në cædäni inänite äñete mämongä pöñönänite, Botö ëadinta incæ pönömo äninque minitö në aamini badinque botö beyæ godonte æncæminimpa. ¹⁵Äninque në ëacä iñömö, Në cædäni æbänö nanguï cædinque aaquinänii, ante adinque tadento ñænængade näni godonte äinta incæ adocanque ingante önompo æmæmpoque mänimpota pædæ pönöninque wacä ingante tadento mentaa mänimpota pædæ pönöninque wacä ingante tadento adotaque pædæ pönongampa. Ayæ wadæ gocä. ¹⁶Ininque tadento önompo æmæmpoque mänimpota në æningä iñömö do godinque godonte æ godonte æ cædinque önompo æmæmpota tömengä nänö ænimpota adopota æñongä edæ tadento önompo tipæmpoga bapa. ¹⁷Ayæ tadento mentaa në æningä adobaï godonte æ godonte æ cædinque mentaa nänö æninta adopota wæætë æñongä edæ tadento mëa go mëa bapa. ¹⁸Wæætë adotaque në æningä guiquënë tömengä wadæ godinque onguipodë ææ wodinque awënë godonte äinta äninque tee moncate wë wodongampa,” angantapa.

¹⁹Ayæ, “Wantæpiyæ ate tömënäni awënë adodö pöninque, Botö qui eyepæ æncæboimpa, ante cædinque tömënäni näni ænte aadinta ante cöwä acantapa. ²⁰Önompo æmæmpoque tadento në æningä iñömö edæ æmæmpota adopota nänö godonte æninta ænte pöninque awënë ingante, ‘Awënë, bitö botö imote, Aacæbi-impa, ante tadento önompo æmæmpoque mänimpota pædæ pönömi æntabopa.

Æninqe botö godonte ænte godonte ænte edæ nanguí cædinque edæ mänimpota adopota æmæmpota dobæ æmoí ae.’ ²¹ Angä wædinque tömengä awënë iñömö, ‘Badogaa. Botö imote nê cæbi inömi inte bitö ædæmö aabi inte ñowo waa cæbi æmopa. Bitö wæðænque æninqe cöwê ædæmö aabi adinque botö ñowo nanguí pöni botö ëadincoo pönömo æninqe bitö wæætê edæ nê aabi bacæbiimpa. Botö bitö awënë inömo inte watapæ tote quëwëmo iñömote bitö edæ äänömonque bai bitö watapæ tote quëwënguinque pöe,’ angantapa.”

²² “Ayæ mäa tadento nê æningä adobaí pöningue, ‘Awënë, bitö botö imote, Aacæbiimpa, ante tadento mentaa mänimpota pædæ pönömi æninqe botö godonte ænte godonte ænte edæ nanguí cædinque edæ mentaa mänimpota adopota dobæ æmoí ae.’ ²³ Angä wædinque tömengä awënë iñömö, ‘Badogaa. Botö imote nê cæbi inömi inte bitö ædæmö aabi inte ñowo waa cæbi æmopa. Bitö wæðænque æninqe cöwê ædæmö aabi adinque botö ñowo nanguí pöni botö ëadincoo pönömo æninqe bitö wæætê edæ nê aabi bacæbiimpa. Botö bitö awënë inömo inte watapæ tote quëwëmo iñömote bitö edæ äänömonque bai bitö watapæ tote quëwënguinque pöe,’ angantapa.”

²⁴ “Ayæ ate edæ adotaque nê æningä wæætê pöningue, ‘Awënë, bitö nê waad-ädämaí cædömi inte bitö wii gadïñömö wayömö incæ edæ do wogaabipa. Ayæ bitö wii miñömö wayömö incæ edæ do tä pete gæte bai æmipa, angantapa. ²⁵ Ìninqe botö edæ ancaí guñente wædinque edæ tao godinque onguipodê ææ wote bitö tadento daga wëningue edæ wë wodontabopa. Bado, bitö qui incæ edæ do æmipa,’ angantapa.”

²⁶ “Angä ëñente wædinque tömengä awënë wæætê, ‘Botö imote nê cæbi inömi inte bitö wiwa pönëmi inte wæntæye cæbi abopa. Botö æbänö gadämaí iñömö do wogaabopa, ante bitö edæ do ëñëmitapa. Botö minämaí iñömö do tä pete gæbopa, ante bitö äninö edæ do ëñënimi inte cæbitapa töö. ²⁷ Ìninqe mäninö ante do ëñënimi inte bitö edæ padata botö godonte æinta æninqe edæ nê godonte ænäni weca godonte ænguënëmi ïmitapa töö. Mänömaí cæbi bai botö ocæ ëmænte pöningue edæ botö qui do æninqe wadäni näni guidöninta tönö edæ do æncædömoimpa töö.’ ²⁸ Äninqe tömengä ingante nê cædäni inänite awënë angantapa. ‘Minitö ñowo iingä tadento adotaque tömengä nänö nææninta ö æninqe edæ tadento önonpo tipæmpoga nê næængä ingante pædæ godömini æncæcäimpa. ²⁹ Edæ nê ëadäni inänite tömänäni inänite godömenque godonte ingæimpa. Ìninqe tömënäni qui nanguí ëacædänimpa. Wæætê edæ ëadämaí inte ömæpocä ingä guiquënë tömengä nänö ëadincoo wæðænque pöni i incæte edæ ö ænte dæ ba wæcæcäimpa. ³⁰ Ayæ edæ mäningä botö imote nê cædingä incæ wæntæye inongä inte cædämaí iñongante minitö wëmö iñömö näni guingo imonte Ca ca wæwëñömö tömengä ingante edæ guitodonte wido cæmini wæcæcäimpa,’ ante tömengä awënë angantapa.”

Tömämæ quëwënäni inänite apænte angæimpa, ante

³¹ Itota mänömaïnö ante odömonte apænedinque godömenque apænegacäimpa. “Botö anquedoidi tönö godongämæ pöningue botö Waobo nê ëñagäimo inte ñäö apäite bai nê ëmömo inte poncæboimpa. Mänïñedê botö pöñedê botö Awënë tæ contaimpaa tæ contadinque edæ öönædê waa pöni ongonäni bai waa pöni ongoncæboimpa. ³² Mänïñedê tömämæ quëwënäni botö weca godongämæ ponte a on-

goncædänimpa. Ayæ nê aacä tömengä cæninäni inänite apænte adinque bodegoidi æmænö cönöningue cabodaidi æmænö nänö cönönö bai cædinque botö iñömö edæ imæca quëwënäni tömänäni inänite apænte adinque pancadäniya inänite æmænö gönöningue wadäni inänite æmænö gönömo ongoncædänimpa. ³³ Obegaidi bai nê ëñente cædäni inänite botö tömëmæ inö gönöningue wæætë cabodaidi bai nê ëñänämaï cædäni inänite botö dipæmæ inö gönöncæboimpa.”

³⁴ “Gönöningue botö Awënë Odeyebo inömo inte botö tömëmæ inö nê ongönäni inänite ancæboimpa. ‘Botö Mæmpo nänö nê waademini inte pöedäni. Tömengä inguipoga nänö badongaiñedë äninque, Awënë Odeye nempo mini quëwenguinö impa, ante do badongacäimpa. Ìninque Awënë Odeye nempo mini quëwenguënönö ñöwo ænte quëwëedäni. ³⁵ Edæ botö gue ænente wæyömo minitö cænguï nê pönömïni cængaboimpa. Tepæ gæwænte wæbo adinque minitö nê pönömïni begaboimpa. Botö Wabo imo inte cowodë bai pömo adinque minitö, Pö guï, ämïni ëñëningue minitö weca guite ëñagaboimpa. ³⁶ Ayæ ömaabo inte wæyömo minitö pönömïni wëñagaboimpa. Wënæ wënæ inte wæyömo minitö ponte nê waadete cægaïmïni iminipa. Tee mönete oncönë ongonte wæwëñömote botö weca ëñacæ nê pongaïmïni inömini inte minitö ñöwo wæætë edæ botö nempo guite quëwencæminimpa,’ ancæboimpa.”

³⁷ “Ämo ëñëningue edæ nê nö cædäni guiquënë, ‘Awënë iñæmpa æyedënö bitö gue ænente wæyömi dicæ pönömöni cæmitawogaa, ancædänimpa. Ayæ tepæ gæwæñömi dicæ pönömöni bebitawogaa. ³⁸ Æyedënö wacä incæ pömi adinque mönitö dicæ, Pö guï, antamöniyaa. Ayæ ömaabi adinque dicæ pönömöni wëñabitawogaa. ³⁹ Ayæ wënæ wënæ inte wæyömi incæ tee mönete wæyömi incæ mönitö dicæ acæ pontamöniyaa.’ ⁴⁰ Ante wæyönäni botö Awënë Odeyebo inömo inte edæ tömënäni inänite, ‘Ìñæmpa botö tönïñadäni iñönänite adocanque önonganque iñongante minitö waa cægaïmïni inte edæ botö imote do waa cæte iminipa ämo ëñëedäni,’ ante tömënäni inänite ancæboimpa,” angantapa.

⁴¹ “Ayæ botö dipæmæ inö nê ongönäni inänite botö nê Awënë inömo inte ancæboimpa. ‘Minitö nê tente wæquënëmïni guiquënë ñöwo edæ gä gobæwedäni. Edæ Wængonguï do badöningue, Wënæ tönö tömengä anquedoidi nänö nê ëmïñänäni tönö wantæpiyæ cöwë wænämaï näni bæcote wæquïñömö, ante nänö badongaiñömö minitö mänïñömö edæ gote guibæwedäni,’ ante edæ ancæboimpa. ⁴² ‘Edæ botö gue ænente wæbo adinque minitö edæ dicæ pönömïni cæntabogaa. Gæwænte wæyömo minitö dicæ pönömïni betabogaa. ⁴³ Ayæ Wabo imo inte cowodë bai pömo adinque minitö dicæ, Pö guïe, ämïnitawogaa. Ömaabo inte wæyömo weocoo dicæ pönömïni wëñatabogaa. Wënæ wënæ inte wæbo incæ tee mönete wæbo incæ minitö iñömö edæ dicæ ëñacæ pömïnitawogaa,’ ancæboimpa.”

⁴⁴ “Ämo ëñente wædinque nê ëñänämaï inäni iñömö, ‘Awënë ëñëmi. Bitö æyedënö gue ænente tepæ gæwænte wæbitawo. Ayæ wabi bai inte æyedënö pömi atamöniyaa. Weocoo ömaabi inte wæbi adinque, daicawo gawæmi adinque, tee mönete wæbi adinque mönitö bitö beyæ dicæ cædämaï intamöniyaa.’ ⁴⁵ Äñönäni botö iñömö edæ tömënäni inänite, ‘Ìñæmpa wacä ingante önonganque iñongante minitö cædämaï ingaïmïni inte botö imote edæ mänïñö do cædämaï ingamïnimpä. Ämo ëñëmaïminipa,’ ante piincæboimpa. ⁴⁶ Ìninque tömënäni näni tente wæwenguinö incæ æmæwo wadæ gocædänimpa. Wæætë nê nö cædäni guiquënë cöwë wænämaï näni quëwenguinö æmæwo gocædänimpa,” ante Itota apænecäcäimpa.

Itota ingante bæi ongongäimpa, ante cädänipa

(Mäadoco 14.1-2; Odoca 22.1-2; Wäo 11.45-53)

26 Ayæ mäninö tömänö iinque apänete ate Itota tömengä miñæ nê godäni inänite apäñecantapa.

²—Mëönaa go ate wodo pänta gogaïönæ bai Patowa mönö äämæ cænguiönæ impa, ante do ëñëminipa. Mänïönæ iñonte botö Waobo ëñagaïmo iñömote botö imote bæi ongöningue edæ, Awæ ñænquedimæ cæte iingä ingante töö godöningue daagö timpote wææ tiwadinque edæ äænö gö cæte wænöedäni, ante botö imote pædæ godönäni æncädänimpa, ante apänegacäimpa.

³Mäniñedë, Wængongui qui, ante nê godongä ñænængä pönï Caiapato oncönë godongämæ pöningue wadäni nê godönäni ñænænäni tönö oodeidi inänite nê aadäni nani Picæncabo iñömö, ⁴ adoyömö pönëningue, Mönö æbänö babæ cæte Itota ingante awëmö bæi ongonte ænte wængongui, ⁵ ante pönënanï incæte,

—Ïñæmpa äämæntedæ iñonte wænömö bai tömänäni ængui bate Yæ yæ ante piinte cæcädönänimpa, ante pönente wædingue mönö ædö cæte mäniñedë cæquii, ante wægädänimpa.

Itota ocaboga onquiyängä ogui wapæ gao cæcacampa

(Mäadoco 14.3-9; Wäo 12.1-8)

⁶Itota mäniñedë Betänia godingue nê baadingä Timönö oncönë gui ëñadingue cæncongantapa. ⁷Cæncöñongä wacä onquiyängä iñömö tömengä weca pö guidingue ogui wapæ nani nanguï godonte ænimæ dica adabatodo waincadedë pe ñiñænte nänö mänimæ incæ ñöwo ænte mämö Itota ocaboga edæ gao cæcacantapa.

⁸Mänömai cæcä adingue Itota miñæ nani gocabo iñömö piïningue,

—Ïñæmpa önonque gao guënte bai cæcampa töö, änänitapa. ⁹Edæ iimæ iñömö nanguï pönï æninta beyæ godonte ænguënëmæ imæmpa. Godonte ænte bai ömæpodäni inänite wæætë godonguënë apa.

¹⁰Ante piïnanï wædingue Itota iñömö,

—Quimæ piïwëminii. Iingä onquiyängä iñömö botö imote waa pönï cæcä apa quëwëminii. ¹¹Ïñæmpa ömæpodäni ante mini äninäni minitö weca cöwë quëwëñönäni botö wæætë minitö weca wiï wantæpiyæ quëwencæboimpa.

¹²Mänimæ ogui wapæ botonga gadongadingue tömengä botö baö daga wenguingue eyepæ iñonte edæ öni paacantapa. ¹³Minitö iminite näwangä ante apänebopa. Waa pönï botö apänedö apänedingue tömämæ æyömömë apänedäni ëñënanï mäningä onquiyängä nänö cædinö ante adobai tededäni ëñente pönencädänimpa, ante Itota apänegacäimpa.

Itota ingante Codaa odömönte godoncæte ante cæcampa

(Mäadoco 14.10-11; Odoca 22.3-6)

¹⁴Ayæ mäniñedë nani, Dote, äincabo iñönäni adocanque Codaa Icadiote nani äongä iñömö, Wængongui qui, ante nê godönäni ñænænäni weca gocantapa.

¹⁵Godingue apäñecantapa.

—Botö, Itota æyömönö ongongää, ante pönö odömömo ate minitö bæi ongonte æmini iinque æpotadö, Eyepæ i, ante pönöminï æmaïmoo.

Angä ëñëninque tömënäni padata tiguitamö incæ todëinta ganca tee mampote tömengä ingante pædæ godönäni. ¹⁶ Æningä inte tömengä cöwë cöwä adinque, Æbänö cæte Itota ingante odömonte pædæ godömo ate ænguïnäni, ante pönente cægacäimpa.

Päö tönö owæta Itota pædæ pönongä cænte bedänipa

(Mäadoco 14.12-25; Odoco 22.7-23; Wäö 13.21-30; 1 Coodintoidi 11.23-26)

¹⁷ Mäniñedë oodeoidi päö yedæ æmpoquï ömæmö i nani ææmæ cæte cænguïönæ tacæ ba adinque Itota miñæ nê godäni iñömö, Wodo pänta gogaïönæ bai Patowa mönö ææmæ cænguïönæ impa, ante pönente wædinque tömengä weca ponte änanitapa.

—Æyömönö bitö beyæ Patowa ææmæ ante cæmöni ate cænguïmii.

¹⁸ Äñönäni tömengä nänö ëmiñænæ mënæa inate äninque,

—Mïnatö waodäni nani quëwëñömö godinque onguïñangä botö nê äningä ingante bee téninque mïnatö iïmainö ante apænemina ëñengæda. “Mönö Awënë iïmai angampa. Botö wænguïönæ oo pöni bapa cæbii. Botö nê ëmiñænäni tönö botö bitö oncönë Patowa ææmæ ponte cæncæmönimpa, angampa,” ante ämina ëñengæda, angä.

¹⁹ Æñente wædinque tömëna Itota nänö änö bai cædinque, Patowa ææmæ cænguï impa, ante cædatapa.

²⁰ Gäwadecæ bayö Itota tönö, Dote, nani äincabo ponte godongämæ cæncæte ante ongönänitapa. ²¹ Cæncöñönäni Itota,

—Nawangä ante apænebo ëñëedäni. Mïni cabo incæ adocanque, Æncädänimpa, ante botö imote odömonte pædæ godonguingä ingampa.

²² Ante apænecä ëñëninque tömënäni wæwente bayönäni adocanque adocanque,

—Awënë, botö imotedö ante dicæ apænebitawogaa.

²³ Ante tedeyönäni Itota wæætë,

—Botö tönö guëa adotaca nê miï cædingä iñömö tömengä botö imote nê odömonte pædæ godonguingä ingampa. ²⁴ Edæ dodäni Wængonguï beyæ nani yewæmongainö bai cædinque botö Waobo ëñagaïmo inte cöwë wænte goquënëmo imodö anguënë. Æninque edæ botö imo nê odömonte godonguingä iñömö tömengä nänö wæquinque ingæimpa. Mäningä wiï ëñate bai waa toquënëngä incædongäimpa.

²⁵ Ante apænecä wædinque Codaa iñömö Itota ingante nê odömonte godonguingä iñömö edæ,

—Awënë nê Odömömi ëñëmi, botö imotedö ante ämitawogaa.

Ante äñongante edæ Itota,

—Tömëmi nämä incæ, Botö imotedö, ante do tedebi imipa.

²⁶ Ante apænecantapa. Ayæ cæncöñönäni Itota päö bæi ongonte äninque Wængonguï ingante waa ate apænedinque päö pä äninque tömengä miñæ nê godäni inänite pædæ godö pædæ godö cæcantapa.

—Botö baö bai impa, ante pædæ pönömo äninque mïnitö Ao ante cæedäni.

²⁷ Äninque ayæ bequimæ owætaca bæi ongonte äninque Wængonguï ingante waa ate pönente apænedinque pædæ godöninque,

—Botö wepæ bai impa, ante pædæ pönömo äninque tömämïni Ao äninque godongämæ intaca beedäni, angantapa. ²⁸ Botö wepæ iïmä bai impa. Wængonguï do apænedinque, Botö pönö cæbo ate mïnitö Ao ämïni ininque mönö godongämæ

waa cæte quëwengäimpa, angacäimpa. Ñowo adobaï miine äninque apänebopa. Botö wepä ante Ao ante ämini inte mönö godongämä waa cæte quëwengäimpa. Edæ nanguï imini mini wënæ wënæ cædinö beyä ante ñä mënongaquimä impa. ²⁹Nawangä ämopa. Botö Mæmpo Awënë Odeye iñongä botö tömengä nempo quëwëninque minitö tönö godongämä miimä botö beganca mänimä yowepä ñowo ämæwo bebo tamënedäni, ante Itota apänegacäimpa.

Dicæ abogaa, ante Pegodo anguingä, ante apäñecampa

(Mäadoco 14.26-31; Odoca 22.31-34; Wäö 13.36-38)

³⁰Ayä Wængonguï ingante ämotamini ante tao godinque Odibowænquidi godäni-tapa. ³¹Goyönänite Itota apäñecantapa.

—Wængonguï beyä yewämöninque, “Në aadingä ingante tacabo dæ wängä in-
inque edæ cæningäidi obegaidi panguimä goquimpa,” ante nani yewämonte an-
gäinö bai cædinque minitö tömämini ñowoönæ woyowotä incæ botö dæ ämo beyä
guingo imonte badinque edæ panguimä goquimini iminipa. ³²Panguimä gomini
incæte botö edæ ñäni ömæmonte ate Gadideabæ täno gote a ongöñomo minitö ayä
pöedäni.

³³Angä wædinque Pegodo guiqüënë,

—İñæmpa dæ ämi beyä tömänäni guingo imonte badinque panguimä godäni
incæte edæ botö guiqüënë cöwë panguimä godämaï incæboimpa.

³⁴Äñongante Itota wæætë,

—Bitö imite näwangä ante apänebo ëñëe. Ñowoönæ woyowotä incæ tawadiya
pedämaï iñonte bitö botö imotedö ante wadö ante apänedinque, Dicæ abogaa, ante
edæ mempoga go adopoque angüimi imipa.

³⁵Angä ëñente wædinque,

—İñæmpa bitö tönö guëa wæmo incæte botö cöwë, Dicæ abogaa, ante edæ änämaï
incæboimpa.

Äñongä tömengä miñä në godäni tömänäni adodö ante angadänimpa.

Guetëmäni iñömö Itota Wængonguï ingante apäñecampa

(Mäadoco 14.32-42; Odoca 22.39-46)

³⁶Mänii godinque Itota yabæ incæ Guetëmäni nani äñömö tömengä miñä në
godäni tönö gocantapa. Mäniñömö pöninque tömengä tömënanä inänite,

—Tæ contate ongöñömini botö godömenque godinque Wængonguï ingante
apänete pömoedäni.

³⁷Äninque Pegodo tönö Tebedeo wëna inate ænte mäocä goyönäni Itota iñömö
nanguï wæwente badinque ancai guiñëninque, ³⁸tömënanä inänite,

—Botö wænguimämo pönö angüënë, ante botö önöwoca incæ pæmænte wæte
wænguï wæ, ante wæbo tamënedäni. Minitö guiqüënë äamonca godongämä wææ
aacöedäni.

³⁹Äninque Itota wædænque godömenque godinque guidömëmä ñongænte Wæn-
gonguï ingante apäñecantapa. “Botö Mæmpo, bitö Ao äninque edæ ti nä wænguimä
baï ö ænte bai cædinque botö imote edæ, Wänämaï incæbiimpa, ämi ininque botö
edæ waa tobaimopa. Incæte botö änönö bai wiï cædinque wæætë tömëmi änönö bai
cæe,” ämopa.

⁴⁰ Ante apäñecä ate tömengä miñä nê godäni weca adodö ponte ayongä tömëñani mö ñönäni adinque tömengä Pegodo ingante,

—Botö tönö wänö conguenëmini incä minitö adoque ooda incä wii aacöminii.

⁴¹ Mimöno waa cäinëmönipa, ante ewocayömini baö aquiñö ëñamini inte wëntäye bamnipa. Ìninqe edä wänö cöninque nämä beyenque ante Wængongui ingante apäñedinque edä, Wii wënä wënä cäinëmöni bacämönimpa, ante apäñeedäni.

⁴² Äninqe Itota adodö wadä gote wäetë apäñedinque, “Botö Mæmpo, botö bedämaï iñömote bitö ö äñämaï imi ininque botö cöwë bitö ämaï becäboimpa.”

⁴³ Ante Wængongui ingante apäñete ate ponte ayongante möwo möinente ämö cæte wædinque mö ñönäni. ⁴⁴ Adinque edä tömengä wäetë adodö godinque ñöwo mempoga go adoque nänö apäñedinö ante adodö ante Wængongui ingante iinque apäñecantapa. ⁴⁵ Ayä tömengä miñä nê godäni weca wäetë adodö pöninque,

—Ìñämpa cöwë mömini edä cöwë guëmämini awädö. Aquenë quëwëedäni. Botö Waobo ëñagaïmo inte botö wæwenguüönä do bayonte edä botö imote nê wënä wënä cädäni inänite nê godö odömonguingä iñömö do godongäi атақeädäni. ⁴⁶ Ängä gantite mönö gocäimpa. Botö imo nê odömonte godonguingä obo pöni pongä tamëñedäni, angacäimpa.

Itota ingante bæi ongonte äñänipa

(Mäadoco 14.43-50; Odoco 22.47-53; Wäö 18.2-11)

⁴⁷ Ayä apäñeyongä edä Codaa wodi tömëñani näni, Dote, ante gocabo adocabo iningä incä ñöwo pongantapa. Wængongui qui, ante nê godönäni ñäñänäni tönö oodeoidi inänite nê aadäni näni Picäncabo tönö da pönönäni pöninque wadäni täiyänäni adobaï yaëmë näëñinque canta näëñäni inte Codaa miñä pönänitapa.

⁴⁸ Doyedë iñömö nê odömonte godoncä cäcä Codaa iñömö tömengä miñä poncä cädäni inänite iïmaï ante wëñëñedë apäñedingä inongäimpa. “Botö odömonte queë bemömo adinque minitö wäetë, Tömengä ingampa, ante adinque tömengä ingante edä bæi ongonte ö äedäni.”

⁴⁹ Ante do äningä inte Codaa ñöwo iñömö Itota weca pöninque,

—Awënë nê Odömömi imi, bitö imi.

Äninqe edä waa cæte bai queë bemongantapa. ⁵⁰ Adinque Itota wäetë,

—Botö miñä nê godïmi ëñëmi. Mäninö ante bitö ponque pö cäbäwe.

Äñongä wadäni tömengä weca pöninque pädä gopo bæi ongonte Itota ingante äñänitapa.

⁵¹ Wængongui qui, ante nê godongä ñäñängä pöni ingante nê cäcä mäninömö ponte a ongongä adinque Itota tönö pöningä adocanque pädä guiipote yaëmë o togänte äninque mäningä nê cäcä ingante täi päninque önömonca wangö tamoncacantapa. ⁵² Adinque Itota iñömö tömengä ingante,

—Yaëmë adodö mini tie, ämopa. Edä yaëmë nê o togänte näëñäni tömänäni inänite yaëmenca adobaï tacädäni wäncädänimpa. ⁵³ Ìñämpa äbänö ante pönëmi edä. Wængongui anquedoidi adocabodänique tei miïdo ganca iñönänite botö Mæmpo ingante apäñebo bai tömengä do angä ininque anquedoidi näni cabo näni cabo incä önompo tipämpoga go mencabodäniya botö beyä ponte cäbäñänipa, ante pönëmiyaa. ⁵⁴ Incæte botö Codito inömo inte botö Mæmpo ingante mänömaï apäñebo ëñente cäcä bai dodäni, Codito iïmaï wäncäcäimpa, ante Wængongui

angä eñente nāni yewæmongainö ante ædö cæte iinque bacædönimpa, ante awædö, ante apænegacäimpa.

⁵⁵ Ayæ wæætë nõwo pönāni inānite Itota apænecantapa.

—Minitö iñæmpa, Bitö nē ö ænīmi imipa, ante bai cædinque botö imote canta tönö yaëmë næænte ö æncæte ante pömīni awædö. Botö Wængonguī oncö yabæcönë iimö iñö iimö iñö apænecönömo mīnitö botö imote yao ongönāmai ee amīnitapa töö.

⁵⁶ Incæte mīnitö Wængonguī beyæ nē apænedāni nāni yewæmongainö bai nõwo iinque baquinque cæmīni abopa.

Ante apænecä eñëninque tömengä ëmīnængä nē godīnāni tōmānāni edæ nāwæ panguimæ cæte wodii winongadānimpa.

Nē Apænte nāni Änoncabo weca Itota ongongampa

(Mäadoco 14.53-65; Odoca 22.54-55, 63-71; Wäö 18.12-14, 19-24)

⁵⁷ Ayæ Itota ingante nē yao ongonte ænāni guiquënë, tömengä ingante mao godinque edæ, Wængonguī quī, ante nē godongä nænængä pōni inongä Caiapato weca ænte godānitapa. Māniñömö do pōninque nē wææ ante odömönāni tönö oodeoidi inānite nē aadāni nāni Picæncabo tönö do a ongönānimpa. Māniñömö Itota ingante ænte māmönāni pongacäimpa. ⁵⁸ Pegodo guiquënë tömengä mīñæ ayæ ayæ godinque, Wængonguī quī, ante nē godongä nænængä pōni inongä oncö yacö moyæ iñömö pö guidinque, Itota ingante æbänö cæquināni, ante wææ wänönāni weca pōninque tæ contate waa acongantapa.

⁵⁹ Wængonguī quī, ante nē godönāni nænænāni tönö nē Apænte nāni Änoncabo tōmānāni, Mönö apænte ante wænömö wæncæcäimpa, ante cædinque, Itota nānö wænguinque wænæ wænæ cæcä ingampa, ante æcänö babæ ante anguingää, ante diqui diqui mīnönānimpa. ⁶⁰ Incæte nanguī ināni ponte babæ apænedāni incæte, Æcänö eyepæ babæ änaa, ante edæ dæ angä wædānitapa. Ayæ ate mēnaa nē babæ wapiticæ änöna inte awënëidi weca pö guiite, ⁶¹ apænedinque,

—Iingä, “Wængonguī tæiyæ wæmö oncö ongö incæte botö iñömö tæi piñæmo iñömo inte godö cæbo bai wo tænguimæ wææmāimpa. Ayæ mēönaa go adoönæque iñonte botö wæætë do mænömaimopa,” angä eñentamōnāni töö. ⁶² Ante apænedä eñëninque nē godongä nænængä pōni inongä incæ ængæ gantidinque Itota ingante,

—Iñæmpa pæ wëenebii. Tömēna bitö imitedö ante godö äninque nāna äninö ante bitö æbänö ämii.

⁶³ Äñongä Itota cōwë änāmai edæ pæ wëenecä. Adinque nē godongä nænængä pōni inongä wæætë,

—Wængonguī nē Quëwengä inte tömengä nānö eñëñongä edæ nāwangä ante apænebi eñëmōni, ämopa. Mönö Codito iñömö Wængonguī Wengä inongä ingampa. Bitö iñæmpa mānimidö inömi imitawo.

⁶⁴ Mänömai angä eñëninque Itota wæætë,

—Tömēmi bitö äninö bai mānimodö inömo imopa. Incæte botö godömenque apænebo eñëdāni. Iincayæ ate botö iñömö edæ Waobo eñagaïmo inte edæ Wængonguī nē Tæi Piñængä ingä tōmëmængä inö tæ contabo adinque mīnitö ayæ ate botö öönædë boguimāncodë pömo acæminimpa.

⁶⁵ Ante apænecä eñente wædinque nē godongä nænængä pōni inongä piinte badinque, Eñente awædö, ante bai cædinque edæ nāmā weocoo wänä nænte,

—Wængongui ingampa mänömaï cæquiringää. Edæ tömengä nämä incæ babæ ante nê wënæ wënæ apæneca ïninqe idæwaa. Wacä tömengä ingantedö, Wënæ wënæ cæcä atabopa, ante nê ancæcäimpa, ante nõwo diqui diqui minämaï ingäimpa. Tömengä nämä Wængongui Wengä inte bai babæ ante nanö änewëninö ante do ëñëmini inte minitö, ⁶⁶ edæ æbänö ante pönëminii.

Ante añongä nê apænte änäni guiquënë,

—Nänö wænguinque änewengampa töö.

⁶⁷ Ante apænte äninque edæ pancadäniya Itota tömengä awinca towæ tänömöninque tæi tæi pänänitapa. Wadäni guiquënë tömengä ingante tamöninque,

⁶⁸ tömengä ingante,

—Bitö Codito imitawo. Æcänö bitö imite awëmö nê pänaa, ante Wængongui beyænque apænedinque apænebi ëñëmönii, ante badete togadänimpa.

Pegodo incæ, Dicæ abogaa, angampa

(Mäadoco 14.66-72; Odoca 22.56-62; Wäö 18.15-18, 25-27)

⁶⁹ Ayæ Pegodo guiquënë mänii yæipodë yacömöñäa contate ongöñongä onquiyängä nê cæcä iñömö tömengä weca ponte apænedinque,

—Mäningä Gadideabæ quëwëningä Itota tönö bitö guëa cægömitapa töö.

⁷⁰ Ante apæneyongä tömänäni nani ayömö Pegodo,

—Dicæ. Bitö änö ante æbänö ämii, ante dicæ ëñëmogaa.

⁷¹ Ante äninque Pegodo yademö gäänë tao gote ongongä adinque wacä onquiyängä wæätë godongämæ ongönäni inänite apænedinque,

—Mäningä adobai Itota Näatadeta quëwëningä tönö nê cægöningä ingä aedäni.

⁷² Ante apæneyongä Pegodo wæätë,

—Wængongui ëñëñongä botö näwangä ämo ëñëedäni. Ìngä onquiyängä nanö nê äningä ingante botö dicæ abogaa, angantapa.

⁷³ Ayæ wantæ ate mäniiñömö ongönäni Pegodo weca pöninque,

—Ìnæmpa Itota tömengä tedecä bai adode nê tedebi inte bitö tömengä miñä mini nê gocabo adobi imipa töö.

⁷⁴ Äñönäni edæ Pegodo wæätë, Wængongui ëñëñongä apænedinque botö nöingä ämopa, ante Wængongui ëmöwo ante babæ tedewëninque tömënanäni inänite,

—Mini nê angä ingante dicæ abogaa.

Mänömaï ante tæcæ änewëñongä edæ tawadiya dobæ petapa. ⁷⁵ Pe wædinque tömengä, Æ Itota nanö äninö bai impa, ante wæcantapa. Itota, “Tawadiya pedämaï iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguimi imipa,” angantapa. Ante Pegodo, Nõwo nanö pequinque do pecampa, ante wædinque oncodo taote edæ guingo imonte wædinque edæ Ca ca wægacäimpa.

Itota ingante Pidato weca ænte mäo gönönäni

(Mäadoco 15.1; Odoca 23.1-2; Wäö 18.28-32)

27 Ayæ nää bayonte, Wængongui qui, ante nê godönäni nänänäni tönö ood-eoidi inänite nê aadäni nani Picæncabo tönö apænte äninque edæ, Itota ingante wænongäimpa, ante godongämæ Ao angadänimpa. ² Äninque tömengä ingante yao ongonte goti winte äninque edæ odömänoidi beyä Oodeabæ awënë gobedönadodo Pidato ingante mäo gönönäni ængacäimpa.

Codaa wodi iimaï cædinque wængampa

³ Ayä, Itota ingante wængæïmpa, änäni ëñente wædinque Codaa tömengä ingante nê godöningä guiquënë, Æ tömengä nänö wænguinquemë cæboïnö ante pönëmogaa, ante guingo imonte wæcantapa. Ayä, Wængonguï qui, ante nê godönäni ñænänäni tönö nê aadäni nani Picæncabo adodö æncædänimpa, ante todëinta padatamö tömënäni nani pönontamö adodö pædæ godoncæte ante gocantapa.

⁴ Ayä tömënäni inänite,

—Inæmpa cæboo. Edæ Itota wënæ wënæ cædämaï iningä iñongante botö nê godönimo inte wiwa cæbo imo ante awædö.

Ante äñongante tömënäni guiquënë,

—Tömëmi wënæ wënæ cædimi inte wentamö bitö entawënö adinque mönitö ædö cæte wæquimönii. Tömëmi edæ nê cædimi inte edæ abaimipa töö.

⁵ Änäni wædinque edæ tiguitamö incæ Wængonguï tæiyä waëmö oncönë wo wæantodöningue Codaa oncodo tao godinque edæ nämä önömenca wëä æi goti guemencate dobæ wængacäïmpa.

⁶ Mäninta wo wæantodongä ate wædinque, Wængonguï qui, ante nê godönäni ñænänäni incæ tiguitamö yao yao ongonte æninque,

—Wepä näadintamö adinque Wængonguï Baa ancæcäïmpa, ante pönente wædinque mönö, Wængonguï qui, ante ædö cæte godonguimöö.

⁷ Ante godongämä pönencöningue tömënäni, Oodeoidi inämaï inäni wodido bacäïmpa, ante ömä nê dai bædongä eadiömæ incæ mänii tiguitamö godonte ængadänimpa. ⁸ Inique wepä näadintamö godonte nani ænimæ ante, Wepænguipo impa, ante nani pemönimæ iñömö ñöwo ganca impa. ⁹ Inique do iñömö Eedëmiya wodi Wængonguï beyä iimaï ante nänö apænegaïnö bai iinque batimpa. “Idægoidi, Tömengä beyä mänimopotamö godonte ængæïmpa, ante nani änimopotamö incæ todëinta tiguitamö padatamö æninque, ¹⁰ tömënäni Wængonguï botö imote nänö äninö bai ëñente cædinque edæ dai bædongä eadiömæ godonte ænänitapa,” ante Eedëmiya nänö angainö bai do iinque batimpa.

Pidato weca Itota ongongampa

(Mäadoco 15.2-5; Odoca 23.3-5; Wäö 18.33-38)

¹¹ Itota iñömö awënë gobedönadodo Pidato weca a ongöñongante awënë gobedönadodo iñömö tömengä ingante,

—Bitö oodeoidi Awënë Odeyebi imitawo.

Äñongante,

—Bitö tömëmi änö bai botö mänimodö imopa, Itota angantapa.

¹² Ayä, Wængonguï qui, ante nê godönäni ñænänäni tönö nê aadäni nani Picæncabo guiquënë Itota ingante äninque, Wënæ wënæ cæbipa töö, ante äñönäni tömengä edæ pæ wëëncä. ¹³ Ate wædinque Pidato wæætë,

—Bitö æpogadö wënæ wënæ cæbi imipa, ante nanguï änäni ëñänämaï inte bitö ædö cæte edæ pæ wëënebii.

¹⁴ Äñongante Itota iñömö tömënäni nani äninö ante adodeque ante apænedämaï ingä adinque awënë gobedönadodo wæætë, Quiëmë bai pæ wëëncä awædö, ante wængacäïmpa.

Itota wæncæcäimpa, änanipa

(Mäadoco 15.6-20; Odoco 23.13-25; Wäo 18.38-19.16)

¹⁵ Mäniimæ awënë gobedönadodo mäniinedë wadepo iñö wadepo iñö cöwë iïmai cædongäimpa. Oodeoidi ææmæ nani cæyedë gobedönadodo iñömö, Në tee mönete ongönäni inänite adinque minitö æcänö ingante ämini ñimpo cæbo goquingää, ante äñongä änanäni ëñëninque tömengä tömënäni nani äningä adocanque ingante ñimpo cæcä godongäimpa. ¹⁶ Mäniinedë adocanque wænæ wænæ nänö cædinö beyæ tee mönete a ongongampa, ante tömänäni do ëñëñönänimpa. Mäningä ëmowo Badabato inongäimpa. ¹⁷ Ìninque nanguï inäni godongämæ pönäni ate Pidato tömënäni inänite edæ,

—Æcänö ingante minitö beyæ ñimpo cæbo abæ tawænte gocä ænguïmini. Badabato ingante ñimpo cæbo gocä ænguïmini. Wæætë edæ Itota Codito mini äñongä ingante ñimpo cæbo gocä ænguïmini, angacäimpa.

¹⁸ Edæ do iñömö, Itota gomonga cæcä ate wædinque tömënäni tömengä ingante piinte adönänimpa. Mäniñö beyænque tömënäni Itota ingante bæi ongonte botö nempo ænte mämö pædæ pönönänitapa, ante Pidato do ëñengantapa.

¹⁹ Ayæ odömänoidi nani apænte anguimpaa ayæ ongöñongä Pidato nänöogængä iñömö wacä ingante da pönongä pöninque Pidato ingante nänöogængä beyæ apænecantapa. “Botö ñowoönæ möwocodë wiimöninque mäningä në nö cædongä beyæ nanguï wogæi wogæi cæwënente wæbopa cæbii. Bitö tömengä ingante gampodämaï inte gomö aquënë quëwëë, ämopa,” ante bitö nänöogængä angampa, angantapa.

²⁰ Angä ëñente wæyongä, Wængonguï quï, ante në godönäni ñænænäni tönö në aadäni nani Picæncabo nani äincabo guiquënë wadäni në godongämæ ongönäni inänite änanitapa. Minitö Pidato ingante iïmai äedäni. Badabato ingante ñimpo cæbi gocæ. Itota ingante wæætë ämi wænönäni wængæe, ante äedäni, änanitapa. Awënëidi incæ mänömaï änanäni ëñëninque godongämæ ongönäni Ao änanitapa.

²¹ Awënë Pidato iñömö tömënäni inänite äninque,

—Mënaa ongöna iñöñate minitö æcänö ingante ämini ñimpo cæbo goquingää.

Äñongante,

—Badabato ingante ämönipa.

²² Änanäni wædinque Pidato wæætë,

—Ìninque Itota Codito mini äñongä ingante æbänö cæquïmoo, ante ämini.

Äñongante tömänäni edæ,

—Awæ ñænquedimæ ämi cæte gönonte wænönäni wængæe töö.

²³ Änanäni ëñëninque Pidato ayæ,

—Ìñæmpa quïñö wænæ wænæ cæcantawo.

Äñongä tömënäni godömenque yedæ äninque adodö,

—Ämi awäa timpote wænönäni wængæe.

²⁴ Ante ancaa änewëñönäni Pidato iñömö, Tæcæ wæatedö wæætë änanäni inte tömënäni wænæ wænæ cædäni wæquï wæ, ante guïñente wædinque ayæ, Ædö cæte botö godömenque cæquïmoo, ante pönente wædinque edæ æpæ pi ñiñænte tömënäni ayönäni önompo mempodinque tömënäni inänite angantapa.

—Tömengä wənæ wənæ cædāmaī iñongante botō, Wə̀nongæ̀impa, ằnămaī imo inte tōmengä wəpæ năadāmaī imo aedāni. Wæætē mīnitō guiquēnē, Wə̀ncæcāimpa, ante nē ằnimīni inte edæ năate bacæmīnīmpa, ante adīnque botō mempobo aedāni.

²⁵ Angä ằñēnīnque tōmănăni Ao ằnīnque edæ,

—Mōni ằnīnō beyænque mōnitō incæ mōnitō wənăni incæ tōmengä wəpæ beyæ năate bai bacæmōnīmpa tōō.

²⁶ ằnăni ate awēnē gobedōnadodo Pidato tōmēnăni năni ằnīnō ante ằñente cædinque edæ Badabato ingante nīmpo cædinque tōmēnăni nempo pædæ godongă ằnănītapā. Wæætē edæ Itota ingante edæ Pidato angă ằmōntai badōimenca tæi tæi pănăni ate tōmengă ingante nænque quepote awăa năni gōnonguinque edæ da godongă ằnte godănītapā.

²⁷ Awēnē gobedōnadodo nănō wææ wănōnăni guiquēnē Itota ingante ằnte godinque awēnē gobedōnadodo oncōnē Podætodio năni ancōnē mangui guiyongă tontadoidi bacabo Itota weca godongămæ ằñete pōnănītapā. ²⁸ Pōnīnque tōmēnăni, Awēnē imi inte awēnē weocoo wēnacæbiīmpa, ante bai cædinque badete todīnque Itota weocoo gă tadongadinque wæætē opatawæ ằmoncoo pōnō da wēñadinque, ²⁹ daa mongăemenca bai ằnīnque que cædinque, Awēnē poganta wencacæbiīmpa, ante bai cædinque pōnō daga wencadănītapā. Ayæ cæwīpa ằnte mămō pædæ pōnonte ằnăni ằnīnque tōmengă tōmēmæmpoca pæ mangă adīnque tōmēnăni da guicapodinque tōmengă ingante,

—Badogaa, bitō oodeo awēnē odeyebi imipææ, ante badete togadănīmpa.

³⁰ Ayæ tōmengăa towæ towæ tănongadinque cæwīpa ằnīnque tæi tæi anca panadănītapā. ³¹ Ayæ iīnque badete todīnque tōmēnăni opatawæ ằmoncoo gă tadongadinque tōmengă nămă weocoo daga wēñadănītapā. Ayæ edæ tōmengă ingante awæ timpote wə̀noncæte ante tōō ằmænte ằnte tao măodăni gogacăīmpa.

Itota ingante awăa timpodăni wə̀ngampa

(Măadoco 15.21-32; Odoca 23.26-43; Wăö 19.17-27)

³² ằnte măo godinque tōmēnăni Tidēne quēwengă Timōnō ingante bee tēnīnque tōmengă ingante edæ, Bitō ægodōe, Itota ingante mōni timpoquīwæ ằnte mongænte goe, ằnăni mongænte gocantapā.

³³ Mănīi Itota ingante ằnte măo godinque Godogota năni ằñōmō mōnō tededō “Ocataīnō” iñōmō mănīñōmō pōnănītapā. ³⁴ Mănīñōmō pōnăni ate wadăni, Nantate beyæ becæcāīmpa, ante cædinque yowepæ biīnōmæ năni ằmæ tōnō moncapæ adoyōmō wempo cædēnīnque pædæ pōnō cəyōnăni tōmengă ōnonque yædæ bedīnque edæ Baa angantapā.

³⁵ Ayæ Itota ingante awæ nænquedimæ năni ằnte pōniwăa tōō godōnīnque pōnō timpodīnque wææ tiwadinque ængæ gantidēnănītapā. ằngæ gantidēnăni ate wægōñongă tōmēnăni wæætē tōmengă weocoo iñi ante, ằcănō quinca nō ta adīnque tōmengă mănīncoo æncæcāīmpa, ante wææntodōnīnque adocooque adocooque ằnănītapā. Mănōmaī cəyōnăni Wə̀ngongui beyæ năni apănegăinō bai iīnque cætīmpa. “Botō weocoo iñi ō ằnīnque tōmēnăni năni caboque wacă ingă wacă ingă nēnempodănītapā. Ayæ, ằcănō quinca nō ta adīnque tōmengă mănīncoo æncæcāīmpa, ante cædănītapā.” ³⁶ Tōmēnăni tæ contadinque tōmengă ingante wææ aadănītapā. ³⁷ Ayæ, Itota nē wə̀nguēnengă ingampa, ante quinante ằnănīi, ante edonque acăīmpa, ante cædinque tōmēnăni, “İngă Itota iñōmō oodeoidi Awēnē

Odeye inongä ingampa,” ante yewämöningue edæ awæmpaa tömengä ocaboca inö tee tinte wo cædänitapa.

³⁸ Ayæ wada në ö ænte quëwëniina inate adoyedë tömengä tönö adocanque tömëmæ inö adocanque dipæmæ inö godö timpote ængæ gantidëdäni wæ-gongadaimpa. ³⁹ Ayæ wodo pænta në godäni guiquënë Itota ingante godö wënæ wënæ ante badete todinque pica pica cædinque, ⁴⁰ tömengä ingante wapiticæ apænedinque,

—Bitö iñæmpa Wængongui tæiyæ waëmö oncö incæ bæ tate wo ëwëningue edæ mëönaa go adoönæque iñonte do mænönæcæ ämitawo. Mänömai cæcæ änimi inte bitö tömëmi edæ nämä incæ cæte quëwëmæwe. Bitö nö Wængongui Wëmi imi in- inque edæ o togæmpote o togæwate wææe, ämönipa töö.

⁴¹ Äñönäni edæ, Wængongui qui, ante në godönäni nænænäni guiquënë në odömönäni tönö ayæ oodeoidi inänite në aadäni näni Picæncabo tönö adobai iümai ante edæ badete todänitapa.

⁴² —Tömengä, Wadäni quëwencædänimpa, ante waa cæcantawoo. Nöwo iñæmpa ædö cæte nämä waa cæte quëwenguingää. Idægoidi awënë odeye ingampa diyæ ti wæænte goquingää. Edæ ti wæænte gocä adinque mönitö wæætë edæ, Næwangä impa, ante pönëmai wædö. ⁴³ Ayæ nämä ingantedö äninque tömengä edæ, Botö Wængongui Wëmo inömo imopa, ante angämææ. Tömengä, Wængongui cöwë pönö cæcæcäimpa, ante wede pönengä iñongante Wængongui wæætë tömengä ingante edæ waa acampa diyæ nimpö cæcä goquingää, ante badete todänitapa. ⁴⁴ Ayæ në ö æna guiquënë tömengä tönö godongämæ timpote wægöna ininque Itota ingante piinte adobai wënæ wënæ ante badete togadaimpa.

Itota wængampa

(*Mäadoco 15.33-41; Odoca 23.44-49; Wäö 19.28-30*)

⁴⁵ Tæcæbæcä pönö bayö tömämæ iñontobæ wëmö badinque ayæ ayaönäa wæi-ganca mä mämönte bai inimpa. ⁴⁶ Ayæ edæ ayaönäa wæiyonte Itota nangui pönö yedæ äninque, “Edii, Edii, nëma tabatäni,” äninque mönö tededö, “Botö Wængonguiñaa, botö Wængonguiñaa, ædö cæte botö imo ëmö cæte gobiyaa.”

⁴⁷ Ante wæcä ëñëningue godämæ ongönäni guiquënë,

—Æ. Ediya ingante aa pecä apa.

⁴⁸ Äñönäni adocanque do pogodo gote önætämö ænte pöninque biinömæ bai önömænque ænte aa bedöningue næænte, Cæwipaca pædæ æænömo becæcäimpa, ante cæyongä, ⁴⁹ wadäni guiquënë,

—Ee aquënë. Ediya edæ ponte wabänö cæcä quëwenguingä abaimpa, angadänimpa.

⁵⁰ Itota iñömö wæætë ogæ tededinque do wængacäimpa. ⁵¹ İninque edæ Wængongui oncö tæiyæ waëmoncönë weocoo odemö näni wææ wodöincoo adoyedë önönæca inö tæcæguedë pönö tænguimæ wææntapa. Ayæ goinque bayonte dica incæ tæ gämæntapa. ⁵² Ayæ wao wodido incæ wi ænote bayonte edæ Wængongui quinäni do wængainäni incæ pancadäniya näni ömæmöninque ⁵³ tömënäni wodido abæ tawænte godänitapa. Edæ nōwo iñömö, Itota näni ömæmongä ate tömënäni në näni ömæmöninäni inte Eedotadëe näni waëmö quëwëñömö ponte a ongönönäni nangui inäni agadänimpa.

⁵⁴ Mänii goinque do pö adinque ayæ, Æbänö cætimpa, ante tömänö adinque edæ tontado capitäo tönö wææ wänönäni tönö ancai guiñëninque,

—Nawangä impa. Ìngä ìñömö Wængonguï Wengä ingainö ante pönenguënë, angadänimpa.

⁵⁵ Do ìñömö Itota Gadideabæ quëwente põñongante onquiyänäni nanguï ìnäni tee empote põninque tömengä beyæ nê cædinäni inte ñowo adodäni adoyömö põ gongæninque põmö adänitapa. ⁵⁶ Mäadiya Mäagadadënë tönö wacä Mäadiya ìnatapa. Ìnä ìñömö Tantiago tönö Ootee badä ìnatapa. Ayæ Tebedeo wëna tömëna badä tönö wadäni adobaï Itota wæñongante gobæ agadänimpa.

Itota wodi baö ìni mao daga wënänipa

(Mäadoco 15.42-47; Odoco 23.50-56; Wäö 19.38-42)

⁵⁷ Ayæ gäwadecæ bayonte Ootee nê nanguï ëacä incæ Itota miñæ nê gocä do badingä inte Adimatea ìñömö pægaingä inte pongä ingantapa. ⁵⁸ Tömengä ìñömö ñowo Pidato weca godinque, Itota wodi baö ìni põnömi æmoe, angantapa. Pidato Ao äninque nê cædäni ìnänite, Tömengä baö ee amini æncæcäimpa, angantapa. ⁵⁹ Itota wodi baö ìni gämiyate pædæ wæænonte ænte godinque waëmö weocoo ninocoo näni ancoo wini wini caadinque, ⁶⁰ Ootee, Botö wodido baquimpa, ante dicamontaa nänö wodintatodë müintatodë mao guidö ñö cædinque daga wengantapa. Ayæ dicabo da pæñæ põnö tee mönodinque wadæ gogacäimpa. ⁶¹ Ìimai cæyongä Mäadiya Mäagadadënë tönö wacä Mäadiya tönö Itota wodido obo contate acönatapa.

Itota wodido ìñömö wææ wänönäni a ongönäni

⁶² Ayæ guëmanguïönæ bacæ cæpa, ante näni täno cæönæ ìnque cædäni ate ìimö ate, Wængonguï quï, ante nê godönäni ñænänäni tönö Paditeoidi guiquënë Pidato weca ponte ⁶³ tömengä ingante äninque,

—Awënë ëñëmi. Mäningä nê babæ äningä ìñömö tömengä müingä ìnedë apænedinque, Mëönaa go adoönæque ìñonte botö ñäni ömæmoncæboimpa, ante nänö äñinö ante põnente wæmönipa. ⁶⁴ Ayæ tömengä miñæ nê godinäni incæ tömengä baö ìni awëmö ö æmäinäni ante edæ wæmönipa. Ænäni ìnque tömënäni, “Dobæ ñäni ömæmongäimpa,” ante godömenque babæ änäni edæ wënæ wënæ babaimpa cæbii. Ñowo wææ wänönäni ìnänite ämi godinque tömënäni mäningä nänö wodintatodë tæëmö tee mönodinque mëönaa go adoönæque ganca wææ wänonte acædänimpa. Edæ wïi godömenque wënæ wënæ bacæimpa, ante cæcæbiimpa, ämönipa.

⁶⁵ Äñönäni Pidato wæætë,

—Bado, wææ wänönäni mä ongönänipa. Minitö tömënäni ìnänite ænte mäomini goyönäni minitö wæætë mini ëñëninö bai do cædinque tæëmö tee mönote cædäni.

⁶⁶ Angä ëñente godinque tæëmö mönodinque Itota nänö wodintatodë dai tee bædodänitapa. Ayæ, Awënë ëmowo adinque wi ænodämaï incædänimpa, ante dai bæyömö aquïnedë ongontoca da guidonte awënë ëmowo adimpaca yewæmonte bai bagatimpa. Ayæ wææ wänönäni ìnänite ænte mao gö cædäni wææ wänongadänimpa.

Itota do wæningä inte ñäni ömæmonte quëwengämpa

(Mäadoco 16.1-8; Odoco 24.1-12; Wäö 20.1-10)

28 Mänii guëmanguiönæ iinque go ate wacä tēmāna baquinque ñäö ba iinque Mäadiya Mäagadadēnā tönö wacä Mäadiya iñömö Itota wodido acæte ante gogadäimpa. ² Awënë Wængongui anquedo do wææ pöninque edæ dicabo wëä godö oo wi ænocantapa. Ayæ goinque nangui ocæ ocæ cætimpa. Anquedo iñömö dicaboga tæ contacantapa. ³ Tömengä awinca näinte cæ bai ëmönongä inte tömengä weocoo näämænta pöni ëmoncoo mongænte a ongongä. ⁴ Adinque edæ nē wææ wänönäni guiquënë ancai guiñente wædinque do do wäate bai badinque æmæwo wænte bai öñönänitapa. ⁵ Mänii onquiyæna pöñönte Wængongui anquedo iñömö,

—Guiñenämai ieda. Itota näni awäa timpodäni wæningä ingante minatö diqui diqui miminapa, ante edæ do ëñemopa. ⁶ Iñömö edæ dæ angampa. Tömengä nänö äninö bai cædinque do edæ ñäni ömæmöninque tao gocäimpa. Pö guite aeda. Iñtatodē nänö öñontatodē iñömö edæ öñontatoque impa. ⁷ Ayæ nē adimina inte edæ quingæ pogodo gote tömengä miñæ nē godinäni inänite gode ante apænedinque, “Itota dobæ ñäni ömæmongäimpa ataqueedäni, äeda.” Ayæ iñömö tömengä Gadideabæ täno godinque a ongöñongä minitö gote aedäni, ante minatö gode ante apænedä ëñeedäni. Bado, ämo ëñëminapa edæ.

⁸ Angä ëñëninque tömengä wodido abæ tawænte wadæ godinque tömëna, Ancai guiñente wæte todadö, äninque watapæ todinque Itota miñæ nē godinäni inänite gode ancæ pogodo godatapa. ⁹ Goyöna edæ Itota incæ iñontobæ mäo bee tēninque edæ, Minatö, angä ëñëninque edæ iñäna tömengä weca pöninque öñowaca ædæ wæante mö ongöwate, Wængongui Awënë imidö angüënë, ante watapæ apæneyöna, ¹⁰ Itota iñömö edæ,

—Guiñenämai ieda, angantapa. Ayæ, Minatö botö biwüidi inänite gode äninque iïmai äeda. Minitö Gadideabæ godinque botö imote acæminimpa, ante tömënäni inänite äeda, ante Itota angacäimpa.

Në wææ wänöninäni babæ ante apænedänipa

¹¹ Onquiyæna gode ancæ goyöna Itota wodido në wææ wänöninäni pancadäniya wæætē tömënäni näni quëwëñömö godinque, Wængongui qui, ante në godönäni ñænænäni inänite apænedinque, Iïmai cætimpa, ante tömänö ante apænedänitapa. ¹² Apænedäni ëñëninque edæ në godönäni ñænænäni guiquënë në aadäni näni Picæncabo tönö pönē cöninque godongämæ Ao äninque tontadoidi në wææ wänönäni iñönänite tiguitamö padatamö bacoo godöninque, ¹³ tömënäni inänite iïmai angadänimpa.

—Wadäni Itota wodi baö ante wæyönäni edæ minitö önonque, Mö cönömöni tömengä miñæ nē godinäni awëmö ponte ö ænänitapa, ante babæ apæneacæminimpa. ¹⁴ Ayæ mäninö äñömöni awënë gobedönadodo ëñëninque, Quimæ möwëminii, ante piingä adinque edæ mönitö wæætē wææ cædinque tömengä ingante ämöni ëñëninque tömengä pänämai ñimpo cæyongä minitö guiñente wädämai incæminimpa.

¹⁵ Äninque në godönäni ñænænäni iñömö në wææ wänöninäni inänite nangui tiguitamö godönäni ænänitapa. Mänintamö äninque awënëidi babæ näni äninö bai adodö ante apænedinque, Tömengä miñæ nē godäni ö ænänitapa, ante babæ wapiticæ apænegadänimpa. Iñinque tömënäni näni babæ apænedö ëñëninque edæ

oodeoidi gode ante tededinque godömenque ñöwo ganca ayä wapiticä ante tededänipa.

Itota, Apänecaē goedäni, angampa

(Mäadoco 16.14-18; Odoca 24.36-49; Wäö 20.19-23)

¹⁶ Önompo ämæmpoque go adodänique Itota miñä näni godincabo guiquënë mäni Itota nänö änö bai cædinque Gadideabæ godinque änanquidi æiyönäni ¹⁷ Itota a ongongä adinque tömengä weca ædæ wæante, Wængongui Awënë imidö anguënë, ante watapæ apäneyönäni pancadäniya guiquënë, Wabänö i, ante pönänamaï ingadänimpa. ¹⁸ Itota iñömö tömënäni weca pönömenque pöninque,

—Wængongui pönö cæcä beyænque botö iñömö öönädë Tæiyä Awënë inömo inte inguipoga adobai në Tæiyä Awënë badinque nämä tæi pñämo inte në ämo imopa. ¹⁹ Ante wædinque minitö guiquënë inguipoga tömämæ quëwënäni weca godinque, Itota miñä gocädänimpa, ante apänemini ëñente botö miñä në godäni bacädänimpa. Ayä mönö Mæmpo ëmöwo apänedinque, ayä Wængongui Wëmo iñömote botö ëmöwo apänedinque, ayä Wængongui Tæiyä Waëmö Önöwoca ëmöwo apänedinque minitö tömämæ quëwënäni inänite æpäne guidömini guicädänimpa. ²⁰ Ayä botö minitö iminite botö äninö ante, Tömänö ante adodö cæedäni, ante odömömini ëñente cæcädänimpa. Ayä botö edæ ñöwo incæ ayä inguipoga iinque baganca cöwë minitö tönö ongonte godongämæ cæcæboimpa. Näwangä inguïnö anguënë, ante Itota angacäimpa.

*Itota Codito ingantedö ante***Mäadoco***nänö watapæ ante yewæmongainta***Wäö önömæca ponte apæneçä ëñëñänipa***(Mäateo 3.1-12; Odoca 3.1-9, 15-17; Wäö 1.19-28)*

1 Ponguingä, ante nani Codito angaingä inongä inte Wængongui Wengä Itota ingantedö ante botö Mäadocobo watapæ ante yewæmömopa.

²Doyedë inömö Wængongui beyæ apænedinque, Codito ingante Wængongui iimai angäimpa, ante Itaiya wodi yewæmongacäimpa.

“Taadö bitö goquino waa wëwaquingä, ante bai cædinque botö, Botö beyæ në gode änogä ingante da godömo täno beyænte gocä ate bitö ayæ gocæbiimpa, ämopa.

³Önömæca inömö adocanque ogæ tedete aa pecæcäimpa.

Tömengä inömö, ‘Awënë nänö ponguinö ante minitö tee moncate bai cædinque, taadö töinö pinonte bai cædäni,’ ante aa pecä ëñengäimpa,”

⁴Ante Itaiya wodi nänö në angaingä inongä inte Wäö nïwo önömæca pöninque æpænë guidongantapa. Mänömai cædinque tömengä mäninömö pönäni inänite apænedinque, Minitö, Idæwaa wënæ wënæ cæte awædö, ante ocæ ëmænte Wængongui gämænö pöninque æpænë guicæminimpa. Mänömai cæmini adinque Wængongui minitö cædinö ante në panguënegä incæte pünämai inte nïmpo cæcæcäimpa. ⁵Ante Wäö mänömai apæneyongante Oodeabæ tömäo quëwënäni Eedotadëë quëwënäni tömänäni tömengä weca pö pö bee tente ëñëninque, Näwangä ämipa. Bitö ä bai ëñëñämai cæte quëwëmöni inte idæwaa wënæ wënæ cæte awædö, ante wædäni ëñëninque Wäö Oododänö æpænë guidongä guidänitapa.

⁶Wäö inömö weocoo ante cämeyo ocaguincoo nonte badöincoo mongænte adobai pacadeyænta ante æmontai badonte encadeyængäimpa. Tömengä cænguï ante nïwäique cænte tömengä bequi ante guinëmænque ade bete në quëwëngäimpa.

⁷Iimai ante apæneçä ëñëñänitapa. “Incayæ ate në Ponguingä guiquënë tömengä tæi ëmongä ewocadongä inte nanguï cæcä ingampa. Botö guiquënë wædämo pöni inömo inte tömengä awæncata eyepæ imopa godö nï cæquimoo. ⁸Botö önonque æpænë guidömo guiminipa. Tömengä wæætë da pönongä ate Wængongui Tæiyæ Waëmö Önöwoca pö guicä ewocacæminimpa,” ante Wäö mäninëdë apænegacäimpa.

Itota æpænë guicampa*(Mäateo 3.13-17; Odoca 3.21-22)*

⁹Ininque Gadideabæ Näatadeta quëwente Itota mäninëdë pongä adinque Wäö Oododänö æpænë tömengä ingante guidongä guicantapa. ¹⁰Ininque æpænë guidingä inte do ää ta gongæninque Itota æmö ayongä öönæ gä godonte bayö equemö wææ bai Wængongui Tæiyæ Waëmö Önöwoca incæ tömengäa wææ guicä acantapa. ¹¹Ayæ ëñëñongante, “Bitö botö Wëmi inömi inte në botö waadebi imipa, ate tobopa,” ante öönädë inö apæneçä ëñengacäimpa.

Itota incæ wënæ wënæ cæcæcäimpa, ante wënæ cæcampa

(Mäateo 4.1-11; Odoca 4.1-13)

¹² Mäniñedē Itota ingante Wængonguī Ōnōwoca incæ, Æibawē, āninqe ōnōmæca mæicā æicantapa. ¹³ Æi quēwēninqe wantæpiyæ coadenta ēönæ ōnōmæca quēwēñongante wënæ awënē Tatāna pōninqe, Wënæ wënæ cæcæcäimpa, ante Itota ingante cædongäimpa. Ayæ Itota mänōmaī babæidi quēwēñōmō quēwēñongante Wængonguī tōmengä anquedoidi inānite da pōnongä pōninqe tōmēnāni tōmengä beyæ pōnō waa cægadānimpa.

Itota Gadideabæ pōninqe tæcæ mä cæcampa

(Mäateo 4.12-17; Odoca 4.14-15)

¹⁴ Mänōmaī cæte ate ayæ awënē odeye Edode dobæ Wäö ingante tee mönecä ate mäniñedē Gadideabæ pōninqe Itota mä Wængonguī nänō waa pōni cægainō ante iūmaī ante apænecäimpa. ¹⁵ “Ponguingä, ante dodāni nāni angaiñedē botō Wængonguī Awënē Odeyebo inōmo inte ñōwo iūnque bayedē do pōmopa, ante apænebo ēñēedāni. Minitō wënæ wënæ mini cædimāmo wido cædinque waa pōni botō apænedinō mini ēñēnō ante pōñēedāni,” ante Itota angacäimpa.

Nē gæyæ dadōwēnāni inānite Itota aa pecampa

(Mäateo 4.18-22; Odoca 5.1-11)

¹⁶ Ayæ mäniī pōninqe Itota gäwapæ Gadideapæ yæwedeca gote cægonte ayongä Timōnō tōnō Æntade tōmengä tōniñacā inate acantapa. Nē gæyæ dadōwēna inōna inte tōmēna dicamōñæ æpænē wo guitodonte dadōwēna acantapa. ¹⁷ Tōmēna inate Itota,

—Ināna, botō miñæ edæ tee empo pōeda, āmopa. Nē dadonte ænte pōmīna inte botō weca pōñōmīnate botō pōnō cæbo ate minatō wæætē nē apænemīna badinque woadāni inānite nē ænte pōmīna bacæmīnaimpa, angantapa. ¹⁸ Angä ēñēninqe tōmēna dicamōñæ do emō cæte godinque Itota miñæ edæ tee empo wadæ godatapa.

¹⁹ Itota inōmō godōmenque gote ayongä Tebedeo wēna Tantiago tōnō Wäö adobaī wipodē dicamōñæ tadōmoncōna acantapa. ²⁰ Adinque Itota do, Botō miñæ pōeda, angä ēñēninqe tōmēna Ao āninqe wæmpocā ingante wæætē, Mæmpo ēñēmi, ānatapa. Bitō nempo wipo emō cæte gomōnapa, āninqe adodaque wæmpocā ingante emō cæte Itota miñæ wadæ godatapa.

Itota angä ēñente wënæ incæ tao gopa

(Odoca 4.31-37)

²¹ Ayæ tōmēnāni quēwēñōmō Capēnaōmō māmongä pōnānitapa. Oodeoidi guēmanguiōnæ bayonte Itota inōmō Wængonguī apænecā nāni ēñente yewæmongainta ate nāni odōmōincōnē do pō guidinque odōmonte apænecā ēñēnānitapa. ²² Ēñēñōnāni tōmengä nāmā tæi pīñāninqe nē angä inongä inte nō odōmonte apænecā ēñente wædinque tōmēnāni, Wadāni nē wææ odōmōnāni guiquēñē mänōmaī odōmonte apænedāni ēñēmongaa. Itotaque nāmā nē ēñente entawēnongä inte nō pōni odōmonte apænecā ēñēmōnipa, ante wädānitapa. ²³ Ayæ wënæ wentamō ewocacā inte nē quēwengä mäniñedē tōmēnāni odōmōincōnē a ongōninqe inōntobæ yedæ ante apænecantapa.

²⁴—Bitō Itota Näatadeta quēwēnīmi inte quīnante mōnatō weca pōmii. Mōnatō īmōnate edæ æmæwo wido cæcæte ante wabānō pōmitawo. Bitō æmōmidō īmii, ante botō do atabopa. Bitō Wængonguī Tæiyæ Waēmō Wēmi inōmi īmipa, ante edæ do ēñēmopa.

²⁵Ante tedeyongante Itota tōmengā ingante wææ āninque,

—Apocænē quēwenguēnē tedewēē. Waocā baōnē quēwēnōmi inte edæ tao gobāwe.

²⁶Angā ēñēninque wēnæ nē wentamō ēwocacā īñōmō waocā ingante quidi quidi māo tæ gotodō go wææñongante, Yæ yæ, āninque dobæ tao gotapa.

²⁷Itota angā wēnæ tao gocā adinque tōmānāni guīñente wædinque nāni caboque wæatedō wæætē tededinque,

—Īngā īñōmō quīnō bāi ante cæcā. Tōmengā nē angā īnongā inte edæ mā pōni odōmonte apænecampa. Edæ wēnæidi nē wentamō ēwocadāni īnānite tōmengā angā ēñente cædānipa, ante awædō.

²⁸Ante pōnente wædinque tōmēnāni, Itota mānōmai cæcampa, ante tededinque Gadideabæ tōmāo quēwēnāni īnānite māo gode ā gode ā cædāni do ēñengadānimpa.

Pegodo nānōogæ wāānā ingante Itota cæcā gancaæ bacā

(Māateo 8.14-15; Odoca 4.38-39)

²⁹Mānīi Itota oodeoidi odōmōincōnē ongōninque īinque odōmonte apænecā ate tōmēnāni tao godinque Tantiago tōnō Wāō mīñæ godinque Timōnō tōnō Æntade oncōnē go guidānitapa. ³⁰Go guiyōnānite wadāni, Timōnō nānōogængā wāānā daicawo gawænte mōimoga oñongampa, ānāni. ³¹Ēñente wædinque Itota tōmengā weca go gongæninque pædæ wææmpote bāi ongonte tōō æmængā ate tōmengā ængæ ganticantapa. Ayæ gancaæ badinque tōmengā wæætē tōmēnāni beyæ cæcantapa.

Daicawo gawæñāni īnānite Itota cæcā waa badānipa

(Māateo 8.16-17; Odoca 4.40-41)

³²Mānīōnæ gāwadecæ pōnī nænque wēmō bayō wadāni daicawo gawæñāni īnānite wēnæ inte quēwēnāni īnānite tōmānāni īnānite Itota weca ænte pōnānitapa.

³³Ayæ mānīñōmō quēwēnāni tōmānāni adoyōmō pōninque odemō goto gongæñānitapa. ³⁴Ayæ quīēmē beyæ wēnæ wēnæ inte wædāni adinque Itota nanguī īnāni īnānite godō cæcā waa badānitapa. Ayæ wēnæidi nanguī īnāni īnānite wido cædinque Itota, Botō æbodō īmoo, ante nē adimini inte tededāmai īmæwedāni, ante tōmēnāni īnānite wææ angacāimpa.

Itota oodeoidi odōmōincōnē go guidīnque apænecampa

(Odoca 4.42-44)

³⁵Ayæ tæcæ oque pōnente wēmō īñonte ængæ gantidinque Itota oncodō tao gote gomonga önōmæca godinque Wængonguī ingante apænecantapa. ³⁶Apæneyongante Timōnōidi, Ædōnō gocāi, ante tee empo tee empo gote, ³⁷adinque,

—Dæ āmi wædinque tōmānāni bitō īmite ante diqui diqui mīnānipa cæbii.

³⁸Ante āñōnānite Itota wæætē,

—Mōnō wayōmō gocāimpa. Eyequei nāni quēwēñōmō nāni quēwēñōmō māo botō apænebo ēñencædānimpa, ante cæcæte ante tate pontabopa.

³⁹ Ante nē āningā inte Gadideabæ tōmāo godinque oodeoidi odömöincönē go guii go guii cædinque Wængongui nānō apānedō ante Itota apānecā ēñengadānimpa. Ayæ wēnæidi inānite wido cæcā gogadānimpa.

Nē baadingā ingante Itota wadæ caacampa

(Mäateo 8.1-4; Odoca 5.12-16)

⁴⁰ Ayæ wacā cōwē baate ēñawengā inongā inte Itota weca ponte da guicapodinique,

—Bitō Ao āmi inte wadæ caabi ininque botō do waintai baabaīmopa.

⁴¹ Āñongante Itota tōmengā tōnō guēa wæwente bai nanguī pōnengā inte pædæ wæampo gampo caadinque,

—Ao āmopa. Bitō waintai baacæbiimpa.

⁴² Angā ininque nōmāintai nānō ēñadintai dæ baadinque tōmengā waintai edæ do baacantapa. ⁴³ Itota edæ tōmengā ingante do da godōninque nanguī angantapa.

⁴⁴ —Ēñēmi. Botō æbānō cæboo, ante edæ wadāni inānite māo apānedāmai imāwe. Wæætē, Nāwangā impa, ante acædānimpa, ante cædinque bitō, Wængongui qui, ante nē godongā weca tōingā godinque waintai bitō baadintai odömōmi ædæmō acæcāimpa. Ayæ Mōitee wodi wææ ante nānō angaincoo bai ænte pōninque bitō waintai bitō baadi beyæ ante edæ, Wængongui qui, āninque nē godongā ingante pædæ godōmi æncæcāimpa, ante Itota nē baadingā ingante nanguī angantapa.

⁴⁵ Angā incæte nē baadingā wæætē wadæ godinque ēñēnāmai inte gode ā gode ā cædinque edæ, Itota wadæ caacā waintai baaboī aedāni, ante māo tedecā ēñēnānitapa. Mānōmai ēñēnāmai cæcā beyænque Itota, Tōmēnāni weca nōwo ædō cæte edonque goquimoo, ante wædinque nānēnē gote önōmæca gomonga cægongan-tapa. Incæte tōmengā weca æmænō quēwēnāni æmænō quēwēnāni cōwē pō pō cægadānimpa.

Nē cōmāingā ingante Itota angā dao dao gocampa

(Mäateo 9.1-8; Odoca 5.17-26)

2 Ayæ tæōnæ quēwēninque ocæ ēmænte Capēnaōmō pongā adinque wadāni, Itota oncōnē ponte ongongampa. ² Ante tededāni wædinque nanguī ināni acæ pōnāni oncōnē eyede pōni guiidinque odemō incæ tōmāo wææ ongōnānitapa. Mānōmai tōmāo goto ongōnāni inānite tōmengā Wængongui nānō apānedō ante apānecā. ³ Ēñēñōnāni wadāni tōnō godongāmæ pōninque mengāa go mengāa ināni incæ cōmāingā nānō möimpataa æmætæ æmætæ bæi ongonte næante pōnānitapa.

⁴ Ponte ayōnāni wadāni Itota weca eyede pōni goto ongōnāni adinque nē ænte māmō pōnināni iñōmō, Ædō cæte guiquii. Ante wædinque oncōmāa inō æidāmæ mæi æidinque Itota önōnæca inō epæ cædāni ompite gongæñō tōmēnāni cōmāingā möimpataa bæi ongōninque tōmengā ingante Itota weca edæ pædæ wæænōnāni.

⁵ Wæænte ongongā adinque, Tōmēnāni æbānō wede pōnente cædānipa, ante adinque Itota cōmāingā ingante,

—Botō wēmi wædāmai iē. Wēnæ wēnæ bitō cædimāmo ante bitō nōwo nīmpo cæte quēwencæbiimpa.

⁶ Ante apānecā ēñēninque nē wææ odömōnāni guiquēnē pancadāniya godāmæ tæ contate ongōninque nāmāneque pōnente tededinque, ⁷ “Quimæ ānewēē. Īngā iñōmō Wængongui ingampa diyæ mānōmai cæquingāa. Edæ babæ ancædō. Waomō

wənæ wənæ mōnō cædimāmo ante Wængonguinque nē ñimpo cæcä ingampa.”

⁸ Ante mīmōnoque pōnēñōnāni Itota tōmēnāni nāni pōnēwēnō ante ònōwēnenque do ēñente bai pōnēninque edæ,

—Mīnitō quīmæ mǎnōmāinō ante pōnēwēmīni.

⁹ “Botō nē cōmāingā nānō wənæ wənæ cædimāmo ante ñimpo cæbo quēwencæcäimpa,” ante botō Wængonguī bai āmo ēñēninque mīnitō guiquēnē, Wængonguī ingampa diyæ mǎnōmaī cæquingāā, ante pōnēmīnīpa. Wæætē edæ, “Ængæ gantidīnque mōimpata æninque dao dao gocæcäimpa,” ante botō Wængonguī bai āmo īninque mīnitō adobaī, Wængonguī ingampa diyæ mǎnōmaī cæquingāā, ante pōnēmīni īmāimīnīpa, ante awædō. Īñempa mǎnōmāinō ante pōnēmīni īninque mīnitō edæ æbānō cæquēnēmo īmo āmīni. ¹⁰ Incæte botō Waobo ēñagaīmo inte inguipoga quēwēninque waomīni mīni wənæ wənæ cædimāmo ante nē āmo inte ñimpo cæbopa, ante mīnitō edæ ēñencæmīnīmpa, ante botō īmaī cæbopa.

Āninque edæ nē cōmāingā ingante edæ,

¹¹ —Bitō īmite āmo ēñē. Ængæ gantidīnque bitō mōimpata topo cæte æninque edæ tōmēmi oncōnē næænte goe.

¹² Angā ēñēninque cōmāingā īningā incæ edæ tōmānāni ayōnāni ængæ gantidīnque mōimpata topo cæte nææ nææ tao gocä adānitapa. Dao dao gocä adīnque tōmēnāni, Æbānō cæcäi, ante ēñēnāmaī inte guīñente wædinque,

—Wēēnēdē mǎnōmaī cædāni atamōniyaa. Nōwo īñōmō mā pōni cæcä amōnīpa, ante pōnēninque, Wængonguī bitō ñāō ēmōmi inte waa pōni cæbi amōnīpa, ante watapæ apænegadānīmpa.

Debii ingante Itota angä tee empote gocampa

(Mäateo 9.9-13; Odoca 5.27-32)

¹³ Itota wæætē adodō gāwapæ wedeca gocantapa. Ayæ nanguī īnāni adoyōmō pō pō cædāni adīnque tōmengä tōmēnāni īnānite odōmonte apæñecä ēñēnānitapa.

¹⁴ Ayæ godōmenque cægonte ayongä Adepeo wengä Debii īñōmō, Odōmāno awēnē quī bacæimpa, ante godonte æinta nāni æincōnē awēnē beyæ æncæte ante ongongä adīnque Itota tōmengä ingante,

—Botō mīñæ pōe.

Angä ēñēninque Debii edæ ængæ gantidīnque tōmengä mīñæ wadæ edæ gocantapa.

¹⁵ Ayæ ate Itotaidi Debii oncōnē pō guīte cængōñōnāni odōmāno awēnē beyæ nē æwēnāni tōnō nē ēñēnāmaī cædāni tōnō nanguī īnāni adoyōmō pō guīte godongāmæ cænānitapa. Edæ tæiyænāni tōmengä mīñæ nē godāni īnōnānīmpa.

¹⁶ Paditeoidi īnōnāni inte nē odōmōnāni guiquēnē ponte ayōnāni nē ēñēnāmaī īnāni tōnō awēnē beyæ nē æwēnāni tōnō Itota godongāmæ cængä adīnque tōmēnāni tōmengä mīñæ nē godāni īnānite ānānitapa.

—Odōmāno awēnē beyæ nē æwēnāni tōnō wadāni nē ēñēnāmaī cædāni tōnō Itota quīmæ godongāmæ cæwengāā.

¹⁷ Āñōnāni Itota wæætē tōmēnāni īnānite,

—Nē waa ingä guiquēnē, Cæbi waa baboe, ānāmaī ingampa. Nē wənæ wənæ ingä guiquēnē dotodo ingante do, Cæbi waa baboe, ante aa pecampa. Pancadāniya, Nāmā incæ nō entawēmo īmopa, ante nē ānāni īnānite adīnque botō nē dotodo bai adobaī

inömo inte tömənäni inänite aa pedämaï incæboimpa. Wadäni guiquënë, Nämä wənæ wənæ cæbo imopa, ante nē änäni guiquënë, Wængonguï gämænö poncädän-
impa, ante botö tömənäni inänite aa pecæ pontabopa, ante Itota apænecäïmpa.

Ee ate cænämaï ingäïmpa, ante nē änäni

(Mäateo 9.14-17; Odoca 5.33-39)

¹⁸ Wäo miñæ nē godäni tönö Paditeoidi tönö mäniñedē Wængonguï beyæ ante ee ate cænämaï inönänimpa. Ìninqe wadäni Itota weca pöninqe änänitapa.

—Wäo miñæ nē godäni tönö Paditeoidi miñæ nē godäni tönö tömənänique, Wængonguï beyæ, ante ee ate cænämaï inänipa. Bitö miñæ nē godäni guiquënë quïnante Wængonguï beyæ ante cädämaï inäni inte do cænäni.

¹⁹ Änäni ëñëninque Itota wæætē,

—Onguïñängä nē monguingä nänö wente ænte nē pönäni bai inönäni inte botö miñæ nē godäni inömo ædö cæte wæwente bai cænämaï inguinäni. Edæ botö tönö watapæ quëwənäni inte tömənäni ædö cæte wæwente bai cænämaï inguinäni.

²⁰ Wæætē ayæ ate guiquënë, Monguingä, näni nē ängongä bai inömete wadäni ponte botö imote bæi ongöninqe ö ænte gocädänimpa. Mänömaï cädäni ate botö miñæ nē godäni inömo mäniñedē ate wæætē cænämaï inte wæcädänimpa, ante apæned-
inque Itota godömenque iïmaï ante apænecäïmpa.

²¹ “Wacä dicæ miincoo æninque pedæncöoga pönö tadömonguingäa. Mänömaï cæcä ininqe edæ miincoo inca dobæ gäänē tamonte guipite ate godömenque wänä tente baquënë. Minitö, Awente bai cænämaï inte waa quëwengäïmpa, ante mïni änewönö guiquënë pedæncöo bai inte ëwenguïne ënepa. Codito nempo wat-
apæ quëwengäïmpa, ante botö apænedö guiquënë miincoo bai inte quëwenguïne ënepa. Ìninqe ëwenguïne tönö quëwenguïne ædö cæte adoyömö ëñente cæquïi.

²² Ayæ adobäi yowepæ biïnömæ mïimæ æninque waocä ædö cæte picæ æmonta-
taicadedē godö pe nïñänguingäa. Edæ picæ æmontaicededē pe nïñängä ininqe yedæ ææninqe ætæwo goquïnö anguënë. Wæætē edæ æmontai mïincadedē pe nïñante ate yedæ ææninqe tæi æbænämaï ee ongonuï apa quëwëmïni,” ante Itota apænecäïmpa.

Guëmanguïönæ inönte tömëmö tä pete ænänipa

(Mäateo 12.1-8; Odoca 6.1-5)

²³ Ayæ ate guëmanguïönæ inönte Itota tömëmoncodē tæcæguedencodē gocan-
tapa. Goyongä tömengä miñæ nē godäni tömëmö inca tæcæ tä pe tä pe ænte idömæ
godäni. ²⁴ Adinqe Paditeoidi guiquënë Itota ingante æninque,

—Bitö miñæ nē godäni æbänö cädänii, ante cöwä aquënë. Ìñæmpa, Guëman-
guïönæ inönte mäninö bai cädämaï iedäni, ante dodäni näni wææ angainö ante
ëñënämaï inte iïnäni ëñënämaï inte quimæ cädänii.

²⁵ Ante pïñönänite Itota,

—Docä Dabii wodi tömengä nänö nē ëmiñænäni tönö ömæpodäni pönï inte
gæwænte wædinque æbänö cægädänii, ante yewæmonte öñö inca mïnitö inæmpa
adämaï inte ämïni awædö. ²⁶ Wængonguï quï, ante nē godönänique cænguï impa,
ante wææ näni angainö bai cædinque dodäni päö, Wængonguï quï, ante nönca
nönca cädönänimpa. Incæte Abiatade wodi nē godongä nænängä pönï inongä nänö
godöñedē mäniñedē Dabii wodi Wængonguï oncönē go guïdinque mäniï päö do

ænte cæninque tōmengä miñæ nē godāni inānite godōmenque godongä cænānitapa, ante yewæmonte öñö apa ānewēmīni.

²⁷ Ante apænedinque Itota ayæ,

—Wængonguī quīnante, Guēmanguiönæ, ante badongacäi, ante pönēmīni. Guëmancædānīmpa, ante cædinque Wængonguī waomō beyænque ante, Mīnitō guëmanguiönæ, ante badongacäīmpa, ante pönenguënēmīni imīnīpa. Ædānidō māniönæ iñonte cædāmaī inānīi, ante pönēninque Wængonguī dicæ māniönæ beyænque ante waodāni inānite badongantawogaa. Ædō cæte mǎnōmainō ante pönēwēmīni. ²⁸ Inīnque botō Waobo nē ēñagāimo iñōmō Tæiyæ Awēnē inōmo inte edæ guëmanguiönæ Awēnē inōmo imopa. Ayæ, Guëmanguiönæ iñonte edæ æbānō cæquīi, ante adobo nē Ämo ingāimo imopa, ante Itota apænegacäīmpa.

Ni cōmampoingä

(Mäateo 12.9-14; Odoca 6.6-11)

3 Iñcayæ ate Itota wæætē oodeoidi Wængonguī apænecä nāni ēñente yewæmon-gainta ate nāni odömōincönē go guīcantapa. Māniñōmō onguīñængä ni cōmampote wædongä inte a ongongantapa. ² Māniñedē Paditeoidi pancadāniya, Itota wapiticæ cæcä inīnque mōnō wæætē piinte angæīmpa, ante nē ānewēnāni inte cædōnānīmpa. Nōwo iñōmō tōmēnāni, Guëmanguiönæ i incæte Itota ni cōmampoingä ingante, Waa bacæcäīmpa, ante cæcä inīnque mōnō māo piinte angæīmpa, ante babæ cæcæte ante cōwä adānitapa. ³ Ante cōwä ayōnāni ni cōmampoingä ingante Itota,

—Bitō ængæ gantidīnque tæcæguedē pō næ gongæe.

⁴ Äninque wæætē nē piinte ancædāni inānite äninque,

—Guëmanguiönæ iñonte mōnō æbānō cæquënēmō imōö, ante wææ angatīi. Mōnō edæ waa cæquënēmō imōmpa, ante pönēmīnitawo. Wæætē edæ, Wēnæ wēnæ cæquënēmō imōmpa, ante pönēmīnitawo. Quëwencædānīmpa, ante mōnō waa cæquënēmō imōmpa, ante pönēmīnitawo. Wæætē, Wæncædānīmpa, ante mōnō wænonguënēmō imōmpa, ante pönēmīnitawo. Mānōmaī ante Itota angä inīnque tōmēnāni edæ pæ wēenedānitapa. ⁵ Adīnque tōmengä ænguī badīnque tōmēnāni inānite æmætæ gomō æmætæ gomō adīnque edæ, Mīmō ömædēināni incædō, ante wædinque ni cōmampoingä ingante,

—Pædæ pompobi, angä ēñēninque pædæ pompodīnque nē cōmampodīngä incæ ædämō waa empocä bapocantapa. ⁶ Adīnque edæ Paditeoidi guīquēnē wadæ tao godīnque Edodeidi tōnō bee tēninque, Mōnō æbānō cæte Itota ingante wænōmō wænguingää, ante godongämæ pönēninque tedegadānīmpa.

Gäwapæ wedeca nanguī ināni pōnānīpa

⁷ Itota iñōmō tōmengä nānō nē emīñænāni tōnō wadæ tao godīnque gäwapæ wedeca godāni adīnque Gadīdeabæ quëwēnāni nanguī ināni tee empote godānitapa. ⁸ Inīnque wadāni Oodeabæ, Eedotadē, Idōmeabæ, Oododānō æmämāa, Tido eyequei, Tidōö eyequei māniñōmō quëwente tededīnque, Itota mānōmaī cæcampa, ante tededāni ēñente wædinque bacoo ināni māniōmæ tōmāo quëwēnāni inte tōmengä weca pōnānitapa. ⁹ Adīnque Itota, Goto gongænāni wæcæ wæ, ante pönēninque tōmengä miñæ cōwē nē godāni inānite, Wipo ænte pōmīni ate botō wipodē wāi wocænte owocæboīmpa, angantapa. ¹⁰ Wēēnē iñōmō, Itota nanguī ināni inānite

gampocä waa badänipa, ante nē adināni inte tömēnāni nōwo, Mönö gampo cæte waa bacäimpa, ante cædinque goto gongænāni wædinque mänömainö ante änongäimpa.

¹¹ Ayä Itota ingante adinque wēnæidi nē wentamö ewocadāni incæ tömengä önöwa gäänē ædæ wææninque,

—Bitö Wængonguī Wēmi inōmi imipa töö, ante Yæ änānitapa. ¹² Eñente wædinque Itota wæætē, Botö æbodö imoo, ante cōwē änāmaī inguēnē quēwēmīni, angacäimpa.

Itota angä ate dote ganca ināni nē gode änāni badänipa

(Mäateo 10.1-4; Odoca 6.12-16)

¹³ Ayä änanquidi æidinque Itota, Ināni inānite ämo poncædänimpa, ante aa pecä tömengä weca pönānitapa. ¹⁴ Pönāni ate tömengä dote ganca ināni mänimpodāni inānite, Minitö botö miñæ quēwēñöminite botö wadāni weca da godömo gote apænemīni eñencædänimpa, äninque, Botö beyä nē gode ämini incæminimpa, angacäimpa. ¹⁵ Ayä pönö apænēbo eñēninque minitö tæi emömini inte wēnæidi inānite nē ämini badinque wido cæcæminimpa. ¹⁶ Tömengä dote ganca nänö apænte ænāni inōmō iimāi emönönänimpa. Tānocä Timönö emongä incæte Itota wawo Pegodo pemongacäimpa. ¹⁷ Tebedeo wodi wēna Tantiago tönö Wäö nāna caya nē yedæ tededa ina adinque Itota, “Detæbo nänömoda bai inapa,” ante, Mæmæ beyä, ante Boänede pemongacäimpa. ¹⁸ Ayä Æntade, Pedipe tönö Batodömēē, Mäateo tönö Tōmato, Adepeo wengä Tantiago tönö Tadeo inānitapa. Ayä, Mönö omæ ingäimpa, ante nanguī cædongä inte wacä Timönö ingantapa. ¹⁹ Ayä Itota ingante odömönte nē godonguingä Codaa Icadiote nāni änongä ingacäimpa. Mänimpodāni inānite Itota angä nē gode änāni bagadänimpa.

Wēnæ tönö cæcä imaingampa, ante wapiticä änānipa

(Mäateo 12.22-32; Odoca 11.14-23, 12.10)

²⁰ Ayä ate Itota oncönē pongacäimpa. Pongä adinque bacoo ināni wæætē pö pö goto gongænāni adinque wadāni guiquēnē, Itotaidi quiodö cænguīnāni, ante wædönänimpa. ²¹ Ayä, Quimæ. Ocai edæ omædæcacä pönente bai cæcämææ, ante pönente tededönänimpa. Mänömainö ante tededāni eñēninque Itota guidēnāni guiquēnē tömengä ingante bæi ongonte æncæte ante wadæ pönänimpa.

²² Ayä nē wææ odömönāni guiquēnē Eedotadēē quēwente pöninque, “Inæmpa wēnæ awēnē Beedeboo tönö quēwengä inte Itota mäningä tönö cædinque wēnæidi inānite wido cæcä imaingampa,” ante tedewēnāni.

²³ Eñente wædinque Itota aa pecä pönāni ate, “Tatāna mini änongä inōmō nāmā incæ ædö cæte wido cæquingä, ante eñencæminimpa, ante botö, Inguipoga æbänö cædāni, ante odömömo aedāni. ²⁴ Awēnē odeye nempo quēwēnāni inōmō piināni badinque näemæ wæætedö wæætē cædāni ininque awēnē odeye nänö omædepote wæquinque tömēnāni nāmā ewente cædänipa. ²⁵ Ayä adocönē owocabo incæ adoyömö godongämæ quēwēnināni incæ näemæ wæætedö wæætē cædāni ininque tömēnāni oncö woquinque näwæ gobainānipa. ²⁶ Ayä Tatāna nempo quēwēnāni inōmō edæ näemæ piinte badinque wæætedö wæætē cædinque tömengä ingante wido cædāni ininque Tatāna dicæ tömēnāni awēnē imaingä,” ante Itota odömönte apænecantapa.

²⁷ Ayä, “Në täi piñængä ingante wii goto wīninqe waocä ædö cæte tömengä oncönë guiite mäincoo ö ænguingää. Edæ në äcä ingante bæi ongonte goto winte ate pö guiite ö ænani bai botö iñömö wænæ inte në bæi ongonte wido cæbo imopa,” angantapa.

²⁸ Ayä, “Nawangä apænebo ëñeedäni, angantapa. Mini waocabo wænæ wænæ cæmini incæ wadäni inänite godö babæ änewëmini incæte edæ Wængongui wæætë tömänö ante pönö ñimpo cæcä beyænque quëwencæminimpa. ²⁹ Wæætë Wængongui Tæiyä Waëmö Önöwoca ingante waocä godö babæ ante wænæ wænæ apænecä iñinque tömengä æmäwo wentamö mongængä bagaingä iñinque cöwë wantæpiyæ wentamö mongæncæcäimpa. Mänömaï beyä Wængongui ñöwopämo iñonte ñimpo cædämaï inte iñincayä pömämo iñonte adobaï ñimpo cædämaï inte cöwë pancæcäimpa,” ante Itota apænecäcäimpa.

³⁰ Äninqe, Minitö botö imote, Bitö wænæ në wentamö ewocäcä tönö quëwente cæbäimipa, äminitawoo. Iñæmpa, Wængongui Tæiyä Waëmö Önöwoca tönö quëwente cæbo apa änewëminii, ante Itota apænecäcäimpa.

Itota badä tönö tömengä biwiidi

(Mäateo 12.46-50; Odoca 8.19-21)

³¹ Ayä Itota wäänä tömengä biwiidi tönö mänii näni ponque pö do pöninqe yabæque ayä ongöninqe, Guii äñete tae. ³² Änani ëñente äñecæte ante ponte apænecä ëñëninque wadäni Itota weca contate ongönäni Itota ingante wæætë apænedinque,

—Bitö badä bitö biwiidi tönö bitö imite ante oncodo ponte yabæque ongönänipa cæbii.

³³ Ante äñönänite,

—Botö badä ædänö inää ante ämoo, ante pönëmini. Ayä botö biwiidi ædänidö inänii ante ämoo, ante pönëmini.

³⁴ Äninqe godämæ contate ongönäni inänite adinque,

—Iñäni iñömö edæ botö badäidi botö biwiidi inönäni inänipa, ante mänömainö ämo abaïminipa. ³⁵ Edæ Wængongui nänö änö bai ëñente æcänö cæte quëwëna mäningä botö biwi ingampa. Mäningä botö biwinque ingampa. Mäninä botö badä inampa, ämo abaïminipa, ante Itota apænecäcäimpa.

Waocä nänö quiyadö ante odömonte apænecampa

(Mäateo 13.1-9; Odoca 8.4-8)

4 Wæætë gäwapæ yæwedeca gote odömoncæ cæyongä nangui inäni tömäo goto ponte ongönäni adinque Itota wipodë go guiite tä contate wäi wocænte owoyongä tömënanäni ayä gäwapæ yæwedecaque ömaaque ongönänitapa. ² Iñinque tömënanäni inänite nangui pönö odömöninqe Itota, Wængongui Awënë nempo quëwëninque æbänö cæquii, ante ëñencæminimpa, ante botö imæca quëwënanäni näni cæinö ante odömonte apænebo ëñeedäni.

Äninqe iïmaï ante odömonte apænecä ëñengadänimpa. ³ “Apænebo ëñeedäni. Waocä në quiyadongä iñömö quiyacæ gocampa. ⁴ Gote quiyayongä pancamonga taadö iñömö eyepote wææmompä. Taadö wæænte eyepodimö öñöñonte ayamöidi pöninqe dobæ ade cænänipa. ⁵ Pancamonga guiquënë dicamontaa onguipoi woyedömö iñömö eyepote wææmpä. Onguipoi woyedömö öñömö inte pæquinä-

maï quingæ tā bocate pædinque æmonga æipa. ⁶ Ìnque oguimento yæyæmë guiwadāmaï inte cõne bawadāmaï iñonte nænque tì nāwāñō wānā cacadinque edæ guingo icate nāñe wæmpa. ⁷ Pancamonga guiquënë ömentacodë nānō eyepodimō iñömō pæquinämaï tā bocate gā æiyonte ömentacoo pō incootonque ganta cæca ate nāñe wæmpa. Wampo incapa pæquii. ⁸ Waëmonguipoga quiyadimō guiquënë tā bocate waa pædinque tōmëmō nanguï pōni godömenque incapa. Pancawæncaa edæ todëinta ganca, pancawæncaa teitenta ganca, pancawæncaa tiëë ganca mänimpomō incapa. Quiyacā nānō quiyadō ante edæ botō mäninque ante apænebopa.”

⁹ Mänömaï impa, ante iinque apænebopa. Æamonca ongonte edæ ëñeedāni, ante Itota apænegacäimpa.

Önömoncaque ëñente pönenämaï inänipa, ante

(Mäateo 13.10-17; Odoca 8.9-10)

¹⁰ Ayæ ate nanguï ongöninäni dæ godāni ate Itotaidi adodānique ongöñönāni edæ, Dote, ante nāni gocabo tönō wadāni tōmengä miñæ godāni tönō tōmengä weca ponte änänitapa. Itota ëñëmi. Bitō mäninō ante apænedinque æbānō ante odömoncæte ante apænebitawo. ¹¹ Äñönänite, “Wængongui Awënë Odeye iñömō æbānō awëmō cæcää, ante mini waocabo wëenëñedë ëñenämaï ininō incæte ñowo edonque pönō apænebo ate minitō adomīnique në ëñëmini bamīnipa. Gobæ ongönāni inänite apænedinque, Inguipoga quëwënāni nāni cæi bai impa, ante botō pancaa ante odömonte apænebo ëñënëni. ¹² Dodāni Wængongui beyæ apænedinque iimaïnō ante yewæmongadänimpa. Wængongui nānō në ñimpo cæquënëñāni ināmaï ināni inte tōmënëni iñömō awincaque adinque wiï ædæmō adāni inte önömoncaque ëñëninque ædæmō ëñënëmaï ināni inte edæ ocæ ëmænte pönāmaï incädänimpa, ante yewæmongadänimpa. Mänömaï iinque bacäimpa, ante beyænque botō tōmënëni inänite wiï edonque apænebopa,” ante Itota apænecantapa.

Quiyacā nānō cæinō ante pönente iimaïnō ante ëñëgäimpa

(Mäateo 13.18-23; Odoca 8.11-15)

¹³ Itota ayæ tōmënëni inänite godömenque apænecantapa. “Botō mäninō inguipoga nāni cæinō ante do odömonte apænebo ëñëninque minitō ëñënëmaï iminitawo. Ìnque ñowo godömenque odömonte apænebo incæte minitō ædō cæte godömenque ëñënguimīni.”

¹⁴ “Iimaï impa. Në apæncä iñömō tōmëmō quiyate bai cædinque Wængongui tōmengä nānō apænedō ante apænecampa. ¹⁵ Pancadāniya guiquënë taadō eyepote wæënimō bai ināni inte Wængongui nānō apænedō ante ëñëninque mimōno pönënëmaï iñönänite ayamō ade cængä bai Tatāna incæ ponte ö ængampa. ¹⁶ Wadāni guiquënë dicamontaa woyedömō iñömō eyepote wæënimō bai ināni inte tōmënëni Wængongui nānō apænedō ëñëninque quingæ Ao ante watapæ todänipa.”

¹⁷ “Ayæ ate adodāni wantæ iñō quëwëñönänite wadāni Wængongui nānō apænedō beyæ piinäni wädänipa. Ayæ wadāni wënæ wënæ cæcæte ante togænte pänāni wädänipa. Ìnque oguimento yæyæmë guiwadāmaï nāñe wænte bai ināni inte tōmënëni guiñente wædinque ëmō cæte godänipa. ¹⁸ Ayæ wadāni guiquënë ömentacodë eyepote wæënimō bai inänāni inte Wængongui nānō apænedō ëñëñönāni, ¹⁹ inguipoga quëwente quiemë beyænque mönō wæpāmo pompa. Ayæ, Mäincoo beyænque toquimo, ante nāni oda cæte wæwëmāmo pöninque wacoo

wacoo nāni äinēnō pōninque edæ ömentacoo ñancate cæ bai cæyonte Wængonguī nānō apænedinō incæ incadāmaī bai bapa. ²⁰ Onguipoga waingui-poga quiyadimō bai ināni guiquēnē tōmēnāni Wængonguī apænedinō ēñente Ao āninque wede pōnēnāni inte tōmēwæ incate bai Wængonguī beyæ nanguī cædānīpa. Pancadāniya todēinta ganca incate bai nanguī cæyōnāni, pancadāniya godōmenque teitenta ganca incate bai cædānīpa. Pancadāniya nanguī pōni tiēē ganca incate bai cædānīpa,” ante Itota apæne-cæ ēñēnānitapa.

Gongapæncade ante odōmonte apæne-campa

(Odoca 8.16-18)

²¹ Ayæ tōmēnāni inānite Itota iūmaī odōmōninque apæne-cantapa. “Waomīni gongapæncade tī wodōnodinque dicæ owætadē boo cæcamīniyaa. Dicæ möimoga ænōmengadæ inō māo concæmīniyaa. Wæætē edæ wænōmēnæcapaa concæmīni ñāō bæco aminīpa. ²² Quinō ante wē wodonte bai i iñōmō māninō ante iincayæ ate tadonte edonque ate bai ēñenguinque ñōwo wē wodonte impa. Quinō bee ocate bai i iñōmō māninō iincayæ ate wi æncate edonque aquinque ñōwo bee ocate impa. ²³ Ēamonca ongonte ēñenguēnē cæmīni,” angantapa.

²⁴ Ayæ tōmēnāni inānite godōmenque apænedinque Itota, “Önōmonca ēñēninque ēñenguēnē cæmīni. Minitō mīni tee mante godoncade incæ adocadeca tee māninque Wængonguī mīnitō imīnite adodō pōnōninque godōmenque ayæ pōnongā æncæmīnīpa. ²⁵ Edæ nē ēacā ingante godōnāni ængā bai nē ēñengā ingante godō apænebo ēñente entawēninque tōmengā godōmenque ēñente bacæcāimpa. Nē ēadāmaī ingā guiquēnē tōmengā wædænque pōni nānō māincoo iñonte māincoo tōmancoo ö ænāni wæcā bai nē ēñēnāmaī ingā adobaī tōmengā wædænque pōni nānō ēñente entawēnō iñonte ö ænte bai cæbo dæ ba ate wæcæcāimpa.” Mānōmāinō ante Itota tōmengā emīñānāni inānite odōmonte apæne-cæ ēñēnānitapa.

Guiyāmō pæpa, ante odōmonte apæne-cæ

²⁶ Ñōwo iñōmō öōmaque ongōnāni inānite godōmenque odōmōninque Itota iūmaī ante apænegacāimpa. “Waocā quiyacā ate awēmō pæ bai inte Wængonguī Awēnē Odeye pōnō cæcā ate tōmengā nempo nē quēwēnāni awēmō yebænīnque bacoo pōni badānīpa. Apænebo ēñēdāni. Waocā gönea quiyate ate, ²⁷ woyowotæ mö ñōninque baānæ ñāni ömæmōñongā iūmō iñō iūmō iñō tōmēmō nānō quiyadimō incæ awēmō tā bocate pæpa. Waocā iñōmō, Æbāmē cæte tā bocate pæpa, ante acantawogaa. ²⁸ Edæ onguipo beyænque tōmengā nānō quiyadimō incæ tā bocate pædinque æmonga æi cænguimæ baate ate ayæ cænguī yagapa. ²⁹ Yaga adinque, Amīñate cænguī bapa, ante edæ pete ængampa,” ante odōmonte Itota apænegacāimpa.

Möotatamō guidimō ante odōmonte apæne-campa

(Mäateo 13.31-32; Odoca 13.18-19)

³⁰ Ayæ godōmenque apænedinque Itota, “Wængonguī Awēnē Odeye nempo æbānō quēwēnāni, ante mönō quinō odōmonte ate ēñenguī. Edæ, Inguipoga quinō pæte yebænte bai i adinque, Mānināni adobaī yebænānīpa, ante ēñengæimpa. ³¹ Ii-māi impa. Möotatamō mīni ænte quiyāmō guidimō pōni i bai wamō mīni quiyāmō adomonque incæ adobaī guiyāmō pōni i iñōmō edæ dæ ampa. ³² Incæte möotatamō iñōmō tā bocate pædinque möotatawæ edæ ocāñequi doyæ pæwæ bapa. Wīi tōmää

ocãñequi mini quiyadiwæ baï edæ ocäa inämaï inte möotatawæ iñömö edæ ñænæ awæ impa. Adinque tömewæ ibæñömö ayamöidi gänë iñömö ponte ongönänpa. Möotatamö guidimö incæ mänömaï pæ baï Wængongui Awënë nempo quëwënäni iñömö wædænque ininäni incæ nanguï yebænguïnäni inänpa,” ante Itota odömonte apænecäimpa.

Inguipoga näni cæï baï impa, ante Itota odömongampa

(Mäateo 13.34-35)

³³ Ayæ Itota, Wængongui Awënë nempo quëwëninque æbänö cæquiï, ante ëñencädänimpa, ante imæca quëwënäni näni cæinö ante godömenque nanguï pönï odömöninque godongämæ ongönäni näni ëñenganca apænedinque idæwaa. ³⁴ Mäninonque baï odömonte apænedinque tömënäni inänite cöwë godömenque apænedämaï inongäimpa. Incæte tömengä miñæ në godäni adodäninque ongönönänite Itota edonque pönï, Mänömaï impa, ante tömänö ante apænecä ëñengadänimpa.

Itota angä ëñente woboyæ æpæ næ gongæmpa

(Mäateo 8.23-27; Odoca 8.22-25)

³⁵ Mänionæ gäwadecæ bayonte Itota tömengä ëmiñænäni inänite,
—Gäwapæ æmæmäa taocæimpa.

³⁶ Äninqe ömaa ongönäni inänite ëmö cæte taocæ cædinque tömengä nänö apænedimpodë adopodë ayæ contayongante mantadäni taocantapa. Adinque wadäni wapodë godongämæ taodänitapa. ³⁷ Tao wogaa goyönäni woboyæ iñontobæ nanguï pönï pæmæninqe æpæ mængonta mængonta pöninque gao gao wipodë änëñö, ³⁸ Itota yæmiñæmpo bee podoncate mö ñongantapa. Ömæmoncæcäimpa, ante tao cædinque,

—Awënë, bete wæncæ cæmompä mö ñömii.

³⁹ Änäni ëñëninque ñäni ömæmonte ængæ gantidinqe,

—Woboyæ, pæmænämaï imæwe. Gäwapæ incæ cädämaï næ gongæmäwe.

Ante äñongä woboyæ pæmænämaï iñö gäwapæ incæ næ gongæninque ñancæ ñancæ gongæmænimpa. ⁴⁰ Ayæ tömënäni inänite,

—Mini pönëgade, quimæ guiñewëminii.

⁴¹ Äñongä tömënäni ancaï guiñëninque nämæneque tededinque,

—Æcämë inte angä ëñente woboyæ incæ æpæ incæ gongæmpa, ante guiñente wægadänimpa.

Wænæ wentamö ewocacä tönö në quëwengä

(Mäateo 8.28-34; Odoca 8.26-39)

5 ¹ Ininqe Itotaidi mänii æmæmäa tao godinque Guedatabæ pö ti wæænänitapa. ² Itota mänömaï pöninque gäwapæ tao ti wæængä adinque onguiñængä wænæ wentamö ewocacä tönö në quëwengä inongä inte edæ waodänido quëwente tao bee tengantapa. ³ Tömengä waodänido cöwë në quëwengä ingante ædö cæte goto winguïnänii. Daagömenca incæ tæämö impa goto winguïnänii. ⁴ Ëno pönö goto wimænte wææ ëno pönö goto wiwate bacæcäimpa, ante ancaa cæyönäni tömengä daagömë wangö ñæ wangö ñæ cædongäimpa. Æcämenque incæ tæi pñængä inte tömengä ingante ænguingäa. Edæ dæ äñongäimpa. ⁵ Itädë incæ woyowotæ incæ

tömengä änanquidi æite wææ waodänido pö änanquidi æite wææ ocæ emænte pö pö cæte Yæ yæ äninque dicaca nämä incæ äwænonga äwænonga cæte wencata bai ëñate quëwënongäimpa. ⁶ Ìninque Itota go dibæ pongä adinque tömengä quingä pogodo godinque Itota weca ædæ wææninque, ⁷ ogæ tededinque,

—Itota ëñëmi, bitö nê Æibæ Quëwengä Wængongui Wëmi ïnömi incæ quimæ botö weca pöwëë. Edæ, Åmogate wæcæcäimpa, ante botö ïmote cædämaï ïmäwe, ante nanguï angantapa.

⁸ Edæ tömengä tæcæ pö bee tëñongante wënæ ingante Itota ïmaï ante äningä ïnongäimpa.

—Wentamö nê wentamö ëwocabi inte ämo ëñëe. Bitö waocä baonga guidëmi inte ñöwo tao gobäwe, ante Itota täno angä ëñente wædingä inte wënæ ñöwo, Cædämaï ïmäwe, angantapa.

⁹ Ìninque Itota,

—Bitö æmömidö imii.

Äñongante,

—Tontadoidi tæiyænäni adinque, Deguiönö, änanipa. Mönitö adobaï tæiyæ pöni ïmönipa, ante botö ëmöwo adobaï Deguiönö ëmömopa.

¹⁰ Ante apænedinque ayæ, Mönitö ïmönite wabæca wido cædämaï incæbiimpa, ante ancaa angantapa. ¹¹ Mänïñömö odæ wængänäidi nanguï ïnäni eyequeï änanquidi a cængönäni adinque, ¹² wënæidi incæ Itota ingante,

—Ïi odæ wængänäidi weca ämi godinque tömënäni baönë guiite quëwëmönie.

¹³ Ante tedete äñönänite Itota Ao angä ëñente wædinque wënæidi wentamö ëwocadäni ïñömö tao gote odæ wængänäidi baönë go guidänitapa. Ìninque odæncato dote miido ganca ïnäni incæ ontacamö cægöninque tömäne to wæi gäwapæno pogodo wæi guiite becadote capo wænänitapa.

¹⁴ Becadote wænäni adinque odæ wængänäidi nê aadinäni guiquënë pogodo wodii winonte tömënäni quëwëñömö mäo bee tente apænedinque idömæ mäo gode ä gode ä cæte, Itota mänömaï cæcä wæmönipa, ante apænedäni ëñëninque wadäni, Æbänö cæcäi, ante acæte ante pönänitapa. ¹⁵ Itota weca ponte ayönäni wënæidi tönö nê quëwëningä incæ ñöwo önonganque bate wecoo ëñacä inte tæ contate on-gongä adinque tömënäni, Mönö Deguiönö ënemrocä äningä ingampa, ante guifente wægadänimpa. ¹⁶ Nê adinäni guiquënë ñöwo pönäni ïnänite apænedinque, Wënæ ënemrocä ïningä ingante Itota æbänö cæcäi, odæ wængänäidi ïnänite Itota æbänö cæcäi, ante apænedäni. ¹⁷ Eñëninque tömënäni wæætë Itota ingante, Mönitö weca quëwënämaï gobäwe, änäni.

¹⁸ Eñente wædinque wipodë go guicæ cæyongante wënæidi inte quëwëningä ïñömö, Bitö miñæ mäobi goboe. ¹⁹ Äñongante Baa äninque Itota,

—Tömëmi oncönë gote, Wængongui Awënë wënæidi ïnänite wido cæcä önömoque baböi aminipa, ante bitö guidënäni ïnänite mäo apænebi ëñencædänimpa. Ayæ, Botö wæwente quëwëñömote tömengä guëa wæwente bai pönente pönö cæcä waa batabopa, ante apænebi ëñencædänimpa.

²⁰ Itota angä ëñëninque wadæ godinque tömengä Decapodibæ mäo, Itota waa cæcä waa batabopa, ante apæneçä. Eñente wædinque tömänäni, Æ æbänö cæte mänömaï waa bacäi, ante guifente wægadänimpa.

Gaido wēñængä beyä cæcæ goyongante

onquiyængä Itota weocoo gampocampa

(Mäteo 9.18-26; Odoca 8.40-56)

²¹ Mänii wipodē guite tömengä imämmaa ta ti wæængä ate nangui inäni acæte ante pō goto goto godämæ gongænänitapa. Itota ayä gäwapæ wedeca ongongantapa. ²² Ayä ongönongä wacä oodeoidi odömöincö awënë inongä inte tömengä emöwo Gaido inömö Itota ingante adinque pöningue tömengä önöwaca gäänē ædæ wææn-inque, ²³ tömengä ingante,

—Botö wēñængä baqucä inömö edæ dobæ wæncæ cæcampa cæbii. Bitö ponte tömengä ingante gampobi waa bate quëwencæcäimpa, ante nangui angantapa.

²⁴ Gaido mänömaï angä ëñëningue Itota wætetö tömengä miñæ gocantapa. Idömæ goyongante nangui inäni bee tente goto goto pönäni. ²⁵ Inique godämæ ongönäni tönö onquiyængä adocanque wantæpiyæ dote wadepo inonte wepæ wantæ bidämaï cöwë wææ wæwëningä inte adobai ponte tömënäni miñæ gocantapa. ²⁶ Doyedë inömö onquiyængä waa bawënençate ante cædinque tömengä quincö tömancoo eyepote pædæ godongä æninque dotodoidi tæiyænäni cædäni caate wæcä incæte tömengä waa bawënänämaï inte godömenque wænæ wænæ bate wædongäimpa.

²⁷ Mänömaï quëwente wæyongante wadäni, Itota mänömaï cæcampa, ante tededäni ëñente wædinque tömengä nõwo goto pönäni tönö pöningue Itota önönabæca inö ponte weocooque godö gampocantapa. ²⁸ Edæ, “Tömengä weocooque gampote waa bawënemote,” ante pönëningä inte, ²⁹ tömengä godö gampoyongä wepæ nänö gowete wæwënimæ wantæ bi ate tömengä, Wantæ biwënëmopa, ante önöwënenque pönengantapa. ³⁰ Itota inömö, Æ, tæi piñænte botö entawënö incæ edæ wacä beyä cæquinque do gotimpa, ante wæwënençate awædö, æninque goto gongænäni tæcæguedë næ gongænëningue dadi emænte cöwä adinque,

—Botö weocoo æcänö pönö gampodaï, angantapa.

³¹ Äñongante tömengä nänö në emiñænäni guiquënë,

—Ënodäni pönänipa aquimii. Æcänö gampodaï, ante ämii.

³² Wææ änäni incæte tömengä, Æcänö botö imote wede pönëningue gampodaï, ante godömenque tömäo cöwä cöwä acantapa. ³³ Ayongante onquiyængä guiquënë, Wampo bawënëmopa, ante pönëningä inte nangui guiñëningue do do wæate wædinque Itota weca ponte ædæ wæænçate tömänö ante töingä apænecä ëñengantapa.

³⁴ Apænecä ëñëningue Itota wætetö,

—Onquiyæmi ëñëmi. Bitö wede pönönö beyä edæ wampo bawënëmipa. Nõwo edæ wædämaï inte waa godinque nõ bawënençate quëwëe, angantapa.

³⁵ Ante tæcæ apæneyongä oodeoidi odömöincö awënë Gaido oncönë quëwënanäni mäniñedë pöningue edæ Gaido ingante apænëdänitapa.

—Bitö wengä inömö nõwo æmäwo wængampa cæbii. Nõwo Awënë në Odömongä ingante quinänte godömenque anguii.

³⁶ Ante ponte äñönänite Itota tömënäni æbänö tededäni ante ëñënämaï inte bai cædinque oodeoidi odömöincö awënë Gaido ingante apænëdinque,

—Guiñënämaï inte önönque wede pönëe, angantapa.

³⁷ Ayä godongämæ ongönäni inänite, Ee ongödäni, æninque Pegodo ingante, Tantiago tönö Wäö näna caya inate mänimpodänique inänite ænte gocantapa.

³⁸Tömənäni tönö godinque Itota tömənäni odömöincö awënë oncönë ponte ayongä mänincönë waodäni nanguï cægöningue edæ Ca ca wædinque ogæ tedete Yæ yæ änäni acantapa. ³⁹Adinque Itota oncönë guidinque,

—Quimæ ogæ tedete cægöwëminii. Quimæ Ca ca wæminii. Ìnæmpa ìñömö wëñængä wodi edæ wiï æmæwo wængantapa. Edæ mö ñongampa.

⁴⁰Ante apænecä ëñëningue tömənäni, Angantedö amini, ante tömengä ingante badete todänitapa. Itota wæätë edæ, Gä goedäni, angä oncodo tao godänitapa. Ìn-
inque wëñængä wæmpo tönö wäänä inate Itota tömengä miñæ nè pöninäni tönö
mänimpodänique inänite ænte manguicä wëñængä wodi nänö öñoncönë wäänë
guiddänitapa. ⁴¹Wëñængä wodi ingante Itota pædæ wææmpo bæi ongonte töö
æmænningue,

—Tadita cömi, äninque mönö tededö, “Wëñæmi onquiyæmi ængæ gantibi,”
angantapa.

⁴²Angä ëñëningue wëñængä baquecä dote wadepo ëñadingä inte dobæ ængæ gan-
tite dao dao gocä. Adinque tömänäni ancai guiñente wædänitapa. ⁴³Itota wæätë,
Botö æbänö cæboo, ante minitö mäo apænedämaï iedäni. Äninque edæ wëñængä
beyæ cængui angä godöna cængantapa.

Näatadeta ìñömö ponte Itota apænecampa

(Mäateo 13.53-58; Odoca 4.16-30)

6 Itota wadæ godinque tömengä miñæ nè godäni tönö tömengä nänö pæ-
gaiñömö pongadänimpa. ²Ayæ, Guëmanguïönæ impa, äninque Itota tömənäni
odömöincönë go guidinque tæcæ odömönte apænecä ëñëningue mäniñömö
ongönäni nanguï inäni guiñente wædinque nani caboque tededänitapa.

—Ìngä ìnæmpa ædö cæte nanguï ëñente apænecä. Æbänö cæquiï, ante æcänö tö-
mengä ingante godö odömongä adinque tömengä mänömaï bamönengæ cæcäa, ante
ëñencæte ante wæmönipa. ³Ìngä ìnæmpa mönö awæmpa nè tímöwengä ìmaingä
inte bamönengæ mänömaï cæcampa, ante awædö. Edæ Mäadiya wengä inongä
inte tömengä ìñömö önönänique mëmö ingampa. Tantiago tönö Ootee, Codaa tönö
Timönö tömənäni mëmö inämaï ingantawogaa. Tömengä biwinqueidi incæ mönitö
tönö wiï ongonäni atamö.

Ante pönente wædinque tömengä beyæ ante piinte badänitapa. ⁴Ìnque piinte
badäni adinque Itota wæätë angantapa.

—Ìnæmpa, Wængongui beyæ nè apænecä inte tömämæ gote apæneyongante tö-
mengä ingante waa adänipa. Wæätë tömengä nänö pægaiñömö ponte apæneyon-
gante mäniñömonque wæätë wiwa adänipa. Tömengä nänö guiddänäni tönö tö-
mengä oncönë owodäni tönö mänimpodänique tömengä ingante wiwa adänipa töö.

⁵Äninque Itota adopoque adopoque gampocä waa badänitapa. Mänömaï
wædænque cædinque tömengä, Ædö cæte gomonga cæquimoo. ⁶Äninque, Mini
pönëegade. Quinante pönënämaï imini, ante wægacäimpa.

Wængongui Awënë ingantedö ante apæneedäni, ante Itota angä godänipa

(Mäateo 10.5-15; Odoca 9.1-6)

Ayæ wayömö nani quëwëñömö wayömö nani quëwëñömö mäo odömöninque
Itota apænecä ëñengadänimpa. ⁷Ayæ, Dote inäni, nani änönäni inänite aa pecä
pönäni ìninque, Nöwo minitö æmænö mëmïnaa æmænö mëmïnaa goyöminite botö

pönö cæbo ate mīnitō awēnēidi bai badinque edæ wēnæidi wentamō ewocadāni inānite nē āmīni incāmīnīmpa, ante da godongā godānitapa. ⁸ Ayæ, Īmaī cædāni, angantapa. Mīnitō taadō godinque ongontoque mīni nææntoque næænte goedāni. Cængui incæ māincoo da wenguincade incæ ænāmaī inte godinque tīguitamō ōnon-camoncadedē da wēnāmaī inte ōmæpomīni goedāni. ⁹ Awæncata mīni ewataque ewate weocoo mīni ēñacoque ēñadinque wacoo ænāmaī goedāni, angantapa. ¹⁰ Ayæ godōmenque āninque Itota,

—Godinque æcōnēnō tāno go guimīni owodinque mīnitō wayōmō mīni go quēwēnginganca mānincōnenque go guī go guī cædinque quēwēdāni. ¹¹ Æyōmōmē goyōmīnite wadāni, Pōedāni, ānāmaī inte mīnitō apænedō ante wīi ēñēnāni wædinque mīnitō wæætē tōmēnāni inānite emō cæte ĩmāinō ante goedāni. Mīnitō ĩnāmpa, Pōedāni, ānāmaī ĩmīni adinque mōnitō gomōni tamēnedāni, ante odōmoncæte ante mīnitō ōnōwa wadæ wadæ cæwadinque wadæ goedāni.

¹² Āninque Itota tōmengā emīñēnāni inānite, Nōwo goedāni, āninque da godongā godānitapa. Godinque tōmēnāni wabæca quēwēnāni inānite māo, Mīnitō wēnæ wēnæ mīni cædinō ante wæwente pōnēninque nīmpo cædāni, ante māo apænedāni ēñēnānitapa. ¹³ Wēnæidi nanguī ināni inānite wido cædānitapa. Ayæ waodāni nanguī ināni wēnæ wēnæ inte wædāni ĩñōnānite oginguipæ ōni ōni paadāni ate waa bagadānīmpa.

Wäo æpænē nē guidōnongā wængampa

(Mäteate 14.1-12; Odoca 9.7-9)

¹⁴ Itota emōwo ante apænedāni ēñēninque tōmāmæ quēwēnāni do ēñēninque gode ä gode ä cæte tedeyōnāni Edode pancabaa awēnē odaye incæ, Itota æbānō cæcää, ante ēñengacāīmpa. ĩninque tōmengā ĩñōmō,

—Æpænē nē guidōnongā Wäo wodi dobæ wænte nāni ōmæmōningā inte ĩngā Itota ĩñōmō ĩmaingampa. Māninō beyænque tōmengā tæī piñænte entawēnongā inte nē nanguī cæcā ingampa, ante pōnēmopa, angantapa.

¹⁵ Ayæ wadāni,

—Ediya wodi ĩmaingampa.

Ante tedeyōnāni wadāni wæætē,

—Wængongui beyæ nē apænegaināni bai tōmengā adocā ĩmaingampa.

¹⁶ Ante tededāni ēñēninque Edode ĩñōmō,

—Botō nē wangō tamencadongā Wäo wodi adocā incæ edæ nāni ōmæmonte a ongōmaingampa, ante wædongāīmpa.

¹⁷ Wäo wodi ĩñōmō ĩmaī wængacāīmpa. Do ĩnedē awēnē Edode nānō tōniñacā Pedipe ayæ miingā ĩnongā Pedipe manguiwēningā Ædodiya ingante Edode ĩñōmō, Botō nānōogængā bacæcāīmpa, ante ō ænte mongā. ĩninque tōmengā adocā Wäo wodi ingante bæi ongonte goti winte tee mōnedongāīmpa. ¹⁸ Edæ Wäo ĩñōmō nānō caate wænguinque Edode ingante ĩmāinō ante do wææ āningā ĩnongāīmpa. “Edode ēñēmi, Wængongui nānō angainō bai ēñēnāmaī inte bitō tōniñacā nānōogængā ingante edæ manguiwēmīpa tōö.”

¹⁹ Ante wææ angā ēñēninque Ædodiya guiquēnē Wäo nānō āninō beyæ cōwē piinque tōmengā ingante wænoncæ cæcā incæte ædō cæte tōmengā ingante wænonguingää. ²⁰ Edæ, Wäo tæiyæ waemō onguīñængā inte nē nō cæcā ingampa, ante do ēñēnongā inte Edode ĩñōmō Wäo ingante edæ guīñente wædongā ĩnongāīmpa.

Īninqe tōmengä ingante edæ wææ gompodongäimpa. Ayæ Wäö apæñecä ēñēninqe Edode, Angä ēñente æbänö cæquimoo, ante nanguī wæcä incæte tōmengä ingante ēñēninqe todongäimpa. ²¹ Īncayæ ate Edode nänö ēñagaïönæ iinque bayonte Ædodiya, Æönædö wænonguimoo, ante nänö äniönæ eyepæ batimpa. Edode iñömö, Mäniönæ bai ēñagaboimpa, ante ææmæ cædinque wente ængä ate tōmengä miñæ awēñēidi tönö tontadoidi awēñēidi tönö Gadideabæ quēwēñäni awēñēidi tönö tōmänäni becæ pönänitapa. ²² Ponte bete cængöñönäni Ædodiya wengä baquēcä incæ tæcæguedē pö gongænte tode pete äwacä adinque awēñē odeye Edode tönö godongämæ ongönäni nanguī todönänimpa. Īninqe baquēcä ingante Edode äñongäimpa,

—Waa pōñi bitö tode pete äwadī beyænque bitö quiēmē ante æinente ämi ate botö ēñente da pönömo æe.

²³ Äninqe ayæ godömenge äninqe, Wængonguī ēñēñongä nöingä ämopa, äñongäimpa. Quiēmē impa bitö æinēmi botö tōmää edæ do godömo æncæbiimpa. Edæ bitö æinente ämi ininqe botö awēñē odeyebö inömo inte botö enempodö incæ edæ tæcæ pä cæte pönömo ämäimipa. ²⁴ Angä ēñēninqe taodinqe,

—Badä ēñēmi, quinö anguimoo.

Äñongante wäänä edæ do,

—Botö iimaī ämopa, änantapa. Wäö æpænē nē guidongä ocabo wangö tomencate pædæ pönömi æmoe, ancæbiimpa, ämopa.

²⁵ Änä ēñēninqe awēñē weca do ponte guidinque baquēcä wæætē,

—Wäö æpænē nē guidongä ingante wangö tomencate tōmengä ocabo iñi coyomænætaca cö cæte do pönömi æmoe.

²⁶ Angä ēñente wædinque awēñē odeye iñömö, Æ ēñente awædö. Quinö ñöwo cæquimoo, ante nanguī wædongäimpa. Incæte tōmengä, Botö iñæmpa godongämæ becönäni ēñēñönänite, Wængonguī ayongä cöwē godoncæboimpa, ante nē äñimo inte edæ ædö cæte ñöwo Baa anguimoo. ²⁷ Ante pönente wædinque tōmengä nänö äñinö, Cöwē godonguī impa, ante pönēninqe Edode wæætē nē wænongä ingante, Bitö godinque wangö tomencate ænte mämömi ængæe. ²⁸ Angä ēñēninqe nē wænongä wæætē tee mönincönē gote guidinque Wäö ingante wangö tomencacä wængantapa. Ayæ Wäö ocamö iñi coyomænætaca cö cædinque baquēcä weca ænte mämö pædæ pönongä æninqe baquēcä wæætē wäänä inante godongä æñönäimpa.

²⁹ Mänömaī wængäimpa, ante gode äñäni ēñente wædinque Wäö wodi tōmengä miñæ nē godinäni incæ pöninque tōmengä baö iñi ænte mäo daga wengadänimpa.

5.000 ganca inäni inänite Itota godongä cænänipa

(Mäateo 14.13-21; Odoca 9.10-17; Wäö 6.1-14)

³⁰ Mänii Itota nē nänö da godöñinäni iñömö ocæ emænte ponte godämæ gongænte, Mänömaī cætamönipa. Mänömaī odömonte apænemöni ēñēñänitapa.

³¹ Ante apæñedänitapa. Ayæ, wadäni nanguī owentædæ pænta owentædæ pænta wææ cægönäni adinque tōmēñäni ædö cæte cæquänäni. Cænguī incæ ædö cæte cænguänäni. Adinque Itota,

—Minitö adomīnique botö miñæ önömæca gote wædænque guēmædäni, angantapa. ³² Angä Ao ante tōmēñäni adodänique Itota miñæ wadæ godinque önömæca gocæte ante wipodē wææ contate wogaa godänitapa. ³³ Goyönänite wadäni guiquēñē, Itotaidi incæ godänipa, ante adinque wacönē ta wacönē ta god-

inque tæiyænāni tee ta tee ta go ömaaue oo pænta pogodo gote do edæ pöningue a ongönānitapa. ³⁴ Ayæ wipodë wogaa mämö tæcæ æænoncadayönāni Itota iñömö ti wæante ayongä nanguï ināni do ponte a ongönāni acantapa. Tömēnāni nē aacä dæ āñongä obegaidi quēwenguināmaï ināni inte adodānique ongönāni bai ināni inte wæwēnānipa, ante pönente tömengä tömēnāni tönö godongāmæ wæwente bai pönengantapa. Īninque nanguï odömōnte apænecä ēñēnānitapa. ³⁵ Ayæ gāwadecæ bayö Itota miñæ nē godāni tömengä weca ponte āninque,

—Nōwo wēmō bacæ cæpa cæbii, ānānitapa. Ayæ, Önomæca incæ cænguï dæ ampa. ³⁶ Īnāni inānite āmi idömæ owodāni weca godinque ayæ nanguï ināni nāni quēwēñömö godinque cænguï godonte cænguīnānie.

³⁷ Āñönānite Itota wæætë,

Minitö wæætë godömini cæncædānimpa, āmopa.

Āñongante,

—Æ, enodāni ināniyaa. Īñæmpa ocho apāicä cæte beyæ paga æinta æninque mänimpota pāo ante godonte æninque edæ wii eyepæ imaimpa. Mönitö wadæ gote mänimpota beyæ pāo godonte æninque iñömö godongāmæ ongönāni inānite godömöni cænguīnānii, āmitawoo.

³⁸ Ante wæyönānite Itota,

—Pāo æpodö nææminii. Acæ goedāni.

Angä ate pöningue,

—Pāo önompo æmæmpoque gæyæ mēa pönī mæ ongompa.

³⁹ Ante apænedāni ēñēninque Itota godongāmæ mæ ongönāni inānite, Nōwo mīni cabo mīni cabo gaguimāa tæ contaedāni. ⁴⁰ Angä ēñēninque pancadāniya tiëë ganca nāni cabo nānēñē pancadāniya tincoenta ganca nāni cabo nānēñē tömānāni nāni cabo nāni cabo tæ contadānitapa. ⁴¹ Tæ contadāni ate pāo önompo æmæmpoque gæyæ mēa æninque öönædë inö æmō adinque, Wængonguï, bitö waa pönömi ænte cæmönipa, ante apænedinque pāo pā pā æ cædinque tömengä, Nanguï ināni cænguï ante ænte māo cö cædāni, ante tömengä miñæ nē godāni inānite pædæ pönongä æninque māo cö cædānitapa. Ayæ gæyæ mēa iñonte adobai æninque tömengä tömānāni inānite di mæñæ di mæñæ cæcä æninque cænānitapa. ⁴² Æninque tömānāni tömo pönī cænāni, ⁴³ ate edæ tömengä emiñænāni pāo tönö gæyæ nāni ao mænte ñönönī ee öñoncoo pædæ wææmpo ö æ da da wente æninque otodë önompo tipæmpoga go mentodëa cænguï eyede da wēnāni contagatimpa. ⁴⁴ Nē cænāni iñömö onguīñænāni edæ tinco miido ganca mänimpodāni nanguï ināni nāni wencabo cængadānimpa.

Itota yædopæ dao dao gocampa

(Mäateo 14.22; Wäö 6.16-21)

⁴⁵ Itota ayæ do tömengä nänö nē emiñænāni inānite, Ægodöedāni. Minitö tāno wipodë guiite æmæ wedeca Betaida tao goyömini botö wæætë wadāni nē cænīnāni inānite āmo godāni ate pömoedāni. ⁴⁶ Angä Ao ante tao goyönāni tömengä wadāni inānite wæætë angä godāni ate adocanque ongonte Wængonguï ingante apænecæte ante ānanquidi æicantapa. ⁴⁷ Ayæ wēmö bayö tömēnāni tæcætibæ wogaa goyönāni tömengä adocanque ömaa ongonte ayongä, ⁴⁸ tömengä nänö emiñænāni wiyate taocæ cæyönāni edæ woboyæ nanguï pæmænte pönömenque ænte pö ædö cæte goquīnānii. Adinque tawadiya nänö peyedë edæ tæcæpæ pönī i gæwapæ wænömēnæ-

capæ inö edæ Itota iñömö æpæno yædopæ dao dao obo ponte wodo pænta gocæ cæcantapa. ⁴⁹Yædopæ edæ gocæ gomö adinque tõmënäni Yæ äninque, Waocä wænte babæningä wabänö cægongä, ante wædänitapa. ⁵⁰Edæ tõmengä ingante adinque tõmënäni ancaï guiñente wædänitapa. Tõmengä iñömö tõmënäni inänite do apænedinque,

—Ee piyænë cæte guiñënämaï iedäni. Botö imo apa guiñewëminii.

⁵¹Äninque wipodë pö guicä ate woboyæ incæ næ gongæ pæmænämaï batapa. Ba adinque tõmënäni godömenque guiñëninque, Quinante mänömaï cæ, ante wædänitapa. ⁵²Edæ, Itota æbänö iñontobæ päö nanguï pöni pönö badongä, ante në adinäni incæte tõmënäni mimö ömædë inäni inte bai wii pönente wægadänimpa.

Caate wædäni inänite Itota cæcä waa badänipa

(Mäateo 14.34-36)

⁵³Ayæ æmæmäa taodinque tõmënäni Guënetadetebæ ti wææninque wipo nã cæmencadänitapa. ⁵⁴Mänömaï ti wæante nã cæmencayönäni mäniñömö quëwënäni guiquënë, Tõmengä Itota ingampa, ante do adänitapa. ⁵⁵Ante adinque mäniömæ tõmäo pogodo godinque wënæ wënæ wæwënäni inänite nönæmpado nō cædinque, Itota æyömönö ongongää, ante ëñëninque tõmëñömö tõmengä nänö ongöñömö do ænte pönänitapa. ⁵⁶Ayæ wadäni näni nanguï pöni quëwëñömö incæ wædænque näni quëwëñömö incæ idömæ incæ, Itota ædömë gocää, ante adinque wadäni wæncæ cædäni inänite mäniñömö ænte mämö taadö wedeca nō cædäni öñönänitapa. Iñäni wæætë tõmengä ingante, Bitö weocoo yæwedecooque ämi gampote waa bamönie. Ante wæyönänite, Ao angä ëñente në gampo gampo cædänique tõmënäni waa inäni bagadänimpa.

Mimöno tao godi beyænque waocä wentamö ewocacampa

(Mäateo 15.1-20)

7 Ayæ Paditeoidi tönö në wææ odömönäni tönö pancadäniya Eedotadëë quëwente mäniñedë Itota weca ponte godongämæ gongænte ayönäni, ²Itota miñæ në godäni pancadäniya mempodämaï inte wentamö empote cænäni adänitapa. ³Edæ dodäni, Önompo ædæmö mempoïnänique cæncædänimpa, ante näni wææ angainö ante Ao äninque, Bapogabo cæte wæcæ wæ, ante Paditeoidi tönö oodeoidi tõmënäni ancaa mempote ate cænönäni inänipa. ⁴Ayæ, Ædæmö äadänique cænguïnäni inänipa, ante pönëninque oodeoidi näni godonte æiñömö gote pöninque ædæmö äate ate cænänipa. Ayæ dodäni godömenque nanguï näni wææ angainö ante pönente Ao ante cædinque tõmënäni owæta cængæ tiguicade awæmpa tõmancoo ancaa mënongate quëwënänipa. ⁵Iñinque dodäni näni wææ angainö ante Ao ante tõmönö ante ëñente cæte quëwënäni inte Paditeoidi tönö në wææ odömönäni nōwo iñömö Itota ingante edæ piinte äninque,

—Bitö miñæ në godäni iñömö quinante dodäni näni angainö ante ëñënämaï inte wentamö nampote cængui cænänii.

⁶Ante piünäni wædinque Itota wæætë,

—Minitö guiquënë waa cæmini inte bai në änewëminii iñöminite mini cædö ante Wængongui iimaï apænecampa, ante Itaiya wodi nöingä ante yewæmongacäimpa. “Iñäni iñömö botö imote önöneque waa apænete bai tededäni incæte, tõmënäni mimöno æmæ pönente edæ gobæ ongonte bai inäni awædö.

⁷ Ayä botö imote waa ate bai ädæ wæænte tededinque, Wængonguimi imidö angüenë, ante apænedäni incæte tömënäni botö imote önonquedö ante cædänipa. Waodänique näni wææ änönö ante odömonte apænedänipa töö.”

Ante Wængonguï piingampa, ante yewæmongacäimpa. ⁸ Edæ Wængonguï, iimäi cæedäni, ante nänö wææ angainö ante Baa änimini inte minitö waodänique näni änewenö ante Ao ante cæminipa töö, angantapa.

⁹ Ante apænedinque Itota godömenque,

—Minitö dodäni näni angäinonque ante ëñente cæcæte ante cædinque Wængonguï nänö wææ angainö ante wido cædinque dicæ waa cæminiyaa. ¹⁰ Möitee wodi, “Bitö Wæmpo ingante bitö badä inante waadedinque waa cæe,” angacäimpa. Ayä, “Waocä wæmpocä ingante wäänä inante piinte wænæ wænæ angä ininque minitö tömengä ingante wænömini wæncæcäimpa,” ante wææ ante yewæmongacäimpa. ¹¹ Incæte minitö iimainö ante wææ cæminipa. Waocä mæmpocä ingante waa cæquëngä iñongante wäänä inante adobai waa cæquëngä iñongante minitö wæætë wææ äninque, Bitö wæmpocä ingante wäänä inante apænedinque iimäi ante apænecebiimpa, änewëminipa. Bitö, “Mæmpo, bitö qui, ante, Badä, minö qui, ante do botö pönonguënönö incæ ñöwo wæætë Wængonguï ingante do edæ godonte impa,” ante, Codobänö näni änö impa, ante apænecebiimpa. ¹² Äninque minitö Wæmpo beyä wäänä beyä në cæquëngä ingante wææ ämini beyä tömengä wi cæcampa. ¹³ Mänömaï cædinque minitö dodäni näni angainö mini Ao ante äninonque ante ëñëninque Wængonguï nänö angainö ante edæ, Önöneque impa, ante bai cæminipa töö. Ayä adobai wapiticä äninque minitö wadö wadö cædinque wænæ wænæ cæminipa töö, ante Itota apænegacäimpa.

¹⁴ Ayä nanguï inäni inänite Itota aa pecä pönönänite apænecantapa.

—Minitö tömämäni iminöte apænebo ëñëninque ocaidë pönente ædæmö ëñeedäni.

¹⁵ Quincoomë yabæque ongoncoo incæ waocä önönë guidi beyænque tömengä mimö dicæ wentamö entawenguingäa. Wæætë mimönë wiwa pönëninque nänö tao godincoo beyænque mimö wentamö mongængampa, ante apænebo ëñeedäni.

¹⁶ Eamonca ongonöte ëñeedäni.

¹⁷ Ante apænedinque Itota nanguï ongönäni inänite ëmö cæte oncönë gote wäänë guicä ate tömengä nänö në ëmiñænäni guiquënë, Mänömainö ante odömonte apænedinque bitö æbänö ante odömoncæte ante apænebitapa, ante ëñencæte ante wæmönipa. ¹⁸ Ante wæyönänite Itota,

—Minitö incæ ocäi ömæcadäni bai inömini inte ëñënämaï iminitawo. Cænguï incæ waocä mimönë guiipa wentamö ëwocaquingäa. ¹⁹ Edæ wi mimönë guiipa. Wæætë cæncadë guite goiwaä ogä mente wido cæquinque i apa änewëminäi.

Mänömainö äninque Itota, Tömää cænguï wæmö impa, angacäimpa. ²⁰ Äninque godömenque,

—Mimönë wiwa pönëninque nänö tao godincoo beyænque waocä wentamö ëwocacampa. ²¹ Edæ mimönë nänö entawente taodinö beyænque waocä önöwëninque wænæ wænæ ante pönengampa. Mimönë towëinente nänö pönënö beyænque waocä godö towente quëwengampa. Mimönö äinente wædinque wacä qui awëmö ængampa. Mimönë nänö piinte pönënö beyænque godö wænongampa. Nänöogängä inämaï iñongante waocä mimönë towëinente nänö pönënö beyænque godö mongampa. ²² Mimönë nanguï äinente wædinque mäincooque ante pönëwengampa. Mimönë nänö taodi beyä wacä ingante piinte cæ-

campa. Mīmönē pönēwēninque, Wacā edæ oda cæcædānimpa, ante babæ cæcampa. Wīwa nānō pönēwēnō beyænque quingāmē bai cæte quēwengampa. Mīmönē nānō pīinte adō beyæ waocā, Wacā bai nænæmo pōni bacæboimpa, ante cæcampa, ayæ wacā ingante godō wænæ wænæ ante babæ angampa. Mīmönē nāmā ante waa ate nānō pōnēnō beyænque, Tōmēmoque waēmō imopa, ante nāmā waa acampa. Mīmō ōmædengā inte ēñēnāmaī cæte ōnonque quēwengampa. ²³Mānīi wīwa cæpāmo tōmāmāmo mīmōnē nānō pōnēnō beyænque waocā wentamō ēwocacampa, ante Itota apænecāimpa.

Onquiyæ oodeo ināmaī inte Itota ingante pōnente angā

(Māteo 15.21-28)

²⁴Mānīnōmō quēwente godinque Itota Tido eyequeī gogacāimpa. Ayæ, Awēmō guite owoyōmo wadāni adāmaī incædānimpa, ante pōnēninque oncōnē pō wāänē guite ongongā incæte ædō cæte wīi aquinānīi. ²⁵Edæ, Itota owocampa, ante do tededāni ēñēninque wacā wāänā, Botō wengā onquiyængā inōmō wænæ nē wentamō ēwocacā ingante enempocampa, ante wædinque Itota weca ponte ædæ wæænte apænecantapa. ²⁶Itota ēñēmi. Wænæ botō wengā tōnō nē quēwengā ingante wido cæquīmi, angantapa. Mānīi onquiyængā Tidopēnitiabæ nē ēñagaingā inte guidiego tededō nē tedecā inongā. ²⁷Adinque Itota, Wīi oodea onquiyængā inongampa, ante wædinque angantapa.

—Wēnāni cænguī inguēnē waocā dicæ guintamōidi cænguī ante wææntodonguingā. Bitō edæ wabi inōmite botō bitō beyæ ædō cæte cæquīmo.

²⁸Åñongante,

—Awēnē ināmpa wēñænāni cænguī cæninque eyepodāni wæænte ænōmen-gadæmpa inō ōñōñō guintamōidi ade cæmpa.

²⁹Ante apæneyongā Itota,

—Bitō nō apænedīmi inte waa gocæbiimpa. Wænæ bitō wēñængā nānō wædō incædobæ edæ emō cæte wadæ gotimpa.

³⁰Angā ēñēninque oncōnē go guite ayongā tōmengā wēñængā ōnonganque bate mōimoga ongongā agacāimpa.

Babetamoncacā ingante Itota waa cæcampa

³¹Mānīi Tido gote quēwēninque Itota wadæ godinque Tidōo wodo pænta gonque go Gadideapæ wedeca poncæ cædinque Decapodibæ yaætænque pongantapa. ³²Gadideapæ wedeca pongā adinque wacā ōnōmonca babetamoncacā inte ōnōne wapiticæ tedecā ingante Itota weca ænte pōninque, Gampo cæbi waa babaingampa. ³³Åñōnāni Itota babetamoncacā ingante nānēnē ænte godinque ōnōmonca pædæ guipomoncasantapa. Ayæ nāmā ōnompō towæ tånompodinque wapiticæ tedecā ingante godō gampo cæguēnēwacantapa. ³⁴Ayæ ōñædē inō æmō adinque ōō guēmante āninque babetamoncacā ingante, “Epata,” āninque mōnō tededō, “Ōnōmonca wi æmoncabæwe,” angantapa.

³⁵Åñongā edæ ōnōmonca tee mōmoncate bai inī wi ænete bai badinque ōnonguēnēwa nīmæncæguēnēwa gote bai cæguēnēwadinque tōō tedecantapa. ³⁶Itota, Botō cæbo nē adīmīni inte gode ānāmaī iedāni, āninque ancaā angā incæte nē adināni inōmō godōmenque nanguī gode ā gode ā cæte tededāni ³⁷Ēñente wædinque tōmānāni nanguī guīñēninque, “Edæ ōnōmonca babetamonca inīnāni inānite

Itota cæcä ate önömonca eñëñäni badänipa. Önöne babetade ininäni inänite cæcä ate önöne tededäni badäni atamönipa. Tömää edæ waa cæcä ingampa,” ante nangui tedete wægadänipa.

4.000 ganca inäni inänite Itota godongä cænänipa

(Mäateo 15.32-39)

8 Mäniñedë wadäni tæiyæ pönï inäni ponte eñëñönäni tömënäni cænguï dæ ä adinque Itota tömengä miñæ në godäni inänite aa pecä pönäni ate,

²—Inäni botö weca ongönäni iñömö meönaa go adoönæque iñonte botö weca ongönönäni tömënäni cænguï ömæpodäni badäni ate wædinque botö tömënäni tönö godongämæ wæte bai nanguï pönëmo imopa. ³Cænämaï inte gue ænente wæyönänite botö, Oncönë goedäni, ämo gote bai tömënäni edæ idömæ godinque tepæ gæwæninque edæ nangæ badinque bocæ bocæ cæte wæcædönänipa. Edæ pancadäniya gobæ quëwente pönäni abopa.

⁴Ante apænecä ënente wædinque tömengä miñæ në godäni wæætë,
—Inämpa önömæca incæ päö impa æninque godömöni cænguïnanii.

⁵Ante wæyönänite Itota,
—Päö æpodö nææmini. Äñongante,
—Önompo æmæmpoque go mäa mä ongompa.

⁶Ante apæneyönäni Itota godongämæ nanguï ongönäni inänite angä onguipoiya tæ contadänitapa. Ayæ päö önompo æmæmpoque go mäa näni næænincoo pædæ godönäni æninque tömengä Wængonguï ingante, Bitö waa pönömi cæncæmönimpa, ante apænedinque pä æninque tömengä miñæ në godäni inänite, Pædæ godö pædæ godö cæmini cæncædänimpa, ante godongä æninque wadäni inänite godäni ænte cænänitapa. ⁷Ayæ gæyæ mäa pönï næænänitapa. Mäniï näni nææni æninque Wængonguï ingante apænedinque adobai angä pædæ godö pædæ godö cædäni. ⁸Æninque tömö pönï cænänitapa. Ayæ idæwaa cænäni ate tömënäni pä ænte näni cænte ñönönï ee öñoncoo wente æninque Itota miñæ në godäni otodë pönö da wënänitapa. Ininque önompo æmæmpoque go mentodëa cænguï eyede contagatimpa. ⁹Në cænäni iñömö onguïñænänique ante tee mampote coatodo miïdo ganca bai inäni inte ongönönänimpa. Ininque cænäni ate Itota angä wadæ godänitapa. ¹⁰Godäni ate Itotaidi do wipodë guii contate cæwodinque imæmäa pöninque Dadämänotabæ pongadänimpa.

Mä cæte odömömi amönie, ante Paditeoidi änanipa

(Mäateo 16.1-4; Odoca 12.54-56)

¹¹Itota pongä adinque Paditeoidi ponte bee tæninque tömengä ingante, Æbänö cæbii, æbänö ämii, ante ancaa änanitapa. Ayæ, Mönö ämö ënente tömengä oda cæbaingampa, ante cædinque Itota ingante apænedinque, Bitö, Pönencædänimpa, ante öönædë mä cæi bai cæbi amönie. ¹²Änäni eñëninque Itota, Ancaa änäni awædö, ante wæwente badinque öö öö ante guëmangantapa.

—Inämpa ñöwomini, Mä cæte odömömi adinque pönëmaimönipa, ante ancaa ämini awædö. Näwangä ämö eñëedäni. Nöwomini iminite mä cæte odömönämaï ingæimpa.

¹³Ante äninque tömënäni inänite ëmö cæte godinque wipodë guite æmæmäa taocæ cæte cæwodinque wadæ gocantapa.

Wapiticä apänedäni ëñëninque gomö aedäni, angampa

(Mäateo 16.5-12)

¹⁴ Mänii ämämäa nani tao gocæ cæyedë tömengä miñä në godäni guiquënë päö wii pönente äenämai inte godäni ïninque päö adoque pöni nani wëñëñedë ñönöninque wipodë öñompa. ¹⁵ Itota iñömö mänii päö tömënäni nani äenämai inö ante wii tededinque wadö ante pönente apäñecantapa.

—Päö yedæ æmpoqui, ante Paditeoidi tönö Edode nani da wente cæi ate gomö aedäni. ¹⁶ Angä ëñente wædinque tömengä nanö në ëmiñäñäni wæætë nani caboque tededinque, Päö ænte pönämai imöimpa, ante Itota wabänö mänömai beyä ämaingampa.

¹⁷ Ante nämäneque tededäni wædinque Itota wæætë tömënäni inänite,

—Päö äenämai inte mini pöninö ante quimä tedewëminii. Botö päö ante dicæ wæbogaa. Nangui cæbo adimini inte minitö ayä ëñënëmai iminitawo. Edæ mimö ömädëmini inte tedewëminipa, ante awædö. ¹⁸ Edæ awincaque adinque ayä adämai iminitawoo. Önömoncaque ëñëninque ëñënëmai iminitawoo. Edæ botö æbänö cætabopa, ante adimini inte edæ wii pönëminitawo. ¹⁹ Päö önompo æmæmpoque botö pä ænte godöni incæ tincö miido ganca inäni nani cænte ñönöni ee öñöñonte æpotodënö cængui wente æminii.

Äñongante,

—Önompo tipæmpoga go mentodä.

²⁰ Ayä päö önompo æmæmpoque go mäa guiquënë coatodo miido ganca inäni nani cænte ñönöni ee öñoncoo æpotodënö cængui wente æminii.

Äñongante,

—Önompo æmæmpoque go mentodä.

²¹ Apänedäni ëñëninque tömengä edæ,

—Inæmpa Tadoteoidi tönö Paditeoidi wapiticä ante nani odömonte apänedö ante botö, Gomö aedäni, ante wææ ämopa, ante minitö ayä ëñënëmai iminitawoo, angacäimpa.

Betaida iñömö babetamongä ingante gampomongampa

²² Mäninö godinque Betaida iñömö pönäni adinque wadäni babetamongä ingante Itota weca ænte pöninque, Gampomonguimi. ²³ Änäni ëñëninque Itota babetamongä önompo bæi ongonte töö æmænte tömënäni quëwëñömö tao yabæque ænte mäocä gocantapa. Ayä godö towæ tänömonte gampo cæmöninque, Pancaa tæcæ abi edæ, angantapa. ²⁴ Äñongä edæ tæcæ iñä æmonte,

—Awæ cægonte bai waodäni incæ cægönäni abopa. ²⁵ Itota wæætë godö gampo cæmongä ate babetamongä iningä incæ ñöwo cöwä adinque edæ waa bamöninque tömäo edonque pöni acantapa. ²⁶ ïninque tömengä ingante Itota,

—Inömö nani quëwëñömö yaatænque wadæ godinque tömëmi oncönë goe, angä gogacäimpa.

Bitö Codito inömi imipa, ante Pegodo angampa

(Mäateo 16.13-20; Odoca 9.18-21)

²⁷ Itota inömo tömengä miñä në godäni tönö wadæ godinque Tetadea Pidipobæ wædænque inäni nani quëwëñömö wædænque inäni nani quëwëñömö go go cædänitapa. Idömæ godinque tömengä nänö në emiñänäni inänite Itota angantapa.

—Wadäni botö imotedö ante tededinque, Æbodö imoo, ante apænedäni ëñëminii.

²⁸ Äñongante,

—Bitö imitedö ante apænedinque pancadäniya, Æpænë në guidongaingä Wäö wodi incæ Itota adocä imaingampa, ante tededänipa. Wadäni guiquënë, Ediya wodi incæ Itota inongä imaingampa, ante apænedänipa. Wadäni guiquënë, Wængongui beyä në apænegañäni bai Itota inömo adocä imaingampa, ante bitö imitedö ante tededänipa, äñänitapa.

²⁹ Ante tömengä miñä në godäni apænedäni ëñëninque Itota,

—Ayä minitö guiquënë, Æbodö imoo, ante äminii.

Äñongante Pegodo inömo,

—Bitö mönö Codito inömi imipa.

³⁰ Angä ëñëninque, Botö imotedö ante, Codito inongä ingampa, ante gode äñämaï edæ pæ wëneedäni, ämopa, ante Itota wææ angacäimpa.

Itota, iimaï cædäni wæncæboimpa, ante apænecampa

(Mäateo 16.21-28; Odoca 9.22-27)

³¹ Ayä mäniñedë Itota tömengä miñä në godäni inänite iimaï ante mä odömönte apænecacäimpa. Botö Waobo ëñagaïmo inte nanguï caate wæquënëmo imopa. Edæ në aadäni nani Picæncabo tönö, Wængongui quï, ante në godönäni nänänäni tönö në odömönäni tönö mäninäni inömo botö imote Baa äñäni wæquënëmo imopa. Ayä botö imote godömenque wænönäni wæncæboimpa. Incæte botö do wænönäni wænimo inte edæ mëönaa go adoönæque inönte nani ömæmoncæboimpa. ³² Mänömaï ante Itota edonque apænecantapa. Apænecä ëñëñönäni Pegodo guiquënë Itota ingante nänënë mäocä godinque, Quimæ wæncæ änewëë, wææ ante tæcæ piincæ cæyongante, ³³ Itota edæ tömengä miñä në godäni gämænö dadi ëmænte adinque Pegodo ingante näëmæ piininque angantapa.

—Bitö Tatänabi bai inömi inte edæ botö weca ongönämaï wadæ gobäwe. Wi Wængongui nänö äñönö ante pönëmi inte bitö waodänique nani pönëwënonque ante pönëninque mänömainö ante tedebe awädö, angantapa.

³⁴ Ayä tömengä emiñänäni tönö nanguï ongönäni inänite aa pecä pönäni ate Itota tömänäni inänite apænedinque,

—Æcänö botö miñä pöinëna ina tömengä nämä beyænque ante pönënamäi inte botö miñä tee empote poncæcäimpa. Nämä nänö wænguiwæ ænte mongænte ponte bai cædinque tömengä, Botö wænguiimo incæ caate wæbo incæ Itota ingante cöwë tee empote gocæboimpa, äninque poncæcäimpa. ³⁵ Edæ æcänö, Nämä wææ gompodinque quëwëncæboimpa, ante cædinque botö miñä pönämaï ingä guiquënë tömengä inömo edæ quëwënamäi incæcäimpa. Wæætë edæ, Wænönäni wæmo incæte botö Itota miñä tee empote godinque tömengä waa pönä nänö cægäinö ante apænecæboimpa, ante æcänö cæda guiquënë tömengä edæ ayä quëwëncæcäimpa.

³⁶ Edæ waocä inguipoga ongoncoo tömancoo ö æncæte ante cædinque nämä önö-

woca incæ pædæ godongä wë womonte ba ïninqe edæ tømengä nänö ömæwocate wæquinque mäincooque æmaingampa. ³⁷ Ìñæmpa eyepæ godongampa diyæ önöwoca wæætë æmaingää. ³⁸ Nöwodäni Wængongui ingante pämente godinque në ëñënamäi cædäni weca quëwëninque minitö ïñömö botö Waobo në ëñagaïmo beyæ ante guingo imonte wæminitawo. Botö apænedö beyæ ante guingo imonte wæminitawo. Ìñæmpa botö Mæmpo ñäö guinë gongæñonte anquedoidi tæiyæ wæmö ëmönäni tönö dibæ pöninque botö wæætë botö beyæ ante në guingo imonte wædingä beyæ ante næmæ guingo imonte wæcæboïmpa.

9 Mänömainö äninque Itota godömenque,
—Botö weca ongömini pancaminiya ïñömö iïmai ba acëminimpa, ante näwangä ämopa. Minitö ayæ wænämaï miïmini quëwëñömini botö Wængongui Awënë Odeye ïnömo inte tæi pñæninqe Tæiyæ Awënë babo acëminimpa, ante Itota apænecäïmpa.

Itota wæmö pönï ñäö bai ëmongä bacä adänipa

(Mäateo 17.1-13; Odoca 9.28-36)

² Mäninö ante apænecä ate Itota ïñömö önompo æmæmpoque go adoönæque ïninqe go ate Pegodo ingante Tantiago tönö Wäö ïnate mänimpodänique ïnänite änanquidi mäicä adodänique æibæ æite ongongadänimpa. Æite ongöñönäni edæ Itota awinca tömënanäni ayönäni edæ wii cöwë nänö ëmönö bai wæmö pönï ñäö bai edæ ëmongä bamongä adänitapa. ³ Tømengä weocoo ñäö pönï näämænta weocoo ëñacä adinque tömënanäni, Ædö cæte iincoo bai näämænta pönï yamonte cæquinänii, ante edæ wædänitapa. ⁴ Ayæ ayönäni edæ doyedë pönï në æigaïna ïñömö Möïtee wodi tönö Ediya wodi incæ Itota tönö edæ godongämæ pö gongæninque tedegöna adänitapa. ⁵ Adinque Pegodo guiquënë Itota ingante,

—Awënë në Odömömi ëñëmi. Ìñömö mönö waa pönï ongonte awædö. Bitö ämi ïninqe mönitö oncontaïcoo mentaiya go adotaique mænöninque bitö oncontai ante adotaique Möïtee oncontai ante adotaique Ediya oncontai ante adotaique mænö-maimöni, angantapa.

⁶ Edæ Wäö tönö Tantiago tönö godongämæ guïñente wædinque Pegodo, Æbänö ante tedequimoo, ante ëñënamäi inte mäninö ante önonque tedecantapa. ⁷ Ayæ edæ boguimämo ocabogadäni obo wææninqe ganta owo ïninqe öñöpæmoque boguimämodë apænecantapa. “Ïngä ïñömö botö Wengä botö në waadecä ïngampa cæminii. Tømengä pönö apænecä ate ëñëdäni,” ante apænecä ëñengadänimpa. ⁸ Æñëninque quingæ gomö gomö ayönäni wada edæ do dæ goda ïñönte Itota adocanque ñöwo tömënanäni weca ongongä agadänimpa.

⁹ Ayæ änanquidi ïnö wæë pönönäni Itota tömënanäni ïnänite angantapa. Mäninö mini adinö ante minitö gode änämaï pæ wëneyömini botö Waobo ëñagaïmo inte edæ wænte ate ñäni ömæmoncæboïmpa. Ñäni ömæmömo ate minitö edæ mänïñedë ate apænecæminimpa. ¹⁰ Ante angä ëñëninque tömënanäni gode änämaï pæ wënedäni incæ nämæneque, Mäninö tømengä nänö ñäni ömæmonguimämo ante æbänö ante apænecää, ante wædönänimpa. ¹¹ Ìninqe Itota ingante,

—Mänömaï ï ïninqe, Ediya wodi täno poncæcäïmpa, ante në ödömönäni ïñæmpa quïnante apænëdänii.

¹² Äñönänite Itota wæætë,

—Ediya wodi nāni ānongā iñōmō tāno pongā ingampa. Nāwangā impa. Pōn-
 inque tōmengā, Doyedē ingai bai nōwo wæætē adobaī nō pōni bacāimpa, ante
 badongampa. Īnque dodāni Waocā nē ēñāquingā ingantedō ante yewæmōninque,
 Nanguī caate wæyongante wadāni pīinque Baa ancædānimpā, ante quīnante
 yewæmongadānii, ante pōnēmīni. ¹³ Incæte botō iīmaīnō ante apænebo ēñeedāni.
 Nōwocā mōnō Ediya iñongā inte do pongāimpa ante aquēnē. Tōmengā pongā ad-
 inque wadāni edæ dodāni nāni yewæmongaiñō bai adobaī cædinque quīēmē ante
 nāni cæinēwēnō ante do cædānipa, ante Itota tōmengā tōnō nē æidīnāni inānite
 apænegacāimpa.

Itota wēnæ ingante angā go ate wēñængā waa bacampa

(Māateo 17.14-21; Odoca 9.37-43)

¹⁴ Itotaidi māniī wææninqe tōmengā nānō nē ēmīñænāni æidāmai ināni weca
 ponte ayōnāni wadāni nanguī ināni goto gongænāni adānitapa. Nē æidāmai ināni
 tæcæguedē ongōñōnānite nē wææ odōmōnāni guiquēnē tōmēnāni tōnō wææt-
 edō wæætē ānāni adānitapa. ¹⁵ Itota do pongā adinque edæ goto gongænīnāni
 tōmānāni guīñente wædinque wadæ pogodo ponte bee tēninque, Bitō pōmi, ānāni-
 tapa. ¹⁶ Āñōnānite Itota,

—Tōmēnāni tōnō quīnō ante apænedinque wæætedō wæætē āmīni.

¹⁷ Āñongante adocanque tæcæguedē ongongā inte wæætē apænedinque,

—Awēnē nē Odōmōmi ēñēmi. Botō wengā wēnæ babetadecā ingante ēwocampa,
 ante wædinque botō tōmengā ingante bitō weca ænte pontabopa. ¹⁸ Æyōmōmē
 ongōñongante wēnæ pō guīdinque wēñængā ingante cōwē gotodongā tæ go
 wæængampa. Īnque wēñængā wodi māwanta tadedinque wentoquēnē wento-
 quēnē angadinque pæ opate bacampa. Mānōmai cæcā ate wædinque botō bitō miñæ
 nē godāni inānite, Wēnæ inte wido cæedāni, āmo cæquēnēnāni incæ ædō cæte
 cæquīnāni.

¹⁹ Ante apæneyongā Itota tōmēnāni inānite,

—Nōwomīni mīni pōnēegade. Botō mīnitō weca æpogadō quēwēmoī. Pōnēnāmai
 inte cæyōmīnite botō æpogadō piyānē cæte wæwēmoī. Edæ wēñængā ingante botō
 weca ænte māmōmīni pongædāni, angantapa.

²⁰ Ænte pōnāni ate wēnæ incæ Itota ingante adinque do wēñængā ingante do do
 wæate bai cædinque wido cæcā tæ go wæængantapa. Ayæ māwantabo tadedinque
 бага wentoquēnē wentoquēnē angadinque edæ pæntæmæ pæntæmæ gocā. ²¹ Ad-
 inque wæmpocā ingante Itota,

—Æyedēnō mānōmai bacāi.

Āñongante,

—Wēñængāñedē do badingā inte quēwengampa. ²² Quēwēñongante wēñængā
 ingante wantæ wantæ iñō wantæ wantæ iñō, Gongapamō guitodōmo gonte
 wæncæcāimpa, ante wēnæ incæ cæcā. Ayæ, Æpænē adobaī guitodōmo becadote
 wæncæcāimpa, ante cæcampa cæbii. Nāwangā tæi pīñæmi ininque bitō mōnatō
 wæwēnō ante pōnente cæbaimipa. ²³ Āñongante,

—Bitō guiquēnē wabānō wede pōnēmi imitawoo. Edæ wede pōnēñongante edæ
 waocā beyæ tōmāā do cæte impa.

²⁴ Angā ēñente wædinque wæmpocā iñōmō yedæ āninque,

—Bitö imite pönemopa. Edæ botö æmæ pönönö ante bitö cæbi ate ædæmö wede pönente bacæboimpa, ante wæbopa.

²⁵ Ante äñongä nangui inäni do pogodo pönäni ate wædinque Itota inñömö wænæ në wentamö ewocacä ingante piinte äninque,

—Wænæbi bitö, Babetamonca babetade bacædänimpa, ante në cæbi inömi inte nñowo tao godinque wii adodö guiquimi incæbiimpa, angantapa.

²⁶ Eñente wædinque nangui Yæ yæ äninque wëñængä ingante wido cæcä do do wäate tæ go wæäninque päntämæ päntämæ goyongante wænæ tao gocantapa. Gocä ate wëñængä do wænänäni bai öñongä ate wædinque pancadäniya, Æmæwo wæmaingampa, ante wædäni. ²⁷ Ininque Itota inñömö pædæ wææmpo önompo bæi ongonte ængæ ganticantapa.

²⁸ Itota ayæ wadæ godinque oncönë pö guiyongante tömengä nänö në emiñænäni awëmö äninque,

—Mönitö guiquënë bitö bai wido cæcæte ante cædinque quinante wido cædämai intamönii.

²⁹ Ante wæyönänite,

—Wænæ mäningä bai ingante wido cæcæte ante cædinque wantæpiyæ cænämai inte Wængongui ingante nangui apänete ate wido cæcæimpa, ante apäneccä ëñengadänimpa.

Wænönäni wæncæboimpa, ante Itota adodö ante apäneccä

(Mäateo 17.22-23; Odoca 9.43-45)

³⁰ Ayæ wadæ gote Gadideabæ wodo pänta godinque Itota, Wadäni adämai inñönänite ³¹ botö emiñænäni adodänique ongöñönänite odömonte apänebo ëñencædänimpa, ante cæcantapa. Ayæ tömönäni inänite iimainö ante awëmö apäneccantapa.

—Adocanque, Waocä në ëñagaingä æyömönö ongongää, ante godö odömöninque botö imote waodäni nempo pædæ godongä æncædänimpa. Në äñäni wæætë botö imote edæ wænönäni näñe wæncæboimpa. Incæte mëönaa go adoönæque inñonte botö adobo incæ nñäni ömæmoncæboimpa.

³² Ante apäneyongante tömengä emiñænäni önömoncaque ëñëninque ëñëñämai inäni inte, Æbänö ante tedebii, ante guinente wædinque änämai pæ wëñengadänimpa.

Æcänö nñænængä inte në angä inguingää, ante tededänipa

(Mäateo 18.1-5; Odoca 9.46-48)

³³ Mänii godinque Capënaömö inñömö ponte oncönë guidinque tömönäni inänite Itota,

—Idömæ pöninque æbänö ante tedeminitawo.

³⁴ Äñongante edæ, Mönö cabo incæ æcänonque nñænængä pöni inongä inte në angä inguingää, ante tedewëñänäni inte guingo imonte wædinque pæ wëñedänitapa. ³⁵ Ininque tæ contadinque Itota inñömö, Dote, näni äincabo inänite, Pöedäni, angä pönäni ate,

—Yæcado ongömote, ante në äñongä inñömö tömengä wæætë yæmiñængä pöni gote ongonte tömänäni beyæ në godö cæcä bate waa tobaingampa.

³⁶ Äninqe Itota wēñængä guiyangä ingante äninque tæcæguedē goncæte pæ mäninqe tōmēnāni inānite wæætē apænedantapa.

³⁷ —Æcänō botō ēmōwo apænedinque mäningä bai wēñængä ingante, Pöe, ante godō waa cæcä iñōmō tōmengä iñōmō edæ botō imote edæ do, Pöe, ante pönō waa cæcä ingampa. Ayæ edæ botō imote, Pöe, ante nē waa cæcä iñōmō tōmengä iñōmō wii botō adoboque imote waa cæcä ingampa. Wæætē botō imote nē da pönōningä ingante Wængongui ingante adobaï edæ, Pöe, ante do waa cæcampa, ante Itota apænegacäimpa.

Mönō imonte æcänō pīnāmaï ina mönō tönō cæcampa

(Mäateo 10.42; Odoca 9.49-50)

³⁸ Itota mänōmaï apænecä ēñēñōnāni Wäo guiquēñē,

—Awēñē nē Odōmōmi ēñēmi. Wacä bitō ēmōwo apænedinque wēñæidi inte wido cæcä atamōnipa tōö. Ayæ, Wii mönō cabo ingampa, ante adinque mönitō tōmengä ingante Baa äninque, Cædāmaï imäwe, antamōnipa.

³⁹ Ante apæneyongante Itota wæætē,

—Ee amini cæcädäni. Edæ æcänō botō ēmōwo apænedinque öönädē nāni cæï bai mä cæda, tōmengä ædō cæte botō imotedō ante do wēñæ wēñæ anguingä. ⁴⁰ Edæ mönō imonte æcänō pīnāmaï ina tōmengä mönō cabo inongä inte bai mönō tönō godongämæ cæcä ingampa tōö. ⁴¹ Näwangä ämopa. Bitō Codito nänō nē emiññänōmi imi ænte bee, ante wacä mīnitō imīnite æpæ adotacaque pönongä bemini ininque nē pönōningä wæætē tōmengä nänō pönōninō beyæ eyepæ æncæcäimpa, angacäimpa.

Wacä oda cæcæcäimpa, ante nāni wæquinque cædānipa

(Mäateo 18.6-9; Odoca 17.1-2)

⁴² Mänōmainō apænedinque Itota godōmenque apænedantapa. “Wadāni godō cædāni beyæ botō imote nē pönēnāni incæ pancadāniya edæ dobæ oda cæte wēñæ wēñæ cædānipa. Ininque, Wēñængä adocanque guiyangä pōñi ingä incæ oda cædāmaï incæcäimpa, ante wææ cæcæte ante cædinque nē godō cæcæ cædingä ingante iïmaï cædāni ininque tōmengä toquēnengä imaingampa. Waodāni nāni dacæ godō dacæ godō cæquinca ñænænca äninque tōmengä önömenca æ wēmencadinque tōmengä ingante tæcætibæ wido cædāni ininque tōmengä edæ, Wēñæ wēñæ cædāmaï inte becadote wæmo beyænque Wængongui botō imote wii godōmenque pangampa, ante wædinque waa toquēnengä imaingampa. ⁴³ Bitō önompoca cædinque wēñæ wēñæ cæbi ininque bitō önompo aa wi æmpote bai wido cæte bai cædinque wēñæ wēñæ bitō cædinō ante wido cæbæwe. Ìñæmpa inguipoga quēwēninque æmæmpoque empobi incæte bitō cōwē bitō wænāmaï quēwenguinque öönädē æibi waa imaimpa. Edæ wii tipæmpoga empobi inte edæ bitō gonga cōwē bæcote wæwenguiñōmō wii æmæwo wido cæte wæquimido anguēñē. ⁴⁴ Edæ mǎniñōmō tadōmengadænguipo iñōmō cængota wænāmaï gonga ēmönāmaï bæcoquinō anguēñē.”

⁴⁵ Ayæ, “Bitō önōwaca wapiticæ godinque ēñēñāmaï cæbi ininque önōwa aa wi æwate bai wido cæte bai cædinque wēñæ wēñæ bitō cædinō ante wido cæbæwe. Ìñæmpa inguipoga quēwēninque æmæwaque ewabi incæte bitō cōwē bitō wænāmaï quēwenguinque öönädē æibi waa imaimpa. Edæ wii tipæmpoga ewabi inte edæ bitō tadōmengadænguipo wido cæte wæquimido anguēñē. ⁴⁶ Edæ mǎniñōmō tadōmengadænguipo iñōmō cængota wænāmaï gonga ēmönāmaï bæcoquinō anguēñē.”

⁴⁷ “Ayä ægodawate tæ go wæænte bai cædinque bitö awinca beyä ëñënamai cæbi adinque bitö awinca cäi cæmonte bai cædinque wënæ wënæ bitö cædinö ante wido cæquimi, ämo. Edæ bitö, Botö tipæmonga ëmonte incæ tadömengadænguipo wii goinente awædö, ante pörente wædinque edæ cäi cæmonte awinca æmæmonque ëmömi inte quëwëninque Wængongui Awënë Odeye weca æite waa tobaïmipa. ⁴⁸ Edæ mäniñömö tadömengadænguipo iñömö cængota wænämaï gonga ëmönämaï bæcoquino anguënë,” ante Itota apænecantapa.

⁴⁹ Ayä godömenque apænedinque, “Waodäni, Ööingä nömænämaï ingæimpa, ante cædinque cati ñænæ quimönique gongapamö æñö cæte biyadänipa. Waomini tömämini adobaï caate wædinque ædæmö biyate bai badinque nömænämaï inguiminiðö anguënë. ⁵⁰ Cati quimonte cæi iñömö waëme inte gæpæ ëmompä. Incæte nongæmonte ba adinque minitö wæætë æbänö nö cæmini wæætë gæpæ ëmongui i. Ööingä waëme bacæimpa, ante quimonte cæi wëä wëä pæmönäni bai cædinque minitö mini caipæ incæ piyænë cæte wacä ingä wacä ingä waa cæte quëwëedäni,” ante Itota odömonte apænecä ëñengadänimpa.

Nänöogængä ingante näni pämäno ante

(Mäateo 19.1-12; Odoca 16.18)

10 Mänii Capënaömmö ongöninque wadæ tao iguidinque Oodeabæ ganca Oododänö æmä wedeca pongantapa. Pongä adinque nangui inäni wæætë pö pö cædäni adinque Itota cöwë nänö odömoi bai adobaï odömonte apænecä ëñënanitapa. ² Paditeoidi guiqënë, Godö ämö ëñëninque Itota adodeque oda cædete wæcä tocäi, ante cædinque tömengä weca pöninque, Itota ëñëmi, änänitapa. Wængongui æbänö ante wææ angacäi. Waocä tömengä nänöogængä ingante pämängä ininque edæ nö cæte intawo.

³ Ante äñönäni tömengä wæætë,

—Möitee wodi æbänö ante yewæmöninque minitö iminite wææ angacäi.

⁴ Angä ëñëninque,

—Æmäwo pämämo goquimi, ante yewæmöninque mäninta bitö yewæmöninta onquiyængä ingante godömi ængä ate bitö önonque pämäncæbiimpa, ante Möitee wodi wææ ante yewæmongacäimpa.

⁵ Ante apænedäni ëñëninque Itota,

—Iñæmpä, Mimmö ömædëmini inömini inte minitö wënæ wënæ cæinëmini iminipa, ante wædinque Möitee wodi, Mänömaï cæedäni, ante yewæmongacäimpa. ⁶ Edæ wëñëñedë Wængongui nänö badongaiñedë tömengä, “Onguïñængä ingampa, ayä, Onquiyængä ingampa, ante badongacäimpa. ⁷ Mänömaï beyä waocä mämpocä ingante ëmö cædinque wäänä inante ëmö cæte godinque onquiyængä ingante, Botö nänöogængä, ante æmäwo mongä ate tömëna nänä gæncaya inöna inte möninque guëa quëwencædäimpa. ⁸ Ininque æmäwo möninque tömëna nänä gæncaya incæ adocanque bai bate quëwencædäimpa,” ante Möitee wodi nänö yewæmongai bai cædinque tömëna nänä gæncaya do möninque nänëñë inämaï adocanque bai do bacäimpa. ⁹ Mänömaï beyä Wængongui, Adocanque bai inapa, ante nänä gæncaya nänö në badongaiña iñönote waocä wæætë pango cædämaï incæcäimpa.

¹⁰ Angä wædinque Itota tönö oncönë guidinque tömengä miñä në godänique, Æbänö ante ämitawo. Godömenque apænebi ëñëmönie. ¹¹ Ante äñönänite Itota,

—Æcänö näwä nänöogängä ingante pämäninge wacä onquiyängä ingante möna tömengä wiwa towengä do badinque näwä nänöogängä ingante wiwa cæcampa. ¹² Onquiyängä guiqüenë tömengä nänöogängä ingante pämente godinque wacä ingante godö mongä ininque tömengä adobaï wiwa towengä bacampa, ante Itota apænecä ëñengadänimpa.

Wëñænäni inänite gampo cæcadinque waa apænecampa

(Mäateo 19.13-15; Odoca 18.15-17)

¹³ Ayä ate, Wëñænäni inänite Itota pönö gampo cæcadinque waadete apænecæcäimpa, ante cædinque wadäni tömengä weca ænte pö ænte pö cædäni adinque tömengä miñä nê godäni guiqüenë, Ænte pönämaï iedäni, äninque Baa Baa änäni. ¹⁴ Ate wædinque Itota ænguï badinque nê Baa äñönäni inänite wææ äninque,

—Wëñænäni inänite ee aminï poncædänimpa. Edæ mäninäni näni pönönö bai adobaï pönänäni inte edæ Wængonguï Awënë Odeye nempo do quëwënäni inänipa. Ininque minitö iñömö wëñænäni inänite Baa änämaï iedäni. ¹⁵ Edæ näwangä apænebo ëñeedäni. Wëñängä do pönengä inte Ao angä ingä bai Wængonguï Awënë Odeye ingante do pönëninque nê Ao änäni iñömö tömënanique tömengä nempo guidinque quëwënäni. Wadäni guiqüenë Wængonguï Awënë Odeye ingante Baa ante pönänämaï inäni guiqüenë tömënanï ædö cæte tömengä nempo guidinque quëwen-guïnänii, ante Itota apænecäcäimpa.

¹⁶ Äninque edæ wëñænäni inänite bæi ongonte pæ mäninque, Wængonguï minitö iminite waadete pönö cæcæcäimpa, ante Itota gampo cæcacä gampo cæcadinque waa apænecäcäimpa.

Mäincoo nanguï ëacä Itota weca ponte apænecampa

(Mäateo 19.16-30; Odoca 18.18-30)

¹⁷ Ayä godömenque gocæ cæyongä wacä edæ Itota weca pogodo ponte da guicapodinque,

—Awënë nê waa Odömömi apænëbi ëñëmoe. Botö æbänö cædinque cöwë wänämaï wantæpiyæ quëwëmaïmoo.

¹⁸ Äñongante Itota edæ,

—Wængonguï adocanque nê waa cæcä iñongante bitö botö imote, Nê waa cæbi imipa, ämii. ¹⁹ Iïmaï cædäni, ante Wængonguï nänö wææ angainö ante bitö tömëmi do ëñëmipa. “Wacä ingante godö wänönämaï ie. Bitö nänöogängä inämaï iñongante godö guëa mönämaï ie. Wacä qui adinque awëmö änämaï ie. Wacä wënæ wënæ cæcä atabopa, ante godö babæ wapiticä änämaï ie. Wacä qui æncæte ante cædinque babæ cædämaï ie. Wæmpocä ingante wäänä inante waa adinque tömëna inante godö waadete cæe,” ante wææ yewæmongacäimpa, ante bitö edæ do ëñëmipa, angantapa.

²⁰ Ante apænecä ëñëninque nê äningä guiqüenë Itota ingante wæætë,

—Awënë nê Odömömi ëñëmi. Botö mäninö bitö änö bai tömänö ëñente cædinque pægaboï ae.

²¹ Apænecä ëñëninque Itota tömengä ingante cöwä adinque waadete pönëninque, —Adodeque ayä ëñente cæquënëmi imipa, ante ämo ëñëe. Öönädë bitö wæmoncoo ænguinque edæ nõwo godinque imæca bitö mänincoo tömancoo godonte

æninque bitō æninta wæætē òmæpodāni inte wædāni inānite tōmanta godōmi æncædānimpa. Ayæ edæ botō imote tee empote pōe.

²² Angā ēñēninque, Botō māincoo nanguī impa, ante pōnente wædinque nē ēacā iñōmō nanguī wæwēninque wadæ gogacāimpa.

²³ Gocā adinque Itota godongāmæ adinque tōmengā nānō nē ēmiñænāni inānite, —Wængonguī Awēñē Odeye nempo guīite quēwencæte ante cædinque waodāni òmæpodāni inte botō miñæ pōnānipa. Māincoo nanguī ēacā guīquēñē æbānō cæte òmæpocā inte botō miñæ ponte guīite quēwenguinggā, angantapa.

²⁴ Īninque tōmengā miñæ nē godāni tōmengā nānō apænedō beyæ ante, Æbānō angā, ante guīñente wæyōnānite Itota wæætē,

—Botō wēmīni ēñēdāni. Wængonguī Awēñē Odeye nempo guīite quēwencæte ante cædinque ante waocā māincoo mangā beyænque eyepæ cæcampa diyæ guīiquinggā. ²⁵ Edæ cāmeyo guīyangā ingampa diyæ daagō guīyampite pædæ tacā. Īninque, cāmeyo ñænængade inongā inte pædæ tadāmaī ingā baī nē ēacā adobaī ingampa. Tōmengā nāmā ayongā ñænængā inongā inte edæ æbānō cæte Wængonguī Awēñē Odeye nempo do wāānē guīite quēwenguinggā.

²⁶ Ante apæñecā ēñēninque godōmenque nanguī pōñi guīñente wædinque tōmēnāni nāmāneque tededinque,

—Īñæmpa mānōmaī ī Īninque æcānō wāānē guīite quēwenguinggā.

²⁷ Ante nāmāneque tededāni inānite adinque Itota,

—Waomīnique incæ nāmā mīni cædō beyænque ædō cæte quēwēmaīmīni. Wængonguī guīquēñē wīi wao baī cædongā inte nāmā incæ tōmānō do cæcā ingampa.

²⁸ Ante apæñecā ate Pegodo tōmengā ingante āninque,

—Mōnitō iñōmō mōni ēadincoo owæ caate bitō miñæ òmæpomōni pōmōni ae.

²⁹ Tæcæ āñongante Itota tōmēnāni inānite wæætē,

—Mīnitō botō beyæ ante pōñēninque waa pōñi botō apænebodō beyæ ante pōñēninque pōmīnitapa. Īninque edæ botō iūmaī ante nāwangā āmopa. Æcānō māñinō beyæ tōmengā oncodo taodique tōmengā tōññadāni inānite ēmō cædinque mæmpocā tōnō wāānā inante ēmō cæte wēñænāni inānite ēmō cæte godinque tōmengā gōneacoo ēmō cæte owæ caate godinque botō miñæ æcānō wadæ pōna iñōmō, ³⁰ tōmengā iñōmō inguipoga quēwēnincoo wēñēñē nānō ēadincoo baī adopocoo æninque godōmenque adopo adopo tiēē ganca māñimpoga adopo æncæcāimpa. Ayæ onconcoo æninque tōmengā tōññadāni tōmengā badāidi tōmengā wēñænāni tiēē ganca baī yebænāni baī æninque, tōmengā gōneacoo wæætē bacoo æncæcāimpa. Incæte tōmengā ingante togænte pancædānimpa. Īncayæ pōmāmo bayonte botō, Bitō quēwenguīmāmo, ante godōmo æninque tōmengā cōwē wantæpiyæ wænāmaī quēwencæcāimpa. ³¹ Incæte edæ tāno yæcado ongōñināni inte pancadāniya wæætē yæmiñæ gote ongōñāni bacædānimpa. Ayæ yæmiñæ ongōñināni inte wæætē yæcado ponte ongōñāni bacædānimpa, ante Itota apænegacāimpa.

Wæncæboimpa, ante Itota wæætē adodō ante apæñecampa

(Māateo 20.17-19; Odoca 18.31-34)

³² Māñiī Eedotadēe ante ñōwo ānāmēñē æiyōnāni Itota incæ tāno beyænte æicā. Ate wædinque tōmengā ēmiñænāni guīquēñē, Tōmengā nānō wænguinque tāno æicampa, ante wæyōnāni ayæ pōñāni guīquēñē guīñente wædōnānimpa. Itota iñōmō tōmengā miñæ, Dote, ante nāni gocabo inānite nāñēñē ænte māocā goyōñāni

tömengä, Botö imote iimaï cädäni bacæboimpa, ante edonque apænecantapa. ³³ Æññönänite, “Nöwo iñömö mönö edæ Eedotadëe iñömö æicæimpa. Mäniñömö æi pö gongæmö ate adocanque, Waocä nê ãñagangä æyömönö ongongää, ante godö odömongä bæi ongonguinäni. Ayæ, Wængongui quï, ante nê godönäni ñænænäni tönö nê odömönäni nempo tömengä botö imote pædæ godongä æinique tömënäni wæætë botö imote apænte æinique, Cöwë wæncæcäimpa, æinique oodeoidi inämaï inäni inänite wæætë pædæ mäo godönäni. ³⁴ Æinique iinäni wæætë botö imotedö ante badete todinque botonga tawimæ towæ tänongadinque æmontaimenca tæi tæi pänäni æmogate wæyömote botö imote godömenque wænönäni wæncæboimpa. Wæætë do wænimo inte botö mëönaa go adoönæque iñonte ñäni ömæmoncæboimpa,” ante Itota wæætë apænegacäimpa.

Tantiago tönö Wäö, Mönatö ämaï cæe, ante wædapa

(Mäteo 20.20-28)

³⁵ Ayæ Tebedeo wëna Santiago tönö Wäö iñömö Itota weca pöninque,
—Awënë nê Odömömi ëñëmi. Mönatö quiëmë ämöna cæbi waa tobaimönapa,

³⁶ Äna ëñëninque,

—Minatö beyæ quïnö cæbo æmïna.

³⁷ Äñongante,

—Awënë inömi inte bitö ñäö ëmömämödë tæe contadinque mönatö imönate iimaï cæcæbiimpa, ante ämönapa. Adocanque bitö tömëmæmi inö adocanque dipæmæmi inö ämi tæe contaquimöna.

³⁸ Ante äna ëñente wædinque Itota wæætë,

—Inæmpa minatö ëñënamäi inte mänömaï ämïna awædö. Edæ botö nantate wæwenguimæ bai becabo bai minatö edæ adobai adotaca becate bai Ao ante botö beyæ nantate wæwenguimïnaa. Ayæ botö wænguimämo ante minatö adopænë guiite bai adobai Ao ante botö beyæ guiñënamäi inte wænguimïnaa.

³⁹ Ante äñongante,

—Ao ante guiñënamäi cæcæmönaimpa.

Ante apæneyönte Itota,

—Botö nanguï caate wæwëmo bai minatö adotaca becate bai äanque bai caate wæquimïna iminapa. Botö wænguimämo ante minatö adopænë guiite bai adobai wænguimïna iminapa. Näwangä impa. ⁴⁰ Incæte botö tömëmæmo inö botö dipæmæmo inö æcänö tæe contaquïna, ante wïi botö godö ämo imopa. Wæætë, Awënë containpaa mäninaque tæe contaquïna, ante do badongangä inte Mæmpo Wængongui iñömö tömengä adocanque godö angä contacädaimpa, ante Itota apænegacäimpa.

⁴¹ Mänömainö ante tededapa töö, ante ëñëninque wädäni diete ganca tömengä miñæ nê godäni guiquënë Santiago tönö Wäö inate piinänitapa. ⁴² Piinäni ate wædinque Itota aa pecä pönäni ate tömënäni inänite wæætë apænecantapa.

—Minitö, Oodeoidi inämaï inäni æbänö cädänipa, ante do ëñëminipa. Tömënäni nani, Awënëidi, ante nê äñönäni iñömö nämä beyænque ante cædinque nanguï piinte änäni wædinque awënëidi nempo quëwënäni incæ wæætë do ëñente cädänipa. Ayæ tömënäni weca nê ñænænäni inönäni iñömö, Tömëmoque ämo ëñente cädäni, ante piinte änäni wædänipa. ⁴³ Minitö guiquënë tömënäni nämä beyænque ante nanguï änäni bai wïi adobai cæquënemini iminipa. Wæætë miini

cabo iñömīni adocanque ñænængä pōnī ingä bacæte ante cædinque tōmengä tāno edæ mīnitō beyæ nē cæcä baquēnengä ingampa. ⁴⁴ Ayæ yæcado ongōinente wæcä iñömō tōmengä yæcado ongoncæte ante cædinque wæætē edæ yæmīñæ pōnī gote tōmānāni beyæ nē cæcä badinque tōmengä nāmā beyæ ante cædāmaī inguēnengä ingampa. ⁴⁵ Edæ Waobo ēñagaīmo inte adobaī, Botō beyæ pōnō cæcædānimpa, ante wīī pōmo īmopa. Wæætē wadāni beyæ godō cæcæte ante pōmoimpa. Ayæ edæ nan-guī ināni tee mōnete baī wæwēñōnāni botō wæætē, Tōmēnāni wibænete tadinque quēwencædānimpa, ante tōmēmo wepæ incæ godoncæte ante pōmo īmopa, ante Itota apænegacāimpa.

Batimeo babetamongä ingante Itota angä waa bamongä

(Mäteo 20.29-34; Odoca 18.35-43)

⁴⁶ Itota mäninō godinque Eedicoo nāni quēwēñōmō pongadānimpa. Tōmengä nānō nē ēmīñænāni tōnō tæiyænāni tōnō Eedicoo iñömō wodo pænta tayōnāni wacä babetamongä Timeo wodi wē Batimeo iñömō taadō wedeca, Pōnōmi æmoe, ante ānecōnongäimpa. ⁴⁷ Īnīnque wadāni, Itota Nāatadeta pædingä inte pongampa, ante tededāni ēñēnīnque tōmengä ogæ tedete,

—Itota ēñēmi. Awēnē Dabii wodi pæīmi iñōmi inte botō wædō ante pōnente cæe.

⁴⁸ Ante tæcæ āñongante godongāmæ godāni pancadāniya, Apocænē inguēnē quēwēe, ante ānāni incæte tōmengä godōmenque yedæ aa pedinque,

—Awēnē Dabii wodi pæīmi iñōmi inte botō wædō ante pōnente cæe.

⁴⁹ Ānīnque ancaā aa pecä ēñēnīnque Itota næ gongæninque,

—Babetamongä ingante aa pemīni pongædāni.

Angä ēñēnīnque babetamongä ingante,

—Ængæ gantidinque wædāmaī imāwe. Bitō imite, Pōe, angä apa quēwēe.

⁵⁰ Ānāni ēñēnīnque babetamongä incæ ayacooga gāni tadongate do ængæ gantidinque Itota weca pongä. ⁵¹ Adinque,

—Bitō beyæ quīnō cæquīmoo.

Āñongante babetamongä,

—Awēnē nē Odōmōmi ēñēmi. Cæbi waa bamonte aboe.

⁵² Angä ēñēnīnque Itota,

—Waa bitō bamonguinque botō imote pōnēmitapa. Ōnonque wadæ gobāwe.

Āñongante tōmengä do waa bamonte adinque Itota miñæ taadonque gogacāimpa.

Itota Eedotadēē iñömō pongampa

(Mäteo 21.1-11; Odoca 19.28-40; Wäo 12.12-19)

11 Mānīi gote Eedotadēē obo pōnīnque Odibowænquidi nāni anquidi ontacamō goinō Betapaguee nāni quēwēñōmō ganca ayæ Betānia nāni quēwēñōmō ganca pōñōnāni Itota tōmengä miñæ nē goda inate mēnaā inate da godōnīnque angantapa. ² Īmaī angantapa.

—Mānīi nāni quēwēñōmō ongō amīna. Tōmēñōmō go guīite ayōmīna bodo wē picængä incæ waocä ingante mongænāmaī īningä inte ñāni ñæingä a ongongä acæminaimpa. Adinque ñī cæyænte ænte pōeda. ³ Wacä, Quīnante ñī cæyæmīnaā, ante wææ angä ēñēnīnque mīnatō wæætē edæ, Mōnō Awēnē nānō ænguēnēnō ante ænte gomōnapa. Tōmengä īinque cæte ate adodō do da pōnongä æedāni, ante æeda.

⁴ Angä ēñente gote ayöna bodo wē taadö wedeca odemö awäa nānō ñä a ongö adinque ñi cæyænte ænte gocæte ante cæda.

⁵ Adinque māniñömö ongönäni guiquēnē,
—Bodo wē quimä ñi cæyæwēmīnaa.

⁶ Äñönänite Itota nānō äñinö adodö äna ēñēninque, Ao äñäni. ⁷ Äñēninque ñi cæyænte Itota weca töi töi ænte pönatapa. Ænte pöninque tömēna wecoo yabæcooque æidämä wo cæyabæda ate Itota wænömēnæca inö æi yiyä tæ contacantapa. ⁸ Adinque nangui inäni, Itota nānō ponguinö, ante tömēnāni wecoo yabæcooque pönö bee podöwayönäni wadäni guiquēnē gōnea gote yæpæma öñabo tapænte māmö bee bee podöwadäni ate tömengä podöwainonque gocantapa. ⁹ Gocä adinque täno godäni tönö ayä pönäni tönö nangui inäni godongämä godinque yedä äninque,

—Möni quëwenguinque impa, ante, Badogaa, ante tomönipa. Awënë Wængongui ëmowo beyænque pömi ininque bitö toquinque edä Wængongui bitö imite waa cæcæcäimpa. ¹⁰ Mönö mämä Dabii wodi päimi inömi imipa, ante adinque mönitö, Awënë odeye Dabii wodi nempo näni waa quëwengai bai bitö nempo mönitö waa quëwenguinque impa. Ininque, Badogaa, ante yedä äñömöni æibæ pöni quëwēnāni incæ, Badogaa, ancædänimpa.

¹¹ Ante yedä äñönäni Itota Eedotadëe pö ti wæäninque Wængongui oncö ñænæncönē yabæcönē pö guidinque māniñömö ongoncoo tömäa acantapa. Ayä, Gäwadecä pöni ba awädö, ante tömengä ëmiñænäni dote ganca inäni tönö wadä tao Betänia gogacäimpa.

Iigowä ömæcawä i adinque Itota püingampa

(Mäateo 21.18-19)

¹² Gote Betänia monte baönä pönönäni Itota gæwænte wædinque, ¹³ Quinö impa cænguimoo, ante gomö ayongä iigowä öñabo ëmä incæ incate bocabaimpa, ante gote ayongä ömæcawä acantapa. Önönepoque i beyä incadämaï intapa. ¹⁴ Ante iigowä inte apænedinque,

—Iigowä ëñēmi. Incaquinämaï inte bitö incaquimi cænguinanii.

Äñongante tömengä nānö nē ëmiñænäni edä ëñēe gongænänimpa.

Wængongui oncö tæiyä waëmö bacäimpa, ante cæcä

(Mäateo 21.12-17; Odoca 19.45-48; Wäö 2.13-22)

¹⁵ Do näni ponguēnēnö Eedotadëe pönänitapa. Itota inömmö Wængongui oncö ñænæncönē yabæcönē pö guidinque māniñömö maincoo mänäni tönö wadäni godonte æncæte ante godongämä pönäni tönö ongönäni adinque tömänäni inänite, Oncodo tao goedäni, ante da tadongä tao godänitapa. Ayä campio ante näni godonte æimpa tönö equemö godoncæte ante nē mänäni näni cönöimpa tönö bæ tacä tömampaa guidömëmä tæ go wææntapa. ¹⁶ Ayä wadäni maincoo mongænte yacönenque gocæte ante cæyönänite Itota, Iincodo mongænte godämaï iedäni, äninque wææ cæcantapa. ¹⁷ Ayä tömēnāni inänite angantapa.

—Wængongui beyä iimaïnö ante yewæmongatimpa. “Tömämä quëwēnāni botö oncönē pö guidinque botö imote apænecædänimpa,” ante Wængongui angä incæte mīnitö wēnæ wēnæ cæmīni beyænque Wængongui oncö incæ nē awëmö ö ænāni näni womöincönē bai wentamö bapa töö.

¹⁸ Ante odömönte apäneyongante, Wængongui qui, ante nē godönāni nānānāni tönö nē wææ ante odömönāni tönö ēñēē gönānitapa. Wadāni önönānique guiquēñē, Itota quīnante waa pönī apānecā ēñēmōnīi, ante wädāni. Adinque awēñēidi wæætē, Itota beyænque pīnāni wæcæ wæ, ante pönēninque Itota ingante guīñente wædinque, Quīnō cæmō wæmaingāā, ante wænoncæte ante pönente cægadānimpa. ¹⁹ Gāwadecæ bayonte Itotaidi iñömō oncodo tao godinque godömenque yabæque tao gogadānimpa.

Iigowæ ömæcawæ do guīñē wæ adānipa

(Mäateo 21.20-22)

²⁰ Baānæ ate iimō nāni pöninō adodō ponte ayönāni iigowæ yæwaguinto ætæwowate tömēwæ æi ayawæ edæ dobæ guingo iwate wänimpa, ante adānitapa.

²¹ Adinque Pegodo, Itota iimō nänō āni baī impa, ante pönēninque,

—Awēñē nē Odömōmi cōwā æe. Bitō piinte āniwæ inte iigowæ edæ dobæ guīñē wæ ataque.

²² Äñongante tömēnāni inānite Itota wæætē,

—Wængongui ingante wede pönēmæwedāni, angantapa. ²³ İi ānanquidi iñömō ongō iñonte waocā, “Änanquidi ēñēmi, āninque, Bitō cabænte wo gote gāwapāñē guīie,” angā ēñēninque ānanquidi tömē gāwapāno do wo gote guīquī ī, ante pönēmīnitawo. Edæ nāwangā ante mīnitō imīnite apānebopa. Æcāmenque incæ edæ æmæ pönēnāmaī inte, Botō änō baī do bacæimpa, ante wede pönēninque āna inique tömengā nänō āninō baī do æmaingampa. ²⁴ Mänōmaī beyæ botō mīnitō imīnite apānebopa. Mīnitō quiēmē incæ ante Wængongui ingante apānedinque, Tömengā nāwangā pönongā æncæboimpa, ante wede pönente apānemīni inique mīnitō āninō tömänō edæ do æncæmīnimpa.

²⁵ Ayæ edæ, “Mīnitō, Wīwa cæbo incæte Wængongui öönædē nē quēwēnongā inte botō imote pönō nīmpo cæcā inique botō waa tobaīmopa, ante wæmīnitawo. İñæmpa, Wængongui mänōmaīnō cæcæcāimpa, ante cædinque mīnitō tömengā ingante apānecæte ante ongōninque tāno piyāñē cæte cædāni. Wacā wēnæ wēnæ cæcā wædōmīni inte mīnitō wæætē tömengā ingante pönō nīmpo cædāni, ante Itota apānegacāimpa. ²⁶ Wæætē edæ mīnitō pönō nīmpo cædāmaī imīni inique mīnitō wēnæ wēnæ cædinō ante mīnitō Mæmpo öönædē nē quēwengā inongā inte tömengā adobaī nīmpo cædāmaī imaingampa,” ante Itota apānegacāimpa.

Awēñē imipa, ante æcänō ānaī, ante Itota ingante ānānipa

(Mäateo 21.23-27; Odoca 20.1-8)

²⁷ Eedotadēē iñömō adodō pönānitapa. Itota Wængongui oncō nānāncönē yabæcönē go guīite cægōñongā, Wængongui qui, ante nē godönāni nānānāni tönö nē wææ ante odömönāni tönö nē aadāni nāni Picæncabo, nāni ānāni tönö tömengā weca ponte ānānitapa. ²⁸ Tömengā ingante,

—Æcänō nē angā inte bitō imite angā cæbii, ānānitapa. Æcänō bitō imite, Nē āmi imipa, pönō āna æninque bitō nē āmi inte baī edæ mänōmaī cæbii. ²⁹ Ante wæyönānite Itota nāemæ āninque,

—Botō mīnitō änō baī adodeque ämo ēñēninque mīnitō wæætē apānemīni ēñēmoedāni. Apānemīni ēñente ate, Botō cædinō ante æcänō nē angā inte pönō āna æninque cæboī, ante botō wæætē apānebo ēñēmaīmīnipa.

³⁰ Wäo wodi ingante æcänö, Æpænë guidonguimi, äna ëñëninque tömengä wæætë guidongäi, ante pönëmini. Edæ Wængongui angä ëñente cæcantawoo. Wæætë waodänique änäni ëñente cæcantawoo. Æcänö Wäo ingante änaa, ante apænëmini ëñëmoedäni. ³¹ Angä ëñente wædinque tömënäni, Æbänö anguii, ante wæætedö wæætë nämäneque tededinque, “Wængongui angä ëñente Wäo guidongantapa, ante ämö bai Itota wæætë mönö imonte, ‘Quinante Wäo ingante pönënämai iminitapa,’ ancædongäimpa. ³² Ante pönente wædinque wæætë, Wængongui beyä nê apænecä Wäo wodi inongäimpa, ante tömänäni pönënanipa. Ante pönëninque awënëidi wæætë, Waodänique änäni ëñente Wäo guidongantapa,” ante mönö ædö cæte anguii. Edæ piinäni wæcæ wæ. ³³ Ante guifñente wædinque Itota ingante edæ,

—Wa. Æñënämai imönipa.

Ante wæyönänite Itota wæætë,

—Ininque edæ, Æcänö nê angä inte pönö äna æninque botö cæboi, ante minitö änö ante botö adobai apænedämai incæboimpa, ante angacäimpa.

Në aadäni inguënänäni incæ wiwa cædänipa, ante

(Mäateo 21.33-46; Odoca 20.9-19)

12 Ayæ mäniñedë Itota, Wængongui æbänö cæcää, ante ëñencædänimpa, ante imæca quëwënäni näni cæinö ante odömöninque iimäi apænecantapa. “Waocä yowementacodë mininque wæcæ da da mäo da caadinque, Tömëmoncoo ænte pinä pinä gäwate tömëmæ ontatodë wæ yopænte æñömö, ante ææ wote badongä. Ayæ yowementacodë awëmö guidämai incædänimpa, ante æi wænömënæca gomö aquinömö mänonngä. Ate wabæca gocæ cædinque wadäni ömæ wite nê aadäni inänite, Botö yowementacodë incæ ömæ wite aedäni, angantapa. Aayöminite botö, Minitö qui, ante pancamonga pönömo æncæminimpa, angä Ao äñönäni wadæ gocantapa.”

² “Ayæ yowedepo bayonte tömengä ingante nê cæcä ingante apænedinque, Bitö yowementacodë nê aadäni weca godinque pancamonga ämi æninque botö weca wæætë mämömi æmoe, angä gocantapa. ³ Angä godinque pongä adinque yowementacodë nê aadäni guiquënë nê æncæ pöninngä ingante bæi ongonte tæi tæi päninque ömæpocä da tadönäni gocantapa. ⁴ Adinque nê ëcä inömö wacä ingante tömengä ingante nê cæcä ingante angä gote pongä adinque yowementacodë nê aadäni adobai tæi tacadäni wæyongante, Guingo imonte wæcæcäimpa, ante tömengä ingante godö wiwa cædänitapa. ⁵ Ayæ wæætë nê ëcä wacä ingante da godongä godinque yowementacodë pongä adinque nê aadäni wæætë tömengä ingante wænönäni wængantapa. Ayæ wæætë nangui inäni inänite da godongä pönäni adinque pancadäniya inänite tæi tæi päninque pancadäniya inänite wænönäni wænänitapa.”

⁶ “Adocanque pönö nê ëcä weca ongönongäimpa. Mäninngä inömö nê ëcä wengä onguifñängä inongante nê ëcä tömengä ingante nangui waadedongäimpa. Ininque nê ëcä inömö, ‘Tömëmo wengä ingante da godömo gocä adinque tömënäni guifñente wædinque ee abainänipa,’ ante pönëninque tömengä ingante da godongä tömangä pönö gocantapa. ⁷ Gote dicæ pongä adinque tömënäni, ‘Tömengä ingampa. Wæmpocä mäincoo ini edæ iingä inömö nê ænguingä ingampa cæmöö. Mönö edæ mäo wænömö wängä ate edæ mönö qui babaimpa.’ ⁸ Änewëninque tömënäni nê ëcä wengä ingante edæ bæi ongonte wænöninque tömengä baö ini yowementacodë wæcæ cæte yabæque edæ, Ömäe, ante wido cædänitapa. Mäninque apænëbopa.”

⁹ Ante tededinque Itota apänegacäimpa. Ayä mänii në äninäni inänite wæætë iimaï angantapa. “İninqe yowementacodë në aaquënëni inänite në äcä äbänö cæquingää, ante pönëmini. Tömengä edæ, Ömäe, ante do pöninque në aaquënëni inänite godö wänöninque wadäni inänite yowementacodë godongä äninque aacädänimpa.”

¹⁰ Äninque Itota, “Minitö guiquënë dodäni näni yewæmongainta adämaï inte botö imote äminitawo. Edæ iimaïno ante Wængongui angä ëñente yewæmongadänimpa. ‘Dica ænte adinque, Wënæ wënæ inca, ante në mäenöni näni wido cædinca incæ gomonga waëmonca inca ininque täno näni nönöinca bæbængapa do bacapa.

¹¹ Wængongui Awënë incæ mänömaï cæcä adinque mönö waocabo guñente wædinque waa amompa,’
Ante yewæmonte i abaiminipa.”

¹² Mänömaï apänecä ëñente wædinque awënëidi wæætë, İñæmpa në aaquënëni näni cæinö ante odömonte apänedinque Itota mönö imonte piinte angä awædo, ante pönëninque tömengä ingante bæi ongoncæ cädänitapa. Incæte, Wadäni piinäni wæcæ wæ, ante wædinque ee adinque bæi ongönämaï inte tömënëni edæ wadæ gogadänimpa.

Tæiyä Awënë nänö äintamö ante tededänipa

(Mäateo 22.15-22; Odoca 20.20-26)

¹³ Mänii awënëidi incæ ayä ate Paditeoidi pancadäniya tönö Edodeidi pancadäniya inänite da godöninque, Minitö gote Itota ingante äñömïni wabänö tömengä nänö pante wæquinque adodeque wapiticæ bai tedebaingampa. ¹⁴ Änäni ëñëninque Itota weca wadæ pöninque,

—Awënë në Odömömi ëñëmi. Bitö nö pönente cæbi imipa, ante do ëñëmönipa. Ayä bitö ayömi mönitö tömämöni önömönique bai imöni adinque bitö iñömö, Waodäni äbänö anguïnänii, ante ayä, Æbänö cæquïnänii, ante wädämaï imi inte Wængongui taadö ante bitö guñënëmaï inte nö odömonte apänebipa. İninqe apänebi ëñëmönie. Odömäno gobiedöno beyä ante tæiyä awënë Tetædo tiguitamö nänö ärintamö ante äbänö wæcæ yewæmonte i, ante ëñencæte ante wæmönipa.

¹⁵ Godonte edæ waa cæte intawo. Wæætë wënæ wënæ cæte intawo. Ante äñönänite Itota iñömö, Waa cæte bai tedewänäni, ante do ëñente wædingä inte tömënëni inänite,

—Botö imotedö ante cædinque, Æbänö cæmö ate oda cæquingää, ante quinante cæminii. Deënadio tiguitamö ænte pömïni aboedäni.

¹⁶ Angä ëñente ænte pönäni adinque,

—Æcänö awinca bai yewæmonte badonte i. Æcänö ëmöwo ante yewæmonte i.

Ante äñongante,

—Awënë Tetædo awinca bai yewæmonte badonte impa. Adocä ëmöwo ante yewæmonte ongö amönipa.

¹⁷ Ante apänedäni ëñëninque Itota tömënëni inänite,

—Awënë Tetædo qui i ininque edæ Tetædo ingante godongäimpa. Wæætë Awënë Wængongui qui i ininque Wængongui ingante godongui i apa änewëmïni.

Angä ëñëninque tömënëni, Æ, nö pönï ante apänecampa, ante tömengä ingante waa adinque guñente wægadänimpa.

Ædō cæte nāni ōmæmonguīī, ante wædānīpa

(Mäateo 22.23-33; Odoca 20.27-40)

¹⁸ Ayæ Tadoteoidi nē, Waocā wæninque nāni ōmæmōnāmaī æmæwo wængampa, ante nē ānewēnāni inte Itota weca pōninque, Mōni ānō ante āmi ēñēmaīmōnīpa, āninque,

¹⁹ —Awēnē nē Odōmōmi ēñēmi. Mōitee wodi mōnō beyæ ante wææ yewæmōnīnque īmaī ante yewæmongacāīmpa. Waocā mōninque wēñæ tapæidāmaī inte wængā ate tōmengā tōniñacā wæætē owæmpoingā ingante mōninque wēñæ tapæidinque, Botō tōniñacā wodi wengā ingampa, ante pæpogacæcāīmpa, ante yewæmongacāīmpa.

²⁰ “Īninque wadāni īmaī cædānitapa, ante apænemōni ēñēe. Edæ ōnompō æmæmpoque go mengāa nāni caipæ īñōnānite bamoncadengā mōninque wēñæ tapæidāmaī manguīwēninque edæ nāñe wængā. ²¹ Wængā ĩnīnque wææ ayæmengā adocā ingante mōninque wēñæ tapæidāmaī nāñe wængā. Ayæ wææ wacā adobaī wēñæ tapæidāmaī nāñe. ²² Ayæ wææ wēñæ tapæidāmaī nāñe, ayæ wææ wēñæ tapæidāmaī nāñe, ayæ wææ wēñæ tapæidāmaī nāñe, ayæ wææ ayæmengā pōni adocā ingante mōninque wēñæ tapæidāmaī nāñe wængantapa. Onquiyængā guiquēnē ancaā owæmpote wædinque tōmengā pōni nāñe wængantapa. ²³ Īnīnque, Mōnō nāni ōmæmonguīōnæ, ante mīni āōnæ īñonte māningā owæmpoingā īñōmō æcānō nānōogængā baquingāā. Edæ tōmengā ingante īñōmō edæ tōmānāni manguīwengadānīmpa.”

²⁴ Āñōnānite Itota wæætē,

—Mīnitō ĩñæmpa. Wængonguī angā ēñente nāni yewæmōīnta adāmaī inte baī āmīni awædō. Wængonguī adocanque tæī piñængā inte edæ tōmāā cæcampa, ante pōnēnāmaī inte edæ oda cæte āmīni awædō. ²⁵ Edæ Wængonguī anquedoidi ōōnædē cōwē owodāni baī ĩñōnāni inte waodāni nāni ōmæmōninque godō nāñōnāmaī mōnāmaī inguīnānidō anguēnē. ²⁶ Wæætē do wængaīnāni nāni nāni ōmæmonguīnō ante Mōitee wodi ocāñequīya ante yewæmōninque adotaa æbānō yewæmongacāī, ante mīnitō adāmaī inte āmīni awædō. Edæ Mōitee wodi ingante Wængonguī īmaī angacāīmpa. “Botō ĩñōmō Abadāō Wængonguīmo ingaīmo inte ayæ Itæca Wængonguīmo ingaīmo inte botō Aacobo Wængonguīmo adobo ĩmo anguēnē.” ²⁷ Ante nē angaingā inte edæ æmæwo wæñināni tōmēnāni Wængonguī ædō cæte inguingāā. Wæætē edæ mīī quēwēnānique tōmēnāni Wængonguī ĩnongā ingampa, pōnenguēnē quēwēmīni. Nē wænte godināni incæ ayæ mīīnāni quēwēnāni ĩnānīpa. Mīnitō edæ wadō ante tededimīni inte edæ oda cæte wapiticæ ānewēmīnīpa, angacāīmpa.

Wængonguī nānō wææ angaīne mēnea tæīneda pōni ēnēpa

(Mäateo 22.34-40)

²⁸ Mānōmaī āñōnānite nō apænecā ēñente wædinque adocanque nē wææ ante odōmongā ĩñōmō Itota weca pōninque,

—Wængonguī, ĩmaī cædāni, ante nānō wææ angaīnecoo ante pōnēninque æd-edō tæīne pōni ĩ ĩñonte mōnō nanguī ēñente waa cæquīī.

²⁹ Āñongante Itota ĩñōmō,

—Īmaīne ante nānō wææ angaīne ĩñōmō edæ tæīne pōni ēne ĩñonte mōnō nanguī ēñente cædinque waa cæcāīmpa, angantapa. “Idægoidi, āmo ēñēdāni. Wæn-

gonguī mōnō Awēnē iñōmō, tōmengā adocanque inongā inte edæ nāwā Awēnē inongā ingampa. ³⁰ Mānōmaī Awēnē Wængonguī ingampa, ante adinque bitō mīmō entawente tōmengā ingante waadedinque ōnōwoca ēwocabi inte ædæmō waadete pōnencæbiimpa. Ayæ edæ bitō ocabi encabi inte nō pōnēninque bitō baō tæi pīñænte ēñabi inte edæ godō waadete cædinque tōmengā ingante waa waadete pōnēe,” ante nānō yewæmongaīne tæine iñonte mōnō nanguī ēñente waa cæcæimpa. ³¹ Ayæ wade nānō angaīne adobaī tæine iñonte mōnō ēñente waa cæcæimpa. “Nāmā bitō waadete waa cædō baī adobaī pōnēninque bitō wadāni inānite adobaī waa waadete cæe.” Māninque. Īmaī cæedāni, ante Wængonguī nānō wææ angaīnō ante tæineda baī wade edæ dæ ampa.

³² Ante apænecā ēñēninque nē wææ odōmongā iñōmō,

—Awēnē nē Odōmōmi nāwangā edæ ante apænēbi ēñēmopa. Wacā wængonguī dæ āñongante adocanque mōnō Wængonguī inongā ingampa, ante nō āmipa. ³³ In- inque tōmengā ingante mīmōno entawente waadedinque mōnō ocabi encamō inte nō pōnēninque mōnō baō tæi pīñæmō inte godō Wængonguī ingante waadete cædinque nāmā mōnō pōnēnō baī wadāni inānite adobaī waadete godō waa cæmō adinque Wængonguī waa acampa. Nāwangā impa. Baō bataa iya tante godōmō incæ, Wængonguī quī, ante mōnō ancaa godōmō incæ Wængonguī ayongā wædænque waa cæte impa. Wæætē māninō bitō āninō baī cæmō adinque Wængonguī godōmenque waa acampa.

³⁴ Ante nē wææ odōmongā nō ēñente apænecā wædinque Itota edæ,

—Bitō Wængonguī Awēnē Odeye nempo obo pōni ongōmi inte guibaīmipa, ante awædō.

Angā ēñēninque tōmānāni, Mōnō æbānō godōmenque anguīi, ante guīñēnete wædinque pæ wēnegadānimpa.

Codito æcānō Pæingā inongā ingāā, ante

(Māateo 22.41-46; Odoca 20.41-44)

³⁵ Pæ wēenedāni adinque Itota ayæ Wængonguī oncō ñænencō yabæcōnē ongōn- inque odōmonte apænecantapa.

—Dodāni nāni wææ yewæmongaīnō ante nē odōmōnāni iñōmō mōnō Codito in- gantedō ante apænedinque, Awēnē Dabii wodi pæingā inongā ingampa, ante quī- nante ānāni, ante pōnēmīni. ³⁶ Īnæmpa Dabii wodi incæ Wængonguī Tæiyæ Waēmō Ōnōwoca tōnō apænedinque,

“Botō Awēnē ingante apænedinque Awēnē Wængonguī incæ ĩmaī ante apænægacāimpa.

Bitō botō tōmēmæ inō tæ contate ongōñōmi,

Bitō imite nē pīināni inānite bæ tabo ate,

bitō ōnōwa gāānē ongōnāni inānite pinā gāwacæbiimpa.”

Ante Awēnē Dabii wodi incæ yewæmongacāimpa. ³⁷ Codito inongā ingampa, ante awēnē Dabii wodi nānō nē angaingā inongā inte edæ adocā Codito iñōmō ædō cæte nāēmæ Awēnē Dabii wodi pæingā inguingāā, ante pōnenguēnē ānewēmīni. Mānō- māinō ante Itota odōmonte apænecā ēñēninque tæiyænāni godongāmæ ongōnāni waa ēñengadānimpa.

Nē wææ odömönäni inänite Itota piingampa

(Mäateo 23.1-36; Odoca 11.37-54, 20.45-47)

³⁸ Itota godömenque iimaï ante odömönte apænegacäimpa. “Cædämaï, ante wææ ante näni yewæmongainta nē ate odömönäni inänite minitö gomö aedäni. Tömönäni iñömö doyæncoo waëmoncoo wēñate mongænte todänipa. Waodäni näni godonte æiñömö cægöñönänite wadäni pö bee tēninque tömönäni inänite, Nē odömömi, bitö imite wæa amönipa, ante apænedäni eñēninque edæ nē odömönäni iñömö nanguï todänipa. ³⁹ Ayæ tömönäni odömöincönē go guïdinque tömönäni nāmanque ante pönēninque waëmompaa pönï tæ contate todänipa. Ayæ ææmæ becaë godinque tömönäni, Botö täno bete tocæboimpa, ante waëmompaa pönï tæ contate bete todänipa. ⁴⁰ Ayæ owæmpoïnäni oncö yo mongænte baï cædinque ö æwēnāni inte nē wææ odömönäni iñömö, Botö imote waa acædänimpa, ante cædinque Wængonguï ingante nöingä apænete baï cædinque babæ cædinque wantæpiyæ tededänipa. Tömönäni godömenque näni nanguï pönï pante wæquinque mänömaï nämä beyænque ante cædänipa, ante adinque minitö iñömö ee gomö aedäni,” ante Itota wææ angacäimpa.

Owæmpoingä incæ, Wængonguï quï, ante godongampa

(Odoca 21.1-4)

⁴¹ Mäniñedē Wængonguï oncö yabæcönē iñömö, Wængonguï quï, ante näni wēnoncadedē da wēnönänimpa. Mänincönē pö guïdinque tömönäni näni da wēnoncade gäänē tæ contadinque Itota a ongöñongä nanguï inäni adoyömö pöninque daga daga wēnāni acantapa. Pancadäniya nanguï eädäni inte nanguï pönï da wēnāni acantapa. ⁴² Ayæ a ongöñongä owæmpoingä ömæpocä inte önantamonque incæ mentamonga ænte mämö daga wengantapa. ⁴³ Adinque Itota tömengä nänö nē emiñænäni inänite aa pecä pönäni ate,

—Nawangä ante apænebo eñēedäni. Wadäni tömänäni wædænque pönï godonte baï wïi eyepæ daga wēñönäni iingä owæmpoingä iñömö ömæpocä inte wædongä incæte godömenque nanguï godonte baï godongä abopa. ⁴⁴ Edæ mäninäni guiquēnē nanguï eädäni inönäni inte, Quëwenguinta impa, ante cö cædinque tömönäni näni wïi æinentaque ayæ ongöintaque godönänipa. Iingä ömæpocä ingä guiquēnē tömengä nänö quëwenguinta incæ, Wængonguï quï bacæimpa, ante tömanta edæ daga wengampa, ante Itota apænegacäimpa.

Wængonguï oncö ñænæncö bæ tate bacæimpa, ante

(Mäateo 24.1-2; Odoca 21.5-6)

13 Mänii Wængonguï oncö ñænæncö yabæcönē ongönte iinque apænete tao goyongä tömengä nänö nē emiñængä adocanque Itota ingante,

—Awēnē nē Odömömi eñēmi, angantapa. Dicacoo wainca wænömænæca wænömænæca näni mænongaincaco waincö ongö cöwä ae.

² Ññongante edæ,

—Bitö guiquēnē, ñænængade näni mænongaincö ongö abii. Mänincoo mini acoo incæ tömanca bæ tadäni wæænca adinque panguimæ panguimæ godinque dica adocaque pönï incæ wænömænæca ongönämaï ingæimpa, ante Itota apænegacäimpa.

Oo iinque bacäimpa, ante æbänö ate ëñenguüi, ante

(Mäateo 24.3-28; Odoca 21.7-24, 17.22-24)

³Mäniü taodinqe Odibowænquidi go æidinqe tömënäni Wængongui oncö ñænencö gomö näni ayömö tæ contayongä Pegodo tönö Tantiago, Wäö tönö Æntade mänimpodäni Itota ingante awëmö änänitapa. ⁴Mäniü bitö äninö ante æyedënö iinque baquüi, ante ëñencæte ante wæmönipa. Ayæ, Iïmai cæbo ate minitö, Oo pönï impa, ante ëñencæminimpa, ante Wængongui æbänö mä cæquiringää, ante apænebi ëñëmaimönipa.

⁵Ante wæyönänite Itota, “Wapiticæ odömönönäni minitö wæætë, Mönö oda cædämai ingäimpa, ante nämä wææ aquënë quëwëminii. Edæ iïmai baquüi i ataque-edäni. ⁶Edæ wadäni nanguü inäni babæ tedete pöninqe botö ëmöwo ante, ‘Botö mänimodö inömo imopa,’ ante apænedinqe wapiticæ edæ mäodäni godinqe nanguü inäni tömënäni miñæ oda cæte wapiticæ gocädänimpa,” ante apænecantapa.

⁷Ayæ, “Wabæca awënë tönö pö bee téninqe wæætedö wæætë cædapa, ante tededäni ëñencæminimpa. Ayæ wayömö näni guëadö guëa cæte wænönö ante tededäni incæte edæ guiñente wædämai iedäni. Edæ mäninö botö äninö bai cöwë bacäimpa. Ba incæte mönö inguipoga quëwënö iñömö mäniñedë wii æmäwo iinque bacäimpa.

⁸Adobæca quëwënäni iñönänite wabæca quëwënäni ponte bee téninqe guëadö guëa cæquinäni inänipa. Adobæca awënë odeye nempo quëwëñönänite wabæca awënë odeye tontadoidi mämö bee téninqe guëadö guëa cæte wænonte wænguinäni inänipa. Ayæ wayömö wayömö goinque pö wæcädänimpa. Ayæ waodäni näni cæinente wænguinque cænguü incæ tömäa capo wængäimpa. Mäniü wëñæ mä nantate bai wæwente bamini incæte mini godömenque wæwænguinque ingäimpa.”

⁹Ante apænedinqe Itota godömenque, “Tömëmini nämä incæ wææ aedäni. Edæ minitö iminite bæi ongöninqe edæ në apænte änäni weca mäo pædæ godönäni æncädänimpa. Ayæ godömenque tömënäni odömöincönë mäo gönönäni gongæñömïni minitö iminite tæi tæi pancädänimpa. Ayæ botö beyænque pancabaa awënëidi gobedönadodoidi weca ayæ tömäma awënëidi odeyeidi weca mäo gönönäni gongæninque minitö botö beyæ apæncæminimpa. ¹⁰Edæ iinque bayedë botö äñedë ayæ badämai iñonte, Botö æmo beyænque quëwencæminimpa, ante waa pönï botö apænedö ante tömäma quëwënäni doyedë ëñencädänimpa. ¹¹Iinque mäniñedë minitö iminite näni bæi ongonte ænte goyedë, Në apænte änäni weca ongöninqe æbänö ante apænequïmo, ante wædämai iedäni. Edæ, Æbänö waa apænequüi, ante Wængongui Tæiyæ Waëmö Önöwoca apæncä ëñente ate apæncæminimpa. Wii nämä pönëninque wæætë Wængongui nänö apænedö ëñëninque apæncæminimpa.”

¹²“Mäniñedë edæ nana caya iñönate adocanque näëmæ piininqe, Wænoncæ, äninque tömengä tönïñacä ingante da godongä gocæcäimpa. Nana wencaya iñönate mæmpocä iñömö näëmæ piininqe, Wænoncæ, äninque tömengä wengä ingante da godongä gocæcäimpa. Ayæ wëñænäni incæ wæmpoda inate näëmæ piininqe mäo apænedäni ëñëninque wadäni tömënäni wæmpoda inate mämö wænönäni wæncædäimpa. ¹³Ayæ, Coditoidi iminipææ, ante tömänäni botö ëmöwo beyænque minitö iminite nanguü piincädänimpa. Piinäni wæwëmini incæte æcänö iïmæca iinque baganca wæntædämai inte botö ëmöwo beyæ piinte badämai inaa botö tömengä ingante æmo beyænque quëwencæcäimpa,” ante Itota apænecantapa.

¹⁴ Ayä, “Wadäni pö ñömäi bai öo wadö nani wo ewenguimämo incä tæiyä waemö iñömö ante mämö cö cæcädänimpa, ante doyedë yewæmongatimpa. Docä nänö yewæmongainta adinque nê adingä iñömö tömengä do ëñëmaingampa. Ìincayä ate cö cädäni ongö adinque edä mäniñedë Oodeabæ quëwëmini iñömö änanquidi do wodii winonte æibæwedäni. ¹⁵ Ayä oncömanca ongömïni iinque mäincoo æncæte ante oncönë wæi guidämaï inte oncömancaque oncömancaque wodii winömæwedäni. ¹⁶ Ayä nê gönea cæmini iinque yacoo æncæte ante oncönë ocä ëmænämaï inte godömenque wodii winömæwedäni. ¹⁷ Mäniönæ iinque bayedë yädëmadä inäni tönö goömæ nê gänönäni tönö tömënäni nani wæquimämo baquinö anguënë. ¹⁸ Ayä minitö mini wodii winonguionæ ante pönëninque edä Wængonguï ingante, Wiï edä cöönædepo bacäimpa, ante apæneedäni. ¹⁹ Edä mäniñedë waodäni nanguï nani wæwëmämo nani angä baquinö anguënë. Edä Wængonguï nänö badongaïñedë mänömaï nani wæwëmämo bai dæ äñonte ayä godömenque ñöwo ganca dæ änompa. Ayä godömenque iinque baganca mänömaï nani wæwenguimämo bai dæ anguinö anguënë.”

²⁰ “Edä wantæpiyä nani wæwenguï impa, ante adinque Wængonguï, Mänimpoönæque edä wæwencädänimpa, ante pönömenque ante änämaï ingä bai quingänö quëwenguënë dæ ancädönänimpa. Incæte Wængonguï, Mänimpodäni inänite apænte ämo beyænque nê quëwenguinäni inänipa, ante nänö apænte ængainäni inänite waadete pönëninque dobæ, Mänimpoönæque wæwencädänimpa, ante cædinque pönömenque angacäimpa,” ante Itota apænegacäimpa.

²¹ Ayä, iinque bayonte æbänö inguïi, apænedinque Itota godömenque iïmaï ante apænecantapa. “Mäniñedë wadäni minitö iminite, ‘Ìñömö mönö Codito ponte ongongä tamënedäni,’ ante ayä, ‘Wayömö a ongongä atamönipa,’ ante tededäni ëñëninque edä minitö iñömö ëñënämaï imæwedäni. ²² Wadäni mäniñedë ponte a ongöninque nämä incä ante, Tömëmo Codito inömo imopa, ante babæ ante tedequinäni. Ayä, Wængonguï beyä nê apænebo inömo imopa, ante nê babæ ante tedequinäni. Tömënäni, Wængonguï nänö apænte ængainäni incä æmæwo oda cædinque wapiticæ gocädänimpa, ante cædinque bamöngæ bai cædinque öönädë cæi bai cædinque nö odömonte bai cæquinäni inänipa. Incæte Wængonguï nê apænte ængaingä inte edä ee aquingä diyä æmæwo oda cædinque wapiticæ goquinäni. ²³ Edä iinque badämaï iñonte botö ñöwo do apænebo ëñente cædäni. Oda cædämaï incæboimpa, ante nämä wææ aabæwedäni,” ante Itota angacäimpa.

Waobo ëñagaïmo inte botö iïmaï ponte cæcæboimpa, ante

(Mäateo 24.29-35, 42, 44; Odoca 21.25-36)

²⁴ Äninque Itota ayä godömenque apænedinque, “Mänii nani wæwëmämo nani angä iinque go ate nænque iñontobæ wëmö badinque apäicä apäidämaï ingäimpa. ²⁵ Nëmöncoo öönädë inö wææ tæ wææninque waa tæ waa tæ wæængæimpa. Öönädë tæi ongongaincoo incä wanca wanca cæte bai wapiticæ goquinö anguënë. ²⁶ Mäniñedë edä botö Waobo nê ëñagaïmo inte boguimancodë pöninque tæi pöni piñämo iinque edä ñäo apäite bai waemö ëmonte wææmo acädänimpa. ²⁷ Mänömaï pöninque botö anquedoidi inänite ämo godinque tömënäni æmænö betamonca æmænö betamonca boguimä nani pö goinö godinque inguipoga tömäne godinque öönæ tömäne godinque Wængonguï nänö apænte ængainäni inänite äñete poncädänimpa.”

²⁸ Ante Itota godömenque apänedinque, “Iigowæ æbänö iwæ, ante odömonte apänebo ëñëninque pönëedäni, angantapa. Tömëwæ miïwæ badinque iigowæ wayabo tänä nä boca adinque mïnitö, Öñabo nänö bocaïnepo inte nænque näwant-edæ baquinque bocapa, ante pönëninque edæ do ëñëmïnipa. ²⁹ Ayæ adobaï mäninö botö apänedö bai edæ do ba adinque mïnitö, Waocä në ëñagaingä do odemö pönï ongöninque inguiþoga oo poncæcäïmpa, ante ëñencæmïninpa. ³⁰ Näwangä ämopa. Nöwomïni ayæ mümïni quëwëninque wænte godämaï iñömïni mäninö botö apänedinö bai tömänö edæ do iinque baquinö anguënë. ³¹ Edæ öönædë ongöñömö inguiþoga tönö wo ëwente bai dæ ba incæte botö angainonque guiquënë dæ badämaï inte edæ cöwë tæï ongongæïmpa,” angacäïmpa.

³² Ayæ, “Mänïönæ æyedëno i, ante, Mänïnepo ædepodö i, ante ëñencæte ante mïni wædinö ante æcämenque incæ ëñënämaï ingampa. Tömänäni ëñënämaï iñönäni edæ Wængongui anquedoidi incæ ëñënämaï inänipa. Wæmpocä Wëmo incæ ëñënämaï iñömote Wæmpocä iñömö tömengä adocanque incæ edæ në ëñengä ingampa,” angantapa.

³³ Äninque ayæ godömenque apänedinque Itota tömënanï inänite iïmaï angantapa. “Iinque, Æyedëno baquïi, ante ëñënämaï imïni inte edæ mönämaï mümïni wänö cöninque edæ Wængongui ingante apäneedäni. ³⁴ Botö ponguinö iñömö waocä ëacä nänö cæï bai impa. Iingä waocä iñömö wabæca gocæ cædinque, Botö imote në cædäni në änäni badinque botö oncö waa aacædänimpa, ante adocanque ingante, Mäninganca cæe, wacä ingante edæ, Mäninganca cæe, wacä ingante, Mäninganca cæe, ante odömöninque odemö wææ a congä ingante, Cöwä ae, äninque wadæ gocä. ³⁵ Iinque botö në ëacä bai iñömote mïnitö, Mönitö Awënë æyedëno ponguingäa, ante ëñënämaï imïni inte gäwadecæ ayaönänëña tawadiya peyedë nää ba, æyedëmë poncæcäïmpa, ante wadö conguënë cæmïni. ³⁶ Edæ, Wiï mö ñömöni ponguingä ingänö anguënë, ante cædinque mümïni quëwëmaïmïnipa. ³⁷ Mïnitö imïnite botö änö ante tömänäni inänite adobaï, Wänö conguënë quëwëmïni,” ante Itota angacäïmpa.

Itota ingante bæi ongonte ængæïmpa, ante cædänipa

(Mäateo 26.1-5; Odoca 22.1-2; Wäö 11.45-53)

14 Mëönaa go ate wodo pænta gogaïönæ bai Patowa ææmä baquïmpa, ante pönëninque oodeoidi ñowo, Päo yedæ æmpoqui ömæmö i mönö cænguiönæ inguiþpa, ante cædönänimpa. Mänïnedë, Wængongui qui, ante në godönäni ñænänäni tönö në wææ ante odömönäni iñömö, Mönö awëmö cæte Itota ingante bæi ongonte ænte mäo wænongæïmpa, ante cædönänimpa. ² Oo pönï impa, ante wædinque awënëidi,

—Iñæmpa ææmæntedæ iñonte wænömö bai tömänäni ængui bate Yæ yæ ante piïnte cæcædönänimpa, ante adinque mönö ædö cæte mäniñedë cæquïi, ante wægadänimpa.

Itota ocaboga onquiyængä ogui wapæ gao cæcacampa

(Mäateo 26.6-13; Wäö 12.1-8)

³ Itota iñömö Betänia godinque në baadingä Timönö oncönë go guiite ëñacantapa. Guii ëñate cæncöñongä onquiyængä adoyömö pö guicantapa. Tömengä ogui wapæ näwä näadodopæ nänï änömæ nänö nanguï godonte ænimæ dica adabatodo

waincadedē pe ñiñænte mäningä inte ñowo ænte mämö Itota weca pongantapa. Pöningue tömengä mänincade wencade ao mäenodique Itota ocaboga edæ gao cæcancantapa. ⁴ Adinque godongämæ ongönäni pancadäniya ænguï badinque näni caboque tededinque,

— Ìñæmpa oguï wapæ incæ önonque guënente bai cæcampa töö. ⁵ Edæ waocä adoque wadepo cæte beyæ paga æninque todetiento deenadiota näni æninta ayæ godömenque æninta beyæ godonte ænguënemæ imæmpa. Godonte ænte bai ömæpodäni inänite wæætē godonguënē apa.

Ante nämæneque tededinque onquiyængä ingante nanguï piinte änänitapa.

⁶ Itota wæætē,

— Quimæ piiwëminii. Ìngä onquiyængä iñömö botö imote waa pöni cæcä apa quëwëminii. Ee aquënë quëwëminii. ⁷ Edæ ömæpodäni mini äninäni minitö weca cöwë quëwënanäi adinque minitö æyedëmë tömënäni beyæ waa cæinëmini inte edæ do waa cæbaiminipa. Botö guiquënë minitö weca wii wantæpiyæ ongoncæboimpa. ⁸ Adinque mänimæ oguï wapæ botonga gadongadinque tömengä edæ botö baö daga wenguinque eyepæ iñonte öni paacantapa. Ìninque tömengä nänö cæganca ante do cæcä apa änewëminii. ⁹ Minitö iminite näwangä ante apænebopa. Tömämæ æyömömë wadäni näni ëñente toquinque botö imotedö ante apænedäni ëñënanii mäningä onquiyængä nänö cædinö ante adobai tededäni ëñente pöncæcädänimpa, ante Itota apænegacäimpa.

Itota ingante odömönte godoncæte ante Codaa cæcampa

(Mäteo 26.14-16; Odoca 22.3-6)

¹⁰ Ayæ mäniñedē näni, Dote, äincabo iñönäni adocanque Codaa Icadiote näni änogä iñömö, Itota æyömönö ongongäa, ante odömönte pædæ pönömo æncæminimpa, ante cædinque, Wængonguï qui, ante nē godönäni ñænænäni weca wadæ gocantapa. ¹¹ Godinque tömengä, Ìmaï cæcæboimpa, ante apænecä ëñëninque awënëidi nanguï todinque Ao äninque, Cæbi ate tigitamö pönömöni æncæbiimpa, änäni. Ëñëninque Codaa Ao äninque, Æbänö cæte godö odömömo ænguïnänii, ante cöwä adinque ancaa cægacäimpa.

Awënë Itota päö tönö owæta pönongä cænte bedänipa

(Mäteo 26.17-29; Odoca 22.7-23; Wäö 13.21-30; 1 Coodintoidi 11.23-26)

¹² Oodeoidi päö yedæ æmpoqui ömæmö i näni cænguïönæ tæcæ ba ate tömënäni, Wodo pænta gogaïönæ bai Patowa mönö cænguïönæ impa, ante pönente cædinque, Wængonguï qui impa, ante codotedo mäniönæ edæ cöwë wænönönänimpa. Ìninque mäniönæ iinque ba adinque tömengä nänö nē ëmiñænäni Itota ingante äninque,

— Ædönö ämi gote mönitö Patowa ææmæ ante cæmöni ate bitö bete cænguimii.

¹³ Änäni ëñëninque Itota tömengä nänö nē ëmiñænäna mënaa inate da godöninque,

— Mänii nanguï näni quëwëñömö gote taadö goyöminate onguïñængä incæ cadabodē æpæ iyænte næænte pö bee tengä adinque minatö tömengä miñæ tee empote goeda. ¹⁴ Tömengä æcönëno guicä adinque mäniï oncö nē ëacä ingante äninque minatö, “Mönö Awënë nē Odömongä inte iïmaï angampa. Bitö oncönë guicönë æcönëno ante, Bitö oncö, ante ämi guidinque botö nē ëmiñænäni tönö botö Patowa ææmæ bete cænguïmönii, angampa.” ¹⁵ Ante äñöminate tömengä æmongapaa

mæi odömöninque ñænæncö awæmpa nänö do cönöincö odömongä adinque minatö mänincönë mönö beyä tömää eyepæ cæcæminaimpa.

¹⁶ Angä ëñente tao godinque nani quëwëñömö ponte ayöna, Itota nänö änö bai tömää do cæte ongompa, ante adinque tömäna Patowa ææmä ante cædatapa.

¹⁷ Gäwadecæ bayonte dote inäni nani cabo Itota miñæ godongämæ pönänitapa.

¹⁸ Ponte tæ contate cæncöñönänite Itota,

—Nawangä ante apænebo ëñëedäni. Mïni cabo incæ adocanque botö tönö ñöwo godongämæ cæncongä incæ, Æncædänimpa, ante botö imote odömonte pædæ godongungä ingampa.

¹⁹ Ante apæneca ëñëinque, Wæinente awædö, ante pönëinque tömengä ingante adocanque adocanque äninque tömänäni adoyömo,

—Botö imotedö ante dicæ apænebitawogaa.

²⁰ Äñönäni Itota wæætë,

—Önompo tipæmpoga go mëminaa iñömini adocanque botö tönö guëa adotaca mi cæte cængä incæ tömengä në cæquingä ingampa. ²¹ Edæ dodäni Wængongui beyä ante nani yewæmongai bai cædinque botö Waobo ëñagaimo inte cöwë wænte goquëñemo imodö angüënë. Incæte botö imote në odömonte godönongå guiquënë tömengä nänö wæquinque cæquingä ingampa. Mäningä wiï ëñate bai waa toquë-nengä incædongäimpa. ²² Ayæ tæcæ cæncöñönäni Itota päö bæi ongonte äninque Wængongui ingante waa ate apænedinque päö pä äninque tömënanäni inänite pædæ godö pædæ godö cæcantapa.

—Botö baö bai impa, ante pædæ pönömo äninque mïnitö Ao ante cæedäni.

²³ Äninque ayæ bequimæ owætaca bæi ongonte äninque Wængongui ingante waa ate apænedinque pædæ godöninque nënempocä äninque tömänäni bedänitapa.

²⁴ Beyönäni tömënanäni inänite apænedinque,

—Botö wepæ iimæ bai impa. Wængongui do apænedinque, Botö pönö cæbo ate mïnitö Ao ämïni ininque mönö godongämæ waa cæte quëwengäimpa, angacäimpa. Ñöwo adobai miine äninque apænebopa. Botö wepæ ante Ao ante æmïni inte mönö godongämæ waa cæte quëwengäimpa. Edæ nanguï inäni beyæ gowequimæ impa.

²⁵ Botö iñömo Awënë Odeye badinque ocæ ëmænte pöninque miimæ botö beganca mänimæ yowepæ ñöwo æmæwo bebo tamëñedäni, ante Itota apænegacäimpa.

Pegodo incæ, Dicæ abogaa, apænequingä ingampa, ante

(Mäateo 26.30-35; Odoca 22.31-34; Wäö 13.36-38)

²⁶ Ayæ Wængongui ingante ämotamini ante tao godinque Odibowænquidi godäni-tapa. ²⁷ Goyönänite Itota iimai ante apænecantapa.

—Dodäni Wængongui beyä yewæmöninque, “Në aadingä ingante tacabo dæ wængä ate cæningäidi obegaidi wæætë panguimæ goquimpa,” ante nani yewæmonte angainö bai cædinque botö dæ ämo beyä guingo imonte wædinque tömämini edæ näwæ goquimïni iminipa, ante awædö. ²⁸ Panguimæ gomïni incæte botö edæ ñäni ömæmonte Gadideabæ täno gote a ongöñömo mïnitö ayæ pöedäni.

²⁹ Angä ëñente wædinque Pegodo guiquënë,

—Iñæmpa dæ ämi beyä tömänäni guingo imonte badinque panguimæ godäni incæte edæ botö guiquënë cöwë panguimæ godämaï incæboimpa.

³⁰ Äñongante,

—Bitö imite näwangä ante apänebo ēñēe. Ñöwoönæ woyowotæ incæ tawadiya mempoga pedämaï iñonte bitö iñömö botö imotedö ante wadö ante apänedinque, Dicæ abogaa, ante mempoga go adopoque anguimi imipa.

³¹ Angä ēñente wædinque Pegodo wæætē,

—Īñæmpa botö bitö tönö wæmo incæte mäninö ante cöwē änämaï incæboimpa. Ante nanguï äñongä tömänäni adodö ante apänegadänimpa.

Guetëmänii iñömö Itota Wængonguï ingante apäñecampa

(Mäateo 26.36-46; Odoca 22.39-46)

³² Mänii godinque yabæ incæ Guetëmänii nani äñömö pöninge tömengä miñæ nē godäni inänite Itota,

—Tæ contate ongöñömini botö godömenque gote Wængonguï ingante apänete pömoedäni.

³³ Äninqe Pegodo Tantiago Wäö mänimpodänique inänite ænte mäocä goyönäni Itota iñömö nanguï wæwente badinque guiñente wæcantapa. ³⁴ Ayæ tömēnani inänite,

—Botö wæwēmämo entawēninque pämənte wæte wænguï wædö. Minitö guiquēnē tæ contadinque ämonca wänö cöedäni.

³⁵ Äninqe wædæ pö gote ædæ wæænte guidömēmæ ñongäninque Wængonguï ingante, Bitö Ao ämi botö caate wæquintedæ wii ba ate waa tobaïmopa. ³⁶ Äninqe, “Mæmpo, botö Wæmpo ēñēmi. Bitö tæi piñæmi inömi imipa. Bitö ti nä wænguimæ bai ö ænte bai cædinque botö imote edæ, Wænämaï incæbiimpa, ämi ininque botö edæ waa tobaïmopa. Incæte botö änönö bai wii cædinque wæætē tömēmi änönö bai cæe,” ämopa.

³⁷ Äninqe tömēnani weca adodö ponte ayongä mö ñönäni adinque tömengä Pegodo ingante,

—Timönö edæ mömitawo. Botö tönö wänö conguēnēmi incæ bitö adoque oda ganca incæ wii aacömi. ³⁸ Edæ, Mímöno waa cæinēmönipa, ante ewocayömini baö aquiiñö ēñamini inte wæntæye bamïnipa. Ininque edæ minitö wänö cöninge nämä beyænque Wængonguï ingante apänedinque edæ, Wii wænæ wænæ cæinēmöni bacämönimpa, ante apäneedäni.

³⁹ Äninqe Itota wæætē wadæ godinque wēēnē nänö äninö bai apänedinque Wængonguï ingante adodö ante apäñecantapa. ⁴⁰ Ayæ adodö ponte ayongä möwo möinente ædo ædo cædinque mö ñönäni acantapa. Acampa, ante wædinque tömēnani, Æbänö anguimö, äninque edæ pæ wēēnedänitapa. ⁴¹ Itota wæætē mempoga go adopoque gote apänedinque ñöwo adodö pöninge edæ tömēnani inänite,

—Ayæ edæ guēmente mö ñöminii. Edæ idæwaa. Ñöwo iinque cætimpä. Botö Waobo ēñagaimo inte edæ botö wæwænguiönæ do edæ ba ininque nē wænæ wænæ cædäni nempo nē pædæ godömoncæ cædingä iñömö botö imote do odömonte godongäi атақеедäni. ⁴² Ñöwo edæ ængæ gantidinque mönö gocäimpa. Botö imo nē odömonte godonguingä iñömö edæ obo pöni pongä tamēñedäni, angacäimpa.

Itota ingante bæi ongonte ænte godänipa

(Mäateo 26.47-56; Odoca 22.47-53; Wäö 18.2-11)

⁴³ Ayæ apäneyongä edæ Codaa wodi tömēnani nani, Dote, ante gocabo adocabo iningä incæ ñöwo pongantapa. Do iñömö, Wængonguï qui, ante nē godönäni

ñænænani tönö nê wææ odömönani tönö nê aadani nani Picæncabo tönö wadani inanite, Codaa miñæ goedani, ante da godönönanima. Nöwo iñömö töménani nani nê da godönani inte tæiyænani yaëmê næænte canta næænte Codaa miñæ pönanita. ⁴⁴ Doyedê iñömö nê odömönte godoncæ cæcä Codaa iñömö tömengä miñæ poncæ cædani inanite iimaï ante wëenëñedê apænedingä ïnogäimpa. “Botö odömönte queê bemömo adinque minitö wæætê, Tömengä ingampa, ante adinque tömengä ingante bæi ongonte æninque wææ cæte mäomïni gocæcäimpa.” ⁴⁵ Ante do äningä inte Codaa iñömö ñöwo Itota weca pöningue,

—Awënë nê Odömömi imi.

Äninque edæ waa cæte bæi edæ queê bemongantapa. ⁴⁶ Mänömaï queê bemönte odömöngä adinque tömengä miñæ pönani incæ Itota ingante pædæ gopo bæi ongonte ænänitapa.

⁴⁷ Wængongui qui, ante nê godongä ñænængä pöni ïnogä ingante nê cæcä incæ mänïñömö ponte a ongonä adinque Itota gäänê ongonä adocanque pædæ guipote yaëmê o togænte æninque mäningä nê cæcä ingante tæi päningue önömonca wangö tamoncacantapa. ⁴⁸ Adinque Itota iñömö ñöwo pönani inanite,

—Minitö iñæmpa, Bitö nê ö ænimi imipa, ante bæi cædinque botö imote canta tönö yaëmê næænte ö æncæte ante pömïni awædö. ⁴⁹ Ìñæmpa Wængongui oncö ñænæncönê yabæcönê iimö iñö iimö iñö apæneconinque botö minitö weca a ongönömöte minitö edæ bæi ongönämaï ee aminitapa töö. Incæte Wængongui angä ëñente nani yewæmongainö bæi iinque baquinque ante cæcäimpa.

⁵⁰ Ante apæneyongante tömänani edæ ëmö cæte wodii winönänitapa. ⁵¹ Adocanque edëningä guiqüenê ömaacä inte yabæcooque ninocoo nani ancooque pönö winiyate Itota miñæ gocantapa. Tömengä ingante yao ongönänitapa. ⁵² Adinque tömengä wæætê gä tadongate weocoo ömaacä wodii winongacäimpa.

Nê Apænte nani Änoncabo weca Itota ongongampa

(Mäateo 26.57-68; Odoca 22.54-55, 63-71; Wäö 18.12-14, 19-24)

⁵³ Wængongui qui, ante nê godongä ñænængä pöni ïnogä weca ænte godinque Itota ingante gönönani gongænte ongongantapa. Ayæ, Wængongui qui, ante nê godönani ñænænani tönö nê aadani nani Picæncabo tönö nê wææ odömönani tönö tömänani pö bee bee bee tente godongämæ ongönänitapa. ⁵⁴ Pegodo guiquenê tömengä miñæ ayæ ayæ godinque, Wængongui qui, ante nê godongä ñænængä pöni ïnogä oncö yacömoyæ iñömö wäänê guicantapa. Mänïñömö guidinque tömengä wææ wänönani tönö gongapamö tæ contate a ootocongantapa.

⁵⁵ Wængongui qui, ante nê godönani ñænænani tönö nê Apænte nani Änoncabo tömänani, Mönö apænte ante wänömö wæncæcäimpa, ante cædinque, Itota nänö wænguinque wænæ wænæ cæcä ingampa, ante æcänö nê adingä inte godö anguingä, ante ancaa diqui diqui miñönani mänömainö ante nê angüenengä edæ dæ angantapa. ⁵⁶ Edæ nanguï inani pöningue babæ apænedinque, Mänömaï cæcä atamönipa, ante apænedani incæte adoyömö apænedämaï inani inte wapiticæ wapiticæ änänitapa. ⁵⁷ Ayæ ate pancadaniya ængæ gantidinque, Tömengä ingante apænte angäimpa, ante cædinque babæ wapiticæ ante äninque,

⁵⁸ —Ïngä iimaï ante apæneca ëñentamönipa. “Ïncö Wængongui tæiyæ waëmö oncö woadani önömpoca nani mäenöncö incæte botö cæbo wo tænguimæ wææn-

guimpa. Ayæ mēōnaa go adoōnæque iñonte wacō wīi ōnompoca mænonguincō wæætē mænoncæboimpa,” ante apænecā ēñentamōnipa tōō, ante tededāni.

⁵⁹ Incæte adodeque ante apænedinque adoyōmō āninque tōmēnāni godōmenque āninque wadō wadō wapiticæ ante apænedānitapa.

⁶⁰ Ēñente wædinque, Wængonguī qui, ante nē godongā ñænængā pōnī inongā guiquēnē godongāmæ ongōnāni tōnō tæcæguedē dibæ ongonte ængæ gantidique Itota ingante,

—Īñæmpa pæ wēēnebii. Bitō æbānō cæbitapa, ante iñāni nāni ānīnō ante bitō æbānō āmii.

⁶¹ Ante āñongante edæ Itota cōwē ānāmaī pæ wēēnecā. Adinque nē godongā ñænængā pōnī inongā wæætē godō āninque,

—Wængonguī mōnō Waēmō inongā Wengā mōnō Codito inongā ingampa. Bitō iñæmpa mānimidō inōmi imitawo.

⁶² Āñongante Itota iñōmō,

—Ao. Mānimodō inōmo imopa. Īninque iñcayæ ate botō Waobo ēñagaimo inte Wængonguī nē Tæi Piñængā ingā tōmēmængā inō tæ contabo adinque mīnitō ayæ ate botō ōōnædē boguimancodē pōmo acæmīnimpa.

⁶³ Ante apænecā ēñente wædinque nē godongā ñænængā pōnī inongā iñōmō piinte badinque, Ēñente awædō, ante baī cædinque edæ nāmā weocoo wānā ñænīnque,

—Idæwaa, angantapa. Nōwo wacā ingante, Itota wēnæ wēnæ cæcā atabopa, ante nē āincædongā ingante godōmenque diqui diqui mīnāmaī ingæimpa. ⁶⁴ Tōmængā nāmā Wængonguī Wengā inte baī babæ godō tedewengampa tōō. Īninque edæ tōmængā babæ nānō ānewēnō ante do ēñēmīni inte edæ æbānō ante pōnēmīnii.

Ante āñongante nē apænte ānāni tōmānāni edæ, Nānō pante wænguinque edæ ānewengampa tōō.

⁶⁵ Ante apænte ānāni ate edæ pancadāniya Itota tōmængā towæ tånongadinque tōmængā awınca weocoota pōnō ñāne cæmōninque tæi tæi pāninque tōmængā ingante,

—Æcānō pānaa, ante Wængonguī beyænque apænebi ēñēmōnie.

Ante badete toyōnāni wææ wānōnāni guiquēnē tōmængā ingante bæi ongonte tæi tæi pangadānimpa.

Pegodo incæ, Dicæ abogaa, angampa

(*Mäateo 26.69-75; Odoca 22.56-62; Wäö 18.15-18, 25-29*)

⁶⁶ Ayæ Pegodo guiquēnē yæipodē yacōmōñāa guīi contate ongōñongā onquiyængā, Wængonguī qui, ante nē godongā ñænængā pōnī inongā ingante nē cæcā iñōmō adoyōmō pō guicantapa. ⁶⁷ Ponte ayongā Pegodo gongapamō ootocæ cæcā adinque onquiyængā ædæmō cōwā adinque,

—Māningā Nāatadeta iñōmō quēwēnongā Itota tōnō bitō guēa cægōmitapa tōō.

⁶⁸ Angā ēñente wædinque,

—Dicæ. Bitō ānō ante æbānō āmii, ante dicæ ēñēmogaa.

Āninque tao yabædemō gāānē gongæñongā tawadiya wēēnængā petapa. ⁶⁹ Ayæ wæætē Pegodo ingante adinque onquiyængā iñōmō godongāmæ ongōnāni inānite,

—Māningā adocabodāni iñingā inte ongongā ataquēdāni.

⁷⁰ Ante apāneyongā Pegodo wæætē, Dicæ bitō angānō imogaa, angantapa. Ayæ wantæ ate māñiñōmō ongōnāni adobaī,

—Īnæmpa Gadideabæ quëwëniimi inte bitö näwängä Itota tönö tee empo në pömi ĩmipa töö.

⁷¹ Ānāni ēñente wædinque Pegodo wæætë, Botö Wængongui ēñëñongä nöingä ämopa, ante Wængongui ëmöwo ante babæ tedewëninque tömënāni inānite wæætë, —Mīni angantedö ingante dicæ abogaa. Dicæ abo ante bai änewëminipa töö.

⁷² Ante tæcæ änewëñongä ĩñontobæ tawadiya ayængä petapa. Ayængä pe ēñente wædinque Pegodo Itota nānō äñinō ante pönengantapa. Itota do ĩñömö, “Tawadiya mempoga pedāmai ĩñonte bitö botö ĩmotedö ante wadö ante apänedinque, Dicæ abogaa, ante edæ mempoga go adopoque anguimi ĩmipa,” äñongäimpa. Ante pönente wædinque Pegodo, Nöwo nānō pequinque do pecampa, ante wædinque Ca ca wægacäimpa.

Itota incæ Pidato weca ongongampa

(Mäateo 27.1-2, 11-14; Odoca 23.1-5; Wäö 18.28-38)

15 Wængongui qui, ante në godönāni nænænāni tönö në aadāni nāni Picæncabo tönö në wææ odömönāni tönö tömënāni ĩñömö në äñāni inönāni inte oodeoidi nāni në Apænte Änoncabo inönānimpa. Īninqe mänii nāö bayonte tömënāni, Æbānō cæquii, ante pönente wædinque godongämæ pönëë cöninque Ao äninque Itota ingante goto winte töö ämænte ænte godinque odömāno awënë Pidato wodi nempo māo pædæ godönāni ængantapa. ² Pidato guiquënë tömengä ingante,

—Oodeoidi Awënë Odeyebi bitö ĩmitawoo. Äñongante,

—Bitö tömëmi änö bai botö mänimodö ĩmopa, ante Itota angantapa.

³ Wængongui qui, ante në godönāni nænænāni guiquënë, Īngä Itota ĩñömö wënæ wënæ cæcampa, ante wadö wadö ante pūninque Pidato ingante ancaa äñānitapa.

⁴ Ānāni ēñente wædinque Pidato wæætë Itota ingante,

—Īnæmpa pæ wëënebii. Bitö æpogadö wënæ wënæ cæbi ĩmipa, ante nangui äñāni apa quëwëë.

⁵ Äñongante Itota tömënāni nāni äñinō ante cöwë apänedāmai ingä adinque awënë gobedönadodo wæætë, Quiëmë bai pæ wëëneçä awädö, ante guñente wægacäimpa.

Itota wæncæcäimpa, äñānipa

(Mäateo 27.15-31; Odoca 23.13-25; Wäö 18.38-40, 19.1-16)

⁶ Mänimæ awënë gobedönadodo mänñedë wadepo ĩñö wadepo ĩñö cöwë ĩmai cædongäimpa. Oodeoidi æämæ cæyönānite gobedönadodo ĩñömö, Në tee mönete ongönāni inānite adinque minitö æcānō ingante ämini nimpō cæbo goquingäa, ante äñāni ēñëninque tömengä tömënāni nāni äningä adocanque ingante nimpō cæcä godongäimpa. ⁷ Doyedë wadāni ængui badinque, Awënë ingante wido cæcäimpa, ante cædinque wæñonte cæyönāni adocanque Badabato nāni äñongä tömënāni tönö godongämæ cædongä ĩñongäimpa. Īninqe awënëidi në wiwa cædāni inānite bæi ongonte goto wināni ongönönāni Badabato adobaï tömënāni tönö godongämæ tee mömænete ongönongäimpa. ⁸ Īninqe nōwo ĩñömö wadāni tæiyænāni Pidato weca pöninque, Cöwë bitö cædö bai nōwo adobaï mönitö beyæ cæquimi ante wæmönipa. ⁹ Ānāni ēñëninque Pidato ĩñömö,

—Oodeoidi Awënë Odeye ingante pönö nimpō cæbo abæ tawængä ænguimīni. Æbānō cæbo ænguimīni.

¹⁰ Edæ do iñömö Itota gomonga cæcä ate wædinque, Wængongui quï, ante nê godönäni ñænänäni incæ tömengä ingante piinte adönänimpa. Mäninö beyænque tömënäni Itota ingante bæi ongonte botö nempo ænte mämö pædæ pönönänimpa. Ante pönente wædinque Pidato, Oodeoidi Awënë Odeye ingante ñimpo cæbo go-quiringä, ämïnitawoo, ante ñowo angantapa. ¹¹ Ìninqe, Wængongui quï, ante nê godönäni ñænänäni guiquënë godongämæ ongönäni inänite apænedinque, Mïnitö Pidato ingante iümaï æedäni, änänitapa. Änäni ëñëninque oodeoidi wæætë Pidato ingante, Wü bitö änogänö ante ämönipa. Wæætë Badabato ingante ñimpo cæbi gocæe, ante änäni. ¹² Ëñëninque Pidato godö äninque,

— Ìninqe oodeoidi Awënë Odeye mini änogä ingante æbänö cæquïmoo, ante ämïni.

¹³ Äñongante tömënäni ogæ tededinque,

— Awæ ñænquedimæ ämi cæte wænönäni wængæe töö.

¹⁴ Änäni ëñente wædinque Pidato,

— Ìñæmpa quïnö wænæ wænæ cæcantawoo.

Äñongante godömenque yedæ äninque adodö,

— Ämi awäa timpote wænönäni wængæe töö.

¹⁵ Ancaa änewëñönäni Pidato iñömö, Mäninäni piinämaï piyænë cæcædänimpa, ante cædinque Badabato näni äningä ingante godö ñimpo cædinque tömënäni nempo pædæ godongä äänänitapa. Wæætë edæ Itota ingante edæ Pidato wodi angä æmontai badöïmenca tæi tæi pänäni ate ñænque quepote awäa näni gönonguinque edæ da godongä ænte godänitapa.

¹⁶ Pædæ godongä ate nê tontadoidi tömengä ingante töö æmænte wadæ godinque awënë gobedönadodo oncönë Podætodio näni ancönë mangui guiyongä tontadoidi bacabo Itota weca godongämæ äñete pönänitapa. ¹⁷ Pöninque tömënäni, Awënë ïmi inte awënë weocoo wëñacæbiimpa, ante bæi cædinque badete todinque Itota ingante wæætë opatawæ ëmoncoo pönö da wëñadinque daa mongæmenca äninque que cædinque, Awënë poganta, ante bæi pönö daga wencadänitapa. ¹⁸ Ayæ Yæ yæ äninque,

— Badogaa, bitö oodeo awënë odeyebi ïmipææ.

¹⁹ Ante badete todinque cæwipaca ancaa tæi tæi pancadinque tömengäa towæ towæ tänongadinque da guicapote ædæ wæäninque, Bitö Tæiyæ Waëmö Awënë ïmi amönipa, ante bæi badete todänitapa. ²⁰ Ayæ ïnque badete todinque tömënäni opatawæ ëmoncoo gä tadongadinque tömengä nämä weocoo da wëñadänitapa. Ayæ edæ tömengä ingante awæ timpote gönoncæte ante töö æmænte ænte tao mäodäni gogacäimpa.

Itota ingante awäa timpodäni wængampa

(Mäteo 27.32-44; Odoca 23.26-43; Wäö 19.17-27)

²¹ Mänïñedë Tidëne quëwënogä Timönö guiquënë Adecantodo tönö Odopo tömëna wæmpo ïnogä inte tömengä yabæque gote pönongäimpa. Ìninqe Itota ingante ænte godinque ayönäni mäningä Timönö ñowo wodo tebæ gocæ cædinque pongä adänitapa. Ìninqe tontadoidi, Bitö ægodöe. Itota ingante möni timpoquiwæ ænte mongænte goe, änäni ænte mongænte gocantapa.

²² Mänömaï godinque Godogota näni äñömö mönö tededö “Ocataïnö” iñömö Itota ingante ænte pönänitapa. ²³ Mänïñömö pönäni ate wädäni, Nantate beyæ

becäcäimpa, ante cædinque biinömæ nāni wædænque tī nāmæ tönö müidapæ nāni änömæ adoyömö wempo cæðenique pædæ pönö cæyönāni tōmengä önonque yædæ bedinque edæ bedāmaï ingantapa. ²⁴ Ayæ tōmengä ingante awæ ñænquedimæ nāni ænte pönīwāa tōö godöninque pönö timpodinque wææ tīwadinque ængæ gantidēnānitapa. Ængæ gantidēnāni ate wægōñongä tōmēnāni wæætē tōmengä weocoo inī ante, Æcānō quinca nō ta adinque tōmengä mänincoo æncäcäimpa, ante wææntodöninque adocooque adocooque ænānitapa.

²⁵ Edæ nænque tōmantadæ æñonte mäniñedē incæ tōmengä ingante iinque timpote edæ ængæ gantidēnāni wægongacäimpa. ²⁶ Ayæ, Itota wæncäcäimpa, ante quīnante apænte änāni, ante tōmänāni ponte adinque eñencädänimpa, ante yewæmöninque, “Oodeoidi Awēnē Odeye inongä ingampa,” ante yewæmöninque awæmpaa wo cæðanitapa. ²⁷ Ayæ wada nē ö ænte quēwēnīna inate adoyedē tōmengä tönö adocanque tōmēmæ inö adocanque dipæmæ inö godö timpote gantidēdāni wægongadäimpa. ²⁸ Iinque, Nē eñēnāmaï cæðāni nāni cabo tönö tōmengä adocä ingampa, ante Wængonguī angä eñente nāni yewæmongainö bai ñöwo iinque bagatimpa.

²⁹ Ayæ wodo pænta nē godāni guiquēnē Itota ingante godö babæ ante badete todinque pica pica cædinque,

—Bitö iñæmpa Wængonguī tæiyæ waëmö oncö incæ bæ tate wo ewēninque mëönaa go adoönæque iñonte do mäñonguimi inte edæ, ³⁰ o togæmpote o togæwate ti wææninque edæ quēwēmäwe.

³¹ Ayæ, Wængonguī qui, ante nē godönāni ñænænāni tönö nē wææ odömönāni adobaï nāni cabo nāmāneque godongämæ badete todinque,

—Tōmengä, Wadāni quēwencädänimpa, ante waa cæcantawoo. Ñöwo iñæmpa. Nāmā beyænque eyepæ cæcampa diyæ quēwenguingäa. ³² Idægoidi awēnē odeye ingä iinque tōmengä ti wæænte gocä adinque mönitö wæætē, Tōmengä nāwä Codito ingampa, ante pönēmaï wædö.

Ante badete toyönāni nē ö æna tōmengä tönö godongämæ timpote wægöna incæ adobaï Itota ingante piñinque wēnæ wēnæ ante badete togadäimpa.

Itota wængampa

(Mäateo 27.45-56; Odoca 23.44-49; Wäö 19.28-30)

³³ Tæcæbæcä pönī bayö tōmämæ iñontobæ wēmö badinque ayæ ayaönāa wæiganca mä mämönte bai inimpa. ³⁴ Iinque ayaönāa wæiyonte Itota nanguï pönī yedæ äninque, “Edoi, Edoi, nēma tabatāni,” äninque mönö tededö, “Botö Wængonguīnaa, botö Wængonguīnaa, ædö cæte botö imote emö cæte gobiya.”

³⁵ Ante wæcä eñēninque godämæ ongönāni guiquēnē,

—Æ. Ediya wodi ingante aa pecä apa.

³⁶ Äñönāni adocanque do pogodo gote önætämö ænte pöninque biinömæ bai önömænque äninque aa bedonte nææninque edæ, Becäcäimpa, ante cædinque cæwipaca pædæ ææñongantapa.

—Ee aquēnē quēwēedāni. Ediya wabänö ponte o togænte pædæ wææñongä abaimpa.

³⁷ Angä ate Itota iñömö wæætē ogæ äninque edæ æmäwo guëmāninque wængacäimpa. ³⁸ Iinque edæ Wængonguī tæiyæ wæmoncönē weocoo odemö nāni wææ

wodöincoo adoyedë önönæca inö tæcæguedë pöni tænguimæ wæantapa. ³⁹ Mänö-mai ogæ äninque do wængä adinque tontadoidi awënë capitäo guiqüenë,

—Nawangä impa. İngä inömö Wængongui Wængä ingainö ante pönenguenë, angacäimpa.

⁴⁰ Ayæ onquiyænäni Mäadiya Mäagadadënë nani änogä, Otite tönö Tantiagomö badä Mäadiya, Tadömee, mänimpodäni adobaï oo gote gomö a ongönänitapa. ⁴¹ Tömënäni inömö Gadideabæ quëwengäñedë Itota miñæ gote pönö waa cædinäni inte nïowo pö gobæ ongöningue pömö adänitapa. Itota Eedotadëe pö äñongante wadäni onquiyænänique godongämæ tee empote pöninäni inte nïowo pöninque a ongönänitapa.

Itota wodi baö inï mäo daga wënanipa

(Mäateo 27.57-61; Odoca 23.50-56; Wäö 19.38-42)

⁴² Oodeoidi nani, Gäwadecæ ba ate guëmanguiönæ inguimpa, ante nani täno cæönæ ingatimpa. İninque gäwadecæ oo ba ate wædinque, ⁴³ Adimatea inömö quëwëningä inte Ootee, Wængongui Awënë Odeye nempo mönö æyedënö quëwengäimpa, ante wänö conte bai quëwënogäimpa. Tömengä oodeoidi nani Apænte Äincabo adocä inongä inte nænængä inongäimpa. Tömengä inömö Pidato weca nïowo guiñenämai pö guidinque, Itota wodi baö pönömi ænte wëmoe, angantapa. ⁴⁴ Angä ëñëninque Pidato, Wa. Wabänö wængäi, ante pönente wædinque awënë capitäo ingante äñete pongä adinque, Do wængäi. ⁴⁵ Äñongante edæ, Dobæ wængäimpa, ante apænecä ëñëninque Pidato wæatë Ootee ingante, Itota wodi baö inï o togænte æmäwe. ⁴⁶ Angä ëñëninque Ootee inömö edæ waëmö weocoo nino nani änoncoo godonte äninque Itota wodi baö inï wi æmpote wææ wi æwadinque pædæ wæænonte ænte gocantapa. Ayæ mänincoo wini wini caate dicamontaa wointatodë guidö nï cæte daga wëninque dicabo edæ da pænæ pönö tee mönogacäimpa. ⁴⁷ Mänömai cæyongante Mäadiya Mäagadadënë nani änogä tönö Otite badä Mäadiya mänimpodaque tömengä ingante nani da wëniñömö adatapa.

Itota do wæningä inte nani ömæmonte quëwengampa

(Mäateo 28.1-10; Odoca 24.1-12; Wäö 20.1-10)

16 Tömënäni guëmanguiönæ iinque go ate Mäadiya Mäagadadënë nani änogä tönö Tantiago badä Mäadiya tönö Tadömee tömënäni inömö, Itota wodi baö öni pæcäimpa, ante cædinque ogui waqui godonte änanitapa. ² Ænte ate wacä tëmäna baquinque nãö tæcæ bayonte iinäni do godinque nænque tæcæ mä awæ nänö tamöñedë Itota wodido pöninque, ³ nãmæneque änanitapa.

—Dicabo nani moncadodınca æcänö tæi piñængä inte pönö da tæñænä ate mönö guite aqui. ⁴ Ante wædinque go gongænte pömo ayönäni dicabo nænængade pöni nani äninca incæ dobæ dicabo nænængade pöni do da tæñæi a öñö adänitapa. ⁵ Adinque tömengä wodido wänë guite ayönäni edëningä bai ingä doycan-coo näämænta ëmoncoo wëñate tömëmæ inö tæ contate a ongongä adinque onquiyænäni wæatë edæ ancai guiñente wädänitapa. ⁶ Edëningä inömö,

—Guiñente wädämai iedäni. Minitö, Itota Näatadeta quëwëningä ingante edæ wadäni awæ timpodäni ate në wæningä ingante edæ diqui diqui mimini awädö. Tömengä edæ dobæ nani ömæmonte tao gocäimpa. İñömö edæ dæ angampa. İintodë nänö öñontatodë inömö edæ öñontatoque iï ataqeedäni. ⁷ Ayæ Pegodo tönö

tömengä nänö nē emīñænīnāni tōmānāni inānite gode ante apænedinque mīnitō nē adīmīni inte iimainō ante apænecāmīnīmpa. “Itota iñōmō tāno Gadideabæ godinque a ongōñongante mīnitō adoyōmō godinque tömengä nänö āninō bai godinque tömengä ingante acāmīnīmpa,” ante gote apænedāni.

⁸Ante apænecā ēñēnīnque, Æbānō ante mānōmaī angāā, ante ancai guñēnte do do wāate wædinque onquiyænāni iñōmō Itota wodido abæ tawæ tao wodii wīnōnānitapa. Guñēnte wædōnāni inte tōmēnāni wadāni inānite bee tēnīnque apænedāmaī pæ wēēngadānīmpa.

Itota ingante Māadiya Māagadadēnā acampa

(Wäö 20.11-18)

⁹Itota tōmēnāni nāni guēmāniōnā go ate iimō baānæque do nāni omæmonte pō a ongōñongante Māadiya Māagadadēnā tānocā agacāiṃpa. Iingā onquiyængā iñōmō wēēnēñedē wēnæidi tiæte ganca ināni ēnempoyongante Itota wido cædongāiṃpa. ¹⁰Ñōwo iñōmō Itota mīñæ nāni quēwēnīncabo ayæ ca wæwēñōnānite Māadiya Māagadadēnā incæ tōmēnāni inānite māo apænecantapa. ¹¹Itota ayæ miingā ingā atabopa, ante apænecā ēñēnīnque tōmēnāni wīi pōnēnānique ongongadānīmpa.

Wada tömengä nänö nē emīñænīna Itota ingante adapa

(Odoca 24.13-35)

¹²Mānōmaī wīi pōnēnāni ate tōmēnāni nāni Itota mīñæ godīncabo incæ mēnaa idōmæ gote ayōna Itota incæ wacā bai bate cægongā adatapa. ¹³Ate wædinque tōmēna wadæ godinque Itota mīñæ nāni godīncabo wadāni inānite apænedinque, Mānōmaī cægongā atamōnāpa, āna ēñēnīnque edæ cōwē pōnēnāmaī ingadānīmpa.

Tömengä nänö da godōnīnāni inānite Itota angampa

(Māateo 28.16-20; Odoca 24.36-49; Wäö 20.19-23)

¹⁴Ayæ ate onte ganca ināni nāni Itota mīñæ godīncabo cænte tedete a cōñōnāni Itota pō a ongongā adānitapa. Tömengä iñōmō, Mīnitō pōnēgade impa. Wadāni, Itota do edæ nāni omæmonte cægongā atamōnīpa, ante apænedāni ēñēnīnque mīnitō mīmō omædēmīni inte wīi pōnēmīni, ante Itota pīngacāiṃpa.

¹⁵Ayæ tōmēnāni inānite, “Wængonguī nänö badongāināni inguipoga tōmāo quēwēnāni iñōnānite mīnitō botō imotedō ante māo tōmānāni inānite watapæ apænēmīni ēñēncædānīmpa. ¹⁶Edæ acānō wede pōnēnīnque apænē guīda tömengä botō godō æmo beyænque quēwēncæcāiṃpa. Wæætē nē pōnēnāmaī ingā guiquēnē tömengä nänö apænte pante wæquinque pōnēnāmaī ingampa. ¹⁷Botō cæbo ate nē pōnēnāni adobai edæ iimāi mā cædāni adīnque wadāni do ēñēncædānīmpa. Botō emōwo apænedinque tōmēnāni wēnæidi inānite wido cæcædānīmpa. Ayæ wadāni tōmēnāni tededō mā tedecædānīmpa. ¹⁸Ayæ tæntæ bæi ongōnāni incæte wænguimæ bedāni incæte wēnæ wēnæ badāmaī incædānīmpa. Ayæ caate wædāni inānite gampodāni ate do waa bacædānīmpa,” ante Itota apænegacāiṃpa.

Itota incæ oōnædē æicampa

(Odoca 24.50-53)

¹⁹Iinque tōmēnāni inānite apænecā ēñēnāni ate edæ Wængonguī oōnædē ængō cæcā æidīnque Wængonguī tömengä nänö tōmēmæ inō mōnō Awēnē Itota iñōmō tā

contagacäimpa. ²⁰ İninque tōmengä nänö emiñäeninäni wæætē edæ tōmāmæ wadæ godinque wabæca măo wabæca măo apænedäni eñēnānitapa. Mönö Awēnē incæ cæcä ate tōmēnāni mă cædāni adinque nē eñēnāni wæætē, Nö impa, ante wægadän-impä. Mäninque ante yewæmonte impa.

*Itota Codito ingantedō ante***Odoca***nānō watapæ ante yewæmongainta***Odoca imo yewæmōmopa, ante**

1 Ñōwodāni nanguī īnāni incæ, Mōnitō weca æbānō iinque cægatimpa, ante do yewæmoncæ cædānipa. ²Doyedē quēwēnāni īñōmō, Æbānō cægatimpa, ante nē agaiñāni inte māniñō ante, Nāwangā impa, ante nē apænedāni badinque adode beyæ ante nē cædāni bagadānimpa. Tōmēnāni mōnitō imōnite adodō ante pōnō apænedāni ēñentamōnipa. Īninque īnāni apænedāni mōni ēñēnō bai ñōwodāni wæætē edæ adobaī pōni ante yewæmoncæ cædāni iinque botō īñōmō edæ, Adobainō ante yewæmoncæboimpa, antabopa. ³Teopido bitō ñænāemi pōni inōmi inte ēñēmi. Botō īñōmō, Wēenēñedē æbānō mā pōni cægatimpa, ante ayæ, Ñōwo ganca æbānō cæte ī, ante ēñencæte ante nanguī cædinque ædæmō ēñēnimo inte botō edæ, Bitō Teopidobi acæbiimpa, ante adodō adodō ante yewæmōmopa. ⁴Wadāni odōmonte apænedāni ēñēninque bitō wæætē, Nō intawo, ante ēñencæte ante cædinque botō yewæmōninta adinque edæ do ēñencæbiimpa. Mānōmañō ante yewæmōmo ae.

Wäo ēñaqingä, ante anquedo ponte apænecampa

⁵Wængonguī quī, ante nē godōnāni pancadāniya Abiyaidi nāni cabo īñōnānite adocanque Tacadiya emongacāimpa. Tōmengä īñōmō Oodeabæ awēnē odaye Edode wodi nānō ingaiñedē, Wængonguī quī, ante nē godongä ingacāimpa. Tōmengä nānōogængä Aadōo wodi pæingä Editabeti ingacāimpa. ⁶Tōmēna īñōmō nāna gæncaya inōna inte Wængonguī ayongante nō cæte quēwēninque Wængonguī, Īmaī cædāni, ante nānō wææ angaiñō ante ēñente quēwēñōnate wadāni, Ēñēnāmaī quēwēnāpa, ante ædō cæte anguiñāni. ⁷Editabeti owæntacā inte wēñæ mānāmaī quēwēñongante wēñæ dæ ä wædinque nāna gæncaya picæna badinque quēwengadāimpa.

⁸Dæ ä wædinque quēwēñōnate Tacadiya wodi tōnō godongāmæ nāni godoncabo nāni godōñedē ba iinque tōmengä īñōmō, Wængonguī quī, ante godongantapa. ⁹Godōñongante tōmēnāni, Æcānō ñōwo guiidinke oguī waquī tanguingää, ante acæte ante cædānitapa. Tōmēnāni cōwē nāni cæi bai cædinque tōmēnāni emōwo wataa wataa yewæmōninque adoyōmō da wēninque adotaque tadonte adānitapa. Ayōnāni, Tacadiya emōwo impa, ante adinke änāni ēñēninque tōmengä Awēnē Wængonguī tæiyæ wæmō oncōnē guiidinke oguī waquī tangantapa. ¹⁰Waadāni tōmānāni, Ñōwo oguī waquī iya tangæimpa, ante yabæcōnē godongāmæ pōninque Wængonguī ingante apænegadānimpa. ¹¹Tacadiya īñōmō tæcæ tancæ cæyongä Wængonguī nānō da pōnōningä anquedo tōmēnāni nāni iya tāimpaa gäänē tōmēmæ inō pō næ gongænte a ongongä acantapa. ¹²Adinke Tacadiya, Æbānō cæquī, ante ancai guiñente wæcantapa. ¹³Wæyongante anquedo guiquēnē,

—Tacadiya, guiñēnāmaī īe. Bitō Wængonguī ingante apænebi ēñēninque tōmengä bitō änō ante do cæcampa. Bitō nānōogængä Editabeti īñōmō onguiñængä ingante

mancaecäimpa cæbii. Mangä ēñacä adinque bitö tömengä emöwo, Wäö, pemoncæbiimpa. ¹⁴Wēñængä waa pōni ēñacä adinque bitö watapæ tocæbiimpa. Wadäni nangui inäni adobaï wēñængä ēñacä ate tocædänimpa. ¹⁵Wængongui incæ, Botö ayömo bitö wengä wadäni bai guiyä inämaï ñænængä pōni ingä abopa, angä beyæ waodäni adobaï tömengä beyæ ante adinque tocædänimpa. Yowepæ biinömæ incæ wapæ incæ tömengä ti nämæ tömämæ bedämaï incæcäimpa. Wäänä cæncadē ayæ ongōñongante Wængongui Tæiyæ Waemö Önöwoca incæ tömengäa pō guiicæcäimpa. ¹⁶Ayæ bitö wengä picængä badinque mäo apænecä ēñenique idægoidi nangui inäni Wængongui gämænö poncædänimpa. ¹⁷Ayæ Wængongui Önöwoca ingante Ediya wodi nänö ewocagai bai adobaï ewocadinque bitö wengä inömö adocä nänö tæi piñængä bai adobaï tæi piñængä incæcäimpa. Ininque tömengä inömö mönö Awënë nänö ponguinö ante täno beyænte bai cædinque odömongä ate mæmpoidi wēñänäni inänite pönente waadete cæcædänimpa. Ayæ tömengä apænecä ēñenique nē ēñänämaï cædäni incæ nö cæte quēwänäni nāni ēñenö bai nö ēñente cæcædänimpa. Mänömaï cædinque bitö wengä adocä apænecä ēñente cædinque waodäni mönö Awënë nänö ponguinö ante eyepæ pōni cædinque tömengä ingante ante wänö concædänimpa. Mänömainö ante anquedo Tacadiya ingante apænecäcäimpa.

¹⁸ Angä ēñenique Tacadiya wæætē anquedo ingante apænedinque,

—Inämpa botö nänöogænä picænä inampa. Botö adobaï picæmo imopa. Ædö cæte, Nö impa, ante ēñenguimoo.

¹⁹ Äñongä anquedo wæætē,

—Botö Gabodiedo ingaimo imo apa anewë. Wængongui weca nē ongömo inö mote tömengä inömö, Botö watapæ apænedö ante bitö Tacadiya ingante apænete pöe, ante da pönongä pontabopa. ²⁰Nöwo inömö botö änö pönänämaï imi inte bitö babetadebi badinque tededämaï inömite botö apænedö ante iinque cæbo ba ate tedecæbiimpa, ante anquedo Tacadiya ingante apænecantapa.

²¹Mänömaï te deyöna wadäni, Tacadiya taqingä, ante wänö cöninque, Wængongui tæiyæ waemö oncönē guiidinque æiquedö taqingäa, ante wægädänimpa.

²²Tömengä tadinque tededämaï ingantapa. Ayæ godömenque tededämaï inte önompoque oo cæpo oo cæpo cæcä adinque tömēnāni, Wængongui tæiyæ waemö oncönē guiite ongōninque Tacadiya wiimonte bai mä pōni adingä inte nöwo edæ babetadecä inte tacampa, ante wædänitapa.

²³Wængongui beyæ ante cæe, ante nāni iinque änionæ ganca cædinque Tacadiya wodi oncönē gocantapa. ²⁴Mäniñedē ate tömengä nänöogængä Editabeti yædëmadä badinque edæ önompo æmæmpoque apäicä ganca oncönē wē womongantapa. ²⁵Tömengä inömö edæ, “Wēñēñedē, Owæntabi imipa, ante piināni wæbo adinque Wængongui botö imote waadete pönö cædinque nöwo wæætē, Piināmaï incædänimpa,

ante cæcampa,” ante pönēninque Editabeti togacäimpa.

Itota ēñäqingä, ante

²⁶Editabeti önompo æmæmpoque go adoque apäicä yædëmadä nänö inñedē Wængongui tömengä anquedo Gabodiedo nāni äñongä ingante da pönongä pöninque Gadideabæ Näatadeta nāni quēwēñömö gocantapa. ²⁷Godinque tömengä baquēcä Mäadiya nāni äñongä weca pongantapa. Tömengä ingante Awënë Dabii wodi

pæingä Ootee, Monguimo, ante do äningä inongäimpa. ²⁸ Inique anquedo Gabodiedo Mäadiya weca pö guidine tömengä ingante,

—Wængongui nänö nē waadebi inte ēñē. Wængongui bitö imite waa cæcæcäimpa. Wädäni onquiyænäni inänite Wængongui pönömenque pönö waa cædongä inte bitö imite edæ godömenque waa pönī pönö cæcä acäimpa. ²⁹ Ante tæcæ apæneyongä tömengä ancai guiñëninque, Quinö bai ī ante botö imote apænecä, ante wæcantapa. ³⁰ Wæyongante anquedo wæætē,

—Mäadiya, bitö guiñënämaī īe. Wængongui incæ edæ bitö imite nanguī waadete pönö acampa. ³¹ Bitö nōwo edæ yädëmadä badinque bitö wëñängä onguiñängä mancæbiimpa. Tömengä ëñacä ate bitö tömengä ëmōwo, Itota ingampa, ante pemoncæbiimpa. ³² Tömengä iñömö edæ nanguī tæī piñänte cæcä incæcäimpa. Inique tömengä ingantedö ante, Æibæ pönī nē Quëwengä Wengä ingaingä ingampa, ante apænecäimpa. Ayæ Awënë Wængongui incæ tömengä ingante apænedinque, Bitö Awënë bayömi mæmæ awënë odeye Dabii wodi nempo dodäni nani quëwengai bai bitö nempo adobai quëwencædänimpa, ante adocä Itota ingante pönongä ænte Awënë Odeye bacæcäimpa. ³³ Inique Aacoboidi tömengä nempo quëwëñönänite tömengä cōwë tömënanī Awënë Odeye incæcäimpa. Tömengä nänö Awënë Odeye inguimämo iñömö edæ dæ badämaī ingäimpa, ante Wængongui nänö da pönöningä Mäadiya ingante angantapa.

³⁴ Mäadiya wæætē tömengä ingante,

—Botö iñæmpa onguiñängä tönö mönämaī inte wëñæ ædö cæte manguimoo.

³⁵ Ante wæyongante anquedo wæætē edæ,

—Wængongui Tæiyæ Waëmö Önöwoca incæ bitö weca poncæcäimpa. Wængongui Æibæ Quëwënongä tömengä nänö tæī piñänö incæ wææ owo bai cæcæcäimpa. Mänömaī beyæ bitö Wëñängä Onguiñängä incæ Tæiyæ Waëmö ëñacä ate, Wængongui Wëñängä ingampa, ante pemoncædänimpa. ³⁶ Ayæ godömenque apænebo ëñē. Editabeti bitö guidengä iñömö picængade pönī iñongante, Owæntacä ingampa, ante tededänitawo. Incæte tömengä picængadecä incæ dobæ edæ önompo æmæmpoque go adoque apäicä yädëmadä inte tömengä wëñängä edæ onguiñängä ingante ënengampa. ³⁷ Iñæmpa quiëmē ante Wængongui nänö änönö ante tömä edæ cōwë cæcäimpa.

³⁸ Ante anquedo angä ëñente wædinque Mäadiya,

—Mönö Awënë beyænque nē cæbo imopa. Bitö änö bai Ao ämo bacäimpa.

Ante apænecä ëñëninque Wængongui nänö da pönöningä incæ ëmö cæte wadæ gogacäimpa.

Editabeti weca Mäadiya ëñacæ gocampa

³⁹ Mäniñedē ate Mäadiya wodi wadæ godinque änämänë quingæ ædinque Oodebæ quëwënanī nani quëwëñömö adoyömonque incæ pöninque, ⁴⁰ Tacadiya oncönē pö guidine Editabeti ingante, Waa quëwëmi, angantapa. ⁴¹ Mäadiya mänömaī apænecä ëñëninque Editabeti wodi wengä cæncadē ongöninque wogæi wogæi tocantapa. Editabeti iñömö Wængongui Tæiyæ Waëmö Önöwoca incæ tömengä pö guicä inique ædæmö pönī ëwocacä bacantapa. ⁴² Mänömaī badinque adocä ogæ tededinque,

—Mönö onquiyæncabo iñömönte bitö adobique bitö waa toquinque impa, angantapa. Wængongui wamöni imönite pönömenque waadedinque bitö imönite

godömenque nanguï waadecampa. Bitö në ënëngä ingante Wængonguï nanguï waadecä beyä tömengä adobaï tocäcäimpa. ⁴³ Botö önömoque iñömote bitö iñömö mönö Awënë badä inömi inte edä botö weca quïnante pömi. ⁴⁴ Tæcä edä apänebi önömonca ëñëñömo botö cæcadë në ongönongä incä wogæi wogæi watapæ tocä ae. ⁴⁵ Mönö Awënë bitö imite nänö äninö ante bitö iñömö, Tömengä cöwë cæcäcäimpa, ante pönëninque bitö toquinque edä në pönëmi imitapa.

⁴⁶ Editabeti mänömaï apäneyongä Mäadiya wæätë ämotamini ante bai iïmaï angacäimpa.

“Botö mïmöno pönëninque, Mönö Awënë iñömö edä waa pönï mönö inongä ingampa, ante watapæ apänebopa.

⁴⁷ Ayä, Quëwencäbiimpa, ante botö imote në Ængä iñongante botö Wængonguï ingante ante pönëninque edä watapæ tote ëwocabopa.

⁴⁸ Botö tömengä ingante në cædömo inte önömoque pönï iñömote tömengä wæätë botö imote waa acampa.

Iïncayä nänömoidi wæä iïncayä nänömoidi wæä inäni tömänäni botö imotedö ante apänedinque,

Tömënä iñömö Wængonguï nänö në waadedä ingadäimpa, ante apä necädänimpa.

⁴⁹ Wængonguï në Tæï Piñäongä inte botö imote pönö nanguï cæcä beyænque edä apä necädänimpa.

Tömengä ëmöwo iñömö edä Tæiyä Waëmö ëmongampa.

⁵⁰ Ayä iïncayä nänömoidi wæä iïncayä nänömoidi wæä inäni tömengä ingante guiñente cæyönänite tömengä wæätë waadete pönö waa cæcäcäimpa.

⁵¹ Tömengä në tæï piñäongä inte tömengä önöpoca cæte bai nanguï cæcantapa. Ayä wadäni, Tömëmoque waëmö imopa, ante önöwëninque pönënäni inänite tömengä angä näwä godänitapa.

⁵² Ayä awënëidi näni tæ contaimpaa ongönönänite tömengä tömënäni inänite wido cæcä godänitapa.

Wæätë önönänique inänite ængö cæcä contadinque tömënäni wæätë awënëidi bai badänitapa.

⁵³ Ayä gue äenente wädäni iñönänite tömengä waa pönï cænguï godongä äninque tömënäni tömo pönï cænänitapa.

Wæätë nanguï ëadäni tömënäni inänite da godongä godinque ömæpodäni inte godänitapa.

⁵⁴ Mönö idægocabo iñömö tömengä ingante në cæmö iñömote tömengä mönö tönö godongämä cæcantapa.

Ayä, Waadete botö pönö waa cægainö bai adodö cæcæboimpa, ante pönëninque tömengä ñöwo pönö waadete waa cæcä ämompä.

⁵⁵ Abadäo wodi pæimö iñömote tömengä mönö mämmæidi inänite nänö angainö bai cædinque,

cöwë ñimpo cædämaï inte pönö waadete cæcampa.”

⁵⁶ Ante Mäadiya wodi ämotamini ante bai angantapa. Ayä Editabeti weca mäa go adoque apäicä quëwente ate ayä ate tömengä oncönë gogacäimpa.

Wäö ëñacampa

⁵⁷ Editabeti wodi guiquënë oo pönï ënëninque tömengä wëñængä onguiñængä mangacäimpa. ⁵⁸ Ayä tömengä guidënäni tönö godongämä quëwënäni iñömö, Æ

mönö Awënë wii piingä inte Editabeti ingante ædæmō waadete waa cæcampa, ante tæcæ ëñëmönipa, äninque Editabeti tönö godongämæ togadänimpa. ⁵⁹ Ayæ adoque Wængongui itädë go ate wëñængä ingante æmontaique ëö togænca cædäni iñömö godongämæ pöninque tömengä wæmpo ëmöwo bai ante, Tacadiya, ante pemonca cædänitapa. ⁶⁰ Cæyönänite wäänä Baa äninque,

—Tömengä ëmöwo Wäö ëmoncæcäimpa, ante wææ angadäimpa.

⁶¹ Äñongante tömënäni wæætë,

—Iñæmpa bitö guidënäni Wäö ëmönämaï. Dæ ämönänipa.

⁶² Äninque wæmpocä ingante ömō cædinque, Æmongänö ëmonguingä ämii, ante odömömi amönii. ⁶³ Äñönänite tömengä tededämaï inongä inte önompocaque odö-mongä adinque yewæmöinta äninque pædæ pönönäni ate tömengä iñömö edæ, “Tömengä ëmöwo Wäö ëmoncæcäimpa,” ante yewæmongä adinque tömänäni edæ guññente wægadänimpa. ⁶⁴ Yewæmongä ate tömengä önonguënëwa ñimæ cæguënëwate bai baguënëwate ate edæ tömengä ogæ tededinque Wængongui ingante, Waa pönö cæbi abopa, ante watapæ edæ apænecantapa. ⁶⁵ Iñinque mänñömö godongämæ quëwënäni tönö Oodeabæ änamænë quëwënäni tönö tömänäni, Mänö-maï batimpa, ante nangui tededänitapa. ⁶⁶ Tededäni ëñëninque në ëñënanäni wæætë, “Iingä wëñængä iñömö æbänö nänö baquinque edæ pæquingä,” ante tömänäni godongämæ wægadänimpa. Edæ tömengä tönö Wængongui godongämæ cæcä ingacäimpa.

Tacadiya ämotamini ante angampa

⁶⁷ Wëñængä wæmpocä Tacadiya guiquënë Wængongui Tæiyæ Waëmö Önö-woca ingante ëwocadinque Wængongui beyæ apænedinque ämotamini ante bai apænecantapa.

⁶⁸ “Mönö idægocabo Wængongui iñömö adocä mönö Awënë iñongante mönö tömengä ingante waa ate watapæ apænecäimpa.

Tömengä iñömö, Botö quinäni bate abæ tawænte bai quëwencädänimpa, ante tömengä do æncæ pongä acäimpa.

⁶⁹ ‘Önömoncawæ wææ ëmoncate bai wææ gompcæcäimpa,’ ante cædinque tömengä mönö imonte në ænguingä ingante da pönongä pöninque iingä wæætë ængä beyænque quëwëmompä.

Wængongui ingante në cægainä awënë odeye Dabii wodi päingä inongä inte tömengä mänömaï cæcä beyænque quëwëmompä.

⁷⁰ Wængongui iñömö tömengä beyæ në apænegainäni tæiyæ waëmö ingainäni iñönänite tömënäni tönö apænedinque,

Cöwë cæcæboimpa, ante nänö apænegainö bai ñöwo edæ iinque cæcampa.

⁷¹ Mönö iñömö në piinte änanäni nempo ongöñömönte tömengä,

Piinte cædänipa, ante adinque mönö imonte gä pe æmpote ö ængä beyænque quëwëmompä.

⁷² Mänömaï cædinque tömengä mönö mämmæidi inänite nänö angainö bai cædinque ñöwo waadete pönö cæcampa.

Ayæ, Botö pönö cæbo ate minitö Ao ämüni iñinque mönö godongämæ wææ cæte quëwengäimpa, ante tömengä tæiyæ waëmö nänö angainö ante cöwë pönënongä inte ñöwo iinque cæcampa.

⁷³ Edæ mämmæ Abadäo wodi ingante, Botö në Quëwëmo ingaimo inte nöingä ämopa,

ante Wængongui iimainö ante nänö pönö cæquinö ante nö apænecäiropa.

⁷⁴ Abadaö eñemi. Nē piinte cædäni nempo wæwēñöminite botö gä pe æmpote ö æninqe

pönö cæbo ate eyepæ badinque mīnitö wæætē guiñēnāmaī inte botö Wængongui imo beyæ cæcæmīnīro, ante Wængongui nē pönö cæqingä inte apænecäiropa.

⁷⁵ Wængongui iñömö edæ, Mīnitö tæiyæ wæmö ewocadinque mīni quēwenganca botö weca nö pönī cæte quēwencæmīnīro, ante pönö cæcä ingacäiropa,” ante wēñængä mæmpocä Tacadiya wodi apænecantapa.

⁷⁶ Ayæ wēñængä ingante tömengä iimaī ante godömenque apænecantapa.

“Botö wēmi bitö imite botö wæætē apænebo eñēe, angantapa.

Nē Æibæ Pönī Quēwengä beyæ bitö nē apænebi inömi imīro, ante bitö imitedö ante apænecædänīro.

Mönö Awēñē taadö pinongæiropa, ante bitö edæ täno beyænte gote baī cædinque,

⁷⁷ mönö Awēñē quināni inānite iimaī ante odömonte apænecæbiro.

Wēnæ wēnæ mīni cædö ante Wængongui pönö ñimpo cæcä ate mīnitö iñömö edæ, Tömengä ængä beyænque mönö quēwengui imīro, ante do eñencæmīnīro, ante apænebi eñencædänīro.

⁷⁸ Edæ mönö Wængongui incæ mönö wēnæ wēnæ wædönö ante waadete pönö waa cædinque,

öönädē Quēwengä ingante mönö weca da pönongä pöninqe nænque tæcæ tamö baī emongä acæiropa.

⁷⁹ Mänömaī cædinque mönö wænguimämo beyæ wēmö iñömö awædö,

ante wæyömonte tömengä ponte a ongongä adinque mönö nænque pämo oo tote baī quēwērompa.

Ayæ, Mīnitö mīni gänē pönente quēwenguinö taadonque poncæmīnīro, ante tömengä töö æmænte mämongä pörompa.”

Mänömainö ante Tacadiya wodi tömengä wēñængä ingante apænecäiropa.

⁸⁰ Wēñængä iñömö do pædinque önöwoca tæi piñænte ewocagacäiropa. Idægoidi weca tömengä nänö ponte a ongonganca önömæca quēwengacäiropa.

Itoa eñacampa

(Mäateo 1.18-25)

2 Wäo idægoidi weca nänö pönedē iinque bayonte awēñē Tetædo Agoto iñömö, Æpomīnidö imīni, ante acæte ante cædinque odömāno ömæ nē quēwēñäni inānite edæ, Mīnitö emöwo tömämīni yewæmoncæmīnīro, angacäiropa. ² Tidiabæ awēñē Tidēnio ingäñedē odömāno awēñē täno angä. ³ Eñēninqe adocanque tömengä mæmæidi nāni quēwengaiñömö wacä tömengä mæmæidi nāni quēwengaiñömö tömānāni yewæmoncæte ante edæ go go cægadänīro.

⁴ Iinque Oodeabæ Awēñē wodi Dabii wodi pæingä inongä inte Ootee iñömö Gadideabæ Näatadeta nāni quēwēñömö quēwēninqe adobaī tömengä mæmæ Dabii wodi nänö quēwengaiñömö Bedēe iñömö gogacäiropa. ⁵ Edæ Ootee nänöogængä inguingä Mäadiya yædëmadä iñongante tömēna nāna gæncaya inguina guëa yewæmoncæ godatapa. ⁶ Bedēe ponte quēwēñöna Wēñængä iñömö iinque pædinque ⁷ bamoncadengä incæ onguiñængä inte iimaī eñagacäiropa. Mäniñömö mongui incönē iñömö mäniñedē eyede pönī goti ongönāni ate wædinque tömēna wæætē cænēnāni cænguī oncontaidē guiyantaidē go guida ate Wēñængä eñacantapa. Iinque guiyān-

taidē ēñacā ate wäänā Wēñængä ingante weocoo wīni wīni caadinque cænēnāni cænguincadedē ñō cædā ōñongantapa.

Obegaidi inānite nē aadāni inānite anquedoidi apænedāni

⁸ Idægoidi cænīnāni obegaidi nāni ānōnāni iñōnānite nē aawēnāni iñōmō eyepancadē adoōnæ woyowotæ a cōnōnānimpa. ⁹ A cōñōnāni mōnō Awēnē anquedo ponte a ongōñongä mōnō Awēnē nānō ñāō ēmōnō beyænque godongāmæ guīnæ gongæ adinque nē aadāni ancai guīñēnte wædānitapa. ¹⁰ Anquedo iñōmō tōmēnāni inānite, “Guīñēnāmaī imæwedāni. Mīni nanguī ēñēnte toquinque ante botō ñōwo watapæ apænebo ēñēdāni. Mīnitō tōnō inguipoga tōmāo quēwēnāni adobaī adode beyænque watapæ tocæmīnimpa. ¹¹ Mōnō Awēnē Codito iñōmō, Æmo beyænque quēwēncæmīnimpa, ante nē Ængä baquingä inongä inte do edæ ēñacantapa. Edæ mīnitō beyæ ante tōmengä ñōwoōnæ incæ awēnē Dabii wodi nānō quēwēngaiñōmō ēñacantapa. ¹² Nō impa, ante gote acæmīnimpa. Wēñængä ingante wäänā wīni wīni caadinque edæ cænīnāni cænguincadedē ñō cædā ate a ōñongä adinque mīnitō, Nō impa, ante ēñencæmīnimpa.”

¹³ Ante anquedo āñongä wadāni nanguī ināni oōnædē owodāni incæ iñontobæ tontadoidi ongōnāni bai tōmengä tōnō godongāmæ ponte a ongōnīnque āmotamīni ante bai ānīnque Wængonguī ingante iīmaī ante watapæ apænedānitapa.

¹⁴ “Wængonguī æibæ pōnī quēwēnongä inte edæ ñāō apāite bai ēmongānō anguēnē. Tōmengä inguipoga iñōmō waadete pōnō cæcä beyænque mīni waocabo edæ gänē pōnenguīmīnidō anguēnē.”

¹⁵ Ante āmotamīni ante bai ānīnque anquedoidi oōnædē adodō wadæ æite godāni ate nē aawēnāni iñōmō nāni cabo tededinque,

—Mōnō Awēnē mōnō imonte apænecä mōnō ēñēnō ante, Æbānō cæcāi, ante mōnō Bedēē gote ædæmō acæimpa. ¹⁶ Ānīnque pogodo ponte ayōnāni Māadiya tōnō Ootee a ongōñōna Wēñængä iñōmō cænīnāni cænguincadedē a ōñongä adānitapa. ¹⁷ Iīnque adinque wadæ godinque, Wēñængä æbānō ingäā, ante anquedo apænecä nāni ēñēnō ante gode ā gode ā cæte wayōmō wayōmō quēwēnāni inānite tededāni ēñēnānitapa. ¹⁸ Ēñēnīnque tōmānāni wæætē, Nē aawēnāni æbānō ante apænedāni, ante guīñēnte wædānitapa. ¹⁹ Māadiya guiquēnē, Wēñængä æbānō ingä ānānīi, ante nāmā pōnēē congantapa. ²⁰ Nē aawēnāni guiquēnē, Wængonguī ñāō apāite bai ēmōnongä inte pōnō waa pōnī cæcä æmōnīpa. Edæ anquedo nānō apænedō bai do cæcä amōnīpa, ante apænedinque eyepancadē ocæ ēmāente gogadānimpa.

Bitō Wengä, ante mæmpoda Wēñængä ingante Wængonguī oncōnē ænte pōnapa

²¹ Ayæ, Adoque Wængonguī itædē go ate æmontaique ëō togængæimpa, ante idægoidi cōwē nāni cæi bai cædinque Wēñængä ingante ëō togænānitapa. Ayæ Māadiya yædēmadāmaī nānō iñedē anquedo nānō pemōnīnō bai ānīnque mæmpoda Wēñængä ëmōwo ante, Itota, pemongadaimpa.

²² Wäänā mānimpoōnæ wepæ nāate inampa, ante Mōitee wodi nānō angaimpoōnæ iīnque go ate tōmēna, Wēñængä iñōmō Wængonguī Awēnē quī ingampa, ante mōnō godongæimpa, ante tōmengä ingante Eedotadēē iñōmō ænte gogadaimpa. ²³ Edæ, “Onguīñænāni bamoncadēnāni tōmānāni tæiyæ waēmō bacædānimpa, ante tōmēnāni Wængonguī Awēnē nempo pædæ godongæimpa,” ante Awēnē Wængonguī

nänö angainö ante ëñëninque Mäadiya tönö Ootee do cædatapa. ²⁴ Ayæ, Equemöna nāna gæncaya, Wængonguī quī, ante godongæimpa. Wīi mänömaī cæte tæcæ wengä wengä pæda mënaa ïnate godongæimpa. Ootee tönö Mäadiya ïñömö mänömaī cædinque, Wængonguī quī impa, ante mënaa ïnate ænte pönninque pædæ godöna ængacäimpa.

²⁵ Mäniñedë adocanque edæ tömengä ëmöwo Timeönö Wængonguī beyænque ante nö cædongä inte Eedotadëë ïñömö quëwengacäimpa. Idægoidi wampo pönente quëwencädänimpa, ante Wængonguī æyedënö ædæmö cæquingää, ante tömengä wänö cönonte quëwënonngäimpa. Ayæ Wængonguī Tæiyæ Waëmö Önöwoca ingante tömengä cöwë ewocacä ïnongäimpa. ²⁶ Wængonguī Tæiyæ Waëmö Önöwoca do apænecä ëñëninque Timeönö wodi ïñömö, Botö ayæ wänämaī mïmï quëwë-moyedë mönö Awënë Codito ingante aquïmo ïmopa, ante do ëñëningä ïnongäimpa. ²⁷ Nöwo ïñömö Wængonguī Önöwoca angä ëñëninque tömengä Wængonguī oncö ñænæncönë yabæcönë pö guicantapa. Mäniñedë Itota mëmpoda ïñömö idægoidi wææ ante nāni cægainö bai cæcæte ante cædinque Wëñængä Itota ingante ænte pö guida. ²⁸ Adinque Timeönö ïñömö edæ Wëñængä ingante bæi ongonte pæ mäninque Wængonguī ingante, Tömëmi waa toquinque mönitö ïmönite pönö cæbipa, ante apænecantapa.

²⁹ “Bitö Tæiyæ Awënë ïnömi inte ëñëmi. Bitö ïmite në cæbo ïñömote bitö doyedë, Cæbo acæbiimpa, angabiimpa.

Ïninqe bitö äninö bai ñöwo edæ ïninqe cæbi adïmo ïñömote bitö ämi ate wænte goboe.

³⁰ Edæ bitö, Quëwencæmïnimpa, ante

në Ænguingä ingante ñöwo da pönömi ponte ëñacä do abopa.

³¹ Mänömaī cædinque bitö, Wädäni nāni cabo wädäni nāni cabo waodäni tömänäni acädänimpa,

ante cædinque bitö në Ænguingä ingante ñöwo da pönömi ponte a ongonngä acäimpa.

³² Idægoidi ïnämaī ïnäni incæ tömënäni nāni cabo nāni cabo incæ edonque acädänimpa, ante cædinque bitö da pönömi pönninque tömengä ñäö apäite bai a ongonngä acädänimpa.

Ayæ möni idægocabo ïñömönite bitö, Wëñængä ængä beyænque botö quimïni ïñömö ñäö bai waëmö pönï ëmöninque quëwencæmïnimpa, ante pönö cæbi abopa.”

³³ Ante ämotamïni ante bai Timeönö wodi, Wëñængä æbänö cæquingä ingää, ante tedecä ëñëninque Wëñængä mëmpo tönö tömengä badä ïñömö guïñente wædatapa. ³⁴ Timeönö wæætë, Mina waa toquinque ïngä Wëñængä ingante æmïnapa, ante apænedinque tömengä badä Mäadiya ingante ïïmaī ante godömenque apænecantapa.

—Picængä badinque ïngä Wëñængä cæcä beyænque idægoidi pancadäniya tægo wæænte bai wæyönäni pancadäniya wæætë ængä gantite bai quëwencädänimpa. Wængonguī ïñömö, Wëñængä ingante ate ëñencädänimpa, ante odömonte cæyongä pancadäniya wæætë adocä ingante godö piïnte tedecädänimpa. ³⁵ Ante apænedinque Timeönö ïñömö Mäadiya ingante apænecantapa. Mänömaī bayonte, Nanguī ïnäni æbänö ante mïmöno pönënanii, ante edonque acäimpa. Bitö ïñömö yaëmë yete bai wæwente ewocacæbiimpa, ante apænecäimpa.

³⁶ Ayæ wadä iñömö Wængongui beyæ nē apænedä iñömö tömēnā ěmōwo Ānā adobaī ongōnantapa. Atedoidi nāni cabo iñōnāni adocanque Pānoedo wēnā iñōnā inte tömēnā picængadedä ingadäimpa. Tömengä iñömö baquēcānedē mön-
 inque nānōogængä tönö önompo æmæmpoque go mēa wadepo quēwente ate
 onguiñængä guiquēnē nāñe wængacäimpa. ³⁷ Onquiyænā iñömö ñōwo otenta i
 coatodo wadepo nānō ěnagainganca owæmpoinā quēwēnā inte tömēnā Wængongui
 oncö ñænæncönē yabæcōnenque cōwē quēwēninque taodāmaī iñōnāimpa. Itædē
 woyowotæ tömēnā cōwē, Wængongui ingampa, ante waa cædinque Wængongui
 ingante apænecæte ante wantæpiyæ cænāmaī quēwēnā iñōnāimpa. ³⁸ Tömēnā
 ñōwo eyepæ pōni māmō bee tēninque Itota ingante adinque Wængongui in-
 gante waa ate pōnēninque apænecantapa. Ayæ wadāni, Mōnitō Eedotadēē iñömö
 quēwēmōni iñömōnite Wængongui æyedēnō pōnō cæcä beyæ abæ tawænte quēwen-
 guimōni, ante nē wānō cōnāni inānite dodä Ānā iñömö Wēñængä ingante do adinā
 inte, Wēñængä nē Ænguingä inte do ěnate pongä atabopa, ante cōwē apænedä
 ěñengadänimpa.

Näatadeta ocä ěmænte godänipa

³⁹ Ayæ mänii, Awēnē Wængongui, ĩimaī cædāni, nānō angaiñö ante iinque
 cæte ate Ootee nāni wencabo Gadideabæ gocæte ante wadæ godinque Näatadeta
 tömēnāni nāna quēwēniñömö pongadänimpa. ⁴⁰ Wēñængä iñömö edæ picængä
 pædinque tæi pñængä bacantapa. Ayæ ocaci encacä inte nangui ěñente bagacäimpa.
 Ayæ Wængongui waadete pōnō apænecä ěñente ewocadinque tömengä nē waadete
 pōnō cæcä ingacäimpa.

Wængongui oncönē Itota gote ongongampa

⁴¹ Wodo pænta gogaïönæ baī Patowa mönō ææmæ cænguiönæ ñōwo impa, ante
 pōnēninque idægoidi Patowa ante Eedotadēē godinque ææmæ cædōnänimpa. Itota
 mæmpoda adobaī Patowa nāni ämæ cōwē cæyedē wadepo iñō wadepo iñō Eedo-
 tadēē goda ingadäimpa. ⁴² ĩninque Itota dote wadepo iñonte Wængongui beyæ ante
 ææmæ cōwē nāni cædō baī Ootee nāni wencabo do gote cædänitapa. ⁴³ Ææmæ
 tömäā iinque cædinque oncönē poncæte ante taadonque pōninque mæmpoda adä-
 maī iñōnate Itota guiquēnē Eedotadēē iñömö ayæ quēwengantapa. ⁴⁴ Godongämæ
 mönō poncabo tönö pongä ĩmaingampa, ante pōnēna inte taadō tömäā itædē pōn-
 inque tömēna guidēnāni weca tömēna æmigoidi weca diqui diqui mincæ cæyōna,
⁴⁵ edæ dæ angä. Ate wædinque tömengä ingante diqui mincæte ante Eedotadēē
 adodō ocä ěmænte gogadäimpa.

⁴⁶ Mēönaa go adoönæque iñonte diqui diqui minte ate edæ Wængongui oncö
 ñænæ oncönē yabæcönē pō guiite ayōnate Itota iñömö nē odömōnāni weca ěñēē
 cōninque, Æbänö i, Æbänö cæquii, ante angä adatapa. ⁴⁷ Tömengä apænecä ěñē-
 inque tömānāni, Æ tömengä iñömö ocaci nē encacä waa ěñengä amōnipa, änānitapa.
 Ayæ, Itota ingante, Æbänö i, ante änāni ěñēninque tömengä wæætē nō apænecampa,
 ante wædinque tömānāni guñente wædänitapa. ⁴⁸ Mæmpoda iñömö māniñömö pō
 guiite ayōna Itota mänōmaī cæcä adinque guñente wædatapa. Tömengä badä tö-
 mengä ingante,

—Botō Wēmi ěñēmi. Mōnatō ĩmōnate quīnante mänōmaī cæbii. ĩnæmpa bitō
 wæmpo tönö mönatō bitō ĩmite ante ancaa diqui diqui minte wæwentamōnapa.

⁴⁹ Āñongante tōmengä wæætë,

—Mīnatō iñæmpa, Mæmpocä oncönë Itota ongonguëngä ingampa, ante ëñëñämaï imīnatawo. Quīnante wayōmō diqui diqui mīmīnatawo.

⁵⁰ Āñongante, Æbänō ante angää, ante ædæmō ëñëñämaï īnatapa.

⁵¹ Tōmengä wæætë mæmpoda mīñæ gote Nāatadeta pōninque tōmëna nāna änō ante cōwë ëñente cæcantapa. Wäänä guiquënë tōmengä nänō cædinō ante nāmā pōnëë congä ingacäimpa. ⁵² Itota iñōmō edæ nanguï ëñengä bate pædongäimpa. Picængä bayongante Wængonguï tōnō waodāni adobaï tōmengä ingante cōwë godōmenque godōmenque waadete adōñānīmpa.

Wäo æpænë nē guidongä önömæca quëwente apænecä

(Mäateo 3.1-12; Mäadoco 1.1-8; Wäo 1.19-28)

3 Tibedio quīte wadepo tōmāmæ awënë nänō inōñedë Pontio Pidato wodi nāni ānongä adoyedë Oodeabæ awënë iñongante Edode wæætë Gadideabæ awënë inongäimpa. Adoyedë iñōmō Edode wodi nänō tōññacä Pedipe Itodeabæ Todacōnitebæ awënë iñongä Ditāniato wodi adoyedë Abidëniabæ awënë inongäimpa. ² Mānimpodāni māññōmæ awënëidi iñōñāni Ānato wodi tōnō Caipato wodi adoyedë, Wængonguï quī, ante nē godōna ñænænā pōñi inōñānīmpa. Tōmëna nāna inōñedë adoyedë edæ Tacadiya wodi wengä Wäo ingante önömæca iñōmō ayæ quëwëñongante Wængonguï apænecäimpa. ³ Wäo wodi iñōmō Oododānonga ömaaque go tōmāo cægōninque iīmaï apænecä ëñëñānitapa. Mīnitō, Idæwaa wënæ wënæ cæte awädō, ante ocæ ëmænte Wængonguï gämænō pōedāni. Ayæ, Wënæ wënæ botō cædinō ante Wængonguï pīñāmaï inte pōñō ata cæpocä quëwëmopa, ante edonque acäimpa, ante odōmōninque æpænë guīiedāni, ante Wäo angacäimpa. ⁴ Māññōmaï cædinque Wængonguï beyæ nē apænegaingä Itaiya wodi iīmaï ante nänō yewæmonte apænegaññō baï Wäo adobaï cægacäimpa. “Adocanque önömæca ongōninque iīmaï ante yedæ tedecä ëñencædānīmpa. ‘Awënë nänō ponguññō ante tee monte baï cædinque, taadō tōññō pīnonte baï cæedāni.

⁵ Onquiyabo incæ ānanquidi incæ, Mæmō pōñi bacäimpa, ante ææ wocäimpa.

Biyōnæ iñōmō tee mōninque mæmō pōñi badongäimpa.

Taadō idiquibæ iñonte tōññō pīnongäimpa.

Wënæ wënæ iñonte wainō pōñi taadō badongäimpa.

⁶ Taadō māññōmaï mæmō pōñi ba iñinque tōmāmæ quëwënāni incæ, Wængonguï pōñō ængä beyænque mōñō quëwenguññō impa, ante edonque acædānīmpa, ‘ancæcäimpa.”

⁷ Ante yewæmonte ongompa cæmīni, ante Wäo wodi æpænë guīicæte ante pōñāni nanguï ināni iñōñānite iīmaï angantapa. “Mīnitō iñōmō tæntæ pæimīni baï inte nē babæ cæmīni iñinque edæ ëñenguënë quëwëmīni. Wængonguï nänō pīinte panguīmāmo ante edæ, Wænompadāni, ante æcänō āna ëñëñinque mīnitō wodii wīnonte pōmīni. ⁸ Wængonguï Awënë gämænō mīnitō ocæ ëmænte poncæ cæmīnitawo. Nō nō pōmīni iñinque edæ nē ocæ ëmænte pōñāni wainca incate baï waa cædāni baï mīnitō iñōmō edæ adobaï waa cæedāni. Mīnitō nāmāneque pōñëñinque, ‘Mōñitō mæmæ Abadäo wodi pæimōni imōni beyænque Wængonguï mōñitō imōnite waa acæcäimpa,’ ante nāmā wææ ancæ cæmīnitawo. Iñæmpa Wængonguï angä baï Abadäo wodi pæimīni mīni inō baï dicacoo incæ dobæ adobaï bacædōññi

apa ānewēmīnii. ⁹ Awæ iñōmō wainca incadāmai ī ininque edæ do yete gongapamō iya tangæīmpa. Awæ yecæte ante awænca eyewa næænāni bai Wængongui nānō panguiāmō iñōmō edæ oo pōni pō apa quēwēmīnii,” ante Wäō apænecacāīmpa. ¹⁰ Angā wædinque godongāmæ ongōnāni pancadāniya wæætē,

Mānōmai ī ininque æbānō cæquēnēmōni imōnii. ¹¹ Āñōnānite Wäō,

—Weocoo mencooga nē mangā iñōmō weocoo ōmaacā ingante adocooque godongā æncæcāīmpa. Cængui nē ēacā adobai cængui ōmæpocā ingante godongā æncæcāīmpa, angantapa. ¹² Ayæ odōmāno awēnē nānō āninta nē ænāni guiquēnē adobai æpænē guicæte ante pōninque Wäō ingante ānānitapa.

—Nē odōmōmi ēñēmi. Mōnitō iñōmō æbānō cæquēnēmōni imōnii. ¹³ Āñōnānite tōmengā wæætē,

—Mīnitō awēnē, Mānimpota, ante nānō ānimpota ante wadāni inānite āmīni pædæ pōnōnāni eyepæ æninque mīnitō wæætē, Tōmēmōni qui, ante godōmenque ānāmai iedāni, angantapa. ¹⁴ Ayæ tontadoidi adobai tōmengā ingante,

—Mōnitō guiquēnē æbānō cæquēnēmōni imōnii.

Āñōnānite Wäō wodi iīmai angantapa.

—Mīnitō wacā tōmengā nānō godonte æinta ō æncæte ante pæmēnēnāmai iedāni. Ayæ wacā wænæ wænæ cædāmai iñongante mīnitō, Wænæ wænæ cæbitapa, ante babæ wapiticæ ānāmai iedāni. Ayæ mīnitō cædi beyæ mīnitō awēnē eyepæ pōnongā æninque piyænē cæte godōmenque æinente wædāmai iedāni, angantapa.

¹⁵ Āñongante godongāmæ ongōnāni iñōmō, Wængongui doyedē, Codito ponguingā, ante nānō nē angaingā iñōmō edæ iingā Wäō wabānō imaingampa, ante ōnōwēnenque pōnēnāni inte edæ, Wäō æbānō cæquingā, ante acæte ante a ongōnānitapa. ¹⁶ Wäō wæætē tōmānāni inānite apænedinque, “Botō guiquēnē nāwangā mīnitō imīnite æpænē guidōmo guimīnīpa. Īncayæ ate nē Ponguingā guiquēnē tōmengā iñōmō nāwangā nænængā pōni iñongante botō guiquēnē guiyāmo inōmo inte tōmengā awæncata incæ ædō cæte nī cæquimoo. Tōmengā iñōmō mīnitonga gonga bæcote bai cædinque Wængongui Tæiyæ Waēmō Ōnōwoca ingante edæ da pōnongā æncæmīnīpa. ¹⁷ Waocā, Todigo tōmēmō wati wati tæñōninque botō tæñōniñōmō ōnōmancaque baquinque botō waiña tōmāmō oncōnē da wencæboīmpa, ante timpodæ næænte wo ææntodō wo ææntodō cædinque ontapocoo wææincoo wadæ nēmænte wo ēwengampa. Waocā mānōmai wo ēwencæte ante timpodæ næængā bai mōnō nē Ponguingā iñōmō adobai oo pōni apænte ancæcāīmpa. Edæ waēmō ināni inānite apænte æninque tōmengā ontapocoo bai ināni inānite gonga cōwē bæcōyōmō iya tangā gonte wæcædānīmpa.”

¹⁸ Mānōmainō āninque Wäō wodi godōmenque wade wade apænedinque tōmēnāni inānite, Āmo ēñēmaiimīnīpa, angacāīmpa. Ayæ, Codito ingantedō ante watapæ apænecā ēñengadānīmpa. ¹⁹ Incæte tōmengā pancabaa Awēnē Edode ingante, Bitō tōniñacā nānōogængā Ādodiya ingante mōmīi, ante piīninque Edode nānō wīwa cædinō ante tōmānō ante piīngā adinque, ²⁰ Edode wodi guiquēnē godōmenque wīwa cædinque Wäō ingante tee mōnecā wægacāīmpa.

Itota æpænē guicampa

(Māateo 3.13-17; Māadoco 1.9-11)

²¹ Mānīi Wäō tōmānāni inānite æpænē nānō guidōñedē Itota ingante adobai guidongā guicantapa. Guiite ate Wængongui ingante apæneyongā ōōnæ wi ænete

baï bayonte edæ ²² Wængongui Tæiyæ Waëmö Önöwoca equemö wææ contate baï tömengäa edonque pönï wææ guicä ate öönædë apäenedinque,

—Bitö botö Wëmi botö në waadebi ïmipa. Bitö ïmite waa adinque waa tobopa, ante öönædë apäenecä ëñengacäimpa.

Itota nänö mämæidi

(Mäateo 1.1-17)

²³ Todëinta wadepo nänö ëñagaiñedë ïnque bayonte Itota mänïñedë täno cæcä ingacäimpa. Tömengä ingante në pæpogadongä ïñömö Ootee ïñongante wadäni, Itota wæmpocä ingampa, ante pönëñänänimpa.

Ootee wodi mæmpo wææ Edii wodi ingacäimpa.

²⁴ Edii wodi mæmpo wææ Mäatato,

Mäatato wodi mæmpo wææ Debii,

Debii wodi mæmpo wææ Mëedequi,

Mëedequi wodi mæmpo wææ Cäna,

Cäna wodi mæmpo wææ docä Ootee wodi ingacäimpa.

²⁵ Mänïi docä Ootee wodi mæmpo wææ Mäatatia,

Mäatatia wodi mæmpo wææ Ämoto,

Ämoto wodi mæmpo wææ Näacö,

Näacö wodi mæmpo wææ Etedi,

Etedi wodi mæmpo wææ Näagai ingacäimpa.

²⁶ Näagai wodi mæmpo wææ Mäato,

Mäato wodi mæmpo wææ docä Mäatatia,

docä Mäatatia wodi mæmpo wææ Tëmei,

Tëmei wodi mæmpo wææ Ooteco,

Ooteco wodi mæmpo wææ Oodaa ingacäimpa.

²⁷ Oodaa wodi mæmpo wææ Owäna,

Owäna wodi mæmpo wææ Deta,

Deta wodi mæmpo wææ Dodobabedo,

Dodobabedo wodi mæmpo wææ Tadatiedo,

Tadatiedo wodi mæmpo wææ Nëedi ingacäimpa.

²⁸ Nëedi wodi mæmpo wææ docä Mëedequi,

docä Mëedequi wodi mæmpo wææ Adi,

Adi wodi mæmpo wææ Cotäö,

Cotäö wodi mæmpo wææ Edëmadäö,

Edëmadäö wodi mæmpo wææ Ede ingacäimpa.

²⁹ Ede wodi mæmpo wææ Ootowee,

Ootowee wodi mæmpo wææ Ediyedede,

Ediyedede wodi mæmpo wææ Oodii,

Oodii wodi mæmpo wææ docä Mäatato ingacäimpa.

³⁰ Mänïi docä Mäatato wodi mæmpo wææ docä Debii,

mänïi docä Debii wodi mæmpo wææ Timeönö,

Timeönö wodi mæmpo wææ docä Oodaa,

docä Oodaa wodi mæmpo wææ wacä docä Ootee,

mänïi docä Ootee wodi mæmpo wææ Öönäö,

Öönäö wodi mæmpo wææ Ediyaquimö ingacäimpa.

³¹ Ediyaquimö wodi mæmpo wæä Mēedeä,
 Mēedeä wodi mæmpo wæä Mēna,
 Mēna wodi mæmpo wæä Māatata,
 Māatata wodi mæmpo wæä Nāatāni ingacäimpa.

³² Nāatāni wodi mæmpo wæä Awēnē Dabii,
 Awēnē Dabii wodi mæmpo wæä Yæte,
 Yæte wodi mæmpo wæä Obedo,
 Obedo wodi mæmpo wæä Boodo,
 Boodo wodi mæmpo wæä Tāna,
 Tāna wodi mæmpo wæä Nāatōō ingacäimpa.

³³ Nāatōō wodi mæmpo wæä Äminadabo,
 Äminadabo wodi mæmpo wæä Adämii,
 Adämii wodi mæmpo wæä Adöni,
 Adöni wodi mæmpo wæä Etedöo,
 Etedöo wodi mæmpo wæä Pade,
 Pade wodi mæmpo wæä wacä docä Oodaa ingacäimpa.

³⁴ Mänii docä Oodaa wodi mæmpo wæä Acobo,
 Acobo wodi mæmpo wæä Itæca,
 Itæca wodi mæmpo wæä Abadäo,
 Abadäo wodi mæmpo wæä Tade,
 Tade wodi mæmpo wæä Nāacodo ingacäimpa.

³⁵ Nāacodo wodi mæmpo wæä Tedogo,
 Tedogo wodi mæmpo wæä Dagao,
 Dagao wodi mæmpo wæä Pedego,
 Pedego wodi mæmpo wæä Eebedo,
 Eebedo wodi mæmpo wæä wacä docä Tāna ingacäimpa.

³⁶ Mänii Tāna wodi mæmpo wæä Cainäo,
 Cainäo wodi mæmpo wæä Adapacadæ,
 Adapacadæ wodi mæmpo wæä Temö,
 Temö wodi mæmpo wæä Docä Nöwee,
 Docä Nöwee wodi mæmpo wæä Nämeco ingacäimpa.

³⁷ Nämeco wodi mæmpo wæä Māatotadëo,
 Māatotadëo wodi mæmpo wæä Ënoco,
 Ënoco wodi mæmpo wæä Aadedo,
 Aadedo wodi mæmpo wæä Mäadadede,
 Mäadadede wodi mæmpo wæä wacä docä Cainäo ingacäimpa.

³⁸ Docä Cainäo wodi mæmpo wæä Ënoto,
 Ënoto wodi mæmpo wæä Teto,
 Teto wodi mæmpo wæä Adäo,

Adäo wodi ingante nē badongaingä iñömö edæ mönō Mæmpo Wængongui inongä ingacäimpa. Mäninäni iñömö edæ Itota mæmæidi ingadänimpa.

Itota wēnæ wēnæ cæcæcäimpa, ante wēnæ cæcampa

(Mäateo 4.1-11; Mäadoco 1.12-13)

4 Mänii Oododänonga quēwēninque Wængongui Tæiyä Waēmö Önöwoca ingante ædæmō ewocacä inongä inte Itota iñömö wadæ gocantapa. Goyongante Wæn-

gonguī Ōnōwoca tōmengā ingante ōnōmæca ænte māocā gogacāimpa. ² Godinque coadenta ēōnæ mānipoōnæ quēwēñongante wēnæ awēnē pōninque, Wēnæ wēnæ cæe, ante ancaa cædongāimpa. Itota iñōmō mānipoōnæ cænāmaī iningā inte edæ iinque bayonte gæwænte wæcantapa. ³ Adinque wēnæ awēnē tōmengā ingante,

—Bitō nāwangā Wængonguī Wēmi inōmi inte dica incæ pāō āmi ba cæmaīmipa. ⁴ Āñongante,

—“Cæntedō quēwenguī ī. Īñæmpa Wængonguī nānō apænedō ante tōmānō ante ēñente quēwengāimpa,” ante yewæmonte ongō apa, āninque Itota edæ Baa angacāimpa.

⁵ Ayæ Itota ingante onquiyaboga ænte mæicā æite ongōñongante wēnæ awēnē wæætē Inguipoga awēnē odeyeidi ōmæ tōmāo ongōñōmæ adoyōmō a ongonte bai adotedæ odōmongā acantapa. ⁶ Odōmongā ayongante Itota ingante āninque wēnæ awēnē wæætē,

—Awēnēidi waincōnē pōni ongōninque waēmoncooga mongæninque tæi pīñæn-
inque tōmēnāni nempo quēwēnāni inānite nanguī ānāni ēñente do cædānīpa, ante
abii. Tōmēnāni waēmō pōni nāni ēmōmāmo ante æcānō ēmonguingāā, ante, Tæi
pīñænte nāni ēnempodō ante æcānō empoquingāā, ante, botō iñōmō edæ do ænte
ēnempogaiimo inte tōmēmoque nē āmo inte godōmo ænānīpa. Īninque bitō ĩmite,
Bado, godōmo æe, āmopa. ⁷ Īninque bitō mānincoo æncæte ante botō weca ædæ
wæænīnque, Tatānabi bitō Wængonguī bai inōmi ĩmīpa, āmi adinque botō wæætē,
Bado, bitō tōmāmæ Awēnē babīpa, ante edæ pōnōmo æmaīmīpa, ante wēnæ awēnē
ānewengantapa.

⁸ Angā ēñēninque Itota,

—Īmaī ante yewæmongatīmpa. “Awēnē Wængonguī weca ædæ wæænte tōmengā
ingante apænedīnque, Bitō adobique Wængonguīmi ĩmidō anguēnē, ante watapæ
apænecæbiīmpa. Ayæ, Wængonguī beyænque cæcæbiīmpa,” ante wææ yewæmonte
ongō apa quēwēē, ante Itota angacāimpa.

⁹ Wēnæ awēnē ayæ Itota ingante Eedotadēē ænte māocā goyongante Wængonguī
oncō ñænæ oncōmāa ænte mæicā æicantapa. Æite næ gongæñongante wēnæ awēnē
wæætē, Bitō nāwangā Wængonguī Wēmi ĩmīpa, ante acædānīmpa, ante bitō to
wæibāwe. ¹⁰ Āninque wēnæ awēnē godōmenque apænedīnque, “Īmaī ante do
yewæmonte ongōmpa,

Bitō ĩmite wææ aacædānīmpa, ante cædinque

Wængonguī tōmengā anquedoidi inānite da pōnongā

¹¹ pōninque bitō ĩmite iñæ æmpodāni ĩninque,

bitō dicaa tee tēwadāmaī incæbiīmpa,”

ante yewæmongatīmpa cæbii.

¹² Āñongā Itota wæætē,

—Īñæmpa ĩmaī ante ingatīmpa. “Bitō, Mōnō Awēnē Wængonguī æbānō
cæquingāā, ante acæte ante cædāmaī incæbiīmpa. Ēñēnāmaī cæbo incæte edæ mōnō
Awēnē Wængonguī botō ĩmote cōwē wææ aaquingā, ante acæte ante wēnæ wēnæ
cædāmaī incæbiīmpa,” ante wææ yewæmonte ongō apa ānewēē, Itota angacāimpa.

¹³ Ante Itota angā ate wēnæ awēnē incæ, Itota wēnæ wēnæ cæcæcāimpa, ante
nānō ānewēnō iinque cædinque iincayæ ate nānō ponte cæquinque edæ wadæ
gogacāimpa.

Gadideabæ godinque Itota täno cæcampa

(Mäateo 4.12-17; Mäadoco 1.14-15)

¹⁴Itota iñömö Wængongui Önöwoca nänö täi piñænö ewocadinque Gadideabæ adodö pongacäimpa. Do pongäimpa, ante adinque wadäni wayömö gode ä gode ä cädäni ëñengadänimpa. ¹⁵Tömengä iñömö mänïömæ wayömö wayömö godinque tömënäni nani odömöincönë go guite go guite cædinque odömönte apäñecä adinque tömänäni, Waa pönï odömönte apäñecampa, ante tedegadänimpa.

Näatadeta iñömö ponte Itota apäñecampa

(Mäateo 13.53-58; Mäadoco 6.1-6)

¹⁶Wæätë Näatadeta tömengä nänö pægaiñömö pöninque tömënäni guëman-guiönæ iñonte Itota nänö cöwë cæi bai ñowo cæcantapa. Oodeoidi Wængongui apäñecä nani ëñente yewæmongainta ate odömöincönë go guidinque tömengä mäninta ate apäñecæte ante ængæ ganticä. ¹⁷Adinque tömengä ingante Itaiya wodi Wængongui beyæ nänö yewæmongainta pædæ pönönäni ængantapa. Äñinque, Mänïñömö yewæmonte i, ante ñi cæpote adinque, Iimaï yewæmonte ongompa, ante apäñecantapa.

¹⁸“Wængongui Awënë Önöwoca botonga pö guicä ate botö tömengä ingante ewocabopa.

Iñinque tömengä botonga gao cæte bai cædinque tömengä nänö täi piñämämo da pönöninque botö imote angantapa.

Bitö ömaadäni wæwänäni inänite Wængongui Awënë waa pönö cæcæcäimpa, ante watapæ apäñebi ëñencädänimpa, angacäimpa.

Në tee mönete bai wädäni inänite bitö, Wængongui pönö wi æñecä beyænque mïnitö abæ tawænte gocæminimpa, ante godö apäñebi ëñencädänimpa.

Në babetamönäni inänite, Mïnitö wæätë waa acæminimpa, ante bitö godö cæcæbiimpa.

Piinte cädäni ate wæwente quëwëñönänite bitö wæätë gä pe æmpobi abæ tawænte bai gocädänimpa.

¹⁹Ayæ, Wængongui Awënë nänö waadete cæquïnepo do batimpa, ante apäñebi ëñencädänimpa, ante Wængongui botö imote do da pönongä pömo imopa.”

²⁰Ante Itaiya wodi nänö yewæmongainta adinque adodö nä nä capodinque mänïñömö në cæcä ingante pædæ godöninque Itota täc contacantapa. Mänömaï cæcä adinque tömënäni nani odömöincönë në ongönäni tömänäni tömengä ingante cöwä adänitapa. ²¹Ayönänite,

—Wængongui botö imotedö ante apäñecä ëñëninque nani yewæmongainö bai ñowoönæ ëñëñömini edæ do iinque ba aminipa.

²²Ante apäñecä ëñëninque tömänäni, Tömengä nanguï waadete pönö tedecampa, ante apäñedinque tömengä ingante waa adinque guïñente wädänitapa.

—Iingä iñæmpa Ootee wengä imaingä inte bamönengæ mänömaï cæcampa, ante awædö, ante nani caboque tededänitapa.

²³Mänömaï ante wæyönänite Itota tömënäni nani pönönö ante önöwënenque ëñëninque,

—Botö imote apäñedinque mïnitö, “Bitö dotodo bai iñömi inte nämä incæ cæte waa babæwe,” ante dodäni nani angainö bai ante tedemini awædö. Ayæ, “Capë-

naömö iñömö bitö waa cæbi adinque tededäni ëñëmönipa. Mäniñömö bitö cædinö baï tömöni ëñagañömö adobaï wii cæbii,” ante wæmïni abopa.

²⁴ Äninqe Itota godömenque apænedinque,

—Näwangä ämopa. Wængongui beyä nê apæneçä iñömö tömengä quëwëñömö ponte apæneyongante, Wii ëñëinê wædö, ante Baa änänipa. ²⁵ Näwangä edæ ämo ëñeedäni. Docä Ediya wodi quëwengäñedê mëa go adoque wadepo ayä tæcæ wadepo iñonte tömënäni ömæ tömäo nani gæwænte wægaimämo baquinque cöönæ cædämaï ingatimpa. Mäniñedê Idægobæ iñömö owæmpoïnäni nanguï inäni quëwëñönäni, ²⁶ tömënäni weca Ediya ingante da godönämaï inte Wængongui wæætê edæ, Bitö Tidöo eyequeï gote Tadepata iñömö quëwengä owæmpoingä weca goe, angä gogacäimpa. ²⁷ Adobaï Wængongui beyä nê apænegaingä Editeo wodi quëwengäñedê Idægobæ ämontai nê baadäni nanguï inäni iñönänite Wængongui tömënäni inänite wadæ caadämaï inte wæætê edæ Tidiabæ quëwengä Näämäo ingante wadæ caacä waintai baagacäimpa.

²⁸ Ante Itota apæneçä ëñëninque mänincönê ongönäni tömänäni piinte äinäni badänitapa. ²⁹ Äinäni badinque tömengä ingante tömënäni nani quëwëñömö yabæ inö wido cædänitapa. Ayä tömënäni nani mäenonte quëwenquidi tömäne ænte mäo godinque tömënäni, Bæ tamö guidömëmæ tæ wææncæcäimpa. ³⁰ Ante cæyönäni, Itota iñömö tæcæguedê godinque aamö cæte wadæ gogacäimpa.

Itota angä ëñente wënæ incæ tao gopa

(Mäadoco 1.21-28)

³¹ Wadæ godinque Gadideabæ Capënaömö nani quëwëñömö pöninque Itota tömënäni nani guëmanguïönæ bayonte tömënäni inänite odömonte apæneçä ëñënanitapa. ³² Eñëñönäni tömengä nämä tæi piñæninqe nê angä inongä inte nö odömonte apæneçä ëñente wædinque tömënäni, Æ tömengä iñömö nö pöni odömonte apæneçä ëñëmönipa, ante wædänitapa.

³³ Mäniñedê edæ onguiñængä wënæ wentamö ëwocacä tönö nê quëwengä iñömö tömënäni odömöincönê a ongöninque iñontobæ yedæ ante aa pecantapa.

³⁴ —Quimä quëwëë. Bitö Itota Näatadeta quëwëniimi inte quinante mönatö weca pömi. Mönatö imönate edæ ämæwo wido cæcæte ante wabänö pömitawo. Bitö æmömido imii, ante botö do atabopa. Bitö Wængongui Tæiyä Waëmö Wëmi inömi imipa, ante edæ do ëñëmopa.

³⁵ Ante tedeyongante Itota wææ äninque,

—Apocänê quëwenguënê tedewëë. Waocä baönê quëwënömi inte edæ tao gobäwe.

Angä ëñëninque wënæ guiquënê tömänäni ayönäni waocä ingante mäo tæ gotodö go wææñongante tömengä baonga wënæ wënæ cædämaï inte tao gotapa. ³⁶ Itota angä wënæ tao gocä adinque tömänäni guiñente wædinque nämäneque tededinque,

—Tömengä æbänö cæte nê angä ingäa. Iñæmpa nê angä inongä inte tömengä tæi piñæninqe wënæidi nê wentamö ëwocadäni inänite angä tao godäni awædö.

³⁷ Ante pönente wædinque tömënäni, Itota mänömaï cæcampa, ante tededinque mäniömæ tömäo gode ä gode ä cædäni ëñengadänipa.

Pegodo nänöögä wäänä ingante Itota cæcä gancæ bacä

(Mäateo 8.14-15; Mäadoco 1.29-31)

³⁸ Mänii tömënäni odömöincönë ongonte apänedinque Itota tao godinque Timönö oncönë go guicantapa. Go guiyongante wadäni, Timönö nänöögængä wäänä iñömö nanguï daicawo gawænte nangæ bacampa cæbii, änäni. ³⁹ Ëñëninque Itota tömengä weca go gongæninque daicawo inte piïnte bai äninque, Idæwaa impa, angä dæ batapa. Ìninque tömengä gancæ badinque ængæ gantidinque tömënäni beyæ cæcantapa.

Nantate wæwënäni inänite Itota cæcä waa badänipa

(Mäateo 8.16-17; Mäadoco 1.32-34)

⁴⁰ Nænque gæwadecæ bayonte nantate wæwënäni inänite Itota weca ænte pönäni adinque tömengä wacä ingante wacä ingante godö gampocä ate tömënäni waa badänitapa. ⁴¹ Ayæ waodäni nanguï inäni baönë wænæidi quëwëñönänite Itota angä ëñëninque tao godinque,

—Bitö Wængonguï Wëmi inömi imipa, ante Yæ änänitapa.

Ìninque Itota, Botö Codito inömo imopa, ante do ëñënanipa, ante wædinque wænæidi inänite, Apocænë imæwedäni, ante edæ wææ angacäimpa.

Itota oodeoidi odömöincönë go guite apænecä

(Mäadoco 1.35-39)

⁴² Ayæ baänæ ate Itota wayömö önömæca gocantapa. Gocä adinque wadäni tömengä ingante ante diqui diqui minte tömengä weca do pöninque, Mönitö imönite ëmö cæte godämaï incæbiimpa, ante wææ cæcæte ante cædänitapa. ⁴³ Ate wædinque tömengä wææ äninque,

—Botö, Wængonguï Awënë Odeye nempo watapæ quëwenguïnö anguënë, ante cöwë apænequënëmo imopa. Wængonguï, Mänömainö ante apænecæbiimpa, ante botö imote da pönongä pönimo inte botö tömänäni quëwëñömö gote apænequënëmo inte gobopa.

⁴⁴ Ante Oodeabæ godinque tömënäni odömöincönë go guï go guï cædinque Itota apænecä ëñengadänimpa.

Gæyæ nanguï pöni dadöwënänipa

(Mäateo 4.18-22; Mäadoco 1.16-20)

5 Ayæ Itota Guënetadetepæ wedeca gote ongöninque Wængonguï nänö apänedö ante apænecantapa. Ëñencæte ante cædinque nanguï inäni godongämæ pö goto ongonte ëñëë congadänimpa. ² Apænecä ëñëñönäni tömengä gomö ayongä gæyæ në dadöwënäni dicamöñæ yamoncæte ante ti wææninque tömënäni nänï ti wææ godimpo mëa wipo gæwapæ wedeca ömædempo wäi wocæ acantapa. ³ Adinque Itota adoque wipodë Timönö wipodë guïdinque tömengä ingante, Tæcæpæno gämænö eyequeï wo go wäi wocæe, angä gä go wäi wocængä ìninque Itota tæ contate tömënäni inänite odömonte apænecä ëñënanitapa. ⁴ Tömënäni inänite iinque apänedinque Timönö ingante,

—Bitö wipo tæcæpæno godömenque ænte gobi ate minitö dicamöñæ wo guïtodonte gæyæ dadonte æncæminimpa.

⁵ Āñongä Timönö,

—Awënë ēñēmi. Tömää woyowotæ gæyæ dadoncæte ante dicamõñæ ancaa gutodõñömöni wii datapa. Incæte bitö ämi beyænque botö Ao ante cæcæboimpa.

⁶ Ante mæo gutodõñönäni gæyæ nanguï pönï da ate dicamõñæ wodo wægo tengatimpa. ⁷ Īninqe Timönöidi wa wipodë ongönäni ponte godongämæ æncædänimpa, ante ömö cædäni adinque wa wipo ænte pönäni ate gæyæ mæa wipodë eyede pönï ñönönäni ate wipo ëmä guicæ cætimpä. ⁸ Īninqe, Itota angä beyænque gæyæ nanguï pönï æmönipa, ante adinque Timönö Pegodo iñömö Itota önöwa gäänë ædæ wææninque,

—Awënë ēñēmi. Botö wænæ wænæ entawëmo iñömote bitö waëmö pönï entawëmi inte nänënë goe, angacäimpa.

⁹ Ante guñente wæyongante në dadöwënäni wadäni adobaï, Æbänö cæte nanguï pönï gæyæ dadonte æmöö, ante wædinque ancai guiñëninque Timönö tönö godongämæ wädänitapa. ¹⁰ Ayæ Timönö tönö godongämæ gæyæ në dadöwëna Tebedeo wodi wëna Tantiago tönö Wäö adobaï guñente wægadäimpa. Īninqe Itota iñömö Timönö ingante,

—Guiñënamäi incæbiimpa. Gæyæidi gæte bitö æmäi bitö iincayæ ate waodäni inänite gæte bai cædinque apænëbi ëñëninque ponte quëwencædänimpa.

¹¹ Angä ëñëninque wipo ëmönaiya ænte mämö ñä cæcadodinque tömënäni mäincoo tömancoo edæ ëmö cædinque edæ Itota miñæ wadæ gogadänimpa.

Në baadingä ingante Itota wadæ caacampa

(Mäateo 8.1-4; Mäadoco 1.40-45)

¹² Īincayæ ate Itota wadäni nani quëwëñömö gote quëwëñongante wacä cöwë baate ëñawënogä inte tömengä weca ponte guidömëmæ ædæ wææninque angantapa,

—Awënë, bitö Ao ämi inte wadæ caabi ĩninqe botö waintai baabaïmopa.

¹³ Āñongä Itota pædæ wææmpo gampo caadinque,

—Ao ämopa. Bitö waintai baacæbiimpa.

Ante tæcæ åñongä ñömæintai nänö ëñadintai edæ dæ baadinque tömengä waintai do baacantapa. ¹⁴ Īninqe Itota tömengä ingante,

—Ëñēmi. Bitö waintai baadimi inte wadäni inänite mæo apænedämaï ie. Wæætë, Näwangä impa, ante acædänimpa, ante cædinque bitö, Wængongui qui, ante në godongä weca töingä godinque waintai bitö baadintai odömömi ædæmö acæcäimpa. Ayæ Möitee wodi wææ ante nänö angaincoo bai ænte pöninque bitö waintai bitö baadi beyæ ante edæ, Wængongui qui, åninqe në godongä ingante pædæ godömi æncæcäimpa, ante wææ angantapa.

¹⁵ Wææ angä incæte, Itota mänömaï cæcampa, ante nanguï gode ä gode ä cædäni ëñëninque nanguï inäni Itota apænecä ëñencæte ante ayæ tömënäni nani caate wædö waa bacæte ante goto pö goto pö cægadänimpa. ¹⁶ Itota iñömö wantæ wantæ iñö önömæca nänënë godinque Wængongui ingante wæætë wæætë apænægacäimpa.

Në cömäingä ingante Itota angä dao dao gocampa

(Mäateo 9.1-8; Mäadoco 2.1-12)

¹⁷ Ayæ adobaï iimö iñö iimö iñö Itota cöwë odömönte apænægacäimpa. Mäniñedë oodeoidi nani wææ angainö ante nanguï adinque në ëñëñäni iñömö në odömönäni

inönänimpa. Wadäni adobaï, Mönö wææ angainö ante ëñente cæcäimpa, ante nanguï änäni guiquënë Paditeoidi näni änäni inönänimpa. Ìnque Itota mäniñedë odömonte apäneyongä mäninäni në odömönäni tönö Paditeoidi ìñömö Gadideabæ näni quëwëñömö ta Oodeabæ näni quëwëñömö ta pöningue ayæ Eedotadëë ìñömö ta pöningue Itota weca pöningue tæ contate a ongönänitapa. Mäniñedë wadäni wa wa badinque wënæ wënæ inte wädäni ìñönänite Itota ìñömö Awënë Wængongui nänö tæï piñænö entawëningue nanguï cæcä waa badönänimpa. ¹⁸ Ìnque wadäni në cömäingä nänö möimpataa æmætæ æmætæ bæi ongonte näæningue, Itota weca ænte mangui ñö cæcäimpa, ante pönänitapa. ¹⁹ Ponte ayönäni wadäni eyede pöni goto ongönäni adinque në ænte mämö pöninäni ìñömö, Ædö cæte guiquï. Ante wædingue oncömäa ìnö æidämæ mäi æidinke dai bæte mänoniñömö epæ cädäni ompite gongæñö tömënanäni cömäingä möimpataa bæi ongöningue tömengä ingante godongämæ ongönäni weca tæcæguedë Itota weca pædæ wæænönäni ongongan-tapa. ²⁰ Mänömaï cädäni adinque Itota, Näwangä wede pönente cädänipa, ante adinque,

—Æmigo, wënæ wënæ bitö cædimämo ante ñöwo ñimpo cætimpä.

²¹ Äñongä Paditeoidi tönö në wææ odömönäni nämäneque pönente tededinque, “Wënæ wënæ cædingä ingante æcänö ñimpo cæquingäa. Ìngä ìñömö Wængongui ingampa diyæ mänömaï cæquingäa. Edæ babæ ancædö.”

²² Ante pönëñönäni Itota tömënanäni näni pönëwëñö ante do ëñëningue,

—Minitö mïmöno quimæ wënæ wënæ pönëwëminii. ²³ “Në cömäingä nänö wënæ wënæ cædimämo ante godö ñimpo cæbopa,” ante botö Wængongui bai ämo ëñëningue minitö guiquënë, Wængongui ingampa diyæ mänömaï cæquingäa, ante pönëminipa. Ayæ wæætë, “Ængæ gantidine möimpata ænte dao dao gocæcäimpa,” ante botö Wængongui bai ämo ëñëningue minitö adobaï, Wængongui ingampa diyæ mänömaï cæquingäa, ante pönëmini ìmaimïnipa, ante awædö. Ìñæmpa mänömainö ante pönëmini ìnque minitö edæ æbanö cæquëñëmö äminii. ²⁴ Incæte botö Waobo ëñagaïmo inte ingui-poga quëwëningue waodäni näni wënæ wënæ cædimämo ante në ämo inte pönö ñimpo cæbopa, ante minitö edæ ëñencæminipa, ante botö ìmaï cæbopa.

Änque në cömäingä ingante edæ,

—Bitö ìmite ämo ëñë. Ængæ gantidine bitö möimpataa topo cæte æningue tömëmi oncönë näænte goe.

²⁵ Ängä ëñëningue cömäingä ìngä incæ edæ tömänäni ayönäni ængæ gantidine, Wængongui ñäö bai ëmönongä inte pönö tæï piñænte cæcä æmopa, ante apänedinque tömengä nänö öñöninta topo cæte tao oncönë ænte gocantapa. ²⁶ Gocä ate wædingue tömänäni, Æbanö cæcäi, ante ëñënamäi inte guïñente wædingue, Wængongui bitö ñäö bai ëmömi inte waa pöni cæbi amönipa, ante watapæ apänegadänimpa. Ayæ,

—Ñöwo ìñömö mä pöni cæcä amönipa, ante ancaï guïñente wädänitapa.

Debi ingante Itota angä tee empote gocampa

(Mäateo 9.9-13; Mäadoco 2.13-17)

²⁷ Ayæ ate Itota tao gote ayongä odömäno awënë nänö äñinta ante në ængä Debi ingante acantapa. Tömengä ìñömö Awënë nänö æimpa gäänë tæ contate ongongä adinque Itota tömengä ingante,

—Botō miñæ pœ.

²⁸ Angä ëñëningue do ængæ gantidique Debii mänincoo tömancoo ëmö cæte Itota miñæ wadæ gogacäimpa.

²⁹ Ayæ ate Debii, Itota beyæ, ante tömengä oncönë æëmæ nanguï pönï cæcantapa. Ìninqe æëmæ becæte ante awënë beyæ nê æwënëni nanguï ïnani pō tæ contate cænönäni wadäni adobaï pō tæ contate cænäni. ³⁰ Adinque Paditeoidi tönō tömënëni nê odömönäni guiquënë Itota miñæ nê godäni ïnänite piinte äninque,

—Odömäno awënë beyæ nê æwënëni tönō wadäni nê wënæ wënæ cädäni tönō minitō quimæ godongämæ ponte tæ contate bete cæminii.

³¹ Ante piñönäni Itota wæætë tömënëni ïnänite,

—Nê waa ingä guiquënë, Cæbi waa baboe, änämaï ïñongante nê wënæ wënæ ingä guiquënë dotodo ingante, Cæbi waa baboe, ante do aa pecampa. ³² Pancadäniya, Nämä incæ nê nō entawëmo ïmopa, ante nê änäni ïñönänite botō ïñömō edæ nê dotodo bai adobaï ïnōmo inte tömënëni ïnänite aa pedämaï incæboimpa. Wadäni guiquënë, Nämä wënæ wënæ cæbo ïmopa, ante nê änäni ïñönänite botō, Tömënëni, Idæwaa wënæ wënæ cæte awädō, ante Wængonguï gämænō poncädänimpa, ante cædinque tömënëni ïnänite aa pecæ pongaboimpa, ante Itota apænecäimpa.

Ee ate cænämaï ingäimpa, ante nê änäni

(Mäateo 9.14-17; Mäadoco 2.18-22)

³³ Itota ingante ïmaï ante ayæ änänitapa. Wäö miñæ nê godäni ïñömō, Wængonguï beyæ, ante ee ate cænämaï ïnänipa. Ayæ Paditeoidi miñæ nê godäni adobaï ee ate cädänipa. Bitō miñæ nê godäni guiquënë do cænte bete quëwënëniya tōö.

³⁴ Änäni ëñëningue Itota wæætë,

—Onguïñängä nê monguingä wente ænte pönäni ïñönänite minitō wæætë, Ee ate cænämaï ïedäni, ante edæ ædō cæte wææ anguimïni. Monguingä nänō wente ænte nê pönäni bai ïñönäni inte botō miñæ nê godäni ïñömō ædō cæte wæwente bai cænämaï inguïnänii. ³⁵ Wæætë ayæ ate guiquënë, Monguingä, näni nê äñongä bai ïñömote wadäni ponte botō ïmote ö ænte gocädänimpa. Mänömaï cädäni ate botō miñæ nê godäni ïñömō mänïñedë ate wæætë cænämaï inte wæcädänimpa, ante Itota apænecäimpa. ³⁶ Ayæ, Wængonguï Awënë nempo quëwëningue æbänō cæquï, ante ëñencädänimpa, ante Itota ïmæca quëwënëni näni cæinō ante odömote ïmaï ante apænecantapa.

—Miincoo badonte ate waocä dicæ adocoo wänä ñænte pancacooga æninque pedæncōoga pönō tadömonguingäa. Mänömaï cæcä ïninqe edæ miincoo incæ do wänä tente baquënë. Ayæ pedæncōo ëmönō bai miincoo wïi adobaï ëmōmpa. Minitō, Awente bai cænämaï inte mönō quëwengäimpa, ante mini änewënë guiquënë pedæncōo bai inte wote baquïne ënepa. Wængonguï gämænō pöninque quëwencæminimpa, ante botō apænedō guiquënë miincoo bai inte quëwenguïne ënepa. Ìninqe wote baquïne tönō quëwenguïne tönō ædō cæte mënea ante ëñente cæquï. ³⁷ Ayæ adobaï yowepæ biñömæ miimæ æninque waocä ædō cæte picæ æmontaicadedë godō pe ñiñänguingäa. Ìñæmpa picæ æmontaicadedë pe ñiñängä ïninqe edæ tæi æbæ æmäwo goquënë. ³⁸ Miimæ wæætë miincadedë pe ñiñängäimpa. Adobaï botō odömönō miimæ bai ïñonte dodäni näni odömöwënë ædō cæte botō odömönō tönō adoyedë ëñente cæquï. ³⁹ Incæte, “Gönänimæ ïñömō

waëmepæ imæmpa,” ante nê bedömîni inte mînitô mîimæ ædô cæte quingæ be-
quîmîni, ante Itota angacæimpa.

Guëmanguiönæ iñonte tømëmô tâ pete ænânipa

(Mâteo 12.1-8; Mäadoco 2.23-28)

6 Ayæ ate guëmanguiönæ iñonte Itota tømëmoncodê tæcæguedencodê gocantapa.
Goyongä tømengä mîñæ nê godâni iñômô tømëmô inca tâ pete æninque dacæ
dacæ cædinque ade cæ ade cæ godâni. ² Adinque Paditeoidi guiquënë,

—Iñæmpa, Guëmanguiönæ iñonte mäninô bai cædâmaï ïedâni, ante dodâni nâni
wææ angainô ante mînitô êñênâmaï inte quimæ cæmîni.

³ Ante pîñônânite Itota,

—Docæ Dabii wodi tømengä nânô emîñænâni tönô òmæpodâni inte gæwænte
wædinque æbânô cægadâni, ante yewæmonte öñô incæ mînitô iñæmpa adâmaï
inte bai ämîni awædô. ⁴ Wængongui qui, ante nê godönâni cængui impa, ante
wææ nâni angainô bai cædinque dodâni päö, Wængongui qui, ante ñoncæ ñoncæ
cædönânimpa. Incæte Dabii wodi Wængongui oncönê go guiidinque mânii päö do
ænte cæninque tømengä mîñæ nê godâni inânite godömenque godongä cænânitapa,
ante yewæmonte öñô apa änewëmîni.

⁵ Ante apænedinque Itota tømënâni inânite ayæ apænegantapa.

—Botô iñômô Waobo nê êñagäimo iñômô Tæiyæ Awënë inömo inte edæ guë-
manguiönæ Awënë inömo imopa. Ininque botô, Guëmanguiönæ iñonte edæ æbânô
cæquiï, ante adobo nê Ämo ingäimo imopa, ante Itota apænegacæimpa.

Nî cômampingä

(Mâteo 12.9-14; Mäadoco 3.1-6)

⁶ Incayæ ate guëmanguiönæ adobai waönæ iñonte Itota oodeoidi odömöincönê
go guiite odömonte apæneyongä onguiñængä önompo tømëmæ inö nî cômampote
wædongä inte mänîñômô a ongongantapa. ⁷ Mänîñedê nê odömönâni tönô Padi-
teoidi guiquënë, Itota wapiticæ cæcä ininque mönô wæætê pîinte angæimpa, ante
nê änewënâni inönânimpa. Ñöwo iñômô tømënâni, Ñöwoönæ guëmanguiönæ i in-
cæte Itota nî cômampingä ingante, Waa bacæcæimpa, ante cæcä ininque mönô
mäo pîinte angæimpa, ante babæ cæcæte ante cöwä adânitapa. ⁸ Mäninô, Mönô
pîingæimpa, ante nâni pönëwënô ante Itota iñômô öñöwënenque edæ do êñëninque
edæ nî cômampingä ingante,

—Bitô ængæ gantidinque tæcæguedê pö næ gongæe.

Angä êñëninque ængæ gantidinque pö næ gongængantapa. ⁹ Ininque Itota nê
pîinte ancædâni inânite,

—Ämo apænemîni êñëmoedâni. Guëmanguiönæ iñonte mönô æbânô cæquënëmô
imöö, ante wææ angatîi, ante pönëmîni. Mönô waa cæquënëmô imompa, ante
pönëmînitawo. Wæætê edæ, Mönô wënæ wënæ cæquënëmô imompa, ante
pönëmînitawo. Guëmanguiönæ iñonte edæ, Quëwencædânimpa, ante cæquënëmô
imompa, ante pönëmînitawo. Wæætê mönô edæ ömæe ëwenguënëmô imompa, ante
pönëmînitawo. ¹⁰ Äninque æmætæ gomô æmætæ gomô edæ tømânâni inânite ad-
inque nî cômampingä ingante,

—Pædæ pompobi.

Angä ēñente cædinque nē cōmampodingä incæ pædæ æmpote edæ ædæmō waa empocä bapocantapa. ¹¹ Īninqe tōmēnāni, Guēmanguiōnæ incæ mǎnōmaī cæ-campa, ante ænguī badinque, Itota ingante mōnō æbānō cæquiī, ante piīninqe nāni cabo nāmāneque tedegadānimpa.

Itota angä ate dote ganca ĩnāni nē gode ānāni badānipa

(Māateo 10.1-4; Māadoco 3.13-19)

¹² Mǎniñedē Wængonguī ingante apānecæte ante Itota ānanquidi ædinque tōmāā woyowotæ apānee congantapa. ¹³ Nǎo ba adinque tōmengä miñæ nē pōnināni ĩnānite aa pecä pōnāni ate tōmengä, Botō beyæ nē gode āmini incæminimpa, ante dote ganca ĩnāni mǎnimpodāni ĩnānite apænte ængacāimpa. ¹⁴ Tōmengä nānō nē da godōnāni baquināni ĩñōmō edæ ĩmaī ēmōnōnānimpa. Tānocä Timōnō ēmongä ingä incæte Itota wawo Pegodo pemongacāimpa. Īngä Pegodo tōnō Æntade nāna caya, Tantiago tōnō Wāo nāna caya, Pedipe tōnō Batodōmēē, ¹⁵ Māateo tōnō Tōmato, Adepteo wengä Tantiago ĩnōnānimpa. Ayæ, Mōnō ōmæ ingæimpa, ante nanguī cæ-dongä inte wacä Timōnō ĩnongäimpa. ¹⁶ Tantiago wengä Codaa tōnō Itota ingante odōmonte nē godonguingä ingaingä inte wacä Codaa Icadote nāni ānongä inatapa. Mǎnimpodāni ĩnānite Itota apænte ængacāimpa.

Tæiyænāni ĩnānite Itota gampocä waa badānipa

(Māateo 4.23-25)

¹⁷ Mǎnimpodāni tōnō Itota mǎmō ĩñōmō wææninqe næ gongænte ongongantapa. Mǎniñōmō tōmengä miñæ nē godāni nanguī ĩnāni do ponte a ongōnōnānimpa. Ayæ tōmēnāni tōnō wadāni Eedotadēē ĩñōmō quēwēnāni tōnō Oodeabæ tōmāo quēwēnāni ayæ Tido eyequeī Tidōo eyequeī gāwapæ wedeca quēwēnāni nanguī ĩnāni do ponte a ongōnōnānimpa. Tōmēnāni, Itota apānecä ēñengæimpa, ante ayæ, Wēnæ wēnæ inte wæwēmō inte mōnō waa edæ bacæimpa, ante pōninqe a ongōnānitapa. ¹⁸ Ayæ wēnæidi nē wentamō ēwocadāni tōnō quēwente wæwēnāni mǎniñōmō ponte ongōnāni ĩnānite Itota adoyōmō wææ pōninqe godō cæcä waa badānitapa. ¹⁹ Ayæ, Itota tæī piñænte entawengä inte pōnō cæcä ate waa badānipa, ante adinque tōmānāni tōmengä ingante gampocæte ante cædānitapa.

Mīni toquinque, ante ayæ, Mīni wæquinque, ante

(Māateo 5.1-12)

²⁰ Ayæ Itota tōmengä miñæ nē godāni ĩnānite gomō adinque apānecä ēñēnānitapa.

“Minitō, Botō waēmō imopa diyæ Awēnē Odeye nempo guiquimoo, ante nē wæwēmīni ĩñōmō watapæ mīni toquinque Wængonguī Awēnē Odeye nempo mīni quēwenguīnō edæ do ēāmīnīpa,” angantapa.

²¹ “Inguipogaque gæwænte wæmīni inte edæ mīni watapæ toquinque Wængonguī pōnongä tōmo pōni cæncæminimpa,” angantapa.

“Minitō inguipogaque wæwente quēwēmīni inte edæ mīni watapæ toquinque Wængonguī pōnō waadete cæcæcāimpa,” angantapa.

²² “Botō Waobo ēñagāimo miñæ gomīni beyænque wadāni mīnitō ĩmīnite badete todinque piīnte adinque wido cædānitawo. Botō beyænque mīnitō ēmōwo ante, Wiwa ēmōwo awædō, ante Baa ānānitawo. Edæ mīni waa toquinque inguipogaque

mänömaï cædänipa. ²³ Öönædē mönō ænguīnō ante nanguī ongompa, ante pönēn-
 inque mīnitō nōwodāni nāni pīinte cæyedē incæ watapæ toedāni. Īnāni nē pīinte
 cædāni wæmæidi incæ Wængonguī beyæ nē apænegaīnāni inānite edæ adobaï pīinte
 cægadānimpa, ante toquēnē wæwēmīni. ²⁴ Wæætē edæ mǎincoo nanguī nē ēāmīni
 guiquēnē iīncayæ ate mīni wæquinque edæ inguipogaque watapæ quēwēmīnīpa,”
 ante Itota apænecantapa.

²⁵ “Nē tōmo cæmīni guiquēnē iīncayæ ate mīni gæwænte wæquinque edæ ingui-
 pogaque tōmo cæmīnīpa,” ante apænecantapa.

“Nē Ca ca tomīni adobaï iīncayæ ate Ca ca mīni wæquinque edæ inguipogaque
 tomīnīpa,” angantapa.

²⁶ “Mīnitō imīnite ante tōmānāni waa apænedāni inique edæ mīni wæquinque in-
 gæimpa. Īnæmpa iīnāni nē waa apænedāni adodāni mæmæidi adobaï cægadānimpa.
 Wadāni babæ wapiticæ apænedāni incæ, Wængonguī beyæ nē apænebo imopa, ante
 nē ānewēnāni inānite iīnāni mæmæidi iīnōmō adobaï waa apænegaīnīpa,” ante
 Itota apænegaīnīpa.

Nē pīinte cædāni inānite waadete cæcæimpa, ante

(Māateo 5.38-48, 7.12)

²⁷ Ayæ godōmenque apænedinque Itota, “Mīnitō nē ēñēmīni iīnōmīnite āmo
 ēñēedāni. Mīnitō imīnite nē pīinte cædāni inānite mīnitō wæætē waadete cædāni.
 Mīnitō imīnite nē pīinte adāni inānite mīnitō wæætē waa cædāni. ²⁸ Wænæ wænæ
 bacæmīnīpa, ante nē ānāni inānite mīnitō wæætē waa apænete godō cædāni.
 Mīnitō imīnite nē wænæ wænæ cædāni inānite mīnitō wæætē tōmēnāni beyæ
 ante Wængonguī ingante apæneedāni. ²⁹ Wacā bitō imite imæmpaga inō tamongā
 wædimi inte bitō wæætē æmæmpaga inō dadi emæmonte ee ongōmi tamongæ.
 Ayæ yogui beyæ bitō yabæcoo ò ængā adinque önōnancapæncōo tōnō ee abi ò
 ængæ. ³⁰ Mǎincoo ante nē angā ingante tōmengā nānō ānoncoo edæ ee godōmi
 ængæ. Ayæ bitō mǎincoo nē ò ængā ingante, Wæætē adodō pōnōmi æmoe, ānāmaï
 incæbiimpa. ³¹ Mīnitō, Wadāni botō imote waa cæcædānimpa, ante wæmīnitawo.
 Edæ mǎnīnō ante mīni wædō baï adobaï wædānīpa, ante pönēnīnque mīnitō wæætē
 wadāni tōmānāni inānite waa cædāni,” ante Itota angacāimpa.

³² Ayæ apænedinque, “Mīnitō imīnite nē waadedānique inānite waadete pōnēmīni
 inte wadāni inānite waadedāmaï imīni adinque edæ Wængonguī dicæ mīnitō imīnite
 waadete pōnō auingāa. Īnæmpa nē ēñēnāmaï cædāni incæ nē waadete pönēnānique
 inānite waadete pönēnīnque mīnitō cæganca do cædānīpa tōō. ³³ Ayæ adobaï mīnitō
 imīnite waa cædānique inānite waa cæmīni inte wadāni inānite waa cædāmaï imīni
 adinque Wængonguī mīnitō imīnite dicæ waa auingāa. Īnæmpa mīnitō cædō baï
 nē ēñēnāmaï cædāni incæ adobaï do cædāni apa cæmīni. ³⁴ Ayæ, Adodō pōnongā
 æncæboimpa, ante pōnēwēnīnque mīnitō nē adodō pōnonguingā ingante godōmīni
 inte wadāni inānite godōnāmaï imīni adinque Wængonguī mīnitō imīnite dicæ waa
 auingāa. Īnæmpa nē ēñēnāmaï ināni nāni cabo incæ, Adodō pōnongā æncæboimpa,
 ante pōnēwēnīnque nē adodō pōnonguinganque ingante godōnīnque mīnitō cædō
 baï adobaï cædānīpa tōō.”

³⁵ “Wæætē mīnitō imīnite nē pīnāni inānite waadete pönēnīnque waa cædāni.
 Ayæ tōmēnāni nāni ānō ante, Adodō pōnōmi æmoe, ante ānāmaï inte ee godōmīni
 æncædānimpa. Mänömaï waadete cæmīni inique mīnitō iīncayæ ate mīni waadete

cægainō beyæ nanguī æmaiminipa. Ayæ mōnō Mæmpo Æibæ pōnī nē Quēwengā iñongante tōmengā ingante nē waa ate pōnēnāmaī ināni inānite tōmengā godō waadete cæcampa. Nē wiwa cædāni inānite tōmengā godō waadete cæcampa. Īnque mīnitō tōmengā nānō cæī bai adobaī waadete cæmīni ĩnque Mæmpocā waadete nānō entawēnō bai mīnitō adobaī entawēnque tōmengā wēmīni ĩmaiminipa. ³⁶Mōnō Mæmpo pōnō waadete nānō waa cægāī bai mīnitō adobaī wadāni inānite godō waadete waa cædāni,” ante Itota angacāimpa.

Wadāni inānite apænte ānāmaī iedāni, ante

(Māateo 7.1-5)

³⁷Ayæ wæætē Itota ĩmaī ante apæncantapa. “Wacā ingante apænte ānāmaī ĩmīni ĩnque mōnō Mæmpo wæætē mīnitō ĩmīnite apænte ānāmaī incæcāimpa. Ayæ, Wacā nānō tente wæquinque wēnæ wēnæ cæcampa, ante ānāmaī ĩmīni ate mōnō Mæmpo wæætē, Mīni tente wæquinque wēnæ wēnæ cæmīnīpa, ante apænte ānāmaī incæcāimpa. Wacā wēnæ wēnæ cæcā ingante mīnitō ñimpo cæmīni ee gocā ate mōnō Mæmpo adobaī mīnitō ĩmīnite ñimpo cæcā quēwencæmīnīpa. ³⁸Wadāni inānite ee godōedāni. Mīnitō ee godōmīni ānāni ĩnque wadāni wæætē mīnitō ĩmīnite ee pōnōnāni æncæmīnīpa. Nē pōnōnāni iñōmō tōmēnāni nāni tee māincadedē da wēnīnque da wæænonte wancæ wancæ cædinque eyepote wæængūnque eyede pōnī da wēnīnque mīnitō ænguincadedē pōnō wāne cædāni edæ æncæmīnīpa. Edæ mīnitō tee mante mīni godōincade incæ adocadeca tee mante bai cædinque Wængonguī mīnitō ĩmīnite eyepæ pōnongā æncæmīnīpa,” ante Itota apænegacāimpa.

³⁹Ayæ, Wængonguī Awēnē nempo quēwēnīnque æbānō cæquīī, ante ēñencædānīpa, ante Itota ĩmæca quēwēnāni nāni cæinō ante odōmōnīnque ĩmaī apæncantapa. “Babetamongā ingante wacā babetamongā incæ ædō cæte māo odōmongā goquingāā. Īnæmpa mǎnōmaī cædinque nāna babetamoncaya ompite adopiticæ guæa go wææ guībainapa. ⁴⁰Nē odōmonte apæncā iñōmō nē ēñengā inte odōmōñongante tōmengā nānō nē ēmīñengā guīquēnē dicæ godōmenque ēñengā ingāa. Incæte ĩnque odōmonte apæncā ēñēnīnque tōmengā nānō nē ēmīñengā abæ tawēnīnque wæætē nē odōmongā bai bacæcāimpa,” ante Itota apænegacāimpa.

⁴¹Ayæ apænedīnque, “Bitō tōñīnacā wædænque wēnæ wēnæ cæcā iñongante bitō guīquēnē nanguī bitō wēnæ wēnæ cædinō ante wædāmaī inōmi inte tōmengā ingante quīnante pīnte ānewēmī. Īnæmpa tōmēmi awīnca gāānē awæmpa wææ ongōmpa, ante adāmaī inte bai cæbīpa tōō. ⁴²Tōmēmi awīnca gāānē awæmpa wææ ongōmpa, ante bitō adāmaī inte bitō tōñīnacā ingante, ‘Biwī, bitō awīnca guiyā mǎe owo bai ate æ wimōmoe,’ ante edæ abīpa ænguīmī. Īnæmpa bitō nē wadō tedete wadō cædōmi inte edæ tōmēmi awīnca gāānē wææ ongōmpa tāno wido cæte ate edonque adīnque bitō tōñīnacā awīnca guiyā owodō æncæbīmpa,” ante Itota angacāimpa.

Awæ æbānō ĩwæ, ante tōmenca bete ēñengāimpa, ante

(Māateo 7.17-20, 12.33-35)

⁴³Ayæ godōmenque apænedīnque Itota, “Waincawæ incæ ædō cæte baaca incaquīī. Wæætē wiwa ĩwæ incæ ædō cæte wainca incaquīī. ⁴⁴Awæ æbānō ĩwæ, ante ēñencæte ante mōnō tōmenca tā pete bete ēñengāimpa. Iigowæñeca æncæte ante waodāni dicæ daa mongæwāa edæ tā pete ānāniyaa. Yowemō æncæte ante

waodāni dicæ daacamēna tā pete ænāniyaa. ⁴⁵ Mönö waocabo iñömö adobaï inömö inte cæmompā. Mīmönē mönö pönēmāmo eyede tate baï tao godedinque mönö mänimāmoque ante pönēninque tedemompā. Waocā nē waa cæcā guiquēnē waa pōni tömengā nānō pönēnō ante entawēninque waa tedecampā. Nē wīwa cæcā guiquēnē tömengā nānō wīwa pönēnō ante entawēninque wīwa tedecampā,” ante Itota apænegacäimpa.

Nē mænōna ante

(Mäateo 7.24-27)

⁴⁶ Ayæ godömenque apænedinque, “Minitö iñömö botö imote, ‘Awēnē, mönitö Awēnē imipa,’ ante tedemini incæte botö änö ante quīnante wīi ēñente cæmīni. ⁴⁷ Ñöwo iñömö edæ apænebo ēñēedāni. Botö gāmænö ponte ēñēninque waocā botö änö ante do ēñente cæcā iñömö tömengā iūmaï ingampā. ⁴⁸ Waocā adocanque oncö mænoncæte ante guibæ ææ wodinque dicaboga mænoncæte ante gönongā baï nē ēñente cæcā iñömö adobaï cæcā ingampā. Tömengā oncö tæi mænonte ongö ininque æpæ äninque quingæ pö incæte oncö ædö cæte wançæ wançæ cæquii. Iñæmpā tæi mænonte ongompā. ⁴⁹ Wæætē waocā guibæ ææ wote gönönāmaï yabæque oncö mænongā ate yabæque mænöiñömö æpæ äninque pö ate oncö dobæ bogo cæte tæ wææninque æmæwo gopa. Botö apænebo ēñēninque waocā nē ēñēnāmaï cæcā iñömö tömengā nē yabæque mænongā baï inte ocai incadāmaï inte baï ēñēnāmaï cæcampā,” ante Itota iinque apænegacäimpa.

Capitåo ingante nē cæcā ingante Itota cæcā waa bacampā

(Mäateo 8.5-13)

7 Ayæ tömēnāni inānite iinque apænedinque Itota Capēnaömo nāni quēwēñömö gogacäimpa. ² Māniñömö quēwēninque odömāno tontadoidi awēnē capitåo ingante nē cæcā iñömö wēnæ wēnæ badinque æmæwo wænçæ cæcā ingantapā. Awēnē capitåo ingante nē cæcā iñongante awēnē wæætē tömengā ingante nanguï waadecantapā. ³ Ininque, Itota waa cæcā ingampā, ante māmö apænedāni ēñēningā inte tontado capitåo iñömö oodeoidi inānite nē aadāni nāni Picæncabo inānite apænedinque, Minitö Itota weca godinque tömengā ingante ämīni ēñente pōninque tömengā wæætē botö imote nē cæcā ingante cæcā waa bacæcäimpa. ⁴ Angā ēñente godinque nē aadāni nāni Picæncabo guiquēnē Itota weca pōninque tömengā ingante nanguï änānitapā.

—Mönö oodeocabo iñömönte mäningā tontado capitåo iñömö mönö imonte waa cæcampā, ante wædinque bitö tömengā beyæ waa cæcæbiimpa. ⁵ Tömengā iñömö mönö oodeocabo iñömönte waadete cædinque, Wængonguï apæneçā nāni ēñente yewæmongainta ate mīnitö odömöincö impā, ante do mænonte pönongā æmompā cæbii.

⁶ Änāni ēñēninque Itota nē aadāni nāni Picæncabo tönö wadæ gocantapā. Oncö obo pönönānite tontado capitåo iñömö tömengā guidēnāni inānite, Go bee tēninque botö beyæ Itota ingante iūmaï ante apæneedāni, angantapā. “Awēnē ee ongöe. Botö waëmö imopa diyæ bitö botö oncönē pö guiquīmii, ante capitåo bitö imite angampā,” ante apæneedāni, angā ponte apænedānitapā. ⁷ Ayæ adobaï, “Botö wīi waëmö inömo inte edæ bitö weca pönāmaï intabopā. Incæte bitö adoyömö ongöninque ämi ininque botö imote nē cæcā waa bacæcäimpa. ⁸ Bitö iñömö Awēnē Wæn-

gonguī ingante nē ēñente cædōmi ĩmi bai botō adobai wacā awēnē ingante nē ēñente cæbo ĩmopa. ĩnque botō awēnē ēabo inte botō awēnē beyænque āmo ēñēnque tontadoidi wæætē guīñente wædinque botō ānō ante cædānipa. ĩnque adocanque ingante botō, Goe, āmo ēñēnque edæ do gocampa. Wacā ingante, Pōe, āmo ēñēnque edæ do pongampa. Ayæ botō ĩmote nē cæcā ingante, Cæe, āmo ēñēnque edæ do cæcampa.” Mānōmainō ante Itota ingante botō beyæ ante apænemini ēñengædāni, ante tontado capitāo ĩñōmō tōmengā guiidēnāni ĩnānite angā godinque tōmēnāni wæætē capitāo nānō ānō bai ante Itota ingante adodō ante apænedānitapa.

⁹ Mānōmainō ante tontado awēnē beyæ apænedāni ēñēnque Itota wæætē, Māningā tontado awēnē ĩñōmō waa pōni ēñengampa, ante wædinque godongāmæ ongōnāni ĩnānite,

—Nāwangā āmopa. Mōnō idægocabo ĩñōmonte māningā wede pōnengā ingā bai adocanque incæ edæ dæ angā awædō, angantapa.

¹⁰ Ayæ nē bee tencæ pōnināni oncōnē wadæ gote ayōnāni capitāo ingante nē cæcā ĩñōmō do waa bacā agadānimpa.

Æmæwo wæningā ingante Itota angā nāni ōmæmongampa

¹¹ Itota ĩñōmō ĩimō ate Nāino nāni quēwēñōmō gocæte ante goyongante tōmengā nānō nē ēmiñænāni tōnō wadāni nanguī ĩnāni godongāmæ gogadānimpa.

¹² Māniñōmō yabædemō obo pōñongā onguīñengā æmæwo wæningā ingante næænte pōnānitapa. Tōmengā badā owæmpoingā ĩnogā inte tōmengā wengā adocanque wængā wædinque pongantapa. Ayæ māniñōmō quēwēnāni nanguī ĩnāni wānā tōnō godongāmæ pōnāni acantapa. ¹³ Wānā ingante adinque Itota tōmengā tōnō guēa wæwente bai pōnēnque,

—Wædāmai ĩe.

¹⁴ Ānque do wæningā ingante tōmēnāni nāni daga wenguimpa gāānē ponte gam-pocā ate nē næænīnāni næ gongænānitapa. Itota ĩñōmō,

—Edēnīmi, bitō ĩmite āmopa. Ængæ gantie, angantapa.

¹⁵ Ēñēnque nē wæningā incæ ængæ gantidique tæcæ tedecā adinque Itota wānā ingante pædæ godongā ængantapa. ¹⁶ Itota mānōmai cæcā adinque tōmānāni nanguī guīñente wædinque Wængonguī ingante watapæ apænedinque,

—Wængonguī beyæ nē apænecā tæi ēmongā ĩnogā inte mōnō weca a ongongā amopā, ānānitapa.

Ayæ,

—Wængonguī quimō ĩñōmonte Wængonguī incæ mōnō weca ponte godongāmæ cæcampa. Nāwangā ĩmpa, ante nanguī todānitapa.

¹⁷ Ayæ Oodeabæ tōmāo quēwēnāni ĩnānite wayōmō gomonga quēwēnāni ĩnānite māo gode ā gode ā cæte, Itota æbānō cæcā, ante apænedāni ēñengadānimpa.

Wāo tōmengā miñæ nē goda ĩnate da pōnogā pōnapa

(Māteo 11.2-19)

¹⁸ Wāo miñæ nē godāni adobai, Itota æbānō cæcā ingāā, ante ēñēnque Wāo ingante māmō apænedāni ēñengantapa. Māninō ante apænedāni ēñente wædinque Wāo ĩñōmō tōmengā miñæ nē goda mēnaa ĩnate āñecā pōnatapa. ¹⁹ Pōna adinque Wāo tōmēna ĩnate, Mīnatō mōnō Awēnē weca godinque botō beyæ ante ĩimai ante

æeda, angantapa. Awënë ēñēmi. Bitō iñōmō dodāni nāni, Nē Ponguingā, angaīmi adobi īmitawo. Wæætē tōmēnāni nāni nē angaīmi ināmaī īmi īninque bitō wæætē, Wacā ponguingā, ante wānō cōedāni, āmitawoo. Æbānō mōnitō cæquīmōnii, ante botō beyæ ante ēñencæte ante æeda. Ante Wāo mēnaa īnate Itota weca da godongā godatapa. ²⁰ Godinque Itota weca pōninque īmaī ante apænedatapa.

—Wāo apænē nē guidōnongā iñōmō mōnatō īmōnate da pōnōninque bitō īmite īmaī angampa. Awënë ēñēmi. Dodāni nāni, Nē Ponguingā, angaīmi bitō iñōmō adobi īmitawo. Wæætē tōmēnāni nāni angaīmi ināmaī īmi īninque bitō wæætē, Wacā ponguingā, ante wānō cōedāni, āmitawo. Æbānō mōnitō cæquīmōnii, ante ēñencæte ante Wāo mōnatō īmōnate da pōnongā pontamōnāpa, ānatapa.

²¹ Māniñedē incæ daicawo gawænāni tōnō wēnæ wēnæ inte wæwēnāni nanguī ināni inānite Itota godō waa cæcā waa badānitapa. Wēnæidi nē wiwa ēwocadāni inānite tōmengā wido cæcā ate waodāni nanguī ināni waa badānitapa. Babetamōnāni nanguī ināni inānite tōmengā gampomongā waa bamōnānitapa. ²² Inique mānōmaī cæcā waa ayōnate nōwo pōna īnate Itota,

—Botō godō cæbo ate babetamō īnināni incæ do adāni amināpa. Cōmante īnināni incæ waa bate dao dao godāni amināpa. Baate īnināni incæ nōwo æmontai waēmōntai baadāni amināpa. Babetamonca īnāni iñōnānite botō godō cæbo ate onōmonca ēñēnāni badāni amināpa. Do æmæwo wænte onōnāni iñōnānite botō godō cæbo ate nāni omæmōnte quēwēnāni amināpa. Ōmaadāni inte wæwēnāni inānite botō Wængonguī Awënë pōnō waa cæcæcāimpa, ante watapæ apænebo ēñencædānimpā. Inique mīnatō ponte ēñēñōmīna botō æbānō apænebo ēñēmīnatawo, ante ayæ, Botō æbānō cæbo aminatawo, ante mīnatō nōwo wæætē Wāo weca gote māo apænēmīna ēñengæda, angantapa.

²³ Ayæ, “Botō beyæ waocā wīi pīinte wadæ gocā iñōmō tōmengā nānō watapæ toquinque oda cædāmaī incæcāimpa, ante Wāo ingante māo apænēmīna ēñencæcāimpa,” ante Itota angantapa. ²⁴ Angā ēñēninque Wāo beyæ nē ānīna wadæ goda adinque Itota wæætē godongāmæ ongōnāni inānite, Wāo æbānō ingāā, ante apænecantapa. “Mīnitō guiquēnē quīnō acæte ante onōmæca gomīnitapa. Cæwīpa woboyæ pæmænte ate æmænō ædæ æmænō ædæ gobaingā ingante mīnitō dicæ acæ gomīnitawogaa. ²⁵ Inique edæ quingānō ingante acæte ante gomīnitapa. Edæ waocā weocoo waēmōncoo mongænongā ingante mīnitō dicæ acæ gomīnitawogaa. Inæmpa weocoo waēmōncoo nē mongænāni iñōmō nāmanque ante pōnente nāni ænte māincoo beyæ ante nē towēnāni inte tōmēnāni iñōmō awënë oncōnē quēwēnāni apa quēwēnāni. ²⁶ Inique edæ quīnante gomīnitawo. Mīnitō mīni nē go acæ cædongā iñōmō edæ Wængonguī beyæ nē apænecā ingantawo. Nāwangā impa. Wængonguī beyæ nē apænecā Wāo ingampa. Incæte tōmengā wīi Wængonguī beyæ nē apænegaināni bai inongā inte godōmenque nanguī cæcā ingampa, ante apænebo ēñēmaīmīnīpa. ²⁷ Wængonguī īmaī angampa, ante yewæmongatimpā. ‘Botō beyæ nē apænecā ingante da godōmo godinque tōmengā taadō tāno beyænte bai cæcæcāimpa.

Tōmengā bitō Codito īmi beyæ ante taadō waa pīnonte bai waa cæcæcāimpa.’ Mānōmaīnō ante dodāni adocā Wāo ingantedō ante pōnēninque yewæmongadānimpā. ²⁸ Nōwo iñōmō āmo ēñēedāni. Imæca mīni ēñagāincabo iñōmīnite apænē mōnō nē guidōnongā Wāo adocanque nænængā iñongante wacā tōmengā bai edæ dæ angampa. Incæte Wængonguī Awënë Odeye nempo quēwēnāni iñōnāni ado-

canque guiyangä pöni ingä incæte Wäö pönömenque wædangä ingampa,” ante Itota apænecantapa.

²⁹ Itota mänömaïnö ante apænecä në ëñänäni iñömö odömäno awënë beyä në æwänäni incæ wadäni incæ tömänäni Wäö nänö në guidongainäni inönänimpa. Ìnque tömënäni, Wængongui nö cæcä ingampa, ante tömänäni apænedänitapa.

³⁰ Paditeoidi tönö idægoidi näni wææ angainö ante në ate ëñänäni guiquënë Wäö nänö në guidongainäni inämaï inönänimpa. Ìnque tömënäni guiquënë Wængongui gämæñö ponguëñänäni incæte edæ Baa äñänitapa.

³¹ Godömenque apænedinque Itota iïmaï angantapa. “Mänömaï i ìnque in-guipogaque ante në quëwänäni iñömö quingämë bai inänipa. Quiëmë bai edæ quëwänänipa. ³² Wëñænäni mönö godonte æiñömö tæ contate owempodäni näni owempodö bai edæ adobaï cædänipa, ante awædö. Wëñænäni näni owempote cæcabo incæ æämæ cæte bai owempote cædinque wadäni inänite aa pedänipa. ‘Minitö beyä ööña we we öönömöni minitö wæætë edæ äwadämaï iminitapa töö,’ ante owempodinque wëñænäni piinte tedewänänipa. Ayä wæætë, Waocä do wængä ate näni wæbai, ante wëñænäni näni owempote cæcabo iñömö, ‘Mönitö Ca ca wæyömöni minitö wæætë edæ wædämaï imini wæmönipa,’ ante piinque aa pedäni bai ñöwodäni iñömö edæ adobaï piinte tedewänäni inänipa.”

³³ “Edæ iïmaï impa. Wëñænäni näni wædö bai Wäö æpænë mönö në guidönongä iñömö cængui cænämaï yowepä biinömæ näni wædænque ti nämæ bedämaï ponte quëwëñongante minitö guiquënë, Wënæ tönö Wäö quëwengampa, ante piiminipa.

³⁴ Ayä wæætë botö Waobo ëñagaïmo inte tömäa cængui cænte yowepä biinömæ bete minitö weca ponte quëwëñömote minitö guiquënë, Cæowæobi inte cæmipa. Beowæobi inte bebipa, ante badete tomänipa. Ayä godömenque, Odömäno awënë beyä në æwänäni tönö wadäni në ëñänämaï cædäni inönänite bitö tömënäni æmigo imipææ, ante botö imote piinque minitö wëñænäni näni piinte aa pedö bai änewëminipa töö. ³⁵ Incæte, Në nö ëñänäni iñömö nö cædänipa, ante adinque, Näwangä nö ëñänänipa, ante mönö ëñengæimpa,” ante Itota apænecäimpa.

Paditeocä Timönö oncönë Itota go guiite ëñacampa

³⁶ Ayä ate adocanque Paditeocä incæ Itota ingante, Botö oncönë pö cæe, angä Ao ante Paditeocä oncönë godinque pö guiite cæ congantapa. ³⁷ Tömënäni quëwëñömö onquiyängä në wënæ wënæ cæte quëwengä inongäimpa. Tömengä iñömö, Paditeocä oncönë Itota cæncongampa, ante tededäni ëñëninque ogui wapæ dica adabatodo waincadedë pe ñiñante næante pongantapa. ³⁸ Pö guidinque tömengä Itota önöwaca inö pö næ gongæninque Ca ca wæcantapa. Ca ca wæyongä Itota önöwaca inö ömæ petæ petæ wææ aa bee adinque onquiyängä wæætë tömengä ocaguincooca wæcæ wæwacantapa. Ayä queë bewadinque ogui wapæ gao cæwacantapa. ³⁹ Mänömaï cæcä adinque, Pö cæe, në äningä inte Paditeocä iñömö nämäneque pönëninque, “Itota iñömö Wængongui beyä në apænecä inte bai tömengä, Æcänö botö imote gampocäa, ante ayä, Quiëmë bai onquiyängä ingäa, ante ëñencædongäimpa. Ìñampa në wënæ wënæ cædongä ingampa, ante do ëñencædongäimpa.”

⁴⁰ Ante pönëñongä Itota wæætë,

—Timönö, bitö imite adodeque apænebo ëñëe.

Äñongante Paditeo wæætë,

—Ao, në Odömömi imi, apænebi ëñëmoe.

⁴¹ Angä ñinque Itota,

—Onguñängä adocanque në godöwengä inte quëwëñongante onguñäena mënaa ñnante godongä ate debe badapa. Adocanque ingante nangui quíniento ëmö godongä ate nangui debe bayongante wacä ingante wædænque tincoenta ëmö godongä ate wædænque debe bacampa. ⁴² Në godöningä nänö äñimpota ömæpoda inte tömëna, Ædö cæte wæætë adodö pönonguimönaa, ante wæyöñate në godöningä ññömö edæ, Ömæpomina inte minatö ædö cæte adodö pönömïna ænguimoo, ante botö æñamaï inte ñimpo cæcæboimpa, angampa. Ñinque Timönö bitö ñmite ämopa. Mënaa ñnate ñimpo cæte äñamaï ingä adinque në godongä ingante æcänö godömenque nangui waadete pönenguingä, ante pönëmi.

⁴³ Äñongante Timönö,

—Wa. Godömenque nangui ëmö debe ingä ññömö tömengä wabänö godömenque waadete pönengä ñmaingampa, ämopa.

Angä ëñëñinque Itota,

—Nawangä ante pönëmipa.

⁴⁴ Äñinque Itota onquiyängä gämänö dadi ëmænte adinque Timönö ingante apäñedinque,

—Ïngä onquiyängä ingante edæ abi. Botö bitö oncönë pö guiyömote bitö, Mëwaquimä, ante bitö dicæ pönömiyaa. Tömengä guiquënë ömä wææmonte aa bewadinque tömengä ocaguinca wadæ cæwacä ae. ⁴⁵ Bitö guiquënë waadedämaï inte queë bemönämaï ññömite tömengä ññömö botö pö guiyedë täno queë bewadinque cöwë queë bewacä ae. ⁴⁶ Bitö guiquënë ouinguipä gao cæcadämaï ññömite tömengä ññömö ogui wapä gao cæwacä ae. ⁴⁷ Ñinque botö, Tömengä mänömaï cæcampa, ante odömöninque bitö ñmite ämo ëñëe. Edæ tömengä nangui wënæ wënæ cæcä ññongante Wængongui godö ñimpo cæcä ate tömengä wæætë nangui waadete pönengampa. Bitö ññömö edæ wædænque wënæ wënæ cæbi ññömite Wængongui pönö ñimpo cæcä ate bitö wæætë wædænque waadete pönëmi abopa.

⁴⁸ Äñinque onquiyängä ingante apäñedinque Itota,

—Wënæ wënæ bitö cædinö ante pönö ñimpo cæbo æe.

⁴⁹ Angä ëñëñinque wadäni godongämæ cæ cönäni guiquënë godö wæñtæ wæñtæ äñinque,

—Ïngä ññömö edæ waocä wënæ wënæ nänö cædinö ante, Pönö ñimpo cæbo æe, ante në angä ññömö edæ æcänö ingä.

⁵⁰ Ante wædinque tedeyönäni Itota ññömö onquiyängä ingante,

—Bitö wede pönëñö beyænque quëwencæbiimpa. Nöwo edæ wädämaï inte goe, angacäimpa.

Itota beyä, ante onquiyänäni godongämæ cädäñipa

8 Ayä ate Itota nangui ñnani nani quëwëñömö wayömö wædænque ñnani nani quëwëñömö wayömö wayömö godinque, Awënë Wængongui Odeye nempo watapä quëwencæminimpa, ante waa apäñecä ëñengadäñimpa. Ayä tömengä tönö dote ganca ñnani mänimpodäni godongämæ godäñitapa. ² Ayä onquiyänäni adobaï Itota miñä godäñitapa. Tömëñäni pancadäñiya wënæidi në wïwa ewocadäni tönö në quëwengäñäni ññönäñite wadäni nantate wæwengäñäni ññönäñite Itota cæcä ate tömännäni do waa badäñäni inte nöwo tömengä miñä tee empote godäni ññönäñimpa. Adocanque Mäadiya Mäagadädëñä nani angaingä tömengä baonga wënæidi

tiæte ganca inäni tao godäni ininque tömengä önonganque badingä inte Itotaidi tönö godinque pönö cæcä inongäimpa. ³Wacä onquiyängä Wäönä nänöogängä Tiota guiquënë Edode nänö éadincoo në aacä inongante Wäönä inömö Totänä tönö ayæ wadäni onquiyænäni nangui inäni tönö adobaï Itotaidi tönö godongämæ godinque pönö cædönänimpa. Tömänäni nani éadincoo incæ ænte pöningue Itotaidi beyæ ante pönö cædönänimpa.

Wacä nänö quiyadö ante Itota odömonte apænecampa

(Mäateo 13.1-9; Mäadoco 4.1-9)

⁴Nangui inäni wayömö nani quëwencabo wayömö nani quëwencabo bacoo inäni godongämæ ponte a ongöñönänite Itota apænecantapa. Wængongui nänö apænedö ante waodäni æbänö ëñänäni, ante ëñencædänimpa, ante inguipoga quëwänäni nani cæinö ante iïmainö ante apænecantapa. ⁵“Wacä në quiyadongä inömö quiyacæ gocampa. Gote quiyayongä pancamonga taadö inömö wæämompa. Taadö wæante eyepodimö önöñonte pinä gäwadäni ædö cæte pæquii. Ayæ ayamöidi pöningue dobæ ade cænänipa. ⁶Pancamonga guiquënë dicamontaa inömö wæäninque pæquinämaï gä æidinque oguiimento guiwapa pæquii. Guiwadämaï inte edæ guingo icadinque tömencaguï näñe wæncaguimpa. ⁷Pancamonga guiquënë ömentacodë nänö eyepodimö inömö pæquinämaï tä bocate gä æiyonte ömentacoo adoyömö pö incootonque ganta cæca ate näñe wæmpa. Wampo incapa pæquii. ⁸Wæmonguipoga quiyadimö guiquënë tä bocate waa pædinque tömëmö tiëë ganca mänimpomö nangui pönö incapa. Quiyacä nänö quiyadö ante edæ botö mäninque ante apænebopa.”

Mänömainö ante apænedinque Itota ogæ tededinque, “Ëamonca ongonte edæ ëñëedäni,” angacäimpa.

Önömonque ëñente pönänämaï inänipa, ante

(Mäateo 13.10-17; Mäadoco 4.10-12)

⁹Tömengä miñæ në godäni inömö, Itota ëñëmi, änänitapa. Mäninö ante apænedinque bitö æbänö ante odömoncæte ante apænebitawo. ¹⁰Äñönänite tömengä, “Wængongui Awënë Odeye nempo æbänö quëwenguui, ante mini waocabo wëñëñedë mini ëñänämaï ingainö ante botö nöwo edonque pönö apænebo ate minitö adomünique ëñëmini iminipa. Wæætë wadäni inänite edæ botö inguipoga quëwänäni nani cæinonque ante odömöninque apænebopa. Edæ tömänäni, Awincaque adinque wiï ædæmö adäni inte önömoncaque ëñëninque ædæmö ëñänämaï incædänimpa, ante dodäni Wængongui beyæ ante nani yewæmongainö bai iinque bacäimpa, ante botö tömänäni inänite mänömainonque ante apænebopa,” ante Itota apænecantapa.

Quiyacä nänö cæinö ante pönente iïmainö ante ëñengäimpa

(Mäateo 13.18-23; Mäadoco 4.13-20)

¹¹Itota ayæ godömenque apænecantapa. “Botö në quiyacä nänö cæinö ante apænedinque iïmainö ante odömoncæte ante apænetabopa. Tömëmö quiyadimö inömö Wængongui nänö apænedö bai impa. ¹²Taadö wæante önömö botö änömö guiquënë në ëñänäni bai impa. Tömänäni Wængongui nänö apænedö ante tæcæ ëñëñönänite wënæ awënë pöningue, Quëwänämaï incædänimpa, ante cædinque Wængongui nänö angainö ante ö ængä ininque tömänäni ömætawänäni inte ædö

cæte pönente quëwenguinänii. ¹³ Dicamontaa wæænte pædimö bai inäni guiquënë Wængongui nänö apænedö ante watapæ ëñente todinque në Ao änäni inänipa. Tömënäni iñömö oguimento guiwadamaï bai inäni inte wantæ iñö pönënäni ate tömënäni nani pönënö beyæ ante wadäni piinte cædäni ate tömënäni wæætë guïñente wædinque ëmö cæte godänipa. ¹⁴ Ömentacodë wæænte pædimö bai inäni guiquënë tömënäni ëñëninque godömenque quëwëñönäni ingui-poga quëwente quïëmë beyænque mönö wæpämö pö ate guïñente wædinque pædämaï inänipa. Mäincooque beyæ ayæ önonque towente nani wædö beyæ tömënäni ömentacoo incootonque nã caate bai cæ ininque edæ wampo encadänipa pæquïnänii. ¹⁵ Ongui-poga wanguipoga quiyadimö bai inäni guiquënë tömënäni nö pönente waa cæte quëwënäni inänipa. Tömënäni iñömö edæ Wængongui nänö apænedö ante ëñëninque do bæi ongonte wede pönënäni inänipa. Wæntæye inämaï inäni inte tömënäni ee cædinque tömëwæ incate bai waa cædänipa. Botö mänömainö tömänö ante odö-moncæte ante në quiyacä nänö cædö ante apænetabopa,” ante Itota apænegacäimpa.

Gongapæncade, ante odömonte apænecampa

(Mäadoco 4.21-25)

¹⁶ Ayæ, “Gongapæncade ti wodönodinque waodäni dicæ owætadë boo cæ-cädäniyaa. Möimoga ænömengadæ inö dicæ concæcadäniyaa. Wæætë, Mäniñömö në pö guidäni acædänimpa, ante cædinque gongapæncade awæmpa æmongapaa concædäni nãö bæco adänipa. ¹⁷ Quiëmë ante wë wodonte i iñömö mäninö tömänö ante iincayæ ate edonque ate bai ëñengæimpa. Quinö nõwo bee ocate bai i incæ mäninö tömänö iincayæ ate wi æncate bai iñonte edonque acæimpa,” ante Itota apænecantapa.

¹⁸ Ayæ, “Në ëacä ingante godönäni ængä bai në ëñengä ingante godö apænebo ëñente entawëninque tömengä godömenque ëñente bacæcäimpa. Në ëadämaï ingä guiquënë tömengä, Ëabopa, ante pönëninque nänö wædænque pönï ëadincoo iñonte ö ænäni wæcä bai në ëñënämaï ingä adobaï tömengä, Entawëmopa, ante pö-nengä ininque wædænque pönï nänö entawënö iñonte edæ ö ænte bai cæbo dæ ba ate wæcæcäimpa cæminii. Ëamonca ongonte ëñenguënë quëwëminii,” ante Itota apænegacäimpa.

Itota wäänä tönö tömengä biwiidi pönänipa

(Mäateo 12.46-50; Mäadoco 3.31-35)

¹⁹ Mäniñedë tömengä wäänä tönö tömengä biwiidi pöninque tömengä weca guicæte ante cæyönäni wadäni goto ongönäni ate wædinque, Ædö cæte guiquüi.

²⁰ Ante wædäni adinque wacä,

—Itota ëñëmi. Bitö badä tönö bitö biwiidi bitö imite ante oncodo ponte yabæque ongönänipa cæbii.

²¹ Ante apænecä ëñëninque Itota,

—Wængongui nänö änö ëñëninque në ëñente cædäni iñömö tömënäni botö badä bai botö töninädäni bai inänipa, angacäimpa.

Itota angä ëñente woboyæ æpæ næ gongæmpa

(Mäateo 8.23-27; Mäadoco 4.35-41)

²² Mäniñedë tömengä miñæ në godäni inänite Itota,

—Gäwapæ æmëmäa taocæimpa.

Angä ëñente cædinque tömengä tönö wipodë guiddinque tæcæ taocæ wogaa godänitapa.

²³Tao wogaa goyönäni Itota wipodë näñe ñongæninque edæ mö ñongantapa. Mänömaï mö ñöñongä goyönänite woboyæ nanguï pönï pæmæninque edæ æpæ mængonta mængonta pöningue wipodë baguimæ guï adinque tömënäni, Æpæ bete wænguï wæ, ante Yæ wædänitapa. ²⁴Itota weca gote, Ömæmoncæcäimpa, ante tao cædinque,

—Awënë, möni Awënë, ëñenguënë quëwëe. Bete wæncæ cæmompæ cæbii.

Änäni ñäni ömæmonte ængæ gantidinque, Woboyæ æpæ idæwaa mængonta cæbipa. Næ gongæmäwe, angä. Næ gongæninque ñancæ ñancæ gongæmæmpa.

²⁵Ayæ tömënäni inänite,

—Mini pönëgade incæ quinante wii pönëminii.

Äñongante tömënäni ancai guïñëninque, Æbänö anguimöö, ante nämäneque tedegadänimpa.

—Íngä íñömö æcänö inongä inte mänömaï angä ëñëninque woboyæ incæ æpæ incæ næ gongæmpa, ante wæmönipa, ante tedegadänimpa.

Guedatabæ íñömö wënæ inte në ënemlocä

(Mäateo 8.28-34; Mäadoco 5.1-20)

²⁶Mänii Gadideabæ ëmö cæte godinque Itotaidi æmëmäa wogaa tao godinque Guedatabæ pö ti wæänänitapa. ²⁷Wipodë manta wo cæyönäni Itota ti wæante tæcæ ömaa goyongante onguïñængä wënæidi tönö në quëwengä íñömö mämö bee tengantapa. Íngä íñömö tömënäni quëwëñömö në quëwengaingä inte ñöwo wantæpiyæ oncönë quëwënämaï inte ömaacä quëwëninque waodänidoque cöwë quëwengä inongäimpa. ²⁸Itota ingante adinque tömengä önöwa inö ædæ wæäninque edæ Yæ angantapa.

—Itota ëñëmi, bitö Æibæ Quëwengä Wængonguï Wëmi inömi incæ quimæ botö weca pöwëe. Botö imote edæ, Ämogate wæcæcäimpa, ante cædämaï imäwe, ante nanguï angantapa.

²⁹Edæ tæcæ pönongante tömengä wentamö nänö në ëwocadongä ingante Itota, Gobäwe, ante do angä ëñente wædingä inte ñöwo mänömaï angantapa. Mänii wënæ íñömö wantæ wantæ íñonte onguïñængä ingante bæi ongonte bai cædongäimpa. Ínninge mäningä onguïñængä ingante waodäni daagömenca edæ ëno pönö goto wimænte wææ ëno pönö goto wiwadinque wææ wänönönänimpa. Incæte tömengä daagömë wangö ñæ wangö ñæ cædongäimpa. Ayæ tömengä ingante wënæ wæætë wæætë da godongä önömæca wodii winonte quëwënongå inte adocä ñöwo Itota weca ponte angacäimpa. ³⁰Angä ëñëninque Itota wæætë,

—Æmömido imii.

Äñongante,

—Botö ëmöwo Deguiönö ëmömopa, angantapa.

Edæ tontadoidi Deguiönö näni änoncabo bacoo inäni bai botö në ënempodäni adobai wënæidi bacoo inänipa, ante adinque, Deguiönö ëmömopa, ante onguïñængä angantapa. ³¹Wënæidi guiquënë Itota ingante wæætë wæætë äninque, Mönitö imönite tadömengadænguipoga wido cædämaï imäwe, ancaa änänitapa.

³² Māniñömō odæ wængänäidi nanguī ināni ānanquidi a cængönāni adinque, Īñömō odæ wængänā baönē āmi go guiite quēwenguimōni, ānāni ēñēninque Itota, Ao angā. ³³ Ēñēninque waocā baönē quēwente tao godinque wēnæidi odæ wængänā baönē wæætē go guidiāni ate odæncato wæætē ontadāa wæænōmēmō ĩñömō gāwapæno pogodo wæi guiite becadote capo wængadānimpa.

³⁴ Itota mǎnōmaī cæcā ate wædinque odæ wængänäidi nē aadināni guiquēnē pogodo wodii winonte tōmēnāni quēwēñömō māo bee tente apænedinque idōmæ māo gode ā gode ā cæte, Itota mǎnōmaī cæcā wæmōnipa, ante apænedānitapa.

³⁵ Ēñēninque wadāni wæætē, Æbānō cæcāi, ante acæte ante pōnānitapa. Itota weca ponte ayōnāni wēnæidi tōnō nē quēwēningā incæ ñowo ōnonganque bate weocoo ēñacā inte Itota ōnōwa gāānē ēñēē congā adinque guīñente wægadānimpa.

³⁶ Wēnæ tōnō quēwēningā ingante Itota mǎnōmaī cæcā ante nē adināni ĩñömō ñowo pōnāni inānite, Mǎnōmaī cæcantapa, ante do apænedānitapa. ³⁷ Ēñēninque Guedatabæ quēwēnāni tōmānāni ancaī guīñente wædinque Itota ingante, Mōnitō weca quēwēnāmaī ñowo gobāwe, ānāni ēñente wædinque tōmengā wipodē ĩmæmāa poncæte ante guicā. ³⁸ Adinque wēnæidi tao godāni ate nē ōnonganque bate quēwengā ĩñömō Itota ingante, Bitō miñæ māobi goboe, angā ēñēninque Itota wæætē, Bitō ee quēwēmi, āninque,

³⁹ —Tōmēmi oncōnē adodō godinque, Wængonguī æbānō nanguī cæcā waa batawoo, ante māo apænebi ēñencædānimpa.

Angā ēñēninque oncōnē godinque tōmēnāni nāni quēwēñömō tōmāo cægōninque tōmengā, Itota mǎnōmaī cæcā ate waa batabopa, ante māo apænecā ēñengadānimpa.

Gaido wēñængā beyæ cæcæ goyongante

Itota weocoo onquiyængā gampocampa

(Māateo 9.18-26; Māadoco 5.21-43)

⁴⁰ Itota ĩmæmāa ocæ ēmænte pongā adinque, Æyedēnō ponguingāā, ante nē wædināni inte tōmānāni tōmengā ingante waa ate togadānimpa. ⁴¹ Māniñedē wacā oodeoidi odōmōincō awēnē ĩnongā inte tōmengā ēmōwo Gaido ĩñömō pō Itota ōnōwaca ĩnō ædæ wæænīnque tōmengā ingante, Botō oncōnē quingæ pōe, ante nanguī angantapa. ⁴² Edæ botō wēñængā onquiyængā adocanque ĩnongā inte dote wadepo nānō ēñagai ĩñonte edæ wæncæ cæcampa cæbii, ante wæcantapa.

Īninque Itota tōmengā miñæ gocantapa. Idōmæ goyongante nanguī ināni goto goto pōninque wodo mō ñongænāni wæcantapa. Wampo impa goquingāā.

⁴³ Māniñedē wacā onquiyængā pongantapa. Tōmengā ĩñömō wantæpiyæ dote wadepo ĩñonte wepæ wantæ bidāmaī cōwē wææ wædinque waa bawēnencæte ante cædinque tōmengā quincōo tōmancoo eyepote pædæ godongā æninque dotodoidi æcāmenque incæ onquiyængā beyæ ædō cæte waa cæquināni. ⁴⁴ Mǎnōmaī quēwente wædongā inte tōmengā ñowo Itota ōnōñabæca ĩnō pōninque tōmengā weocoo yæwedecoque godō gampo cæyongā wepæ ĩñontobæ edæ wantæ bitapa.

⁴⁵ Itota ĩñömō edæ,

—Æcānō botō ĩmote pōnō gampodaī.

Āñongante tōmānāni, Æcānō gampodatawogaa, ante adoyōmō ante ānāni ate wædinque Pegodoidi wæætē,

—Awënë ēñēmi. Bitō weca tōmānāni goto goto godāni apa āmii.

⁴⁶ Itota wæætē,

—Īnāmpa adocanque botō imote wede pōnēninque gampocantapa. Tāi piñānte botō entawēnō incā edā wacā beyā cæquinque do gotimpa, ante wæwēnente awædō.

⁴⁷ Āñongante onquiyāngā ĩñōmō, Ædō cæte wē womonguimoo, ante pōnente wædinque do do wāate bai guñēninque Itota weca ædā wæencate tōmānāni ayōnānite apænedinque, Botō waa bawēnencæte ante bitō imite pōnō gampotabopa. Tæcæ pōnō gampo cædinque waa babo ae. ⁴⁸ Ante apænecā ēñēninque Itota,

—Onquiyāmi ēñēmi. Bitō wede pōnēnō beyā edā wantā bawēnemipa. Nōwo edā nō bawēnēmi inte wampo pōnente waa goe, ante godō ædāmō apænecantapa.

⁴⁹ Ante tæcæ apæneyongā oodeoidi odōmōincō awēnē Gaido oncōnē quēwengā māniñedē pōninque edā Gaido ingante apænecantapa.

—Bitō wengā ĩñōmō nōwo æmæwo wængampa cæbii. Nē Odōmongā ingante nōwo bitō godōmenque ānāmaī incæbiimpa.

⁵⁰ Ante nōwo pōningā Gaido ingante angā ēñēninque Itota wæætē,

—Gaido, guñēnāmaī ie. Bitō wede pōnēmi adinque bitō wengā miingā quēwencæcāimpa.

⁵¹ Āninque Itota godōmenque godinque awēnē oncōnē pō guicæ cædinque Pegodo ingante Tantiago tōnō Wāō ĩnate wēñāngā wæmpo tōnō wānā ĩnate mānimpodānique ĩnānite ænte manguicā wānē guidānitapa. Wadāni ĩnānite wæætē wæcæcæcā guidāmaī ĩnānitapa. ⁵² Tōmānāni Ca ca wædinque wēñāngā wodi ingante ante pōnente wæwēnāni adinque Itota tōmēnāni ĩnānite,

—Ca ca wædāmaī iedāni. Īnāmpa ĩñōmō wēñāngā wodi edā wīi æmæwo wængantapa. Mō edā ñongampa.

⁵³ Angā ēñente wædinque tōmēnāni, Æmæwo wænte oñongampa, ante do adināni inte wæætē edā, Antedō amīni, ante tōmengā ingante badete todānitapa. ⁵⁴ Īninque Itota wēñāngā ingante pædæ wææmpo bæi ongonte tōō æmæninque ogæ tededinque,

—Wēñāmi, ængæ gantibi, angantapa.

⁵⁵ Āñongā tōmengā do wæningā inte ñāni omæmonte quēwēninque ængæ ganticantapa. Itota wēñāngā beyā cænguī angā godōna cængantapa. ⁵⁶ Adinque mæmpoda, Æbānō cæte mānōmaī cæcāā, ante guñēnte wædatapa. Incæte Itota wæætē, Botō æbānō cæboo, ante minatō wadāni ĩnānite apænedāmaī incæminaimpa, angacāimpa.

Wængonguī Awënë ingantedō ante apæneedāni, ante Itota angā godānipa

(Māateo 10.5-15; Māadoco 6.7-13)

9 Tōmengā miñā nē godāni, Dote ĩnāni, nāni ānōnāni ĩnānite Itota angā pōnāni ate, Botō nē āmo inte botō tāi piñānō ante nōwo pōnōmo ænte entawēninque mīnitō tāi piñāninque nē āmīni bacæminimpa. Īninque mīnitō āmīni ate wēnæidi tōmānāni do gocædānimpa. Adobāi āmīni ate wēnæ wēnæ inte wæwēnāni waa bacædānimpa. ² Mīnitō, Wængonguī Awënë Odeye inguipoga do pongāimpa, ante apænemīni ēñencædānimpa. Ayā wēnæ wēnæ ĩnāni ĩnānite godō cæmīni waa bacædānimpa, ante Itota mānimpodāni ĩnānite da godongā gogadānimpa.

³ Īmaī angacāimpa.

—Minitō ömæpomini taadō goedäni. Ongonto incæ mäincoo da wenguincade incæ cænguī incæ godonte äinta incæ tōmancoo edæ äenämaī inte ömæpomini godinque edæ ëñacooque ëñate goedäni, angantapa. ⁴ Ayæ, Godinque æcönënë tåno go guimini owodinque minitō wayömō mini go quëwenganca mänincönenque go guī go guī cædinque quëwëedäni. ⁵ Äyömömë goyöminite wadäni, Pöedäni, änämaī inte minitō apänedō ante wīi ëñänäni wædinque minitō wæætë tömënëni inänite ëmō cæte iimainō ante goedäni. Minitō iñæmpa, Pöedäni, änämaī imini adinque monitō gomōni tamëñedäni, ante odömoncæte ante minitō önöwa wadæ wadæ cæwadinque wadæ goedäni.

⁶ Angä godinque tömënëni quëwëñömō wayömō tömënëni quëwëñömō wayömō tömāo godinque Itota nänō da godöninäni iñömō mönō Awënë ingantedō ante mäo watapæ apänedäni ëñänänitapa. Ayæ wënæ wënæ inäni inänite godō cædäni ate waa bagadänimpa.

Itota æcänō ingää, ante Edode wæcampa

(Mäateo 14.1-12; Mäadoco 6.14-29)

⁷ Tömänäni mäniñedë, Itotaidi æbänō cædänii, ante tedeyönänite pancabaa awënë odeye Edode incæ do ëñengantapa. Itota iñömō æcänō ingää, ante wædinque pancadäniya, Wäo wodi do wænte ñäni ömæmönigä inte iingä Itota imaingampa, ante tededäni ëñente wædinque awënë Edode guñente wæcantapa. ⁸ Wadäni guiquënë, Ediya wodi ponte a ongömaingampa, ante tedeyönäni wadäni guiquënë, Wængonguī beyæ në apänegainäni incæ adocanque docä incæ do ñäni ömæmönigä inte a ongömaingampa, ante tededäni. ⁹ Ëñente wædinque Edode wæætë,

—Botō tömëmo ämo ëñëninque Wäo wodi ingante wido tamencadäni wængantapa. Ininque mäningä Itota näni në tededongä guiquënë æcänō ingää.

Ante wædinque Edode, Æbänō cæte Itota ingante aquimoo, ante nanguī cægacäimpa.

5.000 ganca inäni inänite Itota godongä cænänipa

(Mäateo 14.13-21; Mäadoco 6.30-44; Wäo 6.1-14)

¹⁰ Itota nänō da godöninäni iñömō tömengä weca adodō pöninque, Mänömaī mänömaī cætamönipa, ante nanguī tededäni ëñengacäimpa. Ëñente ate tömengä tömënëni inänite nänënë Betaida eyequei ænte mäocä. ¹¹ Goyönänite wadäni do ëñëninque tee empote pönäni adinque Itota, Waa pömini abopa, ante waadete apänedinque, Minitō Wængonguī Awënë Odeye nempo watapæ quëwencæminimpa, ante apänecantapa. Ayæ, Pancadäniya waa baquënëñäni inänipa, ante adinque tömengä godō cæcä ate waa badänitapa.

¹² Ayæ gawadecæ bayonte edæ, Dote, ante näni Itota miñæ gocabo iñömō tömengä weca pöninque änänitapa.

—Iñömō önömæca impa cæbii. Bitō godongämæ ongönäni inänite ämi idömæ owodäni weca godinque ayæ nanguī inäni näni quëwëñömō godinque oncö eyepæ i ate cæninque moncædänimpa.

¹³ Äñönänite Itota,

—Minitō wæætë godömīni cæncædänimpa. Äñongante,

—Iñæmpa päo önompo æmæmpoque gæyæ mæa pöni mänimpoque näëmönipa töö. Ininque bitō wæætë, Tömänäni beyæ cænguī gote ænte pöedäni, ämitawoo.

¹⁴ Onguiñænänique tinco müido ganca inäni edæ mä ongönönänimpa. Incæte Itota tömengä miñæ në godäni inänite angantapa.

—Minitö tömänäni inänite, Tincoenta ganca müni cabo nänënë tincoenta ganca müni cabo nänënë ämüni tæ contacädänimpa.

¹⁵ Angä eñëninque änäni tæ contadänitapa. ¹⁶ Itota päö önompo æmæmpoque æninque gæyæ mä æninque öönæðë æmö adinque Wængongui ingante, Bitö wæ pönömi ænte cæmönipa, ante apænecantapa. Ayæ päö tönö gæyæ pä æ pä æ cædinque tömengä miñæ në godäni inänite pæðæ godongä æninque tömënäni tömänäni inänite di mäñæ di mäñæ cæðäni ænte cængadänimpa. ¹⁷ Tömänäni eyepæ ænte tömo pöni cænänitapa. Ayæ ao mä ao mä cæte ñönönäni ate Itota miñæ në godäni wæætë ao mä näni ñönöni ee öñoncoo pæðæ wæampo ö æninque önompo tipæmpoga go mentodëa cængui eyede da wënäni contagatimpa.

Bitö Coditobi inömi imipa, ante Pegodo apænecampa

(Mäateo 16.13-19; Mäadoco 8.27-29)

¹⁸ Ayæ ate Itota nänënë godinque Wængongui ingante apæneyongä tömengä miñæ në godäni tömengä tönö godongämæ ongönönänimpa. Tömënäni inänite angantapa.

—Wadäni botö imotedö ante apænedinque, Æbodö imoo, ante apænedäni eñëmüni.

¹⁹ Äñongante tömënäni wæætë,

—Bitö imitedö ante apænedinque pancadäniya, Wäö æpænë në guidongaingä incæ Itota adocä imaingä ingampa, änänipa. Wadäni pancadäniya wæætë, Ediya wodi ingaingä incæ Itota adocä imaingä ingampa, änänipa. Pancadäniya wæætë, Wængongui beyæ në apænegaingä adocanque do wængaingä inte näni ömæmonte quëwënongå incæ Itota adocä imaingä ingampa, ante tededänipa.

²⁰ —Minitö guiquënë, Botö æbodö imoo, ante pönëmüni.

Äñongante Pegodo,

—Wængongui nänö në angäimi inömi inte bitö iñömö edæ në Coditobi inömi imipa, angantapa.

Itota, Iimäi cæðäni wæncæboimpa, ante apænecampa

(Mäateo 16.20-28; Mäadoco 8.30-9.1)

²¹ Pegodo mänömainö ante apænecä eñëninque Itota wæætë angantapa. Minitö botö imotedö ante apænedinque, Codito inongä ingampa, ante gode änämaï ðedäni ämopa, ante nanguï äninque edæ wæ angacäimpa. ²² Äninque,

—Botö Waobo eñagäimo inte nanguï caate wæquënëmo imopa. Në aadäni näni Picæncabo tönö, Wængongui qui, ante në godönäni ñænænäni tönö në odömönäni tönö mäninäni edæ botö imote Baa änäni wæquënëmo imopa. Ayæ botö imote godömenque wænönäni wænguënëmo imopa. Incæte Wængongui angä beyænque botö mëönaa go adoönæque iñonte edæ näni ömæmonte quëwencæboimpa, ante apænecacäimpa.

²³ Ante apænedinque Itota tömänäni inänite godömenque apænedinque,

—Æcänö botö miñæ pöinëna ina tömengä nämä beyænque ante pönënamäi inte iimö iñö iimö iñö botö miñæ tee empote poncæcäimpa. Nämä nänö wænguiwæ nææante ponte bai cædinque tömengä, Botö wænguïmo incæ caate wæbo incæ Itota ingante cöwë tee empote gocæboimpa, äninque poncæcäimpa. ²⁴ Edæ æcänö, Nämä

wææ gompodique quëwencæboimpa, ante cædinqe botö miñæ pönämaï ingä guiquënë tömengä iñömö edæ quëwënämaï incæcäimpa. Wæætë edæ, Wænönäni wæmo incæte botö Itota miñæ tee empote cöwë gocæboimpa, ante æcänö äna guiquënë tömengä wæætë quëwencæcäimpa. ²⁵ Edæ waocä inguipoga ongoncoo tömancoo ö æncæte ante cædinqe nämä önöwoca incæ pædæ godongä wë womonte ba iñinqe edæ tömengä iñæmpa quëwengampa diyæ mäincoo ëaquiringää. ²⁶ Mïnitö pancamïniya botö beyæ ante botö apænedö beyæ ante guingo imonte wæmïnitawo. Iñæmpa botö Mæmpo nänö ëmönö tönö anquedoidi tæiyæ wæmö iñäni nani ëmönö guinæ gongæñonte botö Waobo në ëñagäimo inte edæ nämä ñäö apäite bai dibæ pöninqe botö wæætë në guïñente wægäingä beyæ ante näëmæ guingo imonte edæ wæcæboimpa. ²⁷ Näwangä ämopa. Botö weca ongömini pancamïniya ayæ wænämaï edæ mïimïni quëwëñömini botö Wængongui Awënë Odeyebo babo ate botö nempo guicæminimpa, ante Itota apænegacäimpa.

Itota wæmö pöni ñäö bai ëmongä bacä adänipa

(Mäateo 17.1-8; Mäadoco 9.2-8)

²⁸ Mänömainö ante apænedingä inte Itota adoque Wængongui itädë go ate Wængongui ingante apæncæte ante æidinqe Pegodo ingante Wäö tönö Tantiago inate mänimpodäni iñänite änanquidi ænte mäicä æidänitapa. ²⁹ Æite go apæneyongä tömengä awinca iñömö edæ wii cöwë nänö ëmönö bai wæmö pöni ñäö bai edæ ëmongä bamongä adänitapa. Ayæ tömengä wecoo nänö ëñacoo iñömö edæ näinte bai ëmoncoo badinqe näämænta pöni ëñacantapa. ³⁰ Ayæ ayönäni edæ onguinæna mënaa edæ Möitee wodi tönö Ediya wodi incæ iñontobæ a ongöninqe Itota tönö tededatapa. ³¹ Tömëna iñömö ñäö apäite bai ëmöna inte Itota tönö godongämæ apænedatapa. Godongämæ apænedinqe tömënäni, Itota æbänö ñöwo Eedotadëë godinqe iinqe cædinqe oo wænte wadæ gocæcäimpa, ante tededänitapa. ³² Mänömainö ante tedeyönäni Pegodoidi guiquënë möinente a ongöninqe ædæmö ñäni ömæmonte æmö ayönäni Itota ñäö apäite bai ëmongä adinqe tömengä tönö onguinæna mënaa godongämæ adiyæ ongönäni adänitapa. ³³ Onguinæna iñömö Itota ingante tæcæ ëmö cæte gocæ cæyöna Pegodo guiquënë, —Awënë ëñëmi. Iñömö mönö waa pöni ongonte awædö. Bitö ämi ate mönitö oncontaiucoo mentaiya go adotaique mænöninge bitö oncontai ante adotaique Möitee oncontai ante adotaique Ediya oncontai ante adotaique mænömaimönipa.

Mänömainö ante tededinqe Pegodo, Æbänö ante tedequënëmo imoo, ante ëñënämaï inte önonque tedecantapa. ³⁴ Mänömaï tedeyongä boguimancoo obo wæænte wææ owoyö adämaï iñäni inte, Boguimancoo ganta cæ wæcæ wæ, ante Pegodoidi guïñente wædänitapa. ³⁵ Ayæ boguimancodë önönepämoque apæncantapa. “Iñgä botö Wengä botö në apænte ængäingä ingampa cæminii. Tömengä pönö apæncä ate ëñëdäni.”

³⁶ Ante apæncä ëñente ayönäni Itota ñöwo adocanque a ongonä adänitapa. Iñinqe tömengä miñæ në godäni në adinänique inte pæ wëenedinqe tömënäni nani adinö ante mäniñedë wadäni iñänite apænedämaï ingadänimpa.

Itota wēnæ ingante angä go ate wēñængä waa bacampa

(Mäateo 17.14-21; Mäadoco 9.14-29)

³⁷ Mänii änanquidi æi iimö ate wææ pönönäni Itota ingante bee tencæte ante nangui inäni pönänitapa. ³⁸ Godongämæ ponte nangui inäni ongöñönäni onguñængä adocanque edæ ogæ tededinque,

—Nē Odömömi ēñēmi. Botö wengä onguñængä ingante pönö waa ae. Tömengä adocanque botö wengä ingampa cæbii. ³⁹ Tömengä nänö nē ewocadongä inte wēnæ incæ tömengä ingante edæ bæi ongongä ate tömengä iñontobæ Yæ yæ angampa. Ayæ godö cæcä ate botö wengä edæ do do wäadinque önöne mäwanta tadecampa. Wēnæ iñömö wantæ iñö tao godinque adodö pö guite edæ cöwē quēwēninque botö wengä ingante edæ ewencæ cæcampa cæbii. ⁴⁰ Bitö miñæ nē godäni inänite botö, Wēnæ inte wido cædäni, ancaa äñömo tömēnāni nē cæquēnēnāni incæ ædö cæte wido cæquänāni, ante wæbopa.

⁴¹ Ante wæyongante Itota,

—Ñowomini mini ædæmö cædämāincabo mini pönēegade impa. Minitö weca æpogadö quēwēmoi. Wapiticæ cæyöminite botö æpogadö piyänē cæte wæwēmoi. Äninque mæmpocä ingante apænedinque, Bitö wengä ingante botö weca ænte pöe.

⁴² Angä ēñente ænte mämongä pönongante wēnæ incæ yæipodē bæ tacä do do wäate wæwengantapa. Tömengä wentamö nänö nē ewocadongä ingante Itota iñömö edæ, Ee ae, ante wææ angantapa. Ayæ wēñængä ingante pönö cæcä ate tömengä wæætē öngonganque bayongante mæmpocä ingante Itota pædæ godongä ængacäimpa. ⁴³ Mänömaï cæcä adinque, Wængongui incæ tæi piñænongä inte mänömaï cæcampa, ante pönēninque tömānāni ancai guñente wægadänimpa.

Iïmaï cædäni wæncæboimpa, ante adodö ante apænecä

(Mäateo 17.22-23; Mäadoco 9.30-32)

Mänömaï cæcä ate guñente wæyönāni tömengä miñæ nē godäni inänite Itota iïmaï ante apænegacäimpa.

⁴⁴ —Nöwo ämo ēñenguēnē quēwēminii. Adocanque, Waocä nē ēñagaingä æyömönö ongongä, ante godö odömöninque botö imote waodäni nempo pædæ godönāni æncædänimpa.

⁴⁵ Äninque tömengä nänö apænedö æbänö i, ante wædänitapa. Wē womonte i ininque tömēnāni ædö cæte ēñenguänāni. Ayæ, Æbänö ante ämii, ante anguēnēnāni incæ edæ guñēnete wædinque pæ wēnegadänimpa.

Æcänonque nē angä inguingä, ante tededänipa

(Mäateo 18.1-5; Mäadoco 9.33-37)

⁴⁶ Tömengä miñæ nāni nē gocabo iñömö, Mōni cabo incæ æcänonque ñænængä pönö inongä inte nē angä inguingä, ante wædinque nämä incæ wæætēdö wæætē tedejönänite ⁴⁷ Itota önöwēnenque do ēñengantapa. Eñēninque wēñængä adocanque ingante bæi ongöninque tömengä gäänē iñömö gö cæcantapa. ⁴⁸ Tömēnāni inänite apænecantapa.

—Waocä botö emöwo beyænque iingä wēñængä ingante, Pöe, ante waa cæcä iñömö tömengä botö imote adobaï edæ, Pöe, ante do waa cæcampa. Botö imote æcänö, Pöe, äninque waa cæda tömengä adobaï botö imote nē da pönongä ingante

Wængongui ingante edæ adobaï, Pöe, ante do waa cæcampa. Edæ mîni waocabo wædämîni iñömînite waocä guiyangä pöni inongä nänö entawënö bai në entawengä iñömö tömengä ñænængä pöni inongä ingampa, ante apænegacäimpa.

Në piinte cædämaï ingä iñömö godongämæ cæcä ingampa

(Mäadoco 9.38-40)

⁴⁹ Wäö iñömö Itota ingante apænedinque,

—Awënë ëñëmi. Wacä incæ mönö cabo inämaï inongä inte bitö ëmöwo apænedinque wænæidi inänite wido cæcä atamönipa. Ñinque mönitö wæætë edæ, Bitö mönitö tönö gobi imipa Itota ëmöwo apænequimii, ante tömengä ingante edæ wææ antamönipa.

⁵⁰ Ante apæneyongante Itota,

—Ïnæmpa mînitö imînite në piinte cædämaï ingä iñömö tömengä wæætë mînitö tönö godongämæ cæcä ingampa cæmîni. Tömengä ingante wææ änämaï incæmînimpa, angacäimpa.

Tantiago tönö Wäö inate Itota wææ angampa

⁵¹ Oo pöni nänö æiquionæ bacæ cæyonte Itota, Eedotadëe iñömö botö cöwë gocæboimpa, ante gocæ cæcantapa. ⁵² Wadäni inänite tömengä, Poncæcäimpa, ante mînitö täno beyænte goedäni, ante da godongä godänitapa. Godinque tömënäni iñömö Tämadiabæ godinque tömengä beyæ cæcæte ante Tämadiaidi nani quëwëñömö gocæ cæyönäni, ⁵³ Tämadiaidi wæætë edæ, Eedotadëe gämænö Itota gocä awædö, ante adinque, Mönitö weca pönämaï incæcäimpa, ante wææ änänitapa. ⁵⁴ Ïmaï cædäni adinque Wäö tönö Santiago tömengä nänö ëmîñæna iñömö, —Awënë ëñëmi. Baa änäni adinque öönædë gonga ämöna wææ gonte wænguinäni, ämi, änatapa.

⁵⁵ Äñönote Itota wæætë edæ dadi ëmæmonte wææ ante tömëna inate, “Ïnæmpa mînatö imînate æwocadö angä ëñente ämînaa, ante mînatö edæ ëñënämaï imîna awædö. ⁵⁶ Ïnæmpa botö Waobo ëñagaïmo imo iñömö edæ waodäni inänite ömæe ewencæte ante wii pongaïmo imopa. Wæætë edæ, Botö ämo beyænque quëwencædänimpa, ante pongaboimpa,” ante piingacäimpa. Ayæ wadäni nani quëwëñömö gogadänimpa.

Itota mîñæ në goinënäni

(Mäateo 8.19-22)

⁵⁷ Taadonque goyönäni Itota ingante wacä angantapa.

—Awënë, bitö ædömë goyömite botö bitö mîñæ pö gocæboimpa.

⁵⁸ Angä ëñëninque Itota wæætë,

—Babæ guintaidi iñömö ontatodë mongui ëadäni inänipa. Ayamöidi ongonta ëadäni inänipa. Botö Waobo ëñagaïmo wæætë edæ mongui ömaabo imopa poncæ ämii, angacäimpa.

⁵⁹ Ayæ wacä ingante Itota,

—Botö mîñæ pöe.

Angä ëñente wædinque tömengä,

—Awënë ëñëmi. Botö täno gote botö wæmpo wængä ate daga wente ate pömoe.

⁶⁰ Äñöngante Itota wæætë,

—Īnæmpa nē wæwocadāni incæ tōmēnāni guidēnāni wænāni ate ee abi daga wencædānīmpa. Bitō wæætē, Wængonguī Awēnē Odeye do pongāīmpa, ante gote apānebi ēñencædānīmpa. ⁶¹ Ayæ wacā adobaī,

—Awēnē bitō ĩmite tee empote goinēmo incæ ee ongōñōmi tāno gote botō guidēnāni ĩnānite, Gobopa, ante apānete pōmoe. ⁶² Āñongante Itota wæætē,

—Ōmæ nē mangæ mangæ cædongā ĩñōmō tōō pōnī minte pæquīmpa, ante cæquēnengā ingampa. Tōmēngā dadi ēmænte adinque tōō pōnī cæcampa diyæ tōō minte pæquīī. Ayæ adobaī Wængonguī Awēnē Odeye nempo quēwēnīnque nē cæquēnengā ĩñōmō tōmēngā dadi ēmænte inguīpogaque ante acā ĩnīnque Awēnē beyæ ante ædō cæte cæquīngāā.

72 ganca ĩnāni ĩnānite Itota da godongā godānīpa

10 Ayæ ate mōnō Awēnē godōmenque tetenta i doo ganca ĩnāni mānimpodāni ĩnānite ĩmaī angantapa. Mīnitō æmænō mēmīnaa æmænō mēmīnaa godīnque botō nē goquīñōmō ante wayōmō nāni quēwēñōmō māo wayōmō nāni quēwēñōmō māo tāno beyænte gomīni ate botō ayæ poncæboīmpa, ānīnque da godongā gogadānīmpa. ² ĩmaī ante da godongā godānitapa. “Nāwangā āmopa. Waocā tōmencacodē do pequinca nanguī inca baī Awēnē nempo nē quēwēnūgēnēnāni adobaī nanguī ĩnāni ĩnānīpa. Incæte nē tā pedāni wædænque ĩnāni baī nē gode ānāni ĩñōmō adobaī mēnāniya pōnī ĩnānīpa cæmīnī. Mīnitō Wængonguī ingante apānedīnque, Awēnē, bitō tōmencacodē nē ēabi inte āmi ēñēnīnque gote apānecædānīmpa, ante ædāni. ³ Nōwo mīnitō ĩñōmō goedāni, āmopa. Mēneīdi weca ongōnīnque codotedoidi ĩñōmō tæēmō ĩnānīpa diyæ nāmā wææ aaquīnānī. Mīnitō ĩñōmō codotedoidi aquīīnāni baī adobaī aquīīmīni ĩñōmīnīte botō āmo mēne baī ĩnāni weca edæ gomīni ataqeedāni. ⁴ Godonte mīni ænguīnta wente æī ænāmaī inte māincoo mongænte godāmaī ĩedāni. Awæncata næænte godāmaī ĩedāni. Taadō godīnque wacā ingante bee tēnīnque apānedāmaī inte goedāni. ⁵ Æcōnēmenque go guīte, Mīni quēwēncabo gānē pōnente waa quēwēedāni, āmīni ēñencædānīmpa. ⁶ Mānīncōnē quēwēngā Ao angā ĩnīnque tōmēngā gānē pōnente waa quēwēmaīngampa. Wæætē Baa angā ĩnīnque mīnitō adomīnīque gānē pōnente waa quēwēmaīmīnīpa. ⁷ Mānīncōnē mīni go guīdīncōnē quēwēñōmīnīte mānīncōnē quēwēnāni pædæ pōnōnāni ænte cænte bete quēwēedāni. Edæ nē cæcā ĩñōmō tōmēngā nānō cædī beyæ eyepæ ænguēnengā ingampa. Mīnitō adocōnenque quēwēnīnque wacōnē wacōnē godāmaī ĩedāni. ⁸ Æyōmōmē goyōmīni mānīñōmō quēwēnāni, Pōedāni, ānāni ēñente wædīnque mīnitō tōmēnāni cænguī pōnōnāni ænīnque cæedāni. ⁹ Wēnæ wēnæ wæwēnāni ĩnānite godō cæmīni waa bacædānīmpa. Ayæ tōmēnāni ĩnānite, ‘Wængonguī Awēnē Odeye mīnitō weca oo pongā acæmīnīmpa,’ ante apāneedāni. ¹⁰ Ayæ tōmēnāni quēwēñōmō go guīyōmīnīte Baa ānāni ĩnīnque mīnitō wæætē tōmēnāni taadonque tao godīnque tōmēnāni ĩnānite, ¹¹ ‘Mīnitō quēwēñōmō onguīpoi wadæ cæwate gomōna tamēñedāni. Incæte Wængonguī Awēnē Odeye mīnitō weca oo pongā acæmīnīmpa,’ ante ædāni. ¹² Edæ mīnitō ĩmīnīte āmopa. Wængonguī nānō apānte anguīōnæ ĩnīnque bayonte Todōmā ĩñōmō quēwēngāīnāni guīquēnē nanguī pante wæwēñōnāni mīnitō ĩmīnīte nē Baa ānāni guīquēnē godōmenque nanguī pante wæwēnguīnāni ĩnānīpa,” ante Itota angacāīmpa.

Nē ēñēnāmaī quēwēnāni inānite Itota pīngampa

(Māateo 11.20-24)

¹³ Āninqe Itota nē ēñēnāmaī quēwēnāni inānite pīninqe iīmaī angantapa. “Co-datīi iñōmō quēwēmīni ēñēdāni. Betaida iñōmō quēwēmīni ēñēdāni. Mīnitō mīni wæwenguinque ēñēnāmaī cæte quēwēmīnidō anguēnē. Edæ botō mīnitō weca tæi pīñænte botō cædi bai Tido nāni quēwengaiñōmō Tidōō nāni quēwengaiñōmō adobaī cæbo bai māniñōmō quēwengaināni iñōmō wēnæ wēnæ nāni cægainō ante dobæ ñimpo cædinque gōmæ ēmoncoo da wēñadinque gōnaiboga tæe contadinque Ca ca wæcægadānimpā. ¹⁴ Īninqe Wængonguī nānō apænte anguiōnæ iīnque bay-onte Tido iñōmō tōnō Tidōō iñōmō quēwengaināni inānite nanguī pangā wæwēnāni incæte tōmengā mīnitō imīnite godōmenque pangā wæwencāmīnimpā. ¹⁵ Ayæ Capēnaōmō iñōmō quēwēmīni ēñēdāni. Wængonguī mīnitō imīnite dicæ oōnædē wo ææntodongā æi gote toquimīniyaa. Īñæmpa tadōmengadænguipo wææntodongā guī wæcāmīnimpā,” angantapa. ¹⁶ Āninqe Itota wæætē tetenta i doo ināni inānite apænedinque, “Mīnitō apæneyōmīni æcānō ēñengā tōmengā iñōmō edæ botō imote do ēñengā ingampa. Wæætē mīnitō imīnite nē Baa angā iñōmō tōmengā edæ botō imote do Baa angā ingampa. Ayæ botō imote nē Baa āningā inte tōmengā botō imote nē da pōnōningā ingante do Baa angampa,” ante apænedinque tōmēnāni inānite Itota angā godānitapa.

Tetenta i doo ināni do godīnāni inte ocæ ēmænte pōnāni

¹⁷ Angā godīnāni inte tetenta i doo ganca ināni adodō ocæ ēmænte pōninqe watapæ todinque Itota ingante apænedinque,

—Awēnē, bitō ēmōwo apænedinque mōnitō wēnæidi inānite āmōni ēñēninque bitō ēmōwo beyænque godānīpa.

¹⁸ Ante todāni ēñēninque Itota wæætē,

—Nāinte quingæ cæ bai Tatāna iñōmō wēnæ awēnē incæ oōnædē inō wæængā nē agaīmo inte botō adobo āmopa. ¹⁹ Botō pōnō āmo ate mīnitō iñōmō nē āmīni badinque edæ tæntæ tōnō emēñe ingante pīnā gāwadāni bai adobaī tæi ēmōmīni inte tæntæ bai nē cædāni inānite wido cæcāmīnimpā. Ayæ mōnō imonte nē pīinte cædongā incæ tæi pīñænte cæcā incæte mīnitō iñōmō godōmenque tæi ēmōmīni inte māningā nānō tæi pīñænte cæpāmo ante tōmāmāmo ante edæ wido cæcāmīnimpā. Edæ æcāmenque incæ mīnitō imīnite æmæwo wido cædāmaī incæcāimpā. ²⁰ Incæte mīnitō āmīni ēñēninque wēnæidi do ēñente cædāni beyænque todāmaī iedāni. Wæætē, Mōnitō ēmōwo oōnædē dobæ yewæmonte ongompa, ante adinque mīnitō mænōmaī beyænque watapæ toedāni, angacāimpā.

Mæmpo Wængonguī ingante apænedinque Itota tocampa

(Māateo 11.25-27, 13.16-17)

²¹ Āninqe Wængonguī Tæiyæ Waēmō Ōnōwoca ingante ēwocadongā inte Itota māniñedē edæ watapæ todinque Wængonguī ingante iīmaī ante apænecantapa. “Mæmpo ēñēmi. Bitō, Wadāni nāmā ocāi encadāni tōnō nanguī adinque nē ēñēnāni tōnō māniñō bitō cægainō ante ēñēnāmaī incædānimpā, ante cædinque bitō cægainō ante wē wodongabiimpā. Wæætē wēñænāni tæcæ ēñadāni bai ināni inānite bitō edonque odōmōmi adinque do ēñēnānīpa. Bitō oōnædē Awēnē ingāimi inte

inguipoga Awënë adobi inömi inte edæ mänömai cæbipa, ante adinque botö bitö imite waa ate pönëninque apænebopa. Mæmpo, bitö tömömi änö bai cædinque waa cæbi adinque botö Ao ämopa, ante apænebopa,” ante Wængongui ingante apænecäimpa.

²² Ayæ, “Botö Mæmpo incæ, Bitö Awënë inömi inte aacæbiimpa, ante tömäo inömo ongoncoo botö nempo pædæ pönöninque tömäo inömo quëwënäni tömänäni inänite adobai botö nempo pædæ pönongä æninque botö inömo edæ tömancoo ènempodinqe tömäo inömo quëwënäni inänite nê ènempobo imopa. Wængongui Wëmo inömete, Æbodö imoo, ante Mæmpoque èñengä ingampa. Botö wæætê tömëngä Wëmo inömo inte, Wængongui æcänö ingää, ante adoboque nê èñëmo imopa. Ayæ, Inäninque nê èñënäni incädänimpa, ante botö nê angainäni inänite odömote botö apænebo èñëninque tömënäni wæætê, Wængongui æcänö ingää, ante nê èñënäni badäni ate mönitö adomöni que äanque bai nê èñëmöni imönipa.”

²³ Ante apænedinque Itota dadi èmæninque tömëngä miñæ nê godäninque inänite apænedinque, “Nöwo mini adinö adinque nê èmömüni inte minitö mini watapæ quëwënguinque impa. ²⁴ Iimäi impa, ante apænebo èñëedäni. Wængongui beyæ nê apænëgainäni nangui inäni tönö imæca awënëidi nangui inäni incæ mini adinö bai ante äinente wægäinäni incæte edæ adämai ingadänimpa. Mini èñëninö ante adobai èñëinente wægäinäni incæte tömënäni èñënämai ingadänimpa,” ante mäninganca Itota apænecä èñëngadänimpa.

Tämadiabæ quëwëngä incæ nê waa cæcä ingampa, ante

²⁵ Ayæ ate adocanque idægoidi näni wææ angainö ante nê ate èñengä inömo, Itota æbänö wapiticæ apænebaingää, ante cædinque ængæ gantidinque tömëngä ingante iimäi angantapa.

—Awënë nê Odömömi èñëmi. Botö æbänö cæte cöwë wænämai wantæpiyæ quëwënguimoo, ante wæbopa.

²⁶ Äñongante Itota,

—Möitee wodi, Iimäi cædäni, ante wææ yewæmöninque æbänö ante yewæmongä ongö abii.

²⁷ Äñongante nê odömongä wæætê,

—Iimäi ante yewæmongacäimpa. Bitö mïmö entawëmi inte Wængongui mönö Awënë ingante waadedinque bitö önöwoca èwocadinque ædæmö waadete pönecæbiimpa. Bitö baö tæi piñante èñäbi inte godö waadete cædinque bitö ocäi encäbi inte nö pönëninque waa waadete pönëe. Ayæ adobai bitö nämä bitö waadete waa cædö bai adobai pönëninque godongämæ quëwënäni inänite adobai waa waadete cæe.

²⁸ Ante apænecä èñëninque Itota tömëngä ingante wæætê,

—Bitö nö èñëmi inte nöingä apænebitapa. Mäninö bitö äninö bai cæbi ininque bitö wænämai quëwëmaimipa.

²⁹ Angä èñëninque guñente wædinque nê odömongä inömo, Botö cæquënëno ante wii cæbopa, ante Itota èñënämai incæcäimpa, ante nämanque ante wææ äninque,

—Inæmpa wa. Godongämæ quëwënäni, ante bitö äninäni inömo ædänidö inänii.

³⁰ Äñongante Itota wæætê, Mönö guiidengä æcänö ingää, ante odömoncæte ante iimäi apænecäimpa.

—Onguĩñängä adocanque Eedotadëë quëwente Eedicoo wæidö cægõñongante nè ö äñäni tõmengä ingante iñontobä bæi ongonte weocoo gäni tadongadinque tæi tæi pänäni nangäë bacä iñinque wadæ godäni. ³¹ Ate, Wængonguĩ quĩ, ante nè godongä adocanque adodö wæidö godö godinque nè nangäë bate õñongä ingante gomö adinque ee wodo pænta æmæë wedeca gocampa. ³² Ayäë ate Debii wodi pæinäni näni Wængonguĩ oncönë cæcabo incæ adocanque adobaĩ adoyömö wæäë pöninque nè nangäë bate õñongä ingante gomö adinque ee wodo pænta gocampa. ³³ Ayäë ate wacä Tämadiabæ nè quëwëñongä incæ ado wæidö godinque nè nangäë õñongä weca adoyömö ponte gomö adinque, Tõmengä ædö cæte quëwëngüingä, ante tõmengä wædö ante bai nanguĩ pönente cæcantapa. ³⁴ Ìingä iñömö nè nangäë bate õñongä weca pöninque tæi tæi pänäni nänö æbäadiñömö oginguipæ tönö yowepæ tí nämæë biinömæë näni ämæë gao caadinque weococa wini caacampa. Ayäë, Tæ contate gocæcäimpa, ante adocä Tämadiabæ quëwengä iñömö nämä nänö nè mongænte goquëñengä bodo önõñabæ nè nangäë badingä ingante ængö cæcä tæ contayongante bodo ingante töö töö ænte gocampa. Ayäë taadö pönäni näni cænte guite möincö ganca ænte mäo guidinque nè nangäë badingä ingante waa cæcampa. ³⁵ Ìimö ate padata näni godonte æinta menta tadöñinque mänincönë nè aacä ingante pædæ godöñinque, Bitö nè nangäë badingä ingante waa cæe. Quiëmë æinengä adinque bitö godömi ængä ate botö bitö weca adodö pöninque bitö godön-impö adopo wæætë pædæ pönömo æncæbiimpa, ante gocampa. Mänömaĩ cæcampa. ³⁶ Äñinque Itota tõmengä ingante nè äningä ingante godömenque angantapa. Bitö ìmite nõwo ämo ëñëñinque bitö wæætë apænebi ëñëmoe. Nè nangäë bate õñongä weca pönäni mengäa go adocanque inäni incæte æcänö tõmengä tönö godongämæ quëwëñäni bai inte waa cæcantawoo, ante pönëmi.

³⁷ Äñongante nè odömongä wæætë,

—Tõmengä ingante nè waadete godö waa cædongä incæ tõmengä guidengä bai cæcampa.

Ante apæneçä ëñëñinque Itota wæætë,

—Tõmengä nänö cædö bai bitö adobaĩ godinque cæbæwe, angacäimpa.

Mäadota tõnö Mäadiya näna caya oncönë Itota ëñacampa

³⁸ Ayäë taadö goyönäni tõmëñäni quëwëñömö pongä adinque onquiyängä tõmengä ëmowo Mäadota iñömö Itota ingante angä tõmengä oncönë pö guite ëñacantapa. ³⁹ Mäadota tõniñacä Mäadiya iñömö Itota önöwaca inö tæ contadinque tõmengä apæneçä ëñëë congantapa. ⁴⁰ Mäadota guiquëñë nè ëñadäni beyä ante nanguĩ cæte wæadinque Itota weca pöninque,

—Awëñë, botö tõniñacä ëmö cæte gocä ate botö adoboque nanguĩ cæbo ate wædämaĩ ìmitawo. Edæ ämi pö cæcæe.

⁴¹ Äñongante Itota,

—Mäadota, Mäadota, bitö wa wa wa cæcæte ante wæwëmi awædö. ⁴² Wæætë adoque pönĩ cædinque edæ eyepæ impa. Mäadiya do, Quinö waa cæquimoo, ante apænte pönëningä inte botö önöwaca inö pö tæ contate ëñëë congä adinque botö wæætë tõmengä ingante, Goe, änämaĩ incæboimpa, angacäimpa.

Wængonguī ingante æbānō apænequīī, ante Itota apænecā

(Māateo 6.9-15, 7.7-11)

11 Itota ayæ ate wayōmō gote Wængonguī ingante apænecantapa. Īnque apænecā adinque tōmengā nānō nē ěmīñængā adocanque tōmengā ingante apænedinque,

—Awënë ěñēmi, Wāō tōmengā nānō ěmīñænāni ĩnānite odōmonte, Wængonguī ingante æbānō ante apænequīī, ante nānō apænedō bai bitō mōnitō ĩmōnite adobai ante odōmonte apænebi ěñenguīmōnii.

² Ante wæyōnāni Itota,

—Wængonguī ingante apænecæte ante ĩmaī ante apæneedāni, “Mōnitō Mæmpo nē ōōnædē quēwēnōmi inte ěñēmi.

Mōnitō bitō ěmōwo tæiyæ wæmō ěmōmi adinque bitō ěmōwo ante waa adinque apænemōnipa.

Bitō ōōnædē Awënë nē ingāimi inte inguipoga Awënë Odeyebi bitō baquinque edæ quingæ pōe. Ōōnædē owodāni ěñente cædāni bai inguipoga adobai bitō ānō bai ěñente cæcæimpa.

³ Mōnitō ĩmōnite bitō, Cænguī, ante ĩimō ĩñō ĩimō ĩñō eyepæ pōnōmi ænte cæmōnie.

⁴ Mōnitō wænæ wænæ cæmōni incæte bitō nē panguēnēmi incæ pōnō ñimpo cæbi quēwēmōnie. Mōnitō adobai edæ wadāni mōnitō ĩmōnite wænæ wænæ cædāni adinque ñimpo cæmōni quēwēnāni ae.

Mōnitō wænæ wænæ mōni cæinēnō godō gocæte ante cæmōni adinque bitō wææ cæbi ate māninō godō godāmai inte mōnitō wæætē wænæ wænæ cædāmai incæmōnimpa, Wæætē edæ nē wīwa ěwocadongā nempo ongōñōmōnite bitō gā pe æmpobi quēwēmōnie.”

Mānōmainō ante apænete Wængonguī ingante apæneedāni, Itota angantapa.

⁵ Ānque tōmēnāni ĩnānite godōmenque apænedinque Itota,

—Bitō ĩmaī cæbi ĩnque bitō æmigo æbānō cæbaingāā, ante pōneedāni. Ayaōnænēña incæ bitō æmigo weca godinque bitō, “Botō æmigo ěñēmi. Pāōmo bodogaa tānoque pōnōmi ænīmo inte ayæ ate botō adopo pōnōmo æncæbiimpa.

⁶ Edæ wacā botō æmigo incæ wayōmō gocæte ante botō weca pongampa cæbii. Botō, Quīnō impa diyæ godōmo cænguingāā, ante wædīmo inte bitō ĩmite āmopa.”

⁷ Āñōmi tōmengā guicōnē ōñōninque, “Botō odemō ædæmō tee mōnedinque botō wēñænāni tōnō mōimoga ōñōmo inte diyæ ædō cæte ængæ gantite godōmo ænguīmii. Ee ae.”⁸ Ānque bitō æmigo incæ bitō āmi beyænque ængæ gantite pōnōnāmai ingampa. Incæte wæætē wæætē āñōmi tōmengā, Ancaā ěñente awædō, ānque ængæ gantidinque bitō ĩmite do pōnongā æmaimipa.

⁹ Ante apænedinque botō ĩñōmō mīnitō ĩmīnite ĩmaī āmopa. Pōnōmi æmoe, ante nē angā bai cædinque mīnitō mīni ænguinō ante Wængonguī ingante apæneedāni. Æyōmōnō ĩi, ante nē diqui diqui mingā bai cædinque mīnitō, Æbānō ĩi, ante ædæmō ěñencæte ante Wængonguī ingante wede pōnente apæneedāni. Odemō mōnitō beyæ wi ænecæimpa,

ante aa pecā bai cædinque mīnitō, Æbānō cæquīmoo, ante ěñencæte ante Wængonguī ingante nangūi apæneedāni.

¹⁰ Edæ, Pōnōmi æmoe, ante nē ānāni ĩñōmō edæ do ænānipa. Nē diqui diqui mīnāni ĩñōmō do adānipa. Ayæ odemō ponte nē aa pedāni tōmēnāni nāni guiquinque edæ do wi ænete bai bacæimpa.

¹¹ Ante apænedinque Itota godōmenque apænecantapa.

—Wēñæ mæmpobi ïmi, ēñēmi. Bitō wēñængä päö ante angä ēñēninque bitō dicæ dicamō incæ godōmi ængäa. Gæyæ ante angä ēñēninque bitō täntæbo incæ dicæ godōmi ængäa. ¹² Enquēmo angä ēñēninque bitō emēñe incæ dicæ godōmi ængäa. ¹³ Ìninqe mīnitō nē wīwa cædōmīni incæ, Wēñængä beyæ quīnō waa ï, ante ēñēmīni inte do godōmīni ængampa. Mōnō Mæmpo ïñōmō waa pōnī cædongä ïñongante änāni ēñēninque tōmengä nē änāni ïnānite tōmengä Tæiyæ Wæmō Ònōwoca ingante da pōnongä æncædānimpa, ante Itota apænecäimpa.

Wēnæ tōnō cæcä ïmaingampa, ante wapiticæ änānipa

(Mäateo 12.22-30; Mäadoco 3.20-27)

¹⁴ Ayæ wēnæ nē babetadecä ïñōmō waocä baö do guite ongōñongante Itota tæcæ wido cæcantapa. Wēnæ tao gocä ate onguñængä tededämaï ïningä incæ do tedecä ate wædinque godongämæ ongōnāni wæætē guññente wædinque waa agadānimpa. ¹⁵ Pancadāniya guiquēñē, “Ìñæmpa wēnæ awēñē Beedeboo tōnō godongämæ cædinque Itota wēnæidi ïnānite wido cæcä ïmaingampa tōö,” ante tedewēñānitapa.

¹⁶ Wadāni guiquēñē, Æbänō cæmō ate Itota oda cæquingäa, ante cædinque tōmengä ingante, Bitō öönædē nāni cæi bai mä odōmōmi ate pōñemāimōnipa, änānitapa. ¹⁷ Mänōmaï babæ cæcæte ante änewēñānipa, ante Itota do ēñēningä inte ïmaï angantapa. “Awēñē odeye nempo quēwēñāni näēmæ wæætēdō wæætē cædāni ïninqe awēñē nänō ömædempote wæquinque tōmēñāni nāmä ewente cædānipa. Ayæ adocōñe owocabo incæ adoyōmō godongämæ quēwēñāni incæ näēmæ wæætēdō wæætē cædāni ïninqe tōmēñāni oncō woquinque näwæ gobāñānipa. ¹⁸ Mīnitō, Wēnæ awēñē Beedeboo tōnō cædinque Itota wēnæidi ïnānite wido cæbaingampa, ante änewēmīnipa tōö. Ìñæmpa awēñē Tatāna nempo quēwēñāni ïñōmō näēmæ wæætēdō wæætē pīñāni ïninqe adocabodāni ïnāmaï ïñōñānite tōmengä dicæ tōmēñāni ïnānite ēnempobaingäa. ¹⁹ Mīnitō, Beedeboo tōnō cædinque Itota wēnæidi ïnānite wido cæcampa, ante tedewēmīnipa. Mänīñō mīni änewēñō näwangä ï bai mīnitō mīñæ nē godāni guiquēñē æcänō tōnō cæte wido cædāni. Ìninqe mīnitō mīñæ nē godāni incæ mīni änewēñō beyænque ante näēmæ pīñinqe mīnitō ïmīnite wæætē apænte äninque pīncædānimpa anguēñē. ²⁰ Botō ïñōmō Wængonguï tōnō godongämæ cædinque wēnæidi ïnānite wido cæbo apa änewēmīni. Mänōmaï ï ïninqe botō Wængonguï Awēñē Odeye ïñōmo inte mīnitō weca do pōmo aedāni,” ante Itota apænecäimpa.

²¹ Ayæ, “Ìmaï impa. Nē tæi pīñængä ïñōmō tæēmoncoo wēñate mongæninqe, Wææ godō cæinca, ante tæēmonca näænte tōmengä oncō boyæ wææ godō wææ godō cæyongä tōmengä eadincōo ïñōmō edæ ee ongōmpa. Tatāna ïñōmō mänōmaï ingampa. ²² Incæte wacä godōmenque tæi emongä inte pōninque mäningä ingante edæ bæ tacampa. Ayæ tæēmonca, Wææ godō botō cæinca, ante mäningä nänō äñinca ñōwo pōningä ïñōmō gä pe æmpote ö æninque tōmengä nänō eadincōo adobai gä pe æmpote ö ænte mäo nēnempocampa. Botō ïñōmō nē tæi emōmo pōni ïñōmo inte edæ godōmenque tæi emongä nänō gänä cæbai cæbopa,” angantapa.

²³ Ayæ, “Botō tōnō æcänō wīi godongämæ cæcä ïñōmō tōmengä ïñōmō edæ botō ïmote Baa ante pīinte cæcä ingampa. Ayæ botō, Waodāni botō mīñæ poncædānimpa, ante cæyōmo waocä botō tōnō wīi cæcä ïñōmō tōmengä wæætē botō mīñæ poncæ cæyōñānite tatodongä wadæ godānipa,” ante Itota apænecantapa.

Wënæ waodë owote godingä inte adodö pompa, ante

(Mäateo 12.43-45)

²⁴ Ayä apäenedinque Itota iimaï ante apä necantapa. “Waocä baönë owote ate tao godinque wënæ wentamö nänö ewocadingä iñömö edæ, Quingänö baönë go guidinque edæ guëmante quëwenguimoo, ante diqui diqui minte ayongä önömæca to aminte i ate wædinque edæ, ‘Botö tao godincönë adodö go guiite quëwencæboimpa,’ ante pönëninque adodö pongampa. ²⁵ Ponte ayongä waocä önonganque bayongante wacä önöwoca tömengäa owodämaï ingä adinque wënæ wæætë, Æ waocä botö owodincö bai inongä inte nïwo wadæ nïmænte mäincoo cabo tē gæte bai ömæwocacä ingä abopa. ²⁶ Ate adinque tömengä wæætë godinque wënæidi godömenque wentamö ewocadäni tiæte ganca mänimpodäni inänite ænte pongampa. Tömënanï tömänäni waocä baönë godongämæ pö guiite owodäni ate waocä iñömö wënæ yewëninque godömenque wæwengampa,” ante Itota apänegacäimpa.

Æbänö cæte watapæ quëwenguï, ante

²⁷ Itota tæcæ apäneyongante onquiyængä iñömö godongämæ ongönäni tönö ongöninque ogæ tededinque,

—Bitö imite në mangainä inte edæ tömënä nänä toquinque impa. Bitö imi goömæ gänongainä inte edæ tömënä watapæ nänä quëwenguinque impa.

²⁸ Ante ogæ tedecä ëñëninque Itota wæætë,

—Iñæmpa Wængongui nänö änö ëñëninque në cædäni guiquënë tömënanï wæætë nänï watapæ quëwenguinque ëñente cædänipa, ante apänegacäimpa.

Öönädë nänï cæi bai cædinque mä cæbi amönie, änänipa

²⁹ Mäniñedë godömenque nanguï inäni pönäni adinque Itota, iimaï ante apä necantapa. “Minitö wïwa mïni cæcabo iminipa. Minitö edæ, Mä cæte odömömi adinque pönëmaimönipa, ante ancaa ämïni awädö. Näwangä ämo ëñëedäni. Cönäö wodi beyæ cædinque Wængongui bamönengæ nänö cægäinö ante minitö pönënamä iñöminite edæ mäninque mïni aquinque cæcæimpa änewëminii. ³⁰ Nïnebaidi pönencædänimpa, ante Cönäö wodi ingante Wængongui angä quëwengacäimpa. Nïwomïni pönencæminimpa, ante adobaï cædinque Wængongui botö Waobo ëña-gaïmo iñömote adobaï angä quëwëmo acæminimpa. ³¹ Doyedë iñömö betamonca gämænö ömæ awënë inongä inte onquiyængä incæ awënë Tadömöö wodi nanguï ëñente nänö apänedö ante ëñencæte ante doönæ quëwëninque pongacäimpa. Tadömöö wædænque ëñengä iñongante botö godömenque nanguï ëñëmo inte minitö weca ongönömote minitö iñæmpa wïi ëñëminipa töö. Iñinque mäningä onquiyængä incæ Wængongui në apænte angä weca pöninque mïni nïwo quëwencabo tönö godongämæ ongöninque, Mïni pante wæquinque ëñënamä ingaminimpa töö, ante apænte piinguingä ingampa. ³² Cönäö wodi Wængongui beyæ apä necä ëñëninque Nïnebaidi wënæ wënæ nänï cægäinö ante wæwente pönëninque nïmpo cægadänimpa. Cönäö wodi wædangä iñongante botö wæætë në nænæmo inte apänebo ëñëninque minitö iñömö ëñënamä iminipa. Iñinque Nïnebaidi incæ Wængongui në apænte angä weca pöninque mïni nïwo quëwencabo tönö godongämæ gongænte ongöninque, Mïni pante wæquinque ëñënamä ingaminipa töö, ante apænte piñänidö angüënë,” angantapa.

Mönö awinca gomö aquinemö bai emompa, ante

(Mäateo 5.15, 6.22-23)

³³ Ayä godömenque apäñecantapa. “Gongapæncade ti wodönodique waodäni dicæ awëmö iñömö wë wodönäniyaa. Owæta boo cæcadäniyaa. Wæætë, Mäniñömö nè pö guidäni acädänimpa, ante cædinque gongapæncade awæmpa æmongapaa cö cädäni ñäö bæco adänipa. ³⁴ Mönö baö tömäo beyä mönö awinca tica ënente bai emömompa. Mönö nõ pönëninque amö inique mönö ñäö tica ënente cægonte bai waa cæte quëwëmompa. Wæætë wiwa pönente amö inique mönö wëmö iñömö cægonte bai inte wiwa cæte quëwëmompa. ³⁵ Mänömaï beyä bitö, Wëmö ëwocadämaï incæboimpa, ante bitö önöwoca cöwä adinque nämä wææ cæe. ³⁶ Inique bitö baö tömäo ñäö entawëninque bitö önöwoca adobaï ñäö ëwocabi inique quïomenque incæ wëmö entawënämaï imaimipa. Gongapæncade ñäö bæco edonque abi bai edæ ñäö ædämö entawëninque edonque adinque waa quëwëmaimipa,” ante Itota apäñegacäimpa.

Paditeoidi tönö nè wææ odömönäni inänite Itota püingä

(Mäateo 23.1-36; Mäadoco 12.38-40; Odoca 20.45-47)

³⁷ Inique apäñecä ate adocanque Paditeocä tömengä ingante, Pö cæe, angä ëñente pö guite cæncæte ante ongongä. ³⁸ Adinque Paditeocä iñömö, Itota quinante mempodämaï inte cængä, ante guiñente wæcä. ³⁹ Inique mönö Awënë tömengä ingante,

—Minitö Paditeoidi iñömö edæ owæta tönö podato cæncadë inö wentamö ënen-coo ee adinque yabæque mënongate bai cæmini iminipææ. Mäincooque æinente mini wædö beyä ayä wiwa mini cædö beyä edæ mimöno wentamö entawëmini iminipa. ⁴⁰ Mini ëñëegadë. Në badongä iñömö yabæque badöninque cæncadë inö badönämaï ingantawogaa. Inæmpa mönö baö nè badongaingä iñömö adocä mönö önöwoca badongacäi apa quëwëminii. ⁴¹ Inique minitö wæætë wadäni inänite ædämö waadedinque minitö mäincoo pædæ godö pædæ godö cæmini inique tömancoo edæ ñä mënongate bai ba adinque minitö wæætë edæ ñäö bai entawencæminimpa.

⁴² Paditeoidi mini wæquinque iïmaï cæminipa. Mäincoo diete ganca mänimpocoo ænte cö cædinque, Adocooque Wængonguï quï impa, ante mönö godongæimpa, ante cæminipa. Minitö mänömaï cædinque edæ öñabo mini minte pæyabo, Oguï waa cænguï, ante mini tä pete æñabo incæ edæ, Wængonguï quï impa, ante pancayaboga godöminipa. Mäninganca cædinque minitö waa cæmini incæte wadäni inänite nõ cædämaï imini inte Wængonguï ingante waadete pönënämaï iminipa töö. Inæmpa mäninö öñabo godonguënëmini inte minitö godömenque waadete pönëninque nõ cæquënëmini iminipa.

⁴³ Ayä Paditeoidi mini wæquinque impa. Minitö odömöincönë go guidique nämanque ante pönëninque wæmompaa pönï tæ contate tomïni awædö. Ayä waodäni näni godonte æimancadë godinque minitö nämanque pönëninque, Wadäni, Waa quëwëdäni, ante apäñedinque mönitö imönite waa acädänimpa, ante mini wæquinque edæ änewëminipa töö.

⁴⁴ Ayæ waocä wodigo ñömæi ongö bai minitö iñömö mini wæquinque edæ wentamö entawëminipa. Mänömaï entawëminipa, ante ëñënamäi inte wadäni edæ mini äno ante ëñente cædinque edæ oda cædänipa, ante Itota piingantapa.

⁴⁵ Ìniquè adocanque idægoidi nani wææ angainö ante në ate ëñengä iñömö Itota ingante apænedinque,

—Awënë, mänömaï äninque bitö mönitö imönite adobaï piinte änewëmi awædo.

⁴⁶ Äñongante,

—Minitö dodäni nani wææ angainö ante në adimini inte edæ mini adobaï wæquinque impa. Edæ, Cædämaï cædämaï, ante ancaa wææ äninque minitö iñömö edæ mäincoo teémencoo mö paate wadäni önönancapæ cö cædancapænäni bai cæminipa töö. Ayæ wæætë önompogonca adopogoncaque incæ gä äñancapænämaï cæte bai cædinque minitö mini wæquinque edæ, Æbänö cæte waa quëwenguüi, ante odömonte apænedämaï iminipa töö, ante Itota apæncantapa.

⁴⁷ Ayæ godömenque apænedinque, “Wængongui beyæ në apænegainäni inänite minitö mämmæidi incæ në wænönäni ingadänimpa. Minitö iñömö, Në wæñongainäni nänömoidi imönipa, ante bai cædinque, Wængongui beyæ në apænegainänido, ante mäñonominipa töö. Mini wæquinque edæ mänömaï cæminipa. ⁴⁸ Ìniquè, Mönitö mämmæidi wæñongadänimpa, ante ëñënimöni inte tömënäni wodigo ante mäñonomönipa, äninque minitö mämmæidi nani cægainö ante Ao äninque cæminipa töö,” ante Itota piingantapa.

⁴⁹ Ayæ iïmaï ante apæncantapa. “Mänömaï beyæ Wængongui mönö në ëñengaingä inongä incæ iïmaï ante apænegacäimpa. ‘Botö beyæ në apænedäni tönö botö në da godönäni inänite botö, Idægoidi weca gote apæneedäni, ämo gocædänimpa. Ämo gote pönäni adinque idægoidi wæætë pancadäniya inänite wænönäni wæncædänimpa. Ayæ pancadäniya inänite togænte pänäni wæcædänimpa,’ ante Wængongui do apænegacäimpa. ⁵⁰ Ìniquè ñowo quëwëmini iñöminite, Quinante wænöminii, ante Wængongui edæ minitö iminite ancæcäimpa. Wængongui beyæ në apænegainäni inänite tömengä nänö badongaiñedë dodäni mä pönï wænönäni beyæ ayæ iïncayæ ate ñowo ganca wænönäni beyæ iniquè edæ në wænäni tömänäni wepæ nani näagainö ante, Ñowo quëwëmini mäninäni tömänäni wepæ näate bai iminipa. ⁵¹ Edæ tömänäni nani wæñongainö ante edæ ñowomini mini pante wæquinque impa. Edæ mä pönï wænöninque docä Abedo wodi ingante adocanque wæñongä wængacäimpa. Ìncayæ ate Wængongui oncö ñænæncö boyæ nani iya täimpaa gäänë ongönongante Tacadiya wodi ingante wænönäni nänö wænganca wadäni nangui inäni inänite wænönäni wængadänimpa. Incæte Wængongui, Minitö mämmæidi nänömoidi ingaimini inte tömënäni nani wæñongai beyænque wepæ näate bai wentamö entawëñöminite botö wæætë ñowomini iminite pämo wæcæminimpa, ante Wængongui angampa,” ante Itota apænegacäimpa.

⁵² Ayæ apænedinque, “Dodäni nani wææ angainö ante në adimini iñömö minitö në ëñenguënëmini inte edæ mini wæquinque nö pönente ëñënamäi iminipa. Ayæ wadäni, Nö pönente ëñengäimpa, ante odemö guite bai tæcæ cædäni adinque minitö odemö tee mönete yabæ wido cæte bai cædinque tömënäni inänite edæ wææ cæminipa töö,” ante Itota apænegacäimpa.

⁵³ Ìniquè apænete tao goyongä në odömönäni tönö Paditeoidi tömengä ingante nangui piinte badinque, Ämöni ëñëninque apænebi ëñëmönii, apænebi ëñëmönii,

ante ancaa änänitapa. ⁵⁴ Ayä, Tömengä wabänö oda cæte tedecä ïninque mönö wæætë pämö wæbaingampa, ante wææ wänonte bai cægadänimpa.

Wadö tedete wadö näni cædönö ante

12 Mäniñedë nangui ïnani æpodö müdo ganca ïnani adoyömö pö bee të bee të cædinque goto gongæñönäni Itota tömengä miñä në godäni ïnänite täno apænedinque, “Paditeoidi ïñömö wadö tedete wadö cæyönäni minitö wæætë wadö näni cædö ante, Päö yedæ æmpoquï bai wodö wodö cæpa, ante gomö adinque tömönäni näni cæinö bai cædämaï iedäni. ² Adämaï incædänimpa, ante quiëmë wë wodonte i incæ iïncayä ate tömää wi ænete bayonte edonque pönï bacäïmpa. Ayä quiëmë awëmö cæte i incæ iïncayä ate edonque pönï acædänimpa. ³ Wëmö ïñömö mïni tededö incæ edæ näö ïñömö edonque pönï ëñengäïmpa. Ayä guicönë minitö wæntæ apænedö incæ iïncayä ate oncömanca ïnö æi edæ ogä tedete edonque ëñengäïmpa,” ante Itota apænecantapa.

Æcänö ingante guïñente wæquïi, ante

(Mäateo 10.26-31)

⁴ Ayä, “Botö æmigoidi ämo ëñeedäni. Waocä baonque wænönäni ate tömengä ingante ædö cæte godömenque cæquïnäni. ïninque minitö ïñömö, Baonque wænönäni wæncæ wæ, äninque edæ guïñenämaï iedäni. ⁵ Wæætë edæ, Æcänö ingante guïñente wæquënëmïni imïni, ante botö odömonte apænebo ëñeedäni. Waomïni imïnite wænonte ate në angä ïnogä inte tadömengadænguipo në wido cæcä ingante ïñömö minitö tömengä ingante edæ guïñeedäni. Ao. Mäningä ingante guïñente wæedäni,” ante Itota apænecantapa.

⁶ Ayä, “Wadäni ayamöidi önompo æmæmpoque mänimpodäni beyä tiguitamö mentamonga ante pædæ godonte ænäni amïnitawo. Incæte ayamö adocanque ingante edæ Wængonguï cöwë wææ aacampa. ⁷ Edæ, Ayamöidi bacoo pönï ïnani incæte önönänique ïnänipa, ante në äningä inte mönö Mæmpo ïñömö minitö imïnite wæætë godömenque waa acampa. ïnæmpa mönö ocaguï incæ æpoguïnö encamöö, ante Wængonguï ïñömö edæ do ëñente aacä apa guïñëwëmïni,” ante Itota angantapa.

Wadäni ëñëñönäni mönö Itota ingante Ao angäïmpa, ante

(Mäateo 10.32-33, 12.32; Mäadoco 10.19-20)

⁸ Ayä apænedinque, “Näwangä ämopa, angantapa. Æcänö wadäni ëñëñönäni botö imote Ao äninque, Bitö botö Awënë ïnömi imipa, ante äna botö Waobo në ëñagäimo inte tömengä ingante wæætë Ao äninque, Bitö ïñömö botö miñä në gogaimi ïnömi imipa, ante Wængonguï anquedoidi ëñëñönäni ancæboïmpa. ⁹ Wæætë edæ wadäni ëñëñönäni botö imote në Baa angaingä ingante botö wæætë Wængonguï anquedoidi ëñëñönäni tömengä ingante edæ Baa ancæboïmpa,” angantapa.

¹⁰ Äninque, “Botö Waobo ëñagäimö ïñömote waocä babæ ante wiwa angä incæte Wængonguï wæætë edæ pönö ñimpo cæcä quëwencæcäïmpa. Wæætë Wængonguï Tæiyä Waëmö Önöwoca ingante godö babæ ante në änewengä ingante Wængonguï wæætë edæ ñimpo cædämaï inte cöwë pancæcäïmpa,” ante Itota apænecantapa.

¹¹ Ayä, “Minitö imïnite bæi ongonde tömönäni odömöincönë ænte godinque gö cædäni incæte minitö mäniñedë, Æbänö ante apænequïmoo, ante wædämaï iedäni.

Awënëidi weca incæ nē ānāni weca incæ mīnitō īmīnite ænte māo goncædāni incæte mīnitō māniñedē, Pīināni ēñente wædinque æbānō ante nāmā wææ anguimoo, ante ayæ, Æbānō ante apænequimoo, ante guiñente wædāmaī iedāni. ¹² Īnæmpa Wængonguī Tæiyæ Waēmō Ōnōwoca māniñedē incæ, Æbānō wææ anguīī, ante odōmonte angā ēñēninque mīnitō wæætē māniñō ante wææ ancæmīnīmpa,” ante Itota apænægacāīmpa.

Māincoo nāni æinēmāmo ante

¹³ Tæcæ apæneyongā godongāmæ ongōnāni ongōninque adocanque Itota ingante, —Awënë, botō wæmpo wodi mangaincoo incæ mæmpo wodi ōmæ ingaimæ incæ botō mēmō ingante tæcæguedē āmi pā cæcā æmōe.

¹⁴ Āñongante Itota,

—Botō nē apænte āmo īmopa diyæ āmo pā cæquingāā.

¹⁵ Āninque godongāmæ ongōnāni inānite apænedinque,

—Wīī māincoo nanguī ænte beyænque mōnō quēwengæīmpa cæmīnīī. Mini māincoo æinēmāmo ante edæ nīmpo cædinque ee aedāni.

¹⁶ Āninque Itota, Wængonguī Awënë æbānō cæquingāā, ante ēñencædānīmpa, ante īmæca quēwēnāni nāni cæinō ante odōmōninque īīmaī apænecantapa.

—Adocanque nē nanguī ēacā inte tōmengā ōmæ wainguipoga nanguī pōni pæ. ¹⁷ Adinque tōmengā īñōmō, “Æbānō cæquimoo. Botō cænguī da wenguincō nāñancō īmpa diyæ da wente manguimoo.” ¹⁸ Āninque, “Īīmaī cæcæboīmpa. Guīyancō oncō bæ tate nāñancō wæætē mænoncæboīmpa. Mænōninque tōmēmoncoo tōnō māincoo wæætē mānincōnē tōmancoo da wencæboīmpa. ¹⁹ Ayæ nāmanque apænedinque botō, Botō cænguī tōnō māincoo nanguī wædepo ba beyæ eyepæ mānīmo inte botō guēmancæboīmpa. Ōnonque cænguī nanguī cænte nanguī bete tocæboīmpa,” ²⁰ Ante nāmanque pōnēñongā wæætē nē māningā ingante Wængonguī, “Ēñēnāmaī cæbīpa tōō. Nōwo woyowotæ incæ edæ, Idæwaa quēwēmīpa, āmo wæncæbīīmpa. Wæmi adinque edæ bitō māincoo īnī edæ æcānō māincoo baquīī,” ante Wængonguī angampa, ante Itota, Māninque ante apænēbopa, angacāīmpa. ²¹ Ayæ tōmēnāni inānite wæætē, “Wængonguī mānōmaī angā ēñente wædinque mīnitō wæætē īīmaī ante pōnencæmīnīmpa. Æcānō, Tōmēmoque quī, ante da da wente māna īñōmō tōmengā Wængonguī ayongā nē ōmæpocā baī inte ōmæwocā ingampa. Nē ēacā wodi nānō wænō baī tōmengā adobaī bate wæquīnō anguēnē,” ante Itota apænægacāīmpa.

Tōmengā wēñānāni inānite Wængonguī aacampa, ante

(Māteō 6.25-34)

²² Itota māniñedē tōmengā mīñæ nē godāni inānite, “Īninque botō mīnitō īmīnite āmopa. Inguipoga mīni quēwenguīmāmo ante wædāmaī iedāni. Quīmōnō īmpa cænguimoo, ante, Quīncōdō īmpa wēñaquimoo, ante wædāmaī iedāni. ²³ Cænguīnque cæninque dicæ quēwēmongaa. Weocooque wēñadinque dicæ quēwēmongaa. Mōnō quēwenguīmāmo īñōmō godōmenque īmpa. ²⁴ Gapatāi īñōmō cænguī ante dicæ mīnte pæ ate tā pete mānāniyaa. Incæte Wængonguī eyepæ godongā cænāni aedāni. Mīnitō guīquēnē ōōmā ēadāni baī ināmaī īñōmīnite Wængonguī mīnitō īmīnite godōmenque waa adinque eyepæ pōnongā cæmīnīpa. ²⁵ Wængonguī nānō anganca quēwēninque mīnitō nanguī cædinque wantæ īñō incæ ædō cæte godōmenque

quëwenguimīni. ²⁶Mānīnō wædænque cæquī incæte wīi eyepæ cæmīni īnīnque mīnitō, Botō quëwenguīnō ante wadō wadō cæcæboīmpa, ante quīnante wæmīniī,” ante Itota angantapa.

²⁷Ayæ, “Ongai guiquënë weocoo ante daque daque dadāmaī inte wodonte tīnāmaī īñōnānite Wængonguī weocoo wæmoncoo baī godongā waa pōnī ënopa. Awënë Tadōmōō wodi wæmoncoo ëgaingā incæ wīi ongai baī ëñagacāīmpa. Ongai īñōmō godōmenque wæmō pōnī ënopa. ²⁸Gaguīmæ īñōmō īimō ate edæ gongapamō nē tanguīnque ñōwoōnæ pæ incæte Wængonguī wæmō pōnongā ënopa. Īnīnque, Wæmō ënodō nē pōnongā inte mōnō imonte godōmenque eyepæ pōnī pōnongā æte ëñacæīmpa, ante pōnēmīniyaa. ²⁹Mīnitō cænguī ante bequī ante æinente wædāmaī iedāni. Edæ, Æbānō cæte ænguīmōō, ante wædāmaī iedāni. ³⁰Inguīpoga wayōmō nāni ëñēnāmaī incabo wayōmō nāni ëñēnāmaī incabo mānīnō ante wæyōnāni mīnitō guiquënë, Mōnō ænguënēnō ante mōnō Mæmpo īñōmō edæ do ëñengampa, ante pōnēnīnque guīñente wædāmaī iedāni. ³¹Wæætē Awënë Odeye nempo quëwencæte ante nangūi cæyōmīnite tōmengā wæætē mīnitō ænguënēnō ante do edæ eyepæ pōnī pōnongā æncæmīnīmpa,” ante Itota apænecantapa.

Mōnō ëaquincoo oōnædē do ëamompa, ante

(Māateo 6.19-21)

³²Godōmenque apænedīnque Itota, “Botō nē aabo īñōmote mīnitō botō mīñæ mīni gocabo īñōmō wædænque pōnī īmīni incæte edæ guīñente wædāmaī iedāni. Īñæmpa mīnitō Mæmpo īñōmō, Awënë Odeye nempo quëwencæmīnīmpa, ante pōnō cædīnque waa tocampa cæmīniī. ³³Mīnitō īñōmō, Ō ænāni dæ āñōmō cayæ cænāmaī īñōmō botō māincoo wodāmaī inguincoo inte edæ cōwē mæ ongongæīmpa, ante cædīnque oōnædē īñōmō wo ææntodonte baī cæedāni. Wodāmāincadedē da wente baī cædīnque mīnitō māincoo godonte ænīnque ōmæpodāni wæwēnāni īnānite wæætē godōmīni æncædānīmpa. ³⁴Mīni waocabo īñōmō mīnitō māincoo ongōñōmō māniñōmō quëwencæte ante wæmīni īmīnīpa, ante adīnque botō, Ōōnædē īñōmō wo ææntodonte baī cæte mæedāni, antabopa,” ante Itota apænecantapa.

Tōmāā eyepæ cædīnque wānō cōedāni, ante

³⁵Ayæ apænedīnque, “Waodāni, Awënë beyæ ante cæcæīmpa, ante weocoo eyepæ wēñadīnque, Gongapæncade wæmō bæcocæīmpa, ante eyepæ pōnī cædāni bai mīnitō adobāi eyepæ pōnī cædīnque, Awënë poncæcāīmpa, ante wānō cōedāni. ³⁶Edæ waodāni tōmēnāni awënë wayōmō gote ææmæ bete ocæ ëmante ponte aa pecā ëñēnīnque quingæ wi ænecæte ante wānō cōnāni baī cædīnque mīnitō adobāi, Awënë poncæcāīmpa, ante wānō cōedāni. ³⁷Edæ awënë ponte ayongā tōmengā ingante nē cædāni wānō cōnāni adīnque tōmengā wæætē edæ pōnō waa cæcā ænīnque tōmēnāni īñōmō tocædānīmpa. Mīnitō īmīnīte nāwangā ämopa. Nē wānō cōnīnāni īnānite awënë pōnō angā ate tæ contadāni ate tōmengā nē awënë īnongā incæ, Nanguī cæcæīmpa, ante weocoo wēñadīnque tōmēnāni weca pōnīnque edæ pōnō cæcā æncædānīmpa. ³⁸Edæ woyowotæ tæcæ bæcā incæ ayatadāa wæicā incæ pōnīnque tōmengā nē wānō cōnīnāni īnānite waa adīnque pōnō waa cæcā adīnque tōmēnāni īñōmō watapæ edæ tocædānīmpa. ³⁹Wæætē oncō nē ëacā guiquënë, Nē awēmō æncæ cædongā æyedēnō ponguingāā, ante ëñēnīnque do wææ cæcā baī nē awēmō æncæ cædongā wæætē edæ pō guīite ænāmaī incædongāīmpa, ante apænebo

ēñente pönēedāni. ⁴⁰ Mīnitō adobaī, Waocā nē ēñagaingā æyedēnō ponguingāā, ante ēñēnāmaī imīni inte edā tōmānō eyepā cædinque edā wānō cōedāni,” ante Itota angacāimpa.

Awēnē ingante nē cæda, ante

(Māateo 24.45-51)

⁴¹ Mānōmaī angā ēñēninque Pegodo,

—Mānīnō odōmonte bitō apānedō ante mōnitō adomōnique ēñencāmōn-
impa, ante apānebitawo. Wæætē edā, Wadāni tōmānāni ēñencādānimpa, ante
apānebitawo.

⁴² Āñongante mōnō Awēnē wæætē odōmoncæte ante apānedinque, “Inguipoga
awēnē iñōmō, Æcānō nē ēñengā iñongā inte botō quincōo ante ædāmō aacā ingu-
ingāā, āninque, Mānōmaī inte cæcā ingante adinque botō āmo ate tōmengā nē angā
badinque botō oncōnē nē cædāni inānite ædāmō aadinque cænguī eyepā iñonte
godongā cæncādānimpa, angampa. ⁴³ Īninque awēnē wayōmō gote ponte ayongā,
Nē cæcā botō ānō ante ēñente cæcampa, ante adinque awēnē wæætē tōmengā in-
gante godō waa cæcā ate nē waa cæcā iñōmō edā waa tocæcāimpa. ⁴⁴ Mīnitō imīnite
nāwangā ante apānebopa. Nē ēñente cædingā ingante awēnē, Bitō botō māincoo tō-
mancoo edā nē aabi bacæbiimpa, ancæcāimpa.”

⁴⁵ “Incæte nē cæcā wæætē, Botō awēnē æiquedō ponguingāā, ante pōnēninque
tōmengā tōnō awēnē ingante nāni godongāmæ cæcabo onguīñænāni incæ on-
quiyænāni incæ tōmēnāni inānite tæi tæi pāninque cænguī nanguī cæninque tī
nāmæ nanguī bete quidi quidi dowænte bacā. ⁴⁶ Īninque tōmengā, Æōnædō pongu-
ingāā, ante wædāmaī iñongante, Æyedēnō ponguingāā, ante ēñēnāmaī iñongante
edā awēnē iñontobæ pongā wæbaingampa. Ponte adinque awēnē wæætē māningā
nē ēñēnāmaī cædingā ingante wido wido todinque nē pōnēnāmaī ināni weca māo
wido cæbaingampa,” ante Itota apānecantapa.

⁴⁷ Ayæ, “Awēnē ingante nē cæcā incæ awēnē nānō ānō ante ōnōmoncaque ēñēn-
inque wū eyepā cædinque ēñēnāmaī cæcā iñinque awēnē iñōmō tōmengā ingante
nanguī tæi tæi pancæcāimpa. ⁴⁸ Ayæ wæætē edā, Awēnē æbānō angāā, ante ēñēnā-
maī inte ēmoncacā quiquēnē tōmengā nānō panguinque wēnæ wēnæ cæcā incæte
tōmengā ingante wædænque tæi tæi pancæcāimpa, ante Itota apānegacāimpa. Edā
awēnē æcānō nempo nanguī pōnongā ænte næægā iñōmō tōmengā ingante Awēnē
wæætē, Bitō adodō nanguī pōnōmi æmoe, ancæcāimpa. Ayæ, Botō māincoo nan-
guī ongoncoo iñonte bitō aacæbiimpa, ante æcānō ingante awēnē angāā tōmengā
ingante, Bitō godōmenque nanguī cæcæbiimpa, ante awēnē ancæcāimpa,” ante
odōmōninque Itota apānegacāimpa.

Nāwæ gocādānimpa, ante cæcæte ante pōmopa, angampa

(Māateo 10.34-36)

⁴⁹ Āninque Itota godōmenque apānedinque, “Botō inguipoga gonga baī tānon-
cæte ante pongaīmo inte edā, Do tānonte baī edā waa tocædōmoimpa. ⁵⁰ Ayæ
botō nantate wæwencæte ante pongaīmo inte botō nantate wæganca nantate botō
wæquēnēnō ante iñinque cæcæte ante wæbopa. ⁵¹ Mīnitō, Inguipoga quēwēnāni
piyænē cæte wæætedō wæætē cædāmaī inte quēwencādānimpa, ante cæcæte ante
Itota pongaingā ingampa, ante pōnēmīnitawo. Īñæmpa wadō āmo ēñēedāni. Botō in-

guipoga pōmo beyænque wæatedō wæatē piincædānimpa. ⁵² Īncayæ ate ōnompō æmæmpoque nāni owocabo mānimpodāni iñōnānite mengāa go adocanque iñāni iñōmō botō beyænque mēnaa inate nāēmæ piinte bacædānimpa. Ayæ wæatē mēnaa ina incæ mengāa go adocanque iñāni iñānite wæatē nāēmæ piinte bacædaimpa. ⁵³ Botō ěmōwo beyæ mæmpocā tōmengā wengā onguiñængā ingante nāēmæ piinte bacæcāimpa. Wēñængā wæatē mæmpocā ingante nāēmæ piinte bacæcāimpa. Wānā tōmēnā wengā onquiyængā ingante wæatē nāēmæ piinte bacædāimpa. Wæatē wānā ingante wēñængā incæ nāēmæ piinte bacæcāimpa. Biyongā ingante nānō wæntedā incæ nāēmæ piinte bacædāimpa. Nānō wæntedā inante biyongā ingante nāēmæ wæatē piinte bacæcāimpa,” ante Itota tōmengā miñæ nē godāni iñānite apænegacāimpa.

Æbānō oo baquimpa, ante ěñengāimpa, ante

(Māateo 16.1-4, 8.11-13)

⁵⁴ Ayæ godongāmæ ongōnāni iñānite apænedinque, “Nænque guidō gāmænō boguimā wentamō pō adinque mīnitō, Cōönæ wentamō wocæmpa, āñōmīni edæ do cæpa. ⁵⁵ Ayæ wæatē woboyæ betamonca inō pæmæ pō adinque, Ocoi nāwancæ cæpa, ante tedeyōmīni dobæ ocoi nāwampa. ⁵⁶ Inguipoga gomō adinque ōönædē æmō adinque mīnitō, Æbānō cæcæte ante ěmōō, ante edæ do ěñēmīnīpa. Wæatē, Inguipoga wayōmō wayōmō æbānō cædānīi, ante adinque mīnitō, Wængonguī oo pōnī cæquingānō anguēnē, ante quīnante wīi ěñēmīnīi. Edæ wadō tedete wadō cæmīni iñinīpa tōō,” ante Itota tōmēnāni iñānite piingacāimpa.

Nē piingā ingante waadete apænegacāimpa, ante

(Māateo 5.25-26)

⁵⁷ Ayæ edæ, “Æbānō cæte nō cæquīi, ante mīnitō tōmēmīnique apænte ante cæquēnēmīni iñinīpa. ⁵⁸ Nē piinte angā iñōmō bitō imite edæ, Wīwa cæbīpa, ante awēnē weca ænte māocā idōmæ godinque bitō guiquēnē tōmengā ingante waadete apænebi ěñēninque tōmengā wæatē piyænē cædinque ee abaingampa. Wæatē edæ wīi waadete apænebi iñinque tōmengā nē apænte angā weca godōmenque ænte gobaingampa. Nē apænte angā wæatē bitō imite wææ wānongā ingante pædæ godongā æninque wææ wānongā wæatē tee mōnebaingampa. ⁵⁹ Tee mōnecā iñinque bitō quīēmē beyæ debe imi iñinque edæ tōmanta pōnī di godonte ate tabāimīpa, ante āmo ěñēmāimīpa,” ante Itota apænegacāimpa.

Ocæ ěmænte Wængonguī gāmænō ponguēnēmīni iñinīpa

13 Māniñedē wadāni Itota weca pōninque iimāi ante apænedāni ěñengan-tapa. Gadideabæ quēwēnāni, Wængonguī quī, ante cæningā ingante tæcæ wænōñōnānite Pidato guiquēnē tōmēnāni iñānite iñontobæ wænōninque tōmēnāni wepæ cæningā wepæ tōnō dibæ cæcantapa. ² Ante tedeyōnāni Itota wæatē, “Gadideabæ quēwēnāni wadāni pōnōmenque wēnæ wēnæ cædāni iñōnāni mānim-podānique godōmenque wēnæ wēnæ cædāni inte mænōmaī wænānīpa, ante mīnitō pōnēmīni awædō. Īñæmpa Gadideabæ quēwēnāni tōmānāni adobaī wēnæ wēnæ cædāni iñōnāni māninānique edæ wænānīpa. ³ Wīi mænōmaī impa, āmo ěñēmāimīnīpa. Tōmēnāni wīi godōmenque wēnæ wēnæ cædināni inte wænānitapa.

Mīnitō guiquēnē wēnæ wēnæ mīni cædinō ante wæwente pōnēninque ñimpo cædāmaī imīni ininque mīnitō tōmāmīni adobaī wæmaīmīnīpa,” āngantapa.

⁴“Ayæ Eedotadēē iñōmō tōmēnāni nāni gomō aquincō Tidoeē nāni ānoncō tæ wææñonte waodāni dietiocho ganca ināni capo wēnāni ininque mīnitō, Tōmēnāni godōmenque wēnæ wēnæ cædāni inte wænānīpa, ante pōnēmīni awædō. Īñæmpa Eedotadēē quēwēnāni tōmānāni adobaī wēnæ wēnæ cædāni iñōnāni mānim-podānique edæ wænānīpa. ⁵Wīi mīnitō pōnēnō baī impa, āmo ēñēmaīmīnīpa. Tōmēnāni wīi godōmenque wēnæ wēnæ cædināni inte wænānitapa. Mīnitō guiquēnē wēnæ wēnæ mīni cædinō ante wæwente pōnēninque ñimpo cædāmaī imīni ininque mīnitō tōmāmīni adobaī wæmaīmīnīpa,” ante Itota apænecantapa.

Igowæ òmæca ongompa, ante odòmante apænecampa

⁶Ayæ Itota, Wængonguī Awēnē æbānō cæcāā, ante ēñencædānīmpa, ante imæca quēwēnāni nāni cæinō ante odōmōninque ĩmaī apænecantapa. “Waoçā tōmencodē iigowæ minte pæ ate tōmenca ante ponte ayongā edæ dæ òmæcawæ ongompa. ⁷Ate wædinque tōmengā ocæ ēmænte godinque tōmencawæncōo nē aacā ingante apænedinque, ‘Edæ mēa go adoque wadepo tōmenca ante gote ayōmo edæ mānīi iigowæ cōwē òmæcawæ ònonque wææ ongompa cæbīi. Òmæcawæ wææ ongōwæ adinque wido tate æmæwo wido cæe.’ ⁸Āñongā tōmencawæncōo nē aacā wæætē, ‘Awēnē, ee ongōe. Botō iigowæ ònōwa gāānē ææ wodinque māmō wagada goi ænte wempo cædente tee moncabo ate wadepo ate bitō ongōñōmi edæ, ⁹do incabaimpa. Wæætē wadepo ate ayōmite òmæcawæ ate wædinque edæ æmæwo wido tate wido cæbaimīpa,’ ante nē cæcā angampa.” Māninque ante odòmante apænēbopa, ante Itota apænecacāimpa.

Itota bocæ bocæ wædingā ingante cæcā ate waa bacampa

¹⁰Guēmanguiōnæ iñonte Itota oodeoidi odōmōincōnē go guīdinque odòmante apænecantapa. ¹¹Onquiyængā māniñōmō ongongā iñōmō tōmengā dietiocho wadepo iñonte wēnæ guicā ate bocæ bocæ wæwēningā inte ædō cæte adiyæ ængæ gantiquingāā. ¹²Tōmengā ingante adinque Itota aa pecā pongā ate,

—Onquiyæmi, bitō bocæ bocæ wædō ante ñōwo botō ñimæncæpote baī cæbo ate bitō waa babīpa.

¹³Āninque tōmengā ingante gampocā ate ñimæncæpote baī badinque onquiyængā iñōmō adiyæ gantidinque wæætē, Wængonguī bitō ñāō baī ēmōmi inte waa pōni pōnō cæbi æmopa, ante watapæ apænecantapa. ¹⁴Guēmanguiōnæ iñonte Itota māmōmaī cæcā waa bacā adinque tōmēnāni odōmōincō awēnē guiquēnē piinte badinque godongāmæ ongōnāni inānite,

—Quimæ quēwēmīnīi. Ōnōmpo æmæmpoque go adoōnæque mōnō cæōnæ iñonte mīnitō waa bacæte ante ponguēnēmīni imīnīpa. Guēmanguiōnæ iñonte edæ cædāmaī inguēnē quēwēmīnīi.

¹⁵Ante piñingante mōnō Awēnē wæætē,

—Mīnitō wadō tedete nē wadō cædōmīni inte ēñēedāni. Mīnitō cæningā iñōmō wagada incæ bodo incæ gue ænente wæyongante mīnitō guēmanguiōnæ ĩ incæte cōwē ñī cæyænte æpæ wedeca ænte māo gōnōmīni gongænte becampa. ¹⁶Wæætē māningā onquiyængā iñōmō Abadāō wodi pæingā iñongante Tatāna dietiocho wadepo iñonte goti winte baī cæcā wædingā iñongante mīnitō iñæmpa guēman-

guiönæ i beyænque edæ, Tömengä ñimæncæpodāmaï incæcäimpa, ante quïnante wææ äminii.

¹⁷ Angä ëñente wædinque në piïnte änäni guingo imonte wæyönäni godongämæ ongönäni guiquënë, Bamönengæ pönï Itota waa pönï cæcampa, ante adinque nanguï togadänimpa.

Möotatamö guidimö ante odömonte apænecampa

(Mäateo 13.31-32; Mäadoco 4.30-32)

¹⁸ Ìninqe Itota tömënäni inänite, “Wængonguï Awënë Odeye nempo näni quëwencabo ññömö quïnö bai inänïi. Edæ, Æbänö nanguï yebænte badänii, ante botö inguipoga quïnö pæte yebænte bai i adinque, Mäninäni adobaï yebänänipa, ante ëñenguïi. ¹⁹ Ìimaï impa. Waocä möotatamö tömëmö ænte mäo tömëmoncodë quiyacä bocate pæ ñinque ñænæñeque bayonte ayamöidi pöninque awænëmæ ongönänipa. Möotatamö guidimö incæ mänömaï pæ bai Wængonguï Awënë nempo quëwënäni ññömö wædænque ñinänäni incæ nanguï yebænguinäni inänipa,” ante Itota odömonte apænecäimpa.

Päo yedæ æmpoquï da wenguï ante odömonte apænecampa

(Mäateo 13.33)

²⁰ Itota ayæ angantapa. “Wængonguï Awënë ññömö tömengä nempo quëwënäni inänite æbänö cæcää, ante odömoncæte ante botö, Ìimaï cæcampa, ante odömonte apænebo ëñenguïminii. ²¹ Edæ ñimaï impa. Onquiyængä ñænængade tee manguincade ænte tee mäninque ædina näni ämö ænte mempoga go adopoque da wëninque ayæ, Päo yedæ æmpocäimpa, ante adoyömö pönö da wëninque wempo wempo ædämö cædengä ate päömo yedæ æmpote tömäo näämænta bapa. Yedæ æmpote ate päömo tömäo näämænta ba bai öönædë Awënë nempo mini quëwencabo ññömö tömämini nö ëñente bamïnipa,” ante Itota odömonte apænecantapa.

Odemö guiyänemö, ante

(Mäateo 7.13-14, 21-23)

²² Itota mänïñedë Eedotadëe taadö godinque nanguï näni quëwëñömö wodo pænta godinque wædænque näni quëwëñömö wodo pænta godinque wayömö wayömö gote odömonte apænecäimpa. ²³ Goyongante adocanque,

—Awënë, bitö æmi beyænque në quëwënguïnäni ññömö wædænque inänipa, ämitawo.

Äñongante Itota,

²⁴ —Odemö guiyänemö guicæte ante edæ nanguï cædäni. Edæ nanguï inäni incæ guicæte ante cædinque guidämaï incädänimpa, ämo ëñëmäiminipa. ²⁵ Ìimaï impa. Oncö në ëcäcä ængæ gantidinque odemö tee mönecä adinque minitö ññömö tömengä oncö boyæ gote ongöninque aa pedinque, “Awënë, wi ænebi guiquimönii.” Ante wæyöminite tömengä, “Æminidö imïnii, ante ayæ, Ædönö gämænö quëwente pömïni imïnii, ante botö adämaï ñmopa,” ancæcäimpa. ²⁶ Angä ëñëninque minitö wæætë, “Ïnæmpa mönitö bitö tönö godongämæ cænte becongämönimpa. Ayæ bitö mönitö taadö ponte cægöninque odömonte apænëbi ëñengamöni ae,” ancæminimpa. ²⁷ Äñöminii tömengä ññömö, “Æminidö imïnii, ante, Ædönö gämænö pömïni imïnii, ante botö ëñënämaï ñmopa. Edæ do antabopa. Nöwo në wïwa cægäimïni inte

edæ botō weca ongönāmaī. Edæ wadæ goedāni, ämopa,” ancæcäimpa, ante Itota apænecantapa.

²⁸“İnıne mınıtō gomō ayōmını Wængonguı beyæ nē apænegaināni tönō dodāni Abadāō wodi Itæca wodi Aacobo wodi tönō tōmānāni Wængonguı Awēnē Odeye ömæ godongāmæ ongönōnāni mınıtō imınite edæ yabæque wido cæcä ate wædinque mınıtō wæætē guingo imonte pıınte wædinque edæ Ca ca wæcæmınımpa. ²⁹Wadāni wæætē edæ nænque tamönō pönāni tönō nænque guıdō pönāni ayæ betamonca æmatæ æmatæ pönāni tönō Wængonguı Awēnē Odeye oncönē ponte tæ contadınque ææmæ bete cængoncädānımpa. ³⁰İnıne ayæ ate ēñēnāni incæ pancadāniya yæcado ongönāni bate toyönāni mınıtō guıquēnē do ēñēnimını inte yæcado ongömını incæte pancamınıya wæætē yæmiñæ gote ongonte wæcæmınımpa,” ante Itota apænecäimpa.

Eedotadēē quēwēnāni beyæ ante Itota wæcampa

(Mäteo 23.37-39)

³¹Māniñedē Paditeoidi pancadāniya tōmengä weca pönınque,

—Awēnē Edode bitō imite wænoncæ angantaye. Bitō ongönāmaī wayōmō wadæ goe.

³²Änāni ēñēnıneque Itota,

—Edode congāñe baı babæ cædongä iñongante mınıtō tōmengä weca godınque, Itota iımaı angampa, ante apænemını ēñengædāni. “Edode ēñēmi. Botō ñōwoönæque baönæque wēnæidi inānite iınque wido cædinque iınque godō cæbo waa badāni ate iñabæ guingä iñonte botō edæ māniñedē edæ idæwaa cægäımo bacæboımpa, ante Itota apænecampa,” ante apænemını ēñengædāni, ämopa. ³³Incæte botō ñōwoönæ godınque baönæ godömenque godınque edæ waönæ godömenque botō goquēnēnō godınque Eedotadēē gocæboımpa. Edæ Wængonguı beyæ nē apænegaināni incæ Eedotadēē iñömō tōmēnāni nāni wængaiñömō iñonte botō Wængonguı beyæ nē apænebo adobo inōmo inte edæ ædō cæte wayōmō ongonte wænguımoo.

³⁴Ante apænedınque Itota Eedotadēē iñömō quēwēnāni beyæ ante pönente wædinque, “Eedotadēē quēwēmını ēñēedāni, angantapa. Wængonguı beyæ nē apænedāni inānite mını wænongaincabo inte ayæ Wængonguı nānō da pönönāni inānite dicaca tacamını iñömınite botō iñömō mınıtō imınite waadete pönō cæınente nangui wæbopa. Tawadiya wæmönä iñömō, Botō wēnāni, ante gompodınque tæcæenēmæ wēä pönō ö ænä baı botō adobaı, Botō wēnāni pöedāni, ante æpogadō äñömote mınıtō, Wıı pöınente awædō, ante Baa ämını wætabopa. ³⁵Ñōwo iñömō mınıtō onconcoo edæ önonconcooque baconcoo tamēñedāni. Nōwo edæ botō dæ äñömo mınıtō, ‘Awēnē Wængonguı emōwo beyænque pönınque bitō toquınque edæ waa cæcæbiımpa,’ ante mını anguinganca mınıtō edæ botō imote adāmaı incæmınımpa ante ämo ēñēedāni,” ante Itota apænecäimpa.

Æpæ ēñate nē wædongä ingante Itota cæcä waa bacä

14 Itota guēmanguıönæ iñonte Paditeoidi awēnē oncönē cæncæte ante go guııyongante godongāmæ ponte ongönāni guıquēnē, Itota æbänō cæquingäa, ante waa agönānitapa. ²Tōmengä weca adocanque æpæ ēñate nē wædongä inte a

ongongä. ³ Adinque idægoidi nāni wææ angainö ante nē ate ēñēnāni tönö Paditeoidi inānite apænedinque Itota iīmaī angantapa.

—Wængonguī æbānō ante wææ angacāi. Waa bacædānimpa, ante guēmanguiönæ iñonte mönō waa cæquēnēmō imöō, ante pönēmīni. Wæætē edæ, Guēmanguiönæ iñonte cædāmaī inguēnēmō imöō, ante pönēmīni.

⁴ Äñongä edæ pæ wēenedānitapa. Itota iñömō edæ nē æpæ ēñate wædongä ingante gampocä waa bacantapa. Ayæ, Goe, angä gocantapa. ⁵ Angä gocä ate Itota wæætē tōmēnāni inānite iīmaī angantapa.

—Minitō waocabo iñōmīnite adocanque tōmengä wēñængä onguiñængä incæ tōmengä wagada onguiñængä incæ æpæ ante nāni ææ wodīñömō goyæ guicä iñinque mæmpocä iñömō guēmanguiönæ iñonte edæ dicæ tōō tadōnāmaī inguingä. Mänōmaī goyæ guicä wædinque mīnitō tōmāmīni guēmanguiönæ i incæte do gote nāwæ gongæinque edæ quingæ tōō tadōmāimīnīpa.

⁶ Ante Itota äñongante tōmēnāni ædō cæte wæætē anguināni. Edæ pæ wēenedānitapa.

Monguimæno ante awënë beyæ gote nē wente ænāni, ante

⁷ Ayæ Paditeo awënë nānō nē äñedināni pōninque nāmanque ante pönēninque, Yæcado ongōñōmote botō imote waa acædānimpa, ante cædinque waa pōni tæ contaī iñömō tæ contadāni Itota acantapa. Iñinque tōmengä, Wængonguī Awënë nempo quēwēninque æbānō cæquīi, ante ēñencædānimpa, ante imæca quēwēnāni nāni cæinō ante odömōninque iīmaī apænecantapa.

⁸—Bitō imite, Monguimæno pō bee, ante nē wente ængä ēñēninque bitō pōninque yæcado inō waēmō iñömō tæ contadāmaī incæbiimpa. Iñæmpa wacä tōmengä nānō nē waadecä pongä iñinque ⁹ mīnatō imīnate nē wente ængä iñömō bitō weca pōninque, “Bitō gä goyōmi botō nē waadecä wæætē tæ containgä,” ante ämaingampa. Iñinque bitō gä godinque wīi waēmō iñömō wæætē tæ contadinque guingo imonte wæbaīmīpa. ¹⁰ Wæætē nē wente ængä ēñēninque bitō monguimæno pōninque yæmīñæ pōni wēnæ wēnæ iñömō tæ contæ. Edæ nē wente ængä ponte ayongä bitō wēnæ wēnæ iñömō tæ contabi adinque tōmengä wæætē bitō imite, “Botō nē waadebi inōmi inte bitō ñōwo yæcado pōni pō tæ contæ, ämopa,” ämaingampa. Mänōmaī angä ēñēninque godongämæ cæ cōnāni iñömō, Nē èacä nānō nē waadebi bitō imi amōnīpa, ante bitō imite waa abāinānīpa. ¹¹ Edæ, Botō nāmā nē waa cæbo inōmo inte edæ yæcado ongonguēnēmō imopa, ante nē cæcä iñömō tōmengä iñömō wæantodonte baī guingo imonte wæcæcāimpa. Wæætē edæ, Botō önōmoque imopa, ante yæmīñæ nē ongongä iñömō tōmengä guiquēnē ængō cæte tocæcāimpa, ante Itota apænecantapa.

¹² Tōmēnāni inānite iñinque apænedinque nē wente æningä ingante Itota godōmenque angantapa.

—Bitō, Pō cæe, ante ææmænoca wente æninque bitō æmigoidi inānite wente ænāmaī iē. Bitō tōniñadāni inānite wente ænāmaī iē. Bitō guidēnāni inānite wente ænāmaī iē. Eyequeī owote māincoo nē èadāni inānite wente ænāmaī iē. Edæ bitō tōmēnāni inānite wente æmi iñinque tōmēnāni wæætē bitō imite wente æmāinānīpa, ante wææ cædinque bitō iñömō, Botō godōnō wæætē eyepæ pōnōnāni māninque æninque öönædē wæætē ænāmaī imāimopa, ante wædinque edæ tōmēnāni inānite wente ænāmaī iē. ¹³ Wæætē ææmæno ante wente æninque ömæpodāni inte

wæwënāni inānite cōmante wæwënāni inānite bee ñante wæwënāni inānite babetamōnāni inānite wente æe. ¹⁴Mānināni inānite wente æninque edæ bitō toquinque ingæimpa. Tōmēnāni wæætē ædō cæte adopo pōnōnāni ænguimii. Edæ nē nō cædāni nāni ñāni ōmæmonguïōnæ iinque bayonte edæ mōnō Mæmpo Wængongi incæ bitō imite adopo pōnongā æncæbiimpa, ante Itota apænegacäimpa.

Ææmæ ante Itota odōmoncæte ante apænecampa

(Mäateo 22.1-10)

¹⁵Angā ēñēninque Itota tōnō nē cængongā adocanque tōmengā ingante apænecantapa.

—Wængongi Awënë Odeye pongā ate tōmengā tōnō godongāmæ nē cængā iñōmō edæ tōmengā nānō watapæ toquinque cænguingā.

¹⁶Apæncä ēñēninque Itota wæætē tōmengā ingante odōmoncæte ante apænecantapa.

—Wacā ææmæno ante cædinque nangui ināni inānite māo apænedinque, ñincayæ ate āmo ate pō bete cæedāni, ante cæcantapa. ¹⁷Ææmæno beyedē iinque bayonte tōmengā ingante nē cæcā ingante æninque, “Iñōnæ ææmæno iinque cætimpā. Pōedāni,” ante bitō tē tē wente ænte pōe, ante da godongā. ¹⁸Godinque wente ængā ēñēninque do nānō nē āñēdināni wæætē, Ædō cæte ponguimōnii, ante tōmānāni adoyōmō wædānipā. Tānocā iñōmō, “Botō ōmæ ante tæcæ godonte æninque botō acæ goquimo inte botō ææmæ becæ godāmaï imopa. Incæte nē wente æningā weca adodō gote bitō botō beyæ apænebi ēñēninque tōmengā wæætē botō imote piināmaï incæcäimpa,” angampa. ¹⁹Wacā guiquēnē, “Wagada onguiñænā nāna goti wimencacaya nāna goti wimencacaya ōnompō æmæmpoque ganca mānimpodāni ināni inānite godonte ænimo inte botō, Æbānō cædānii, ante acæ gocæ cæbopa. Ñinque botō ææmæ becæ pōnāmaï imo incæte awënë ingante āmi botō imote piināmaï incæcäimpa,” angampa. ²⁰Wacā guiquēnē, “Botō tæcæ mōnimo inte ædō cæte ponguimoo,” angā. ²¹Ēñēninque nē cæcā iñōmō awënë weca adodō pōninque tōmēnāni nāni cædōnō ante tōmāā apæncä ēñente wædinque nē ēacā iñōmō ængui badinque tōmengā ingante nē cæcā ingante, “Bitō mōnō quēwēñōmō wacā taadō wacā taadō ñænænō incæ guiyānō incæ tōmāo gote adinque nē ōmæpodāni inānite, nē cōmāināni inānite, nē biyaate ināni inānite, nē babetamōnāni inānite adinque ænte pōe.” ²²Angā ēñente cædinque nē cæcā wæætē awënë ingante, “Awënë, bitō ānīnō ante do cæbo incæte bitō oncō wii eyede impā.” ²³Ante apæncä ēñente wædinque awënë wæætē, “Ōnōmæca iñōmō ñænænō incæ guiyānō incæ gote diqui diqui minte wadāni inānite ate āmi pōnāni iinque botō oncō eyede ponte cæncædānipā. ²⁴Edæ bitō imite āmopa, Wēēnēñedē botō wente ænināni incæ bedāmaï incædānipā,” ante nē ēacā angampa. Māninque ante apænebopa, ante Itota apænegacäimpa.

Itota miñæ gocæte ante æbānō cæquiï, ante

(Mäateo 10.37-38)

²⁵Itota tōnō nangui ināni godongāmæ godānitapa. Tōmēnāni inānite apænecæte ante tōmengā dadi ēmænte adinque apænecantapa.

²⁶“Minitō iñōmō, Itota gāmænō ponguimo, āmīnitawo. Ñnæmpa botō weca pōninque wacā mæmpo tōnō wānānā inate ante wædāmaï incæcäimpa. Tōmengā

nänöogængä ingante ante wädämaï inte tömengä wēñænäni tönö tömengä nänö tönñadäni inänite ante wädämaï incæcäimpa. Mänimpodäni inänite piinte bai pönëninque tömengä, Nāmanque ante quëwencæboimpa, ante wädämaï inte piinte bai pönëninque botö imote wæatë godömenque nangui waadete pönenguënegä ingampa. Mänömaï ante pönënanäni iñömö tömënanique edæ botö miñæ nē godäni badänipa. ²⁷ Ayæ botö miñæ poncæ cædinque waocä, Awæ botö wænguiwæ, ante næænte ponte bai cædinque, Wænönäni wæmo incæte Itota miñæ cöwë gocæboimpa, ante poncæcäimpa. Mänömainö ante wii cæcä iñömö tömengä iñömö edæ botö nē emiñængä ædö cæte baquingä. ²⁸ Æi gomö aquincö mænnoncæ cædinque bitö, Æpodö godonte æninque iinque mænonguiimo. Botö eyepæ mantawo, ante täno pönënamäi inte edæ ædö cæte mænonguiimii. ²⁹ Täno pönë cönämaï imi iinque bitö ongoto ontowæ do näne ñongæninque godömenque ængui ante ömæpobi badinque iinque edæ mænönämaï imaïmipa. Ayæ edæ mænönämaï imi adinque godongämæ ongönäni wæatë, ³⁰ Æ bitö mænnoncæ cædimi incæ iinque mænönämaï imipa töö, ante badete tobainänipa, angantapa.

³¹ Ayæ, “Imæca awënë wabæca awënë ingante guädö guëa piinte cæcæte ante cædinque ædö cæte täno pönënamäi inte cæquingä. Imaï pönente cæquënegä ingampa. Botö tontadoidi guiquënë diete müido ganca iñönänite wabæca awënë tömengä tontadoidi guiquënë bæinte müido ganca inäni awædö. Tömengä tontadoidi nangui inäni tönö piincæte ante pönongante botö æbänö cæte edæ wææ cæquimoo, ante täno pönë cöngüënë ingampa. ³² Ayæ, Botö iñömö tæi pñæmo imopa diyæ tömënanäni inänite wido cæquimoo, ante pönengä iinque tömengä edæ wabæca awënë gobæ ongöñongante mäo wææ angüënegä ingampa. Edæ, Botö æbänö cæbo ate bitö wæatë piyænë cæte ee ate gobi quëwëmoe, ante wææ angüënegä ingampa. ³³ Mäni cabo adobaï iminipa. Mäincooque impa, ante godonte bai cædinque minitö tömancoo emö cædinque tömänäni inänite emö cædinque botö miñæ poncæminimpa. Iñæmpa emö cædämaï imini iinque minitö botö nē emiñæmïni ædö cæte baquimïni, ante Itota angacäimpa.

Cati incæ nongæ bapa, ante

(Mäateo 5.13; Mäadoco 9.50)

³⁴ Ayæ apænëdinque Itota, “Cati quimonte cæi iñömö waëme inte gæpæ emompa, angacäimpa. Incæte nongæmonte ba adinque minitö wæatë æbänö nö cæmïni wæatë gæpæ emonguii. ³⁵ Iñæmpa gönea inguiipoga cati wäne cædäni iinque tömëmö cati beyæ pædämaï ingæimpa. Ayæ wagada goi tönö wempodente wäne cædäni iinque tömëmö cati beyæ pædämaï ingæimpa. Iinque edæ cati nongæ ba ate wido cædänipa. Mänömaï apænëbo ëñëninque ëamonca ongonte ëñëedäni, ante Itota apænëgacäimpa.

Cæningä wë womönimpa, ante odömöninque apænecampa

(Mäateo 18.10-14)

15 Odömäno awënë beyæ nē ænäni tönö Wængongui ingante ëñënamäi inte nē cædäni tönö tömänäni Itota apænecä ëñencæte ante godongämæ pönäni inönänimpa. ² Adinque Paditeoidi tönö nē odömönäni guiquënë Itota ingante ante piinque,

—Iingä iñömö, Pöedäni, äninque nē ëñënamäi cædäni tönö cæ congä awædö.

³ Ante piinte tededāni wædinque Itota, Wængonguī Awēnē nempo quēwēninque æbānō cæquīī, ante ēñencædānimpa, ante imæca quēwēnāni nāni cæinō ante odōmōninque iīmaī apænegantapa. ⁴“Mīnitō iñæmpa. Mīni waocabo iñōmīnīte adobi iñōmō bitō obegaidī tiēē ganca ēabi iñōmī obega adocanque incæ wē womonte edæ dæ bacā iñinque bitō iñōmō æbānō cæbaīmīi. Edæ nōobenta i nōebe iñāni ayæ ongoncoo iñānīte yabæque ēmō cæte godinque ōnōmæca gote wē womōningā ingante bitō ædō cæte diqui diqui mīnāmaī iīmī. Bitō aganca cōwē edæ diqui diqui mīmaīmīpa. ⁵Ayæ diqui diqui mīnīte ēadente ate, Nōwo ēadēmopa, ante todinque ōnōnancapæ wo ææntodōninque, ⁶oncōnē mongænte pōninque bitō guīdēnāni tōnō bitō æmigoidī tōnō āñete pōnāni ate, ‘Badogaa, botō wē womō wædō dobæ ēadente i abopa. Edæ mōnō watapæ toquinque impa,’ ante nē ēabi iñōmō āmaīmīpa. ⁷Ōōnædē quēwēnāni iñōmō adobaī cædānīpa, ante apænebo ēñēedāni. Waodāni nōobenta i nōebe ganca iñāni nē nō cædōnāni inte wē womōnāmaī inte ayæ ongōnāni adinque ōōnædē quēwēnāni wædænque todānīpa. Wæætē waocā adocanque incæ nē womōningā iñōmō tōmengā edæ wēnæ wēnæ nānō cædīnō ante wæwente pōnēninque ñimpo cæte pongā adinque ōōnædē quēwēnāni iñōmō godōmenque watapæ todānīpa,” ante Itota apænegacāimpa.

Onquiyængā tīguitamō nānō wē wodōnintamō ante

⁸ Godōmenque apænedinque Itota odōmongantapa. “Ayæ wæætē onquiyængā tīguitamō diete ganca māñongā adotamonque wē wodonte ba adinque, Nāō gongængæimpa, ante tīca wodōnodinque tōmengā oncō tōmāo wadæ ñēmæ wadæ ñēmæ cæte diqui diqui mīnīte ængampa. ⁹Do æninque tōmengā guīdēnāni tōnō tōmengā æmigoidī tōnō āñete pōñōnānīte, ‘Botō wē womontamō wædō dobæ ēadente abopa. Mōnō edæ watapæ toquinque impa,’ angampa. ¹⁰Iñinque mīnitō iīmīnīte apænebopa. Adocanque incæ wēnæ wēnæ nānō cædīnō wæwente pōnēninque ñimpo cædīnque pongā adinque Wængonguī anquedoidī incæ watapæ todānīpa,” ante Itota apænegacāimpa.

Māincoo nē ēwengā ingante mæmpocā waadete pōnō cæcā

¹¹ Ayæ godōmenque apænedinque Itota, “Mæmpocā tōmengā wēñæna mēnaa iñōnate, ¹²ayæmengā iñōmō wæmpocā ingante apænedinque, ‘Mæmpo, bitō ēacoo incæ æmæncōoque pā cæte botō ænguēnencōoque pōnōmī æmoe.’ Angā Ao āninque wæmpocā pā cædīnque wacā ingā pædæ wacā ingā pædæ godongā æna. ¹³Ate wantæ ate ayæmengā iñōmō ænte næænte wabæca godinque quingāmē baī ōnonque towente quēwēninque wæmpocā nānō pōnōnincoo incæ eye cæpote ba. ¹⁴Ate māniōmæ cænguī dæ ba ate nāni gæwænte wæpāmo pō iñinque tōmengā māincoo ænguēnengā inte wæwengā. ¹⁵Iñinque tōmengā māniñōmō quēwengā weca gote āninque, Bitō iīmī nē cæbo bacæboimpa, āñongante Ao āninque, Botō ōmæ odæ wængāñāidī nāni cæmancadē gote nē aabi bacæbiimpa, ante da godongā. ¹⁶Gote aadinque tōmengā gue ænente ōmædengā inte odæ wængāñāidī nāni cæntapodē incæ cæinente wæyongante cænguī dicæ pōnōnāniyaa.”

¹⁷“Ante wædinque tōmengā nāmanque pōnēē cōninque, ‘Iñæmpa botō wæmpo ingante nē cædāni iñōmō ōnōnānīque incæ eyepæ pōnī cæñōnāni botō iñōmō edæ gæwænte wænguī wæ. ¹⁸Botō mæmpo weca edæ wadæ gocæboimpa. Gote pōninque botō tōmengā ingante, Mæmpo ēñēmī. Ōōnædē quēwengā ingante botō godō ēñēnā-

maī cædinque bitō ayōmite pōnō wēnæ wēnæ cæbo iñōmote,¹⁹ bitō ñowo edæ, Botō wēmi, ante ædō cæte anguīmii. Wæætē edæ, Bitō botō ïmote, Nē cæbi bae, āmi ate botō bitō ïmite nē cæbo bacæboimpa, ancæboimpa.’²⁰ Ante pōnēninque wadæ godinque wæmpocā weca gocantapa,” ante apænedinque Itota godōmenque odōmonte apænecantapa.

“Ayæmengā mǎnōmaī gote gobæ pōnī dibæ pōñongante wæmpocā iñōmō gomō adinque iñontobæ pōnō waadete wæcampa. Pogodo pōnī godinque tōmengā wengā ingante waa waadedinque bæi ongonte queē bemongampa.²¹ Tōmengā wengā iñōmō, ‘Mæmpo ēñēmi. Öönædē nē quēwengā ingante botō godō ēñēnāmaī cædinque bitō ayōmite pōnō wēnæ wēnæ cæbo iñōmote bitō ñowo edæ, Botō wēmi, ante ædō cæte anguīmii.’²² Ante tæcæ apæneyongante mæmpocā iñōmō nē cæðani iñānite āninque, ‘Weocoo wæmoncoo quingæ ò ænte māmō daga wēñaquīmīni. Öonmpo timpoi ænte pōninque godō da timpodinque awæncata ò ænte godō da wēwaedāni.²³ Ayæ wagada wēñægā nanguī cænte uguīmo pōnī inongā inte wænonte ænōmīni ate mōnō cænte tocæimpa.²⁴ Edæ botō wengā iñōmō do wænte bai inongā incæte ñowo mīingā pongā aedāni. Botō nē wē womongā wædongā incæ edæ ñowo dobæ ëadente tobopa.’ Ante wæmpocā angā ēñēninque ææmæ cædinque nanguī todānitapa,” ante Itota godōmenque odōmonte apænecantapa.

²⁵ “Ææmæ cæte toyōnāni bamoncadengā guiquēnē gōnea ayæ cædongäimpa. ïnque cæte ate obo ponte ēñēñongā ämotamīni ante äwadāni.²⁶ Ëñente wædinque nē cæcā ingante äñecā pōñongante, Æbānō cæðanii, ante wæcampa.²⁷ Äñongante, ‘Bitō biwī incæ do pongā adinque bitō wæmpo, Botō wengā mīingā ëñadente tobopa, ante adinque wagada wengā uguīmo pōnī inongā ingante do angā wænonte ææmæ cæte todānipa.’²⁸ Ante apæneçā ēñēninque bamoncadengā iñōmō edæ ænguī badinque oncōnē guidāmaī, Baa angā. Wædinque wæmpocā iñōmō oncodo taodinque tōmengā ingante waadete apænedinque, Oncōnē pō guīie, angampa.²⁹ Bamoncadengā wæætē, ‘Iñæmpa bitō beyæ ante wadepo iñō wadepo iñō botō ancaa cædinque bitō änō tōmānō ante do cæbo iñōmote bitō wæætē, Bitō æmigoidi tōnō cænte tocæminimpa, ante dicæ ämiyaa. Caboda wengā incæ dicæ pōnōmi æmogaa.³⁰ Wæætē mäningā bitō wengā guiquēnē onquiyænāni mäincoo beyæ ante nē towente quēwēnāni tōnō quēwēninque bitō ëadīncoo incæ nē ëwēnengā inte pongā adinque bitō wæætē wagada wē uguīmo pōnī inongā incæ mäningā beyæ do wænōmīpa, ante awædō,’ angantapa.”

³¹ “Ante pīñongante wæmpocā, ‘Botō wēmi ëñēmi. Bitō iñōmō cōwē edæ botō weca ongōmi imīpa. Botō mäincoo iñi edæ bitō mäincoo cōwē impa.³² Incæte mäningā bitō biwī, Do wæmaī ingampa, ante mōnō nē pōnēnongā inte ñowo mīingā ingā pongā ae. Nē wē womōningā ingante do ëadente ate edæ ææmæ cæte toquēnē inimpa,’ ante bamoncadengā ingante mæmpocā angampa.” Mäninque ante apænebopa, ante Itota apænegacäimpa.

Nē aaquēnengā incæ nō cæðāmaī ingampa, ante

16 Itota tōmengā mīñæ nē godāni iñānite godōmenque apænedinque, “Waoçä adocanique mäincoo nanguī ëaçā iñongante wadāni, Bitō mäincoo nē aaquēnengā incæ önonque pōnī wido cæcā ae.² Änāni ëñēninque nē ëaçā iñōmō nē aaquēnengā ingante äñecā pongā ate iīmaī angampa. ‘Bitō quīmæ cæbii, ante adinque tedðāni edæ ëñēmpa. Nōwo idæwaa botō mäincoo inte nē aadīmi inte edæ abæ tawæ

gocæbiimpa. Ämo ate ëñente wædinqe bitö botö mäincoo inï ante edæ, Æbänö aadinqe cæboo, ante apænebi ëñemoe.”

³“Ante piïnte angä ëñente wædinqe në aadingä inïömö nämäneque tededinqe, ‘Botö awënë, Gobäwe, angä ëñëninque botö abæ tawænte gote awæðö. Botö cæte ænguënta nïwo ænämaï ininque æbänö cæte ænte quëwenguïmo. Botö, Wadäni beyæ onguipoi ææ wobo ate pönönäni ænte quëwencæboimpa, ante pönëmo bai edæ tæï piñæmopa diyæ ææ woquïmoo. Ayæ, Önonque pönömïni æmoedäni, ante æðö cæte anguïmoo. Guiñënete awæðö. ⁴Æ. Tæcæ pönëmopa. Botö awënë angä botö abæ tawænte goyömete wadäni wæætë, Botö oncönë pö guiie, ancædänimpa, ante cædinqe botö nïwo iïmaï cæcæboimpa, ante iïmaï cæcampa,” ante apænedinqe Itota godömenque apænecantapa.

⁵“Wadäni inïömö iingä awënë pönongä æninque adodö pönönämaï inäni inte debe inönänimpa. Iinäni inänite adocanque adocanque tömänäni inänite angä pönönänite në aadingä inïömö täno pöningä ingante apænedinqe, ‘Botö awënë ingante bitö ayæ æpodö pönönämaï imii.’ ⁶Äñongante, ‘Oguinguipæ incæ botö tiëë ganca tanquebo encadedë awënë ingante pönönämaï inte debe imopa.’ Ante apænecä ëñëninque ‘Mänimpocadedë debe imipa,’ ante awënë nänö yewæmöninta pædæ godöninque në aadingä inïömö, ‘Bado, bitö iïnta ænte pönömenque ante yewæmöninque edæ, Botö tincoenta ganca encadedë debe imopa, ante edæ quingæ tæ contate yewæmöe,’ angä ëñente cæcampa. ⁷Ayæ pöningä ingante në aadingä angantapa. ‘Bitö guiquëñë æpodö pönönämaï imii.’ Äñongante, ‘Todigo incæ tee manguincade nænængade pöni tiëë ganca encadedë botö debe imopa.’ Ante apænecä ëñëninque awënë nänö yewæmöninta pædæ godinque në aadingä, ‘Bado bitö iïnta ænte pönömenque ante yewæmöninque, Otenta ganca debe imopa, ante yewæmöe,’ angä cæcampa.”

⁸“Ininque në aaquënegä mänömaï önonque wiwa cæcä wædinqe awënë tömengä ingante, Bitö ocai nanguï encabi inte nämanque ante pönëwëninque cæbitapa, angampa, ante Itota në aaquënegä ingante ante mäninque apænecantapa. Ayæ godongämæ ongönäni inänite godömenque apænedinqe, Inguipogaque ante quëwënäni inïömö nänï caboque nanguï ëñente cæyönäni botö nïö inïömö në quëwënäni nänï cabo guiquëñë wi nanguï ëñente cædänipa,” ante Itota odömoncæte ante apænecantapa.

⁹Ayæ, “Minitö imïnite nïwo ämo ëñëedäni. Mäningä në aacä ocai encate cæcä bai minitö inïömö adobai inguipogaque wiwa cæcæte ante nänï godonte æïnta mämïni ininque ocai encate töingä pönente cæedäni. Inguipoga ininque bayedë mäninta inïömö edæ dæ bacæimpa, ante pönente wædinqe, wadäni beyænque ante godö waa cæedäni. Mänömaï cæmïni ininque minitö ömæpomïni inte öönädë nänï cöwë wantæpiyæ quëwencönë æite godinque pönöminite, Oncönë pöedäni, ämainänipa,” ante Itota apænecantapa.

¹⁰Ayæ, “Wacä mäincoo wædænque pöni æninque ædæmö aacä ininque tömengä wæætë nanguï mäincoo æninque adobai ædæmö aaquingä ingampa. Wæætë edæ mäincoo wædænque pöni aaquënegä incæ babæ cæcä ininque tömengä wæætë nanguï æninque cöwë babæ cæquingä imaingampa. ¹¹Ininque mäincooque ante mïni wædoncoo æninque minitö ædæmö aadämaï imïni adinque minitö imïnite, Wo ëwënämaincoo aacæbiimpa, ante dicæ pönönäni ænguimïniyaa. ¹²Ayæ wacä minitö imïnite, Botö qui ædæmö aedäni, ante pönongä ænimïni inte minitö ædæmö aadä-

maï imini adinque, Tömëmïni quï, ante mïnitö imïnite pönönämaï incädänïmpa,” ante Itota apänegacäïmpa.

¹³ Ante apänedinque Itota godömenque apänegacantapa. “Mënaa awënëna ina beyä waocä ædö cæte cæquingää. Adocanque awënë ingante pïinïnque wacä ingante waadebaingampa. Wæætë adocanque mïñä godinque wacä ingante wïi waa abaingampa. Mïnitö adobaï imïni inte Wængonguï ingante nê cämïni inïnque mäincooque ante ædö cæte cæquïmïni,” ante Itota angacäïmpa.

¹⁴ Itota apänecä ëñëninque Paditeoidi guiquënë mäincooque ante nê wæwënäni inönäni inte, Quimä änewëë, ante badete togadänïmpa. ¹⁵ Adinque Itota wæætë tömönäni inänite, “Mïnitö inämpa, Mönitö imönite adinque waodäni, Nê nö cädäni inänipa, ante pönencädänïmpa, ante nê babæ cämïni imïnïpa. Incæte Wængonguï mïnitö mïmönë mïni entawënö ante edæ do acampa. Waodäni näni waa adö ante Wængonguï wæætë, Wentamö pönï i awædö, ante pïingampa,” ante Itota apänegacantapa.

Wængonguï Awënë nänö wææ angainö cöwë ongompa

¹⁶ Äninque Itota, “Wëëñëñedë inömö Wäö nänö ponganca dodäni Möitee wodi nänö wææ angainö ante ayä Wængonguï beyä nê apänedäni näni angainö ante apänete quëwengadänïmpa. Nöwo guiquënë, Wængonguï Awënë Odeye nempo guiite quëwengäïmpa, ante watapæ apänete impa. Iine ante ëñëninque tömänäni Awënë nempo guicæte ante edæ pæ pagænte cædinque da godö guidänipa,” ante apänegacantapa.

¹⁷ Ayä apänedinque, “Incæte öönæ tönö inguïpo æmæwo edæ dæ näni baganca edæ Wængonguï nänö wææ angainö inömö edæ cöwë mä ongongäïmpa. Mänïne ante yewämöninque dodäni näni tænoncagai inömö edæ guiyä pönï incæ cöwë wadæ cädämaï ingäïmpa,” ante Itota apänegacäïmpa.

Näni pämänte wædö ante Itota apänegacampa

(Mäateo 19.1-12; Mäadoco 10.1-12)

¹⁸ Ayä godömenque apänedinque Itota, “Æcänö näwä nänöogängä ingante pämäninque wacä onquiyängä ingante godö möna inömö tömengä edæ wiwa towengä do bacampa. Adobaï, tömengä nänöogängä iningä inongante wacä möninque edæ do towente bacampa,” ante apänegacantapa.

Tæcæ wodi tönö Datado, ante Itota odömonte apänecä

¹⁹ Godömenque odömonte apänecæte ante Itota iïmaï ante apänegacäïmpa. “Onguïñängä adocanque nê ëacä inte cæncadencoo waëmoncoo wëñadinque awënëidi näni opatawæ ëmoncoo bai yabæque wëñadongäïmpa. Tömengä tæcæ wodi inongä inte waëme cænguïncooque æninque iïmö inö iïmö inö æëmæ cædinque nanguï todinque quëwëngäïmpa. ²⁰ Tæcæ wodi yabædemö inö wacä tömengä ëmöwo Datado ingante ænte mämö ñö cädäni ñongängantapa. Iingä inömö, Pönömi æmoe, Pönömi æmoe, ante nê änewëngä inte quëmoncoo tömäo baate wædongäïmpa. ²¹ Ayä tæcæ wodi weca cæninque eyepodäni wæænte öñoncoo adinque tömengä ænte cæncæte ante wæwëngäïmpa. Ayä edæ tömengä nanguï baate ñömænte wæyongä guintaidi incæ pö yædæ yædæ beyadönänïmpa. ²² Tömengä nê, Pönömi æmoe, Pönömi æmoe, ante änewëngä inte näñe wængä ad-

inque Wængongui anquedoidi tömengä önöwoca ingante Abadäo wodi weca ænte mäidäni æicantapa. Ayæ ate tæcæ wodi adobaï nänne wængä adinque tömengä baö ini daga wënanitapa.”

²³ Ante apænedinque Itota tæcæ wodi ingante ante godömenque apænecantapa. “Tömengä önöwoca guidömëmö taadö wææ gote mæ mämönte bai iñömö ongöninque nanguï ämogate wæwëngä inte gomö ayongä Abadäo wodi a ongongä acantapa. Datado wodi adobaï Abadäo wodi weca a ongongä acantapa. ²⁴ Adinque tæcæ wodi iñömö Abadäo ingante aa pedinque, ‘Mæmpo Abadäo ëñëmi. Botö gonga bæcöyömö guite nanguï ämogate wæwëmo cæbii. Botö ämogate wædö ante pönö waadete waa cædinque bitö Datado ingante da pönömi pöninque tömengä æpæ ada ipomencacä botö cöñe bamencaboe.’ ²⁵ Äñongante Abadäo, ‘Botö wëmi, Datado imæcayedë wënæ wënæ ämogate wæwëngante bitö mäincoo wæmoncooque ænte todinque quëwënömiimpa. Nöwo diyæ bitö ämogate wæwëñömite Datado ingante wæætë ædæmö cæbo ate wampo pönëninque tömengä nöwo iñömö watapæ quëwente tocampa. ²⁶ Ayæ godömenque ämo ëñë. Nänënë i apa änewëë. Botö weca ongongä inte ædö cæte bitö weca goquingä. Wæætë bitö weca ongongä inte botö weca ædö cæte ponguingä. Guiibæ pöni iñömö taadö impa taquii. Edæ dæ ampa,’ ante Abadäo wodi angampa, angantapa.”

²⁷ “Angä ëñente wædinque tæcæ wodi wæætë, ‘Mæmpo Abadäo ëñëmi. Datado ingante ämi ëñente tömengä botö mæmpo oncönë adodö gocæcäimpa. ²⁸ Mänñömö botö tönñadäni önompo æmæmpoque ganca mänimpodäni inänipa. Ininque bitö Datado ingante ämi tömënäni weca gote, Wænompadäni, ante wææ angä ëñëninque tömënäni wæætë iñömö nanguï pöni ämogate wæwëñömö pönämaï incædänimpa.’ ²⁹ Äñongante Abadäo wæætë, ‘Möitee wodi nänö wææ ante yewæmongainta Wængongui beyæ nê apænedäni näni yewæmongainta do mänäni inte edæ bitö tönñadäni iñömö mäninta adinque, Æbänö i, ante do ëñenguëñëni inänipa.’ ³⁰ Ante apæneyongä tæcæ wodi wæætë, ‘Inæmpa mæmpo Abadäo ëñëmi. Wacä nê wængaingä inte nänï ömæmönite tömënäni weca gote apæneccä ëñëninque botö tönñadäni tömënäni wënæ wënæ cædinö ante wæwente pönëninque do edæ nïmpo cæbainänipa.’ ³¹ Ante wæyongante, ‘Inæmpa Möitee wodi nänö wææ angainö ante Wængongui beyæ nänï apænegainö ante ëñëñämaï inänï inte tömënäni nê wænte nänï ömæmönigä apæneyongante cöwë ëñëñämaï imainänipa,’ ante Abadäo wodi angantapa.” Tæcæ wodi ingante ante apænedinque Itota mäninque ante apænegacäimpa.

Wacä oda cæcæcäimpa, ante nänï wæquinque cædänipa

(Mäteo 18.6-7; Mäadoco 9.42)

17 Ayæ tömengä miñæ nê godäni inänite apænedinque Itota, “Nê pönëñäni incæ pancadäniya wiï ëñente do oda cædänipa. Cöwë mänömaï impa. Incæte, Oda cæcæcäimpa, ante nê cæcä iñömö edæ tömengä nanguï nänö caate wæquinque cæcampa. ² Ininque edæ, Wëñængä adocanque guiyangä pöni incæ oda cæcæcäimpa, ante nê godö cæcæ cædingä iñömö edæ, Wiï cæcæcäimpa, ante mönö edæ wææ cæcæimpa. Waodäni nänï dacæ godö dacæ godö cæquinca nænænca æninque nê godö cæcæ cæcä önömenca æ wëmencadinque tömengä ingante tæcætibæ wido cædäni ininque tömengä edæ, Wënæ wënæ cædämaï inte wæmo beyænque Wængongui botö imote pänämaï ingampa, ante tömengä waa toquëngä imaingampa.

³ Mänömaï ämo ëñëmini inte minitö, Oda cæcæcäimpa, ante në cæcä bai cædämaï incæboimpa, ante edæ nämä wææ aedäni,” äninque Itota iïmaï apæñecantapa.

“Wacä wënæ wënæ cæcä adinque bitö wæætë tömengä ingante, Cædämaï incæbiimpa, ante wææ æe. Ämi ëñëninque tömengä wënæ wënæ nänö cædinö beyæ guingo imonte wædinque, Wiwa cætabopa, ante apæñecä ëñëninque bitö wæætë piyænë cædinque tömengä ingante ñimpo cæbi ee gocæcäimpa. ⁴ Tömengä wæætë adoönæque iñonte önompo æmæmpoque go mempoga mänimpoga bitö imite wiwa cædingä inte tömengä guingo imöninque, ‘Bitö imite wiwa cætabopa,’ ante adopoga apæñecä ëñëninque bitö wæætë tömengä ingante adopoga ñimpo cæbi ee gocæcäimpa,” ante Itota angantapa.

Mönö täi piñante entawenginque wede pönëmpa

⁵ Mönö Awënë tömengä nänö në da godöñinäni iñömö tömengä ingante äninque, —Wædænque pönëmöni iñömönite bitö pönö cæbi äninque mönitö ædämö wede pönëmöni bacæmönimpa.

⁶ Änäni ëñëninque mönö Awënë wæætë, —Möotatamö guiyämö pönö nänö inganca minitö pönënö mäninganca wædænque pönëminitawo. Mäningancaque pönëmini incæte minitö möodedawæ näni äwæ inte apænedinque, “Awæ ëñëmi. Bitö bæ wite godö gäwapæ minte pæbäwe,” ante ämini bai awæ incæ dobæ edæ ëñente cæcædönimpa, ante Itota apæñecantapa.

Wacä ingante në cæcä incæ iïmaï cæquëngä ingampa

⁷ Ayæ godömenque apænedinque, “Mäni waocabo iñömönite adobi në äbi imi inique bitö imite në cæcä ingante edæ æbänö cæbaïmii. Tömengä gönea mangæ mangæ wodinque ayæ cænänäni inänite iinque aadinque pö guicä adinque bitö iñömö edæ, ‘Pö täe contate cæe,’ ante edæ dicæ ämiyaa. Edæ në äcä ingampa diyæ täno cænguingä. ⁸ Wæætë në äbi inömi inte bitö, ‘Botö beyæ cænguï æñöninque bitö weocoo topo cædinque pönömi äninque botö cænte bebo ate bitö mäññedë ate edæ cænte becæbiimpa,’ ante cöwë ämaïmipa. ⁹ Ayæ, Cæe, ante bitö äñinö ante tömengä ëñente cæcä beyænque bitö, Waa cæbi æmopa, ante dicæ angüimii. ¹⁰ Iñinque mönö Awënë, Cædäni, ante nänö angäinö ante eyepæ pönö cædinque minitö adobaï ante pönenguëñëmini iminipa. ‘Mönitö në cæmönique inte öñömönique inömöni inte wënæ wënæ cæte awædö. Mönitö tömengä nänö änonque mäñinque cæte ate tömengä beyæ ante dicæ godömenque nanguï cæmöniiyaa,’ ante pönente wæquëñëmini iminipa,” ante Itota tömengä miñæ në godäni inänite apænegacäimpa.

Itota angä ate diete ganca inäni waintai baadänipa

¹¹ Mänii Eedotadëe iñömö gocæte ante godinque Itota Tämadiabæ æmætæ Gadideabæ æmætæ tæcæguedë pönö godinque, ¹² waodäni näni quëwëñömö tæcæ pöñongä në baate wædäni önompo tipæmpoga inäni pö bee ténänitapa. Pö gobæ næ gongæñinque pömö adinque, ¹³ aa pedänitapa.

—Itota në Awënë inömi inte ëñëmi. Mönitö wædö ante pönö waadete waa cæe, ämönipa.

¹⁴ Äñönänite gomö adinque Itota,

—Minitō guiquēnē Wængonguī oncōnē godinque, Wængonguī qui, ante nē godōnāni inānite mīnitō æmontai māo odōmōmīni acədānīmpa.

Angā ēñente tōmēnāni idōmæ godinque iñontobæ waintai baagadānīmpa. ¹⁵ Inique adocanque watapæ todinque, Wængonguī bitō nāō apāite bai inōmi inte edæ waa cæbi æmopa, ante yedæ apænedinque adodō pongantapa. ¹⁶ Tōmengā iñōmō wabæca Tāmadiabæ nē quēwēningā incæ pō Itota önōwa inō guidōmēmæ ñongæinque waa ate pōnēninque, Bitō pōnō cæbi ate waintai baabopa, ante apæneca. ¹⁷ Ēñēninque Itota wæatē angantapa.

—Īñæmpa mīni cabo ōnōmpo tipæmpoga mānīmpomīni inōmīni inte edæ wīi tōmāmīni waintai baamīnitawo. Inique wadāni ōnōmpo æmæmpoque go mēnaa go mēnaa ināni iñōmō edæ ædōnō gote dæ ānāni. ¹⁸ Īngā iñōmō wabæca quēwēningā incæ adocanque Wængonguī ingante waa pōnī apæneceate ante ponte quēwēñongā wadāni guiquēnē tōmānāni pōnāmai inānitawo.

¹⁹ Āninque Itota tōmengā ingante,

—Bitō wede pōnēnō beyænque waintai baadimi inte ængæ gantite goe, angantapa.

Īmaī iinque bayonte Awēnē Odeye poncæcāimpa, ante

(Māateo 24.23-28, 36-41)

²⁰ Paditeoidi Itota ingante, Wængonguī Awēnē æyedēnō ponte Awēnē Odeye baquingāā, ante wæyōnānite tōmengā wæatē, Īñæmpa wīi waomīni ayōmīni Wængonguī Awēnē Odeye pongā ingampa. ²¹ Inique, “Tōmengā iñōmō ponte ongongampa,” ante ayæ wæatē, “Tōmengā wayōmō gote ongongampa,” ante edæ ædō cæte anguii. Minitō weca nē quēwēngā incæ Awēnē Odeye bayongante woadāni tōmengā nempo do quēwēnāni apa ānewēmīni, ante Paditeoidi inānite angacāimpa.

²² Ayæ tōmēnāni inānite iinque apænedinque Itota tōmengā nānō nē ēmīñēnāni inānite wæatē apænecantapa.

—Īncayæ ate mīnitō, Waocā nē ēñagaingā ingante adoönæque incæ ainēmōnīpa, ante wæcæmīnīmpa. Wæmīni incæte adāmai incæmīnīmpa. ²³ Wadāni mīnitō imīnite, “Īñōmō ongongā tamēñedāni,” āninque ayæ, “Wayōmō ongongā tamēñedāni,” āñōnāni mīnitō acæ godāmai iedāni. Tōmēnāni mīñæ edæ godāmai imæwedāni. ²⁴ Botō ponguīōnæ iinque bayonte botō iñōmō edæ Waobo nē ēñagaīmo inte edæ nāō æmatæ æmatæ nāinte bai ēmōninque edæ edonque pōnī ponte a ongoncæboimpa. ²⁵ Incæte botō nōwo guiquēnē tāno nanguī āmogate wæwencæboimpa. Ayæ nōwodāni iñōmō botō imote edæ Baa āninque wido cæcədānīmpa, ante Itota apænecantapa.

²⁶ “Botō Waobo nē ēñagaīmo inte botō ponguīōnæ iinque bayedē guiquēnē Nōwee wodi Docā nāni angaingā nānō quēwēñedē dodāni nāni quēwēngāi bai adobai edæ quēwēnguīnāni inānīpa. ²⁷ Docā Nōwee wodi ñāñæ wipoboga oncō bai mænōninque tōmengā nānō guiganca tōmēnāni ōnonque cænte bete monte quēwēngadānīmpa. Monguīna, ante ñānōnte quēwēngadānīmpa. Māñīñedē edæ tōmēnāni nāni capo bedō wænguinque edæ æpæ do angatīmpa. ²⁸ Dooto wodi nānō quēwēngāñedē dodāni adobai cænte bete quēwēngadānīmpa. Nē mānāni godongadānīmpa. Āñēnāni wæatē godonte ængadānīmpa. Mīnte pæcæimpa, ante cædinque onconcoo mænōnte quēwēngadānīmpa. ²⁹ Incæte Dooto wodi Todōmā iñōmō quēwēnte nānō tao gogaīōnæ iñōnte gonga tōnō atopodemō nanguī ocoi bæcomō cōōnæ cæ bai wæænīnque māo bæco iinque māñīñōmō quēwēnāni tōmānāni gonte wæn-

gadānimpa. ³⁰ Botō Waobo ēnagaīmo inte edonque botō a ongōñedē mäninō nāni bæco gonte wængai bai adobaī bacæimpa, ante āmo ēñēmaīmīnīpa,” ante Itota angacāimpa.

³¹ Ayæ godōmenque apænedinque, “Mānionæ iñonte mīnitō oncōmanca ongōnīnque, Botō māincoo, ante oncōnē wæi guiidinque ænāmaī inte wodii wīnōmæwedāni. Ayæ gönea cædinque māincoo ante oncōnē ocæ ēmænte æncæ pōnāmaī imæwedāni. ³² Iñæmpa, Dooto nānōogængā wodi æbānō dadi ēmænte adinque edæ gonte wængacāi, ante pōnēmīniyaa. ³³ Inguipogaque cōwē quēwencæboimpa, ante nē pōnengā iñōmō tōmengā iñōmō edæ quēwēnāmaī incæcāimpa. Wæætē edæ inguipoga mōnō guēmante quēwenguimāmo ante nē wædāmaī ingā guiquēnē tōmengā iñōmō edæ cōwē wænāmaī quēwencæcāimpa, ante āmo ēñēmaīmīnīpa,” ante Itota apænegacāimpa.

³⁴ Ayæ, “Māniñedē woyowotæ i iñinque mēnaa āñōmonque ōñōna adocanque ingante bæi ongonte goyōnāni adocanque ingante ēmō cæte godāni a ongoncæcāimpa.

³⁵ Ayæ onquiyæna cængui ante guëa dicaca dacæ dacæ cæte godō wēñōna adocanque ingante bæi ongonte goyōnāni adocanque ingante ēmō cæte godāni a ongoncæcāimpa.” ³⁶ “Ayæ onguiñæna gönea guëa cæyōna adocanque ingante bæi ongonte goyōnāni adocanque ēmō cæte godāni a ongoncæcāimpa.”

³⁷ Ante apænecā ēñente wædinque tōmēnāni wæætē,

—Awēnē, bitō ānō æyōmōnō incæ mænōmaī baquīi.

Åñōnānite,

—Baō æyōmōmē wænte ōñōñōmonte abadæidi wē ongonte edæ do godongāmæ pōnāni bai waodāni, Mōnitō Awēnē pongampa, ante do ēñēnīnque godongāmæ poncædānimpa, ante Itota apænegacāimpa.

Nē apænte ānongā tōnō owæmpoingā æbānō cædaī, ante

18 Ayæ tōmengā mīñæ nē godāni cōwē Wængongui ingante apænedinque wæntæte badāmaī incædānimpa, ante cædinque Itota inguipoga quēwēnāni nāni cæinō ante odōmonte apænegacāimpa. ² “Wayōmō nāni quēwēñōmō adocanque waodāni nāni nē apænte ānongā inte quēwēnongāimpa. Wængongui ingante guiñēnāmaī inongā inte tōmengā iñōmō, Waodāni æbānō ānāni, ante wædāmaī inongāimpa. ³ Adoyōmō tōmēnāni quēwēñōmō onquiyængā adocanque owæmpoingā inte nē wædongā inte quēwēnongāimpa. Tōmengā guiquēnē māningā nē apænte adongā weca wæætē wæætē pōnīnque, Botō imote adocanque nē piingā iñongante bitō āmi ēñente wæætē nō cæcæcāimpa. ⁴ Ante ancaa pōnīnque ānā ēñente wædinque nē apænte ānongā iñōmō edæ cōwē Baa Baa angā. Incæte ayæ ate nāmāneque tedinque tōmengā, ‘Onquiyængā iñōmō ancaa angā awædō, ānīnque, Wængongui ingante guiñēnāmaī imo inte botō, Waodāni æbānō ānāni, ante wædāmaī imo incæte, ⁵ māningā owæmpoingā pō pō cæcā wædinque botō, Ancaa ponte angā wæcæ wæ, ante wæætē tōmengā ingante waa cæcæboimpa. Tōmengā ingante nē piingā ingante botō, Nō cæe, ante wææ āmo wæcæcāimpa.’ Ānīnque nē Baa āningā incæte owæmpoingā beyæ do waa cæcampa. Mānīnque ante odōmōmopa.”

⁶ Ante odōmonte apænedinque mōnō Awēnē iñōmō godōmenque apænecantapa. “Nē apænte angā iñōmō wīwa cæcā incæte, Tōmengā æbānō apænecāā, ante mīnitō ēñente pōnēmæwedāni. ⁷ Wængongui nānō nē apænte ængāimīni inte mīnitō itædē woyowotæ wæætē wæætē aa pe aa pe cæyōmīni Wængongui edæ ædō cæte Baa

anguingää. Wææ ämi ate nö cæcædänimpa, ante äñöminite tömengä iñömö edæ, iñcayæ ate cæcæboimpa, ante ædö cæte anguingää. ⁸Wæætë quingæ edæ do cæcæcäimpa. Nê piñte cædinäni iñönänite Wængongui wææ angä ate tömënäni minitö iminite wæætë nö cæcædänimpa, ante ämo ëñëmaimäni. Incæte Wao Wëmo ëñagaïmo inte botö ponte ayömo wede pönënäni wabänö inguipoga mä ongönäni aquimoo, ante wæbopa,” ante Itota angacäimpa.

Paditeo tönö awënë beyä nê ænongä æbänö cæda, ante

⁹Ayæ pancadäniya, Wadäni önönänique iñönäni mönonque nö cæmö imopa, ante pönëwëninque wadäni inänite piñte adänipa. Mänömainö ante nê änewënäni inänite Itota, Wængongui ingante æbänö apänequi, ante ëñencædänimpa, ante imæca quëwëna näna apäneinö ante odömöninque apäñecantapa. ¹⁰“Wada mënaa Paditeo tönö odömäno awënë beyä nê æwengä iñömö Wængongui ingante apäñecæte ante Wængongui oncö ñænæncö yabæcönë æi guiidatapa. ¹¹Paditeo iñömö adiyæ gongæninque nämä incæ apäñedinque, ‘Wængongui ëñëmi. Wadäni bai wii imopa. Botö iñömö godömenque waëmö imopa, ante todinque botö mänömaï beyä bitö imite waa ate apänebopa, änewengampa. Edæ wadäni guiquënë wacä qui ö ænänipa. Wadäni inänite wiwa cædänipa. Tömënäni nänöogængä inämaï iñongante godö guëa mönänipa. Botö iñömö mäninäni bai inämaï inömo inte botö mäninö ongongä odömäno awënë beyä nê æwengä bai wii imopa, ante adinque botö Wængongui bitö imite waa ate pönëninque apänebopa. ¹²Botö iñömö, mëönaa go mëönaa iñonte, mëönaa go mëönaa iñonte bitö imite apäñecæte ante cænämaï quëwëmopa. Ayæ botö ænincoo tömancoo ate adinque botö önompo tipæmpoga mänimpocoo mä ongönoncoo adocooque æninque, Wængongui qui, ante cöwë pædæ pönömo ae,’ ante apänewengampa.”

¹³“Odömäno awënë beyä nê ænongä guiquënë guingo imöninque nämä tæi tæi yatawëninque, ‘Wængongui ëñëmi, botö nê wiwa cæbo adinque bitö waadete pönö piñnämaï incæbiimpa, ämopa,’ angä. Mäninque angampa. ¹⁴Mänömainö ante odömoncæte ante apäñedinque Itota, Nöwo ämo ëñëedäni, angantapa. Iingä awënë beyä nê æwengä mänömaï äñongante Wængongui do, Botö ayömo bitö nö cæbi babipa, ante godö badongä ate tömengä edæ nö pönëningä inte tömengä oncönë gocampa. Wæætë Paditeo, Nämänque waëmö imopa, ante nê änewëningä ingante Wængongui, Nö cæbi bacæbiimpa, ante godö badönämaï incæcäimpa, ante ämo ëñëmaimäni. Edæ, Nämänque waa cæbo imopa, ante nê ængö cæcä guiquënë edæ wææntodonte bai inte wæcæcäimpa. Wæætë, Nämänque wënæ wënæ cæbo imopa, ante nê apäñecä guiquënë edæ ængö cæte bai inte tocæcäimpa,” ante Itota apäñegacäimpa.

Wëñænäni inänite gampo cæcadinque Itota waa apäñecä

(Mäateo 19.13-15; Mäadoco 10.13-16)

¹⁵Ayæ ate wadäni, Wëñænäni inänite Itota pönö gampo cæcadinque waa apäñecæcäimpa, ante cædinque tömengä weca guiyänäni inänite ænte pö ænte pö cædäni adinque tömengä miñä nê godäni guiquënë, Ænte pönämaï iedäni, ante Baa änäni. ¹⁶Adinque Itota wæætë wëñænäni inänite aa pecä pönönäni tömengä miñä nê godäni inänite apäñecantapa.

—Wēñænāni inānite botō weca ee amīni poncædānimpa. Īñæmpa mānināni nāni pōnēnō baī adobaī pōnēnāni inte edæ Wængonguī Awēnē Odeye nempo do quēwēnāni inānipa. Īnīnque mīnitō ĩñōmō wēñænāni inānite Baa ānāmaī iedāni. ¹⁷ Edæ nāwangā apānebo ēñēedāni. Wēñængā do pōnengā inte Ao angā ingā baī Wængonguī Awēnē Odeye ingante do pōnēnīnque nē Ao ānāni ĩñōmō tōmēnānīque tōmengā nempo guīdīnque quēwēnānipa. Wadāni guīquēnē Wængonguī Awēnē Odeye ingante Baa ante pōnēnāmaī ināni guīquēnē tōmēnāni ædō cæte tōmengā nempo guīdīnque quēwēnguīnānīi, ante Itota apānegacāimpa.

Māincoo nanguī ēacā inte Itota weca ponte apānecampa

(*Māateo 19.16-30; Māadoco 10.17-31*)

¹⁸ Mānīnedē Itota ingante wacā awēnē angantapa.

—Awēnē nē waa Odōmōmi apānebi ēñēmoe. Botō æbānō cædinque wānāmaī wantæpiyæ quēwēmaimoo.

¹⁹ Āñongante Itota tōmengā ingante,

—Wængonguī adocanque nē waa cæcā ĩñongante bitō botō imote, Nē waa cæbi imīpa, āmīi. ²⁰ Ānīnque Itota godōmenque apānecantapa. Īmāmaī cæedāni, ante Wængonguī nānō wææ angaiñō ante bitō tōmēmi edæ do ēñēmīpa. “Bitō nānōogængā ināmaī ĩñongante bitō godō guēa mōnāmaī iē. Wacā ingante godō wānōnāmaī iē. Wacā quī adīnque awēmō ænāmaī iē. Wacā wēnæ wēnæ cæcā atabopa, ante godō babæ wapiticæ ānāmaī iē. Wæmpocā ingante wānā inante waa adīnque tōmēna inate godō waadete cæe,” ante wææ yewæmongacāimpa, ante bitō edæ do ēñēmīpa, angantapa.

²¹ Ante apānecā ēñēnīnque māningā awēnē wæætē,

—Botō mānīnō bitō ānō baī tōmānō ante ēñente cædinque pægaboī ae.

²² Ante apānecā ēñēnīnque Itota wæætē,

—Adodeque ayæ ēñente cæquēnēmi imīpa, ante āmo ēñēe. Ōōnædē bitō waēmoncoo ænguīnque edæ imæca bitō mānīncoo tōmancoo godonte ænīnque bitō ænīnta wæætē ōmæpodāni inte wædāni inānite tōmanta godōmi æncædānimpa. Ayæ edæ botō imote tee empote pōe.

²³ Angā ēñente wædinque tōmengā māincoo nanguī ēadongā inte mānīncoo beyænque ante pōnēnīnque māningā awēnē ĩñōmō wæwente bacantapa. ²⁴ Īnīnque Itota tōmengā ingante gomō adīnque,

—Wængonguī Awēnē Odeye nempo guīite quēwēncæte ante cædinque waodāni ōmæpodāni inte botō mīñæ pōnānipa. Māincoo nanguī ēacā guīquēnē æbānō cæte ōmæpocā inte botō mīñæ ponte guīite quēwēnguīgāā, angantapa. ²⁵ Cāmeyo ĩñōmō guīyangā ingampa diyæ daagō guīyampite pædæ tacāā. Īnīnque cāmeyo pædæ tadāmaī ingā baī nē ēacā ĩñōmō adobaī ingampa. Tōmengā nāmā ayongā ñænængā inongā inte edæ æbānō cæte Wængonguī Awēnē Odeye nempo do wānē guīite quēwēnguīgāā.

²⁶ Mānōmaīnō ante Itota apānecā ēñēnīnque nē ēñēnāni wæætē,

—Īñæmpa mānōmaī ĩ inīnque æcānō wānē guīite quēwēnguīgāā.

²⁷ Ante wæyōnānite,

—Waomīni mīni, Ædō cæte cæquīi, ante mīni wædō incæ Wængonguī ĩñōmō do cæcampa, ante Itota apānecā.

²⁸ Ēñente wædinque Pegodo,

—Awënë ēñēmi. Mōnitō ēadincoo owæ caate bitō miñæ tee empo pōmōni abipa.

²⁹ Āñongante Itota tōmēnāni inānite wæætē,

—Mīnitō nāwangā oncodo tao godinque mīnitō nānōogængā ingante mīnitō tōniñadāni inānite wæmpoda inate wēñænāni inānite ēmō cæte botō miñæ pōmīnitapa. Īnque iīmaī ante nāwangā āmopa. Æcānō Wængonguī Awënë Odeye beyænque botō miñæ mǎnōmaī pōna iñōmō, ³⁰ tōmengā iñōmō inguipoga quēwēn-
inque nānō ēmō cædincoo adopocoo ānque ayæ wæætē godōmenque nanguī æncæcāimpa. Ayæ iīncayæ ate öñædē godinque edæ tōmengā cōwē wantæpiyæ wænāmaī quēwencæcāimpa, ante āmo ēñēmaimīnipa, angacāimpa.

Itota, Wæncæboimpa, ante wæætē adodō ante apænecā

(*Māteō 20.17-19; Māadoco 10.32-34*)

³¹ Ānque tōmengā miñæ, Dote, ante nāni gocabo inānite Itota nānēnē ænte māocā goyōnāni iīmaī ante apænecantapa. “Nōwo iñōmō mōnō edæ Eedotadēē iñōmō æicæimpa. Wængonguī beyæ nē apænegaināni iīmainō ante yewæmōnque, Nē Waocā iīncayæ ate ēñate pæcā adinque tōmengā ingante æbānō cæquināni, ante yewæmongadānimpā. Nōwo mōnō Eedotadēē iñōmō æi pō gongæmō ate edæ mǎniñō dodāni nāni angaiñō baī edæ do iīnque bacæimpa. ³² Botō edæ mǎni-
modō ēñagaiimo iñōmote oodeoidi botō imote ö ænque wadāni inānite pædæ māo godōnāni ö ænque tōmēnāni wæætē tawimæ botonga towæ tǎnongadinque botō imote badete todinque pīinque wīwa anguīnāni inānipa. ³³ Ayæ æmon-
taimenca tæi tæi pānāni āmogate wæyōmote botō imote godōmenque wænōnāni wæncæboimpa. Wæætē mēōnaa go adoönæque iñonte edæ botō do wænimo inte edæ nāni ömæmonte wæætē quēwencæboimpa,” angantapa.

³⁴ Tōmengā miñæ nē godāni iñōmō mǎniñō, Tōmengā æbānō bate wæquingāā, ante adodeque incæ edæ ēñēnāmaī ingadānimpā. Tōmengā nānō apænedō edæ wē wodonte baī iñonte tōmēnāni öñōmoncaque ēñēnque, Æbānō ante apænecāā, ante wīi edonque ēñēnānitapa.

Itota angā ate babetamongā iñingā incæ do waa acampa

(*Māteō 20.29-34; Māadoco 10.46-52*)

³⁵ Itota mǎniñō godinque Eedicoo iñōmō obo pōñongā onguīñængā babetamō inte nē wædongā inte taadō wedeca, Pōnōmi æmoe, ante ānecōnongāimpā. ³⁶ Nanguī ināni cægōnāni ēñēnque babetamongā iñōmō, Quīnante cægōnāni, ante wæy-
ongante, ³⁷ Itota Nāatadeta quēwēningā inte edæ nōwo wodo tebæ gocampa, ante apænedāni. ³⁸ Ēñēnque tōmengā iñōmō aa pedinque,

—Itota ēñēmi. Bitō Awënë Dabii wodi pæimi inōmi inte botō wædō ante edæ nōwo waadete pōnō waa cæe.

³⁹ Āñongante tǎno godāni wæætē tōmengā ingante, Apocænē inguēnē ānewēē, ante wææ āñōnāni tōmengā godōmenque nanguī ānque,

—Awënë Dabii pæimi inōmi inte edæ botō wædō ante pōnō waadete waa cæe, ante wæcā.

⁴⁰ Wædinque Itota næ gongænque, Tōmengā ingante ænte māmōmīni pongædāni. Angā obo ænte māmōnāni pōñongante Itota,

⁴¹ —Æbānō ante āmii. Bitō beyæ quīnō cæquīmoo.

Āñongante,

—Awënë, wëenë botö ëmongai bai cæbi acæboimpa.

⁴² Angä ëñëninque Itota wæætë,

—Wëenë bitö ëmongai bai abawe. Edæ wede pönëmi inte edæ waa bamömipa.

⁴³ Ante nänö äñedë në babetamöningä do waa bamöningue Itota miñäë godingue Wængongui ingante, Bitö ñäö apäite bai ëmömi inte edæ waa cæbi æmopa, ante togacäimpa. Mänömai cæcä adingue tömänäni adobaï Wængongui ingante waa adingue, Bitö ñäö bai ëmömi inte waa cæbipa, ante togadänimpa.

Itota tönö Taqueo

19 Itota mänü Eedicoo pöningue tæcæ wodo tebæ gocä ingantapa. ² Mänüömö adocanque Taqueo nani änongå iñömö tömengä odömäno awënë beyä në äñäni awënë inongä inte nanguï mäincoo ëadongä inongäimpa. ³ Tömengä ñöwo, Itota æcänö ingää, ante acæte ante ponte ayongä wadäni nanguï inäni wææ ongönäni adingue, Botö ocäa pöni inömo inte edæ Itota ingante ædö cæte aquimoo, ante wæcantapa. ⁴ Adämai inte wæyongante wadäni, Itota iinö gämänö pö wodo tebæ goqingä, ante tededäni ëñëninque tömengä Itota ingante acæte ante pogodo täno gote awäa ticämodöwäa nani äwäa daëwa æi näë gongænte a ongongantapa. ⁵ Itota obo pöningue æmö ayongä Taqueo a ongongä adingue tömengä ingante,

—Taqueo, quingä wææe. Ñöwoönæ edæ pö bitö oncönë ëñaquënëmo imopa.

⁶ Angä ëñëninque Taqueo quingä wææ ti wæäninque, Ao, botö oncönë waa poncæbiimpa, ante watapæ todingue edæ tömengä oncönë mämongä pongacäimpa. ⁷ Itota mänömai cæcä adingue wadäni, Æ në wiwa cæcä weca Itota quimäë ëñacæ gocäa, ante tömänäni piinte tedegadänimpa. ⁸ Taqueo iñömö edæ tömënäni ayönäni ængä gantite adiyä ongöningue mönö Awënë ingante,

—Awënë ëñëmi. Botö mäincoo tæcæguedencoo pä cædingue ömæpodäni inte wæwënäni inänite ñöwo godömo äñäni æ. Ayä botö wacä qui ante babæ äningue ö æmo wæcä iningue wëenëñedë botö ö änincoo adopocoo bai incæ godömenque mempoga go mempoga godömo æncæcäimpa.

⁹ Ante apænecä ëñëninque Itota wadäni inänite apænedinque,

—Taqueo adobaï Abadäo wodi päingä iñongante botö në æmo inömo inte tömengä oncönë nani owocabo quëwencädänimpa, ante ñöwoönæ pontabopa. ¹⁰ Botö Waobo ëñagaïmo iñömö æmo beyænque quëwencädänimpa, ante cædingue wë womonte bai inäni inänite diqui diqui mincæ pontabopa, ante Itota apænecäimpa.

Minata nani godonte äinta ante odömongampa

(Mäteo 25.14-30)

¹¹ Mänömai apænecä ëñëñäni inte tömënäni, Itota Eedotadëe obo pongampa, ante adingue, Wængongui Awënë Odeye nempo mönö oo pöni quëwenguingue impa, ante pönente edæ oda cädänitapa. Iningue Itota, Wængongui Awënë æbänö cæquingäa, ante ëñencädänimpa, ante imæca quëwënäni nani cæinö ante odömöningue apænecantapa.

¹² Iimainö ante apænecantapa. “Wacä adocanque awënë odeye päingä inongä inte, Botö gobæ wabæca gote imæca pancabaa awënë odeye bate pömoedäni. ¹³ Äningue tömengä ingante në cädäni diete ganca inäni inänite äñete pönäni ate tömengä oodo minata nani äinta wantæpiyæ cæte nani äinta incæ äningue adocanque ingante adotaque pædæ wacä ingante adotaque pædæ godöningue tömänäni inänite

godongä adopota adopota ännänpa. 'Minitö mäninta änninque godonte äi godonte äi cædinqe, Yebængäimpa, ante botö gote pompoga cædäni.' ¹⁴ Ante wadæ gocä adinqe tömengä nempo quëwënnäni guiquënë tömengä ingante piinte cædinqe pancadäniya inänite änninque, Minitö tömengä miñä godinque awënëidi inänite gode änninque, Mäningä iñömö wii mönitö awënë odeye bacæcäimpa, ante wææ ämini ëñencædänimpa, ante da godönäni godänitapa," ante apænedinque Itota ayæ godömenque apænecantapa.

¹⁵ "Incæte awënëidi do ännäni ate awënë odeye badinque tömengä ömæ pongantapa. Pönninque tömengä, Botö beyæ nè cædäni iñömö godonte äi godonte äi cædinqe æbänö godömenque nanguï edæ ænte mänänii, ante acæte ante cædinqe, Botö oodo minata nè ännänäni inänite äñete pöedäni, angä. ¹⁶ Äñete pönäni ate tömengä weca täno pöningä iñömö, 'Awënë ëñëmi. Bitö oodo minata adotaque incæ önompo tipæmpoga mänimpota edæ ñöwo yebænte bapa.' ¹⁷ Ante apænecä ëñënninque tömengä ingante, 'Botö imote nè cæbi imi waa cæbi æmopa. Wædænque incæ ännimi inte bitö ædæmö aate cæbipa, ante adinqe botö önompo tipæmpoga nänni quëwëñömö quëwënnäni iñönänite bitö nempo pönömo änninque nè ämi inte aabi æmoe.' ¹⁸ Ante tömënnäni awënë angä ate ayængä pönninque, 'Awënë ëñëmi. Bitö oodo minata adotaque incæ önompo æmæmpoque mänimpota ñöwo yebænte bapa.' ¹⁹ Ante apænecä ëñënninque tömengä ingante adobäi apænedinque, 'Önompo æmæmpoque nänni quëwëñömö quëwënnäni iñönänite botö bitö nempo godömo ænte aabi æmoe,' angantapa," ante Itota apænecantapa.

²⁰ Ayæ godömenque apænedinque Itota, "Awënë angä ate tömengä guiquënë pönninque, 'Awënë ëñëmi, tömëmi minata æe. Botö weocodë ædæmö wini caadinque wææ aate mantabopa. ²¹ Änninque, Bitö wii bitö ñönönï incæ wacä ñönönï incæ ö ænte mämi awædö. Ayæ wii bitö mimi pæ incæ wacä mingä pædi incæ tä pebi imipa, ante pönente wædinque cætabopa. Bitö täëmö inömi imipa, ante guinente wædinque botö oodo minata botö änninta wini caapote weocodë ædæmö wææ aabo ae.' ²² Äñongante tömengä awënë iñömö, 'Iñæmpa bitö nè wiwa cæbi imi nämä bitö tededö beyænque bitö imite apænte ancæboimpa. Botö täëmö imo inte wii botö ñönönï incæ wacä ñönönï incæ ö æmopa. Wii botö mimo pædi incæ wacä mingä pædi incæ edæ do tä pebo imopa. Mänömaï impa, ante bitö dicæ ëñënnämaï imitawogaa. ²³ Do ëñënnimi inte bitö ëñente edæ cæquënëmi imitapa töö. Botö oodo minata godonte äinta änninque edæ nè godonte ännäni weca baanco weca quinnante wii guidonte æmitawo. Mänömaï cæbi bai botö ocæ æmænte pönninque edæ botö qui do änninque wadäni nänni guidöninta tönö edæ do æncædömoimpa töö,' angampa."

²⁴ "Änninque godongämæ ongönäni inänite awënë apænecantapa. 'Minitö ñöwo iingä minata nänö næänninta ö änninque edæ minata önompo tipæmpoga nè næængä ingante pædæ godömini æncæcäimpa.' ²⁵ Angä ëñënninque tömënnäni, 'Awënë iñæmpa, iingä diete ganca minata do mangä apa ämii.' ²⁶ Ante wæyönäni awënë wæætë, 'Iñæmpa nè ëadäni inänite tömänäni inänite godömenque godonte ingäimpa. Wæætë edæ ëadämaï inte ömæpocä ingä guiquënë tömengä nänö ëadincöo wædænque pönï i incæte edæ ö ænte dæ ba wæcæcäimpa. Ante apænebo ëñëmaïminipa. ²⁷ Ayæ botö imote nè piinäni guiquënë botö imotedö ante apænedinque, Bitö wii mönitö awënë odeye bacæcäimpa, ante nè Baa ännäni guiquënë, tömënnäni inänite botö weca ænte pönninque botö ayömo wænömini wæncædän-

impa, ämopa, 'awënë angantapa. Mäninque ante odömonte apänebopa," ante Itota apänegacäimpa.

Eedotadëe iñömö Itota pongampa

(Mäateo 21.1-11; Mäadoco 11.1-11; Wäö 12.12-19)

²⁸ Mäninganca apänedinque Itota Eedotadëe æicæte ante täno gocantapa. ²⁹ Godinque Odibowænquidi nani anquidi ontacamö goinö Betapaguee nani quëwëñömö obo pöinque Betänia ganca pöinque Itota tömengä miñä nê goda mënaa inate da godöinque, ³⁰ iïmai angantapa.

—Mänii nani quëwëñömö ongö amina. Tömëñömö go guite ayömina bodo wë picängä incæ wacö ingante mongänämai iningä inte niani nãingä a ongongå acæminäimpa. Adinque nï cæyænte ænte pöeda. ³¹ Ayæ wacä minatö iminate, Qui-nante nï cæyæminaa, ante wææ angä ininque minatö wæætë, Mönö Awënë nänö ænguënönö ante æmönapa, ante apäneeda, angantapa.

³² Tömengä nänö nê da godöna wadæ gote ayöna Itota nänö äni bai bodo wë a ongö. ³³ Adinque nï cæyæñöna bodo wë nê eadäni tömëna inate,

—Bodo wë quimæ nï cæyæwëminaa.

³⁴ Wææ äñönänite tömëna wæætë,

—Mönö Awënë nänö ænguënönö ante æmönapa.

³⁵ Ante äna ëñëinque Ao änäni ininque awæ nã cæyæñömö nï cæyænte bodo ingante töi töi ænte pönatapa. Ayæ ænte pöinque tömëna weocoo yabæcooque æidämæ wo cæyabædinque äna ate Itota wænömënæca inö æi tæ contate gocantapa. ³⁶ Bodoga æi tæ contate taadonque goyongä tömengä nänö goquino ante waodäni weocoo wæænö bee podöwadänitapa. ³⁷ Odibowænquidi wæænömëmö iñömö pönömenque pöñongante tömengä miñä nê godäni godongämæ nani poncabo tömänäni inontobæ nanguï todinque ogæ tededänitapa. Itota bamönengæ nanguï cæcä atamönipa, ante nani adinö ante pönëinque Wængonguï ingante waa ate apänedänitapa.

³⁸ —Möni quëwenguinque impa, ante, Badogaa, ante tomönipa. Awënë Wængonguï ëmowo beyænque pömi ininque bitö toquinque edæ Wængonguï bitö imite waa cæcæcäimpa. Öönädë nê quëwengä pönö piyænë cæcänö anguënë. Æibæ pöni quëwënongå iñömö nãö bai ëmongänö anguënë. ³⁹ Ante nanguï inäni godongämæ godinque ämotamini ante bai äñönäni pancadäniya Paditeoidi inönäni inte Itota ingante,

—Nê Odömömi ëñëmi. Bitö miñä nê godäni inänite wææ ämi apocænë inänie.

⁴⁰ Äñönänite tömengä wæætë,

—Minitö iminite näwangä ämopa. Waodäni pæ wëenedäni ininque dicacoo incæ botö imote waa ate bai edæ yedæ ämainänipa, ante Itota apänegacäimpa.

⁴¹ Ayæ pönömenque pöinque Eedotadëe gomö adinque Itota mäniiñömö quëwëñäni inänite ante pönëinque Ca ca wædinque, ⁴² iïmai angantapa. "Minitö iñömö edæ ñowoönæ mini gänë pönenguinque botö imote edonque pöni adinque Ao ämini bai waa incædonimpa. Incæte minitö, Æbänö cæte gänë pönenguimöö, ante edæ wë wodonte bai i ininque minitö adämai iminipa. ⁴³ Iincayæ ate minitö iminite nê piinäni incæ minitö wææ cæinca gäänë pönö tee mongate godämæ wææ ongönäni adinque minitö edæ ædö cæte tao wodii winonguimini. ⁴⁴ Botö minitö weca pömo incæte minitö awincaque adinque, Wængonguï ñowoönæ ponte

æncæcäimpa, ante dicæ amīniyaa. Mänömaï beyænque nē pīnāni iñömö mīnītō imīnite bæ tadāni tæ go wææñōmīnite wænōnāni wæncæmīnimpa. Ayæ wēñænāni wææ cæte iñömö quēwēñōnānite tōmēnāni inānite edæ wænōnāni wæncædānimpa. Dica mīni mænongainca incæ bæ tadāni ate dica adocaque incæ wænōmēnæca iñō ongōnāmaï ingæimpa,” ante Itota apænecacäimpa.

Wængonguī oncō tæiyæ waēmō bacæimpa, ante cæcampa

(*Mäateo 21.12-17; Mäadoco 11.15-19; Wäö 2.13-22*)

⁴⁵ Ayæ Wængonguī oncō ñænæncönē yabæcönē go guidinque Itota mäniñömö nē godonte æncæte ante nē mänāni inānite da tadongä tao goyōnānite, ⁴⁶ Ayæ tōmēnāni inānite angantapa.

—Wængonguī beyæ iīmañō ante yewæmongatimpa. “Waadāni botō oncönē pō guidinque botō imote apænecadānimpa,” ante Wængonguī angä incæte mīnītō wēnæ wēnæ cæmīni beyænque Wængonguī oncō incæ nē awēmō ö ænāni nāni womōincönē bai wentamō bapa tōö.

⁴⁷ Ayæ iīmō iñō iīmō iñō Wængonguī oncō ñænæncönē yabæcönē go guidinque Itota odömōnte apænecä ēñēnānitapa. Mäniñömö, Wængonguī qui, ante nē godōnāni ñænænāni tönō nē odömōnāni tönō tōmēnāni awēñēdi guiquēñē, Itota ingante wænōnte wido cæcæimpa, ante ancaa cæyōnāni, ⁴⁸ wadāni tōmānāni, Tōmengä æbānō odōmongäa, ante ēñē cōnāni adinque awēñēdi wæætē, Tōmengä ingante mōnō ædō cæte wido cæquiī, ante wædinque ñimpo cægadānimpa.

Awēñē imipa, ante æcänō änaï, ante Itota ingante äñānipa

(*Mäateo 21.23-27; Mäadoco 11.27-33*)

20 Iīncayæ ate Itota Wængonguī oncō ñænæncönē yabæcönē go guite waodāni inānite odömōnte apænedinque Wængonguī Awēñē ingantedō ante watapæ apænecä ēñēnānitapa. Apænecä ēñēñōnāni, Wængonguī qui, ante nē godōnāni ñænænāni tönō nē odömōnāni iñömö nē aadāni nāni Picæncabo tönō tōmengä weca ponte äñānitapa. ² Ponte apænedinque,

—Æcänō nē angä inte bitō imite angä cæbii. Bitō imite æcänō, Nē ämi babipa, äna ēñēninque cæbii.

³ Ante äñōnānite Itota,

—Botō wæætē mīnītō imīnite ämo ēñente apænemīni ēñēmoedāni. ⁴ Wäö wodi iñömö quīnante æpænē guidongantawo, ante pōñemīni. Öönædē nē owocä angä ēñente cæcantawoo. Waodānique äñāni ēñente cæcantawoo. Æbānō ante pōñemīni. Mīnītō wæætē apænemīni ēñēmoedāni.

⁵ Äñongä tōmēnāni iñömö nāni caboque tededinque, “Iñæmpa mōnō, Wængonguī öönædē iñō angä Wäö ēñente cæcampa, ämō bai Itota wæætē, ‘Quīnante tōmengä ingante pōñēnāmaï imīni,’ ante mōnō imonte piīncædongäimpa. ⁶ Ayæ wæætē, Waodānique äñāni ēñente cægacäimpa, ämo bai godongämæ ongōnāni iñömö, Wængonguī beyæ nē apænecä Wäö wodi ingacäimpa, ante nē pōñēnāni inte tōmānāni mōnō imonte dicaca tacadāni wæncædōmōimpa.”

⁷ Ante pōñente wædinque tōmēnāni wæætē Itota ingante, Wa. Æcämē angä ēñēninque Wäö wodi cægacäi, ante ēñēnāmaï imōnipa, äñāni. ⁸ Wædinque Itota wæætē,

—Botō adobaï, Æcänō nē angä inte pōñō äna ēñēninque botō mäñōmaï cæboo, ante mīnītō imīnite apænedāmaï incæboimpa, angacäimpa.

Nē aadāni inguēnēnāni incæ wīwa cædānīpa, ante

(Māateo 21.33-44; Māadoco 12.1-11)

⁹Ayæ godongāmæ ongōnāni inānite Itota, Wængonguī Awēnē æbānō cæcāā, ante ēñencædānīmpa, ante īmæca quēwēnāni nāni cæinō ante odōmōninque īīmaī apænecantapa. “Onguīñængā adocanque yowementacodē minte pæyonte wadāni ōmæ wite aate nē tā pedāni inānite, Botō yowementacodē incæ ōmæ wite aaedāni. Aayōmīnīte botō, Mīnitō quī, ante pancamonga pōnōmo æncæmīnīmpa, angā Ao ānāni ate nē ēacā īñōmō edæ wantæpiyæ wabæca quēwēncæ gocantapa. ¹⁰Yowedepo īīnque bayedē nē cæcā ingante nē ēacā īñōmō, Bitō yowementacodē nē aadāni weca godīnque pancamonga āmī ænīnque botō weca wæætē māmōmī æmoe, angā. Gote pongā adīnque yowementacodē nē aadāni guīquēnē nē æncæ pōnīngā ingante bæi ongonte tæi tæi pānīnque da tadōnāni ōmæpocā inte gocantapa. ¹¹Ayæ wæætē nē ēacā īñōmō wacā tōmēngā ingante nē cæcā ingante angā gote pongā adīnque yowementacodē nē aadāni adobaī tæi tæi pānāni wæyongante, Guingo imonte wæcæcāīmpa, ante godō wīwa cædāni wæyongante da tadōnāni ōmæpocā inte gocampa. ¹²Ayæ mēnaa īnate da godongā ōmæpoda pōna adīnque nē ēacā īñōmō wacā nē cæcā ingante angā gote pōñongante tōmēnāni godō mæ yete wido cædānītapa,” ante odōmōninque Itota godōmenque apænecantapa.

¹³“Mānōmaī cædānīpa, ante ēñente wædīnque yowementacodē nē ēacā īñōmō, ‘Botō īñōmō æbānō cæquēnēmo īmoo, ante wædīnque, Botō edæ īīmaī cæcæboīmpa. Botō wēngā onguīñængā botō nē waadecā īñongante da godōmo gocæcāīmpa. Tōmēmo wēngā da godōmo gocā adīnque tōmēnāni wabānō guīñente wædīnque ee abāīnānīpa,’ ante pōnēnīnque da godongā. ¹⁴Gote dicæ pongā adīnque yowementacodē nē aadāni guīquēnē, ‘Tōmēngā ingampa. Wæmpocā māīncoo īnī edæ īīngā īñōmō nē ængūīngā ingampa cæmōō. Mōnō edæ māo wænōmō wēngā ate edæ mōnō quī babāīmpa.’ ¹⁵Ånewēnīnque tōmēnāni tōmēngā ingante wææ cæte īñōmō yabæque wido cædīnque godōmenque wænōnāni wængantapa.”

Ante Itota, Mānīnque ante apænebopa, ante tōmēnāni inānite angantapa. “Mānōmaī cædāni adīnque yowementacodē nē ēacā īñōmō tōmēnāni inānite æbānō cæquīngāā, ante pōnēmīni. ¹⁶Tōmēngā edæ do pōnīnque nē aaquēnēnāni inānite godō wænōnīnque wadāni inānite wæætē yowementacodē godongā ænīnque nē aadāni bacædānīmpa.”

Itota mānōmaī angā ēñente wædīnque godongāmæ ongōnāni īñōmō,

—Mānōmaī cædāmaī inguēnē ānewēē, ante wædānītapa.

¹⁷Īnīnque Itota tōmēnāni inānite gomō adīnque,

—Īñæmpa ēñēnāmaī cæmīni īñōmīnīte Wængonguī pānāmaī ingūīngāā, ante pōnēmīnītawo. Īnīnque mīnitō, Īīmaī ante quīnante yewæmongatīmpa, ante pōnēmīni.

“Dica ænte adīnque, Wēnæ wēnæ inca, ante nē mānōnāni nāni wido cædīnca incæ gomonga wæmonca inca īnīnque tāno nāni ñōnōnīnca bæbængapa do bacapa,” ante yewæmongadānīmpa. ¹⁸Botō īñōmō mānīī dica wæmonca bāī īñōmo inte āmo ēñēnīnque nē wæcā īñōmō tōmēngā īñōmō mānīncaā tæ go wæænīnque tobænte wæte bāī botō ōnōwa gāānē ædæ wææncæcāīmpa. Wæætē æcānō ingante Wængonguī pīīnte mānīncaca tacacā īnaa tōmēngā guīquēnē quīēmē bāī yaintai bāī goquīngānō anguēnē, ante pōnēmīnīyaa, ante Itota apænegacāīmpa.

¹⁹ Ante nē aaquēnēnāni nāni cæinō ante odömōninque Itota apæneceā ēñente wæd-
inque nē odömōnāni tōnō, Wængonguī quī, ante nē godōnāni ñænænāni iñōmō,
Īñæmpa mōnō imonte piinte angā awædō, ante pōnēnānitapa. Īninque tōmēnāni,
Mōnō ñōwo pōnī tōmengā ingante bæi ongongæimpa, ante cædānitapa. Incæte tæcæ
bæi ongoncæ cædinque, Wadāni pīnāni wæcæ wæ, ante wædinque ee adānitapa.

Tæiyæ Awēnē nānō äintamō ante tededānīpa

(*Mäteo 22.15-22; Mäadoco 12.13-17*)

²⁰ Īninque, Mōnō Itota ingante bæi ongōninque odömāno gobedōnadodo awēnē
nempo godomō æninque tōmengā wæætē nē angā inte edæ Itota ingante apænte
ancæcäimpa, ante ñænænāni incæ tōmengā ingante cōwā adānitapa. Ayæ wadāni
inānite äninque, Minitō Itota miñæ tee empote gote nöingā ante bai apænedinque
wæætē babæ cædāni. Babæ cæmīni beyæ tōmengā adodeque incæ wapiticæ tedecā
ēñēninque mīnitō ocæ émænte ponte apænemīni ēñencæmōnīpa, ānāni ēñente
godinque ñænænāni nāni āninō bai babæ cædānitapa. ²¹ Īninque ñænænāni nāni nē
da godōnināni iñōmō Itota weca pōninque,

—Awēnē nē Odömōmi ēñēmi. Bitō apænedō nō impa, ante do ēñēmōnīpa. Bitō
ayōmi mōnō waocabo adoyōmō pōnī imōnīpa, ante adinque bitō tōmāmōni imōnite
adoyōmō pōnī cæbi æmōnīpa. Ayæ, Wængonguī taadō ante bitō nō pōnī odömōmi
imīpa, ante ēñēmōnīpa. ²² Īninque apænebi ēñēmōnīi. Odömāno gobiedōno beyæ
ante tæiyæ awēnē Tetædo tiguitamō nānō änintamō ante æbānō wæcæ yewæmonte
ī, ante ēñencæte ante wæmōnīpa edæ. Godonte edæ waa cæte intawo. Wæætē wēnæ
wēnæ cæte intawo.

²³ Äñōnānite Itota iñōmō, Tōmēnāni wēnæ wēnæ ancæte ante babæ cædānīpa,
ante do ēñente wædinque,

²⁴ —Deēnadio tiguitamō odömōmīni aboedāni. Æcānō awinca bai yewæmonte
badonte ī. Æcānō emōwo ante yewæmonte ongō, ante edæ apænemīni ēñēmoedāni.

Äñongante,

—Awēnē Tetædo awinca bai yewæmonte badonte impa. Adocā emōwo ante
yewæmonte ongō amōnīpa.

²⁵ Ante apænedāni ēñēninque,

—Awēnē Tetædo quī ī Īninque edæ Tetædo ingante godongæimpa. Wæætē Awēnē
Wængonguī quī ī Īninque Wængonguī ingante godonguī ī apa ānewēmīni.

²⁶ Ante Itota tōmānāni ayōnānite nō apæneceā ēñente wædinque ñænænāni nāni
da pōnōnināni wæætē, Mōnō ædō cæte piinguī, ante guingo imonte wædinque pæ
wēengadānīpa.

Ædō cæte ñāni ömæmonguī, ante wædānīpa

(*Mäteo 22.23-33; Mäadoco 12.18-27*)

²⁷ Tadoteoidi nē, Waocā wæninque ñāni ömæmōnāmaī æmæwo wængampa, ante
nē ānewēnāni inte Itota weca pōninque, Mōni ānō ante apænebi ēñēmaimōnīpa,
ānānitapa.

²⁸ —Awēnē nē Odömōmi ēñēmi. Mōnō beyæ ante Mōitee wodi iūmaī ante wæcæ
yewæmongacäimpa. Onguīñangā monte ate wēñæ tapæidāmaī inte wængā Īninque
tōmengā tōññacā incæ owæmpoingā ingante mōninque, Botō tōññacā wodi wēnāni
wæætē pæcædānīpa, ante tapæicæcäimpa, ante yewæmongacäimpa. ²⁹ Īninque

wadāni iīmaī cædānitapa, ante apænemōni ēñēe. Edæ ōnompō æmæmpoqwe go mengāa nāni caipæ iñōnānite bamoncadengā mōninque wēñæ tapæidāmaī manguiwēninque edæ nāñe wængā. ³⁰ Ate ayæmengā wææ adocā ingante mōninque wēñæ tapæidāmaī inte nāñe wængā. ³¹ Ayæ wææ wacā mōninque adobaī nāñe wængā, ayæ wææ wacā mōninque nāñe wængā, ayæ wææ wacā mōninque nāñe, ayæ wææ wacā mōninque nāñe, ayæ wææ wacā mōninque nāñe wængampa. Ōnompō æmæmpoqwe go mēnaa ināni owæmpoingā ingante mōninque edæ wēñæ tapæidāmaī inte edæ tōmānāni nāñe wænāni. ³² Ate onquiyængā tōmangā nāñe wængā. ³³ Ininque, Mōnō nāni ōmæmonguiōnæ, ante mīni äōnæ iñonte māningā owæmpoingā iñōmō æcānō nānōogængā baquingā. Edæ tōmengā ingante iñōmō edæ tōmānāni manguiwengadānimpa.

³⁴ Äñōnānite Itota,

—Inguiwoga quēwēninque edæ mīni waocabo iñōmō do mōminipa. Wacā ingante do godō nānōmīni mongampa. ³⁵ Wæætē, Miinguiwoga bayonte iñānique eyepæ inte nāni ōmæmonte öönædē æite quēwencædānimpa, ante Wængongui nānō nē angaināni iñōmō tōmēnāni mōnāmaī ininque wadāni inānite godō nānōnāmaī incædānimpa. ³⁶ Ayæ Wængongui anquedoidi bai iñōnāni inte tōmēnāni Wængongui nānō nē angaināni iñōmō ædō cæte wæætē wænguināni. Tōmēnāni nē nāni ōmæmongaināni iñōnāni inte edæ Wængongui wēñænāni inānipa. ³⁷ Wæætē Mōitēe wodi incæ ocāñeque bæcoīñeque ante nānō yewæmongainta adotaa yewæmōninque, Waodāni dobæ nāni ōmæmonte quēwencædānimpa, ante edonque odōmongacāimpa. Tōmengā iīmaī ante yewæmongacāimpa. Mōnō Awēñe inongā iñōmō Abadāo Wængongui ingaingā inte ayæ Itæca Wængongui ingaingā inte adocā Acobō wodi Wængongui ingänō anguēñe, ante yewæmongacāimpa. ³⁸ Inæmpa Wængongui iñōmō nē quēwēnāni Wængongui inongā inte tōmengā nē wængaināni Wængongui ināmaī ingampa. Wæætē tōmengā ayongante do wængaināni incæ tōmānāni mīñāni quēwēnānipa.

³⁹ Ante apæneyongante nē odōmōnāni pancadāniya,

—Awēñe nē Odōmōmi ēñēmi. Bitō nōingā ante apænēbi awædō, ante apænedānitapa.

⁴⁰ Ayæ wadāni tōmānāni guññente wædinque godōmenque änāmaī ingadānimpa.

Codito æcānō Pæingā inongā ingā, ante

(Māteō 22.41-46; Māadocō 12.35-37)

⁴¹ Ayæ tōmēnāni inānite Itota,

—Awēñe Dabii wodi Pæingā inongā wææ Codito ingampa, ante quīnante änāni, ante pōnēmīni, angantapa. ⁴² Inæmpa Dabii wodi incæ tōmengā nānō ämotamīni äintaa iīmaī ante yewæmongacāimpa.

“Botō Awēñe ingante apænedinque Awēñe Wængongui incæ iīmaī ante apænegacāimpa.

Bitō botō tōmēmæ inō tæ contate a ongōe.

⁴³ Ongōñōmite botō bitō imite nē piināni inānite bæ tate cæbo ate,

bitō önōwa gäänē ongōnāni inānite pinā gawacæbiimpa,” ante Awēñe Wængongui apænegacāimpa.

⁴⁴ Codito nē Awēnē ingampa, ante awēnē Dabii wodi nānō nē angaingā inongā inte edæ adocā Codito iñōmō ædō cæte nāēmæ Awēnē Dabii wodi Pæingā inguingā. ante pönenguēnē ānewēmīnii, ante Itota angacäimpa.

Nē wææ odömönāni inānite Itota püingampa

(Māateo 23.1-36; Mäadoco 12.38-40; Odoca 11.37-54)

⁴⁵ Ayæ tōmänāni ēñēē cōñōnānite tōmengā miñæ nē godānique inānite Itota apænecantapa.

⁴⁶ “Cædāmai, ante wææ ante nāni yewæmongainta nē ate odömönāni inānite mīnitō gomō aedāni. Tömēnāni iñōmō doyæncōo wæmoncoo wēñate mongænte todānīpa. Waodāni nāni godonte æiñōmō cægōñōnānite wadāni pō bee tēninque tōmēnāni inānite, Nē odömōmi, bitō imite waa amōnīpa, ante apænedāni ēñēninque edæ nē odömönāni iñōmō nanguī todānīpa. Ayæ tōmēnāni odömōincōnē go guiid-
inque tōmēnāni nāmanque ante pōnēninque wæmompaa pōni tæ contate todānīpa. Ayæ ææmæ becæ godinque tōmēnāni, Botō tāno bete tocäimpa, ante wæmompaa pōni tæ contate bete todānīpa. ⁴⁷ Ayæ owæmpoināni oncō yo mongænte bai cæd-
inque ò æwēnāni inte nē wææ odömönāni iñōmō, Botō imote waa acædānīpa, ante cædinque Wængonguī ingante nöingā apænete bai cædinque babæ cædinque wantæpiyæ tededānīpa. Tömēnāni edæ nāni nanguī pōni pante wæquinque mänō-
mai nāmā beyænque ante cædānīpa, ante adinque mīnitō iñōmō ee gomō aedāni,”
ante Itota wææ angacäimpa.

Owæmpoingā incæ, Wængonguī quī, ante godongampa

(Mäadoco 12.41-44)

21 Itota Wængonguī oncōnē ongonte gomō ayongā nē nanguī ēadāni, Wæn-
gonguī quī, ante nāni wēnoncadedē pō daga daga wēnāni acantapa. ² Ayæ
ayongā onquiyängā owæmpoingā òmæpocā inte ònontamonque mentamonga pō
daga wengā. ³ Adinque Itota iīmai ante apænecantapa.

—Nāwangā ante apænebo ēñēedāni. Wadāni tōmänāni wædænque pōni godonte
bai wīi eyepæ daga wēñōnāni iingā owæmpoingā iñōmō òmæpocā inte wædongā
incæte godōmenque nanguī godonte bai godongā abopa. ⁴ Tömēnāni nanguī ēadāni
inōnāni inte, Quēwenguīnta impa, ante cō cædinque tōmēnāni nāni wīi æiñentaque
ayæ ongōintaque godōnānīpa. Iingā òmæpocā ingā guiquēnē tōmengā nānō quēwen-
guīnta incæ, Wængonguī quī bacäimpa, ante tōmanta edæ daga wengampa, ante
Itota apænecacäimpa.

Wængonguī oncō ñænæncō bæ tate bacäimpa, ante

(Māateo 24.1-2; Mäadoco 13.1-2)

⁵ Wēēñēdē Wængonguī oncō ñænæncō mænōninque wadāni dicacoo wæmon-
coo pōni tee bædāni waa ongoncadompa. Ayæ wacoo wæmoncoo pōni ænte pōn-
inque, Wængonguī quī impa, ante pædæ godōnāni ongōnompa. Nōwo iñōmō Itota
miñæ nē godāni pancadāniya gomō ayōnāni, Dicacoo tōnō wadāni waa pōni nāni
ænte pōnoncoo wæmoncoo pōni ongō amōnīpa, ante tededānitapa. Tedyōnānite
Itota,

⁶—Mänincoo mīni acoo incæ iincayæ ate tōmanca bæ tadāni wæænca adinque panguimæ panguimæ godinque dica adocaque pōni incæ wænōmēnæca ongōnāmai ingæimpa, ante apænegacāimpa.

Oo iinque bacæimpa, ante æbānō ate ēñenguūi, ante

(Māateo 24.3-28; Māadoco 13.3-23)

⁷Mänōmai apænecā ēñēnīnque tōmēnāni wæætē,

—Awēnē nē Odōmōmi ēñēmi. Mānī bitō āninō ante æyedēnō iinque baquūi, ante ēñencæte ante wæmōnīpa. Ayæ, Īmai cæbo ate mīnitō, Oo pōni impa, ante ēñencæmīnīmpa, ante Wængonguī æbānō mā cæquingāā, ante apænebi ēñēmōnie.

⁸Āñōnāni Itota, “Wapiticæ odōmōñōnāni mīnitō wæætē, Mōnō oda cædāmai ingæimpa, ante nāmā wææ aedāni. Edæ Īmai baquī i ataquēdāni. Wadāni nanguī ināni ponte botō ēmōwo ante apænedinque, ‘Cōditobo ĩmopa,’ ante babæ ante tedequīnāni inānīpa. Ayæ, ‘Oo pōni impa,’ ante ponte nanguī ināni tedequīnāni inānīpa. Mänōmainō ante ponte tedequīnānīte mīnitō wæætē tōmēnāni mīñæ tee empote godāmai ĩmæwedāni. ⁹Ayæ, Wabæca awēnē tōnō pō bee tēnīnque wæætēdō wæætē cædapa, ante tēdēdāni ēñencæmīnīmpa. Ayæ, Adobæca quēwēnīnque incæ awēnē ingante wido cæcæte ante ængæ gantidānīpa, ante tēdēdāni ēñēnīnque mīnitō ĩñōmō edæ guīñēnāmai ĩedāni. Mänōmai edæ tāno cōwē bacæimpa. Incæte iinque baōnæ botō āōnæ æiquēdō ponguūi.”

¹⁰Ante apænedinque Itota godōmenque apænecantapa. “Adobæca quēwēnāni ĩñōnānīte wabæca quēwēnāni ponte bee tēnīnque guēadō guēa cæquīnāni inānīpa. Adobæca awēnē odeye nempo quēwēñōnānīte wabæca awēnē odeye nempo quēwēnāni māmō bee tēnīnque guēadō guēa cæte wænonte wænguīnāni inānīpa.

¹¹Ayæ wayōmō wayōmō goinque nanguī pōni ocæ ocæ cæcæimpa. Ayæ waodāni nāni cæinente wænguīnque cænguī incæ tōmāā capo wængæimpa. Ayæ quingæ nāni wodonte wēnæ wēnæ inte wænguīmāmo incæ edæ do pongæimpa. Edæ ancaī nāni guīñenguīmāmo edæ pongæimpa. Ōōnædē ĩñōmō nāni wo go wo go cæwēnen-guīmāmo edæ ate baī bacæimpa.”

¹²Ayæ apænedinque Itota, “Mānīmāmo nāni guīñenguīmāmo tōmāmāmo ayæ pōnāmai ĩñonte mīnitō ĩmīnīte togænte yao ongonte tōmēnāni odōmōincōnē ænte go guīdinque apænte ānīnque mīnitō ĩmīnīte māo tee mōnecædānīmpa. Ayæ botō ēmōwo beyæ mīnitō ĩmīnīte tōmāmæ awēnēīdī odeyēīdī weca ayæ pancabaa awēnēīdī gobedōnadodoidī weca ænte māodāni gote gongæncæmīnīmpa. ¹³Mīnitō awēnēīdī weca godinque gongænte apænēmīni ēñēnīnque awēnēīdī incæ, Itota æcānō ingāā, ante ēñencædānīmpa. ¹⁴Īnīnque mīnitō ĩmīnīte awēnēīdī weca ayæ ænte godāmai ĩñēdē incæ mīnitō ĩmai ante nāmāneque pōnēdāni. Botō awēnē weca ongōnīnque æbānō ante wææ anguīmoo, ante edæ wædāmai incæboimpa, ante piyānē cædāni. ¹⁵Īñæmpa botō pōnō nō apænebo ēñēnīmīni inte mīnitō wæætē adodō ante apænecæmīnīmpa. Mänōmainō ante apænēmīni ēñēnīnque nē piīnāni guīquēnē nō pōni mīni apænedō ante ædō cæte wido cæquīnānīi. Wæætēdō wæætē ædō cæte anguīnānīi. ¹⁶Mīnitō mæmpoidī incæ mīnitō tōnīñadāni incæ mīnitō guīdēnāni incæ mīnitō æmigoidī incæ, ĩngā ingampa, ante godō odōmōnīnque mīnitō ĩmīnīte wadāni nempo pædæ godōnāni ō æncædānīmpa. Āēnīnque pancamīniya ĩmīnīte godōmenque wænōnāni wænguīmīni ĩmīnīpa. ¹⁷Ayæ, Cōditoidī ĩmīnipææ, ante tōmānāni botō ēmōwo beyænque mīnitō ĩmīnīte nanguī piīncædānīmpa. ¹⁸In-

cæte mīnitō baō incæ ocaguī incæ adoguinque incæ æmæwo ëwënāmaī ingæimpa. ¹⁹ Ìnque mīnitō botō ìmote pīnāmaī inte wæntædāmaī inte ee cæmīni ìnque botō æmo beyænque quëwencæmīnīma.

²⁰ Ante apænedinque Itota godōmenque apænegacāimpa. “Wabæca tontadoidi pōninque Eedotadëë godongāmæ wææ ongōnāni adinque mīnitō, Bæ tate nāni wido cæquīmāmo oo pompa, ante do edæ ëñencæmīnīma. ²¹ Mānōmaī cædāni adinque Oodeabæ quëwëmīni ìñōmō ānanquidi do wodii wīnonte æibæwedāni. Ayæ Eedotadëë quëwëmīni ìñōmō edæ yabæque taobæwedāni. Ayæ yabæque quëwëmīni inte Eedotadëë ìñōmō pō guidāmaī ìmæwedāni. ²² Māniñedë edæ Wængonguī nānō panguiōnæ incæ Wængonguī beyæ nāni yewæmonte angaiōnæ incæ ìnque baquīnō anguënë. ²³ Māniōnæ ìnque bayedë edæ yædëmadā ìnāni tōnō goōmæ nē gānōnāni tōnō tōmënāni nāni wæquīmāmo baquīnō anguënë. Ìmæca quëwënāni edæ māniñedë nanguī pōni caate wæquīnāni ìnānīpa. Idægoidi ìnānite edæ nanguī pōni pīinte cæquīnō anguënë. ²⁴ Pancadāniya ìnānite yaëmenca wido tadāni wænguīnāni ìnānīpa. Ayæ pancadāniya ìnānite bæi ongonte mæo wabæca ænte goquīnāni ìnānīpa. Wængonguī doyedë apænedinque, Oodeo ìnāmaī ìnāni ìnque nāni cæpoga cæcædānīma, angacāimpa. Ìnque tōmengā nānō angaimpoga ìnque baganca oodeoidi ìnāmaī ìnāni incæ Eedotadëë ìñōmō pōninque nanguī cægōninque pīnā gāwate bæi bæ tadāni wæquīmīni ìmīnīpa, ante apænebo ëñëmaīmīnīpa,” ante Itota apænegacāimpa.

Waobo ëñagaīmo inte botō ìīmaī ponte cæcæboīma, ante

(Māteoo 24.29-35, 42-44; Māadoco 13.24-37)

²⁵ Ayæ, “Oo pōni ìma, ante edæ ëñencæmīnīma, ante cædinque Wængonguī angā ate nænque tōnō apāicā nēmoncoo mā pōni edæ wacoo bæi bacæīma. Inguipoga guiquënë ñænængade pōni gāwapæntibæ tadōmengadæ mængonta mængonta cædinque nanguī ä ëñente wædinque tōmāmæ quëwënāni edæ, Æbānō cæquīmōō, ante edæ nanguī pōni guīñente wæquīnāni ìnānīpa. ²⁶ Ayæ waodāni æmō ayōnāni öönädë tæi ongongaincoo incæ wancæ wancæ cæte bæi wapiticæ go ate adinque tōmënāni ancaī guīñente wædinque, Inguipoga mōnō quëwënōmō edæ quīëmë bæi bacæīma, ante wædinque ìñontobæ nangæ bate wæcædānīma. ²⁷ Māniñedë edæ botō Waobo nē ëñagaīmo inte boguīmancodë pōninque tæi pōni pīñæmo ìnque edæ ñäo apāite bæi waëmō ëmonte wææmo acædānīma. ²⁸ Ìnque mānōmaī tæcæ ba ate wædinque mīnitō ocabo guīni æmencadinque, Badogaa, āninque edæ, Oo pōni mōnō abæ tawænte goquinque ìma, ante ämæwedāni,” ante Itota apænegacāimpa.

²⁹ Ayæ, Wængonguī Awënë oo poncæcāimpa, ante æbānō ëñenguīi, ante ëñencædānīma, ante Itota ìmæca quëwënāni nāni cæinō ante odömōninque ìīmaī apænecantapa. “Ìgowæ aedāni. Ayæ quīwämë incæ tōmāwæ aedāni. ³⁰ Õñabo tånā nā boca adinque mīnitō ìñōmō, Õñabo nānō bocaīnepo inte nænque nāwantedæ baquinque bocapa, ante pōnëninque edæ do ëñëmīnīpa. ³¹ Ayæ adobāi mānīnō botō apænedō bæi do edæ ba adinque mīnitō, Wængonguī Awënë Odeye do odemō pōni ongōninque inguipoga oo poncæcāimpa, ante ëñencæmīnīma,” angacāimpa.

³² Ayæ apænedinque Itota, “Nāwangā ämopa. Nōwomīni mīīmīni quëwëninque wænte godāmaī ìñōmīni edæ mānīnō botō ānīnō bæi tōmānō edæ do ìnque baquīnō anguënë. ³³ Edæ öönädë ongōñōmō inguipoga tōnō wo ëwente bæi dæ ba incæte

botö angainonque guiquënë dæ badāmaī inte edæ cōwē tæī ongongæimpa,” ante apænecantapa.

³⁴ Ayæ, “Minitö iñömö edæ, Mönö quingämë bai wīwa quëwëmö iñinque mönö mimö ömædëmö bate wæcæ wæ, ante nāmā wææ aaedāni. Tī nāmæ bete quidi quidi dowāninque mimö ömædëmö bacæ wæ, ante nāmā wææ aaedāni. Ayæ, Inguipoga quëwëmö inte quïëmë beyænque wædinque mimö ömædëmö bacæ wæ, ante nāmā wææ cæedāni. Mimö ömædëmö inte wæyömonte mǎniönæ wīi iñontobæ pö wæcæimpa, ante mimö ömædëmö badāmaī ingæimpa, ante nāmā wææ cæedāni. ³⁵ Iñæmpa waodāni tōmānāni inguipoga tōmāmæ quëwëñōnānite edæ iñontobæ ba wæcædānimpā. ³⁶ Iñinque woyowotæ itædë cōwë wānō cōinque mīnitö Wængonguī ingante cōwë apænecadāni. Mīnitö, Māninö iñinque ba adinque mönö eyepæ inte aamö cæte wodi wīnongæimpa, ante Wængonguī ingante apænecadāni. Ayæ, Waocā nē ēnagaingā weca mönö eyepæ gongængæimpa, ante adobaī edæ Wængonguī ingante apænecadāni,” ante Itota angacäimpa.

³⁷ Itota mǎniñedë Wængonguī oncö ñænæncönë iimö iñö iimö iñö yabæcönë go guite odömonte apænecä ēñenāni ate tōmengä wæætë gāwadedcæ iñö gāwadedcæ iñö tao godinque Odibowænquidi æite owodongäimpa. ³⁸ Ayæ tōmengä Wængonguī oncö ñænæncönë yabæcönë ongonte apænecä ēñencæte ante tōmānāni wæætë baänæ iñö pö baänæ iñö pö bee tēnōnānimpā.

Itota ingante bæi ongongæimpa, ante cædānīpa

(*Māateo 26.1-5, 14-16; Māadoco 14.1-2, 10-11; Wäö 11.45-53*)

22 Pāö yedæ æmpoquī ömæmö ī nāni cænguiönæ ante oodeoidi, Patowa mönö wodo pænta gogaïönæ æëmæ oo pōni bacæimpa, ante cædōnānimpā. ² Wængonguī quī, ante nē godōnāni ñænænāni tōnō nē odömōnāni iñömö, Itota ingante mönö wido cæcæimpa, ante cōwë cædōnānimpā. Incæte, Wadāni pīnāni wæcæ wæ, ante guīñente wædinque tōmēnāni mǎniñedë, Mönö æbānō cæte awëmö bæi ongongæimpa, ante wægadānimpā.

³ Ayæ Itota mīñæ nāni, Dote, ante gocabo iñōnāni Codaa Icadiote nāni ānongä adocä inongäimpa. Tatāna mǎniñedë tōmengāa pö guicantapa. ⁴ Iñinque nē godōnāni ñænænāni tōnō Wængonguī oncö nē wææ wānōnāni awënëidi iñömö godongāmæ ongōñōnāni Codaa tōmēnāni weca godinque iimāi ante apænecantapa. Itota æyōmōnō ongongāa, ante botö æbānō odömonte pædæ pōnōmo ate ænguimīni. Angä ēñēninque tōmēnāni tōmengä tōnō mǎninö ante godongāmæ tedegadānimpā. ⁵ Tōmengä, Odömonte pædæ pōnōmo æncæmīnimpā, ante apæneyongante tōmēnāni nangui todinque wæætë, Tiguitamö padatamö pōnōmōni æncæbiimpā, ante apænecadāni. ⁶ Eñēninque tōmengä Ao ante wadæ godinque, Wadāni adāmaī iñōnānite botö æbānō cæte iināni inānite awëmö odömonte godōmo ænguīnāni, ante cōwä adinque cægacäimpa.

Awënë Itota pāö tōnō owæta godongä cænte bedānīpa

(*Māateo 26.17-29; Māadoco 14.12-25; Wäö 13.21-30; 1 Coodintoidi 11.23-26*)

⁷ Pāö yedæ æmpoquī ömæmö ī nāni cænguiönæ iñonte wodo pænta gogaïönæ bai ī iñinque Patowa æëmæ bete cænguiönæ do iñinque batimpā. Mǎniönæ iñonte oodeoidi cōwë cæningä codotedo ingante wænōninque, Wængonguī quī, ante

godonguēnēnāni inōnānimpa. ⁸ Inique Pegodo tōnō Wāō inate da godōninque Itota iīmai angantapa.

—Mīnatō inōnō gote, Patowa æēmæno impa, ante ænōmīna ate mōnō cængæimpa.

⁹ Angā ēñēninque tōmēna,

—Æcōnēnō go guiite æænonguīmōna, āmii.

¹⁰ Āñōnate tōmengā wæætē,

—Waa aeda. Mīnatō māniī nāni quēwēñōmō go guiiyōmīna onguīñængā incæ cad-abodē æpæ iyānte næænte gocā adinque tōmengā ingante edæ tee empote goeda. Tee empo goyōmīna tōmengā oncōnē go guicā adinque, ¹¹ mīnatō wæætē oncō nē ēacā ingante iīmai ante æda. “Mōnō Awēnē nē Odōmongā incæ bitō imite iīmai angampa. Bitō æcōnēnō āmi guidiñque botō nē ēmiñænāni tōnō Patowa æēmæ ante cænguīmōniī, angampa,” ante apæneeda. ¹² Mānōmainō ante apænemīna ēñēninque nē oncō ēacā iñōmō æmongapaa mæi goyōmīnate oncō ñænencō awæmpaa do nānō cōnōincō odōmongā adinque mīnatō mānincōnē tōmāā eyepæ cæcæmīnaimpa, ante Itota da godongā godatapa.

¹³ Mānōmai angā godinque apæneyōna, Itota nānō ānō bai adobai tōmāā batimpa, ante adinque tōmengā nānō nē ēmiñæna, Patowa æēmæno impa, ante cædatapa.

¹⁴ Inique æēmæno nāni cæñedē iinque bayonte Itota awæmpaa gäänē pō tæ con-tayongā tōmengā nānō nē da godōnināni godongāmæ pō tæ contadāni. ¹⁵ Adinque Itota tōmēnāni inānite apænecantapa.

—Botō iñōmō caate wæte wænāmai iñedē mīnitō tōnō godongāmæ Patowa ante cænte tocæimpa, ante cæinente nanguī wætabopa. ¹⁶ Apænebo ēñeedāni. Botō Wængonguī Awēnē inōmo inte Awēnē Odeye badinque māniñedē ate waodāni inānite æmæwo pōniī ata cæpocæboimpa. Māninganca botō ata cæpoganca botō ñōwo, Wængonguī Awēnē dodāni inānite ata cæpodinque wodo pænta gogacæimpa, ante Patowa æēmæno ñōwo iinque cæncæ cæbopa. ¹⁷ Āninque ayæ Itota bequīmæ owætaca bæi ongonte æninque Wængonguī ingante waa ate apænedinque tōmēnāni inānite angantapa.

—Mīnitō owæta iīnta æninque godongāmæ beedāni. ¹⁸ Āmo ēñeedāni. Yowepæ ñōwo bedinque botō Wængonguī Awēnē inōmo inte Awēnē Odeye botō baganca edæ ñōwo æmæwo bebopa.

¹⁹ Ante apænedinque Itota pāo æninque Wængonguī ingante waa ate pōnente apænedinque pā æninque pædæ godōninque apænecantapa.

—Īi pāo botō baō bai impa. Botō, Mīnitō quēwencæmīnimpā, ante botō baō godonte bai cædinque wæncæboimpa. Botō pā ænte pædæ pōnōmo bai mīnitō iīncayæ ate botō imote ante pōnēninque adobai cæte wacā ingā wacā ingā pædæ godonte cæedāni, angantapa. ²⁰ Mānōmai angā iinque cænāni ate owæta adobai ænte apænedinque tōmengā,

—Botō wepæ iīmæ bai impa. Wængonguī do apænedinque, Botō pōnō cæbo ate mīnitō Ao āmīni inique mōnō godongāmæ waa cæte quēwengæimpa, angacæimpa. Ñōwo adobai botō wepæ mīnitō beyæ pædæ godōmo ate mīnitō Ao ante æmīni inique mōnō godongāmæ waa cæte quēwengæimpa. ²¹ Incæte botō imote nē pōnō odōmonte pædæ godonguīgā iñōmō botō ōnōmpo gäänē cænguimpaa adoyōmō ongō aedāni. ²² Wængonguī do nānō angainō bai botō nē Waobo ēñagaiimo inte wænte gocæboimpa. Nāwangā impa. Incæte botō imote nē pōnō odōmonte pædæ

godonguingä iñömö edæ tömengä nänö nangui wæwenguinque edæ mänömaï cæcä ingampa töö.

²³ Ante Itota apäneyongä tömënäni nani caboque tededinque edæ, Æcänö ingante ante apäneccää, ante wädänitapa.

Æcänö yæcado ongonguingää, ante tededänipa

²⁴ Ayæ adobaï, Mönö cabo iñömöte æcänö nænængä inte edæ yæcado ongonte bai në angä baquingää, ante wædinque tömënäni wæatedö wæætë äninque nangui tedewënäni. ²⁵ Adinque Itota tömënäni inänite, “Idægoidi inämaï inäni awënëidi iñömö tömënäni nempo quëwënäni inänite, Botö ämo ëñente cæedäni, ante nangui piinte änewënäni. Incæte në piinte änewënäni iñönänite tömënäni nempo quëwënäni wæætë, Mönitö awënëidi në Pönö Cædäni inänipa, ante babæ ante pemöwënäni. ²⁶ Wæætë minitö guiquënë inguipoga awënëidi nani cæi bai cædämaï iedäni. Mïni cabo incæ në yæcado ongongä inte yæmiñængä bai baquënegä ingampa. Ayæ në angä inongä inte wacä beyæ në cæcä bai baquënegä ingampa. ²⁷ Æbänö ante pönëminii. Æcänö ingante, Awënë bai ingampa, ante nangui waa adänii. Në cænguimpaa gäänë tæ contate cængä ingante waa adänitawo. Wæætë awënë beyæ ante ænte mämö pönongä ingante waa adänitawo. Ìñæmpa në contactä ingante näwangä waa adänipa. Incæte botö iñömö önömoque bai cædömo inte minitö weca pöninque në ænte mämö pönongä bai inte në pönö cædömo imopa,” ante Itota apäneccantapa.

²⁸ Ayæ apänedinque, “Botö caate wæwëñömöte minitö iñömö botö tönö godongämæ iñacabo cædimini iminipa. ²⁹ Ìnque botö Mæmpo botö imote, Awënë Odeye bacæbiimpa, ante nänö pönö cægäi bai botö wæætë, Botö tönö iñacabo cædimini inömini inte minitö awënë odeyeidi adobaï bacæminimpa, ante pönö cæcæboimpa. ³⁰ Ayæ, Botö në Awënë Odeye bayömöte minitö botö awæmpaa gäänë tæ contadinque godongämæ edæ cænte becæminimpa, ämopa. Ayæ idægoidi önömpo tipæmpoga go mencabodäniya iñönänite minitö awënë tæ containpaa tæ contadinque tömënäni inänite në apænte ämini bacæminimpa,” ante tömengä miñæ në godäni inänite Itota apänegacäimpa.

Pegodo incæ, Dicæ abogaa, ante anguingä ingampa, ante

(Mäateo 26.31-35; Mäadoco 14.27-31; Wäö 13.36-38)

³¹ Itota ayæ,

—Timönö, ëñëmi. Timönö, bitö imite ämopa. Waocä tömëmö ænte wancæ wancæ cæcä ontapo wææ bai minitö iminite Tatäna incæ bæi ongonte wënæ wënæ cæcæte ante angampa. ³² Wæætë, Bitö wede pönëninque nangæ badämaï incæbiimpa, ante botö do edæ Wængongui ingante apänetabopa. Ìnque bitö iñömö edæ iincayæ ate botö gämänö ocæ ëmænte ponguimi imipa. Pöninque, Bitö töninädäni wæætë tæi piñænäni bacædänimpa, ante tömënäni inänite godö töö æmænte bai cæe.

³³ Ante apäneccä ëñëninque Timönö wæætë,

—Awënë ëñëmi. Bitö imite tee mönedäni ininque botö do bitö tönö go guiibai-mopa. Bitö imite wænönäni wæmi ininque edæ botö bitö tönö do wæmaimopa.

³⁴ Ante apäneccä ëñëninque Itota angantapa.

—Pegodo, bitō ïmite ämo ëñëe. Tawadiya ñöwoönæ ayæ pedämaï ïñonte bitō botō ïmotedō apænedinque, Dicæ abogaa, ante mempoga go adopoque angüimi ïmipa, ante Itota apænegacäimpa.

Botō caate wæquimämo oo bacæimpa, angampa

³⁵ Ayæ wæætë tömënäni ïñänite,

—Botō wëenëñedë mïnitō ïmïnite da godöningue, Godonte äinta da wente ænguincadedë ænämaï inte goedäni, antabopa. Mäincoo da wente ængui næænämaï inte awæncata næænämaï inte goedäni, ante botō da godömo godinque mïnitō ænguënëmïni inte wæmïnitawo.

Äñongante,

—Ængüenente wædämaï intamönipa, änänitapa.

³⁶ Itota wæætë tömënäni ïñänite,

—Ñöwo ïñömö æcänö godonte äinta da wente ænguincade mäna tömengä mänincade næænte gocæcäimpa. Ayæ mäincoo da wente ængui adobaï næænte gocæcäimpa. Ayæ yaëmë mänämaï ingä inte weocoo yacoo në mäningä wacä ingante godonte æningue wæætë yaëmë godonte æncæcäimpa. ³⁷ ïïmaï ante dodäni näni yewæmongainö bai botō ïmote cæcädänimpa. “Në ëñënämaï näni cæcabo ïñönänite tömengä adocä ïnongä ingampa, ante änänitapa,” ante yewæmongatimpa. Mänömaï impa, ante pönëningue botō ïïmaï ämopa. Botō ïmote æbänö cæquinänii, ante näni yewæmongainö bai botō ïmote tömänö ïinque cæquïnö angüënë. Botō ïmote ante näni yewæmongainö bai cædinque ñöwo ïñömö edæ eyepæ ba aedäni.

³⁸ Ante apæneyongante tömënäni,

—Awënë, yaëmë mëa më ongö ae.

Änänitapa. Tömengä wæætë,

—Idæwaa, angacäimpa.

Guetëmäni ïñömö Itota Wængonguï ingante apænecampa

(*Mäateo 26.36-46; Mäadoco 14.32-42*)

³⁹ ïinque apænedinque Itota wadæ godinque cöwë nänö æidö bai æidinque Odi-bowænquidi go æiyongante tömengä miñæ në godäni tee empo æigadänimpa. ⁴⁰ Äi cöwë nänö æi ongöñömo pöninque tömënäni ïñänite,

—Mïnitō ñöwo Wængonguï ingante nämä beyænque apænedinque, Mönitō wïi wënæ wënæ cæñëmöni bacæmönimpa, ante apæneedäni.

⁴¹ Äningue Itota wadæ godinque dica mönö wido cæganca mäninganca godinque da guicapodinque Wængonguï ingante apænecantapa. ⁴² Apænedinque, “Mæmpo ëñëmi. Bitō Ao äningue edæ ti nä wænguimæ bai ö ænte bai cædinque botō ïmote edæ, Wænämaï incæbiimpa, ämi ïinque botō edæ waa tobäimopa. Incæte botō äñönö bai wïi cædinque wæætë tömëmi äñönö bai cæe, ämopa.”

⁴³ Ante apæneyongä Wængonguï öönädë nänö da pönöningä anquedo Itota weca ponte a ongöningue, Tæi piñænte entawencæbiimpa, ante cædinque pönö töö æmænte bai cæcantapa. ⁴⁴ Incæte Itota ïñömö edæ nangui wæwente badinque Wængonguï ingante ancaa apæneçä ïinque edæ tömengä owæmä wepæ gowete bai tad-inque onguipoiya petä petä wæantapa.

⁴⁵ Ayæ iinque apænedinque tömengä ængæ gantite godinque tömengä miñæ në pöninäni weca ponte ayongä tömënäni nanguï wæwente wædinque mö ñönäni.
⁴⁶ Adinque edæ tömengä tömënäni inänite,
 — Ìñæmpa möwo möminii. Edæ ængæ gantidinque, Wënæ wënæ cæinente badämaï incæmönimpa, ante Wængonguï ingante apæneedäni, angacäimpa.

Itota ingante bæi ongonte ænte godänipa

(*Mäateo 26.47-56; Mäadoco 14.43-50; Wäö 18.2-11*)

⁴⁷ Ante tæcæ apæneyongä nanguï inäni inñontobæe ponte a ongönänitapa. Itota miñæ näni, Dote, ante gocabo iningä incæ Codaa inñömö täno beyænte pöningue Itota ingante waa cæte bai queë bemoncæte ante pongä. ⁴⁸ Adinque Itota tömengä ingante,

— Codaa ìñæmpa, botö Waobo ënagaïmo inñomote bitö, Ìngä ingampa, ante queë bemoninque odömonte pædæ godömi ænguïnänii, angantapa.

⁴⁹ Mänömaï cæcæ cædänipa, ante adinque tömengä miñæ në godäni guiquënë,
 — Awënë, yaëmenca godö tao cæquimöni ämii, änänitapa.

⁵⁰ Wængonguï qui, ante në godongä ñænængä pönii inongä ingante në cæcä inñömö mäniñömö ponte a ongonä adinque Itota miñæ në pöningä adocanque wæætë yaëmë æninque mäningä önömonca tömëmonca inö wangö tamoncacä wæcantapa.

⁵¹ Adinque Itota wæætë,

— Idæwaa, äninque gampo cæmoncacä waa bamoncagacäimpa. ⁵² Ayæ, Wængonguï qui, ante në godönäni ñænänäni incæ Wængonguï oncö ñænæncö ante në wææ wänönäni incæ në aadäni näni Picæncabo incæ tömengä ingante æncæte ante në pöninäni inñönänite Itota tömënäni inänite, Botö miñæ në godäni tönö botö dicæ awënë ingante wido cæcæte ante cæbogaa. Incæte minitö, Në wido cæcä ingampa, ante bai cæmini awædö. Edæ canta teëmenca mini badöinca tönö yaëmë næænte botö weca pöminii. ⁵³ Ìñæmpa botö æpogadö Wængonguï oncö ñænæncönë iimö inñö iimö inñö yabæcönë go guidinque minitö weca a ongöñomote minitö wæætë bæi ongoncæte ante pædæ gopodämaï iminitapa. Edæ ñöwo wëmö mäë mämonte bai inñonte edæ mini në wënæ wënæ cæyedë impa, ante apænegacäimpa töö.

Pegodo incæ, Dicæ abogaa, angampa

(*Mäateo 26.57-58, 69-75; Mäadoco 14.53-54, 66-72; Wäö 18.12-18, 25-27*)

⁵⁴ Ìninque Itota ingante bæi ongonte ænte mäo, Wængonguï qui, ante në godongä ñænængä pönii inongä weca ænte godänitapa. Gobæ godäni ininque Pegodo inñömö ayæ ayæ gocantapa. ⁵⁵ Ñænæ oncö yacömojë inñömö wææ wänönäni gonga tänonte godämæ pö tæ contadäni adinque Pegodo tömënäni weca pö tæ contacä. ⁵⁶ Adinque në cæcä onquiyængä tömengä gongapamö ongonä adinque tömengä ingante cöwä adinque,

— Ìngä adobaï mäningä miñæ tee empo gocä ingantapa.

⁵⁷ Äñongante Pegodo,

— Onquiyæmi ëñëmi. Botö mäningä ingante dicæ abogaa, angantapa.

⁵⁸ Ayæ wantæ ate wacä pöningue Pegodo ingante waa adinque,

— Bitö adobaï tömengä miñæ në gobi imitapa töö.

Ante apæneccä ëñëninque,

— Onguïñæmi ëñëmi. Botö dicæ tömengä miñæ gobogaa. Edæ wabo imopa.

⁵⁹ Ayæ wacä adobaï wantæ wantæ adoque ooda go ate äninque,
 Ìingä ìñömö Itota miñä nè godingä ingampa. Näwangä impa. Gadideabæ quëwëningä inte edæ pongä aedäni.

⁶⁰ Angä ëñëninque Pegodo,

—Onguüñämi, quiëmë bai apänebipa, ante botö ëñënämaï imopa.

Ante tæcæ mënea äñongante tawadiya ìñontobæ aa aa pecantapa. ⁶¹ Itota incæ tömengä gämænö dadi ëmænte pömö acä adinque Pegodo ìñontobæ, Æ, äninque, “Tawadiya ñowoönæ pedämaï ìñonte bitö botö imotedö ante wadö ate apänedinque, Dicæ abogaa, ante tededinque mempoga go adopoque anguümi imipa,” ante Itota wëenëñedë apäñecä ëñentabopa. ⁶² Nöwo nänö pequinque do pecampa, ante pönente wædinque Pegodo oncodo tao godinque Ca ca wægacäimpa.

Itota ingante badete todinque cædänipa

(Mäateo 26.67-68; Mäadoco 14.65)

⁶³ Itota ingante nè wææ wänönäni ìñömö tömengä ingante mäniñedë badete todinque edæ tæi tæi pänänitapa. ⁶⁴ Ayæ tömengä awinca wini cæmöninque tömënanäni,
 —Æcänö bitö imite tæi tæi pänaa, ante Wængonguü apäñecä ëñente ate apäñebi ëñëmönie.

⁶⁵ Ante badete todinque quiëmë bai ante godö babæ änewënanitapa.

Në apænte änanäni weca Itota ongongampa

(Mäateo 26.59-66; Mäadoco 14.55-64; Wäo 18.19-24)

⁶⁶ Näo bayedë, Wængonguü qui, ante nè godönäni ñänänäni tönö nè odömönäni ìñömö idægoidi inänite nè aadäni nänäni Picæncabo inönäni inte edæ godongämæ go bee tëninque tömënanäni nänäni apænte anguümpaa gäänë ongöñönäni Itota ingante tömënanäni weca töö æmænte ænte mäo gönönäni gongængantapa.

⁶⁷ Tömengä ingante nè apænte änanäni ìñömö,

—Apäñebi ëñëmönie, äninque, Bitö mönitö Codito inömi imitawoo.

Äñönänite Itota wæætë,

—Botö apäñebo ininque mïnitö wæætë ëñënämaï imaiminipa. ⁶⁸ Ayæ wæætë botö ëñencæte ante ämo ininque mïnitö wæætë botö imote apäñedämaï imaiminipa.

⁶⁹ Incæte ämo ëñëedäni. Botö ìñömö nè Waobo ëñagaimo inte iincayæ ate Wængonguü nè tæi Pïñängä tömëmæ inö tæ contate ongoncæboimpa.

⁷⁰ Ante apäñecä ëñëninque tömänäni,

—Ìñampa, bitö Wængonguü Wëmi imitawoo.

Äñönänite,

—Botö mänimodö imopa. Tömëmini edæ mänömaï äninque edæ nö apäneminipa.

⁷¹ Ante apäñecä ëñëninque,

—Idæwaa. Tömengä nämä incæ edæ, Wængonguü Wëmo imopa, ante wënæ wënæ apäñecä do ëñentamompa. Ìninque mönö ñowo edæ, Wadäni, Itota wënæ wënæ cæcampa, ante apäñecädänimpa, ante quïnante godömenque diqui diqui mingüi, ante wægädänimpa.

Pidato weca gote Itota ongongampa

(Máateo 27.1-2, 11-14; Mádocolo 15.1-5; Wäö 18.28-38)

23 Ìninqe mänĩñömö ongönäni tömänäni godongämæ ængæ gantidinqe Itota ingante awënë Pidato weca ænte gogadänimpa. ² Godinque tömënäni, Itota iĩmaĩ nê wënæ wënæ cæcä ingampa, ante piĩninqe,

—Mönitö cöwä ayömöni iingä iñömö wapiticæ odömonte apæneceä ëñëninque mönitö ömæ quëwëñäni oda cæte ëñëñämaĩ cædäni wæmönipa. Edæ odömäno awënë Tetædo nänö äninta godönämaĩ iedäni, ante tömengä wææ angampa. Ayæ tömengä, Botö iñömö Awënë Odeye Coditobo inömo imopa, ante nämä ante angampa töö.

³ Ante godö piĩnäni ëñëninque Pidato iñömö Itota ingante,

—Bitö oodeoidi Awënë Odeyebi imitawoo.

Äñongante Itota wæætë,

—Bitö tömëmi änö bai botö mänimodö imopa, angantapa. ⁴ Ìninqe nê godönäni ñænänäni tönö wadäni godongämæ ongöñönänite Pidato wæætë,

—Botö ayömote iingä dicæ ëñëñämaĩ cæte wentamö mongængä abogaa, angantapa.

⁵ Ante Pidato apæneceä incæte tömënäni godömenque äninque,

—Ìñæmpa tömengä Gadideabæ täno odömöninque ñöwo iñömö ganca pöninqe Oodeabæ tömäo godinque odömonte apæneceä ëñëninque waodäni edæ piĩnte badäni apa cæbii, änänitapa.

Edode weca Itota gote ongongampa

⁶ Mänömainö änäni ëñente wædinque Pidato wæætë, Ìngä iñömö näwangä Gadideabæ quëwëningä inte pongantawoo. ⁷ Äñongante, Mäningänö ingampa, ante apænedäni ëñëninque tömengä, Gadideabæ nê quëwëningä inte tömengä awënë Edode nänö nê ënempodongä ingampa, ante tæcæ ëñengantapa. Ayæ, Edode ñöwo Eedotadëe ponte quëwengampa, ante do ëñëningä inte Itota ingante Edode weca Pidato da godongä gocantapa. ⁸ Doyedë iñömö wadäni, Itota æbänö cæcää, ante tededäni ëñëninque Edode, Itota botö weca pöninqe wabänö bamönengæ pönĩ cæcä abaĩmopa, ante pönëninque tömengä ingante wantæpiyæ ainengä ìnogäimpa. Ìninqe Itota ingante ñöwo adinque Edode nanguĩ togacäimpa. ⁹ Ìninqe, Apænebi ëñëmoe, ämi ëñëmoe, ante Edode wæætë wæætë äñongante Itota iñömö edæ pæ wënete apænedämaĩ ingacäimpa. ¹⁰ Edode weca adoyömö ongöninque nê godönäni ñænänäni tönö nê odömönäni guiquënë ængui badinque, Itota wënæ wënæ cæcä ingampa töö, ante nanguĩ piĩnte angadänimpa. ¹¹ Ayæ Edode tönö tömengä tontadoidi tönö Itota ingante piĩninqe, Waa cæte bai cæcantedö abi, ante badete todänitapa. Önonque badete tocæte ante tömënäni wæmö pönĩ weocoo daga wëñadinque tömengä ingante adodö Pidato weca da godönäni gogacäimpa. ¹² Ìninqe do nänä guëadö guëa piĩncaya inina inte edæ Edode tönö Pidato mänionæ edæ guëa piyænë cæte nänä æmigocaya bagadäimpa.

Itota wæncæcäimpa, änanipa

(Mäateo 27.15-26; Mäadoco 15.6-15; Wäo 18.39-19.16)

¹³ Pidato iñömö nē godönäni nænænäni tönö awënëidi tönö önönäni que inänite äñecä pönäni ate tömengä, ¹⁴ tömänäni inänite äninque,

—İngä ingante botö weca ænte pöninque mīnitö, Tömengä wapiticæ odömonte apænecä eñëninque wadäni oda cædinque eñënämaï cædänipa, ante pūiminipa. Incæte mīnitö edonque ayöminite botö, Itota æbänö cæcää, ante eñencæte ante cöwä ayömo edæ tömengä wænæ wænæ nänö cædö ante mīni änewënö ante edæ dæ ä abopa. ¹⁵ Ayæ Edode adobaï tömengä ingante apænte äninque wænæ wænæ nänö cædinö ante adämaï inte wædinque adodö botö weca da pönongä ponte a on-gongä aedäni. Edæ, Tömengä nänö wænguinque, ante nänö cædinö edæ dæ ä apa änewëminii. ¹⁶ İninque botö önönque tæi tæi päninque ñimpo cæbo gocæcäimpa, ante Pidato angantapa. ¹⁷ Wadepo iñö wadepo iñö tömënäni æëmæ nāni cæyedë, Nē tee mönete on-gongä adocanque gocæcäimpa, ante cöwë godö ñimpo cæquë-nengä inongä inte awënë Pidato ñöwo mänömainö ante cæcantapa. ¹⁸ Mänömainö angä eñëninque tömänäni adoyömo ogæ tededinque,

—Itota ingante wido cædinque Badabato ingante wæætë pönö ñimpo cæbi æmönie, änanitapa.

¹⁹ Badabato guiquënë tömënäni nāni quëwëñömö awënë ingante wido cæcæte ante cædinque godömenque waocä ingante wænöningä inte edæ ñöwo tee mönete ongönongäimpa. ²⁰ Pidato iñömö, Itota ingante æbänö cæte ñimpo cæbo goquingä, ante wædinque tömënäni inänite wæætë aa aa peyongante, ²¹ Oodeoidi wæætë,

—Awæ ñænquedimæ ämi cæte gönonte wænönäni wængæe töö, ante wæætë wæætë adodö äninque Yæ änanitapa.

²² Quimæ änewëminii, ante do mempoga äningä inte Pidato ñöwo mempoga go adopoque änogä inte,

—Quinö wænæ wænæ cæcantawogaa, angantapa. İñæmpa, Quinö wænæ wænæ cæcantawo, ante cöwä ayömo edæ dæ ampa. İninque botö ämo ate edæ tömengä ingante tæi tæi päninque ñimpo cædäni gocæcäimpa, ämopa, angantapa.

²³ Incæte awënëidi tönö wadäni godömenque Yæ äninque, Awæ ñænquedimæ ämi cæte gönonte wænönäni wæncæcäimpa, ante, Cöwë wængongäimpa, ante an-caa aa pedänitapa. İninque tömënäni nāni Yæ yæ äno beyænque Pidato ñimpo cæcantapa. ²⁴ İninque ancaa wææ änäni eñente wædinque tömengä, Tömënäni nāni äno bai godö cæcæboimpa, ante nāmæneque pönengantapa. ²⁵ Mäniñedë Badabato nē, Awënë ingante wido cæcäimpa, ante cædinque nē wænöningä inte ayæ tee mönete ongönongäimpa. Pidato ñöwo, İngä guiquënë oodeoidi nāni nē äningä ingampa, ante godö ñimpo cæcantapa. Itota ingante wæætë, Oodeoidi nāni äno bai cæcäimpa, ante cædinque Itota ingante wæætë tontadoidi nempo pædæ godongä ænte godänitapa.

Itota ingante awäa timpodäni wængampa

(Mäateo 27.32-44; Mäadoco 15.21-32; Wäo 19.17-27)

²⁶ Itota ingante ænte goyönäni Tidënebæ nē quëwengä Timönö wayömo gote pöninque eyepæ pönï mämö bee tengantapa. Tömengä ingante adinque bæi ongöninque

tömənäni, Nænquedimæ möni cædiwæ Itota miñæ ænte goe, äninque ño cædan-
capænäni næænte gocantapa.

²⁷ Goyongante Itota miñæ nanguï inäni godänitapa. Onquiyänäni incæ Yæ yæ
ante wo ca wo ca wædinque tee empote godänitapa. ²⁸ İninque Itota dadi emænte
adinque tömənäni inänite,

—Onquiyämäni, Eedotadëë quëwëmäni inte munitö botö beyæ ante wädämaï
iedäni. Wæætë tömëmäni nämä beyænque ante wæedäni. Ayæ munitö wëñænäni
beyæ ante pönente wæedäni, ämopa. ²⁹ İncayæ ate munitö caate wædinque iïmaï
ante wæquimäni iminipa. “Wëñæ nê mänämaï ingä iñömö edæ tömengä nänö waa
toquinque. Goömæ nê gänönämaï ingä iñömö edæ tömengä nänö toquinque impa,”
ante wæquimäni iminipa. ³⁰ Mäniñedë edæ, “Woadäni iïmaï ante wæcädänimpa.
Onquiyabo onguipo æmæwo cabæñö goyæ guimönie. Änanquidi wææ mönitonga
capo ñongæñö wë womonte bamönie, ante wæcädänimpa,” ante dodäni nani yewæ-
mongainö bai edæ bacæimpa. ³¹ Edæ awæ müiwæ iñonte gonga wædænque wo
cädäni bai ñowo iñömö woadäni wii nanguï wënæ wënæ cädänipa. Wæætë awæ
amimö bayonte ti wodönoyönäni dobæ wo bæco bai woadäni iincayæ ate quingämë
bai cæquänäni inänipa, ante Itota mäninö godinque apænegacäimpa.

³² Ayæ, Mäo wænongæimpa, ante nê ænte godäni iñömö mænä nê wënæ
wënæ cädäna inate tömengä tönö godongämæ ænte gogadänimpa. ³³ Ocatainö,
nani äñömö ænte pöninque awæ nænquedimæ nani badöniwäa Itota ingante töö
godonte timpodinque wææ tiwadinque ængæ gantidänitapa. Ængæ gantidänäni
ate wægöñongä tömənäni nê wënæ wënæ cädäna inate adobai Itota tömëmæ
inö adocanque tömengä dipëmæ inö adocanque timpote gönönäni gongænatapa.
³⁴ Mänömaï cädäni adinque Itota,

—Mæmpo ëñemi. Tömənäni ëñänämaï inäni inte iïmaï cädänipa cæbii. Wënæ
wënæ nani cæinö ante bitö wæætë edæ ñimpo cæbi quëwencädänimpa ämopa,
angacäimpa.

Mäniñedë tömengä weocoo ini ante, Æcänö quinca nö ta adinque tömengä bad-
incoo æncæcäimpa, ante tömənäni wæntodöninque adocooque adocooque ænänita-
tapa. ³⁵ Wadäni, Æbänö cæquingä, ante acæte ante godongämæ a ongönänitapa.
Awënëidi incæ tömengä ingante ante badete todinque,

—Tömengä, Quëwencädänimpa, ante wadäni inänite ængä quëwänänitawo. Ayæ
Wængongui iñömö, Codito ingampa, äninque tömengä ingante ængantawo. İn-
inque tömengä Wængongui nänö nê ængaingä inongä inte edæ nämä aamö cæte
quëwencæcäimpa, ante badete togadänimpa.

³⁶ Tontadoidi guiquënë obo pöninque tömengä ingante badete tote bai cædinque
edæ, Yowepæ ti nämæ becæcäimpa, ante pædæ æänöninque, ³⁷ tömengä ingante,

—Oodeoidi Awënë Odeyebi imi ininque bitö nämä aamö cædinque quëwëmæwe,
ante towengadänimpa.

³⁸ Ayæ, “İngä oodeoidi Awënë Odeye inongä ingampa,” ante yewämöninque
tömənäni tömengä dæca inö wo cädäni owotapa.

³⁹ Nê wënæ wënæ cädäna guiquënë tömengä tönö ongöñöna adocanque tömengä
ingante godö wënæ wënæ ante badete tocantapa.

—Bitö iñæmpa, Codito inömo imopa, ämitawo. Mänimi inömi ininque bitö
tömëmi aamö cæte gote quëwëninque mönatö imönate adobai ñimpo cæbi aamö
cæte gomönae.

⁴⁰ Äñongante wacä wææ äninque,

—İñæmpa tømëmi adobaı bitö wænguinque ongömi inte Wængongui ingante guıññënamai inte ämi awædö. ⁴¹ Mönatö wënæ wënæ cæmöna iññömönte nê apænte äñani edæ nöingä cæte pänani wæmönapa. Mönatö wënæ wënæ cædinö beyæ eye-pæ tente wæmönapa. Tömengä guiquënë wënæ wënæ cædamai inongä inte wængä apa änewëë.

⁴² Äninque adocä wæætë Itota ingante apænedinque,

Awënë ëñëmi. Bitö Awënë Odeye badinque botö imote pönente cæbi ämopa.

⁴³ Äñongante Itota,

—Nawangä ämopa. Bitö nõwoönæ incæ wænte godinque do wænte gogainäni nani watapæ quëwëñömö botö tönö guëa ongoncæbiimpa, angacäimpa.

Itota wængampa

(Mäateo 27.45-56; Mäadoco 15.33-41; Wäö 19.28-30)

⁴⁴ Mäniñedë edæ tæcæbæcä iñedë mä mämönte bai tæcæ badinque ayaönäa wæi-ganca tømämæ iñömö edæ wëmö ingatimpa. ⁴⁵ Edæ nænque näwänamai i inique wëmö ingatimpa. Ayæ Wængongui tæiyæ wæmoncönë odemö nani wææ wodöin-coo adoyedë edæ önönæca inö tæcæguedë pönı tænguimæ wææntapa. ⁴⁶ Mäniñedë Itota ogæ tededinque,

—Mæmpo ëñëmi. Nöwo edæ botö önöwoca bitö önönempo pædæ pönömo æe.

Äninque edæ æmäwo guëmäinque wængacäimpa.

⁴⁷ Mänömai cæte wængä adinque odömäno tontado capitäo incæ,

—Nawangä impa. İingä iñömö edæ nö pönı cæcä inongä inte edæ wængä abopa, äninque, Wængongui näö apäite bai ëmönongä inte mänömai cæcä abopa, ante apænegacäimpa.

⁴⁸ Ayæ, Æbänö cæquiı, ante godongämæ ponte a ongönäni iñömö tømänäni, Itota mänömai wængä awædö, ante wædinque edæ nämä öñontawë tæi tæi tompotawëinque wadæ gogadäinpa. ⁴⁹ Wæætë Itota ingante nê do adinänique iñömö gobæ ongonte pömö agönänitapa. Wëenëñedë tömengä Gadideabæ quëwente pönongante onquiyänäni tömengä miñæ nê pöninäni inte tömënäni nõwo adobaı gobæ ongonte pömö agönänitapa.

Itota wodi baö inı mäo daga wënänipa

(Mäateo 27.57-61; Mäadoco 15.42-47; Wäö 19.38-42)

⁵⁰ Oodeoidi nani Apænte Äincabo iññänite adocanque tömengä ëmöwo Ootee inongäimpa. Tömengä cöwë waa cædinque nê nö cædongä inongäimpa. ⁵¹ Do iññömö, Itota ingante wæñongäimpa, ante oodeoidi nani Apænte Äincabo godongämæ pönente cæyönänite adocä Ootee iññömö edæ Baa ante tömënäni tönö godongämæ cædamai inongäimpa. Tömengä, Wængongui Awënë Odeye nempo mönö æyedëno quëwengäimpa, ante wänö conte bai quëwëñongä inongäimpa. Tömengä Oodeabæ Adimatea iññömö nê quëwëñongä inte nõwo pöningä ingantapa. ⁵² Mäningä Ootee iññömö awënë Pidato weca do gote apænedinque, Itota wodi baö inı pönömi ænte daga wëmoe. ⁵³ Angä ëñëninque awënë Ao angä ëñente gocantapa. Godinque tömengä Itota wodi baö inı wi æmpote wææ wi æwadinque pædæ wæænonte ænte godinque wæmö weocoo nino nani änoncoo wini wini caate dicamontaa wointatodë öñontatoque iññömö daga wengantapa. Do nani wënämai inta-

tocæ iñonte daga wengantapa. ⁵⁴Oodeoidi nāni, Gāwadecæ ba ate guēmanguiönæ inguimpa, ante tāno nāni cæönæ i iñinque Ootee mänömaï tāno cægacäimpa.

⁵⁵Do iñömö Gadideabæ quëwente Itota tönö godongämæ nê pönināni inte onquiyänāni nōwo Ootee miñæ tee empote pöningue Itota wodido adinque, Tömengä baö æbänö nō cædānii, ante do adānitapa. ⁵⁶Adinque tömënāni oncönê godinque ogui wapæ ogui wayabo tönö ænte ponte öni pæcæte ante cædānitapa. Incæte, Guëmanguiönæ impa, ante wædinque waönæ ate nāni goquingue tömënāni Wængongui nänö wææ angainö bai cædinque tāno guëmangadānimpa.

Itota do wæningä inte nāni ömæmonte quëwengampa

(Mäateo 28.1-10; Mäadoco 16.1-8; Wäö 20.1-10)

24 Ayæ guëmanguiönæ iñinque go ate baänæ ate ooque pönente bayonte mänināni onquiyänāni ogui waqui nāni cædincoo nōwo ænte nææninque Itota wodido pönānitapa. ²Ponte ayönāni dicabo nænængade pöni do da tæñæi a öñö adānitapa. ³Ayæ ontatodê guite ayönāni edæ mönö Awënë Itota wodi baö edæ dæ antapa. ⁴Önontatoque i awædö, ante adinque guiñente wæyönāni edënina bai ina iñömö weocoo näämænta pöni näinte bai ëmoncoo mongæna inte edæ iñontobæ tömëna weca a ongöna. ⁵Ate wædinque onquiyänāni iñömö ancai guiñente wædinque ædæ wæænte onguipoga bigui tëmönānitapa. Edënina bai ina iñömö onquiyänāni inänite,

—Iñæmpa minitö do wænināni weca ponte nê quëwengä ingante ante quinante diqui diqui mīmīni. ⁶Tömengä iñömö edæ dobæ nāni ömæmonte godingä inte edæ iintatodê iñömö dæ angä aedāni. Tömengä wëenënedê Gadideabæ minitö weca nänö ayæ quëwënedê minitö iminite iimaï ante apænecä ëñëmīni inte nōwo adodö ante pönëdāni. ⁷Tömengä iñömö, Botö Waobo ënagaïmo iñömote nê wënæ wënæ cædāni nempo odömonte mao pædæ godönāni æninque tömënāni wæætê wænönāni wænguënëmo imopa, ante apænecä ëñëmīnitapa. Ayæ mëönaa go adoönæque iñonte botö nāni ömæmonte quëwenguënëmo imopa, ante apænecä ëñëmīni inte pönenguënê quëwëedāni.

⁸Ante edënina bai ina äna ëñente wædinque onquiyänāni iñömö, Itota æbänö angacäi, ante tæcæ pönente wædānitapa. ⁹Iñinque ontatodê tao wadæ godinque onquiyänāni iñömö Itota tömengä miñæ nê godināni önonpo tipæmpoga go adocanque ināni inänite mao apænedinque wadāni tömänāni inänite apænedāni ëñënānitapa. ¹⁰Mänömainö ante Itota nänö nê da godongaināni inänite nê gote apænedāni iñömö Mäadiya Mäagadadënä nāni änongä tönö Wäönä, Tantiago wäänä Mäadiya ayæ wadāni onquiyänānique tönö godinque tömënāni inänite apænedāni ëñënönānimpa. ¹¹Incæte, Mänömaï impa, ante mao apænedāni ëñëninque, Onquiyänāni iñömö önonquedö ante tededāni awædö, ante Itota nänö nê da godönināni iñömö edæ pönënāmaï ingadānimpa. ¹²Pegodo guiquënê quingæ ængæ gantidinque pogodo godinque Itota wodido pongantapa. Ponte ædæ wææninque guimö ayongä wīni wīni cædincooque öñö adinque tömengä nämæneque pönëninque, Æbämë cætimpā, ante wædinque wadæ gogacäimpa.

Ēmaodö taadö godänipa

(Mäadoco 16.12-13)

¹³ Eedotadëë ongöningue wædænque inäni näni quëwëñömö Ēmao goinö iñömö onte quidometodo ganca mäninganca taadö impa. Mäniönæ adoönæque iñonte Ēmao iñömö gocæte ante waoda mënaa idömæ godatapa. ¹⁴ Æbänö cætimpä, ante tömänö ante tedegodatapa. ¹⁵ Tedegoyöna Itota incæ mämö bee téninque godongämæ gocä. ¹⁶ Incæte, Tömengä æcänö ingää, ante wë wodonte bai i beyæ tömëna adämaï ëmöna inte ëñënämaï inatapa. ¹⁷ Itota iñömö,

—Æbänö ante wæætedö wæætë tede gominatawoo.

Angä ëñente wædinque tömëna wæwente bai ëmöna inte edæ næ gongænatapa.

¹⁸ Adocanque tömengä ëmöwo Codeopato iñömö tömengä ingante apænedinque, —Eedotadëë quëwëñäni tömänäni, Æbänö ñöwo mäniñömö cætimpä, ante ëñëñönäni bitö adobique adoyömö quëwëninque edæ ëñënämaï imitawoo.

¹⁹ Äñongante Itota,

—Ædö ämina.

Äñongä tömëna wæætë,

—Itota Näatadeta quëwëningä ingante ante tedemönäpa. Wængongui beyæ në apæneçä inongä inte mäningä onguiñængä iñömö Wængongui ayongä ayæ waodäni ayönäni adobai tæï piñænongä inte waa pönï apænedinque nanguï cæcä inongäimpa. ²⁰ Mänömaï iñongante në godönäni ñænænäni tönö mönö ömæ awëñëidi guiquënë wadäni nempo pædæ godöningue, Itota ingante apænte äningue mäo wënömini wængæedäni, änäni ëñëninque iinäni wæætë tömengä ingante ñænquedimæ cæte timpote wææ tiwadinque edæ gönönäni wængantapa. ²¹ Mönatö guiquënë, Tömengä mönö idægocabo Awënë badinque pönö ængä beyænque mönö abæ tawænte quëwenguimö imompa, ante pönënimöna inte edæ ñöwo wæmönäpa. Ayæ, Tömëñäni mänömaï näni cædiönæ edæ ñöwo mëönaa go adoönæque impa, ante edæ mönatö godömenque wæmöna ae. ²² Mänömaï i incæte möni cabo incæ onquiyänäni pancadäniya tömengä wodido gote pöninque, İmaï atamönipa, ante apænedäni ëñente wædinque mönatö wæætë ançai guiñente wæmönäpa. ²³ Tömëñäni iñömö tömengä baö inï adämaï inäni inte edæ wadæ pöninque iimaï ante apænedäni wætämönäpa. Mönitö wiimonte bai Wængongui anquedoda inate mä pönï atamönipa, änänitapa. Ayömönite anquedoda iñömö, Itota ñäni ömæmonte edæ miingä quëwengampa, ante apænedä ëñëninque edæ wadæ pömönipa, ante onquiyänäni apænedäni ëñentämönäpa. ²⁴ Mänömainö ante apænedäni ëñëninque möni cabo incæ pancadäniya Itota wodido gote adinque, Onquiyänäni näni äninö bai edæ näwangä impa, ante adäni incæte Itota ingante adämaï inäni wæmönäpa.

²⁵ Ante apænedä ëñëninque Itota wæætë tömëna inate,

—Minatö pönëgade i apa änewëminäa. Mimö ömædëmina imina inte minatö Wængongui beyæ në apænegaïnäni näni apænedö ante tömänö ante edæ ëñënämaï imina awædö. ²⁶ Codito iñömö edæ cöwë caate wæquënegä ingacäimpa. Ayæ wænte ñäni ömæmöninque tömengä nämä nänö ñäö iñömö æiquënegä ingacäimpa, ante pönëminäa.

²⁷ Ayæ, Codito æbänö cæquingää, ante Möitee wodi æbänö apænete yewæmon-gacäi, ante täno apænedinque Itota mimönoque pönëninque, Wængongui beyæ në

apænedäni tömänäni æbänö apænegadänii, ante, Codito æbänö cæquënegä ingacäi, ante edonque odömonte apænegä ëñënatapa.

²⁸ Mänii tömäna näna quëwëñömö tömäna näna gocæ cæyömö pöñönäni Itota wodo tebæ gocæ cæte bai cæcä. ²⁹ Adinque tömäna nangui äninque tömengä ingante edæ,

—Nöwo gäwadedæ pöni inte wëmö ba apa. Mönatö oncönë go guiite cænte monte baänæ ate goe.

Ante anca äñöna tömäna oncönë pö ëñacæ guicantapa. ³⁰ Ayæ tömäna tönö cæncæte ante tæ contadinque tömengä päö pä äninque Wængongui ingante waa ate pönte apænedinque tömäna inate tæcæ pædæ godoncæ cæyongä. ³¹ Tömäna awinca wi ænete bai bayö, Tömengä ingampa, ante edæ tæcæ adatapa. Tömengä iñömö edæ adoyedë tömäna ayöna edæ dæ gocä. ³² Adinque tömäna guëa tededinque,

—Nawangä intawo. Wængongui mönö Codito ingantedö ante apænegä ëñëninque æbänö yewæmongadänimpa, ante tömengä ponte odömongä ëñëninque mönö mimö edæ gonga bæco bai totamompa. Wii edæ mänömai intawo.

³³ Ante tededinque tömäna adodö taadö quingä godinque Eedotadëe ponte ayö-nate edæ Itota miñæ në godinäni iñömö onte ganca mänimpodäni iñönäni tömënanäni tönö wadäni godongämæ pö bee tente a ongönäni adatapa. ³⁴ Iñäni guiquënë,

—Mönö Awënë iñömö ñäni ömæmonte miingä quëwengampa. Nawangä edæ impa. Tömengä ingante Timönö Pegodo do acantapa, ante godongämæ tededäni adatapa.

³⁵ Mänömainö ante tededäni ëñëninque tömäna wæætë, Mönatö taadö goyömö-nate wacä pö bee tëninque iimai cæcantapa, äninque, Æbänö cæcantapa, ante adodö adodö ante apænedatapa. Ayæ godömenque apænedinque, Oncönë go guiyömöni tömengä päö pä ængä adinque mönatö, Itota ingampa, ante do ëñentamönäni, ante tömänö ante apænedä ëñengadänimpa.

Tömengä miñæ në godinäni weca Itota pongampa

(Mäateo 28.16-20; Mäadoco 16.14-18; Wäo 20.19-23)

³⁶ Mäninö ante ayæ tæcæ tedeyönäni Itota incæ edæ tömënanäni weca tæcæguedänäni do pö guiite a ongöninque,

—Guiñänämai gänë pönëedäni.

³⁷ Angä ëñëninque tömënanäni, Önöwoca badi iimai, ante anca guiñente wædinque, Yæ änäni. ³⁸ Adinque Itota,

—Quinante guiñëwëminii. Mimöno quinante æmæ æmæ pönte wæminii.

³⁹ Bado botö önombo empobo edæ aedäni. Botö önöwa ëwabo aedäni. Botö baö edæ gampo caate aedäni. Iñæmpa önöwoca badi imo bai ædö cæte baö tönö bamë ëaquënemö. Baö tönö bamë ëadömo inte botö imo apa guiñëwëminii.

⁴⁰ Äninque Itota önombo tönö önöwa tömënanäni inänite odömongä. ⁴¹ Adäni incæte tömënanäni guiñente todinque wede pönënämai iñönänite tömengä,

—Minitö weca cængui æbänö mämminii.

⁴² Äñongante gæyæ baö do awëni ëadäni inte pædæ godönäni ⁴³ äninque tömënanäni ayönäni edæ ade cængantapa. ⁴⁴ Ayæ tömënanäni inänite apænedinque Itota,

—Botö imotedö ante Möitee wodi wææ äninque æbänö yewæmongacäi, ante botö minitö weca ayæ quëwëninque do apænetabopa. Botö imotedö ante Wæn-

gonguī beyæ nē apænegaïnāni æbānō yewæmongadānii, ayæ ämotamīni äninque æbānō yewæmongadānii, ante apænetabopa. Mänīne botō apænedō ante tōmānō edæ iinque baquīnō anguēnē.

⁴⁵ Ante apænedinque Itota, Ocai encate ēñencädānimpa, ante pönō cædinque tōmēnāni inānite Wængonguī angä ēñēninque nāni yewæmongaïnō ante odōmonte apæneçä ēñēninque tōmēnāni edonque edæ ēñēnānitapa. ⁴⁶ Ayæ godōmenque apænedinque,

—Mönō Codito cōwē nantate wæninque mēōnaa go adoönæque iñonte nāni ömæ-monguēnengä incæcäimpa, ante edæ edonque yewæmongatimpa. ⁴⁷ Ayæ, Codito emōwo ante Eedotadēē iñömō tāno apænete ate tōmāmæ quēwēnāni inānite iīmaī ante apæneçäimpa. Tōmēnāni inānite apænedinque, Wēnæ wēnæ mīni cædinō ante nīmpo cædinque Wængonguī gāmānō pōedāni. Pōmīni adinque tōmengä wæætē pānāmaī inte pönō nīmpo cæcæcäimpa, ante apænequīnāni incädānimpa, ante yewæmongatimpa. ⁴⁸ Mīnitō iñömō, Æbānō cætimpā, ante nē adīmīni inte edæ nē apænequīmīni iīmīnīpa. ⁴⁹ Ayæ edæ Wængonguī, Botō Tæiyæ Waēmō Önōwoca ingante da pönōmo æncæmīnimpa, angacäimpa. İninque botō Mæmpo nānō nē angaingä ingante botō oo da pönōmo æncæmīnimpa. Mänōmaī i ininque Wængonguī nānō tæi pīñænō æncæte ante mīnitō, Wængonguī Önōwoca ingante ewocacæimpa, ante Eedotadēē iñömō wānō cōedāni, angacäimpa.

Öönädē Itota æicampa

(Māateo 16.19-20)

⁵⁰ Itota ayæ tao godinque Betānia obo pōninque tipæmpoga pædæ æmpod-inque, Mīnitō iīmīnīte Wængonguī waa cæcæcäimpa, ante waa apæneçä ēñengadānimpa. ⁵¹ Tæcæ apæneçä ēñēñōnāni edæ tōmengä iñontobæ inque ingä edæ öönädē æigacäimpa. ⁵² Adinque tōmengä mīñæ nē godīnāni iñömō ædæ wæænte apænedinque, Nāwangä Wængonguī Wengä inongä inte æicampa, ante watapæ apænedinque Eedotadēē wadæ godinque nanguī togadānimpa. ⁵³ Wængonguī oncō nænæncōnē yabæcōnē iīmō iñō iīmō iñō pō pō cædinque Wængonguī ingante, Bitō nāō baī emōmi inte waa pōnī cæbīpa, ante cōwē waa apænegadānimpa.

*Itota Codito ingantedö ante***Wäö***nänö watapæ ante yewæmongainta***Wængonguï nänö Angainö ante nê ëmongaingä Waocä bagacäimpa**

1 Wëenënedê pönï Wængonguï nänö mä badöñedê Wængonguï nänö Angainö ante nê ëmongaingä iñömö do ingacäimpa. Tömengä Wængonguï weca quëwengacäimpa. Ayæ adocä adobaï nê Wængonguï inongä ingacäimpa. ²Wëenënedê pönï tömancoo badönämaï iñedê mäningä do Wængonguï weca quëwengacäimpa. ³Wængonguï angä ëñëninque adocä tömancoo badongacäimpa. Tömengä wïi badongä bai Wængonguï nänö badongaincoo tömancoo edæ dæ ancædönimpa. ⁴Mäningä iñömö mönö quëwenguinö entawengacäimpa. Ayæ mönö quëwenguinö edæ entawëninque tömengä waodäni beyæ nê ñäö bai inongä ingacäimpa. ⁵Tömengä nê ñäö bai ingaingä inte mönö wëmö iñömö ta tamongä ate adoyömö ñäö bai bayonte edæ mönö wëmö iñömö edæ mäniï ñäö ædö cæte mönæ ëmonguïi.

⁶Onguïñængä adocanque ingante Wængonguï da pönongä pöningä ingampa. Tömengä ëmöwo, Wäö, ante pëmonte ingacäimpa. ⁷Tömengä iñömö Wængonguï nänö ñäö ëmömämo ante edonque pönï bacäimpa, ante nê ñäö bai ingaingä ingantedö ante apænecæte ante pongacäimpa. Adocä apænecä beyænque waodäni tömänäni tömengä nänö nê apænedongä ingante pönencædänimpa, ante pongacäimpa. ⁸Incæte mäningä wïi ñäö bai ingaingä ingampa. Wæætê tömengä, Wacä waodäni beyæ nê ñäö bai ingaingä ingampa, ante apænecæte ante pongacäimpa. ⁹Nê nö ñäö bai nê ingaingä iñömö waodäni tömänäni inänite tömengä nänö ñäö ëmömämo pönoncæte ante inguipoga wææ pongacäimpa.

¹⁰Tömengä inguipoga iñömö quëwengacäimpa. Ayæ tömengä inguipoga nê badongaingä iñongante inguipogaque quëwënäni wæætê Baa äninque tömengä ingante ædö cæte ate bai pönenguïñäni. ¹¹Tömengä edæ tömengä qui weca pongacäimpa. Pongä ate tömengä guidëñäni incæ tömengä ingante æñämaï ingadänimpa. ¹²Incæte tömengä ingante nê ængainäni iñömö tömengä ëmöwo, Codito, ante nê wede pönëñäni iñönänite tömengä tömënäni inänite Ao äninque edæ, Wængonguï wënäni bacædänimpa, ante pönö cægacäimpa. ¹³Ayæ Wængonguï wënäni iñömö wïi waocä ëñate bai inänipa. Waocä, Botö wë manguinque, ante äñämaï iñongante ëñadänipa. Wïi nänöogängä angä beyænque inänipa. Wæætê Wængonguï tömenganque cæcä ate tömënäni tömengä wënäni badänipa.

¹⁴Tömengä iñömö edæ, Wængonguï nänö Angainö, ante nê ëmongaingä inique Waocä ëñate bagacäimpa. Waocä ëñate badinque tömengä mönö weca quëwengacäimpa. Mæmpo Wængonguï Wengä adocanque inte adocä godömenque ñænængä inte nê cædongä ingä atamönipa. Adocä Mæmpo weca quëwente nê pongä iñömö tömengä nanguï waadete pönö cædongä inte nöingä änogä ingampa. ¹⁵Wäö iñömö, Mäningä æbänö ingää, ante apænecäimpa. “Mäningä botö nê apænedongä ingantedö ante iïmaï apæneta bopa. Botö täno pömo imopa. Tömengä nê ayæ Ponguingä iñömö godömenque ñænængä inte cædongä ingampa. Edæ botö

ēñadāmaī īñedē tōmengä do ingacäimpa,” ante nanguī pōñi yedæ äñinque Wäö apänegacäimpa.

¹⁶Mäningä nē ayæ Ponguingä īñömö nanguī pōñi waadete pōñö cædinque tōmengä wæætē wæætē nänö entawenö ante pōnongä äñinque tomompa. ¹⁷Edæ Wængonguī tōmengä nänö wææ angainö ante apäñecä ēñēñinque Mōitee wodi wæætē adodö ante yewæmōñinque waodäni īñänite godongacäimpa. Wængonguī nänö waadete pōñö cægainö ante nöingä nänö angainö ante guiquēñē Itota Codito beyænque ēñēmompa. Itota Codito īñömö möñö nē Ponguingä ingaingä ingampa. ¹⁸Mönö waocabo tōmämö incæ Wængonguī ingante cōwē adāmaī ïmopa. Incæte tōmengä adocanque Wengä Wængonguī weca nē quēwēnongä inte, Mæmpo æbänö ingaingä ingää, ante tōmengä odömongä ate pōñēmompa.

Wäö æpäñē guidönongä, Botö wīi Codito ïmopa, angä

(Mäateo 3.11-12; Mäadoco 1.7-8; Odoca 3.15-17)

¹⁹Oodeoidi awēñēidi Eedotadēē quēwēñäni īñömö Wængonguī qui, ante nē godönäni tönö Debii wodi päñinäni īñänite da godönäni Wäö weca godänipa. Gote pōñinque adodäni, Æbidö ïñömi ïmii, ante apäñebi ēñēmönie, äñönäni Wäö ïmaī äñinque ²⁰nämä wææ änāmaī inte wæætē, Botö wīi Codito ïñömo ïmopa, ante edonque pōñi angantapa.

—Botö wīi Codito ïñömo ïmopa.

²¹Äñongante tōmēñäni wæætē tōmengä ingante,

—Æbidö ïñömi ïmii, Ediya wodi ïñömi ïmii. Apäñebi ēñēmönie.

Ante änäni ēñēñinque tōmengä,

—Wabo ïmopa.

Ante äñongä tōmēñäni wæætē,

—Wængonguī beyæ nē apäñebi ayæ Ponguimi ïñömi ïmitawo.

Äñäni ēñēñinque tōmengä,

—Wabo ïmopa.

Ante angantapa.

²²Tömēñäni ïinque äñinque,

—Æbidö ïñömi ïmii, ante apäñebi ēñēmönie tōö. Mönitö ïmönite nē da pōñönänäni weca godinque möñitö tōmēñäni īñänite, Æbidö ïmii, ante ancæmön-impä. ïñinque bitö nämä incæ æbänö ämii.

²³Äñönäni Wäö wæætē tōmēñäni īñänite, Itaiya wodi nē Wængonguī beyæ nē apäñecä nänö angainö bai ante ïmaī ante apäñebo ēñēcæmñinmopa.

—Öñömæca incæ nē aa pebo ïñömo inte botö tōmēmo pepämo ïmaī nani ēñēñö impä. “Awēñē nänö ponguinö ante töñinö pñonnte bai tee möedäni,” ante aa pebopa, angantapa.

²⁴Paditeoidi nē wadö tedete wadö cædäni nani cabo ïñönäni inte tōmēñäni pancadäniya īñänite da godönäni Wäö weca nē godänipa. ²⁵Gote pōñinque mänñäni guiquēñē,

—Bitö wīi Codito ïñömi inte wīi Ediya wodi ïñömi inte ayæ wīi Wængonguī beyæ nē apäñebi ayæ Ponguimi ïñömi ïmipa. Bitö ædö cæte waodäni īñänite æpäñē guidömi ïmii.

²⁶Ante äñönäni Wäö wæætē,

—Botö önonque æpænë guidönömo ïmopa. Wæætë mīnitö weca adocanque a on-gongä ïñongante, Tömengä æcänö ingää, ante mīnitö ëñënamai ïminipa. ²⁷ Botö tåno pömo ïmopa. Tömengä në ayæ Ponguingä ingampa. Botö önonque wædænque cæbo inte ædö cæte tömengä awæncata incæ ñi cæte cæbo ïmoo.

²⁸ Betånia nāni quëwëñömö Oododånö æmæmäa Wäö æpænë nånö guidöñömö mänömai bagatimpa.

Itota Wængonguï Codotedo

²⁹ Baånæ ate Itota bee tente pongä adinque Wäö apænecantapa. “Aedåni, ïngä Wængonguï da pönongä pöningä ingampa. Ayæ tömengä waodåni ingui-poga quëwëñåni nāni wënæ wënæ cægåinö ante æninqe teëmë mongænte wænguingä ingampa, ante Wængonguï tömengä ingante, Codotedo, ante pönö pemongacåimpa. ³⁰ Måningä ïñömö botö në apænedongä ïñongante botö ïmai apænetabopa. ‘Botö tåno pömo ïmopa. Onguïñængä në ayæ Ponguingä ïñömö godömenque ñænængä inte cædongä ingampa. Edæ botö ëñadåmai ïnedë tömengä do ingacåimpa.’ ³¹ Botö incæ adobai, Tömengä æcänö ingää, ante ëñënamai intabopa. Mönö idægocabo ïñö-monte, Mīnitö tömengä ingante ëñencæminimpa, ante botö æpænë guidöninge pömo intabopa.”

³² Ayæ Wäö, Tömengä ingampa, ante åninqe, “Botö æmö ayömete Wængonguï Öñowoca incæ öönædë owote equemö bai wææ tömengä næ gongængä atabopa. ³³ Wængonguï, Waodåni ïnånite æpænë guidöe, ante botö ïmote në da pönöningä wii botö ïmo angä bai botö, Itota æcänö ingää, ante ëñënamai mo incædömoimpa. Incæte tömengä botö ïmote ïmai angantapa. ‘Wængonguï Öñowoca incæ æcänö onguïñængä wææ næ gongængä ayömi måningä ïñömö në æpænë guidönåni bai Wængonguï Tæiyæ Waëmö Öñowoca ingante da pönongä waodåni mīmönouque pö guiquingä, ante cæcä ingampa.’ ³⁴ Måninö botö adinö impa. Månömai beyæ ïmai åmopa, Måningä ïñömö Wængonguï Wengä ïnogä ingampa,” ante Wäö apænecåimpa.

Itota miñæ në tåno godåni

³⁵ Baånæ ate Wäö tönö tömengä ëmiñæna mënaa adoyömo ongöñönåni ³⁶ Itota wodo tebæ cægongä adinque Wäö angantapa.

—Aeda, tömengä ïñömö Wængonguï Codotedo ïnogä ingampa.

³⁷ Måninö angä ëñëninge Wäö nånö në ëmiñæna ïniina incæ Itota ingante tee empo godaimpa. ³⁸ Itota dadi ëmænte ayongä tee empo pöna adinque angantapa.

—Quinante pöminaa.

Ante åñongä tömëna wæætë,

—Mætodo, æyömönö owobi. Apænebi ëñëmönæ.

Ånatapa. Månine, Mætodo, ante mönö tededö, Në Odömongä, ante impa.

³⁹ Åna ëñëninge tömengä,

—Ægodöeda go aeda.

Åñongä tömengä miñæ godatapa. Goyöna ædæ wææicä intapa. Ayæ nånö owocönë gote adinque tömëna adoönæ tömengä weca a ongönapa.

⁴⁰ Wäö nånö åninö ëñëninge Itota ingante tee empo goda mënaa ïñönote adocanque Æntade ïñömö Timönö Pegodo tönñacä ingantapa. ⁴¹ Tömengä nånö tönñacä Timönö ingante ancæte ante diqui diqui minte gote adinque angantapa.

—Mēetiya mönō ānongā ingante atamōnapa, angantapa. Tōmengā iñōmō Wængongui nānō nē Pōnongaingā Codito inongā ingampa.

⁴² Ayä Timönō ingante Itota weca ænte māmongā pongā adinque Itota angampa.

—Bitō Wäö wē Timönōmi īmi abopa. Botō wæætē, Bitō tæimō dicabo bai īmipa, ante bitō imite mönō tededō, Quepata, pōnō pemōmopa. Ōnonque adowo emōwo incæ guidiego tededō, Pegodo, ānānipa.

Pedipe tönō Nāatānaedo inate Itota angā tee empo goda

⁴³ Baänæ ate Itota, Gadideabæ ante gocæboimpa, ante pōnengäimpa. Pedipe ingante adinque Itota tōmengā ingante,

—Botō miñæ pōe, āmo, angacäimpa.

⁴⁴ Pedipe iñōmō Æntade tönō Pegodo bai Betaida nāna quēwēñōmō adoyōmō quēwēningā inongaimpa. ⁴⁵ Pedipe Nāatānaedo weca gocā adinque tōmengā ingante iīmai āninque,

—Wængongui nānō wææ angainō ante yewæmōninque Mōitee wodi nānō nē yewæmongaingā ingante mōnitō atamōnipa. Wængongui beyæ nē apænegaināni adobai māningā ingantedō ante yewæmongadānimpa. Tōmengā iñōmō Itota Nāatadeta quēwēnongā inte Ootee wengā ingampa, ante angantapa.

⁴⁶ Ante āñongā Nāatānaedo wæætē,

—Nāatadeta quēwēñōmō adocanque waa quēwente pongā, ante mōnitō dicæ ēñēmōniyaa.

Angā ēñēninque Pedipe iñōmō,

—Pō ae, angantapa.

⁴⁷ Itota ayongā Nāatānaedo pongā adinque tōmengā,

—Īngā iñōmō nāwā idægocā inongā inte tōmengā nē nō entawēnongā inte babæ cædāmai inongā ingampa, āmopa.

⁴⁸ Angā ēñēninque Nāatānaedo,

—Æbānō īmoo, ante bitō æbānō cæte do ēñēmii,

Ante āñongā Itota wæætē tōmengā ingante,

—Pedipe iñōmō bitō imite ayæ aa pedāmai iñedē bitō iigowæncawa tæ contabi iñōmite botō bitō imite do atabopa, angacäimpa.

⁴⁹ Ayä Nāatānaedo,

—Awēnē nē Odōmōmi īmi, bitō Wængongui Wēmi inōmi imipa. Idægoidi mönō cabo iñōmonte bitō mōnitō Awēnē Odeyebi inōmi imipa, āmopa.

⁵⁰ Āñongā Itota wæætē,

—Bitō iigowæncawa tæ contabi iñōmite botō bitō imite atabopa, āmo beyænque pōnēmi imipa. Māninō ante adinque bitō godōmenque botō bamōnengæ cæbo acæbiimpa, āmopa.

⁵¹ Tōmengā godōmenque angantapa.

—Bitō imite nāwangā āmopa. Ōñadē wi ænete bayō Wængongui anquedoidi Waocā ēñagaingā weca wææninque æiyōnāni bitō acæbiimpa.

Cānaa quēwēñōmō nāni monguimæno cæte bedāni

2 Mēōnaa go adoönæque iñonte Cānaa quēwēñōmō Gadideabæ iñōmō monguimæno ante bedānipa. Itota wānā adoyōmō ponte ongongacäimpa.

² Itota tōmengā emiñænāni tönō tōmēnāni inānite adobai, Monguimæno mīni

bequinque, ante tē tē wente ænte pongadānīmpa. ³Ayæ yowepæ wædænque tī nāmæ biinōmæ nāni āmæ dæ bedāni adinque Itota wānā tōmengā Wengā ingante, —Tōmēnāni biinōmæ dæ āmæpa.

⁴Āñongā Itota wæætē,

—Badā ēñēmī. Botō cæquēnēnō tōmēmoque cæquīnō impa. Botō cæyedē wīī eyepæ impa, āmopa.

⁵Tōmengā wānā iñōmō nē cædāni inānite,

—Mīnitō iīmīnīte æbānō angā ēñente cæedāni, angantapa.

⁶Ayæ ōnōmpo æmæmpoque go adocadeque æpæncade dica inte badōincade iñōmō cō cædāni ongoncadepa. Wængonguī weca guicæte ante waēmō bacēmōimpā, ante āate cædānīpa, ante oodeoidi nāni āagaincade incadepa. Īncade pancacadea otenta ditodo nā ongoncadepa. Ayæ pancacadea tiēē ditodo nā ongoncadepa. ⁷Nē cædāni inānite Itota,

—Æpæncadecoo iñōmō æpæ eyede pōnī pe nīñæedāni.

Angā ēñēnīnque pe nīñængadānīmpa. ⁸Ayæ tōmēnāni inānite,

—Owæta ænte wædænque mā iyænte monguīmæno ante nē cædongā ingante godōmīni æncæcāimpā, āmopa.

Angā ēñēnīnque mānōmāi cægadānīmpa. ⁹Ayæ monguīmæno ante nē cædongā æpæ iīmīæ incæ biinōmæ badīmæ ænīnque, Æbānō īmæ, ante bedīnque tōmengā, Itota nānō badōnīmæ impa, ante ēñēnāmāi īnongāimpā. Nē cædōnāni Itota weca æpæ pe nīñænānīque ēñēnōnānīmpa. Ayæ monguīmæno ante nē cædongā iñōmō nē monguīgā ingante, Nānēnē pōe, aa pecā pongā ate, ¹⁰iīmāi angantapa.

—Wadāni tōmānāni wāimæ biinōmæ tāno godōnāni bedānīpa. Ayæ ate ææmæ becæ pōnāni tōmo pōnī bedāni adinque tōmēnāni biinōmæ wædænque godonte nāni ænīmæ wæætē godōnāni bedānīpa. Bitō guiquēnē nōwoyedē wāimæ biinōmæ bitō nānēnē concædimæ ænte pōmīpa.

¹¹Itota, Acædānīmpa, ante mānōmāi cædinque tōmengā Cānaa quēwēñōmō Gādīdeabæ iñōmō mānīī mā nānō bamōnengæ cægacāimpā. Mānīī tæī pīñænte bamōnengæ cæcā adinque waodāni, Tōmengā waēmō pōnī inte cæcampa, ante edonque agadānīmpa. Ayæ tōmengā ēmīñænāni iñōmō tōmengā ingante godōmenque wede pōnēnāni bagadānīmpa.

¹²Ayæ ate Capēnaōmō quēwēñōmō Itota tōmengā wānā tōnō tōmengā biwīīdi tōnō tōmengā ēmīñænāni tōnō wææ gogadānīmpa. Mānīñōmō godīnque wædænque ēōnæ quēwengadānīmpa.

Wængonguī oncō tæiyæ waēmō bacæimpā, ante cæcā

(Māteō 21.12-13; Mādōcō 11.15-18; Odōcā 19.45-46)

¹³Wodō pænta gogāiōnæ, ante oodeoidi Patowa nāni ææmæ cænguīōnæ oo pōnī bayedē Itota Eedotadēē iñōmō æigacāimpā. ¹⁴Tōmengā iñōmō Wængonguī oncō nāñænæcōnē yabæcōnē pō guīdīnque ayongā wagadāidi obegāidi tōnō equemōīdi inānite godonte æncæte ante nē mānāni inānite acantapa. Ayæ wadāni campio næænte nē godonte ænōnāni iñōmō nāni godonte æimpā tæ contayōnānite tōmengā acantapa. ¹⁵Yæguīncāmē nāñænēmōmo nāā wēnēnīnque que cæte ate ænīnque tōmengā Wængonguī oncō nāñænæcōnē yabæcōnē nē ongōnāni inānite tatodongā tao godānitapa. Adobāi obegāidi tōnō wagadāidi inānite, Tao gobæwedāni, angā tao godānitapa. Ayæ campio næænte nē godonte ænōnāni tōmēnāni tīguitāmō æn-

inque tömengä wido cæcä gueogæ gotimpa. Ayæ adodäni nāni æimpaa bæ tacä guidömëmæ go wæantapa. ¹⁶ Ayæ equemöidi godonte æncæte ante nē mänāni inānite Itota,

—Minitö equemöidi ænte tao gobæwedāni. Botö Mæmpo oncönē incæ mīnitö ædö cæte, Mönö godonte æiñömö bai impa, ante cæmīnitapa töö, angacäimpa.

¹⁷ Mäninö angä ëñëninque tömengä ëmīñænāni Awënē Dabii nānō yewæ-mongainö ante iūmai ante pönente wædānipa. “Bitö oncö ante waodāni waa acædānimpā, ante cæcæboimpā, ante botö nanguī cæinente wængui wæ,” ante yewæmongatimpa.

¹⁸ Ayæ oodeoidi awënëidi pancadāniya tömengä ingante,

—Bitö mänī tömäā awënē bai cæbi incæ æbānō bitö bamönengæ cæte odömömi adinque mönitö, Māningä nē angä ingampa, ante ëñencæmönimpā, ämönipa.

¹⁹ Äñönāni Itota wæætë tömënāni inānite,

—Wængongui tæiyæ waëmö oncö incæ mīnitö iincö bæ tate ewëmini ininque botö mēönaa go adoönæque iñö miincö mænoncæboimpā, ämopa.

²⁰ Angä ëñëninque oodeoidi awënëidi pancadāniya,

—Wængongui tæiyæ waëmö oncö coadenta i tei wadepo ganca mænongadän-impā. Bitö iñömö ædö cæte, Botö mēönaa go adoönæque iñö miincö mænoncæboimpā, ämii, änānitapa.

²¹ Itota iñömö nämä baö incæ ante, Wængongui tæiyæ waëmö oncö bai impa, ante apænecä inongäimpā. ²² Tömengä iincayæ wængä ate Wængongui, Nāni ömæmöe, angä nāni ömæmongä ate, Æbānō angacäi, ante tömengä ëmīñænāni pönënanitapa. Ayæ, Wængongui angä ëñente nāni yewæmongainö nö impa, ante pönënanī inte ayæ Itota tömënāni inānite nānō äninö ante adobaī pönengadänimpā.

Itota, Mönö waocabo æbānō imö, ante ëñengampa

²³ Patowa nāni ææmæ cæyedë Itota Eedotadë iñömö ponte quëwëninque, Acædänimpā, ante bamönengæ nanguī cæcä adinque waodāni tæiyænāni iñömö, Māningä mönö Codito ingampa, ante pönengadänimpā. ²⁴ Itota edæ, Waodāni tömānāni æbānō entawënāni ināni, ante do ëñënogä inte tömengä, Wabānō pönënanī, ante tömënāni inānite gomö adongä ingantapa. ²⁵ Edæ tömengä waodāni nāni entawënö ante do ëñënogä ingantapa. Ininque waocä iñömö, Waodāni æbānō cædāni, ante apænecæcäimpā, ante Itota tömengä ingante, Bitö botö imo adodö an-cæbiimpā, ante änāmai ingacäimpā.

Itota tönö Nüicodemö

3 Paditeocä adocanque tömengä emöwo Nüicodemö tömengä iñömö oodeoidi awënëidi tönö nē godongämæ cæcä ingacäimpā. ² Adocä woyowotæ Itota weca pöninque,

—Awënē nē Odömömi ëñëmi. Wængongui, Odömoncæbiimpā, ante bitö imite da pönongä pönimi imipa, do ëñëmönipa. Edæ Wængongui waocä tönö godongämæ cædāmai ingä ininque māningä ædö cæte bitö bai bamönengæ cæcä aquimönii.

³ Angä ëñëninque Itota wæætë,

—Bitö imite näwangä ämopa. Nē mempoga ëñadinganque Wængongui Awënē Odeye nempo guite aquingä ingampa.

⁴ Äñongä Nüicodemö,

—Waocä picængä ba ate ædö cæte mempoga ëñaquingää. Tömengä nänö wäänä cæncadë ædö cæte mempoga guii æidinque ëñaquingää.

⁵ Ängä ëñëninque Itota angantapa.

—Bitö ïmite näwangä ämopa. Waocä æpænë guidengä ïñongante Wængonguï Öñowoca cæcä beyænque mempoga ëñadinganque Wængonguï Awënë Odeye nempo guuite quëwenguingä ingampa. ⁶ Baonga beyænque në ëñadäni ïñömö edæ baonque ëñate quëwënänipa. Wæætë Wængonguï Öñowoca cæcä beyænque në ëñadäni ïñömö Wængonguï Öñowoca ingante ëwocate quëwënänipa. ⁷ Botö, Bitö mempoga ëñaquënëmi ïmipa, ante botö äñö ëñëninque, Æbämë impa, ante äñämaï incæbiimpa. ⁸ Woboyæ nänö cægaï bai wayömo wayömo päemænte gopa. Woboyæ nänö päemämämo ëñëmö incæ, Ædonö päemænte pö, ædonö päemænte go, ante ëñëñämaï ïmopa. Wængonguï Öñowoca cæcä beyænque në ëñadäni tömänäni ïnänite tömengä æbänö cæcää, ante adobaï ëñëñämaï ïmopa, ämopa, ante Itota apænecantapa.

⁹ Apænecä ëñëninque Niicodemö,

—Æbänö inguüi.

¹⁰ Äñongä Itota wæætë,

—Idægoidi ïnänite në odömömi ïmi incæte mäninö ante ædö cæte ëñëñämaï ïmii. ¹¹ Bitö ïmite näwangä ämopa. Mönitö quiëmë ante ëñëñimöni inte mäninö ante apænemönipa. Mönitö quiëmë ante adimöni ïninqe, Mänömaï impa, ante apænemönipa. Minitö quiquënë möni äñö ante apænemöni ëñëninque ayæ Baa ämïni inte pönëñämaï ïminipa. ¹² Botö minitö ïminite, Inguipoga quëwënäni weca æbänö i, ante apænedimo ïmo incæte minitö ëñëñämaï ïminipa. ïninqe Wængonguï cæcä beyænque öönæde mïni quëwenguinö ante æbänö i, ante apænebo bai ædö cæte pönenguimïni, ante apænecantapa.

¹³ Ayæ apænedinque, “Waodäni tömänäni öönæde æidämaï ingadänimpa. Waobo në ëñagaïmo inte öönæde quëwente në wææ pömo ïñömö botö adoboque öönæde æibo ïmopa. ¹⁴ Möitee wodi öñömæca tæntæ näni badöninto æninque awäa nã cædinque gö cæcä a ongongatimpa. Waobo ëñagaïmo ïmote adobaï awäa timpodinque tiwadinque gö cædäni wægonquënëmo ïmopa. ¹⁵ Mänömaï botö ïmote cædäni adinque botö ïmote në wede pönëñäni ïñömö tömänäni cöwë wænämaï quëwencædänimpa,” ante Itota apænecäimpa.

Wængonguï nänö waadete pönëno

¹⁶ “Edæ Wængonguï incæ inguipoga quëwënäni ïnänite në waadete pönengä inte tömengä Wengä adocanque onguïñængä ïñongante pönongä pongacäimpa. ïninqe æcänö tömengä ingante në wede pönëna ïñömö tömengä wë womönämaï inte cöwë wænämaï quëwencæcäimpa. ¹⁷ Edæ Wængonguï incæ tömengä Wengä ingante inguipoga ïñömö da pönongä pongacäimpa. Incæte, Inguipoga quëwënäni näni pante wæquinque, ante apænte ancæte ante wiï pongacäimpa. Wæætë inguipoga quëwënäni ïnänite tömengä ængä beyænque quëwencædänimpa, ante tömengä ingante da pönongä pongacäimpa.”

¹⁸ “Æcänö tömengä ingante në wede pönëna ïñömö Wængonguï tömengä ingante, Bitö pante wæquinque cæbipa, ante apænte äñämaï incæcäimpa. Æcänö quiquënë wede pönëñämaï ina ïñömö Wængonguï tömengä ingante, Botö Wengä adocanque ïñongante bitö tömengä ëmowo ante pönëñämaï ïñömi inte wæcæbiimpa, ante do

apænte angä ingampa. ¹⁹ Wængongui nänö apænte änö iñömö iimaï impa. Nē ñäö bai inongä iñömö, Wængongui æbänö ingää, ante inguipoga iñömö ancæte ante pongacäimpa. Incæte waodäni tömënäni nāni cædimāmo wænæ wænæ i beyænque wëmö iñömö ante waadete pönënāni inānīpa. Wæætē nē ñäö bai inongä ingante waadedāmaï inānīpa. ²⁰ Nē wænæ wænæ cædönāni inte ñäö iñömö ante pïinque Baa äninque, Mönö cædinö edonque pönī badāmaï ingæimpa, ante ñäö iñömö pönāmaï inānīpa. ²¹ Waodäni Wængongui nāwangä nänö ämaï nē cædönāni guiquënë, Mönö cædinö ante Wængongui mönö tönö godongāmæ cæcä beyænque cætamompa, ante edonque pönī acædänīpa, ante cædinque ñäö iñömö pöninque cædänīpa.”

Wäö nē guidönongä Itota ingantedö ante apænecä

²² Ayæ ate Itota tömengä emiñænāni tönö Oodeabæ wædænque nāni quëwëñömö godänitapa. Gote pöninque mäniñömö tömënāni tönö wædænque quëwëninque Itota angä beyænque tömënāni waodäni inānite apænē guidönāni guiigadänīpa. ²³ Ænöö quëwëñömö æpæ nanguï mä adinque Wäö mäniñömö guidongä guiigadänīpa. Ayæ waodäni, Wäö mönitö imönite apænē guidongingä, ante cöwë tömengä weca pönāni inānite guidongä guidänīpa. Ænöö quëwëñömö Tadii quëwëñömö eyequei inīpa. ²⁴ Mäniñedē Wäö ingante ayæ tee mönedāmaï ingadänīpa.

²⁵ Wäö emiñænāni pancadäniya oodeocä adocanque tönö apænedinque, Mönö oodeocabo æbänö cæte Wængongui weca guiicæte ante wæmö bacæmöimpa, ante tömënāni nāni pönönö ante guädö guëa ante tedewëñänīpa. ²⁶ Adodäni Wäö weca ponte apænedinque,

—Nē odömömi ëñëmi. Oododänö æmæmäa bitö weca nē pönīngä ingantedö ante bitö, Mänīngä ingampa, ante apænebitawo. Edæ mäningä onguiñängä iñömö adobai apænē guidongä guidänīpa töö. Waodäni tömānāni tömengä weca godänīpa, ante wædänitapa.

²⁷ Ante wædäni ëñëninque Wäö,

—Wængongui öönädē quëwëñongä pönö angä æninque waocä mänömaï beyæ cæcampa. ²⁸ Botö wii Codito inömo imopa. Inæmpa Wængongui botö imote täno da pönongä pönimo imopa. Tömengä ayæ Ponguingä, ante apænetabopa. Mänömainö ante apænebo ëñënimini inte minitö tömëmini mäninö ante nē apænequënëmini iminīpa. ²⁹ Monguingä iñömö mongä ate tömengä onquiyängä nänöogängä bacampa. Tömengä guidengä iñömö nē monguingä ante wänö cöninque ëñëñongä monguingä apænecä ëñëninque, Monguingä apænecä ëñëmopa, ante watapæ to-campa. Botö adobai Codito apænecä ëñëmopa, ante mäningä bai nanguï watapæ tobo imopa. ³⁰ Tömengä iñömö godömenque ñænängä inte cædongä baquëñengä ingampa. Botö guiquënë pönömenque wædämo inte cædömo baquëñëmo imopa, ante Wäö apænecäimpa.

Öönädē nē quëwente wææ pongä

³¹ Ayæ Wäö godömenque apænecantapa. Öönädē nē quëwente wææ pongä iñömö tömengä iñömö wii wadäni bai wædängä inte wæætē ñænängä inte cædongä ingampa. Öönädē nē quëwente wææ pongä iñömö tömengä godömenque ñænängä inte cædongä ingampa. Inguipoga iñömö nē ëñacä guiquënë waodäni bai quëwëñongä inte inguipogaque ante apænecampa. ³² Tömengä Wængongui weca quïëmē adīngä inte quïëmē ëñëningä inte mäninö ante apænecä ëñëninque wadäni

wæætē, Nāwangā impa, ante ānāmaī inānīpa tōō. ³³Mānīnō ante nē Ao angā guiquēnē tōmēngā, Wængonguī nāwangā angā ingampa, ante edonque pōnī angā inongā ingampa. ³⁴Edæ Wængonguī nānō da pōnōningā iñōmō Wængonguī nānō ānō ante apānecampa. Tōmēngā ingante Wængonguī iñōmō tōmēngā Ōnōwoca ingante godongā ānīnque tōmēngā ædæmō ēwocate quēwengampa. ³⁵Mæmpo Wængonguī iñōmō tōmēngā Wēngā ingante nē waadete pōnēngā ingampa. Wængonguī tōmēngā ingante, Bitō nempo quīnō inincoo tōmancoo pōnōmo ānīnque bitō awēnē bacæbiimpa, ante pōnō cægacāimpa. ³⁶Æcānō Wængonguī Wēngā ingante nē wede pōnēna iñōmō tōmēngā cōwē wænāmaī quēwencæcāimpa. Æcānō Wængonguī Wēngā ingante nē Baa ante pōnēnāmaī ina guiquēnē tōmēngā wīi cōwē wænāmaī quēwencæcāimpa. Edæ Wængonguī tōmēngā ingante ænguī nānō pangūimāmo cōwē cædongā ingampa, ante Wäo māniñedē iinque apānecacāimpa.

Itota Tāmadiabæ onquiyængā ingante apānecā

4 Paditeoidi inānīte iīmaī ante tededāni ēñēnānītapa. Itota pōnō cædinque apānē guidongā guīdinque tōmēngā nānō ēmiñānāni iñōmō wīi Wäo ēmiñānāni bai wædænque badāni inte nangūi ināni badānīpa, ante tededānītapa. ²Mānōmaī ānāni incæte wīi Itota nē guidongā inongāimpa. Wæætē tōmēngā ēmiñānāni waodāni inānīte guidōnāni guīgadānīpa. ³Mānīnō ante Paditeoidi do ēñēnānīpa, ante ānāni ēñēnīnque Awēnē Itota Oodeabæ quēwēnīnque wadæ go Gadideabæ iñōmō ocæ emænte gogacāimpa.

⁴Gadideabæ taadō Tāmadiabæ iñōmō tæcæguedē inō godō tōmēngā goquēnēngā inongāimpa. ⁵Tāmadiabæ iñōmō godīnque tōmēngā Ticada nāni āñōmō pongantapa. Mānīi Ticada quēwēñōmō eyequei docā Aacobo wodi tōmēngā wēngā Ootee wodi ingante, Pancabaa bitō ōmæ baquīñōmō, ante tōmēngā ingante nānō godongāimæ inīpa. ⁶Ayæ apāamōnicæ Aacobo wodi nānō ææ wogāimōnicæ adoyōmō inīpa. Itota taadō gobæ inō godīnque nangæ badīnque apāamōnicæ iñōmō pō tæ contayongā māniñedē tæcæ bæcā bagatīpa. ⁷Tæ contate ongōñongā Tāmadiabæ quēwēngā onquiyængā apæ iyænte tadonte æncæte ante pongā adīnque Itota tōmēngā ingante,

—Æpæ pōnōmi beboe, angantapa. ⁸Edæ tōmēngā mīñæ nē godāni mānīnāni quēwēñōmō cænguī godonte æncæ godāni inōnānīpa.

⁹Tāmadiaidi inānīte oodeoidi cōwē gomō adāni inānīpa, ante ēñēngā inte Tāmadiabæ quēwēngā onquiyængā iñōmō Itota ingante,

—Bitō oodeobi imi incæte botō Tāmadiabæ quēwēmo iñōmote bitō ædō cæte botō imote, Æpæ pōnōmi beboe, āmīi, āmopa.

¹⁰Āñongā Itota wæætē,

—Bitō, Wængonguī quīnō nānō pōnōnī i, ante ēñēnte bai ayæ, Æbodō inōmo inte bitō imite, Æpæ pōnōmi beboe, ante apāneboo, ante ēñēnte bai bitō wæætē botō imote, Æpæ pōnōmi beboe, ancædōmiimpa. Ayæ botō bitō imite apæ quēwēnguimæ pōnōmo becædōmiimpa, āmopa.

¹¹Angā ēñēnīnque onquiyængā,

—Awēnē, bitō apæ mā iyæncade dæ ampa. Ayæ apāamōnicæ guīibæ impa. Mānīmæ apæ quēwēnguimæ bitō nē apānedīmæ ædōnō mā iyænte ænguīmīi. ¹²Mōnō docā mæmpo Aacobo wodi iñōmō, Botō æmæwo wæmo adīnque botō apāamōnicæ mīnītō quī bacāimpa, ante iimōnicæ mōnō imonte godongacāimpa.

Tömengä adomonicä æpæ begacäimpa. Tömengä wänäni tönö tömengä cæningäidi adobaï adopæ begadänimpa. Adocä mönö docä wædangä iñongante bitö godömenque nänäemi inte nê cædömi imitawogaa, ämopa.

¹³ Äñongä Itota wæætê,

—Æcämenque iñömö mänimæ bedinque wæætê gæwænte bacæcäimpa. ¹⁴Æcämenque botö godonguimæ nê beca guiquënë tömengä gæwänämaï cöwê quëwencæcäimpa. Wæætê botö tömengä ingante tömëmo godonguimæ godömo bedinque tömengä botö quëwënö entawente quëwencæcäimpa. Æpäämonicæ cöwê cægö bai botö tömengä mimöno godonguimæ beyänque tömengä wänämaï nänö quëwenguinö do æninque quëwencæcäimpa, ämopa.

¹⁵ Onquiyængä tömengä ingante,

—Awënë, äninque, Botö gæwänämaï bacæboimpa, ante mänimæ botö imote pönömi beboe, ämopa. Ayæ mäniñömö cöwê æpæ iyæncæ pönämaï incæboimpa.

¹⁶ Ante äñongä tömengä wæætê,

—Goe, bitö nänöogængä ingante aa pedinque ænte mämömi pongæ, angantapa.

¹⁷ Äñongä tömengä wæætê,

—Botö nänöogængä dæ ampa.

Angä ëñëninque Itota tömengä ingante,

—Bitö, Botö nänöogængä dæ angampa, äninque nö ante ämipa. ¹⁸Ïñæmpa bitö nänöogæidi önompo æmæmpoque iñönänite bitö tömënanï inänite mönïmi imipa töö. Ayæ nówoyedê onguiñængä bitö weca nê quëwengä iñömö wii bitö näwä nänöogængä ingampa. Ìnïnque nówo bitö änö iñömö edæ näwangä impa, ämopa.

¹⁹ Angä ëñëninque onquiyængä,

—Awënë, Bitö Wængonguï beyæ nê apänebi imi adinque ëñëmopa. ²⁰Mönitö dodäni mæmpoidi wodi, Ìi onquiyabo inö gote Wængonguï ingante, Bitö Awënë Wængonguï imidö anguënë, ante ædæ wæäninque angadänimpa. Minitö nê ood-eoidi imini guiquënë, Wængonguï ingante waa ate apänecæte ante Eedotadêë quëwëñömö mäniñömonque godinque ædæ wæænte apänecæcäimpa, äminipa töö.

²¹ Äñongä Itota wæætê,

—Onquiyæmi ëñëmi. Botö änö ëñëninque pönëe. Minitö iñömö ædæ wæäninque botö Mæmpo ingante, Bitö Awënë Wængonguï imidö anguënë, ante ïi onquiyabo inö incæ Eedotadêë mäniñömö incæ minitö mäninö ante änämaï anguiönæ oo pönï impa. ²²Minitö tämadiaidi iñömö nê Wængonguï ingante, Bitö Awënë Wængonguï imidö anguënë, ante ædæ wæäninque apänemini incæte adocä ingante, Æbänö ingää, ante ëñënämaï iminipa töö. Mönitö guiquënë nê ædæ wæäninque Wængonguï ingante waa ate apänemöni inte adocä, Æbänö ingää, ante do ëñëmöni imönipa. Edæ, Nê wënæ wënæ cædäni wæncæ cædinäni incæ quëwencædänimpa, ante nê Ængä iñömö oodeocä inongä ingä apa änewëë. ²³Botö Mæmpo ingante, Bitö Awënë Wængonguï imidö anguënë, ante ædæ wæäninque näwangä ante apänedönäni inte apänecædänimpa. Adodäni, Näwangä impa, ante nö pönente ëwocadäni inte ædæ wæäninque Wængonguï ingante mäninö ante watapæ apänecædänimpa. Mäninö ante näni apänequionæ iñömö edæ oo pönï impa. Edæ do iinque batimpa. Wængonguï, Mänömaï entawente nö pönënanï bai inäni inänite diqui diqui mininque, Mäninänique botö imote, Bitö Awënë Wængonguï imidö anguënë, ante ædæ wæäninque watapæ apänecædänimpa, angampa. ²⁴Wængonguï Önöwocaque ëwocate quëwengä ingampa. Ìnïnque nê ædæ wæænte tömengä ingante watapæ apänedäni

iñömö tömënäni, Näwangä impa, ante nö pönente ewocadäni inte ædæ wææninqe tömengä ingante watapæ apænequënenäni inänipa, ämopa.

²⁵ Angä ëñëninque onquiyængä,

—Botö, Mëetiya nani Codito änogä poncæcäimpa, ante do ëñëmopa. Tömengä pongä ate, Æbänö inguii, ante mönö imonte tömänö odömonte apænecä ëñencämönimpa.

²⁶ Äñongä Itota wæætë,

—Botö nê apænebo iñömö Codito inömo imo apa cæbii, ämopa.

²⁷ Tæcæ apæneyongante tömengä miñæ nê godäni ocæ ëmænte ponte ayönäni tömengä iñömö onquiyængä ingante apænecä adinque, Æbänö cæ wæmönii, ante guifñente wædänitapa. Incæte, Æbänö ämii, ante, Quinante tömengä ingante tedebei, ante adocanque incæ äñämaï ingantapa. ²⁸ Ayæ onquiyængä tömengä iyencade ëmö cæte nani quëwëñömö ocæ ëmænte gote pöninque waodäni inänite apænedinque,

²⁹ —Ægodödäni, onguifñængä iñömö botö imote tæcæ adinque, Botö æbänö cæboo, ante tömänö ante botö imo nê apænecä ingante pö aedäni. Mäningä wabänö mönö Codito inongä ingantawo, ante ämopa.

³⁰ Angä ëñëninque tömënäni nani quëwëñömö tao godinque tömengä weca gogadänimpa. ³¹ Onquiyængä nani quëwëñömö tæcæ goyongä Itota nänö nê ëmiñænäni iñömö tömengä ingante,

—Awënë nê Odömömi imi wædænque cæe, ämönipa.

³² Ante äñönäni tömengä wæætë tömënäni inänite,

—Botö cængui botö ëadö ante quinä i, ante minitö guiquënë tömää ëñëñämaï iminipa töö.

³³ Angä ëñëninque tömengä ëmiñænäni godongämæ nämanque apænedinque,

—Wabänö wacä tömengä ingante cængui ænte pongantawo.

³⁴ Äñönäni Itota,

—Botö imote nê da pönongä nänö änö bai botö cædö iñömö mänii tömömo cængui bai impa. Ayæ, Tömengä nänö cædö ante tömänö iinque cæbopa, ante botö cædö iñömö botö cængui bai adobaï impa. ³⁵ Minitö iñömö, Mëa go mëa apäicä bayonte amiñayedë tömëmoncodë gæcämönimpa, ante wii äminitawo. Botö guiquënë minitö iminite ämopa. Waodäni inänite wi æmonte aedäni. Edæ mäninäni tömëmoncoo gæyedë bai inänipa. ³⁶ Itota, Botö beyæ ante waodäni inänite nê gædongä ingante botö, Bitö cæbipa, ante paga cædinque ñowoyedë incæ do pönömo ængampa. Wænämaï wantæpiyæ quëwencædänimpa, ante cædinque ñowoyedë incæ tömengä tömënäni inänite do gædongä ingampa. Ininque botö änö ante waodäni mimöno nê quiyadingä tönö nê gædingä tönö guëa tocædaimpa. ³⁷ Mänömaï wëñëñedë nani angainö ante, Waocä adocanque tömömö quiyacä ate wacä guiquënë nê gædongä ingampa, ante näwangä ante impa. ³⁸ Tömëmoncodë iñömö cædäni bai cædämaï imini incæte minitö tömëmoncoo gæquinäni bai bacæminimpa, ante botö, Waodäni botö quinäni inänite gæcæminimpa, ante minitö iminite da godömo gominitapa. Wadäni iñömö do mänincodë nanguï pöni quiyate cædinque botö änö ante waodäni inänite apænecadänimpa. Minitö guiquënë mini cædämaï iñömö incæ önonque gædimini iminipa, ante Itota apænecäcäimpa.

³⁹ Onquiyængä guiquënë tämadiadi mäniñömö nani quëwëñömö quëwënäni inänite, “Tömengä iñömö botö imote tæcæ adinque, Botö æbänö cæboo, ante tömänö ante botö imote apænecantapa,” ante apænecä ëñëninque tömënäni nan-

guï inäni Itota ingante pönengadänimpa. ⁴⁰Tämadiaidi tömengä weca godinque, Bitö mönitö weca a ongöe, änäni ëñëningue tömengä mëönaa iñonte tömënäni weca owocantapa. ⁴¹Tömengä nänö owoyedë tömengä nänö änö beyænque godömenque tæiyænäni iñömö tömengä ingante wede pönente badänitapa. ⁴²Adodäni onquiyængä ingante,

—Wii bitö apænete änonque ante ëñëningue pönëmöni inte mönitö tömengä apænecä adobaï ëñënimöni imönipa. Ayä, Mäningä iñömö inguipoga mönö quëwencabo iñömonte tömengä näwangä mönö imonte në Ænongä ingampa, ante do ëñëmönipa, apänegadänimpa.

Itota cæcä beyænque awënë tönö cæcä wengä waa bacäi

⁴³Mëönaa go ate tömengä mäniñömö quëwëningue wadæ godinque, Gadideabæ gocæboimpa, ante gocantapa. ⁴⁴Itota inca wëëñënedë, Ìimai impa, ante änongäimpa. Wængonguï beyä në apænecä inte tömengä nänö pægaimæ inca mäniñömö apäneyongä tömengä tönö pægainäni guiquënë tömengä ingante wii waa adänipa töö, ante änongäimpa. ⁴⁵Tömengä mäni Gadideabæ nänö ponque pongä adinque gadideaidi edæ Eedotadëe iñömö Patowa näni æämæ cæyedë Itota bai mäniñömö gote ongöönäni, Tömengä æbänö cæcäa, ante tömäa adinäni inte, Bitö pömi waa amönipa, ante tömengä ingante apänegadänimpa.

⁴⁶Ayä Gadideabæ godinque Itota wæætë Cänaa näni quëwëñömö, Æpæ inca biinömæ bacäimpa, ante wëëñënedë nänö cædiñömö adoyömö gocantapa. Capënaömö näni äñömö quëwëningue adocanque pancabaa awënë tönö godongämæ cæcä iñömö tömengä wëñængä onguiñængä wënæ wënæ inongäimpa. ⁴⁷Adocä onguiñængä iñömö, Itota Oodeabæ quëwente Gadideabæ pongä, änäni ëñëningue tömengä Itota weca gote angantapa. Botö wëñængä onguiñængä wænæ cæcä iñongante bitö tömengä ingante cæbi waa bacæe. Ægodöe. ⁴⁸Itota tömengä ingante,

—Botö, Acæminimpa, ante bamönengæ cæbo ate wæmïni inte mïnitö mäninö beyænque botö imo pönëmïni awædö.

⁴⁹Ante apænecä ëñëningue pancabaa awënë tönö godongämæ cæcä,

—Awënë, botö wëñængä ayä wænämai iñedë ægodöe gocäimpa.

⁵⁰Ante äñongä Itota wæætë,

—Ñöwo wadæ goe. Bitö wëñængä iñömö quëwencæcäimpa, ämopa. Angä ëñëningue onguiñængä, Itota nänö änö nö impa, ante pönëningue wadæ gogacäimpa.

⁵¹Tömengä, Botö oncö, ante taadonque goyongante tömengä beyä në cædönäni tömengä ingante apænecæte ante pö bee ténänitapa. Pö bee téninque,

—Bitö wëñængä waa bacäi.

⁵²Ante apänedäni ëñëningue tömengä tömënäni inänite, Botö wëñængä æyedënö waa bacäi, ante äñongä tömënäni wæætë tömengä ingante,

—Ìimö ædæ gowayedë mäniñedë tömengä gancæ bacantapa, ante apänedänitapa.

⁵³Ayä wëñængä mæmpo, Bitö wëñængä quëwencæcäimpa, ante Itota botö imote nänö äniñedë adoyedë botö wëñængä do waa bacantapa, ante wædinque tömengä tönö tömengä näni quëwencabo tömancabo Itota ingante wede pönënäni bagadänimpa. ⁵⁴Itota oodeoidi weca quëwente Gadideabæ ocä ëmænte pöninque tömengä mäniñömö ii bamönengæ cædinque mempoga nänö cædö bamönengæ bagatimpa.

Itota cæcä beyænque pæ opa pæ opa gocä waa bacäi

5 Ayæ ate oodeoidi, Mönö Wængongui beyæ, ante nani ææmä cæyedë Itota Ee-dotadëë iñömö æidinqe ado ante gogacäimpa. ²Eedotadëë wææ cæte iñömö obegaidi nani pö guidemö gäänë gäwapæ impa. Mänimæ gäwapæ ebedeo tededö Betadapæ nani ämä yæwedeca önompo æmæmpoque ñoncæcate inoncöimpa. ³Mänincönë wænæ wænæ inäni tæiyænäni cöwë öñönönänimpa. Pancadäniya babetamönäni inte pancadäniya pæ opa pæ opa godönäni inte pancadäniya cömante inönäni inänipa. ⁴Adodäni, Æpæ incæ gopæ, ante wänö cönönäni inönänimpa. Edæ Wængongui anquedo wæætë wæætë, Mänimæ incæ incæ gopængæimpa, ante wææ pöninqe cædongäimpa. Gäwapæ incæ incæ go cæpæ adinqe æcänö täno mänimænë guida inte adocä quïëmë wænæ wænæ i waa badongäimpa. ⁵Mäniñömö öñönäni weca adocanque në öñönongä iñömö todëinta i ocho wadepo ganca wænæ wænæ inte wægainingä inongäimpa. ⁶Adocä mäniñömö öñongä ingante Itota ponte ayongä wadäni, Mäningä wantæpiyæ mänömai wænæ wænæ inte wægainingä ingampa, ante apænedäni ëñëninque Itota tömengä ingante,

—Bitö, Waa bainëmo, ämitawo.

⁷Ante äñongä në wænæ wænæ ingä wæætë,

—Awënë, gäwapæ incæ incæ gopæñedë æcänö botö imote ænte guiquinaa edæ dæ angampa. Ayæ botö, Æpænë guicæboimpa, ante goyömo wacä pöninqe do täno guicä.

⁸Ante wæyongante Itota,

—Ængæ gantie, bitö bee podonte möïmo ænte goe. ⁹Äñongä onguïñængä iñömö iñontobæ waa badingä inte tömengä bee podonte möïmo ænte cægonte gocantapa. Oodeoidi nani guëmanguïönæ iñonte Itota mänömai cæcantapa. ¹⁰Mänömai beyæ oodeoidi awënëidi iñömö onguïñængä në waa badingä ingante,

—Ñöwoönæ guëmanguïönæ iñonte mönö æbänö cæquïi, ante do wææ yewæmonte impa cæbii. Bitö bee podonte möïmo næænämai incæbiimpa.

¹¹Ante piñönäni tömengä wæætë,

—Botö imote, Waa bae, ante në cædingä iñömö adocä incæ, Bitö bee podonte möïmo ænte goe, angä cætabopa.

¹²Angä ëñëninque tömënäni tömengä ingante,

—Mäningä iñömö bitö imite, Bitö bee podonte möïmo ænte goe, ante në angä iñömö æcänö ingä. Apænebi ëñëmönïe, änänitapa.

¹³Itota guiquënë do waodäni nanguï inäni ongönäni tæcæguedë go wadæ godongäimpa. Mänömai beyæ onguïñængä në waa badingä iñömö, Në cædingä æcänö ingä, ante ëñënëmai ingantapa. ¹⁴Ayæ ate Itota Wængongui oncö ñænæncö yabæcönë go guidinqe tömengä ingante bee téninqe,

—Ëñëmi, bitö wæætë waa babi imipa. Ìninqe godömenque wænæ wænæ cædämai incæbiimpa. Bitö mäninö wænæ wænæ bitö cægäinö ante ñimpo cædämai imi ininqe wabänö bitö wæwenguinque godömenque babaïmipa, ämopa.

¹⁵Angä ëñëninque onguïñængä wadæ gote oodeoidi awënëidi weca pöninqe angantapa. Botö imote, Waa bae, ante në cædingä iñömö Itota ingampa, ante apænecantapa. ¹⁶Mänömai beyæ Itota mäninö nänö cædinö ante guëmanguïönæ iñonte cæcä adinqe oodeoidi awënëidi iñömö tömengä ingante togænte wænæ wænæ cædanitapa. ¹⁷Itota tömënäni inänite,

—Botö Mæmpo ñowoönæ ganca tömengä nänö cædö ayæ cæcä ingampa. Ayæ botö adobaï cæbo ïmopa, ante apæñecantapa.

¹⁸ Mäninö angä ëñëninque tömënäni godömenque pïininque, Mönö tömengä ingante æbänö cæte wænömö wænguingää, ante godömenque nanguï cægadänimpa. Tömënäni, Tömengä guëmanguïönæ ïñonte do cæcä ingampa. Ayæ godömenque, Wængonguï botö Mæmpo ïnongäimpa, ante tedinque tömengä, Botö Wængonguï baï ïmopa, ante baï cæcampa töö, ante tömënäni godömenque pïingadänimpa.

Tömengä Wengä ingante Wængonguï pönö cæcä ate Awënë bacampa

¹⁹ Itota adodäni inänite iïmaï äninque, “Botö minitö iminite näwangä ämopa. Botö Wængonguï Wëmo inömo incæ ædö cæte adoboque nämanque cæbo ïmoo. Botö Mæmpo æbänö cæcää adinque botö adodonque cæbopa. Edæ botö Mæmpo nänö cædö baï botö Wængonguï Wëmo inte adobaï cæbopa. ²⁰ Edæ Mæmpocä Wëmo ïñö-mote tömengä botö imote waadete pönëninque tömengä nänö cædö tömänö ante botö imote odömongä abo ïmopa. Ayæ minitö, Æbänö cæcä wæmöö, ante wæcæmin-impä, ante cædinque tömengä godömenque bamönengæ nänö cædö ante botö imote odömongä ate botö wæætë cæbo acæminimpä. ²¹ Edæ botö Mæmpo ïñömö æmæwo wængainäni inänite, Ñäni ömæmöninque minitö miimäni quëwencæminimpä, ante pönö cæcä baï botö tömengä Wëmo ïñömö adobaï cæbo ïmopa. Æcänö ingante, Bitö müi quëwencæbiimpä, ante äinëmo inte botö tömengä ingante pönö cæbo ate müingä quëwencæcäimpä. ²² Adobaï botö Mæmpo ïñömö waodäni inänite adinque, Æcänö waa cæcantawo, ante, Æcänö wænæ wænæ cæcantawo, ante apænte änämaï ingampa. Wæætë edæ botö tömengä Wëmo ïñömote tömengä, Bitö mäninö ante waodäni tömänäni inänite apænte ancæbiimpä, ante cægacäimpä. ²³ Mänömaï cædinque botö Mæmpo, Waodäni botö ïmo nänö waa abai adobaï botö Wengä ingante tömänäni waa acædänimpa, ante cægacäimpä. Botö tömengä Wëmo ïñömote nê waa adämaï ingä ïñömö tömengä botö Wæmpocä botö imote da pönongä ingante adobaï waa adämaï ingampa töö,” ante Itota apæñecantapa.

²⁴ Ayæ apænedinque, “Minitö iminite näwangä ämopa. Waocä botö änö ëñëninque botö imote nê da pönongaingä ingante nê wede pönengä ïñömö tömengä nänö apænte pante wæwenguïnö godämaï incæcäimpä. Wæætë tömengä nänö wænämaï quëwenguïnö gocæcäimpä. Edæ tömengä mönö æmæwo wænguinö ñimpo cædinque wænämaï mönö quëwenguïnö do gocäimpä. ²⁵ Minitö iminite näwangä ämopa. Waodäni nê quëwënäni incæ tömënäni æmæwo wængainäni baï inönäni inte tömënäni ïñömö Wængonguï Wëmo botö tedepämo oo ëñencädänimpa. Ñowoönæ tömënäni nänö ëñënguïönæ do batimpa. Nê ëñëñäni ïñömö tömënäni nänö wænämaï quëwenguïnö gocädänimpa. ²⁶ Wængonguï nämä nê quëwënongä inte tömänäni nänö quëwëmämo ante nê godongä ingampa. Mänömaï beyænque botö tömengä Wëmo adobaï nämä nê quëwënömo inte tömänäni nänö quëwëmämo ante nê godömo ïmopa. ²⁷ Ayæ Waobo ëñagaïmo ïñömote tömengä pönö cæcä beyænque botö nê ämo badinque nämä täi pïñante cædinque edæ, Æcänö waa cæcantawo, ante, Æcänö wænæ wænæ cæcantawo, ante nê apænte anguïmo ïmopa. ²⁸ Botö mänömaï ante apænebo ëñëninque minitö, Æbänö angä wæmöö, ante änämaï incæminimpä. Edæ æmæwo wængainäni tömänäni tömënäni nänö wodido nê öñongainäni ïñönänite edæ botö tedepämo incæ tömënäni nänö ëñënguïönæ oo pönö impä. ²⁹ Botö tedepämo ëñëninque tömënäni tömänäni ta poncädänimpa. Nê waa cægainäni

Mänömaï beyä mīnitō botō ïmote ædō cæte pönēmīni ïmīni. ⁴⁵ Botō Mæmpo weca ongōnīnque mīnitō ïmīnitedō ante botō, ïnāni wēnæ wēnæ cædāni ïnānitapa, ante ancæboīmpa, ante mīnitō pönēmīnitawo. Mänömainō ante edæ pönēnāmaï ïedāni. Wæætē Mōītee wodi nānō angāinō ēñente beyænque mōnō quēwengæīmpa, ante pönēmīnīpa. ïnæmpa adocā Mōītee wodi mīni nē pönēnongā ïñōmō, Nē wēnæ wēnæ cæmīni ïmīnīpa, ante ancæcāīmpa cæmīni. ⁴⁶ Mīnitō Mōītee wodi ingante pönente baï adobaï botō ïmote pönencædōmīnīmpa. Edæ tōmengā botō ïmotedō ante yewæ-mongacāīmpa. ⁴⁷ Mōītee wodi nānō yewæmongāinō ante pönēnāmaï ïmīni ïnīnque mīnitō ædō cæte botō apænedō ante ēñēnīnque pönenguīmīni,“ ante Itota mänīñedē ïinque apænecacāīmpa.

5.000 ganca ïnāni ïnānite Itota godongā cænānīpa

6 Mänīnō ïinque apænete ate wantæyō ïñonte Itota wadæ godīnque gāwapæ Gadideapæ nāni ämä æmæmäa tao gogacāīmpa. Mänīmæ Tibediapæ nāni ämä ïmpa. ² Tōmengā wogaa tao gocā adīnque waodāni tæiyænāni pō tee empo godānitapa. Tōmengā, Acædānīmpa, ante cædīnque wēnæ wēnæ ïnāni ïnānite bamōnengæ cæte odōmongā do adīnāni inte godānitapa. ³ Ayæ Itota tōmengā nānō ēmīñænāni ïnānite ānanquīdī ænte mæicā ædīnque tōmēnāni tōmengā tōnō tæ contadānitapa. ⁴ Wodo pænta gogāiönæ, ante oodeoidi Patowa nāni æämæ cæönæ oo pōni ingatīmpa. ⁵ Itota gomō ayongā waodāni tæiyænāni tōmengā weca pōnāni adīnque tōmengā Pedīpe ingante,

—Mänīnāni waodāni beyä ædōnō gote pāō godonte ænīnque godōmōni cæn-guīnāni, angantapa.

⁶ Edæ Itota ïñōmō, Æbānō cæbaīmoo, ante do ēñēningā inte mänīnō ante, Pedīpe æbānō cæquingāā, ante acæte ante angantapa. ⁷ Pedīpe wæætē tōmengā ingante,

—Ïnæmpa pāō ante tōmānāni wædænque cæncædānīmpa, ante ocho apāicā cæte beyä paga æinta ænīnque mänīmpota godonte ænīnque edæ wīi eyepæ ïmaīmpa, angantapa. ⁸ Ayæ tōmengā ēmīñængā Timōnō Pegodo biwī Æntade ïñōmō Itota ingante,

⁹—Mōnitō weca nē ongongā edēningā ïñōmō tebada nāni awēnēnimō guiyā pāō ònompō æmæmpoque tōnō guiyā gæyæ mēa pōni næængā ingampa. Incæte mänīñ cænguī tæiyænāni beyä ædō cæte eyepæ ï, ante wæbopa.

¹⁰ Angā ēñēnīnque Itota,

—Mīnitō tæiyænāni godongāmæ ongōnāni ïnānite ämīni tæ contaedāni, angantapa. Tōmengā nānō ämaï ānāni ēñēnīnque waodāni ònōmæcaque ïnō nangūi gaguīmæ pæyōmō do tæ contadānitapa. Onguīñænāni incæ ònompō æmæmpoque mīido ganca ïnāni inte tæ contadāni ingadānīmpa. ¹¹ Itota pāō ænīnque, Wængonguī, Bitō waa pōni pōnōmī ænte cænguīmōni, ante apænedīnque tōmengā nānō ēmīñænāni ïnānite godongā ænīnque tōmēnāni wæætē tæ contadāni ïnānite dī mæñænāni cænānitapa. Ayæ tōmengā gæyæ ænīnque adobaï cæcantapa. Tōmānāni ïñōmō nāni cæinēnō ante eyepæ cængadānīmpa.

¹² Tōmēnāni tōmo pōni cænāni ate tōmengā ēmīñænāni ïnānite tōmengā,

—Cænguī nāni ao mæ ao mæ ñōnōni ee òñoncoo wote badāmaï ingæīmpa, ante pædæ wææmpo ò æedāni.

¹³ Angā ēñente cædīnque nē cænāni pāō ònompō æmæmpoque tebada nāni awēnēnimō nāni ao mæ ao mæ ñōnōni ee òñoncoo ò ænte da wēnāni ate edæ otodē

tipæmpoga go mentodëa cænguï eyede da wënäni contagatimpa. ¹⁴ Waodäni iñömö Itota bamönengæ nänö cædi adinque,

—Nawangä iingä iñömö Wængonguï beyæ nê apænecä ingampa. Tömengä ingui-poga Ponguingä, ante nani angaingä inongäimpa, ante tæcæ änänitapa.

¹⁵ Tömënäni, Bitö mönitö Awënë Odeye bacæbiimpa, ante botö imote bæi on-goncæte ante poncæ cædänipa, ante wædinque Itota wadæ godinque adocanque änanquidi wæætë æigacäimpa.

Itota æpæ yædopæ dao dao gocä

(Mäateo 14.22-27; Mäadoco 6.45-52)

¹⁶ Gäwadedcæ pönï bayö tömengä ëmiñænäni iñömö gäwapæ yæwedeca wæi gogadänimpa. ¹⁷ Itota angä ëñëninque mäniñömö wæi wipodë guiidinque tömënäni, Gäwapæ æmæmäa Capënaömö nani quëwëñömö mönö taocæimpa, ante tæcæ wogaa tao goyönäni dobæ wëmö bayö Itota ayæ tömënäni weca pönämaï inongäimpa. ¹⁸ Ayæ woboyæ nanguï pæmænte pönö æpæ mäë conta mäë conta cæyonte, ¹⁹ tömënäni wodo tinco quidömetodo wiyate cæyönäni Itota iñömö wipo gämænö pöninque æpæ yædopæ wænömënæcapæ dao dao pongä adinque ancai guiñënänitapa. ²⁰ Ancai guiñëñönänite Itota iñömö tömënäni inänite,

—Botö imopa. Guiñënämaï iedäni, angantapa.

²¹ Ante äñongä tömënäni Ao ante tömengä ingante wipodë æninque tömënäni nani goinëñömö ëmönaiya do tao gogadänimpa.

Waodäni Itota ante diqui diqui minte pönäni

²² Iimö ate tæiyænäni gäwapæ imæ wedeca a ongönönänimpa. Iñinque tömënäni, Wipo adoque pönï mäniñömö wäi wocæ incæte Itota iñömö mänimpodë guidämaï iñongante tömengä miñæ godäni adodäninque guui wadæ tao godänitapa, ante adinque wædänitapa. ²³ Awënë Itota do Wængonguï ingante, Bitö waa pönï pönömi cænguimöni, ante apænecä ate waodäni nani päö cænïñömö pancadäniya ayæ ongönänimpa. Nöwo iñömö wapocoo Tibedia nani quëwëñömö wo cæwodinque mäniñömö tömënäni nani cænïñömö eyequei pönäni adänitapa. ²⁴ Iñinque Itota tönö tömengä nänö ëmiñænäni edæ dæ änäni wædinque tæiyænäni iñömö wipodë guite Capënaömö godinque Itota ante diqui diqui mincæte ante wogaa gogadänimpa.

Itota, Mönö quëwenguinque, ante cænguï bai ingampa

²⁵ Adodäni gäwapæ æmæmäa tao godinque tömengä ingä adinque,

—Awënë nê Odömömi imi æyedëno iñömö pömitawo, änänitapa.

²⁶ Äñönäni Itota wæætë,

—Minitö iminite näwangä ämopa. Minitö tömo pönï päö cænïmini inte botö imote ante diqui diqui mincæ pöminitapa töö. Wæætë edæ botö, Acæminimpa, ante bamönengæ cæbo beyæ minitö wii pömini awædö. ²⁷ Minitö, Mönö cænguï, ante æncæte ante cæmini incæte ingui-pogaque mini woquinonque ante æncæ cædämaï quëwëedäni. Wæætë edæ, Mönö cænguï iinque bayedë cænguï mäë öñongäimpa, ante cædinque minitö, Mönö wænämaï quëwenguinque gocæmöimpa, ante pönente quëwëedäni. Botö nê Waobo ëñagaïmo imo mäniï cænguï minitö iminite pönömo

æncæminimpa. Botö Mæmpo botö imotedö ante, Ìngä nö cæcä ingampa, ante odömongacäimpa.

²⁸ Angä ëñëninque tömënäni tömengä ingante,

—Mönitö, Wængongui nänö cæquimämo ante cæcæte ante quinä cæquënëmöni imönii, ante wæmönipa.

²⁹ Äñönäni Itota wæætë,

—Botö Wængongui nänö në da pönongaïmo ìñömote minitö botö imote mïni wede pönëno ìñömö edæ mäninö Wængongui nänö cædö impa, angantapa.

³⁰ Mänömaï beyæ tömënäni godömenque tömengä ingante,

—Bitö, Èñencädänimpa, ante bamönengæ bitö cædö ante æbänö cæte odömömi adinque pönëmaïmönipa. Æbänö cæquimii, ante anewënänitapa. ³¹ Mönö wæmæidi önömæca nani quëwëñedë cængui mänää nani angai cængadänimpa. Ìmäinö ante yewæmongatimpa. “Tömengä, Minitö cængui, ante tömënäni inänite öönædë inö mäwææ godongacäimpa,” ante nani yewæmongainö bai impa, ante apænedänitapa.

³² Itota wæætë tömënäni inänite,

—Näwangä ämopa. Minitö iminite öönædë mäwææ cængui në pönongaingä ìñömö tömengä wii Möitee wodi ingacäimpa. Wæætë botö Mæmpo ìñömö tömengä minitö iminite öönædë nani näwä cængui bai pönongä cæncæminimpa. ³³ Öönædë quëwente wææ pongaingä ìñömö tömengä ìñömö, Cængui bai ingampa, ante Wængongui nänö në angaingä ingampa. Adocä inguipoga quëwënäni inänite, Mïni wantæpiyæ wænämaï quëwenguinö ante pönongä æninque quëwënänipa.

³⁴ Ante Itota apæneçä ëñëninque tömënäni,

—Awënë, nöwo mänii cængui ìimö ìñö ìimö ìñö pönömi cæmönie.

³⁵ Äñönäni Itota godömenque apænedinque,

—Botö ìñömö, Mïni quëwenguinque, ante mïni cængui bai inömo imopa. Botö weca në pongä ìñömö cöwë cængui gue ænenämaï bai quëwencæcäimpa. Ayæ botö imote në wede pönengä ìñömö cöwë tepæ gæwænämaï bai quëwenguingä ingampa, ante apæneçantapa. ³⁶ Ayæ wæætë, Minitö iminite do botö änö bai impa. Botö imote do adimini incæte minitö ayæ wede pönënämaï iminipa. ³⁷ Botö Mæmpo, Bitö quinäni bacädänimpa, ante cædinque botö imote pönongä æmo ininque botö quinäni në badäni inte tömënäni tömänäni ìñömö botö weca edæ do pönänipa. Ayæ æcämenque botö weca pöna inate, Botö weca pönämaï imipa, ante cöwë änämaï incæboimpa. ³⁸ Edæ öönædë quëwëninque botö wii tömëmö ämaï cæcæboimpa, ante wææ pontabopa. Wæætë botö imote në da pönongaingä nänö ämaï cæcæboimpa, ante wææ pontabopa. ³⁹ Ayæ botö imote në da pönongaingä botö imo nänö angainö ìñömö iïmaï impa. Waodäni bitö quinäni bacädänimpa, ante pönömo æninque bitö quinäni badinque adocanque incæ wë womonte wænämaï incæcäimpa. Wæætë iinque baquïönæ ìñonte bitö, Näni ömæmöedäni, ämi ëñëninque bitö quinäni tömänäni edæ nani ömæmoncädänimpa. ⁴⁰ Edæ botö Mæmpo nänö angainö ìñömö iïmaï impa. Botö Wængongui Wëmo ìñömote botö imote ædæmö adinäni inte edæ botö imote në pönënäni tömänäni cöwë wænämaï wantæpiyæ quëwencädänimpa. Mänömainö ante impa. Ayæ iinque baquïönæ ìñonte botö mäninäni inänite, Minitö nani ömæmöedäni, ämo ate ömæmoncädänimpa. Itota mänömaï apæneçantapa.

⁴¹ Apæneçä ëñëninque oodeoidi ìñömö, Tömengä, “Botö cængui bai imopa, ante öönædë inö wææ pontabopa,” angampa, ante tömengä ingantedö ante tæcæ piinte tedewënänitapa. ⁴² Tömënäni,

—Īngä ĩñömö wīi Ootee wengä Itota ingantawo. Tömengä mæmpo tönö wäänä wīi mönö adöna ĩnatawo. Tömengä ædö cæte, Botö öönædē quēwente wææ pontabopa, angä änewëë.

⁴³ Ante pīññönäni Itota wæætē,

—Minitö namanque godongämæ pīinte tededämaï ĩedäni. ⁴⁴ Botö Mæmpo botö ĩmote nē da pönongaingä wīi pönö cæcä bai æcämenque incæ botö weca pönämaï incædongäĭmpa. Ayæ ĩinque baquiönæ ĩñonte botö weca nē pongä ingante, Nñani ömæmöe, ämo nñani ömæmoncæcäĭmpa. ⁴⁵ Wængonguï beyæ nē apænegaĭnāni nāni yewæmongaintaa ĩmaï ante yewæmongadänĭmpa. “Wængonguï waodäni tömänäni ĩnänite ödömönte apænecä ēñencädänĭmpa.” Botö Mæmpo apænecä nē ēñēnāni ĩñömö tömengä nänö ödömönte apænecä ante nē ēñēnāni ĩñönāni ĩnĭnque tömēnāni tömänäni botö weca pönänĭpa, ante Itota apænecantapa.

⁴⁶ Ayæ apænecäntapa, “Mīni waocabo tömämini incæ botö Mæmpo ingante cöwē adämaï ĩmīnitapa. Botonque ĩñömö Wængonguï weca nē quēwente pömo inte botö Mæmpo ingante nē adimo ĩñömö adoboque pönĭ ĩmpa. ⁴⁷ Mīnitö ĩmīnite näwangä ämopa. Botö ĩmote nē wede pönengä ĩñömö tömengä cöwē wantæpiyæ nänö quēwenguĭmämo do entawente quēwengä ingampa. ⁴⁸ Botö ĩñömö, Mīni quēwenguĭnque, ante mīni cænguï bai ĩmpa. ⁴⁹ Mīni wæmäidi önomæca quēwēñedē cænguï mänää nāni angäi cængäināni incæte edæ do wængadänĭmpa. ⁵⁰ Botö ĩñömö cænguï bai ĩñömo inte öönædē quēwente wææ pömo ĩmpa. ĩnĭnque waocä, Cænguï cænte bai quēwengäĭmpa, ante botö ĩmote pönengä ĩnĭnque tömengä cöwē wænämaï quēwëmaingampa. ⁵¹ Botö cænguï bai ĩmo inte öönædē quēwengäĭmo incæ wææ pontabopa. Æcänö cænguï cænte bai botö ĩmote pönēna tömengä ĩñömö cöwē wænämaï quēwencæcäĭmpa. ĩi cænguï botö godonguï botö nämä baö ĩmpa. Inguipoga quēwēnāni ĩnänite, Mīnitö quēwenguĭmīni, ante botö nämä baö incæ godoncæboĭmpa,” ante Itota mänömaï apænecantapa.

⁵² Mänĭñö angä ēñente wædinque oodeidi nāni cabo ĩñömö godongämæ namanque tededinque wæætē godö wæætē godö änewēñänitapa.

—Mänĭngä ĩñömö mönö ĩmö tömengä nämä baö ædö cæte pönongä cænguĭmönĭi.

⁵³ Ante tedewēñönāni Itota wæætē tömēnāni ĩnänite,

—Mīnitö ĩmīnite näwangä ämopa. Botö Waobo ēñagaĭmo ĩñömote mīnitö botö baö cænämaï inte botö wepæ bedämaï ĩmīni ĩnĭnque ædö cæte Wængonguï wantæpiyæ nänö quēwenguĭmämo entawēmīni ĩnguĭmīni. ⁵⁴ Botö baö nē cængä ayæ botö wepæ nē becä tömengä ĩñömö Wængonguï wantæpiyæ nänö cöwē quēwenguĭmämo do entawente quēwengä ingampa. Ayæ ĩinque baquiönæ ĩñonte botö mänĭngä ingante, Bitö nñani ömæmöe, ämo nñani ömæmoncæcäĭmpa. ⁵⁵ Edæ botö baö näwä cænguï bai ĩmpa. Ayæ botö wepæ näwä bequi bai ĩmpa. ⁵⁶ Botö baö nē cængä inte ayæ botö wepæ nē becä ĩñömö tömengä botö nempo ee quēwēnongä ingampa. Ayæ adobai tömengä botö ĩmote entawēnongä ingampa. ⁵⁷ Botö Mæmpo nē Quēwēnongä inte botö ĩmote da pönongä pönĭmo ĩmpa. Tömengä pönö cæcä ate quēwëmo ĩmpa. Botö ĩmote nē cængä ĩñömö adobai botö cæbo beyænque quēwencæcäĭmpa. ⁵⁸ Botö cænguï bai ĩmo inte öönædē wææ pönĭmo ĩñömö mänĭi cænguï bai ĩmpa. Mönö wæmäidi cænguï mänää nāni angäi cængäināni incæ edæ do wængadänĭmpa. Wæætē nñowo wææ pömo ĩñömote, Cænguï ĩmpa, ante nē cænongä ĩñömö tömengä cöwē wænämaï quēwencæcäĭmpa, ante Itota apænecäĭmpa.

⁵⁹Tömengä mäninö ante Capënaömö nani quëwëñömö nani odömöincönë ongön-
inque tömënäni inänite odömonte apänegacäimpa.

Itota nänö änö beyænque mönö wänämaï quëwengäimpa

⁶⁰Mäninö odömonte apäneacă ëñëninque tömengä ëmiñänäni nanguï inäni,
—Tömengä nänö odömonte apänedinö iñömö waadedämaïnö impa. Edä æcänö
ëñëmaïnaa, ante änänitapa.

⁶¹Mäninö nänö odömonte apänedinö ante tæcæ pünte tedewënäni wædinque
Itota tömënäni inänite,

—Minitö botö äninö ante oda cæmïni inte püimïni imïnitawo, angantapa. ⁶²Ayæ
godömenque apänedinque, Botö Waobo ënagaïmo ïmo öönædë quëwente wææ
pongaïmo inte adodö adoyömö æibo adinque mïnitö æbänö ante ämaïmïni.

⁶³Wængonguï Önöwoca pönö cæcä beyænque waocä quëwengä ïnïnque tömengä
baonque nänö ëñayö beyænque ædö cæte quëwëmaingää. Botö Wængonguï Önö-
woca tönö apänedinque mïnitö imïnite botö apänedinö beyæ mïnitö önöwoca
ëwocate quëwencæminïmpa. ⁶⁴Incæte mïnitö weca pancadäniya iñömö botö ïmo
pönënämaï inänipa töö, ante Itota apäneçantapa.

Edä tömënäni weca æcänö tömengä ingante pönënämaï ingää, ante Itota do
ëñëngongäimpa. Ayæ tömengä ingante në godö odömonguingä æcänö ïmaingää, ante
tömengä adobaï do ëñëngongäimpa. ⁶⁵Itota godömenque apänedinque,

—Botö mänii beyæ mïnitö imïnite do antabopa. Botö Mæmpo wii pönö cæcä bai
æcämenque incæ botö weca pönämaï incædongäimpa, ante apänegacäimpa.

⁶⁶Mänionæ ganca tömengä miñæ në godäni incæ nanguï inäni wadæ godinque
tömengä miñæ ayæ tee empo godämaï ingadänïmpa. ⁶⁷Tömënäni wadæ godäni ad-
inque Itota önompo tipæmpoga go mëa ganca inäni inänite,

—Minitö diyæ æbänö cæquimïni. Minitö tömënäni bai adobaï botö imote emö
cæte, Wadæ goinëmönipa, ämïnitawo.

⁶⁸Äñongä Timönö Pegodo wæætë,

—Awënë, æcänö miñæ gobaïmönii. Wacä mönitö imönite në ëmiñængä iñömö
edæ dæ angampa. Wantæpiyæ wänämaï möni quëwenguïnö ante æbänö gocæmön-
impa, ante wæyömöni bitö iñömö në apänebi imipa. ⁶⁹Bitö iñömö Wængonguï nänö
da pönönömi inte tömengä nänö Tæiyæ Waëmö inömi imipa, ante pönëmöni inte
ëñëmönipa.

⁷⁰Ante apäneacă ëñëninque Itota,

—Minitö önompo tipæmpoga go mëa ganca imïni inte wii botö apänte äñömïni
imïnitawo. Incæte mïni cabo incæ adocanque iñömö wënæ qui ingampa, ante
apänegacäimpa.

⁷¹Timönö Icadïote wengä Codaä ingantedö ante Itota mänömaï angacäimpa. Tö-
mengä önompo tipæmpoga go mënaa nani cabo adocanque ïnongä incæte ayæ ate
Itota ingante odömonte në godonguingä ïnongäimpa.

Itota biwiidi tömengä ingante pönënämaï inäni

7 Ayæ ate Itota Gadideabæ tömämæ wayömö wayömö gocä ingacäimpa. Oodeabæ
iñömö oodeoidi awënëidi botö imote wænönca cædänipa, ante wædinque Itota,
Oodeabæ wii goinëmopa, ante mänïömæ godämaï ïnongäimpa. ²Oodeoidi, Mönö

wæmæidi oncontaicoo mænöninge quëwengadänimpa, ante pönëninge tömënäni ææmæ oo pöni ingatimpa. ³Itota biwüidi tömengä ingante,

—Bitö ëmiñænäni bitö bamönengä cæbi acädänimpa, ante cæcæte ante bitö iñömö ongönämaï inte wæætë Oodeabæ goquënëmi imipa. ⁴Waadäni tömänäni ayönäni cæbo edonque acädänimpa, ante cæinengä iñömö tömengä wüi awëmö cæcampa. Bitö mäniü cædinö do cæbi inte waodäni tömänäni bitö imite edonque pöni acädänimpa, ante odömonte cæe, ämönipa.

⁵Edæ tömengä biwüidi incæ tömengä ingante pönënämaï inäni inönänimpa. ⁶Mänömaï beyæ Itota tömënäni inänite,

—Botö wüi ñowo goquënëmo imopa. Minitö guiquënë æyedëmë gomini incæ cöwë waa impa. ⁷Inguipogaque quëwënäni minitö iminite ædö cæte piinte badäni. Wæætë botö tömënäni inänite, Minitö wënæ wënæ cæmïni iminipa, ante apænebo beyæ tömënäni botö imo piñänipa. ⁸Minitö ææmæ cædäni weca æite goedäni. Botö goquüönæ wüi eyepæ impa, ante pönëninge botö ayæ mänimæ cædäni weca godämaï imopa.

⁹Mäninö äninge tömengä godömenque Gadideabæ ongonte quëwengacäimpa.

Itota näni ææmæ cæyömö gote pongacäimpa

¹⁰Incæte tömengä biwüidi ææmæ ante godäni ate tömengä adobaï godingue wüi waodäni näni ayömö gocampa. Wæætë awëmö gocantapa. ¹¹Ayæ näni ææmæ cæyömö oodeoidi awënëidi iñömö,

—Mäningä onguiñængä æyömönö ingää, ante tömengä ingante ante diqui diqui minte wææ wänönänitapa.

¹²Tæiyænäni ponte a ongönäni godongämæ nämä tededingue tömengä ingantedö ante wæntæ wæntæ tededänitapa. Pancadäniya, “Tömengä waa cæcä ingampa.” Äñönäni wadäni iñömö, “Baa, mäningä waodäni inänite wapiticæ mäodingue, Oda cæquänänimpa, ante cæcä ingampa,” ante apænedönänimpa.

¹³Oodeoidi awënëidi inäni adingue guñente wædinge wadäni tömänäni tömengä ingantedö ante waodäni ëñëñönäni apænedämaï inönänimpa.

¹⁴Tömënäni ææmæ do cæyedë Itota iñömö Wængonguü oncö ñænæncönë yabæcönë æite pö guidinge waodäni inänite mä odömonte apæneçä ëñengadänimpa. ¹⁵Tömengä odömonte apæneçä ëñëninge oodeoidi ancaï guñëninge,

—Æbänö cæte nanguü ëñengä ingää. Edæ tömengä ecoeda adämaï inongä ingampa.

¹⁶Äñönäni Itota wæætë,

—Botö odömonte apænedö ante wüi nämä pönëninge odömonte apænebo imopa. Wæætë Wængonguü botö imote në da pönongaingä nänö angainö ante odömonte apænebopa. ¹⁷Minitö, Wængonguü nänö angainö ante Itota odömonte apæneçampa, ante pönëminitawo. Wæætë, Nämä pönëninge Itota odömonte apæneçampa, ante pönëminitawo. Iñæmpa waocä, Wængonguü nänö ämaï cæcæboimpa, ante æcänö änaa tömengä iñömö, Æcänö angä ëñëninge Itota odömonte apæneçää, ante do ëñencæcäimpa. ¹⁸Në nämä pönëninge apæneçä iñömö tömengä nämä ante, Botö imo waa acädänimpa, ante äinente apæneçä ingampa. Wæætë edæ, Botö imo në da pönongainganque ingante waa acädänimpa, ante në äinente cæcä iñömö tömengä edæ në nö cæte quëwënongå ingampa. Adocä, Waodäni oda cæquänänimpa, ante tömënäni inänite wüi wapiticæ mäocä ingampa, ante Itota apæneçantapa. ¹⁹Ayæ

apænedinque, “Wængongui nänö wææ angainö ante Möitee wodi wii minitö beyæ ante yewæmongacäi. Incæte minitö tömämäni Wængongui nänö wææ angainö adinque ëñente cædämaï iminipa töö. Minitö quïnante botö imote, Wænöinëmönimpa, ante pönëninque cæminii.”

²⁰ Ante awënëidi inänite añongante nanguï inäni adoyömö ongönäni wæætë,

—Bitö wënæ tönö cæbi imipææ, ante tömengä ingante äninque, Bitö imite æcänö wænöinente cæcää.

²¹ Ante änäni ëñëninque Itota godömenque tömënäni inänite,

—Guëmanguïönæ iñonte botö adopoque bamönengæ cæbo adinque minitö tömämäni ancai guïñente wæminipa edæ. ²² Möitee wodi iñömö, Minitö wëñængä ëñacä ate önompo æmæmpoque go mëönaa go adoönæque iñonte mäniönæ tömengä yabæque ëö togæncæminimpa, ante minitö iminite odömönte apænegacäimpa. Wii Möitee wodi mänömaï mä cæcä ingacäimpa. Wæætë wëñëñedë incæ minitö wæmæidi do adodö cægadänimpa. Incæte Möitee wodi, Mäniönæ iñonte ëö togæncæminimpa, ante pönö angä beyænque minitö guëmanguïönæ i incæte minitö wëñængä onguïñængä ingante ëö togæmini iminipa töö. ²³ Möitee wodi nänö wææ yewæmongainö wido cædämaï ingæimpa, ante cædinque minitö guëmanguïönæ iñonte edæ wëñængä onguïñængä ingante do ëö togæminipa. Incæte edæ guëmanguïönæ iñonte botö wënæ wënæ iningä ingante ämo ate tömengä baö tömäñö waa bacä beyænque quïnante botö imote piimäni iminii. ²⁴ Waocä wabänö nänö cædi wënæ wënæ i, ante pönëninque ædæmö ëñënämaï imini inte minitö tömengä ingä, Bitö wënæ wënæ cæbi imipa, ante apænte änämaï iedäni. Wæætë, Æbänö i, ante ædæmö ëñëninque nöingä ante ancæminimpa, ante Itota mänömaï apænegacäimpa.

Itota iñömö Codito mönö në Ponguingä ingampa

²⁵ Mänömaï beyæ Eedotadëë quëwënäni pancadäniya,

—Mäningä ingante wænömöni wæncæcäimpa, ante awënëidi wii äñanitawo, ante mäniñedë tæcæ tedewëñanitapa. ²⁶ Aedäni, tömengä iñömö edonque pönö a ongöninque waodäni inänite apæneyongä incæ mönö awënëidi tömengä ingante änämaï pæ wëënete inänipa töö. Tömënäni wabänö, Mäningä iñömö näwangä Codito mönö änogä ingampa, ante pönëñanitawo. ²⁷ Inæmpa, Mäningä onguïñængä æyömönö quëwente pongä ingää, ante do ëñëmöpa. Mönö Codito, Në Ponguingä, ante näni angaingä iñömö æyömönö quëwente pongää, ante mönö waocabo tömämö incæ ëñënämaï inguimö imompa, äñanitapa.

²⁸ Ayæ Itota Wængongui oncö ñænæncönë yabæcönë odömönte apænedinque aa pecantapa.

—Ao, Botö æbodö imoo, ante minitö ëñëminiyaa. Ayæ botö, Æyömönö quëwente pömoo, ante minitö adobaï ëñëminiyaa. Botö wii nämä pönëninque pontabopa. Botö imote në da pönongaingä näwangä inongä ingampa. Minitö, Tömengä æbänö ingää, ante ëñënämaï iminipa töö. ²⁹ Botö wæætë edæ tömengä weca quëwëmö iñömönte tömengä botö imote da pönongä pönimo inte edæ botö iñömö edæ tömengä ingante do agaïmo inömo imopa, angacäimpa.

³⁰ Mäninö angä ëñëninque tömënäni, Quïnö cæte tömengä ingante bæi ongonguimönimpa, ante pönengadänimpa. Incæte tömengä nänö wænguiönæ wii eyepe i beyæ tömengä ingante ö äñnämaï ingadänimpa. ³¹ Tæiyænäni adoyömö pö

ongönäni weca ongöningue nangui inäni tömengä ingante wede pönänitapa. Tömänäni,

—Mäningä onguinängä inömö nangui bamönengä cæcä inongäimpa. Mönö Codito inömö tömengä pongä ate godömenque bamönengä cæquiringä ingantawogaa.

Itota ingante bæi ongoncæte ante cædäni

³²Tæiyænäni mäninömö ongönäni inömö Itota ingantedö ante mänömainö ante wæntæ wæntæ tedeyönäni Paditeoidi ëñänänitapa. Ayæ, Wængongui qui, ante në godönäni nænänäni tönö Paditeoidi inömö Wængongui oncö nænæncö wææ wänönäni inänite, Minitö goedäni. Tömengä weca godinque tömengä ingante bæi ongonte ænte pöedäni, änänitapa. ³³Itota godömenque apænedinque,

—Minitö weca wantæyö quëwëningue botö ayæ ate botö imote në da pönongaingä weca ocæ ëmænte gocæboimpa. ³⁴Botö ocæ ëmænte gobo ate minitö botö imote ante diqui diqui mimini incæte adämai inguimini iminipa. Ayæ botö go quëwëñömö minitö adoyömö ædö cæte ponguimini iminii.

³⁵Angä ëñëningue oodeoidi awëneidi nämanque tededänitapa.

—Mäningä, Gocæboimpa, ante ædönö goyongante mönitö diqui diqui mininque adämai inguimöni imönii. Tömengä, Edæ mönö guidëñäni do panguimæ godinque guidiegoidi weca wayömö wayömö näni quëwëñömö tömengä wabänö goquingä. Ayæ guidiegoidi mäninömö quëwëñäni inänite odömonte apænebo ëñencædän-impä, ante apænequingä. ³⁶Tömengä inæmpä, “Botö imote ante diqui diqui mimini incæte minitö botö imote adämai inguimini iminipa, angampa töö. Ayæ, Botö go quëwëñömö minitö adoyömö dicæ ponguiminyaa,” ante mäninö ante æbänö ante apænecantawo, angadänimpa.

Waëmö æpæ tayömö ta gopæ mönö quëwenguimæ impa

³⁷Ayæ tömëñäni näni æëmæë iinque cæönæ inönte, Nænæ æëmæ impä, ante godömenque nangui cæyönäni Itota inömö ængæ gantidique yedæ yedæ tedecantapa.

—Në gæwænte wæcä inömö tömengä botö weca poncæcäimpa. Ayæ botö tönö godongämæ becæcäimpa. ³⁸Æcämenque botö imote në wede pönengä inömö tömengä quëwenguimæ ænte entawencæcäimpa. Ayæ waëmö æpæ tayömö ta gote cægömæ bai tömengä adobai tömengä nänö entawënö godonte bai cædinque, Wadäni bete bai quëwencædänimpa, ante godö cæcæcäimpa. Wængongui angä ëñente näni yewæmongainö bai ante mänömainö ante impä.

³⁹Mänömainö ante Itota inömö, Botö imote në wede pönänäni inte ayæ ate Wængongui Önöwoca ingante ænte entawenguinäni inänipa, ante pönëningue mäningä Wængongui Önöwoca ingantedö ante apænegacäimpa. Edæ Itota ayæ wænämai inte öönädë ocæ ëmænte æidämai nänö inëdë Wængongui inömö Tæiyæ Waëmö Önöwoca ingante ayæ da pönönämai inongäimpa.

Waadäni wæætë godö wæætë godö näni änewëñö

⁴⁰Mäninö nänö änö ëñëningue waodäni pancadäniya,

—Nawangä impä. Mäningä inömö, Wængongui beyæ në apænecä në Ponguingä, ante näni angaingä adocä inongä ingampa.

⁴¹Ante äñönäni wadäni guiqënë,

—Mönö Codito në Ponguingä, ante nani angaingä mäningä ingampa.

Änani ëñëninque wæætë wadäni,

—Mönö Codito ædö cæte Gadideabæ quëwente pongä ingää, änänitapa.
⁴² İñempa mönö Codito İñömö Awënë Dabii päingä inguingäimpa. Ayæ Bedëë Dabii nänö quëwengaiñömö adoyömö ëñaqingä ingampa, ante Wængongui angä ëñente nani yewæmongainö ongö adämaï İmïnitawo.

⁴³ Angä ëñëninque waodäni, Itota æcänö ingää, ante mänömaï wadö wadö ante pönente tedewengadänimpa. ⁴⁴ Pancadäniya, Tömengä ingante bæi ongöinëmönipa, änäni incæte tömengä ingante bæi ongonte ænämaï ingadänimpa.

Awënëidi Itota ingante pönenämaï İñönäni

⁴⁵ Wængongui oncö tæiyæ waëmö oncönë wææ wänönäni İñömö, Wængongui quï, ante në godönäni ñænænäni tönö Paditeoidi weca ocæ ëmænte pönänipa. Ocæ ëmænte pönäni adinque tömënäni,

—Quinante tömengä ingante ænte pönämaï İminii.

⁴⁶ Ante äñönäni wææ wänönäni wæætë,

—Mäningä onguiñængä waa apænecaï bæi æcänö adobaï tedecä İñömö edæ dæ angampa.

⁴⁷ Änani ëñëninque Paditeoidi guiquënë,

—Tömengä mïnitö İmïnite adobaï wapiticæ mäocä oda cæte gobaimini bamïnitawo. ⁴⁸ Äninque tömënäni godömenque, Awënëidi incæ Paditeoidi incæ adocanque tömengä ingante pönengä ingantawogaa. ⁴⁹ Nanguï İnäni İñömö ongönäni guiquënë tömënäni në önönänique inte Wængongui nänö wææ angainö ante ëñenämaï İnäni inte tömengä ingante pönänäni İnäni. Mänömaï beyæ tömënäni Wængongui nänö pangaimämo ante wæquïnäni İnäni.

⁵⁰ Niicodemö İñömö wëenënedë Itota weca në godingä adobaï tömënäni bæi Paditeocä İnogä inte apænecantapa.

⁵¹ —Wacö, Æbänö cæboo, ante nämä beyæ wææ änämaï İñongante mönö, Tömengä ingante pangäimpa, ante ædö cæte apænte anguiï. Edæ, Wææ änämaï İñongante pangäimpa, ante dicæ wææ yewæmongadäniña.

⁵² Ante äñongä tömënäni,

—Bitö adobaï Gadideabæ quëwente ponte bæi tedebipææ. Wængongui beyæ nani yewæmongainta ae. Adinque bitö, Wængongui beyæ në apænecaï wï Gadideabæ quëwente pongä ingampa, ante do ëñencæbiimpa, ante angadänimpa.

Onquiyængä nänö towënë

⁵³ Mäninö änäni ate tömänäni oncönë ocæ ëmænte gogadänimpa.

8 Itota guiquënë Odibowænquidi nani anquidi gocantapa. ² İimö ate ñäö bayedë tömengä Wængongui oncö ñænæncönë yabæcönë wæætë pö guicä adinque waodäni tömänäni tömengä nänö ongöñömö goto pönäni adinque Itota tömënäni İnänite odömonte apænecate ante tæ contacantapa.

³ Mäniñedë onquiyængä adocanque tömengä nänöogængä İnämaï İñongante wacä onguiñængä tönö tæcæ godö guëa mongä adäni ate në odömönäni tönö Paditeoidi İñömö mäningä onquiyængä ingante ænte pönänitapa. Tömengä ingante tæcæguedë gö cädäni ongöñongä ⁴ tömënäni Itota ingante,

—Awënë në Odömömi imi, iingä onquiyängä iñömö wacä ingante tæcæ godö guëa mongä adäni wæmönipa. ⁵Wængongui nänö angainö ante Möitee wodi iimaï ante wææ yewæmongacäimpa. Onquiyänäni mäningä onquiyängä bai cädäni iñönänite minitö tömënäni inänite dicaca tacamini wæncädänimpa. Bitö guiquënë quinö ämii.

⁶Mäninö ante tömënäni iñömö, Æbänö apænecää, äninque, Wabänö pancadea wapiticä tedecæcäimpa, ante cädänitapa. Edæ wapiticä tedecä ininque mönitö, Adocä wënæ wënæ cæcä ingampa, ante ancæmönimpa, ante cädänitapa. Itota guiquënë ædæ wææninque onguipoga tömengä önongompoga yewæmongacäimpa. ⁷Tömënäni godömenque tömengä ingante ëñencæte ante äñönäni Itota ængæ gantite tömënäni inänite,

—Minitö weca adocanque ongöninque në wënæ wënæ cädämaï ingä ininque mäningä täno onquiyängä ingante, Wænguimi, ante dicaca tacacæcäimpa, ante angantapa.

⁸Äninque wæætë ædæ wææninque onguipoga yewæmongacäimpa. ⁹Mäninö angä në ëñänäni iñömö adocanque wadæ go wacä wadæ go wacä wadæ go tömänäni wadæ godänipa. Picänäni täno wadæ godäni ayæ wadäni wadæ godänitapa. Tömänäni dæ godäni adinque Itota adocanque ee ongönongä onquiyängä ayæ adoyömö næ gongængantapa. ¹⁰Itota ængæ gantidinqe onquiyängä ingante,

—Æyömönö inänii. Bitö imite apænte äninque tacadämaï inänitawo.

¹¹Äñongä tömengä wæætë,

—Awënë, tömänäni mänömaï cädämaï inänitapa.

Angä ëñëninque Itota,

—Botö adobaï bitö imite apænte äninque tacadämaï incæboimpa. Nöwo goe ämopa. Bitö wënæ wënæ cæte quëwënimämo ñimpo cæte waa quëwëe, angacäimpa.

Inguipoga quëwënäni beyæ Itota ñäö bai inongäimpa

¹²Ayæ Itota wæætë waodäni inänite apænedinque,

—Botö iñömö inguipoga quëwënäni beyæ ñäö bai imodö angüënë. Æcänö botö miñæ tee empo goda tömengä wëmö iñömö cöwë cægönämaï ingampa. Wæætë tömengä nänö quëwënö taadö edonque acæcäimpa, ante botö tömengä beyæ ñäö bai imopa, ante apænecantapa.

¹³Paditeoidi guiquënë tömengä ingante,

—Bitö iñömö nämä äninque, Æbänö imoo, ante apænëbi imipa töö. Mänömaï nämanque ante apænëbi beyæ bitö äninö önonquedö ante impa, ämönipa, piñänitapa.

¹⁴Itota wæætë,

—Botö iñömö nämä äninque, Æbänö imoo, ante apænëbo incæ botö apænedö näwangä impa. Edæ, Botö æyömönö quëwente pömo imoo, ante ayæ, Ædönö gobo imoo, ante do ëñëmopa. Minitö guiquënë, Botö æyömönö quëwente pömoo imoo, ante ayæ, Ædönö gobo imoo, ante wii ëñëminipa töö. ¹⁵Waodänique, iimaï cädäni, ante näni wææ ante cægai bai minitö wacä ingante apænte ämini iminipa. Botö guiquënë waodäni tömänäni inänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämaï imopa. ¹⁶Incæte botö mänömaï apænte ämo bai, Æbänö apænte ämoo, ante pönëninque tömëmö nö ante apænte ämopa. Edæ wii botonque apænte ämopa. Wæætë botö Mæmpo botö imote në da pönongaingä iñömö tömengä iñömö botö tönö godongämæ cæcä ate apænte

ämopa. ¹⁷ Minitö mini wææ yewæmongaintaa iïmaï ante wææ yewæmongatimpa. Mënaa onguïñæna në adïna inte tømëna nana adinö ante apænedä ëñëninque mïnitö wæætë, Nö impa, ante ëñencæminimpa. ¹⁸ Botö iñömö nämä äninque, Æbänö imoo, ante apænebo imopa. Ayæ botö Mæmpo botö imote në da pönongaingä iñömö tömengä botö imotedö ante, Æbänö ingää, ante adobaï apænecä ëñencæminimpa.

¹⁹ Angä ëñëninque tømënäni tömengä ingante,

—Bitö Mæmpo æyömönö quëwengää.

Äñönäni Itota wæætë,

—Minitö iñömö, Botö incæ æbänö imoo, ante, Botö Mæmpo incæ æbänö ingaingä ingää, ante ëñëmini iminitawogaa. Botö æbodö imoo, ante ëñëmini inte baï mïnitö, Botö Mæmpo æbänö ingaingä ingää, ante adobaï ëñëmini incädöminimpa, ante apænegacäimpa.

²⁰ Itota Wængonguï oncö ñænæncönë yabæcönë go guidinque, Wængonguï qui, ante nani da wencade gäänë ongonte apænedinque mäninö ante apænegacäimpa. Incæte tömengä nänö wænguïönæ wïi oo pönï i beyænque tömengä ingante bæi ongonte ænämaï ingadänimpa.

Itota, Botö goquïñömö mïnitö ædö cæte goquïmïni, angä

²¹ Itota wæætë tømënäni inänite äninque,

—Botö wadæ goquïmo imopa. Gobo ate mïnitö botö imote ante diqui diqui minguiïmini iminipa. Minitö wænæ wænæ cädömini inte wæncæminimpa. Botö goquïñömö mïnitö ædö cæte ponguïmïni, angantapa.

²² Mäninö beyæ oodeoidi awënëidi, Tömengä iñömö, Botö goquïñömö ante mïnitö ædö cæte ponguïmïni, ante quïnante angää. Tömengä nämä incæ, Wænonguïmo, ante pönëninque iïmaï angantawo, ante änänitapa.

²³ Itota godömenque,

—Minitö iñömö inguipoga quëwëmini iminipa. Botö guiquënë öönæde quëwente põmo imopa. Minitö iñömö iï inguipogaque nani quëwencabo tönö adömini iminipa. Botö guiquënë iï inguipogaque nani quëwencabo tönö adobo inämaï imopa.

²⁴ Mänömaï beyæ botö, Minitö wænæ wænæ cädömini inte wæncæminimpa, ante mïnitö iminite apænetabopa. Botö, Æbänö imoo, ante ämo ëñëninque pönënämaï imini ininque mïnitö wænæ wænæ cädömini inte nö wæmaïminipa.

²⁵ Ante apænecä ëñëninque tømënäni,

—Æbidö imitawo.

Ante äñönäni Itota wæætë,

—Botö do mïnitö iminite, Æbodö imoo, ante në änimö imopa. ²⁶ Botö mïnitö iminitedö ante nangui anguënëmo imopa. Minitö iminitedö ante ämo baï mänii botö änö mini apænte anguinque imaimpa. Incæte botö imote në da pönongaingä iñömö tömengä nöingä inte tömengä, Quinö botö imote angää, ante botö ëñëninö ante botö adodö ante inguipoga quëwënäni inänite apænebo imopa, angantapa. ²⁷ Incæte tømënäni, Itota tömengä Mæmpo ingantedö ante mönitö imönite apænecampa, ante ëñënämaï ingadänimpa. ²⁸ Mänömaï beyæ Itota,

—Botö Waobo ënägaïmo iñömote mïnitö botö imote awäa timpodique tüwad-inque gö cæmini wægöñömo mïnitö mänïñedë edæ, Botö æbodö imoo, ante ëñencæminimpa. Ayæ botö nämä pönëninque cädämaï imopa. Wæætë Wæmpo nänö odömonte apænedö ante botö imote apænecä botö ëñëninö ante adodö ante

apænebopa, ante mīnitō adobaī māniñedē ēñencæminimpa. ²⁹ Botō ïmote nē da pōnongaingā botō ïmote ēmō cædāmaī inte cōwē botō tōnō godongāmæ ongongā ingampa. Edæ botō cōwē, Æbānō cæbo ate tōmengā waa aqinggā, ante cæbopa, ante Itota apænegacäimpa.

³⁰ Māniñō āñongā nanguī ïnāni ïñömō tōmengā ingante pōnengadānimpa.

Wēnæ beyænque nē cædāni

³¹ Oodeoidi pancadāniya nē pōnēnāni ïñōnānite Itota ïñömō,

—Mīnitō cōwē botō odōmonte apænedinō baī cæmīni ïninque botō mīñæ nō gomīni ïmaīminipa. ³² Ayæ botō ānō nōinō impa, ante ēñencæminimpa. Māniñō nō botō ānō beyænque mīnitō ñimpo cæte quēwencæminimpa.

³³ Ante āñongā tōmēnāni wæætē,

—Mōnitō ïñömō Abadäō nānō pæimōni ïmōni inte mōnitō cōwē wacā æcāmenque beyænque nē cæmōni ïnāmaī intamōnipa tōō. Bitō ïñömō, Wacā beyænque mīnitō godōmenque cædāmaī inte ñimpo cæte quēwencæminimpa, ante ædō cæte āmii.

³⁴ Āñōnāni Itota wæætē,

Mīnitō ïminite nāwangā āmopa. Nē wēnæ wēnæ cæcā ïñömō tōmengā wacā beyænque cæte nē quēwengā baī wædongā inte edæ tōmengā nānō wēnæ wēnæ cægaiñonque ante cædinque ædō cæte aamō cæte goqinggā. ³⁵ Wacā beyænque cæte nē quēwengā ïñömō tōmengā awēnē nāni wencabo tōnō wīī cōwē godongāmæ quēwengā ingampa. Awēnē wengā guiquēnē tōmengā mæmpo tōnō nāna wencaya ïna beyænque tōmengā awēnē tōnō cōwē guēa quēwengā ingampa. ³⁶ Mānōmaī beyæ Wængonguī Wengā mīnitō ïminite ñimpo cæcā ïninque mīnitō nō ñimpo cæte quēwēninque wacā beyænque nē cæcā baī ïnāmaī inte quēwenguīmīni ïmaīminipa. ³⁷ Mīnitō ïñömō Abadäō nānō pæimīni ïminipa, ante do ēñēmopa. Incæte botō ānō ante mīmōnē entawēnāmaī quēwēmīni beyæ mīnitō botō ïmote, Wænōmōni wæncæcäimpa, ante pōnēmīni ïminipa. ³⁸ Botō ïñömō botō Mæmpo weca tōmēmo adīnō ante mīnitō ïminite apænebo ïmopa. Mīnitō guiquēnē mīni mæmpo nānō angaiñō mīni ēñēniñō ante cæmīni ïminipa.

³⁹ Ante apæneyongā tōmēnāni wæætē,

—Abadäō mōnō docā mæmpo ingaingā ingampa.

Ānāni ēñēninque Itota,

—Mīnitō nō Abadäō wēmīni inte baī mīnitō tōmengā nānō cægaiñō baī adobaī cæcædōminimpa tōō. ⁴⁰ Ñōwo ïñæmpa botō, Wængonguī nāwangā nānō angaiñō ante botō ēñēniñō ante mīnitō ïminite nē apænebo ïñōmote mīnitō, Mōnitō æbānō cæte wænōmōni wænguinggā, ante pōnēmīni ïminipa. Abadäō māniī mīni cægai baī cædāmaī ingacäimpa. ⁴¹ Mīnitō ïñömō tōmēmīni mæmpo nānō cægai baī adobaī cædōmīni ïmīni awædō.

Āñongante tōmēnāni,

—Mōnitō wīī wegōwæ wēmōni ïmōnipa tōō. Wængonguī incæ tōmengā adoconque mōnitō Mæmpo ïnongäimpa.

⁴² Ānāni ēñēninque Itota tōmēnāni ïnānite,

—Wængonguī nāwangā mīnitō Wæmpocā ingā baī mīnitō botō ïmote waadete pōnencædōminimpa. Edæ botō Wængonguī weca quēwente mīnitō weca ñōwo wææ pontabopa. Botō wīī nāmā pōnēninque pontabopa. Wæætē tōmengā botō ïmote da

pöningä pongäimo imopa. ⁴³ Minitö iminite botö quinä apäneboo, ante minitö quinate eñenāmai iminii. Edæ botö änö ante, Quinä apäneboo, ante minitö babetamö ināni bai inömini inte ædö cæte eñenguimīni. ⁴⁴ Wēnæ iñömö minitö mæmpo inongäimpa. Ayæ minitö mæmpo nänö cæinewēnō ante minitö adodō ante, Mōnitö cæinēmōnīpa, ante cæmīnīpa. Wēēñedē inguipoga mā badōñedē tōmengä, Botö wænonguimo, ante do entawengä ingacäimpa. Tōmengä, Quinä nāwangä impa, ante cōwē ānāmai ingampa. Ayæ edæ, Quinä änö nōinō impa, ante tōmengä entawēnāmai inongäimpa. Adocä babæ tēdēdīque tōmengä babæ nänö entawēnonque ante tedewengä ingampa. Edæ tōmengä nē babæ ānongä ingampa. Ayæ tōmengä iñömö mā babæ angaingä ingampa. ⁴⁵ Incæte botö nāwangä āmo beyænque minitö botö änö ante pōñenāmai imīnīpa tōö. ⁴⁶ Minitö weca ongongä iñömö æcāmenque incæ botö imote apænte āninque, Bitö wēnæ wēnæ cæbi imīpa, ante, Nāwangä impa, ante odömōnatawogaa. Botö nāwangä āmo bai minitö quinate botö angainō ante pōñenāmai imīnīpa. ⁴⁷ Wængonguī wēnāni nē inōnāni iñömö Wængonguī nänö angainō ante eñenāni inānīpa. Minitö guiquēnē tōmengä wēmīni ināmai imīni beyæ, Tōmengä quinä angää, ante eñenāmai imīnīpa, ante Itota apānegacäimpa.

Abadäo ayæ eñadāmai iñedē mönō Codito do ingaingä

⁴⁸ Oodeoidi wæætē tōmengä ingante,

—Bitö Tāmadiabæ quēwēmi imipææ. Ayæ wēnæ tönō cæbi imipææ, ante wīi nāwangä āmōni intamōni.

⁴⁹ Ante pīināni eñēnīque Itota wæætē apānedīque,

—Botö wīi wēnæ tönō cædōmo imopa. Wæætē botö iñömö, Botö Mæmpo ingante waa acæboimpa, ante cæbo imopa. Minitö guiquēnē botö imote waa adāmai imīnīpa tōö. ⁵⁰ Waodāni, Bitö waēmō imīpa, ante botö imote apānecædānīpa, ante botö cædāmai imopa. Wæætē wacä iñömö, Waodāni bitö imite apānedīque, Waēmō imīpa, ante apānecædānīpa, ante nē cæcä ingampa. Māningä nē apænte ānongä ingampa. ⁵¹ Minitö iminite nāwangä āmopa. Botö angainō ante nē eñente cæcä tōmengä iñömö wantæpiyæ wænāmai quēwencæcäimpa, angantapa.

⁵² Ante apānecä eñēnīque oodeoidi,

—Bitö wēnæ tönō cæbi imīpa, ante nōwo ædæmō eñēmōnīpa. Abadäo wodi iñæmpa do wængacäimpa. Ayæ Wængonguī beyæ nē apānedāni adobai do wængadānīpa. Incæte bitö, “Botö angainō ante nē eñente cæcä tōmengä iñömö wantæpiyæ wænāmai quēwencæcäimpa, ante apānēbi tōö.” ⁵³ Mōnō docä mæmpo Abadäo wodi nānængä inte cægaingä incæte bitö iñömö edæ, Abadäo wædangä iñongante botö iñömö godōmenque nāñæmo inte cædōmo imopa, āmitawo. Tōmengä iñömö edæ do wængacäimpa. Ayæ Wængonguī beyæ nē apānedāni adobai do wængadāni apa ānewē. Bitö nāmā āninque, Æcāmē bai imoo, ante āmi.

⁵⁴ Āñōnāni Itota wæætē,

—Botö nāmā āninque, Waodāni, Bitö waēmō imīpa, ante botö imote apānecædānīpa, ante eñēnīte wæbo bai waodāni botö imote nāni waa apānedō wæætē ononquedō ante incædōnīpa. Botö Mæmpo incæ minitö, Mōnō Wængonguī ingampa, ante mīni ānongä guiquēnē tōmengä iñömö, Bitö waēmō imīpa, ante botö imote pōnō apānecä apa quēwēmīni. ⁵⁵ Minitö tōmengä ingante wīi adīnque pōñenāmai imīnīpa tōö. Botö guiquēnē tōmengä ingante do agāimo inte pōñēmo imopa. Botö tōmengä ingante adāmai imopa, ante bai botö minitö bai babæ ante ancædōmoimpa.

Wæætē tōmengā ingante do adinque nē pōnengaimo inte botō iñōmō edæ tōmengā nānō angaiñō bai nē cæbo ïmopa. ⁵⁶Inguipoga botō ponguiñōnæ ante mīnitō docā mæmpo Abadäō wodi incæ, Codito ponguiñōnæ pongā acæboimpa, ante pōnēninque do edæ watapæ togacäimpa. Ìninque tōmengā māniñōnæ Codito nānō ponguiñōnæ adinque godōmenque togacäimpa, ante Itota apænecantapa.

⁵⁷Oodeoidi tōmengā ingante,

—Bitō ēñagai iñōmō tincoenta wadepo ināmaï i incæte bitō ædō cæte, Botō Abadäō ingante atabopa, ante ämii.

⁵⁸Ante piññōnāni Itota wæætē,

—Mīnitō iñinite nāwangā ämopa. Abadäō wodi ayæ ēñadāmaï iñedē botō iñōmō edæ do quēwēmo ingaimo ïmopa, ante apænecantapa.

⁵⁹Māniñō ante apænecā ēñēninque tōmēnāni iñōmō tōmengā ingante dicaca tacacæte ante cædinque dicacoo wææmpo ænānitapa. Incæte Itota wē womōninque Wængongui oncō ñænæncodo tao wadæ gogacäimpa.

Babetamō ēñagaingā incæ waa bamonte acampa

9 Itota gomonga godinque onguiñængā babetamō ēñagaingā ingante acantapa.

²Tōmengā ēmiñænāni iñōmō tōmengā ingante,

—Awēnē nē Odōmōmi ïmi, māningā onguiñængā incæ tōmengā mæmpoda incæ æcānō wēnæ wēnæ cæda beyæ tōmengā babetamō ēñacantawo, ante ēñencæte ante änānitapa.

³Itota tōmēnāni inānite,

—Īngā onguiñængā incæ tōmengā mæmpoda incæ tōmānāni wēnæ wēnæ cædāmaï inānitapa. Wæætē tōmengā babetamō ēñagaingā inte quēwēñongante Wængongui nānō cædō iñōmō edonque pōni acäimpa, ante māningā mānōmaï ingacäimpa. ⁴Īñānāni ēñēedāni. Botō ïmote nē da pōnongaingā tōmengā nānō cædō ante mōnō mīi quēwenganca mōnō cæquēnēmō ïmopa. Mōnō wænguiñōnæ iñonte mōnō ædō cæte ayæ cæquimōō. ⁵Botō inguipoga quēwēñedē botō inguipoga quēwēnāni beyæ ñāō bai inōmo ïmopa.

⁶Māniñō ante äninque Itota onguipoga towæ tånōninque wēä wēä gopodinque aquimæ bayonte æninque babetamongā awinca òni òni pæmongantapa. ⁷Ayæ tōmengā ingante,

—Goe. Gäwapæ Tidoe nāni ämæ godinque bitō awinca ñāō mēmōe, ämopa, angantapa. Tidepæ nāni ämæ iñōmō mōnō tededō, Da godōmæ, ante impa.

Angā ēñente godinque onguiñængā ñā mēmōninque tōmengā oncōnē ocæ ēmænte pōninque do acā ingacäimpa. ⁸Tōmengā mānōmaï do acā inte pongā adinque godongāmæ quēwēnāni tōnō wēēñēñedē tōmengā, Pōnōmi æmoe, äñongante nē adināni tōnō,

—Æ, Īngā onguiñængā diyæ, Pōnōmīni æmoedāni, ante nē äncōningā wīi adocā ingantawo.

⁹Änāni ēñēninque pancadāniya,

—Māningā ingampa, änānitapa.

Wadāni guiquēñē,

—Wīi tōmengā ingā, ònonque tōmengā nānō emō bai emōnongā ingampa.

Ante tedeyōnāni onguiñængā tōmenganque,

—Botō mānimodō inōmo ïmopa, angantapa.

¹⁰ Ayä tömënäni,

—Æbänö cæte bitö waa bamonte abii.

¹¹ Äñönäni tömengä wæætë,

—Onguïñängä ïñömö tömengä ëmöwo Itota ïñömö onguipoga towæ tänöningue wëä wëä gopodique aquimæ bayonte æninque botö awinca öni öni pæmongantapa. Ayä botö ïmote, “Goe. Gäwapæ Tidoepæ näni ämæ godinque bitö awinca ñä mëmöe” angantapa. Angä ëñëningue botö wadæ gote ñä mëmöningue do waa bamonte abopa, angantapa.

¹² Tömënäni tömengä ingante,

—Ïngä onguïñängä bitö änongå ïñömö æyömönö ingäa.

Ante äñönäni tömengä wæætë,

—Botö ëñënamäi ïmopa, angacäimpa.

Babetamö ïningä ingante Paditeoidi ancaa änäni

¹³ Ayä Paditeoidi weca onguïñängä në babetamö ëñagaingä ingante ænte mämönäni pongantapa. ¹⁴ Itota mänii aquimæ badöningue babetamö ïningä awinca wi æmonte bai nänö cæönæ ïñömö oodeoidi guëmanguïönæ ïnonimpa. ¹⁵ Mänömaï beyä Paditeoidi ïñömö adobai ëñencæte ante babetamö ïningä ingante edæ, Æbänö cæte bitö waa bamonte abii, ante äñönäni tömengä wæætë,

—Mäningä ïñömö aquimæ æninque botö awinca öni öni pæmongantapa. Ayä botö tömö awinca ñä mëmöningue ñöwo waa bamömo inte abopa, angantapa.

¹⁶ Paditeoidi pancadäniya,

—Ïngä onguïñängä ïñömö wii Wængongui weca quëwente pongä ingampa. Edæ tömengä mönö guëmanguïönæ ïñonte guëmänämaï inte do cæcampa, äñänitapa.

Wadäni guiquënë,

—Ïñæmpa waocä në wënæ wënæ cæcä ïnongä inte ædö cæte mänömaï, Acæminimpa, ante mä cæquingäa, äñänitapa.

Ïningue tömënäni wadö wadö ante pönente tedewengadänimpa. ¹⁷ Ayä tömënäni wæætë babetamö ïningä ingante,

—Tömengä cæcä ate bitö waa abi inte bitö edæ tömengä ingantedö ante quïnö ämii.

Ante äñönäni onguïñängä wæætë,

—Tömengä Wængongui beyä në apæncä ingampa, angantapa.

¹⁸ Babetamö ïningä ïñömö, Waa bamömo ïmopa, ante apæncä ëñëningue oodeoidi awënëidi ayä pönënamäi ïñänitapa töö. Tömengä mæmpoda ïnate aa pedäni ponte apænedä ate mäniñedë pönëñänitapa. ¹⁹ Tömënäni tömöna ïnate,

—Ïngä onguïñängä edæ minatö wengä ingantawo. Mäningä në babetamö ëñagaingä minatö änongå adocä ingantawo. Æbänö cæte tömengä ñöwo waa bamonte acäi.

²⁰ Ante äñönäni tömengä mæmpoda wæætë, Në babetamö ëñagaingä ïñömö tömengä mönatö wengä ingampa, ante ëñëmönäni. ²¹ Incæte mönatö, Æbänö cæte tömengä ñöwo waa bamonte acäa, ante, Æcänö tömengä awinca wi æmonte bai cæcäa, ante ëñënamäi ïmönäni. Minitö tömengä ingante ëñencæte ante äedäni. Tömengä do picängä ingampa. Tömenganque apæncä ëñencæminimpa, änatapa.

²² Tömengä mæmpoda oodeoidi awënëidi ïñänite guïñëningue mäninö ante apænedatapa. Edæ oodeoidi awënëidi ïmaï ante do apænedönänimpa. Æcänö Itota

ingante Ao ante, Mönö Codito ingampa, äna ëñëninque edæ, Mönitö odömöincönë ongönämaï incæbiimpa, ante tömengä ingante da tadömöni tao gocæcäimpa, ante godongämæ pönente apænedönänimpa. ²³ Mänömaï beyæ tömengä mæmpoda, “Tömengä do picängä ingampa. Minitö tömengä ingante ëñencæte ante äedäni,” angadaimpa.

²⁴ Onguiñängä në babetamö ïningä ingante wæætë aa pedäni pongä ate tömengä ingante,

—Bitö Wængongui ëñëñongä näwangä ante apænee, ämönipa. Edæ ïngä onguiñängä mäninö në cædingä wënæ wënæ cæcä ingampa, ante edæ do amönipa.

²⁵ Ante piññönäni tömengä wæætë,

—Mäningä wënæ wënæ cæcä incæ wii wënæ wënæ cæcä incæ botö ëñënämaï ïmopa. Botö babetamömo ïnimo incæ ñowo waa bamonte abopa. Mäninque ëñëmo ïmopa.

²⁶ Ante apæneca ëñëninque tömënäni tömengä ingante,

—Tömengä ïñömö bitö ïmite æbänö cæcantawo. Æbänö cæte bitö waa bamonte abii, änänitapa.

²⁷ Tömengä wæætë,

—Minitö ïminite do antabopa. Botö äñömote minitö ëñënämaï ïminipa töö. Quiñante wæætë adodö ante ëñëinëminii. Minitö adobai, Mönitö tömengä ëmiñämöni baquimöni, ante äminitawo, ante angantapa.

²⁸ Ayæ tömënäni tömengä ingante piinte wënæ wënæ badete todinque,

—Bitö mäningä ëmiñämii ïmipa töö. Mönitö guiquënë Möitee ëmiñämöni ïmöni apa quëwëmi, änänitapa. ²⁹ Wængongui Möitee ingante apænegacäimpa, ante do ëñëmönipa. ïngä guiquënë æyömönö quëwente pongää, ante ëñënämaï ïmönipa.

³⁰ Äñönäni onguiñängä wæætë,

—Mäninö minitö äninö wiwa impa äminii. Tömengä pönö cæcä waa bamonte abo incæte tömengä æyömönö quëwente pongää, ante minitö ëñënämaï ïminipa. ³¹ Në wënæ wënæ cædäni ïñömö Wængongui ingante apæneyönäni tömengä tömënäni ïnänite ëñënämaï ingampa, ante do ëñëmompa. Wæætë Wængongui ingante, Bitö adobique mönö Wængongui ïmidö anguënë, ante në apæneca ïñömö tömengä Wængongui nänö angainö në ëñente cædongä inte apæneyongante Wængongui tömengä ingante ëñencæcäimpa. ³² Waocä në babetamö ëñagaingä ïñongante wacä tömengä awinca wi æmante bai cæcä ante æyedëmenque incæ inguipoga quëwënäni dicæ änäni ëñënanitawogaa. ³³ ïngä onguiñängä ïñömö wii Wængongui nänö da pönongä pongaingä inte bai tömengä tömänö cædämaï incædongäimpa, angantapa.

³⁴ Mäninö angä ëñëninque tömënäni wæætë,

Bitö ëñagaiñedë do wënæ wënæ cæte ëñagaiimi ïmipa. Incæte bitö mönitö ïmönite ædö cæte, Eñencæminimpa, ante odömonte apænebi ïmipa töö.

Änäni ïninque tömënäni, Bitö mönitö odömöincönë ongönämaï tao gobäwe, ante tömengä ingante da tadönäni tao gogacäimpa.

Në babetamö bai ïnäni ïnänite ante Itota apænecampa

³⁵ Tömënäni tömengä ingante da tadönänipa, ante tededäni ëñëninque Itota tömengä ingante ante diqui diqui minte gote adinque.

—Bitö Waocä në ëñagaingä ingante pönëmitawo.

³⁶ Angä ëñëninque onguiñängä,

—Awënë, mäningä æcänö ina. Botö tömengä ingante pöncæboimpa, ante apænebi ëñëmoe.

³⁷ Ante äñongä Itota wæætë,

Bitö tömengä ingante do abitapa. Ayæ bitö imite nê apænebo iñömö tömömö imopa.

³⁸ Angä ëñëninge onguïñængä,

—Awënë, botö wede pönëmö imopa. Ayæ, Bitö Wængonguï Wëmi imidö anguënë, ante tömengä Itota weca ædæ wæëninge apænecantapa.

³⁹ Itota iñömö edæ,

—Botö, Inguipoga quëwënäni æbänö cädäni, ante apænte ancæte ante pöninge iïmaï cæbopa. Botö nê babetamönäni bai inäni waa bacädänimpa, ante cædinque pontabopa. Ayæ wæætë, Mönitö waa amönipa, ante nê änäni inänite, botö, Babetamömini bai iminipa, ante edonque odömoncæte ante pontabopa.

⁴⁰ Mäninö angä ëñëninge Paditeoidi pancadäniya tömengä weca nê ongönäni guiquënë tömengä ingante,

—Æbänö ämii. Iñæmpa mönitö adobaï babetamömöni bai imönitawogaa.

⁴¹ Ante äñönäni Itota wæætë,

—Minitö babetamömini bai inte bai wënæ wënæ cädämaï incädöminimpa. Wæætë minitö, Mönitö waa amönipa, ante nê änömöni inte mini wentamö mongæncoo ee mongæmini inguïminidö anguënë, ante apænegacäimpa.

Nê aacä tönö tömengä obegaidi

10 Itota ayæ iïmaï apænecantapa. “Minitö iminute näwangä ämopa. Onguïñængä obegaidi nani wææ cæyömö guidemö nê guidämaï inte wæætë wayömö da ewa æi guicä iñömö tömengä iñömö nê awëmö ö ængä inongä inte adobaï wadäni ayönäni nê pö ö ænte gocä ingampa. ²Odemö nê guicä guiquënë tömengä obegaidi inänite nê aacä ingampa. ³Nê aacä beyæ odemö nê wææ cæcä wi ænecampa. Wi ænecä ate nê aacä pö guiite tedeyongä obegaidi tömengä nänö tedepämo ëñente inänipa. Tömengä obegaidi inänite nani ëmöwo nani ëmöwo ante aa pecä pönönänite tömengä tömënäni inänite ænte taocampa. ⁴Tömengä obegaidi tömänäni inänite ænte taodique tömengä önömæca iñömö täno beyænte gocä ate tömengä obegaidi tömengä nänö tedepämo ëñëninge tömengä ingante tee empo godänipa. ⁵Wacä ingante guiquënë tömënäni tee empote godämaï inänipa. Wæætë wacä nänö tedepämo ëñënamäi inäni inte tömënäni tömengä weca ongönämaï wodii gocädänimpa,” ante Itota apænecantapa.

⁶Tömengä mänömaï tömënäni inänite odömoncæte ante, Nê aacä æbänö cæcäa, ante odömonte apænecä incæte tömënäni tömengä nänö äninö ante ëñënamäi ingadänimpa.

Itota mönö imonte nê Aacä ingä

⁷Mänömaï beyæ Itota wæætë äninge, “Botö minitö iminute näwangä ämopa. Botö iñömö nê obegaidi bai inäni nani wææ cæyömö, Guicädänimpa, ante odemö bai imopa. ⁸Wëñënedë botö ayæ pönämaï iñedë wadäni odömonte apænecæ pongadänimpa. Tömënäni tömänäni waodäni inänite nê awëmö ö ænäni bai inönäni inte adobaï wadäni ayönäni nê pö ö ænte gogäinäni bai ingadänimpa. Incæte waodäni

iñömö nê botö obegaidi bai inönäni inte nê ö äinänäni inänite wæætê ëñänämaï ingadänimpa. ⁹ Botö nê odemö bai ïmopa. Odemö nê guicä bai iñömö tömengä botö ïmote pönengä iñongante botö ämo beyænque quëwencæcäimpa. Adocä nê obega bai inte tömönäni nani wææ cayömö guidemö nê guicä bai ïninqe tömengä piyänê cæte quëwencæcäimpa. Ayæ tömengä wæætê nê taocä bai ïninqe tömengä nänö cængui mä öñö adinque eyepæ cæncæcäimpa,” ante Itota apænecantapa.

¹⁰ Ayæ apænedinque, “Nê awëmö ængä guiquënë tömengä iñömö awëmö æncæte ante pongä inongä inte adobai wænoncæte ante wö ewencæte ante mäninganca cæcæte ante pongä ingampa. Botö iñömö, Waodäni quëwencädänimpa, ante ayæ, Tömönäni nani quëwenguinque ante watapæ pöni quëwencädänimpa, ante pontabopa. ¹¹ Botö obegaidi bai inäni inänite nê waa aacä bai ïmopa. Nê waa Aacä iñömö nämä incæ obegaidi beyænque wæncæcäimpa. ¹² Godonte äinta ante wacä ingante nê cæcä iñömö tömengä iñömö obegaidi nê ëcä inämaï inongä inte nê aacä inämaï ingampa. Mänömaï beyæ adocä iñömö mëñe bai ingä pongä adinque tömengä obegaidi inänite ëmö cæte wodii winongampa. Tömengä wodii winongä adinque mëñe bai ingä wæætê obegaidi weca pogodo ponte obega ingante yao ongöninque, Obegaidi pangocæ goquinäni, ante cæcampa. ¹³ Godonte äintaque ante nê cæcä iñömö, Æbänö cæte obegaidi waa quëwenguinäni, ante änämaï inongä inte edæ wodii winongampa,” ante Itota apænecantapa. ¹⁴⁻¹⁵ Ayæ apænedinque, “Obegaidi inänite waa aacä bai edæ botö iñömö nê waa Aabo ïmopa. Botö Mæmpo edæ botö ïmote do ate pönengä bai botö adobai tömengä ingante do adinque pönemopa. Ayæ tömëmö obegaidi bai inäni inänite do adinque tömönäni inänite pönemopa. Ayæ tömönäni guiquënë botö ïmote do adäni inte botö ïmote pönänäni. Botö nämä incæ obegaidi bai inäni beyænque wæncæboimpa. ¹⁶ Ayæ wadäni iñömö botö obegaidi bai nê inäni incæ wii mäniñömö wææ cayömö quëwänäni inänipa. Botö mäninäni inänite adobai ænte mämö ponguënemö ïmopa. Adodäni adobai botö tedepämo, Æbänö ämo, ante ëñenguinäni inänipa. Mänömaï beyæ mäninäni iñömö do botö quinäni tönö tömänäni adocabodänique baquinäni inänipa. Ayæ nê Aabo adoboque iñömö tömänäni beyæ cæcæboimpa.” ante Itota apænecantapa.

¹⁷ Ayæ apænedinque, “Botö nämä incæ Ao ante wæninque nani ömæmoncæboimpa, ante cædinque wæætê tömëmö mii quëwenguimo incæboimpa. Mänömaï beyæ botö Mæmpo botö ïmote waadete pönengä ingampa. ¹⁸ Waodäni iñömö ædö cæte botö ïmote wænonguinänii. Botö nämä incæ Ao äninque wæncæboimpa. Botö nämä tæi piñæmo iñömö, Wænguimo, ante nê ämo inömo ïmopa. Ayæ adobai botö nämä tæi piñænte nê ämo inte botö, Nani ömæmoncæboimpa, ante cædinque wæætê tömëmö mii quëwenguimo incæboimpa. Botö Mæmpo iñömö botö ïmote nänö wææ angainö botö ëñëninö ante ëñente cæbopa,” ante apænecantapa.

¹⁹ Mäninö apænecä ëñëninque oodeoidi wæætê wadö wadö ante pönente tedewengadänimpa. ²⁰ Oodeoidi nanguï inäni iñömö,

—Tömengä wænæ tönö cæcä inte edæ ömæcacä inongä ingampa. Ædö cæte tömengä ingante ëñëmïni ïminii.

²¹ Añönäni oodeoidi incæ wadäni guiquënë,

—Tömengä wænæ tönö cæcä inte bai tömengä iïmaï nänö äninö ante wii angä incædongäimpa. Nê wænæ inte quëwente cæcä iñömö babetamönäni awinca wi æmonte bai cæcä waa bamönäniyaa.

Oodeoidi Itota ingante Baa änäni

²²Yoguite tedæ ñhonte waodäni Eedotadëë quëwënanäni, Wængonguï oncö tæiyæ waëmö oncö ante dodäni mänongadänimpa, ante pönente ææmä cæyönäni. ²³Itota Wængonguï oncö ñænæncönë yabæcönë Tadömöö näni änoncönë ññömö cægongan-tapa. ²⁴Oodeoidi tömengä weca pö godongämæ gongænte änäni,

—Bitö æbänö imii, ante æpoönædö ayæ äinënämaï imii. Bitö mönitö Codito imi ñinque mönitö ñmönite edonque pönï apænebi ëñëmönii.

²⁵Ante äñönäni Itota wæætë,

—Minitö ñminite do antabopa. Incæte minitö pönënämaï iminipa töö. Botö edæ botö Mæmpo ëmowo ante bamönengæ cæbo adinque minitö, Botö æbänö imoo, ante ëñenguëñëminii iminipa. ²⁶Minitö wii botö obegaidi bai ñömöni inte botö imote pönënämaï iminipa töö. ²⁷Waodäni botö obegaidi bai në inäni inte botö tedepämo, Æbänö ämoo, ante do ëñënäni. Ayæ botö tömënäni inänite adinque pönëmo ññömote tömënäni wæætë botö imote tee empote godänipa. ²⁸Botö adodäni inänite wan-tæpiyæ näni quëwenguinö godömo æninque quëwencädänimpa. Ayæ cöwë wänämaï incädänimpa. Tömënäni tömëmo önönempo ongöñönänite æcänö tömënäni inänite gä pe æmpoda ññömö edæ dæ angampa. ²⁹Botö Mæmpo edæ adodäni inänite botö imote në pönongaingä ñongä ingampa. Tömänäni wædänäni ññönäni tömengä ññömö godömenque ñænængä inte nanguï cædongä ingampa. ñinque tömengä önönempo ongöñönänite æcänö tömënäni inänite gä pe æmpoda ññömö edæ dæ angampa. ³⁰Botö ññömö botö Mæmpo tönö ääwoaque bai ëwocamöna imönapa, ante Itota apænegacäimpa.

³¹Mäninö angä ëñëninque oodeoidi wæætë tömengä ingante dicaca tacacæte ante cædinque dicacoo wææmpo ænänipa. ³²Tömënäni dicacoo wææmpo æñönänite Itota tömënäni inänite,

—Botö minitö weca botö Mæmpo nänö angai bai nanguï bamönengæ odömote cætabopa. Ædö botö bamönengæ cædinö ante adinque minitö botö imote dicaca tacacæ cæminii.

³³Ante äñongä oodeoidi wæætë,

—Mäninö bitö waa cædinö beyæ ante mönitö wii bitö imite dicaca tacacæ cæmönipa. Wæætë bitö babæ ante Wængonguï ingante godö wënæ wënæ ämipa, ante bitö imite tacacæ cæmönipa. Edæ mönitö waomöni bai inte bitö adobaï waobi imi incæte bitö, Botö Wængonguïmo ññömö imopa, ante ämipa töö.

³⁴Ante wæyönäni Itota wæætë tömënäni inänite,

—Minitö mini wæe yewæmongainö wii iimäi ante yewæmongatii. “Minitö ññömö wængonguïidi iminipa, ante do antabopa,” ante yewæmongadänimpa. ³⁵Wængonguï angä ëñente näni yewæmongainö ante waodäni ædö cæte Baa äninque wido cæquinänii. Wængonguï nänö angainö ante apæneca në ëñënäni ññönänite tömengä, Minitö wængonguïidi iminipa, angantapa. ³⁶Ayæ botö Mæmpo botö imote ingui-poga da pönoncæte ante, Botö adoboque quimi imipa, ante botö imote apænte ængacäimpa. ñinque edæ botö tömengä quimo ññömö inte tömengä nänö në da pönongaimo ññömote edæ botö imote edæ æbänö anguii. ññæmpa botö ññömö Wængonguï Wëmö ññömö imopa, äñömote edæ minitö wæætë, Bitö babæ ante Wængonguï ingante godö wënæ wënæ ämipa, ante quinante äminitawo. ³⁷Botö edæ Mæmpo nänö cædö bai cædämaï imo bai minitö mäññedë botö imote pönënämaï imini bai waa

incædönimpa. ³⁸Minitö botö imote pönënämaï imini incæte botö guiquënë botö Mæmpo nänö cædö bai adobaï cæbo inique minitö, Botö æbänö cæboo, ante ad-
 inque pönencæminimpa. Mänömaï cædinque, Botö Mæmpo ingante botö ewocabo
 imopa, ante ayæ, Botö adobaï botö Mæmpo nempo quëwëmopa, ante ënenguimini
 inte ayæ ëñëninque pönencæminimpa, ante Itota angacäimpa.

³⁹Mäninö angä ëñëninque tömënäni wæætë tömengä ingante bæi ongoncæ
 cæyönäni tömengä do aamö cæte gocantapa.

⁴⁰Ayæ Eedotadëe wadæ godinque Oododänö æmæmäa ocæ ëmænte taodique
 tömengä Wäö wëenënedë waodäni inänite æpænë nänö guidöninömö adoyömö gote
 ongongä ingantapa. ⁴¹Ayæ tömengä mäniinömö ongönedë waodäni nangui inäni
 tömengä weca goto pöninque änänitapa.

—Ate ëñencæminimpa, ante Wäö wodi cöwë bamönengæ cædämaï ingä incæte
 tömengä mäningä Itota ingantedö ante nänö angainö tömänö näwangä ante angan-
 tapa, ante apænedänitapa.

⁴²Ayæ mäniinömö ongöninque waodäni nangui inäni Itota ingante wede pönënäni
 bagadänimpa.

Datado wængäimpa

11 Mäniinedë wacä onguiinängä tömengä ëmöwo Datado wënæ wënæ badinque
 önönongäimpa. Mäadiya tönö Mäadota tömengä töninada nana quëwëinömö
 tömengä adoyömö Betänia inömö quëwëinongäimpa. ²Ingä Mäadiya guiquënë ayæ
 ate ogui wapæ ænte Awënë Itota ingante öni pædinque nämä ocagui inte tömengä
 önöwa amimö cæquingä adocä Mäadiya inongä tömengä töninacä Datado nöwo
 wënæ wënæ bacä inongäimpa. ³Inique Datado töninada inömö, Itota ingante aa
 pebi pongæ, äna ëñente wacä gote,

—Awënë ëñëmi, Bitö në waadecä inömö wënæ wënæ ingampa cæbii, ante änapa,
 ante apænecantapa.

⁴Mäninö nana änö ante apænecä ëñëninque Itota,

—Mäninö wënæ wënæ inte nänö wædö inömö wii wængui impa. Wæætë waodäni,
 Wængongui näö apäite ëmönongä ingampa, ante acædänimpa. Ayæ botö imote, Bitö
 Wængongui Wëmi adobaï näö apäite ëmönömi imipa, ante apænecædänimpa, ante
 mäningä wënæ wënæ ingampa, angantapa.

⁵Mäadota tönö tömengä töninacä Mäadiya nana caya inate ayæ Datado ingante
 Itota tömënäni inänite waadete pönënonongäimpa. ⁶Datado wënæ wënæ ingampa,
 ante apænecä ëñengä incæte Itota nänö ongönömö adoyömö mëönaa ayæ ongongan-
 tapa. ⁷Tömengä ayæ ate tömengä ëmiinänäni inänite,

—Ægodöedäni, wæætë Oodeabæ mönö gocäimpa.

⁸Äñongä tömënäni wæætë tömengä ingante,

—Awënë në Odömömi imi, wantæyö intapa oodeoidi bitö imite dicaca tacacæ
 cædäni incæte bitö nöwo wæætë, Mäniinömö goquimo, ämitawo.

⁹Ante änäni Itota wæætë,

—Inämpa nænque wii tömää itädë apäitawo. Itädë në gocä mönö nænque ingui-
 poga apäicä ate beyæ tëwadämaï gocampa. Botö inömö itädë gocä bai adobaï miimo
 botö quëwenganca botö cæquënëni inique cæquinque gobopa. ¹⁰Woyowotæ në
 gocä bai guiquënë tömengä wæætë näö dæ ä beyæ tëwate bai gocampa, angacäimpa.

¹¹Mäninö angä ate tömengä godömenque tömënäni inänite,

—Mönö æmigo Datado iñömö mö ñongä. Botö ñowo tömengä weca gote, Ñäni ömæmöe, ämo ñäni ömæmonguingä, ante apænecantapa.

¹²Tömengä emiñænäni wæætë tömengä ingante,

—Awënë Itota, tömengä mö ñongä ininque edæ gancaë baquingä, apænedänitapa.

¹³Itota Datado nänö æmæwo wænimämo ante apænecaë incæte tömengä emiñænäni guiquënë, Datado önonque mö ñongampa, ante Itota apænecampä, ante pönönänimpa. ¹⁴Mänömaï beyæ Itota tömënäni inänite,

—Datado æmæwo wængäimpa, ante edonque pönï apænecantapa. ¹⁵Minitö pönecæminimpa, ante botö, Tömengä wæncæ cæyongä botö tömengä weca ongönämaï intabopa, ante minitö beyæ ante tobopa. Ægodödäni, tömengä weca mönö gocäimpa, angantapa.

¹⁶Ayæ Tömato Äancadënaque näni änongä iñömö Itota emiñænäni wädäni inänite,

—Ægodödäni, äninque, Tömengä tönö godongämæ wæncæte ante tömengä miñæ gocäimpa, angacäimpa.

Itota mönö ömæmonguimämo mönö miï quëwenguimämo ante në pönongä ingampa

¹⁷Ayæ Itota ponte ëñëñongä, Datado baö tömënäni näni wodintatodë meönaa go meönaa do daga wëñänitapa, ante apænedäni ëñengacäimpa. ¹⁸Betänia iñömö näni taadö godö Eedotadëë näni quëwëñömö godö eyequei inönimpa. Mänii taadö wodo tedete quidömetodo ganca inönimpa. ¹⁹Oodeoidi nanguï inäni iñömö Mäadota tönö Mäadiya weca pöninque, Minatö tönïñacä wængä ate wæwëmïna incæte piyänë cæte quëwencæminäimpa, ante waadete apænecaëte ante pönänitapa. ²⁰Itota oo pönï pongampa, ante änäni ëñëninque Mäadota tömengä ingante bee tencæte ante gocantapa. Mäadiya guiquënë oncönë ee ongongantapa. ²¹Mäadota Itota weca pöninque tömengä ingante,

—Awënë Itota, bitö mönitö weca ongömi bai botö tönïñacä wiï wæncædongäimpa. ²²Tömengä æmæwo wængä incæte bitö ñowo Wængonguï ingante quïëmë ante apænebi tömengä pönö cæcä ænguimi imipa, ante botö ëñëmopa, ante apænecantapa.

²³Angä ëñëninque Itota tömengä ingante,

—Bitö tönïñacä wodi ñäni ömæmonguingä.

²⁴Ante apænecaë ëñëninque Mäadota wæætë,

—Ao, inguipoga iinque bayedë mönö ñäni ömæmönedë tömengä do wængaingä incæte ñäni ömæmoncæcäimpa, ante botö do ëñëmopa, angantapa.

²⁵Itota tömengä ingante äninque,

—Botö në ñäni ömæmonguimo inömo inte cæbo beyænque minitö ñäni ömæmoncæminimpa. Mini wantæpiyæ quëwenguinque ante në Quëwëmo inömo imopa. Botö imote në wede pönengä iñömö do wængä incæte ayæ ate wantæpiyæ quëwencæcäimpa. ²⁶Ayæ në miï quëwengä inte botö imote wede pönengä iñömö tömengä cöwë wëñämaï quëwencæcäimpa. Bitö mäninö ante pönëmitawo.

²⁷Angä ëñëninque Mäadota tömengä ingante,

—Awënë Itota Ao ämopa, ante apænecantapa. Bitö mönitö Codito inömi imipa, ante pönëmopa. Wængonguï Wëmi inömi inte bitö iñömö edæ, Inguipoga në Ponguingä, ante näni angäimi imipa, ante pönëmopa, ante apænecantapa.

Itota Datado wodintatodē gote wæcä

²⁸ Mänömaï ante apänedinque Mäadota ocä emænte gote Mäadiya ingante aa pecä pongä ate Mäadota tömengä ingante awëmö äninque,

—Mönö nē Odömongä do pöninque bitö imite aa pecampa.

²⁹ Angä eñëninque Mäadiya quingæ ængæ gantite tömengä weca gocantapa.

³⁰ Itota Betänia iñömö ayæ guidämaï inongäimpa. Mäadota tömengä ingante nänö bee tēniñömö tömengä adoyömö ayæ a ongönongäimpa. ³¹ Oodeoidi Mäadiya tönö oncönē godongämæ ongöninque, Tömengä piyænē cæcæcäimpa, ante tæcæ waadete apäneyönäni tömengä quingæ ængæ gantidinque taocä adinque tömēnāni, Tömengä Datado wodi nänö wodintatodē wæcæte ante gocampa, ante pönente tömengä ingante tee empote godänitapa.

³² Itota nänö ongönömö pöninque Mäadiya tömengä ingante adinque tömengä önöwa ædæ wæænte apänedinque,

—Awënë Itota, bitö mönitö weca ongömi bai botö töninäcä wii wæncædongäimpa, ante wæcantapa.

³³ Mäadiya mänömaï wæyongä oodeoidi tömengä tönö godongämæ nē pöninäni adobaï wædäni adinque Itota wæwente entawëninque wæcantapa. ³⁴ Ayæ,

—Datado wodi baö æyömönö da wëminitawo,

Angä eñëninque tömēnāni,

—Awënë Itota, pö ae.

³⁵ Ante äñönäni Itota Ca wæcantapa. ³⁶ Tömengä mänömaï wæcä adinque oodeoidi,

—Aedäni, tömengä Datado wodi ingante nö waadete pönengä ingantapa.

³⁷ Ante tedeyönäni pancadäniya,

—Tömengä iñæmpa nē babetamongä awinca wi æmonte bai cædingä inte adocä Datado wodi ingante cæcä bai tömengä wii wæncædongäimpa, ante wægadänimpa.

Datado nänö ñäni ömämömämo

³⁸ Itota wæætē wæwente entawëninque Datado wodintatodē pongacäimpa. Tömengä wodido ontatodē i iñonte dicabo ñænængade da pænñæ pönö tee mönodäni.

³⁹ Adinque Itota,

—Dicabo da tæ ñæedäni, äñongä Datado wodi töninäcä Mäadota wæætē,

—Awënë Itota, eñëmi. Mëönaa go mëönaa tömengä wodido önöninque tömengä wodi do öö wadingä ingampa.

⁴⁰ Ante wææ angä eñëninque Itota,

—Bitö wede pönëmi ininque edæ Wængongui æbänö ñäö apäite emönongä inte cæcäa, ante bitö acæbiimpa, ante bitö imite wii antawo, angacäimpa.

⁴¹ Ininque tömēnāni dicabo tæ ñænänitapa. Ayæ Itota æmö adinque,

—Mæmpo botö apänedinö ante do eñëmitapa, ante adinque botö bitö imite waa ate pönëninque apänebopa. ⁴² Botö apänedö ante æyedemö apänebo incæ bitö cöwē eñëmipa, ante botö do eñëmopa. Wæætē edæ waodäni botö weca godongämæ gongænäni beyæ ante botö mäninö ante apänetabopa. Bitö botö imote da pönömi pontabopa, ante tömēnāni pönencädänimpa, ante apänetabopa.

⁴³ Mänömainö ante Wængongui ingante apänedinque Itota,

—Datado ta pöe, ante yedæ aa pecantapa.

⁴⁴Nē wæningä iñömö edæ do ta pongantapa. Tömengä önompo weocoo inte nāni wīni wīni cædincoo ayæ empodique önöwa nāni wīni wīni cædincoo ayæ ewad-
inque tömengä awinca weocoo nāni nāne cæmönincoo ayæ emongä inte ta pongä
adinque Itota tömēnāni inānite,

—Mānincoo nī cæmīni gocæe, angacäimpa.

Itota ingante bæi ongonte ængæimpa, ante tedewēnāni

(*Māateo 26.1-5; Māadoco 14.1-2; Odoca 22.1-2*)

⁴⁵Mänömaī beyæ oodeoidi nangui ināni Māadiya weca ēnacæ nē pönināni
inte iñāni iñömö Itota mänömaī cæcä adinque tömengä ingante wede pönēnāni
bagadānimpa. ⁴⁶Pancadāniya guiquēnē Paditeoidi weca godinque, Itota quīnō
cæcäa, ante adodō angadānimpa. ⁴⁷Īnīnque Wængongui quī, ante nē godōnāni
ñænēnāni tönō Paditeoidi iñömö wæætē tömēnāni ömæ nāni Apænte Äincabo
tömānāni inānite, Mönō godongāmæ apænecäimpa, ante adoyömō pöedāni, ante
āñōnāni pönāni adinque tömēnāni,

—Īngä iñömö, Acædānimpa, ante nangui bamönengæ cæcä ingä. Mönō quīnō
cæquīmōö. ⁴⁸Ante wædinque mönō tömengä ingante, Bitō mänömaī godömenque
cædāmaī incæbiimpa, ante wīi wææ ämō ĩnīnque waodāni tömānāni tömengä in-
gante pönēmaīnānipa. Tömengä ingante pönēnāni ĩnīnque, Itota oodeoidi Awēnē
bacæte ante cæcampa, ante pönente wædinque odömānoidi incæ edæ wææ
cæbāinānipa. ĩnīnque tömēnāni pönīnque mönō tæiyæ waemō oncō wo ewē-
maīnānipa. Ayæ mönō ömæ iñömö mönō quēwencabo incæ nāmā nē ämō iñömōte
tömēnāni pō ö ænte baī cædinque tömēnānique nē änāni babāinānipa, änānitapa.

⁴⁹Tömēnāni weca adocanque Caiapato mānīi wadepo, Wængongui quī, ante nē
godongä ñænængä pönī inongä inte tömengä iñömö,

—Mīnitō tömānō ante ēñēnāmaī ĩmīnīpa tōö, apænecantapa. ⁵⁰Mönō ömæ
quēwencabo wīi tömāmō wængæimpa, ante wæætē tömēmō beyæ ante adocanque
onguīñængä wængä ĩnīnque godömenque waa ĩmaimpa, ante mīnitō ēñēnāmaī ĩmīni
inte tedewēmīni awædō.

⁵¹Mänömaīnō ante apænedinque Caiapato mā nānō pönēnonque ante wīi an-
gacäimpa. Wæætē tömengä mānīi wadepo ĩñonte, Wængongui quī, ante nē godongä
ñænængä pönī inongä inte Wængongui beyæ apænedinque, Itota iñömō oodeoidi
beyæ ante wæncæcäimpa, ante apænecäimpa. ⁵²Ayæ wīi Oodeabæ quēwēnānique
beyæ ante wænguingä. Wæætē, Wængongui wēnāni wayömō wayömō pan-
gote godināni inte adodānique badinque adoyömō godongāmæ poncædānimpa,
ante tömengä wæncæcäimpa. ⁵³Caiapato mānīnō ante nānō änīönæ ĩñonte tāno
godongāmæ pönēnīnque oodeoidi ömæ nāni Apænte Äincabo iñömō, Æbānō cæte
Itota ingante wænömō wænguingää, ante cōwē tedewēnōnānimpa.

⁵⁴Mänömaī beyæ Itota ayæ oodeoidi weca wīi edonque gocä inongäimpa.
Wæætē wadæ godinque tömengä önomæca eyequei Epadaimē nāni āñömō godinque
mānīñömō tömengä emīñænāni tönō ongönongäimpa.

⁵⁵Wodo pænta gogaionæ, ante Patowa nāni cæönæ oo pönī ĩnönimpa. Mānīñedē
Oodeabæ wayömō wayömō quēwēnāni nangui ināni Eedotadē quēwēñömō pō æid-
inque tömēnāni Patowa nāni ææmæ ayæ cædāmaī ĩñedē dodāni angai baī cæd-
inque, Mönō wēnæ wēnæ cægainō ante mönō mēnongate baī waemō bacäimpa,
ante nāmā incæ äacæte ante cædinque æi gogadānimpa. ⁵⁶Adodāni Wængongui

oncö ñænæncönë yabæcönë pö guiddinque adiyæ gongæninque, Itota æyömönö ingää, ante pönente gomö adinque nämæneque godongämæ apænedinque,

—Mäningä iñömö ææmæ beyæ ante edæ pönämaï ingantawo. Æbänö ante pönëmïni, ante apænedönänimpa.

⁵⁷ Wængonguï qui, ante godönäni ñænænäni tönö Paditeoidi wæætë waodäni inänite wææ änönänimpa. Æcänö Itota nänö a ongöñömö ante nê ëñengä iñömö tömengä mönitö imönite angä ëñëninque mönitö wæætë Itota ingante yao ongonte æmaïmönipa, ante do wææ änönänimpa.

Awënë Itota önöwa oguï wapæ gao cæwacampa

(Mäateo 26.6-13; Mäadoco 14.3-9)

12 Önompo æmæmpoque go adoönæque ate Patowa nani ämæ bacæ cæyedë Itota Betänia iñömö pongantapa. Itota do angä ate nê ñäni ömæmönningä Datado iñömö tömengä adoyömö Betänia quëwëningäimpa. ² Itota pongä adinque waodäni mänïñömö quëwënäni, Itota ingante waa amönipa, ante tömengä beyæ ææmæ cægadänimpa. Wadäni tönö Datado adobaï Itota tönö godongämæ tæ contate cæñönänite Mäadota iñömö tömënäni inänite cængui godongä cænänitapa. ³ Ayæ Mäadiya iñömö mëedio ditodo ganca nani oguï wapæ öni pæquimæ nääadodopæ nänö nangui godonte ænimæ incæ ænte mämö Itota önöwa gao cæwad- inque tömengä ocaqui inte amimö cæcä iñinque oncönë tömancönë oguï waacönë ingatimpa. ⁴ Itota miñæ nê gocä adocanque Codaa Icadiote nani äñongä iñömö edæ, Itota ingante æncædänimpa, ante odömonte nê godonguingä inte ñöwo wææ apænecantapa.

⁵ —Iimæ nänö oguï wapæ quïante ömæpodäni beyæ ante godonte ænämaï ingantawo. Iñæmpa waocä adoque wadepo cæte beyæ paga æninque todetiento deë- nadiota nänö ænimpota beyæ mänimæ godonte ænimæ imæmpa, ante wæcantapa.

⁶ Tömengä dicæ ömæpodäni beyæ ante pönëninque mänömainö ante apænecanta- wogaa. Wæætë tömengä nê awëmö æñongä inte mäninö ante apænecantapa. Tömënäni da wente æintaa nææñongä inte tömengä iñömö, Tömënäni da wëninta incæ pancataa botö qui bacæimpa, ante awëmö æñongä inte mänömaï apænecan- tapa. ⁷ Itota wæætë tömengä ingante,

—Onquiyængä ingante piinte änewënämaï incæbiimpa. Mänimæ botö daga wen- guïönæ ante manguëñengä inte tömengä botö baö nani daga wenguinque ante eye- pæ iñonte öni paacantapa. ⁸ Ömæpodäni cöwë minitö weca quëwënäni inänipa. Botö quiquënë wii cöwë minitö weca quëwëmö imopa, ante apænegacäimpa.

Datado ingante wæñongäimpa, ante tedewënäni

⁹ Itota Betänia ponte ongongampa, ante apænedäni ëñëninque oodeoidi nangui inäni tömengä weca pönäni incæte wii tömengä beyænque pönänintapa. Wæætë adobaï Datado ingante angä nê ñäni ömæmönningä ingante acæte ante pongadän- impa. ¹⁰ Mänömaï beyæ Wængonguï qui, ante nê godönäni ñænænäni iñömö, Æbänö cæte Datado ingante adobaï wænömö wænguingää, ante godongämæ tedewënäni- tapa. ¹¹ Iñæmpa oodeoidi nangui inäni, Datado beyæ mönitö imönite ëmö cæte Itota ingante pönëninque tömengä gämënö godänipa, ante wægadänimpa.

Itota Eedotadëe iñömö pongä

(Mäateo 21.1-11; Mäadoco 11.1-11; Odoca 19.28-40)

¹² Iimö ate, Eedotadëe iñömö poncæte ante Itota idömæ pongampa, ante apænedäni ëñëninque ææmæ beyæ ante tæiyænäni pöninäni iñömö, ¹³ yædëmæmäa wangö tate mæo bee tente taodisque yedæ aa pedinque,

—Möni quëwenguinque ante, Badogaa, ante tomönipa. Bitö Awënë Wængongui ëmöno beyænque pömi ïninque bitö toquinque edæ Wængongui bitö ïmite waa cæcæcäimpa. Bitö idægoidi Awënë ïnömi inte bitö toquinque ingæimpa.

¹⁴ Ante yedæ äñönäni Itota iñömö bodo wengä ate æninque tömengäa æi contate pongantapa. Wëñëñedë Wængongui beyæ iimaï ante näni yewæmonte angainö bai ïnque cædinque pongantapa.

¹⁵ “Tiöno iñömö quëwëmini iñömö edæ guiñënamäi ïedäni.

Minitö Awënë Odeye ñowo minitö weca pongä aedäni. Edæ bodo wengäa æi contate pongampa,”

ante yewæmongadänimpa. ¹⁶ Tömënäni dodäni näni angai bai cædinque Itota ingante bee tencæ taodäni adinque Itota nanö në ëmiñænäni iñömö, Æbänö cædäni, ante mäniñedë ëñënamäi inte wædönänimpa. Wæætë edæ Itota Wængongui ñäö ëmöñömö ocæ ëmænte gocä adinque tömengä ëmiñænäni mäniñedë ate edæ, Itota ingante waodäni ñowo näni cædönö ante dodäni wëñëñedë yewæmongadänimpa, ante pönente wædönänimpa.

¹⁷ Datado wodi ontatodë ongöñongante Itota, Ta pöe, ante aa pecä ëñëninque në wæningä incæ näni ömæmöninque ta pongä adinque Itota weca godongämæ ongöninäni nanguï ïnäni iñömö, Itota mänömaï cæcä atamönipa, ante gode ä gode ä cædönänimpa. ¹⁸ ïninque edæ, Itota mänömaï bamönengæ cæcampa, ante apænedäni ëñente beyænque waodäni tæiyænäni Itota weca bee tencæ pönänitapa.

¹⁹ Mänömaï beyæ Paditeoidi iñömö nämanque godongämæ tedewënanitapa.

—Waodäni tömänäni æbänö tömengä miñæ tee empo godäni ante aedäni. Mänii beyæ ante, Mönö cædinö wiï eyepæ impa, ante adinque, Mönö æbänö cæte godömenque cæquimö, ante wægadänimpa.

Guidiegoidi pancadäniya Itota ingante diqui minäni

²⁰ Eedotadëe iñömö tömënäni ææmæ cæyedë Wængongui ingante waa ate apæneçæte ante në pönäni pancadäniya iñömö guidiegoidi ïnönänimpa. ²¹ Mäninäni iñömö Pedipe weca pöninque edæ,

—Awënë, ëñëmi. Mönitö Itota ingante ainëmönipa, ante änänitapa. Mäningä Pedipe iñömö Betaida quëwëñömö Gadideabæ quëwente pongä ïnogäimpa.

²² Tömengä iñömö Æntade weca gote tömengä ingante guidiegoidi näni äniinö ante apæneçä ate tömëna wæætë Itota weca guëa godinque tömengä ingante äñöna,

²³ Itota wæætë,

—Wængongui nanö cæönæ do ba ïninque tömengä pönö cæcä beyænque botö Waobo ëñagaïmo iñömö ñäö apäite ëmoncæboimpa. ²⁴ Minitö ïminite näwangä ämopa. Tömëmö onguipo quiyadimö incæ yabæque ñömäadämaï i bai ædö cæte tä bocate pædinque tömëmö nanguï pönï ïmonguii. Wæætë tömëmö yabæque ñömæate ate tä bocate pædinque nanguï pönï ïmompä. Botö adobaï wænguënëmo ïmopa. Botö wiï wæmo bai ædö cæte waodäni tæiyænäni botö quinäni baquinäni. ²⁵ Në,

Nāmanque pōnente quēwēmate, ante pōnengā iñōmō edæ tōmengā nānō quēwenguimāmo incæ wo ēwente bacæcāimpa. Inguipoga quēwēhedē nē, Wīi nāmanque pōnente quēwēmate, ante pōnengā guiquēnē tōmengā nānō wantæpiyæ quēwenguinō ante do ēadingā inte tōmengā nānō wænāmaī quēwenguinque gocæcāimpa. ²⁶Æcānō botō imote nē cæda ina tōmengā iñōmō edæ botō imote tee empo goquēnengā ingampa. Ayæ æyōmōnō botō quēwēmo botō imote nē cædongā adoyōmō quēwencæcāimpa. Botō Mæmpo iñōmō botō imote nē cædongā ingante waa acæcāimpa, ante Itota apænecāimpa.

Itota, Botō wæncæboimpa, ante apænecā

²⁷ Ayæ godōmenque apænedinque Itota iūmaī apænecantapa. “Botō guīñēmāmo entawēninque wæbo inte quīnō anguimoo. ‘Botō Mæmpo ēñēmi, āninque, Botō nantate wæwenguōnæ oo pōni ba incæte bitō pōnō ō æmi ate wæwēnāmaī bacæboimpa,’ ante botō wīi mænōmainō ante ancæboimpa. Edæ botō wæwenguinō beyæ ante pontabopa. ²⁸Mæmpo, Bitō æbānō ñāō apāite emōmi imii, ante odōmōmi acædānimpa,” angantapa.

Åñongā oōnædē inō tedepāmo apænedinque, “Botō æbānō ñāō apāite emōmo imopa, ante do odōmontabopa. Ayæ wæætē adodō cæcæboimpa,” ante apænecā ēñēnānitapa.

²⁹ Māniñōmō godongāmæ ongōnāni nanguī ināni iñōmō mānimāmo ēñēninque edæ, Detæbo tæi tēmāmo bai impa, ante wædānitapa. Wadāni guiquēnē,

—Anquedo iñōmō tōmengā ingante apænecantapa, ante ānānitapa.

³⁰ Itota iñōmō wæætē,

—Mānimāmo wīi botō beyæ ante apænecampa. Wæætē mīnitō beyæ ante apænecampa. ³¹ Nōwoyedē Wængonguī inguipoga quēwēnāni inānite apænte nānō panguinō iñōmō edæ oo baquinō anguēnē. Inguipogaque quēwēnāni awēnē iñongante wēnæ ingante Wængonguī nōwoyedē, Gobāwe, angā gocæcāimpa. ³² Botō imote awāa timpodinque ængæ gantidēnāni wægōmo ate botō waodāni tōmānāni inānite, Mīnitō botō weca poncæmīnimpa, ante aa pecæboimpa, ante Itota apænecantapa.

³³ Mānōmainō ante apænedinque tōmengā, Æbānō wænguimoo, ante ēñencædānimpa, ante apænecantapa. ³⁴ Eñēninque māniñōmō ongōnāni nanguī ināni,

—Mōnitō iñæmpa, Mōnō Codito cōwē ee ongoncæcāimpa, ante dodāni nāni wææ angainō ante yewæmonte ongompā, ante ēñentamōnīpa. Incæte bitō iñōmō nāmanque āninque, Botō Waobo ēñagaīmo iñōmote botō imote awāa timpodinque gō cædāni wængonguimo imopa, ante ædō cæte āmii. Åninque, līngā Waocā nē ēñaingā iñæmpa ee ongōnāmaī wænte goquingā.

³⁵ Ante wæyōnāni Itota tōmēnāni inānite,

—Botō, Waodāni mimōnē ñāō bai entawēninque quēwencædānimpa, ante pontabopa. Wædænque ayæ iñō botō mīnitō weca quēwēninque mīnitō imīnite odōmonte apænecantapa. Mōnitō taadō wēmō badāmaī ingæimpa, ante mīnitō taadō ayæ ñāō iñedē goedāni. Edæ wēmō iñōmō nē gocā iñōmō tōmengā edæ, Ædōnō goboo, ante ēñēnāmaī ingampa. ³⁶ Botō ñāō bai emōnōmo imopa. Ñāō iñōmō nē cægōmōni incæmōnimpa, ante bacæte ante cædinque mīnitō iñōmō botō mīnitō weca ayæ ongōñōmote botō imote pōnēdāni āmopa, angantapa.

Tōmengā iinque apænete ate wadæ godinque wē womonte ongongacāimpa.

Oodeoidi Itota ingante iimaï cæte pönenämaï inänipa

³⁷ Itota oodeoidi weca nanguï bamönengä cæte odömongä incæte tömënëni ayä tömengä ingante pönenämaï inänitapa. ³⁸ Wængonguï beyä nē apænecä Itaiya wodi iimaï ante do nänö angainö bai iinque baquinque tömënëni mänömaï cædönänimpa. “Awënë Wængonguï ëñëmi. Mönitö apænemöni tömënëni nani ëñënë ante edæ æcänö ëñente pönengä. Inæmpa nē pönengä iñömö edæ dæ angä awædö. Ayä Awënë Wængonguï nänö tæï piñante cægainö ante æcänö ada iñömö edæ dæ angampa.”

³⁹ Ininque tömënëni ædö cæte pönenguinänii, ante Itaiya wodi edæ wayömö yewæmöninque, Wængonguï iimaï ante cæcä beyä pönënëni inänipa, ante yewæmongacäimpa.

⁴⁰ “Tömënëni botö gämænö ocæ ëmænte pönäni bai botö wæætë, Waa bacæmin-impä, ante godö cæcædömoimpä.

Incæte mänömaï cædämaï incæboimpä, ante Wængonguï iimaï cægacäimpa.

Tömengä godö cæcä beyænque waodäni babetamönäni bai adämaï bagadänimpa.

Adobaï mimönë nani pönënë ömædë badinque ëñenämaï bagadänimpa.

Edæ, Tömënëni nani adinö ante ëñenämaï incædänimpa, ante cædinque ayä edæ, Tömënëni nani ëñënë ante ëñenämaï incædänimpa,” ante wææ cægacäimpa.

ante Itaiya wodi yewæmongacäimpa. ⁴¹ Itaiya wodi Itota nänö nãö ëmömämo æbänö inguï, ante do ate bai ingaingä inte edæ Itota ingantedö ante mäninö ante doyedë angacäimpa.

⁴² Nöwo guiquënë oodeoidi awënëidi tæiyänäni Itota ingante pönänänimpa. Incæte Paditeoidi beyä guinänäni inte, Mönö odömöincönë go guiyömönite tömënëni mönitö imönite wii tatodoncædänimpa, ante wææ cædinque tömënëni nē pönënëni incæ waodäni ëñëñönäni pæ wëenete tededämaï inänimpa. ⁴³ Edæ mäninäni, Waodäni mönitö imönite waa ate apænecædänimpa, ante nanguï ainente wædäni inönänimpa. Adodäni, Wængonguï mönitö imönite waa ate apænecæcäimpa, ante pönömenque ainente wædäni inönänimpa.

Itota nänö änö beyænque waodäni apænte wæcædänimpa

⁴⁴ Itota yedæ äninque aa pecantapa. “Botö imote nē pönengä iñömö wii botö adoboque imote pönëngä ingampa. Wæætë edæ botö imote nē da pönongaingä ingante tömengä adobaï pönengä inongäimpa. ⁴⁵ Adocä botö imote nē acä iñömö tömengä botö imote nē da pönongaingä ingante adobaï acä ingampa. ⁴⁶ Botö imote nē wede pönënëni iñönäni adocanque incæ wëmö iñömö wii godömenque ee ongoncæcäimpa, ante cædinque botö iñömö inguipoga quëwënëni weca nãö bai inömo inte pontabopa.”

⁴⁷ “Waacä botö änö ëñëninque wii ëñente cæcä ingä incæte botö tömengä ingante apænte änämaï imopa. Edæ botö wii inguipoga quëwënëni inänite apænecæte ante pontabopa. Wæætë inguipoga quëwënëni inänite æmo beyænque quëwencæmin-impä, ante pontabopa cæminii. ⁴⁸ Botö imote nē Baa angä iñömö tömengä botö änönö ante, Dicæ pönëmogaa, angä iñongante tömengä ingante nē apænte änö incæ edæ mä ongompa. Inguipoga iinque baquiönæ iñonte botö äninö incæ nē apænte anguingä bai ba iinque mäningä ingante, Bitö pante wæquinque Baa angabiimpä,

ante bai apänete ingäimpa. ⁴⁹Edæ botö wii nämanque pönëninque apänetabopa. Wæætë, Botö quinä apänequimoo, ante, Æbänö ante apänequimoo, ante botö Mæmpo botö imote në da pönongaingä iñömö tömengä botö imote wææ angä ëñëninque apänetabopa. ⁵⁰Tömengä nänö wææ angainö ëñente cæbo beyænque minitö wantæpiyæ cöwë quëwencæminimpa, ante do ëñëmopa. Ìninqe botö Mæmpo botö imote nänö angainö ante botö adodö ante apänebopa,” ante Itota mänñëdë iinque apänegacäimpa.

Itota incæ tömengä ëmiñænäni önöwa mënöwacä

13 Patowa näni ämæ wantæyö bacäimpa, ante näni cæyedë Itota iñömö, Botö ingui-poga quëwente ëmö cæte botö Mæmpo weca ocä ëmænte æi goquïönæ do bacäimpa, ante do ëñëngäimpa. Itota ingante pönënanäni në ingui-poga quëwënäni iñönänite tömengä tömënäni inänite waadete pönëninque nõwoyedë, Botö æbänö nangui waadete pönëmo imoo, ante odömongäimpa.

²Gäwadecæ bayö Itota tömengä ëmiñænäni tönö godongämæ cænönäni wënæ awënë cæcä beyænque Timönö wengä Codaa Icadiote iñömö, Itota ingante odömonte godoncæboimpa, ante pönengä inongäimpa. ³Itota iñömö, Quincoomë ongoncoo incæ Wængongui pönö cæcä beyænque botö tömancoo awënë badinque nämä tæi piñænte në ämo imopa, ante ëñëngäimpa. Ayæ edæ Wængongui weca quëwente wææ pönimo inte botö Wængongui weca ocä ëmænte goquïmo imopa, ante do ëñëngäimpa. ⁴Mäninö ante ëñëngä incæ tömengä iinque cænte ate ængæ gantidinqe yabæcoo gä tadongadinqe wadæ caaincoo æninque önoncadeyæ inö goti padengantapa. ⁵Ayæ ate æpæ mënongaquintadë pe nññæninqe tömengä ëmiñænäni tömänäni önöwa mënöwadinque wadæ caaincoo goti padëincoo inte wadæ cæwacæ tæcæ cæcantapa.

⁶Mänömaï cædinque tömengä Timönö Pegodo weca pongä adinque adocä iñömö tömengä ingante,

—Bitö botö Awënë ïmi incæte botö önöwa mënöwacæ pömitawo.

⁷Ante añongä Itota wæætë,

—Nõwoque botö æbänö cæboo, ante ëñënamäi imipa. Incæte ayæ ate ëñencæbiimpa.

⁸Angä ëñëninque Pegodo,

—Botö önöwa cöwë mënöwadämaï incæbiimpa, ante Baa ämopa cæbii.

Ante añongä Itota godömenque,

—Botö bitö önöwa mënöwadämaï imo bai bitö wii botö quimi imaimipa, ante angantapa.

⁹Mäninö angä ëñëninque Timönö Pegodo wæætë,

—Awënë, Mänömaï i ïninqe bitö wii botö önöwaque mënöwaquimi. Wæætë botö önompö adobai mënompodinque botö ocabo mënoncae.

¹⁰Ante añongä Itota wæætë,

—Æpæ në äadingä iñömö tömengä baö ëñayö tömäñö waëmö impa. Ìninqe tömengä önöwaque nämanque mënöwacä inte eyepæ impa. Minitö do mimö mënongate waëmö entawënömini iminipa. Incæte wii tömämini waëmö entawëmini iminipa, angantapa.

¹¹ Edæ, Æcänö botö imote në odömonte godonguingä ingää, ante tömengä do ëñëongäimpa. Mänömaï beyä tömengä, “Minitö wii tömämïni do mënongate wæmö entawënömini iminipa,” angantapa.

¹² Ayä tömënäni önöwa iinque mënöwadinque tömengä yabæcoo wëñadinque tömengä adodö gote tæ contadinque tömënäni inänite,

—Botö mänömaï cædinque minitö beyä ante quïnö cæboo, ante ëñëmïnitawo, ante äninque Itota godömenque, ¹³ Minitö botö imote, Në Odömömi imipa, äninque ayä adobaï, Awënë imipa, ämïni iminipa. Edæ botö mïnitö Awënë inömo ininque minitö mänömaïnö ante näwangä ante äminipa. ¹⁴ Botö inömö minitö Awënë inömo inte në mïnitö iminite Odömömo imo incæ minitö önöwa do mënöwabo aminipa. Ininque botö mänömaï mënöwabo baï minitö adobaï wacä önöwa wacä önöwa mënöwaquëñëmïni iminipa. ¹⁵ Botö cæbo baï minitö adobaï cæcæminimipa, ante cædinque botö minitö beyä ante cæbo aedäni. ¹⁶ Minitö iminite näwangä ämopa. Awënë ñænængä inongä inongante tömengä ingante në cæcä inömö wii godömenque ñænængä ingampa. Awënë në da godongä ñænængä inongä tömengä nänö në da godöningä wæætë wii godömenque ñænængä ingampa. ¹⁷ Minitö nöwo mänïnö ante ëñënimïni inte edæ ado ante cæmïni ininque mïni toquinque bacæimpa, ante Itota apænecantapa.

¹⁸ Ayä apænëdinque, “Botö wii tömämïni beyä antabopa. Botö apænte äninäni ædänidö inänii, ante botö në ëñëmo imopa. Wængongui angä ëñente näni yewæ-mongäinö baï iinque bacæimpa, ante iïmaï bacæ cæpa. ‘Botö tönö godongämæ në cængongä inömö botö imote në piïnte cæcä bacantapa.’ ¹⁹ Mänömaï ba adinque edæ minitö botö imotedö ante apænëdinque, Tömengä mönö Codito inongä ingampa, ante pönencæminimipa, ante cædinque botö nöwo ayä badämaï inedë minitö iminite ämopa. ²⁰ Minitö iminite näwangä ämopa. Æcämenque botö në da godongaingä ingante äna tömengä inömö edæ botö imote adobaï ængä ingampa. Ayä æcämenque botö imote äna tömengä inömö botö imote në da pönongaingä ingante ængä ingampa cæmïni,” ante Itota apænëgacäimpa.

Itota ingante Codaa në godonguingä ingampa, ante

(Mäateo 26.20-25; Mäadoco 14.17-21; Odoca 22.21-23)

²¹ Mänïnö angä ate Itota inömö tömengä nänö wæwëmämo entawëninque wæcä inte, Näwangä ante apænebo ëñëedäni. Mïni cabo incæ adocanque, Æncædänimipa, ante botö imote odömonte pædæ godonguingä ingampa.

²² Ante apænecä wædinque tömengä ëmïñænäni, Æcänö ingante apænecää, ante ëñënämaï inte godongämæ wacä ingä wacä ingä adänitapa. ²³ Itota ëmïñænäni adocanque inömö Itota nänö në waadete pönengaingä inongäimpa. Tömengä inömö Itota tönö äänömonque tæ contate ongönaimpa. ²⁴ Timönö Pegodo inömö iingä ingante ömö ömö cædinque angampa. Bitö Itota ingante, Æcänö ingää, ante ämi angä ëñente ate apænëbi ëñëmönïe. ²⁵ Angä ëñëninque mäningä Itota tönö äänömonque në tæ contacä inömö,

—Awënë, æcänö ingää, ante apænëbi ëñëmönïe, ante tömengä ingante äñongä.

²⁶ Itota wæætë,

—Botö iï päö owætaca mii cæte godömo në ænguingä inömö tömengä në cæquingä ingampa.

Ayæ päö owætaca mii cædinque Timönö wë Codaa Icadote ingante godongan-tapa. ²⁷ Codaa päö ængä ate Tatäna iñömö tömengäa do guigacäimpa. Ìninqe tömengä ingante,

—Bitö quinö cæcæ cæbii edæ quingæ cæe, ante Itota angantapa.

²⁸ Wadäni adoyömö nê cænäni iñömö, Itota quinante mäninö ante tömengä ingante angäa, ante ëñänämaï inönänimpa. ²⁹ Edæ Codaa tömënäni da wente æinta næænongä ingä beyæ tömënäni pancadäniya, Ææmæ beyæ ante mönö cænguï wii eyepæ ëamöni ininqe, Bitö godonte æncæbiimpa, ante Itota angampa, ante pönönänimpa. Adobaï ömæpodäni inänite, Godömi ænguïnänimpa, ante Itota angampa, ante pönönänimpa.

³⁰ Codaa päö ænte ate tao gogacäimpa. Do woyowotæ inönimpa.

Itota nänö wææ änönö ante ñöwo angampa

³¹ Codaa dæ gocä adinqe Itota,

—Botö Waobo ëñagaimo inte æbänö ñäö apäite ëmönömo imoo, ante ñöwo edonque bacäimpa. Botö cæquinö beyæ Wængongui æbänö ñäö apäite ëmongä ingäa, ante edonque bacäimpa. ³² Ayæ botö cæquinö beyæ Wængongui ñäö apäite nänö ëmönö edonque ba ininqe Wængongui cæcä ate botö ñäö apäite botö ëmönö adobaï edonque bacäimpa. Ayæ mänömaï Wængongui wantæyö cæcæcäimpa. ³³ Botö wëmini botö minitö weca wantæyö quëwëninque gobopa. Minitö botö imote ante diqui diqui minguiimini iminipa. Ayæ oodeoidi inänite botö angainö baï ñöwo minitö iminite adodö ämopa. Botö goquiñömö ante minitö ædö cæte ponguimini iminii. ³⁴ Botö wææ änönö ante ñöwo minitö iminite ämopa. Wacä ingä wacä ingä waadete pönencæminimpa. Botö minitö iminite waadete pönönömo baï minitö adobaï wacä ingä wacä ingä waadete pönenguënëmini iminipa. ³⁵ Minitö wacä ingä wacä ingä waadete pönëmini adinqe wadäni tömänäni, Minitö Itota nänö nê ëmiñæmini iminipa, ante ëñencædänimpa, ante Itota apænægacäimpa.

Pegodo incæ, Dicæ abogaa, anguingä ingampa, ante

(Mäateo 26.31-35; Mäadoco 14.27-31; Odoca 22.31-34)

³⁶ Timönö Pegodo tömengä ingante,

—Awënë, ædömë gobii.

Ante äñongä Itota wæætë,

—Botö goquiñömö ante bitö ædö cæte botö imote ñöwo tee empo ponguimi imii. Ayæ ate guiquënë bitö botö imote tee empo ponguimi incæbiimpa, angantapa.

³⁷ Pegodo godömenque,

—Awënë, äninque, Botö quinante bitö imite ñöwo tee empo godämaï imoo, ante wæcampa. Botö Ao äninque bitö beyæ ante nämä wænguimo imopa.

³⁸ Ante äñongä Itota wæætë,

—Bitö Ao äninque botö beyæ ante näwangä wænguimi imiyaa. Bitö imite näwangä ante apænebo ëñëe. Tawadiya pedämaï iñonte bitö iñömö botö imotedö, Dicæ abogaa, ante mempoga go adopoque anguimi imipa, ante apænægacäimpa.

Mæmpo weca mönö godö ante Itota taadö baï ingampa

14 Itota tömengä ëmiñænäni inänite, “Mimönë guiñente wædämaï iedäni. Wæætë Wængongui ingante wede pönëdäni, angantapa. Ayæ adobaï botö

imote wede pönëedäni. ²Botö Mæmpo nänö quëwëñömö onconcoo bacoo pönï mä ongompa. Mänömaï impa, ante wïi näwangä i bai botö mïnitö imïnite ancädömoimpa. Mïnitö beyä ante botö, Mïni ponte quëwenguï onconcoo ante tömää ædæmö badoncæte ante mäniñömö gocæboimpa. ³Ayæ mïnitö quëwenguï onconcoo tömää ædæmö mänoncæte ante gobo inique botö ocæ ëmænte poncæboimpa. Pöninque mïnitö botö quëwëñömö adoyömö botö tönö godongämæ quëwencæmïnïmpa, ante botö mïnitö imïnite ænte mäibo æicæmïnïmpa. ⁴Botö goquiñömö æyömönö i, ante ayæ mäniñömö gocæte ante taadö godö ante mïnitö do ëñëminipa,” ante Itota apænecantapa.

⁵Apænecä ëñëninque Tömato iñömö tömengä ingante,

—Awënë, Ædömë goquïmii, ante mönitö ëñënämaï imöni inte mönitö mäninö bitö goquïnö ædönö i, ante taadö ædö cæte ëñenguïmönii.

⁶Äñongä Itota wæætë,

—Botö iñömö tömömo në taadömo bai inömo imopa. Ayæ botö adobo në näwangä änö bai inömo bai iñömote mïnitö æbänö näwangä impa, ante ëñenguïmïni imïnïpa. Botö edæ në Quëwëmo inte pönö cæbo beyænque mïnitö quëwenguïmïni imïnïpa. Botö wïi pönö cæbo bai waocä æcämenque incæ botö Mæmpocä weca godämaï incædongäimpa. ⁷Botö imote do ate pönëmïni inique mïnitö botö Mæmpo ingante adobaï ate pönëmïni imäimïnïpa. Nöwo tömengä ingante tæcæ ate bai pönëmïni inte mïnitö tömengä ingante cöwë në agaimïni incæmïnïmpa, ante apænecantapa.

⁸Mäninö apænecä ëñëninque Pedipe iñömö,

—Awënë, Mæmpocä ingante odömömi amönïe. Mäninque adinque idæwaa. Eye-pæ impa.

⁹Äñongä Itota wæætë,

—Pedipe ëñëmi. Botö mïnitö weca wantæpiyæ quëwëmo incæ bitö ayæ botö imote adämaï inte bai pönënämaï imitawo. Në botö imote acä iñömö tömengä adobaï Mæmpocä ingante në acä ingampa. Inique bitö iñömö, Mæmpocä ingante odömömi amönïe, ante ædö cæte botö imote ämii. ¹⁰Wæmpocä nempo botö në quëwëmo imopa, ante ayæ, Wæmpocä ingante botö entawëmo imopa, ante bitö pönënämaï imitawo. Botö mïnitö imïnite, Æbänö apænëboo, ante wïi nämanque pönëninque apænëbopa. Wæætë botö Wæmpocä incæ botö tönö në ääwocæque bai quëwënongå inte edæ tömengä nänö cädö ante në cæcä ingampa. ¹¹Tömengä nempo quëwëmo imopa, ante ayæ, Tömengä ingante botö entawëmo imopa, ante mïnitö imïnite apænëbo ëñëninque pönëedäni. Wæætë edæ mïnitö botö änö beyænque ayæ pönënämaï imïni incæte botö bamönengæ nanguï cædinö adinque mäninö beyænque pönëedäni. ¹²Mïnitö imïnite näwangä ämopa. Botö imote në wede pönengä iñömö tömengä botö cæbai adobaï cæcæcäimpa. Ayæ botö Mæmpocä weca ocæ ëmænte gobo beyæ në wede pönengä iñömö edæ wïi önonque botö cæbai cædinque godömenque cæquingä ingampa. ¹³Mïnitö botö ëmöwo ante apænëdinque quiëmë æncæte ante apænëmïni ëñëninque botö Wængonguï Wëmo inömo inte edæ, Mæmpocä nänö nãö ëmömämo edonque pönï acädänïmpa, ante cædinque mïnitö änö bai edæ do cæcæboimpa. ¹⁴Mïnitö, Ænguïmöni, ante quiëmë beyæ ante botö ëmöwo ante botö imo apænëmïni ëñëninque do cæcæboimpa, ante Itota apænëgacäimpa.

Wængonguï Tæiyæ Waëmö Önöwoca poncæcäimpa, ante

¹⁵ Ayæ godömenque apænedinque Itota iïmaï ante apænecantapa. “Minitö botö imote waadete pönëmini ininque botö wææ angainö ante ëñente cæquimini iïmaïminipa. ¹⁶ Ayæ, Wacä botö beyæ ante minitö tönö godongämæ cæquingä, ante botö iïnömö botö Mæmpocä ingante, Da godömi gocæe, ante apænecæboimpa. Ayæ tömengä botö änö ante do ëñente cædinque edæ, Tömengä minitö tönö cöwë ongote godongämæ cæcæcäimpa, ante cædinque adocä ingante minitö weca da pönongä ponguingä ingampa. ¹⁷ Wængonguï nè nõ cæcä ingampa, ante näwangä impa, ante Wængonguï Tæiyæ Waëmö Önöwoca incæ nè odömongä inongä ingampa. Incæte waodäni nè inguipogaque quëwënäni iïnömö tömengä ingante adämaï inäni inte pönënamäi inönäni inte edæ ædö cæte tömengä ingante Ao ante ænguïnäni. Wæætë edæ tömengä minitö weca quëwëningä iïnongante minitö tömengä ingante nè entawenguimini inte tömengä ingante do ate bai pönëmini iminipa,” ante Itota apænecantapa.

¹⁸ Ayæ apænedinque, “Botö wii minitö nöwamini bai mini baquinque ante edæ ëmö cæte goquimo imopa. Wæætë minitö weca ocæ ëmænte poncæboimpa. ¹⁹ Wantæ ate waodäni nè inguipogaque quëwënäni iïnömö edæ botö imote adämaï inguïnäni inäni. Minitö guiquënë botö imote aquimini iminipa. Edæ botö quëwëmo beyænque minitö adobai quëwencæminipa. ²⁰ Ayæ Wængonguï Tæiyæ Waëmö Önöwoca nänö ponguïönæ iïnonte minitö iïnömö edæ, Mönö æbänö äanque bai quëwëmö imöö, ante ëñencæminipa. Edæ, Botö Mæmpocä nempo quëwëmo imopa, ante ayæ edæ, Minitö botö nempo quëwëmini iminipa, ante ayæ, Minitö iminite adobai botö entawëmo quëwënomini iminipa, ante minitö ëñencæminipa. ²¹ Æcänö botö wææ angainö ö æninqe ëñente cæda tömengä iïnömö botö imote nè waadete pönengä ingampa. Botö imote nè waadete pönengä ingante botö Mæmpo näëmæ waadete pönencæcäimpa. Ayæ botö adobai mäningä ingante waadete pönencæboimpa. Ayæ, Botö æbänö imoo, ante tömengä ingante odömömo acæcäimpa,” ante Itota apænecantapa.

²² Codaa iïnömö edæ wii Codaa Icadote wacä Codaa iïnömö edæ Itota ingante apænecantapa.

—Awënë iïnæmpa bitö mönitö imönite apænedinque, Botö æbänö imoo, ante odömömo acæminipa, äninque quïnante wæætë, Inguipogaque quëwënäni inänite odömönämaï incæboimpa, ante pönëninque cæbitawo, angantapa.

²³ Itota wæætë,

—Waocä botö imote nè waadete pönengä ininque tömengä iïnömö botö odömönte apænedö ante ëñente cædongä iïmaingampa. Botö Mæmpo adocä ingante waadete pönenguingä ingampa. Ayæ mönatö tömengä tönö cöwë godongämæ quëwencæte ante tömengä weca ponguimöna imönapa. ²⁴ Botö imote nè waadete pönënamäi ingä guiquënë tömengä iïnömö botö odömönte apænedönö ante ëñënamäi cædongä ingampa. Mäninö botö odömönte apænebo mini ëñëninö iïnömö wii botö nämä pönëninque apænedinö impa. Wæætë botö imote nè da pönongaingä nänö angainö impa, ante Itota apænecantapa.

²⁵ Ayæ apænedinque, “Minitö weca botö quëwënedë botö mäninö ante minitö iminite apænetabopa. ²⁶ Botö Mæmpocä botö ëmöwo beyæ ante tömengä Tæiyæ Waëmö Önöwoca ingante da pönongä ponguingä inte tömengä minitö tönö

godongämæ në cædongä ingampa. Adocä mīnitō īmīnite tōmānō ante odōmonte apānecä ēñencāmīnīmpa. Ayæ botō apānedō mīni ēñēnīnō tōmānō ante tōmengä adodō apānecä wæætē pōnencāmīnīmpa,” ante Itota apānecantapa.

²⁷ Ayæ apānedīnque, “Botō pōnō cæbo beyænque mīnitō gänē entawente quēwēedāni, ante pōnō cædinque gobopa. Botō gänē entawēmāmo incæ mīnitō īmīnite pōnōmo ænīnque mīnitō gänē pōnente quēwēncāmīnīmpa. Botō ingui-pogaque quēwēnāni nāni godōnō bai wīi pōnōmo īmopa. Nō cæte pōnōmo īmopa. Mīnitō mīmōnē guīñente wædāmaī inte piyānē cæte quēwēncāmīnīmpa. ²⁸ Botō mīnitō īmīnite ēmō cæte godīnque mīnitō weca ocæ ēmænte poncæboīmpa, ante botō apānebo ēñēmīnitapa. Botō edæ, Botō Mæmpocä weca gocæboīmpa, ante apānebo ēñēmīnīni inte mīnitō botō īmote waadete pōnēmīni īnīnque botō beyæ ante watapæ tobaimīnīpa. Edæ botō wīi botō Mæmpo bai īnōmo inte wædāmo īnōmo īmopa. ²⁹ Mānōmaī īnīnque ba adīnque mīnitō, Nāwangä īmpa, ante pōnencāmīnīmpa, ante botō nōwoque ayæ badāmaī īñedē mīnitō īmīnite apānetabopa,” ante Itota apānecantapa.

³⁰ Ayæ apānedīnque, “Īi ingui-pogaque quēwēnāni awēnē īñōmō wēnæ īnongä inte oo poncæ cæcampa. Īnīnque botō mīnitō īmīnite wīi wantæpiyæ ayæ apānebopa. Edæ tōmengä ædō cæte botō īmote nāmā tæi pīñænte në angä inguingä. ³¹ Incæte botō, Waodāni ingui-pogaque quēwēnāni īñōmō īmaī ante ēñencædānīmpa, ante cæbopa. Botō Mæmpo īngante botō waadete pōnēmopa, ante ayæ, Botō Mæmpo botō īmo wææ angä bai botō adodō cæbo īmopa, ante tōmēnāni ēñenguēnēnāni īnānīpa,” ante Itota īnīnque apānegacāīmpa.

Ayæ, “Nōwo edæ ængæ gantīdīnque mōnō gocæīmpa,” angacāīmpa.

Itota nāwā yowementa bai ingampa

15 Ayæ godōmenque apānedīnque Itota īmaī apānecantapa. “Botō nāwā yowementa bai īmopa. Ayæ botō Mæmpo yowementa në aacā bai ingampa. ² Botō īmote pōnēnāni tōmānāni īi yowementa gædēmænto bai īnānīpa. Æcānō wīi botō ēmīñængä bai cæda tōmengä īñōmō gædēmænto ōmæcato bai ingampa. Botō Mæmpo gædēmænto ōmæcato bai īñongante wangō topænte bai cædinque tōmengä īngante wido cæcampa. Æcānō botō ēmīñængä bai cæda guīquēnē tōmengä gædēmænto tōmenca incato bai ingampa. Gædēmænto tōmenca incato incæ godōmenque waa pædīnque nanguī incacæīmpa, ante wææ topæ wææ topæ cædāni bai botō Mæmpo īñōmō adobaī cæcampa. Botō në ēmīñængä wīi eyepæ cæcā adīnque tōmengä īngante wadæ cæcampa. ³ Botō änō ante mīnitō īmīnite botō apānedīnō beyæ mīnitō mīmōnē do mēnongate quēwēmīni īmīnīpa. ⁴ Mīnitō botō nempo ee quēwēnōmīni incāmīnīmpa. Ayæ adobaī mīnitō botō īmote cōwē entawente quēwēnōmīni īmīnīpa. Gædēmænto yowementa adoyōmō ībænte odæ yate bai pæte incate bapa. Edæ gædēmænto adotoque īñōnte ædō cæte nāmā cædinque incaquīntoo. Mīnitō īñōmō, Tōmenca incate bai mōnō nanguī cæcæīmpa, ante cædinque botō nempo ee quēwenguēnēmīni īmīnīpa,” ante Itota apānecantapa.

⁵ Ayæ apānedīnque, “Botō yowementa bai īmopa. Mīnitō guīquēnē gædēmænto bai īmīnīpa. Waocā botō nempo ee quēwēnongä inte ayæ botō īmote cōwē entawēnongä īngä īnīnque tōmengä tōmenca incate bai nanguī cæbaīngampa. Wæætē edæ botō nempo quēwēnāmaī īmīni īnīnque mīnitō tōmāā cædāmaī īmaīmīnīpa tōō. ⁶ Nē botō nempo ee quēwēnāmaī īngä īñōmō tōmengä gædēmænto

näni wido cædinto bai ingampa. Mäninto amimö bayonte gæte mämö gongapamö nõ cædäni wo bæco bai cædinque tõmengä ingante botö Mæmpo adobai wido cæcä ingampa,” ante Itota apænedantapa.

⁷ Ayæ apænedinque, “Minitö guiquënë botö nempo ee quëwëningue botö angainö ante ee entawente quëwëmïni ïnïnque mïnitö quiëmë æncæte ante äinëmïni incæ Wængonguï ingante apænemïni inte tõmengä wæætë pönongä æmaïmïnipa. ⁸ Minitö nanguï pönï tõmenca incate bai ïmïni inte, Minitö botö ëmiñæmïni ïmïnipa, ante edonque pönï ingæïmpa. Mänömai cæmïni ïnïnque, Botö Mæmpo ñäö apæite ëmönongä ingampa, ante odömote ingæïmpa. ⁹ Botö Mæmpo ïñömö botö ïmo waadete pönengä ingaingä bai botö adobai mïnitö ïmïnite waadete pönëmo intabopa. Botö nê waadete pönëmo ïñömote mïnitö ïñömö botö nempo ee ongödäni. ¹⁰ Botö Mæmpo nê waadecä ïñongante botö tõmengä nänö wææ angainö ante ëñente cædïmo inte tõmengä nempo ee ongömopa. Minitö adobai botö nê waadete pönëmo ïñömote mïnitö botö wææ angainö ante ëñente cæmïni ïnïnque edæ botö nempo ee ongömïni ïmaïmïnipa,” ante Itota apænedantapa.

¹¹ Ayæ apænedinque, “Botö watapæ topämo ante mïnitö mimönë entawëningue watapæ tocæminïmpa, ante ayæ, Mïni watapæ topämo eyepæ ingæïmpa, ante botö mïnitö ïmïnite mäninö ante apænetabopa. ¹² Botö wææ änö ïñömö ïïmai ante ïmpa. Minitö ïmïnite botö waadete pönëninö bai mïnitö adobai wacä ingä wacä ingä waadete pönëedäni. ¹³ Æcänö nänö æmigoidi beyæ ante, Botö Ao äinïnque nämä incæ tõmënäni beyæ ante wænguïmo, ante cæcä ïñömö tõmengä nänö waadete pönëmämo wïi waodäni tõmänäni waadete pönëmämo bai ïmpa. Tõmengä ïñömö edæ godömenque nanguï waadete pönengä ingampa. ¹⁴ Minitö botö wææ angainö ëñente cæmïni ïnïnque botö guidëmïni ïmaïmïnipa. ¹⁵ Minitö botö ïmo nê cædömïni ïmïnipa, ante botö mïnitö ïmïnite godömenque apænedämai ïmopa. Edæ awënë ingante nê cæcä ïñömö, Awënë æbänö cæcää, ante ëñënämaingä ingampa. Wæætë edæ botö Mæmpo nänö angainö ante botö ëñëninö tõmänö ante mïnitö ïmïnite apænebo ëñëmïni beyæ botö, Minitö botö guidëmïni ïmïnipa, ante apænedïmo ïmopa. ¹⁶ Minitö wïi botö ïmote apænte ænimïni ïmïnipa. Wæætë botö ïñömö, Minitö botö ëmiñæmïni ïnömïni inte tõmenca nanguï incate bai nanguï cæcæmïnïmpa, ante mïnitö ïmïnite apænte ænïmo ïmopa. Minitö botö ëmiñæmïni ïnömïni inte cöwë cæmïni ïnïnque mïnitö quiëmë ante botö ëmowo beyænque apænemïni ëñëningue Mæmpocä ïñömö do pönongä æncæminïmpa. ¹⁷ Botö wææ änö ïñömö ïïmai ante ïmpa. Minitö wacä ingä wacä ingä waadete pönëedäni,” ante Itota apænegacäïmpa.

Inguipogaque nê quëwënäni Itotaidi ïnänite näni pïmämö

¹⁸ Mänömainö ante apænedinque Itota godömenque ïïmai ante apænedantapa. “Inguipogaque nê quëwënäni ïñömö mïnitö ïmïnite pïinäni adinque mïnitö guïñënämaï inte edæ, Itota ingante do pïingadänïmpa, ante pönëmïni ïmïnipa. ¹⁹ Waodäni nê inguipogaque quëwënäni näni cabo wacä ingä wacä ingä waadete pönënanï ïnänïpa. Minitö inguipogaque näni quëwencabo tönö adomïni ïmïni bai tõmënäni mïnitö ïmïnite adobai waadete pönencædönänïmpa. Wæætë mïnitö inguipoga näni quëwencabo tönö adomïni ïnämai ïmïnipa. ïñæmpa wëenënedë mïnitö inguipoga quëwëñömïnite botö do mïnitö ïmïnite apænte æntabopa. Mänömai beyæ nê inguipogaque quëwënäni ïñömö mïnitö ïmïnite pïinäni ïnänïpa. ²⁰ Botö änö ante mïnitö

iminite, Æbänö apæneboo, ante nōwo wæætē pōneedāni. ‘Awēnē ñænængä inongä iñongante tömengä ingante nē cæcä iñömö wii godömenque ñænængä ingampa.’ Waodāni botö imote piināni wæwēmo bai mīnitö iminite adobai piināni wæwēmīni incæmīnimpa. Botö odömōnte apænegainö ante ēñente cædāni bai mīnitö odömōnte apænedö ante adobai ēñente cæcædānimpa. ²¹ Mīnitö botö quimīni iñöminite edæ botö emōwo beyenque iināni, Botö imote nē da pōnongaingä, Æbänö ingää, ante ēñenāmai ināni inte mänōmai edæ cæquīnāni inānipa,” ante Itota apænecantapa.

²² Ayæ apænedinque, “Botö tömēnāni inānite wii ponte apænebo bai tömēnāni nāni wentamö mongænguimāmo mongænāmai incædönānimpa. Nōwo iñömö, Botö apænebo nē ēñenināni inte tömēnāni nāni wentamö mongæmāmo do mongænānipa. Ināmpa Itota apæneçä ēñenāmai imōnipa, ante ædö cæte anguinānii. ²³ Botö imote nē piingä iñömö tömengä adobai botö Mæmpocä ingante piingä ingampa. ²⁴ Wacä, Botö bamōnengæ botö cæbai adobai cæcä iñömö cōwē dæ angampa. Inique botö wii tömēnāni weca bamōnengæ cæbo bai tömēnāni nāni wentamö mongænguimāmo mongænāmai incædönānimpa. Incæte, Botö æbänö cæboo, ante do adāni incæ tömēnāni botö imote piinique botö Mæmpo ingante adobai piinānitapa. ²⁵ Dodāni nāni wææ yewæmongaintaa yewæmōninque iimāi ante nāni apænegainö bai nōwodāni nāni cædö beyæ edæ iinque batimpa. ‘Botö imote ononque piinānitapa,’ ante yewæmongadānimpa,” ante Itota apænecantapa.

²⁶ Ayæ apænedinque, “Botö edæ botö Mæmpo weca ocæ emænte gote ate mīnitö beyæ ante mīnitö tönö godongämæ cæquingä ingante da pōnoncæboimpa. Māningä iñömö Wængonguī Tæiyæ Waēmö Önōwoca inongä inte edæ, Æbänö nāwangä i, ante apæneçä ēñencæmīnimpa. Tömengä botö Mæmpo weca quēwente ponguingä ingampa. Pōninque tömengä, Botö æbänö cæboo, ante apæneçä ēñencæmīnimpa. ²⁷ Mīnitö adobai wēenēnedē botö mä cæyedē do botö miñæ godimīni imīni inte edæ, Botö æbänö cæboo, ante apænequēnemīni imīnipa,” ante Itota tömengä nänö nē emiñænāni inānite apænegacäimpa.

16 Godömenque apænedinque Itota iimāi apænecantapa. “Mīnitö oda cædāmai tæi gongænte ongoncæmīnimpa, ante cædinque botö mīnitö iminite mäninö ante tömānö apænetabopa. ² Mīnitö odömöincönē go guiyöminite wadāni, Mōnitö tönö godongämæ ongönāmai iedāni, ante mīnitö iminite tatodönāni gocæmīnimpa. Wii mäninonque cæquīnānimpa. Wæætē iincayæ ate æcāmenque mīnitö iminite nē wænonguīna ina iñömö tömengä, Botö Wængonguī nänö cædö ante cæbopa, ante pōnencæcäimpa. ³ Botö Mæmpo ingante wii adinque pōnēnāmai ināni inte ayæ botö imote adāmai inte bai pōnēnāmai ināni iñömö tömēnāni iñömö mīnitö iminite mäninö cæquīnāni inānipa. ⁴ Edæ māniönæ bayonte mīnitö, Botö wææ angainö ante æbänö ämo, ante wæætē pōnencæmīnimpa, ante botö mīnitö iminite mäninö ante do apænetabopa,” ante Itota apænegacäimpa.

Wængonguī Tæiyæ Waēmö Önōwoca nänö cædö

Ayæ godömenque apænedinque Itota iimāi apænecantapa. “Mīnitö tönö wēenēnedē godongämæ ongōmo beyæ botö mäninö ante māniñedē apænedāmai intabopa. ⁵ Botö imo nē da pōnongaingä weca botö nōwo pōni ocæ emænte goquīmo incæte, Bitö æyömönö goquīmi, ante mīnitö tömāmīni botö imote änāmai imīnipa. ⁶ Botö mäninö ämo beyæ mīnitö nanguī pōni wæwēmīni imīnipa. ⁷ Incæte botö mīnitö iminite nāwangä ämopa. Mīnitö beyæ waa ingæimpa, ante botö goquīmo

imopa. Botö wadæ godāmaī imo baī mīnitö tönö godongāmæ nē cæqingä iñömö mīnitö weca pönāmaī incædongäimpa. Wæætē edæ cöwē goquimo inte godinque botö tömengä ingante mīnitö weca da pönömo ponguingä ingampa. ⁸Pöninque Wængonguī Tæiyæ Waëmö Önöwoca cæcä beyænque inguipogaque quëwënäni, Mönö wënæ wënæ cædomö inte wentamö mongämö awædö, ante wæcædänimpa. Ayæ tömengä cæcä beyænque, Wængonguī weca æcänö nö cæte quëwëna ina, ante ëñcædänimpa. Ayæ Wængonguī apænte ante pancæcäimpa, ante adobai ëñcædänimpa. ⁹Edæ botö imote nāni pönënāmaī inö beyænque inguipogaque quëwënäni iñömö edæ, Mönö wënæ wënæ cædonque ante cædinque pönënāmaī imopa, ante wæcædänimpa, ante adocä cæcæcäimpa. ¹⁰Ayæ edæ, Botö iñömö botö Mæmpo weca gote quëwëñomote mīnitö botö imote adāmaī inguimīni iminipa. Ininque botö Mæmpo weca gote quëwëmo beyæ Wængonguī Tæiyæ Waëmö Önöwoca incæ, Æbänö nö cæte quëwenguīi, ante inguipogaque quëwënäni inänite odömonte apæncä ëñcædänimpa. ¹¹Ayæ inguipogaque quëwënäni awënë iñongante wënæ ingante Wængonguī, Botö pancæboimpa, ante do apænte angacäimpa, ante Wængonguī Tæiyæ Waëmö Önöwoca godö odömonte apæncä beyænque ëñcædänimpa,” ante Itota apæncantapa.

¹²Ayæ apænedinque, “Botö mīnitö iminite nanguī ayæ apæneinente wæbo incæte mīnitö ñöwo ganca ædö cæte ëñgungimīni. ¹³Wængonguī Tæiyæ Waëmö Önöwoca pongä ate tömengä iñömö, Æbänö nāwangä impa, ante tömänö ante mīnitö iminite odömonte apæncä ëñcæmīnimpä. Adocä, Æbänö apænequimoo, ante wīi nāmä pönëninque apæncæcäimpa. Wæætē Wængonguī tömengä ingante angä nänö ëñëninö ante Wængonguī Önöwoca iñömö mäninonque ante mīnitö iminite odömonte apæncä ëñcæmīnimpä. Ayæ, İncayæ ate æbänö baquīi, ante tömengä mīnitö iminite apæncä ëñcæmīnimpä. ¹⁴Botö æbänö nāö apæite ëmönömo imopa, ante edonque pönī bacäimpa, ante cædinque tömengä iñömö botö entawënë ante mīnitö iminite odömonte apæncä ëñcæmīnimpä. ¹⁵Botö Mæmpo nänö ëadoncoo iñömö edæ tömancoo botö quincöo impa. Mänömaī beyæ iīmaī apænetabopa. Tömëmo entawencöo ante Wængonguī Önöwoca iñömö mīnitö iminite odömonte apæncä ëñcæmīnimpä, ante apænetabopa,” angantapa.

¹⁶“Ayæ wantæ ate mīnitö botö imote adāmaī inguimīni iminipa. Ayæ ate wantæyö iñonte botö imote wæætē acæmīnimpä,” ante Itota apænegacäimpa.

Mīni wæwëmämö incæ wæætē mīni toquinque bacäimpa

¹⁷Tömengä ëmīñänäni pancadäniya nāmanque godongāmæ apænedinque,

—Mäninö äninque tömengä, Mīnitö wantæ ate botö imote adāmaī inguimīni iminipa, ante æbänö ancæte ante apæncä, ante wædänitapa. Ayæ, Wantæ iñonte mīnitö botö imote wæætē acæmīnimpä, ante ayæ, Botö Mæmpo weca gote quëwëmo beyæ impa, ante Itota apæncä awædö, ante apænedänitapa. ¹⁸Tömënäni wæætē wæætē, Mäninö tömengä, Wantæyö, ante nänö änö iñömö edæ æbänö ante apæncä, ante wædänitapa. Tömengä æbänö ancæte ante apæncä, ante ëñënaī imönipa, ante wædänitapa.

¹⁹Tömënäni mäninö ante pönëninque botö imote ëñcæte ante äinënäni inänipa, ante wædinque Itota tömënäni inänite,

—Wantæ ate mīnitö botö imote adāmaī inguimīni iminipa, ante botö änö ante ayæ, Wantæyö iñonte mīnitö botö imote wæætē acæmīnimpä, ante botö æbänö

ämoo, ante mīnitō nāmanque godongāmæ tedemīnitawo. ²⁰ Mīnitō īmīnite nāwangā āmopa. Inguipogaque quēwēnāni īñōmō watapæ toyōnāni mīnitō caate wæquīmīni inte Ca ca wæcāmīnīmpa. Mīnitō wæwenguīmīni īmīnīpa. Incæte mīni wæwēmāmo incæ mīni toquinque bacæīmpa. ²¹ Onquiyængā īñōmō tōmengā wēñæ ēñacæ cæyedē nanguī nantate wæcā inte wæwengā bacā incæte tōmengā wēñæ ēñacā adīnque tōmengā, Botō wē ēñacā ingampa, ante watapæ tote beyæ tōmengā nānō wædīnō ante edæ pōnēnāmaī ingampa. ²² Mīnitō tōmengā baī adobaī īmīnīpa. Nōwoyedē mīni caate wæyedē impa. Incæte botō wæætē mīnitō īmīnite aquīmo īmopa. Mānōmaī beyæ mīnitō watapæ tocāmīnīmpa. Māniñedē, Mīnitō todāmaī incāmīnīmpa, ante æcāmenque incæ wææ cædāmaī incæcāīmpa.

²³ Godōmenque apænedīnque Itota, “Māniñedē mīnitō botō īmote, Æbānō ī, ante ēñencæte ante godōmenque ānāmaī incāmīnīmpa. Mīnitō īmīnite nāwangā āmopa. Botō Mæmpo ingante mīnitō quīēmē æncæte ante botō ěmōwo ante apæneyōmīni tōmengā īñōmō do pōnogā æncāmīnīmpa. ²⁴ Nōwo ganca mīnitō quīēmē æncæte ante botō ěmōwo ante apænedāmaī īmīnīni īmīnīpa. Nōwo īñōmō edæ, Pōnōmi æmōnie, ante Wængonguī ingante apæneedāni. Apænemīni ēñēnīnque tōmengā pōnogā ænīnque mīnitō eyepæ pōni mīni watapæ toquinque ænguīmīni incāmīnīmpa,” ante Itota apænegacāīmpa.

Itota nē tæī ěmōnogā ingampa

²⁵ Mānōmaīnō ante apænedīnque Itota īīmaī apænecantapa. “Mīnitō īmīnite inguipoga quēwēnāni nāni cæbainō ante odōmonte apænedīmo incæte botō wantæyō baquīōnæ īīnque bayonte mānōmaīnō ante godōmenque odōmonte apænedāmaī incæboīmpa. Wæætē botō tōmēmo Mæmpo ingantedō ante apænedīnque mīnitō īmīnite edonque pōni apæneceboīmpa. ²⁶ Māniñōnæ mīnitō botō Mæmpo ingante botō ěmōwo beyænque apænequīmīni īmīnīpa. Īnīnque botō, Mīnitō beyæ ante botō Mæmpo ingante apænequīmo īmopa, ante mānōmaī beyæ botō ānāmaī īmopa. ²⁷ Edæ botō Mæmpo incæ mīnitō īmīnite waadete pōnengā ingampa. Botō īmo waadete pōnēnīnque mīnitō īñōmō edæ, Wængonguī weca quēwēnīnque Itota pongaingā ingampa, ante pōnēnīmīni beyæ botō Mæmpo adobaī mīnitō īmīnite waadete pōnengā ingampa. ²⁸ Botō edæ Mæmpocā weca quēwente inguipoga īñōmō pōnīmo inte nōwo pōni inguipoga quēwēnīnque wadæ godīnque Mæmpocā weca ocæ ěmænte goquīmo īmopa,” ante Itota apænecantapa.

²⁹ Tōmengā ěmīñænāni,

—Nōwo inguipoga quēwēnāni nāni cæbainō ante odōmonte apænedāmaī inte bitō edonque pōni apænebi ēñēmōnīpa. ³⁰ Bitō tōmānō ante ēñēmi īmīpa, ante nōwo ēñēmōnīpa. Īnīnque mōnitō, Æbānō ī, ante ēñencæte ante bitō imite ānāmaī īñōmōni bitō īñōmō do nē ēñēmi īmīpa. Mānōmaī beyæ mōnitō, Bitō Wængonguī weca quēwente pōnīmī inte nē ēñēmi īmīpa, ante do pōnēmōni īmōnīpa.

³¹ Ante āñōnāni Itota wæætē,

—Nōwo tæcæ pōnēmīni īmīnitawo. ³² Wantæyō bayedē īñōmō edæ nōwo pōni batīmpa. Māniñedē mīnitō botō īmote ěmō cæte panguīmæ panguīmæ wodīi wīnōnīnque tōmēmīni oncōnē go guīquīmīni īmīnīpa. Botō īmo adoboque ěmō cæte gomīni incæte botō īñæmpa wīī adoboque ongōmopa. Edæ botō Mæmpo botō tōnō godongāmæ ongongampa. ³³ Mīnitō īñōmō botō nempo quēwēmīni inte gānē pōnente quēwencāmīnīmpa, ante cædīnque botō mānīnō ante mīnitō īmīnite

apänetabopa. Ii inguipoga quëwëninque mīnitō caate wæcæmīnimpa. Incæte mīni wæwenguimāmo ante guīñēnāmaī iēdāni. Edæ inguipogaque ante nāni wēnæ wēnæ cædōnō ante Baa āninque botō godōmenque tæi emōnōmo inte nē gānā cægāimo imopa. Mānōmaīnō ante Itota tōmengā nānō emīñānāni inānite iinque apænecā ēñengadānimpa.

Itota Mæmpo ingante mōnō beyæ ante apænecampa

17 Itota mānōmaīnō ante iinque apænedinque oōnædē æmō adinque iīmaī apænecantapa. “Mæmpo ēñēmi. Bitō, Æbānō baquīī, ante bitō angāinō baī do batimpa. Botō edæ, Bitō Wēmo inōmo iñōmote bitō pōnō cæbi ate botō ñāō apāite baī botō emōnō iñōmō edonque pōnī bacæimpa, ante apænebopa. Mānōmaī cæbi adinque botō wæætē bitō beyæ pōnō cæbo ate bitō ñāō emōmāmo edonque pōnī bacæimpa. ²Bitō pædæ pōnōmi botō nē ængāināni inānite botō cōwē wantæpiyæ nāni quëwenguīnō ante godōmo æncædānimpa, ante bitō botō tōnō godongāmæ cæbi beyænque botō waodāni tōmānāni inānite nē āmo batabopa. ³Waodāni cōwē wantæpiyæ nāni wænāmaī quëwenguīnō ante iīmaī impa. Mæmpo, bitō adobique nāwā Wængonguī inōmi iñōmote tōmēnāni bitō imite ate baī pōnencædānimpa. Ayæ botō Itota Coditobo bitō nē da pōnongāimo iñōmote do adinque tōmēnāni pōnencædānimpa. Tōmēnāni mānōmaī nāni pōnēnō beyænque edæ cōwē wantæpiyæ nāni wænāmaī quëwenguimāmo edæ do ēadānipa,” ante Itota apænecantapa.

⁴Ayæ Mæmpo ingante godōmenque apænedinque, “Bitō, iīmaī cæe, ante bitō angāinō ante botō inguipoga quëwëninque do iinque cæbo beyæ bitō ñāō emōmāmo edonque pōnī bagatimpa. ⁵Wëēnēñedē pōnī inguipoga badōnāmaī iñedē bitō weca ongōninque botō ñāō emongāimo inte ñōwo bitō weca ocæ emænte pōmo adinque bitō pōnō cæbi ate botō adobo ñāō apāite baī emōmo ate edæ edonque pōnī acæimpa,” Mæmpo ingante apænecantapa.

⁶Ayæ, “Inguipoga quëwēnāni bitō quīnāni inānipa, ante bitō pædæ pōnōmi æninque botō wæætē, Wængonguī æcānō ingāā, ante tōmēnāni inānite odōmōmo ēñēnānitapa. Adodāni bitō quīnāni iñōnānite bitō tōmēnāni inānite pædæ pōnōmi æntabopa. Tōmēnāni bitō angāinō ante ēñente cædīnāni inānipa. ⁷Bitō pōnōmi æninque botō ewocagaincoo ante iīnāni iñōmō edæ, Mānīncoo tōmancoo edæ Mæmpocā pōnongā æninque Itota ewocacampa, ante ñōwo do ēñēnānipa. ⁸Edæ Mæmpo bitō pōnō apænebi botō ēñente ængāinō ante botō adodō ante edæ tōmēnāni inānite godō apænebo ēñēninque tōmēnāni do ænānitapa. Botō bitō weca quëwente pongāimo imopa, ante ēñēninque tōmēnāni ædæmō ēñēnānitapa. Ayæ, Bitō botō imote da pōnōmi nē pongāimo imopa, ante pōnēnānitapa,” ante Itota Mæmpocā ingante apænecantapa.

⁹Ayæ, “Mæmpo, botō tōmēnāni beyæ ante bitō imite apænebopa. Botō wīi inguipogaque quëwēnāni beyæ ante apænebopa. Wæætē edæ, Bitō nē pædæ pōnōmi botō ængāināni iñōmō edæ bitō quīnāni inānipa, ante botō tōmēnāni beyæ ante bitō imite apænebopa. ¹⁰Botō quīnāni tōmānāni bitō quīnāni inānipa. Ayæ bitō quīnāni tōmānāni botō quīnāni adobaī inānipa. Tōmēnāni cædāni beyænque botō ñāō emōmāmo edonque pōnī batimpa.”

¹¹Ante apænedinque Itota godōmenque apænecantapa. “Botō inguipoga iñōmō godōmenque ongōnāmaī incæboimpa. Wæætē bitō weca ocæ emænte ponguīmo imopa. Botō emīñānāni guiquēñē inguipoga iñōmō ayæ ongōnāni inānipa. Mæmpo

bitö nē Tæiyæ Waëmö inömi inte ëñëmi. Bitö ëmöwo bitö pönö pemongaïwo beyænque botö tæi piñænte nē ämo ïmopa. Ìnque mönatö ääwocaque bai ëwocate quëwëmöna bai mäninäni adobai ääwocaque bai ëwocate quëwencädänimpa, ante cädinque bitö tæi piñæmi inte tömënäni inänite wææ aacæbiimpa, ante bitö ïmite apænebopa. ¹²Mäninäni weca botö quëwëñedë botö ïñömö bitö ëmöwo bitö pönö pemongaïwo beyænque botö tömënäni inänite wææ aatabopa. Ayæ, Wë womönämai incädänimpa, ante adodäni inänite wææ gampotabopa. Ìnque tömënäni tömänäni wë womönämai inänipa. Önonque adocanque ïñömö æmæwo wë womonguënegä incæ tömengä ïñömö edæ Wængongui angä ëñente näni yewæmongainö bai ñowo ïnque baquinque ante edæ æmæwo wë womongantapa,” ante Itota Mæmpocä ingante apænecantapa.

¹³Ayæ, “Botö ñowo bitö weca ocæ ëmænte ponguïmo ïmopa. Tömënäni botö watapæ topämö tömämämö entawëninque quëwencädänimpa, ante botö mäninö ante inguipoga ayæ quëwëñedë apænebo ïmopa. ¹⁴Mæmpo, bitö angainö ante botö tömënäni inänite godö apænebo ëñënanitapa. Botö inguipogaque näni quëwencabo tönö adobo inämai ïmo bai tömënäni edæ adobai inguipogaque näni quëwencabo tönö adodäni inämai inäni adinque inguipogaque quëwënäni wæætë tömënäni inänite piñänitapa. ¹⁵Mæmpo ëñëmi. Bitö botö ëmiñænäni inänite, Minitö inguipoga ïñömö ayæ quëwënämai incæminimpa, ante ænte mäobi gocädänimpa, ante botö bitö ïmite apænedämai ïmopa. Wæætë, Wënæ awënë nē wiwa cædongä ïñömö tömënäni inänite, Oda cæcädänimpa, ante cæyongante bitö wææ aabi ate tömënäni wæætë oda cædämai incädänimpa, ante bitö ïmite apænebopa. ¹⁶Botö inguipogaque näni quëwencabo tönö adobo inämai ïmo bai tömënäni edæ adobai inguipogaque näni quëwencabo tönö adodäni inämai inänipa. ¹⁷Bitö änö ïñömö edæ näwangä ante impa. Ìnque bitö godö cæbi ate näwangä bitö änö beyænque tömënäni ïñömö tömëmi cædonque ante cädinque tæiyæ waëmö ëwocate quëwënäni incädänimpa, ante bitö ïmite apænebopa. ¹⁸Bitö botö ïmote inguipoga ïñömö bitö da pönömi pömo bai botö adobai tömënäni inänite inguipoga quëwënäni weca da godömo godänitapa. ¹⁹Tömënäni ïñömö bitö cædonque ante cädinque tæiyæ waëmö ëwocate quëwënäni incädänimpa, ante botö ïñömö edæ bitö cædonque ante Ao äninque, Botö nämä incæ tömënäni beyæ ante wænguïmo ïmopa,” ante Itota apænecantapa.

²⁰“Mæmpo ëñëmi. Botö wii botö ëmiñænänique beyæ ante bitö ïmite apænebopa. Wæætë tömënäni botö angainö ante apænedäni ëñente pönëninque wadäni nē wede pönenguinäni ïñönänite botö iinäni beyæ ante adobai bitö ïmite apænebopa. ²¹Mæmpo, Bitö ïmite botö entawëmo ïmo bai ayæ botö bitö nempo quëwëmo ïmo bai mäninäni tömänäni adobai ääwocaque bai ëwocate quëwëmainänipa, ante cæcæbiimpa, ante bitö ïmite apænebopa. Ayæ inguipoga quëwënäni ïñömö, Bitö botö ïmote da pönömi pongaïmo ïmopa, ante pönencädänimpa, ante cädinque bitö godö cæbi ate tömënäni mönatö nempo quëwencädänimpa, ante bitö ïmite apænebopa. ²²Bitö pönö cæbi beyænque botö ñäö bai entawëninque, Mönatö ääwocaque bai ëwocate quëwëmöna bai tömënäni adobai ääwocaque bai ëwocate quëwencädänimpa, ante botö ïñömö bitö pönönimämö botö ñäö entawëmämö tömënäni inänite adopämo godömo ænte entawënanipa. ²³Tömënäni ääwocaque bai ëwocate quëwencädänimpa, ante tömënäni botö ïmote entawënanipa. Ayæ botö bitö ïmite entawëmo ïmopa. Tömënäni mänömai ääwocaque bai ëwocädäni adinque

inguipoga quëwënäni iñömö, Bitö botö imote në da pönömi pongaïmo imopa, ante ëñencädänimpa, ante apänebopa. Ayä botö imote waadete pönengaïmi imi bai bitö tömënäni inänite adobaï waadete pönengaïmi imipa, ante ëñencädänimpa, ante apänebopa,” ante Mæmpocä ingante Itota apäñecantapa.

²⁴ Ayä, “Mæmpo, Bitö pædæ pönömi botö në ængainäni iñömö botö ñäö ëmömämo acädänimpa, ante botö, Tömënäni botö quëwëñömö adoyömö quëwencädänimpa, ante ainente wæbopa. Wëenëñedë pönï inguipoga badönämaï iñedë bitö iñömö edæ botö imote waadete pönëninge botö ñäö ëmömämo pönömi botö ængaimämo tömënäni adopämo acädänimpa, ante ainente wæbopa. ²⁵ Mæmpo në nõ cädömi imi ëñëmi. Inguipogaquë quëwënäni bitö imite wïi adinque pönëñämaï inäni incæte botö iñömö edæ bitö imite do ate pönëmo imopa. Botö ëmiñænäni iñömö, Bitö botö imote da pönömi në pongaïmo imopa, ante do ëñëñänitapa. ²⁶ Botö cæbo beyænque mäninäni iñömö, Bitö imite ate bai pönëñänitapa. Botö imote bitö waadete pönëno ante adodö waadete pönëno tömënäni mimönë entawente quëwencädänimpa, ante ayä, Tömënäni botö imote entawencädänimpa, ante botö ayä cæbo beyænque tömënäni iñömö, Bitö imite ate bai pönencädänimpa,” ante Itota Mæmpo ingante iinque apäñegacäimpa.

Itota ingante bæi ongonte ænte godänipa

(Mäateo 26.47-56; Mäadoco 14.43-50; Odoca 22.47-53)

18 Wængonguï ingante iinque apäñedinque Itota tömengä ëmiñænäni tönö wadæ godinque Quedodöo biyönæ æmäë wedeca godänitapa. Æmäë wedeca odibowæncodë näni ancodë i iinque Itota tömengä ëmiñænäni tönö mänincodë pö guidänitapa. ² Itota ingante në odömonguingä Codaa iñömö Itota tömengä ëmiñænäni tönö mänincodë wantæ iñö wantæ iñö gote ongönäni iinque Itota ingante në odömonguingä Codaa iñömö mänincodë do adingä inongäimpa. ³ Iinque tontadoidi adocaboque inänite æninque Codaa iñömö edæ täno beyænte adocodë pongantapa. Ayä, Wængonguï quï, ante në godönäni ñænænäni tönö Paditeoidi näni wææ wänönäni inänite Codaa nempo godönäni æningä inte tömengä tömënäni inänite tontadoidi tönö ænte mämongä pönänitapa. Pöninque tömënäni gonga ticaïnë næænte gongapæncade ticaïnë nææninque yaëmë næænte Codaa miñæ pönänitapa. ⁴ Itota nämä ante, Æbänö bate wæquimoo, ante tömää ëñëngongä inte awænë tao godinque tömënäni inänite,

—Æcänö ingante ante diqui diqui minte pöminii.

⁵ Ante añongä tömënäni wæætë,

—Itota Näatadeta në quëwëningä ingante ämönipa.

Änäni ëñëninque,

—Botö tömëmö imopa, ante Itota apäñecantapa.

Ayä në odömonguingä Codaa iñömö tömënäni weca a ongönongäimpa. ⁶ Itota iñömö, “Botö tömëmö imopa,” ante añongä tömënäni gä godinque onguipoga täe go wæænänitapa. ⁷ Tæ go wæænäni adinque tömengä adodö,

—Æcänö ingante ante diqui diqui minte pöminii.

Ante añongä tömënäni wæætë,

—Itota Näatadeta quëwëningä ingante ämönipa.

⁸ Änäni ëñëninque Itota wæætë,

—Botö tömömö imopa, ante do antabopa. Minitö iñömö botö imote ante diqui diqui minte pömīni bai mānināni inānite bai ongönāmaī iedāni.

⁹Itota Mæmpocā ingante do apænedinque, “Bitö edæ pönömi botö ængaināni inānite wææ aabo beyæ adocanque incæ wê womönāmaī inānitapa,” ante nānō angainō bai ñōwo iinque bacæimpa, ante mānōmaī angantapa. ¹⁰Timönö Pegodo iñömö nê yaēmê næængä inte pædæ guipote yaēmê æninque, Wængonguī qui, ante nê godongä ñænængä pōni inongä ingante nê cæcä ingante tæi pāninque tömëmonca inō wangö tamoncacantapa. Pegodo nānō nê wangö tamoncadingä ëmöwo Mäadoco ëmongä inongäimpa. ¹¹Itota wæætê Pegodo ingante,

—Bitö yaēmê adodö da wêe, æninque, Botö wæwenguimāmo ante botö Mæmpo pönongä ænimo inte wæwenguënëmo imopa, angacäimpa.

Itota ingante bai ongöinque Änato weca ænte godāni

(Mäateo 26.57-58; Mäadoco 14.53-54; Odoca 22.54)

¹²Ayæ odömāno tontadoidi tönö tömënāni awënë ayæ oodeoidi awënëidi tönö Itota ingante bai ongöinque ænānitapa. Äninque tömengä ingante goto wimpote cædānitapa. ¹³Ayæ adodāni Änato nānōwāa Caiapato weca Itota ingante ænte māo godānitapa. Edæ Caiapato iñömö, Wængonguī qui, ante nê godongä ñænængä pōni inongä māniī wadepo iñonte inongäimpa. ¹⁴Caiapato wëenëñedë oodeoidi awënëidi inānite iūmaī ante nê änogä inongäimpa. Mönö waocabo beyæ ante adocanque onguñængä wængä iinque waa imaimpa.

Pegodo incæ, Dicæ abogaa, angampa

(Mäateo 26.69-70; Mäadoco 14.66-68; Odoca 22.55-57)

¹⁵Itota nānō ëmiñængä wacä tönö Timönö Pegodo iñömö tömöna iñömö Itota ingante tee empo godatapa. Māningä iñömö Itota nānō ëmiñængä iñömö, Wængonguī qui, ante nê godongä ñænængä pōni nānō nê adingä inongäimpa. Iinque Itota tönö pōninque tömengä Wængonguī ingante nê godongä ñænængä pōni inongä oncö yacömōñāa iñömö pō guicantapa. ¹⁶Pegodo guiquënë odemö yabæ inō a ongönongäimpa. Wacä Itota miñæ nê gocä iñömö, Wængonguī qui, ante nê godongä ñænængä pōni inongä nānō nê adingä iñömö tömengä ocæ ëmænte pōninque baquécä odemö nê wææ aacä ingante apænecantapa. Pegodo ingante ämi guicæe, angä ëñëninque baquécä wi ænecä ate tömengä Pegodo ingante ænte manguicä guicantapa. ¹⁷Manguicä guiyongä baquécä odemö nê wææ aacä iñömö Pegodo ingante,

—Bitö adobai māningä onguñængä nānō nê ëmiñænömi imipa töö.

Äñongä tömengä wæætê,

—Botö wabo imopa, angantapa.

¹⁸Yoguite ingatimpa. Ayæ nê cædönāni tönö oodeoidi awënëidi wææ wānönāni gongapamö ootoqui, ante nāni tadōni gäänë adiyæ ongonte ootodönānimpa. Pegodo adobai tömënāni tönö godongāmæ adiyæ ongonte ootocantapa.

Në godongä ñænængä Itota ingante angampa

(Mäateo 26.59-66; Mäadoco 14.55-64; Odoca 22.66-71)

¹⁹ Mäniñedë Änato iñömö, Wængongui qui, ante në godongä ñænængä pöni iñömö Itota ingante, Bitö në emiñænäni diyä, änogäimpa. Ayä Itota nänö odömonte apänegainö ante, Æbänö i, ante tömengä ingante adobaï angantapa. ²⁰ Itota wæätë,

—Waadäni ëñëñönänite botö edonque pöni apänebo ëñëñänitapa. Botö cöwë mïnitö odömöincönë incæ Wængongui oncö ñænæncönë incæ oodeoidi tömänäni nani pöincönë pö guiddinque odömonte apänebo ëñëñänitapa. Botö cöwë awëmö apänedämaï intabopa. ²¹ Bitö botö imote, Æbänö i, ante quïnante ämii. Botö imote në ëñëñänäni inänite ämi ëñente apänedäni ëñencæbiimpa. Edæ mäninäni ædæmö ëñëñäni inänipa.

²² Mänömainö angä ëñëñinque wææ wänongä adocanque iñömö Itota gäänë ongöñinque tömengä ingante tæi tamöñinque apäñecä,

—Wængongui qui, ante në godongä ñænængä pöni inongä ingante ædö cæte mänömaï ante wæätë änewëë töö.

²³ Ante äñongä Itota wæätë,

—Botö wænæ wænæ äñimo imo bai bitö botö wænæ wænæ äñinö ante, Æbänö i, ante apänebi ëñëmoe. Wæätë edæ näwangä ante apänebo ininque bitö quïnante botö imote tæi tamömipæä, angantapa.

²⁴ Ayä, Wængongui qui, ante në godongä ñænængä pöni Caiapato weca gocæcäimpa, ante Änato iñömö Itota ingante ayä goto wimpoingä iñongante angä ëñëñinque tömengä ingante ænte gogadänimpa.

Pegodo incæ, Dicæ abogaa, wæätë angampa

(Mäateo 26.71-75; Mäadoco 14.69-72; Odoca 22.58-62)

²⁵ Timönö Pegodo ayä adiyä ootoyongante wadäni,

—Bitö tömengä emiñænömi adobaï imipa töö.

Änäni ëñëñinque tömengä,

—Wabo imopa, angantapa.

²⁶ Wængongui qui, ante në godongä ñænængä pöni inongä ingante në cädäni iñönänite adocanque iñömö Pegodo nänö në wangö tamoncadingä guiddengä inongäimpa. Tömengä iñömö Pegodo ingante,

—Bitö tömengä miñä odibowæncodë ongöñedë bitö imi atabopa. Bitö wii imitawo.

²⁷ Ante äñongä Pegodo wæätë, Wabo imopa, ante tæcæ änewëñongä tawadiya dobæ pegatimpa.

Pidato weca Itota ongongä

(Mäateo 27.1-2; Mäadoco 15.1-5; Odoca 23.1-5)

²⁸ Tæcæ ñäö bayonte Itota ayä Caiapato weca ongöñongante oodeoidi iñömö, Mönö tömengä ingante odömäno gobedönadodo awënë Pidato weca ænte gocäimpa, ante cædinque awënë oncö boyä mäodäni gocantapa. Incæte tömëñäni dodäni nani wææ angainö beyä ante guiñente wædinque, Pidato oncönë guite bai mönitö mïmö wentamö ewocamöni incædömönimpa. Iñæmpa mänömaï cæmöni ininque mönitö Patowa mönö æëmæ cæyedë cængui ædö cæte cænguimöñii, ante

wædinque guidāmaī inānitapa. ²⁹ Īninqe Pidato tōmēnāni weca oncō boyæ taod-
inque tōmēnāni inānite,

—Īngā onguīnāngā īñōmō quīnō wēnæ wēnæ cæcantawo.

³⁰ Āñongā tōmēnāni wæætē,

—Māningā wīī wēnæ wēnæ cæcā inte baī mōnitō tōmengā ingante wīī ænte māmō
pædæ godōmōni æncædōmiimpa.

³¹ Ānāni ēñēninque Pidato,

—Mīnitō tōmēmīni tōmengā ingante ænte godinque mīni wææ yewæmongainō
baī ante cædinque, Tōmengā ingante pangæimpa, ante apænte ædāni.

Āñongā oodeoidi awēnēidi,

—Īnæmpa mīnitō wææ āmīni īñōmīni mōnitō cōwē tacamōni wænāni mōni cæ-
gāinō baī ædō cæte æcāmenque ingante wænōmōni wænguingāā, ante wædānitapa.

³² Odōmānoidi māniñedē wēnæ wēnæ cædāni inānite awāa tōō godōmænte
timpodinque wææ tiwadinque godō wænōnāni inōnānimpa. Īninqe odōmānoidi
inānite pædæ godōninque oodeoidi wæætē Itota, Æbānō cædāni wænguimoo, ante
do nānō angainō baī nōwo iinque baquinque cædānitapa. ³³ Māninō ānāni ēñēn-
inque Pidato wæætē oncōnē ñænæncōnē guidinque Itota ingante āñecā pongā ad-
inque, Pidato,

—Bitō oodeoidi Awēnē Odeyebi imitawo.

³⁴ Angā ēñente Itota wæætē,

—Bitō nāmā pōnēninque apænebitawo. Wabānō wacā botō imotedō ante bitō
imite apænecā ēñēmitawo.

³⁵ Ante āñongā Pidato,

—Botō dicæ oodeobo imogaa. Tōmēmi guidēnāni tōnō Wængonguī quī, ante nē
godōnāni ñænēnāni īñōmō bitō imite māmō pædæ pōnōnāni æntabopa tōō. Bitō
quīnō wēnæ wēnæ cæbitawo.

³⁶ Āñongante Itota wæætē apænedinque,

—Wīī inguipoga quēwēnāni ānāni beyæ botō Awēnē Odeyebo nē ingāimo imopa.
Botō inguipoga quēwēnāni Awēnē Odeyebo inte nē āmo imo baī botō nempo
quēwēnāni īñōmō botō imote, Bæi ongonte ænte godāmaī incædānimpa, ante wææ
cædinque oodeoidi tōnō guēa wæætedō wæætē cæcædōnānimpa. Incæte wīī ingui-
poga quēwēnāni ānāni beyæ wæætē edæ wayōmō quēwengāimo inte botō tōmēmo
nāmā incæ Awēnē Odeyebo nē ingāimo imopa.

³⁷ Mānōmainō ante Itota apænecā iinque Pidato,

—Īnæmpa Awēnē Odeyebi bitō imitawo.

Āñongante Itota wæætē,

—Bitō tōmēmi ānō baī botō Awēnē Odeyebo inōmoimpa. Nāwangā āmipa. Botō
īñōmō Wængonguī nānō angainō ante, Nāwangā impa, ante inguipoga quēwēnāni
inānite apænecæte ante edæ māniī beyænque ante inguipoga īñōmō pō ēñagāimo
imopa. Wængonguī nāwangā ante nānō angainō ante Ao ante ēñente nē cædāni
īñōmō edæ tōmēnāni tōmānāni botō imote nē ēñēnāni inānipa, angantapa.

³⁸ Āñongante Pidato,

—Æcāmē nāwangā angāā, angacāimpa.

Itota wæncæcäimpa, änanipa

(Mäateo 27.15-31; Mäadoco 15.6-20; Odoco 23.13-25)

Pidato mänömaï apænedinque wæætë oodeoidi weca oncö boyæ taodinque apænecantapa.

—İngä quinä wænæ wænæ cæcä ingampa, ante ëñenämaï imopa. İninqe botö dicæ tömengä ingante apænte angüimo imogaa. ³⁹Wadepo iñö wadepo iñö Patowa mîni ææmæ cæönæ mînitö, Ædänidö tee mönete ongönäni, ante pönëninque adocanque ëmöwo ante botö imote apænedinque, İngä ingante ñimpo cæbi goqingä, ante cöwë äminipa. İninqe adocanque ingante, İngä iñömö mîni apænedongä ingampa, ante botö tömengä ingante ñimpo cæbo ate ænte gomîni inöminipa. İninqe ñöwo diyæ. Mînitö, Oodeomöni Odeye iñongante pönö ñimpo cæbi abæ tawænte goguinga, ämînitawo.

⁴⁰Äñongante tömënäni yedæ tededinque,

—Mäningä ingante dicæ ämöniyaa. Wæætë Badabato ingante ñimpo cæbi gocæe, ante tedewengadänimpa.

Badabato wëñëñedë wadäni tönö, Odömäno tæiyæ awënë ingante wido cæcæimpa, ante cædingä inongäimpa.

19 Ayæ Pidato angä ate Itota ingante bæi ongonte mäo æmontaiya tæi tæi pänänitapa. ²Tontadoidi daa mongæmenca æninqe que que cædinque, Awënë poganta, ante pönö da wencadänitapa. Awënë weocoo wëñacæbiimpa, ante badete tote bæi cædinque Itota ingante opatawæ ëmoncoo pönö daga wëñadänitapa.

³Daga wëñadinque tömënäni wæætë wæætë tömengä weca ponte äninqe,

—Badogaa, bitö oodeo awënë odeyebi imipææ.

Ante badete todinque tömengä ingante tæi tamönänitapa.

⁴Pidato tömënäni weca oncö boyæ adopoque ayæ tadinque oodeoidi inänite apænedinque,

—İngä iñömö æbänö cæcantawo, ante ëñencæte ante cæbo ate tömengä wænæ wænæ nänö cædö ante dicæ abogaa. Mînitö mänömainö ante ëñencæminimpa, ante botö tömengä ingante mînitö weca ænte mantabo tacä aedäni, angantapa.

⁵Itota daa mongæmenca poganta encadinque opatawæ ëmoncoo mongænte tayongä Pidato tömënäni inänite,

—İngä onguïñängä ongongä aedäni.

⁶Tömengä ingante adinque, Wængongui quï, ante në godönäni ñænænäni tönö adodäni inänite në wææ wänönäni iñömö yedæ tedewëninque,

—Awæ ñænquedimæ cæte ämi wänönäni wængæe. Ämi wänönäni wængæe.

Ante ancaa änewënäni ëñëninque Pidato wæætë,

—Mînitö iñæmpa tömengä ingante æninqe awæ ñænquedimæ cæte wænöminî wængæe. Botö guiquënë iingä wænæ wænæ nänö cædö ante dicæ abogaa.

⁷Pidato äñongä oodeoidi wæætë iïmaï tedewënanitapa.

—Mönitö wææ yewæmongainö ante ëñente quëwëmöni imönipa. İngä iñömö edæ nämä ante edæ, Wængongui Wëmo inömo imopa, ante cædinque edæ mäninö möni wææ yewæmongainö ante ëñenämaï cæcampa. Mänömaï ëñenämaï inte cæcä beyæ tömengä në wænguënegä ingampa.

⁸Mänömainö änäni ëñëninque Pidato godömenque guïñente wædinque, ⁹oncönë ñænæncönë adodö pö guidinque Itota ingante,

—Bitö ædönö quëwente pömi imii.

Ante añongä Itota guiqüënë pæ wëenecä. ¹⁰ Adinque Pidato tömengä ingante,

—Bitö quĩnante botö imo tededämaĩ imii. Botö nämä nē tæĩ piñante ämo inömo inte ämo ininque ñimpo cædäni gobaimipa. Botö wadö ante ämo ininque bitö imite do awæ ñænquedimæ cæte wænönäni wæmaimipa, ante ëñenämaĩ imitawo.

¹¹ Añongante Itota wæætë,

—Wængonguĩ bitö tæĩ piñante ämämo ante godönämaĩ ingä bai bitö tömëmi tæĩ ämi imi diyæ botö imote anguimiyaa. Mänömaĩ beyæ bitö imite, Wænömi wæncæcäimpa, ante botö imote nē pædæ pönöningä inömö edæ godömenque wænæ wænæ cæcä ingampa, ante apænecantapa.

¹² Mänömainö angä ëñëninque Pidato, Æbänö ñimpo cæbo goquingää, ante cædongäimpa. Cæyongä oodeoidi wæætë godömenque yedæ änönänimpa,

—Bitö mäningä ingante ñimpo cæbi bai bitö odömäno tæiyæ awënë Tetædo æmigo dicæ imiyaa. Æcämenque inömö edæ, Botö awënë inömoimpa, ante nē angä inte tömengä inömö Tetædo ingante nē piinongä ingampa.

¹³ Mäninö änäni ëñëninque Pidato inömö, Itota ingante ænte tao godinque awënë nänö apænte äimpaa gote tæe contacantapa. Pidato nänö tæe contayömö inömö, Dica-coo ayadi bai näni caayömö impa, ante näni añömö ininque ebedeo tededö, Gabata, näni añömö inönimpa. ¹⁴ Patowa näni ææmæ cæyedë iinque bayö oodeoidi, ñimö ate guëmanguionæ inguimpa, ante mönö ñöwoönæque cæcæimpa, ante näni cæönæ inönimpa. Iñönæ wodo tæcæ bæcä bayonte Pidato oodeoidi inänite,

—Iingä inömö munitö Odeye inongä ingampa.

¹⁵ Añongante yedæ äninque tömënäni,

—Tömengä ingante wænömi wængæe. Tömengä ingante wænömi wængæe. Awäa timpote ämi wænönäni wængæe.

Ante ancaa änewëñönäni Pidato wæætë,

—Botö inömö munitö Odeye inongante awäa timpote ämo wænönäni wængæe, ante änewëmunitawo.

Angä ëñëninque Wængonguĩ quĩ, ante godönäni ñænänäni inömö,

—Tetædoque incæ mönitö awënë odeye inongä apa cæbii, änewëñönänimpa.

¹⁶ Ancaa änewëñönäni Pidato, Awäa ämo timpote wænömüni wængæedäni, ante Itota ingante tontadoidi inänite pædæ godongä ængadänimpa. Ayæ tömënäni Itota ingante ænte gogadänimpa.

Itota ingante awäa timpodäni wængäimpa

(*Mäateo 27.32-44; Mäadoco 15.21-32; Odoca 23.26-43*)

¹⁷ Itota incæ tömengä timpoquiwæ æninque mongænte taodique “Ocatainö” mönö añömö pongantapa. Mäniñömö ante ebedeo tededö, Godogota, näni añömö impa. ¹⁸ Mäniñömö pöñongante tömënäni awæ ñænquedimæ cædinque tömengä ingante töö godonte timpodinque wææ tiwadinque ængæ gantidënäni ongongantapa. Ayæ wada inate tömengä weca æmatæ inö æmatæ inö mämö adobai cæte ængæ gantidënäni wægöñöna Itota tæcæguedë wægongä ingantapa. ¹⁹ Pidato angä yewämointa, Näni ëñenguinta, ante yewæmonte æninque ñænquedimæ iwäa wo cædänitapa. “Itota Näatadeta quëwëningä oodeoidi Awënë Odeye inongä ingampa,” ante yewæmonte wo cæte ongongatimpa. ²⁰ Itota ingante näni timpodinömö eyequei i ininque oodeoidi nangui inäni tömënäni näni quëwëñömö ta pöninque Pidatoidi

näni yewæmöninta adänitapa. Mäninta iñömö ebedeo tededö datii tededö guidiego tededö ante yewæmonte ingatimpa. ²¹ Oodeoidi beyæ ante, Wængongui qui, ante nê godönäni ñænänäni iñömö Pidato weca godinque tömengä ingante,

—Bitö, “Oodeoidi Awënë Odeye inongampa,” ante yewæmönämaï inguënë quëwëë. Wæætë tömengä nämä nänö angainö bai, “Botö oodeoidi Awënë Odeyebo inömoimpa, ante nê änewëningä ingampa,” ante yewæmöe.

²² Ante änewëñönanäni Pidato wæætë,

—Botö yewæmöninö ante yewæmönimo inte botö wæætë wadö ante yewæmönämaï incæboimpa.

²³ Tontadoidi iñömö tömengä ingante awäa timpote ængæ gantidënanäni wægöñongä tömënanäni tömengä weocoo inï æninque mencooga go mencooga cönöninque adocanque adocooque adocanque adocooque æninque tömänäni ænönäninpa. Täno mongæincoo guiquënë ayæ öñoncoopa. Mänincoo iñömö bæbængapaa badönämaï incoo tömancoo adocooque da wëñaque badöi inimpa. ²⁴ Adocooque wänä ñænämaï ingäimpa, ante adodäni godongämæ tededinque,

—Æcänö quince nö ta adinque tömengä mänincoo æncæcäimpa, ante wææntodönänitapa.

Edæ Wængongui angä ëñente dodäni iïmaï ante näni yewæmongainö bai ñöwo iinque baquinque tontadoidi mänömaï cädänitapa. “Edæ botö weocoo inï ö æninque tömënanäni näni caboque wacä ingä wacä ingä nënempodänitapa. Ayæ, Æcänö quince nö ta adinque tömengä mänincoo æncæcäimpa, ante wææntodöninque ænänitapa,” ante näni yewæmongainö bai tontadoidi ñöwo cädänitapa.

²⁵ Itota ingä näni ængæ gantidëñömö tömengä wäänä tönö wäänä tönñäcä nana caya ayæ Codeopato nänöogængä Mäadiya tönö wacä Mäadiya Mäagadadënä mänñömö pöninque eyequei a ongönänitapa. ²⁶ Itota iñömö tömengä wäänä inante acantapa. Ayæ botö tömengä miñä nê godimo iñömö tömengä nänö nê waadebo inömo inte tömënanä weca ongömo adinque Itota tömengä wäänä inante,

—Badä ëñëmi. Mäningä iñömö minö wengä bacæcäimpa.

²⁷ Äninque tömengä ëmiñænimo iñömote,

—Botö ëmiñænimi ëñëmi, Mäninä iñömö botö badä inçæ bitö badä bacædäimpa, angacäimpa.

Iinque botö Itota nänö nê ëmiñænimo inte tömengä nänö änöñedë täno ænte mämömo pöninque tömengä wäänä iñömö botö oncönë cöwë owodönäimpa.

Itota inçæ wængäimpa

(*Mäateo 27.45-56; Mäadoco 15.33-41; Odoca 23.44-49*)

²⁸ Quinö bacäimpa, ante ñöwo iinque batimpa, ante nê ëñëngö inte Itota iñömö edæ, Wængongui angä ëñente näni yewæmongainö bai ñöwo iinque bacäimpa, ante cædinque,

—Botö gæwænte awædö, ante apænecantapa.

²⁹ Adoyömö biinömæ näni ämä bai wædænque godonte näni ænimæ owætadë engate ongö adinque tömënanäni dayömö bai æninque mänimænë pædæ guidonte aa beyonte wëä tadonte æninque iitopowænca näni äwænca ongontoca goto wencadodinque Itota önöne pædæ æænö pæ mänänitapa. ³⁰ Pæ männönäni Itota oo guëmante bedinque,

—Ñöwo iinque batimpa.

Ante apænedinque tōmengä ocabo ædæ wææncadinque tōmengä önōwoca wadæ goyōwoca do wængäimpa.

Itota betagonta inō tontado boo täenongä

³¹ Ìimō ate, Mönō guēmanguïönæ iñōmō Patowa inguiönæ beyæ godōmenque waa eönæpa, ante oodeoidi, Nōwoönæque cæcæimpa, ante nāni cæönæ inimpa. Oodeoidi awënëidi, Awāa nē ongönāni baō māniwāa guēmanguïönæ ongönāmai incädänimpa, ante Pidato weca godinque tōmengä ingante, Ìināni nāni timpodiwāa nē ongönāni quingæ wæncädänimpa, ante cædinque bitō tōmēnāni önōmēnē bamē āmi wadāni taa mænāni do wæncädänimpa. Ayæ tōmēnāni baō o togænte pædæ wæænonte āmi ænānie, änānitapa. ³² Māniū beyæ tontadoidi pōninque Itota weca tāno nāni nē ængæ gantidēningä önōmēnē bamē taa mæninque edæ ayæ nāni nē timpodingä wægongä önōmēnē bamē taa mænānitapa. ³³ Taa mæninque Itota weca pōninque tōmengä do wængäi adinque tōmengä önōmēnē taa mænāmai inönänimpa.

³⁴ Wæætē tontado adocanque Itota betagonta inō boo täenōnongä wepæ tönō æpæ guī gotimpa. ³⁵ Botō māninō bayonte nē adīmo inte, Æbānō nāwangä batimpa, ante nō apænebopa. Ayæ, Botō änō ante nāwangä impa, ante do ēñēmopa. Minitō adobai ēñente pōnencæminimpa, ante apænebopa. ³⁶ Edæ, “Tōmengä bamē adomenque incæ taa mænte wädāmai incæcäimpa,” ante Wængonguī angä ēñente nāni yewæ-mongainō bai bacæimpa, ante mænōmai batimpa. ³⁷ Ayæ edæ, “Waadāni nāni nē boo täenōningä ingante aquināni inānīpa,” ante Wængonguī angä ēñente wataa nāni yewæmongainō bai iinque bacæimpa, ante mænōmai batimpa.

Itota wodi baō inī mǎo daga wēnānīpa

(Māateo 27.57-61; Māadoco 15.42-47; Odoca 23.50-56)

³⁸ Ayæ ate Adīmatea quēwengä Ootee iñōmō oodeoidi awënëidi inānite guñente awædō, ante awēmō Itota emiñæningä inongäimpa. Tōmengä iñōmō Pidato Awënë ingante, Itota wodi baō pōnōmi ænte wēmoe, angantapa. Pidato Ao angä ēñēn- inque Ootee do pōninque Itota wodi baō timpodiwāa ongōñongante o togænte pædæ wæænonte ængantapa. ³⁹ Ayæ Niicodemō wēnēñedē Itota weca woyowotæ ēñacæ nē pōningä iñōmō Ootee miñæ pongantapa. Tōmengä müidamō nāni änōmō nanguī tī nāmō tönō aadoemō nāni änōmō nanguī oguī wamō tönō adoyōmō nāni wempo cædīmō todēinta quido ganca ænte pongantapa. ⁴⁰ Ootee tönō Niicodemō iñōmō Itota wodi baō æninque ninocoo nāni ancoo guiancoo incæ doyancoo mānincoo oguī wamō nāna ænte pōnimō ænte wāne cædedatapa. Ayæ oodeoidi daga wencæte ante nāni cægai bai adobai cædinque tōmēna nāna wāne cædincoo inte tōmengä baō wini wini cægadäimpa. ⁴¹ Itota ingante nāni timpodiiñōmō eyequei gōnea inimpa. Adodea iñōmō miintatodē nāni ææ wodiñōmō önontatoque inimpa. ⁴² Ìimō ate guēmanguïönæ inguimpā, ante oodeoidi, Nōwoönæque cæcæimpa, ante nāni cæönæ impa, ante beyæ, Ontato eyequei impa, ante tōmēnāni Itota wodi baō māniñōmō daga wengadänimpa.

Itota nē wæningä incæ ñäni ömæmonte quëwengä

(Mäateo 28.1-10; Mäadoco 16.1-8; Odoca 24.1-12)

20 Oodeoidi guëmanguïönæ Tabado go ate mönö Dominco tæcæ ooque pönente bayedë Mäadiya Mäagadadënä Itota wodido ponte ayongä dicabo ontato tee mönocæte ante ñäni da pæñænınca incæ do wëä godö concaei intapa. ² Botö Itota nänö nē waadedimo tönö Timönö Pegodo iñömö Itota miñæ möna nē godincaya iñömönate Mäadiya Mäagadadënä wæætë, Mänömaï impa, ante adinque mönatö weca pogodo ponte apæncantapa,

—Awënë Itota wodi baö ontatodë öñöñongante ænte taodinqe ædönö mäo ñö cædäni, ante ëñënamäi imönipa.

³ Ante apæneyongä Pegodo tönö botö Itota miñæ möna nē godincaya iñömö tömengä wodido quingæ gote pogodo pontamönapa. ⁴ Guëa pogodo gomöna incæte tömengä ëmiñænimo botonque quingæ tömengä wodido täno pontabopa. Pegodo ayæ pongantapa. ⁵ Mäniñömö täno pöninqe ædæ wæænte guite ayömo iñäna näna wini caadincocoque öñö abo incæte guidämaï intabopa. ⁶ Timönö Pegodo botö miñæ ayæ nē pöningä Itota wodido ontatodë ponte wäänë guicantapa. Wäänë guiyongante doyæncocoque iñäna näna wini caadincocoque mäniñömö öñö acantapa. ⁷ Ayæ Itota wodi ocabo näna ñäni cæcadincoo adobaï öñö acantapa. Mäincoo doyæncoco tönö wiï adoyömö ñönonte intapa. Wæætë iincoo nää wënente nänënë ñö cæte öñö acantapa. ⁸ Iinque botö tömengä wodido ontatodë täno nē pönimo incæte ñöwo tæcæ adobaï wäänë guitabopa. Guite ayömo, Itota nänö öñöniñömö æbanö i, ante adinque, Tömengä ñäni ömæmonte quëwengä ingampa, ante pönentabopa. ⁹ Edæ Wængonguï angä ëñente yewæmöninqe dodäni, Mönö Codito iñömö do wæningä incæ ñäni ömæmonte quëwenguënegä incæcäimpa, ante mönatö mäniñedë ayæ ëñënamäi inömönaimpa. ¹⁰ Ayæ mönatö tömengä miñæ nē godimöna iñömö wadæ godinqe tömëmöna oncönë ocæ ëmænte gotamönapa.

Itota iñömö Mäadiya Mäagadadënä weca pongä

(Mäadoco 16.9-11)

¹¹ Mäadiya guiquënë Itota wodido ontatodë yabæ inö a ongonde wædongäimpa. Mänömaï wædinque tömengä, Abote, ante ædæ wæænte guite ¹² adinque Wængonguï anquedoda näämæntacoo mongäna inte Itota wodi baö öñöniñömö tæ contada ina acantapa. Adocanque Itota wodi ocabo öñöniñömö tæ contayongä wacä Itota wodi önöwa öñöniñömö tæ contate ongongä acantapa. ¹³ Tömëna iñömö tömengä ingante,

—Onquiyæmi, minö quinante wæmintawo.

Äna ëñëninque tömengä wæætë,

—Botö Awënë wodi baö ini ö ænte godäni awædö. Ædönö mäo ñö cædäni, ante ëñënamäi wæbopa.

¹⁴ Mäninö äninque Mäadiya dadi ëmænte ayongä Itota mäniñömö a ongongä adinque Itota incæcä tömengä ëñënamäi ingantapa. ¹⁵ Itota iñömö,

Minö quinante wæmintawo. Æcänö ingante ante diqui diqui mimintawo.

Ante angä ëñëninque Mäadiya, Iingä iñömö wabanö gönea ömæ wite nē aacä ingampa, ante önöwënenque pönëninque,

—Ēñemi, bitō tōmengä wodi baō inī wayōmō ænte mäobi inte bai ædönō gote ñō cæbitapa, ante apænebi ēñemoe. Apænebi ēñeninque botō tōmengä wodi baō do gote æmaimopa.

¹⁶ Āñongante Itota tōmengä ingante,

—Mäadiya, angantapa.

Angä ēñeninque tōmengä weca dadi emænte ebedeo tededō äninque,

—Adabōni, angantapa. Mäninō mōnō tededō, “Awënë nē Odōmōmi imi,” ante impa.

¹⁷ Itota inñömō,

—Edæ botō ayæ botō Mæmpo weca ocæ emænte godāmaï imopa, ante adinque minō botō imo pæ mänāmaï iedä, angantapa. Wæætē minō botō tōniñadāni weca godinque tōmēnāni inānite iīmaï apænebi ēñencädānimpa. Botō ñōwo botō Mæmpo weca ocæ emænte goquimo imopa. Tōmengä inñömō minitō Mæmpo adobaï inongampa. Botō ñōwo botō Wængonguï weca ocæ emænte goquimo imopa. Tōmengä inñömō minitō Wængonguï adobaï inongampa, angantapa.

¹⁸ Itota angä ate Mäadiya Mäagadadēnā inñömō Itota nānō nē emiñænīnāni weca pōninque, Awënë Itota ingante atabopa, äninque, Tōmengä iīmainō ante apænecä ēñentabopa, ante tōmēnāni inānite māo apænegacäimpa.

Itota inñömō tōmengä emiñænīnāni weca pongä

(Mäateo 28.16-20; Mäadoco 16.14-18; Odoca 24.36-49)

¹⁹ Guēmanguïönæ go ate iimō ate wēmō bayō tōmengä emiñænīnāni adoyōmō pōninque, Oodeoidi awënëidi inānite ancai guiñente awædō, ante odemō tee mōnete ongōnānitapa. Itota tōmēnāni weca pō guiite tæcæguedē a ongōninque,

—Guiñēnāmaï inte gänē pōnencæminimpa, angantapa.

²⁰ Mäninō angä ate tōmengä onompo odōmōninque tōmengä betagonta odōmongä adānitapa. Ininque mōnō Awënë ingante adinque tōmengä emiñænīnāni nangui watapæ todānitapa. ²¹ Itota wæætē adodō,

—Guiñēnāmaï inte gänē pōnencæminimpa, angantapa. Botō Mæmpo inñömō botō imote nānō da pōnongaïmo imo bai botō adobaï minitō iminīte da godōmo goquimīni iminīpa.

²² Ante apænedinque tōmēnāni baonga woo òngate apænecä,

—Botō ñōwo pōnī minitonga Wængonguï Tæiyæ Waēmō Öñowoca ingante pōnō pōnōmo æedāni. ²³ Nē wēnæ wēnæ cæcä ingante adinque minitō tōmengä ingante godō ñimpo cæminī ininque Wængonguï adobaï tōmengä ingante godō ñimpo cæcä quēwēmaingampa. Minitō wæætē nē wēnæ wēnæ cæcä ingante godō ñimpo cädāmaï iminī ininque Wængonguï adobaï cädāmaï inte tōmengä ingante pōnō ñimpo cädāmaï imaingampa.

Itota ñāni òmæmonte nē quēwengä ingante Tōmato acä

²⁴ Itota emiñænīnāni adoyōmō a ongōñōnāni tōmengä pō guiite tōmēnāni weca tæcæguedē a ongōñongä tōmengä emiñæningä adocanque Tōmato mēwoga emongä Äancadēnaque inñömō dæ angampa. ²⁵ Ayæ ate Itota nānō nē emiñænīnāni wadāni inñömō,

—Mōnō Awënë ingante atamōnīpa, ante Tōmato ingante apænedāni ēñeninque tōmengä wæætē,

Botö iñömö tömengä önönempo nani daagö timpodiiñömö, Æyömönö empocä, ante adinque önongompoca gampodinque ayä tömengä betagonta inö nani tapa täenonte codiñömö botö tömëmo önongompoca gampote ate pönëmaï wädö, angantapa.

²⁶ Wacä témäna go ate Itota ëmiñæniniñäni wæätë oncönë adoyömö pö guiite a ongöñönäni Tömato tömënäni tönö godongämä pö guiite a ongongantapa. Odemö tee mönete ongö incæte Itota iñontobä pö guiite tömënäni weca tæcæguedë a ongöñinque,

—Guiñënämaï inte gänë pönencæminimpa, angantapa.

²⁷ Ayä Tömato ingante,

—Bitö tömëmi önongompoca pædæ pompodique botö önompö ae. Pædæ guiipote botö betagonta inö gampoe. Ayä, Wabänö incædö, ante änämaï incæbiimpa. Wæätë pönëe.

²⁸ Ante äñongä Tömato,

—Botö Awënë inömi imipa. Ayä adobaï botö Wængongui inömi imipa, angantapa.

²⁹ Ayä Itota tömengä ingante,

—Botö imote ate pönëmi imipa. Wæätë në adämaï inäni incæ botö imote pönënäni ininque tömënäni nani toquinque ingäiimpa, angacäiimpa.

Wäö nänö yewæmongainta quïnante yewæmongacäi

³⁰ Tömengä ëmiñæniniñäni weca Itota, Æñencædänimpa, ante wadö wadö cædinque tömengä nänö bamönengä ayä godömenque nanguï pönï cægacäiimpa. Botö iñömö iintaa yewæmöninque mäninö tömengä nänö cægainö ante wiï tömää yewæmontabopa. ³¹ Wæätë mäninö ante yewæmöninque botö, Itota mönö Codito inongäiimpa, ante ayä, Tömengä Wængongui Wengä inongä ingampa, ante mïnitö pönencæminimpa, ante yewæmontabopa. Edæ tömengä ëmöwo beyænque mïnitö mänömainö ante pönëninque cöwë wänämaï quëwencæminimpa, ante botö iinta yewæmömopa.

Itota tömengä ëmiñæniniñäni 7 ganca inäni weca pongä

21 Ayä ate tömengä ëmiñæniniñäni Tibediapä nani ämä yæwedeca ëmönaiboga ongöñönäni Itota iñömö tömënäni weca pöninque a ongongä adänitapa. Edæ iïmaï batimpa. ² Timönö Pegodo adocanque, Tömato Äancadënaque nani äñongä tönö Gadideabä Cänaa në quëwengä Näatänaedo mënaa, Tebedeo wëna nana caya mënaa, ayä Itota nänö në ëmiñænina wada mënaa mänimpodäni adoyömö ongöñönäniimpa. ³ Timönö Pegodo iñömö tömengä tönö ongönäni inänite,

—Botö ñöwo gæyæ dadoncæ tao gobopa.

Angä ëñëninque tömënäni iñömö,

—Bitö miñä gocæmönimpa.

Äninque, Ægodödëdäni gomompa, ante tao godinque wipodë godongämä guiidinque tömää woyowotä gæyæ dadoncæ cædäni incæte gæyæ dæ äñämaï inönänimpa. ⁴ Näö bayonte Itota iñömö ëmönaïya yæwedeca a ongongä adinque, Itota ingampa, ante tömengä ëmiñæniniñäni incæ ëñënämaï inänitapa. ⁵ Ayä tömengä tömënäni inänite yedæ aa pedinque,

—Inänäni, gæyæ æmïnitawo.

Äñongante,

—Änämaï imönipa.

⁶ Änani eñëninque tömengä wæætë,

—Minitö dicamonca wipo tömëmä inö æpäñë wo guitodonte gæyæ dadonte æedäni.

Tömengä nänö ämaï cædinque tömënäni nanguï pönï gæyæ dicamonca date owo adinque ædö cæte dicamonca wëä pönonte ænguïnänii. ⁷ Itota ëmiñænimo tömengä nänö në waadebo inömo inte botö Pegodo ingante apænedinque,

—Íngä inömo mönö Awënë Itota ingampa.

Ämo eñëninque Timönö Pegodo inömo tömengä yabæcoo nänö gä tadongate cönönincoo æninque daga wëñate æpäñë to go ti wæëninque ömaa taocantapa. ⁸ Wadäni Itota nänö në ëmiñæninäni inömo yawedeca obo pönï tiëë mëetodo ganca bai inömo wäi wocädäni ininque wipodë ayæ owodäni inömo Pegodo miñæ wogaa godinque dicamö gæyæ eyede pönï wëä pönö pönänitapa. ⁹ Tömënäni wipodë inte pædæ æænoncado ponte ayönäni, Äænonguï, ante gonga ëmöñömö gæyæ öñö adinque adoyömö wædænque päö cö cæte öñö adänitapa. ¹⁰ Itota tömënäni inänite,

—Gæyæ mini nöwo æni wædænque ænte pöedäni.

¹¹ Angä eñëninque Timönö Pegodo wipodë pö guidinque dicamö ænte ëmönaiya wëä tadongantapa. Edæ tiento tincoenta i todee ganca inäni mänimpodäni gæyæ nænængade dicamö inömo eyede owodäni incæte dicamö wangö tëmönämaï in-impä. ¹² Itota inömo tömënäni inänite,

—Pö cæedäni,

Äñongante tömengä ëmiñæninäni tömänäni, Mönö Awënë Itota ingampa, ante eñëninque, Æbidö imii, ante tömengä ingante ædö cæte ænguïnänii. ¹³ Itota gongapamö inömo pöninque päö ænte tömënäni inänite pædæ godongä ænäni ininque tömengä ayæ gæyæ öñö æninque tömënäni inänite pædæ godongä cænänitapa.

¹⁴ Mänömaï cædinque Itota do wæningä incæ nänäi ömæmonte quëwente mem-poga do ponte a ongöningä inte nöwo tömengä ëmiñæninäni weca mempoga go adopoque pongacäimpä.

Timönö Pegodo ingante Itota apæneçä

¹⁵ Tömënäni iinque cænäni ate Itota inömo Timönö Pegodo ingante,

—Timönö Wäo wëmi eñëmi. Botö imo mäninäni pönömenque waadete pönëñönäni bitö inömo näwangä botö imote godömenque waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do eñëmipa.

Angä eñëninque Itota,

—Wadäni inömo botö obegaidi wënäni bai inönänite bitö tömënäni inänite botö angainö ante odömonte apænebi eñencädänimpa, angantapa.

¹⁶ Ayæ wæætë,

—Timönö Wäo wëmi eñëmi. Bitö näwangä botö imote waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do eñëmipa.

Angä eñëninque Itota,

—Wadäni botö obegaidi bai inönänite bitö tömënäni inänite aacæbiimpä, angantapa.

¹⁷ Itota mempoga go adopoque tömengä ingante,

—Timönö Wäo wëmi ëñëmi. Bitö botö ïmote waadete pönëmitawo, ante angantapa.

Itota mempoga go adopoque tömengä ingante, Bitö botö ïmote waadete pönëmitawo, ante angä ëñëninge Pegodo wæwente ïnongäimpa. Incæte Itota ingante,

—Awënë bitö tömää ëñëmi ïmipa. Bitö ïmite botö waadedö ante bitö do ëñëmipa. Ante wæyongä Itota wæætë,

—Waadäni ïñömö nê botö obegaidi bai ïñönänite bitö tömënanï inänite botö angainö ante odömonte apänebi ëñencädänimpa. ¹⁸ Bitö ïmite näwangä ämopa. Bitö wëñämiyedë tömëmi nämä daga wëñadinque, Ædönö goinëmo, ante bitö goinënonque do gobi ïmitapa. Ñowo ïñömö bitö picämi bayedë bitö pädæ gopoyömi wacä incæ bitö ïmite godö daga wëñadinque bitö goinënämaï ïñömö mänñömö bitö ïmite mäocä gocæbiimpa.

¹⁹ Pegodo ingante mänömaïnö ante apänedinque Itota ïñömö, Tömengä ingante æbänö wänönäni wäñongä Wængongui ñäo apäite bai nänö ëmönö edonque bacäimpa, ante odömoncæte ante apänegacäimpa. Ayæ godömenque tömengä ingante,

Botö miñæ tee empo pöe, angacäimpa.

Itota ëmiñäningä nänö nê waadecä

²⁰ Pegodo guiquënë dadi ëmænte botö Itota ëmiñänimo nänö nê waadebo ïñömö tömëna miñæ tee empo pömo acantapa. Mänimo ïñömö do möni cæñedë Itota tönö äänömonque tæ contadinque, “Awënë bitö ïmi æcänö godö odömonguinaa, apänebi ëñëmönie,” ante nê apänedimo ïnömoimpa. ²¹ Pegodo botö ïmo adinque Itota ingante,

—Ïngä ïñömö nê tee empo pongä diyæ æbänö tömengä beyæ bacäimpa.

²² Äñongä Itota wæætë,

—Botö ocæ ëmænte ponguinganca tömengä ayæ quëwencæcäimpa, ämo bai bitö wæætë ædö cæte nê ämi inguïmii. Botö ïñömö nê anguïmo ïmopa. Bitö guiquënë botö miñæ tee empo ponguënëmi ïmipa, angantapa.

²³ Mänömaï beyæ pancadäniya möni tönñadäni weca godinque gode ä gode ä cædinque botö ïmotedö ante apänedinque, Ïngä ïñömö cöwë wänämaï quëwengüingä ingampa, ante tedewengadänimpa. Itota ïñæmpa, Ïngä ïñömö wänämaï quëwencæcäimpa, ante änämaï ingacäimpa. Wæætë, “Botö ocæ ëmænte ponguinganca tömengä ayæ quëwencæcäimpa, ante ämo bai bitö ædö cæte anguïmii. Botö anguïmo ïmopa,” ante mäninque angacäimpa.

²⁴ Tömënanï, Ïngä wänämaï quëwengä ingampa, ante nänö nê apänedimo ïñömö edæ botö tömengä nänö nê ëmiñänimo adobo ïmopa. Tömëmo, Æbänö batimpa, ante botö apänedö ïñömö näwangä ante nê apänedimo inte botö adodö ante tömänö ante nê yewämönimo ïmopa. Mäninö ante botö angainö ïñömö näwangä impa, ante mönitö ëñëmönipa.

²⁵ Itota ïñömö nanguï pönï godömenque wadö wadö cægacäimpa. Æbänö cæcäa, ante tömää nänö cægainö ante adinque yewämömöni bai mänintacoo möni yewämönintacoo ñönongui ante edæ inguipoga tömäo incæ wii eyepæ incädönimpa, ante pönëmpa. Mäninque ante yewämömopa.

*Itota nänö da godongainäni***Nāni Cægainö****Wængongui Tæiyæ Waëmö Önöwoca poncæcäimpa, ante**

1 Teopido bitö acæbiimpa, ante botö do yewæmöninque, Itota æbänö mä cægacäi, ante, Itota æbänö mä odömonte apænegacäi, ante yewæmontabopa. Mänö-mainö ante do yewæmönimo inte botö adobo Odoca inömo inte nöwo godömenque yewæmömo ae. ² Itota do inömo, Inäni botö imotedö ante nê apænequinäni inänipa, ante cædinque tömënäni inänite apænte æninque da godongacäimpa. Ininque tömengä nänö æite goquïönæ inönte tömënäni tönö godongämæ ongöninque Itota inömo Wængongui Tæiyæ Waëmö Önöwoca tönö cædinque tömënäni inänite, Botö dæ gobo ate minitö iimaï cæcæminimpa, ante apænegacäimpa. Ininque apæneceä ate tömengä ingante Wængongui do ænte mäicä inque ingä æigacäimpa. Ininque mäninganca tömengä nänö cægainö ante do yewæmönimo inte botö inömo, Bitö Teopidobi godömenque acæbiimpa, ante nöwo wæætë yewæmömopa.

³ Itota adocä inca nantate wægaingä inte nāni ömæmonte ate coadenta ëönæ man-impöönæ inguipoga quëwëninque tömënäni weca müingä inte wæætë pö wæætë pö cædinque mä pönï cædongäimpa. Ininque, Tömengä näwangä müingä inte mänö-mäi cæcampa, ante adinque tömënäni ædö cæte wadö ante pönenguinänii. Ayæ tömënäni weca a ongöninque tömengä tömënäni inänite, Wængongui Awënë Odeye nempo quëwencæminimpa, ante tömänö ante adodö adodö ante apæneceä ëñengadänimpa.

⁴ Tömënäni tönö godongämæ ongöninque Itota iimaï angantapa.

—Wii wayömö goedäni, Eedotadëe inömo ee quëwëedäni, angantapa. Botö Mæmpo inömo, Wacä ingante da pönömo æninque ëwocacæminimpa, ante do apænebo ëñëminitawo. Tömengä, Da pönonguimo, ante nänö nê angaingä ingante ante ænte ëwocacæte ante minitö nöwo wänö cöedäni. ⁵ Edæ Wäö wodi inömo æpænë guidongacäimpa. Wængongui Tæiyæ Waëmö Önöwoca guiquënë minitö baonga wantæ inö pö guicæcäimpa, ante Itota apænegacäimpa.

Itota öönädë æicampa

⁶ Ayæ Itota tönö godongämæ ponte ongönäni inömo tömengä ingante änänitapa.

—Itota ëñëmi. Mönö idægocabo mönö quëwengaimæ inönte wadäni do ö ænäni incæte bitö nöwo wæætë adobæ æninque mönitö Awënë Odeyebi oo bacæ cæbitawo. Edæ, Bitö nempo oo pönï godongämæ quëwencæmönimpa, ante cæbitawo, ante ëñencæte ante wæmönipa.

⁷ Ancaa äñönäni,

—Inämpa minitö ante wæinö bai, Æyedëno baquii, ante, Æpogadö baquii, ante minitö wii ëñenguënëmini iminipa. Mæmpoque nê angaingä inte mäninö ante ëñengampa. ⁸ Wæætë Wængongui Tæiyæ Waëmö Önöwoca pö guidinque pönö cæcä ate minitö wæætë tæi piñante ëwocamini edæ bacæminimpa. Ininque, Botö æbänö cægaboï, ante nê adimini inte mäninö botö cægainö ante minitö täno Eedotadëe inömo quëwente apænedinque ayæ Odeabæ mäo apænedinque ayæ Täma-

diabæ mǎo apænedinque godömenque tömämæ mǎo apænemini ëñencæðänimpa, ante Itota angacäimpa.

⁹Mänömainō ante apæneçä ëñente a ongöñönāni Itota mänñömo ongonte æi boguimancodë ingæ æicä æmö agadänimpa. ¹⁰Öönæðë æite ingæ gocä æmö ayönāni eðæ onguñæna näämænta weocoo mongæna tömænāni weca a ongöninque eðæ, ¹¹tömænāni inānite apænedinque,

—Gadideabæ quëwëmini inte onguñæmini ëñeedäni. Quinante æmonga a cöminii. Eðæ Itota minitö tönö ongöninque öönæðë æicä aminitawo. Eðæ öönæðë æicä mini adï baï adocä Itota iincayæ ate ocæ emænte poncæcäimpa, ante apænedatapa.

Codaa nänö cæquënenö wacä cæcæcäimpa, ante cæðäni

¹²Oodeoidi nāni guëmanguïönæ cöwë nāni goganca mäningancaque ï inique wïi gobæ ï inique tömænāni Odibowænquidi nāni anquidi ongöninque ocæ emænte wææ Eedotadëë pönānitapa. ¹³Tömænāni emöwo Pegodo tönö Wäö, Tantiago tönö Æentade, Pedipe tönö Tömato, Batodömëë tönö Mäateo, Adepeo wengä Tantiago, wacä, Mönö ömæ ingæimpa, ante nē änongå Timönö, Tantiago wengä Codaa. Mänömai emönāni inte pö guiddinque tömænāni nāni wānoncönë æmongapaa æi guiddänitapa. ¹⁴Ayæ iināni tönö wadāni Wængonguï ingante godongämæ apæneçæte ante cöwë pö pö cægadänimpa. Onquiyænāni adobaï Itota badä Mäadiya tönö ayæ Itota biwïidi tönö cöwë ponte apænedönänimpa.

¹⁵Mäniñedë Itota ingante nāni tee empote quëwënāni tiento bæinte ganca ināni inte ongöñönāni Pegodo tæcæguedë ængæ gantite apæneçantapa. ¹⁶“Inānāni ëñeedäni. Nöwocä Codaa wodi Itota wodi ingante nē æncæðäni inānite nē godö odömongä ingantawo. Eðæ tömengä ingante ante Wængonguï Tæiyæ Waëmö Önöwoca wëñëñedë apæneçä ëñëninque awënë Dabii wodi nänö yewæmongainö baï cöwë iinque baquinö angüenë. ¹⁷Eðæ Itota mönitö imönite apænte æninque Codaa ingante adobaï apænte ængacäimpa. Inique mönö cabo mönö nē cæquënenö ante Codaa wodi adocä incæ mönö tönö godongämæ cæcä ingacäimpa. ¹⁸Tömengä wïwa çæte tiguitamö nänö ænintamö incæ adodö godongä ænānitapa. Tömænāni wæætë tiguitamö æninque, Waodänido bacäimpa, ante ömæ godonte ænānitapa. Tömengä iñömo guidömëmæ wæante ömengö tæi æbæ godente æmæwo wængantapa. ¹⁹Mänömai wængä ëñëninque Eedotadëë quëwënāni tömānāni, ‘Wepæ onguïpo ba awæðö,’ ante tömænāni nāni tededö Atedämæ pemönānitapa. ²⁰Eðæ Ämotamini nāni Angaintaa iimaï ante dobæyedë yewæmongatimpa. ‘Tömengä oncö æmæwo önonconque bacäimpa. Wacä mänincönë cöwë quëwënāmai incæcäimpa.’ Ante nāni Ämotamini Angainta baï do batimpa. Ayæ, ‘Tömengä nē aacä bate nänö cæquënenö incæ wacä badinque cæcæcäimpa,’ ante yewæmonte ongompa,”

²¹Ante apænedinque Pegodo godömenque iimaï ante apæneçantapa. “Mänömai ïi inique Codaa wodi nē nänö cæquënenö incæ eðæ wacä cæcæcäimpa, ante nōwo mönö apænte angæimpa. Awënë Itota imæca mönö tönö guëa cægongäñedë wadāni godongämæ nē cægönināni inānite adinque mönö iimaïnö ante apænte ængæimpa. ²²Wäö wodi nänö guidöñedë cægöninque nōwoönæ Itota nänö æite goönæ ganca æcänö æcänö mönö tönö godongämæ cægönināni ināni, ante adinque mönö ado-

canque ingante apænte ængæimpa. Apænte æmō ate tōmengā, Itota dobæ nāni òmæmongantapa, ante nē againgā inte wæætē mōnō tōnō godongāmæ apænecā incæcäimpa.”²³ Ante Pegodo angā ēñente cædinque tōmēnāni wæætē, Æcānō æcānō nē agaïnāni ināni, ante adinque mēnaa inate apænte ænānitapa. Adocanque Ootee, Badatabato nāni ānongā inte tōmengā mæmæ beyæ, Yoto, ante nāni pemongaingā iñongante tōmēnāni tōmengā ingante apænte æninque edæ wacā ingante Māatiya ingante apænte ænte gōnōnānitapa.²⁴ Mānōmaï apænte æninque Wængonguï ingante apænedānitapa. “Awēnē ēñēmi. Mōnitō æbānō pōnēmōnii, ante tōmāā ēñēmi inte bitō iina inate adinque æcānō ingante do apænte ængabiï, ante odōmōmi amōnii.²⁵ Edæ Codaa wodi tōmengā nānō pante wænguinque oda cæcantapa. In- inque bitō nōwo wacā ingante da godōmi godinque Codaa wodi nānō cæquēnēnō ante cæcæcäimpa, ante āmii, ante wæmōnīpa.”

²⁶ Ante Wængonguï ingante apænedinque tōmēnāni, Æcānō inaa, ante ēñencæte ante cædinque dicamō æninque, Wo godō wo godō cæyōmō to ta wææ acæï, ante cæte ayōnāni Māatiya nānō cæ to ta wæænca adinque, Mōnō imonte Itota da godongā nē godimō ònompō tipæmpoga go adocanque iñōmonte tōmengā mōnō cabo badinque godongāmæ cæcæcäimpa, ante cægadānimpa.

Wængonguï Tæiyæ Waēmō Ònōwoca pongampa

2 Tōmēmō incadepo ba ate Pentecotee ææmænoca nāni äōnæ iñonte tōmēnāni nāni cabo adoyōmō ponte godongāmæ ongōnānitapa.² Ongonte ēñēñōnāni woboyæ nanguï pæmænte ä baï iñontobæ öönædē pō ēñēñōnāni oncōnē nāni ongoncōnē tōmancōnē wææ guite baï woboyæ nanguï pæmænte ä baï ēñēnānitapa.³ Ayæ waodāniya incæ gonga baï onguēnē onguēnē bæco adānitapa.⁴ Ayōnāni Wængonguï Tæiyæ Waēmō Ònōwoca incæ tōmānāniya pō guicā ewocadānitapa. Pō guidinque Wængonguï Ònōwoca pōnō cæcā beyænque tōmēnāni wadāni nāni tededō baï wadāni nāni tededō baï mā apænedānitapa.

⁵ Māniñedē oodeoidi Wængonguï ingante guñente quēwēnāni inte edæ wabæca wabæca tōmāmæ quēwēninque nōwo Eedotadēē ponte quēwēnōnānimpa.⁶ Ināni iñōmō woboyæ nanguï pæmænte baï ä ēñente wædinque ponte ēñēñōnāni Itota ingante nē pōnēnāni iñōmō nōwo pōnāni nāni tededō baï tededāni ēñēnānitapa. Adocanque nānō tededō baï wacā nānō tededō baï tededāni ēñēninque tōmēnāni, Æbānō cæte tōmāmō tededō baï tededāni ēñēmōnii, ante wædānitapa.⁷ Tōmēnāni nāmāneque apænedinque,

—Inæmpa Gadideabæ quēwēninānique inte iināni mānōmaï tededāni awædō.⁸ In- inque ædō cæte mōnō ēnagaiōmæ mōnō tededō baï tededāni ēñēmō, ante ancai guñente wædānitapa.⁹ Edæ iñōmō nē ongōmō iñōmonte pancadāniya Padatiabæ quēwente pōñōmō wadāni guiquēnē Mēediabæ, Edāmæ, Mēetopotāmiabæ, Oode- abæ, Capadotiabæ, Pontobæ, Atiabæ quēwente pōnāni inānipa.¹⁰ Wadāni guiquēnē Pidiguiabæ, Pampidiabæ, Equitobæ quēwente pōnāni inānipa. Wadāni guiquēnē dibiabæidi ināni inte Tidēne iñōmō quēwente pōnānipa. Wadāni guiquēnē Odōmā iñōmō quēwēninque ēñacæ ante ponte owodānipa.¹¹ Odōmā iñōmō nē quēwēnināni iñōmō pancadāniya oodeoidi ēñagaiñāni iñōnāni pancadāniya wæætē wadāni incæ oodeoidi pōnēnāni baï adodō pōnente oodeoidi baï bagaiñāni inānipa. Ayæ wadāni guiquēnē codetenteidi tōnō adabeidi inte pōnāni inānipa. Ininque mōnō wabæca wabæca quēwēninque wadāni nāni tededō baï wadāni nāni tededō baï nē tedemō

imompa. Incæte iināni guiquēnē, Wængonguī waa pōni cæcā ingampa, ante mōnō tededō bai mā pōni tedinque apænedāni ēñēmompa tōō.

¹² Ante wædinque tōmēnāni nāni cabo nāmāneque apænedinque,
—Æbānō ēñēmōō, ante wæmōnipa tōō.

¹³ Ante wæyōnāni pancadāniya babæ apænedinque,
—Biinōmæ miimæ tōmo pōni bedinque dowænāni inte tededānipa, ante badete togadānimpa.

Pegodo tōmēnāni iinānite apænecampa

¹⁴ Mānōmaī tedejōnāni Pegodo iinōmō ōnompo tipæmpoga go adocanque ināni tōnō ængæ gantidinque nanguī tedecā ēñengadānimpa. “Oodeoidi ēñēedāni. Ayæ wamīni guiquēnē Eedotadēē iinōmō nōwo ponte owomīni inte mīnitō oodeoidi tōnō tōmāmīni ēamonca ongonte ēñēedāni. Botō, Æbānō i, ante edonque apænebo ēñencāmīnimpa,” angantapa.

¹⁵ “Gāwadedcæ impa diyæ ti nāmæ bete dowænte baquinānii. Iinæmpa nænque ayaōnāa ææñongā ædō cæte mīni ānō bai bete dowænte baquinānii. ¹⁶ Wæætē Wængonguī beyæ nē apænegaingā Ooedo wodi do nānō angainō bai nōwo cædānipa, ante apænebo ēñēedāni. Ooedo wodi iinōmō iimainō ante yewæmongacāimpa.

¹⁷ ‘Wængonguī iimāi angampa, angacāimpa.
Iinque bayedē botō Ōnōwoca ingante tōmānāniya āmo pō guicā ēwocacædānimpa.

Māniñedē onquiyænāni incæ onguiñænāni incæ mīnitō wēnāni iinōnāni inte botō beyæ apænecædānimpa.

Edēnināni iinōmō ate bai mā pōni acædānimpa.

Picænāni guiquēnē nō wiimonte bai acædānimpa.

¹⁸ Ayæ botō Ōnōwoca ingante āmo pō guicā ēwocadinque onguiñænāni incæ onquiyænāni incæ

botō beyænque nē cædāni iinōnāni inte botō beyæ apænecædānimpa.

¹⁹ Edæ mīni ææmō ate pōnenguinque ante botō ōōnædē mā cæbo acāmīnimpa.

Ayæ imæca adobaī pōnō cæbo ate wepæ gonga tēemā nanguī mongæ adinque ēñencāmīnimpa.

²⁰ Edæ nænque tāno wentamō bayō apāicā wepæ emō ba acāimpa.

Ayæ ate tōmengā nānō ponguionæ iinonte

Wængonguī Awēnē incæ tæi piñængā inongā inte

nāō apāite bai emōninque poncæcāimpa.

²¹ Iinque botō emōwo ante nē aa pedāni iinōmō

tōmānāni botō æmo beyænque quēwencædānimpa.’

Ante Wængonguī Awēnē cæcæcāimpa, ante Ooedo wodi yewæmongacāimpa.”

²² Ante apænedinque Pegodo godōmenque iimāi ante apænecantapa. “Idægoidi, apænebo ēñēedāni. Itota Nāatadeta nē quēwengaingā nāwangā botō nē da pōnongā ingampa, ante pōnencāmīnimpa, ante mā cædinque Wængonguī Itota tōnō godongāmæ tæi piñænte nanguī cæcā ate Itota mīnitō weca bamōnengæ cædinque nanguī cægacāimpa. Iinque mānōmaī cæcā nē agaīmīni inte mīnitō, Nāwangā Itota ingante Wængonguī da pōnongā ponte cæcampa, ante do ēñēmīnipa. ²³ Wængonguī nāmā pōnēninque, Codito ingante tōmēnāni nempo pædæ godoncæboimpa, ante do angaingā inte, Mīnitō tōmengā ingante æninque mānōmaī cæcāmīnimpa, ante do ēñengacāimpa. Iinque mīnitō iinōmō Itota ingante bæi ongonte æninque ēñente

cædāmaï ināni nempo pædæ godōninque, Mīnitō tōmengä ingante awāa timpod-
 inque wææ tiwate wænōedāni, ante ämīni wænōnānitapa. Mänōmaï önōnecaque
 tedete beyæ mīnitō tōmēmīni edæ nē wænōmīni bai bamīnīpa tōö. ²⁴ Mīnitō mänō-
 maï wadāni tönō cædinque wænōmīni beyæ Itota iñōmō mönō wænguēnēmāmo
 teēmē mongænte caate wædinque wængacäimpa. Ayæ pæ opate öñöñongante Wæn-
 gonguï wæætē, Idæwaa, ante wi ænote bai cædinque angä ate Itota nāni ömæmonte
 ta pongantapa. ²⁵ Adocä Codito beyæ ante apænedinque awënë Dabii wodi iïmaï
 ante yewæmongacäimpa.

‘Botō, Mönō Awënë cōwē botō weca mä ongongampa, ante atabopa.

İnīnque tōmengä botō tōmēmæ inö tōö æmænte ongongä inīnque botō imote ædö
 cæte bæ tadāni wæquimoo.

²⁶ Mänōmaï beyæ botō, Watapæ bacäimpa, ante mīmönē pönēmo inte botō önōneca
 ämotamīni ante bai nanguï tobopa.

Botō nāni ömæmonguinque nē wæwocabo imopa, ante pönēmo inte botō guïñēñate
 wædāmaï inte baö ēñate quēwencæboimpa.

²⁷ Wængonguï ēñēmi. Botō waodāni nāni wænte ongöñömō öñöñömote bitö emö
 cæte godāmaï incæbiimpa.

Bitö imite nē cæbo inte botō tōmēmi cædö ante cōwē cæbo iñōmote bitö ædæmō
 wææ aabi ate botō baö nōmäadāmaï incæboimpa, ante edæ botö do ēñēmopa.

²⁸ Taadö botö quēwenguïñö ante bitö do odömömi agaboimpa.

Bitö weca æidinque bitö awinca adinque watapæ tocæboimpa,’
 ante awënë Dabii wodi ämotamīni ante bai apænegacäimpa.”

²⁹ Ante apænedinque Pegodo godōmenque apænegcantapa. “İñānāni nōwo
 edonque apænebo ēñenguēnē quēwēmīni. Mönō mæmæ Dabii wodi do wæn-
 gacäimpa. Tōmengä mæo do daga wengadānīpa. Edæ tōmengä wodido nāni
 wengaiñömō nōwo ganca a ongö amīnīpa. ³⁰ Incæte tōmengä ingante Wæn-
 gonguï, Dabii ēñēmi, angacäimpa. Bitö pæināni wææ pæyönāni adocanque in-
 gante botö bitö awënë contaīpaa pönö cönōmo contadinque tōmengä iñōmō
 nē Awënë bacæcäimpa, ante apæneçä ēñēnīnque awënë Dabii wodi Wængonguï
 beyæ nē apænegaingä inongä inte edæ, Wængonguï tōmengä nänö änö bai cōwē
 cæcæcäimpa, ante do ēñengacäimpa. ³¹ Ayæ, Æbänö cæquingä, ante do ēñen-
 gaingä inte tōmengä, Mönö Codito iñōmō waodāni nāni wænte ongöñömō öñöñon-
 gante Wængonguï emö cæte godāmaï inte wææ aacä beyænque tōmengä baö
 incæ nōmäadāmaï ingäimpa, ante apænegacäimpa. Mänōmaïñö ante apænedinque
 awënë Dabii wodi, Mönö Codito nāni ömæmoncæcäimpa, ante do apænegacäimpa.

³² Itota ingante Wængonguï, Nāni ömæmōe, angä nāni ömæmongantapa. İnīnque
 mänīñö tōmengä nänö nāni ömæmongaiñö ante nē adīmōni inte mönitö tōmämōni
 edæ, Nāwangä impa, ante nē apænemōni imōnīpa.”

³³ “İnīnque Wængonguï angä beyænque Itota inque ingä öönädē æidinque Wæn-
 gonguï tōmēmæ inö tæ contate ongongampa. Ayæ Mæmpo Wængonguï, Botö
 Önōwoca ingante æncædānīpa, ante nänö nē angaingä ingante do godongä
 ænīnque Itota wæætē mönitö imōnite nōwo da pönongä ænte ewocamōnīpa.
 İnīnque mīnitö guiquēnē gonga bæco ate wæmīnitawo. Wadāni nāni tede bai
 tedemōni ēñente wæmīnitawo. Edæ Wængonguï Önōwoca pönö cæcä beyænque
 gonga bæco amīnīpa. Wængonguï Önōwoca pönö cæcä beyænque wadāni nāni
 tede bai tedemōni ēñēmīnīpa. ³⁴ Itota öönädē inque ingä æicä bai awënë Dabii

wodi wīi adobaī æigacāimpa. Incæte tōmengā godōmenque apænedinque iīmaī ante yewæmongacāimpa.

‘Awēnē Wængonguī incæ botō Awēnē ingante apænedinque,
Nē Awēnē īmi ēñēmi. Botō tōmēmæ īnō tæ contayōmi,

³⁵ botō bitō īmite nē piīnte cædāni īnānite bæ tabo ate bitō tōmēnāni īnānite pīnā
gāwate baī cæcæbiīmpa,’ ante Awēnē Wængonguī angacāimpa,” ante Dabii
wodi yewæmongacāimpa.

³⁶ Ante apænedinque Pegodo godōmenque iīmaī angantapa. “Mānōmaī beyæ mīni
idægocabo tōmāmīni, Īmaīnō ante nāwangā pōni īmpa, ante ēñencāmīnīmpa. Mān-
ingā Itota ingante mīnitō ñænquedīmæ gōnonte wænōmīni nē wæningā ingante
ante apænedinque Wængonguī incæ, Itota nē Awēnē īnogā ingampa, ante ayæ,
Nē Codito īnogā ingampa, ante edæ do cægacāimpa.”

³⁷ Ante Pegodo apæneccā ēñēninque tōmēnāni, Æ, wēnæ wēnæ cæte awædō, ante
ancai guīñente wædinque Pegodoidi īnānite,

—Īnānāni, æbānō cæquēnēmōni īmōnii.

³⁸ Āñōnānite Pegodo wæætē,

—Īmaī cædāni. Mīnitō wēnæ wēnæ mīni cædinō ante Wængonguī pōnō ñīmpo
cæcæcāimpa, ante cædinque, Æmæwo wēnæ wēnæ cætābopa, ante Itota Codito
ēmōwo ante apænedinque æpænē guīiedāni. Mānōmaī cāmīni adinque Wængonguī
tōmengā Ōnōwoca ingante da pōnogā ænte ēwocacāmīnīmpa. ³⁹ Edæ mīnitō
īmīnite aa pecā incæ mīni wēnāni īnānite aa pecā incæ gobæ quēwēnāni īnānite aa
pecā incæ ayæ ate quēwēnāni īnānite aa pecā incæ mōnō Awēnē Wængonguī nānō
nē aa pedāni īnānite apænedinque, Botō ānō baī cōwē cæcæboīmpa, angampa.

⁴⁰ Ante apænedinque Pegodo godōmenque nanguī āninque, Ēñenguēnē
quēwēnānii, ante wantæpiyæ apæneccantapa.

—Ñōwodāni īñōmō nāmanque nāni cæinēnō ante idiquibæ nāni cæi baī mīnitō
adobaī cædāmaī inte nōingā cæte waa quēwēedāni.

⁴¹ Ante Pegodo ancaa angā ēñēninque pancadāniya Ao āninque æpænē do gui-
idānitapa. Īninque edæ māniōnæ todee mūido ganca īnāni mānimpodāni wede
pōnēninque do pōnengāināni tōnō adocabodāni bagadānīmpa. ⁴² Īnāni īñōmō ado-
cabodāni badīnāni inte cōwē ñīmpo cædāmaī īninque godongāmæ pō pō cæyōnānite
Itota nānō da godongāināni apænedāni ēñēnōnānīmpa. Ayæ nāni pōnencabo
īnōnāni inte wacā ingā wacā ingā watapæ apænedinque pāo pā ænte godongāmæ
cæninque Wængonguī ingante cōwē apænete quēwēnōnānīmpa.

Nāni pōnencabo godongāmæ waa cæte quēwēnānīpa

⁴³ Īninque edæ tōmānāni guīñente wædinque ee quēwēnōnānīmpa. Ayæ Itota
nānō da godongāināni īñōmō, Tōmānāni pōnencædānīmpa, ante cædinque Wæn-
gonguī Tæiyæ Waēmō Ōnōwoca tōnō cædinque tōmēnāni nāni pōnēninque ante mā
cædinque bamōnengæ nanguī cædōnānīmpa. ⁴⁴ Nē pōnēnāni tōmānāni adoyōmō pō
pō cædinque tōmēnāni nāni mānīncoo incæ, Tōmāmō quī īmpa, ante nē pōnēninque,
Wacā ingā wacā ingā mōnō godongāmæ godonguinque māmōmpa, ante cædōnān-
īmpa. ⁴⁵ Māincoo tōnō ōmæ nāni ēadincoo incæ godonte æ godonte æ cædinque
wadāni nē ōmaadāni inte wædāni īnānite pancæ pancæ godōnānīmpa. ⁴⁶ Ī īninque
iīmō iīnō iīmō iīnō adoyōmō pōninque Wængonguī oncō ñænæncōnē yabæcōnē nē
guii guīi cædāni inte mīmōno nō pōnēninque tōmēnāni oncōnē adobaī pāo pā ænte

watapæ todinque godongämæ cænönänimpa. ⁴⁷ Tömänäni edæ Wængongui ingante, Waa pönī nē cæbi imipa, ante ancaa añönäni wadäni edæ tömänäni inänite waa adönänimpa. Ayæ mönō Awënë pönō cæcä ate tömänäni edæ, Itota Codito ængä beyænque mönō quëwengæimpa, ante pönëninque iimō iñō wacabomō iimō iñō wacabomō nē pönänäni badinque edæ tæiyänäni bagadänimpa.

Cömäwaingä ingante äna waa bawacampa

3 Iincayæ ate nænque ædæ wæicä ate oodeoidi näni cöwë Wængongui ingante apænedönedë Pegodo tönō Wäö iñömō Wængongui oncönë ñænæncö yabæcönë guicæte ante ædatapa. ² Æite ayöna wadäni pöninque cömäwaingä ëñate nē pædingä ingante næænte mämönäni pongä adatapa. Iingä cömäwaingä iñömō nē pō guidäni inänite, Pönömi æmoe pönömi æmoe, ancæcäimpa, ante cædinque tömänäni tömengä ingante iimō iñō iimō iñō næænte pō næænte pō cædinque edæ Wængongui oncö ñænæncö boyæ yabædemō, Wainemō, näni änemō yabæque cō cædönänimpa. ³ Iinque ñöwo Pegodo tönō Wäö Wængongui oncö ñænæncönë yabæcönë pō guicæ cæda adinque tömengä tömëna inate, Pönömina æmoeda, angantapa. ⁴ Angä ëñëninque Wäö tönō tömengä ingante cöwä adinque Pegodoque apænecantapa.

—Mönatö imönate ææmō ae.

⁵ Angä ëñëninque cömäwaingä, Botö imote wabänö pönöna ænguimo, ante pönëninque ææmō ayongä ⁶ Pegodo iñömō,

—Quinö mämopa pönömo ænguiimii. Edæ oodo incæ tigitamö incæ ömæpobo imopa. Wæætë tæiyæ waëmō botö ewocadö ante bitö imite pönō apænebo ate bitö æe. Näatadeta quëwengaingä Itota Codito emöwo beyænque bitö dao dao goe, angacäimpa.

⁷ Äninque Pegodo cömäwaingä tömëmæ inö pædæ wææmpo bæi ongonte töö æmængä ate cömäwadingä önöwa tönö önoncaiwa tæi piñæwacä. ⁸ Ate iñontobæ ængæ gantite dao dao gocantapa. Ayæ Wäö tönō Pegodo miñæ Wængongui oncö ñænæncönë yabæcönë godongämæ go guidinque dao dao go togæi togæi godinque Wængongui ingante waa ate apænedinque, Wængongui, bitö cöwë waa pönī inömi inte pönō cæbi æmopa, ante nanguī apænecantapa. ⁹ Wængongui mänömaï waa cæcampa, ante nanguī pönī tededinque dao dao gocä adinque edæ tömänäni, ¹⁰ Æ, iingä iñömō, Pönömi æmoe pönömi æmoe, ante Wængongui oncö ñænæncö boyæ yabædemō, Wainemō, mönō änemō gäänë mönō nē änecöningä adocä ingampa. Ante adinque, Quinö bai cæte waa bacäi, ante ancai guiñente wægadänimpa.

Tadömöo yabætaa ongonte Pegodo apænecampa

¹¹ Mänii cömäwaingä iningä incæ Pegodo tönō Wäö inate winimä winimä cæcä adinque wadäni tömänäni guiñente wædinque Tadömöo yabætaa näni añömō pogodo ponte tömänäni weca guidänitapa. ¹² Guidäni adinque Pegodo, “Mini idægocabo ëñëedäni. Mönatö imönate quinante waa aminii. Mänömaï waa bawacä adinque edæ quinante guiñente wæminii. Mönatö edæ, Tömengä dao dao gocæcäimpa, ante cædinque tæiyæ waëmöna imönapa diyæ tæi piñænte cæquimönaa. ¹³ Abadäo wodi Itæca wodi Aacobo wodi tömänäni, Mönō Wængongui inongä ingampa, ante näni nē angaingä inte Wængonguinque cæcä ate waa bawacampa. Mönō wæmæidi Wængongui incæ, Itota botö imote nē cædongä ñäö bai emönongante tömengä ingante waa acædänimpa, ante mänömaï cæcampa. Adocä Itota ingante munitö

iñömö, Wænongæimpa, äninque pædæ godöminitapa. Ayæ Pidato, Ñimpo cæbo gocæcäimpa, ante apænte angä ate minitö wæætë Pidato weca ongöninge adocä ingante ante Baa äminitapa. ¹⁴ Ìninque nè Tæiyæ Waëmö inongä inte nö cæyon-gante minitö Baa äninque wæætë nè wænöningä ingante ante äninque, Ìngä ingante ñimpo cæbi pongæe, äminitapa töö. ¹⁵ Ìninque mönö quëwenguimämo nè pöningä ingante Baa äninque minitö nè wænönimini iminipa. Incæte Wængongui tömengä ingante, Nāni ömæmöe, angä ñāni ömæmongantapa. Ìninque tömengä ñāni ömæmongä nè adimöni inte mönitö, Æbänö cægacäimpa, ante adodö ante nè apænemöni imönipa. ¹⁶ Adocä Itota ëmöwo ante apænemöna ëñente pönëninge mäningä cömawadingä mini nè adingä iñömö ñöwo tæi piñæwacampa. Edæ Itota pönö cæcä beyæ mäni onguinængä nè pönengä badinque Itota ëmöwo beyænque ædæmö waa bwate tæi piñængä bacä aminipa,” ante Pegodo apænecantapa.

¹⁷ Ayæ godömenque apænedinque Pegodo, “Ñöwo botö töninamini ëñeedäni. Minitö awëneidi ëñenāmai nāni cæi bai cædinque minitö iñömö adobai, Æbänö nö cæquii, ante ëñenāmai inte cæminitapa, ante awædö. ¹⁸ Incæte minitö mänö-mai ëñenāmai cædinque Wængongui beyæ nè apæneganāni tömänāni nāni apænega-i bai do iinque cæminipa. Tömënanāni, Mönö Codito caate wæte wæncæcäimpa, ante nāni angainö bai minitö cædi beyæ ñöwo iinque batimpa. ¹⁹ Ìninque minitö wænæ wænæ mini cædinö ante wæwente pönente ñimpo cædinque wentamö mini mongænö mini ñā mënongquinque Wængongui gämænö pöedäni. ²⁰ Mönö Awënë weca mini wampo pönenguinque pöedäni. Ayæ Wængongui, Minitö Codito pon-cæcäimpa, ante do nänö angaingä inongä inte Itota minitö weca poncæcäimpa, ante tömengä gämænö pöedäni.”

²¹ “Incæte edæ, Tömancoo do ingai bai adobai bacoocäimpa, ante Wængongui badoncæcäimpa, ante tæiyæ waëmö ingaināni Wængongui beyæ doyedë apæneganānimpa. Wængongui mänömai nänö badompoga Itota iñömö mänimpoga öönædë quëwencæcäimpa angüenë. ²² Edæ Möitee wodi, ‘Botö wænte gobo ate minitö Awënë Wængongui wæætë minitö beyæ cædinque mini cabo iñöminite adocanque ingante apænte Ao ante æncæcäimpa. Tömengä ingante äninque, Möitee wodi botö beyæ nè apænecä ingaingä bai bitö adobai edæ botö beyæ nè apænëbi bacæbiimpa, ancæcäimpa. Wængongui mönö Codito ingante mänömai angä ininque tömengä wæætë nè apænecä bagacäimpa. Ìninque minitö iñömö tömengä quiemë ante apæneyongä ëamonca ongonte tömänö ante ëñencæminimpa. ²³ Ìninque edæ mäningä Wængongui beyæ nè apænecä ingante æcänö ëñenāmai ina iñömö, tömengä guidënanāni weca quëwënāmai edæ wæncæcäimpa,’ ante Möitee wodi apæneganäcäimpa,” ante Pegodo apænecantapa.

²⁴ Ayæ apænedinque Pegodo, “Æpodänidö Wængongui beyæ nè apæneganāni ināni. Edæ tömënanāni Tämöedo tönö ayæ pönāni tönö tömänāni adoyömö apænedinque Codito ñöwoönæ nänö cædö ante apæneganānimpa. ²⁵ Ìninque minitö guiquenë Wængongui beyæ nè apæneganāni wëmini inömini inte tömënanāni nāni angainö ante nè ænguimini iminipa. Ayæ edæ Wængongui, Botö pönö cæbo ate Ao ämini ininque mönö godongämæ waa cæcäimpa, ante nänö angainö ante minitö edæ mini quëwenguinque ëñente quëwencæminimpa. Abadäo wodi ingante apænedinque Wængongui, ‘Abadäo ëñemi. Minitö mini quëwencabo tönö wadāni tömämæ quëwënāni nāni cabo nāni cabo tönö tömämini iñöminite bitö Pæingä pönö waadete cæcä beyænque waa quëwëninque tocæminimpa,’ ante apæneganäcäimpa.

²⁶Wængonguī, Botō Wengā pōnō aa pecā ēñēnīnque mīnitō wæætē wēnā wēnā cæte mīni gogainō ocā ēmænte wadā pōnīnque wæætē waa quēwenguīnō cægōnīnque waa tocæmīnīmpa. Ante cædinque tōmengā tāno mīnitō beyæ ante tōmengā ingante nē cædongā mōnō Codito ingante da pōnongā pongacāīmpa,” Ante Pegodo īīnque apænēgacāīmpa.

Pegodo tōnō Wāō awēnēīdi weca gongænte apænedapa

4 Pegodo tōnō Wāō tōmānāni īnānite tæcæ apæneyōna wadāni tōmēna weca māo godongāmæ pōnānitapa. Īnāni īñōmō nē, Wængonguī quī, ante godōnāni tōnō Tadoteoidi tōnō Wængonguī oncō ñænencō ante nē wææ wānōnāni awēnē tōnō mānīnāni pongadānīmpa. ²Itota ñāni ōmæmongā bai mōnō adobai ñāni ōmæmongæīmpa, ante Pegodo tōnō Wāō apænedapa, ante do wædōnāni inte tōmēnāni ñōwo piinte māmō pōnānitapa.

³Pōnīnque tōmēnāni īñāna īnate bai ongōnānitapa. Ayæ wēmō ba īnīnque baānā ate nāna taquinque tōmēna īnate tee mōnedāni guīdatapa. ⁴Incæte tōmēna āna nē ēñēnīnāni guīquēnē pancadāniya nanguī īnāni incæ nē pōnēnāni bagadānīmpa. Īnīnque onguīñænāni nāni nē pōnencabo īñōmō wodo tīnco mīīdo ganca īnāni mānīmpodāni bai bagadānīmpa.

⁵Baānā ate oodeoidi awēnēīdi tōnō tōmēnāni īnānite nē aadāni nāni Picæncabo tōnō nē odōmōnāni tōnō Eedotadēē īñōmō godongāmæ ponte ongōnānitapa. ⁶Wængonguī quī, ante nē godongā ñænængā pōnī Ānato ponte a ongōñongā tōmengā guīdēnāni Caiapato Wāō Adecantodo tōnō wadāni tōmengā guīdēnāni incæ tōmengā weca godongāmæ pō guīdānitapa. ⁷Pō guīdīnque edæ Wāō tōnō Pegodo īnate tæcæguedē māmō gōnōnāni gongæñōna ānānitapa.

—Mīnatō æcānō tōnō tæī piñænte cæmīna ate cōmāwadingā waa bawacantawo. Edæ æcānō ēmōwo apænete cæmīnāī.

⁸Ante āñōnāni Pegodo īñōmō Wængonguī Tæiyæ Waēmō Ōnōwoca tōnō apænedīnque,

—Awēnēīdi īmīni ēñēedāni, nē aamīni mīni Picæncabo ēñēedāni. ⁹Cōmāwaingā æbānō cæte waa bawacāī, āmīnitawo. Edæ cōmāwaingā ingante mōna waa cædī beyænque mīnitō ñōwoōnā pōnō apænte āmīni awædō. ¹⁰Īnīnque mīnitō tōnō idægoidi wadāni tōnō botō tōmāmīni īmīnite adoyōmō apænebo ēñencæmīnīmpa. Itota Codito Nāatadeta quēwēningā ingante awæ ñænquedīmæ cæte mīni nē wænōningā ingante Wængonguī angā do ñāni ōmæmongacāīmpa. Tōmengā adocā Itota ēmōwo beyænque cōmāwaingā īningā tæī piñængā badīnque mīnitō weca a ongongā apa ānewēmīnī. ¹¹Edæ wainca nē mānōnāni nāni wido cædinca incæ wacā, Tæcæ manca pōnī tæī manguīmpa, ante cōnongampa. Itota īñōmō mānīnca bai ææmōnga pōnī ongongampa.

¹²Īnīnque Itota, Quēwencæmīnīmpa, ante mōnō īmonte ængā bai wacā ædō cæte adobai ænguingā. Itota ēmōwo beyænque quēwencæmīnīmpa, ante pōnō cægāingā inte Wængonguī wæætē, Wawo adobai ī, ante dicæ pōnō cæcantawogaa. Īñæmpa inguīpoga tōmāmæ īñōmō edæ æcāmenque incæ adobai nē tæī piñænte ēmōnongā īñōmō edæ dæ angampa, ante apænedatapa.

¹³Ayæ Pegodo tōnō Wāō ōnōnaque īna inte nanguī adāmaī īna incæte edæ guīñēnāmaī edonque apænedapa, ante adīnque tōmēnāni, Ābānō cæte edæ do ēñēnatawoo, ante wædīnque, Itota mīñæ nē godīna inte do ēñēnāpa. Nāwangā

impa, ante wädänitapa. ¹⁴ Edæ cömawadingä ینگä tömënäni weca a ongongä ad-
 inque tömënäni ædö cæte wadö ante tedequinänii. ¹⁵ Ìnque tömëna ìnate, Mönitö
 godongämæ Apænte Äincabo weca ongönämaï godömenque goeda, änäni goda ìn-
 inque, Tömëna ìnate æbänö cæquiï, ante pönëninque godongämæ tedecönänitapa.
¹⁶ Ìimaï ante apænedänitapa.

—Mänina ìnate quïnö cæquimöö. Ìnæmpa tömëna täi pïñænte bamönengæ cæ-
 datapa, ante Eedotadëë quëwënäni, Näwangä impa, ante tömänäni do ëñënanipa.
 Ìnque, Waa cädämaï ìnatapa, ante mönö ædö cæte anguiï. ¹⁷ Incæte mäninö
 näni apænedö ante wädäni wïï godömenque ëñencädänimpa, ante wææ cædinque
 mönö tömëna ìnate wææ angæimpa. Mänii ëmowo ante minatö mina wæquinque
 apæneminäpa. Wacä æcämenque ingante apænedämaï imæweda, ante mönö wææ
 angæimpa, ante nämæneque tededänitapa.

¹⁸ Ayæ ìnque tedinque Wäö tönö Pegodo ìnate äñete mämönäni pöna adinque
 tömëna ìnate wæætë, Èñenguënë quëwëmïnaa, änänitapa. Edæ mina panguinque
 ante Itota ëmowo ante apænemina. Ìncayæ ate tömengä ëmowo ante apænedinque
 edæ adopoque incæ odömönämaï imæweda. ¹⁹ Ante äñönänite Pegodo tönö Wäö
 wæætë,

—Ìnæmpa æcänö ingante ëñente cæquimöna, ante pönëminii. Minitö äno ëñën-
 inque wæætë Wængongui nänö äno ëñënämaï inte cæmöna adinque Wængongui
 edæ, Nö cæmïna abopa, anguingä. ²⁰ Edæ möna adinö ante möna ëñënö ante ædö
 cæte apænedämaï inguimönaa.

²¹ Ante apænedä ëñente wædinque awënëidi wæætë, Mini panguinque, ante ancaa
 apænedänitapa. Incæte wädäni, Cömäiningä ingante Wængongui waa pönï cæcan-
 tapa, ante watapæ apænedäni ate wædinque awënëidi wæætë Wäö tönö Pegodo
 ìnate pancæte ante cædinäni inte, Ìnæmpa waodäni pïñäni ìnque mönö æbänö
 cæte panguimöö, ante guïñente wædinque pänämaï inte ñimpo cädäni godatapa.
²² Edæ waa në bawadingä ìñömö do coadenta wadepo ayæ godömenque tömengä
 nänö ëñadi ìñonte Wængongui bamönengæ cæcä waa bacä adinque tömänäni ædö
 cæte wadö ante pönënguänii.

Wede pönente täi pïñænte cæcæmönimpa, ante Wængongui ingante apænedänipa

²³ Mänii ñimpo cädäni godinque Pegodo tönö Wäö ìñömö tömëna tönö
 godongämæ pönënanäni weca ponte apænedinque, Wængongui qui, ante në godönäni
 ñænänäni tönö në aadäni näni Picæncabo ìñömö mönatö imönate ìimaï änäni wæ-
 tamönäpa, ante tömänö ante adodö ante apænedä. ²⁴ Èñëninque tömënäni näni pö-
 nencabo adoyömö pönëninque Wængongui ingante adotedä tedete apænecädän-
 impa. “Awënë Wængongui ëñëmi. Tæiyæ Awënë ìñömi inte bitö öönæ owocoo tö-
 mancoo inguipoga tömämæ gäwapentibæ tömämæ badöninque öönädë owodäni
 yæipodë quëwënäni gäwapäa owodäni æyömömë quëwënäni tömänäni ìnänite bitö
 adobique badongabiimpa. ²⁵ Ìnque mönitö mämmæ Dabii wodi ingante apæned-
 inque bitö, Dabii ëñëmi, Bitö botö imote në cädömi ìñömite botö Tæiyæ Waëmö
 Önöwoca apænecä ëñëninque bitö wæætë ìimaï ante apænecæbiimpa.
 ‘Wädäni në ëñënämaï ìnäni incæ quïnante ænguï badinque wido cæcæte ante
 cädäni.

Waodäni näni cabo waodäni näni cabo incæ idiquibæ ante quïnante pönënanitawo.

²⁶ Inguipoga awënë odeyeidi, Wido cæcæimpa, ante tæi gongænte ongönänpa. Pancabaa awënëidi adobaï, Æbänö cæquimöö, ante godongämæ pönëninque mönö Awënë ingante ayæ tömengä nänö në öni pæcadongä Codito ingante piinte änewënanänpa töö, 'ante apænebi ëñëninque mäemæ Dabii wodi wæætë bitö beyæ apænecacäimpa."

²⁷ Ante Wængongui ingante apænedinque ñowodäni nāni pönencabo godömenque apænedänitapa. "Wængongui ëñëmi. Tömëmi Wengä bitö Tæiyæ Waëmö inongä iñongante bitö, Botö imote në cæbi bacæbiimpa, ante öni pæcagabiimpa. Näwangä impa. Incæte bitö imite në cædongä iñongante Itota bitö në öni pæcadongä ingante edæ Edode tönö Pontio Pidato tönö idægoidi tönö wadäni tönö piinte adoyömö ponte möni quëwënomö incæ ongöninque bitö imite në cædongä ingante, Æbänö cæte wido cæquiï, ante do cædänitapa. ²⁸ Edæ bitö tæi piñæmi inömi inte nāmā pönëninque edæ, Iïmaï baquinö angüenë, ante do angabiimpa. Tömënanäni guiquenë bitö angainö bai wæætë cædinque piinte pö gongænte cædänitapa. ²⁹ Ñöwo iñömö bitö imite në cæmöni iñömönite ñowodäni pönö piinte änāni ate wædinque bitö wæætë pönö cæbi ate mönitö tæi piñæninque bitö änö ante guïñenämaï apænecæmönimpa. ³⁰ Ayæ në wënæ wënæ ināni inänite bitö önompoca pönö gampobi ate waa bacædänimpa, ämönipa. Ayæ bitö Wengä Itota Tæiyæ Waëmö iñongante mönitö tömengä ëmowo apænedinque, Wadäni pönencædänimpa, ante mä cædinque bamönengæ cæmöni adinque tömënanäni guïñente wæcædänimpa ämönipa," ante Wængongui ingante apænedänitapa.

³¹ Iinque apænedäni ate tömënanäni nāni godämæ ongöñömö incæ iñontobæ oca oca cætapa. Cæyö tömänāni inänite Wængongui Tæiyæ Waëmö Önowoca pö guicä æninque ædæmö ewocadinque tömënanäni Wængongui nänö änö ante guïñenedāmaï inte edonque apænecadänimpa.

Tömämö mönö quincoo impa, ante cædänipa

³² Ayæ tömänāni nāni pönencabo incæ tömënanäni nāni ewocadö adodö ewocate bai ināni inte mïmönë adodö ante pönëninque tömënanäni ëadincoo incæ, Botö qui impa, ante änāmaï ināni inte, Tömämö mönö qui impa, ante pæ gompodāmaï inönänimpa. ³³ Ayæ Itota nänö da godongaināni iñömö tæi piñænte apænedinque, Itota Codito ñāni ömæmongantapa, ante cöwë nāni apænedi bai apænedönänimpa. Edæ Wængongui tömënanäni inänite waadete pönö cæcä ate watapæ quëwënonänimpa. ³⁴ Ayæ tömënanäni nāni cabo incæ æcämenque ömæpocä i iñömö edæ dæ angantapa. Edæ ömæ nāni ëadi incæ godonte æninque oncö mäenonte nāni ëadi incæ godonte æninque tömënanäni nāni godonte æninta ænte pöninque ³⁵ Itota nänö da godongaināni weca ænte mämö ñö cædäni æninque tömënanäni wæætë ömæpodäni inänite godönäni eyepæ eyepæ ænönänimpa. ³⁶ Iinque Itota nänö da godongaināni iñönäni adocanque Debiï wodi pæingä Ootee ingacäimpa. Tömengä iñömö, Wadäni wampo pönente quëwencædänimpa, ante në ædæmö apænedongä iñongante wadäni tömengä ingante Bedënabee ante pönö pemongadänimpa. Iingä Ootee Bedënabee nāni pemöningä iñömö Tipidebæ quëwente pöningä inte edæ, ³⁷ tömengä ömæ ëadi godonte æninque tömengä nänö godonte æninta Itota nänö da godongaināni weca mämö ñö cægacäimpa.

Änäniya tönö Tapidä

5 Mäniñedē Änäniya näni änongä tömengä nänöogängä Tapidä tönö tömēnāni näni cæi bai cædinque ömæ nāna eadimæ godonte ænatapa. ² Ayæ nänöogängä eñeñongä tömēna godonte nāna æninta incæ Änäniya iñömö pancataa pæ gompote æninque wæætē pancataa ænte mämö Itota nänö da godongaināni weca nō cæcantapa. ³ Nō cæcä adinque Pegodo,

—Änäniya eñēmi. Tatāna ingante ædæmō entawēmi inte ömæ beyæ bitō æninta pancataa, Botō qui, ante awēmō nō cædinque edæ pancataa ænte mämö nō cædinque bitō, Tömanta impa, ante quimæ anewēē. Iñæmpa, babæ cædimi inte bitō Wængongui Tæiyæ Waēmō Önöwoca ingante babæ ämipa töö. ⁴ Edæ bitō ömæ ini incæ bitō qui cōwē intapa. Ayæ nōwo mäninta æninque, Æbänö cæquii, ante tömēmi nē ämi imitapa. Ininque edæ mimōno pönēninque quimæ wapiticæ cæbitawo. Bitō mänömaï cædinque waodāni inānite wii babæ apænedinque Wængongui ingante babæ apænebitapa töö.

⁵ Angä eñente wædinque Änäniya iñömö tæ wæante æmæwo wængantapa. Wængä adinque tededāni eñēninque tömānāni guiñente wædānitapa. ⁶ Wængä ininque edēnināni ponte wini caate næænte mao daga wēnānitapa. ⁷ Dobæ wængä ate todee ooda go ate tömengä æbänö wængä ante eñēnāmaï iningä inte tömengä nänöogängä incæ pō guicä. ⁸ Adinque Pegodo tömengä ingante,

—Apænebi eñēmoē. Minatō ömæ godöninque mänimpota æminatawo. Äñongä, Ao, mänimpota.

⁹ Angä eñēninque Pegodo wæætē,

Minatō iñæmpa edæ guëa pönēninque, Mönö Awënë Önöwoca æbänö panguingäa, ante quimæ cæminatawo. Edæ bitō nänöogängä baö ini nē daga wēnināni incæ do dao pönāni eñēmii. Edæ bitō baö adobaï ænte gocædānimpa töö.

¹⁰ Tæcæ ante äñongä onquiyängä iñömö tömengä önöwa gäänē tæ wææninque näñe wængantapa. Wængä ate mänii edēnināni pō guite ayönāni dobæ wænte a öñongä adinque tömengä baö ini æninque tömengä nänöogängä wodido gäänē mao daga wēnānitapa. ¹¹ Mänömaï näñe wænapa, ante tededāni eñēninque Codito ingante näni nē godongämæ pönencabo tönö wadāni tömānāni ancaï guiñente wægadānimpa.

Ate eñencædānimpa, ante bamönengä nanguï cædānipa

¹² Mäniñedē Itota nänö da godongaināni iñömö Wængongui Önöwoca tönö cædinque, Ate pönencædānimpa, ante wadāni ayönāni mä cædinque bamönengä nanguï cædönānimpa. Ayæ adoyömö pönēninque tömānāni Wængongui oncö Tadömöö yabæcönē näni änoncönē pō guii pō guii cædönānimpa. ¹³ Wadāni tömēnāni inānite adinque, Nē pönēnāni waa quēwēnāni inānipa, ante pönēnāni incæte guiñente wædinque godongämæ pō guidāmaï gomö adönānimpa. ¹⁴ Pancadāniya guiquēnē onguiñænāni tönö onquiyænāni tönö nanguï ināni mönö Awënë ingante nōwo pönēnānitapa. Iināni iñömö do pönēnināni tönö adocabodāni bacoo ināni bagadānimpa. ¹⁵ Ininque mänii bamönengä cædāni adinque wadāni wēnæ wēnæ ināni inānite ænte pöninque möimoga möincodē nō cædānitapa. Edæ, Pegodo nænque pämo wodo pänta goyongä tömengä gänēñömö öñöninque adocanque adocanque waa bacædānimpa, ante cædinque Pegodo nänö goquino ante ænte mämö nō cædāni

önönänitapa. ¹⁶ Ayæ adobai Eedotadëe eyequei wayömö näni quëwëñömö wayömö näni quëwëñömö quëwëninque wadäni wënæ wënæ inäni inänite näænte mämö näænte mämö cönönäni ate tömänäni waa badänitapa. Ayæ wënæ në wentamö ewocadäni inte yewænte wæwënanäni inänite adobai ænte mämö pöninque waa badänitapa.

Itota nänö da godongainäni inänite piinte tee mönedänipa

¹⁷ Wængongui qui, ante në godongä ñænængä pöni inongä tönö wadäni tömengä tönö godongämæ cädäni incæ Tadoteoidi inönäni inte, Näni ömämönämaï ingæimpa, ante në pönänäni inönänimpa. Ìninqe Itota nänö da godongainäni mänömaï waa cädäni ate wædinque awënë tönö Tadoteoidi inönö tömënäni inänite piinte agadänimpa. ¹⁸ Ìninqe Itota nänö da godongainäni inänite yao ongonte æninqe tömänäni ayönäni tee mönedänitapa. ¹⁹ Tee mönedäni wæcönönänite Wængongui anquedo woyowotæ ponte odemö wi ænete mantacä tayönänite apænecan-tapa. ²⁰ “Goedäni. Wængongui oncö ñænæncö yabæcönë go guite nä gongæninque minitö mäniñömö pönäni inänite apænedinque, Wængongui pönö cæcä beyænque mönö quëwengæimpa, ante ædæmö apænemini ëñencädänimpa.” ²¹ Angä ëñente cædinque tömënäni baönæ ñäö bayonte Wængongui oncö ñænæncö yabæcönë do go guidinqe odömönte apænedäni ëñänitapa.

Mänömaï do go guite apænedänipa, ante ëñänämaï inäni inte edæ, Wængongui qui, ante në godongä ñænængä pöni inongä guiquënë tömengä tönö godongämæ cädäni tönö adoyömö pö guidänitapa. Pöninque tömënäni idægoidi inänite në aadäni Picænäni godongämæ näni Apænte Änoncabo tömänäni inänite ænete pönänitapa. Ìnänäni wæætë tontadoidi awënëidi inänite äninque, Minitö tee möneincönë gote Itota nänö da godongainäni inänite ænete mämömini poncädänimpa. ²² Änäni tee möneincönë gote ayönäni edæ dæ änäni ante wædinque wææ wänönäni awënëidi gode ancæ pöninque, ²³ iimaï ante apænedänitapa.

—Gote ayömöni oncö ædæmö tee mönete intapa. Ayæ tontadoidi odemö pöni a ongönäni adinque mönitö go wi ænete guiyömöni edæ dæ änäni ate wædinque wadæ pömönipa. ²⁴ Ante tededäni ëñëninque, Wængongui qui, ante në godönäni ñænænäni tönö Wængongui oncö ñænæncö ante në wææ wänönäni tæiyæ awënë tönö guifente wædinque, Nöwo quiëmë bai bacæimpa. ²⁵ Ante wæyönäni wacä do pö guidinqe tömënäni inänite,

—Aquënë quëwëmini. Mäninäni mini tee mönedänäni incæ Wængongui oncö ñænæncö yabæcönë go guite a ongöninque mäniñömö pönäni inänite odömönte apænedäni ëñänäni ataqueedäni.

²⁶ Ante apænecaï ëñente wædinque wææ wänönäni awënë tömengä nänö wææ wänoncabo tönö Itota nänö da godongainäni inänite æncæ godinque, Godongämæ ongönäni incæ piinte tacädäni wæcæ wæ, äninque pänämaï inte ee ænte pönänitapa. ²⁷ Ænte pöninque në aadäni Picænäni godongämæ näni Apænte Änoncabo weca ænte mämö gönönäni gongæñönänite, Wængongui qui, ante në godongä ñænængä pöni inongä inönö tömënäni inänite angantapa.

²⁸ —Mäningä Itota ëmowo apænedinque wadäni inänite odömönämaï imæwedäni, ante ancaa antamönipa töö. Incæte minitö mänine mini odömönte anewënë ante Eedotadëe tömäo odömönte apænemünipa. Ayæ godömenque

tedewēninque mīnitō, Māningā nē wængaingā ingante awēnēidi nē wēnæ wēnæ cædināni inānīpa, ante mōnitō imōnitedō ante ānewēmīnīpa tōō.

²⁹ Ante nē nāenængā pīiŋongā Pegodoidi wæætē,

—Mōnitō guiquēnē waomīni imīnite ēñēnāmaī inte Wængonguī ingante ēñente cæquēnēmōni imōnīpa. ³⁰ Mīnitō Itota ingante nāenquedīmæ timpote wænōmīni wængā ate mōnō wæmæidi Wængonguī incæ angā nāni ōmæmongantapa. ³¹ Ayæ nē nāni ōmæmōningā ingante apænedinque Wængonguī, Bitō, Quēwencædānīmpa, ante nē Æmi bacæbiīmpa, angacāīmpa. Nē Æmi iñōmite idægoidi tōmānāni, Idæwaa wēnæ wēnæ cæte quēwente awædō, ante botō gāmænō poncædānīmpa, ante cæcæbiīmpa. Bitō æmi beyænque botō tōmēnāni inānite pōnō waadete nīmpo cæcæboīmpa. Ante cædinque edæ Itota nānō Awēnē baquinque Wængonguī æmōnga ænte mæicā æidinque Wængonguī tōmēmæ inō tæ contate ongoncampa. ³² Itota ingante Wængonguī ænte mæicā æigacāīmpa, ante nē adīmōni inte mōnitō mānīnō ante nē apænēmōni imōnīpa. Ayæ nē ēñēmō cæmō iñōmonte Wængonguī tōmengā Tæiyæ Wæmō Ōnōwoca ingante da pōnongā ænte ewocamōmpa. Tōmengā Ōnōwoca adobaī mōnitō tōnō godongāmæ nē apænecā ingampa, ante Pegodoidi apænedānītpa.

³³ Mānōmaī apænedāni ēñēninque awēnēidi ænguī badinque tōmēnāni inānite edæ wænoncæ cædānītpa. ³⁴ Māniñedē adocanque Paditeocā incæ tōmengā emōwo Gāmadiēdo tōmēnāni nāni wææ angāinō ante nē ēñengā iñongante tōmānāni tōmengā ingante waa adōnānīmpa. Inīnque tōmēnāni nāni Apænte Āincabo wænoncæ cæyōnāni māningā iñōmō tōmēnāni nāni nē waadecā iñongā inte ængæ gantidinque, Itota nānō da godongāināni inānite oncodo mantamīni wantæ ongoncædānīmpa. ³⁵ Angā dæ godāni inīnque Gāmadiēdo wæætē awēnēidi inānite apænecantapa.

—Idægoidi ēñēedāni. Māniñāni inānite æbānō cæquiī, ante ædæmō pōnente ate edæ ee cædāni. ³⁶ Edæ doyedē wacā Teodo adobaingā ængæ gantidinque, Botō nē nanguī cæbo imōpa, ante āñongante edæ tōmengā miñæ coatodo tiento ganca ināni godānītpa, ante pōnēedāni. Tōmengā ingante wadāni māo wænōnāni wængā ate tōmengā emiñænīnāni wæætē nāwæ godāni ate edæ dæ batīmpa. ³⁷ Ayæ ate edæ awēnē, Mīnitō emōwo ponte yewæmoncæmīnīmpa, ante nānō āniñedē wacā Gādideabæ quēwēningā Oodaa adobaī awēnē ingante wido cæcæte ante ængæ gantiyongā nanguī ināni tōmengā miñæ goyōnāni tōmengā ingante wænōnāni wængā ate nāwæ adobaī gogadānīmpa. ³⁸ Inīnque, Mānōmaī batīmpa, ante pōnente cædāni. Nōwo iñōmō iñāni adobaī ængæ gantidāni adinque mīnitō tōmēnāni inānite ee ate gomō aedāni āmōpa. Tōmēnāni waodānīque inte cædāni baī ædō cæte cæquinānīi. Edæ dæ bacāīmpa. ³⁹ Wæætē Wængonguī angā ēñente cædāni baī mīnitō ædō cæte Baa ante wido cæquimīnīi. Edæ mīnitō mānōmaī cædinque Wængonguī ingante pīimīni inte wæbaimīnīpa.

Ante wææ angā ēñente wædinque Ao ante tōmengā nānō ānō baī cædānītpa. ⁴⁰ Itota nānō da godongāināni inānite aa pedāni pōnāni ate awēnēidi, Pædāni, ānāni ēñēninque nē wææ wānōnāni æmontaimenca tæi tæi pānānītpa. Ayæ awēnēidi godōmenque, Itota emōwo ante apænedāmaī imæwedāni, ante ānīnque Itota nānō da godongāināni inānite nīmpo cædāni godānītpa. ⁴¹ Nē Apænte nāni Āincabo weca ongoncæ tao godinque tōmēnāni wæætē, Wængonguī mōnō imōnte adinque, Botō Wēñængā emōwo beyæ wadāni wēnæ wēnæ ānāni ate mīnitō eyepæ inte caate wæcæmīnīmpa, ante do cæcampa, ante pōnēninque edæ nanguī togadānīmpa. ⁴² In-

inque Wængongui oncö ñænæncö yabæcönë incæ waodāni oncönë incæ tömēnāni ñimpo cædāmai inte cōwë go guii go guii cædinque cōwë odömonte apænedinque, Itota tömengä näwangä mönö Codito ingampa, ante watapæ apænedāni ēñengadānimpa.

Tiæte ganca ināni nē nēnempodāni badānipa

6 Itota ingante nē tee empote quëwēnāni māniñedē nangui ināni badāni ate pancadāniya guidiego tededö nē tededāni iñömö ebedeo tededö nē tededāni inānite piunte āninqe, Minitö mini cabo owæmpoināni inānite iimö iñö iimö iñö cængui eyepæ godöninque möni cabo owæmpoināni inānite pönönāmai iminipa töö, ante ānāni. ² Itota nānö nē da godongaināni iñömö dote ganca ināni iñönānite wadāni, Dote inānipa, ante pemonte bai apænedönānimpa. Iñāni iñömö guidiegoidi mänömainö ante wädānipa, ante ēñente wædinque wadāni Itota ingante nē tee empote quëwēnāni inānite āñete godongämæ pönāni ate tömēnāni inānite,

—Wængongui nānö apænedö ante nē apænequēñēmöni inte mönitö ædö cæte möni cæquēñenö ante ñimpo cædinque cænguinqe ante godonguimöni. ³ Iñinqe botö tönñamini ēñeedāni. Mini pönencabo nāmä cōwä adinque, Æcänö æcänö Wængongui Önöwoca tönö äawoquake bai ewocate nö cædāni ināni, ante adinque minitö tiæte ganca ināni mānimpodāni inānite apænte æedāni. Apænte æmīni adinque mönitö tömēnāni inānite, Cængui nē godömīni bacæminimpa, ämöni ēñente cæcædānimpa. ⁴ Mönitö wæætē Wængongui ingante cōwë apænedinque Wængongui nānö apænedö ante godömenque odömonte apænedinque mäninonque cæte quëwencæmönimpa.

⁵ Mänömainö ante ēñēninque tömēnāni nangui ināni inönāni inte tömānāni Ao ante edæ, Iñāni mänömai inānipa, ante adinque iimāi emönāni inānite apænte ængadānimpa. Adocanque Etebä nē wede pönengä inte Wængongui Tæiyæ Waëmö Önöwoca tönö äawoquake bai ewocacä inongäimpa. Tömengä tönö Pedipe, Podocodo tönö Niicånodo, Timönö tönö Padömēna, ayæ Antioquiya iñömö nē quëwēningä Niicodato. Iingä iñömö oodeoidi nāni pönēnö bai pönengä inte do oodeo bai bacä inongäimpa. Mānimpodāni inānite apænte æñānitapa. ⁶ Apænte æninqe Itota nānö nē da godongaināni weca ænte māmö gönönāni ongöñönānite iñāni iñömö, Minitö nē godömīni bacæminimpa, ante cædinque tömēnāni inānite gampodinque Wængongui ingante apænedānitapa.

⁷ Iñinqe Wængongui nānö apænedö ante gode ä gode ä cædinque mǎo apænedāni ēñēñönānimpa. Iñinqe Eedotadē iñömö Codito miñæ nāni tee empote quëwencabo tæiyänāni yebante bagadānimpa. Wængongui qui, ante nē godönāni incæ adobai nangui ināni wede pönēninque ēñente bagadānimpa.

Etebä ingante bæi ongönānipa

⁸ Etebä iñömö Wængongui waadete pönö cæcä ate tæi piñænte ewocadongä inte bamönengæ nangui cædongäimpa. Ayæ, Cæbo ate pönencædānimpa, ante mä cæcä adinque godongämæ ongönāni pancadāniya, Æbänö cæcää, ante wädānitapa. ⁹ Wadāni guiquēñē Etebä tönö guëa wæætēdö wæætē ancæte ante cædānitapa. Iñāni iñömö oodeoidi inönāni incæ pancadāniya Tidēnebæ quëwēnināni iñönāni pancadāniya Adecantodia iñömö quëwēnināni iñönāni pancadāniya Tiditiabæ quëwēnināni iñönāni pancadāniya Atiabæ quëwēnināni inönānimpa.

Tömēnāni doyedē wadāni inānite nē cægāināni inōnāni inte nōwo abæ tawænte godināni inōnāni inte godongāmæ pōninque adocabodāni bai badināni inōnān-impā. Tömēnāni odōmōincō ante, Mōni nē Abæ Tawænte Gocabo Odōmōincō impā, ante pemōnōnānimpā. Īnīnque tōmēnāni pancadāniya Etebā ingante wææt-edō wæætē ante cæyōnāni, ¹⁰ tōmengā nē nō ēñēnongā inte Wængonguī Ōnōwoca tōnō godongāmæ apānecā ēñēninque tōmēnāni, Æ mōnō wæætē ædō cæte wææ anguī, ante wædānitapā.

¹¹ Īnīnque nē wæætēdō wæætē ānāni adodāni incæ wadāni inānite godō awēmō ānānitapā. Mīnitō babæ ante ĩ incæte, Mōitee wodi ingante ante Etebā godō wēnæ wēnæ apānecā ēñentamōnipā, ante ōnonque ædāni. Ayæ Wængonguī ingante adobāi tōmengā godō wēnæ wēnæ ante babæ apānecā ēñentamōnipā tōō, ante incæ ædāni, ante nē abæ tawænte godināni ānānitapā. Mānōmāinō ānāni Ao ante tōmēnāni nāni angainō bai cædinque Etebā ingante ante babæ ante pīnānitapā.

¹² Mānōmāinō ante babæ ante pīnāni ēñēninque wadāni ōnōnānique incæ nē aadāni nāni Picāncabo incæ nē odōmōnāni incæ tōmānāni ænguī badānitapā. Mānōmāi ænguī badinque tōmēnāni Etebā wodi ingante bæi ongonte nē Apānte nāni Āincabo weca ænte māo gōnōnāni ongongantapā. ¹³ Pancadāniya Etebā ingante ante babæ apānedinque ĩmāi ānānitapā. Īngā ĩñōmō nīmpo cædāmāi inte cōwē Wængonguī oncō tæiyæ wæmō oncō ĩñonte wīwa tedewēninque tōmengā godōmenque Mōitee wodi nānō wææ angainō ante godō wīwa ante babæ apānecā ēñentamōnipā.

¹⁴ ĩñōmō oncō ante apānedinque adocā Etebā ĩñōmō, Itota Nāatadeta nē quēwēningā ĩi oncō bæ tadete wido cæcæcāimpā, ante ānewengampā. Ayæ adocā Itota ĩñōmō, ĩmāi cædāni, ante Mōitee wodi nānō wææ angainō ante Ao ānāmāi inte edæ, Wadō ante cæquēnēmīni ĩmīnipā, ante odōmongampā, ante ĩngā Etebā ĩñōmō adobāi ānewengā ēñentamōnipā tōō, ante babæ apānegadānimpā.

¹⁵ Mānōmāi babæ apānedāni ēñēninque nē Apānte nāni Āincabo incæ Etebā ingante cōwā ayōnāni tōmengā awinca Wængonguī anquedo nānō ēmōnō bai ēmongā agadānimpā.

Etebā nāmā wææ apānecampā

7 Īnīnque, Wængonguī quī, ante nē godongā nānængā pōni ĩnongā ĩñōmō Etebā ingante ānīnque, Bitō ĩmitedō nāni ānīnō nāwangā intawoo. ² Āñongante Etebā wæætē ĩmāi ante nāmā wææ apānecantapā. “Botō wæmpoidi ēñēedāni. Botō tōniñāmīni ēñēedāni. Mōnō wæmæ Abadāō wodi Mēetopotāmiabæ ayæ quēwēninque Cadāna ĩñōmō ayæ quēwēncæ godāmāi ĩñongante Wængonguī nē nāō apāite bai ēmōnongā inte Abadāō weca ponte a ongongā agacāimpā. ³ Ayæ Abadāō ingante apānedinque Wængonguī, ‘Bitō guīdēnāni inānite ēmō cæte bitō ōmæ ēmō cæte godinque wabæca botō odōmonguīmæca æmæwo wadæ goe,’ angacāimpā. ⁴ Angā ēñente cædinque Abadāō wodi māniōmæ Cadeabæ ēmō cæte wadæ godinque Cadāna nāni quēwēñōmō ganca pōninque quēwengacāimpā. Ayæ tōmengā wæmpo wodi wængā ate Wængonguī tōmengā ingante angā ēñēninque Abadāō ĩmæca mōnō nōwo quēwēnæ ponte quēwengacāimpā.”

⁵ “Incæte Wængonguī, Tōmēmi ōmæ, ante Abadāō wodi ingante cabo incæ ōmæ pōnōnāmāi ingacāimpā. Wæætē Abadāō wodi wēñængā mæmpo ĩnāmāi ĩñongante Wængonguī, ĩmæ incæ bitō ænguīmæ ĩñonte bitō pāināni adobæ tōmāō quēwēncædānimpā, ante odōmongacāimpā. ⁶ Ayæ godōmenque apānedinque Wæn-

gonguī, Bitö pæināni iñömö wabæca gote mānimæ quëwënāni weca quëwëñönānite iñāni wæætë bitö pæināni inānite edæ ö ænte bai cædinque, Mönitö beyænque cæedāni, ante nanguī ānāni wæcædānimpa. Ayæ tōmënāni nempo wantæpiyæ coatodo tiento wadepo ganca mānimpoga quëwëñönānite adodāni wënæ wënæ cædāni beyæ caate wæcædānimpa. ⁷ Ante Wængonguī godōmenque apænedinque, ‘Bitö pæināni inānite nē ö ænte wënæ wënæ cædāni inānite botö wæætë apænte ān- inque pancæboimpa. Ayæ iincayæ ate bitö pæināni māniömæ tōmënāni nāni caate wædiōmæ ëmö cæte wadæ pōninque iimæca wæætë pōninque botö Wængonguīmo iñōmote botö beyæ cæquināni inānipa.’ ⁸ Äninqe Wængonguī, Mönö godongämæ cæcæimpa, ante pönö cæbo ate mīnitö wæætë Ao ante ëñente cæcæmīnimpa. Mänö- maī ante cædinque mīnitö onguīñæmīnique ëö togænte caate wædinque ëñencæmīn- impa. Angä ëñëninque Abadäö wodi wëñængä Itæca ëñacä ate tōmengä nänö ëñadi adoque Wængonguī itadë go ate tōmengä ingante ëö togængacäimpa. Itæca wodi pæte wææ Aacobo wæmpo bagacäimpa. Aacobo wodi pæte wææ dote ganca ināni tapæicä wææ mönö wæmæidi wodi baquinque pægadānimpa.”

⁹ Ante apænedinque Etebä godōmenque, “Mānināni mönö wæmæidi ingaināni iñömö tōmënāni biwī Ootee ingante ante adinque piinte wædinque tigitamö beyænque pædæ godönāni ö æninqe Equitobæ ænte mäodāni gogacäimpa. Equitobæ pōninque tōmënāni godonte æncæte ante cædinque Ootee wodi ingante māniñömö quëwengä nempo pædæ godönāni awënë beyænque cæte quëwengan- tapa. Mänömaī quëwengä incæte tōmengä tönö godongämæ Wængonguī cōwë cæ- gacäimpa. ¹⁰ İninqe Ootee wodi ingante nanguī wiwa cædāni wæyongante Wæn- gonguī cōwë wææ aacä quëwengacäimpa. Ayæ Wængonguī pönö apænecä ëñë- inque nē ëñente bayongante Equitobæ tæiyæ awënë Padaönö incæ tōmengä ingante waa adinque, Botö tæiyæ awënë imo bai bitö wodo adobaī badinque Equitobæ wædænque awënë bacæbiimpa. Ayæ adobaī botö awënë onconcoo bitö aacæbiimpa, angacäimpa.”

¹¹ Ante apænecä ëñëñönāni Etebä godōmenque, “Māniñedë Equitobæ tōmäo Cānaämæ tōmäo to aminte bayonte tepæmpo gæwænte wædönānimpa. Mönö wæmæidi cænguī æncæte ante cædinque ænāmaī inönānimpa. ¹² İninqe, Equitobæ cænguī ayæ mäë öñompa, ante tededāni ëñëninque wæmpocä Aacobo wodi mönö mäemæidi nē baquināni inānite āninqe, Botö wëmīni, Equitobæ godinque cænguī ænte pödāni, angä mä gogadānimpa. ¹³ Gote pōninque ayæ wæætë mempoga gote a ongönāni adinque Ootee wodi incæ tōmengä mēmōidi inānite, Botö mīnitö biwīmo ëñagaimö imopa, angä wægadānimpa. Ayæ, Ootee guidënāni do pönānipa, ante tededāni ëñëninque awënë Padaönö ingante gode ānāni edonque ëñengacäimpa. ¹⁴ Ayæ ate Ootee wodi tōmengä wæmpo Aacobo wodi nāni pæincabo tetenta i tinco ganca mānimpodāni āñecä gogadānimpa. ¹⁵ Aacobo wodi mānömaī Equitobæ gote quëwëninque wængacäimpa. Ayæ tōmengä pæināni wææ mönö wæmæidi ingaināni inte adobaī māniñömö gote quëwente wængadānimpa. ¹⁶ Abadäö wodi wëñëñedë, Mönitö wodido, ante Caämōdo wënāni nāni ānimpota mānimpota godonte æninqe Tiquemö iñömö ömæ godonte ænongäimpa. Ante do againāni inte mönö wæmæidi nōwo Aacobo wodi bayetoca ingāi Cānaämæ ænte pōninque, ayæ iincayæ ate wææ tōmengä wënāni bayetoca ingāi Abadäö wodi nänö ængaimæ tōmënāni wodido in- gāiñömö mämö daga wengadānimpa.”

¹⁷ Ante apäenedinque Etebä godömenque apäenecantapa. “Abadäo wodi ingante Wængongui wëenëhedë nänö, Botö wantäpiyä ate bitö päinani inänite adodö ænte mämömo poncädänimpa, ante nänö angäñhedë wodo iinque bayonte tömënanä Equitobæ quëwëninque nanguï bacoo yebænte bagadänimpa. ¹⁸ Mänñhedë wacä onguñnängä ñowocä incæ, Ootee wodi æcänö ingacäi, ante ëñënamäi inongä inte Equitobæ awënë bagacäimpa. ¹⁹ Tömengä iñömö mönö guidënanäi wodi inänite wapiticæ ante wënæ wënæ cægacäimpa. Tömengä, Minitö wëñänäni tæcæ ëñadäni inänite wido cæedäni, ante piingä ëñente wædinque mönö wëmæidi wodi incæ tæcæ ëñadäni inänite yabæque wido yabæque wido cæedäni wængadänimpa.”

²⁰ “Tömënanäi mänömaï näni cægäñhedë incæ Möitee wodi ëñate pægacäimpa. Tömengä waëmö wëñä iñongante Wængongui waa acampa, ante pönëninque mëa go adoque apäicä go ate tömengä ingante mæmpo oncönë pæ gompote pæpogada pæcantapa. ²¹ Ayä, Wänönäni wæncæ wæ, ante guiñente cædinque tömëna tömengä ingante yabæque gäwapæ yædopæ wo cæda ongöñongante awënë Padaönö wengä onquiyängä adinque, Botö wë, ante cædinque Möitee ingante ænte pæpogacä pægacäimpa. ²² Mänömaï cæcä beyä equitoidi näni ëñengäinö ante tömänö ante odömönäni ëñente pædinque Möitee wodi në angä baquinque nangui cæcä baquinque täi piñänongä inte pægacäimpa.”

²³ Ante Etebä godömenque apäenedinque, “Ayä æmäwo pædinque coadenta wadepo nänö ëñagäñhedë Möitee wodi, Idægoidi botö tönñadäni inänite ëñacæ gobote, ante ëñacæ gocantapa. ²⁴ Gote ëñayongä, Equito onguñnängä incæ botö guidengä ingante wiwa cæcä caate wæcampa, ante adinque Möitee wodi tömengä guidengä ingante wææ cæcæte ante cædinque tiyänö tiyæ cædinque Equito onguñnängä ingante wæñongä wængacäimpa. ²⁵ Edæ, Wængongui botö imote äninque, Bitö idægoidi inänite ö ænte mäobi wadæ gocädänimpa, ante do angä ëñentabopa, ante do ëñëningä inte Möitee wodi, Idægoidi adobaï ante ëñente pönencädänimpa, ante pönente cæyongä tömënanäi wæætë mäninö ante ëñënamäi ingadänimpa. ²⁶ Mänömaï i ininque Möitee wodi iimö ate ponte ayongä idægoda wæætëdö wæætë cæda adinque, ‘Inäna, mina guidencaya incæ wacä ingante quimæ wënæ wënæ cæte quëwëminaa.’ ²⁷ Ante, Guëa waa waadete quëwencädäimpa, ante cæyongä adocanque tömengä guidengä ingante në wënæ wënæ cædingä guiquënë Möitee wodi ingante bæ tadinque angantapa. ‘Inæmpa, Bitö mönitö awënë inömi imipa, ante, Në apænte ämi imipa, ante æcänö bitö imite në änaï. ²⁸ Edæ Equito ingante iimö bitö wænömi bai ñowoönæ adobaï botö imote wænoncæte ante pönëmi awädö.’ ²⁹ Angä ëñente wædinque Möitee wæætë wodii winongacäimpa. Wodii winonte wabæca Mäadiämæ gote wadäni ömæ quëwëninque wëñäna mënaa wæmpocä bagacäimpa.”

³⁰ Ante apäenedinque Etebä godömenque awënëidi inänite iimaï ante apäenecantapa.

“Ayä wæætë coadenta wadepo go ate Möitee wodi önömæca cægöninque onquiyabo Tinaiquidi gämänö gote dadi ëmænte ayongä ocäñequiwæ gonga bæcöyömö Wængongui anquedo ponte a ongongä agacäimpa. ³¹ Ate wædinque Möitee wodi, Quinö bai inte bæco ante botö wiimonte bai aboo, ante acæte ante pönömenque pönongante mönö Awënë tömengä ingante iimaï ante apänegacäimpa. ³² ‘Bitö wëmæidi Wængonguimo inömo inte botö Abadäo wodi Itæca wodi Aacobo wodi Wængonguimo inömo imopa.’ Ante apäñecä ëñente wædinque Möitee wodi

do do wäate guiñente wædinque, Wii ainente awædö, ante cægacäimpa. ³³ Mänö-mai cæyongante mönö Awënë wæætë, 'Bitö nä gongænte ongöñömö botö adoyömö ongömo beyænque onguipoi tæiyæ waëmö impa, ante pönëninque bitö awæncata gä tadöwæ ämopa. ³⁴ Botö edæ cöwä adinque, Botö quinäni inänite equitoidi æbänö wænæ wænæ cædäni, ante do abopa. Tömënanä caate ö ö wædäni do ëñente wædinque botö, Nïmpo cæbo ate abæ tawænte gocædänimpa, ante wææ pömo imopa. Nöwo ññömö edæ ægodöe. Botö, Equitobæ gocæbiimpa, ante bitö ñmite adodö da godömo gocæbiimpa,' ante Wængongui Möitee wodi ingante angacäimpa."

³⁵ Ante apænedinque Etebä ñimai ante godömenque apænecantapa. "Adocä Möitee ingante pïininque idægoidi doyedë, 'Ïñæmpa, Bitö mönitö awënë inömi imipa, Në apænte änömi imipa, ante æcänö bitö ñmite në änai,' ante änönänimpa. Nöwo ññömö Wængongui anquedo ocäñequi ññömö pöninque tömënanä nani në pïingaingä adocä Möitee ingante, Bitö idægoidi awënë bacæbiimpa, angacäimpa. Bitö tömënanä inänite ö æninque ænte mäobi abæ tawænte gocædänimpa, ante cædinque Wængongui bitö ñmite da godongä gocæbiimpa, ante Wængongui beyæ apænedinque Wængongui anquedo angacäimpa. ³⁶ Möitee ññömö, Ate pönencædänimpa, ante mä cædinque ayæ Wængongui tönö bamönengæ nangui cædinque idægoidi inänite ænte mäocä gogadänimpa. Equitobæ ëmö cæte wadæ pöninque gäwapæntibæ Opatawæmä yæwedecapæ pö ongöninque adocä Möitee mantacä imæmäa pongadänimpa. Önömæca ta pöninque coadenta wadepo ganca cægöñönäni tömengä, Ate pönencædänimpa, ante mä cædinque bamönengæ nangui cægacäimpa," ante Etebä wodi apænecantapa.

³⁷ Ayæ, "Adocä Möitee, Idægoidi ëñeedäni. Botö Wængongui beyæ në apænebo imo bai wacä edæ mïnitö tönñnacä incæ adobai edæ Wængongui beyæ në apænecä bacæcäimpa. Tömengä ponte apænecä ëñëninque mïnitö tömengä ingante ædæmö ëñente cæcæminimpa, ante Möitee wodi apænegacäimpa. ³⁸ Godongämæ nani Wængongui ingante apæneincabo tönö Möitee wodi önömæca cægöngöngäimpa. Mönö mäemæidi tönö cægöñönäni Wængongui anquedo wëenënedë Tinaiquidi në ponte äningä incæ adocä tönö Möitee wodi önömæca cægöngöngäimpa. Mäniñedë mönö imonte ante pönö cædinque Wængongui, Möitee ëñëmi, angacäimpa. Ïncayæ quëwenguinäni ëñente quëwencædänimpa, ante cædinque botö, Mïnitö cæte quëwenguimïni, ante apænebo ëñëninque bitö adodö ante yewæmoncæbiimpa, ante apænegacäimpa," ante Etebä apænecantapa.

³⁹ Ayæ, "Möitee wodi mänömai cæyongante mönö wæmæidi guiquënë ëñënanämaï inäni inte tömengä ingante Baa äninque Equitobæ mönö adodö gocäimpa, ante önöwënenque pönente wægadänimpa. ⁴⁰ Mänömai në wædönäni inte tömënanä wæætë Aadöo wodi ingante apænedinque, 'Aadöo ëñëmi. Mäningä, Equitobæ në ëmö cæte mönö imonte mämöningä Möitee wodi ædönö gote dæ angää, ante adämaï imönipa cæbii. Wængonguiidi inänipa, ante mönö imonte në töö æmænte ænte goquïnäni ante bitö badömi æmönie.' ⁴¹ Äninque mäniñedë, Mönö wængongui ingampa, ante cædinque tömënanä wagada wë bai badongadänimpa. Ayæ, Mönö wængongui qui impa, ante cædinque cæninäni wænöninque baö tömënanä nani badöinca gäänë ænte mämö ñö cædinque önompoca nani badöinca adinque ææmä bai cæte togadänimpa. ⁴² Mänömai cædäni ate wædinque Wængongui näëmæ, Pönë cæmïniyaa, ante pïingacäimpa. Ayæ, ñinäni öönädë owocooque ante, Wængonguiidi inänipa, ante oda cæcædänimpa, ante cædinque idægoidi inänite ñïmpo cædinque

dadi emäenique aadāmaī ingacäimpa. Edæ mäninö tömēnāni nāni cægainö bai ante pönente yewämöninque wacä wantæpiyæ ate Wængonguī beyæ iīmaī ante yewæmongacäimpa.

‘Idægoidi ēñēedāni. Ōnömæca gote coadenta wadepo ganca cægöninque mīnitö, Wængonguī qui, ante pönoncæte ante cædinque cænīnāni wænöninque baö tönö mäincoo ænte pö ænte pö cæmīni incæte

dicæ botö imote ante pönēninque pönöminī æntawogaa.

⁴³ Īnæmpa, Mönö wængonguīdi iñönānite ædæ wæænte apænecäimpa, ante cædinque mīnitö mīni badöninca adoca Mönoco mīni ānonca beyæ æmontaicö oncö næænte godinque wocæ wocæ cædöminī awædö.

Ayæ waca, Mōni wængonguī Adempaö nēmö bai owocäimpa, ante mīni badöninca næænte æmonga cö cæ cö cæ cædöminīmpa töö.

Ante adinque Wængonguī, Mänömaī cæmīni beyæ botö mīnitö imīnite Babidönia ganca da godöninque godömenque gobæ da godömo gocæminīmpa,’ angampa, ante yewæmongatīmpa.” Ante apænēdinque Etebä, Mönö wæmæidi iīmaī cægadānīmpa, ante godömenque apænecantapa.

⁴⁴ “Wængonguī doyedē Mōitee wodi ingante apænēdinque, Mīnitö æmontaicö mænonte ate botö wææ ante yewämöninca cö cæte mancæminīmpa. Īmaī mænoncæminīmpa, ante odömongä adinque Mōitee wodi wæætē mönö wæmæidi inānite odömongä ate ēñēninque tömēnāni wæætē Wængonguī nänö odömönö bai mänömaīnonque æmontaicö mænongadānīmpa. Mänömaī mænonte ate dica wææ ante Wængonguī nänö yewæmongainca incæ mänincönē cö cægadānīmpa. Ayæ önömæca wayömö wayömö gocæte ante æmontaicö capote mongænte mao wocæ wocæ cægadānīmpa. ⁴⁵ Ayæ wadāni māniömæ nē quēwēnāni iñönānite Wængonguī wido cæcä ate mönö wæmæidi Ootowee wodi mīñæ ponte ömæ æninque Wængonguī oncö æmontaicö nāni ænte mongængaincö mämö wodongadānīmpa. Wodönāni ate Awēñē Dabii wodi nänö ēñate quēwenguimpoga mänincö æmontaicö incæ ayæ a owogatīmpa. ⁴⁶ Awēñē Dabii ingante Wængonguī pönö waa agacäimpa. Īninque Dabii wæætē Wængonguī ingante apænēdinque, Bitö Aacobo wodi Wængonguī inömi imīpa, ante adinque botö, Bitö quēwenguīñömö, ante oncö āmi mænonguīmo, āñongante Wængonguī Baa angacäimpa. ⁴⁷ Wæætē Tadömö wodi Wængonguī beyæ nē oncö mænongä ingacäimpa. ⁴⁸ Mänömaī cægaināni incæte Wængonguī iñömö edæ æmonga pōnī nē ongongä inte waocä nänö önompoca mænönincönē ædö cæte pönö Ao ante guiite quēwenguingä. Mänömainö ante pönente wædinque Wængonguī beyæ nē apænēgaingä iīmaī ante apænēgacäimpa.

⁴⁹ ‘Botö nē Tæiyæ Awēñē inömo iñömote öönæ incæ botö Awēñē tæ contaqui bai

impa,

inguiipoga wæætē botö önöwa podöwate qui bai impa.

Mänömaī nē ongömo beyæ mīnitö botö oncö ante ædö cæte mænonguimīni.

Inguiipoga æcönēñö guīdinque guēmanguimoo, ante Wængonguī angampa.

⁵⁰ Botö iñæmpa tömēmö önompoca tömäā nē badongaimo inömo imopa,’ ante Wængonguī Awēñē angampa, ante wacä yewæmongacäimpa.”

⁵¹ Ante apænēdinque Etebä godömenque iīmaī ante apænecantapa. “Ñöwo ēñēedāni. Mīnitö mīmö ömæde imīni inte wīi pönencædö. Ōnömoncaque ēñēninque wīi ædæmö ēñēmīni imīni awædö. Mīnitö wæmæidi nāni cægainö ante ēñēmīnitawo. Īnæmpa tömēnāni nāni cægaī bai adobaī cædinque mīnitö Wængonguī

Tæiyæ Waëmö Önöwoca ingante Baa äninque cöwë wææ äminipa töö. ⁵²Minitö wæmæidi doyedë Wængongui beyæ në apænegaïnäni inänite togænte päninque adocanque ingante ata cæpodämaï inte tömänäni inänite togænte pangadänimpa. Edæ në apænedäni, Në nö entawënogä inte ponguingä ingampa, ante apæneyönänite tömënäni inänite do wænönäni wængadänimpa. Nöwo iñömö tömënäni näni, Ponguingä, angaingä incæ do pongä adinque minitö godö wænöminitapa töö. ⁵³Edæ, Iïmaï cæedäni, ante Wængongui wææ angampa, ante Wængongui anquedoidi änäni ëñëninque yewæmönäni ate minitö në adömini incæ Baa äninque ëñënaï cöwë cæminipa töö,” ante Etebä iinque apæncantapa.

Etebä ingante wænönäni wængampa

⁵⁴Mänii awënëidi guiquënë Etebä nänö apænedö ante ëñente wædinque äinäni badinque бага wentoquënë wentoquënë angate piinänitapa. ⁵⁵Etebä iñömö Wængongui Tæiyæ Waëmö Önöwoca ingante ædæmö ewocadinque öönädë inö æmö adinque Wængongui nãö apäite bai nänö ëmönö acantapa. Ayæ në Waocä ëñagaingä inte Itota incæ Wængongui tömëmæ inö adiyæ ongongä acantapa. ⁵⁶Adinque,

—Badogaa, öönädë wi ænete bai ba abopa. Waocä në ëñagaingä incæ Wængongui tömëmæ inö adiyæ ongongä abopa.

⁵⁷Ante apæncä ëñente wædinque tömënäni piinte Yæ yæ äninque ëñënaï cæcæte ante önömonca nï mämoncate cædänitapa. Godongämæ piinte quingæ tömengä weca pogodo pöninque, ⁵⁸tömengä ingante bæi ongöninque tömënäni näni quëwëñömö yabæque ænte mäo dicaca tæi tacacæ cædänitapa. Tömengä æbänö angäa, ante ënëninäni inte në apænedäni iñömö edæ tacacæ cædinque tömënäni weocoo yabæcooque gä tadongate tæcæ æmæwo pædingä Taodo näni änogä önöwaca inö nō cædönänimpa. ⁵⁹Dicaca tacayönäni Etebä iñömö Wængongui ingante apænedinque, “Awënë Itota, bitö botö önöwoca æncæbiimpa.” ⁶⁰Ante da guicapodinique yedæ äninque, “Awënë, tömënäni näni wënæ wënæ cædönö ante ee ae,” äninque edæ mö ñonte bai wængacäimpa.

8 Etebä wodi ingante wænoncæte ante dicaca tacadäni adinque Taodo guiquënë, Waa wænömini wængampa, ante Ao ante ongongacäimpa.

Në godongämæ pönëinäni inänite Taodo togænte pangä

Mäniönæ incæ mä togænte päninque Eedotadë iñömö Codito ingante näni në godongämæ pönencabo inänite godömenque nanguï togænte piinte pangadänimpa. Ate wædinque Itota nänö në da godongainänique godämaï ongöñönäni wadäni iñömö näwæ wodii winöninque Oodeabæ Tämadiabæ æmänö æmänö gogadänimpa. ²Mänii Etebä wodi ingante æmæwo wænönäni wængä ate Wængongui ingante në waa adäni incæ Ca ca wædinque mäo daga wenänitapa. ³Taodo guiquënë, Itota ingante në pönëinäni inänite wido cæcæimpa, ante nanguï wënæ wënæ cædinque wacönë pö guii wacönë pö guii cædinque onguïñänäni tönö onquiyänäni inänite bæi ongonte wëä mäo tee mönegadänimpa.

Tämadiabæ godinique Pedipe apæncä ëñënäni

⁴Mänii në wodii winönäni iñömö ædöme godinique Codito ingantedö ante cöwë watapæ apænedäni ëñëñänänimpa. ⁵Iinque Pedipe iñömö Tämadia näni nanguï quëwëñömö gote apænedinque, Mönö Codito æbänö do ponte cægacäi, ante

apä necä ëñënanitapa. ⁶ Mänömainö ante apänedinque tömengä, Ate pönencädän-
 impa, ante mä cäcä adinque nanguï inäni adoyömö pönëninque, Mönö ëñengäimpa,
 ante cädänitapa. ⁷ Waodäni nanguï inäni wënæidi wentamö ewocadäni tönö
 quëwënäni adinque Pedipe angä ëñëninque wënæidi incä Yæ äninque dæ tao godäni
 ate önönänique badänitapa. Ayä cömäinäni incä cabëinäni incä tæiyänäni inänite
 Pedipe cäcä ate waa badänitapa. ⁸ Ante adinque mäniñömö quëwënäni wæætë wat-
 apä togadänimpa.

⁹ Wacä idö tömengä ëmowo Timönö inñömö tömengä adoyömö quëwëninque
 wënæ tönö wantæpiyæ cäcä inongäimpa. Ininque Tämadiabæ quëwënäni tömänäni,
 Æbanö nanguï cäcä, ante guiñente wæyönänite tömengä, Në idömo inömo inte
 botö inñömö edæ nanguï cæte beyæ ñäñæmo pönï imo aedäni. ¹⁰ Angä ëñëninque
 awënëidi incä önönänique incä tömänäni adoyömö pönëninque, “Wængonguï nänö
 tæi pñænö bai entawëninque ingä idö inñömö në Tæi Pñænongä ingampa,” ante
 pönëwëninque, Në Ñænängä pönï inongä ingampa, ante pemongadinque tömengä
 apä necä ate ædæmö ëñënonänimpa.

¹¹ Ayä tömengä wantæpiyæ wënæ tönö wæætë wæætë mä cäcä adinque
 tömënäni, Tömengä ingante mönö ëñengäimpa, ante tee empo tee empo godönän-
 impa. ¹² Mänömai cæyönänite Pedipe guiquënë, Wængonguï Awënë Odeye nempo
 mönö quëwengäimpa, ante watapæ apä necä ëñënanitapa. Ayä, Mönö Codito
 inñömö tömengä ëmowo Itota ëmongampa, ante apänebo ëñëedäni. Ante apä necä
 ëñëninque onguiñänäni incä onquiyänäni incä wede pönëninque æpäñë guidäni-
 tapa. ¹³ Ininque Timönö incä adobai pönëninque æpäñë guidinque Pedipe miñæ
 tee empo tee empo gocantapa. Pedipe, Ate pönencädänimpa, ante mä cædinque tæi
 pñænente nanguï cäcä ate wædinque Timönö adocä cöwë guiñente wægacäimpa.

¹⁴ Ininque, Tämadiabæ quëwënäni Wængonguï nänö apänedö ante ëñëninque
 do Ao änänipa, ante Eedotadëe ponte tedeyönänite Itota tömengä nänö da godon-
 gäinäni incä do ëñënanitapa. Eñëninque Pegodo tönö Wäö inate Tämadiabæ da
 godönäni godatapa. ¹⁵ Godinque Tämadiabæ pöninque tæcæ mä pönënäni beyæ
 ante tömëna Wængonguï ingante iümai ante apänedatapa. Wængonguï ëñëmi. Bitö
 Tæiyæ Waëmö Önöwoca ingante tömënäniya da pönömi pö guicä ate ewocacädän-
 impa, ämönapa. ¹⁶ Edæ Awënë Itota ëmowo apänedinque tömënäni mä æpäñë
 guiyönänite bitö Tæiyæ Waëmö Önöwoca tömënäniya wæë guidämai ingan-
 tapa cæbii. Nöwo ämi pö guicacäimpa. ¹⁷ Ante apänedinque Pegodo tönö Wäö
 tömënäniya pönö gampote apäneyöna Wængonguï Tæiyæ Waëmö Önöwoca pö
 tömënäni baonga guicantapa.

¹⁸ Mänömai pönö gampoyöna Wængonguï Tæiyæ Waëmö Önöwoca tömënäniya
 pö guicä ate wædinque Timönö guiquënë tömënäni godonte äinta pædæ pönön-
 inque, ¹⁹ tömëna inate,

—Minatö bai botö adobai në cæbo bacæboimpa ämopa. Pönö cæmina ate botö
 në cæbo badinque wadäniya pönö gampobo ate Wængonguï Önöwoca adobai pö
 guicacäimpa, ämopa.

²⁰ Äñongante Pegodo,

—Bitö mini godonte äintaque pædæ godöninque, Wængonguï Önöwoca nänö
 da pönönongä ingante æncæboimpa, ante pönëwëmi. Edæ tömëmi tigitamonque
 näëninque edæ bitö ömæe ewenguinque gobäwe. ²¹ Inämpa, Wængonguï Önöwoca
 nänö da pönönongä ingante äninque godongämæ cæcæboimpa, ämitawoo. Wæn-

gonguī ayongä nö pönente cæbipa ænguīmii. Edæ mönatö tönö ædö cæte cæquīmii.
²² Nōwo edæ mäninö bitö wīwa cædinö ante wæwente pönëninque ñimpo cæe. Ayæ mönitö Awënë ingante apænebi ëñëninque tömengä wabänö pönö waadete cædinque mīmōno bitö pönëwënö ante wadæ cædinque ñimpo cæbaingampa.
²³ Bitö nämä beyænque ante nē æinëmi inte bitö mīmōnë guinæmæ entwente bai quëwëmipa. Ayæ bitö tömëmi wīwa cædö beyænque ñä cæyænte bai quëwëmipa, ante awædö.

²⁴ Angä ëñëninque Timönö wæætë,

—Æ ämi awædö, äninque Pegodo ingante, Botö minatö änö bai wī bacæboimpa, ante cædinque minatö botö beyæ Wængonguī ingante apæneeda, angantapa.

²⁵ Ayæ Wäö tönö Pegodo ñnömö, Itota incæ mönö Codito ingaingä ingampa, ante mäninömö quëwënäni inänite mönö Awënë nänö änö ante apæneda ëñëñanitapa. Ñinque apænedinque adodö Eedotadëë gocæte ante wadæ gote Tämadiabæ godinque tömëna wayömö wayömö mäo wædænque quëwënäni weca pö pö cædinque nangui inäni inänite apænedinque Codito ingantedö ante watapæ apæneda ëñëñanitapa.

Etiopæ awënë ingante Pedipe bee tengampa

²⁶ Mäningä Pedipe ingante anquedo ayæ ate ponte äninque, “Bitö ægodöe, Eedotadëë wæi Gata goquinö pædæ taoquinque betamonca gocæbiimpa,” angantapa. Mäninö önömæcaque wæidö inompa. ²⁷ Mänömainö angä ëñëninque Pedipe ængæ gantidinque wadæ godinque anquedo nänö äninonque cægonte ayongä onguinængä Etiopæ quëwëningä pö eyepæ bee tengä acantapa. Ñingä ñnömö Etiopæ tæiyæ awënë onquiyængä Cantate beyæ tömëñäni godonte æinta nē aacä inongä inte ñænæ awënë inongäimpa. Tömengä nōwo Wængonguī weca ædæ wææninque watapæ apænecæte ante Eedotadëë æidingä inte ocæ ëmænte pöninque Pedipe ingante eyepæ mämö bee tengantapa. ²⁸ Ñingä ñnömö cabayo nänö wëä pönoncadea æi tæ contate ocæ ëmænte pöninque Itaiya wodi Wængonguī beyæ nē apænegaingä nänö yewæmongainta næænte a congantapa.

²⁹ Mänömaï a conte pönongante Pedipe ingante Wængonguī Önöwoca, “Goe, Ñi cabayo nänö wëä pönoncade eyepæ godinque guëa goe,” angantapa. ³⁰ Angä ëñëninque Pedipe pogodo godinque obo ponte ëñëñongä Etiopæ awënë ñnömö Itaiya wodi nänö Wængonguī beyæ yewæmongainta adinque apænecä ëñëninque,

—Bitö ate apænëdö ante ædæmö ëñëmitawo.

³¹ Äñongante,

—Ñnæmpa ëñëmogaa. Botö imote apænëdänipa ëñënguimoo.

Ante apænedinque Pedipe ingante, Bitö botö weca æäë guite tæ contæ, angä æäë guii tæ contacantapa.

³² Mäninta Wængonguī angä ëñente nāni yewæmongainta Etiopæ awënë nänö aintaa iïmaï ante yewæmonte ongönönimpa.

“Codotedo ingante wæñongæimpa, ante bæi ongonte æninque töö godonte bai cædinque

tömengä ingante adobaï wæñoncæte ante bæi ongonte ænte godänitapa.

Obegaidi ocaguincoo ëö toyönäni wædämaï pæ wëëneccä bai

tömengä adobaï wædämaï inte pæ wëënecantapa.

³³ Püinte änäni wayongante nē apænte angüëñänäni incæ, Pangæimpa, ante cædinque nöingä ante änämaï inänitapa.

Tömengä ingante æmæwo wænönāni wængaingä iñongante,
Tömengä nānō pæināni, ante ædō cæte apænequii.”

³⁴ Ante nāni yewæmongainö adingä inte Etiopebæ awënë ñowo Pedipe ingante,
—Apænebi ëñemoe. Nē Wængongui beyæ apænegaingä iñömō æcānō ingante ante
nē apænegaicāi. Tömengä nāmā ingante ante yewæmongantawo. Edæ wacā ingante
ante yewæmongantawo, ante ëñencæte ante wæbopa.

³⁵ Ante āñongante Pedipe iñömō Etiopebæ awënë nānō adinta adotaa ate apæned-
inque ayæ wataa wataa adinque Itota ingantedō ante watapæ apænecā ëñengantapa.
³⁶ Apæneyongä taadō godinque wapæ ganca pōnatapa. Equitobæ awënë mānimæ
adinque Pedipe ingante, Waa ae. Iñömō gāwapæ impa. Æpænē guidāmaï inguimo,
āmitawoo.

³⁷ Angä ëñëninque,

—Bitō mimōno wede pōnēmi ate botō Ao āmaimopa, angantapa. Åñongante,

—Ao botō, Itota Codito nāwangä Wængongui Wengä inongä ingampa, ante wede
pōnēmopa.

³⁸ Äninque Etiopebæ awënë angä cabayo næ gongæ ate Pedipe tönō guëa æpænē
ti wææna ate Pedipe tömengä ingante æpænē guidongä guicantapa. ³⁹ Ayæ æpænē
guiite ate tömengä tao gongæñongä Wængongui Awënë Öñowoca Pedipe ingante
iñæ æænonte ö ængä. Ate æmæwo adinque Etiopebæ awënë watapæ todinque on-
cōnē goinō gocantapa. ⁴⁰ Pedipe guiquënë Atota iñömō iñontobæ a ongōninque
godōmenque wadāni nāni quëwëñömō go apænedinque wayōmō nāni quëwëñömō
go apænedinque Tetadea ganca godinque Codito ingantedō ante watapæ apænecā
ëñengadānimpa.

Awënë Itota ingante Taodo acampa

(Nāni Cægainö 22.6-16, 26.12-18)

9 Taodo guiquënë mönō Awënë ingante nē tee empote quëwënāni inānite pūin-
inque, Wængongæimpa, ante bæi ongō bæi ongō cædinque cōwë ñimpo cædā-
maï ingacāimpa. Nōwo godōmenque cæcæte ante Wængongui oncōnē gote nē
godongä ñænængä pōnī inongä ingante apænedinque, ² Awënë ëñëmi, angantapa.
Bitō Ao āmi ininque botō Daāmaco nāni quëwëñömō gote ayōmo, Onguiñænāni
incæ onquiyænāni incæ æcāmenque Itota Taadō ante nē godāni ināni, ante adinque
tömënāni inānite bæi ongonte goti winte Eedotadë ænte pōmaimopa. İninque bitō,
Taodo mānōmaï cæcæcāimpa, ante botō beyæ cadota ante yewæmōninque pædæ
pōnōmi æninque botō wæætë Daāmaco iñömō mao oodeoidi odömōincōnē awënëidi
weca gote pædæ godōmo ænte adinque tömënāni Ao āñönāni mānōmaï cæbai-
mopa. ³ Åñongä awënë Ao ante yewæmōninque pædæ pōnongä æninque Taodo Daā-
maco obo gote ayongante iñontobæ öönädë inō nāinte bai cædinque tömengä nānō
ongōñömō tömāo guinæ gongæ. ⁴ Adinque Taodo guidömëmæ tæ go wæængantapa.
Ayæ wæænte öñöñongante tömengä ingante, “Taodo. Taodo. Quinante botō imote
togænte pāmii.”

⁵ Angä ëñente wædinque Taodo wæætë, “Awënë, æmōmidō inōmi imii.” Ante
ëñëñongä, “Botō Itotabo inōmo inte bitō nē togænte pānimo mānimotō imopa cæbii.
İñæmpa wagada pāntoca bai bitō nāmā iñæ æwate bai cædinque cowate bai edæ
caate bai wæbipa töö.” ⁶ Mānōmaï apænecā ëñëninque Taodo ancai guinente do
do wæadinque, “Awënë, æbānō cæquimo āmii.” Åñongante mönō Awënë wæætë

apænecantapa. “Bitö ængæ gantidique iināni näni quëwëñömö goe. Botö, Taodo iimaï cæcæcäimpa, ante wacä ingante Daämaco iñömö nê quëwengä ingante do apænebo ëñengampa cæbii. Bitö Daämaco iñömö gote ongönömi tömengä wæætë bitö imite apænecä ëñente cæcæbiimpa.”

⁷Taodo tönö godongämæ godāni guiquënë waocä ingante adāmaï ināni incæte, Önonque tempa, ante pönëninque ancai guñente wædānitapa. ⁸Taodo iñömö onguipoga ayæ a öñongä inte ængæ gantidique awinca adāmaï ingä adinque wadāni tömengä ingante önompo bæi ongöninque Daämaco ganca ænte mäodāni gocantapa. ⁹Māniñömö gote ongöninque tömengä adāmaï inongä inte cænāmaï bedāmaï meönaa go adoönæque iñonte wæwengacäimpa.

¹⁰Ayæ wacä nê pönengä Änäniya Daämaco iñömö quëwengä inte mä pönï wïmonte bai ayongä mönö Awënë, “Änäniya,” angä ëñëninque, “Awënë, botö ëñë cömopa.”

¹¹Äñongä mönö Awënë wæætë, “Taodo ñöwo Wængongui ingante apænecampa cæbii. Bitö ængæ gantidique taadö näni Töinö änönö godinque Codaa oncönë gote äninque, Tadoto nê quëwëningä Taodo iñömö owocantawo, ante acæbiimpa. ¹²Wængongui ingante ñöwo apænedinque ate bai ayongä wacä Änäniya pö guidinque, Nöwo edonque acæbiimpa, ante gampocampa, ante ate bai Taodo wæcantapa cæbii. Tömengä wïmonte bai adinque nänö wædö bai cædinque bitö ñöwo gote cæcæbiimpa.”

¹³Angä ëñente wædinque Änäniya wæætë, “Awënë iñæmpa botö, Māningä Taodo iñömö quinö bai onguñængä ingäa, ante nanguï tededāni do ëñëmopa. Ayæ, Eedotadëe iñömö tömengä bitö quināni inānite wënæ wënæ cæcampa, ante tededāni ëñente wæbopa. ¹⁴Ayæ nê godönāni ñænænāni Ao ante yewämönāni äninque tömengä iñæmpa nê angä badinque bitö ëmöwo ante nê apænemöni iñömönite bæi ongonte tee mönecæte ante pongampa cæbii.”

¹⁵Ante wæyongante mönö Awënë wæætë Änäniya ingante, “Iingä ingante do apænte ämo apa änewëe. Tömengä ingante, Bitö wabæca gote wadāni inānite botö ëmöwo ante apænedinque ayæ tömënāni awëñëidi inānite botö ëmöwo ante apænedinque idægoidi inānite adobaï botö ëmöwo apænebi ëñencädänimpa, ante tömengä ingante do antabopa cæbii. Nöwo tömengä weca gobäwe. ¹⁶Ayæ botö nê äningä inte tömengä æbänö botö ëmöwo beyæ nanguï caate wæquënegä ingäa, ante odömömo ate ëñencæcäimpa.”

¹⁷Angä ëñëninque Taodo nänö owoyömo go guidinque Änäniya tömengä ingante gampomöninque,

—Taodo botö tönñabi ëñëmi. Bitö taadö pöninque Itota ingante abitawo. Tömengä iñömö nê Awënë inongä inte botö imote apænecantapa. Bitö Taodo weca godinque cæbi ate tömengä wëñëñedë nänö ëmönö bai adinque Wængongui Taiyæ Waëmö Öñöwoca ingante da pönömo äninque ewocæcæcäimpa, ante mönö Awënë angä ëñëninque botö bitö weca pontabopa.

¹⁸Ante Änäniya tæcæ apæneyongä Taodo tömentagæ nänö ëmönitagæ tæ wæante iñontobä edonque acantapa. Ayæ ængæ gantiyongante Änäniya tömengä ingante æpænë guidongä guicantapa. ¹⁹Ayæ cænguï cæninque tömengä baö wæætë tæi piñængä bacantapa. Ayæ Daämaco iñömö Itota ingante nê tee empote quëwënāni weca godömenque tæönæ quëwengantapa.

Daämaco iñömö Taodo apäncä ëñëñänpa

²⁰ Mäniñömö quëwëningue Taodo do oodeoidi odömöincönë go guii go guii cæd-
inque, Itota Codito näwangä Wængongui Wengä ingampa, ante apäncä ëñëñäni-
tapa. ²¹ Mänömaï apäncä ëñëningue tömengä ingante në ëñëñäni iñömö ancai
guiñëningue, “Æ. Ìngä adocä Eedotadëë iñömö Itota ëmowo ante në apänedäni
inänite në wido cæcä ìmaingampa. Tömengä adocä në wido cæcä incæ adodäni
inänite bæi ongonte äningue, Wængongui qui, ante në godönäni ñäenänäni weca
mäo pædæ godoncæte ante ñowo iñömö pöninque cæcä awædö. Edæ adocä ingänö
anguënë.”

²² Ante wädäni incæte Taodo godömenque tæi piñante entawëningue ìmai
ante apäncantapa. Awënë bacæcäimpa, ante Wængongui nänö në gao cæcadongä
iñömö mönö Codito iñömö edæ Itota adocä inongä ingampa, ante, Näwangä impa,
ante nöingä pöni apäncä. Adinque Oodeoidi Daämaco iñömö quëwëñäni guiquënë,
Ædö cæte wadö anguii, ante wægadänimpa.

Oodeoidi wänoncæ cæyönäni Taodo aamö cæte gocampa

²³ Ìnningue tæönæ go ate oodeoidi godongämæ pönente Ao äningue, Taodo ingante
wänongäimpa, ante cædänitapa. ²⁴ Mänömaï ante cæyönäni Taodo mäninö näni
äninö do ëñengantapa. Tömëñäni guiquënë, Mönö quëwëñömö wææ cæinemö tacä
ate wänömö wæncæcäimpa, ante itädë woyowotä wææ wänönänitapa. ²⁵ Wææ
wänönönäni tömengä ingante në tee empote quëwëñäni wæætë yabæ wææ cæte
iñömö Taodo ingante woyowotä mäi ayacömoyäa inö otodë pædæ wæänönäni ti
wæante gocantapa.

Taodo Eedotadëë ponte apäncampa

²⁶ Mänömaï godinque Taodo Eedotadëë pöninque, Itota ingante në tee empote
quëwëñäni weca gobote, ante pongä. Adinque tömänäni, Näwangä Itota ingante në
pönengä ingantawogaa, ante guiñente awædö, ante pönëningue wææ adänitapa.
²⁷ Bedënabee guiquënë Taodo ingante bæi ongömænte äningue Itota nänö në da
godongainäni weca ænte mämongä pongantapa. Ayæ tömëñäni inänite Bedënabee
apäncantapa. Taodo ñowo taadö godinque mönö Awënë ingante dobæ acäimpa.
Mönö Awënë tömengä ingante do apäncantapa. Daämaco gote quëwëningue
Itota ëmowo ante tömengä guiñëñämaï apänedingä inte ñowo iñömö pongä apa
quëwëminii. ²⁸ Bedënabee mänömaï angä ëñëningue Ao äñönäni Taodo Eedotadëë
iñömö quëwëningue tao guite ta tao guite ta cædningue tömëñäni tönö godongämæ
cædningue mönö Awënë ëmowo ante guiñënedämaï apäncantapa. ²⁹ Ayæ wädäni
oodeoidi incæ guidiego tededö në tededäni mäniñömö quëwëñänänimpa. Ìinäni
inänite Pabodo mönö Awënë ëmowo ante nangui apänedinque wæætëdö wæætë
äñongante tömëñäni wæætë wänoncæte ante cædänitapa. ³⁰ Mänömaï cædänipa,
ante ëñente wædningue tömengä nänö töninädäni bai badänäni inte pancadäniya
Taodo ingante Tetadea ganca mäo ëmönningue, Godömenque Tadoto iñömö wodii
winonte goe, ante da godönäni gogacäimpa.

³¹ Ìnningue Codito ingante näni godongämæ pönencabo incæ Oodeabæ Gadide-
abæ Tämadiabæ tömäo quëwëningue mäniñedë wädämaï inte guëmänänitapa. Ayæ
tæi piñante entawëñäni badänitapa. Ayæ Wængongui Tæiyæ Waëmö Önöwoca

ædæmō apænecā ate tōmēnāni wampo pōnēnāni badinque yebænte nanguī ināni bagadānimpa. Ayæ mōnō Awēnē ingante ædō cæte ēñēnāmaī cæquiī, ante guiñente wægadānimpa.

Ēnea ingante Pegodo angā waa bacampa

³² Mānōmaī tōmēnāni nāni pōnencabo nanguī yebænte bayōnāni Pegodo guiquēnē wayōmō wayōmō wodo tebæ wodo tebæ godinque Dida iñōmō pōninque mōnō Awēnē quīnāni weca ēñacæ pongantapa. ³³ Māniñōmō ponte apæneyongā wacā tōmengā ěmōwo Ēnea do ocho wadepo ganca mōimoga cōmāingā inte nē ongōningā ingā. ³⁴ Adinque Pegodo tōmengā ingante,

—Ēnea ēñēmi. Itota Codito cæcā ate waa babipa cæbii. Ængæ gantidique tōmēmi mōimo nī capoe.

Ānongā Ēnea iñōmō do edæ ængæ ganticā. ³⁵ Adinque Dida quēwēnāni tōnō Tadōō quēwēnāni tōnō wēēnē nāni pōnēwengainō ante ěmō cædinque Wængonguī Awēnē gāmānō pōnānitapa.

Dodoca wodi ingante Pegodo angā nāni òmæmongampa

³⁶ Māniñedē wacā onquiyængā nē pōnengā Tabita iñōmō Cope nāni quēwēñōmō quēwēnongāimpa. Tōmengā ěmōwo guidiego tededō Dodoca incæ mōnō tededō Cowāñe ěmongā inongāimpa. Tōmengā iñōmō nē waa cædongā inte òmæpodāni wæwēnāni inānite nanguī waa cædongā inte Cope iñōmō quēwēnongāimpa. ³⁷ Tōmengā māniñedē nangæ badinque æmæwo wængā. Ate tōmengā baō inī æpæ āadēn-
inque wænōmēnæcapaa mæi nō cædānitapa. ³⁸ Cope iñōmō quēwēninque Dida wīi gobæ impa, eyequeī impa. Mānōmaī beyæ, Pegodo Dida iñōmō ongongampa, ante tededāni ēñente wædinque Itota ingante do tee empote quēwēnāni iñōmō onguīñæna mēnaa inate da godōninque, Cope iñōmō gote Pegodo ingante, “Quingæ pōe, ante æeda.”

³⁹ Ānāni gote āñete pōñōnate Pegodo godongāmæ pongā adinque tōmengā ingante wænōmēnæcapaa mæidāni guiite acantapa. Owæmpōināni godongāmæ pōn-
inque doyæncōo tōnō yabæcōo Dodoca mīingā quēwēngāñedē nānō badongaincōo odōmōninque Ca ca wædāni. ⁴⁰ Adinque Pegodo tōmānāni inānite angā tao godāni adinque da guicapote Wængonguī ingante apænecantapa. Ayæ dobæ wænte onguite a oñongā gāmānō dadi ěmænte adinque,

—Tabita, ængæ gantibi āmo.

Ānongā Tabita wodi awinca wi æmōninque Pegodo ingante adinque ængæ gantite contacantapa. ⁴¹ Ængæ ganti contayongante tōmengā ònōmpo bæi ongōninque Pegodo tōō æmængā ate ædæmō ængæ gantite adiyæ gongægantapa. Ayæ owæmpōināni tōnō mōnō Awēnē quīnāni inānite Pegodo aa pecā pō guidāni ate mīingā ingā odōmongā adānitapa. ⁴² Īninque, Mōnō Awēnē mānōmaī cæcantapa, ante Cope iñōmō nāni quēwēñōmō tōmāo gote tededāni ēñēninque nanguī ināni mōnō Awēnē ingante nē pōnēnāni badānitapa. ⁴³ Pegodo māniñedē æmontai nē aminengā Timōnō weca owodinque Cope iñōmō tæōnæ quēwēngacāimpa.

Pegodo tōnō Codōnedio

10 Tetadea nāni quēwēñōmō odōmāno tontadoidi Itadiaidi nāni ānōncabo inte quēwēngadānimpa. Īninque tontadoidi tiēē ganca nāni cabo tiēē ganca

näni cabo iñönänite adocabodäni capitäo tömengä emöwo Codönedio emongacäimpa. ²Tömengä näni wencabo näni owocabo owodique, Mönö wadö pönēñö-monte Wængonguī pangä wæcæ wæ, äninque Wængonguī nänö äñö ante eñente quēwēñönänimpa. Ayæ pæ gompodämaī inte Codönedio, Ömæpodäni wæwēñäni quī, ante pædæ godö pædæ godö cæcä äñönänimpa. Ayæ Wængonguī ingante ñimpo cædämaī cöwē apænedongäimpa. ³Tömengä iñömö ædæ wæicä ate mä pönī wīimonte bai acantapa.

Edonque wīimonte bai ayongante Wængonguī anquedo tömengä weca pö guidinque, “Codönedio bitö imi.” ⁴Angä wædinque Codönedio tömengä ingante cöwä adinque ancai guñente wædinque, “Awēñē, æbänö ante ämii. Ämi eñēmoe.” Äñongante, “Bitö Wængonguī ingante nē apænebi imitawo, ömæpodäni wæwēñäni inänite nē godömi imitawo. Mäninö bitö apænedö ante mäninö bitö godönö ante adinque bitö imite waa abopa, Wængonguī angampa, angantapa. ⁵Nöwo wadäni inänite ämi Cope iñömö gote Timönö Pegodo näni äñongä ingante äñete poncædänimpa. ⁶Adowo emönongä Timönö weca Timönö Pegodo gäwapæntibæ wedeca owocampa. Mäningä Timönö æmontai nē aminëñongä ingampa.”

⁷Ante apænedingä inte Wængonguī anquedo ingä gocä adinque Codönedio wæætē tömengä ingante nē cæda mënaa inate aa pecä pönatapa. Ayæ tontadoidi incæ pancadäniya tömengä ingante nē cædäni inönänimpa. Ininque adocanque tontado incæ Codönedio ingante nē cæcä incæ Wængonguī ingante nē eñengä inongäimpa. Tömengä ingante Codönedio adobaī aa pecä pongantapa. ⁸Mänömaī aa pecä ate tömēñäni godongämä pönäni ate Codönedio, Wængonguī æbänö angantawoo, ante tömänö ante adodö apænedinque, Nöwo Cope iñömö goedäni, angantapa.

⁹Angä godinque iimö wææñö taadö godinque Cope iñömö obo pönönäni mäniñedē incæ tæcæbæcä incæ Pegodo guiquēñē Wængonguī ingante apæñecæte ante oncömanca æcantapa. ¹⁰Ayæ ate gue ænente wædinque wadäni inänite, Cæñente awædö, äñongante cænguī iinque æænönämaī inte cönönämaī iñönänite tömengä wīimonte ate bai cæwēñengantapa. ¹¹Ate bai æmö ayongante öönædē wi æñete bai bayö möincoo bai ñænæncoo pönī iñonte æmænecoo bæi æmænecoo bæi ongönete bai inguiipoga pædæ wæænonte bai wææ wäi wocæ acantapa. ¹²Wäi wocæñö nē ocaguī mongæñäni incæ, nē ocaguī ömaadäni incæ, nē öömä emænte æidämæ godäni incæ babæidi tömänäni weocoo cæncadencoo inö ongönäni acantapa. ¹³Ayongante wacä äninque, “Pegodo, ængæ gantidinque wæñonte cæe.”

¹⁴Angä eñëñinque Pegodo, “Awēñē, eñëmi. Öñönäniñe iñönänite botö, Baacä awædö, äninque cöwē cænämaī imo apa änewēe.” ¹⁵Äninque wæætē eñëñongä, “Wængonguī nänö ædæmö mëñongadongä incæ bitö ædö cæte baacä ämii.”

¹⁶Äninque nē apænedingä iñömö wæætē adodö adodö angä eñëñinque Pegodo wæætē, Baacä awædö, ante Baa angantapa. Ayæ mempoga go adopoque wæætēdö wæætē adodö äna ate ñænæncoo pönī weocoo incæ öönædē inö wëä æænongä bai acantapa. ¹⁷Ininque, Mänömainö ante wīimonte bai adimo inte botö quinö bai cæquimoo, ante Timönö Pegodo pönëe congantapa. Pönëe cönongä Codönedio nē nänö da pönöninäni guiquēñē, Timönö oncö æyömönö i, ante diqui diqui minte adinque yabædemö inö næ gongæñinque, ¹⁸Timönö Pegodo näni äñongä iñömö owocää, ante eñencæte ante aa pedänitapa.

¹⁹Pegodo wīimonte bai nänö adinö ante ayæ pönëe cönongante Wængonguī Öñöwoca, “Timönö eñëmi, bitö imite ante onguñænäni mengäa go adocanque diqui

diqui mīnānīpa quēwēmīi. ²⁰Tömēmo āmo pōnānīpa cæbīi. Bitō ængæ gantīdīnque yæipodē wæidīnque tōmēnāni tōnō ee goe,” angantapa.

²¹Angä ēñēnīnque Pegodo yæipodē wæidīnque tōmēnāni īnānīte, Botō mīnitō nē diqui diqui mīnōmo adobo īmopa. Mīnitō quīnante pōmīnīi.

²²Äñongante,

—Mōnitō awēnē capitāo Codōnedio incæ angä pōmōnīpa. Tōmengä īñōmō Wængonguī ayongante nō cæcä īnongä inte Wængonguī ingante guīñente quēwengampa. Nē nō cæcä īngampa, ante pōnēnīnque oodeoidi tōmānāni tōmengä ingante waa adānīpa. Īnīnque Wængonguī anquedo tæiyæ wæmō īnongä inte wæætē Codōnedio ingante, Bitō wadāni īnānīte āmi gote Pegodo ingante āñete poncädānīmpa. Tōmengä īñōmō bitō weca pōnīnque apāñecä ēñencæbīiimpa, angä ēñente wæidīnque Codōnedio wæætē mōnitō īmōnīte da pōnongä pōmōnī ae.

²³Ante apāñedāni ēñēnīnque Pegodo angä pō guīite tōmengä weca owodānītapa. Īmō ate Pegodo tōmēnāni tōnō tao goyongante Cope īñōmō quēwente nē pōnēnāni incæ pancadānīya godongāmæ tao wadæ godānītapa.

²⁴Mānōmaī godīnque Pegodo īñabæ wæængä Tetadea pongantapa. Codōnedio guīquēnē, Oo ponguīgä, ante pōnēnīnque tōmengä guīdēnāni tōnō tōmengä æmigoidi īnānīte do āñecä ponte godongāmæ ongōnānītapa. ²⁵Īnīnque Pegodo īñōmō oncōnē pō guīicæ cæyongä Codōnedio wæætē oncodo tao bee tēnīnque, Æ, bitō Wængonguī anquedo īnōmī īmīpa, ante baī cædīnque ædæ wæænte Pegodo ōnōwa gāānē guīdōmēmæ ñongængä. ²⁶Adīnque Pegodo wææ ānīnque,

—Īñæmpa bitō waobi īmi baī botō adobaī waobo īnōmo īmopa. Ængæ gantībi, ānīnque Pegodo angä ængæ gantīcantapa.

²⁷Ayæ Codōnedio tōnō guēa tēdēdīnque Pegodo oncōnē guīite ayongante nanguī īnāni godongāmæ mæ ongōnāni. ²⁸Adīnque tōmēnāni īnānīte,

—Mīnitō do ēñēmīnīpa. Oodeoidi īnōmōnī inte mōnitō Mōītee wodi nānō wææ angāinō ante Ao ante ēñente cæmōnīpa. Īnīnque, Oodeo īnāmaī īnāni tōnō godongāmæ cædāmaī incæmīnīmpa, ante ayæ, Tōmēnāni weca go guīdāmaī incæmīnīmpa, ante mōnitō ēñengāinō ante cæmōnīpa, ante mīnitō do ēñēmīnītawoo. Incæte Wængonguī wæætē botō īmote īmaī ante odōmongantapa. Bitō, Baacä awædō, ante tēdēte baī waocä īngantedō ante tēdēdīnque, Wentamō mongængampa, ante ānāmaī incæbīiimpa. Ayæ, Ōnonganque īngampa, ante ānāmaī incæbīiimpa, ante Wængonguī botō īmote do odōmongä atabopa. ²⁹Äñete pōnāni ate botō, Wængonguī mānōmaīnō ante odōmongä atabopa, ante pōnēnīnque ee pontabopa. Īnīnque quīnante botō īmote aa pemīnīi, ante ēñencæte ante wæbopa.

³⁰Äñongante Codōnedio wæætē,

—Do mēōnaa go mēōnaa īñonte botō tōmēmo oncōnē cænāmaī inte Wængonguī ingante apāñetabopa. Botō mānōmaī ñōwo baī ædæ wæicä apāñeyōmo onguīñængä weocoo nāāmænta pōnī mongængä ponte botō weca a ongongä atabopa. ³¹Ayæ botō īmote apāñēdīnque, “Codōnedio, bitō Wængonguī ingante apāñēbitawo, angantapa. Mānīnō bitō apāñedō ante Wængonguī do ēñēngantapa. Ōmæpodāni wæwēnāni quī, ante bitō godōmitawo. Mānīnō bitō godōnō ante adīnque Wængonguī cōwē pōnengampa cæbīi. ³²Ñōwo āmi Cope gote Timōnō Pegodo nāni ānongä ingante āñete poncädānīmpa. Tōmengä wacä Timōnō æmontai nē amīnengä weca gāwapæntibæ wedeca owocampa.” ³³Angä ēñēnīnque botō wæætē bitō īmīte ante, Äñete pōedāni, antabopa. Ñōwo bitō do pōmī waa abopa. Īnīnque ñōwo

iñömö Wængongui ayongä tömämöni godongämä a ongöñömöni bitö, Wængongui Awënë mönitö beyä ante bitö imite äbänö angää, ante apänebi ëñencæte ante ongömönipa, angantapa.

Codönedio oncönë ongöinque Pegodo apä necampa

³⁴ Codönedio mänömaï apä necä ëñëninque Pegodo iïmaï ante apä necantapa.

—Wængongui, Adoyömö pönï iminipa, ante tömämö imonte pönö adoyömö pönï cæcampa, ante botö, Näwangä impa, ante ñowo tæcæ ëñëmopa. ³⁵ İninque iïmæcä quëwënäni incæ wayömö wabæca wabæca quëwënäni incæ æcänö Wængongui ingante guiñente wædinque nö cæte quëwëna ante adinque Wængongui mäningä ingante Ao ante do ængampa. ³⁶ Mänömaï cæbopa, ante idægoidi inänite apänemini ëñencädänimpa, ante Wængongui mönitö imönite da godongä gote iïmaï ante apänemöni ëñënanipa. Tömämæ quëwëmö iñömonte mönö Tæiyä Awënë iñömö Itota Codito ingampa. Tömengä waa pönï pönö cæcä beyænque Wængongui piyänë nänö cægäinö ante watapæ möni apä nedö impa. ³⁷ Wäö wodi, Æpänë mönö guidongä impa, ante apä necä ëñënanä ate Itota Codito iñömö Gadideabæ iñömö mä cædinque Oodeabæ tömäo cægonte äbänö cægacäi, ante do ëñëminipa. ³⁸ İïmaï ingatimpa. Wængongui tömengä Önöwoca ingante angä Itota Näatadeta nê quëwëngäingä baonga wææ guigacä impa. Wææ guicä ate Itota tæi piñænte entawëninque wayömö wayömö gote tömäo cægöinque waa cægacä impa. Edæ Wængongui tömengä tönö godongämä quëwente cæcä beyä Itota iñömö, Wadäni wënæ angä ëñëninque goti winte bai wæwënänipa, ante adinque wënæidi inänite angä tao godänitapa. Ayä wadäni wënæ wënæ inte wayönänite tömengä godö cæcä ate edæ waa inäni bagadänimpa.

³⁹ Pabodo mänömainö ante godömenque apä necantapa. “Oodeoidi ömæ cægöinque ayä Eedotadëë iñömö quëwëninque, Itota Codito äbänö cægacäi, ante nê adimöni inte mönitö iñömö mäninö tömänö ante nê apänemöni imönipa. Tömengä ingante awæ ñænquedimæ cæte godö wänönäni wængacä impa. ⁴⁰ Incæte Itota do wæningä inte mëönaa go adoönæque öñongante Wængongui angä ñäni ömæmonte miingä inte edonque pönï a ongongä agadänimpa. ⁴¹ Wü tömänäni adänitapa. Pancamöniya atamönipa. Itota ñäni ömæmongä ate tömengä tönö nê godongämæ cænte bedimöni iñömönite Wængongui, Mänimpodänique Itota miingä ongongä ingampa, ante nê adinäni inte nê apä nedäni incädänimpa, ante mönitö imönite apænte ængacä impa. Mönitö adomönique tömengä ingante atamönipa. ⁴² Ayä mönitö imönite äninque Wængongui, Minitö iñömö do ëñënimini inte nê apänemini badinque waodäni inänite mänömainö ante apä nedinque iïmaï ante apä necæminimpa. Mii quëwënäni inänite do wäninäni inänite Itota Codito iñömö edæ tömänäni inänite edæ nê apænte anguingänö angüënë, ante apänemini ëñencädänimpa, ante Wængongui mönitö imönite angacä impa. ⁴³ Ayä, Mönö Codito poncæcä impa, ante do ëñengäinäni inte tömänäni Wængongui beyä adoyömö apä negadänimpa. Tömänäni, Codito ingante nê pönënanäni wënæ wënæ nänäni cædö ante adocä Codito ëmöwo beyænque Wængongui pönö waadedinque ñimpo cæcä quëwëncädänimpa, ante doyedë apä negadänimpa,” ante Pegodo Codönedioidi inänite apä necä ëñënanitapa.

Oodeoidi inämaï inäni Wængongui Önöwoca ingante äänäni

⁴⁴ Pegodo mäninö ante tæcæ apæ necä ëñëë cöñönänite Wængongui Tæiyä Waëmö Önöwoca tömënäni tömänäni baonga wæä guicantapa. ⁴⁵ Pegodo tönö godongämä pöninäni guiquënë nê pönënëni inäni incæte, Mönö ëö togænte quëwengäïmpa, ante nê änönäni ingadänimpa. Æinque tömënäni, Oodeoidi inämaï inäni inänite Wængongui Tæiyä Waëmö Önöwoca do wæä guicampa, ante adinque edæ guïñente wædänitapa. ⁴⁶ Edæ Codönedioidi Wængongui Önöwoca ingante ëwocadinque wadäni näni tede bai wadäni näni tede bai iñontobä apænedinque Wængongui ingante waa adinque waa todäni ëñente wædinque oodeoidi mänömaï guïñente wædänitapa. ⁴⁷ Adinque Pegodo tömengä tönö nê pöninäni inänite,

—Tömënäni mönö bai Wængongui Tæiyä Waëmö Önöwoca do äñinäni inänite adinque tömënäni, Æpænë guidömi guiboë, äñönänite mönö ædö cæte wææ anguii. ⁴⁸ Äinque Pegodo angä ëñëninque tömënäni Itota Codito ëmöwo apænedinque æpænë guidönäni guidänitapa. Æpænë nê guidënëni iñömö ayä Pegodo ingante, Tæönæ mönitö weca quëwencæbiïmpa, änäni Ao ante quëwengacäïmpa.

Eedotadëë iñömö nê pönënëni inänite Pegodo apæ necä

11 Oodeoidi inämaï inäni incæ Wængongui nänö änö ante do Ao ante ëñënëni, ante wadäni Oodeabæ tömäo cægonte tededänitapa. Æinque Itota nänö da gogäinäni tönö wadäni nê pönënëni tönö mäninö ante do ëñënëni. ² Æinque Pegodo Eedotadëë iñömö æite quëwëñongante nê pönënëni incæ pancadäniya, Mönö ëö togængäïmpa, ante nê änönäni inte tömengä ingante piïnque, ³ iïmaï ante änänitapa.

—Quïmä bitö togænämaï inäni weca incæ go guidinque cæmitapa töö.

⁴ Äñönänite Pegodo, Æbänö cæte i, ante adodö adodö ante apæ necä ëñënëni. ⁵—Botö Cope näni quëwëñömö gote quëwëninque Wængongui ingante apænedinque cæwënente ongöninque wiïmonte bai atabopa. Wiïmonte bai ayömote wecoo ñænencoö möincoo bai æmænencoö yao æmænencoö yao oncönete bai öönädë inö pædæ wæænonte bai ayömote botö weca wæä wäi wocæ atabopa. ⁶ Wäi wocæñö botö acæte ante guïmö ayömo babæidi bai inäni inte ocagui mongænäni, æmontaique mongænäni, öömä ëmänäni yæmiñencoö inö ongönäni bai atabopa. ⁷ Ayä wacä botïmote, “Pegodo, ængä gantidinque wæñonte cæe.” ⁸ Angä ëñëninque botö, “Awënë ëñëmi. Baacä ingä änewëë. Näwäaquiringä inämaï iñongante cöwë cænämaï imoi ae.” ⁹ Ante wæyömote öönädë apæ necä botö nê ëñëningä godömenque äninque, “Wængongui nänö ædæmö mënongadongä ædö cæte baacä ämii.” ¹⁰ Äinque tömengä wæætë wæætë mempoga go adopoque adodö angä ate ñænencoö bai adodö öönädë ingä æi atabopa. ¹¹ Mäniñedë Tetadea nê quëwengä da pönongä pöninque onguiñænäni mengäa go adocanque botö imote ante diqui mincæte ante botö owocö boyä tæcæ pöninque næ gongænänitapa. ¹² Ayä Wængongui Önöwoca incæ botö imote angä ëñëninque botö, Wadäni inänipa, ante piïnämaï imo inte guïñënëmaï tömënäni tönö ee gotabopa. Ayä botö tönö iïnäni iñömö tei ganca inäni mänimodäni godongämä godänitapa. Gote ayömöni, Codönedio oncö ïmpa, ante adinque go guitamönipa, ante Pegodo apæ necantapa. ¹³ Ayä, Go guite ëñëñömönite Codönedio iñömö, Æbänö cætïmpa, ante apænedinque mönitö imönite iïmaï ante apæ necantapa. Botö oncönë Wængongui anquedo a ongongä atabopa. Ayä botö

īmote āninqe anquedo iñōmō, “Bitō Cope iñōmō āmi wadāni gote Timōnō Pegodo nāni ānongā ingante āñete poncædānīmpa. ¹⁴Tōmengā pōninqe, Mīni quēwencabo æbānō cæte wænāmaī quēwenguimīni, ante bitō īmite apæneccā ēñencæbiīmpa.” Mānōmaīnō ante Wængonguī anquedo apæneccā ēñente cætābopa, ante Codōnedio mōnitō īmōnite apæneccā ēñentāmōnīpa.

¹⁵Māningānca apænedīnque Pegodo iīmaī angantāpa. “Wængonguī Tæiyæ Waēmō Ōnōwoca mā pōninqe mōnitō īmōnite nānō guidō bai nōwo iñōmō botō tæcæ apæneccæ cæyōmo adocā edæ tōmēnāniya adobaī wææ guīcantāpa. ¹⁶Īninqe botō, Mōnō Awēnē Itota æbānō angacāī, ante adodō ante pōnentābopa. ‘Wāō wodi iñōmō æpænē guidongacāīmpa. Wængonguī Tæiyæ Waēmō Ōnōwoca guīquēnē mīnitō baonga pō guīcæcāīmpa,’ ante Itota do apænegacāīmpa, ante botō ōnōwēnque pōnentābopa. ¹⁷Ayæ, Mōnō Awēnē Itota Codito ingante wede pōnēmōni ate Wængonguī tōmengā Tæiyæ Waēmō Ōnōwoca ingante da pōnongā æntāmōnīpa. Nōwo tōmēnāni adobaī wede pōnēnāni ate Wængonguī mōnitō īmōnite nānō da pōnongāingā ingante tōmēnāniya adobaī da pōnongā ænānīpa, ante pōnentābopa. Mānōmaī cæcāmpa, ante pōnēnīnque botō, Ædō cæte Wængonguī ingante Baa anguīmoo.”

¹⁸Ante Pegodo, Æbānō cætīmpa, ante tōmānō ante edonque apæneccā ēñēnīnque tōmēnāni wæætē, Mōnō ædō cæte godōmenque piīnte anguīī, ante piyænē cæte apænedānīta.

—Nōwo idæwaa āmōnīpa. Wadāni oodeoidi īnāmaī īnāni incæ mōnō bai, Idæwaa wēnæ wēnæ cæte awædō, ante guingo imonte wædāni ate Wængonguī pōnō waadete cæcā ate quēwēnānīpa, ante nōwo tæcæ mā ēñēmōnīpa, ante todīnque Wængonguī ingante edæ watapæ apænegadānīmpa.

Antioquiya iñōmō Itota ingante nāni pōnencabo

¹⁹Māningā Etebā wodi ingante wænōnīnque oodeoidi godōmenque wadāni nē pōnēnāni īnānite wēnæ wēnæ togænte pānāni wædinque nē pōnēnāni iñōmō wodīi wīnōnīnque nāwæ gote Pēnitīa ganca Tipidebæ ganca Antioquiya ganca godānīta. Godīnque tōmēnāni, Itota Codito æbānō cægacāī, ante oodeoidīque īnānite apænedīnque wadāni īnānite apænedāmaī ingadānīmpa. ²⁰Incæte Tipidebæ iñōmō quēwēnāni tōnō Tidēnebæ iñōmō quēwēnāni pancadāniya Antioquiya iñōmō godīnque guidiegoidi īnānite adobaī Itota Codito ingantedō ante watapæ apænedāni ēñēnānīta. ²¹Īninqe mōnō Awēnē tōmēnāni tōnō godongāmæ cæcā beyænque nanguī īnāni tæcæ pōnēnīnque tōmengā gāmænō pōnānīta.

²²Mānōmaī pōnēnānīpa, ante tededāni ēñēnīnque Eedotadēē iñōmō Codito ingante nāni godongāmæ pōnencabo incæ Bedēnabee ingante, Bitō Antioquiya iñōmō godīnque ate pōe, ānāni. ²³Māniñōmō gote pōnīnque Bedēnabee iñōmō, Antioquiya iñōmō quēwēnāni īnānite Wængonguī waadete pōnō cæcāmpa, ante adīnque nanguī todīnque tōmānāni īnānite, Mīnitō mīmōno wede pōnēnīnque mōnō Awēnē mīñæ cōwē quēwēedāni, ante nanguī angantāpa. ²⁴Bedēnabee iñōmō Wængonguī Tæiyæ Waēmō Ōnōwoca ingante ēwocadīnque nē wede pōnengā īnongā inte nē waa cæcā īnongāīmpa. Īninqe tōmengā apæneccā ēñēnīnque tōmēnāni nanguī īnāni mōnō Awēnē gāmænō pongadānīmpa.

²⁵Bedēnabee wæætē Taodo ingante dīquī mincæte ante Tadoto iñōmō gote, ²⁶adīnque tōmengā ingante Antioquiya iñōmō ænte pongantāpa. Pōnīnque adoque

wadepo quëwëninque tömënanî Codito ingante nê tee empote quëwencabo tönö cöwë godongämæ ponte apænedinque nanguî inäni inänite odömonte apænedä ëñënanitapa. Ayæ Antioquiya iñömö quëwënanî Codito ingante nê tee empote quëwënanî inänitedö ante apænedinque, Coditoidi inänipa, ante mä pemöninque apænedönänimpa.

²⁷ Ayæ Wængonguî beyæ nê apænedäni pancadäniya mänïñedë Eedotadëë quëwëninque Antioquiya pönänitapa. ²⁸ Tömënanî näni Wængonguî beyæ apæneincabo incæ adocanque Agabo näni änongå iñömö Wængonguî Onöwoca ingante ëwocate apænedinque, Mönö waocabo quëwëñömö tömämæ cænguî oo dæ ba adinque mönö gæwænte wæquimämo baquïnö anguënë, ante angacäimpa. Ininque iinçayæ ate Codaodio Awënë ingäñedë Agabo nö nänö äninö bai do batimpa. ²⁹ Ba adinque Antioquiya näni pönencabo godongämæ pönëninque, Mönö tönïñadäni iñömö Oodeabæ quëwëninque edæ tepæmpo gæwænte wädänipa cæmöö. Tömënanî beyæ mönö godonte äinta pædæ godöninque adocanque eyepæ inte nänö godonganca wacä eyepæ inte nänö godonganca godongäëmpa, ante godongämæ Ao änanitapa. ³⁰ Äninque eyepæ pædæ pönöninque Bedënabee tönö Taodo inate, Ænte mäo godinque nê pönënanî inänite nê aadäni nê Picänäni nempo pædæ godömina æncædänimpa, ante da pönönäni ænte gote godöna ængadänimpa.

Tantiago wængä ate Pegodo ingante tee mönedänipa

12 Mänïñedë Codito ingante näni godongämæ pönencabo iñönänite awënë odaye Edode iñömö pancadäniya inänite wënæ wënæ cæcæte ante angä bæi ongonte ængadänimpa. ² Mänömaï cædinque tömengä angä ëñëninque Wäö tönïñacä Santiago ingante yaëmenca wënönäni wængacäimpa. ³ Santiago wodi mänömaï wængä adinque oodeoidi todäni ate wædinque Edode, Godömenque cæbo ate nanguî todinque botö imote waa acædänimpa, ante cædinque Pegodo ingante adobai bæi ongongantapa. Edæ päö yedæ æmpoquî ömæmö i näni æëmæ cæyedë mänïñedë tömengä ingante bæi ongonte ængantapa. ⁴ Mänömaï æninque Edode iñömö, Oodeoidi Patowa æëmæ iinque bedäni ate botö Pegodo ingante ænte tadonte tömänäni ayönänite apænte ancæboimpa, ante pönëninque tömengä ingante tee mönecantapa. Tee mönedinque Edode godömenque angä ëñëninque tontadoidi mengäa go mengäa näni cabo pö wææ wänonte goyönäni wacabo adopodäni pö wææ wänonte godönänimpa. Mänömaï wacabo pö wacabo pö cædinque mencabodäniya go mencabodäniya wæætë wæætë ponte wææ wänonte godönänimpa. ⁵ Ininque Pegodo ayæ tee mönete ongönongäimpa. Incæte tömënanî Codito ingante godongämæ näni pönencabo Wængonguî ingante tömengä beyæ cöwë nanguî apænegadänimpa.

Pegodo ingante Wængonguî incæ ñimpo cæcä gocampa

⁶ Pegodo ingante tontadoda mënaa tönö æmæncaipo æmæncaipo yaëmengö tæi goti wincapodäni wæyongante wada odemö cöwë wänö cönönaimpa. Ininque Edode tömengä nänö apænte anguiönæ ado woyowotæ Pegodo mänömaï goti winte wædongä inte mö ñongantapa. ⁷ Iñontobæ Wængonguî Awënë nänö da pönöningä anquedo a ongongantapa. Tee mönete oncönë ñäö gongæntapa. Pegodo mö ñöñongante Wængonguî nänö da pönöningä iñömö æmætë inö tao cædinque, “Pegodo, näni ömæmonte quingæ ængæ gantibi.” Änongå daagömë näni tæi wini incæ tömenque ñimæncæ tæ wæængatimpa. ⁸ Ayæ, “Bitö weocooga pacadeyænta

pacadeyænte awæncata wëwabi.” Angä ëñente cæcä adinque Wængongui anquedo godömenque, “Yacoo wïni caadinque botö miñæ pöe.”

⁹ Angä ëñëninque Pegodo, Awii cæmonte awædö. Anquedo dicæ ponte cæcää. Mänömaï ponte cæcampa, ante botö wïimonte bai aboimpa, ante wawique pönengä incæte anquedo miñæ tee empote tao gocantapa. ¹⁰ Mänömaï tao godinque guicönë në wänöna ongöñöna wodo tebæ tao godinque yabæcönë tamongademö në wänöna ongöñöna wodo tebæ tao godinque yaëmëwæ odemö tömënäni quëwëñömö ante näni tao goquïnemö ganca pönatapa. Mäninemö ganca ponte ongöñöna yaëmëwæ odemö incæ tömenque æ ænete bayö tao godinque taadö adononque cægöna ate anquedo iñömö ingæ gocä ate Pegodo guiquënë adocanque a dogongantapa.

¹¹ Adoboque a ongömopa, ante wædinque tömengä wæætë nämä pönengä badinque, “Æ. Näwangä incæ do tate ëñëmopa. Edode nempo wæwëninque botö ood-eoidi näni pïñö wæquënëmo imo adinque Wængongui angä ëñëninque tömengä anquedo ponte botö imote gä pe æmpote ö ængä ate aamö cæbopa, ante tæcæ pönëmopa.”

¹² Ante pönente wædinque Pegodo wadæ godinque Wäö Mäadoco näni änongä tömengä badä Mäadiya oncö boyæ ponte näë gongængantapa. Mänincönë wadäni në pönënanäni incæ do pöninque Wængongui ingante godongämæ apænee cönönänimpa.

¹³ Pegodo iñömö yabædemö ongonte aa peyongä baquécä në ëacä ingante në cæcä inte tömengä ëmowo Adoda iñömö ëñencæte ante pongantapa. ¹⁴ Ponte ëñëñongä Pegodo incæ aa pecä ëñëninque watapæ tote wædinque tömengä wïi pönëninque odemö wi ænedämaï pogodo gote edæ wadæ guïdinque, Pegodo incæ oncodo a ongongä tamëñedäni. ¹⁵ Ante apæneccä ëñëninque tömënäni wæætë,

—Adoque antedö amïni.

Ante wæyönäni tömengä, Näwangä impa, ante ancaa angä ëñëninque tömënäni,

—Wa. Pegodo ingante në aacä anquedo imaingampa.

¹⁶ Ante tedeyönäni Pegodo iñömö ayæ aa pete ongönongäimpa. Ayæ ponte wi ænete ayönäni Pegodo ingante adinque ancai guïñente wædänitapa. ¹⁷ Tömengä wæætë, Apocænë iedäni, ante önompocaque compo cæcä adinque pæ wëneyönäni tömënäni inänite apæneccantapa. Botö tee mönete wæyömete Wængongui æbänö pönö cæcä ate tate pömoo, ante tömänö ante adodö ante apænedinque,

—Botö apænebo mïni ëñënö ante mïnitö wæætë wacä Tantiago ingante apænedinque wadäni mönö tönïñadäni inänite apænemïni ëñencädänimpa.

Äninque Pegodo wayömö wadæ gocantapa.

¹⁸ Iimö wænö nãö bayonte tontadoidi guiquënë, Pegodo ædönö gote dæ angää, ante nangui Yæ yæ ante cædänitapa. ¹⁹ Mänömaï cætimpa, ante apænedäni ëñente wædinque Edode angä diqui diqui miñönäni Pegodo ayæ dæ angantapa. Iñinque në wææ wänöninäni inänite Edode, Æbänö cætiï, ante ancaa angä wædinque tömënäni, Mönö ædö cæte anguiï, ante wæyönänite tömengä wadäni inänite angä capo wænönäni wængädänimpa. Edode tömë Oodeabæ wadæ tao godinque Tetadea gote quëwengacäimpa.

Edode wængampa

²⁰ Tido iñömö quëwënäni tönö Tidöo iñömö quëwënäni inänite awënë Edode wodi mäniñedë ëngate ængui bacä adinque tömënäni wæætë godongämæ pönente Ao äninque Edode weca apæneccä pönänitapa. Tömënäni, Mönö iñömö awënë od-

eye Edode ömæ quëwënäni pönönäni æninque mäninonque cænte quëwëmompa, ante wædönäni inte tömengä ingante, Bitö pünämaï inte piyænë cæbi quëwëmönie, ante ancæte ante pönänitapa. Pöninque tömënäni Edode oncönë owodäni inänite nê aacä Bodato ingante waa cædinque tömengä ingante änäni Ao ante tömengä wæætë Awënë Edode ingante tömënäni beyæ apænecä ëñengacäimpa. ²¹ Edode iñömö, Iñönæ ba ate botö ponte apænecæboimpa, ante tömengä nänö änionæ iinque ba ate tömengä awënë weocoo waëmoncoo wëñate pöninque awënë nänö apænte ante contaimpaa tæ contadinque tömänäni ayönäni tömënäni inänite apænecantapa. ²² Apænecä ëñëninque tömänäni Yæ yæ äninque, “Wii waocanque tedecä ëñëmompa. Wængonguüidi näni tedepämo bai tedecä ëñëmompa.” ²³ Ante Yæ äñönäni Edode wodi wæætë, Näwä Wængonguinque nê waa cæcampa, ante angüenengä incæte änämaï pæ wëñecä adinque tömengä ingante Wængonguüi anquedo wæætë godö cæcä ate ayago cæ æmæwo wængacäimpa.

²⁴ Incæte Wængonguüi nänö angainö ante mänïñedë wayömö mäo wayömö mäo apænedäni ëñëninque nanguüi inäni mönö Awënë ingante nê wede pönënäni badänitapa.

²⁵ Bedënabee tönö Taodo iñömö Eedotadëë iñömö godinque tömëna näna cæquënönö tömänö iinque cædinque wadæ godinque Wäö Mäadoco näni änongå ingante tömëna tönö æninque adodö godänitapa.

Wængonguüi angä ëñente Bedënabee tönö Taodo godapa

13 Antioquiya iñömö Itota Codito ingante näni godongämæ pönencabo inönäni iñömö pancadäniya Wængonguüi beyæ nê apænedäni iñönäni pancadäniya guiquënë nê odömönte apænedäni inönänimpa. Bedënabee tönö wacä Timönö Nëegodo näni änongå inönaimpa. Tidënebæ nê quëwëningä Dotio inongäimpa. Pancabaa awënë Edode tönö godongämæ nê pædingä Mänäënë tönö Taodo inönaimpa. Mänimpodäni ingadänimpa. ² Iinque tömänäni godongämæ mönö Awënë ingante, Tæiyæ Waëmö imipa, ante watapæ apænecæte ante cænämaï apæneyönänite Wængonguüi Tæiyæ Waëmö Önowoca incæ iïmaï angacäimpa. “Bedënabee tönö Taodo mïñitö tönö nê cæda iñönate ämïni botö beyænque cædinque nänënë godinque botö äñinö ante cæcædäimpa,” angacäimpa.

³ Iinque iinque cænämaï inte apænedinque tömënäni Bedënabee tönö Taodo inate gampocadinque Wængonguüi ingante apænedinque änäni ate wadæ gogadäimpa.

Wää tëiwænë Tipidebæ gote apænedä ëñënäni

⁴ Bedënabee tönö Taodo iñömö Wængonguüi Tæiyæ Waëmö Önowoca mänömaï angä godina inte Tedeotia iñömö wæi wipodë ñænæmpodë go guüidinque wogaa godinque wää tëiwænë Tipidebæ näni ämæ godatapa. ⁵ Tadamina näni quëwëñömö pöninque oodeoidi odömöincönë wacönë go guüi wacönë go guüi cædinque Wængonguüi nänö apænedö ante nöingä apænedä ëñengadänimpa. Ayæ Wäö tömëna mïñä godinque tömëna beyæ nê cæcä inongäimpa.

⁶ Mänömaï wää tëiwænë tæcæguedë wodo tebæ cægöninque yæcado godinque Papo näni quëwëñömö ganca pönänitapa. Pöninque tömënäni wacä idö tömengä ëmowo Baditota ingante mämö bee ténänitapa. Tömengä iñömö oodeocä inongä inte, Wængonguüi beyæ nê apænebo imopa, äninque nê babæ änongå inongäimpa.

⁷Tömengä wää tēimæ awënë Tedeguo Pabodo näni änongä tönö godongämæ në cædongä inongäimpa. Awënë Tedeguo guiquënë në ocai encadongä inte Wængongui nänö änö ante ëñëmente wædinque Bedënabee tönö Taodo inate äñete mämongä pönatapa. ⁸Tömëna ponte apäneyönote idö Baditota guiquënë guidiego tededö Edima näni änongä inongä inte edæ, Awënë në pönengä badämaï incæcäimpa, ante wææ cæcæte ante piinte cæcantapa. ⁹Inique Taodo Pabodo näni änongä iñömö Wængongui Tæiyæ Waëmö Önöwocaque ewocadinque idö ingante gomö adinque, ¹⁰tömengä ingante angantapa.

—Bitö iñömö wænæ awënë nänömömi bai imidö angüënë. Iñæmpa, Wadäni quiëmë nö impa, ante oda cæcædänimpa, ante bitö piinte pönëwënonque entawëninque bitö në babæ cædömi imipa töö. Wængongui nänö töinö ponguinö ante idiquibæ bacäimpa, ante bitö æpogamë incæ cæbii. ¹¹Ñöwo iñömö Wængongui Awënë në piñängä inongä inte bitö imite pancæcäimpa. Tömengä pönö gampomongä ate bitö babetamömi badinque nænque ñäö tamönö wantæpiyæ tömengä nänö änimpoga adämaï incæbiimpa.

Äñongä boguimä bai do wææ inique wëmö ëmöninque Edima Baditota näni änongä gampo gampo cædinque, Æcänö botö imote töö æmænte mäoda goquimoo, ante diqui diqui mingantapa. ¹²Mänömaï bacä adinque wää tēimæ awënë wæætë Wængongui Awënë ingantedö ante iñäna nana odömonte apänedö ante pönente guñente wædinque në pönengä bagacäimpa.

Pitidiabæ Antioquiya godinque cædapa

¹³Pabodoidi iñömö Papo iñömö wadæ godinque wipodë ñænæmpodë wogaa taodique Pampidiabæ pöninque Pedegue iñömö ti wæäñönäni Wäö wæætë adodö Eedotadëë gocæte ante tömëna inate ëmö cæte wadæ gogacäimpa. ¹⁴Tömëna wæætë Pedegue wadæ godinque Pitidiabæ pöninque Antioquiya näni quëwëñömö pönatapa. Ayæ tömëñäni guëmanguionæ iinque bayö oodeoidi odömoïncönë pö guiite tæ contadatapa. ¹⁵Tæ contate a cönöna Möitee wodi nänö yewæmongainta adinque Wængongui beyæ në apænëgäinäni näni yewæmongainta ate apänedänitapa. Ayæ mäniñömö awënëidi iñömö tömëñäni weca ongongä adocanique ingante apänedinque,

—Bitö ñöwo pöna inate mäo äninque iïmaï apænecæbiimpa, Iñäna, möni tönñämäna ëñëmäna. Iñömö ongönäni wampo pönëninque tæi gongænte ongoncædänimpa, ante cædinque minatö ædæmö apænëmäna ëñënguñänii, ante ämi apänebainapa.

¹⁶Änäni ëñente mäo angä ëñëninque Pabodo iñömö ængæ gantidinque önompoca compo compo cædinque tömëñäni inänite apænecantapa.

—Minitö, pancaminiya idægoidi iñöminite pancaminiya wamini incæ, Näwä Wængongui inongä ingampa, ante në guñente wämäni iñöminite botö tömämäni iminite apänebo ëñëedäni. ¹⁷Idægoidi, minitö iminite täno apänebo ëñëedäni. Mönö idægocabo Wængongui incæ mönö mämæidi inänite apænte ængä ate wadäni nëmæ Equitobæ iñömö quëwëñönänite tömengä pönö cæcä ate tömëñäni tæiyänäni yebængadänimpa. Ayæ Wængongui tæi piñänongä inte ingæ æmæninque töö æmænte mäocä wadæ gogadänimpa. ¹⁸Godinque tömëñäni coadenta wadepo mänimpoga önömæca cægöninque æbämë wænæ wænæ cæte quëwëñäni ate wæcä incæte tömengä pänämaï inte ata cæpote ænte mäocä gogadänimpa. ¹⁹Ayæ wadäni Cä-

naämæ quëwënäni önompo ämæmpoque go mencabodäniya iñönänite wido cæd-
inque Wængonguï, Tömënäni ömæ ini minitö ömæ wæætë bacäimpa, ante mönö
wämæidi inänite pönongä ængadänimpa. ²⁰ Edæ coatodo tiento tincoenta wadepo
mänimpoga wabæca quëwënäni ate mäniñedë ate Wængonguï, Minitö ömæ, än-
inque mönö wämæidi inänite pönongä æninque quëwengadänimpa.

Ante apænedinque Pabodo, Idægoidi dodäni æbänö cægadäni, ante godömenque
apænegacäimpa. “Mänimæca ponte wantæpiyæ quëwënäni ate pancadäniya nê
apænte änäni iñönänite Wængonguï angä ate adodäni awënëidi bai badinque
wayedë wacä adocanque wayedë wacä adocanque wayedë wacä adocanque a-
agadänimpa. Tämoedo Wængonguï beyæ nê apænegä nänö ponte apæneganca
mäninänique aagadänimpa. ²¹ Ìncayæ ate mönitö dodäni iñömö Wængonguï in-
gante apænedinque, Bitö adocanque ingante ämi ate tömengä tæiyæ awënë
bacacäimpa, ante ancaa änäni ëñente wædinqe tömengä wæætë Beencaminö wodi
pæingä incæ Titæ wengä Taodo ingante angä bagacäimpa. Tæiyæ awënë bad-
inque tömengä coadenta wadepo mänimpoga iñonte aagacäimpa. ²² Ayæ ate Wæn-
gonguï wæætë, Idæwaa, ante Taodo wodi ingante wido cædinqe Dabii wodi in-
gante wæætë angä tæiyæ awënë bagacäimpa. Adocä Dabii ingantedö ante apæned-
inque Wængonguï, Botö waa pönï entawëmo bai Yæte wengä Dabii iñömö adobai
entawengä abopa. Tömengä iñömö botö änö bai edæ tömänö cæquingä ingampa,
ante apænegacäimpa.”

²³ “Wængonguï doyedë, Codito ængä beyænque idægoidi quëwencädänimpa,
ante do nänö angainö bai ñowo cædinqe adocä Dabii pæingä Itota Codito in-
gante da pönongä pongacäimpa. ²⁴ Itota ayæ pönämaï iñongä Wäö wodi idægoidi
tömänäni inänite apænedinque, Minitö, Idæwaa wënæ wënæ cæte awædö, ante
Wængonguï gämænö wadæ pöninque æpænë guiedäni, ante apænegä ëñengadän-
impa. ²⁵ Ayæ adocä Wäö incæ, ‘Botö æbodö imoo, ante pönëmini. Minitö pönënö
bai wii imopa. Botö do pönimo iñömote mini nê pönëmongä iñömö ayæ pon-
cæcäimpa. Tömengä ingante adinque botö waëmö imopa diyæ tömengä awæn-
cata godö ñi cæquimoo.’ Ante Wäö tömengä nänö cæquënënö wodo iinque cæyedë
apænegacäimpa.”

²⁶ Ante apænedinque Pabodo godömenque apænegacäimpa. “Iñänäni, pancaminiya
Abadäo wodi pæimini iñömini pancaminiya wamini incæ Wængonguï ingante
guñëmimi iñömini edæ botö tömämimi iminite apænebo ëñëdäni. Mäninö, Codito
ængä beyænque quëwencämiminimpä, ante Wængonguï tömämö beyæ pönö apæne-
gacäimpa. ²⁷ Eedotadë quëwënäni tönö tömënäni awënëidi iñömö, Itota æcänö
ingää, ante pönënamäi ingadänimpa. Ìninque guëmanguïönæ iñö guëmanguïönæ
iñö Wængonguï beyæ nê apænegainäni nänï yewæmongainta cöwë adäni incæte
tömënäni, Itota nänö wænguinque wënæ wënæ cæcä ingampa töö, ante babæ ante
apænte änewëninque edæ dodäni nänï yewæmonte angainö bai iinque cädäni-
tapa. ²⁸ Tömënäni, Itota nänö wænguinque æbänö wentamö mongængää, ante
cöwä ayönäni edæ dæ ampa. Ante wædinqe awënë Pidato ingante apænedinque
tömënäni, Itota ingante ämi wænönäni wængæ, ante ancaa änäni ëñëninque Pidato
Ao angä wænönäni wængacäimpa. ²⁹ Ìninque Itota ingante awäa timpote wænön-
inque tömënäni dodäni tömengä ingante ante nänï yewæmonte angainö bai tömänö
ante iinque cädänitapa. Mänömaï cädäni ate wængä ate tömënäni änäni ate tö-
mengä miñæ godinäni wæætë tömengä nänö ongöwäa pædæ æmpodinqe önompo

o togæmpote wæi ðnōwa o togæwadinque pædæ wæænōninque edæ ænte mǎo daga wengadānimpa.”

³⁰ “Incæte Wængongui guiquēnē do wæningā ingante, Nāni ðmæmōe, angā nāni ðmæmōte quēwengampa. ³¹ Nāni ðmæmōninque tōmengā tæōnæ iñonte pō pō cædinque a ongōñongante edæ tōmengā tōnō wēēnēdē Gadideabæ quēwēninque Eedotadēē iñōmō nē pongaïnāni iñōmō edæ tōmengā ingante wæætē adānitapa. Īninque tōmēnāni iñōmō nē adīnāni inte waodāni inānite, Itota nāwangā nāni ðmæmōte mīingā quēwengampa, ante nē apænedāni inānīpa.”

³² Ante apænedinque Pabodo, “Dodāni inānite Wængongui, Minitō beyæ botō cōwē pōnō cæcæboimpa, ante apænegacāimpa, ante ēñēmīnitawo. Māninō ante watapæ nānō apænegāinō ante mōnitō nōwo iīmaī ante apænemōnīpa. ³³ Māninō tōmengā dodāni inānite nānō angāinō baī nōwo tōmēnāni mōmōidi beyæ iinque cædinque Wængongui Itota ingante, Nāni ðmæmōe, angā nāni ðmæmongacāimpa. Tōmengā nōwo iinque cæcampa, ante Ämotamīni nāni Angainta tānota gao wæintaa Wængongui beyæ iīmaī ante yewæmongatimpa. ‘Botō Wēmi inōmi imīpa. Nōwoōnæ bitō Mæmpobo babopa.’ ³⁴ Ayæ māninō, Tōmengā Wengā do wæningā iñongante Wængongui angā nāni ðmæmōninque baō nōmāadāmaī incæcāimpa, ante pōnēninque Itaiya wodi iīmaī ante Wængongui beyæ ante yewæmongacāimpa. ‘Awēnē Dabii wodi ingante apænedinque botō, Tæiyæ waēmō botō cædō baī cædinque cōwē ædæmō aate cæcæboimpa, ante nō botō angāinō baī cædinque mīnitō imīnite pōnō adobaī cæcæboimpa,’ ante Wængongui angampa, ante yewæmongacāimpa. ³⁵ Ayæ māninō ante wataa adobaī Wængongui ingante apænete baī Dabii wodi yewæmongacāimpa. ‘Bitō imite nē Cæcā iñōmō bitō cædō ante cōwē cædongā inte wængā adinque bitō ædō cæte tōmengā ingante ænāmaī inte ee abi baō nōmāaquiringā,’ ante yewæmongacāimpa.”

³⁶ “Awēnē Dabii wodi guiquēnē Wængongui nānō ānōnō ante ēñēninque adoyedē quēwēnāni beyæ waa cædingā inte edæ nāñe wæninque tōmengā mæmæidi weca æiyongā tōmengā baō iñi nōmænte bagatimpa. ³⁷ Wæætē Wængongui, Nāni ðmæmōe, angā ēñente nē ðmæmongaingā iñōmō tōmengā baō nōmāadāmaī ingatimpa. ³⁸ Īninque onguiñæmīni botō tōniñamīni ēñēdāni. Itota pōnō cæcā beyænque mōnitō mīnitō imīnite apænedinque, Wēnæ wēnæ mōnō cædō ante adinque Wængongui pōnō nīmpo cæcā ate quēwēmōmpa, ante apænemōni ēñēmīnīpa. Mōitee wodi nānō wææ angāinō ante ēñente beyænque mōnō iñōmō dicæ nō cæte quēwēmō imongaa. ³⁹ Wæætē māningā onguiñængā iñōmō Itota iñōmō tōmengā nō pōni nānō entawēnō ante pōnongā ænte entawēmō beyænque mōnō nē pōnēmō tōmāmō wæætē Wængongui ayongā edæ nō cæte quēwēmō inōmō imōmpa. ⁴⁰ Īninque Wængongui beyæ nē apænegāināni iīmaī ante nāni apænegāinō ante pōnēninque mīnitō iñōmō, Mōnitō imōnite wīi bacæimpa, ante nāmā wææ aquēnē quēwēedāni. Iīmaī ante edæ ämotamīni ante baī yewæmongadānīpa.

⁴¹ ‘Mīnitō nē badete towēmīni inte cōwā aquēnē quēwēedāni.

Botō cæbo adinque mīnitō ancaī guīñente wæcæmīnīpa.

Mīnitō ayæ mīimīni quēwēñōmīni edæ botō mā pōni cæcæboimpa, ante pōnēmīniyaa.

Wængongui mānōmaī cæcæcāimpa, ante edonque pōni apænedāni baī mīnitō wæætē, Babæ ancædō, ante wæcædōmīnīpa.’

Ante näni yewæmongäinö ante adinque edæ badete todämaï iedäni,” ante Pabodo apäñecantapa.

⁴²Mänömainö ante iinque apäñedinque Pabodo tönö Bedënabee tömënäni odömöincönë ongonte oncodo tao goyönate Antioquiya iñömö quëwënäni iñömö, Wacä guëmanguïönæ bayonte minatö ñöwoönæ mina apäñedö bai godömenque apänemina ëñencämönimpa, änänitapa. ⁴³Ayæ godongämæ näni ponte ongönincabo tao goyönäni oodeoidi pancadäniya ayæ oodeoidi bai në bagäinäni adobai Wængongui ingante guïñente quëwënäni nanguï inäni iñömö Pabodo tönö Bedënabee inate edæ tee empote godäni. Adinque iñäna wæætë tömënäni inänite apäñedinque, Wængongui waadete nänö pönö cädönö ante pönëninque minitö cöwë ñimpo cädämaï täï ongöninque edæ waa quëwëedäni, ante nanguï apäñedatapa.

⁴⁴Ayæ adoque Wængongui itädë go ate tömënäni näni guëmanguïönæ bayonte mäniñömö quëwënäni wodo tömänäni Wængongui Awënë nänö änö ëñencæte ante godongämæ pönänitapa. ⁴⁵Nanguï inäni mänömaï pönäni ate wædinque oodeoidi guiquënë piinte badinque, Babæ ante änewengampa, ante Pabodo ingante godö piinte tedewëñänitapa. ⁴⁶Mänömaï tedewëñönänite Pabodo tönö Bedënabee wæætë guïñenedämaï inte apäñedatapa.

—Minitö oodeoidi imiini inte edæ täno ëñencämönimpa, ante cædinque mönatö Wængongui nänö änö ante edæ mä apäñedinque minitö imiinite täno apäñequëñemöna intamönapa. Minitö iñæmpa mini cöwë wänämaï quëwenguïnö ante apäñeyömöna mini apänte pangä wæquinque edæ Baa äminipa. Ante wämöna inte mönatö ñöwo ëmö cæte godinque edæ oodeoidi inämaï inäni weca edæ apäñecæ gomöna tamëñedäni. ⁴⁷Mönitö Awënë iïmaï ante mönatö imönate angacäimpa.

“Quëwencämönimpa, ante botö cægäinö ante bitö inguipoga tömämaë mäo apäñedinque

Oodeoidi inämaï inäni beyæ tica ënente bai cæcæbiimpa, ante cædinque botö bitö imite da godömo apäñecæ gocæbiimpa.”

Ante në apäñegaingä inte Wængongui mönatö imönate angä ëñente apänemönapa.

⁴⁸Mänömainö ante apäñeda ëñëninque oodeoidi inämaï inäni iñömö, Awënë nänö apäñedö waa ëñëmönipa, ante watapæ apäñedänitapa. Ayæ mönö Awënë doyedë apäñedinque, Mänimpodänique wede pönëninque cöwë wädämaï quëwenguïnäni incädänimpa, ante tömengä nänö në angäinänique ñöwo pönëñänitapa. ⁴⁹Iinque mönö Awënë tömengä nänö apäñedö ante mäo apäñeyönäni mäniömæ tömäo quëwënäni ëñëñänitapa.

⁵⁰Oodeoidi guiquënë, Pabodo tönö Bedënabee inate mönö wido cæcäimpa, ante cædinque iïmaï cädänitapa. Onquiyänäni näni në waa adäni inte Wængongui ingante guïñente quëwënäni iñönänite tömënäni tönö onguïñänäni mäniñömö quëwënäni awënëidi bai inte ñänänäni iñönänite oodeoidi, Badogaa, ante nanguï änäni ëñëñänitapa. Oodeoidi nanguï änäni ëñente cædinque mäninäni wæætë Pabodo tönö Bedënabee inate togænte päninque, Mönitö ömä quëwënämaï, ante wido cädäni godatapa. ⁵¹Mänömaï cädäni godinque tömëna iñömö, Mänimæ näwate awädö, ante bai cædinque piwacæ piwacæ cædinque Icönio iñömö gocæte ante wadæ godatapa. ⁵²Itota ingante në tee empote quëwënäni guiquënë watapæ todäni badinque Wængongui Tæiyæ Waëmö Önöwoca ingante ænte ëwocadinque edæ waa quëwengadänimpa.

Pabodo tönö Bedënabee Icönio iñömö godapa

14 Mänii godinque Icönio näni quëwëñömö pöningue Pabodo tönö Bedënabee cöwë näna cæi bai cædinque oodeoidi odömöincönë go guidatapa. Go guite apäneyöna, Nö apänedä, ante pönëningue oodeoidi tönö oodeoidi inämaï inäni tönö nanguï inäni näni wede pönëningue ëñëñänitapa. ²Wæætë oodeoidi incæ pancadäniya në Baa änäni inte babæ wapiticæ apänedinque, Iñäna në wënæ wënæ apänedä inate wii ëñengæimpa. Ante tedewënäni ëñente wædinque wadäni oodeoidi inämaï inäni wæætë piinte badinque mönö tönöñäda inate ante wiwa adänitapa. ³Incæte iñäna wantæpiyæ mäniñömö quëwëñinque guiñënedämaï inte mönö Awënë beyæ apänedatapa. Apäneyöna mönö Awënë incæ, Pabodo tönö Bedënabee iñömö botö pönö waadete cægäinö ante në nö apänedä inönapa, ante wadäni pönencädäniimpa, ante cædinque tömëna tönö godongämæ cæcä ate tömëna, Ate pönencädäniimpa, ante mä cædinque bamönengæ cædatapa.

⁴Mänömaï cæda incæte mäniñömö quëwëñäni pancadäniya, Oodeoidi bai pönëmönipa, äñönänite wadäni guiquënë, Itota da godongä në pöna bai pönëmönipa, ante pancadäniya wadö pancadäniya wadö cædänitapa. ⁵Iñinque oodeoidi tönö oodeoidi inämaï inäni tönö tömëñäni awënëidi tönö godongämæ pönëningue, Pabodo tönö Bedënabee inate mönö piinte cædinque dicaca tacamö wæncædaimpa. ⁶Ante Ao ante cæyönäni Pabodo tönö Bedënabee iñömö, Mänömaï ante cædänipa, ante ëñente wædinque wodii winönatapa. Wodii winonte godinque Dicäoniaabæ pöningue tömëna Ditada näni quëwëñömö Dedebe näni quëwëñömö wayömö wayömö godinque, ⁷mönö Awënë ingantedö ante watapæ mao godömenque apänedä ëñëñönänimpa.

Ditada iñömö Pabodo ingante tacädänipa

⁸Mäniñömö Ditada iñömö edæ wacä cabæwaingä tömengä önöwa tipæwaa wënæ wënæ ewacä ëñagaingä inte dao dao godämaingä pægaingä inte tæ contate a ongongantapa. ⁹A ongönongä Pabodo ponte apäñecä ëñëe congantapa. Pabodo wææmö adinque önöwënenque pönëningue, Iñgä nänö waa bawaquinque në pönengä ingampa, ante do pönente wædinque, ¹⁰tömengä ingante ogæ tedete,

—Ængæ gantidinque adiyæ gongæmi ämopa.

Angä ëñëningue në cabæwaingä incæ quingæ ængæ gantidinque dao dao gocantapa. ¹¹Mäniñömö ongönäni guiquënë Pabodo mänömaï cæcä ate wædinque dicäoniaidi tömëñäni tededö yedæ äninque,

—Iñäna iñömö wængonguina incæ waoda bai bate mönö weca wæænte ongöna abaimpa.

¹²Ante pönente wædinque Bedënabee ingantedö ante apänedinque, Mönö wængonguï Deoto ingänö angüënë, ante Deoto pönö pemöninque, Iñgä wæætë në apäñecä ingampa, ante pönëningue Pabodo ingante, Mönö wængonguï Edëme ingänö angüënë, ante pemönänitapa. ¹³Ayæ tömëñäni quëwëñömö yæcado tömëñäni wængonguï Deoto oncö mäñonte ongönimpa. Deoto qui, ante në godongä iñömö edæ, Pabodo tönö Bedënabee në wængonguina inapa, ante wapiticæ pönëningue, Mönö wængonguina qui, ante tömänäni tönö godoncæ cæcantapa. Mänömainö ante cædinque tömengä näni que cædi ongai ænte pöningue wagadaidi onguiñänäni inänite yabædemö ænte ponte wænoncæ cæcantapa. ¹⁴Mänömaï cæcä ate wæd-

inque në ponte apæneda Bedënabee tönö Pabodo iñömö, Wiwa cæminipa, ante bai cædinque nämä weocoo wänä ñæninque pogodo mämö nangui ongönäni weca tæcæguedë nä gongæninque,

¹⁵—Iñänäni, quimä quëwëminii. Minitö waomini iminipa, mönatö minitö bai adobai waomöna imöna apa quëwëminii. Mönatö iñæmpa watapæ möna ëñënë ante apænecæte ante pönimöna inte minitö iminite iimaï ante ämönäpa. Iñcoo mini waa adincoo incæ edæ, Önoncooque impa, ante adinque minitö mänincooque wido cædinque Wængongui në Quëwengä gämænö pöedäni. Tömengä iñömö öönæ inguipoga gäwapæntibæ në badongaingä inte öönædë quëwënäni tömänäni inguipoga quëwënäni tömänäni gäwapäa quëwënäni tömänäni inänite në badongaingä Wængongui inongä ingampa. ¹⁶Tömengä wëñëñedë tömämaë quëwënäni nämä pönëninque näni goquïnonque ee acä gogadänimpa. ¹⁷Incæte tömënäni inänite wii æmäwo emö cæte gogacäimpa. Wæætë edæ, Wængongui æbänö ingää, ante ëñencädänimpa, ante cædinque tömengä ñimpo cädämaï cöwë odömongacäimpa. Edæ minitö iminite pönö waadete cædinque Wængongui cöönæ angä inguipoga wææ ininque incadepo incadepo cængui eyepæ pönongä cæninque minitö watapæ todinque quëwëminipa.

¹⁸Mänömainö ante Pabodo tönö Bedënabee wææ cæcæte ante apæneda ëñënëni incæte godongämæ ongönäni guiquënë, Minatö wængonguimina qui, ante cöwë pönöncæmönimpa, ante wawique pönëninque cädänitapa. Wodo edæ pönöñönänite iñäna godömenque wææ äna ëñëninque ñimpo cæte wii pönönänitapa.

¹⁹Ayæ ate oodeoidi Antioquiya iñömö quëwëninque Icönio iñömö quëwëninque pö Ditada iñömö pöninque mäniñömö godongämæ ongönäni inänite, Iina onguïñäna inate mönö wii ëñengæimpa, ante änäni. Eñëninque godongämæ Ao äninque Pabodo ingante dicaca tacadäni wæyongä, Ämäwo wængampa, ante pönëninque tömënäni näni quëwëñömö yabæ inö wëä mäo wido cädänitapa. ²⁰Incæte Itota ingante tee empote quëwënäni godongämæ ponte æænimaë gongænte ayönäni Pabodo yabæque æmäwo wænte bai öñöningä inte ængæ gantidinque adodö tömënäni quëwëñömö pongantapa. Ayæ iimö ate tömengä Bedënabee tönö wæætë Dedebe näni quëwëñömö adodö gocæte ante wadæ godatapa.

²¹Godinque Dedebe iñömö pöninque Codito ingantedö ante watapæ apæneda ëñëninque tömënäni nangui inäni Itota miñä quëwënäni bagadänimpa. Ininque tömëna mäniñömö idæwaa apænete wadæ godinque Ditada iñömö adodö pö godinque Icönio iñömö adodö pö godinque Antioquiya näni quëwëñömö wæætë pönatapa. ²²Mänömaï wayömö wayömö godinque Itota ingante në tee empote quëwënäni inänite bee téninque Pabodo tönö Bedënabee nangui apæneda ëñëninque iinäni godömenque täi piñænte entawënäni badänitapa. Ayæ tömënäni inänite, Mini pönëno ante ñimpo cädämaï inte godömenque wede pönëninque täi ongoncæminimpa, ante ædæmö apæneda ëñënanitapa. Ayæ waadete apænedinque, Mönö nangui nantate wædinque Wængongui Awënë Odeye nempo guicäimpa, ante apæneditapa. ²³Ayæ wayömö wayömö tömäo godinque Itota ingante godongämæ näni pönecabo weca go guite ongöninque Pabodo tönö Bedënabee iñömö iimaï cædatapa. Në nö cädäni inänite adinque tömëna, Itota Codito ingante mini godongämæ pönecabo iñöminite iinäninque edæ në aadäni bacädänimpa, ante äna ate mäniñäninque në Picänäni näni änönäni badänitapa. Ayæ cænämaï inte Wængongui ingante apænete ate tömënäni inänite iñäna, Minitö mönö Awënë ingante wede pönëminita-

woo. Tömengä mīni nē pönēnongä incæ mīnitō imīnite wææ aacæcäimpa, ante apænedatapa.

Tidiabæ Antioquiya iñömö ocæ emænte godapa

²⁴ Pabodo tönö Bedēnabee ayæ Pitidiabæ wodo tebæ godinque Pampidiabæ pōnatapa. ²⁵ Māniñömö ponte Pedegue näni quēwēñömö mönō Awēnē nānō angainö ante apænedinque Ataya näni quēwēñömö wææ pōnatapa. ²⁶ Māniñömö pōninque tōmēna imæmāa Antioquiya iñömö adodō tacæte ante ñænæ wipodē guidadapa. Doyedē iñömö tōmēna nāna māniñömö quēwente tao goyedē wadāni nē pönēnāni inte tōmēna inate, Wængongui pōnō waadete godongämæ cæcä ate mīnatō eyepæ cæcæmīnaimpa, ante da godongaināni inōnānimpā. Ñowo iñömö tōmēnāni näni ānīnō do iinque eyepæ cædīna inte tōmēna adoyōmō näni da godiñömö ocæ emænte pōnatapa. ²⁷ Māniñömö pōninque tōmēnā Itota ingante godongämæ näni pōnencabo inānite āñete pōnāni ate tōmēnāni inānite apænedinque Wængongui tōmēna tönō nānō cædīnō ante adodō adodō tōmānō ante apænedatapa. Oodeoidi ināmai ināni wede pōnēninque guicædānimpā, ante Wængongui odemō wi ænete bai cæcä ate do pōnente badānimpā, ante apænedā eñēnānitapa. ²⁸ Ayæ māniñömö Itota ingate nē tee empote quēwēnāni tönō wantæpiyæ quēwengadaimpā.

Eedotadēē iñömö pōninque wæætedō wæætē ānāni

15 Māniñedē onguñænāni Oodeabæ quēwēnāni pancadāniya Antioquiya iñömö wææ pōninque nē pönēnāni inānite iīmai ante odōmonte wææ angadānimpā. Mīnitō bagāamīni inte Mōitee wodi nānō wææ angainö bai wīi cæmīni adinque Wængongui dicæ ængampa quēwenguimīni. ² Ante wææ ānewēnāni eñente wædinque Pabodo tönö Bedēnabee iñömö, Quimæ ānewēmīni, ante nāēmæ wææ ānatapa. Iinque Antioquiya iñömö quēwēnāni guiquēnē Pabodo tönö Bedēnabee tönō wadāni nē pönēnāni inānite, Mīnitō Eedotadēē godinque Itota nānō da godongaināni tönō nē aadāni Picænāni inānite bee tēninque, Oodeabæ quēwēnāni näni wææ ānōnō ante æbānō cæquiī, ante eñencæte ante ædāni.

³ Äninque Itota Codito ingante godongämæ näni pōnencabo incæ Pabodoidi inānite da godōnāni wadæ godānitapa. Ayæ godinque Pēnitiabæ wodo tebæ godinque mānimæ quēwēnāni inānite apænedinque godōmenque Tāmadiabæ adobai wodo tebæ gote apænedinque, Wængongui pōnō cæcä ate oodeoidi ināmai ināni incæ mönō Awēnē gāmænō do pōnānimpā, ante Pabodoidi apænedāni. Eñēninque mönō tōniñadāni mānimæ quēwēnāni incæ watapæ todānitapa.

⁴ Pabodoidi Eedotadēē iñömö pōnāni adinque Codito ingante näni godongämæ pōnencabo tönō Itota nānō da godongaināni tönō nē pönēnāni inānite nē aadāni nē Picænāni tönō godongämæ ponte ongōninque Pabodoidi inānite, Waa pōmīni amōnimpā. Ante āñōnānite Pabodo tönö Bedēnabee iñömö, Wængongui iīmai mönatō tönō godongämæ cæcampa, ante tōmānō ante adodō adodō apænedā eñēnānitapa. ⁵ Māniñedē Paditeoidi incæ pancadāniya nē pönēnāni badīnāni inte ængæ gantidinque iīmai ante apænedānitapa.

—Iñæmpa oodeoidi ināmai ināni inānite, Cōwē eö togænguēnemīni imīnimpā, ante mönō wææ angæimpā. Ayæ Mōitee wodi, iīmai cæedāni, ante nānō angainö ante eñenguēnemīni imīnimpā, ante mönō cōwē angæimpā.

⁶Änani ate Itota nänö da godongäinani tönö në pönänani inänite në aadani Picänäni tönö godongämä pöningue, Oodeoidi inämaï inäni inänite mönö äbänö anguiï, ante tedecönänitapa. ⁷Mäninö ante wæætedö wææte apänedäni adinque Pegodo guiquënë ängä gantidique godongämä ongönäni inänite iïmaï ante apä necantapa.

—Botö mämöidi, minitö iïmainö ante do ëñëminipa. Wængongui do inönedë, Oodeoidi inämaï inäni incæ Codito ingantedö ante watapæ ëñëningue edæ në pönänäni bacädänimpa, ante cædinque mönö imonte apænte äningue botö imote angä gote mäninö ante apänebo ëñënanitapa. ⁸Da godongä gote apäneyömo Wængongui, Waocä äbänö mimöno pönengä ingäa, ante në ëñëningä inte edæ tömengä Tæiyä Waëmö Önöwoca ingante oodeoidi inämaï inäni inänite da pönongä æte ewocädänipa. Ininque mönö imonte pönö cæcä bai tömënäni inänite adobai cædinque tömengä edæ, Oodeoidi inämaï inäni inänite botö Ao ante do ämopa, ante odömongä abaimpa. ⁹Tömënäni wede näni pönënö beyænque Wængongui tömënäni mimö nã mënongadinque, Oodeoidi inämaï inäni incæ minitö bai adobai inäni apa änewëminii, angampa. ¹⁰Mönö iñömö mönö mämæidi tönö teëmë mongænte bai wædinque edæ, Möitee wodi nänö wææ angainö ante mönö ædö cæte ëñente cæquiï, ante godongämä wægämöimpa. Nöwo guiquënë Oodeoidi inämaï inäni incæ tæcæ pönëñönänite minitö iñömö teëmë cönöncapænte bai cædinque tömënäni inänite, Cædäni, ante wææ äminipa töö. Mänömaï cædinque minitö, Wængongui önonque cæcampa, ante bai cæminipa töö. ¹¹Iñæmpa mönö Awënë Itota pönö waadete ängä beyænque tömënäni wänämaï inte quëwënäni bai mönö adobai mäninö beyænque wänämaï inte quëwëmompa, ante pönëmönipa. Mänömainö ante Pegodo iinque apä necä ëñënanitapa.

¹²Ayæ Bedënabee tönö Pabodo wææte tömënäni inänite apänedä ëñëningue godongämä ongönäni tömänäni edæ tededämaï inte ëñë cönänitapa. Tömëna iñömö, Wængongui mönatö tönö godongämä cædinque edæ, Minatö mä cæminä adinque Oodeoidi inämaï inäni incæ pönencädänimpa, ante cædinque bamönengä wææte wææte cæcantapa, ante adodö adodö ante apänedatapa. ¹³Iinque apänedä ate Tantiago wææte tömangä apä necantapa.

—Botö biwiïdi, botö nöwo apänebo ëñëdäni. ¹⁴Wængongui täno waadete pönö cædinque oodeoidi inämaï inäni pancädäniya inänite apænte äningue, Botö quimini bacæminimpa, ante cæcantapa, ante Timönö do apä necä ëñëntamompa. ¹⁵Ayæ Wængongui beyæ në apänegainäni incæ, Iincayæ ate Wængongui mänömaï cæcæcäimpa, ante pönëningue adoyömö ante iïmainö ante do yewæmongadänimpa.

¹⁶“Awënë Dabii nempo në quëwengainäni näwæ godäni adinque botö iñömö oncö wodintai wææte tæi mänonte bai cædinque, iincayæ ate adodö pöningue pönö cæbo ate

näwæ gogainäni iñömö Awënë nempo adodö pöningue quëwencädänimpa.

¹⁷Mänömaï cæbo ate edæ wädäni tömämaë quëwëningue oodeoidi inämaï inäni incæ botö ëmowo ante në ewocädäni inte näwä Awënë ingante ante diqui diqui minte acädänimpa,

¹⁸ante mönö Awënë iñömö edæ

mäninö ante në cægäingä inongä inte,

do cæcä näni ëñengainö ante apä necampa.”

¹⁹ Ante yewæmongatimpa, ante Tantiago godömenque apænecantapa. “Botö Wængongui nänö apænegäinö ante pönente wædinque, İımaı cæcæimpa, ante pönemopa. Oodeoidi inämaı inäni, Idæwaa wapiticæ pönente awædö, ante wædinque ocæ emænte näwä Wængongui gämænö pönönänite mönö edæ ee cædinque tömënäni taadö ganta cædedämaı ingæimpa. ²⁰ Önonque, Tömënäni acædänimpa, ante iımaı ante yewæmongæimpa, Wadäni, Wængonguiıdi quı, ante cænguı näni cönönı cænämaı incæminimpa. Ayæ nänöogængä inämaı inongante godö mönämaı incæminimpa. Ööingä nê wemencate wæningä ate cænämaı incæminimpa. Baö wepæ owemöingä i adinque cænämaı incæminimpa, ante mönö yewæmongæimpa, ämopa. ²¹ Edæ doyedê pönı oodeoidi näni quëwëñömö näni quëwëñömö tömää inömö mäo Möitece wodi nänö wææ angäinö ante apænädäni ênengadänimpa. Ayæ nōwo ganca adobainö ante guëmanguıönæ inö guëmanguıönæ inö mönö odömöincönê go guiite apænädäni ênente mänömainö ante ênente cæquënenäni inänipa. Mäninonque ante mönö yewæmongæimpa, ämopa,” ante Tantiago iınque apænecantapa.

Oodeoidi inämaı inäni acædänimpa, ante yewæmönänipa

²² Mänömainö ante apænecä êñëninque Itota nänö da godongäinäni tönö në aadäni Picænäni tönö Itota Codito ingante godongämæ näni pönencabo tömancabo tönö godongämæ pönëninque, Mönö cabo incæ mënaa inate apænte æninque tömäna inate, Mınatö Pabodo tönö Bedënabee miñæ Antioquiya goeda, ämögocædaimpa. Ante Ao äninque tömënäni, Mönö pönencabo inömonte Codaa Badatabato mönö änogä tönö Tidato inömö nê äna inapa, ante adinque tömäna inate apænte ænänitapa. ²³ Ayæ, Cadota ante ænte gocædänimpa, ante iımaı ante yewæmongadänimpa.

Mönitö pancamöniya Itota nänö da godongaımöni inömöni pancamöniya në pönënäni inänite nê aamöni Picämöni imönipa. Mänömaı imöni inte mönitö mınitö töninamöni imönipa. Mınitö oodeoidi inämaı imini inte Antioquiya inömö Tidiabæ inömö Tiditiabæ inömö quëwëninque mını pönencabo mını pönencabo inöminite mönitö, Waa quëwencæminimpa, ämönipa.

²⁴ İımaı ante tededäni êñentamönipa. Mönitö, Goedäni, änämaı inömöni wadäni möni cabo incæ pancadäniya wadæ gote mınitö weca pöninque mınitö iminite, Eö togæedäni, ante wææ änäni. Êñëninque mınitö tömënäni näni wææ äninö beyænque teëmê mongænte bai, Æbänö cæquıı, ante wæminipa, ante tededäni êñëmönipa. ²⁵ Mänömainö ante tededäni êñente wædinque mönitö godongämæ pönëninque onguıñæna mënaa inate apænte æninque tömäna inate iımaı antamönipa. Mınatö Bedënabee tönö Pabodo mönö nê waadeda tönö godongämæ godinque oodeoidi inämaı inäni weca goeda, ante cætämönipa. ²⁶ Bedënabee tönö Pabodo inömö mönö Awënë Itota Codito emöwo beyænque cædinque näna nämä wodo wænguinque cædatapa. ²⁷ İıninque, İı cadota möni yewæmönö näwangä impa, ante adodö ante apænecædaimpa, ante cædinque mönitö Codaa tönö Tidato inate da godömöni godinque mınitö weca pöna aedäni. ²⁸ Edæ, mönitö Wængongui Tæiyæ Waëmö Önöwoca tönö godongämæ pönëninque, Mınitö godömenque teëmê mongænämaı incæminimpa, antamönipa. İıninque, Mınitö iımaı cædinque idæwaa, ante pönëmönipa.

²⁹Wadäni, Wængonguïdi quï, ante cænguï näni cönönincoo ante cænämaï gomö aedäni. Wepæ owemöingä adinque ööingä ñë wëmencate wæningä adinque cænämaï iedäni. Ayæ nänöogængä inämaï iñongante godö mönämaï iedäni. Minitö mäninque ante ee ate cædämaï imïni ininque waa quëwë-maiminipa. Mäninque ante yewæmömönipa.

³⁰Ante yewæmonte pædæ pönönäni ænte wadæ godinque Antioquiya iñömö wæidinque në pönänäni inänite äñete godongämæ pönäni ate Eedotadëë quëwente pönäni tömënäni näni yewæmöninta pædæ pönönäni ænte adänitapa. ³¹Eedotadëë quëwënäni, Minitö godömenque teëmë mongænämaï incæminipa, ante näni yewæmonte äninö adinque oodeoidi inämaï inäni iñömö wampo pöninque todänitapa. ³²Codaa tönö Tidato iñömö Wængonguï beyæ në apæneda inte adobaï, Tæï piñænte entawencæminipa, ante cædinque ædæmö apæneda ëñëninque tömënäni näni pönencabo mimönë gancæ batawente wede pönänänitapa. ³³Ininque tæönæ quëwëna ate mäninömö quëwënäni näni pönencabo wæætë tömëna inate waa apænedinque, Ñöwo gänë pönëninque waa goeda, ante tömëna inate në da pönönäni weca wæætë adodö da godönäni godatapa. ³⁴Tidato guiquënë, Iñömö ongoncæboimipa, ante ayæ ongongantapa. ³⁵Pabodo tönö Bedënabee guiquënë Antioquiya iñömö ayæ quëwëninque wadäni nangui inäni tönö godongämæ odömöninque Wængonguï nänö äno ante watapæ apæneda ëñengadänimipa.

Pabodo ingante wæætë da godönäni gocampa

³⁶Iñcayæ ate Bedënabee ingante Pabodo,

—Wëenënedë Wængonguï nänö äno ante möna gote apænediñömö wæætë adoyömö gote mönatö töninadäni weca gote ëñadinque, Æbänö quëwënänii, ante acæmönaimpa.

³⁷Äñongä Bedënabee Ao angantapa. Ayæ tömengä, Wäö Mäadoco näni äñongä ingante mönatö tönö godongämæ gocæcäimpa, ante cæcantapa. ³⁸Pabodo guiquënë, Iñæmpa wëenënedë Pampidiabæ iñömö pönömönate iingä Mäadoco iñömö mönatö tönö godömenque cædämaï inte edæ wadæ gocantapa, äninque, Ñöwo wii ænte gocæimpa, ante Baa angantapa. ³⁹Ininque tömëna wæætedö wæætë äninque tömëna wadö wadö gote panguimæ godatapa. Bedënabee guiquënë Mäadoco ingante ænte ñænæ gäwapaa gote wipodë ñænæmpodë guite wogaa godinque wää tëiwænë Tipidebæ tao gocantapa. ⁴⁰Pabodo guiquënë Tidato ingante apænte ænte gocæ cæyongante tömënäni näni pönencabo iñömö tömëna inate apænedinque, Wængonguï minatö beyæ pönö waadete cæcæcäimpa, änäni ëñëninque wadæ godatapa. ⁴¹Ayæ Tidiabæ tömäo godinque Tiditiabæ tömäo godinque Pabodo iñömö Codito ingante näni godongämæ pönencabo inänite apænecä ëñëninque tömënäni wede pönëninque tæï piñænte batawengadänimipa.

Pabodo tönö Tidato miñæ Timoteo gocampa

16 Mänii godinque Pabodo Dedebe iñömö ponganque go Ditada iñömö pongantapa. Itota ingante tee empote në gocä Timoteo mäninömö quëwengacäimpa. Tömengä wäänä oodea inöna incæ në ædæmö cæte pönëna inönäimpa. Timoteo mæmpo wæætë guidiego inongäimpa. ²Timoteo iñömö Itota ingante pönente quëwengä adinque në pönänäni Ditada iñömö quëwënäni incæ Icónio iñömö quëwënäni incæ, Timoteo në waa quëwënongå ingampa, ante adoyömö apænedäni-

tapa. ³ Ìnque Pabodo, Botö tönö Tímoteo guëa gocæcäimpa, angantapa. Wæætë, Oodeoidi mänimæ quëwënäni tömänäni, Tímoteo mämpo guidiego ingampa, ante do ëñänäni inte piinäni wæcæ wæ. Änque Pabodo angä yæcadogæ ëö togänäni ate Tímoteo ingante ænte gocantapa. ⁴ Godinque Pabodoidi wayömö näni quëwëñömö wayömö näni quëwëñömö godinque iimaï ante apænedänitapa. Minitö oodeoidi inämaï imini inte æbänö ëñente cæte quëwenguimini, ante Eedotadëë iñömö nê aadäni Picænäni tönö Itota nänö da godongainäni tönö godongämæ pönëninque do änänpa. Ante apænedinque Pabodoidi wæætë tömënäni näni äninö ante adodö ante apænedäni ëñänitapa. ⁵ Mänömaï apænedäni ëñente wædinque Codito ingante näni godongämæ pönencabo iñömö wayömö näni cabo wayömö näni cabo tömänäni wede pönëninque edæ tæi piñante badinque iimö iñö godömenque iimö iñö godömenque nanguü yebænte bagadänimpa.

Mäatedöniabæ quëwengä ingante Pabodo wüimonte acä

⁶ Pabodoidi Atiabæ gocæ cæyönänite Wængongui Tæiyæ Waëmö Önöwoca iimaï ante apænecantapa. Minitö botö änö ante mänimæ apænecæ godämaï incæminimpa, ante wæcæ angä ëñente wædinque tömënäni wæætë Gadatiabæ incæ pancabaa Pidiquiabæ tömäo cægöninque godänitapa. ⁷ Mänimæ cægönaque go Mii-tiyabæ ganca pöninque Bitiniabæ gocæ cæyönänite Itota Tæiyæ Waëmö Önöwoca incæ, Godämaï, Baa angä wædinque tömënäni mäniñömö ñimpo cæte godömenque godämaï inänitapa. ⁸ Mänömaï beyæ tömënäni Mii-tiyabæ wodo pænta go Todoa iñömö wæi godänitapa.

⁹ Mäniñömö wæi gote ongöninque woyowotä ba ate Pabodo wüimonte bai ayongä Mäatedöniabæ onguinængä a ongöninque tömengä ingante iimaï ante apænecantapa. “Mäatedöniabæ pöninque bitö mönitö imönite pönö cæquimi ämönipa,” ante Pabodo ingante angä ëñengantapa. ¹⁰ Ìnque Pabodo, Mänömaï wüimonte bai atabopa, ante apænecä ëñente wædinque mönitö wæætë, Minitö Mäatedöniabæ gote mäo apænemini ëñencädänimpa, ante Wængongui incæ cæbaingampa. Ante pönente wædinque botö Odocabo tönö wadäni Pabodo tönö nê godongämæ cädäni tönö wæætë, Mönö mäniñömö gote Codito ingantedö ante watapæ apænecäimpa, ante pönëninque gocæte ante cætämönipa.

Pabodo tönö Tidato Pidipoto iñömö ponte cædapa

¹¹ Mänömainö ante pönëmöni inte mönitö Todoa iñömö gäwapæ wedeca quëwëninque ñænæ wipodë guite wogaa tao godinque wää tæiwänë Tämotadate töingä gote möninque iimö ate tao Næapodi pontämönipa. ¹² Mäniñömö pö ti wææninque taadonque godinque mönitö Pidipoto odömänoidi näni ponte quëwëñömö adoyömö pöninque tæönæ quëwentämönipa. Mäatedöniabæ incæ pancabaa quëwënäni näni yæcado quëwëñömö Pidipoto impa. ¹³ Mönitö mäniñömö ponte quëwëninque guë-manguionæ iinque bayonte tömënäni näni quëwëñömö yabædemö tao godinque, Önö wedeca Wængongui ingante godongämæ apænebainänipa, ante önöwënenque pönëninque mäniñömö gotämönipa. Mäniñömö ponte ayömöni onquiyänäni do godongämæ ponte a ongönäni adinque mönitö tæ contadinque tömënäni inänite apænetämönipa. ¹⁴ Mäniñömö nê ëñänäni tönö adodanque tömënä ëmowo Didia iñömö Tiatida quëwënonä inte weocoo awënëidi näni opatawæ ëmoncoo godonte ænte quëwënonäimpa. Tömënä Wængongui ingante nê waa ate pönënä inonäimpa.

Īninqe Pabodo apæneca ēamonca ongonte ēñēñōnante mōnō Awēnē tōmēnā mīmō wi ænete bai cæcā ate tōmēnā wede pōnēnantapa. ¹⁵Īninqe tōmēnā nāni owocabo pōnēninqe godongāmæ æpænē guidāni ate tōmēnā ĩñōmō mōnitō ĩmōnite apænedantapa.

—Botō ĩmote ante adinqe mīnitō, Mōnō Awēnē ingante Didia ædæmō cæte pōnengā ingampa, ante pōnēmīnitawoo. Mānōmaïnō ante pōnēmīni inte mīnitō botō oncōnē ponte owoedāni, āmopa.

Ante ancaa apænedā ēñente wædinque mōnitō Ao ante gote owotamōnipa.

¹⁶Māniñedē wacā onquiyængā obe badā inongā inte wadāni nempo quēwēninqe tōmēnāni beyænque nē cæte quēwengā ĩnongāimpa. Tōmengā ĩñōmō nē cæwēnengā inte wadāni ĩnānite, Īncayæ ate æbānō baquī, ante yewænte tedecā ĩnongāimpa. Tedecā ēñēninqe nē ēñēnāni wæætē tōmēnāni nāni godonte æinta bacoo pædæ pōnō pædæ pōnō cædāni incæte tōmengā awēñēidi wæætē ō æ ō æ cædōnān- ĩmpa. Īninqe māniñōmō quēwēninqe mōnitō ayæ ate Wængonguī ingante nāni apæneiñōmō adodō gocæ cæyōmōnite māningā onquiyængā māmō bee tengantapa. ¹⁷Mānōmaī bee tēninqe tōmengā mōnitō Pabodo tōnō mōni gocabo ĩñōmōnite tee empo tee empo pōninqe yedæ angantapa.

—Īnāni Wængonguī Æibæ pōni Quēwengā ingante nē cædāni inte mīnitō ĩminite apænedinque, Æcānō ængā beyænque quēwenguī, ante apænedānipa.

¹⁸Āninqe tæōnæ ĩñonte tōmengā tōmēnāni ĩnānite tee empote godinque Yæ yæ ānewengā ēñente wædinque Pabodo, Ancaa ēñente awædō, ante dadi ēmænte wēnæ ingante āninqe,

—Bitō ĩmite botō Itota Codito ēmōwo apænedinque, Tao gobāwe, āmopa.

Ante tæcæ apæneyongā wēnæ incæ baquecā ingante ēmō cæte tao gocantapa.

¹⁹Pabodo mānōmaī angā ate tao go ate wædinque onquiyængā awēñēidi quiquēnē, Æ tōmengā yewængā beyæ mōnō æincædō incæ dæ gotimpa. Nōwo æbānō cæte nanguī ænguīmō. Ante pīinte wædinque tōmēnāni, Mōnō tōmēna ĩnate odōmāno awēñēidi weca ænte gocæimpa, ante Pabodo tōnō Tidato ĩnate bæi ongonte wēā māo tōmēnāni nāni godonte æiñōmō ænte godānitapa. ²⁰Ayæ odōmāno awēñēna tōmēnāni quēwēñōmō nē apænte āna ĩñōnate nē pīinte cædāni māniņa awēñēna weca Pabododa ĩnate ænte māmō gō cædinque,

—Īina ĩñōmō edæ oodeoda ĩnōna inte mōnitō quēwēñōmō ponte wēnæ wēnæ apænedā ēñēninqe tōmānāni ænguī badinque Yæ yæ ānānipa. ²¹Mōnō odōmānocabo mōnō wīi cæquēñēnō ante odōmonte apænedinque tōmēna ĩñōmō, Māniñonque cædāni, ante ancaa ānewēnapa.

²²Ante tæcæ apæneyōnāni godongāmæ ongōnāni ĩñacabo cædinque Pabodo tōnō Tidato ĩnate pīinte cædānitapa. Ayæ odōmāno awēñēna ĩñōmō, Tōmēna weocoo gā tadongate tæi tæi pædāni. ²³Āna ēñente tæi tæi pānāni wæyōnate awēñēna godōmenque āna ēñente cædinque tōmēna ĩnate bæi ongonte māo tee mōnedinque tee mōneincō nē aacā ingante, Īina ĩnate bitō ædæmō wææ ae, ānatapa. ²⁴Īn- ĩnque mānōmaī ānāni ēñente wædinque nē wææ wānongā wæætē Pabodo tōnō Tidato ĩnate guimongacōnē manguiçā guiidatapa. Ayæ godōmenque tōmēna ōnōwa awæmpaa goti guidōwate tæi tee mōnecā ongōñōna wadæ taocantapa.

²⁵Ayaōnænēña bayō Pabodo tōnō Tidato mānōmaī goti guidōwate wægōninqe Wængonguī ingante apænedinque āmotamīni ānecōñōnate wadāni nē tee mōnete ongōnāni ēñēē cōnānitapa. ²⁶Īñontobæ goinque nanguī ocæ ocæ pōninqe tee

möneincö tännöinca incæ wancæ wancæ cæyö odemö tömänemö wi æmænete gotapa. Ayæ tömänäni inänite näni tæi pöni yaëmengö näni nāni nānimē incæ nīmæncæ nīmæncæ wææntapa. ²⁷ Tee möneincö nē aacä guiquenē iñontobæ nāni ömæmonte ayongä, Odemö dobæ wi æmænete gotimpa, ante wædinque tömengä, Æ tee mönete ongönināni dobæ tao wodii wīnönānipa, ante pönente wædinque, Botö awēnēidi piinte pānāni wænguī wæ, ante pönēninque nāmā wænonte wæncæte ante yaēmē o togænte ængä. ²⁸ Ate wædinque Pabodo iñontobæ ogæ tededinque,

—Nāmā wēnæ wēnæ cædāmaī. Ee ae. Tömāmōni ayæ ongömōni apa quēwēē.

²⁹ Angä ēñēninque nē wææ wānongä iñömö edæ, Tica wodōnoī ænte pōedāni, angä ænte pönāni æninque tömengä pogodo pöninque ancaī guīñente wædinque do do wāate wædinque Pabodo tönö Tidato önöwa inö wæængantapa. ³⁰ Ayæ ængæ gantidinque edæ tömēna inate oncodo ænte mäocä tayōnate,

—Mīnatö nē ämīna inte apænemīna ēñēmoeda. Botö æbānō cæte quēwenguīmoo, ante wæcä.

³¹ Eñēninque tömēna wæætē,

—Awēnē Itota ingante edæ wede pönēmi ate tömengä ængä beyænque quēwencæbiimpa. Mīni owocabo tömāmīni adobaī wede pönente quēwencæmīn-impā, änatapa.

³² Äninque tömēna nē wææ wānongä ingante godömenque Wængonguī Awēnē nānō apænægäinö ante apænedinque tömengä oncönē nāni owocabo tömänäni inänite apænedä ēñēnānitapa. ³³ Ayæ woyowotæ incæ tömēna inate æninque nē wææ wānongä iñömö tömēna inate tæi tæi pānāni nāna æbāate wædiñömö nā mēnongacantapa. Ayæ tömengä nāni wencabo do æpænē guidānitapa. ³⁴ Ayæ tömengä oncönē ænte mængä ææ guīyōna tömēna inate cænguī godongä cænatapa. Ayæ tömengä nāni wencabo nē Wængonguī ingante pönēnāni badināni inte watapæ todānitapa.

³⁵ Baānæ ate odömāno awēnēna guiquenē poditiyaidi inänite nē wææ wānongä weca da godöninque, Pabodo tönö Tidato inate nīmpo cæbi gocædaimpa, ämīni ēñengæda, angä ēñēninque godānitapa. ³⁶ Ponte odömāno awēnēna ëmōwo ante apænedāni ēñēninque nē wææ wānongä wæætē Pabodo ingante apænedinque,

—Poditiyaidi nōwo ponte apænedinque, Pabodo tönö Tidato inate nīmpo cæbi gocædaimpa, ante odömāno awēnēna ānapa, ante apænedānipa. İninque mīnatö nōwo taote godinque piyænē cæte ee goeda.

³⁷ Angä ēñēninque Pabodo wæætē poditiyaidi inänite apænedinque,

—Mönatö odömānomōna imōna incæte nē apænte āna weca apænedāmaī iñömōnate tömēna āna tömänäni ayönāni edæ mönatö imōnate tæi tæi pāninque tee mönedānitapa töö. Tee mönedāni wæyömōna nōwo wæætē mönatö imōnate awēmö wido cæcæte ante cædānipa töö. Mönatö iñæmpa edæ Baa ämōnapa. Awēnēna incæ iñömö pöninque mönatö imōnate ænte mäoda gocæmōnaimpa.

³⁸ Mänömaīnö ante apænecä ēñente wædinque poditiyaidi tömēnāni awēnēna weca adodö godinque Pabodo nānō apænedö ante adodö ante apænedānitapa. Ayæ, Pabodo tönö Tidato odömānoda inapa, ante apænedāni ēñēninque odömāno awēnēna guiquenē guīñente wædatapa. ³⁹ Ayæ guīñente wædinque awēnēna incæ Pabodo tönö Tidato weca ponte waadete apænedinque, Mönatö oda cædinö ante mīnatö odömānomīna imīna inte piinte ānāmaī ieda, ante äninque Pabodo tönö Tidato inate ænte mäoda taoda adinque tömēna inate, Nōwo mönitö quēwēñömö

ëmö cæte wadæ goeda, ämönapa. ⁴⁰ Äna ëñente taodique onquiyænä Didia oncönë go guiddique Pabodo tönö Tidato iñömö, Në pönëñani wampo pönëningue tæi on-goncæðänimpa, ante cædinque æðæmö apænedinque wadæ gogadaimpa.

Tetadönica iñömö quëwënäni Yæ yæ äñänipa

17 Mänii godinque Pabodo tönö Tidato Ampipodi näni quëwëñömö wodo tebæ godaque go Apodönia näni quëwëñömö wodo tebæ godaque go Tetadönica näni quëwëñömö pönatapa. Mäniiñömö oodeoidi Wængongui apæñecä näni ëñente yewæmongainta ate odömöincö näni mäñongaincö mä ongö. ² Adinque Pabodo cöwë nänö cæi bai cædinque guëmanguïönæ bayö guëmanguïönæ bayö mëönaa go adoönæque iñonte tömënäni odömöincönë go guiddique edæ Wængongui angä ëñente näni yewæmongaintaa ate adinque tömënäni inänite, iimaï impa quëwëmini, ante nö apæñecantapa. ³ Tömënäni inänite edonque apænedinque Pabodo, Wængongui beyä në apæñegainäni iimaï ante do yewæmongadänimpa, angantapa. Mönö Codito iincayæ ate pöninque cöwë caate wæquënegä ingampa. Ayæ adocä wænte ate cöwë ñäni ömæmonte quëwenguënegä ingampa, ante yewæmongadänimpa, ante Pabodo apæñecantapa. Ayæ godömenque apænedinque,

—Itota botö në äñongä incæ adocä mönö Codito inongä ingampa, ante apæñecantapa.

⁴ Mänömaï apæñecä ëñëningue oodeoidi pancadäniya, Nö impa, ante pönëningue Pabodo tönö Tidato miñæ godänitapa. Ayæ guidiegoidi nanguï inäni Wængongui ingante në guïñëñäni inte adobaï pönëningue tömëna miñæ godänitapa. Ayæ awënëidi bai inäni onquiyænäni incæ nanguï inäni adobaï pönëningue tömëna miñæ godänitapa. ⁵ Mänömaï pönëñänipa, ante wædinque oodeoidi guiquënë pünte wædinque iimaï cæðänitapa. Tömënäni näni godonte äiñömö gote ayönäni në wiwa cæðäni ongönäni adinque tömënäni inänite äñäni Ao ante godongämæ pöninque oodeoidi tönö iñacabo cædinque Yæ yæ ante püñänitapa. Mänömaï yedæ äñäni ëñente wædinque mäniñömö quëwënäni tömänäni godongämæ pünte badinque Yæ yæ äñänitapa. Oodeoidi iñömö, Mönö Yatönö oncönë guiddique Pabodo tönö Tidato inate da tadöningue në pünte cæðäni inänite da godömö æncæðänimpa, ante cædinque diqui diqui mincæte ante tee gäwade guiddänitapa. ⁶ Wäänë guiddique tömëna inate adämaï inäni inte oodeoidi wæætë oncö në ëacä Yatönö ingante yao ongöninque wadäni në pönëñäni inänite yao ongonte wëä tadö mäo tömënäni näni quëwëñömö awënëidi weca ænte godänitapa. Ayæ, ogæ tededinque,

—Iina onguïñæna iñömö tömämæ quëwënäni inänite wapiticæ në apænedina inte ñöwo wæætë iñömö pöna tamëñedäni. ⁷ Ayæ Yatönö guiquënë, Botö oncönë pöeda, ante manguicä guiddatapa. Iinäni tömänäni edæ odömäno tæiyæ awënë Tetædo nänö äñinö ante Baa äñinque wacä Itota näni äñongä ingantedö ante, Tömengä në Awënë Odeye ingampa, ante änewënänipa cæminii.

⁸ Ante püñäni ëñente wædinque godongämæ ongönäni tönö awënëidi adobaï püin-
inque, Quinö cæquii, ante wædinque Yæ yæ äñänitapa. ⁹ Iinque Yatönöidi inänite äñinque awënëidi, Minitö ñöwo mänimpota pönömüni ænte mäñömöni minitö wënæ wënæ cæðämaï imüni adinque mönitö iincayæ ate wæætë adodö pönömöni æ-maimünipa, ante tömënäni godonte äinta äñäni pæðæ godönäni äñinque ñimpo cæðäni abæ tawænte gogadänimpa.

Bedeā iñōmō quēwēnāni ēñente pōnēnānīpa

¹⁰ Ayæ tæcæ wēmō bayonte nē pōnēnāni wæætē Pabodo tōnō Tidato inate, Bedea iñōmō goeda, ante da godōnāni godatapa. Māniñōmō gote pōninque tōmēna oodeoidi odōmōincōnē go guiddatapa. ¹¹ Māniñō Tetadōnica iñōmō quēwēnāni nē piinte cædāni iñōnānīte bedeaiddi guiquēnē pīnāmaī ināni inte mōnō Awēnē nānō apānedō ante do ēñēnānītapa. Ayæ ēñēninque, Wængonguī angā ēñente nāni yewæmongainō bai Pabodo nō apānecantawo, ante pōnente wædinque bedeaiddi iñōmō, Wængonguī æbānō angā ēñente yewæmongadāni, ante ēñencæte ante iimō iñō iimō iñō mānīnta æninque cōwā adānītapa. ¹² Mānōmaī cædinque oodeoidi tæiyænāni wede pōnēnāni badānītapa. Ayæ guidiegoidi awēnēiddi bai ināni onquiyænāni incæ nangui ināni pōnēnōnāni guidiegoidi onguīñænāni adobaī tæiyænāni nē wede pōnēnāni badānītapa.

¹³ Incæte wadāni Tetadōnica iñōmō godinque oodeoidi inānīte apānedinque, Pabodo ñowo Bedea godinque māniñōmō quēwēnāni inānīte apānecā ēñēnānīpa, ante tededāni. Ēñēninque oodeoidi wæætē Bedea iñōmō pōninque, Pabodo wiwa apānecā apa ēñencæ quēwēmīnī, āninque wapiticæ tededāni ēñēninque godongāmæ ongōnāni guiquēnē ængui badānītapa. ¹⁴ Mānōmaī ængui badāni adinque nē nāni pōnencabo iñōmō Pabodo ingante æpæ yæwedeca do ænte māodāni godinque tōmengā wipodē ñænæmpodē go guiddinque godōmenque wogaa goyongante Tidato tōnō Timoteo wæætē Bedea iñōmō ayæ ongōnatapa. ¹⁵ Pabodo tōnō godongāmæ godāni iñōmō Atēna ganca māodāni gocā ate tōmengā wæætē, Mīnitō adodō Bedea iñōmō godinque Tidato tōnō Timoteo inate apānedinque tōmēna eyepæ inte ate botō weca quingæ āmīni pōnæ, angā ēñēninque tōmēnāni adodō Bedea iñōmō godinque Pabodo nānō ānīnō bai iñāna inate apānedānītapa.

Atēna iñōmō Pabodo apānecā ēñēnānīpa

¹⁶ Mānōmaīnō ante āningā inte Pabodo tōmēna nāna ponguīnō ante ee ongongantapa. Ee ongōninque ayongā māniñōmō quēwēnāni, Wængonguīiddi inānīpa, ante badonte nāni cō cægainca bacoō mæ ongō ate wædinque Pabodo wæwēwocate quēwengantapa. ¹⁷ Mānōmaī beyæ oodeoidi odōmōincōnē go guiddinque oodeoidi inānīte apānedinque ayæ guidiegoidi incæ Wængonguī ingante nē guīñēnāni inānīte apānedinque Pabodo, Mānōmaī impa. Apānebo ēñēmaīmīnīpa, ante apānecantapa. Ayæ tōmēnāni nāni godonte æiñōmō adobaī iimō iñō iimō iñō godinque māniñōmō ponte ongōnāni inānīte adobaī nō apānecā ēñēnānītapa. ¹⁸ Mānōmaī cæyongā wadāni Epicodeoidi, Mōnō tote quēwengæimpa, ante nē ānewēnāni nāni cabo tōnō wadāni Etoicoidi, Waa iimō incæ caate wæmō incæ mōnō piyænē cæte quēwengæimpa, ante nē quēwēnāni nāni cabo tōnō tōmānāni adoyōmō ponte bee tēninque Pabodo ingante wæatedō wæætē ānānītapa.

Pabodo iñōmō Itota ēmōwo ante apānecā beyæ ayæ Itota nānō ñāni omæmongainō ante apānecā beyæ Epicodeoidi nāni cabo tōnō Etoicoidi nāni cabo tōnō pancadāniya guiquēnē,

—Īngā iñōmō ōnonque ante tedewēnongā inte æbāmē ante tedewengā.

Ante wæyōnāni adodāni incæ pancadāniya guiquēnē,

—Tōmengā wabānō, Wabæca wængonguīiddi inānīte pōnencāmīnīpa, ante cæcā iimaingampa, ante wædānītapa.

¹⁹ Ìninqe Pabodo ingante bæi ongonte töö æmænte ænte godinque tömënäni Adeopagoidi näni änönäni näni godongämæ ëñente pönencöñömö mäodäni gocantapa. Go guiite ongöñongante,

—Mä bitö odömonte apænedö æbänö ïi. Edæ apænebi ëñëmönie. ²⁰ Edæ bitö odömonte apænedö ante tæcæ ëñëmöni inte mönitö, Æbänö ante apænebi, ante ëñencæte ante wæmönipa, änänitapa.

²¹ Edæ atënaidi tönö wadäni Atëna ïñömö ñöwo ponte quëwënäni tönö tömänäni wadö cædämaï inte önonque, Wadäni æbänö mä apænete pönëñäni, ante wædinque mäninonque ante tedete quëwënönänimpa.

²² Pabodo ïñömö Adeopagoidi godongämæ näni ëñente pöncöncabo tæcæguedë ængæ gantidinqe tömënäni inänite apænedinqe,

“Atënaidi, ëñeedäni. Wængonguïdi, mïni änönäni inänite waa ate bæi mïnitö nanguï pönï cæmïni abopa. ²³ Botö mïnitö quëwëñömö tömäo cægonte ayömo, Wængonguïdi inänipa, ante mïni waa adoncacoo nanguï ongö atabopa. Ayæ mïni waa adonca adocaque ïñömö mïni pönö yewæmönimpaa ïmaï ante yewæmonte ongö atabopa. ‘Wacä wængonguï æcämë ingää, ante mönö ëñëñämaï në ïnogä beyæ mönö waa adonca impa,’ ante mänimpaa yewæmöi ongö atabopa. Mänimpaa yewæmöi ongö adïmo inte botö mïni, Æcämë ingää, ante ëñëñämaï inte mïni waa adongä ingante ante ñöwo, Æcänö ingää, ante ñöwo apænebo ëñeedäni.”

²⁴ Ante apænedinqe Pabodo godömenque, “Wængonguï inguipoga në badongaingä ïnogä inte tömää ïñömö ongoncöo në badongaingä ïnogä inte tömengä inguipoga tömämaë Awënë ïnogä ingampa. Tömengä adocä ïñömö öönædë Awënë ingampa. Ìninqe Tæiyæ Awënë ïnogä inte tömengä waomö önopoca mäñönincönë ædö cæte guiite quëwengüingää. ²⁵ Ayæ waomö ïñömönte tömengä mönö quëwengüimämo pönongä æmompaa. Ayæ mönö guëmanguimämo adocä pönongä guëmämompaa. Ayæ tömengä adocä nänö pönönonque tömänö æninqe quëwëmompaa. Mänömaï në pönönongå inte tömengä mönö waocabo ïñömönte, Pönömi æmoe, ante ædö cæte angüingää. Ìninqe tömengä beyæ ante mönö waomö önopoca ædö cæte cæquimöö.”

²⁶ Ante apænedinqe Pabodo godömenque apæñecantapa. “Wængonguï waocä adocanque ingante badöninque, Tömengä nänö pæinäni nanguï inäni yebæninque näni cabo näni cabo tömancabodäni bacædänimpa, angacäimpa. Ayæ edæ, Adocanque pæinäni inönäni inte mänincabodäni ïñömö nänëneto nänënë godinque adocaboque wabæca wacabo wabæca godinque inguipoga tömäo go go cædinque wayömö wayömö quëwencædänimpa, ante cægacäimpa. Mänömainö ante badöninque tömengä tömancabodäni inänite ante pönëninque, Æyömönö quëwengüinänii, ante cædinque, Ìinäni ïmæca mänimpoga quëwencædänimpa, äninque, Wadäni wabæca mänimpoga quëwencædänimpa, ante doyedë angacäimpa. ²⁷ Edæ tömämaë quëwënäni botö imote ante diqui diqui mincædänimpa. Ayæ botö imote ante pædæ æmpo cædinque wabänö bee tengüinäni, ante cædinque Wængonguï mänömaï badöninque angacäimpa. Incæte Wængonguï mönö tömämo weca ongöninque wïi gobæque quëwengampa. ²⁸ Wængonguï tömäo quëwengä ïñongante mönö waomö ïñömö inte wayömö wayömö gomö incæte tömengä nempo edæ cöwë quëwëmompaa. Mïni cabo incæ ämotamïni ante bæi në tededäni pancadäniya, ‘Wængonguï pæimö adomö imompaa,’ ante do näni änö bæi edæ mänömaï impa,” ante Pabodo apæñecantapa.

²⁹ Ayæ, “Mänömaï beyæ mönō Wængonguï pæimō inömō inte edæ iïmainō ante wii pönenguënemō iïmopa. Mönō, Waocā nanguï pönëninque dicaa yewæmön-
 inque waa pōni nānō badōinca bai Wængonguï adobaï ingampa, ante ædō cæte
 anewenguïi. Oodo tönō padata waocā nānō badōi bai Wængonguï ingampa, ante
 mönō wii mänömainō ante pönenguënemō iïmopa. ³⁰ Incæte wëenënedë mäninō
 nāni ëñënamāi ingainō ante adinque Wængonguï pönō waadete ata cæpogacäimpa.
 Nōwo guiquënë tōmāmæ quëwënāni inānite, Minitō ëñënamāi cædō ante, An-
 caa wæwente awædō, ante ñimpo cædāni. ³¹ Ante Wængonguï nē apænte angu-
 ingä inongä inte iïmaï angampa. Iïönæ iinque bayonte botō inguipoga tōmāmæ
 quëwënāni inānite apænte ancæboimpa, ante mänïönæ æönædō i, ante do an-
 gacäimpa. Ayæ, Waocā adocanque tönō botō godongāmæ cæyōmo tōmengä nöingä
 ante apænte ancæcäimpa, ante Wængonguï mäningä onguïñængä ingante do
 apænte ængacäimpa. Ayæ tōmänāni, Wængonguï nānō angainō bai cōwë bacäimpa,
 ante pönencädänimpa, ante cædinque Wængonguï mäningä Onguïñængä dobæ
 wængä ate, Nāni ömæmōe, angä iinque mäningä iïömō edæ do nāni ömæmonte
 quëwengampa.”

³² Ante Pabodo mäninō Itota nānō nāni ömæmongainō ante apæ necä ëñëninque
 pancadäniya, Babæ ancædō, ante badete todänitapa. Wadäni guiquënë,
 —Iïncayæ ate mäninō ante adodō apænebi ëñëmönie, änänitapa.

³³ Mänömainō ante cædäni adinque Pabodo iïömō tömënāni inānite emō cæte
 godinque tao gogacäimpa. ³⁴ Incæte pancadäniya tōmengä miñæ godinque nē
 pönënāni badänitapa. Adeopagoidi nāni ëñente pönëë concabo iïönänite adocanque
 Diönitio adobaï nē pönengä bacantapa. Ayæ onquiyængä tōmengä emōwo Daämadi
 tönō wadäni adobaï nē pönënāni bagadänimpa.

Coodinto iïömō pöninque Pabodo apæ necampa

18 Atëna iïömō ongonde apæ necä ëñëninque mänömaï cædäni ate Pabodo
 wadæ godinque Coodinto nāni quëwëñömō pongantapa. ² Doyedë iïömō
 odömānoidi tæiyæ awënë Codaodio oodeoidi inānite piïnte äninque, Mönitō
 quëwëñömō Odömā iïömō nōwo quëwënāmaï inte tōmāmīni wadæ goedäni, angä
 ëñente wædinque tōmänāni nāwæ wadæ godönänimpa. Adocanque tōmengä emōwo
 Aquidæ Pontobæ ëñagaingä inte Itadiabæ gote mänïñedë quëwënongäimpa. Tō-
 mengä adocä oodeocä inongä inte awënë nānō änō ante ëñente wadæ god-
 inque tōmengä nänöogængä Piditida tönō nōwo Coodinto iïömō wadæ ponte
 quëwëñönaimpa. Iinque Pabodo nōwo Aquidæ ingante tæcæ adinque tōmëna weca
 ëñacæ pongantapa. ³ Tömëna weca ponte ayongä tōmëna tōmengä nānō tadömönō
 bai adobaï æmontai cadopa tadömōnte godonte ænte quëwëna adinque Pabodo
 tōmëna weca ee owodinque tōmëna tönō godongāmæ tadömönänitapa. ⁴ Mänö-
 maï cæte quëwëninque Pabodo guëmanguïönæ iïō guëmanguïönæ iïō oodeoidi
 odömöincönë go guïdinque, Oodeoidi incæ oodeoidi ināmaï ināni incæ ëñente pō-
 nencädänimpa, ante cædinque, Iïmaï impa ante apænebo ëñëmaïminipa, ante nan-
 guï apæ necantapa.

⁵ Ayæ Tidato tönō Tïmoteo Mäatedöniabæ quëwente wadæ pöninque Coodinto
 iïömō nāna wææ pöñedë Pabodo mänïñedë æmontaicō nānō badöninō ñimpo cæd-
 inque wæætë, Wængonguï nānō apænedō ante ëñencädänimpa, ante nanguï cæi-
 nente wædinque nanguï apænedinque mäninque cæte quëwengantapa. Mänömaï

cædinque tömengä, Codito mönö në änongå incæ Itota adocä ïnongä ingampa, ante botö në agaïmo inte apænebo ëñëmaïminipa, ante oodeoidi ïnänite apænecantapa. ⁶ Mänömaï apæneyongante oodeoidi wæatedö wæætë godö wënæ wënæ ante pïinäni wædinque Pabodo wæætë, Wïi ëñëinë wædö, ante bai cædinque nämä weocoo wancæ wancæ cæcantapa. Ayæ tömënäni ïnänite,

—Wængonguï weca mïni goquënëno ante apænebo ëñëninque mïnitö pönö wææ äninque tömëmïni wænguinque wentamö mongæmïnipa. Botö wæætë mïnitö ïmïnite edonque pönï apænedïmo inte mïni cædö wentamö mongænämaï ïmopa töö. ïninque botö Wængonguï taadö mïnitö ïmïnite idæwaa odömöninque edæ oodeoidi ïnämaï ïnäni weca nõwo wadæ gobo tamënedäni.

⁷ Äninque Pabodo wadæ tao godinque oodeoidi odömöincö gäänë wacä oncönë go guï go guï cædinque cöwë apænecantapa. Mänincö në ëacä Titio Yoto näni änongå ïnömö Wængonguï ingante në waa ate pönengä ïnongäimpa. ⁸ Oodeoidi odömöincönë në aacä Codipo guiquënë mönö Awënë ingante në pönengä bayongä tömengä oncönë në owodäni tömänäni pönënanitapa. Ayæ coodintoidi nangui ïnäni pö ëñë pö ëñë cædinque adobai wede pönëninque æpænë guïgadänimpa. ⁹ Mäniñedë woyowotæ ïnö Pabodo wïimonte bai ayongante mönö Awënë tömengä ingante apænecantapa. “Bitö guiñenedämaï inte apænebi ëñencædänimpa. Pæ wëenedämaï incæbiimpa. ¹⁰ Coodinto ïnömö botö quïnäni nangui ïnäni ïnänipa, ante cædinque botö ïnömö edæ bitö tönö godongämæ cöwë cæcæboimpa. ïninque wadäni bitö ïmite mämö pïininque wënæ wënæ cædämaï incædänimpa.” ¹¹ Ante mönö Awënë tömengä ingante apænecaï ëñëninque Pabodo adoque wadepo go tæcæ ïnonte Coodinto ïnömö ongöninque Wængonguï nänö apænedö ante tömënäni ïnänite odömönte apænecaï ëñënonänimpa.

¹² Mäniñedë odömänoidi änäni ate Acayabæ awënë Gadiöno ïnongäimpa. Tömengä awënë nänö ïnönëdë oodeoidi godongämæ pönëninque Ao äninque Pabodo ingante quingæ mämö bæi ongonte æninque awënë Gadiöno nänö cöwë apænte änonömö ænte mäodäni gocantapa. ¹³ Awënë weca pöninque Pabodo ingantedö ante pïinte äninque,

—Ïngä ïnömö, Mönö wadö bai cædinque Wængonguï ingante waa ate apæneccæimpa, ante odömöninque mönitö awënëidi näni wææ änonö ante wido cæcampa. Mänömaï wapiticæ cædinque ancaa änewengä ëñëninque tömänäni adobai wapiticæ cædänipa cæbii.

¹⁴ Änäni ate Pabodo tæcæ apænecaï cæyongante Gadiöno oodeoidi ïnänite ïmaï ante wææ apænecantapa.

—Oodeoidi ëñëdäni. Mïnitö botö weca ponte apænedinque, Odömäno awënë nänö wææ änö bai ïngä ëñënämaï cæcampa, ämïni bai, Wacä ingante ædæmö wiwa cæcampa, ante ämïni bai botö mïni änö do ëñëninque apænte ancædömoimpa. ¹⁵ Mïnitö ïnæmpa, Tömengä tededonque ante oda cæcampa, ämïnipa. Mïnitö ëmöwo ante oda cæcampa, ämïni. Mïnitö wææ angäinö ante oda cæcampa, ante pïimïnipa. Mänïnonque ante oda cæcampa, ante ancaa tedewëmïni wædinque botö wæætë tömengä ingante apænte änämaï incæboimpa. Tömëmïninque tömengä ingante apænte äedäni.

¹⁶ Ante pïinte äninque awënë tömënäni ïnänite, Botö apænte äñömö ongönämaï gobæwedäni. ¹⁷ Ante wido cæcä tao godinque tömänäni oodeoidi odömöincönë në

aacä Totënë ingante wæætë bæi ongonte tæi tæi pänäni incæte nê apænte angüë-nengä inca Gadiöno iñömö önonque adämaï inte bai ee acä pangadänimpa.

Pabodo Antioquiya ponte gocampa

¹⁸ Iñinque täönæ quëwente ate Pabodo Coodinto iñömö näni pönencabo inänite, Gobopa, äninque wadæ godinque Tidiabæ gocæte ante Tencodea ganca pongantapa. Tömengä do apænedinque, Botö mänimpoga ocaguï tocadämaï inte Wængonguï beyänque cædinque botö tömëmo äninö ante cöwë cæcæboimpa, ante doyedë ängäimpa. Nöwo iñömö tömengä nänö äninö bai iñinque cædingä inte Tencodea iñömö pöningque ocaguï ëö toacantapa. Ayæ ëö tocacä ate tömengä Piditida tönö Aquidæ nana gæncaya tönö godongämæ ñænæ wipodë go guiidinque tömënäni Tidiabæ gocæte ante wogaa godänitapa. ¹⁹ Mänömaï godinque Epeto iñömö go ti wæänänitapa. Tömëna nana gæncaya mänïñömö ti wæäninque tä contayöna Pabodo iñömö oodeoidi näni odömöincönë go guiidinque oodeoidi inänite, iïmaï impa apænebo ëñencæminimpa, ante apæneçä. ²⁰ Eñëninque tömënäni, Bitö mönitö weca wantæpiyæ quëwenguïmi, äñönäni tömengä Baa äninque, ²¹ wæætë, Gobopa, angantapa. Ayæ, “Nöwo Eedotadëe iñömö äæmæ bequinque goquënëmo imo incæte Wængonguï Ao angä ate botö minitö weca ayæ ate wæætë ocä ëmænte poncæboimpa. Nöwo gobo tamëñedäni.”

Äninque Epeto iñömö ñænæ wipodë go guii tä contadinque Pabodo wogaa gocantapa. ²² Godinque Tetadea pö ti wæäninque Eedotadëe iñömö Itota Codito ingante godongämæ näni pönencabo weca ëñacæte ante æicantapa. Ayæ ate Antioquiya wæicantapa. ²³ Ayæ ate mänïñömö täönæ quëwëninque wadæ godinque Gadatiabæ adodö godinque Pidiqiuabæ tömäo wayömö wayömö cægonte godinque Itota miñæ nê tee empote quëwënäni tömänäni inänite mäo apænedinque, Mönö ñimpo cædämaï inte tæi piñænte cæcæimpa, ante apæneçä ëñëninque tömënäni tæi piñænte entawëninque quëwengadänimpa.

Epeto iñömö Apodo apæneçä ëñënanipa

²⁴ Mänïñedë wacä oodeo tömengä ëmowo Apodo iñömö Equitobæ Adecantodia näni quëwëñömö ëñate pægaingä inte nöwo Epeto näni quëwëñömö pongantapa. Tömengä iñömö nanguï adinque nê ëñënogä inte Wængonguï angä ëñente näni yewæmongainö ante do ëñëninque waa pönï apæneçä inongäimpa. ²⁵ Mönö Awënë taadö ante apæneyönäni do ëñëningä inte mäninö ante ædæmö ëwocadinque tömengä, Eñencædänimpa, ante nanguï apæneçantapa. Ayæ Itota nänö cægäinö ante nö ante odömönte apæneçä incæte Apodo iñömö Wäo æpäne nänö guidongainonque ante mäningancaque ëñëningä inte mäningancaque ante töingä odömongä ëñënonänimpa. ²⁶ Tömengä nöwo oodeoidi odömöincönë go guii go guii cædinque guïñenedämaï inte apæneçantapa. Piditida tönö Aquidæ nana gæncaya guiquënë tömengä mänömaï apæneçä tæcæ ëñëninque edæ Apodo ingante, Mönatö weca pöe, äna pöñongante, Wængonguï taadö iïmaï inompa, ante töingä apænedä tæcæ mä ëñengantapa.

²⁷ Mänömaï cæda ate Apodo wæætë Acayabæ gocæte ante cæyongante tömënäni näni pönencabo tömengä ingante, Waa goe, änanitapa. Ayæ, Acayabæ iñömö Itota ingante nê tee empote quëwënäni acædänimpa, ante iïmaï ante cadota ante yewëmönänitapa. Minitö, Apodo pongä adinque tömengä ingante waa cædäni,

ante yewämöninque tömengä ingante pædæ pönönäni ænte godinque mäo Acayabæ quëwënäni inänite pædæ godongä adänitapa. Tömënäni Wængongui waadete pönö cæcä ate nê pönënäni iñönänite Apodo nê waa pönï apænedongä inte mänïñömö ponte apænedinque tömënäni tönö godongämæ cægacäimpa. ²⁸ Edæ tömänäni ayönäni Apodo oodeoidi inänite nanguï wæatedö wæatê apænedinque gomonga apæneçä wædänitapa. Tömengä, Mönö Codito æbänö cæquiringä, ante Wængongui angä ëñente näni yewæmongainta adinque mönö ëñengäimpa, angantapa. Ayæ, Itota mäninö näni yewæmongainö bai nê cædongä inte näwangä mönö Codito inongä ingampa, ante nö apæneçä ëñëninque tömënäni ædö cæte wadö ante apænequïnänii.

Epeto iñömö Pabodo ponte apæneçampa

19 Apodo ayæ Coodinto iñömö ee ongöñongä Pabodo nänö cægönimæ tacæguedê änanquidi owëñaque pö Epeto iñömö wæængantapa. Ponte ayongä Itota ingante nê tee empote quëwënäni pancadäniya a ongönäni. ² Adinque tömengä tömënäni inänite,

—Minitö pönente bayömini Wængongui tömengä Tæiyæ Waëmö Önöwoca ingante da pönongä æminitawo.

Äñongä tömënäni wæatê,

—Iñæmpa mäningä Tæiyæ Waëmö Önöwoca ingantedö ante apænedänipa ëñenguimönii.

³ Ante apænedäni ëñëninque Pabodo wæatê,

—Ininque æcänö ëmowo ante æpænê guiminitawo.

Äñongante,

—Wäö wodi nänö æpænê guidongainö ante guitamönipa.

⁴ Mänömainö ante apænedäni ëñëninque Pabodo wæatê,

—Wäö wodi nänö guidongainö ante guigaïmini inte minitö, Idæwaa wænæ wænæ cæte awædö, ante Wængongui Awënê gämænö ocæ ëmænte pongaïmini iminipa. Incæte Wäö wodi, Iincayæ ate nê Ponguingä ingante pönencæminimpa, äninque tömënäni inänite æpænê guidongacäimpa. Mäningä iñömö Wäö nänö, Nê Ponguingä, änogä iñömö Itota inongä ingampa.

⁵ Ante apæneçä ëñente wæyönäni Pabodo wæatê mönö Awënê Itota ëmowo apænedinque æpænê guidongä guidänitapa. ⁶ Ayæ tömengä gampocä ongönönäni Wængongui Tæiyæ Waëmö Önöwoca wææ tömënäni baonga guicantapa. Guicä ate tömënäni wadäni näni tede bai mä tededinque Wængongui beyæ apænedänitapa. ⁷ Mäninäni onguïñänäni æpænê nê guidënäni iñömö önompo tipæmpoga go mengäa inönänimpa.

⁸ Pabodo apäicä mengäa go adocanque pämonque adoyömö quëwëninque oodeoidi odömöincönê go guii go guii cædinque guiñenedämai apænedinque, Wængongui Awënê Odeye do pongäimpa, ante apænebo ëñëdani, ante nöingä ante apæneçä ëñënanitapa. ⁹ Apæneçä ëñëñönäni pancadäniya guiquënë, Wïi pönëinente awædö, ante Baa äninque Wængongui Awënê taadö ante wiwa tedewënanitapa. Mänömai tedewënanäni ëñente wædinque Pabodo iñömö ëmö cæte godinque Itota ingante nê tee empote quëwënäni inänite ænte wadæ gocantapa. Ayæ iimö iñö iimö iñö Tidänö nänö apæneincönê go guii go guii cæte apænedinque Pabodo mänïñömö pö guidäni tönö guædö guæa apænedänitapa. ¹⁰ Ayæ mënepoga wadepo

ganca Pabodo mänömaï cæyongä oodeoidi incæ guidiegoidi incæ Atiabæ quëwënanï tömänäni mönö Awënë nänö apänedö ante ëñënanitapa.

¹¹ Ayä Pabodo tönö godongämæ cædinque Wængonguï tæï piñänongä inte nanguï cæcantapa. ¹² Ìniquë tömënanï Pabodo weocoo wadæ cæcadoquincoo incæ padëincoo incæ æniquë wënæ wënæ inäni inänite ænte mämö wo caayönäni waa badänitapa. Ayä mänömaï cæyönäni wënæidi në wiwa ëwocadäni tömënanï nänï në ëwëneninäni tao godänitapa.

¹³ Mäniñedë oodeoidi Itota ingante pönënamäi inäni incæ pancadäniya wayömö wayömö godinque wënæidi në wiwa ëwocadäni inänite në wido cädäni inönänimpa. Tömënanï nämä mä pönëwëninque, Ñowo Awënë Itota ëmöwo apänedinque mönö wënæ ingante wido cæcäimpa, ante cædinque wënæidi inänite iïmaï änönänimpa. Pabodo nänö në apänedongä Itota ëmöwo apänedinque botö, Wënæbi tao gobäwe ämopa, änewënonänimpa.

¹⁴ Mäniñedë oodeoidi beyä, Wængonguï qui, ante në godongä ñänängä adocanque Etequeba iñongä tömengä wënäni tiæte ganca inänitapa. Ìnänï iñömö Itota ingante pönënamäi inäni incæte adobaï cæcæ cädänitapa. ¹⁵ Tæcæ cæcæ cæyönänite wënæ në wiwa ëwocadongä incæ tömënanï inänite näëmæ tededinque, “Itota ingante do abopa. Ayä Pabodo æcänö ingäa, ante do ëñëmopa. Wæætë minitö quiquënë æminidö iminiï.”

¹⁶ Äñongä wënæ wiwa inongä ingante në ëwënegä inte wiyaëmæ tömënanï inänite to mäo yao ongöninque bæ tacantapa. Mänömaï cædinque tömënanï weocoo gä tadongadinque tæi tæi pangä ate tömënanï weocoo ömaadäni inte wepæ taate wædinque oncodo tao wodii winönänitapa. ¹⁷ Mänömaï batimpa, ante tedeyönäni Epeto iñömö quëwënanï oodeoidi incæ guidiegoidi incæ tömänäni ëñëninque ancai guñente wädänitapa. Ìniquë mönö Awënë Itota ëmöwo wiï önonque ante tededäni inte tömengä ëmöwo æwocæte baï cædinque, Tæï piñängä inte ëmongampa, ante wädänitapa.

¹⁸ Ayä nanguï inäni ñowo wede pönente badinque adoyömö pöninque tömänäni ëñëñönäni tömënanï nänï wënæ wënæ cædinö ante tömänö ante edonque apänedinque, Idæwaa wënæ wënæ cæte awädö, ante wido cädänitapa. ¹⁹ Ayä idö inte në yewäninäni incæ pancadäniya adobaï pönente badinque tömënanï nänï, Æbänö cæte yewänguï, ante yewämöninta incæ adoyömö ænte pöninque tömänäni äñönäni në tänänitapa. Mänintacoo æpodö itædë cædinque padata nänï æinta beyä godonte ænänii, ante cöwä ayönäni tincoenta müido ganca mänimpota nänï godonte æninta incæ në tänäni agadänimpa. ²⁰ Mänömaï në pönënanï badinque waa cädäni iniquë mönö Awënë nänö änö ante godömenque wayömö wayömö mäo gode änäni ëñëninque tömengä ingante nänï pönencabo incæ yebäninque tæï piñänäni bagadänimpa.

²¹ Mänömaï cädäni ate Pabodo önöwënenque pönëninque, Mäatedöniabæ ëñacæ godinque botö Acayabæ ëñacæ godinque Eedotadëë gocæboimpa, ante pönëninque, ayä, Mäniñömö gote ate Odömä nänï quëwëñömö cöwë goquënëmo imopa, angantapa. ²² Äniquë tömengä beyä në cädäni iñönänite mënaa inate Timoteo tönö Edaato inate apänedinque, Mäatedöniabæ gote ongöñömiina botö Atiabæ wantæ quëwente pömoeda, ante da godongä godatapa.

Epetoidi nanguï Yæ yæ änanipa

²³ Mäniñedë Epeto iñömö quëwëñäni iñömö, Itota Taadó mönö wido cæcæimpa, ante nanguï Yæ yæ änanitapa. ²⁴ Tömëñäni, Mönitö wængonguinä Diänä inampa, ante onquiyænä ëmönö baï badöningue mäninca weca ædæ wæænte nê apænedäni inönänimpa. Tömëñäni quëwëñömö adocanque Deëmetedio näni änogä iñömö padata aca podonte nê badongä inongäimpa. Tömengä iñömö padatagæ æninque aca podonte badöningue, Mïni wængonguinä Diänä inante mïni tæiyæ waëmö apæneincö baï impa, ante guïyanconque badonte quëwëñongäimpa. Mänömaï badöñongä tömengä tönö godongämæ cædäni wæætë wadäni inänite godonte æn- inque mänincoo beyæ tömëñäni godonte æinta nanguï æninque quëwëñönänimpa. ²⁵ Ininque tömengä tönö nê cædäni inänite ayæ wadäni adobaï cædäni inänite äñete pönäni ate Deëmetedio iñömö tömëñäni inänite apænecantapa.

“Iñänäni, do ëñëminipa. Mönö badonte godöningue wadäni näni pönöninta nanguï æmompä. ²⁶ Ayæ nanguï inäni Epeto iñömö quëwëñäni incæ Atiabæ wodo tömämæ quëwëñäni incæ iingä Pabodo guiquënë wapiticæ apæneca ëñëninque edæ oda cædinque tömengä miñæ godänipa, ante do ëñëminipa. Tömengä iñömö, Önom- poca badöñinca wïi wængonguïidi inänipa, ante tedecä apa quëwëminii. ²⁷ Mänö- maï tedecä beyæ mönö badönö ante wadäni nanguï inäni piïnte anguinäni awædö. Ayæ Diänä ñænænä wængonguinä iñönante tömengä ingante mönö apæneincö incæ, Önonconque impa, anguinäni awædö. Ayæ godömenque, Mönö wængonguinä Diänä waa pönï wængonguinä inampa, ante Atiabæ tömäo quëwëñäni tönö inguipoga tömäo quëwëñäni näni waa adönä iñönante wabänö wapiticæ tededinque godö piin- guinäni badänipa, ante awædö.”

²⁸ Ante Deëmetedio mänömainö ante apæneca ëñëninque tömëñäni ænguï bad- inque ogæ tededinque, “Epetoidi wængonguinä Diänä ñænænä inampa,” ante wæætë wæætë anca änanitapa.

²⁹ Mänömaï padata nê badönäni Yæ yæ änäni ëñente wædinque mäniñömö quëwëñäni tömänäni, Quiëmë baï cædänipa, ante acæte ante wadö pö wadö pö pogodo pönänitapa. Ponte ayönäni Mäatedöniabæ quëwente Pabodo tönö godongämæ nê pönina Gayo tönö Aditadoco a ongöna adinque tömëñäni tömëna inate bæi ongonde quingæ mäo tömëñäni näni aincönë ñænæncönë go guidäni- tapa. ³⁰ Pabodo guiquënë mänömaï cædäni ate wædinque, Godongämæ ongönäni weca go guidique apænecaëboimpa, ante cæyongante Itota ingante nê tee empote quëwëñäni wæætë, Wænompä, ante, Go guidämaï incæbiimpa, ante wææ cædäni- tapa. ³¹ Ayæ mänimæ awënëidi pancadäniya Pabodo æmiçoidi inäni inte adobaï mämö tömengä ingante gode äninque, Bitö ædö cæte mäniñömö go guiquimii, ante wææ änanitapa.

³² Iñonte godongämæ ongönäni guiquënë, Quinante pömoï, ante wodo tömänäni ëñëñämaï inänitapa. Pancadäniya, Iïmaï cæcæimpa, äñönänite wadäni guiquënë, Wadö baï cæcæimpa, ante wæætedö wæætë ante ogæ tededinque nanguï pönï Yæ yæ änanitapa. ³³ Yæ yæ äñönäni oodeoidi guiquënë Adecantodo ingante yæcado gö cædäni ongongä adinque godongämæ ongönäni pancadäniya tömengä ingante, Iïmaï cæcæimpa, änanitapa. Tömengä guiquënë tömëñäni inänite wææ apænecaete ante, Apocænë iedäni, ante baï cædinque pipo pipo cæcantapa. ³⁴ Oodeo inongä inte mänömaï cæcampa, ante wædinque tömengä ingante ëñëñämaï inte tömänäni

adoyömö ogæ tededinque, “Epetoidi wængonguinä Diänä ñænænä inampa,” ante meä ooda ganca adodö adodö adodö ante nangui änänitapa.

³⁵ Ayæ ate tömënäni awënë Tequedetadio incæ ancaa tömënäni inänite angä ëñente apocænë cæyönäni tömengä, “Epetoidi ëñëmini. Tömäo quëwënäni mänö-mainö ante do ëñënanipa. Mönö Epeto iñömö quëwencabo mönö wængonguinä Diänä apæneincö nê aamö imompa. Ayæ tömengä awinca bai yewämöinca öönädë mönö wæængainca adobai nê wææ cæmö imompa, ante adinque tömämä quëwënäni do ëñënanipa cæminii. ³⁶ Mäninö ante näwangä pönï impa, ante adinque, Babæ impa, ante ædö cæte anguinänii. Ininque minitö ëñënamai mini Yæ yæ änewënö ñimpo cædinque piyænë cæquënëmini iminipa. ³⁷ İna mini bæi on-gonte ænte pönönina iñömö mönö wængonguinä Diänä apæneincönë guidämai ina inte wënæ wënæ cædämai inapa. Ayæ mönö wængonguinä Diänä inantedö ante wi wënæ wënæ ante piina apa quëwënäni.”

³⁸ “Deëmetedio padatagæ näni badoncabo incæ wacä ingante, Wiwa cæbitapa, piinte wädänitawo. Edæ nê apænte näni äincö cöwë wi ænete ongompa. Män-incönë nê apænte änäni cöwë ongönänipa. İninque Deëmetedioidi nê näni piinongä ingante mäninömö ænte gote änäni ëñëninque nê apænte änäni wæætë tömengä ingante do apænte angüenänäni inänipa. ³⁹ Ayæ apænte änäni, İionæ tömämäni godongämæ pöedäni, näni änionæ bayonte minitö godömenque piinte äinëmini inte mänionæ ponte ämini ëñente apænte änäni ate minitö piyænë cæquënëmini iminipa. ⁴⁰ Edæ ñöwoönæ mini Yæ yæ änewëninö ante awënëidi pöninque, Quinante mänö-mai cæminii, ante äñönäni wæætë, Quiëmë beyæ cætimpä, ante mönö angæimpä. Tömënäni wæætë mönö imonte äninque, Minitö awënë ingante wido cæcæte ante cæminipa, ante piinäni wæcæ wæ.” ⁴¹ Äninque godongämæ ponte ongönäni inänite tömengä angä gogadänimpa.

Mäatedöniabæ godinque Pabodo Guidetiabæ gocampa

20 Mänii Yæ yæ ante näni änewënö iinque cædäni ate Itota ingante nê tee em-pote quëwënäni inänite wæætë äñete pönönänite Pabodo, Minitö ganca pö-nente godömenque cæcæminimpa, ante godö ædæmö apænecantapa. Ayæ, Nöwo gobopa, ante Mäatedöniabæ gocantapa. ² Godinque tömengä mäninömö quëwënäni inänite, Minitö ganca pönte godömenque cæcæminimpa, ante godö ædæmö apæncä ëñënanitapa. Mänömai nangui apænedinque tömengä mänimæ tömäo cægöninque wayömö mäo wayömö mäo apæncä ëñënanäni ate Guidetiabæ gote pongantapa. ³ Mäninömö pöninque meä go adoque apäicä quëwengantapa.

Ayæ, Tidiabæ goquimo, ante tæcæ ñænæ wipodë guicæ cæyongante wädäni, Ood-eoidi bitö imite wænoncæte ante cædänipa атаque. Ante wææ änäni wædinque tö-mengä, Botö wæætë adodö godinque Mäatedöniabæ wodo tebæ gocæboimpa, ä-ninque taadonque gocantapa. ⁴ Goyongä tömengä tönö godongämæ godäni iñömö, adocanque Bedea quëwëningä inte Pidido wengä Topatede, ayæ wææ Tetadönica quëwëninä Aditadoco tönö Tegonto mënaa, ayæ wææ Dedebe quëwëningä Gayo tönö Timoteo mënaa, ayæ wææ Atiabæ quëwëninä Tiquico tönö Todopimo mënaa, mänimpodäni inänitapa. ⁵ Tömënäni täno godinque Todoa näni quëwëñömö pön-inque mönitö wipodë ponguimöni ante ee ongönänitapa. ⁶ Mönitö guiquënë ood-eoidi päo yedæ æmpoqui ömæmö i näni cængüionæ iinque baganca Pidipo iñömö quëwëninque wipodë ñænæmpodë go guidinque wogaa godinque önompo æmæm-

poque eönæ gote ate tömënäni weca Todoa pöningue önompo æmæmpoque go meönaa quëwentamönipa.

Todoa iñömö Pabodo ponte apænecampa

⁷Tömënäni näni guëmanguïönæ go ate mönitö, Ñöwo gäwadedæ bayö Wængonguï itädë impa, ante päö godongämæ cæncæte ante æmongapaa æi wænömænæcapaa æi guïdinque tæ contatamönipa. Pabodo iñömö baänæ ate gocæ cædingä inte æi guïi tæ contadinque wantæpiyæ ayaönænëña pöni ayæ apænecä ëñentamönipa. ⁸Wænömænæcapaa möni godongämæ ëñengoncönë gongapæncade bacoo ti wodönote mä ongönimpa. ⁹Adocanque edëningä tömengä ëmöwo Eotico ayamönecäa tæ contate ongongantapa. Ñinque Pabodo wantæpiyæ apæneyongä edëningä iñömö möwocodë nanguï möinente ayæ wangæ monte wænömænæcapaa ongöninque yæipodë tæ go wæængantapa. Go wæænte do wængä adinque tömengä ingante yao ongonte mänänitapa. ¹⁰Näñe wænte öñöñongä Pabodo yæipodë wæäninque, Quëwencæcäimpa, ante cædinque wini ænte pæ mangantapa. Ayæ në pönëmöni möni caipæ imönite apænedinque,

—Mii quëwengä ingampa. Guïñente wædämaï iedäni, angantapa.

¹¹Äninqe Pabodo wæætë adodö æmongapaa æidinque päö ænte pä ænte mönitö tönö godongämæ cæninque wantæpiyæ godömenque apænecöñongä edæ ñäö batimpa. Ñäö ba ate Pabodo ñimpo cæte wadæ gocantapa. ¹²Ayæ, Edëningä müingä quëwengampa, ante ænte wadæ godinque tömënäni wampo pönëninque nanguï togadänimpa.

Ömaaque godinque Pabodo Müideto ganca pongampa

¹³Pabodo guiquënë taadonque gocæ cædinque mönitö imönite apænecantapa. Minitö wipodë ñænæmpodë go guïdinque mäodämæ wipodenque godämæ goyömïni, botö ömaaque näñe tebæ pömoedäni. Atönö iñömö pö wäi wocænte owoyömïni botö iñömö ömaaque pö adopodë guïlbo ate gocæimpa, angä Ao ante mönitö täno go guïi tæ contadinque öme tagamönimpa. ¹⁴Mänömaï godinque Atönö iñömö pö wäi wocænte owoyömöni tömengä ömaaque pö bee téninque ñænæ wipodë adopodë pö guïite tæ contacä ate mönitö godongämæ wogaa godinque Müitidëne näni quëwëñömö pontamönipa. ¹⁵Mäniñömö wäi wocænte monte ate ñäö ba wogaa godinque mönitö Quiyo ganca pöningue waönæ ate wodo pænta godinque wæætë Tämo iñömö pömönique go Todoguidio iñömö pömönique go iñabæ guingä ate Müideto pontamönipa. ¹⁶Edæ, Ææmæ Pentecotee näni änömæ botö bequinque Eedotadë eyepæ poncæte ante quingæ goquënëmo imopa, ante do äningä inte Pabodo ñöwo, Atiabæ wantæpiyæ ongöninque ædö cæte Eedotadë eyepæ pömaïmo. Ante pönente wædinque, Epeto iñömö ti wæænämaï yaatænque gocæboimpa. Äñongä mönitö tömengä tönö Epeto wodo tebæ godinque Müideto iñömö pontamönipa.

Epeto iñömö në Picænäni inänite Pabodo apænecampa

¹⁷Mäniï wipo ñænæmpo Müideto iñömö wogaa pö wäi wocæ ate ti wæäninque Pabodo wadäni inänite da godöninque, Minitö Epeto iñömö tömæwæ æidinque Itota Codito ingante në godongämæ pönënäni weca godinque tömënäni inänite në aadäni Picænäni inänite äñete pöedäni. ¹⁸Angä äñete pöñönänite tömengä, “Botö Atiabæ

mä ponte quëwëninque botö goganca æbänö minitö weca waa cæte quëwënömoï, ante do ëñëmïnipa. ¹⁹Edæ oodeoidi, Wænoncæ, änäni ëñëninque nanguï guiñente wæbo incæte botö, Önömoque bai ïmopa, ante pönëninque Wængonguï beyænque nanguï cædinque Ca ca wædinque ee cætabopa. ²⁰Ïninque botö, Minitö beyænque quïnö waa inguiï, ante pönëninque pæ wëenedämaï inte do apænebo ëñëmïnitapa. Ayæ edæ tömänäni ayönäni odömonte apænedinque botö wacönë mão wacönë mão go guiidinque apænebo ëñëmïnitapa. ²¹Ayæ pancamïniya oodeoidi ïñömïnite pancamïniya guidiegoidi ïñömïnite botö tömämïni ïmïnite apænedinque ïmaï ante apænetabopa. Minitö, Idæwaa wënæ wënæ cæte awædö, ante pönente wædinque Wængonguï gämænö pöninque mönö Awënë Itota Codito ingante pönencëmïnipa, ante ämo ëñëmïnitapa. Mänömaï tömäa cætabopa, ante do ëñëmïnipa.”

²²“Ñöwo guiquënë Wængonguï Önöwoca angä ëñëninque Eedotadëë gocæboimpa. Mänïñömö pönöomote quiëmë bai bacæïmpa, ante pönente wædïmo incæte ee gocæboimpa. ²³Önonque botö ñöwo wayömö wayömö näni quëwëñömö pönöomote wadäni Wængonguï Tæiyæ Waëmö Önöwoca tönö apæneca ëñënäni inte do botö ïmote ïmaï ante wææ änänipa. Bitö tee mönete nanguï caate wæquinque Eedotadëë gobipa, änäni ëñëninque mäninque ante ëñëmopa. ²⁴Incæte, Wængonguï waadete pönö cædinque nänö cægainö ante watapæ apænedinque bitö, Nö pönï impa, ante apænebi ëñencädänimpa, ante mönö Awënë Itota doyedë botö ïmote angacäïmpa. Ïninque tömengä nänö anganca ïinque cæcæte ante cæyömote wænönäni wæmo incæte botö, Godömenque inguipoga quëwenguënëmo intabopa, ante wædämaï incæboimpa. Ayæ pogodo gote bai botö goquïnö tömänö gocæte ante nanguï cæcæboimpa, ämopa,” ante Pabodo apænecantapa.

²⁵Ante apænedinque tömengä ayæ godömenque apænecantapa. “Botö, Mönö Awënë Odeye do pongäïmpa, ante apænedinque wayömö mão wayömö mão apænebo ëñëmïnitapa. Idæwaa apænebo ëñënïmïni inte minitö ñöwo æmäwo botö awınca amïnipa. ²⁶Mänömaï beyæ botö ñöwoönæ apænedinque minitö ïmïnite ïmaï ämopa. Botö, Quëwencëmïnipa, ante cædinque ancaa apænebo incæte pancadäniya tömënäni näni wïi ëñënö beyænque wentamö mongænte näni wænguinque goyönäni botö wæætë mänïñö beyæ wentamö mongænämaï ïmopa. ²⁷Wængonguï, ïmaï cæbo bacæïmpa, ante nänö änö ante botö ïñömö edæ pæ wëenedämaï inte minitö ïmïnite tömänö edonque pönï apænebo ëñëmïnitapa.”

²⁸“Minitö ïñömö edæ nämä wææ aadinque waa cæte quëwëedäni. Wængonguï Önöwoca minitö ïmïnite äninque, ïñänäni cæningäidi bai ïnänipa, ante nänö në angäinäni ïñönänite minitö wæætë në aamïni inömïni inte tömënäni ïnänite ædæmö wææ aedäni. Mönö Awënë Codito ingante näni godongämæ pönencabo ïnänite æncæte ante tömengä nämä wepæ godonte ængä ate Wængonguï quïnäni bagadänimpa cämïni. Minitö tömënäni ïnänite në aamïni inte waa aedäni. ²⁹Edæ botö do ëñëmopa. Babæidi gäwæï ecate ade cænäni amïnipa. Edæ botö ëmö cæte gobo ate waodäni incæ babæidi cädäni mïni abai adobai wënæ wënæ cædinque mïni pönencabo ïñömïnite ata cæpodämaï incädänimpa. Tömënäni babæ wapiticä änäni ëñëninque mïni cabo incæ pancadäniya ëñënämaï badinque wadæ godäni wæcämïnipa. ³⁰Ayæ tömëmïni mïni pönencabo incæ pancadäniya, Mönitö miñæ pön-cämïnipa, ante cædinque babæ wapiticä odömoncädänimpa cämïni. ³¹Edæ wææ cæedäni. Botö, Mänömaï bacæïmpa, ante wadepo mënepoga go adodepoque ïñonte itädë incæ woyowotä incæ ñïmpo cädämaï inte Ca ca wædinque minitö

tömämīni imīnite apænebo ēñenōmīnīmpa. Mänōmainō ante pōnēedāni,” ante Pabodo apænecā ēñenānitapa.

³² Ānīnque tōmengā, “Īñānāni, botō mīnitō imīnite Wængonguī nempo ñōwo ēmō cæte gobo tamēñedāni. Tōmengā waadete nānō pōnō cædinō ante mōni apænedō ante ēñente ēwocamīni ĩñōmīnite tōmengā mīnitō imīnite godongāmæ cæcā ate tæi pīñænte bacæmīnīmpa. Ayæ Wængonguī quīmōni tōmāmōni tōnō mīnitō adocabomīni bayōmīnite tōmengā eyepæ da pōnongā ate mīnitō mōnitō tōnō godongāmæ æncæmīnīmpa. ³³ Botō ĩñōmō æbānō quēwēmoī aedāni. Edæ wacā quī tīguitamō incæ oodo incæ weocoo incæ, Botō quī bacæīmpa, ante cōwē æñenāmaī ĩñōmōīmpa. ³⁴ Edæ tōmēmo ñonopoca botō cædinō beyænque quēmē ænguēnēmo ante eyepæ æñinque quēwēnōmoīmpa. Ayæ botō tōnō godongāmæ cædāni nāni ænguēñēnō ante adīnque adobaī botō tōmēmo ñonopoca cædinō beyænque æñinque tōmēnāni ĩnānite da godō da godō cæbo æñinque quēwēñōnānīmpa. Mänōmaī botō cædinō ante do ēñēmīnīpa. ³⁵ Mōnō Awēñē Itota incæ ĩmaī ante apænegacāīmpa. ‘Māincoo æñinque mōnō wædænque tomōmpa. Wæætē wacā ingante pædæ godōnīnque mōnō nanguī toquinque impa.’ Ante Itota nānō apænegainō ante pōnēnīnque botō, Mänōmaī mōnō ñonopoca nanguī cædinque æñinque wadāni nē ænguēñēnāni ĩnānite mōnō pædæ godongæīmpa, ante mīnitō imīnite cōwē odōmonte apænebo ēñēmīnitapa.”

³⁶ Mänōmainō ante ĩnque apænedīnque Pabodo tōmēnāni tōnō da guīcapodīnque Wængonguī ingante apænecantapa. ³⁷ Ayæ tōmēnāni Ca ca wædīnque, Waa goe, ancæte ante godongāmæ goto pōnīnque tōmengā ingante yaagō yaagō cædānitapa. ³⁸ Tōmengā nānō, Botō ĩmote æmæwo amīnīpa, nānō āñinō beyæ godōmenque nanguī wædānitapa. Ayæ tōmengā ingante ñænæ wīpo ganca ænte māodāni gogacāīmpa.

Pabodo Eedotadēē gocampa

21 Mōnitō tōññadāni tōnō godongāmæ wægōnīnque Pabodo tōnō mōni goquincabo ĩñōmō, Wīpo ñænæmpo do wogaa gocæ cæpa, ante adīnque edæ, Ñōwo gomōnīpa, ante tōmēnāni ĩnānite ēmō cæte godīnque mānīmpodē go guītamōnīpa. Guīdīnque mōnitō tōingā wogaa godīnque Coto nāni quēwēñōmō ponte tōmæwæ æite monte ate ĩmō ate Ododata gomōnīque go Patada nāni quēwēñōmō pontamōnīpa. ² Patada ĩñōmō pō ti wæænte ayōmōni, Wīpo ñænæmpo Pēnitīa goquīmpo ĩmpopa, ante adīnque mānīmpodē go guīdīnque wogaa gotamōnīpa. ³ Wogaa godīnque dipæmæ ĩnō gomō ayōmōni wāā tēiwænē Tīpīdebæ a ongō adīnque tæcæpæ ĩnō wodo tebæ wogaa gomōnīque go Tīdiabæ pontamōnīpa. Ayæ ñænæmpo mōni goīmpo Tīdo ĩñōmō māincoo ōwāaquī impa, ante ēñēnīnque mōnitō māññōmō adobaī ti wææntamōnīpa.

⁴ Tī wæænīnque mōnitō tōmēnāni quēwēñōmō ponte ayōmōni Itota ingante nē tee empote quēwēñāni a ongōnāni adīnque mōnitō ñonopmo æmæmpoque go mēōnaa ĩñonte tōmēnāni tōnō godongāmæ quēwentamōnīpa. Tōmēnāni guīquēñē, Wængonguī Tæiyæ Wæmō Ōñōwoca apænecā ēñēñānāni ĩnte Pabodo ingante, Bītō wæquīnque Eedotadēē ĩñōmō gocæ cæbīpa, ante wææ ānānitapa. ⁵ Mänōmaī ante wææ ānāni ēñēmōni ĩncæte mōnitō, Māñīmpōñæque quēwēñōmōni ĩntamōnīpa, ante adīnque wadæ gotamōnīpa. ĩnīnque tōmēnāni nāni quēwēñōmō yabæ ĩnō tōmēnāni nāni wencabo tōmānāni ænte māodāni godīnque mōnitō

ēmōnaiya pōninque godongāmæ da guicapodisque Wængongui ingante apænetamōnipa. ⁶Apænete ate mōnitō, Gomōnipa, āninque go ñænæ wipodē adopodē guiddinque wogaa gocæ cæyōmōnite tōmēnāni wæætē, Waa goedāni, āninque ocæ ēmænte tōmēnāni oncō godānitapa.

⁷Mōnitō iñōmō Tido iñōmō wadæ tao wogaa godinque Todēmaida iñōmō pō tōmæwæ æidinque māniñōmō nāni pōnencabo inānite adinque mōnitō, Pōmōnipa, āninque tōmēnāni tōnō adoönæque quēwentamōnipa. ⁸Īmō ate wadæ godinque Tetadea nāni quēwēñōmō pōninque Pedipe oncōnē pō guuite quēwentamōnipa. Wēēñedē Itota nānō nē ēmiñænāni, Mōnō pōnencabo beyæ ante nē cædāni tiæte ganca ināni incædānimpa, ante nāni Tiæte ānōnāni iñōnāni adocā Pedipe tōmēnāni nāni pōnencabo beyæ ante nē cæcā inongā inte Codito waa pōni nānō pōnō cægāinō ante nē apæñecā inongāimpa. ⁹Tōmengā wēnāni baquedānique mengāa go mengāa iñōnānite Wængongui Ōnōwoca pōnō cæcā ate tōmēnāni Wængongui beyæ nē apæñedāni inōnānimpa. ¹⁰Mōnitō Pedipe weca tæōnæ quēwēmōni ate wacā onguiñængā tōmengā ēmōwo Agabo Wængongui beyæ nē apæñedongā inte Oodeabæ quēwente wææ pongantapa. ¹¹Mōnitō weca pōninque tōmengā Pabodo pacadeyænta æninque nāmā ōnompō goti wimpote wæi ōnōwa goti wēwadinque iīmaī ante apæñecantapa.

—Wængongui Tæiyæ Waēmō Ōnōwoca botō ĩmote æbānō ante apæñecāā, ante apænebo ēñēdāni. Oodeoidi Eedotadē nē quēwēnāni iñōmō ĩi pacadeyænta nē ēadingā ingante mānōmaī goti wīninque oodeoidi ināmaī ināni nempo pædæ godōnāni æncædānimpa, ante do apæñecā ēñēmopa, ante Agabo apæñecantapa.

¹²Mānōmaī apæñecā ēñēninque mōnitō Tetadea quēwēnāni tōnō Pabodo ingante wææ wææ apæñedinque, Eedotadē godāmaī imāwe. ¹³Ante wææ āñōmōnite Pabodo wæætē,

—Mīnitō iñæmpa Ca ca wæmīni ēñente wædinque wætawente awædō. Edæ Eedotadē goyōmote bæi ongonte goti wīnāni incæte wænōnāni wæmo incæte botō iñōmō ñimpo cædāmaī inte mōnō Awēñē Itota ēmōwo beyænque cōwē gocæboimpa.

¹⁴Ante mānōmaī apæñecā ēñēninque mōnitō anca wææ āñōmōnite Pabodo, Cōwē gocæboimpa, ante ñimpo cædāmaī inte angā wædinque mōnitō wæætē edæ, Wængongui nānō ānō baī bacæimpa, ante adinque mōnitō ee ate pæ wēēnetamōnipa.

¹⁵Īninque mānimpoōnæ māniñōmō quēwēninque, Ñōwo mōnō Eedotadē gocæimpa, ante cædinque Pabodo tōnō godongāmæ ee gotamōnipa. ¹⁶Goyōmōni Tetadea iñōmō quēwēnāni inte Itota ingante nē tee empote quēwēnāni pancadāniya mōnitō tōnō godongāmæ godinque, Nāatōo oncōnē owocæmīnimpa, ante māninganca ænte māmōnāni pō guitamōnipa. Tōmengā iñōmō wāā tēiwænē Tipidebæ nē quēwēningā inte dobæyedē Itota nānō nē ēmiñængā badingā inte quēwēnongāimpa.

Tantiago weca Pabodo ēñacæ gocampa

¹⁷Tōmengā oncōnē pō guui mōmōnique go Eedotadē pōñōmōni māniñōmō quēwente nē pōnēnāni iñōmō, Waa pōmīni amōnipa, ante todānitapa. ¹⁸Ayæ iīmō ate Pabodo tōnō godongāmæ mōni poncabo Santiago weca ēñacæ gotamōnipa. Tōmengā weca pōñōmōnite nē pōnēnāni inānite nē aadāni nē Picænāni tōmānāni adoyōmō pōnānitapa. ¹⁹Adinque Pabodo, Waa quēwēmīni, āninque godōmenque

iïmai ante apæncantapa. Mëmöidi ëñeedäni, äninque, Botö oodeoidi inämai inäni weca gote cæyömote Wængongui iïmai godongämæ waa cæcantapa, ante Wængongui nänö cædinö ante tömengä adodö adodö ante apæncä ëñënanitapa. ²⁰ Ëñëninque nê aadäni Picænäni guiquënë, Wængongui, Bitö waa pöni cæbitapa, ante godongämæ watapæ apænedänitapa. Ayæ Pabodo ingante wæætë apænedinque,

—Biwi ëñëmi. Oodeoidi æpodö müido ganca inäni nōwo do pönente badäni abitapa. Tömënanï iñömö Wængongui nänö wææ angainö ante tömänäni ëñente cōwë cædäni abitawo. ²¹ Ayæ edæ bitö Pabodobi wænæ wænæ cædämai iñömite wadäni bitö imitedö ante babæ wapiticæ godö oodeoidi inänite iïmai ante tedewënanï ëñënanïpa. Tömënanï, Pabodo wayömö wayömö godinque oodeoidi wabæca quëwënanï inänite bee tente odömöninque iïmai ante apæncampa, ante tedewënanïpa. Pabodo, Minitö wënäni inänite ëö togænämai iedäni, äninque, Dodäni näni angainö mini ëñëno ante nïmpo cædäni, ante änewengampa, ante tedewënanïpa. Ayæ godömenque äninque, Möitee wodi nänö wææ angainö ante wido cædäni, ante Pabodo änewengampa töö. Ante tömënanï bitö imitedö ante babæ ante tedewënanïpa. Iñæmpa bitö mänömainö ante änämai iñömite tömënanï oodeoidi inänite babæ ante apænedäni ëñënanïpa cæbii. ²² Ininque, Pabodo do pongäimpa, ante oodeoidi do ëñenguinäni inänïpa, ante pönente wædinque mönitö nōwo, Æbänö cæte wææ cæquiï, ante wæmönïpa. ²³ Ininque, Pabodo nö cæcä iñongante wadäni babæ wapiticæ tededänïpa, ante oodeoidi ëñencædänïmpa, ante wææ cædinque bitö iïmai cæcæbiïmpa ämönïpa.

“Pabodo ëñëmi, änänitapa. Mönitö weca onguinænäni mengäa go mengäa inäni nōwo ongöninque, Wængongui beyænque ante cōwë cæcæmönïmpa, ante nê äninäni inte tömënanï näni äninö bai iinque cæquinäni inänïpa. ²⁴ Tömënanï, Mönitö äninö ante do iinque cædimöni inte wentamö mongænämai imöni acædänïmpa, ante cædinque, Wængongui qui, ante godoncæ cædänïpa. Ininque bitö iñömö mäninäni inänite ænte godinque tömënanï tönö godongämæ, Wængongui qui, ante godöe. Ayæ bitö eyepæ pædæ godömi æninque tömënanï näni godonguëncöo godonte æninque, Wængongui qui, ante godöninque tömënanï ocagui tömanguï ocäa pöni ëö tocate incædänïmpa. Bitö mänömai tömënanï tönö iñacabo cædinque Möitee wodi nänö angainö bai cæbi adinque oodeoidi wæætë, Æ, Pabodo nö cæcä iñongante wadäni iñömö babæ wapiticæ tededänïpa, ante ëñencædänïmpa,” ante nê Picænäni änänitapa.

²⁵ “Ayæ oodeoidi inämai inäni guiquënë nê pönënanï badinque æbänö cæquënënanï inänïpa, ante pönente wædinque mönitö do godongämæ pönëninque tömënanï inänite iïmai ante yewæmontamönïpa. Wadäni, Wængonguiidi qui, ante cængui näni cönöincoo ante minitö cænämai gomö aedäni. Wepæ owemöingä adinque cæningä nê wimencate wæningä adinque cænämai iedäni. Ayæ nänöogængä inämai iñongante minitö godö guëa mönämai iedäni, ante do yewæmontamönïpa,” ante nê aadäni Picænäni Pabodo ingante apænegädänïmpa.

Wængongui oncönë Pabodo ingante bæi ongönänïpa

²⁶ Iïmö ate nãö bayonte nê aadäni Picænäni näni äninö bai ëñente cædinque Pabodo mengäa go mengäa inäni inänite ænte mäocä gote cæyönäni tömengä nänö tæiyæ waëmö baquinque ante tömënanï tönö Möitee wodi nänö wææ angainö ante ëñente cæcantapa. Mänömai cædingä inte tömengä Wængongui oncö nænæncö

yabæcönë go guiddinque mäninömö cædäni inänite apænedinque, Mönitö adoque Wængongui itæde go ate Möitee wodi nänö angainö iinque cæmöni ate iinäni inömö, Wængongui qui, ante baö pædæ pönönäni æninque tancæminimpa, ante Pabodo tömönäni beyæ ante apæncantapa.

²⁷ Ayæ önompo æmæmpoque go meönaa nänö änimpoönæ wodo iinque ba ate oodeoidi Atiabæ quëwente në pöninäni guiquënë Wængongui oncö ñænencö yabæcönë ponte ayönäni Pabodo a ongonä. Adinque mäninömö önonque ongonäni inänite, Mönö piinte cæcæimpa, ante änäni ëñëninque iinäni wæætë ænguï badäni-tapa. Ayæ Pabodo ingante bæi ongonte, ²⁸ aa pedinque tömengä ingante në piinte änäni inömö, “Idægoidi cöwä aedäni” ante, “Iingä ingampa cæminii. Pö godongämæ cædäni. Tömengä inguipoga tömäo godinque tömämæ quëwënäni inänite mäo apænedinque iimainö ante tedewengampa. Idægoidi wënæ wënæ cædäni inänipa, ante cöwë änewengampa. Wængongui oncö ñænencö incæ önonconque impa, angampa. Ayæ Wængongui nänö wææ angainö ante mönö ëñënamai ingæimpa, ante tömengä änewengampa töö. Ayæ inömö oncö tæiyæ waëmö oncö inönte tömengä wæætë guidiegoidi inänite ænte mämö iincönë guiddinque otänë öñö bai cæcantapa cæminii,” ante piinänitapa.

²⁹ Do edæ wacä Todopimo inömö Epeto inömö quëwëningä inte Eedotadëe pöninque Pabodo tönö cægöna inönäimpa. Mänömai guëa cægöna adinque oodeoidi, Æ, iingä oodeocä inämai inongante Pabodo do Wængongui oncö ñænencö yabæcönë ænte mämongä wäänë guiibaingampa, ante wawique pönëninque mäninö ante wapiticæ apænedänitapa.

³⁰ Mänömai ante änewënäni ëñëninque Eedotadëe quëwënäni tömäo inömö Yæ yæ äninque pogodo pönänitapa. Ponte Wængongui oncö ñænencö yabæcönë mäo pö guiddinque Pabodo ingante bæi ongonte æninque oncodo wëä mantao godinque odemö do tee mönedänitapa. ³¹ Ayæ godömenque, Wænongæimpa, ante tæcæ cæyönäni adocanque mäi odömäno tontadoidi awënë cömantante ingante apæncantapa. Eedotadëe tömäo Yæ yæ äninque pogodo pönänipa cæbii. ³² Ante mäi angä ëñente wædinque awënë cömantante inömö tontado capitäoidi tontadoidi inänite, Pöedäni, äninque në Yæ änäni weca pogodo wææ do pönänitapa. Ininque awënë cömantante tönö tontadoidi do wæænte pönänipa, ante adinque wadäni wæætë Pabodo ingante në tæi tæi päninäni inte ñöwo ñimpo cædinque ee adänitapa. ³³ Pabodo weca pöninque awënë cömantante angä ëñëninque tontadoidi wæætë Pabodo ingante bæi ongöninque yaëmengö mëmëña goti winänitapa.

Awënë cömantante inömö, Æcänö ingäi, ante ayæ, Quinö wënæ wënæ cæcäi. ³⁴ Äñongante pancadäniya, iimäi cæcantapa, äñönäni wadäni wæætë, Wii iimäi wadö cæcantapa, äninque wææ wææ äñönänite tontadoidi awënë cömantante inömö, Nöingä ante æbänö cæte ëñenguimoo, ante wædinque tontadoidi inänite angä ëñëninque Pabodo ingante tömönäni wææ cæte inömö ænte mäicæte ante cædänitapa. ³⁵ Ænte godinque tëwaimpa ganca tæcæ pöñongante godongämæ ongönäni godömenque ænguï badinque wiwa cæcæ cædäni wædinque tontadoidi wæætë Pabodo ingante wææ cædinque önönancapæ ængö cædinque adimongä næænte mäidäni tëwaimpaa æicantapa. ³⁶ Ayæ tömänäni edæ tee empote pönäni inömö Yæ yæ äninque, “Cöwë wido cæcæimpa,” ante ancaa änänitapa.

Pabodo nāmā wææ apæ necampa

³⁷ Wææ cætiñömö tæcæ mangui guicæte ante cæyönāni Pabodo iñömö tontadoidi awënë cōmantante ingante apænedinque,

—Bitö Ao ämi ëñente ate botö adodeque bitö imite apæ necæboimpa.

Äñongante,

—Iñæmpa bitö guidiego tededö tedebi imitawo. ³⁸ Bitö iñæmpa equitobi inömi inte edæ doyedë, Wido cæcæimpa, ante cædinque në, Wæñongæimpa, ante nāni än-incabo iñönānite coatodo miido ganca ināni inānite önömæca ænte mäobi godāni-tapa. Botö ayömo bitö adobi imitapa töö.

³⁹ Äñongante Pabodo wæætë,

—Iñæmpa botö waobo ëñagaïmo inte oodeobo inömo imopa. Botö wīi önönö-monque ëñagaïmo imopa. Tidityabæ Tadoto nāni nangui quëwëñömö ëñagaïmo imopa cæbii. Ao ämi ate botö iñāni inānite apænebo ëñëmainānipa.

⁴⁰ Äñongante Ao angä ate tëwaimpaa adiyæ gongæninque godongämæ ongönāni inānite Pabodo, Apocænë iedāni, ante bai cædinque compo compo cæcä. Adinque tededāmai ongönāni ate tömengä ebedeoidi nāni tededö tededinque iïmai ante apæ necä ëñëñānitapa.

22 “Botö tönñamīni imīni ëñëedāni. Botö wæmpomīni imīni botö nāmā wææ apænebo ëñëedāni.”

² Ante Pabodo ebedeo tededö apæ necä ëñëninque tömënāni, Æ mönö tededö apæ necampa, ante wædinque godömenque ëamonca nōwæ ongönönāni tömengä iïmai ante apæ necantapa.

³ “Botö iñömö oodeobo ingaïmo imopa. Tidityabæ Tadoto iñömö ëñagaïmö inte botö Eedotadëe ponte pægaboï aedāni. Iñömö pædinque Gæmadiedo në odömongä weca adimo inte botö mönö mæmæidi nāni wææ angainö ante ædæmö ëñëninque adodö ante ëñente cæte pægaboimpa. Minitö, Wængonguï beyæ ante mönö cōwë cæcæimpa, ante ñowoönæ cæminipa. Minitö cæmīni bai botö adobaï Wængonguï beyæ ante cæcæte ante cōwë nangui cædinque quëwengaboimpa. ⁴ Iñinque, Itota öönädë godö Taadö bai ingampa, ante në pönënāni inānite botö, Pæmo wæncædän-impā, ante togænte pangaboimpa. Onguïñænāni incæ onquiyænāni incæ tömänāni inānite bæi ongöninque botö wadāni nempo pædæ godömo æninque tömënāni wæætë në pönënāni inānite mäo tee mönedāni wægadänimpa.”

⁵ “Mänömaï cædinque botö, Godömenque Daämaco iñömö godinque botö, Taadö, ante në pönënāni inānite bæi ongonte goti winte adodö Eedotadëe iñömö ænte mämö pædæ godömo æninque awënëidi wæætë tömënāni inānite pänāni wæcædän-impā, ante cætābopa. Mänömaï cæcæte ante cæbo adinque, Wængonguï qui, ante në godongä ñænængä pöni inongä tönö në aadāni nāni Picæncabo tönö Ao än-inque, Mönitö tönñadāni Daämaco iñömö quëwënāni acædänimpa, ante cadota ante yewæmönāni ænte gotābopa. Iñinque, Botö æbänö cæboo, ante në agāināni inte awënëidi incæ edæ, Pabodo nāwangä angampa, ante ñowo në apænequënënāni inānipa,” ante Pabodo angantapa.

**Botö wëenë pönëwengäinö ante ñimpo cædinque wadö
ante pönëmopa, ante Pabodo apäñecampa**

(Näni Cægäinö 9.1-19, 26.12-18)

⁶ Äninqe Pabodo, İmaï cægaboimpa, ante godömenque apäñecantapa, “Botö taadö godinque tæcæbæcä İñonte Daämaco obo ponte ayömete öönædë İñontobæ ñäö botö weca pö godongämæ guinä gongæ ate wædinque, ⁷ botö guidömëmæ tæ go wæantabopa. Ayæ ëñëñömote, ‘Taodo, Taodo. Botö İmote quınante togænte pämii.’ ⁸ Äñongante, ‘Awënë, æbidö İnömi İmii.’ Ante wæyömete tömengä, ‘Itota Näatadeta quëwëñimo inte mänimodö bitö nê togænte pänömo İmopa,’ ante apäñecantapa. ⁹ Mänömaï apäneyongä botö tönö godongämæ godäni guiquënë ñäö gongænque adinque botö İmote nê apäñecä nänö tededö ante ëñëñämaï İñanitapa. ¹⁰ Botö İñömo, ‘Awënë, quınö cæquëñemo İmoo, ante ämi ëñëmo.’ Äñömote mönitö Awënë wæætë, ‘Bitö ængæ gantidinqe Daämaco İñömo goe. Botö, Taodo İmaï cæcæcäimpa, ante wacä ingante Daämaco İñömo nê quëwengä ingante do apänebo ëñengampa cæbii. Bitö Daämaco İñömo gote ongöñömi tömengä wæætë bitö İmite apäñecä ëñente cæcæbiimpa,’ angantapa. ¹¹ Ayæ ñäö gongæ adinque botö bee wodömonte baï bayömete botö tönö godongämæ godinäni wæætë töö æmænte Daämaco İñömo mäodäni gotabopa,” ante Pabodo apäñecantapa.

¹² Mänömaïnö ante apäñedinque Pabodo godömenque apäñecantapa. “Mänİñömo gote ongöñömo wacä tömengä ëmöwo Änäniya botö weca pongantapa. Tömengä İñömo Wængonguï ingante guïñente wædongä inte dodäni nani wææ angäinö ante cöwë ëñente cæcä İnongäimpa. İninqe oodeoidi mänİñömo quëwëñäni tömänäni tömengä ingante waa adönänimpa. ¹³ Tömengä İñömo botö weca pö nê gongæinque, ‘Taodo, bitö botö biwï İmi, ñöwo waa bamonte ae.’ Tæcæ äñongante botö æmö adinque tömengä ingante waa atabopa. ¹⁴ Tömengä ayæ apäñedinque, ‘Mönö mäëmæidi Wængonguï incæ, Botö æbänö cæquïmo İmoo, ante botö pönente angäinö ante bitö ëñencæbiimpa, ante cædinque bitö İmite apænte ængampa. Ayæ, Mönö nö cædongä ingante tömëmi acæbiimpa. Adocä apäñecä ëñencæbiimpa, ante cædinque Wængonguï bitö İmite do apænte ængampa. ¹⁵ İninqe nê adİmi inte nê ëñëmi inte bitö İñömo edæ bitö adİnö ante bitö ëñëñinö ante, Näwangä İmpa, ante tömämaæ quëwëñäni İñänite mäo apäñebi ëñencädänimpa. ¹⁶ Ñöwo İñömo quınante a ongömi. Ængæ gantidinqe Itota ëmöwo apäñedinque, Wënaæ wënaæ botö cædö pönö ñä mënongabi quëwëmoæ, äninqe apäñë guie.’ Ante Änäniya angä ëñëñinqe botö apäñë guitabopa,” ante Pabodo apäñecantapa.

Oodeoidi weca gotabopa, ante Pabodo apäñecampa

¹⁷ “Ayæ ate adodö Eedotadëe pontabopa. Ayæ Wængonguï oncö ñäñæncö yabæcönë go guidinque Wængonguï ingante apäñedinque botö ate baï cæwëñente ayömo, ¹⁸ mönö Awënë botö İmote İmaï ante apäñecantapa. ‘Bitö botö İmote ante nö apäñebi incæte İñäni ëñëñämaï İñäni inte Baa anguïñäni İñänipa cæbii. Ñöwo Eedotadëe quingæ wodii tao gobäwe.’ ¹⁹ Äñongante botö, ‘Awënë ëñëmi, antabopa. Oodeoidi odömoİncönë wacönë wacönë go guidinque botö bitö İmite nê pönëñäni İñänite mäo tee mönedinqe tæi tæi pänimo İmopa. Mänömaï İmpa, ante İñäni do ëñëñäni. ²⁰ Ayæ, Itota incæ näwä Awënë İnongä ingampa, ante

në apä necä iñongante Etebä wodi ingante wänönäni wäñongä botö edæ Ao äninque në wänönäni weocoo aate a ongontabopa, ante tömönäni do agäinäni inte botö imote waa aquinäni inänipa.’²¹ Ante wææ apänebo incæte Wængongui Awënë wæætë, ‘Nöwo goe, ämopa, angantapa. Gobæ oodeoidi inämaï inäni weca bitö imite da godömo gocæbiimpa,’ ante da godongä gotabopa,” ante Pabodo apä necantapa.

Pabodo tontadoidi awënë cömantante weca ongongampa

²² Pabodo, Oodeoidi inämaï inäni weca angä gotabopa, ante nänö apänedi ganca godongämæ ongönäni ëñëë gönänitapa. Wæætë mänine apä necä ëñente wædinque tömänäni yedæ äninque, “Oodeoidi inämaï inäni weca godingä iñömö edæ quëwënämaï inguënegä awädö. Tömengä ingante mönö wo ëwengäimpa.”²³ Äninque tömönäni godömenque ængui badinque Yæ yæ äninque nämä weocoo yabæcooque gäni tadogadinque wancæ wancæ cædinque onguipo guidimö ö äninque wo ææntodö wo ææntodö ancaa cædänitapa.²⁴ Mänömaï ængui bate wënæ wënæ cædäni adinque tontadoidi awënë cömantante angä ëñëninque Pabodo ingante wææ cæte iñömö manguidäni guicantapa. Ayæ, Quinö wënæ wënæ cæcäi ante piinte änanii, ante ëñencæte ante tontadoidi inänite apänedinque, Minitö cöwë cædinö bai cædinque tæi tæi pämini caate wædinque Pabodo tömää tömengä cædinö edonque pönï apä necä ëñencæboimpa, angantapa.²⁵ Eñëninque tömengä ingante pancæte ante æmontaimenca tæcæ goti wininque nõ cæyönäni Pabodo iñömö tontado awënë capitäö mäniñömö ongongä ingante apänedinque,

—Inämpa apænte änämaï iñönäni botö odömäno onguinæmo iñömote quimæ päwëminii. Mänömainö cædinque minitö awënëidi näni wææ angäinö ante dicæ ëñente cæminiyaa.

²⁶ Äñongä capitäö wæætë awënë cömantante weca godinque,

—Ingä iñömö odömäno onguinængä inongä ingä ataque. Nöwo æbänö cæquimii.

²⁷ Angä ëñente wædinque cömantante iñömö Pabodo weca pöninque tömengä ingante,

—Bitö näwangä odömäno onguinæmi imitawo.

Äñongante Pabodo,

—Ao, bitö ä bai botö mänimodö imopa, angantapa.

²⁸ Pabodo apä necä ëñëninque cömantante wæætë,

—Botö guiquënë odömäno inämaï ëñagaïmo inte mäninö bacæte ante cædinque nanguï godömo äninque odömänoidi wæætë botö imote, Odömänobi imipa, ante yewämönäni bagaboimpa.

Apä necä ëñëninque Pabodo wæætë,

—Botö guiquënë odömänobo ëñagaïmo inte edæ odömänobo inömo imopa, ante apä necantapa.

²⁹ Mänömaï apäneyongä në pancæ cædinäni guiquënë do tömengä ingante ëmö cæte wadæ godänitapa. Ayæ cömantante iñömö, Pabodo odömäno onguinængä iñongante botö ämo yaëmengonca goti winänipa töö, ante guinente wædinque, Botö awënëidi piinäni wæcæ wæ, ante wægacäimpa.

Oodeoidi näni Apænte Äincabo weca Pabodo ongongä

³⁰ Iimö ate cömantante iñömö, Quinö Pabodo wënæ wënæ cæcäi ante oodeoidi piinte änanii, ante ëñencæte ante Pabodo ingante äñecä ta pongantapa. Ayæ, Wæn-

gonguī qui, ante nē godōnāni nānēnāni tōnō oodeoidi tōmēnāni nāni nē Apænte Āincabo inānite āñete godongāmæ ponte ongōñōnāni Pabodo ingante ænte mawæ tōmēnāni weca gō cæcā gongængantapa.

23 —Botō mēmōidi ēñēedāni. Botō mīmō entawente nāmā apænte cædinque Wængonguī beyæ botō cæquēnēnō ante wēēñēdē iinque cædinque cōwē nōwo ganca adobaī cædinque quēwēmopa.

² Ante mānōmaī apānecā ēñente wædinque, Wængonguī qui, ante nē godongā nānēngā pōni inongā Ānāniya guiquēnē Pabodo gāānē ongōnāni inānite apānedinque, Ōnōneca tæi tæi tadeedāni, angantapa. ³ Āñongā Pabodo wæætē,

—Bitō iñæmpa botō imote apænte ancæte ante Mōitee wodi nānō wææ angainō ante cæbitawo. Incæte adode nānō wææ angainō ante ēñēnāmāi inte bitō edæ, Tæi tadeedāni, ante pōnō āmi awædō. Bitō weocoo wæmoncoo ēñabi incæte mīmō wentamō entawēninque cæyōmite Wængonguī bitō imite nāēmæ tæi tadecæcāimpa tōō.

⁴ Ante apānecā ēñēninque Pabodo gāānē ongōnāni wæætē,

—Bitō iñæmpa, Wængonguī qui, ante nē godongā nānēngā pōni iñongante quimæ tedewēmii.

⁵ Āñōnānite Pabodo wæætē,

—Botō tōniñadāni ēñēedāni. Botō, “Waadāni awēnē iñongante tōmengā ingante wēnæ wēnæ tededāmāi incæbiimpa,” ante do wææ yewæmongatimpa, ante do ēñēmopa. Iñinque botō, Iñōmō ongongā, Wængonguī qui, ante nē godongā nānēngā pōni inongā ingampa, ante ēñēnāmāi inte botō mānōmainō ante apānetabopa.

⁶ Ante apānedinque Pabodo, Iñāni pancadāniya Tadoteoidi iñōnānite pancadāniya Paditeoidi inānipa, ante adinque tōmēnāni nāni nē Apænte Āincabo inānite aa pedinque,

—Botō mēmōidi ēñēedāni. Botō Paditeo wēmo nē ēñagaīmo inte botō mæmpo Paditeo nānō ingaī baī botō adobaī Paditeobo inōmo imopa. Mānimodō inōmo inte botō, Mōnō nāni ōmæmonte watapæ quēwengæimpa, ante pōnēmopa. Iñinque mānīne botō pōnēnō beyænque botō imote apænte āninque mīnitō pancæ cæmīni awædō, angantapa.

⁷ Pabodo mānōmainō ante apānecā ēñente wædinque Paditeoidi tōnō Tadoteoidi dodāni nāni pōnengainō ante wæætēdō wæætē ānewēninque Paditeoidi nānēnē Tadoteoidi nānēnē nāni cabo nāni cabo badānitapa. ⁸ Iīmaī impa. Tadoteoidi guiquēnē, Mēwoga waomō ēwocamō inte mōnō nāni ōmæmongæimpa, ante, Babæ ancædō, ante Baa āninque, Ōnōwocaidi tōnō anquedoidi Wængonguī weca owodānipa, ante adobaī edæ Baa ānāni inōnānimpa. Paditeoidi guiquēnē mēnea ante pōnēninque Ao ānāni inōnānimpa. ⁹ Iñinque wadō wadō tedete ogæ tedeyōnānite Paditeoidi tōmēnāni nē odōmōnāni pancadāniya ængæ gantidinque,

—Iñgā iñōmō mōnitō ayōmōni wēnæ wēnæ cædāmāi ingampa tōō. Wæætē edæ anquedo incæ wacā ōnōwoca incæ Wængonguī weca owocā inongā inte tōmengā ingante apānecā i māingampa ānewēmīni.

¹⁰ Ante nangūi ogæ tedeyōnāni tōmānāni godōmenque Yæ yæ ānāni ate wædinque tontadoidi awēnē cōmantante iñōmō, Pabodo ingante æmæmæ inō tōō godō æmæmæ inō tōō godō cædinque æi guīñānāni wæmaingampa. Ante pōnente guīñente wædinque tontadoidi inānite angā wæñāni ate, Pabodo ingante bæi on-

gonte ö äninque wææ cæte iñömö ænte mäi tee möneedäni, angä eñente tee mönedänitapa.

¹¹ Ìimö ate woyowotæ mönö Awënë iñömö Pabodo weca ponte apænecantapa. “Pabodo, Guiñente wädämaï incæbiimpa. Bitö doyedë Eedotadëe iñömö botö imotedö ante apænedinque, Näwä Awënë inongä ingampa, ante apænebitawo. Nöwo iñömö do bitö apænedö bai Odömä iñömö godinque adobaï apænecæbiimpa,” angantapa.

Pabodo ingante wængongæimpa, ante cædänipa

¹² Ñäö bayonte Oodeoidi pancadäniya guiquënë godongämæ pönëninque iimainö ante Ao änänitapa. Cænämaï bedämaï inimo inte mönö Pabodo ingante wængongæimpa, ante cædinque, Pabodo miï quëwëñongante mönö cabo incæ æcänö cæna æcänö beda mäningä nänö wænguinque cæcampa. ¹³ Onguiñænäni në änäni iñömö coadenta ganca inäni ayæ godömenque nanguï inäni godongämæ pönëninque mänömaï änewëninque cædäni inänitapa. ¹⁴ Ìinäni iñömö, Wængongui qui, ante në godönäni ñænænäni tönö në aadäni näni Picæncabo weca godinque iïmaï ante apænedänitapa.

—Mönitö godongämæ Ao äninque, Pabodo ingante wængongæimpa. Edæ miï quëwëñongante æcänö cæna æcänö beda nänö wænguinque, ante ämönipa cæminii. ¹⁵ Minitö tönö wadäni mini Apænte Äincabo inömini inte minitö iñömö, Pabodo æbänö cæcäi, ante ædæmö eñencæte ante wæte bai apænedinque tontado awënë cömantante ingante babæ ante ämini eñëninque tömengä wæætë Pabodo ingante minitö weca ænte poncæ cæcæcäimpa, ämönipa. Mänömaï babæ ämini eñente cædinque cömantante wæætë Pabodo ingante mäwængä tæcæ wææñongante mönitö guiquënë taadö wææ wänöninque bæi ongonde edæ wænömöni wæncæcäimpa ämönipa.

¹⁶ Äñönäni Pabodo nänöwäa iñömö edæ do eñengantapa. Eñëninque tömengä tontadoidi näni wææ cæte iñömö do go guidinque Pabodo ingante apænecä. ¹⁷ Eñëninque Pabodo wæætë tontadoidi awënë capitäo ingante apænedinque,

—Ìingä edëningä ingante minitö awënë cömantante weca ænte manguibi guicæe. Tömengä cömantante ingante adodeque apænecæcäimpa.

¹⁸ Angä Ao äninque capitäo wæætë mäningä edëningä ingante ænte guidinque cömantante ingante apænecantapa.

—Pabodo mönö në tee mönedongä iñömö botö imote aa pedinque iïmaï angantapa. Ìingä edëningä ingante awënë cömantante weca ænte mäobi guidinque tömengä awënë ingante adodeque apænecæcäimpa, angantapa.

¹⁹ Ante apænecä eñëninque cömantante iñömö edëningä ingante töö æmænte nänënë mäocä goyongante,

—Botö imote æbänö apænecæte ante pömii.

²⁰ Äñongante,

—Awënë eñëmi. Oodeoidi godongämæ pönëninque iïmaï babæ cæcæte ante cædänipa. Tömënäni, Pabodo æbänö cæcäi, ante ædæmö eñencæte ante bai apænedinque bitö imite babæ ante apænecæ cædänipa. Bitö iïmö ate Pabodo ingante tömënäni näni në Apænte Äincabo weca ænte poncæbiimpa, ante cædinque babæ cæcæte ante cædänipa. ²¹ Tömënäni iñömö, Pabodo miingä quëwëñongante æcänö cæna æcänö beda nänö wænguinque, ante në änönäni inte edæ, Wængongæimpa,

äninque cädänipa. Adodäni näni cabo incæ coadenta ganca onguiñänäni wänoncæte ante taadö do wææ wänöinque edæ, Wänömö wæncæcäimpa, ante edæ a ongönänipa cæbii. Tömänäni, Bitö æbänö Ao anguimi, ante ëñencæte ante ponte änewëñönäni bitö iñömö wæætë tömänäni näni änö bai cädämaï incæbiimpa ämopa.

²² Ante edëningä apäñecä ëñëninque cömantante iñömö, Bitö, Awënë ingante ante mänömaï apäñetabopa, ante wacä ingante apäñedämaï pæ wëñecæbiimpa. Nöwo edæ goe, angantapa.

Pedique weca Pabodo ingante ænte mäodäni gocampa

²³ Edëningä ingante mänömaï angä gocä ate cömantante wæætë awënëna capitäona mënaa inate aa pecä pöñöñate tömëna inate iïmaï angantapa. Mínatö ñöwo tontadoidi önöwa në godäni dotiento ganca inäni tönö cabayo mongænte në godäni tetenta ganca inäni ayä tapa në næænäni dotiento ganca inäni tönö mänimpodäni inänite iïmaï ancæminaimpa. Minitö ñöwoönæ eyepæ cædinque wantæ wantæ guiñongä wadæ godinque Tetadea ganca goedäni, ante da godömina tao gocädänimpa. ²⁴ Ayä Pabodo beyä cabayoidi ämi ænte gocädänimpa. Tömengä ingante wææ aadinque pancabaa awënë gobedönadodo Pedique weca ämina ænte mäodäni cabayo mongænte adimongä gocæcäimpa. ²⁵ Äninqe awënë cömantante iñömö cadota ante iïmaï ante yewæmongantapa.

²⁶ Pedique ëñëmi.

Bitö acæbiimpa, ante botö Codaodio Ditia inömo inte ñöwo yewæmömopa. Bitö në gobedönadodo awënë inömi inte waëmö pöni imipa, ämopa. Waa quëwencæbiimpa, ämopa.

²⁷ Iingä ingante oodeoidi bæi ongonte wänoncæ cæyönänite botö wæætë, Iñæmpa iingä iñömö odömäno onguiñængä ingampa, ante do ëñente wædimo inte tontadoidi tönö godinque tömengä ingante gä pe æmpote ö ænte wææ aatabopa. ²⁸ Ayä oodeoidi, Pabodo wënæ wënæ cæcäi, ante quinante piïnte änänii. Ante ëñencæte ante cædinque botö tömengä ingante tömänäni näni në Apænte Äincabo weca ænte gotabopa. ²⁹ Ænte gote ëñëñömo tömänäni dodänique näni angainonque ante, Pabodo ëñënämaï cæcampa, ante piïnte änäni wætabopa. Iñinque botö ayömate tömänäni, Pabodo nänö wænguinque nänö tee mönequinque wënæ wënæ cæcampa, ante piïninque önonquedö ante cädänipa, ante awädö. ³⁰ Nöwo iñömö, Iingä onguiñængä ingante wänoncæte ante oodeoidi awëmö cädänipa, ante tededäni ëñëñimo inte botö tömengä ingante bitö weca do da godömo gocampa. Tömengä ingante në piïnte äninäni inänite bitö weca adobai da godömo godänipa. Mäninque ante yewæmömopa. Ante cadota ante yewæmöninque, Awënë gobedönadodo Pedique acæcäimpa, ante tontado awënë cömantante da godongä ænte godänitapa.

³¹ Iñinque cömantante nänö äñinö ëñente cædinque tontadoidi woyowotæ tao godinque Pabodo ingante Antipati ganca adimongä mäodäni gocantapa. ³² Iimö ate, Cabayo mongænte në godäni tönö Pabodo adimongä gocæcäimpa, äninque tömänäni nempo ëmö cæte godinque önöwa në godänique tömänäni näni cæte quëwencönë ocæ ëmænte godänitapa. ³³ Cabayo mongænte në godäni wæætë Pabodo ingante godömenque ænte godinque Tetadea iñömö pöninque awënë gobedönadodo ingante cadota pædæ godöninque Pabodo ingante awënë nempo pædæ

godönäni ængantapa. ³⁴Awënë gobedönadodo iñömö cadota ænte adinque, Bitö æbædö eñagabiimpa. Äñongä Pabodo, Tidityabæ eñagaboimpa. ³⁵Ante apäneca eñëninque gobedönadodo wæætë,

—Bitö imite nê piinte äñinäni pönäni ate mäninedë ate botö, Bitö æbänö apänequimi, ante eñencæboimpa.

Äninqe wææ wänönäni inänite apänedinque, Minitö Awënë Edode wodi nänö apænte angaincönë Pabodo ingante ænte gote wææ wänöedäni, ante gobedönadodo angä ænte godänitapa.

Pedique weca ongöninque Pabodo nämä wææ apäneca

24 Önompo æmæmpoque iñönæ go ate, Wængongui quí, ante nê godongä ñænængä pöní inongä Änäniya iñömö Eedotadëë quëwëninque wææ Tetadea gocantapa. Ayæ wacä tömengä emöwo Tedetodo tömënäni näni wææ angainö ante ædämö adingä inte wadäni beyæ ante nê wææ apäneca inongä inte nê abogado näni äñongä inongäimpa. Tömengä tönö oodeoidi nê aadäni näni Picæncabo pancadäniya adobai Änäniya tönö godongämæ godänitapa. Godinque pancabaa awënë gobedönadodo weca ponte apänedinque, Pabodo nê wënæ wënæ cædongä ingampa töö, äñänitapa. ²Pabodo ingante äñete mämönäni pongä ate nê abogado Tedetodo iñömö gobedönadodo Pedique weca ongöninque apänecantapa.

—Awënë gobedönadodo eñëmi. Bitö nempo quëwëninque mönitö wantæpiyæ wæatedö wæætë cædämaí inte godongämæ piyænë cæte waa quëwëmönipa. Ayæ bitö nê aabi inömi inte, Æbänö cæcæimpa, ante do eñëninque mönitö ömæ iñömö waa cæbi ate mönitö godömenque waa pöní quëwëmönipa. ³Awënë Pedique, bitö waëmö pöní inömi inte imæca tömäo waa cæbi æninque mönitö bitö imite cöwë waa ate pönëninque waa apänemönipa. ⁴Incæte, Botö wantæpiyæ apänebo bai bitö wæcædömiimpa, ante pönente wædinque botö, Ao ämi ate wantæ iñö apänebo pönö eñëe, ante abogado Tedetodo angantapa.

⁵Ayæ, “Mönitö ayömöni iñömö ongongä iñömö nê wënæ wënæ cædongä inte tömäo godinque wapiticæ apäneca eñëninque oodeoidi ængui badinque Yæ yæ äñäni wämönipa. Edæ Näatadënöidi wapiticæ näni cæcabo iñönänite iingä iñömö adocä inongä inte nê angä ingampa töö. ⁶Ayæ Wængongui oncö ñænæncö incæ önonconque bai baquinque tömengä wënæ wënæ cæcä adinque mönitö tömengä ingante bæi ongontamönipa. Ayæ mönitö mæmæidi näni wææ angainö ante Pabodo æbänö eñente cæcäi, ante mönitö apænte ancæte ante cætämönipa. ⁷Mänömaí ante tæcæ cæyömöni tömengä mönitö nempo ongöñongante cömantante Ditia iñömö mämö gä pe æmpote ö ængantapa. ⁸Ayæ mönitö adocä Pabodo ingantedö ante nê piinte ämöní iñömönite adocä cömantante Ditia angä eñëninque bitö weca ponte ongömöni æ. Bitö Pabodo ingante ämi eñëninque tömengä, Æbänö cæboi, ante nämä wææ apäneccæcäimpa. Tömengä mänömaí wææ apäneca eñëninque bitö, Mönitö æbänö näwangä ämönipa, ante do eñencæbiimpa.”

⁹Ante Tedetodo mänömainö ante apäneyongante oodeoidi godongämæ apänedinque, Tedetodo näwangä angampa. Pabodo wënæ wënæ cæcä ingampa töö, ante adoyömö ante apänedänitapa. ¹⁰Gobedönadodo Pedique guiquënë Pabodo gämænö opo cæpoyongante Pabodo wæætë iimaí apänecantapa.

—Awënë Pedique eñëmi. Tæiyæ wædepo iñonte bitö iimæca nê apænte angaimi inte möni oodeocabo æbänö cæmöni imönii, ante do eñëmipa, ante adinque botö,

Bitö weca ponte nämä beyä wææ apæ necæboimpa, ante tobopa. ¹¹ Bitö iñömö eñencæte ante cæbi iñinque iimainö ante do eñenguimi iimaimipa. Botö onompo tipæmpoga go meönaa mänimpoönæque iñonte Wængongui weca ædæ wææinque tömengä ingante waa apæ necæte ante Eedotadëe æitabopa. ¹² Mäniñömö æi pöninque botö tömënäni ayönäni quinö wænæ wænæ cæboi ae. Botö Wængongui oncönë ñænæncö yabæcönë go guilbo incæ, oodeoidi odömöincönë go guilbo incæ taadö gobo incæ wadäni tönö guëadö guëa piinte ämo dicæ adäniyaa. Botö ædömë godinque Yæ yæ ämo dicæ eñënäniyaa. ¹³ Iñinque tömënäni näni, Pabodo wænæ wænæ cæcampa, ante näni piinte änewënö ante edæ, Näwangä impa, ante quinö impa odömöingünäni. Edæ dæ ampa, ante Pabodo nämä wææ apæ necantapa.

¹⁴ “Incæte mönitö, Quëwenguinö Taadö impa, ante möni pönönö ante oodeoidi wæætë, Wapiticæ goquinö impa, ante piñänipa. Iñinque, Pabodo mäninönö ante pönengampa, ante iñäni nö ante apæ nedänipa. Näwangä impa, ante bitö imite ämopa. Botö mäninönö ante pönëninque mönitö mæmæidi Wængongui ingante waa ate cædinque quëwëmopa. Ayæ Möitee wodi nänö wææ angainö ante botö Ao äninque Wængongui beyä në apæ nedäni näni yewæmongainö ante adobaï Ao äninque quëwëmopa. ¹⁵ Wængongui angä ate mönö waocabo edæ nö cæmö incæ wiwa cæmö incæ tömämö wænte ate ñäni ömæmöninque mönö quëwengæimpa, ante iñäni pönënanipa. Botö tömënäni näni pönënö bai adobaï ante pönente tobopa. ¹⁶ Mänömaï beyä botö, Wængongui ayongä incæ waodäni ayönäni incæ botö nämä apænte botö pönënö tæiyæ waëmö entawencæboimpa, ante cöwë nanguï cæbopa.”

¹⁷ Äninque Pabodo godömenque apæ necantapa. “Botö wayömö gote tæiyæ wadepo quëwente ate tömëmö ömæ adodö pöninque, Ömæpodäni wæwënäni quï, ante ænte pöninque botö guidënanäni oodeoidi iñänite wæætë pædæ godömo ænänitapa. Ayæ, Wængongui quï, ante baö pædæ godontabopa. ¹⁸ Mänömaï cæyömo ayönäni botö iñömö tæiyæ waëmö bacæte ante Möitee wodi nänö angainö bai do eyepæ cædimo inte Wængongui oncö ñænæncö yabæcönë pö guidinque, botö, Wængongui quï, ante godömo adänitapa. Wiï nanguï iñäni tönö cædinque botö Yæ yæ änämaï inte cæbo adänitapa. ¹⁹ Incæte botö imotedö ante näni piinte äninö näwangä i bai wadäni guiquënë oodeoidi incæ Atiabæ quëwente pönäni iñömö, tömënäni wæætë bitö weca do ponte anguënänäni iñänipa. ²⁰ Botö oodeoidi näni në Apænte Äincabo weca ongönömote, Pabodo æbänö nö cædämaï ingää, ante apænte äñönänite bitö weca ñowo ongönäni guiquënë mäninö ante në eñënäni iñänipa. Iñinque wadäni dæ änäni adinque iñäni wæætë edæ tömënäni näni eñëninö ante në anguënänäni iñänipa. ²¹ Botö awënëidi weca ongöninque yedæ äninque, ‘Mönö wænte ate ñäni ömæmongæimpa, ante botö apæ nedö beyænque minitö ñowoönæ botö imote apænte äninque piiminipa,’ ante apænetabopa. Iñinque iñömö ongönäni wabänö adobaï adode botö äninö beyænque piinte änänipa,” ante Pabodo nämä wææ ante iñinque apæ necantapa.

²² Pabodo mäninganca apæ necä eñëninque Pedique, Taadö ante në quëwënäni æbänö ante pönënanäni, ante do eñëningä inte, Idæwaa, äninque tömënäni iñänite, —Cömantante Ditia pongä ate wæætedö wæætë mïni äninö ante apænte ancæboimpa.

²³ Äninque tontadoidi capitäö ingante apænedinque, Pabodo ingante tee mönedämaï inte wææ wänöedäni. Ayæ tömengä quïëmë ante ænguëningä ingä adinque tö-

mengä ämigoidi ponte pædæ pönönäni ængä ĩninqe mĭnitö ee amĭni æncæcäimpa, angantapa.

²⁴Tæönæ go ate Awënë Pedique tömengä nänöogængä Dodotida tönö näna gæncaya pönatapa. Tömengä nänöogængä oodea onquiyængä ĩnongäimpa. Pedique ĩñömö Pabodo ingante äñete mämönäni pöninqe Pabodo wæætë, Codito Itota ingante mönö wede pönente quëwengäimpa, ante apænecä ëñëë cönatapa. ²⁵Ayæ Pabodo godömenque apænedinque, Mönö nö cæte quëwengäimpa, äninque, Mönö nämä wææ aate waa cæte quëwengäimpa, angantapa. Ayæ, Wængonguĭ Awënë nänö apænte anguĭönæ oo baquĭnö anguënë, ante apænecä ëñëninque Pedique wæætë guĭñente wædinque, Idæwaa, äninque,

—Ñöwo gobæwe, angantapa. Waönæ ate botö eyepæ ĩmo inte ämo bitö ĩmite äñete mämönäni ponte apænebi ëñëmaĭmopa, angantapa.

²⁶Mänömaĭ äninque tömengä, Pabodo wabänö, Ñimpo cæbi gocæboimpa, ante cædinque godonte äinta pönömaingampa, ante pönengantapa. ĩninqe tömengä wantæ wantæ ĩñö Pabodo ingante angä pönongä guëa tededatapa. ²⁷Mänömaĭ ancaa cæyongä wadepo mēnepoga ba ate Pedique gobedönadodo awënë ĩinque bayongante wacä Pontio Peto näni änogä pöninqe wæætë awënë gobedönadodo bacantapa. ĩninqe Pedique ĩinque awënë bayedë, Botö ĩmaĭ cæbo ate oodeoidi botö ĩmote waa acædänimpa, ante pönente cædinque Pabodo ingante tee möneincönë oncodo tadönämaĭ ee adinque wadæ gogacäimpa.

Gobedönadodo Peto weca Pabodo ongonte apænecampa

25 Peto ĩñömö pancabaa awënë gobedönadodo tæcæ badingä inte mänĭmæ pöninqe Tetadea näni quëwëñömö mēönaa go adoönæque quëwëninque Eedotadëë go æicantapa. ²Eedotadëë ĩñömö ponte ongönongante, Wængonguĭ quĭ, ante në godönäni nænænäni tönö oodeoidi awënëidi tömengä weca pöninqe, Pabodo ĩmaĭ wënæ wënæ cæcantapa töö, ante apænedäni ëñengantapa. ³Tömënäni doyedë adoyömo pönëninque, Gobedönadodo Peto ingante ämö ate tömengä wæætë Pabodo ingante Eedotadëë ĩñömö da pönongä pönongante mönö taadö wææ wänonte ö ænte wænongäimpa. Ante në pönëwënäni inte tömënäni ñöwo Peto weca pöninqe ĩmaĭ änanĭtapa. Gobedönadodo Peto ëñëmi, Bitö Ao ante möni ämaĭ pönö cæquĭmi. Bitö Pabodo ingante ämi Eedotadëë ĩñömö ænte mämönäni pongæ, ante ancaa änanĭ. ⁴Ëñëninque Peto wæætë tömënäni ĩnänite edæ, Pabodo ĩñæmpa Tetadea ĩñömö tee mönete ongongantawo. Botö tömëmö edæ oo adoyömo wæi gocæboimpa. ⁵Äninque,

—Mänömaĭ beyæ mĭnitö mĭni cabo ĩñöminite në änanĭ pancadäniya ĩnänite da godömini botö tönö godongämæ Tetadea wæi gocædänimpa. Pabodo wënæ wënæ cæcä ingä ĩninqe tömënäni mäniñömö pöninqe ancædänimpa. ⁶Äninque tömënäni tönö wodo önompo tipæmpoga ĩiönæ godömenque quëwëninque Peto wadæ godinque Tetadea wæi gocantapa. Pöninqe tömengä ĩimö ate awënëidi apæncæte ante näni contaĭmpaa tæ contadinque angä ate Pabodo ingante ænte mämönäni pongä. ⁷Ate oodeoidi Eedotadëë quëwente ñöwo wææ pönĭnänĭ inte pö godongämæ gongæninque, Pabodo mänömaĭnö wiwa cæcampa, wadö wiwa cæcampa, ĩmaĭnö wiwa cæcampa, ante ancaa änewënänĭtapa. Incæte Petoidi ĩnänite, Näwangä ante apænemönĭpa, ante odömoncæte ante tömënäni quĭnö ĩmpa ante odömönäni aquĭnänĭi. ⁸Pabodo ĩñömö nämä wææ apænedinque,

—Oodeoidi näni wææ angäinö ante Baa änämaï inömo inte botö eñente cæte quëwënimo imopa. Wængonguï oncö ñænæncö waa adinque botö mänincönë yabæcönë guiite wënæ wënæ cædämaï intabopa. Odömänoidi tæiyä awënë Tetædo nänö änö ante eñente cædinque wadö ante cöwë cædämaï intabopa.

⁹ Äñongante Peto, Oodeoidi tömënäni näni äninö bai cæbo ate botö imote waa acædänimpa, ante babæ cædinque Pabodo ingante,

—Botö Eedotadëë go æibo ate adinque bitö botö weca pöñömi iinäni piinte näni äninö ante apænte ancæboimpa. Bitö Ao ante, Gocæboimpa, ämitawo.

¹⁰ Äñongante Pabodo wæætë,

—Botö inämpa odömäno tæiyä awënë Tetædo nänö Apænte ante Contaimpaa gäänë nöwo incæ ongömo ae. Minitö inömo Tetædo beyä ante në apænte ämini inömini inte edæ botö imote në apænte angüenëmini iminitapa töö. Bitö tömëmi inömo edæ, Pabodo oodeoidi inänite wënæ wënæ cædämaï iningä ingampa, ante edæ do eñëmipa. ¹¹ Inique wënæ wënæ cædinque botö tente wängüenëmo imo bai botö edæ Baa änämaï inte edæ dobæ wæncædömoimpa. Wæætë edæ, Wënæ wënæ cæbipa, ante iinäni oodeoidi näni änewënö guiquënë önonquedö ante i inique waocä æcämenque incæ ædö cæte tömënäni nempo pædæ godongüenengä ingä. Inique botö, Odömäno tæiyä awënë Tetædo ingante ämo botö imote pönö apænte ancæcäimpa, angantapa.

¹² Pabodo mänömaï angä eñente wædinque Peto tömengä tönö godongämæ në apænte änäni tönö, Æbänö cæquimöö, ante adoyömö pönënäni ate tömengä Pabodo ingante,

—Ao ämönipa. Tæiyä awënë Tetædo incæ apænte ancæcäimpa, ante do änimi inte bitö Tetædo weca edæ gocæbiimpa, angacäimpa.

Awënë odeye Agodipa ingante Peto apænecampa

¹³ Tæönæ go ate wacä awënë odeye Agodipa tönö onquiyängä Bedënite inömo gobedönadodo awënë Peto ingante, Bitö iimæca waa pömi amönapa, ante apænecæte ante Tetæda inömo pöninque Peto weca eñacæ pönatapa. ¹⁴ Pöninque tæönæ quëwëna ate awënë Peto guiquënë awënë odeye Agodipa ingante, Pabodo ingante iimaï cætämönipa, ante apænedinque,

—Gobedönadodo awënë Pedique wodi nänö në tee mönete emö cæte godingä inömo onguinængä adocanque ayä a ongongampa. ¹⁵ Inique botö Eedotadëë æite quëwëñömote, Wængonguï qui, ante në godönäni ñænænäni tönö oodeoidi inänite në aadäni näni Picæncabo guiquënë botö imote äninque, Mäningä inömo wiwa cæcä ingä adinque bitö tömengä ingante apænte äninque ämi wænönäni wæncæcäimpa, änänitapa. ¹⁶ Eñëninque tömënäni inänite botö wæætë iimaï antabopa. Waocä nämä beyä apænedämaï inongante mönitö möni odömänocabo inömo në pänäni inänite pædæ godönämaï imönipa. Wæætë wadäni, Iingä iimaï cæte wënæ wënæ cæcampa, ante piinte änäni eñente wædinque mönitö mäningä tönö në piinäni inänite ämöni godongämæ pönänipa. Ponte awincadö awinca adinque wæatedö wæætë äñönänite mönitö inömo, Tömënäni näni piinte äninö ante tömengä æbänö nämä wææ apænecä, ante ædæmö eñente ate nöingä ante apænte ämönipa. Mänömainö ante botö tömënäni inänite apænetabopa, ante awënë Peto apænecantapa.

¹⁷ Ayä, “Mänömaï ante apænebo eñëninque në piinte änäni botö tönö wææ Tetæda inömo godongämæ pönänitapa. Inique botö a ongönämaï do möni apænte

äimppaa iimō ate go tæ contadinque, Māningä ingante ænte pöedāni, ämo ænte pönānitapa. ¹⁸ Botō iñömō, Pabodo wadāni inānite wīwa cæcampa, ante piinguināni imāinānīpa, ante pönentabopa. Incæte nē piinte ānāni ængæ gantite apænedinque edæ botō ante pönēninō bai wīi piinānitapa. ¹⁹ Wæætē edæ wadō ante piināni ēñente wætabopa. Wængonguī ingante æbānō cæte waa aquīi, ante tōmēnāni Pabodo tōnō wæatedō wæætē piinānitapa. Ayæ tōmēnāni mæmæidi nāni wææ angainō ante tōmēnāni, Pabodo ēñēnāmai ingampa tōō, ante piinānitapa. Ayæ adocanque Itota wodi do wængaingä incæte Pabodo, Miingä quēwengampa, ante tedecampa tōō, ante piinānitapa. ²⁰ Iñinque botō, Quiēmē bai ānewēnānīi, Æbānō cæte nō ēñente apænte anguimoo, ante wædinque botō Pabodo ingante iimāi antabopa. Tōmēnāni nāni piinte āninō ante bitō Ao āninque Eedotadēē gote ongōñomite botō apænte ancæboimpa, antabopa.”

²¹ “Äñömō tōmengä wæætē, Botō imote ee wææ wänōñōmini, Botō æbānō cæta-woo, ante tæiyæ awēnē Empedadodo mōnō ānongä apænte ancæcäimpa, ämopa. Angä ēñēninque botō, Æyedēmē eyepæ i ate Pabodo ingante tæiyæ awēnē Tetædo weca da godōmo gocæcäimpa, ante pönēninque, Tōmengä ingante mānimpoga wææ wänöedāni, antabopa,” ante Peto apænegantapa.

²² Mānōmai apænegä ēñēninque awēnē Agodipa wæætē,

—Īngä onguīñængä æbānō apænegä, ante tōmēmo ēñēinente wætabopa.

Äñongante Peto,

—Īimō ate tōmengä apænegä ēñencæbiimpa, angantapa.

²³ Īimō ate awēnē odeye Agodipa tōnō Bedānite iñömō waēmō pōni wecoo wēñate mongæninque tōmēnāni nāni ēñēincōnē nānæncōnē pōninque, Mōnatō awēnēmōna iñōmōnate waa aedāni, ante bai cædinque wæñee da da pō guidatapa. Ayæ tontadoidi tæiyæ awēnēidi tōnō māniñōmō quēwēnāni awēnēidi nānænāni tōnō tōmēna miñæ dao dao pönānitapa. Ayæ Peto angä ēñēninque nē wææ wänōnāni wæætē Pabodo ingante ænte māmōnāni pō guiite ongōñongante,

²⁴ Peto iñömō,

—Awēnē odeye Agodipa ēñēmi, angantapa. Īñömō ongōmini tōmāmini edæ ēñēedāni. Īngä ingante aminii. Tōmengä ingante āninque Eedotadēē quēwēnāni incæ iñömō quēwēnāni incæ oodeoidi tōmānāni botō imote yedæ āninque, Īngä nē wēnæ wēnæ cæcä inte godōmenque wīi quēwenguēngä ingampa cæbii, āninque, Bitō apænte ancæbiimpa, ante wædānīpa. ²⁵ Iñinque, Adocä Pabodo nānō wænguinque wēnæ wēnæ cæcantawoo, ante botō cōwä ayōmo edæ dæ antapa. Ante wæyōmo tōmengä guiquēnē, Tæiyæ awēnē empedadodo incæ botō imote apænte ancæcäimpa, angä ēñente pönēninque botō, Ao, tæiyæ awēnē Tetædo weca da godōmo gocæbiimpa, antabopa. ²⁶ Incæte, Īngä nānō cædinō ante tæiyæ awēnē aquinō ante botō ædō cæte yewæmonguimoo, ante wæbopa. Mānōmai beyæ botō, Minitō tōmāmini apænte āmini ēñencæboimpa, antabopa. Ayæ, odeye Agodipa bitō tōmēmi apænte āmi nō ēñente ate yewæmoncæboimpa, ante cædinque botō nōwo Pabodo ingante ænte māmōmo ponte a ongongä aedāni. ²⁷ Īñæmpa botō, Mōnō nē tee mōnete ongongä wēnæ wēnæ nānō cædinō ante yewæmōnāmai inte mōnō ædō cæte da godonguīi, ante awædō, ante Peto apænegacäimpa.

Agodipa weca ongonte Pabodo nämä wææ apænecampa

26 Awënë odeye Agodipa wæætë Pabodo ingante,
—Bitö ñowo nämä beyænque wææ apænecabiimpa, ämopa.

Angä ëñëninque Pabodo compo compo cædinque nämä beyænque ante wææ apænecæ cæcantapa. ²“Awënë odeye Agodipa, ëñëmi. Oodeoidi näni püinte äñinö tömänö ante nämä beyænque wææ apænedinque botö bitö awënë ïmi weca ongonte apænebopa, ante adinque botö waa edæ tobopa. ³Möni oodeocabo dodäni näni cægäi bai möni cæinö ante bitö ïñömö edæ do ëñëmipa, ante tobopa. Ayæ adobai, Oodeoidi ñowodäni æbänö ante wæætëdö wæætë ante tededäni, ante do ëñëmi inömi inte bitö botö wææ apænedö ante edonque ëñenguïmi ïmipa, ante pönëninque botö godömenque tobopa. ïninque bitö Ao ante ee ongöninque ëñencabiimpa, ämopa.”

Ïmaï quëwengaboimpa, ante Pabodo apænecampa

⁴Ante apænedinque, “Botö ñowo ganca æbänö quëwëmoï, ante oodeoidi tömänäni do ëñënanipa. Edæ do wëñämoyedë botö ëñagaimæ quëwente pædinque botö edënimoyedë ñowo ganca æbänö Eedotadëë ïñömö quëwengaboï, ante do ëñënanipa. ⁵Möni oodeocabo incæ pancadäniya Wængonguï ingante wædænque ëñente quëwëñönäni möni Paditeocaboque wæætë, Dodäni näni wææ angainö ante mönö ëñente cæcäimpa, ante ëñente quëwëmönipa. Botö ïñömö Paditeobo inömo inte mäninö ante cöwë Ao ante godömenque nangui cæte quëwentabopa. ïninque oodeoidi do againäni inönäni inte Ao ante bai, Näwangä Pabodo ëñente quëwengampa, ante apænecädönänimpa. ⁶Mönitö mämæidi inänite apænedinque Wængonguï, Minitö beyæ cöwë pönö waa cæcæboimpa, ante nänö angainö bai cæcä beyænque mönö watapæ bacäimpa, ante botö pönëmopa.”

“Ñowo ïñömö mänine botö pönënö beyænque ïinäni, Pabodo ingante apænte an-cæminimpa, ante ænte mämönäni pöninque botö minitö weca a ongömo aedäni. ⁷Wængonguï, Minitö beyæ pönö waa cæcæboimpa, ante nänö angainö ante ïinque bacäimpa, ante möni pönënö beyænque möni oodeo pægaincabo önompo tipæmpoga go mencaboga mänimpomöni ïmöni ïñömö woyowotæ itädë, Wængonguï ingampa, ante tömengä beyæ cæte quëwëmönipa. Incæte awënë odeyebi, ëñëmi. Wængonguï, Cöwë cæcæboimpa, ante nänö angainö ante möni pönënö beyænque oodeoidi incæ botö ïmote, Wiwa cæbipa töö, ante püinänipa. ⁸Minitö iminite ämo apænemini ëñëmoedäni. Do wäninäni ïñönänite Wængonguï, Botö pönö cæbo ate näni ömæmoncädänimpa, angacäimpa. Minitö ïñæmpa, Wængonguï ædö cæte mänömaï cæquingää, ante pönente wædinque quinänte Baa änewëminii,” ante Pabodo angacäimpa.

Pabodo, Coditoidi inänite togænte pantabopa, angampa

⁹Äninque Pabodo godömenque apænecantapa. “Botö wëñëñedë edæ oodeoidi näni pönëwënö bai pönengaboimpa. Mäniñedë botö Itota wodi Näatadeta quëwengaingä ëmowo ante näni pönënö ante püinte cædinque nangui wido cæquënëmo ïmopa, ante pönëwentabopa. ¹⁰Ïninque botö Eedotadëë ïñömö quëwëninque mäninonque ante cægaboimpa. Mäniñedë edæ, Wængonguï qui, ante në godönäni ñænänäni inänite antabopa. Ämo Ao ante tömënanäni në änanäni inte yewæmonte pædæ pönönäni æninque botö Wængonguï Awënë quinäni nangui ïnäni inänite

bæi ongonte æninqe nē tee mönebo ingaboimpa. Ayæ tömēnāni inānite wænoncæ cæyönāni botö cöwē godö Ao angaboimpa. ¹¹ Botö wayömö wayömö godinque oodeoidi odömöincönē wantæ wantæ inö go guidinque, Wængongui Awēnē quīnāni tömengä ingante godö wēnæ wēnæ ante piincædānimpa, ante cædinque pædāni, ante nanguī ämo pangadānimpa. Ayæ tömēnāni inānite nanguī piīninqe godömenque ænguī badinque botö tömēnāni inānite pancæte ante wabæca nāni quēwēñömö wabæca nāni quēwēñömö incæ togænte gogaboimpa,” ante Pabodo wææ apænecantapa.

Wadö ante pönente babopa, ante Pabodo adodö angampa

(Näni Cægainö 9.1-19, 22.6-16)

¹² Ante apænedinque Pabodo godömenque, “Mänömaī wabæca go wabæca go cædömo inte Daämaco inömo gocæte ante cætatabopa. Cæyömö, Pabodo iimāi cæcæcäimpa, ante Ao ämönipa, ante, Wængongui qui, ante nē godönāni nænænāni nē änāni inönāni inte botö beyæ cadota ante yewæmöninque pædæ pönönāni ænte gotabopa. ¹³ Awēnē odeyebi, ēñēmi. Mänömaī gote idömæ goyömo tæcæ bæcä pönī bayonte nænque nänö näwä bæi godömenque näwä öönædē inö botonga möni godongämæ gocaboga pö tömäo guinæ gongæ. ¹⁴ Ate wædinque tömämöni guidömēmæ go go wææñömöni adocanque möni ebedeo tededö tedete öönædē apænecä botö adoboque ēñentabopa. ‘Taodo. Taodo ämo. Botö imote quīnante togænte pämi. Inæmpa wagada päintoca bæi bitö nämä inæ æwate cowate bæi bitö caate wæquinque cæbipa,’ angacäimpa.”

¹⁵ “Angä ēñente wædinque botö, ‘Awēnē, æbidö inömi imii.’ Ante ēñente wæyö-mote, ‘Botö Itota inömo inte bitö nē togænte pänimo mänimodö imopa cæbii. ¹⁶ Nöwo edæ ængæ gantidinque adiyæ næ gongæmi ämopa. Botö beyæ nē pönö cæbi ämo edæ bacæbiimpa. Ayæ, Botö imote æbänö abii, ante bitö adinö ante nē apænebi ämo bayömite botö iincayæ ate godömenque odömömo ate bitö aquinö ante bitö nē apænebi ämo bacæbiimpa. Mänömainö ante ämo bacæbiimpa, ante apænecæte ante botö bitö weca ponte a ongömopa. ¹⁷ Ayæ bitö guidēnāni oodeoidi incæ wadāni wabæca quēwēnāni incæ bitö imite wēnæ wēnæ cæcæ cæyönāni ate botö bitö imite gä pe æmpote wææ gompobo beyænque bitö wæætē quēwencæbi-impä. Tömēnāni weca botö bitö imite da godömo gocæbiimpa. ¹⁸ Tömēnāni botö imote wede pönēnāni ate botö wēnæ wēnæ nāni cædinö ante godö ñimpo cæbo ate tömēnāni do botö tæiyæ wæmö badongaināni tönö adocabodāni bæi badömo badinque quēwencædānimpa, ante cæbopa. Mänömainö cæcæte ante botö, Bitö Taodobi inömo tömēnāni awinca wi æmonte bæi cædinque apænebi ēñēninqe tömēnāni wæætē edonque adinque nāö inö gämänö poncædānimpa, ante cæbopa. Tatāna nempo quēwēñönānite bitö wæætē gä pe æmpote bæi cædinque odömonte apænebi ēñēninqe tömēnāni wæætē edæ ocæ emænte pöninque Wængongui nempo quēwencædānimpa, ante bitö imite da godömo gocæbiimpa.’ Ante Awēnē Itota botö imote angä ēñente gotabopa,” ante Pabodo apænecantapa.

Pabodo, Öönædē apænecä ēñente cætatabopa, angampa

¹⁹ Mänömaī apænedinque Pabodo godömenque, “Awēnē odeyebi Agodipa, ēñēmi. Botö wiimonte bæi ayömo öönædē inö nē angä nänö angainö ante botö ædö cæte ēñēnāmaī cæquimoo. Edæ do cætatabopa. ²⁰ Tāno Daämaco inömo quēwēnāni inānite

apänedinque botö ayä Eedotadëe iñömö godinque mäninömö quëwënäni inänite apänedinque Oodeabæ quëwënäni inänite go apäneboque go wayömö oodeo inämaï inäni inänite mäo apänedinque iimainö ante apänebo ëñënanitapa. Minitö wënæ wënæ mïni cädö ante, Ancaa wæwente awädö, ante ñimpo cædinque Wængonguï gämænö edæ pödäni. Ayä pöningue mïnitö, Mäninö wënæ wënæ botö cædinö edæ ämæwo ñimpo cæbopa, ante edonque acäïmpa, ante cædinque waa cæte quëwëedäni, ante ämo ëñënanitapa.”

²¹ “Ininque botö mänömaï cæbo beyænque Wængonguï oncö ñänencö boyä ongönömote oodeoidi botö imote bæi ongöningue edæ wænnoncæ cädänitapa. ²² Mänömaï wënæ wënæ cädäni incæte Wængonguï ñowoönæ ganca botö tönö cöwë godongämæ cæcampa. Ininque botö, Wængonguï Awënë æbänö cæcää, ante guñënamäi inte næ gongäningue awënëidi inänite önönänique inänite apänedinque apäneboï aedäni. Möitee wodi tönö wadäni Wængonguï beyä në apänegainäni tönö, Æbänö baquïi, ante apänegadänimpa, ante apänebopa. Mänine tömënäni näni apänegainequue adodö ante apänedinque botö godömenque apänedämaï imo inte edæ iimainö ante apänebopa. ²³ Möiteeidi iñömö, Mönö Codito cöwë caate wæquingä ingampa, ante apänegadänimpa. Ayä, Wænte ate tömengä tänocä në ñäni ömämöningä inongä inte, Acädänimpa, ante cædinque ñäö tica ënente bai tömengä guidënäni inänite wadäni inänite edæ odömoncæcäïmpa, ante yewämongadänimpa. Botö iñömö, Möiteeidi näni angäinö do edæ iinque batimpa, ante apänedinque wadö ante apänedämaï imopa,” ante Pabodo apänegacäïmpa.

Agodipa, bitö Codito ingante pönenguënämi imipa, angä

²⁴ Pabodo mänömaï nämä beyænque tæcæ wææ apäneyongante awënë Peto do ogä tededinque,

—Inämpa Pabodo ocai ömæcabi inte tedebe awädö. Nanguï wantæpiyä dibodo adïmi inte idiquibæ pönente babiimpa töö.

²⁵ Ante wææ tedecä ëñëninque Pabodo,

—Awënë Peto bitö waa pönï awënë gobedönadodo imi incæte botö wïi bitö änö bai imopa. Botö wïi idiquibæ pönëmo inte töingä pönëningue näwangä ante apänebopa. ²⁶ Awënë odeye Agodipa guiquënë tömengä mäninö botö apänedö ante tömää ëñengä iñongante tömengä ingante edonque apänebo ëñengampa. Edæ mäninö botö äninö wïi awëmö cætimpa, ante pönëningue botö, Awënë odeye incæ do adingä inte ädö cæte ëñënamäi inguingää, ante awädö. ²⁷ Awënë odeyebi Agodipa, ñowo bitö imite apänebo ëñëe. Wængonguï beyä näni apänegainö ante bitö pönëmitawo. Do pönëmi imitapa, ante ëñëmopa.

²⁸ Äñongante Agodipa wæætë,

—Inämpa bitö botö imote wantæ iñö tededinque, Agodipa bitö Codito ingante do pönencæbiimpa, ante cæcæte ante cæbitawo.

²⁹ Äñongä Pabodo wæætë,

—Wantæ iñö apänebo incæ wantæpiyä apänebo incæ bitö botö bai pönëmi waa tobäimopa. Edæ bitö tönö godongämæ ëñë cönäni tönö minitö tömämi botö bai entawencämïnimpa, ante botö Wængonguï ingante apänebopa. Incæte, Botö bai baedäni, äninque botö, Yäëmengoncoo empocämïnimpa, ante apänedämaï intabopa.

³⁰ Ante Pabodo mänömaï apænecä eñëninque awënë odeye Agodipa ængæ ganticantapa. Ayæ pancabaa awënë Peto, Bedänite, godongämæ ongönäni adobaï tömengä tönö ængæ gantidique, ³¹ mänincönë tao godinque iïmaï ante tededänitapa. —İngä Pabodo wænæ wænæ cædämaï iñongante quinante wææ wänonguï. Qui-nante apænte wänonguï. Edæ wænæ wænæ nänö cædinö dæ ampa.

³² Ante tedeyönäni Peto ingante Agodipa apænecantapa.

—Tetædo incæ botö imote apænte ancæcäimpa, ante Pabodo wïi angä baï botö edæ tömengä ingante do ñimpo cæcædömoimpa, angacäimpa.

Pabodo ingante Odömä iñömö da godönäni gocampa

27 Mänömainö ante wædinque mänimæ awënëidi, Pabodoidi inänite ñöwo Itadiabæ ämö wogaa gocædänimpa, ante godongämæ Ao änänitapa. Mäniñömö tontadoidi iñömö tæiyæ awënë empedadodo beyænque näni wææ wänoncabo inönäni inte Empedadodoidi näni änoncabo inönänimpa. Tömënäni capitäo Codio nempo Pabodo tönö wadäni në tee mönete ongöninäni inänite pædæ godönäni ö æninque ænte gocantapa. Ayæ botö Odocabo në yewæmömo tönö wadäni adobaï Pabodo tönö godongämæ gotamönipa. ² Gäwapæntibæ wedeca gote ayömöni wipo ñænæmpo Adadämítő wäi wocænte näni ænte pönimpo inte ñöwo Atiabæ godinque wayömö go ti wææ wayömö go ti wææ näni goquimpo adinque mönitö mänimpodë go guiite gäwapæntibæ wogaa gotamönipa. Ayæ wacä Aditadoco Mäatedöniabæ Tetadönica iñömö quëwëningä inte mönitö tönö pö äampodenque gocantapa. ³ İimö ate Tidöo näni quëwëñömö pö wäi wocæñömöni Pabodo ingante capitäo Codio waa cædinque pönö apænecantapa. Bitö æmigoidi weca quiëmë bitö ænguënënë ante gote ænte pöe, äninque ee acä tömæwæ gote eñadinque ænte pongantapa. ⁴ Ayæ mänii Tidöo iñömö eñate wogaa goyömönite möni në gocæ cædö woboyæ beta-monca pæmæ ate wædinque mönitö wää tëiwænë Tipidebæ näni äniwænë wææ cæteinö wogaa gotamönipa. ⁵ Wää tëiwænë go wodo tebæ gomönique go tæcæpæ pönï wogaa godinque Tiditiabæ wodo tebæ pömönique go Pampidiabæ wodo tebæ pömönique go Ditiabæ godinque Miida näni quëwëñömö pö wäi wocæntamönipa.

⁶ Mäniñömö wacä wipo ñænæmpo Adecantodia näni ænte pönimpo adinque capitäo Codio, Itadiabæ goquimpo impa, äninque mönitö imönite angä godongämæ guiite wogaa gotamönipa. ⁷ Tæönæ iñonte wæñee godinque mönitö, Æiquedö go-quimönii, ante ancaa cæmönique go Gönido näni quëwëñömö go wodo tebæ gotamönipa. Ayæ woboyæ cöwë mönitö gocæ cædö inö nanguï pönï pö ate wæmönique go wää tëiwænë Tadamöne wodo tebæ godinque wawænë Cædeta näni änowænë yaatænque gotamönipa. ⁸ Mäniwænë wææ cæteinö yæwedecaque ancaa cædinque wæñee godinque mönitö Datea wëmonca wodöiñömö näni Waa Wodöiñömö näni äniñömö pontamönipa. Mäniñömö pömöni ate wipodë në cædäni iñömö, Wipo ñænæmpo wäi wocæñompo nämä godämaï ingäimpa, ante cædinque teëmenca gæguincamë inte näni ñä cæcadodınca gutodönäni näñe ñongæ ate wipo godämaï wäi wocæntapa.

⁹ Mäniñömö wäi wocænte owodique mönitö, Quingæ pongamö incæ wæñee pö-mompa, ante wædinque mönitö, Woboyæ nanguï pæmæ tedæ baquinque mönitö Wængonguï beyæ ante mönö cænämaï eönæ do iinque batimpa, ante pönen-tamönipa. İninque mönitö, Nöwo mönö wænguinque wipodë godömenque go-

mompa, ante wæyōmōni wipo ñænæmpo nē ænte godāni inānite Pabodo nō pōnēn-
 inque wææ angantapa.

¹⁰—Īñānāni, botō ayōmo mōnō ēwente wæquinque godōmenque gomompa. Māincoo mīni ænte gocco wido cæquinque wipo nā tobæ go ate mōnō becadote wænguinque impa cæmīni.

¹¹Āñongā wipo ñænæmpo nē ēacā tōnō wipo capitāō wadō ante apæneda ēñēn-
 inque tontado capitāō Codio ĩñōmō Pabodo nānō ānīnō ante ēñēnāmaī cæcan-
 tapa. ¹²Wæætē edæ, Īñōmō ponte mōnō wodōĩñōmō woboyæ pæmæ tedæ ĩñonte
 wīi owoīnente wæmomba. Ante wædinque wodo tōmānāni, Pēnite nāni wēmonca
 wodōĩñōmō nænque tamōnō imætæ ĩnō ongōnīnque woboyæ ante wææ cæte
 impa cæmōō. Nōwo wadæ godīnque Pēnique nāni wēmonca wodōĩñōmō go ti
 wæænte quēwēnīnque woboyæ pæmæ tedæ ĩnque pæmænte go ate mōnō gomonga
 gocæīmpa, ante adoyōmō ānānitapa.

Wīni cai pompa

¹³Mānōmainō, Gocæīmpa, āñōnāni ñænæ wipo goquinque woboyæ dipæmæ ĩnō
 betamonca wædænque pæmæ ate wædinque, Mōnō ānīnō baī nōwo mōnō waa go-
 quinque impa, ante todānitapa. Ayæ wipo ñænæmpo wāi wocæñō teēmenca nāni
 guitodōnīnca nōwo gæguīncamenca quingæ ĩñæ æænō ñænæ wipodē cō cædāni ate
 mōnitō wogaa go Cædeta nāni ānōwænē yæwedecaque gotamōnīpa.

¹⁴Mānīnō tæcæ gocæ cæyōmōni do woboyæ wīni cai Yodocodōno nāni ānō
 wāā tēiwænē ayaēnēmāa ĩnō māmō pæmæ pōnīnque, ¹⁵wipo ñænæmpo māmō
 ō ænīmpa. Mōnitō, Mōnō wodōĩñōmō adodō gocæīmpa, ante cædinque woboyæ
 pōnō gāmænō ædō cæte wiya wēnente goquīi. Ante wædinque mōnitō ee amōni
 woboyæ betamonca ĩnō quingæ māmō dadī wēnente da godō māo gotamōnīpa.
¹⁶Wāā tēiwænē guiyāwænē Caoda nāni ānōwænē dipæmæ ĩnō yæwedeca woboyæ
 wææ cæteīnō godīnque mōnitō guiyampo mōni wēā wēā ænte pōnīmpo ante, To-
 bænāmaī impacæīmpa, ante pæ pagænte ancaa cædinque wēā pōnōnte pæ man-
 tamōnīpa. ¹⁷Ayæ nē cædāni guiyampo gæguīncamenca wēā æænōnte ñænæmpo-
 podē da wēnānitapa. Guiyampo da wēnente ate tōmēnāni, Nænæmpo awæmpa-
 coo wīi bede wænecæīmpa, ante cædinque ñænæ wipo incæ gæguīncamenca wīni
 wīni cæte goto wīnānitapa. Ayæ, Ōnætāmō Tidite nāni ānōtamō impa, ante ad-
 inque tōmēnāni, Æ quingæ gomō baī mōnō wænguinque Tidite ēmōnaiboga go
 nāñe ñongæncædōnīmpa. Ante pōnente guīñente wædinque wæñee gocæte ante
 cædinque weocoo ñænæmpodē pæmænte māo nāni gocco incæ wēā wænōnte nō
 cædinque ee adāni woboyænque wæñee māo gotamōnīpa.

¹⁸Wīni cai ĩñōmō godōmenque woboyæ pæmæñīnque æpæ mængonta mængonta
 ante cæ wædinque wipo ñænæmpo incæ æmætæ dadīimæ æmætæ dadīimæ go
 wætāmōnīpa. Īnīnque ĩimō ate tōmēnāni, Wipo ōmædē bate wodæi bacæīmpa,
 ante cædinque māincoo ñænæmpodē ongōnīncoo incæ æpænē edæ wido wido
 cædāni gotapa. ¹⁹Waōnæ bayōnte tōmēnāni, Nænæ wipo quīncoo, ante nāni cæin-
 coo incæ nāmā ōnompoca pancacooga æpænē wido cædāni gotapa. ²⁰Ayæ tæōnæ
 ĩñonte nænque edæ tamōnāmaī nēmō tamōnāmaī ī ate mōnō, Ædōmē gomompa,
 ante ēñēnāmaī inte edæ wætāmōnīpa. Ayæ woboyæ godōmenque māmō pæmæñō
 æpæ nanguī mængonta mængonta cæ wædinque mōnitō, Nōwo quēwēngūināmaī
 ĩmōmpa, ante edæ pōnēnīnque wætāmōnīpa.

²¹ Mānināni wantæpiyæ cænāmaī īnāni adinque Pabodo tæcæguedē ængæ gantid-
inque tōmāmōni ayōmōni tōmēnāni īnānite īmaī apæncantapa.

—Īñānāni, botō āmo ēñēninque Cædeta nāni ānōwænē ēmō cæte pōnāmaī inte
ee owoquēnēmīni īmīnitapa. Edæ mānōmaī ee ongōmīni baī wīpo tobænāmaī
īñonte mīnitō māincoo ēwēnāmaī inte wædāmaī incædōmīnīmpa. ²² Nōwo guiquēnē
guiñēnāmaī piyænē cæte quēwēedāni. Nænæ wīpo mōnō goimpo incæ tobænte
bacæīmpa. Nāwangā īmpa. Incæte waomō īñōmō wænāmaī tōmāmō mīimō quēwen-
guīmō īmōmpa. ²³ Botō īñōmō edæ Wængonguī quīmo īnōmo inte botō, Wængonguī
ingampa, ante tōmēngā beyæ cæbopa. Nōwoōnæ woyowotæ tōmēngā anquedo botō
weca pōninque, ²⁴ botō īmote apænecā ēñentabopa. “Pabodo, guiñēnāmaī īe. Tæiyæ
awēnē Tetædo weca bitō cōwē gote gongæncæbiīmpa. Ayæ bitō beyæ waadete
pōnō cædinque Wængonguī bitō tōnō adopodē godongāmæ godāni īnānite do angā
quēwencædānīmpa.” ²⁵ Ante mānōmaī pōnō apænecā ēñēnīmo inte botō wæætē
mīnitō īmīnite, Guiñēnāmaī īmīni inte pōnencæmīnīmpa, āmōpa. Tōmēngā nānō
apænedō baquinō anguēnē, ante botō Wængonguī ingante nē wede pōnēmo inte
āmōpa. ²⁶ Incæte wīpo nænæmpoque wāā tēiwænē wawænē godinque tobænte ba
wæcæīmpa, ante Pabodo angantapa.

²⁷ Īninque mēa Wængonguī itædē īñonte woboyæ ayæ pæmæ māo godinque
mōnitō Adodiaticopæ nāni ānōmāa wadō wadō wogaa gotamōnīpa. Mānīmpōōnæ
īinque go ate woyowotæ ayaōnænēñā īñonte wīpo nænæmpodē nē cædāni īñōmō,
Onguīpoiya obo pōmōmpa, ante pōnēnānitapa. ²⁸ Tōmēnāni, Ægancadō īi, ante
acæte ante cædinque pædæ guidonte adinque todēinta i tei mēetodo īmpa, ante
adinque ayæ godōmenque godinque pædæ guidonte adinque tōmēnāni, Nōwo edæ
pōnōmenque bæintitiætæ mēetodo īmpa, ante wædānitapa. ²⁹ Dicaboga pōnī edæ
gomō tamēñedāni, ante guiñente wædinque, Nænæ wīpo wāī wocængæīmpa, ante
teēmenca nāni guitodōninca menca go menca yæmīñæmpo īnō edæ guitodōnāni-
tapa. Ayæ, Nāō ba waa tobāīmpa, ante Wængonguī ingante apænedīnque edæ wāī
wocænte a owotamōnīpa. ³⁰ Wīpo nænæmpo nē cædāni guiquēnē, Mōnō wodīi
wīnongæīmpa, ante awēmō cædinque waca nāni guitodōninca yæcadopo īnō gui-
todoncæte ante cæte baī babæ cædinque, Mōnō awēmō goquīmpo, ante guiyā wīpo
incæ pædæ wæænōncæ cædānitapa. ³¹ Guiyæmpo tæcæ pædæ wæænōñōnāni Pa-
bodo īñōmō tontado capitāō tōnō tontadoidi īnānite angantapa.

—Īñāni wīpo nænæmpo nē cædāni inte nænæ wīpodē ongōnāmaī īnāni baī mīnitō
ædō cæte nāmā cæte quēwenguīmīni.

³² Angā ēñente wædinque tontadoidi guiquēnē nænæ wīpo nē cædāni nāni awēmō
gocæ cædimpo gæguīncamē aa wiyænāni īinque guiyæmpo tæi guīite æmæwo
gotīmpa.

³³ Tæcæ oque pōnente īñonte Pabodo īñōmō, Tōmāmīni cænguī cæedāni, ante
nanguī āninque,

—Nōwo mēa Wængonguī itædē īñonte mīnitō ancaī guiñente wædinque ee
ate cænāmaī quēwēmīni abopa. ³⁴ Nōwo īñōmō mīnitō īmīnite, Cæedāni, āmōpa.
Cænte quēwenguēnē cæmīni, āmōpa. Mīnitō æcāmenque incæ tōmāmīni wænāmaī
incæmīnīmpa.

³⁵ Āninque tōmānāni waa ayōnāni Pabodo pāō æninque Wængonguī ingante, Waa
pōnōmī cæmōnīpa. Ante apænedīnque ao mænte cængā. ³⁶ Adinque tōmēnāni, Mōnō
quēwængæīmpa, ante ganæcæ pōnente wædinque tōmānāni cænānitapa. ³⁷ Wīpodē

möni adopodê gocabo iñömö dotiento tetenta i tei mänimpomöni intamönipa. ³⁸Mänömaï cædinque tömënäni eyepæ cænäni ate edæ, Wipo teëmê êmiñænte önætamo iñömö gobaimpa, ante guiñente wædinque, Wodæi bacæimpa, ante cædinque mönitö cængui tömëmö incæ æpænê gäwapænê wido cægadänimpa.

Wipo ñænæmpo incæ goyæ guiipa

³⁹Mänii ñäö bayö ömæ adinque ñænæ wipo nê cædäni iñömö, Ìimæ quimæmê impa, ante êñenämaï inäni inänitapa. Wæætê cöwä ayönäni, Æpæ wedeca togaa paodämæ iñömö êmönai impa, ante adinque, Eyepæ imö ininque mönö êmönai-boga wipo ñäne ñongæimpa. ⁴⁰Ante cædinque teëmenca näni guitodönincacoo êmö cæte gocæte ante gæguincamê aa wiyæninque ñimpo cædäni tadömengadæ ee on-gontapa. Ayæ wiyaimpa mempaa tömënäni wäi wocæñedê yæmiñæmpoya inö näni goti winimpa incæ ñöwo wæætê edæ, Wipo töö gocæimpa, ante ñi cædinque æpænê wæætê pædæ guidönänitapa. Ayæ, Woboyæ pæmænte mäo gocæimpa, ante ñænæ wipo weocoo adocooque yæcadopo pædæ æænonte wo cædäni ate êmönai-boga togaa paodämæ iñömö töingä mäo gotamönipa. ⁴¹Incæte tæcæ goyömöni önætamo iñömö ñäne ñongæntapa. Wipo yæcado ñäne ñongæ adinque mönitö, Mönö ædö cæte goquii, ante wæyömöni æpæ nangui mængonta mængonta cæ beyænque yæmiñæmpo nä tobæninque panguimæ panguimæ æmæwo gopotapa.

⁴²Tæcæ tobænö tontadoidi guiquenê, Nê tee mönete ongönäni wii tæi tæi pante wodii winonguinäni, ante wææ cædinque tömënäni inänite wænoncæ cædänitapa. ⁴³Adinque tontado capitäo iñömö, Pabodo cöwê quëwencæcäimpa, ante cædinque tömënäni näni cæcæ cædinö ante wææ angä êñente ñimpo cædänitapa. Ayæ mönitö imönite, Nê ipo cæmïni iñömö täno æpænê tæi guidinque önompoca compo compo go tömæwæ ömaa goedäni, angä êñente gotamönipa. ⁴⁴Wadäni ipo cædämaï inäni inänite tömengä, Minitö guiquenê awæmpaa incæ wipopa tobænimpaa incæ ñäne ñongæninque wiyacæ wiyacæ goedäni, angä êñente godänitapa. Mänömaï êñente cædinque mönitö edæ tömämöni æpæmpo becadote wænämaï inte ömaa edæ tömæwæ pongamönimpa.

Wäa tæiwænê Mänatabæ Pabodo ponte quëwengampa

28 Æpæmpo becadote wænämaï inte tömämöni ömaa taote êñenömonite, Wäa tæiwænê iiwænê Mänatabæ impa, ante apænedäni êñentamönipa. ²Mänömaï quëwënäni iñömö wii wadäni bai cædinque mönitö imönite waadete cædänitapa. Cöönæ ayæ nangui cæ ate yoguite wæyömönite tömënäni gonga tänöninque, Pö ootoedäni, änäni gonga tömämöni bæcoyömö oototamönipa. ³Pabodo iñömö önompoca gæte tænewæ bacoo ænte mämö ñö cæyongä gonga ocoi ä wædinque tæntæ gongapamö manta Pabodo önompo æo pocænte ñinga cædämaï ee engate owo wæcä. ⁴Adinque iñömö quëwënäni wæætê näni cabo nämæneque tædedinque, “Íingä iñömö waocä ingante nê wæningä ingä awædö. Tömengä æpæmpo becadote wænämaï iñongante edæ mönö nö cæte pänongä incæ tömengä ingante ata cæpodämaï inte angä ate ñöwo quëwenguinämaï incæcäimpa.”

⁵Ante wapiticæ ante pönente tedeyönänite Pabodo iñömö pongadämaï ingä inte pipo cæcä tæntæ ñingacæ gongapamö togodo guite gonga gonte wængantapa. ⁶Adinque tömënäni, Tincadö pæncæ pæncæ mempoquingää, ante ayæ, Tincadö iñontobæ tæi go wæænte wænguingää, ante acæte ante wantæpiyæ cöwä ayönäni, Ayæ

dæ pongadämaï i inque ingampa, ante adinque tömënäni wæætë edæ, Æ iingä wacä wængonguï inongä inte ponte a ongongampa, ante wapiticæ ante pönënanitapa.

⁷ Ayæ mäniwænë awënë Pobidio iñömö tömengä quincodë möni ömaa pöñömö eyequei intapa. Tömengä, Oncönë pö guite quëwëedäni, angä pö guite mönitö mëönaa go adoönæque quëwëñömöni tömengä waadete pönö cæcä ate waa quëwentamönipa. ⁸ Pobidio mänömaï waa cæcä quëwëñömöni, Tömengä mëmpo wepæ tönö gömä cæte daicawo gawænte möimoga a öñongampa. Ante apænedäni wædinque Pabodo tömengä weca guiddinque Wængonguï ingante apænedinque gampocä ate waa bacantapa. ⁹ Pabodo mänömaï cæcä adinque mäniwænë tömäo gode änäni ëñente wædinque në wënæ wënæ inäni inänite Pabodo weca ænte mämö ænte mämö cæyönäni tömänäni Wængonguï cæcä waa badänitapa. ¹⁰ Mäniñömö quëwëñäni mönitö imönite wæætë pönö waa apænedinque cöwë waa cædänitapa. Ayæ wogaa tæcæ gocæ cæmöni adinque quïëmë möni ænguënënö ante adinque tömënäni, Minitö ænte goqui, ante eyepæ pöni ænte mämö da wënäni ænte gotamönipa.

Odömä iñömö Pabodo pongampa

¹¹ Ayæ mönitö Mänatabæ iñömö mengäa go adocanque mämonque quëwëninque gocæte ante cædinque, Äancadënaquepo, Adecantodia iñömö quëwëñäni näni pemonte änimpodë go guitamönipa. Tömënäni wængonguïna Catodo tönö Podoco awinca bai ante badönninque tömënäni ñænä wipocado gö cædinque wipo ñænæmpo ëmöwo, Äancadënaquepo impopa, ante pemönönänimpa. Mänimpo Mänatabæ wëmonca wodöiñömö do pönninque pæmä tedä wäi wocæ adinque mönitö iñömö mänimpodë go guiddinque wogaa gotamönipa. ¹² Godinque Tidacota iñömö näni wëmonca wodöiñömö pö wäi wocënninque mönitö mëönaa go adoönæque quëwentamönipa. ¹³ Ayæ wadæ godinque Odeguio näni quëwëñömö pontamönipa. Iimö ate dipæmä gämænö woboyæ betamonca wædænque pæmä wædinque mönitö wadæ godinque waönæ ate Poteodi quëwëñäni näni wëmonca wodöiñömö æmäwo pö ti wææninque tömäwæ gotamönipa.

¹⁴ Tömæwæ godinque Poteodi näni quëwëñömö ponte ayömöni në pönënanäni näni cabo ongönäni atamönipa. Tömënäni, Adoque Wængonguï itädë mönitö tönö ee owoedäni, änäni Ao ante mönitö tömënäni näni änimpoga mäniñömö quëwentamönipa. Ayæ ate Odömä taadonque gotamönipa. ¹⁵ Odömä iñömö quëwente në pönënanäni iñömö, Pabodoidi oo pönänipa, ante do ëñënanäni inte doönæ tadinque mönitö imönite bee tencæte ante pönänitapa. Pancadäniya iñömö Apio näni godonte äiñömö ganca pönninque mönitö imönite mämö bee tënäni ate godongämæ gotamönipa. Godinque, Cæincö, ante Menconga go Adoconque, näni äñömö mäniñömö pöñömöni wadäni mämö bee tënanitapa. Mäninäni inänite adinque Pabodo iñömö, Nöwo iñömö wampo pönëmopa, änninque Wængonguï ingante waa ate pönëninque apænecantapa. ¹⁶ Ayæ odömänoidi näni nanguï quëwëñömö Odömä näni äñömö pöñömöni tontado capitäo iñömö në tee mönedinäni wadäni inänite tömengä awënë nempo pædæ godönninque Pabodo ingante tee mönedämaï ingantapa. Wæætë wacönë nänënë ænte mäodäni quëwëñongante tontado adocanque tömengä ingante wææ wänönongäimpa.

Odömā iñömō Pabodo quëwengampa

¹⁷ Māniñömō ponte ate Pabodo meōnaa go adoönæque ate oodeoidi nē ānāni inānite āñecā godongāmæ pōnāni ate tōmēnāni inānite,

—Botō tōniñamīni, ēñēedāni. Mōnō guiddēnāni inānite wēnæ wēnæ cædāmaī inte botō dodāni nāni angaiñō ante wido cædāmaī iñōmote oodeoidi incæ Eedotadēē iñömō botō imote bæi ongōninque æninque odömānoidi nempo pædæ godōnāni gotabopa. ¹⁸ Odömānoidi guiquēnē botō imote apænte āninque, Æbānō cæcantawo, ante ancaā ante adinque, Pabodo dicæ tōmengā nānō wænguinque wēnæ wēnæ cæcāa, ante adinque botō imote ñimpo cæcæte ante cædānitapa. ¹⁹ Odömānoidi botō imote ñimpo cæcæte ante cæyōnāni oodeoidi wæætē ancaā Baa ānāni ēñente wædinque botō iñömō edæ, Odömānoidi tæiyæ awēnē Tetædo incæ botō imote apænte angūēnengā ingampa, antabopa. Mānōmaī ānimo incæte botō awēnē Tetædo weca ongōninque, Botō guiddēnāni wēnæ wēnæ cædānitapa, ante wæætē piinte ānāmaī incæboimpa. ²⁰ Mānōmaī beyæ mīnitō imīnite apæncæte ante botō, Pōedāni, antabopa. Ñōwo apænebo ēñēedāni. Mōnō idægocabo iñömō, Mōnō nē ponguingā Codito pōnō cæcā beyænque watapæ bacæimpa, ante mōnō pōnēmompā. Māniñō mōnō pōnengaiñō beyænque botō daagōmē ñānoncapoimo a ongōmo aedāni.

²¹ Ante apæneyongante tōmēnāni wæætē Pabodo ingante apænedinque,

—Oodeabæ quëwēnāni bitō imite ante yewæmōninque cadota pædæ pōnōnāni dicæ æmōniyaa. Mōnitō tōniñadāni Oodeabæ quëwente pōninque bitō imitedō ante dicæ wīwa ānāniyaa. Bitō wīwa cædinō ante yewæmōninque odömōnāmaī iñōnāimpa. ²² Mānōmaī ī incæte wayōmō wayōmō tōmāmæ quëwēnāni, Māniñāni Coditoidi iñömō wēnæ wēnæ cædāni inānīpa, ante piinte tededāni do ēñēmōni īninque mōnitō, Bitō ayōmi Coditoidi æbānō cædāni ināni. Æbānō pōnēmīi, ante ēñencæte ante wæmōnīpa.

²³ Āninque tōmēnāni, Īñōnæ godongāmæ bee tēninque ēñengæimpa, āninque wadæ godānitapa. Ayæ wæætē māniñōnæ nāni āniñōnæ iinque ba ate ocæ ēmænte pōñōnāni tæiyæñāni bee tēninque Pabodo weca godongāmæ pōnānitapa. Pōnāni adinque Pabodo iñömō baānæ contadingā gāwadecæ pōni apænedinque, Wængonguī Awēnē Odeye nempo mōnō quëwengæimpa, ante apæncantapa. Ayæ, Mōitee wodi tōnō Wængonguī beyæ nē apænegaiñāni, Mōnō Codito ponte cæcæcāimpa, ante nāni angaiñō bai Itota iñömō ñōwo ponte tōmānō ante do iinque cægacāimpa. Nāwangā impa, ante botō apænebo ēñēmaimīnīpa, ante Pabodo oodeoidi inānite apæncantapa. ²⁴ Angā ēñēninque pancadāniya, Pabodo nāwangā angampa, ānānitapa. Pancadāniya guiquēnē, Wīi pōnēinente awædō, ānānitapa. ²⁵ Nāni cabo incæ mānōmaī wæætēdō wæætē apænete wadæ gocæ cæyōnānite Pabodo wæætē æmæwo apæncantapa.

—Wængonguī Tæiyæ Waēmō Ōñowoca apæneca ēñēninque Itaiya wodi doyedē mīnitō mæmæidi inānite nāwangā ante apænegacāimpa.

²⁶ “Itaiya ēñēmi, bitō oodeoidi weca godinque iimāi ante apænebi ēñencædānimpa. Mīnitō ōñōmoncaque ēñēninque ēñēnāmaī incæmīnimpa.

Awincaque adinque cōwē adāmaī incæmīnimpa, ante apænebi ēñencædānimpa.

²⁷ Īñāni edæ mīmō ōmædēnāni inte wīi ēñēinente wæwædō, āninque ædō cæte ēñenguīnāni.

Awinca wīi aīnente awædō, ānāni inte ædō cæte aquīnāni.

Edæ mīmō ēnēnāni inte bai tōmēnāni awinca wi æmonte adinque
ōnōmonca wi æmoncate ēñencædōnānimpa.

Edæ mīmō nō pōnēninque dadi ēmænte botō gāmānō pōnāni bai
botō do godō cæbo waa bacædōnānimpa.”

Ante Itaiya wodi mīnitō māmæidi beyæ āmotamīni ante bai yewæmongacāimpa.

²⁸ Īninque mīnitō oodeoidi ĩnōmīni inte ēñēnāmaī ĩmīni adinque Wængonguī nōwo
wæætē, Botō pōnō æmo beyænque quēwencæmīnimpa, ante oodeo ĩnāmaī ĩnāni
ĩnānite do apænecæ cæcampa. Tōmēnāni guiquēnē ædæmō waa ēñenguīnāni
ĩnānipa, ante apænebo ēñēmaīmīnipa, ante Pabodo apænecantapa.

²⁹ Mānōmaī apænecā ēñente wædinque oodeoidi nāni cabo nanguī pōnī wææt-
edō wæætē āninque wadæ godānitapa. ³⁰ Pabodo ĩnōmō oncō ænte quēwencæte
ante tōmēnāni nāni godonte æinta pædæ godōninque wacā oncō incæ tōmengā
oncō bai bayō mānincōnē wadepo mēnepoga quēwengantapa. Ayæ, Æcānō ēñacæ
pōinēna cōwē botō weca waa ponguīmīni, ante quēwēninque tōmengā nē pōnāni
ĩnānite apænecā ēñēnōnānimpa. ³¹ Ayæ nē wææ wānōnāni cōwē Baa ānāmaī
ĩñōnāni tōmengā guiñēnāmaī apænedinque, Wængonguī Awēnē Odeye nempo mōnō
quēwengæimpa, ante apænedinque, Mōnō Awēnē Itota Codito æbānō cægacāi, ante
edonque odōmonte apænecā ēñengadānimpa.

Odömānoidi

inānite Pabodo nānō cadota ante yewāmongainta

Waa quēwencāmīnīmpa, ante

1 Itota Codito ingante nē cædōmo inte botō Pabodobo inōmo inte iī cadota ante nē yewāēmōmo īmopa. Wængonguī botō īmote apænte æninque iīmainō ante aa pegacāīmpa. Bitō Pabodobi gote botō pōnō cædō ante watapæ apænebi ēñencædānīmpa, ante angacāīmpa.

²Mānīnō, Wængonguī æbānō pōnō cæquingā, ante watapæ apænedīnque tōmengā beyæ nē apænegaināni wēēnēnedē pōni nāni tæiyæ waēmō yewāēmōgainō ante botō mānīnō ante nē apænebo īmopa. ³Mānīnō waa pōni nānō cæquīnō ante iīnque cæcæte ante cædīnque Wængonguī tōmengā Wengā ingante da pōnongā pongacāīmpa. Tōmengā iīnōmō waocā onguīñængā nānō baquinque Awēnē Dabii wodi Pæingā inte ēñagacāīmpa. ⁴Adocā Itota iīnōmō botō Wengā īnongā ingampa, ante tōmānāni edonque acædānīmpa, ante odōmoncæte ante cædīnque Wængonguī tæi pīñængōngā inte iīmaī cægacāīmpa. Iīngā Itota Codito mōnō Awēnē iīnōmō Tæiyæ Waēmō ēwocacā inte do wæningā iīnongante Mæmpo Wængonguī wæætē nanguī angā ate nāni ōmæmongacāīmpa.

⁵Ayæ adocā tōnō godongāmæ cædīnque tōmengā ēmōwo beyæ mōnitō īmōnite Wængonguī pōnō waadete cægacāīmpa. Ayæ, Mīnitō wabæca wabæca gote apænemīni ēñēnīnque tōmāmæ quēwēnāni Itota Codito ēmōwo ante wede pōnēnīnque nē ēñente cæte quēwēnāni bacædānīmpa, ante cædīnque Wængonguī adobaī Itota ōnōmpo inte mōnitō īmōnite da godongā gotamōnīpa. ⁶Iīnque tōmāmæ quēwēnāni inānite Itota Codito, Botō gāmænō pōedāni, ante aa pedīnque mīnitō īmīnite adobaī aa pecampa. ⁷Mīnitō botō quīmīni badīnque botō ayōmō tæiyæ waēmō ēwocate quēwēmīni bacāmīnīmpa, ante Wængonguī cægacāīmpa. Iīnque mīnitō Odōmā iīnōmō quēwēnīnque Wængonguī quīmīni iīnōmīnite botō, Acāmīnīmpa, ante iīmaī ante yewāēmōmopa. Mōnō Mæmpo Wængonguī tōnō Awēnē Itota Codito waadete pōnō cæyōnate mīnitō wæætē gānē pōnente bacāmīnīmpa, ānīnque yewāēmōmopa.

Odōmā iīnōmō ēñacæ pōinēmopa, ante

⁸Mīnitō æbānō wede pōnēmīni, ante tōmāmæ quēwēnāni tededāni ēñēnānīpa. Iīnque botō iīnōmō Itota Codito ēmōwo apænedīnque Wængonguī ingante waa ate apænebopa. Wængonguī bitō adobīque pōnō cæbi ate odömānoidi wede pōnēnānīpa, ante apænebopa. ⁹Wængonguī Wengā ingantedō ante watapæ apænedīnque botō Wængonguī ingante nē cædōmo inte tōmengā nānō ānō ante ædæmō ēwocadīnque apænebo ēñēnānīpa. Botō mānōmaī cæbopa, ante nē adīngā inte Wængonguī iīnōmō edæ, Odömānoidi beyæ ante Pabodo botō īmote woyowotæ incæ itædē incæ apænecampa, ante nē ēñengā ingampa. ¹⁰Edæ, Wængonguī, bitō Ao āmi ate botō nōwo odömānoidi weca ēñacæ gobāīmpa, ante Wængonguī ingante mīnitō beyæ ante botō cōwē apænebopa. ¹¹Wængonguī Ōnōwoca beyæ apænebo ēñēnīnque mīnitō tæi pīñænte ēwocacāmīnīmpa, ante cæcæte ante botō mīnitō weca

ēñacæboimpa, ante wæbopa. ¹²Edæ mīnitō botō wede pōnēnō beyæ wampo pōnente bayōmīni botō wæætē, Mīnitō wede pōnēmīnīpa, ante adīnque adobaī wampo pōnēmō īnīnque mōnō pōnencabo godongāmæ wampo pōnēnīnque godōmenque tæī pīñænte entawengæīmpa, ante pōnēnīnque botō mīnitō īmīnite aīnente wæbopa.

¹³Botō wabæca quēwēnāni weca gote apænebo ēñēnīnque pancadāniya wede pōnēnāni badānitapa. Īnīnque, Botō mīnitō weca gote apæneyōmo wadāni pancadāniya adobaī wede pōnencādānīmpa, ante cædīnque botō æpogamē incæ poncæ cæyōmo edæ wææ cæte intapa. Īnīnque botō, Tæmpo poncæ cætabopa, ante yewæmōmo ate ēñencæmīnīmpa, ante yewæmōmopa. ¹⁴Edæ guidiegoidi incæ wadāni incæ, ocai encadāni incæ ocai ōmæcadāni incæ ædānīmē īñōnānite botō debe inte baī edæ tōmānāni īnānite odōmonte apænequēnēmō īnōmo īmopa. ¹⁵Mānōmaī beyæ mīnitō Odōmā īñōmō quēwēmīni īñōmīnite botō mīnitō īmīnite adobaī mōnō Codito ingantedō ante watapæ apænecæte ante nangui cæinente wæbopa.

Mōnō tæī pīñænte ēwocadō Codito beyænque impa, ante

¹⁶Mōnitō oodeomōni īñōmōnite tāno apænedīnque Wængonguī īñōmō mīnitō oodeoidi ināmaī īñōmīnite ayæ adobaī apænedīnque, Mīnitō wede pōnēmīni adīnque Codito waa pōnī pōnō ængā beyænque quēwencæmīnīmpa, ante tæī pīñænte cægacāīmpa. Īnīnque mānīnō Codito ingantedō ante botō īñōmō watapæ apænedīnque, Wængonguī tæī pīñænte nānō cægāinō impa, ante pōnente wædīnque edæ guīñenedāmaī inte do apænebopa. ¹⁷Mōnō wede pōnēmō īñōmonte Wængonguī mānīne ante odōmonte watapæ apænecā beyænque mōnō nō cæte quēwēmō bagamōīmpa. Mānīne beyænque godōmenque wede pōnente badīnque mōnō wede pōnēnō beyænque quēwēmōmpa. Īnīnque docā īñōmō Wængonguī beyæ yewæmōnīnque, “Nē nō cæte quēwēnongā incæ tōmengā nānō wede pōnēnō beyænque quēwencæcāīmpa,” ante nānō yewæmongāinō baī edæ do batīmpa.

Mōnō waocabo wentamō mongænte wæmōmpa, ante

¹⁸Nē wīwa cædāni guīquēnē wīwa nāni cædō beyænque wadāni edæ Wængonguī nō pōnī nānō apænegāinō ante ædō cæte ēñenguīnānīi. Īnīnque Wængonguī ingante nē wīwa cædāni nāni ēñēnāmaī īnīnō ante godō pīnīnque tōmengā ōñædē ongōnīnque wīwa nāni cædīnō beyænque do pangā wædāni edonque amōmpa. ¹⁹Wængonguī, Botō æbodō īmoo, ante tōmāmīni edonque pōnī ēñencæmīnīmpa, ante cædīnque tōmāmō īmonte odōmōnīnque tōmēnāni īnānite adobaī edonque pōnī odōmongā wægadānīmpa. ²⁰Wēēñēdē pōnī nē quēwengāināni tōnō ñōwo ganca quēwēmō adobaī, Wængonguī mōnō nē adāmaī īnongā inte æbānō quēwengāā, ante ēñencæte ante wægāimō īñōmō inte mōnō tōmengā nānō badongaincooque adīnque edæ edonque pōnī acæīmpa. Edæ, Tōmengā ñīmpo cædāmaī inte cōwē nē tæī pīñænongā ingampa, ante ayæ, Nē Wængonguī īnongā ingampa, ante wædīnque mōnō waocabo edonque aquēnēmō īmōmpa. Īñæmpa ēñēnāmaī intabopa, ante ædō cæte anguiī.

²¹Wængonguī ingante do ate baī ingāināni incæte waodāni tōmengā ingante edæ, Bitō Wængonguī ñāō ēmōnōmī īmīpa, ante edæ ānāmaī īñōnānīmpa. Wængonguī ingante waa ate pōnente apænedāmaī īñōnānīmpa. Mānōmaī ocai ōmæcadāni baī mīmō ōmædēnāni baī badīnque tōmēnāni wentamō entawēnāni bagadān-

impa. ²² Ocai encamōni imōnipa, ante ānāni incæte tōmēnāni wæætē mǎnōmaī cæd-
inque ocai ōmæcadāni bagadānimpa. ²³ Edæ Wængonguī wænāmaī nē Quēwen-
gaingā iñongante tōmēnāni wæætē godō Baa angadānimpa. Tōmengā nānō nāō
ēmōnō ante piinte cædinqe tōmēnāni wæætē waomō nē wæwocamō mōnō ēmōnō
baī badōninque, ōmā ēñadāni nāni ēmōnō baī badōninque, ocaguī ēñadāni nāni
ēmōnō baī badōninque, ocaguī ōmaadāni nāni ēmōnō baī badōninque tōmēnāni,
Mōnitō wængonguī ingampa, ante cædōnānimpa.

²⁴ Mǎnōmaī cædāni ate wædinqe Wængonguī, Mīnitō mīni cæinente wædō ante
ee abo cæcæminimpa, ante da godongā wadæ godinqe tōmēnāni baonga nāni
ñōmǎi mongænte quēwenguinque cædōnānimpa. Ininque nāna gæncaya nāna gænc-
aya nāni monguēnēnō ante Baa ante guīñēñadāmaī inte cædinqe wacā ingā wacā
ingā godō wīwa cædōnānimpa. ²⁵ Wængonguī nāwangā pōnī nānō apānegainō ante
tōmēnāni Baa āninque mā pōnēninque nāni babæ apānegainonque ante Ao ānōnān-
impa. Mǎnōmaī cædōnāni inte tōmēnāni wæætē Wængonguī nānō nē badongaincoo
weca ædæ wææninque, Mōnitō wængonguī impa, ante cædinqe nē Badongaingā
ingante edæ ēmō cæte wadæ gogadānimpa. Incæte tōmengā nē Badongaingā iñon-
gante mōnō waocabo inguipoga mōnō quēwēñedē ayæ ate miinguipo bayonte wan-
tæpiyæ mōnō quēwēñedē Wængonguī ingante, Bitō tōmēmi toquinque pōnō waa
cæbi æmōnipa, ante mōnō apānecæimpa. Mǎnōmaī impa, ante Amēē, āmopa.

²⁶ Mǎnōmaī cæyōnānite Wængonguī, Mīnitō guīñēñadāmaī mīni toinente wæ-
donque gobæwedāni, ante da godongā gogadānimpa. Ininque onquiyænāni incæ,
Nē onquiyæmo inōmo inte botō onguīñængā tōnō monguēnēmo imopa, ante ānā-
maī ināni inte godō wacā onquiyængā tōnō towente mōwēnōnānimpa. ²⁷ Ayæ
onguīñænāni incæ adobaī cædinqe, Botō onguīñæmo inōmo inte onquiyængā tōnō
monguēnēmo imopa, ānāmaī ināni inte godō wacā onguīñængā tōnō mōinente
gonga bæco baī toinente wædāni bagadānimpa. Ininque cōwē nāni waa quēwen-
guēnēnō ante Baa āninque nāni onguīñæncabo inōnāni inte wīwa cædōnānimpa.
Mǎnōmaī cæyōnānite Wængonguī eyepæ pōnī godō pangā wædinqe tōmēnāni
wīwa nāni cædō beyænque nāmā baonga caate wæwengadānimpa.

²⁸ Wængonguī ingante mōnō pōnente ēñengæimpa, ante tōmēnāni, Ōnonquedō
ante impa, ante tedeyōnānite Wængonguī wæætē, Ocaidē wentamō encadōmīni
inte edæ waomīni mīni wīī cæquēnēnō incæ ee abo cæbæwedāni, ante da godongā
gogadānimpa.

²⁹ Tōmēnāni iñōmō nō cæquīnāmaī ināni inte do wīwa cædānique badinqe iīmaī
cædānipa. Wacā ingā godō towēninque tōmēnāni wadāni inānite nē wēnæ wēnæ
cædānique inānipa. Mǎincoo ante æinente wæwēnāni inte tōmēnāni, Wacā gomonga
ængā ingante godō piinte adānipa. Ayæ edæ, Mōnō godō wænongæimpa, ante cæd-
inque do cædānipa. Guēadō guēa piinte cædānipa. Wacā oda cæcæcæimpa, ante
ancaa cædinqe tōmēnāni godō babæ cædānipa. Ayæ nē wīwa pōnēwēnāni inte
tōmēnāni, Wadāni wæcædānimpa, ante godō piinte cædānipa. Godō wæntaa godō
wæntaa tedewēnāni inānipa. ³⁰ Ayæ wadāni inānite piininque iīnāni iñōmō godō
babæ ante tedewēnāni inānipa. Wængonguī ingante piinte cædāni inānipa. Ayæ,
Tōmēmoque waēmō imopa, ante nāmā ængō cæte baī cædinqe wadāni inānite
wææntodonte baī āninque, Ōnonquedō cæcantedō abii, ante godō piinte todāni
inānipa. Edæ, Æbānō godōmenque wēnæ wēnæ cæte toquīmoo, ante edæ pōnēē
cōninque edæ nanguī cædānipa. Mæmpocā tōnō badā, Cædāni, āñōnate tōmēnāni

ēñēnāmaī cædānīpa. ³¹ Mīmō ōmædēnāni inte tōmēnāni ocai ōmæcadāni bagadānīpa. Cæcæboīmpa, ānīnque edæ iīnque cædāmaī iñōnānīmpa. Wacā caate wæcā adīnque godō waadedāmaī iñōnāni inte tōmēnāni edæ godōmenque pīnāni inte cædōnānīpa.

³² Mānōmaī cædāni iñōmō nāni wængūnque cædānīpa, ante Wængonguī nō pōnī nānō angāinō ante tōmēnāni ōnōmoncaque nē ēñēnāni inte tōmēnāni nāni wēnæ wēnæ cæinēnonque ante cædānīpa. Ayæ tōmēnāni wīwa nāni cædō bai wadāni adobaī cædāni adīnque tōmēnāni, Waa cæmīnīpa, ānīnque nē cædāni iñānite waa adānīpa.

Nōingā ante Wængonguī apænte angampa, ante

2 Tōmēnāni mānōmaī cædānīpa. Incæte bitō adobaī wīwa cædōmi inte tōmēmī pante wæquinque tōmēnāni iñānite apænte āmīpa. Iīnque bitō wacā ingante, Bitō pante wæquinque wīwa cæbīpa, ante apænte āmī inte bitō iñāmpa adobaī wīwa cædōmi inte edæ æbānō cæte nāmā ante wææ anguīmīi. ² Wīwa cædāni iñānite apænte ānīnque Wængonguī cōwē nōingā ante apænte angampa, ante edæ do ēñēmōmpa. ³ Iīnque waobi ōnōmīque iñōmī inte bitō iñāmpa tōmēnāni iñānite apænte āmī incæte tōmēnāni nāni cædō bai adobaī cædōmi inte edæ, Wængonguī botō imote pānāmaī inte ata cæpocæcāīmpa, ante pōnēmītawo. ⁴ Bitō wīwa cæbī inte Ca ca wæquēnēmī iñōmīte Wængonguī wæætē ee pānāmaī inte nanguī waadete pōnō cæyongante bitō wæætē edæ pīīnīnque Baa āmītawo. Iñāmpa tōmēngā, Bitō, Æmæwo wēnæ wēnæ cætabopa, ante wædīnque botō gāmænō poncæbīīmpa, ante Wængonguī pōnō waadete cæcampa, ante pōnēmīyaa.

⁵ Incæte bitō mīmō ōmædēmī inte anca Baa ānīnque edæ wēnæ wēnæ bitō cædō ante nīmpo cædāmaī iñōmīte Wængonguī nānō ænguī baquīōnæ iīnque bayonte tōmēngā ænguī pōnī badīnque godōmenque pangā wæcæbīīmpa. Tōmēngā æbānō nō apænte angāā, ante mānīñedē ate edæ edonque acæīmpa. ⁶ Edæ, Tōmāmō mōnō cægāi ganca ante Wængonguī eyepæ pōnī pædæ pōnongā æncæmōīmpa, ante dodāni nāni yewæmōngāinō bai edæ iīnque bacæīmpa.

⁷ Iīnque, Mōnō nāō bai entawēngæīmpa, ante cædīnque ayæ, Wængonguī mōnō imonte waa adīnque pōnō cæcā ate mōnō wæwocadāmaī ewocacæīmpa, ante cædīnque mōnō wæntædāmaī inte ee waa cæte quēwēmō iīnque Wængonguī pōnō cæcā ate mōnō cōwē wænāmaī quēwēmaīmōmpa. ⁸ Wæætē, Wængonguī nāwangā nānō apænedō ante Baa ānīnque, Tōmēmō beyænque quēwēncæboīmpa, ante nē ānāni iñānite ayæ wadāni wīwa nāni cæquīnonque ante nē tee empote godāni iñānite Wængonguī ænguī badīnque godō pīīnte cæcæcāīmpa. ⁹ Edæ mōnō wao-cabo wēnæ wēnæ cæmō adīnque Wængonguī oodeomōni iñōmōnīte tāno pānīnque oodeomīni iñāmaī imīni imīnīte adobaī pāñongā nē wēnæ wēnæ cæmō tōmāmō iñōmō edæ caate wæwēncæmōīmpa. ¹⁰ Wæætē waa cæmō adīnque Wængonguī oodeomōni imōnīte tāno pōnō waadete cædīnque oodeomīni iñāmaī imīni imīnīte adobaī pōnō waadete cæyongā nē waa cæmō wæætē gānē entawēnīnque nāō apāite bai entawēñōmonte edæ Wængonguī tōmāmō imonte waa acæcāīmpa.

¹¹ Edæ mōnītō oodeomōni imōnī incæ mīnītō oodeomīni iñāmaī imīni incæ Wængonguī tōmāmō imonte adoyōmō pōnī adīnque wadō wadō ate pōnēnte cædāmaī ingampa. ¹² Mōītee wodi, Iīmaī cædāni, ante nānō wææ angāinō ante ōmæmoncadāni inte wīwa cædāni iīnque tōmēngā nānō wææ angāinō dæ ante bai

mānīnāni wāncādānīmpa. Wæætē Mōitee wodi nānō wææ angainō ante do ēñente ēmoncadīnāni incæte wīwa cādāni adīnque Wængonguī mānīne ante ēñēnāmaī cādāni beyænque apænte ānīnque pangā wæcādānīmpa. ¹³ Edæ Mōitee wodi nānō wææ angainō ante ōnōmoncaque ēñēnāni inte tōmēnāni nāni ōnōmoncaque ēñēnō beyænque Wængonguī ayongā dicæ nō cādāni badāniyaa.

Wæætē edæ mānīne ante ēñente cādāni inānite guiquēnē Wængonguī pōnō angā ate tōmēnāni īñōmō nō cādāni bacādānīmpa. ¹⁴ Edæ Mōitee wodi nānō wææ angainō ante ōmæmoncadāni inte oodeoidi ināmaī ināni incæ pancadāniya tōmēnāni dodāni nāni wææ angainonque ante Ao ante cādīnque Wængonguī nānō wææ angainō baī edæ do cādānīpa. Mānōmaī ēñente baī cādīnque tōmēnāni mīmō entawēnāni inte mānīne ante ōmæmoncadāni ināni incæte nāmā nāni wææ ānonque ēñente cādānīpa. ¹⁵ Edæ, Tōmēnāni dodāni nāni wææ angainō ēñēnīnque waa cādāni inte tōmēnāni Wængonguī nānō wææ angainō baī do entawēnānīpa, ante edonque acāīmpa. Mīmō entawēnāni inte tōmēnāni nāni caboque godongāmæ pōnēnīnque wēnæ wēnæ nāni cādōnō ante nāēmæ apænte wææ ānānīpa. Ayæ wæætē waa cādāni ate tōmēnāni nāēmæ apænte nīmpo cādānīpa.

¹⁶ Codito ingantedō ante watapæ ēñengaīmo inte botō īīmaī ante apænebopa. Wængonguī angā ēñente cādīnque Itota Codito wæætē waomō mōnō awēmō entawēnō ante edonque pōnī adīnque apænte ancæcāīmpa. Tōmengā nānō apænte anguīōnæ īīnque bayedē edæ mānīnō ante botō yewæmonte apænedō baī edæ īīnque bacāīmpa.

Mōitee nānō wææ angainta adīnque oodeoidi wīī ēñēnāni

¹⁷ Bitō īñōmō edæ, Oodeobo īnōmo īmopa, ante āmīpa. Ayæ, Mōitee wodi nānō wææ angainta nē ēñēmo inte botō Wængonguī ayongante waa quēwēmo īmopa, ante edæ nāmā ængō cādīnque āmīpa. ¹⁸ Wængonguī æbānō angāā, ante do ēñēmīpa. Ayæ tōmengā nānō wææ angainō ante do ēñēmi inte bitō, Quīnō waa ī, ante do ēñēnīnque Ao ante āmīpa. ¹⁹ Bitō, Wadāni babetamō baī ēwocayōnānite botō tōō æmænte māobo godānīpa. Wēmō īñōmō quēwente baī adāmaī īñōnānite botō īñōmō, Acāmīnīmpa, ante tīca ēnente baī odōmonte apænebopa, ante edæ, Nāwangā āmopa, ante bitō apænebitawo. ²⁰ Ayæ adobaī, Mōnō Mōitee wodi nānō wææ angainō ante ēñente beyænque mōnō ēñenguēnēnō ante entawēnīnque mōnō nō cæquēnēnō ante adobaī tōmānō ante entawengæīmpa, ante bitō pōnēmitawo. Ayæ mānōmaīnō ante bitō pōnēnō beyæ bitō, Nē oda cādāni inānite botō nē tōīngā odōmōmo īmopa, ante pōnēmitawo. Wēñænāni baī wædænque ēñēnāni īñōnānite botō nē odōmonte apænebo īmopa, ante pōnēmitawo.

²¹ Īnāmpa mānōmaī īnōmi inte bitō edæ dicæ nāmā odōmonte apænete ēñēmīta-wogaa. Wadāni inānite odōmonte apænedīnque, Awēmō ænāmaī īedāni, ante odōmonte apænedōmi inte tōmēmi awēmō æmitawo. ²² Bitō wadāni inānite odōmonte apænedīnque, Nānōogængā īnāmaī īñongante godō guēa mōnāmaī īe, ante nē wææ āmi inte bitō adobaī wacā tōnō guēa mōmitawoo. Ayæ, Wængonguī īngampa, ante nāni badōīnca ante nē pīīmi inte bitō edæ tōmēnāni nāni apæneincōnē go guīdīnque edæ ō æmitawoo. ²³ Īnāmpa bitō, Mōitee wodi nānō wææ angainō ante botō ēñente cæbo īmopa, ante tēdēdīnque nāmā ængō cādōmi inte edæ mānīne ante ēñēnāmaī cæbi adīnque wadāni wæætē Wængonguī īngante waa adāmaī īnānīpa tōō. ²⁴ Edæ, “Mīnitō cādīnō beyæ oodeoidi īnāmaī ināni incæ Wængonguī ēmōwo

ante godö babæ ante wënæ wënæ änewënänipa,” ante tömengä beyæ dodäni nani yewæmongainö bai do batimpa.

²⁵ Edæ Wængongui nänö wææ angainö ante ëñente cæbi inique bitö, Näwä oodeobo imopa, ante në ëö togæimi badinque waa imaimpa. Wæætë edæ ëñenamai cæbi inique oodeo inamai ingä bagäacä ingä bai bitö inömö edæ do babaïmipa.

²⁶ Oodeoidi inamai inäni guiquënë bagäadäni inäni incæte tömënäni Wængongui nänö wææ angainö ante ëñente cädäni inique Wængongui ayongä tömënäni do ëö togæinäni bai inönäni inte oodeoidi bai inänipa. ²⁷ Bitö inömö Möitee wodi nänö wææ yewæmongainta mänimi inte në ëö togæimi imitawo. Bitö mänömai imi incæte ëñenamai cæbi inömi wacä wæætë bagäacä inongä inte ëñente cæcä inique tömengä ëñente nänö cädö beyænque Wængongui wæætë bitö imite apænte äninque pancæcäimpa.

²⁸ Inämpa oodeo ënagaingä inte baö beyænque oodeocä ingä incæte tömengä wii mänömai ingä beyænque näwä oodeocä ingampa. Adobai në ëö togæingä inömö baonque nänö ëö togæinö beyænque tömengä Wængongui ayongä ædämö ëö togæingä bai wii ingampa. ²⁹ Wængongui Önöwoca ingante në ewocacä guiquënë tömengä inömö edæ näwä oodeo bai badinque Wængongui wëñængä ingampa. Edæ Möitee wodi nänö wææ yewæmongainö ante ëñente ëö togæinque waocä tömengä wentamö nänö entawënö dicæ wido cæquingä. Wængongui Önöwoca guiquënë pönö wido cæcä beyænque waocä wæætë waëmö entawengampa. Mänömai entawengä ingante wadäni waa adämai inäni incæte Wængongui wæætë, Bitö waa entawëmi abopa, äninque tömengä ingante waa apænecampa.

3 Inique oodeocä inömö edæ, Oodeobo imopa, ante toquënegä ingantawo. Ayæ adobai, Botö ëö togæimo imopa, ante toquënegä ingantawo. ² Ao ämopa. Në oodeoidi inönäni inte tömënäni cöwë nangui toquënenäni inänipa. Edæ Wængongui apænecä ëñengainäni inte edæ oodeoidi tömengä nänö apænedö ante në mangainäni inte në toquënenäni inänipa. ³ Mänömai i incæte pancadäniya inömö edæ wede pönënämai inänipa. Inique mönö æbänö anguii. Tömënäni nani pönënämai inö beyænque Wængongui tömënäni inänite dicæ nimpo cædinque ædämö aadämai ingantawogaa. ⁴ Ædö cæte mänömai inguii. Mönö waocabo tömämö në babæ apænemö inömonte Wængongui inömö nö pönö cæcä ingainö angüënë. Edæ tömengä beyæ iimai ante yewæmongatimpa.

“Wængongui bitö æbänö apænebii, ante apænte ancæ cädäni incæte tömënäni,

Wængongui nö pönö ante apænecampa, ante edonque acädänimpa.

Bitö në tæi emömi inte edæ bitö imite në apænte ancæ cädäni inänite näëmæ edæ wæantodonte bai cædinque edæ gänä cæcæbiimpa.”

Ante nani yewæmongainö bai edæ bacæimpa.

⁵ Waodäni mä pönëninque iimai ante tedewänäni. Mönitö wiwa cæyömönite Wængongui nö cæcä adinque wadäni, Wængonguinque në nö cædongä ingampa, ante godömenque edonque acädänimpa. Inique wiwa cæyömönite Wængongui quinante piinte pangä, ante tedewänäni. Mänömai tedewänäni adinque mönö wæætë æbänö angüënëmö imö. Inämpa waodäni nani änewënö bai dicæ angüënëmö imongaa. ⁶ Ædö cæte mänömai änewenguii. Mäninö nani tedewënö näwangä i bai inguipoga quëwëmö imonte Wængongui apænte änämai ingüengä.

⁷ Wadäni guiquënë iimai ante tedewänäni. Wængongui cöwë näwangä ante apæneyongante botö babæ apænebo adinque wadäni, Wængonguinque näwangä

ante apænecampa, ante tōmengā ingante godōmenque waa acädānīmpa. Īnīnque babæ botō apænedō beyænque Wængonguī godōmenque nāō apāite bai ēmongā ingampa. Īnīnque, Bitō nē wēnæ wēnæ cæbi īmīpa, ante Wængonguī quīnante botō īmote apænte angāā, ante tedewēnānīpa. ⁸Tōmēnāni, Wængonguī ingante godōmenque waa acädānīmpa, ante mōnō godōmenque wēnæ wēnæ cæcæīmpa, ante tedewēnānīpa. Tōmēnāni nāni tedewēnō nāwangā ī bai mōnitō adobai ante ancädōmōnīmpa. Edæ, Tōmēnāni nāni tedewēnō bai edæ Pabodoidi adobai ante apænedānīpa, ante pancadāniya pōnō wēnæ wēnæ ante babæ apænedānīpa. Mānōmaī ante nē apænewēnāni inānite pānīnque Wængonguī nō cæte pangampa.

Tōmāmō mōnō pante wæquinque wentamō mongæmōmpa

⁹Īnīnque æbānō ante anguīī. Mīnitō oodeoidi ināmai onōmīnīque īnōmīnīte mōnitō mōni oodeocabo dicæ godōmenque waa pōni imōniyaa. Īnāmpa mōnitō oodeomōni incæ mīnitō oodeomīni ināmai imīni incæ tōmāmō nē wēnæ wēnæ cædōmō imōmpa, ante do odōmonte yewæmōmōni abaimīnīpa. ¹⁰Edæ īīmai ante Wængonguī beyæ ante āmotamīni ante bai yewæmongatīmpa.

“Nē nō cædongā īnōmō edæ dæ angampa.

Adocanque incæ edæ dæ angampa.

¹¹Nē ēñente pōnengā īnōmō edæ dæ angampa.

Wængonguī ingante ante nē diqui diqui mīnongā īnōmō edæ dæ angampa.

¹²Tōmānāni edæ oda cæte wapiticæ godīnque,

nāni waa cædāmai incaboque badānitapa.

Nē waa cædongā īnōmō edæ dæ angampa.

Adocanque incæ edæ dæ angampa.

¹³Woadāni inānite wænoncæte ante ææ ænete bai ēmencadinque, tōmānāni babæ ante enguēnēwate tedewēnānīpa.

Edæ tæntæ tōmēmæ ēnete bai, Wænongæīmpa, ante ēnedānīpa.

¹⁴Tōmēnāni piīnte nāni tedewēnō beyænque moncapæ tī nā bai enguēnēwadānīpa.

¹⁵Tōmēnāni wænonguīwaque pogodo goquīwaque ēwadānīpa.

¹⁶Tōmēnāni nē godō wænōnāni inte māincoo wido cæte wodii godāni ate edæ mīi quēwēnāni ponte adīnque caate bai wæwēnānīpa.

¹⁷Nē piīnte cædōnāni inte tōmēnāni Wængonguī taadō tōmengā gānē entawente nānō godōnō ante adāmai inte cædānīpa.

¹⁸Tōmēnāni, Wængonguī ingante mōnō guīñente ēñengæīmpa, ante pōnēnāmai inānīpa.”

Ante dodāni nāni yewæmongainō bai īmpa.

¹⁹Æcānō Mōītee wodi nānō wææ angainō ante nē ēñente quēwenguēnēna inaa tōmengā beyænque ante wææ yewæmongatīmpa. Mānōmai ī beyæ, Botō eyepæ cæbo īmōpa, ante mōnō ædō cæte anguīī. Edæ guīñēnete mōnō pæ wēenecæīmpa. Ayæ inguīpoga tōmāo quēwēmō tōmāmō Wængonguī nē apænte angā weca ongōnīnque edæ, Æbānō cætaboo, ante Wængonguī ingante mōnō edonque apænequēnēmō īmōmpa. Mānōmainō ante edæ do ēñēmōmpa. ²⁰Mānōmai beyæ Wængonguī, Mōītee wodi nānō wææ angainō ædæmō ēñente cæbi beyæ bitō botō ayōmo nē nō cæbi babīpa, ante adocanque ingante edæ ānāmai incæcæīmpa. Wæætē mānīne nānō wææ angainō ēñente beyæ mōnō, Nē wēnæ wēnæ cæmō īmōmpa, ante edonque amōmpa.

Mönö wede pönēnō beyænque nō cæte quēwēmompa, ante

²¹ Wī Mōitee wodi nānō wææ angainō ante ēñēmīni beyæ wæætē edæ Wængonguī incæ pönō badongā beyænque mönō tōmengā ayongā nō cæmō bamompa, ante nōwo pōnī odōmongatimpa. Dodāni Mōitee wodi tōnō Wængonguī beyæ nē apænegaināni iñōmō, Īncayæ ate mănōmai bacæimpa, ante do yewæmongadānimpā. ²² Wængonguī pönō badongā ate mönō nē wede pönēmō iñōmō Itota Codito ingante mönō wede pönēnō beyænque edæ tōmāmō tōmengā ayongā nō cæmō bamompa. Edæ mönō adoyōmō ingaimō inte önōmonque imompa. ²³ Īnrique mönō tōmāmō wænæ wænæ cæmō inte Wængonguī nānō nāō bai quēwēmō guicæte ante cædinque wī eyepæ cæmō inte wī guimompa. ²⁴ Incæte Itota Codito ængā beyænque abæ tawænte gote bai quēwēmō iñōmonte Wængonguī önonque änāmai inte waadete pönō badongā ate mönō tōmengā ayongā nō cæmō bamompa. ²⁵ Wængonguī iñōmō Itota Codito ingante da pönōninque, Tōmengā mīnitō wænæ wænæ cædō ante teēmente wængā beyænque botō wæætē piyænē cædinque mīnitō imīnite pānāmai incæboimpa, ante cægacäimpa. Īnrique tōmengā, Mānōmai pönō cæbo ate mīnitō, Itota wepæ mönō beyæ pe tæ pe tæ wæænimpa, ante wede pönēnque wede mīni pönēnō beyænque quēwencæmīnimpā, ante pönō cægacäimpa.

Mānōmai cædinque Wængonguī wēñēñedē mönō waocabo mönō wænæ wænæ cægāinō ante ee adinque nē pānāmai ingaingā incæte edæ, Botō cōwē nōingā ante apænte änōmo imopa, ante ēñencæmīnimpā, ante odōmongacäimpa. ²⁶ Īnrique, Wængonguī nē nō cæcā inongā ingampa, ante mönō acæimpa. Ayæ adobaī, Itota ingante nē pönēmō iñōmonte Wængonguī nē panguēnengā ingā incæ mönō imonte ata cæpodinque pönō badongā ate mönō wæætē tōmengā ayongā edæ nē nō cæmō bamompa, ante mönō acæimpa. Īnrique tōmengā mănōmai cædinque tōmengā nō nānō cædō ante odōmoncæte ante nōwo cægacäimpa.

²⁷ Īnrique mönō waocabo iñōmō nāmā ængō cæte bai cædinque mönō, Nāmā cædinque nō cæmō bamompa, ante ædō cæte anguīmō. Īñæmpa mănōmai ānrique cædāmai ingæimpa. Quīnante nāmā wī ængō cæquīī, ante wæmīnitawo. Mōitee wodi nānō wææ angainō ædæmō ēñente cæmō inte bai mönō, Tōmēmō cætamompa, ancædōmōimpa. Incæte ædæmō ēñente dicæ cæmongaa. Wæætē tōmengā ingante wede mönō pönēnō beyænque tōmengā ayongā nō cædōmō bamompa, ante adinque mönō, Tōmēmō cætamompa, ante ædō cæte anguīī. ²⁸ Īñæmpa waocā Wængonguī nānō wææ angainō ante ēñente cæcā incæ wī tōmengā nānō ēñente cædō beyæ nē nō cæcā bacampa. Wæætē wede nānō pönēnō beyænque Wængonguī ayongā edæ nē nō cæcā bacampa, ante do edæ apænebo ēñēmaimīnīpa.

²⁹ Oodeomōni iñōmōnite Wængonguī mōnitō Wængonguī inongā ingampa. Oodeomīni ināmai imīni guiquēñē, Wī mōnitō Wængonguī ingampa, ante pönēmīnitawo. Īñæmpa oodeomīni ināmai iñōmīnite adocā Wængonguī mīnitō Wængonguī ingampa. ³⁰ Edæ adocanque Wængonguī inongā ingampa. Īnrique nē ēö togæimōni imōni mōni wede pönēnō beyænque tōmengā pönō badongā ate tōmengā ayongā edæ nō cæmōni bamōnīpa. Adobaī bagāamīni mīni wede pönēnō beyænque Wængonguī adocanque inongā inte pönō badongā ate mīnitō adobaī tōmengā ayongā nō cæmīni bamīnīpa. ³¹ Mönō pönēnō beyænque impā, ante apænedinque mōnitō Wængonguī nānō wææ angainō ante dicæ wēā godonte bai cæmōniyaa. Wīi

mānōmaī cāmōnipa. Wæætē mānōmainō ante apænedinque tōmengā nānō wææ angainō ante Ao āninque mōnitō, Ēñēedāni, ante odōmonte apænemōnipa.

Abadāō wodi æbānō cægacāi, ante pōnengæimpa

4 Māninō ante mōnitō mæmæ Abadāō wodi iñōmō æbānō ante ēñengacāi, ante mōnō nōwo pōnente apænecæimpa. ² Abadāō wodi nē ēñente cæcā ingaingā incæte tōmengā nānō ēñente cædō beyænque dicæ nō pōni entawengā bacantawogaa. Mānōmaī cædinque nō cæcā bagacāimpa, ante nāwangā ī bai tōmengā waodāni ēñēñōnānite, Waa cæbo īmopa, ante do ancægacāimpa. Incæte tōmengā Wængonguī ēñēñongante māninō ante cōwē ānāmaī inguēnengā ingacāimpa. ³ Wængonguī æbānō ante apænecā ēñente yewæmongadāni, ante aminīi. Edæ īmaī ante apænecā ēñente yewæmongadānimpa. “Wængonguī nōingā ante apænecampa, ante Abadāō wede pōnengacāimpa. Īnīnque tōmengā wede nānō pōnēnō beyænque Wængonguī wæætē edæ, Botō ayōmo Abadāō nē nō entawengā ingā abopa, angacāimpa,” ante yewæmongadānimpa.

⁴ Edæ wadāni beyæ waocā nanguī cæcā ate tōmēnāni debe badināni inte edæ, Ōnonque pōnōmōni æe, ante ædō cæte anguinānīi. Īñæmpa wīi ōnonque godonte impa. Wæætē tōmengā nānō nanguī cædinō beyænque paga ante nē godonguēnēnāni inte awēnēidi, Bitō nanguī cæbitapa, ante godōnāni ængampa. ⁵ Wængonguī guiquēnē ōnonque pōnō cæcā æmōimpa. Waocā wīwa cæcā incæ wede pōnengā adinque Wængonguī pōnō badongā ate tōmengā Wængonguī ayongante wæætē nō cæcā bacampa. Īnīnque waocā waa cædāmaī incæ edæ wede pōnengā adinque Wængonguī wæætē tōmengā ingante pōnō badōnīnque, Nō pōni bitō entawengūnque bitō wede pōnēmi abopa, angampa. ⁶ Waocā waa cædāmaī iñongante Wængonguī pōnō badongā ate tōmengā Wængonguī ayongā nō pōni entawengā iñinque tōmengā watapæ quēwencæcāimpa, ante apænedinque Dabii wodi adobaī āmotamīni ante bai yewæmongacāimpa.

⁷ Adocā yewæmōninque,

“Waodāni ēñēnāmaī cædāni iñānite Wængonguī pōnō nīmpo cæcā ate tōmēnāni wæætē watapæ quēwencædānimpa.

Edæ tōmēnāni ēñēnāmaī nāni cædō ante ō ænte māo tee moncate bai cæcā adinque nanguī tocædānimpa.

⁸ Æcānō ingante Wængonguī, Bitō pante wæquinque wēnæ wēnæ cæbipa, ante cōwē pīinte ānāmaī ingā iñinque māningā waocā wæætē nanguī tocæcāimpa.”

⁹ Ante Awēnē Dabii wodi, Eō togæñinānīnque tocædānimpa, ante dicæ yewæmongantawogaa. Bagāadāni adobaī tocædānimpa, ante ancæte ante yewæmongacāimpa. Abadāō wodi Wængonguī ingante wede nānō pōnēnō beyænque Wængonguī, Botō ayōmo Abadāō nē nō entawengā ingā abopa, angacāimpa. Mānōmainō ante edæ botō do yewæmōmo abaīmīnīpa. ¹⁰ Abadāō wodi æbānō engæñongante Wængonguī mānōmaī angacāi. Dicæ eō togæningā iñongante angantawogaa. Wæætē bagāacā iñongante angacāimpa. ¹¹ Īnīnque, Abadāō bagāacā inte wede pōnengā beyænque botō pōnō badōmo ate nō cæcā bacampa, ante ēñencædānimpa, ante cædinque Wængonguī angā eō togænte bagacāimpa.

Mānōmaī cæcā beyæ mīnitō bagāamīni inte wede pōnēmīni iñōmīni Abadāō wodi mīnitō wæmængā bai bagacāimpa. Abadāō wodi pæīmīni bai wede pōnēmīni adinque Wængonguī adobaī, Nō entawēmīni bamīni acæboimpa, ante pōnō badon-

gacäimpa. ¹²Mönitö wämæ Abadäo wodi doyedë bagäacä ingäñedë incæ wede pönengä ingacäimpa. Möni idægocabo iñömö nê ëö togëimöni inte edæ tömengä wede pönente nänö cægongainö adodö tee empote gomönipa. Ìninqe mäninönö möni wede pönente godönö gomöni beyænque möni ëö togæncabo wämængä adocä Abadäo wodi ingacäimpa.

Mönö wede pönënö beyænque Wængonguï nänö angainö ante cæcampa, ante

¹³Wængonguï, Inguipoga incæ bitö nê ænguïmi incæbiimpa, äninque Abadäo wodi tönö tömengä nänömoidi inänite pönö angä ængadänimpa. Mänömainö äninque Wængonguï dicæ, Botö wææ angainö ante ëñente cædänique æncædänimpa, ante angantawogaa. Wæætë edæ wede pönente tömengä ayongä nö entawëñäni badäni beyænque Wængonguï, Inguipoga incæ pönömo æncæminimpa, ante apænegacäimpa. ¹⁴Wængonguï dicæ, Botö wææ angainö ëñente nê cædänique nê ænguïñäni inänipa, ante angantawogaa. Edæ mänömainö angä bai mönö wede pönënö ante önonque pöncædömöimpa. Tömengä nänö angainö incæ wo ewente bai bacædönimpa. ¹⁵Edæ mäninö tömengä nänö wææ angainö ante ëñëñämaï cædäni beyænque Wængonguï ænguï badinque pangampa. Wæætë wææ änämaï inte bai Wængonguï, Botö wææ angainö ante ëñëñämaï cæbipa, ante ædö cæte anguingä. Edæ dæ ancædönimpa.

¹⁶Mänömaï beyæ Wængonguï, Botö waadete pönö cædö beyænque æminipa, ante edonque acäimpa, ante cædinque Abadäo wodi wede nänö pönënö beyænque ante, Pönömo æncæminimpa, angacäimpa. Mönitö Möitee wodi nänö wææ angainö ante nê ëñëmöni iñömönite wïi adomönique imönite angacäimpa. Wæætë Abadäo wodi nänö wede pönengäi bai adobai wede pönëmö iñömonte mönö tömämö imonte Wængonguï, Cöwë pönömo æncæminimpa, angacäimpa. Edæ mönö wede pöncabo iñömonte Abadäo wodi tömämö wämængä bai ingacäimpa. ¹⁷Wængonguï edæ do wængainäni inänite pönö cæcä ate tömënäni iñömö ñäni ömæmonte edæ müñäni quëwëñänipa. Dæ angaincoo incæ tömengä do badongä ate edæ a ongoncoopa. Wængonguï mänömaï nê badongä iñongante Abadäo wodi tömengä ingante nê wede pönengä ingacäimpa. Ìninqe Wængonguï, “Abadäo ëñëmi. Botö pönö badömo ate bitö pæinäni yebæninqe wacabodäni nänö cabo wacabodäni nänö cabo nanguï inäni iñönänite edæ bitö adobique tömënäni wämæmi incæbiimpa.” Ante Wængonguï beyæ ante yewæmongatimpa. Ìninqe Wængonguï ayongante mönö wede pönëmö iñömonte Abadäo wodi mönö wämængä bagacäimpa.

¹⁸Tömengä ingante, “Bitö pæinäni edæ mänimpodäni bacædänimpa,” ante Wængonguï do angacäimpa. Mänömainö angä ëñëninque, Ædö cæte baquïi, ante wædongä incæ Abadäo wodi, Wængonguï cöwë cæcä beyæ watapæ bacäimpa, ante wede pönengä ingacäimpa. Ìninqe tömengä wede nänö pönënö beyænque “wacabodäni nänö cabo wacabodäni nänö cabo nanguï inäni bayönänite tömënäni wämængä” Abadäo bagacäimpa.

¹⁹Tömengä, Botö picængadebo wodo tiëë wadepo quëwengäimo inte edæ botö baö wænte bai ëñäbo inte edæ ædö cæte wëñæ tapæiquimoo, ante ëñengacäimpa. Ayæ, Tada adobai wëñæ cöwë mänämaï ingaingä inte picængadecä badinque ædö cæte wëñæ manguingä, ante pönengacäimpa. Incæte mäninö nänö wædö beyænque guïñëñädämaï inte Abadäo wodi Wængonguï nänö äninö ante godömenque pönengacäimpa. ²⁰Tömengä, Wængonguï wabänö cæbaingä, ante wædä-

maī inte wæætē Wængonguī nānō, Cōwē pōnō cæcæboimpa, āninō ante wede pōnengacāimpa. Ayæ, Wængonguī bitō nāō entawēmi inte tæi ēmonte waa cæcæbiimpa, ante godōmenque tæi piñānte entawēninque Abadāō wodi wede pōnengacāimpa. ²¹Edæ, Wængonguī nē tæi piñānongā inte, Cōwē cæcæboimpa, ante nē angaingā inte edæ cōwē cæcæcāimpa, ante Abadāō do ēñēninque edæ wede pōnengacāimpa. ²²Tōmengā mānōmaī wede pōnengā beyænque Wængonguī, Abadāō bitō nō entawēmi imi abopa, angacāimpa.

²³Mānīne, Bitō nō cæbi imi abopa, ante nānō angaine iñōmō wīi tōmengā beyænque yewæmongatimpa. ²⁴Wæætē mōnō beyæ adobaī yewæmongatimpa. Edæ, Mōnō Awēnē Itota ingante Wængonguī angā ñāni ōmæmongacāimpa, ante nē angaingā ingante wede pōnēmō iñōmonte Wængonguī, Botō ayōmo mīnitō nō cæmīni imīni abopa, ante badongampa. ²⁵Wēnæ wēnæ mōnō cædō beyænque mōnō Awēnē Itota ingante Wængonguī pædæ godongā wængacāimpa. Ayæ mōnō beyæ ante cædinque tōmengā mōnō Awēnē Itota ingante, Bitō nē nō cædōmi inte ñāni ōmæmōmi beyænque tōmēnāni botō ayōmo nō entawēnāni bacædānimpa, ante cædinque angā ñāni ōmæmongacāimpa.

Wængonguī badongā ate mōnō nō cæmō bamompa

5 Mōnō wede pōnēnō beyænque Wængonguī pōnō badongā ate mōnō tōmengā ayongante edæ nō cæmō bamompa. Īninque mōnō Awēnē Itota Codito nānō cægainō beyænque Wængonguī piyænē cæcā ate mōnō tōmengā tōnō godongāmæ gānē entawente quēwēmompa. ²Mōnō wede pōnēnō beyæ adocā Codito mōnō imonte pōnō ænte māmongā ate Wængonguī waadete pōnō cædinque mōnō imonte ængampa. Ayæ Wængonguī nē nāō ēmongā weca ongōñōmō tōmengā pōnō badongā ate mōnō godongāmæ nāō ēmonte mōnō watapæ bacæimpa, ante wede pōnēninque tomompa.

³Ayæ wīi māninque beyæ tomompa. Īñæmpa, Waocā nānō wæntædāmaī inte ee cæquinque caate wæcampa, ante ēñēmō ĩninque mōnō caate wæmō incæte caate mōnō wædō beyæ adobaī tomompa. ⁴Ayæ nē wæntædāmaī inte ee cæmō adinque mōnō Wængonguī ayongā nē waa cæmō edæ bamompa. Mānōmaī bamō ĩninque mōnō, Watapæ bacæimpa, ante pōnente tomompa. ⁵Mānōmainō ante nē pōnente tomō iñōmō edæ mōnō ænguēnēnō ante do æninque mōnō guingo imonte wædāmaī imompa. Edæ Wængonguī tōmengā Tæiyæ Waēmō Ōnōwoca ingante da pōnōninque tōmengā nānō waadete pōnēnō adobaī do pōnongā æninque mīmōnē entawēmompa.

⁶Edæ iīmaī impa. Mōnō aquīimō pōni inōmo inte, Ædō cæte cæmōō, ante wæyōmonte mōnō Codito iñōmō eyepæ pōni pōninque, Mīnitō Wængonguī ayongante wīwa cæmīni imīnīpa, ante adinque wīwa mōnō cædō ante teēmente wæætē wængacāimpa. ⁷Waocā guiquēnē wacā nē nō cædongā ingā adinque tōmengā beyæ wæætē dicæ wænguingāa. Incæte, Nē waa cædongā wæætē quēwencæcāimpa, ante cædinque adocanque adocanque wabānō Ao ante tōmengā beyæ wæætē wæmainānīpa. ⁸Incæte, Wængonguī mīnitō imīnite nanguī waadete pōnengampa, ante odōmoncæte ante cædinque mōnō Codito iñōmō nē wēnæ wēnæ cæmō iñōmonte mōnō beyænque wæætē wængacāimpa. ⁹Codito wepæ mōnō beyæ pe tæ pe tæ wææ beyænque mōnō Wængonguī ayongante nō entawēmō do batamompa. Codito mōnō beyæ mānōmaī wængaingā inte cōwē godōmenque cæcæcāimpa.

Ämo ëñeedäni. Wængonguï nê piinte panguënegä iñongante adocä Codito gä pe ämpote ängä beyænque Wængonguï wæätê mönô imonte edä ata cæpocä quëwencæmöimpa. ¹⁰ Mönô edä Wængonguï tönô mönô godongämä piincabo iñö-monte tömengä Wengä mönô beyä wæätê wængä beyænque mönô Wængonguï tönô godongämä piyänê cæmô bagamöimpa. Mönô Wængonguï tönô godongämä piyänê cæmô ininque tömengä Wengä iñömô cöwê godömenque cæcæcäimpa. Ämo ëñeedäni. Tömengä adocä do wængaingä inte ñäni ömæmante miingä quëwëninque mönô imonte ängä beyænque mönô wænämaï inte cöwê quëwencæmöimpa. ¹¹ Ayä mönô godömenque iïmaïnô ante ëñengæïmpa. Mönô Awënë Itota Codito ängä beyænque Wængonguï piyänê cæcä ininque mönô ñöwo Wængonguï nempo quëwëninque edä Itota Codito beyä ante watapæ tomompa.

Tänocä Adäo wodi bai Codito adobai Tänocä ingampa

¹² Docä mämmä adocanque tänocä incæ ëñenämaï cæcä ininque mönô wënä wënä cæpämö inguipoga do pongatimpa. Ayä tömengä nänô ëñenämaï cægainô beyænque nê wæwocacä bagacäimpa. Tömengä wënä wënä cæcä ingaingä bai mönô tömämö adobai nê wënä wënä cæmô imô ininque edä mönô waocabo tömämö nê wæwocamö edä do bagamöimpa. ¹³ Edä wëenëñedê Möitee wodi nänô wæä änämaï iñedê incæ waodäni do wënä wënä cädäni ingadänimpa. Wënä wënä cädäni incæte Wængonguï, Botö wæä äno ante ëñenämaï cæminipa, ante ädö cæte apænte anguingä. Iñæmpa mäniñedê ayä wæä änämaï ingacäimpa. ¹⁴ Nê Ponguingä, ante dodäni näni nê angaingä iñömô Tänocä nänô ingai bai docä Adäo wodi adobai tänocä ingacäimpa. Incæte Adäo wodi Wængonguï nänô wæä äno ante ëñenämaï cædinque wënä wënä cægacäimpa. Wæätê Wængonguï edä Möitee wodi nänô quëwenganca wæä änämaï iñongante Adäo wodi päinäni guiquënë wënä wënä cädäni incæte tömengä nänô ëñenämaï cægai bai wii adobai ëñenämaï cægadänimpa. Incæte tömënäni nê wæwocadäni inte wægadänimpa.

¹⁵ Incæte Wængonguï nänô wæä angainô ante adocanque nänô ëñenämaï cægai bai Wængonguï nänô pönongai iñömô wii adobai impa. Edä adocanque nänô ëñenämaï cægai beyænque nanguï inäni inte wængadänimpa. Incæte Wængonguï guiquënë nanguï pönï waadete pönô cædinque Itota Codito ingante da pönongä pöninque tömengä adocanque inongä waadete eyepæ pönï pönô cæcä ate mönô nanguï pönï imô inte quëwëmompa. ¹⁶ Onguïñängä adocanque wënä wënä nänô cægai beyä nê wæwocadäni bagadänimpa. Wængonguï nänô pönongai iñömô edä wii adobai impa. Adocanque nänô adopoque ëñenämaï cægainô ante adinque Wængonguï tömengä ingante apæte äninque edä, Bitö tente wæquinque impa, angacäimpa. Wæätê Wængonguï nänô wæä angainô ante ëñenämaï wæätê wæätê cæmô incæte tömengä, Botö ayömo mini nö entawenguinque impa, ante önonque pönongä ænte entawëmompa.

¹⁷ Waocä adocanque incæ Wængonguï nänô wæä angainô ante ëñenämaï cæcä ininque tömengä adocanque nänô ëñenämaï cægai beyænque mönô wæwocamö do bagamöimpa. Wængonguï guiquënë godömenque eyepæ pönï waadete pönô badongä ate tömengä ayongä mönô nö entawëmö bagamöimpa. Ininque Itota Codito adobai Adocanque iñongante mönô tömengä nempo wæwocadämaï inte quëwëninque awënëidi bai badinque quëwëmompa.

¹⁸ Mänömaï beyä adocanque adopoque ëñënämaï cäcä beyænque Wængongui mönö tömämö imonte apænte äninque, Mïni wænguinque wënä wënä cämïnipa, angampa. Ayä adobaï Adocanque adopoque nänö nö cægäinö beyænque mönö Wængongui ayongä nö cämö bamö ininque Wængongui apænte äninque mönö tömämö imonte, Mïni quëwenguinque mïnitö botö ayömo nö entawëmïni bamïnipa, angampa. ¹⁹ Edä adocanque nänö adopoque ëñënämaï cægäi beyænque mönö nanguï imö incä edä në wënä wënä cämö bagamöimpa. Adobaï Adocanque nänö adopoque ëñente cægäi beyænque mönö nanguï imö incä edä Wængongui ayongä nö cämö bagamöimpa.

²⁰ Mönö waocabo wënä wënä cäyömonte Wængongui, Botö wæä äno ëñënämaï inte cämïnipa, ante edonque acämïnipa, ante wæä angacäimpa. Wæä angä ate edonque adinque mönö waocabo wæätë, Nanguï ëñënämaï inte cæte awædö, ante wäyömonte Adocä incä godömenque nanguï waadete pönö cäcä ämompä. ²¹ Ininque mönö ëñënämaï cægäi beyä mönö në wäwocamö bagamöimpa. Wæätë mönö Awënë Itota Codito waadete pönö nö cæte badongä ate mönö cöwë wänämaï quëwenguinque Wængongui ayongä nö entawëmö bagamöimpa.

Codito nempo quëwëninque mönö në wïwa cædongä nempo wïi quëwëmompä

6 Ininque mönö æbänö anguiï. Pancadäniya iïmaï änewënanipa. Wængongui godömenque waadete pönö cæcæcäimpa, ante cædinque mönö godömenque wënä wënä cæcäimpa, ante tedewënanipa. Mönö iñömö dicä mänömainö ante tedewenguënëmö imongaa. ² Iñämpä ædö cæte mänömainö ante tedewenguïi. Wënä wënä mönö cæte quëwëmämo pædä godömo äninque Codito teëmë mongäëninque wæñongante mönö tömengä tönö godongämä wænte bai inömo inte ædö cæte godömenque wënä wënä cæte quëwenguïi. ³ Mönö Itota Codito nempo quëwengäimpa, ante æpænë guïdinque mönö tömengä tönö godongämä wængäimö bai batamompä, ante mïnitö iñömö ëñënämaï imïnitawo. ⁴ Tömengä wænte öñöñongante Mæmpo Wængongui në nää entawënongå inte tæi ëmönongä inte, Näni ömæmoe, angä nïni ömæmongacäimpa. Ininque mönö iñömö edä, Codito tönö nïni ömæmonte bai mönö mümö quëwengäimpa, ante cædinque æpænë guïdinque tömengä wodido godongämä guïte bai wænte bai öñontamompä.

⁵ Edä tömengä wængä ate godongämä wænte bai bagäimö ininque mönö tömengä nïni ömæmongä ate tömengä tönö ääwocaque bai ewocate nïni ömæmonte bai quëwëmaïmompä. ⁶ Waocä nänö në ö æninäni inte tömengä beyænque cæte në quëwënanï bai mönö adobaï wënä wënä mönö cædö beyænque wægämöimpa. Mänömaï inte wäyömonte mönö Codito iñömö, Aamö cæte gocämïnipa, ante cædinque wënä wënä cæte mönö wentamö mongäëñö ö ænte teëmë mongængantapa. Ee mongäëñongante tömengä ingante awäa timpodäni wængä adinque baonque ante mönö wënä wënä cæpämö iñömö ewente bai ba ininque mönö do aamö cæte bai mäninö ante ëmö cæte gomompä. ⁷ Waocä æmæwo wængaingä inte edä ædö cæte wënä wënä cæquingä. Edä tömengä nänö wënä wënä cægäinö ante ëmö cæte aamö cæte bai gogaingä ingampa.

⁸ Mönö Codito tönö ääwocaque bai ewocadinque adopoque wængäimö inte mönö tömengä tönö godongämä quëwengäimpa, ante wede pönëmompä. ⁹ Edä do wænte nïni ömæmonte müingä quëwënongå inte Codito wæätë mempoga wængingä inämaï ingampa. Tömengä nïwo wäwocadämaï iñongante tömengä in-

gante, Wāmāwe, ante ædō cæte anguii. Īnæmpa, wænāmaī incæcāimpa, ante do ēñēmōmpa. ¹⁰Tōmengā adopoque wæninque mōnō wænæ wænæ cægāinō ante æmæwo wido cæcæte ante teēmē mongænte wængacāimpa. Wæætē ñāni ōmæmonte mīingā quēwēninque tōmengā, Wængongui beyænque cæte quēwencæboimpa, ante quēwengampa. ¹¹Mīnitō adobaī Codito nempo quēwēnōmīni inte wīwa mīni cægāinō ante æmæwo wido cæcæte ante cædinque, Itota Codito tōnō adopoque wængāimō ĩmōmpa, ante wæætē, Mōnō Wængongui beyænque cæte quēwengæimpa, ante pōnēninque quēwēedāni.

¹²Mānōmaī beyæ mīnitō, Baonga mōnō ñōmænguīñō quēwēninque mōnō wænæ wænæ cæinēnō ante mōnō ēñente cædāmaī ingæimpa, ante nāmā wææ aadinque edæ wænæ wænæ mīni cæinēwēnō ante edæ ēñēnāmaī inte quēwēedāni. ¹³Ayæ mīnitō, Bado, ante edæ, Botō baonca wīwa cæcæimpa, ante edæ mīnitō baō quiomē ĩ incæ wænæ wænæ cæquinque ante edæ godō cædāmaī ĩedāni. Wæætē do wæwocagāimīni inte ñāni ōmæmonte mīimīni quēwēninque mīnitō wæætē Wængongui ingante nāmā godōmīni æncæcāimpa. Edæ, Botō baō ĩni edæ tōmāo Wængongui quī ĩmpa, ante pædæ godōninque mīimīni quēwēnōmīnite tōmengā wæætē mīnitō tōnō godongāmæ cædinque nō pōni cæcæcāimpa. ¹⁴Edæ Mōitee wodi nānō wææ angāinō ante ēñēmīni incæte wīi māninō beyænque quēwēmīnīpa. Wæætē Wængongui waadete pōnō cæcā beyænque quēwēmīni inte mīnitō wænæ wænæ mīni cæinēwēnō ante ēñente cædāmaī inte quēwencæmīnīpa.

Wīwa mōnō cæinēwēnō ante mōnō ēñēnāmaī ingæimpa

¹⁵Mōitee wodi nānō wææ angāinō ante ēñente beyænque wīi quēwēmō inte mōnō Wængongui waadete pōnō cæcā beyænque quēwēmōmpa. Nāwangā ĩmpa. Īninque mōnō æbānō cæquīi. Wadāni ĩñōmō idiquibæ ante pōnēninque, Wængongui pōnō cæcā beyænque nē quēwēnōmō inte mōnō wæætē wænæ wænæ cæcæimpa, ante tedewēnānīpa. Mōnō ĩñōmō ædō cæte mānōmaīnō ante cæquīmōō.

¹⁶Wacā ingante nē cæte quēwēmīni bacæte ante cædinque mīnitō, Bado, bitō botō awēnē badinque edæ āmi ēñente nē cæbo baboe, āmīni ĩninque edæ māningā mīnitō ĩmīnite ō ængā ate tōmengā beyænque cæte quēwēmaīmīnīpa. Māninō ante pōnēmīniyaa. Ayæ adobaī mīnitō wænæ wænæ cæinente mīni wædō ante Ao ante cæmīni ĩninque mīni wænguinque edæ māninō beyænque cæte nē quēwēmīni inte wæbaīmīnīpa. Wæætē Wængongui ingante, Bado, bitō botō Awēnē ĩnōmi inte edæ āmi ēñente nē cæbo baboe, āninque mīnitō nō cæte mīni quēwenguinque tōmengā beyænque nē cæmīni babāimīnīpa. ¹⁷Mīnitō doyedē mīni wænæ wænæ cæinēwēnonque ante cædinque mīnitō awēnē beyænque cæte nē quēwēmīni bai ingāmīnīpa. Nōwo guiquēnē Wængongui nō nānō ānō ante odōmōmōni ēñēninque mīnitō ĩnonque ante edæ nē ēñente cæmīni bamīnitapa. Mānōmaī bamīnīpa, ante adinque botō Wængongui ingante waa ate pōnēninque apænebopa. ¹⁸Ayæ wænæ wænæ mīni cædō beyænque cæte nē quēwēmīni inte wæyōmīnite Wængongui ñīmpo cæcā ate mīnitō abæ tawænte ee gote bai quēwēmīnīpa. Nōwo wæætē tōmengā nānō nō cædonque ante ēñente cæmīni ĩninque mīnitō edæ nē nō cædongā nempo quēwēninque tōmengā beyænque cæte nē quēwēmīni bamīnīpa.

¹⁹Mīnitō ōnōmīnique inte æiquedō ædāmō ēñenguīmīni, ante wædinque botō, Waocā nānō cæi bai ĩmpa, ante tededinque odōmōmo aedāni. Wēēnēdē wænæ wænæ cædinque godōmenque quingāmē bai quēwencæte ante mīnitō, Bado, ante

quiomē incæ mīni baonga wīwa cæquinque pædæ godō cæmīnitapa. Mānō-maī beyænque ēñēnāmaī mīni cæinēwēnō ante ēñente cædinque edæ mīnitō mānīnonque ante nē cæte quēwēmīni ingamīnimpa. Nōwo guiquēnē tæiyæ waēmō mīni ēwocate quēwenguinque ante mīnitō baō inī edæ, Wængonguī quī impa, ante tōmāo pædæ godōedāni. Ayæ mīni nō cæquinque ante edæ tōmengā beyænque nē cæmīni inte quēwēedāni. ²⁰ Wēēnēñedē iñōmō mīnitō wēnæ wēnæ mīni cæinēnō beyænque cæte nē quēwēmīni baī inte wægāmīnimpa. Māniñedē mīnitō nē nō cædongā nempo quēwēnāmaī ingāmīni inte tōmengā nānō angainō ante edæ ēñēnāmaī ingamīnimpa. ²¹ Māniñedē quingāmē baī mīni cægainō ante pōnente wædinque mīnitō nōwo iñōmō guingo imonte bamīnipa. Edæ mānīnō mīni wīwa cægainō beyæ ante dicæ watapæ tote bamīniyaa. Iñæmpa edæ mīni wænguinque mānōmaī cægāmīnimpa.

²² Nōwo guiquēnē, Wēnæ wēnæ mīni cæinēwēnō ante idæwaa ēñencæmīnimpa, ante cædinque Wængonguī gā pe æmpote ængā ate mīnitō abæ tawænte baī Wængonguī nempo wæætē ee pongamīnimpa. Iñinque nē gā pe æmpocā nempo quēwēnīnque mīnitō tōmengā ingante cæte nē quēwēmīni inte mīni cōwē wænāmaī quēwenīnque tæiyæ waēmō ēwocamīni bamīnipa. ²³ Mōnō waocabo mōnō wēnæ wēnæ cædō beyæ ante paga cæte baī cædinque Wængonguī mōnō imonte pōnō pangā wænguēnēmō imōmpa. Wæætē, Wantæpiyæ quēwencæmīnimpa, ante adocā incæ mōnō Awēnē Itota Codito tōnō godongāmæ cædinque mōnō imonte ōnonque pōnō ængā beyænque mōnō cōwē wænāmaī quēwēmōmpa.

Ēñente cæquēnēmō inte ñā cæyænte baī ingamōimpa

7 Iñānāni ēñēedāni. Mōitee wodi nānō wææ ante yewæmongainō ante do adīmīni imīni incæte mīnitō iīmaī ante ēñēmīniyaa. Edæ, Ēñente cæedāni, ante tōmengā mīnāni quēwēnānique inānite wææ ante yewæmongacāimpa. Iñinque waocā do wæningā iñongante, Cæ, āñōmō tōmengā mīingā ingampa diyæ cæquingāā. Edæ dobæ wængāimpa.

² Iīmāinō ante pōnēedāni. Onquiyængā ingante ñānōnāni mongā ate tōmengā nānōogængā mīingā nānō quēwenganca onquiyængā iñōmō tōmengā nānōogængā ingante ēñente quēwencæcāimpa, ante wææ ante yewæmongatimpa. Wæætē edæ tōmengā nānōogængā wængā ate onquiyængā owæmpoingā inte adocanque quēwēñongante mānōmāinō ante edæ ædō cæte wææ anguī. ³ Iñinque nānōogængā ayæ mīingā quēwēñongante onquiyængā wacā ingante godō guēa mongā adinque, Bitō nānōogængā mīingā iñongante bitō wacā ingante guēa godō mōmīpa tōō, ante pīnānipa. Incæte tōmengā nānōogængā wængā ate abæ tawænte gote baī tōmengā adocanque quēwēñongante, Wacā ingante mōnāmaī incæbiimpa, ante ædō cæte wææ anguīnānīi. Do owæmpodingā inte wacā ingante mongā adinque tānocā quēwengampa diyæ wææ anguīnānīi. Edæ owæmpodingā inte tōmengā do mongampa.

⁴ Mānōmaī beyæ botō tōniñamīni, Mōnō adobaī imōmpa, ante āmo ēñēedāni. Ñānōnāni nē mōningā iñōmō ēñente cæquēnengā ingā baī mīnitō wēēnēñedē adobaī Mōitee wodi nānō wææ angainō ante ēñente cæquēnēmīni inte ñā cæyænte baī ingamīnimpa. Mānōmaī inte wæyōmīnite Codito iñōmō, Mīnitō botō nempo quēwēnīnque waincate baī cæmīni badinque Wængonguī beyænque ante ēñente cæcæmīnimpa, ante pōnō cægacāimpa. Tōmengā baonga ponte ēñadinque mōnō

beyæ wæninque nāni òmæmongacäimpa. Ìninqe mōnō tōmengä tōnō adobai wænte bai ingaimō inte mōnō wēēnēnedē mōnō ēñenguēnengainō ante edæ ædō cæte wæætē ēñenguēnēmō inguimōō. Wæætē edæ nē nāni òmæmongaingä nempo quēwēnōmo inte mōnō tōmengä quimō ìnōmō ìmōmpa.

⁵Doyedē ìñōmō mōnō nē wæwocamō ìnōmō inte baonque ante pōnente mōnō quēwēnedē Mōitee wodi nānō wææ angainō ante ēñente wædinque godōmenque wīwa cæinēwente wæmō batamōmpa. Ìninqe mōnō baaca incate bai cædinque mōnō wænguinqe wænæ wænæ cætamōmpa. ⁶Wēēnēnedē wææ ānāni ate mōnō, Ædō cæte ēñente cæquiī, ante nā cæyænte bai wægaimō inte mōnō edæ Codito tōnō adopoque wænte bai nī cæyænte bai bagamōimpa. Ñōwo guiquēnē adopoque wængaimō inte mōnō Mōitee wodi pedæne ante nānō wææ ante yewæmongainō ante wī ēñente cæquēnēmō inte abæ tawænte bai gomōmpa. Wæætē edæ Wængongui Tæiyæ Waēmō Ònōwoca beyæ quēwēmō ìnōmō inte mōnō tōmengä miine nānō ānonque ante ēñente cæmō ìmōmpa.

Wænæ wænæ botō cædō beyæ ante wæbopa, ante

⁷Ìninqe æbānō ante anguimoo. Mōitee wodi, Wænæ wænæ cæqui, ante yewæmongacäimpa, ante botō dicæ antawogaa. Ædō cæte edæ mænōmai anguiī. Ìñæmpa tōmengä wææ ānāmai ingä bai botō, Quinō wænæ wænæ cæte ī, ante ēñēnāmai incædōmoimpa. Botō edæ, Wacä qui æinente wæbo incæte botō ænāmai inte ee abo inte waa cæbopa, ante pōnengaboimpa. Mōitee wæætē, “Wacä qui ante æinente wædāmai īe,” ante wææ angä beyænque botō, Æ æinente botō wædō incæ wænæ wænæ impa, ante tæcæ ēñentabopa. Māninō ante ānāmai ingä bai botō, Wænæ wænæ impa, ante ēñēnāmai incædōmoimpa. ⁸Ìninqe nē wænæ wænæ cædōmo inte botō Mōitee nānō wææ angainō ante ònōmoncaque ēñente ate botō quingāmē bai tōmancoo ante godōmenque æinente wætabopa. Edæ tōmengä wææ ānāmai ingä bai mōnō wænæ wænæ cædō ìñōmō edonque ìnāmai inte edæ dæ ante bai incædōnimpa.

⁹Mōitee wodi wææ ante nānō yewæmongainō ante botō adāmai ìmoyedē botō ònonque wædāmai quēwengaboimpa. Wæætē, Ìmai wææ ante yewæmonte ongōmpa, ante adinque botō, Æ, wænæ wænæ cæbo ìmopa, ante tæcæ ēñēninqe, ¹⁰edæ nāñe wænte bai botō, Wæwocabo ìmopa, ante wætabopa. Edæ, Ìmai cædinque quēwencæminimpā, ante wææ ante nānō yewæmongainta adinque botō edæ, Botō wænguinqe wī ēñente cæbopa, ante tæcæ ēñēninqe wætabopa. ¹¹Edæ Mōitee wodi wææ ante nānō yewæmongainta do adīmo inte māninō ante ēñēnāmai cædinque botō pante wænguinqe wænæ wænæ cætābopa. Edæ, Ònonque wænæ wænæ cæte tocæi, ante wapiticæ pōnente cæyōmote tōmengä nānō wææ angainō ante odömōnāni ēñēmo beyænque botō, Æ, botō wænguinqe wænæ wænæ cæbopa, ante wægaboimpa.

¹²Wængongui nānō wææ angainō ìñōmō tæiyæ wæmō ìnepa. Ayæ Mōitee wodi adobai mānīne tæiyæ wæmō ìnedō ante apænedinque, Ìmai cæedāni, ante wææ āninqe, Mīni waa cæte quēwenguinqe ēñente cæcæminimpā, ante nōingä pōni angacäimpa.

¹³Ìninqe tōmengä, Mīni waa quēwenguinqe impa, ante nānō wææ angainō incæ botō ìmote ædō cæte wænonguiī. Wængongui wæætē, Quinō wænæ wænæ cæte ī, ante edonque acæminimpā, ante pōnō waa cædinque, Mīnitō ēñēnāmai ìmīni beyænque mīni wænguinqe impa, ante wææ angacäimpa. Ìninqe Wængongui

nänö wææ angainö beyænque botö iñömö, Wënæ wënæ cægaboimpa, ante edonque atabopa.

¹⁴Minitö tæiyæ waëmö ewocacæminimpa, ante Wængongui mönö önöwoca beyænque ante wææ angacäimpa, ante do ëñëmompæ. Incæte botö wiwa cædonö beyænque cæte nê quëwëmo inte botö edæ ömæwocate bai inte wæbopa. ¹⁵Edæ botö waa cæinente wædö ante cædämaï inte botö wæætê edæ, Wii cæinente awædö, ante botö piinte adö incæ edæ do cæte wæbopa. Ìninqe botö, Æbänö cæboo, ante ëñënaïmaï imopa. ¹⁶Wængongui nänö wææ angainö ante ëñënaïmaï cæbo incæte botö ëñënaïmaï botö cædö ante wii cæinëmopa. Mänömaï botö wii cæinënö beyænque botö, Wængongui waa cædinque wææ angacäimpa, ante bai cædinque tömengä nänö wææ angainö ante edæ Ao ante bai cæbopa. ¹⁷Incæte botö wodi wii tömëmo änö ante cæbopa. Wæætê edæ botö wiwa entawënö beyæ wii cæinente botö wædö ante do ëñente cædinque wæbopa. ¹⁸Edæ ancaa waa cæinente wæbo incæte botö dicæ waa cæbogaa. Mänömaï beyæ botö, Botö baonga quëwëninque botö waa cæquinö iñömö edæ dæ ampa, ante do ëñëmopa. ¹⁹Waa pöni botö cæinënö incæ cædämaï inte wæbopa. Wæætê edæ wënæ wënæ cæte botö wii cæinente wædö ante ancaa cæte wæbopa. ²⁰Ìninqe botö wii cæinëmo inte do cæbo ìninqe wii tömëmo cæbopa. Wæætê wiwa cæquinque botö entawënö beyænque edæ wënæ wënæ cæte wæbopa.

²¹Waa cæinente wæbo incæte botö wënæ wënæ cæquinö edæ do entawente wæbopa. Ìninqe botö nã cæyænte bai imopa, ante do abopa. ²²Edæ botö Wængongui nänö wææ angainö ante mïmönë pönëninque watapæ tobopa. ²³Incæte, Wængongui nänö wææ angainö ante botö pönënö incæ ëñënaïmaï ingæimpa, ante botö edæ wade wææ ante entawente bai inte wæbopa. Ìninqe nämä wææ ante bai mïmönë botö pönënö tönö wade, Æñënaïmaï ingæimpa, ante wææ ante botö entawënö tönö näëmæ guëadö guëa cæ bai inte wæbopa. Edæ mänine beyæ wiwa botö cæquinö entawëninque botö yæguincamenca nã cæyænte bai inte wæwëmopa.

²⁴Edæ cætawente wængui wæ. Botö wiwa cæquinö entawente beyæ botö wænguiñö ëñate wæyömote æcänö edæ æna beyænque quëwëmaïmoo, ante wæbopa. ²⁵Edæ, Itota Codito beyænque quëwenguïmo imopa, ante botö Wængongui ingante waa ate pönente apænebopa. Ìninqe Wængongui nänö wææ angainö ante ëñëninque botö tömëmo mïmönö tömengä beyænque cæte nê quëwëmo ìnomo imopa. Incæte botö ëñayö beyæ botö wiwa cæinënö beyænque cæte nê quëwëmo inte wæbopa.

Wængongui Önöwoca ingante ewocate quëwengæimpa

8 Ìninqe mönö Itota Codito nempo quëwëninque mönö wiwa cæinente wæwënö ante cædämaï inömö inte wæætê tömengä Önöwoca pönö angä ëñëninque cæte quëwëmö adinque Wængongui iñömö, Mini wænguinque, ante apænte änaïmaï ingampa. ²Edæ wiwa cæinente mönö wæwënö ante mönö wænguinque ëñente cæyömote Itota Codito iñömö pönö gä peyæmpote bai ö ængä beyænque mönö abæ tawænte ee gote bai quëwëmompæ. Ayæ tömengä Önöwoca nê quëwënongå nänö wææ änö ante wæætê mönö ëñente cæinente quëwëmompæ.

³Edæ Möitee wodi, Ìmaï cædäni, ante wææ äñongä mönö iñömö wiwa cæinente mönö wæwënö beyænque aquii pñænämaï ëñadömö inte, Mönö ædö cæte ëñente cæquii, ante wægamöimpa. Mönö waocabo mänömaï wënæ wënæ cædömö inte

wæyömō Wængonguī wæætē, Waocā bacæcāimpa, ante tōmengā Wengā ingante da pōnongā pōninque mōnō wīwa cæinentai baī adotai baī ēñate pægacāimpa. Ēñate pædinque tōmengā nāmā baō nānō ēñayō ante edæ, Wængonguī quī impa, ante pædæ godonte baī cædinque wænæ wænæ mōnō cædō beyænque ante wængacāimpa. Mānōmaī cædinque Wængonguī mōnitō īmōnite apænedinque, Mīni wænguinque mīnitō baonga ēñadinque wænæ wænæ cæmīni awædō, ante apænte angacāimpa. ⁴Mānōmaī pōnō cædinque tōmengā, Wīwa cæinente mīni wæwēnō ante ēñente cædāmaī inte mīnitō ñōwo wæætē botō Ōnōwoca ingante ēwocadinque tōmengā beyænque quēwēmīnīpa. Īninque nō pōnī botō wææ angainō ante tōmānō ante ēñēninque nō cæte quēwęcæmīnīpa, ante cægacāimpa.

⁵Adopoque ēñadinque baonque nē ēñadāni guiquēnē wīwa cæinente nāni wæwēnō ante pōnente cædānīpa. Mēmpoga ēñadinque Wængonguī Ōnōwoca ingante nē ēwocadāni guiquēnē tōmengā nānō ānonque ante pōnente cædānīpa.

⁶Wīwa cæinente nāni wæwēnō ante cæcæte ante nē pōnēwēnāni guiquēnē tōmēnāni nāni wænguinque mānīnō ante pōnēwēnānīpa. Wæætē Wængonguī Ōnōwoca angā ēñente nē pōnēnāni guiquēnē tōmēnāni nāni gānē entawente quēwēnguinque edæ mānōmaī pōnēnānīpa. ⁷Waodāni wīwa nāni cæinente wæwēnō ante cæcæte ante nē pōnēwēnāni īñōmō edæ Wængonguī ingante pīinte cædānīpa. Wængonguī nānō wææ ānō ante tōmēnāni ōnōmoncaque ēñēnāni inte edæ wīī ēñente cædānīpa. Īñæmpa tōmengā Ōnōwoca ingante ēwocadānīpa diyæ ēñente cæquīnānī. ⁸Wīwa cæinente nāni wæwēnō ante cæcæte ante nē cædāni īñōmō, Wængonguī waa acæcāimpa, ante anca cædāni incæte Wængonguī wæætē edæ waa todāmaī incæcāimpa.

⁹Mīnitō guiquēnē Wængonguī Ōnōwoca ingante ēwocamīni īninque edæ wīwa cæinente mīni wæwēnīnō ante cædāmaī inte quēwēmīni īmaīmīnīpa. Wæætē edæ tōmengā Ōnōwoca angā ēñente cæte quēwēmaīmīnīpa. Incæte waocā æcāmenque incæ Codito Ōnōwoca ingante ēwocadāmaī ingā īninque tōmengā wæætē Codito nempo quēwēnāmaī īmaingampa. ¹⁰Mīnitō guiquēnē Codito ingante entawēmīni īninque wænæ wænæ mīni cægāinō beyænque mīnitō baō incæ tōmengā tōnō adopoque wænte baī ēñamīnīpa. Incæte Codito nānō nō cædōnō entawēmīni inte mīnitō ōnōwoca mēmpoga ēñate baī mīiwoca ēwocamīnīpa. ¹¹Itota ingante Wæmpocā, Ñāni ōmæmōe, angā ēñēninque ñāni ōmæmongacāimpa. Ayæ mīni baō ñōmæintai ēñayōmīnite tōmengā Ōnōwoca pō guīdinque quēwēngā īninque Wæmpocā wæætē mīnitō īmīnite, Ñāni ōmæmōe, ante adobaī angā ñāni ōmæmoncæmīnīpa. Edæ tōmengā Ōnōwoca mīni nē ēwocadongā tōnō tōmengā pōnō cæcā ate mīnitō baō incæ ñōmænāmaī intai bacæimpa.

¹²Īninque botō tōnīñamīni ēñēedāni. Wængonguī Ōnōwoca angā ate mōnō ēñente cæquēnēmō īmōmpa. Wæætē wīwa cæinente mōnō wæwēnō ante wīī ēñente cæte quēwēnguēnēmō īnōmō īmōmpa. ¹³Īñæmpa wīwa cæinente mīni wæwēnō ante ēñente cæmīni īninque mīni æmæwo wænguinque cæbāīmīnīpa. Wæætē Wængonguī Ōnōwoca ingante ēwocadinque mīnitō wīwa mīni cædinō ante wido cæmīni īninque mīni quēwēnguinque īmaīmpa.

¹⁴Ædānidō īnānite Wængonguī Ōnōwoca tōō æmænte angā ate ēñente goda īñōmō tōmēnāni īñōmō edæ Wængonguī wēnāni īnānīpa. ¹⁵Mīnitō guīñente mīni wægāinō beyænque ñā cæyænte baī nē quēwēngāīmīni inte ñōwo wæætē Wængonguī Ōnōwoca ingante æninque wīī adobaī guīñente wæmīni īmīnīpa. Wæætē

Wængongui Önöwoca pönö cæcä beyænque minitö näwä wëmini bamînipa. Ayæ tömengä Önöwoca pönö cæcä ænte ewocadinque mönö guiñenedämaï inte edæ, Mæmpo, botö Wæmpo, ante apænemompa. ¹⁶Edæ mönö mimönë ponte apænedinque Wængongui Önöwoca incæ, Bitö Wængongui näwä wëmi inömi imipa, ante apænecampa. ¹⁷Înîque mönö Wængongui wëmö inömö inte tömengä nänö pönonguincoo nê ænguimö imompa. Edæ Codito tönö äanque bai caate wëmö inîque mönö tömengä ñäö bai nänö emö bai ñäö adobai emöinîque tömengä tönö edæ godongämæ ænguimö imaimompa.

Ñäö bai mönö entawenguimämo

¹⁸Botö iïmaï ante pönëmopa. Ñöwo caate mönö wæpämö iñömö pönömenque iñonte iïncayæ ate ñäö bai mönö emonguimämo guiquënë wii adobai wædænque inte godömenque nanguï pöni ingæimpa. ¹⁹Æyedënö Wængongui wënäni tæi emonte badinque edonque a ongonguinänii, ante acæte ante edæ Wængongui nänö badongaincoo incæ nanguï ainente wædinque wänö conte bai ongoncoopa. ²⁰Edæ wænæ wænæ cædämaï incoo iñonte mönö waocabo mönö eñenämäi cægainö beyæ Wængongui nänö badongaincoo önoncooque bai bagatimpa. Wii nämä äno beyæ mänömaï bagatimpa. Wæætë Wængongui nê, iïncayæ ate watapæ bacæimpa, ante angaingä inte adocä angä beyænque önoncooque bai bagatimpa. ²¹Edæ Wængongui nänö badongaincoo ñömænguincocooque inte yæguincamenca ñä cæyænte bai wæyoncoote Wængongui gä pe æmpote bai godö cæcä beyænque ñömænämäi inguincocooque bacæcoimpa. Mönö Wængongui wëñæmö iñömönte tömengä pönö ñimpo cæcä ate mönö abæ tawænte bai tæi emonte bamö bai tömengä nänö badongaincoo adobai abæ tawænte bai miincooque bacæcoimpa. ²²Wëñæ nantate, Æiquedö eñäquingää, ante nâni wæ bai Wængongui nänö badongaincoo incæ ñöwo ganca godongämæ nantate bai, Æiquedö waa baquii, ante ö ö wæconcoopa.

²³Ayæ Wængongui mönö imonte mä pönöinîque tömengä Önöwoca ingante pönongä ænte do ewocamö inömö inte mönö adobai, Mönö baö miïñö eñäquincocooque æiquedö Wængongui wëñæmö ædæmö baquii, ante nanguï æinente wänö conte ö ö wæmompa. ²⁴Edæ Codito, Botö iïncayæ ate badömo ate watapæ bacæimpa, ante pönëedäni, äinîque mönö imonte edæ ængä beyænque quëwëmompa. Înîque mäninö edæ, Watapæ bacæimpa, ante nänö angainö iñömö iinque ba acæte ante mönö ayæ wänö cömompa. Mäninö watapæ do ba amö bai mönö, Ayæ ate watapæ ba acæimpa, ante änämäi incædömöimpa. Waocä do æningä inte, Æinente wæbopa, ante quinante anguingää. Îñæmpa edæ dobæ ængantapa. ²⁵Înîque mönö æinente wædö ante mönö cöwë ængæimpa, ante wede pönëmö inîque mönö wæntädämaï inte ee wänö cömompa.

²⁶Ayæ adobai mönö aquiiimö pöni iñömönte Wængongui Önöwoca mönö beyæ cæcampa. Æbänö cæte Wængongui ingante apænequii, ante eñenämäi inte wæyömönte tömengä wii waomö tededö ante apænedinque tömengä önöwënenque mönö beyæ apænecampa. Mäninö tömengä nänö tededönö ante mönö guiquënënte inte önöneca ædö cæte tedequii. ²⁷Mönö Wængongui quimö tæiyæ waëmö ewocamö iñömönte Wængongui Önöwoca iñömö mönö beyæ apænedinque, Mæmpo Wængongui nänö angainö bai bacæimpa, ante pönëinîque apænecampa. Înîque mönö mimöno do adongä inte Mæmpo Wængongui iñömö edæ, Botö Önöwoca æbänö pönëinîque apænecää, ante do eñengampa.

Nē tæi ěmōninque mōnō gānā cæmō ĩmōmpa, ante

²⁸ Wængongui, Botō ānō bai ĩnque bacæĭmpa ante cæcæminĭmpa, ante mōnō ĩmonte aa pegacæĭmpa. ĩnque tōmengā nānō ānō bai nē cæmō inte mōnō tōmengā ingante waadete pōnēmō ĩñōmonte Wængongui wæætē mōnō beyænque cōwē waa pōnō cæcā ate mōnō edæ, Inguipoga æbāmē ba incæte mōnō waa pōnī quēwen-
guinque ĩmpa, ante edæ do ēñēmōmpa. ²⁹ Doyedē badōninque Wængongui ĩñōmō, Botō Wengā Bamoncadengā ĩñongante ĩnāni tōmengā biwīdi badinque nanguī ĩnāni yebænte bacædānĭmpa, angacæĭmpa. ĩnque tōmengā mānōmai cæcæte ante cædinque, Do botō nē agāināni ĩñōmō tōmēnānique botō Wengā nānō entawēnō bai adobai entawencædānĭmpa, ante badongacæĭmpa. ³⁰ Ayæ, Botō Wengā nānō entawēnō bai entawencæminĭmpa, ante nānō nē angāināni ĩñōnānite do aa pegacæĭmpa. Ayæ tōmengā nānō aa pegāināni adodāni ĩnānite, Botō ayōmo mīnitō nō cæmīni bacæminĭmpa, ante badongacæĭmpa. Tōmengā ayongā nō cædāni nē bagāināni ĩnānite tōmengā, Mīnitō tæi ěmonte badinque nāo bai ěmonte bacæminĭmpa, ante do badongacæĭmpa.

³¹ ĩnque æbānō ante anguīmoo. Edæ Wængongui mōnō tōnō godongāmæ cæcā ĩñongante æcānō mōnō ĩmonte bæ taquingā. Edæ dæ angampa. ³² Tōmengā Wengā adocanque ĩñongante Wængongui pæ gompodāmai inte da pōnongā pōninque tōmengā wæætē mōnō tōmāmō beyæ teēmente wæætē wængacæĭmpa. Māningā ingante da pōnōninque Wængongui tōmengā nānō ēgaincoo ante ædō cæte pōnōnāmai inguingā. Edæ, Botō Wengā tōnō godongāmæ entawencæminĭmpa, ante Wængongui tōmancoo do pōnongā æmōmpa. ³³ Wængongui mōnō ĩmonte apænte ængā ongōñōmonte æcānō, Wiwa cæbipa tōo, ante apænte anguingā. ĩnæmpa Wængongui incæ, Botō ayōmo mīnitō edæ nō cæmīni ĩmīnĭpa, ante badongā bamōĭmpa. ³⁴ Itota Codito nē wængaingā inte godōmenque nāni ōmæmongaingā inte Wængongui tōmēmæ ĩnō do tæ contate a ongongampa. Ayæ mōnō beyæ Wængongui ingante cōwē apænecampa. Tōmengā mānōmai cæcā adinque mōnō ĩmonte æcānō, Bitō wænguinque, ante apænte anguingā. ĩnæmpa wīi eyepæ ĩnānĭpa.

³⁵ Codito mōnō ĩmonte waadete pōnente aayongā æcānō gā pe æmpote ō æn-
guingā. Edæ, Ædō cæte cæquīmōo, ante wæmō incæ caate wæwēmō incæ mōnō ĩmonte togænte pānāni wæmō incæ mānōmai wæyōmonte mōnō Codito dicæ māniñedē edæ waadedāmai inguingā. Mōnō wænguinque gue ænente wæmō incæ weocoo ōmaamō inte wæmō incæ tōmengā mōnō ĩmonte dicæ waadedāmai inguingā. Quiēmē beyæ, Mīni wænguinque, ante wææ ānāni wæyōmonte yaēmenca tacadāni wæyōmonte Codito māniñedē dicæ waadedāmai inguingā. ³⁶ Edæ Wængongui ingante āmotamīni ante bai yewæmongatĭmpa.

“Bitō beyænque wænōnāni wængui wæ, ante mōnitō tōmāā itædē wæmōnĭpa.

Obegaidi ĩnānite, Wænongæĭmpa, ante ānāni bai,
mōnitō ĩmōnite adobai, Wænongæĭmpa, ante pīināni wæmōnĭpa,”
ante yewæmonte ongō aedāni.

³⁷ Edæ mānimāmo mōnō wæpāmo tōmāmāmo pō ate wædōmō incæte mōnō ĩmonte nē waadete pōnengā nempo ongōninque mōnō tæi ěmonte godōmenque gānā cæte ongōmōmpa. ³⁸ Botō do ēñente pōnēmōpa. Mōnō nē waadete pōnengā nempo ongōñōmonte mōnō wænguīmāmo incæ mōnō quēwenguīmāmo incæ an-

quedoidi incæ wēnæidi incæ nōwopāmo incæ iincayæ ponguimāmo incæ tæi nāni pīñæmāmo incæ mānimāmo tōmāmāmo ædō cæte mōnō imonte gā pe æmpote ò ænguīi. ³⁹ Ayæ edæ æibæ mōnō æite wæquimāmo incæ guibæ mōnō wæænte wæquimāmo incæ quiēmē Wængonguī nānō badongaīmāmo incæ mānimāmo tōmāmāmo iñōmō mōnō Codito nempo ongōñomonte ædō cæte gā pe æmpote ò ænguīi. Edæ Wængonguī nānō waadete pōnēnō entawēninque mōnō Awēnē Itota Codito iñōmō mōnō imonte waadete pōnēninque pæ gompyongante mānimāmo tōmāmāmo incæ gā pe æmpote ò ænāmai ingæimpa. Amo ēñēmaimīnīpa.

Idægoidi inānite Wængonguī apænte angacāimpa, ante

9 Botō iñōmō edæ mīmō entawēmo inte nāmā apænte pōnēñomote Wængonguī Tæiyæ Waēmō Ōnōwoca adoyōmō ante apānecā ininque botō ædō cæte babæ wapiticæ anguimoo. Edæ Codito nempo quēwēnōmo inte botō nō pōni apānedinque iūmai āmopa. ² Mīmōno cōwē cawēnente wæwēmo inte botō iūmai ante pōnēninque nanguī wæbopa. ³ Botō guidēnāni botō tōnō adodāni inōnāni iñōnānite Wængonguī ængā beyænque quēwencādānīmpa, ante botō nanguī āninque wæbopa. Ininque Wængonguī tōmēnāni inānite, Quēwencæminīmpa, ante æninque wæætē botō Codito nempo quēwēñōmote botō imote piīninque tatodonte wido cæcā bai botō Ao ante piyænē cæcædōmoīmpa.

⁴ Tōmēnāni iñōmō idægoidi inānīpa. Wængonguī pæpogacā pædāni ininque tōmēnānique tōmengā wēnāni ingadānīmpa. Tōmēnāni inānite Wængonguī nāō entawente nānō tæi ēmōnō ante odōmongā adinque tōmēnānique nē agaiñāni inānīpa. Tōmēnāni inānite apānedinque Wængonguī, Botō pōnō cæbo ate mīnitō Ao āmīni ininque mōnō godongāmæ waa cæcæīmpa, ante cægacāīmpa. Iūmai cæedāni, ante tōmengā tōmēnāni inānite tāno wææ angā ēñente māniñō nānō wææ angaiñō ante tōmēnānique nē mangaiñāni inānīpa. Wængonguī oncōnē nānæncōnē wadāni guidāmai iñōnānite idægoidique guite tōmengā ingante waa ate ædæ wæænte apānedānīpa. Tōmēnānique inānite Wængonguī, Cōwē waa cæcæboīmpa, ante mā apānegacāīmpa. ⁵ Mōnitō, Mæmæidi, ante mōni nē angaiñāni incæ idægoidi mæmæidi adodāni inānīpa. Ininque tōmēnāni Pæingā badinque mōnō Codito inguipoga ēñagacāīmpa. Tōmengā iñōmō tōmāmō Wængonguī inongā ingampa, ante adinque mōnō tōmengā ingante apānedinque, Tōmēmi toquinque pōnō waa cæbi æmōnīpa, ante mōnō cōwē nīmpo cædāmai apānecæīmpa. Mānōmai īmpa, ante botō, Amēē, āmopa.

⁶ Idægoidi quēwencādānīmpa, ante nānō angaiñō bai Wængonguī cædāmai ingacāīmpa, ante botō dicæ āmogaa. Wæætē edæ iūmai īmpa. Nāwā idægoidi nāni wede pōnēnō bai pancadāniya pōnēnāmai ināni iñōnānite botō tōmēnāni inānite, Nāwā idægoidi inānīpa, ante apānedāmai īmopa. ⁷ Edæ Abadāō wodi pæināni incæ pancadāniya iñōmō, Abadāō wodi wēnāni, mōnō ānōnāni wīi inānīpa. Wæætē, “Botō ayōmo Itæca wēnānique bitō pæināni inguināni inānīpa,” ante mæmæ Abadāō ingante Wængonguī angampa, ante yewæmongatīmpa. ⁸ Mānōmai ī ininque Abadāō tapæicā nē ēñate pædāni inānite Wængonguī, Abadāō wēnāni, ante angantawogaa. Wæætē Abadāō wodi ingante apānedinque, Bitō wēnāni bacædānīmpa, ante Wængonguī nānō nē angaiñāni guiquēnē tōmēnānique tōmengā wēnāni inānīpa. ⁹ Edæ, “Iñēdē īmpa, ante botō ānōñēdē botō adodō pōmo ate māniñēdē ate edæ Tada incæ

wēñængä onguññængä ingante mancæcäimpa,” äninque Wængongui, Mäninö botö äñö bai cōwē cæcæboimpa, angacäimpa.

¹⁰ Wii mäninque impa, ante ēñengäimpa. Godömenque iimaï ante mönö pö-nengäimpa. Wæmpocä adocanque tapæicä ate Adebeca wodi wēna äancadēnaque ēñagadäimpa. Mänina wæmpocä iñömö mönö wæmæ Itæca wodi ingacäimpa.

¹¹ Tömēnä wēna ayæ ēñadämaï iñedē ædö cæte wēnæ wēnæ cæquīnaa, ædö cæte waa cæquīnaa. Incæte edæ Wængongui, Ìngä ingante apænte æncæboimpa, ante nänö angainö ante cōwē bacæimpa, ante cædinque, ¹² tömēna ayæ cædämaï iñö-nate Wængongui nē aa pedongä inte, “Bamoncadengä incæ ayæmengä ingante nē cæcä incæcäimpa,” ante Adebeca wodi ingante apænegacäimpa. ¹³ Adobainö ante Wængongui beyæ yewæmongadänimpa. “Aacobo ingante waadete pönengaboimpa. Etawoo ingante guiquēnē piinte agaboimpa,” ante yewæmongatimpa.

¹⁴ Ìninque mönö æbänö anguii. Wængongui dicæ nö cædämaï ingantawogaa.

¹⁵ Wæætē Möitee wodi ingante apænedinque Wængongui iimaï angacäimpa. “Wacö adocanque ingante botö, Wii päinewædö, äninque tömengä ingante do godö ñimpo cædinque pänämaï incæboimpa. Adocanque ingante nē waadete cæinēmo inte botö tömengä ingante do godö waadete waa cæcæboimpa,” angacäimpa, ante yewæmongatimpa. ¹⁶ Ìninque wacö nanguï cæinengä incæte wacö nanguï cæcä incæte Wængongui wii wacö nänö cædö beyænque apænte ængampa. Wæætē nämä nänö waadete waa cæinēnö beyænque Wængongui wacö ingante godö apænte ængampa. ¹⁷ Edæ awēnē Padaönö wodi ingante apænedinque Wængongui, “Botö iimaï ante cæcæte ante bitö imite ængö cætabopa. Edæ bitö imite ængö cædinque tæï piñænte pönö cæbo adinque waodäni, Wængongui tæï piñængä inte mänömaï cæcampa, ante botö emöwo ante inguipoga tömäo apænedäni do ēñencädänimpa, ante cætabopa.” Wængongui mänömainö ante Padaönö ingante apænecantapa, ante yewæmongatimpa. ¹⁸ Ìninque Wængongui, Adocanque ingante godö waadete ñimpo cæcæboimpa, äninque tömengä ingante do godö waadete ñimpo cæcampa. Wæætē wacä ingante guiquēnē, Godö cæbo ate mīmö ömædengä bacæcäimpa, äninque Wængongui tömengä ingante do cæcä ate edæ mīmö ömædengä bate wæcampa.

¹⁹ Mänömainö ante yewæmömo adinque bitö wabänö iimaï anguiimi, ante awædö. “Ìñæmpa mönitö Wængongui nänö äñö ante Baa änämaï iñömönite tömengä, Minitö beyænque impa, ante quīnante piinte angää.” Mänömainö ante ämitawoo.

²⁰ Bitö ññæmpa önömi que inömi inte Wængongui ingante wæatedö wæætē ämii. Nē badongä ingante tömengä nänö nē badöninca incæ dicæ, “Botö imote quīnante mänömaï badöwēmii,” ante dicæ anguii. ²¹ Nē bædongä iñömö daibo pancaiya æninque waa pöni wamoncade bædinque ado daibo pancaiya æninque önönque ewenguincade bæyongante æcänö nē bædingä ingante Baa anguingää. Nē bædongä iñömö nē äñongä inte bæcampa. Edæ Baa anguiimii.

²² Wængongui nänö nē piinani iñömö tömēnani nani ömæe ewente wæquinque wiwa cæyönänite tömengä piyænē cædinque wantæpiyæ pänämaï inte ee ongongantawo. Ìñæmpa tömengä nänö piimämo ante adinque do wæcädänimpa, ante cædinque ayæ tömengä nänö tæï piñæmämö ante edonque acädänimpa, ante cædinque Wængongui mänömaï ee ongongä apa änewëe. ²³ Ayæ wæætē, Botö waadete godö waa cæbo ænani inte edæ tömēnani iñömö botö ñäo bai botö emönö ante acädänimpa, ante cædinque Wængongui mänömaï pänämaï inte edæ ee cæcampa. Wæætē, Tömēnani ñäo iñömö quëwencädänimpa, ante tömengä godö badongä ate

tömēnāni nāō bai ēmōnānīpa. ²⁴ Edæ mōni oodeocabo iñōmōnite mīnitō oodeomīni ināmaī iñōmīnite Wængonguī mōnō tōmāmō imonte mānōmaī cæcæte ante aa pegacāīmpa. ²⁵ Wængonguī iīmaī angampa, ante Ootea wodi yewæmongacāīmpa.

“Botō guīdēnāni ināmaī iñōnānite botō wæætē,

Botō guīdēmīni, ante apænecæboīmpa.

Onquiyængā botō nē waadedāmaī ingaingā iñongante botō wæætē,

Botō nē waadebi iīmpa, ancæboīmpa.

²⁶ Ayæ, ‘Botō guīdēmīni ināmaī imīnīpa,’ ante botō ongonte āñōmō adoyōmō ongōninque

botō wæætē edæ, ‘Botō Wængonguīmo nē Quēwēmo wēmīni imīnīpa,’ ancæboīmpa.”

Ante adocā Wængonguī nānō ānō ante yewæmongacāīmpa. ²⁷ Idægoidi inānit-edō ante yedæ ānīnque Itaiya wodi iīmaī apænægacāīmpa. “Gāwapæ wedeca ēmōnaicoo nanguī pōnī ōñō bai idægoidi adopodāni nanguī pōnī ināni incæte pancadāniya guiyā wæantodōni bai mānīmpodānīque quēwencādānīmpa. ²⁸ Edæ Wængonguī, Inguīpoga quēwēnāni inānite apænte ānīnque botō angainō bai do edæ cæcæboīmpa, ante nē apænēgaingā inte tōmengā adocā, Idæwaa, ante quingæ pōnī edæ iīnque cæcæcāīmpa,” ante Itaiya wodi yewæmongacāīmpa. ²⁹ Adocā Itaiya wēēnē iīmainō ante nānō apænēgainō bai impa.

“Mōnō Awēnē nē Tæiyæ Awēnē tæi pīñængā inte dodāni inānite, Mīnitō pæināni yebænte nanguī ināni bacædānīmpa, ante cædinque pancadāniya inānite ata cæpocā quēwengadānīmpa. Mānōmaī ante cædāmaī ingā bai,

mōnō wæætē Todōmā quēwengāināni bai dæ badīnque Gōmoda nāni quēwēñōmō dæ ba bai mōnō adobaī edæ dæ bacædōmōīmpa,” ante nānō angainō bai impa.

Idægoidi adobaī pōnēnīnque quēwenguēnēnāni inānīpa

³⁰ Iīnīnque æbānō ante anguiī. Oodeo ināmaī ināni guīquēnē, Nō entawēmōni bacæmōnīmpa, ante ānāmaī ingadānīmpa. Incæte Wængonguī godō cæcā beyænque tōmēnāni wede pōnēnīnque wede nāni pōnēnō beyænque Wængonguī ayongā nō entawēnāni do badānīpa. ³¹ Idægoidi guīquēnē, Nō cædāni, ante mōni wææ angainō beyænque nō entawēmōni bacæmīnīmpa, ante nē angaināni inte eyepæ cædāmaī inānīpa. ³² Quīnante eyepæ cædāmaī inānīi. Tōmēnāni wede pōnēnāmaī ināni inte wæætē edæ, Mōnō nanguī cædinque nō cæmōni bacæmōnīmpa, ānīnque oda cæte nāni pōnēnō beyænque dicaboga tee tēwate bai cædinque eyepæ cædāmaī ingadānīmpa. ³³ Edæ do Wængonguī beyæ yewæmongatīmpa.

“Aquēnē quēwēnānīi. Botō Codito ingante Tiōno nāni quēwēñōmō dica bai gō cæbo gongængā adīnque edæ

wadāni dicaboga tee tēwate bai pōnēnāmaī ināni inte tæ go wææncædānīmpa.

Tōmengā adocā ingante nē pōnengā guīquēnē cōwē edæ guingo imōnāmaī inte quēwencæcāīmpa,”

ante yewæmongatīmpa.

10 Botō tōnīnāmīni ēñēedāni. Idægoidi quēwencādānīmpa, ante botō mīmōnē nanguī aīnente wædinque Wængonguī ingante apænedīnque botō, Bitō æmi beyænque quēwencādānīmpa, ante cōwē apænebopa. ² Wængonguī beyæ nō cæcæīmpa, ante cæinente wædānīpa, ante nāwangā impa. Incæte tōmēnāni, Wængonguī beyæ nō cæcæte ante æbānō cæquīi, ante ēñēnāmaī ināni inte ōnonque cæte

wædänipa. Botö, Mänömaï impa, ante nê apænebo inömo imopa. ³Edæ Wængongui pönö badongä ate mönö tömengä ayongä nö entawëmö bamompa, ante êñênämaï inäni inte idægoidi inömö, Nämä mönö cædö beyænque nö cæmö bacæimpa, ante cædinque edæ oda cægadänimpa. Mänömaï cædinque tömênäni Wængongui nänö nö cægainö ante edæ Baa angadänimpa. ⁴Nö cæmö bacæte ante Wængongui nänö wææ angainö ante êñente cæquênëmö inte mönö tömämö wii eyepæ inte wægamöimpa. Mänömaï inte wæyömonte Codito inömö, Mini pönencabo Wængongui ayongä nö entawëmini bacæminimpa, ante cædinque mäninö Wængongui nänö wææ angainö ante tömänö ante inque cægacäimpa. Ininque tömengä mänömaï inque cæcä adinque Wængongui mönö imonte wæætê wææ änämaï ingampa.

⁵Iïmaï cæedäni, ante botö wææ angainö êñente cædinque nö cædäni badänipa, ante Möitee wodi iïmaï ante yewæmongacäimpa. “Nê êñente cæcä inömö tömengä nänö êñente cædö beyænque quëwencæcäimpa,” ante yewæmongacäimpa. ⁶Wæætê, Mönö wede pönencabo æbänö cæte Wængongui ayongä nö entawëmö imöö, ante iïmaï ante adocä yewæmongacäimpa. “Bitö, ‘Æcänö öönädê æi äñete wæænguingää,’ ante nämäneque änämaï ie.” Mänömaï ante tömengä, Codito ingante æi äñete wææncæte ante mönö pönênämaï ingæimpa, ante ancæte ante yewæmongacäimpa. Inämpa Codito pönämaï ingampa diyæ æite mäwæmi wæænguingää. Dobæ edæ inguipoga pongacäimpa. ⁷“Ayæ, ‘Æcänö tadömengadæ wæi äñete ænguingää,’ ante änämaï ie.” Inämpa Codito ayæ öñongampa diyæ wæite mämi æænguingää. Edæ Codito dobæ nãni ömæmonte quëwengampa.

⁸Ininque, Mönö wede pönencabo æbänö nö cæmö bamöö, ante æbänö ante yewæmongacäi. Edæ, Wede pönengæimpa, ante mönitö apænemöni mini êñênine ante adode ante iïmaï ante yewæmongacäimpa. “Wængongui nänö nö änöne inömö edæ bitö weca eyequei pöni ênepa. Edæ bitö önöne tedeyömi bitö mimöno pönênömi tömengä nänö nö änöne edæ adoyömö pöni ênepa.” ⁹Æbänö cæte quëwenguui, ante iïmaï ante ênepa. Itota Codito Tæiyæ Awënë inongä ingampa, ante bitö önöneca apænedinque, Itota Codito wænte öñöñongante Wængongui angä nãni ömæmongacäimpa, ante bitö mimöno pönëmi adinque tömengä ængä beyænque quëwencæbiimpa, ante adode incæ ênepa. ¹⁰Mimöno edæ wede pönëninque mönö Wængongui ayongä nö entawëmö bamompa. Mänömainö ante wede pönëmopa, ante önöneca apæneyömonte tömengä ængä beyænque mönö quëwëmopa.

¹¹Codito ingantedö ante apænedinque, “Tömengä ingante nê wede pönengä inömö tömengä edæ guingo imönämaï incæcäimpa,” ante Wængongui angä êñente yewæmongadänimpa. ¹²Edæ mönitö oodeomöni inömonite munitö wæætê oodeomöni inämaï inöminite mönö tömämö imonte adinque mönö Awënë inömö edæ, Adoyömö pöni iminipa, ante acampa. Ininque tömengä adocä tömämö Awënë inongä ingampa. Ayæ tömengä ingante aa pemö êñëninque tömengä inömö edæ tömämö imonte nangui pöni pönö cæcä æmompä.

¹³Iïmaï ante Wængongui beyæ ante yewæmongatimpa. “Mönö Awënë ëmöwo ante apænedinque aa pedäni êñëninque mönö Awënë inömö edæ tömênäni tömänäni inänite ængä beyænque quëwencædänimpa.” ¹⁴Ininque tömengä ingante nê pönênämaï inäni inömö ædö cæte tömengä ingante aa pequïnänii. Ayæ tömengä ëmöwo ante êñênämaï inäni inömö tömengä ingante ædö cæte pönenguinänii. Ayæ tömengä ëmöwo ante wadäni gote apænedämaï inönäni tömênäni ædö cæte êñënguïnänii. ¹⁵Ayæ edæ wadäni da godönämaï inönäni nê apænequênênäni wæætê

ædö cæte gote apænequinänii. Iimainö ante edæ Wængongui beyæ ante yewæmongatimpa. “Tömengä waa pöni nänö cægainö ante nê watapæ apænedäni iñömö tömënäni nani apæneca gote cægöniwa iñömö edæ waa pöni ewadänipa,” ante nani yewæmonte angainö bai impa. Edæ nê apæneca godäni inänite Wængongui waa acampa.

¹⁶Mönö Awënë ingantedö ante watapæ apænedäni ëñëningue idægoidi pancadäniya Ao angadänimpa. Pancadäniya guiquënë Baa angadänimpa. Tömënäni mänömainö nani cædinö ante Itaiya wodi iimaï ante yewæmongacäimpa. “Awënë Wængongui ëñëmi. Mönitö apænemöni tömënäni nani ëñënö ante edæ æcanö ëñente pönengä. Iñampa nê pönengä iñömö edæ dæ angä awædö,” ante yewæmongacäimpa. ¹⁷Inique gode änäni ate nê ëñënanique wede pönënäni badänipa. Ayæ Codito nänö änönö ante gode ante apænedäni beyanque nê ëñënanäni badänipa. ¹⁸Inique botö, Mäninö ante idægoidi gobæ ongönänipa diyæ ëñënamäi inguinänii, ämopa. Do ëñënanitapa, ante edæ iimaï ante Wængongui beyæ yewæmongatimpa. “Nê apænedäni inguipoga tömäo gote tededäni ëñënanäni.

Waodäni inguipoga nani quëwenganca quëwëñönänite mäninö tömënäni nani apænedö ante do ëñënanäni,” ante yewæmongatimpa.

¹⁹Ayæ wæætë, Idægoidi önömonca ëñëningue ömæcadäni inänipa diyæ ëñënamäi inguinänii. Do ëñënanitapa. Edæ Möitee wodi incæ iimaï ante yewæmongacäimpa. “Wadäni önönänique iñönänite botö godö waa cæbo adinque mîni idægocabo wæætë, Mönitö imönite wii pönö cæbii, ante piinte wæcæminimpa. Ayæ wadäni ocai ömæcadäni iñönänite

botö godö waa cæbo adinque mînitö wæætë nê piinte amîni bacæminimpa,”

Ante cæcæte ante Wængongui pönö cægacäimpa. ²⁰Itaiya wodi guiquënë Wængongui beyæ ante guïñënamäi inte apænecacäimpa.

“Wadäni iñömö botö imote ante diqui diqui mînamäi inäni incæte do adänitapa.

Ayæ, Wængongui ingante ainëmönipa, ante änämäi iñönänite, Botö imote aedäni, ante botö odömömo adänitapa.”

²¹Äninqe Itaiya wodi idægoidi inänitedö ante apænedinque, “Eñënamäi inte Baa änönäni iñönänite botö, Pöedäni, ante tömää itädë önömpo compo compo cæbo incæte pönämäi inänitapa.”

Idægoidi pancadäniya inänite Wængongui apænte ængä

11 Inique botö iimaï ante apænebopa. Tömengä quinäni iñönänite Wængongui dicæ idægoidi inänite Baa angantawogaa. Iñampa botö adobo näwä idægobo imopa. Abadäo wodi pæïmo inömo inte botö edæ Beencaminö wodi pæïmo inömo inte tömengä pæinäni tönö adocabobo tömëmo inömo imopa. ²Idægoidi botö quinäni incädänimpa, äninqe Wængongui wëñëñedë pöni mönitö imönite adinque do apænte ængacäimpa. Inique mönitö tömengä nänö nê agaimöni iñömönite tömengä cöwë Baa änämäi ingacäimpa. Idægoidi inänite piinte äninqe Ediya wodi Wængongui ingante apænecacäimpa, ante æbänö yewæmonte ongompa, ante mînitö adämäi imînitawo.

³“Awënë ëñëmi. Bitö beyæ nê apænedäni inänite wænöninqe idægoidi godömenque cædinque, Wængongui qui, ante nani iya tainca bæ tadinque edæ wido cædänitapa. Ayæ botö adoboque inte edæ ayæ quëwëñömmote botö imote wænön-cæte ante cædäni wæbo abi.” ⁴Äñongante Wængongui, “Iñampa botö tiæte müido

ganca mänimpodäni inänite, Botö quinäni inänipa, ante wææ gompobo quëwënäni apa quëwëe. Wadäni näni, Mönitö wængonguï Baado ingampa, näni änogä weca botö quinäni iñömö edæ da guicapodämaï inänipa cæbii,” angacäimpa, ante näni yewæmongainta adämaï imïnitawoo.

⁵ Nöwo iñömö edæ adobaï impa. Idægomöni möni cabo incæ mäa pönï imöni inte Wængonguï ingante Baa änämaï iñömönite tömengä mönitö imönite waadete pönö cædinque, Botö quimïni imïnipa, ante apænte ængampa. ⁶ Ìninqe, Wængonguï waadete pönö cædinque apænte ængampa, ante adinqe tömëmonque waa cæmö beyæ ædö cæte Wængonguï apænte ænguingää. Ìnæmpa tömëmonque waa cæmö beyæ Wængonguï mönö imonte apænte ængä baï, Wængonguï waadete pönö cæcampa, ante ædö cæte angüënë ï. Wæætë edæ tömëmonque waa cæmö beyæ Wængonguï apænte ængä baï tömengä adocä ædö cæte nänö waadete pönö cædö beyænque mönö imonte apænte ængüëngää. Ìnæmpa Wængonguï waadete pönö cædinque apænte ængä ininqe, Tömëmonque waa cæmompa, ante ædö cæte angüü.

⁷ Mänömaï ï ininqe æbänö ante angüü. Edæ idægoidi tömënäni näni nangui æinënö ante diqui diqui minte ænämaï iñönäni mönö iñömö Wængonguï nänö në apænte ængaimö imö iñömö edæ do æntamompa. Në ænämaï inäni inänite Wængonguï ee ayongante mimö ömædënäni bažadänimpa. ⁸ Ìimaï ante Wængonguï beyæ näni yewæmongainö baï ingatimpa. “Tömënäni inänite Wængonguï godö cæcä ate möwo möinente baï wädäni inte tömënäni awinca ëmönäni incæ ñowo ganca adämaï inte wädänipa. Önömonca ëmoncadäni incæ edæ ëñënämaï inte wädänipa,” ante yewæmongatimpa. ⁹ Ayæ awënë odeye Dabii wodi Wængonguï ingante apænedinqe iïmaïnö ante apænegacäimpa.

“Wængonguï ëñëmi. Waodäni näni wænguinque gote ææmä bedäni baï cædinque iïnäni iñömö edæ wapiticæ näni towënönö ante gote towënanipa. Incæte bitö godö cæbi ate tömënäni näni towënö beyæ edæ wæncädänimpa, ämopa.

Tömënäni tee tëwate baï oda cæte wæyönäni bitö godö pämi wæcädänimpa, ämopa.

¹⁰ Bitö godö cæbi ate tömënäni awinca edæ mä mämönte baï bamöninque adämaï incädänimpa.

Ayæ teëmë mongæninque boca ñongænte cöwë wæcädänimpa, ämopa,” ante awënë Dabii wodi Wængonguï ingante apænegacäimpa.

Idægoidi inämaï inäni quëwënanipa, ante

¹¹ Nöwo wæætë iïmaï ämopa. Do oda cädäni incæ idægoidi iñömö dicæ æmäwo tæ go wæænguïnäni inänitawogaa. Ìnæmpa ayæ ate ængæ gantidinqe tömënäni në quëwenguïnäni inänipa. Incæte Wængonguï, Tömënäni ëñënämaï cädäni beyæ wädäni quëwënäni adinqe idægoidi wæætë, Mönö quëwengade impa, ante piinte wæcädänimpa, ante godö cæcä ate idægoidi edæ oda cægadänimpa. ¹² Ìninqe idægoidi ëñënämaï cædinque ænämaï inäni beyæ mönö inguipoga tömämæ mönö quëwencabo wæætë edæ nangui pönï æmompa. Tömënäni ænämaï inte ömæpodäni wädäni beyænque mïnitö idægomïni inämaï imïni wæætë nangui pönï æmïnipa. Ìninqe idægoidi näni quëwenguïmämo iïncayæ ate eyepæ pönï ænäni ate edæ æbänö baquü. Edæ idægoidi iïncayæ ate eyepæ pönï ænte entawënäni beyænque mönö waocabo tömämö godömenque nangui pönï ænte entawengæimpa.

¹³Idægomiñi inämaï imini iminite apänebo eñeedäni. Botö imote Codito, Idægoidi inämaï inäni inänite apäñecäbiimpa, ante da godongä gotabopa. Ìninqe botö, Minitö iminite në apänebo inte tobopa, ante nanguï tedebo. ¹⁴Edæ, Idægoidi inämaï inäni incæ do quëwëñanipa, ante botö tedebo eñente wædinqe botö guiidëñani idægoidi wæætë, Mönitö adobaï quëwencämönimpa, ante piinte wæcädänimpa, ante tedebo. Ayæ adodäni pancadäniya godömenque pönëninque quëwencädänimpa, ante cædinqe botö edæ nanguï tedebo.

¹⁵Idægoidi inänite Baa ante wido cædinqe Wængongui wæætë inguiwoga tömämæ quëwëmö iñömönte piyänë cædinqe edæ waadete pönö cægacäimpa. Ìninqe tömengä iincayæ ate idægoidi inänite Ao ante ængä ate edæ æbänö baquï. Mäniñedë ate edæ mönö wænte öñonte bai inömö inte edæ mönö ñäni ömæmonte quëwengäimpa. ¹⁶Ïmaï ante pönengäimpa. Päö pancaboga pancæte bai wædæñque inäni inte täno näni pönente quëwencabo iñömö täiyæ waëmö inäni ininqe iincayæ näni pönente quëwencabo guiquënë päö babo bai adobaï inäni inte tömëñani adobaï täiyæ waëmö inänipa, ante pönengäimpa. Täno pönengainäni guiquënë tæcæguinto bai inönäni inte täiyæ waëmö inäni ininqe edæ iincayæ pönëñani guiquënë yæpænto bai inönäni inte adobaï täiyæ waëmö inänipa.

¹⁷Odibowæ önonque pæwæ incæ wainca incacäimpa, ante cædinqe waocä tömengä nänö mingaiwæ waa pönï incawæ adinqe yæpængö nämænte godö önonque pæwæ yæpæntoga mine timongä aminipa. Idægoidi iñömö waocä nänö minte pæwæ bai iñönänite Wængongui pancadäniya inänite yæpængö wæi ñämænte bai wido cæcä wædänipa. Tömëñani mänömaï wæyönäni bitö guiquënë önonque pæwæ yæpængö bai imitapa. Incæte Wængongui, Odibowæ yæpængoncoo bai tæcæguinto beyænque odæ yate bai pæte incacäimpa, ante odibowæ yæpæntoga godö mini tinte bai cædinqe bitö imite waadete pönö cæcä ate bitö idægoidi beyænque miimi inte ongömipa. ¹⁸Mänömaï i ininqe bitö wæætë edæ, Wængongui botö imote pönö cæcæte ante tömëñani inänite wido cæcampa, ante bitö nämä ængö cæcæte ante cædinqe idægoidi inänite ante wiï piinte ancæbiimpa. Ìñæmpa tæcæguinto ëwa bai inäni inte idægoidi iñömö edæ bitö beyæ dicæ quëwëñaniyaa. Wæætë edæ tæcæguinto ëwa bai inäni beyænque bitö quëwëmipa, ante apänebo eñëninque bitö piimi ininqe, Mänömaï impa, ante täno pönë.

¹⁹Ìninqe bitö, “Odæ yacäimpa, ante cædinqe godö mine timönäni bai Wængongui botö imote pönö cæcæte ante cædinqe idægoidi inänite wæætë wido cæcampa,” ante pönëmitawoo. ²⁰Bitö pönëñö edæ näwangä impa. Incæte edæ tömëñani näni pönëñamaï inö beyænque Wængongui tömëñani inänite wido cægacäimpa. Bitö guiquënë wede bitö pönëñö beyænque miimi inte ongömipa. Ìninqe bitö guiñente wædinqe edæ nämä ængö cædämaï inte edæ, Botö waëmö imo beyæ cæcantapa, ante pönëñamaï imæwe. ²¹Ìñæmpa näwä yæpængö bai inäni inänite Wængongui tapodämaï inongä inte bitö önömiqwe iñömite dicæ ata cæpoqingä.

²²Ìninqe, Wængongui në waadete cædongä incæ cöwë në apænte pangä ingampa, ante pönë. Tömengä iñömö në oda cædäni inänite pangampa. Wæætë bitö në waadete cædongä nempo quëwëmi ininqe tömengä bitö imite waadete cæbaingampa. Incæte tömengä nempo wiï quëwëmi ininqe tömengä wæætë bitö imite edæ wæi ñämænte bai wido cæbaingampa. ²³Idægoidi guiquënë, Idæwaa pönëñamaï inte awædö, ante ocæ ëmænte pönäni adinqe Wængongui në täi piñæñongä inte tömëñani inänite wæætë ado awæ yæpæntoga godö mini timonte

baī pōnō cēcā ate mīnāni edæ ongōmainānīpa. ²⁴ Waodāni waa incawæ yæpængō nāmænte ōnonque pæwæ yæpæntoga godō nāni mīne tīmōnō baī Wængonguī wī adobaī cæcampa. Wæætē edæ bitō ōnonque pædīwæ yæpængō baī īñōmite tōmengā waadete pōnō nāmænte baī cædinque, Nāwā idægobi babīpa, ante waa pæwæ yæpæntoga godō mīni tīmōnte baī cæcampa. Bitō īmite mānōmaī waa cēcā īnongā inte tōmengā idægoidi īnānite æbānō godōmenque waa cæbaingāā. Tōmēnāni īñōmō waa pōnī pæwæ yæpængoncoo tōmengā nānō wæi nāemæncōo baī inte wæyōnānite adowænē yæpæntoga godō mīne tīmōnte baī cædinque tōmengā tōmēnāni īnānite, Nāwā idægomīni inte mīnitō wæætē mīmīni ongoncæmīnīpa, ante do cæcæcāimpa.

Idægoidi īnque bayonte quēwencædānīpa, ante

²⁵ Īnānāni ēñēedāni. Mīnitō nāmā ængō cædāmaī incæmīnīpa, ante cædinque botō wēēnēnedē mīni ēñēnāmaī ingainō ante edæ wææ āmopa. Mīnitō idægomīni īnāmaī īmīni mīni pōnencabo eyepæ pōnī mīni yebænganca idægoidi īñōmō nōwo mīmō ōmædēnāni inte wædōnāni inte edæ māninganca cōwē mīmō ōmædēnāni inte wæcædānīpa. ²⁶ Īncayæ ate guiquēnē idægoidi tōmānāni quēwenguīnāni īnānīpa. Edæ īīmaī ante yewæmōnte ongōmpa.

“Mōnō nā cæyænte baī tee mōnete baī wæwēñōmōnte nē Nīmpo Cēcā īñōmō Tīōno īñōmō quēwente poncæcāimpa.

Aacobo wodi pæīnāni Wængonguī ingante ēñēnāmaī cæte quēwēnāni adīnque nē Nīmpo Cēcā īñōmō tōmēnāni nāni ēñēnāmaī entawēnō wadæ cēcā ate tōmēnāni wæætē ēñente cæte quēwencædānīpa.

²⁷ Īnīnque wēnæ wēnæ nāni cægāinō ante wadæ cæte wido cædinque Wængonguī tōmēnāni īnānite īīmaī angampa.

Botō pōnō cæbo ate mīnitō Ao āmīni īnīnque edæ mōnō godongāmæ waa cæte quēwengæīmpa, ante Wængonguī angampa,” ante yewæmongadānīpa.

²⁸ Codito ingantedō ante watapæ ēñente pōnēnīnque mīnitō idægomīni īnāmaī īmīni do quēwēmīni beyæ idægoidi wæætē Wængonguī ingante pīnte adānīpa. Incæte tōmēnāni mæmæīdi īnānite nē apænte ængaingā inte Wængonguī wæætē mæmæīdi beyænque ante pōnēnīnque nōwodāni īnānite waadete pōnengampa.

²⁹ Edæ waomō īmōnte quīncoomē pōnongā æñōmōnte Wængonguī adodō ō ænāmaī ingampa. Ayæ adobaī waomō īmōnte aa pedīnque tōmengā wadō ante ānāmaī inte edæ adodō ante edæ cōwē aa pecampa. ³⁰ Mīnitō wēēnēnedē ēñēnāmaī cæmīni incæte Wængonguī īñōmō idægoidi ēñēnāmaī cædāni beyæ mīnitō īmīnite wæætē waadete cædinque pōnō ata cæpocā quēwēmīnīpa. ³¹ Ayæ adobaī mīnitō īmīnite pōnō waadete ata cæpocā quēwēmīni beyæ idægoidi ēñēnāmaī cædāni īñōnānite Wængonguī nōwo tōmēnāni īnānite adobaī waadete cædinque godō ata cæpocā quēwēnānīpa. ³² Īnīnque tōmengā, Mīni waocabo tōmāmīni īmīnite botō waadete cædinque pōnō ata cæpocæboīmpa, ante cædinque, Mīni ēñēnāmaī cæcabo īnōmīni inte mīnitō nāmā ēō toyænte aamō cædāmaī incæmīnīpa, ante tōmāmō īmōnte nā cæyænte baī cēcā wæcongāmōīmpa.

³³ Īnīnque Wængonguī nangūī pōnī waadete entawēnongā īñongante tōmengā nānō pōnō cædōnō ante mōnō ædō cæte tee mante aquīī. Tōmengā tōmancoo do adongā inte nangūī pōnī ēñēnongā inte cēcā ingānō anguēnē. Tōmengā edæ, Æbānō ī, ante do againgā inte edæ, Æbānō cæquīī, ante do apænte āñongante mōnō wao-

cabo wæætē tōmengā nānō cædō ante ædō cæte ēñenguīi. Tōmengā ædōnō ponte ædōnō gocāā, ante pōnente wædinque mōnō tōmengā ōnōwa amompa diyæ taadō aquiī. ³⁴ Edæ iīmaī ante nāni yewæmongainō bai impa. “Mōnō Awēnē æbānō pōnengāā, ante pōnente wædinque æcānō ēñengāā. Ayæ, Iīmaī cæqui impa, ante mōnō tōmengā ingante edæ ædō cæte odōmonte apænequiī. ³⁵ Wængonguī ingante æcānō do godongā inte wæætē, Bitō debe iīmipa, ante anguingāā. Iīnæmpa tōmengā ingante godōmompā diyæ debe inguingāā,” ante Itaiya wodi nānō yewæmongainō bai impa. ³⁶ Edæ tōmengā nānō pōnongaincooque inte edæ tōmancoo ongompa. Mōnō wao-cabo iīnōmō tōmengā badongā beyænque tōmengā quīmō baquinque ongōmompā. Ayæ adobai edæ tōmengā badongā beyænque tōmancoo tōmengā quincōoque edæ baquinque ongoncoopa. Edæ tōmengā adocanque pōni nāō entawente edæ cōwē tæi ēmoncæcāimpa. Mānōmaī impa, ante mōnō, Amēē, ante apænecæimpa.

Wængonguī quīmō iīmompā, ante cæte quēwengæimpa

12 Botō tōniñamini ēñēedāni. Wængonguī waadete pōnō waa cæcā ængaimini inte mīnitō iīmaī cæedāni, ante botō nanguī āmopa. Wængonguī qui, ante baō pædæ godōnāni waa ængā bai mīnitō adobai edæ, Wængonguī quīmōni iīmōnipa, ante miīmīni inte edæ tōmengā ingante nāmā pædæ godōmīni ængæedāni. Mānōmaī cædinque mīnitō tōmengā ōnōwa inō mīni ædæ wæænte nanguī cæquēnēnō ante edæ do cæmīni incæmīnimpa. Mānōmaī godōmīni ænīnque tōmengā wæætē edæ, Botō ayōmo tæiyæ waēmō pōnōmīni æmopa, ante tocæcāimpa. ² Inguipogaque ante pōnente mīni cægāinō ante nōwo nīmpo cædinque mīnitō miīmīni mīni quēwenguinque ante edæ ocai mīinque encate bai nōingā ante pōnēedāni. Mānōmaī cædinque mīnitō, Wængonguī waa pōni nānō ānōnō ante, Æbānō ī, ante ædæmō ēñēnīnque, Tōmengā nānō ānō iīnōmō eyepæ pōni impa, ante ēñencæmīnimpa. Mānīnō ante ēñente cæte quēwēmō inte mōnō tōmengā tōnō godongāmæ waa tocæimpa.

³ Wængonguī waadete pōnō cæcā ate botō nē apænebo badīmo inte iīmaī ante apænebopa. Mīnitō nāmā pōnēnīnque, Nænæmo iīmopa, ante pōnēnāmaī iedāni. Wængonguī pōnō badongā ate mīnitō wede pōnēmīni badīmīni inte mīni wede pōnenganca māningancaque pōnēnīnque iīmaīnō ante pōnēedāni. Botō ōnōmoque bai iīnōmo iīmopa, ante ocai encamīni inte tōō pōni pōnēedāni. ⁴ Mōnō baō adoyonque pōni ēñamō incæte wīi adodonque mōnō cæquēnēnō ante ēñamompā. Iīnīnque mōnō aquīnō ante awīnca ēmōnīnque mōnō dao dao goquīnō ante ōnōwa ēwamompā. Ayæ wadō mōnō cæquīnō ante wayō ēñadinque mōnō wæætē wadō mōnō cæquīnō ante wayō ēñadinque wayō wayō mōnō ēñacoo ēñamompā. ⁵ Iīnīnque wayō wayō ēñamō incæ mōnō baō pæ pagænguīncoo adoyonque ī bai mōnō adobai Codito nempo mōnō quēwencabo nanguī pōni iīmō incæte adocabomō iīnōmō iīmompā.

⁶ Iīnīnque mōnō adocabomō iīnōmonte Wængonguī waadete pōnō cædinque mōnō iīmonte wadō wadō mōnō cæquīnō ante tōmānō pōnongā æmompā. Iīnīnque mōnō tōmengā da pōnongā mōnō ænganca edæ adoganca wadō wadō cæmompā. Mānōmaī ænte cædōmō iīnōmonte pancamīniya iīmīnite Wængonguī pōnō apænecā ēñēnīnque mīnitō tōmengā beyæ nē apænēmīni do badīnque wede mīni pōnenganca apæneedāni. ⁷ Wæætē wamīni iīmīnite Wængonguī pōnō cæcā ænīnque mīnitō wadāni iīnānite nē cæmīni do badīnque wadāni beyæ cæcæmīnimpa. Wæætē wamīni iīmīnite tōmengā pōnō cædinque odōmonte apænecā ēñēnīnque mīnitō nē odō-

monte apänemini do badinque odömonte apänecäminimpa. ⁸ Ayä wæätë wamini iminite Wængongui pönö waadete apänecä ëñëninque në waadete apänemini badinque minitö iñömö wëntæye inte wädäni inänite ædämö apänemini ëñëninque tömënäni wæätë edæ wampo pönëninque tæi piñænte cæcädänimpa. Wamini iminite Wængongui pönongä æninque në nënempomini badinque minitö, Tömëmöni qui, ante wädämaï inte wæätë wädäni nãni ænguënënö ante eyepæ godömini æncädänimpa. Wamini iminite Wængongui pönö angä ëñëninque minitö wæätë awënëidi bai në ämini badinque wädäni inänite nöingä cæte awënëidi bai ancäminimpa. Wamini iminite Wængongui ædämö waadete pönö waa cæcä æninque minitö wæätë ædämö waadete cæmini do badinque wädäni inänite ædämö waadete godö waa cædinque edæ wädämaï inte tocäminimpa.

Codito nempo quëwëninque iïmaï cæcäimpa, ante

⁹ Botö waadete pönëmopa, ante tedemini ininque minitö nöinö cæte waadete pönecäminimpa. Wiwa mini cædönö ante piïninque wido cædäni. Wæätë, Quinö waa cæquiï, ante adinque mäninö ante ænte minitö mimönë ædämö entwëninque cöwë waa cæte quëwëedäni. ¹⁰ Mönö waadete pönencabo imompa, ante pönëninque wacä ingä wacä ingä waadete pönente cædäni. Wädäni nãænänäni inänipa, ante minitö tömënäni inänite ængö cæte bai cædinque wæätë, Botö wädämo imopa, ante nämä ængö cædämaï iedäni.

¹¹ Tæi piñænte ewocadinque mönö Awënë beyä ante wëntædämaï inte cædäni.

¹² Watapæ bacäimpa, ante pönëninque tocäminimpa. Caate wæwëmini incæte wëntæye badämaï inte ee cædäni. Nïmpo cædämaï inte Wængongui ingante cöwë apäneedäni.

¹³ Wængongui quinäni ænguënänäni inte wädäni adinque minitö mäincoo wæätë nënempomini æncädänimpa. Ayä, Botö oncönë pö guiite cænte möedäni, ante wädäni inänite waadete cædäni.

¹⁴ Minitö iminite në piïnte cædäni iñönänite minitö tömënäni inänite waadete godö apäneedäni. Edæ tömënäni inänite waadete apänedinque, Wængongui minitö iminite waa cæcäcäimpa, ante apänedinque wæätë piïnte änämaï iedäni.

¹⁵ Në watapæ todäni tönö godongämæ watapæ toedäni. Në Ca wädäni tönö minitö godongämæ Ca ca wæedäni.

¹⁶ Mönö pönencabo imompa, ante adoyömö pönente quëwëedäni. Önönäni nãni në änönäni tönö godongämæ cædinque, Botö nãænämo imopa, ante pönënämaï iedäni. Minitö, Wädäni pönömenque ocai encayönäni botö godömenque nanguï pöni encabo imopa, ante nämä ante pönënämaï iedäni.

¹⁷ Wädäni minitö iminite pönö wënæ wënæ cædäni adinque minitö wæätë godö wënæ wënæ cædämaï iedäni. Ayä, Quinö waa cæquiï, ante tömänäni nãni waa adönö ante adinque minitö mäninonque ante cædäni. ¹⁸ Eyepæ imini inte minitö cæganca cædinque tömänäni tönö godongämæ piyänë cæte quëwëedäni. ¹⁹ Botö në waademini ëñëedäni. Mönö Awënë beyä iïmaï ante yewæmongatimpa. “Wënæ wënæ cædäni adinque botö wënæ wënæ nãni cædinö beyä ante në apænte pangüënëmo inte tömëmö eyepæ wæätë godö cæbo wæcädänimpa, ante Awënë angampa,” ante yewæmonte ongompa cæminii. Minitö iminite pönö wënæ wënæ cædäni wæmini ininque edæ wæätë godö cædämaï ee aedäni. Edæ në äingä bate pänongä inte Wængongui incæ pancæcäimpa. ²⁰ Wæätë, “Bitö imite në piïnte cæ-

dongä incæ gæwænte wæcä adinque godömi cængæe. Gue ænente wæcä adinque godömi becæe. Edæ mänömaï waa cædinque edæ tömengä guingo imonte nänö wæwenguinque bitö tömengä ingante waa cæcæbiimpa,” ante Wængongui beyæ yewæmonte ongö apa cæbii. ²¹Tömënäni wænæ wænæ nani cædö beyæ oda cædämaï inte wæætë mäninö ante wido cæte bai cædinque bitö waa cædinque edæ tæï emonte gänä cæe.

13 Gobiedöno awënë nempo waodäni ëñente cæte quëwencädänimpa, ante Wængongui incæ godö gö cæcä beyænque gobiedöno awënëidi badänipa. Edæ Wængongui mänömaï ante gö cædämaï ingä bai quingänö awënë ingüenengä. Edæ dæ ancædönimpa. Ìninque gobiedöno awënëidi inänite mönö tömämö Ao äninque ëñente cæcæimpa. ²Ìninque awënë ingante æcänö Baa änaa tömengä nänö apænte pante wæquinque Wængongui nänö goncægäinö ante ëñänämaï inte edæ Baa angampa. ³Në waa cædäni guiquënë awënëidi inänite waa ate todinque guïñänämaï inänipa. Wæætë wænæ wænæ cædäni guiquënë awënëidi inänite guïñente wædänipa. Gobiedöno awënë ingante guïñänämaï inte quëwencæboimpa, ante bitö ämitawoo. Ìninque bitö guïñänämaï inte quëwencæte ante waa cæcæbiimpa. Waa cæbi adinque tömengä, Bitö waa cæbi abopa, ante pönö waa cæcä ìninque bitö guïñänämaï imaimipa.

⁴Botö imote në cædongä inte munitö beyæ waa cæcæcäimpa, ante Wængongui gobiedöno awënë ingante godö gö cæcä ongongampa. Edæ Wængongui ingante në cæcä ìnongä inte tömengä në wænæ wænæ cæcä ingante nö cæte në panguenengä ingampa. Ìninque awënë yaëmë në næægä inge wii önonque næægampa cæbii. Wænæ wænæ cæbi ìninque edæ guïñente wæcæbiimpa. ⁵Ìninque mönö, Pangä wæcæ wæ, äninque awënë ingante ëñente cæcæimpa. Ayæ pangä wæmö incæ wii pangä wæmö incæ mönö mimö në entawente nämä apænte änömö inte mönö awënë ingante Ao ante ëñente edæ nöingä cæcæimpa. ⁶Wængongui beyæ në cædönäni inte awënëidi ìñömö tömënäni nempo quëwënäni inänite cöwë aadinque mäninque cæte quëwënänipa. Mänömaï ì ìninque munitö, Awënëidi eyepæ æninque mönitö beyæ cæcædänimpa, ante tömënäni nani äinta pædæ godömini ænänipa.

⁷Æcämenque ingante cæquënëmini imini inte munitö tömännäni inänite mini cæquënganca do godö cæmini æncædänimpa. Awënë nempo quëwëñömonte tömengä eyepæ æninque mönö beyæ cæcæcäimpa, ante munitö awënë nänö äinta godongüënëmini inte do godömini ængædäni. Waocä ingante munitö guïñente ëñenquënëmini imini ìninque tömengä ingante guïñente ëñeedäni. Waocä ingante munitö waa aquënëmini imini ìninque edæ tömengä ingante waa aedäni.

⁸Wacä ingante mini cæquënëno ante edæ ee ongönämaï inte godö cæmini ængä ate abæ tawænte gocæbiimpa. Wæætë wacä ingä wacä ingä waadete mini pönenguënëno ante edæ godongämæ cöwë waadete pönenguënëmini iminipa. Wadäni inänite në waadete pönengä ìñömö tömengä ìñömö Wængongui nänö, Ìmaï cædäni, ante nänö wææ angäinö ante do ëñente cæcä ingampa. ⁹Tömëmi nämä bitö waadete pönönö ganca wacä ingante adonganca waadete pönencæbiimpa, ante Möitee wodi yewæmongacäimpa. Mänine adodeque ante ëñente cædinque waocä Wængongui nänö wææ angäinö ante tömännö do ìinque cæcampa. Edæ, “Bitö nänöogængä inämaï ìñongante godö guëa mönämaï ìe. Wacä ingante godö wænönämaï ìe. Wacä nänö ëadincoo adinque godö ænämaï ìe. Wacä wænæ wænæ cæcä atabopa, ante godö babæ wapiticæ apænedämaï ìe. Wacä qui ante æinente

wædāmaï ie.” Mänīnecoo Wængonguï nänö wææ angainecoo ante bitö waadete pönēmi beyænque tōmäne do iinque cætīmpa. Ayæ quīnemē godōmenque wææ ante i mänīne adobaï bitö waadete pönēmi beyænque tōmäne do iinque cætīmpa. ¹⁰Nē waadete pönengä iñōmö edæ wacä ingante cōwē wīwa cædāmaï ingampa. Mänōmaï beyæ nē ædæmō waadete pönēnānique Wængonguï nänö wææ angainö ante iinque cædānīpa.

¹¹Iinque, Ñöwoyedē æbänö oo baquīi, ante do eñēnīnque mīnitö waadete pönente quēwēedāni. Edæ wēēnēñedē mä mönō wede pönēñedē mīnguīpo mönō quēwenguīmāmo iñōmö edæ mänīñedē edæ oo bacæ cædāmaï ingatīmpa. Ñöwo guīquēñē, Oo pōnī bacæīmpa, ante pönente wædīnque mīnitö möwocodē òñōmīnī inte edæ ñānī òmæmōnīnque mīmīnī quēwēedāni. ¹²Wēmō iñōmö mönō wæwēmāmo idæwaa edæ bapa. Mīnguīpoga ñāö baï baquinque edæ oque pönente impa cæmōö. Wēmō iñonte mönō wēnæ wēnæ cædö æmæwo wido cædīnque, mönō wæætē ñāö iñōmö quēwēnīnque edæ wææ cæquincoo wēñate baï cædīnque nāmā wææ gompotawengæīmpa. ¹³Mänōmaï cædīnque mönō itædē quēwēnōmö inte nö pōnī cæcæīmpa. Baonque ante mönō cæinēwēnō ante towēnāmaï inte mönō tī nāmæ nangui bete quidi quidi dowænāmaï ingæīmpa. Mönō wacä tönō godö guēa mönāmaï, cænguī eyepæ cænīnque godōmenque nangui cænāmaï ingæīmpa. Wææt-edö wæætē pīinte cædāmaï inte mönō, Wacä baï bacæboīmpa, ante pīinte adāmaï ingæīmpa. ¹⁴Wæætē wææ cæquincoo entawente baï cædīnque mīnitö nāmā wææ gompotawencæte ante cædīnque mönō Awēñē Itota Codito ingante entawente quēwēedāni. Ayæ baonque ante mīnī cæinēwēnō ante wido cædīnque, Æbänö cæte wēnæ wēnæ cæquīmoo, ante cæcæte ante wædāmaï iedāni.

Mīnitö tōññadāni iñānite pīinte änāmaï iedāni, ante

14 Wacä wīi ædæmō pönengä incæte mīnitö, Mönō pönencabo imōmpa, ante pönēnīnque tōmengä adocabocä nänö baquinque ämīnī pongæedāni. Tōmengä nänö pönēnō ante wæætēdö wæætē änāmaï iedāni. ²Pancadāniya wede pönēnāni inte cænguī adīnque, Nāwä cænguī impa, ante guīñēnāmaï inte quīēmē cænguī incæ edæ dobæ ade cænānīpa. Wadāni guīquēñē æmæ pönente beyæ, Tōmäa baö baacä impa, ante awente baï cædīnque quingāmenque baö incæ cænāmaï inte onguīpoiya pæcooque edæ cænānīpa. ³Incæte tōmäa cænguī nē cænongä iñōmö onguīpoiya pæcooque nē cænongä ingante pīinte adāmaï incæcæīmpa. Wacä ingante, Bitö òñōmīque baï iñōmī inte edæ awente cænāmaï imīpa, ante änāmaï incæcæīmpa. Ayæ wæætē onguīpoiya pæcooque nē cænongä guīquēñē baö nē cænongä ingante, Baacä apa cæwēe, ante apænte ante pīināmaï incæcæīmpa. Edæ nē cænongä ingante Wængonguī Ao änīnque, Botö quīmī imīpa, ante do ængampa. ⁴Iñæmpa tōmengä wacä awēñē ingante nē cæcä iñongante bitö ædö cæte apænte ämīi. Edæ tōmengä awēñē incæ, Waa cæbīpa, angä wædīnque edæ tōmengä adīyæ tæi ongōmaingampa. Wæætē adocä tōmengä awēñē, Wēnæ wēnæ cæbīpa, angä wædīnque edæ tæ go wææmaingampa. Incæte edæ tōmengä mönō Awēñē ingante nē cæcä iñongante mönō Awēñē adocä incæ tæi pīñængä inte eyepæ cædīnque edæ æænö gö cæcä tæi ongoncæcæīmpa.

⁵Ayæ wacä guīquēñē, Pancaōnaa godōmenque waa eönæpa, ante cæcæīmpa, ante pönēñongante wacä guīquēñē, Tōmäa itædē òñōnæque impa, ante pönengampa. Iinque mönō pönencabo wacä wadö wacä wadö pönēmō incæte mönō tōmāmō

iñömö edæ, Nämä botö pönënonque ante botö nö pönente cæcæboimpa, ante edæ mäninonque ante cæcæcäimpa. ⁶Edæ, Pancaönaa godömenque waa ëönæpa, ante nê pönengä guiquënë tömengä mönö Awënë ingante waa adinque mänömainö ante cæcampa. Pancaönaa wii godömenque waa ëönæpa, ante nê pönengä guiquënë tömengä adobaï mönö Awënë ingante waa adinque mänömainö ante cæcampa. Baö nê cænongä guiquënë Wængongui ingante, Waa pönömi cæmopa, ante adobaï mönö Awënë ingante waa adinque cængampa. Baö ate nê awente cænämaï inongä guiquënë tömengä adobaï Wængongui ingante, Waa pönömi cæmopa, ante onguipoiya pæcooque cæninque mönö Awënë ingante waa adinque baö cænämaï ingampa.

⁷Mönö pönencabo iñömonte æcämenque incæ nämä beyænque dicæ quëwengää. Dicæ nämä beyænque wængää. ⁸Wæætë edæ quëwëmö ininque mönö Awënë beyænque quëwëmompä. Wæætë edæ wämö ininque mönö Awënë beyænque wëmompä. Ininque quëwëmö incæ wämö incæ mönö Awënë quimö inömö inte quëwëninque tömengä quimö inte edæ wëmompä. ⁹Edæ do wængainäni beyæ ante miimö quëwëmö beyæ ante Codito tömämö Awënë nänö baquinque edæ wænte nãni ömæmongacäimpa.

¹⁰Bitö guiquënë bitö töninacä ingante ædö cæte apænte ämii. Ayæ bitö töninacä ingante, Önömique baï imipa, ante quinante ämii. Edæ Wængongui nänö apænte anguimpaa gäänë ongöñömonte tömengä tömämö imonte apænte ancæcäimpa cæbii.

¹¹Edæ Wængongui beyæ ante iïmaï ante yewëmonte ongompä.

“Mönö Awënë incæ, ‘Në Quëwëmo inömö inte edæ ämo ëñëedäni,’ angampa.

Ayæ, ‘Minitö tömämüni botö önöwa inö da guicapodinique,

Bitö Wængongui inömi imipa, ante adoyömö apænecæminimpa,’ angampa.”

¹²Ante nãni yewëmongainö baï iinque cædinque mönö tömämö Wængongui weca ponte ongöninque mönö pönengainö ante mönö apænëgainö ante mönö cægainö ante tömengä ingante edonque pönï apænecäimpa.

Wacä oda cæcæcäimpa, ante cædämaï incæbiimpa, ante

¹³Mänömaï beyæ mönö wacä ingante apænte änämaï ingäimpa. Wæætë minitö, Waa cæcæboimpa, ante nämä wææ cædinque, Botö töninacä taadö nänö goquinö ante ee acæboimpa, ante pönëedäni. Tömengä tee tëwate baï oda cædämaï incæcäimpa, ante nöingä cæquinque ante pönencæminimpa. ¹⁴Botö iñömö Itota Codito nempo quëwëmo inte edæ nöingä pönëninque, Tömää cængui nämä incæ näwääquingä impä, ante do ëñëmopa. Incæte wacä, Pancaa cængui baacä impä, ante nê pönengä inte tömengä beyæ baacä iñönte tömengä nänö, Baacä impä, änö cænämaï inguënegä ingampa.

¹⁵Bitö quingämë cæmi adinque bitö töninacä, Baacä apa cæwëe, ante wæwente bacä ininque bitö waadedämaï inte godömenque cæmaimipa. Edæ bitö töninacä beyæ Codito wængacäi apa quëwëe. Bitö töninacä nänö pönënämaï bate wænguinque baö cæmipa, ante wædinque bitö tömengä ingante näwangä waadete pönëmi inte tömengä beyænque ante cöwë baö cænämaï incæbiimpa. ¹⁶Botö mänömaï cædinque waa pönï cæbopa, ante pönëmi incæte wadäni bitö waa cædö ante, Wiwa cæbipa, ante pönö babæ ante tedewënäni ate wædinque bitö wæætë waadete pönëninque wææ ämi tedewënämaï incædänimpa. ¹⁷Wii cænguinque ante wii bequinque ante Wængongui nempo quëwëmompä. Wæætë Wængongui Tæiyæ Waëmö

Önōwoca nempo quēwēñōmonte tōmengā pōnō cæcā æninqe mōnō nō entawenguinque impa. Ayæ mōnō gānē pōnenguinque ante mōnō watapæ tote quēwenguinque ante tōmengā nempo quēwēmompa. ¹⁸Edæ Codito nempo quēwēninqe waocā mǎnōmaī cæcā adinqe Wængonguī tōmengā ingante waa ate tocampa. Wadāni adobaī, Waa cæbipa, ante waa adānipa.

¹⁹Mǎnōmaī impa, ante adinqe, Mōnō pōnencabo godongāmæ piyænē cæte quēwengæimpa, ante, Ayæ mōnō godongāmæ wede pōnēninqe tæī mænonte baī ongongæimpa, ante mōnō nanguī cæcæimpa. ²⁰Īninqe cænguī cæīnente beyænque bitō Wængonguī nānō nē badongaināni ĩnānite bæ tadāmaī incæbiimpa. Tōmāā cænguī edæ nāwāaquinğā impa. Incæte bitō cænīnō beyænque wacā ēñēnāmaī inte tee tēwate baī oda cæbaingampa, ante do ēñēmi inte bitō godōmenque cæmi ĩninqe wīwa cæbaīmipa tōō. ²¹Waa cæcæte ante bitō ĩmaī cæcæbiimpa. Bitō baō cæmi beyæ, biinōmæ nāni wædænque ti nāmæ bebi beyæ, quiēmē cæbi beyæ bitō tōniñacā oda cæte wæcantawo. Īninqe bitō ĩñōmō, Botō tōniñacā oda cædāmaī incæcæimpa, ante wææ cædinque ee cædāmaī ĩmi ĩninqe waa imaimpa.

²²Māninō, Æbānō cæte waa inguī, ante bitō pōnēnō beyænque wadāni ĩnānite apænte ānāmaī inte bitō adobique inte Wængonguī ayongante cæcæbiimpa. Waa cæquī impa, ante mīmōno bitō pōnēnonque ante māniinonque cædinque bitō tente wæquinque cædāmaī inte waa tobaīmipa. ²³Wæætē nē æmæ pōnengā guiquēnē, Cæmo beyæ Wængonguī pangā wæcæ wæ, ante wædingā inte tōmengā nāmā nānō apænte pante wæquinque ade cængampa. Edæ æcānō wede pōnēnāmaī inte cæda tōmengā nānō cædōnō tōmānō edæ wīwa cætimpa. Īninqe bitō cædō tōmānō wede pōnente cæcæbiimpa.

Wadāni incæ watapæ quēwencædānimpā, ante cæe, ante

15 Mōnō nē wede pōnēmō ĩñōmō tæī piñænte entawēmō ĩñōmō inte nāmanque ante mōnō cæīnēnō ante edæ wædāmaī ingæimpa. Wæætē edæ nē æmæ pōnēnāni guiquēnē tōmēnāni aquīī pōnī ĩnāni inte, Ædō cæte cæquīmoo, ante wædāni adinqe mōnō tōmēnāni wædō ante ænte mongænte baī cædinque tōmēnāni tōnō ĩñacabo cæcæimpa. ²Godongāmæ godō cæmō æninqe waa todinque tōmēnāni wæætē wede pōnēninqe oncō tæī mænonte baī tæī ongoncædānimpā, ante mōnō ædæmō cæcæimpa. ³Edæ mōnō Codito incæ nāmanque ante nānō cæīnēnō ante cæcæte ante edæ wædāmaī inte piyænē cægacæimpa. Wængonguī ingante do nāni apænegainō baī tōmengā wadāni beyænque ante cægacæimpa. “Wængonguī ēñēmi. Wadāni bitō ĩmite piinte badete tocæte ante cædinque botō ĩmote wæætē piinte badete todānipa,” ante apænete baī Codito ee cægacæimpa. ⁴Edæ mōnō ĩmote odōmonte apænecæte ante Wængonguī angā ēñēninqe dodāni tōmantāa yewæmongadānimpā. Īninqe mǎninta ædæmō adinqe wampo pōnēninqe wæntædāmaī inte ee cæmō ĩninqe edæ mōnō, Watapæ bacæimpa, ante pōnente tocæimpa.

⁵Īninqe Codito Itota miñæ tee empote goyōmonte Wængonguī ĩñōmō edæ, Mīnitō wampo pōnēninqe wæntædāmaī inte ee cæcæmīnimpā, ante nē ædæmō cæcā ingampa. Tōmengā mǎnōmaī pōnō cæcā ate mīnitō ĩñōmō adoyōmō ante mīni pōnencabo bacæmīnimpā, āmopa. ⁶Mǎnōmaī bamīni ĩninqe mīnitō āanque baī adodō ante pōnēninqe ĩmaī ante Wængonguī ingante apænecæmīnimpā. Mōnitō Awēnē Itota Codito Mæmpobi ĩñōmi inte bitō tōmengā Wængonguī adobi ĩmi ĩñōmō

bitō tæi emōmi inte nāō apāite bai imi amōnipa, ante adoyōmō ante apānecāmīn-
impa, ante botō mānōmainō ante yewēmōmopa.

Oodeoidi ināmaī ināni ēñencādānīmpa, ante

⁷Codito mīnitō imīnite Ao ante ængacāīmpa. Īnīnque tōmengā mīnitō imīnite nānō ængāi bai mīnitō adobaī wacā ingā wacā ingā godongāmæ Ao ante æedāni. Mānōmaī cāmīni adīnque wadāni Wængonguī ingante apānedīnque, Bitō waa pōnī cæbi amōnipa, ante watapæ pōnī apānecādānīmpa. ⁸Edæ apānebo ēñeedāni. Mōnitō mæmæidi inānite Wængonguī, Mīnitō beyæ pōnō waa cæcæboīmpa, angacāīmpa. Īnīnque, Wængonguī tōmengā nānō angāinō ante cōwē cæcæcāīmpa, ante oodeoidi ēñencādānīmpa, ante cædinque mōnō Codito tōmēnāni beyæ nē cæcā bagacāīmpa. ⁹Tōmengā ĩñōmō, Idægoidi ināmaī ināni incæ Wængonguī ingante, Bitō nāō bai emōmi inte pōnō waadete waa cæbi æmōnipa, ante apānecādānīmpa, ante mānōmaī cægacāīmpa. Īīmaī ante Wængonguī beyæ nāni yewæmongainō bai impa.

“Botō mānōmaī beyæ, Bitō æbānō nē waa cæbi imīi, ante idægo ināmaī ināni weca gote apānecæboīmpa.

Bitō emōwo ante āmotamīni watapæ pōnī ancæboīmpa,” ante nāni yewæmongainō bai Codito cægacāīmpa.

¹⁰Ayæ wataa ĩñōmō ĩīmaī ante yewæmongatīmpa.

“Idægoidi ināmaī imīni incæ mīnitō Wængonguī quīnāni tōnō godongāmæ watapæ toedāni.”

¹¹Ayæ wæætē,

“Idægoidi ināmaī imīni mōnō Awēnē ingante apānedīnque, Bitō waa pōnī cæbi amōnipa, ante watapæ pōnī apāneedāni.

Wamīni mīni cabo mīni cabo tōmāmīni āmotamīni ante bai apānedīnque, Waa pōnī cæbi amōnipa, ante watapæ pōnī apāneedāni.”

¹²Itaiya wodi adobainō ante yewæmongacāīmpa.

“Inguipoga quēwēnāni tōmānāni Awēnē baquinque

Awænguinto tā bocate bai cædinque Yæte Pæingā ĩñōmō ængæ ganticæcāīmpa.

Tōmengā cæcā beyænque watapæ bacāīmpa, ante idægoidi ināmaī ināni incæ pōnencādānīmpa,” ante Itaiya wodi yewæmongacāīmpa.

¹³Wængonguī ĩñōmō, Watapæ bacāīmpa, ante nē badongaingā inongā inte ĩīmaī cæcæcāīmpa, āmopa. Tōmengā Tæiyæ Waēmō Ōnōwoca tæi piñante cæcā ate mīnitō, Watapæ bacāīmpa, ante godōmenque wede pōnencāmīnīmpa. Mānōmaī cæcæte ante cædinque Wængonguī pōnō apānecā ēñēnīnque mīnitō tōmengā ingante wede pōnēnīnque edæ gānē entawēnīnque watapæ tocāmīnīmpa, āmopa.

¹⁴Botō tōñīnamīni ēñeedāni. Botō tōmēmo ayōmote mīnitō nē waa cāmīni imīni abopa. Ayæ, Æbānō waa cæquīi, ante do ēñēmīni imīnīpa. Ayæ adobaī mīnitō eyepæ imīni inte wacā ingā wacā ingā do odōmonte apānemīni imīnīpa, ante pōnēmopa. ¹⁵Īnīnque botō, Mīnitō ēñēnīnō ante mīnitō ocai encadōmīni inte edæ adodō ante pōnencāmīnīmpa, ante bai cædinque pancadea ante yewæmontabopa. Botō ĩñōmō Wængonguī waadete pōnō cæcā ænte nē entawēmo inte mānōmainō ante yewēmōnīnque edæ guīñēnāmaī inte nangūi ante yewēmōmopa. ¹⁶Edæ tōmengā waadete pōnō cæcā ænte entawēnīnque botō Itota Codito beyænque ante idægoidi ināmaī ināni inānite nē cæbo badīnque Wængonguī ingantedō ante watapæ

apænebo eñenänipa. Mänömainö ante apænebo eñenöminite Wængongui Tæiyæ Waemö Önöwoca pönö badongä ate idægoidi inämaï inäni incæ tæiyæ waemö ewocate quëwënanäni badänipa. Mänömaï bayönänite botö inñömö, Wængongui qui, ante pædæ godönäni bai cædinque tömënanäni inänite ante edæ, Wængongui quimäni bacæminimpa, ante pædæ godömo æninqe Wængongui wæætë waa tocampa.

¹⁷ Mänömaï beyæ botö Itota Codito nempo quëwëninque Wængongui beyæ cædinque edæ nanguï tobopa. ¹⁸ Codito botö tönö guëa cæcä beyænque botö nanguï apænedinque nanguï cæbo ate tömengä inñömö töö æmængä pöninque edæ idægoidi inämaï inäni incæ edæ Wængongui ingante eñente cædäni badänitapa. Botö Codito mänömaï botö tönö nänö cædinö ante apænedinque edæ mäninque ante apænedinque guiñenete wædinque godömenque apænedämaï incæboimpa. ¹⁹ Wængongui Tæiyæ Waemö Önöwoca tæi piñænongä inte botö tönö godongämæ cæcä ate botö, Eñencædänimpa, ante bamönengæ cæbo ate në pönënanäni badänitapa. Mänömaï Eedotadëe inñömö mä cæte godinque Ididiabæ ganca tömäo godämæ godinque botö Codito ingantedö ante watapæ apænedinque adodö adodö ante tömänö ante apænebo eñenänitapa.

²⁰ Botö, Codito emöwo ante wadäni nani apænedämaï inñömö gote tömengä ingantedö ante watapæ apænebo eñencædänimpa, ante cöwë goinente wætabopa. Wacä onguitanca nänö tännönincönë æmonga mænönämaï incæboimpa, ante bai cædinque botö, Wacä do nänö apænediñömö botö wæætë apænedämaï incæboimpa, ante cætabopa. ²¹ Wæætë iïmaï ante Itaiya wodi nänö yewæmongainö bai cætabopa. “Tömengä ingante ante eñenämaï ininäni incæ edæ do ate bai ewocacædänimpa. Önömonca eñenämaï ininäni incæ edæ, ‘Æbänö i,’ ante do eñencædänimpa.” Ante nänö yewæmongainö bai botö, Eñencædänimpa, ante cætabopa.

Odömä inñömö pöinëmopa, Pabodo angampa

²² Mänömaï beyæ botö minitö weca poncæ cæyömote edæ, Wææ cæte i, ate wædinque pönämaï intabopa. ²³ Inñömö ömæ idæwaa cæbo inte botö æpomë wadepo inñonte minitö iminute ainente wædömpa. ²⁴ Ininque botö, Iincayæ ate Epänabæ gocæ cædinque wodo tebæ godinque minitö weca eñate aboque gocæboimpa, ämpa. Edæ botö wantæpiyæ eñate tote quëwente ate godömenque Epänabæ gote cæyömo minitö botö beyæ cædinque da godömini gocæboimpa.

²⁵ Nöwo guiquënë botö täno Eedotadëe inñömö Wængongui quinäni beyæ godö cæcæte ante gobopa. ²⁶ Wængongui quinäni incæ Eedotadëe quëwënanäni pancadäniya ömæpodäni inte wædänipa, ante pönente wædinque wabæca Mäatedöniabæ quëwënanäni tönö Acayabæ quëwënanäni tönö, Mönö da godö da godö cæcæimpa, ante pönëninque watapæ todinque tömënanäni, Wængongui quinäni qui, ante do godönänitapa. ²⁷ Mänömainö ante watapæ pönente cædäni incæte tömënanäni Eedotadëe inñömö quëwënanäni inänite në godonguënenäni inte da godönänimpa. Edæ Wængongui Önöwoca nänö pönongaincoo ante idægoidi pönö apænedäni eñente ænte ewocadinäni inte wabæca quëwënanäni inñömö tömënanäni nani eadincöo incæ idægoidi beyæ ante wæætë godonguënenäni badänäni inänipa. ²⁸ Ininque botö inñömö mänincöo tömënanäni nani da godönincöo idægoidi weca ænte gocæboimpa. Godinque botö cöwä adinque, Në ömæpodäni inte në wædäninque æncædänimpa, ante wææ cæcæboimpa. Ædæmö cæbo ænänäni ate botö mäninñedë ate Epänabæ gocæte ante cædinque minitö ömæ wodo tebæ godinque minitö weca eñacæ poncæboimpa.

²⁹ Codito pönö waa cædinque da pönongä pöninge botö cöwë tömengä tönö waa pöni botö cæquinque minitö weca poncæboimpa, ante do ëñëmopa.

³⁰ Botö töninamini ëñeedäni. Botö pæ pagænte bai nangui cæyömote minitö inacabo cædinque botö beyæ Wængongui ingante nangui apæneedäni, ante botö mönö Awënë Itota Codito beyænque äninque ayæ Wængongui Önöwoca në waadete pönengä beyænque äninque minitö iminite nangui ämopa. ³¹ Oodeabæ pönënamai inäni inömö Pabodo ingante wænæ wænæ cædämai incædänimpa, ante botö beyæ ante apæneedäni. Ayæ, Eedotadë inömö botö gote cæbo adinque Wængongui quinäni incæ botö cædö ate Ao ancædänimpa, ante apæneedäni. ³² Mänömai i adinque botö, Awënë Wængongui angä ate botö watapæ todinque minitö weca pömo ate mönö godongämæ guëmäninque wampo pönengäimpa, ämopa. ³³ Wængongui në gänë pönengä inte minitö tönö godongämæ ongöninque pönö cæcä ate gänë pönencæminimpa, ämopa. Mänömai impa diyæ, ante botö, Amëë, ämopa.

Waa quëwencæminimpa, ante

16 Botö iimai ämopa. Mönö töninacä tömengä emöwo Pebe minitö weca nöwo poncæ cæcampa. Tencodea inömö Codito ingante näni godongämæ pönencabo inönänite tömënanäi beyæ në waa cæcä inte iingä onquiyängä inömö waingä pöni ingampa. ² Tömengä nangui inäni beyæ wææ gompodique waa cædongä inte botö beyæ adobai nangui cæcantapa. Inique edæ botö minitö iminite iimai ämopa. Wængongui quimö inömö inte mönö Awënë nempo quëwëñömonte Pebe adocä inte adobai ingampa, ante adinque minitö tömengä ingante waa adinque Ao ante æedäni. Ayæ tömengä quiemë æinente wæcä inongante minitö wæætë edæ godö cæedäni ämopa.

³ Ayæ wada Piditida tönö Aquidæ näna gæncaya inömö Itota Codito nempo quëwëninque edæ botö tönö godongämæ cæda inapa. Inique minitö tömëna inate, Waa quëwencæminainpa, ante botö beyæ ante apænemini ëñëcædaimpa. ⁴ Wadäni botö imote wænönæ cædäni wæyömote tömëna näna wodo wænguinque edæ botö imote wææ cædatapa. Mänömai cædapa, ante botö tömëna inate waa ate pönente apænebopa. Ayæ idægoidi inamai inäni Codito ingante näni wayömö pönencabo wayömö näni pönencabo adobai tömänäni Aquidæda näna cædinö ante ëñëninque tömëna inate waa ate pönëninque apænedänipa.

⁵ Ayæ Itota Codito ingante në pönënanäi Aquidæda oncönë godongämæ pö guidäni inänite, Waa quëwëedäni, ante apænemini ëñëncædänimpa. Botö æmigo Epëneto botö në waadecä inongante minitö botö beyæ apænedinque, Waa quëwencæbiimpa, ante apæneedäni. Atiabæ inömö Codito ingante wadäni pönënamai inönäni tömengä inömö täno pönengantapa. ⁶ Ayæ Mäadiya minitö beyæ nangui cædingä inongante minitö wæætë tömengä ingante Waa quëwencæbiimpa, ante apæneedäni. ⁷ Botö guidëna Antodönico tönö Nöniato inömö botö tönö godongämæ tee mönete wædina inapa. Tömëna inömö botö pönënamai inömotote wëenëñedë Itota Codito nempo quëwëna inönate Codito incæ tömëna inate da godongäcäimpa. Inique, Itota Codito nänö në da godongäina tänoda ina adinque minitö botö beyæ ante tömëna inate waa apæneedäni.

⁸ Ayæ wacä mönö Awënë nempo quëwëninque Ampidiato ingante waadete pönëmo inte edæ botö, Waa quëwencæbiimpa, ämopa. ⁹ Ayæ adobai Odömäno mönitö tönö godongämæ Codito nempo quëwente në cæcä inongante, Waa

quëwencæbiimpa, ante botö beyæ ante apæneedäni. Botö në waadecä Etaquito ingante adobaï ante apæneedäni. ¹⁰ Ayæ Apede iñömö Codito nempo quëwëñongante tömengä æbänö cæcää, ante adinque Codito tömengä ingante wæætë, Waa cæbi abopa, angampa. Tömengä ingante botö beyæ ante waa apæneedäni. Ayæ Aditobodo näni quëwencabo inänite adobaï waa apæneedäni. ¹¹ Botö guiidengä Edodiyaönö ingante waa apæneedäni. Ayæ Næadotito guiidënnäni incæ æcänö mönö Awënë nempo quëwëna tömënnäni inänite adobaï, Waa quëwencæminimpa, æedäni.

¹² Ayæ wada mönö Awënë nempo quëwëna onquiyæna Tidipina tönö Tidipota iñömö në nanguï cæda inapa. Tömëna inate botö beyæ ante waa apæneedäni. Ayæ wacä onquiyængä mönö në waadecä Pedetida iñömö tömengä mönö Awënë nempo quëwëninque nanguï cæcantapa. Tömengä ingante adobaï, Waa quëwencæbiimpa, æedäni. ¹³ Ayæ mönö Awënë nänö në apænte ængaingä Odopo ingante waa apæneedäni. Tömengä badä incæ adobaï botö badä bai iñönante tömënnä inante botö beyæ ante waa apæneedäni. ¹⁴ Ayæ adobaï Atincodito, Pedegonte, Edëme, Patodobato, Edëma tömënnäni näni pönencabo tömännäni inänite, Waa quëwencæminimpa, ante apæneedäni. ¹⁵ Ayæ wadäni Pidodogo tönö Oodia, Næedeo tömengä mængä tönö, Odimpa tönö Wængongui quinäni tömännäni inänite, Waa quëwencæminimpa, ante apæneedäni.

¹⁶ Edæ, Waa quëwencæminimpa, ante minicabo incæ tömämïni godongämæ waa waadete apænecæminimpa. Codito ingante wayömö näni pönencabo wayömö näni pönencabo tömännäni mïnitö imïnite wæætë, Waa quëwencæminimpa, ante änänipa.

¹⁷ Botö tönïnamïni ëñeedäni. Mïnitö adocabomïni iñömïnite wadäni æmæmoncadö æmæmonca pä cædäni inänite cöwä adinque edæ Baa æedäni. Doyedë mïnitö ëñënö ante ëñënamäi inäni inte tömënnäni, Mïnitö tee tëwate bai oda cæcæminimpa, ante cædinque wadö ante edæ odömönänipa cæmïni. Tömënnäni inänite gomö aquënë cæmïni. ¹⁸ Mänömaï cædäni iñömö mönö Awënë Codito ingante cædämaï inte nämä näni cæinënnonque ante cædänipa. Tömënnäni ante, Mïnitö imïnite waa amönipa, ante waa tedete bai tededäni ëñëninque pancadäniya guiquënë, Babæ wapiticæ impa, ante cöwä adämaï inäni inte, Nö impa, ante do pönënnänipa. ¹⁹ Mïnitö cöwë ëñente cæmïni imïnipa, ante tömännäni do ëñënnänipa. Mänömaï beyæ botö iñömö nanguï tobopa. Incæte, Quïnö waa cæquï, ante mïnitö ædæmö ëñencæminimpa, ante ainëmopa. Quïnö wënæ wënæ cæquï, ante edæ ædæmö ëñënnämaï inte edæ gomö acæminimpa, ante ainëmopa. ²⁰ Wængongui, Gänë pönente quëwencæminimpa, ante në pönö cæcä iñömö edæ Tatäna ingante mïnitö önöwa gäänë wææntodongä ate mïnitö wæætë do pinä gäwate bai cæcæminimpa. Nöwo iñömö mönö Awënë Codito nänö waadete pönö cædö incæ entawencæminimpa, ämopa.

²¹ Botö tönö guæa cædongä Timoteo iñömö mïnitö imïnite, Waa quëwencæminimpa, angampa. Ayæ botö guiidënnäni Dotio tönö Yatönö adobaï Totipatedo adobaï mïnitö imïnite, Waa quëwencæminimpa, änänipa.

²² Nöwo botö Tedetiyobo iñömö Pabodo önöneque tedecä ëñëninque iï cadota ante në yewæmönimo inte botö adobaï, Waa quëwencæminimpa, ämopa.

²³ Gayo adobaï mïnitö imïnite, Waa quëwencæminimpa, angampa. Tömengä oncönë Codito ingante näni pönencabo cöwë godongämæ ponte apænedänipa. Ayæ tömengä botö imote adobaï, Pöe, angä ëñëninque edæ botö nöwo tömengä oncönë owobopa. Ayæ iñömö quëwënnäni awënë nänö äinta æninque adocanque Edaato näni

ānongā iñōmō tōmengā, Tōmānāni beyä æbānō cæquiī, ante nē angā iñōmō tōmengā tōnō mōnō tōniñacā Coadoto adobaī, Waa quēwēedāni, ānapa.

²⁴ Mōnō Awēnē Itota Codito mīnitō iṃinite pōnō waadete cæcæcāimpa. Mānōmaī impa, ante botō, Amēē, ante āmopa.

Wængonguī ingante waa ate apænecāimpa, ante

²⁵ Nōwo iñōmō Wængonguī ingantedō ante watapæ botō apænedō ante ayä Itota Codito ingantedō ante mōnō apænedō ante nē pōnēmini inte mīnitō tæī piñænte ongoncæmīnimpa. Wængonguī eyepæ inte mānōmaī pōnō cæcæcāimpa. Tōmengā mānīnō ante nōwo tæcæ nānō odōmōnō ante wēēnēnedē pedæmāmo iñonte cōwē wantæpiyæ wē wodonte bai cægacāimpa. ²⁶ Nōwo guiquēnē, Codito æbānō cægacāi, ante inguipoga tōmāmæ quēwēnāni ēñente wede pōnēnīnque botō iṃote ēñente cæcædānimpa, ante cædinque Wængonguī cōwē nē Quēwēnongā inte do odōmongā acāimpa. Tōmengā angā ēñēnīnque tōmengā beyä nē apænegaināni wæætē edonque pōni yewæmōnāni acāimpa.

²⁷ Iñinque Wængonguī nō pōni ēñēnongā inte adocanque Wængonguī ingampa, ante adinque mōnō, Bitō adobique nāö bai ēmōmi inte edæ waa cæbi amōnīpa, ante mōnō Itota Codito ēmōwo apænedinque Wængonguī ingante edæ cōwē apænecāimpa. Mānōmaī impa diyæ, ante botō, Amēē, āmopa.

1 Coodintoidi

inänite Pabodo cadota ante tänota nänö yewëmongainta

Coodinto iñömö Codito ingante nani pönencabo

1 Wængonguï angä ëñëninque Itota Codito botö imote aa pedingue da godongä godömo inte botö Pabodobo yewëmömopa. Mönö töninäcä Totënë tönö guëa apänete ate yewëmömo aedäni. ²Coodinto iñömö minitö Codito ingante mini godongämä pönencabo inömini inte ëñëdäni. Wængonguï, Botö quimäni badingue minitö Itota Codito nempo quëwëninque täiyä wäemö ëwocate quëwencämimipa, ante cädinque äñecä pönimäni inte minitö acämimipa, ante yewëmömopa. Ayä adobaï, Mönö Awënë Itota Codito ëmowo ante në aa pedäni tömämä quëwënanä incä acädänimipa, ante yewëmömopa. Itota Codito iñömö mönö Awënë ingä incä tömënanä Awënë adocä ingampa. ³Mönö Mämpo Wængonguï tönö mönö Awënë Itota Codito godongämä waadete pönö cæda ate minitö gänë pönente quëwencämimipa, ante botö Totënë tönö ämönäpa.

Codito nänö entawënë bai nanguï entawëmompä, ante

⁴Wængonguï waadete pönö cæcä ate minitö Codito Itota nempo quëwëninque tömengä nänö entawënë bai nanguï entawëmimipa, ante adingue botö minitö beyä ante Wængonguï ingante waa ate pönëninque cöwë apänebopa. ⁵Edä Codito nempo quëwëñöminite tömengä nänö ate ëñengainö ante pönö apäñecä ëñëninque minitö do entawëmimipa. Iningue mäninö nänö ate ëñengainö ante eyepä entawëmimäni iningue minitö nö apänemäni bamimipa. ⁶Edä mönitö, Itota iñömö adocä mönö Codito inongä ingampa, ante apänemöni ëñëninque minitö Ao äningue, Näwangä impa, ante wede pönëninque waa cæte quëwëmimäni acäimipa.

⁷Mäninö beyä, Mönö Awënë Itota Codito äyedënö pöningue edonque pönä a ongonguingä, ante wänö cöningue minitö wëntäye badämaï incämimipa, ante cädinque Wængonguï Önöwoca pönö apäñecä ëñëninque minitö eyepä inte waa cæquimäni imimipa. ⁸Minitö cöwë iinque baganca täï ongonte oda cädämaï incämimipa, ante Wængonguï pönö cæcä ate mönö Awënë Itota Codito pönëdë mäninëdë ate minitö wentamö ædö cæte entawenguimimäni. Edä dæ ampa. ⁹Wængonguï, Botö Wengä Itota Codito iñömö minitö Awënë inongä ingampa. Iningue minitö tömengä nempo quëwëninque tömengä tönö godongämä cæte quëwencämimipa, ante minitö iminite äñete aa pecantäpa. Mänömaï ante në aa pecä iñömö tömengä nänö angainö bai edä cöwë në ædämö cæcä ingampa cämimäni.

Wæätë godö wæätë godö cädämaï iedäni, ante

¹⁰Botö töninäminäni, botö mönö Awënë Itota Codito ëmowo apänëdäningue iimäi ante ämo ëñëmäimimipa. Mönö pönencabo imompä, ante adodö pönëninque minitö tömäminäni godongämä Ao ante adodöningue cädinque näwä godämaï iedäni. ¹¹Botö töninäminäni apänebo ëñëdäni. Codoeidi minitö iminitedö ante apänëdäningue, Coodintoidi nani pönencabo incä wæätë godö wæätë godö tedewënanäpa. ¹²Ante apänëdäni ëñëninque botö, Iimäi impa, ante apänebo ëñëdäni. Pancämimäniya,

“Mönitö Pabodo nänö nē ěmĩñǣmōni ĩmōnipa,” ante cǣminipa. Pancamĩniya guiquĕnĕ, “Apodo nänö nē ěmĩñǣmōni ĩmōnipa,” ante cǣminipa. Pancamĩniya guiquĕnĕ, “Pegodo nänö nē ěmĩñǣmōni ĩmōnipa,” ante cǣminipa. Ayǣ wǣǣtĕ pancamĩniya guiquĕnĕ, “Codito nänö nē ěmĩñǣmōni ĩmōnipa,” ante cǣminipa. Mǎnō-mǎinö ante mĩnitö wadö wadö ante tedewĕmĩni awǣdö.

¹³ ĩñǣmpa Codito nǎmǎ incǣ ante dicǣ wadö wadö ante apǣnecantawogaa. Incǣte Codito nempo quĕwĕmĩni inte mĩnitö, Pabodo ěmĩñǣmōni ĩmōnipa, ǎmĩni. Apodo ěmĩñǣmōni ĩmōnipa, ǎmĩni. Pegodo ěmĩñǣmōni ĩmōnipa, ǎmĩni. Ayǣ botö Pabodobo ĩñömete wadǎni awǣ ñǣnquedĩmǣ gōnōninque mĩnitö beyǣ wǣnōnǎni dicǣ wǣntawogaa. Ayǣ botö Pabodobo ěmōwo apǣnedinque mĩnitö dicǣ ǣpǣnĕ guimĩnitawogaa. ¹⁴ Botö mĩnicabo weca quĕwĕninque Codipo tōnö Gayo ĩnate mǎnĩnaque ĩnate ǣpǣnĕ guidōmo guiidatapa, ante pōnĕninque waa tobopa. ¹⁵ Mǎnōmaĩ ĩ adĩnque mĩnitö, Pabodo ěmōwo apǣnedinque ǣpǣnĕ guita-mōnipa, ante ǣdö cǣte anguimĩni, ante tobopa.

¹⁶ Æ, tǣcǣ pōnĕmopa. Etepanǎidĩ ĩnǎnite adobaĩ guidōmo guiidǎnitapa. Wadǎni ĩnǎnite wabǎnö guidōmoĩ, ante wĩi pōnĕmopa. ¹⁷ Edǣ Codito, Bitö ǣpǣnĕ guidōmi guicǣdǎnimpa, ante botö ĩmote ǎnǎmaĩ ingacǎimpa. Wǣǣtĕ, Tǣĩ piñǣnongǎ inte Codito mōnö wǣdö ante teĕmĕ mongǣnte ñǣnquedĩmǣ wǣngǎ beyǣnque mōnö quĕwengǣimpa, ante apǣnebi ĕñencǣdǎnimpa. Ayǣ, Mǎnĩne ante wadǎni, Ōnonque ĩmpa, ante ǎnǎmaĩ incǣdǎnimpa, ante wǣǣ cǣdinque bitö woadǎnique nǎni nangui ĕñente apǣnedö ante apǣnedǎmaĩ incǣbiimpa. Wǣǣtĕ, Codito ingantedö ante watapǣ apǣnebi ĕñencǣdǎnimpa, ǎnĩnque Codito botö ĩmote da godongǎ gobo ĩmopa.

Codito Wǣngongui nänö ĕñĕnö entawĕninque tǣĩ nänö piñǣnö entawengampa

¹⁸ Itota ingante nǎni timpogaiwǣ ante apǣnemōni adĩnque nē wǣnguĩnǎni guiquĕnĕ, Mǎniwǣ ante apǣnete wǣdǎnitedö abi, ante badete todǎnipa. Codito ǣngǎ beyǣnque nē quĕwĕmōni guiquĕnĕ, Codito mǎniwǣa wǣngǎ beyǣnque Wǣngongui tǣĩ piñǣnte pōnö cǣcampa, ante wede pōnente apǣnemōnipa. ¹⁹ Edǣ Wǣngongui, ĩĩmaĩ cǣcǣboimpa, angampa, ante yewǣmonte ongompa.

“Nĕ adǎni ōnonquedö ante ĕñĕnǎnipa,

ante botö nangui nǎni ĕñĕnö ante wido cǣcǣboimpa.

Nĕ nǎmǎ mǎ pōnente ĕñĕnǎni guiquĕnĕ ōnonque ĕñĕnǎnipa, ante botö nǎmǎ nǎni ĕñĕnö ante Baa ancǣboimpa,”

ante Wǣngongui cǣcampa, ante yewǣmongatimpa.

²⁰ Mǎnōmaĩ cǣdinque Wǣngongui, Inguipogaque quĕwĕnǎni nǎni nangui ĕñĕnö incǣ ōnonque ĩmpa, ante ĕñĕnguĕnĕ quĕwĕmĩni, ante do odōmongampa. ĩnĩnque adocanque ingante, Nanguĩ ĕñĕmipa, ante Wǣngongui dicǣ anguingǎa. Dodǎni nǎni wǣǣ angǎinö ante nē nō odōmōmi ĩmipa, ante Wǣngongui dicǣ anguingǎa. Nǎmǎ mǎ pōnĕninque nē nō apǣnebi ĩmipa, ante Wǣngongui dicǣ anguingǎa. Edǣ dǣ ampa. ²¹ Edǣ, Inguipogaque quĕwĕnǎni ocaidĕ nangui ĕñĕnǎni incǣ ōnonque nǎni ĕñĕnö beyǣnque botö ĩmote ǣdö cǣte ate baĩ pōnenguĩnǎnii, ante Wǣngongui nē nō ĕñĕnongǎ inte cǣcampa. Codito nänö cǣgǎinö ante apǣnemōni adĩnque ĩĩnǎni ĩñömö, Ōnonque tedewĕnǎnitedö abi, ante badete todǎnipa. ĩñǣmpa Codito nänö

cægainō ante badete nāni todō beyænque mīnitō wæætē nē wede pōnēmīni inte quēwencāmīnīmpa, ante Wængonguī nōingā pōnēnīnque pōnō cæcampa.

²²Oodeoidi, Öönædē nāni mā cæī bai bamōnengæ cāmīni ate ēñēmaimōnīpa, ante ānewēnānīpa. Guidiegoidi guiquēnē, Nāmā mā pōnēnīnque ēñēmaimōnīpa, ante cædānīpa. ²³Mōnitō guiquēnē, Codito ingante awænēmæ timpote wænōnāni wængacāīmpa, ante mānīnonque ante apænemōni ēñēmīnīpa. Mänōmaīnō ante apænemōni ēñēnīnque oodeoidi guiquēnē Baa ante tee tēwate bai oda cædānīpa. Guidiegoidi guiquēnē mānīne ante ēñēnīnque badete todānīpa. ²⁴Mōnitō ood-eomōni īñōmōnite mīnitō guidiegomīni īñōmīnite ædānimē īnānīte Wængonguī apænte ængā ingaimō inte mōnō īñōmō edæ īīmaī ante pōnēmōmpa. Wængonguī nānō nō ēñēnō incæ Codito encacampa, Wængonguī nānō tæī piñænō incæ Codito entawengampa, ante do edæ ēñēnte pōnēmōmpa.

²⁵Wængonguī önonque ante cæcampa, ante pōnēwēmīnitawoo. Mōnō wao-cabo nanguī ēñēmō īmōmpa, ante pōnēmīnitawoo. Īñæmpa, Nanguī ēñēmō, ante tedewēmō incæ önonque wædāmō inte cæmōmpa. Wæætē Wængonguī guiquēnē önonque cæte bai cæcā incæ godōmenque gomonga nanguī ēñengā inte cæcampa. Ayæ, Wængonguī aquiingā inte cæcampa, ante pōnēmīnitawoo. Īñæmpa mōnō wao-cabo tæī piñæmō īmōmpa, ante tedewēmō incæ mōnō önonque aquiimō inte cæ-mōmpa. Wæætē Wængonguī guiquēnē nē önonque cæte bai cæcā incæ godōmenque gomonga tæī piñænongā inte cæcampa.

²⁶Īñānāni, æbānō īñōmīnite Wængonguī aa pecantapa, ante pōnēedāni. Tömāmīni dicæ nanguī ēñēmīni ingamīniyaa. Inguipogaque quēwēnāni nanguī nāni encadō bai mīnitō tömāmīni dicæ adobaī nanguī encamīni ingamīniyaa. Tömāmīni dicæ nanguī tæī piñæmīni ingamīniyaa. Awēnēidi pæingā nānō awēnē baquinque ēñacā bai mīnitō tömāmīni dicæ adobaī awēnē baquinque ēñamīniyaa. Mänōmaī īñōmīnite Wængonguī dicæ aa pecantawogaa. Incæte adocanque adocanque mänōmaī īñōmīnite Wængonguī aa pegacāīmpa.

²⁷Wæætē, Nē nanguī ēñēnāni incæ guīñente wæcædānīmpa, ante cædinque Wængonguī īīmaī cægacāīmpa. Inguipoga quēwēnāni īnānīte cōwā adīnque nē önonque cæī bai cædāni īnānīte apænte ængacāīmpa. Ayæ, Nē tæī piñænāni incæ guīñente wæcædānīmpa, ante cædinque Wængonguī inguipoga nē wæntæte cædāni īnānīte apænte ængacāīmpa. Īnīnque tömengā mänōmaī cæcā ate waa cædānīpa, ante adīnque nē tæī piñænāni wæætē guīñente wædānīpa. ²⁸Wængonguī inguipoga quēwēnāni nāni waa pōnī māincoo ewente bai bacæīmpa, ante cædinque, Inguipoga pancacooga wīwa incoo īmpa, ante adīnque mānincooque ænīnque waa cægacāīmpa. Ayæ, Önoncooque īmpa, ante mōnō ānoncoo adīnque tömengā ingante do ænīnque nō cægacāīmpa. Ayæ, Dæ āmpa, mōnō ānoncoo incæ do adīnque Wængonguī mānincoo ænīnque nanguī cægacāīmpa. ²⁹Īnīnque Wængonguī weca ongōnīnque waocā adocanque incæ, Waēmō īmōpa, ante ædō cæte anguingāä.

³⁰Wængonguī pōnō ængā beyænque mīnitō Codito Itota nempo quēwēmīnīpa. Wængonguī Codito Itota ingante da pōnongā ænīnque mōnō Codito nānō ēñēnō bai ænte entawēmōmpa. Tömengā nempo quēwēnīnque mōnō tömengā nānō nō cæte quēwēnō bai adobaī ænte entawēmōmpa. Ayæ tömengā tæiyæ waēmō nānō ewocadō adobaī pōnongā ænīnque tæiyæ waēmō ewocate quēwēmōmpa. Ayæ Codito ængā beyænque mōnō abæ tawænte gote bai quēwēmōmpa. ³¹Īnīnque Wængonguī beyæ nāni yewæmongainō bai īīmaī ante bacæīmpa. “Waocā, botō nanguī

waëmō pōnī imopa, ante nāmā waa ate apæneinente wædongā iñōmō tōmengā wæætē, Mōnō Awēnē adocanque waëmō pōnī ingampa, ante apæneçā ininque waa cæbaingampa.”

Itota Codito ingante awāa timpodāni wængacäimpa, ante

2 Iñānāni botō mīnitō weca apæneçæte ante mā pōninque nē nanguī ēñēnāni nāni waa ēñēnō bai ēñēnāmaī imo inte bai pontabopa. Waodāni nāni waa tede bai tededāmaī imo incæ pontabopa. Wæætē, Wængonguī nāwangā waa pōnī cæ-gacäimpa, ante mānīnonque ante apæneçæte ante pontabopa. ²Itota Codito ingante do adīmo inte botō, Tōmengānque nānō cægāinonque ante ēñente bai cæd-inque botō coodintoidi weca gote apænebote, ante godāmaī iñedē do ānōmoimpa. Ininque, Wadō nāni nanguī ēñēnō ante ēñēnāmaī inte bai cædīnque botō, Itota Codito ingante awāa timpodāni wængacäimpa, ante mānīnonque ante ēñente bai gote apænebote, ante pōnēninque mīnitō weca pontabopa. ³Ayæ botō aquīmo pōnī inōmo inte mīnitō weca pōninque, Ædō cæte apænequīmoo, ante guīñēnete wædīnque nanguī do do wāate pōmo amīnitapa. ⁴Pōninque botō, Mānōmaī impa, ante dicæ tōmēmo nanguī ēñēnō ante tedetabogaa. Wængonguī beyæ apænebo ēñēdāni, ante ānīmo incæ botō dicæ waa pōnī tedete bai apænetabogaa. Wæætē Wængonguī Ōnōwoca tōnō āawocaque bai ēwocadīnque botō tōmengā nānō tæī pīñānō beyænque apænebo amīnitapa. ⁵Mānōmaī cædīnque botō, Waomō mōnō nanguī ēñēnō beyænque ante wīī pōnencāmīnīmpa. Wæætē Wængonguī nānō tæī pīñānō beyænque wede pōnēmīni bacāmīnīmpa, ante cæcæte ante mānōmaī ponte apænetabopa.

**Wængonguī æbānō ēmongāā, ante tōmengā
Ōnōwoca odōmongā ēñēmōmpa, ante**

⁶Wæætē ædæmō pōnēnāni æmæwo pæte bai iñōnānite mōnitō tōmēnāni weca ongōninque mōni nanguī ēñēnīnō ante apænēmōnīpa. Incæte nōwodāni nāmā nāni ēñēnō ante apænedāmaī imōnīpa. Ayæ imæca awēnēidi nāni dæ goquincabo tōmēnāni nāni ēñēnō ante apænedāmaī imōnīpa.

⁷Wæætē Wængonguī awēmō iñonte nānō ēñengāinō ante apænēmōnīpa. Tōmengā iñōmō, Botō nanguī ēñēnōmo inte pōnō cæbo beyænque botō nē apænte ænānīque nāō apāite bai entawencædānīmpa, ante inguīpoga dæ ānedē wēēñēnedē pōnī incæ mōnō imonte ante pōnō cægacäimpa. Incæte, Mānōmaī cæcæboimpa, ante tōmengā nānō ēñēnō ante wadāni ēñēnāmaī incædānīmpa, ante wææ cæd-inque wē wodonte bai cædīnque tōmengā nānō ēñengāinō ante nōwo ganca awēmō iñōmō entawēnongāimpa. Nōwo iñōmō tōmengā awēmō nānō ēñengāinō ante tæcæ apæneçā ēñēnīmōni inte mōnitō wæætē mānīnō ante nōwo apænēmōnīpa.

⁸Inguīpoga awēnēidi guīquēnē Wængonguī nānō wē wodonte ēñengāinō ante dicæ ēñēnānīyaa. Edæ mānīnō ante ēñente bai tōmēnāni mōnō Awēnē nāō bai entawēnongā iñongante awāa timpote wænōnāmaī incædōnānīmpa. ⁹Wæætē iīmāi ante yewæmongatīmpa.

“Botō imote nē waadete pōnēnāni iñōmō watapæ quēwencædānīmpa, ante Wængonguī do pōnō badongacäimpa.

Mānīnō nānō pōnō cægāinō ante waocā dicæ acāa.

Mānīnō ante dicæ ēñēngāa.

Edæ waocä nāmanque mä pönëninque dicæ ãngäa,”

ante nāni yewæmongai bai iinque bacæimpa, ante mönitö apänemönipa. ¹⁰Wængongui Önöwoca guiquënë tömää cöwä adinque Wængongui awëmö nānö pönö badongainö ante edonque adinque do ãngampa. İninque mönonga pö guidinque tömengä mönö imonte edonque odömongä ãngampa.

¹¹Edæ mönö waocabo incæ, Adocanque önöwënenque pönëë cöñongante wacä, Æbänö ante pönëë congäa, ante ædö cæte ãnguingäa. Edæ nê pönëë congä guiquënë, Botö æbänö ante pönëë cömo, ante tömengä adocanque önöwënenque pönente ãngampa. Wængongui adobai ingampa. Wængongui æbänö ante awëmö pönëë congäa, ante waocä ædö cæte ãnguingäa. Wængongui æbänö ante pönëë congäa, ante tömengä Önöwoca adocanque ãngingä wadäni ãngingä inänipa.

¹²Wængongui inömo, Botö æbänö pönömo æminii, ante edonque acæminimpa, ante cædinque tömengä Önöwoca ingante da pönongä ænte ewocate amompa. İninque inguipogaque quëwënanäni nāni pönënö bai entawënamai inömo inte mönö Wængongui tömengä Önöwoca tönö äawocaque bai ewocamö inte do ãngampa.

¹³Mönitö inömo, Wængongui mänömai pönö cæcampa, ante odömoncæte ante mä pönente möni ãngingä ante apængedämai imönipa. Wæætë Wængongui Önöwoca pönö odömonte apængecä ãngingä ewocadinque tömengä nānö odömönö möni ãngingä ante apänemönipa. Edæ Wængongui Önöwoca nānö pönënö ante ãngingä ante Wængongui Önöwocaque nānö apængede ante apængete ãngingä ewocacæimpa, ante pönëninque mönitö mänineque ante apänemönipa.

¹⁴Edæ, Wængongui Önöwoca nānö pönënö æbänö i, ante tömengä Önöwoca tönö äawocaque bai nê ewocadinque pönente ãngingä. İninque nê ömæwocacä bai ingä guiquënë tömengä ædö cæte edonque ãngingä. Edæ oda cæcampa. Mäninö ante apänemöni ãngingä tömengä, Önonquedö ante apængete wæcant-edö abi, ante badete todinque edæ, Baa angampa. ¹⁵Wængongui Önöwoca tönö äawocaque bai nê ewocacä guiquënë, Tömää æbänö i, ante cöwä adinque edonque pönö ãngampa. Wæætë edæ, Tömengä æbänö ewocacäa, ante wadäni cöwä adäni incæte ædö cæte apængte angüinänii. ¹⁶Ayæ, “Wængongui Awënë æbänö nangui ãngingä, ante æcänö ãngingä. Edæ Wængongui ingante godömenque odömönänipa diyæ ãngingä,” ante yewæmongatimpa. Mönö guiquënë Codito ãngingä nānö pönënö ante entawëmampa.

Wængongui ingante nê cæmö mönö godongämæ cæcabo

3 İnanäni ãngingä. Codito Önöwoca tönö nê ædämö ewocadäni inänite botö Wængongui Önöwoca nānö apængedö ante do apængebopa. Minitö guiquënë mempoga ãngingä inte Codito nempo quëwëminii incæ tæcæ ãngingä bai pædämai inöminii inte minitö inguipogaque ante pönëminii awædö. Mänömai beyæ botö adobainö ante ædö cæte minitö iminite apængequimoo. ²Edæ tæcæ ãngingä inömo tæëmö mönö cængui capo capo cængingä inänipa. Minitö inömo tömënanäni bai adobai imini inte Wængongui Önöwoca nānö apængedö ante ædö cæte ãngingä. İninque tæcæ ãngingä ingante goömæ di godönete bai cædinque botö minitö iminite apængedinque adodeque adodeque apængebö ãngingä. İngampa nêwo ganca tæcæ ãngingä bai inöminii inte minitö ængingä ãngingä. ³Edæ cöwë inguipogaque ante pönëminii inte pancaminiya, Wacä gomonga cæcampa, ante piinte wæminipa. Pancaminiya guiquënë wæætë godö wæætë godö piinte ængingä. Mänömai

cæte quëwëninque mīnitō òmæwocadāni bai īmīni inte inguipogaque ante pōnente quëwëmīni abopa. ⁴Edæ iīmaī ante tedewëmīnīpa. Adocanque, “Botō Pabodo nānō nē ēmīñæmo īmopa,” ante cæcampa. Wacā, “Botō guiquënë Apodo nānō nē ēmīñæmo īmopa,” ante cæcampa. Mānōmaīnō ante mīnitō òmæwocamīni inte bai cæmīni awædō.

⁵Īñæmpa, Apodo æcānō ingāā, ante pōnëmīni. Pabodo æcānō ingāā, ante pōnëmīni. Edæ botō mōnō Awënë nānō pōnō anganca tōmengā ingante nē cæbo bagaboīmpa. Apodo adobaī mōnō Awënë nānō pōnō anganca Awënë ingante nē cæcā bagacāīmpa. Īninque tōmengā beyæ nē cæmōnaque īmōna inte mōnatō mīnitō īmīnite apænemōna ēñente pōnëmīnitapa. ⁶Tōmëmō minte bai cædinque botō mā apænëbo ate mīnitō tæcæ ēñëmīnitapa. Apodo guiquënë, Cōñe bate pæcæīmpa, ante æpæ gao caadāni bai cædinque mīnitō īmīnite godōmenque nanguī odōmonte apænecā ēñëmīnitapa. Incæte mōnatō apænemōna beyænque ædō cæte tā bocate bai pæwocaquimīni. Wængonguī adocanque nē apænecā beyænque mīnitō tā bocate bai pæwocate ëwocamīnīpa. ⁷Īninque minte bai nē apænëbo inte botō tōnō Apodo æpæ gao cæte bai nē odōmonte apænecā tōnō mōnatō iñōmō ònōmōnaque īmōnāpa. Wængonguī tōmengānque, Pæe, ante nē ānongā ingāmpa. Tōmengā adocanque angā beyænque pæmīnitapa.

⁸Botō nē apænëbo tōnō Apodo nē odōmonte apænecā tōnō mōnatō, Pæcæīmpa, ante āanque bai Wængonguī beyænque cæmōnāpa. Īninque botō nē apænëbo iñōmote tōmengā nē odōmonte apænecā iñongante Wængonguī iñōmō, Mīnatō apænëgainō beyæ æeda, ante eyepæ pōnī pōnongā æncæmōnaīmpa. ⁹Mōnatō iñōmō Wængonguī tōnō godongāmæ cæmōni inte mōni nē cæcabo īmōnīpa. Mīnitō guiquënë Wængonguī quimīni īnōmīni inte tōmengā gōnea bai pæwocamīni īmīnīpa.

Ayæ adobaī tōmengā nānō mænōincō bai īmīnīpa. ¹⁰Nē ēñente mænongā iñōmō, Wænōmënæca īnō mænongæīmpa, ante cædinque dicacoo cō cō cæcampa. Botō iñōmō Wængonguī waadete pōnō cæcā ate nē ēñente mænongā bai adobaī bagaīmo inte botō mīnitō weca mā ponte apænëbo ēñëmīnitapa. Nōwo guiquënë botō mānōmaī cō cæte bai mā apænëbo ēñëmīni ate wadāni ponte botō cō cædinca wænōmënæca mænonte bai cædinque godōmenque odōmonte apænedāni ēñëmīnīpa. Īninque edæ æcānō mānīnca mænonte bai odōmōna tōmengā tōingā mænonte bai nō ēñente odōmonte apænequënëngā ingāmpa. ¹¹Wadāni, Dica adocaa wænōmënæca īnō mænongæīmpa, ante tāno nāni cō cædinca bai Itota Codito adocanque Tānocā ingāmpa. Īninque, Wacā tānocā ingāmpa, ante bai cædinque mīnitō ædō cæte wacā mīñæ gomīni. Īñæmpa, Dica wacaa wænōmënæca īnō mænonte bai babāīmpa.

¹²Ayæ tānoca nāni gö cædinca bai Itota Codito Tānocā iñongante mōnitō, Mānīnca adocaa wænōmënæca mænongæīmpa, ante bai cædinque odōmonte apænemōnīpa. Nē mænōnāni iñōmō oodo ænīnque padata ænīnque dica nāni waa pōnī adīnca ænīnque, Quīncamē ëwënāmaī īnguīnca, ante ænīnque tōmënāni nāni mænōnō bai cædinque pancamōniya nō pōnī odōmonte apænemōni ate mōnitō apænedō wido cædāmaī īngæīmpa. Wadāni guiquënë awæ ænīnque gaguīmæ amīmō ī ænīnque ayawāa amīwæ ænīnque quīncoomē ëwenguīncoo ænīnque godō mænōnāni bai cædinque tōmënāni ònonque odōmonte bai apænedānīpa. ¹³Edæ Wængonguī nānō apænte anguīōnæ īnque ba ate gonga nāni angā nanguī bæcōcæīmpa. Māniñedē ate edæ, Mōnitō æbānō nōwo odōmonte apænemōnī, ante nāō

gongæ edonque acæimpa. Wængongui mǎniñedē mōnitō apænedō apænte ancæte ante cædinque nē tante baī cæcā ate pancadea æmæwo montæ gōne ate pancadea ongō æncæcæimpa.

¹⁴ Ìninqe, Æcǎnō mǎnongaincō montæ gōnāmaī ì, ante adinque Wængongui eyepæ pōnongā æninque nē mǎnongaingā wæætē watapæ quëwencæcæimpa. ¹⁵ Wacā guiquënë tōmengā nānō mǎnongaincō do montæ gō adinque Wængongui mǎnincō nē mǎnongaingā ingante pōnōnāmaī incæcæimpa. Incæte mǎningā waocā gonga bæcoyōmō wodii tao wīnongā baī òmæpocā wæyongante Wængongui ængā beyænque tōmenganque quëwencæcæimpa.

¹⁶ Mīnitō ìñōmō, Wængongui Ònōwoca ingante do æninque tōmengā ingante ëwocamōmpa, ante ëñēnāmaī ìmīnitawo. Wængongui tæiyæ waëmō oncō baī mōnō baō ëñamōmpa, ante ëñēnāmaī inte baī cæmīni awædō. ¹⁷ Wængongui oncō tæiyæ waëmō oncō ì ìñonte waocā bæ tate wido cæcā adinque Wængongui nǎëmæ tōmengā ingante edæ òmæe ëwencæcæimpa. Ayæ adobaī Wængongui tæiyæ waëmō oncō baī baō ëñayōmīnite waocā wapiticæ odōmonte apæncæcā beyæ mīni godongāmæ apænedincabo incæ oda cæte nǎwæ gomīni adinque nē wapiticæ apæncæcā ingante Wængongui adobaī wido cæcæcæimpa.

¹⁸ Mīnitō, Ñōwodāni nāni ëñēnō ante do nanguī ëñēmōnīpa, ante pōnēmīnitawoo. Ìñæmpa mǎnōmaīnō ante mīnitō nāmā babæ pōnëwëninque apænemīni awædō. Nē nō ëñēmīni bacæte ante mīnitō ñōwodāni nāni nanguī ëñëwënō ante wido cædinque òmæcamīni badinque nē ëñēmīni bacæmīnimpa. ¹⁹ Inguipogaque quëwënāni nanguī ëñēnāni incæte Wængongui, Ònonquedō ante ëñēmīni awædō, angampa. Edæ Wængongui beyæ apænedinque ìmaī ante yewæmongadānimpa. “Òmē nāmā nānō ñōnōmē incæ waocā nǎëmæ wīni wīni dawacā baī nē nanguī ëñēnāni adobaī nāmā nāni ëñēnō beyænque nǎëmæ oda cædānīpa, ante cæbopa,” Wængongui angampa. ²⁰ Ayæ adobaī, “Nē ëñēnāni ìñōmō tōmēnāni nāni nanguī ëñente pōnēnō incæ idiquibæ impa, ante edæ mōnō Awënë do ëñengampa,” ante yewæmonte ongōmpa.

²¹ Ìninqe, Botō waocā adocanque nānō nē ëmīñæmo inte tobopa, ante änāmaī incæmīnimpa. Ìñæmpa mōnitō waomīni inte tōmāmōni mīnitō beyæ ante cæte quëwëmōnīpa. ²² Botō Pabodobo ìñōmo incæ Apodo ingā incæ Pegodo ingā incæ mīnitō beyæ ante cæte tōmāmōni quëwëmōnīpa. Inguipo incæ inguipoga ongoncoo incæ mīnitō beyæ ongōmpa. Mōnō quëwëmāmo incæ mōnō wænguimāmo incæ mīnitō beyæ ongōmpa. Ñōwopāmo incæ mīimāmo ìncayæ ponguimāmo incæ quincōomē incæ edæ mīnitō beyæ tōmancoo ongōmpa. ²³ Ayæ mīnitō wæætē Codito beyænque quëwëmīni ìmīnīpa. Codito wæætē Wængongui beyænque quëwengā ingampa, ante āmo ëñēmaīmīnīpa.

Itota nānō nē da godongāmōni inte ìmaī cæmōnīpa

4 Ìninqe mōnatō Pabodobo tōnō Apodo ìñōmōnate mīnitō ìmaī ante ëñen-guënēmīni ìmīnīpa. Codito tōnō godongāmæ cædinque tōmengā beyæ ante Pabodo tōnō Apodo nē cæda ìnāpa. Ayæ godōmenque, Wængongui tōmengā nānō awëmō ëñengainō ante pōnō apæncæcā ëñēna inte tōmēna mǎnīnō ante nē apænedā ìnāpa, ante ëñenguënēmīni ìmīnīpa. ² Ìninqe Awënë Wængongui ìmaī angampa. Botō waocā ingante quiēmē pōnō cæbo æninque tōmengā botō pōnōnonque entawëninque nō pōnente ædæmō aaquëngā ingampa, ante Wængongui cōwā adinque, Æbānō botō beyæ wææ aabii, ante apænte angampa. ³ Ìninqe mīnitō,

Pabodo æbänö cæcää, ante apænte ancæte ante cōwā amīni incæte botō wædāmaī īmaīmopa. Nē apænte nāni ānoncabo incæ botō īmote adobaī cōwā adinque apænte ānāni ēñēnīnque botō wædāmaī īmaīmopa. Tōmēmo incæ, Æbänö botō cōwē wede pōnente cæbo īmoo, ante ædō cæte nāmā anguīmoo. ⁴ Botō, Tōmēmo wēnæ wēnæ cædāmaī inōmo īmopa, ante pōnēmopa. Incæte, Wentamō mongænāmaī īmopa, ante ædō cæte botō nāmā anguīmoo. Mōnō Awēnē adocanque botō īmote nē apænte angā ingampa.

⁵ Mānīnō beyæ mīnitō, Īnque bayedē tōmāā apænte angæīmpa, ante mōnō Awēnē ponganca ee adinque apænte ānāmaī īedāni. Tōmengā ĩñōmō waomō mōnō awēmō cægāinō ante, Edonque pōnī acæīmpa, ante nāō ĩñōmō māo odōmoncæcāīmpa. Ayæ, Æbänö cæcæboīmpa, ante mōnō ōnōwēnenque pōnengāinō incæ edonque odō-mongā gongæ nāwæ acæīmpa. Ayæ, Adocanque æbänö waa cægacāī, ante, Wacā æbänö waa cægacāī, ante watapæ apænedinque tōmāmō mōnō cægāinō ante Wængonguī pōnō apænecā ēñente mōnō tocæīmpa.

⁶ Īñānāni ēñēedāni. Waocā adocanque ingante, Waingā ingampa, ānīnque wacā ingante wīī piīncæmīnīmpa, ante yewæmongatīmpa. Īnīnque botō mīnitō beyæ ante, Mōnatō æbänö cæmōna, ante yewæmontabopa. Mīnitō, Apodo tōnō Pabodo æbänö cæda īnaa, ante pōnēnīnque Wængonguī beyæ nāni yewæmongainonque ante mānīnonque ēñente cædinque godōmenque cædāmaī incæmīnīmpa, ante cætabopa.

⁷ Īñæmpa tōmāmō ōnōmonque ĩñōmonte Wængonguī, Bitō gomonga waēmōmī pōnī īmīpa, ante dicæ apænte angantawogaa. Bitō entawēnō ĩñōmō tōmēmi ocaidē mā bitō pōnēnō beyænque dicæ entawēmitawogaa. Mōnō Codito adocanque edæ pōnō apænecā ēñente nē ænte entawēmi inōmi inte bitō, Tōmēmoque nāmā beyænque entawēmopa, ante ædō cæte ānewēmīi.

⁸ Mīnitō, Eyepæ pōnī do entawēmōnīpa, ante baī cæmīni awædō. Mīnitō waa quēwengūnque ante do eyepæ ænte baī cæmīni awædō. Edæ Pabodoidi mōnitō beyæ cædāmaī ĩñōnānīte tōmēmōnī nāmā beyænque awēnē odeyemōnī bamōnīpa, ante cæte baī cæmīni awædō. Īñæmpa mīnitō nāwangā awēnē odeyemīni bamīni baī mōnitō adobaī awēnē odeyemōnī badīnque nanguī tocædōmōnīmpa. ⁹ Wæætē Itota nānō nē da godongaincabo ĩñōmōnīte Wængonguī incæ, Yæmīnæ pōnī gote nāni wængūnque godānītedō amīni, ante badete tote baī odōmongā awædō. Mānōmaī cæcā adinque waodāni incæ anquedoidi incæ Wængonguī nānō nē badongāināni tōmānāni mōnitō īmōnīte adinque badete todānīpa, ante awædō.

¹⁰ Edæ mīnitō adobaī cædinque īmaī piīmīni wæmōnīpa. Mōnitō Codito beyæ cæyōmōnīte mīnitō, Ocaī ōmācamīni inte cæmīnīpa, ante pōnēmīnitawoo. Wæætē nāmanque ante pōnēnīnque, Codito nempo quēwēnīnque mōnitō ocaī encāmōni inte nanguī ēñēmōnīpa, ante tedewēmīni awædō. Ayæ, Pabodoidi aquīī pōnī ĩñōnānīte mōnitō wæætē tæēmō piīñæmōnī īmōnīpa, ante pōnēmīni awædō. Wadāni adobaī mīnitō īmīnīte ante apænedīnque, Wāīmīni pōnī īmīnīpa, ānīnque mōnitō īmōnīte ante wæætē, Ōnōmīnīque īmīnīpa, ante piīnānīpa.

¹¹ Ayæ mōnitō nōwo ganca cænguī cænāmaī inte gue ænente awædō. Tepæ bedāmaī inte gæwænte awædō. Weocoo wāā tēincoo mongænte awædō. Ayæ tæi tæi pānāni caate wæmōnīpa. Ayæ oncō ōmaamōni inte ¹² mōnitō ōnompoca nanguī cædinque ænte quēwēmōnīpa. Wēnæ wēnæ īmīnīpa, ante piīnāni wædinque mōnitō wæætē, Mīnitō īmīnīte Wængonguī pōnō waadete cæcæcāīmpa, ante cæmōnīpa. Ayæ togænte pānāni ate wædinque mōnitō wæætē piīnāmaī piyænē

cæmönipa. ¹³Mönitö imönite ante apænedinque, Wiwa cædänipa töö, ante babæ änäni ëñente wædinque mönitö wæætë waadete apænemönipa. Edæ, Ëwëmöimæ gadonguimæ bai iminipa. Ömæpocoo wido cæquincoo bai iminipa töö, ante piin-
inque inguipogaque quëwënäni iñömö mönitö imönite ñowo ganca cöwë wido cædäni wædömöni imönipa.

¹⁴Mönitö beyæ cædinque Pabodoidi wæwente quëwënänipa, ante adinque minitö wæætë guingo imonte wæcæminipa, ante botö dicæ mänömainö ante yewæmömogaa. Wæætë botö wëmini bai iñöminite botö, Mänömai cædinque mini wæquinque impa, ante wææ yewæmömopa. ¹⁵Minitö iminite në aadäni iñömö diete miido ganca mänimpodäni iñönänite mönitö minitö mæmpoidi bai imöni guiquënë mëmönिया pöni imönipa. Edæ, Itota Codito nempo quëwëninque botö, Itota Codito pönö cæcä beyænque mönö watapæ quëwengæimpa, ante apænebo ëñëminitapa. Mänömainö ante apænebo ëñëninque minitö mempoga ëñämini ate botö minitö mæmpo bai bagaboimpa. ¹⁶Mänömai beyæ botö minitö iminite waadete apænedinque, Botö mæmpobo cædö bai minitö adobai cæcæminipa, ante nangui ämopa.

¹⁷Botö tömämæ godinque wayömö Codito ingante näni godongämæ pönencabo weca wayömö näni pönencabo weca go guidinque iimai ante apænebopa. Mönö Itota nempo quëwëninque nö ëñëninque waa cæte quëwengæimpa, ante odömönte apænebopa. Mänömainö ante botö odömönte apænedö bai botö tömëmö adodö ëñente quëwëmö abaimpa. Ìnque minitö, Pabodo mänömai quëwengampa, ante ëñencæminipa, ante botö në waadecä Timoteo ingante da godömo minitö weca ponte apænecæcäimpa. Tömengä iñömö botö wengä bai inongä inte Codito nempo quëwëninque cöwë nö pönente cæcä ingampa. Tömengä minitö weca ponte apænedinque, Pabodo nänö odömönte apænedö bai tömengä nämä adodönte ante cöwë ëñente quëwengampa, ante apænecä ëñëninque adodö ante pönencæminipa.

¹⁸Pancaminiya, Pabodo wiï pongä awædö, ante, Tömëmönique wæætë në ämöni incæmönipa, ante botö imote piinte tedewëminipa. ¹⁹Incæte mönö Awënë Ao angä ate botö oo poncæboimpa. Ponte adinque botö, Tömëmönique në ämöni incæmönipa, ante në tedewëmini æbänö tedewëminii, ante änämai incæboimpa. Wæætë adömini mini täi piñänö ante cöwä adinque apænte ancæboimpa. ²⁰Wængongui Awënë Odeye nempo në quëwëmö iñömö wiï önonque mönö tedequinö beyænque quëwëmompä. Wæætë edæ täi piñante mönö quëwenguinö ante mönö tömengä nempo quëwëmompä. ²¹Minitö æbänö cæmini ate minitö weca ponguimo. Edæ mini cædinö adinque botö panguënëmo inguimo, äminitawo. Wæætë waadete pönëninque ædæmö cæquënëmo inguimo, äminitawo.

Në wiwa towengä ingante apænte angæimpa, ante

5 Edæ, Në wiwa towengä incæ coodintoidi näni pönencabo tönö godongämæ ongongampa, ante tededäni ëñentamönipa. Minitö weca ongongä adocanque tömengä wæmpo nänöogängä incæ manguiwengampa töö. Ìñæmpa Wængongui ingante në ëñänämai inäni incæ mänömai wënæ wënæ cædämai iñönäni minitö weca ongonganque do cæcä apa cæminii. ²Në wiwa towengä tönö godongämæ ongömini incæte minitö, Tömëmönique waa cæmöni imönipa, ante tedewëmini awædö. Incæte Ca ca wæmini bai waa incædönipa. Në wiwa cæcä ingante, Mönitö weca ongönämai gobäwe, ante da godömini gocä bai waa incædönipa. ³Botö guiquënë nänënë quëwëmö incæte minitö weca owote bai önowënenque pönëmö imopa. Ìn-

inque mīnitō weca owote baī botō nē wīwa cæcā ingante do apænte ämopa. ⁴ Mīnitō Awënë Itota ëmōwo apænedinque godongämæ pōñōmīni botō nānēnē quëwëmo incæte adoyōmō owote baī pōnencæboimpa. Ayæ Awënë Itota tæi piñænongā inte mīnitō tōnō adoyōmō ongoncæcäimpa. Ìninqe mīnitō iīmaī cæedāni. ⁵ Awënë nānō ponguïōnæ iñedē nē wīwa cædongā tōmengā ònōwoca quëwencæcäimpa, ante iīmaī cæedāni. Tōmengā nānō wīwa ëñayō ëwente bacæimpa, ante cædinque mīnitō tōmengā ingante Tatāna nempo pædæ godōmīni æncæcäimpa.

⁶ Mīnitō, Waa iīmōni iīmōnipa, ante tededinque wīwa tedewëmīnipa tōō. Edæ dodāni nāni yewæmongainō ante adāmaī inte baī tedewëmīnipa. “Päō tōmāo yedæ æmpoquinque wædænque da wënāni” baī mīnitō adobaī adocanque wīwa cæcā ingante mīni oda cæquinque ee amīni ongongampa. ⁷ Mīni pōnencabo waëmō pōni mīni entawenguinque päō yedæ æmpoqui wido cæte baī cædinque nē wīwa cædongā ingante da tadōmīni gocæcäimpa. Edæ mōnō Codito iñōmō wīwa mōnō cædinō ante ñā mënongacæte ante nāmā wepæ godongacäimpa. Edæ dodāni, Nē wænonguë-nengā wænōnāmaī inte wodo pænta gocæcäimpa, ante, Patowa, ante codotedo nāni nē wænongaingā baī mōnō Codito iñōmō adobaī inongā inte wængacäimpa. ⁸ Ìninqe mōnō päō yedæ æmpoqui òmæmō i cænte baī cædinque wīwa mōnō cædō ante wido cædinque mōnō piinte cædāmaī inte waa cæte quëwengæimpa. Ayæ ææmæ watapæ bete baī cædinque, Quinō nāwangā pōni i, ante Ao ante æninqe mōnō nō pōnente quëwengæimpa.

⁹ Nē wīwa towënāni tōnō godongämæ cædāmaī iedāni, ante botō cadota ante do yewæmōmo amīnitawo. ¹⁰ Mänōmaīnō ante yewæmōninqe botō, Inguipogaque quëwënāni tōnō godongämæ cædāmaī iedāni, ante dicæ antabogaa. Ìñæmpa wīwa towënānique, wacā qui nē æinente wædānique, wacā qui nē ò ænānique inguipoga quëwënānipa. Ayæ, Wængonguī impa, ante badōninqe nē ædæ wæante quëwënānique mänimpodānique inguipoga quëwënānipa. Ìninqe ædō cæte tōmënāni weca cædāmaī inguīi. Edæ inguipo ëmō cæte gote baī tōmënāni weca ongōnāmaī inguīi.

¹¹ Wæætē mäninō ante yewæmōninqe botō, Mīni pōnencabo incæ adocanque wīwa cæcā adinque mīnitō tōmengā tōnō godongämæ cædāmaī iedāni, ante wææ ämopa. Edæ, Nē pōnengā incæ wīwa towengantawo. Nē pōnengā incæ wacā qui æinente wæcantawo. Wængonguī impa, ante badonte nē pōnengā ædæ wæængantawo. Wacā ingante, Wënæ wënæ iimpā, ante angantawo. Tī nāmæ bete nē pōnengā incæ quidi quidi dowængantawo. Wacā qui æncæte ante babæ cædinque ò ængantawo. Ìninqe tōmengā, Nē pōnëmo iimpā, änongå incæ mänōmaī wīwa cæcā adinque mīnitō tōmengā tōnō godongämæ cædāmaī inte godōmenque tōmengā tōnō godongämæ contate cænāmaī iedāni, ante botō wææ ancæte ante ämopa.

¹² Mīnitō Codito nempo mīni quëwencabo incæ næëmæ apænte änāmaī iīmīni inte oda cæmīnipa. Wadāni inānite Codito nempo quëwënāmaī iñōnānite botō, Tōmënāni æbānō wënæ wënæ cædāni, ante ædō cæte apænte anguimoo. ¹³ Wængonguinque tōmënāni inānite apænte ancæcäimpa. Incæte mīni cabo incæ adocanque wīwa cæcā adinque mīnitō tōmëmīni, Mōnitō weca ongōnāmaī gobāwe, ante da tadōmīni tao gocæcäimpa.

Nē pōnēnāmaī ingā apænte ancæcäimpa, ante änāmaī ie

6 Mīni pōnencabo iñōmīnite adocanque bitō imite wēnæ wēnæ cæcantawo. Īn-
 inque bitō, Tōmengā ingante apænte ancædānimpa, ante cædinque ēñēnāmaī
 ināni weca ædō cæte ænte gobii. Wæætē Wængonguī quīnāni inānite angā ēñē-
 inque tōmēnāni wæætē, Tōmengā æbānō wēnæ wēnæ cæcāā, ante apænte adinque
 nō ancædānimpa. ²Edæ mōnō Wængonguī quīmō iñōmō edæ, Inguipoga tōmāmæ
 quēwēnāni æbānō wēnæ wēnæ cædāni, ante nē apænte anguīmō imompa. Incæte
 mīnitō, Mānōmaī cæcæmōnimpa, ante ēñēnāmaī inte baī cæmīni awædō. Tōmāmæ
 quēwēnāni inānite nē apænte anguīmīni inte mīnitō ñowo wædænque mīni apænte
 anguēnēnō incæ quīnante änāmaī imīnii. ³Mōnō iñōmō Wængonguī anquedoidi
 inānite nē apænte anguīmō inōmōimpa, ante ēñēnāmaī imīnitawo. Mānīnāni inānite
 nē apænte anguīmō inōmō inte mōnō pōnencabo ñowo mōnō wædō ante mōnō
 godōmenque apænte angæimpa, ante pōnēmīniyaa.

⁴Codito ingante mīni godongāmæ pōnencabo incæ mīni wædō ante apænte
 ancædānimpa, ante mīnitō ædānidō inānite ämīni apænte änānii. Īñæmpa,
 Ōnōnānique inānipa, ante mīni änōnāni incæ mānīnō ante nē apænte änāni
 badānitawo. ⁵Mīnitō guingo imonte mīni wæquinque cæmīnipa, ämo ēñē-
 maīmīnipa. Nāna pōnencaya incæ nāēmæ wæætedō wæætē äna wædinque mīnitō,
 Mōnō pōnencabo incæ æcānō nē nō ēñēnongā inte apænte anguingāā, ante adinque
 tōmengā ingante anguēnēmīni imīnipa. Īñæmpa mīnitō weca nē nō ēñengā ado-
 canque dæ angantawogaa. ⁶Wæætē nāna pōnencaya incæ nāēmæ piīnīnque ado-
 canque, Botō beyæ apænte äninque iingā ingante pancædānimpa, angampa. Ayæ
 godōmenque wēnæ wēnæ cædinque tōmengā nānō tōñīñacā ingante nē pōnēnāmaī
 ināni weca ænte godīnque, Apænte äninque pancæmīnimpa, angā pānānipa.

⁷Īñæmpa mīni pōnencabo incæ nāēmæ piīnīnque, Apænte ante pangæimpa, ante
 dobæ oda cæmīnipa tōō. Edæ wacā wīwa cæcā ate wædinque bitō wæætē piyænē
 cæbi waa imaimpa. Tōmengā babæ wapiticæ äninque ō ængā wædinque bitō piyænē
 cæbi waa imaimpa. ⁸Incæte piyænē cæquēnēmīni incæ mīnitō wæætē babæ cæd-
 inque ō æmīni awædō. Wacā ingante wīwa cæmīni awædō. Mānōmaī cædinque
 mīnitō mīni pōnencabo incæ wæætē godō wæætē godō wīwa cæmīnipa tōō.

⁹Wī ēñente cædāni iñōmō Wængonguī Awēnē Odeye nempo cōwē guīdāmaī
 inguīnāni inānipa, ante mīnitō iñōmō ēñēnāmaī inte baī cæmīnipa tōō. Mānō-
 maīnō ante pōnēnīnque mīni oda cæquinque ī apa cæmīni. Ñowo godōmenque
 ämo ēñēedāni. Pancadāniya towente cædānipa. Pancadāniya guīquēnē, Wængonguī
 impa, ante nāni badōñīñōmō gāänē ædæ wæænānipa. Pancadāniya guīquēnē
 nānōogæ ināmaī iñongante godō guēa mōwēnānipa. Pancadāniya guīquēnē nāna
 onguīñæncaya incæ nāna gæncaya inte baī cædinque guēa monte quēwēnāna.

¹⁰Pancadāniya guīquēnē awēmō ænānipa. Pancadāniya guīquēnē wacā māin-
 coo ante æīnente wædānipa. Pancadāniya guīquēnē tī nāmæ bete quidi quidi
 dowænānipa. Pancadāniya guīquēnē wacā ingante, Bitō wēnæ wēnæ imīpa tōō,
 ante piīnīnque babæ änānipa. Pancadāniya guīquēnē babæ apænedīnque ō ænānipa.
 Mānōmaī wīwa cædōnāni inte tōmēnāni Wængonguī Awēnē Odeye nempo cōwē guī-
 idāmaī inguīnāni inānipa, ämo ēñēmaīmīnipa. ¹¹Mīni pōnencabo incæ pancamīniya
 mānōmaī ingaīmīni inte ñowo iñōmō æbānō imīnii. Edæ mōnō Awēnē Itota Codito
 ēmōwo beyænque Wængonguī Ōnōwoca pōnō ñā mēnongacā ate mīnitō tæiyæ

waëmō ēwocate quēwēmīni adinque Wængonguī, Botō ayōmo mīnitō waa cæmīni imīnīpa, angampa.

Baonga quēwēnīnque mōnō tæiyæ waëmō entawente quēwengæīmpa

¹²“Botō cæinēnonque ante cæbo incæ Wængonguī wææ änāmaī ingampa,” ante apænedānīpa. Incæte botō cæinēnonque ante quēwēmo baī wīī botō waa quēwengūinque incædōmoīmpa. Botō cæinēnonque ante cæbo incæ Wængonguī wææ änāmaī ingampa, ante nāni änō īñōmō edæ nāwangā impa. Incæte botō cæinēnonque ante cæbo baī botō nā cæyænte baī wæwenguēnēmo inte awædō. ¹³Ayæ cænguī īñōmō. “Mōnō cæncadē guīquinque cænguī æmōmpa. Ayæ adobaī mōnō cæncadē cæī cænguī beyænque ēnēmōmpa,” amīnitawo. Īñæmpa cænguī incæ cæinca incæ, Idæwaa impa, ante Wængonguī wo ēwencæcāīmpa. Ayæ adobaī mōnō baō īñōmō wīī towengūinque beyæ ēñamōmpa. Wæætē mōnō Awēnē beyænque mōnō baō ēñate quēwēmoīmpa. Ayæ mōnō baō beyæ ante mōnō Awēnē pō guīcā ate tōmēngā tōnō äawocaque baī ēwocamōmpa. ¹⁴Īnīnque edæ mōnō Awēnē ingante Wængonguī tæēmō piñænīnque angā nāni òmæmongā baī mōnō imonte adobaī tæēmō piñænīnque angā nāni òmæmonguīmō imōmpa.

¹⁵Edæ, Codito quī, ante mōnō baō incæ godōmō ængā ate mōnō tōmēngā baō baī ēñamōmpa, ante ēñēnāmaī imīnitawo. Īnīnque Codito baō baī ēñabo inte botō īñōmō edæ onquiyængā māincoo beyæ ante nē towente quēwēngā tōnō edæ ædō cæte godō monguīmoo. ¹⁶Edæ, Æcānō mænōmaī godō mōna tōmēngā nē tote quēwēngā tōnō adocanque baī bacampa, ante ēñēnāmaī imīnitawo. Edæ, “Mēnaa īnīna incæ tōmēna wæætē nāna gæncaya mōnīnque adocanque baī bacædaīmpa,” ante apænete yewæmonte ongōmpa. ¹⁷Ayæ mōnō Awēnē nempo quēwēngā tōmēngā īñōmō mōnō Awēnē tōnō äawocaque baī ēwocacampa cæmīnīi.

¹⁸Æcānō godō towēna tōmēngā nāmā baō cædingā inte nāmā baō nānō wæwengūinque wēnæ wēnæ cæcampa. Wæætē yabæque mōnō wēnæ wēnæ cædō beyæ mōnō baō ædō cæte wæwenguīī. Mænōmaī ī īnīnque mīnitō īñōmō wodīi wīnonte towēnāmaī quēwēdānī. ¹⁹Edæ Wængonguī tōmēngā Tæiyæ Waëmō Ōnōwoca ingante mīnitonga da pōnongā pō guīite owocampa. Īnīnque mīnitō, Botō baō tōmēmō quī ēñabopa, ante ædō cæte amīnīi. Īñæmpa Wængonguī Ōnōwoca tæiyæ waëmō oncō baī ēñate apa ānewēmīnīi. ²⁰Wængonguī nangūī pōnī godonte ængā beyænque mīnitō baō tōmēngā quī ēñapa. Mænōmaī beyæ mīnitō, Tōmānāni Wængonguī ingante waa ate ēñencædānīmpa, ante cædinque mīnitō baonga quēwēnīnque edæ waa cædānī.

Nāna gæncaya īnōna inte īīmaī cæbaīnāpa

7 Nōwo īñōmō mīni wædō ante yewæmōmīni ænte adinque botō īīmaī āmōpa. ²Onguīñængā īñōmō onquiyængā ingante mōnāmaī ingā waa tobāīmpa. Incæte, Wīī towēinente wæcæcāīmpa, ante cædinque onguīñænāni tōmānāni, Botō nānōogængā incæcāīmpa, ante mōnāni waa īmaīmpa. Ayæ onquiyænāni adobaī tōmānāni, Botō nānōogængā incæcāīmpa, ante mōnāni waa īmaīmpa. ³Onguīñængā īñōmō tōmēngā nānōogængā āñongante, Botō nānōogæmī imīpa, ante Ao ānīnque äāodenque moncæcāīmpa. Ayæ onquiyængā adobaī, Botō nānōogæmī imīpa, ante ānīnque tōmēngā nānōogængā āñongante äāodenque moncæcāīmpa. ⁴Monte ate nānōogængā tōnō adocanque baī ba adinque onquiyængā wæætē, Onguīñængā quī,

ante eñadinque, Tömëmo baonque eñabopa, ante ædö cæte anguingää. Ayæ adobai onguiñængä wæætë, Onquiyængä qui, ante eñadinque, Tömëmo baonque eñabopa, ante ædö cæte anguingää. ⁵Nänöögængä angä eñente edæ Baa änämaï. Pancaguënea Wængongui ingante nanguï apæneçæte ante guëa Ao äninque nänëneto nänënë wantæ iñö möninque idæwaa. Edæ, Tatäna angä wacä ingante towëinente wæcæ wæ, ante wæcæ cædinque adodë iñömö wæætë moncædaïmpa.

⁶Incæte mänömaï äninque botö, Minitö botö äno bai cöwë cæcæminimpa, ante wæcæ änämaï imopa. Wæætë, Minitö mänömaï cæmini waa imaimpa, ante mäninonque ante apænebopa. ⁷Onguiñænäni tömänäni botö bai wëmö cædäni quëwënäni bai waa incædönimpa, ante pönëmopa. Incæte Wængongui pancadäniya inänite pönö apænedinque, Bitö mönämaï inte adobique wëmö cæte botö beyæ cæcæbiimpa, äninque wadäni inänite, Bitö mömi ate mina gæncaya botö beyæ cæcæminimpa, angampa.

⁸Botö, edëningä ingante apænedinque ayæ owæmpoingä ingante apænedinque, Botö bai wëmö cæbi waa imaimpa, ämopa. ⁹Incæte adocanque, Onquiyængä ingante cöwë moncæboimpa, ante wæcä adinque botö, Bitö cöwë moncæbiimpa, ämopa. Edæ tömengä towëinente wædämaï incæcäimpa, ante wæcæ äninque botö, Tömengä godömenque waa quëwencæcäimpa, ante ee abo moncæcäimpa.

¹⁰Do möningä ingante edæ botö iïmaï ämopa. Æ, wadö ämopa. Wii botö ämopa. Mönö Awënë incæ iïmaï angampa. Onquiyængä incæ tömengä nänöögængä ingante ëmö cæte godämaï incæcäimpa, angampa. ¹¹Incæte ëmö cæte gocä ininque wæætë adodö pöninque adocä ingante mongä waa imaimpa. Wæætë adodö pönämaï ingä ininque tömengä ee quëwëninque wacä ingante cöwë mönämaï incæcäimpa. Ayæ onguiñængä incæ nänöögængä ingante pämänte godämaï incæcäimpa, ante mönö Awënë angampa.

¹²Wamini iminite guiquënë mönö Awënë änämaï iñongä botö wæætë iïmaï ämopa. Onguiñænganque në pönengä inte, Botö nänöögængä pönënämaï ingä incæ botö tönö ee quëwengampa, ante adinque tömengä nänöögængä ingante pämänaïmaï incæcäimpa. ¹³Onquiyænganque në pönengä inte, Botö nänöögængä pönënämaï incæ botö tönö ee quëwengampa, ante adinque tömengä nänöögængä ingante pämänaïmaï incæcäimpa. ¹⁴Onquiyænganque në pönengä iñongante tömengä adocanque nänö pönëno beyænque Wængongui, Mina gæncaya botö quimina iminapa, ante onguiñængä ingante edæ do ængampa. Ayæ adobai onguiñænganque në pönengä iñongante tömengä nänö pönëno beyænque Wængongui, Mina gæncaya botö quimina iminapa, ante onquiyængä ingante adobai do ængampa. Wængongui mänömaï cæcä beyænque minatö wënäni näni waa quëwenguinque Wængongui quinäni badäni. Wængongui wii mänömaï cæcä bai minatö wënäni iñömö Wængongui quinäni inämaï inte nöwadäni bai nänënë pæcædönänimpa.

¹⁵Bitö adobique në pönëmi iñömite bitö nänöögængä pämänte gocä wædinque ee abi gocæ. Mänömaï ëmö cæte gocä adinque bitö tömengä ingante nänönämaï inte bai badinque ee quëwencæbiimpa. Edæ, Piyänë cæte quëwëedäni, ante Wængongui tömämö imonte aa pegacäimpa. ¹⁶Bitö onquiyæmi tömëmi waa cæbi adinque bitö nänöögængä wabänö waa pönente quëwëmaingä, ante ædö cæte eñëmii. Edæ onguiñæmi adobai tömëmi waa cæbi adinque bitö nänöögængä wabänö waa pönente quëwëmaingä, ante ædö cæte eñëmii.

¹⁷ Incæte mōnō Awēnē, Īīmaī cæe, angā ate ēñente wædinqwe bitō tōmengā nānō ānōnonque ante cæte quēwencæbiimpa. Ayæ, Æbānō botō nānōogængā ēayōmo mōnō Awēnē aa pecantapa, ante pōnēninque bitō māniñedē bitō nānōogængā ēagaī baī adobi inte quēwencæbiimpa. Botō ĩñōmō Codito ingante nāni pōnencabo wayōmō nāni godongāmæ poncabo wayōmō nāni godongāmæ poncabo weca gote apænedinque, Mānōmaī cædāni, ante tōmānāni ĩnānite ante apænebopa.

¹⁸ Onguīñæmi ĩmi do ēō togænīmi ĩñōmite Wængonguī aa pecantawo. ĩnque bitō, Bagāacā baī babote, ante cædāmaī incæbiimpa. Ēō togæmi inte ee quēwēe. Wæætē ēō togænāmaī ĩñōmite Wængonguī aa pecantawo. ĩnque bagāabi inte ee quēwēe. ¹⁹ Edæ ēō togæmō incæ bagāmō incæ waomō ōnōnonque ĩmōmpa. Wīī māniñō beyænque waa quēwēmō ĩmōmpa. Wæætē Wængonguī nānō wææ angainō ēñente beyænque waa quēwēmōmpa. ²⁰ ĩnque, Æbānō engæñōmo Wængonguī aa pecantawoo, ante pōnēninque bitō adobi inte cōwē quēwēe. ²¹ Bitō wacā beyænque cæte nē quēwēmi ĩñōmite Wængonguī bitō ĩmite aa pecantawo. ĩnque bitō nē cæbi inte piyænē cæte wædāmaī incæbiimpa. Incæte bitō ĩmite ñimpo cædinque, Abæ tawænte goe, angā ēñēninque ee goe.

²² Waocā beyænque cæte nē quēwēmi ĩñōmite mōnō Awēnē aa pecantawo. ĩnque mōnō Awēnē incæ pōnō ñimpo cædinque, Abæ tawænte goe, angā ēñēninque ee gote baī ēwocabipa. Wæætē bitō waocā beyænque nē cæbi ĩnāmaī ĩñōmite mōnō Awēnē aa pecantawo. ĩnque Codito nē aa pete ængā beyænque bitō cæte nē quēwēmi babipa. ²³ Edæ Wængonguī tōmengā nānō Tæiyæ Waēmō Wengā ingante godongā beyænque mōnō wæætē tōmengā quīmō bagamōimpa, ante pōnēninque mīnitō wæætē waocā beyænque nē cæte quēwēmīni badāmaī ĩedāni. ²⁴ ĩñānāni ĩīmaī ante cædāni. Botō Wængonguī Awēnē nempo quēwēninque tōmengā nānō ānonque ēñente cæcæboimpa, ante cædinque mīnitō Wængonguī nānō aa peyedē mīni ēagai baī adomīni inte quēwēedāni.

²⁵ Ayæ, Mōnāmaī ĩnāni æbānō quēwenguēñēnāni ĩnāni, ante mōnō Awēnē angampa diyæ ēñenguīmoo. Incæte Wængonguī waadete pōnō apæneccā ēñēninque botō nē ēñēñōmo bagaīmo inte mā pōnēninque āmo ēñēmaīmīnīpa. ²⁶ Mōnō wæwenguīmāmo oo pōni ĩmpa, ante pōnēninque bitō, Ñowo botō nānōogængā ingante æbānō ēate quēwēmoo, ante pōnēninque ñowo bitō ēadō baī adobi inte cōwē quēwenguēñēmi ĩmīpa, ante pōnēmōpa. ²⁷ Onguīñæmi ēñēmi, Bitō nānōogængā ingante do mōmītawo. ĩnque, Pāmæncæboimpa, ante ānāmaī ĩe. Wæætē wacā ingante āmōpa. Bitō wēmō cæbitawo. ĩnque, Botō nānōogængā, ante diqui diqui mīnāmaī ĩmi waa ĩmaimpa. ²⁸ Incæte ñowo mōmi incæ wēnæ wēnæ cædāmaī inte mōmīpa. Ayæ baquēcā adobaī do mongā incæ wēnæ wēnæ cædāmaī inte mongampa. Incæte æcānō mōna tōmengā inguipoga quēwente nānō caate wæquinque mongampa. Mānōmainō ante yewæmōninque botō, Mīnitō caate wædāmaī incæmīnīmpa, ante wææ āmōpa.

²⁹ ĩñānāni, Ñowopāmo wīī wantæpiyæ ingæīmpa, ante wædinqwe āmōpa. Edēningā nānō pōnēnō baī nē manguiwengā incæ adobaī pōnengā baī waa ĩmaimpa. ³⁰ Æcānō Ca ca wæda tōmengā ĩñōmō wīī wæcā baī bacā ĩnque waa ĩmaimpa. Æcānō Ca ca toda tōmengā wīī tocā baī bacā ĩnque waa ĩmaimpa. Æcānō godonte æna tōmengā ōmæpocā baī bacā ĩnque waa ĩmaimpa. ³¹ Inguipoga mōnō cædō ante æcānō cæda tōmengā māniñō ante ānāmaī inte baī cæcā ĩnque waa ĩmaimpa. Edæ inguipoga quēwēninque mōnō cædō oo pōni ēwente baquīñō anguēñē.

³²Edæ mīnitō, Æbānō cæquīmoo, ante wædāmaī incæmīnīmpa, ante botō iīmaī ante wææ āmopa. Nē wēmō cæcā guīquēnē, Æbānō cæbo ate mōnō Awēnē waa toquīngā, ante pōnēnīnque tōmengā mōnō Awēnē beyænque ante quēwengampa. ³³Do mōīngā guīquēnē īnguīpoga nānō quēwenguīnō ante pōnēnīnque, Æbānō cæbo ate botō nānōogængā waa toquīngā, ante wæcampa. ³⁴īnīnque tæcæ tæcæ pōnēnte cæcampa. Onquīyængā guīquēnē owæmpoīngā īngā incæ baquēcā īngā incæ mōnō Awēnē beyæ ante pōnēnīnque, Æbānō botō baō tæiyæ waēmō ēñaquīmoo, ayæ, Æbānō botō ōnōwoca tæiyæ waēmō ēwocaquīmoo, ante cæcampa. Do mōīngā guīquēnē, Æbānō cæbo ate botō nānōogængā waa toquīngā, ante īnguīpogaque nānō quēwenguīnō ante wæcampa.

³⁵Mānīnō ante botō wīī mīnitō īmīnīte wææ cæcæte ante āmopa. Wæætē mīnitō mīnī watapæ quēwenguīnque ante botō, Mōnō Awēnē īngante æmæ pōnēnāmaī īntē nōīngā cæte quēwencæmīnīmpa, ante āmopa.

³⁶Onguīīnængā adocanque guīquēnē, Botō wengā baquēcā do picængā bacampa, ante adīnque botō tōmengā īngante godonguēnēmo īmopa, angā īnīnque tōmengā nānō ānō baī cædīnque ee godongā moncæcāīmpa. Edæ mānōmaī godōnīnque tōmengā wīī wēnæ wēnæ cæcā īngampa. ³⁷Wacā guīquēnē mīmōno ædæmō nō pōnēnīnque, Botō wengā baquēcā picængā bacā incæte botō piyænē cæte godōnāmaī incæboīmpa, angampa. īnīnque wadānī tōmengā īngante wææ ānāmaī īñōnānī tōmengā, Tōmēmoque botō ānīnō baī cæcæboīmpa, ante nē ēñēnte pōnēnīnque godōnāmaī īngampa. Tōmengā adobaī waa cæcampa. ³⁸īnīnque tōmengā wengā baquēcā īñongante edæ, Moncæcāīmpa, ante nē godongā guīquēnē waa cæcampa. Wæætē wacā, Mōnāmaī incæcāīmpa, ante wīī godongā guīquēnē tōmengā godōmenque waa cæcampa.

³⁹Nānōogængā ayæ mīīngā quēwēñongante onquīyængā īñōmō tōmengā tōnō cōwē quēwenguēnengā īngampa. Wæætē nānōogængā wængā owæmpote ate tōmengā abæ tawænte baī adocanque quēwengampa. Do owæmpoīngā īntē, Wacā īngante mōīnēmopa, angā ēñēnīnque mīnitō, Tōmēna mōnō Awēnē nempo nāna quēwencaya īnapa, ante adīnque mōīnēnte nānō wædō ante ee godōmīnī moncædaīmpa. ⁴⁰Incæte botō, Owæmpoīngā ee wēmō cædīnque godōmenque watapæ quēwēmaīngampa, ante pōnēmopa. Edæ Pabodo īmo Wængonguī Ōnōwoca tōnō āawocaque baī ēwocabo īntē mānōmaīnō ante pōnēmopa.

Mōnītō wængonguī cænguī, ante wadānī nānī cōnōnī ante

8 Wadānī, Mōnītō wængonguī cænguī īmpa, ante nānī cōnōnīncoo ante adīnque mīnitō, Ōnonque cænguī īmpa, ante abāīmpa, āmīnītawo. Nāwangā tōmāmō mīnī ānō baī do ēñēmōmpa. Incæte, Tōmēmoque do ēñēmōpa, ante nē angā īñōmō tōmengā nāmā ængō cæte baī cædīnque wadānī īnānīte piīntē baī cæcampa. Wæætē nē waadecā guīquēnē wadānī īnānīte ængō cæte baī cædīnque tōmēnānī īnānīte waadete cæcampa. ²Wacā, Tōmēmo do ēñēmōpa, ante nē ānewengā guīquēnē tōmengā nō nānō ēñenguēnēnō ante ayæ ēñēnāmaī īntē cæcampa. ³Wæætē Wængonguī īngante nē waadedānī īnānīte do agāīngā īntē tōmengā tōmēnānī īnānīte pōnēngampa.

⁴īnīnque, Mōnītō wængonguī cænguī īmpa, ante wadānī nānī cōnōnīncoo ante nōwo apænebo ēñēedānī. Tōmēnānī nānī, Mōnītō wængonguī īmpa, ante nānī cōnōnīnca ōnoncaque īmpa, ante mōnō do ēñēmōmpa. Ayæ adobaī, Nāwā Wæn-

gonguī adocanque pōnī ingampa, ante do ēñēmompā. ⁵ Wængonguīidi nāni ānōnāni incæ awēnēidi nāni ānōnāni incæ nanguī pōnī inānīpā. Nāwangā impā. Incæte tōmēnāni, Wængonguīidi inānīpā, ante nāni ānōnāni inguipoga incæ öönædē incæ ongōnāni incæte, ⁶ Wængonguī mōnō Wæmpocā iñmō adocanque pōnī ingampa. Öönæ incæ inguipo incæ öönædē ongoncoo incæ inguipoga ongoncoo incæ tōmancoo incæ tōmengā adocanque badonte aacā beyænque edæ ongoncoopa. Ayæ adobaī mōnō tōmengā nempoque quēwēmompā. Ayæ Itota Codito mōnō Awēnē adocanque pōnī ingampa. Tōmengā tōnō godongāmæ cædinque Wængonguī tōmancoo badongacāimpā. Adocā Codito tōnō godongāmæ cædinque Wængonguī pōnō cæcā ate mōnō quēwēmompā.

⁷ Mānīnō ante pancamonga guiquēnē ēñēmompā. Pancadāniya guiquēnē nē pōnēnāni incæ mānīnō ante ēñēnāmai inānīpā. Īñāni Codito ingante tæcæ pōnēnāni iñmō tōmēnāni wēēnēdē, Mōnitō wængonguī impā, ante badonte cōnonte ædæ wæante cægaināni inānīpā. Nōwo iñmō tōmēnāni Codito ingante tæcæ pōnente ate, Wadāni wængonguī cænguī incæ cæninque wentamō mongante wæcæ wæ, ante guiñente wædāni incæte do edæ cænānīpā. Mānōmai Codito ingante æmæ pōnēnāni inte tōmēnāni wadāni nāni wængonguī cænguī cæninque nāmanque nāni æmæ pōnēnō beyænque nāmā apænte do wentamō entawēnāni inānīpā. ⁸ Incæte cænguī önonque iñonte mōnō cænāmai imō beyænque ædō cæte wīwa entawenguiī. Wæætē mōnō cæmō beyænque ædō cæte waa entawenguiī. Edæ mōnō imonte cænguī beyænque Wængonguī dicæ waa aquingāa.

⁹ Wængonguī wææ ānāmai ingā adinque mīnitō do cæmīnitawoo. Īñæmpā mānōmai cæmīni adinque wadāni nē æmæ pōnēnāni adobaī cænāni ininque tōmēnāni tee tēwate baī oda cæbaīnānīpā. Mānōmai impā, ante pōnēninque mīnitō, Oda cædāmai incædānīmpā, ante cædinque ee cænāmai imæwedāni āmopa. ¹⁰ Edæ, Mōnitō wængonguīidi oncō impā, ante tōmēnāni nāni ānīncōnē bitō nē ēñēmi inte go guīdinque cængōmitawo. Īñæmpā bitō mānōmai go guī cængōmi adinque wacā nē æmæ pōnengā guiquēnē bitō cæbaī adobaī do cædinque nāmā apænte ānāmai inte tōmengā nānō oda cæquinque do go guīte cæmaingampa. ¹¹ Codito tōmāmō beyæ wænīnque nē æmæ pōnengā beyæ adobaī wængacāimpā cæbii. Bitō tōmēnāni nāni wængonguī oncō ante, Önonconque impā, ante nē ēñēmi inte do guīte cæmi beyænque bitō tōñīñacā nē æmæ pōnengā iñongante wapiticæ māobi oda cæte wæwente bacampa tōō. ¹² Mānōmai cædinque mīnitō tōñīñadāni inānite mīnitō waadedāmai inte wēnæ wēnæ cæmīnīpā. Tōmēnāni nāni nāmā apænte æmæ pōnēnō ante wido cæte baī cædinque mīnitō mōnō Codito ingante do wīwa cæmīni imīnīpā. ¹³ Īninque botō cæmo beyænque botō tōñīñacā oda cæcā adinque botō, Tōmengā oda cædāmai incæcāimpā, ante cædinque baō incæ cōwē cænāmai incæboimpā.

Codito nānō da godongaināni iīmai cæquēnēnāni inānīpā

9 Botō Pabodobo æbānō imoo, ante mīnitō æbānō ante pōnēmīni. Edæ, Botō Itota nānō nē da godongaimo imopa. Tōmengā botō imote pōnō ñīmpo cæcā beyænque quēwēmopa. Mōnō Awēnē Itota ingante do agaīmo imopa. Mīnitō guiquēnē, Pabodo mānōmai ingampa, ante pōnēmīniyaa. Ayæ mōnō Awēnē nempo quēwēninque botō Pabodobo tōmengā beyæ apænebo ēñēmīni inte mīnitō wæætē, Pabodo apænecā beyænque mōnitō nē pōnēmōni imōnīpā, ante pōnēmīniyaa. ² Wadāni guiquēnē, Pabodo ingante Awēnē Itota da godōnāmai ingacāimpā,

änänitawo. Tömənäni mänömainö ante tedewənäni incæte mīnitō guiquēnē, Pabodo ingante mönō Awēnē Itota nāwangä da godongacäimpa, ante apänequēnēmīni imīnīpa. Edæ botō pönō apänebo beyænque mīnitō wede pönēninque mönō Awēnē nempo quēwēmīnīpa, ante edonque abaimpa.

³Pancamīniya botō imote apænte ancæte ante cæyōmīni botō nāmā wææ cæcæte ante iīmaī ämopa. ⁴Mönatō apænemōna ēñēmīni incæte mīnitō iñömō, Mīnatō eye-pæ cæmīnīpa diyæ cænguī tönō bequī ænguīmīnaa, ante wææ ante baī tedemīni awædō. ⁵Wadāni mönō Awēnē Itota nānō nē da godongaināni iñömō nāna gæncaya nāna gæncaya godānīpa. Mönō Awēnē tōniñadāni adobaī Pegodo adobaī tōmənāni nāna gæncaya nāna gæncaya godānīpa. Mönatō imōnate guiquēnē mīnitō, Mīnatō godinque nānōgængä äñāmāi inte goeda, ante wææ ante baī tedemīni awædō. ⁶Wadāni önopoca cædāmāi inte quēwēñōnāni botō tönō Bedēnabee adomōnaque önopoca möna cædō beyænque ænte quēwenguēnēmōna imōnatawo.

⁷Tontadoidi guiquēnē dicæ tōmənāni nāmā nāni godonte äinta beyæ quēwənāniyaa. Ayæ æcänō yowementacoo mingä pæ inca ate nē mīningä iñömō ædō cæte yowepæ ænte bedāmāi inguingää. Edæ dobæ ade becampa. Cæñināni nē aacä guiquēnē dicæ goömæ yopænte äñāmāi inguingää. Edæ do yopænte ænte becä apa änewēmīni.

⁸Mänömainö ante apænedinque botō waodānique nāni änönō ante wīi ämopa. Wæætē Wængonguī nānō wææ angainö ante mäninonque ante ämopa. ⁹“Wagada onguīñängä nē cæcä inte tōmentapo æ yacäimpa, ante ämi pīnā pīnā gäwate cægōñongä bitō tōmengä önöne wææ wodōnedāmāi inte ee abi cæncæcäimpa,” ante Mōitee wodi wææ yewæmongacäimpa. İnīnque Wængonguī dicæ wagada beyænque ante pönēninque mänömainö ante angantawogaa. ¹⁰Wæætē mönō beyænque ante Wængonguī angampa, ante pönengäimpa. Nāwangä mönō beyænque yewæmongatīmpa. Waocä dicæ, Wadānique cæncædānīmpa, ante onguīpoi mangæ mangæ tæñongää. Wæætē, Mönitō godongämæ cæncæmönīmpa, ante mangæ mangæ tæñongampa. Ayæ tōmēmō nē æ yeyacä guiquēnē dicæ, Wadānique cæncædānīmpa, ante æ yeyacäa. Wæætē edæ, Mönitō godongämæ cæncæmönīmpa, ante pönengä inte æ yeyacampa. ¹¹İnīnque, Mīnitō mīmōno cænte baī ewocacæmīnīmpa, ante cædinque mönatō tōmēmō mīnte pæ baī pönō apænemōna do ēñente ewocamīnitapa. Incæte mönatō imōnate wæætē mäincooque pönōmīni wənæ wənæ ænguēnēmōna ämīnitawo. ¹²İñampa wadāni inānite mäincoo ee godōmīni äñānīpa. Mönatō iñömō godōmenque apænedinque godōmenque ænguēnēmōna iñömōnate mīnitō Baa ämīnitawoo.

Mönatō nē ænguēnēmōna incæte cōwē äñāmāi imōnāpa. Edæ, Mönō Codito ingantedō ante watapæ apænedinque mönatō mäincoo æmōna baī wadāni, Pabodoidi mäincoo æncæte ante apænedapa, ante piīnīnque wææ ancædönānīmpa. İnīnque, Wææ äñāmāi incædānīmpa, ante cædinque mönatō, Cōwē äñāmāi incæmönānīmpa, ante piyænē cæte ee apænemōnāpa. ¹³Nāwä Wængonguī cænguī, ante ænte māmō cönönāni ongō adīnque Wængonguī oncönē ñænæncönē nē cædāni incæ pancaa ænte ade cænte quēwənānīpa. Ayæ, Wængonguī quī, ante baō nāni iya täimpaa nē cædāni adobaī iya täimpaa nāni cönöningä incæ pancacäa ænte cænte quēwənānīpa, ante pönēmīniyaa. ¹⁴Mönō Awēnē adobaī, Botō imotedō ante watapæ apænedāni ate nē ēñēnāni wæætē nē apænedāni inānite cænguī pædæ godönāni ænte cænte quēwencædānīmpa, angampa. ¹⁵Botō guiquēnē nē ænguēnēmō incæte cænguī ante

änāmaī inte cōwē apænebo inōmoimpa. Nōwo mīnitō īmīnite yewæmōninque botō dicæ, Pōnōmīni æncæboimpa, ante yewæmōmogaa. Cænguī ante änāmaī inte botō Wængonguī beyænque apænebo ēñēmīnīpa, ante pōnēninque mǎnīnō beyænque tobopa. Mǎnōmǎinō ante todōmo inte botō, Gæwænte wædinque nǎñe wæmo incæ wacǎ mǎincoo edæ ænāmaī incæboimpa.

¹⁶ Itota Codito ingantedō ante apænebi ēñencædānīmpa, angǎ ēñente botō nē apænebo bagaiūmo inte edæ ædō cæte wadō cæquīmo. Īninque botō mǎnōmǎinō ante nē apænedōmo inte edæ, Tōmēmo waa cædinque apænebopa, ante ædō cæte tedequīmo. Edæ botō Itota ingantedō ante mōni watapæ apænedō ante wīi apænebo bai edæ botō wæquinque incædōnīmpa. ¹⁷ Edæ Itota Codito, Apænebi ēñencædānīmpa, angǎ ēñēninque botō Ao ante watapæ todinque apænebo adinque tōmengǎ, Waa cæbi īmīpa, ante eyepæ pōnongǎ æmaīmopa. Wæætē, Wīi apæneīnente wæbo incæte botō cōwē apænebo īninque edæ tōmengǎ nǎnō angaiūnque cæte apænebopa. Edæ botō nē apænequēnēmo inte ædō cæte apænedāmaī inguīmo. ¹⁸ Īninque botō ēñente cæbo beyænque quīnō ænguīmo. Botō Itota Codito ingantedō ante watapæ apænebo beyænque Wængonguī īmaī pōnō cæcǎ æninque tocæboimpa. Botō apænebo beyæ mīnitō nē pōnonguēnēmīni incæte pōnōnāmaī īmīni īninque botō wæætē ænāmaī inte tocæboimpa.

¹⁹ Ayæ waodāni wīi botō awēnēidi īnānīpa. Ayæ botō wacǎ ingante nē cæbo īnāmaī inte abæ tawænte bai quēwēmopa. Incæte botō, Waodāni godōmenque nangūi īnāni Codito gāmænō poncædānīmpa, ante cædinque tōmānāni īnānite nē cæte quēwēmo bai botō baquinque nāmǎ pædæ godonte bai quēwēmopa. ²⁰ Godongāmæ cæbo ate oodeoidi incæ Itota gāmænō poncædānīmpa, ante cædinque botō oodeoidi nāni pōnēnō bai pōnēninque tōmēnāni nāni quēwēnō bai quēwēmopa. Pancadāniya, Mōitee wodi nǎnō wææ angaiūnō ēñēmō beyænque mōnō quēwengæīmpa, ante pōnēninque mǎnīnonque ante ēñente cædānīpa. Botō guiquēnē, Wīi Mōitee wodi nǎnō wææ angaiūnō ēñēmō beyænque mōnō quēwengæīmpa, ante pōnēmopa. Incæte, Godongāmæ cæbo ate mǎnīnonque ante nē ēñente cædāni adobai Itota Codito gāmænō poncædānīmpa, ante cædinque botō tōmēnāni ēñēnō bai adobai ēñente bai cæbopa.

²¹ Wadāni guiquēnē Mōitee wodi wææ ante nǎnō yewæmongainta adāmaī īnānīpa. Botō guiquēnē, Wængonguī, Īmaī cæedāni, ante nǎnō wææ angaiūnō ante cōwē ēñenguēnēmo inte botō mōnō Awēnē Codito nempo quēwēninque tōmengǎ nǎnō angaiūnō ante cōwē ēñente quēwēmopa. Incæte godongāmæ cæbo ate nē adāmaī īnāni adobai Itota Codito gāmænō poncædānīmpa, ante cædinque botō wadō pōnēmo incæ tōmēnāni adāmaī inte nāni quēwēnō bai adobai inte bai quēwēmopa. ²² Ayæ, Godongāmæ cæbo ate æmæ pōnēnāni adobai Codito gāmænō poncædānīmpa, ante cædinque botō tōmēnāni æmæ pōnente quēwēnāni bai æmæ pōnēmo inte bai quēwēmopa. Īninque, Godongāmæ cæbo ate pancadāniya Codito gāmænō ponte quēwencædānīmpa, ante cæcæte ante botō æbānō cæquīmo, ante wædinque īmaī cæbopa. Wadāni nāni quēwēnō bai wadāni nāni quēwēnō bai wadāni nāni quēwēnō bai adobai cædinque botō tōmānāni nāni quēwēnō bai adodō ante pōnēmo inte bai quēwēmopa. ²³ Edæ, Itota Codito watapæ pōnō cæcǎ beyænque tōmāmō tōmengǎ nempo quēwēninque godongāmæ watapæ tocæīmpa, ante cædinque mǎnīnō wadāni nāni quēwēnō bai wadāni nāni quēwēnō adodō ante pōnēmo inte bai quēwēmopa.

²⁴Edæ nê quingæ pogodo godāni iñōmō tōmēnāni nāni pogodo goīmancadē tōmānāni pogodo godānipa. Incæte adocanque quingæ pogodo gocā inte tāno gote næ gongængä adinque edæ, Bitō adobique quingæ pogodo gote gānā cæbipa, ante pædæ pōnōnāni ængampa, amīnitawoo. Mīnitō guiquēnē quingæ pogodo gote bai gānā cæte æncæte ante tæi pīñænte cædāni. ²⁵Gānā cæcæimpa, ante cædinque tōmēnāni wadō nāni cæinēnō ante cædāmaī inte wæntæye ināmaī inte mānīnonque ante cædānipa. Tōmēnāni guiquēnē gānā cædinque poganta aquīi guīñē wæn-guīñabo nāni que cædintaque ænte wencacæte ante mānōmaī cædānipa. Mōnō guiquēnē poganta guīñē wænāmaī inta mōnō cōwē encaquinta æncæte ante mānōmaī cæmōmpa. ²⁶Mānōmaī impa, ante pōnēninque edæ wīñatæ wīñatæ guīdāmaī inte pogodo godāni bai botō tōingä gobopa. Ayæ, Æcānō gānā cæcāā, ante tiyāmāa tamonte guēa cæda bai cædinque botō, Gānā cæcæboimpa, ante tæimō pīñænte nō cæbopa. ²⁷Īninque godōmenque godōmenque apænebo ēñēnāni ate tōmēmo oda cædāmaī incæboimpa, ante cædinque botō, Tæi pīñænte quingæ gobæwe, ante bai cædinque botō nāmā incæ da godō da godō godoncæte ante nāmā tæi tæi pante bai cæbopa.

Wængonguī impa, ante nāni cōnōninca

10 Botō tōniñamīni iīmaī ante apænebo ēñēdāni. Mōnō wæmæidi wodi tōmānāni boguimā gāñēñōmō quēwente cægongadānimpa. Ayæ tōmānāni gāwapæntibedē tæcæguedēmæ ti wææ tao gogadānimpa. ²Īninque æpænē guīite bai cædinque tōmēnāni Mōitee wodi nempo tōmānāni nāni quēwenguinque edæ boguimāmodē godinque gāwapæntibæ tæcægūidēmæ gogadānimpa. ³Ayæ cænguī Wængonguī oōnædē da pōnongä wææ nāni cæ bai tōmengä Ōnōwoca nānō apænedō adobaī ēñente ēwocate quēwengadānimpa. ⁴Wængonguī Ōnōwoca apæneca ēñēninque tōmānāni godongāmæ bete bai ēwocate quēwengadānimpa. Edæ dicabo tæēmonca iñonte Mōitee wodi ongonto tæi tæi āayongä æpæ ompade ba begadānimpa. Īncayæ Ponguingä mōnō Codito adobaī tæi pīñænongä inte tōmēnāni tōnō godongāmæ godinque tōmengä Ōnōwoca ingante pōnongä æninque tōmēnāni ompade bete bai āawocaque bai ēwocagadānimpa. ⁵Incæte wodo tōmānāni ēñēnāmaī cædāni adinque Wængonguī wīi togacāimpa. Edæ pīīninque wænōninque ōnōmæca yabæque wido cæcä nōmængadānimpa.

⁶Īninque, Tōmēnāni wænæ wænæ cæcæte ante nāni toīnente wædō bai mīnitō wīi adobaī toīnente wæcæmīnimpa, ante mōnō imonte wææ odōmoncæte ante Wængonguī tōmēnāni nāni toīnēnō beyæ ante pangä wængadānimpa, ante abaimpa. ⁷Pancadāniya nāni badonte cōnōninca weca ædæ wæænte, Wængonguī impa, ante babæ apænete towengadānimpa. Edæ, “Cæncæte ante becæte ante tæe contadinque tōmēnāni Yæ yæ owempocæte ante ængæ gantidānitapa,” ante yewæmongatimpa cæminii. Mīnitō iñōmō edæ, Wængonguī impa, ante nāni babæ towengāi bai wīi adobaī cædāni. ⁸Pancadāniya guiquēnē nānōogængä ināmaī iñongante wīwa towengadānimpa. Edæ bæintitodee miido ganca ināni mānimpodāni edæ mānōmaī towēnāni inte adoōnæque iñonte nāñe wængadānimpa, ante adinque pōnente wædinque mōnō wæætē towēnāmaī ingæimpa. ⁹Pancadāniya guiquēnē, Quiēmē cæmō iñōmonte Awēnē dicæ pangāa, ante ancaa wænæ wænæ cædāni adinque Wængonguī tæntæ angä pocæ wængadānimpa. Īninque tōmēnāni nāni wænæ wænæ cægāinō ante mōnō Baa ante wænæ wænæ cædāmaī ingæimpa. ¹⁰Pancadāniya

guiquënë Wængongui nänö pönöningoo adinque, Wængongui wii waëmö pönongä awädö, ante piinte tededäni ate Wængongui anquedo në wido cædongä inongä inte tömënäni inänite wænonte edæ wido cægacäimpa. Mänömaï cæcä ante adinque minitö, Pangä wæncæ wæ, ante wædinque tömënäni nani piinte tedewengai bai adobaï piinte tededämaï imæwedäni.

¹¹ Ininque, Wamini mini adobaï panguinque cæminipa, ante wææ odömoncæte ante pancadäniya inänite Wængongui mänömaï pangacäimpa. Ayæ iimämo wodo iinque bayonte quëwëmö iñömonte dodäni mönö imonte wææ ancæte ante yewæmöninque, Wënæ wënæ cædäni ate Wængongui æbänö pangacäi, ante aedäni, ante wææ yewæmongadänimpa. ¹² Mänömaï impa, ante adimini incæte minitö, Mönitö nämä ongonde cöwë oda cædämaï incæmöninpa, ante pönëminitawo. Edæ mini ædocæ tæ go wæænguinque mänömaï änewëminipa töö. ¹³ Minitö wënæ wënæ cæinente wæminitawo. Edæ wii minitö adominique mänömaï wënæ wënæ cæinente wæminipa. Mönö waocabo mönö wënæ wënæ cæinente wæcabo tömämö imompa. Incæte minitö mini oda cæquinque wënæ wënæ cæinente wæmini adinque Wængongui mönö imonte cöwë në pönengä inongä inte, Oda cædämaï incæminipa, ante wææ äninque edæ, Idæwaa, angampa. Ayæ wënæ wënæ cæinente wæmini incæte tömengä töö æmænte ængä beyænque minitö eyepæ inte ate adiyæ næ gongæinque oda cædämaï inguimini iminipa.

¹⁴ Mäninö beyænque botö në waademini, ämo ëñëedäni. Wængongui impa, ante nani babæ ante gönöninga gomö adinque ocæmæ wodii winöedäni ämopa. ¹⁵ Minitö ocai encadömini iminipa, ante adinque botö mänömainö ante yewæmömopa. Ininque botö änö ante, Nö intawo, babæ intawo, ante minitö në encadömini inte apænte ante bai ëñencæminipa. ¹⁶ Mönö pönencabo owæta æninque Wængongui ingante waa ate pönente apænedinque, Mönö Codito wepæ tömämö beyæ godonte impa, ante pönëninque mönö pönencabo iñömö godongämæ bemompa. Ayæ päö mönö pä ænö æninque, Mönö Codito tönö godongämæ caate wængaimö bai imompa, ante pönëninque mönö godongämæ cæmompa. ¹⁷ Mönö päö adocaque æninque pä ænte godongämæ cæninque mönö, Päö adocaque i bai mönö tæiyæmö pönimö incæte adocabomö imompa, ante pönengæimpa.

¹⁸ Idægoidi ëñagainäni iñömö, Wængongui qui, ante baö ænte mämö ñönöningque iya tänänipa. Mänii baö tömënäni nani iya täimpaa ñönöningä pancacäa æninque tömënäni, Baö Wængongui qui i bai mönö adobaï Wængongui quimö imompa, ante bai cædinque godongämæ cænänipa, ante do ëñëminipa. ¹⁹ Mänömaï äninque botö æbänö ämoo, ante pönëmini. Në ëñënamai inäni nani babæ cönöninga iñömö edæ näwä Wængongui ingampa diyæ tömënäni tömengä quinäni inäniyaa. Ayæ, Wængongui cængui impa, ante babæ nani änogä iñömö näwä Wængongui cængui impa diyæ tömënäni Wængongui tönö godongämæ cænäniyaa. Botö iñömö edæ mänömainö ante dicæ ämogaa.

²⁰ Mänömaï änämaï imo inte botö iimäi ämopa. Tömënäni, Wængongui qui, ante babæ cönöningque dicæ näwä Wængongui ingante godönäniyaa. Inæmpa wænæidi inänite godönänipa cæminii. Wënæ tönö cædäni awädö, ante minitö gomö adinque godongämæ cænämaï imæwedäni, ämopa. ²¹ Edæ mönö Awënë bepæ godongämæ bemini inte minitö wænæidi bepæ ædö cæte godongämæ bequimiiii. Mönö Awënë cæimpaa tæ contate godongämæ cæmini inte minitö wænæidi cæimpaa ædö cæte godongämæ tæ contate cænguimiiii.

²² Æmæ pönente bai wænæidi nani bepæ bemö adinque mönö Awënë piinte badinque pämaingampa, ante ëñënimö inte mönö ædö cæte wænæidi bepæ bequimöö. Tæi piñænte wææ cæmompä mönö Awënë pänämaï inguingää.

Ni cæyænte gote bai quëwente waadete pönengæimpa

²³ Minitö iïmaï apënedinque, “Mönö quiëmë bai cæinëmo incæ Wængongui wææ änämaï ingampa,” äminitawo. Ìñæmpä mönö cæinënonque cæte quëwëmö bai wii mönö waa quëwenguinque incædönimpa. Ayæ adobaï, “Mönö cæinonque cæmö incæ Wængongui wææ änämaï ingampa,” äminitawo. Ìñæmpä mönö cæinënonque cæte quëwëmö bai wacä, Botö adobaï cæbote, ante oda cæcædongäimpa cæmöö. Oda cædämaï incæcäimpa, ante wææ cædinque mönö Wængongui nänö änönonque ante ëñente cæcæimpa. ²⁴ Edæ, Mönö æbänö cæte eyepæ æninque quëwenguimöö, ante nämä beyænque wædämaï inte wæætë wadäni beyæ ante pönëninque, Tömënanï nöingä ante ëñente waa quëwencædänimpa, ante mönö nanguï cæcæimpa.

²⁵ Ìniquë baö godonte æncæte ante në mänäni nani æi pancadë gote æninque minitö mimö entawëmini incæte, Baacä bai intawo, näwäaquiringä intawo, ante apænte änämaï inte guiñenedämaï ade cæedäni. ²⁶ Edæ, Inguipo Wængongui qui impa. Ìniquë inguipoga ongoncoo tömancoo adobaï Wængongui qui inte näwäaquincoo impa, ante yewæmongatiï apa guiñëwëmini.

²⁷ Ayæ në pönënamä ingä minitö iminite, Pö cæedäni, angä ëñëninque minitö goinëmini inte godinque tæ contayömini cænguï pædæ pönongä adinque ee ö ænte cæedäni. Baacä intawo, Näwäaquiringä intawo, ante nämänque apænte änämaï inte ade cæedäni. ²⁸ Wæætë wacä tömengä nänö mimö pönëno beyænque ante wææ æninque, “Wadäni tömënanï, Mönitö wængongui cænguï impa, ante do nani godöni impa iñæmpä cæminii,” angantawo. Mänömainö wææ angä ëñente wædinque minitö në wææ äningä beyæ ante ayæ tömengä nänö nämä apænte æmæ pönëno beyæ ante edæ cænämaï iedäni. Ìñæmpä inguipo incæ inguipoga ongoncoo tömancoo incæ mönö Awënë qui impa cæminii. ²⁹ Wii tömëmini mimö entawënö beyæ ante nämä apænte æninque wæætë në wææ äningä beyæ ante tömengä nänö nämä apænte æmæ pönëno beyænque ante minitö cænämaï incæminimpa.

Incæte bitö wabi iïmaï ante wæbitawo. “Möitee wodi nänö wææ angainö beyæ nã cæyænte wægäimo bai inte botö nõwo nã cæyænte gote bai imo adinque wacä tömengä nänö nämä apænte æmæ pönëno beyænque ædö cæte botö imote apænte anguingää,” ante wæbitawoo. ³⁰ Ayæ, “Wængongui önonque pönongä æninque botö tömengä ingante waa ate pönente apënedinque ade cæmo adinque wadäni iñömö edæ, Baacä incæ iñæmpä cæmii, ante quinante pönö babæ ante tedewënanii,” ante bitö wæbitawoo. ³¹ Incæte minitö cæmini incæ bemini incæ quiëmë bai cæmini incæ minitö cædinö adinque wadäni, Wængongui nãö apäite bai ëmönongä ingampa, ante acædänimpa, ante cædinque waa cæedäni. ³² Edæ minitö iñömö, Waa cæmöni adinque wadäni oodeoidi incæ guidiegoidi incæ Codito ingante në godongämæ pönëinani incæ tömänäni tee tewardämaï inte oda cædämaï incædänimpa, ante pönëninque edæ waa cæedäni. ³³ Botö adobaï, Botö tömëmo ænguino ante wædämaï imopa. Wæætë, Botö waa cæbo adinque wadäni Itota gämænö pöninque tömengä ængä beyænque quëwencædänimpa, ante pönëninque botö quiëmë cæbo incæ cöwë waa cæbopa.

11 Mönö Codito tömengä nänö cæi bai botö adobaï cæbo adinque mīnitō botō cæi bai adobaï cæbaīmīnīpa.

Īīmaï cæte Wængonguï ingante apænecæīmpa

²Mīnitō botō ĩmote cōwē pōnēmīni adinque botō mīnitō ĩmīnite waa adinque apænebopa. Ayæ do pōnengāināni nāni apænegāinō ante botō adodō ante apænebo ēñēninque mīnitō, Nāwangā ĩmpa, ante ēñente cæmīnīpa, ante adinque botō mīnitō ĩmīnite waa ate pōnēninque apænebopa.

³Nōwo ĩñōmō ĩīmaï āmo ēñēdāni. Mönö Codito nānængā ĩnongā inte onguīñængā ingante nē angā ingampa. Waoda nāna gæncaya adinque onguīñængā nānængā bai ĩnongā inte onquiyængā ingante nē angā ingampa. Mæmpo Wængonguï guiquēnē nānængā pōnī ĩnongā inte mōnō Codito ingante nē angā ingampa. ⁴Īnīnque onguīñængā ĩñōmō Wængonguï ingante apænedīnque ayæ, Wængonguï æbānō angāā, ante apænedīnque wencadāmaï apænecæcāīmpa. Edæ bee ocadinque tömengä nāmā ocabo ante guīñencate bai apænebaingampa.

⁵Onquiyængā guiquēnē bee ocadinque Wængonguï beyæ apænecæcāīmpa. Bee ocadinque tömengä, Wængonguï æbānō angāā, ante apænecæcāīmpa. Edæ bee ocadāmaï inte nāmā ocamō ante guīñencate bai onquiyængā apænebaingampa. Mānōmaï cædīnque tömengä nē ēñēnāmaï cædīngā ingante nāni ēō tocadingā bai ĩnongā inte encabaingampa. ⁶Edæ onquiyængā bee ocadāmaï ingā inte godōmenque ēō tocacā bai waa incædōnīmpa. Wæætē, Ēō tocate wæcæ wæ, ante wæcā ĩnīnque tömengä ĩñōmō edæ bee ocabaingampa. ⁷Edæ onguīñængā ingante badōnīnque Wængonguï tömengä nänō ēmōnō bai adobaï badongā ēmongacāīmpa. Īnīnque Wængonguï nänō nāō apāidō bai adobaï ēmōnongā inte onguīñængā bee ocadāmaï incæcāīmpa. Onquiyængā guiquēnē onguīñængā nänō ēmōnō mānīnque ēmōnongā ingampa. ⁸Onguīñængā ingante tāno badōnīnque Wængonguï ayæ onquiyængā ingante badoncæte ante onguīñængā iyapa ænte badongacāīmpa. ⁹Edæ wīī onquiyængā beyæ ante onguīñængā ingante Wængonguï badongacāīmpa. Wæætē, Bitō onguīñængā beyæ quēwencæbiīmpa, ante onquiyængā ingante badongacāīmpa. ¹⁰Īnīnque onquiyængā ĩñōmō, Botō nānōogængā beyæ Wængonguï botō ĩmote badongacāīmpa, ante pōnente wædīnque bee ocacæcāīmpa. Ayæ, Bee ocabo adinque Wængonguï anquedoidi incæ, Botō nānōogængā nē angā ingampa, ante ēñencædānīmpa, ante cædīnque onquiyængā waa cædīnque bee ocacæcāīmpa.

¹¹Incæte mōnō Awēnē nempo quēwēnīnque onguīñængā dæ angā bai onquiyængā ōnonganque baquēnengāinō anguēnē. Wæætē onquiyængā dæ angā bai onguīñængā wæætē ōnonganque baquēnengāinō anguēnē. ¹²Edæ onquiyængā ayæ dæ āñongante tömengä ingante badoncæte ante Wængonguï onguīñængā iyapa ænīnque badongacāīmpa. Wæætē wēñængā onguīñængā ingante onquiyængā mangā beyænque ēñacampa. Incæte Wængonguï beyænque tömāmō quēwēmōmpa.

¹³Onquiyængā bee ocadāmaï inte Wængonguï ingante apænecā ĩnīnque waa intawoo, ante mīnitō tömēmīni godongāmā pōnēē cōnīnque ædāni. ¹⁴Edæ dodāni nāni cægāi bai cæquēnēmō inte mōnō ĩīmaï ante pōnengæīmpa. Onguīñængā doyænguï encadinque guīñencate wæquēnængā ingampa, ante edonque ate pōnēmaīmpa. ¹⁵Onquiyængā guiquēnē tömengä doyænguï pæ ĩnīnque edæ waa ĩmpa. Edæ, Doyænguï bee ocacæbiīmpa, ante onquiyængā ingante Wængonguï badongā encacampa. ¹⁶Botō mānōmaīnō ante apænebo ēñēninque mīnitō pancamīniya wæætēdō

wæætē äinēmīnitawo. Ìñæmpa botō äninō bai mōnitō cōwē cæmōnipa. Ayæ Codito ingante godongāmæ nāni pōnencabo adobai Wængonguī quīnāni inōnāni inte edæ cōwē mǎnōmaī cædānipa cæmīni.

Awënë ææmæ ante bedinque pancamīniya wīwa cæmīni

¹⁷ Mīnitō mīni waa quēwenguīnque ante godongāmæ pōnguēnēmīni incæte mīni godōmenque wīwa quēwenguīnque godongāmæ pōmīni awædō. Ìnīnque botō, Waa cæmīnipa, ante ædō cæte anguīmoo. ¹⁸ Ìīmainō ante ñowo tǎno apænebo ēñēedāni. Codito ingante mīni pōnencabo godongāmæ pōnīnque mīnitō ññōmō mīni caipæ incæ wæætē godō wæætē godō tedewēnīnque wacabo nānēnē wacabo nānēnē bamīnipa. Ante apænedāni ēñēnīnque botō, Wabānō nōingā ante apænedānipa, ante pōnēmopa. ¹⁹ Nāwangā impa, ante pōnēmopa. Edæ, Ædānidō inānite Wængonguī waa acāā, ante edonque acæimpa, ante tōmengā angā ate mīnitō mīni cabo wadō ante mīni cabo wadō ante tedemīnipa, ante awædō.

²⁰ Ìnīnque, Awënë ææmæ impa, ante godongāmæ pōnīnque mīnitō wīi mōnō Awënë ææmæ bete bai cæmīni awædō. ²¹ Edæ mīni godongāmæ cæñedē incæ mīnitō, Wadāni adobai cæncædānipa, ante ee ongōnāmaī imīni inte tōmāmīni cænguī ade cæmīnipa. Pancadāniya ayæ gæwænte ongōñōnāni edæ pancamīniya do tōmo bete dowænte wæmīni awædō. ²² Ìñæmpa oncō ömaamīni bai inte mīnitō tōmēmīni oncōnē cænte wīi bemīni. Edæ Codito ingante mōnō godongāmæ pōnencabo Wængonguī quīmō imō incæte mīnitō nāemæ piinte cæmīni awædō. Ömæpodāni incæ tōmēnāni nāni guingo imonte wæquinque ante mīnitō pæ gompote ade cæmīnipa tōō. Mǎnōmaī cæmīni adīnque botō dicæ, Waa cæmīnipa, ämogaa.

Mōnō Awënë ææmæ

(Māateo 26.26-29; Māadoco 14.22-25; Odoca 22.14-20)

²³ Edæ mōnō Awënë botō imote pōnō apænecā ēñēnīnque botō wæætē ñīmaī ante mīnitō imīnite pōnō apænetabopa. Mōnō Awënë Itota ingante Codaa nānō odōmonte godongaiōnæ woyowotæ ññonte Itota pāō ænīnque, ²⁴ Wængonguī ingante waa ate pōnente apænedīnque pāō pā ænīnque angacāimpa. “Ìi pāō botō baō bai impa. Botō, Mīnitō quēwencæmīnipa, ante botō baō godonte bai cædīnque wæncæboimpa. Botō pā ænte pædæ pōnōmo bai mīnitō adobai ñīncayæ ate botō imote ante pōnēnīnque godongāmæ cædāni,” angantapa.

²⁵ Mǎnōmaī angā ñīnque cænāni ate owæta adobai ænīnque tōmengā, “Botō wepæ ñīmæ bai impa. Wængonguī do apænedīnque, Botō pōnō cæbo ate mīnitō Ao ämīni ñīnque mōnō godongāmæ waa cæte quēwengæimpa, angacāimpa. Ñowo adobai mīine ænīnque apænebopa. Botō wepæ ante Ao ante æmīni inte mōnō godongāmæ waa cæte quēwengæimpa. Ìnīnque mīnitō wantæ wantæ ññō bedinque botō imote ante pōnente becæmīnipa.” Ante Itota angā begadānipa. ²⁶ Ìnīnque Itota nānō pōnguīōnæ ganca mīnitō mǎnōmaī pāō wæætē wæætē cænīnque mǎnimæ bai wæætē wæætē bedinque, Mōnō Awënë tōmāmō beyæ wængacāimpa, ante odōmonte bai cæmīni adīnque wadāni ēñēncædānipa.

Nöingä ante pönëninque mönö Awënë äëmæ becäimpa

²⁷ Mänömaï i ïinque waocä pönënamäi inte mönö Awënë päö önonque cæninque Awënë nänö bequimæ önonque bedinque tömengä nänö wentamö mongænguinqu mönö Awënë baö ante, Önonque impa, ante piinte bai cædinque tömengä wepæ önonque wido cæte bai cæcampa. ²⁸ ïinque, Æbänö entawëmöö, ante minitö nämä näëmænte cöwä adinque nöingä ante pönëninque päö cæninque mänimæ bequënëmini iminipa. ²⁹ Edæ, Mönö Awënë baö bai impa, ante æcänö pönënamäi inte cænte beda ïñömö tömengä nämä nänö apænte pante wæquinque mänömaï cænte becampa. ³⁰ Edæ mänömaï cæmini beyænque pancaminiya aquimini badinque wæntæye baminipa. Pancaminiya wii pönente wæminipa. Ayæ wadäni æpodänimë mäninö beyænque do æmæwo wænänimpa.

³¹ Incæte mönö cöwä adinque nämanque apænte äninque nöingä cæmö ïinque mönö Awënë wæætë mönö imonte apænte ante piinämäi imaingampa. ³² Mönö Awënë minitö iminite apænte ante piingantawo. Edæ mönö Awënë, Ingui-pogaque quëwënanäi inänite apænte äninque botö päñedë minitö wii adobai pante wæquimini, ante wææ cædinque ñowo ïñömö edæ, Æñenguënë quëwëedäni, ante wædænque pangä wæmompä.

³³ Botö töninamini ëñeedäni. Mänömaï i, ante pönëninque minitö cæncæte ante pöninque ee ongönömüni tömänäni adoyömö pönäni ate godongämæ cæedäni. ³⁴ Godongämæ pöninque mönö wii apænte panguënëmö bacäimpa, ante wææ cædinque minitö në gæwænte wæcä ingante ämini oncönë täno cæncæcäimpa. Ñowo mäninque ante yewæmöninque botö minitö weca iincayæ ate pöninque wadö mini äninö ante godömenque apænebo ëñencæminimpa.

Wængongui Önöwoca pönö cæcä äninque cæcäimpa

12 ïñänäni ëñeedäni. Wængongui Önöwoca mönö imonte pönö cæcä ate tömengä nänö pönönoncoo eyepæ ænte ewocadinque mönö æbänö cæquii, ante ëñëninque minitö oda cædämaï incæminimpa, ante ñowo yewæmömo aedäni.

² Doyedë ïñömö minitö ëñënamäi ïñöminite wadäni, Mönitö miñæ pöedäni, ante æbämë cæte ænte mäodäni gogaminimpa. Tömënanäni miñæ mänömaï go go cædinque minitö do oda cædinque babetade näni badöinca weca ædæ wæäninque, Mönitö wængongui impa, ante cædinque quëwengaminimpa. ³ ïinque minitö iminite botö ñowo, Æñenguënë quëwëminii, ante iimäi ante apænebopa. Æcänö Wængongui Önöwoca tönö ääwocaque bai ewocacä guiquënë tömengä, Itota nänö panguinque në wentamö mongængä ingampa, ante ædö cæte tedewenguingää. Ayæ wæætë Wængongui Tæiyæ Waëmö Önöwoca tönö ewocadämaï ingä guiquënë tömengä, Itota Tæiyæ Awënë ingampa, ante ædö cæte apænequingää.

⁴ Adocanque ingante wadö pönö cædinque Wængongui Önöwoca wacä ingante wadö pönö cædinque tömengä nänö pönönincoo nënempote bai cæcä äninque mönö wadö wadö në cæmö imompä. Wængongui Önöwoca adocanque pönü inongä incæ mänömaï wadö wadö pönö cæcampa. ⁵ Ayæ mönö Awënë adocanque pönü inongä inte waocä adocanque ingante, iimäi cæe, äninque wacä ingante, Wadö bai cæe, angä ëñëninque mönö tömämö wadö wadö në cæmö imompä. ⁶ Ayæ Wængongui adobai adocanque pönü incæ tæi piñængä inongä inte waocä adocanque ingante pönö cæcä äninque tömengä tæi piñængä badinque inte wadö cæcampa.

Wacä ingante wadö pönö cæcä æninque tömengä täi piñængä badinque wadö wadö cæcampa. Ìninque Wængongui mänömai wadö wadö pönö cæcä æninque mönö tömämö eyepæ badinque cæmompä.

⁷Wængongui Önöwoca, Tömänäni waa quëwencädänimpa, ante cædäni, ante tömämö ìmonte wadö wadö pönö odömonte apæneçä ëñëninque tömämö mönö waa quëwenguinque ante godongämæ cæmompä.

⁸Ìninque Wængongui Önöwoca pancadäniya inänite, Wængongui nö nänö ëñënë ante apæneçä ëñëninque tömënäni në nö ante apænedäni badäniya. Ayæ adocä Önöwoca ìñömö Wængongui nänö cædö ante edonque odömongä adinque pancadäniya në adinäni badinque, Wængongui mänömai cæcampa, ante nö apænedäniya.

⁹Adocä Wængongui Önöwoca apæneçä ëñëninque pancadäniya, Wængongui eyepæ pönö cæcampa, ante wede pönëñäni inte tömënäni wede näni pönëñö beyænque nangui cædäniya. Ayæ Wængongui Önöwoca adocanque ìnogä inte pönö cæcä æninque pancadäniya wënæ wënæ inäni inänite gampote apænedäni ate waa badäniya. ¹⁰Pancadäniya inänite guiquënë Wængongui Önöwoca godö cæcä æninque tömënäni täi piñänäni badinque nangui pöni cædäniya. Wængongui Önöwoca apæneçä ëñëninque wadäni Wængongui beyæ në apænedäni inäniya. Ayæ wacä yewænte bai tedecä adinque, Wængongui Önöwoca tedecantawo, wënæ tedecantawo, ante wæyönäni Wængongui Önöwoca pancadäniya inänite edonque odömongä adinque tömënäni, Æcänö önöwoca në tedecä, ante do ëñëñäniya. Pancadäniya guiquënë Wængongui Önöwoca tönö apænedinque wadäni näni tede bai në tededäni inäniya. Ayæ ìñäni wadäni näni tede bai tededäni ëñëninque pancadäniya Wængongui Önöwoca apæneçä ëñëninque, Në tededäni æbänö ante tededäni, ante do ëñëñäni inte wadäni inänite edonque pöni apænedäni ëñëñäniya.

¹¹Ìninque adocä Önöwoca adocanque ìnogä inte tömengä nänö nö angai bai cædinque mönö ìmonte apænte æninque, Pancaminiya iimaï cæcæminimpa, wamini iimaï cæcæminimpa, ante pönö cæcä æninque adocanque nänö cæquënëñö ante wacä nänö cæquënëñö ante edæ tömämö mönö cæquënëñö ante cæmompä.

Adocabomö bai ìmompä

¹²Mönö baö adoyonque pöni ëñämö incæ mönö wii adodonque cæquinö ante ëñämö inte mönö pæ pagænguincö watai watai ëñamompä. Edæ wadö mönö cæquinö ante watai ëñadinque mönö wæætë wadö cæquinö ante watai watai ëñamompä. Ìninque watai watai nangui mönö ëñacö ìñömö adoyonque pöni ìmpä. Ayæ Codito nempo quëwëninque mönö adobai adocabomö ìmompä. ¹³Mönö adocabomö mönö tömämö baquinque Wængongui Önöwoca mönonga pö guiite owocampa. Ìninque oodeocä incæ guidiegocä incæ wacä ingante në cæcä incæ abæ tawænte ee gote bai nämä beyænque në cæcä incæ mönö tömämö adotaca bete bai Wængongui Önöwoca tönö äawocaque bai tömämö ëwocamompä.

¹⁴Mönö baö adoyonque pöni ëñämö incæ mönö wii adodonque cæquinö ante ëñämö inte mönö ëñacö watai watai nangui ëñamompä. ¹⁵Ìninque mönö önöwa incæ, “Önompö ömæpobo inte botö waocä baö ömaabo ìmopa,” ante ædö cæte angingää. Ìñæmpä mänömai wæte tedecä incæ önöwa cöwë waocä baö ëñate ëwacampa. ¹⁶Ayæ mönö önömonca incæ, “Awinca ömæmömo inte botö waocä baö ömaabo ìmopa,” ante ædö cæte angingää. Ìñæmpä mänömai ante tedecä incæ önömonca cöwë waocä baö ëñate ëmoncacampa. ¹⁷Ìñæmpä mönö baö tömännö aw-

incaque emömö bai edæ quimnacadö eñenguëñi. Eñëñämaï incädömöimpa. Ayæ mönö baö tömäñö önömoncaque emoncamö bai quincadodö ongoncadoquëñi.

¹⁸Incæte Wængongui iñömö edæ, Waomini mini cæquëñenö ante eyepæ cæcæminimpa, ante badoncæboimpa, ante Wængongui angacäimpa. Ìnque tömengä nämä nänö angainö bai badöninque mönö pæ pagænguicoo adoyonque baquinque ante wadö cæquïnö ante wadö cæquïnö ante tömäñö badongacäimpa.

¹⁹Edæ adonque pöni mönö cæquëñenö ante Wængongui badongä bai mönö wadö mönö cæquëñenö ante quiodö pæ pagænte cæquëñi. ²⁰Wængongui nänö nê badongaimö inömö inte wadö mönö cæquïnö ante watai wadö mönö cæquïnö ante watai nanguï mönö eñacoo eñamö incæ mönö baö adoyonque pöni eñamompa.

²¹Mänömaï eñamö iñömonte edæ mönö awinca incæ önömpo inte apænedinque, “Bitö dæ ämi bai botö tömëmo eyepæ cæcädömoimpa,” ante ædö cæte anguiï. Ayæ wæætë mönö ocamö incæ önöwa inte apænedinque, “Bitö dæ ämi bai botö tömëmo eyepæ cæcädömoimpa,” ante ædö cæte anguiï. ²²Wæætë mönö baö pancayonga pæ pagëñämaï i incæte mäniñö ante mönö godömenque waa adinque, Mönö quëwenguiñö impa, ante angäimpa. ²³Wayö guiquëñë, Wii waëmongä awædö, ante mönö äñö ante, Waa acädänimpa, ante cædinque waëmoncoo pönö dadi ompogate mäniñö beyæ godömenque waa ate bai cæmompä. Wayö guiquëñë mönö guiñëñate wædö ante, Wii edonque acäimpa, ante pönö bee ogate cædinque mönö guiñëñayö beyæ godömenque waa cæmompä. ²⁴Waëmö mönö ayö guiquëñë, Edonque acäimpa, ante bee ogadämaï cæmompä.

Incæte, Adoyonque bacäimpa, ante mönö baö wayö wayö badöninque Wængongui, Wii waëmongä, ante mönö wæyö ante pönëninque, Mäniñö botö godömenque waa abopa, ante badongacäimpa. ²⁵Ìnque, Minitö baoncoo näëmæ piñämaï incæminimpa, ante cædinque Wængongui mönö baö adoyonque badongacäimpa. Wæætë minitö nämä baoncoo incæ näëmæ waadete waa cæcæminimpa, äninque Wængongui tömäñö waa acampa. ²⁶Ìnque mönö baö adoyömonque nantate wæyömö tömäo wootæ wootæ nantate wæmompä. Ayæ wæætë adoyömonque adinque, Waëmö impa, äñäni eñente wædinque tömäo watapæ tomompä.

²⁷Minitö iñömö, Wayö wayö eñamö incæ adoyonque eñamompä, ante do pönëninque, Mönö adobai nänëñë nänëñë ingaimö inte nöwo wæætë Codito nempo quëwëninque adocabomö imompä, ante pönencæminimpa. ²⁸Ìnque Codito ingante godongämæ mönö pönencabo imö adinque Wængongui angä eñëninque iïmaï cæmompä. Yæcadomöni imöni iñömö Codito nänö da godongaimöni imönipa. Gao wæi inäni iñömö Wængongui beyæ nê apænedäni inänipa. Ayæ tæcæguedëñäni inäni iñömö nê odömonte apænedäni inänipa. Wæænömenque inäni iñömö tæi piñante entawente nê nanguï cädäni inänipa. Yæmiñæ gao æidinque inäni iñömö Wængongui Önöwoca tönö äawocaque bai ewocadinque iïmaï cädänipa. Pancadäniya, Wënæ wënæ inäni waa bacädänimpa, ante nê waa cädäni inänipa. Pancadäniya wadäni beyæ nê waa cädäni inänipa. Pancadäniya nê äñäni inönäni inte awëñëidi inänipa. Ayæ yæmiñæ pöni inäni iñömö wadäni nani tede bai nê tededäni inänipa.

²⁹Mänömaï imö incæte edæ Codito nänö nê da godongaimö dicæ tömämö imongaa. Ayæ Wængongui beyæ nê apæñimö dicæ tömämö imongaa. Nê odömönömö dicæ tömämö imongaa. Nê tæi piñante entawente nanguï cädömö dicæ tömämö imongaa. ³⁰Ayæ Wængongui Awënë pönö cæcä incæte wënæ wënæ inäni nani

waa baquinque ante dicæ tōmāmō nē waa cæmongaa. Edæ wadāni nāni tede bai dicæ tōmāmō tedemongaa. Wacā mǎnōmaī wadāni nāni tede bai tedecā ēñēn-
 inque tōmāmō dicæ mōnō tededō adodō edonque apænemongaa. ³¹ Incæte mīnitō
 Wængonguī ingante, Bitō Ōnōwoca pōnō cæcā ate mōnitō eyepæ inte ate yæcado
 ongōnāni nāni cæī bai adobaī cæcæte ante nanguī wæmōnīpa, ante apænedinque
 nanguī cæedāni.

Mōnō waadete pōnente cæcæīmpa, ante

Ōnōwō iñōmō botō, Æbānō godōmenque waa pōnī cæquīī, ante yewæmonte
 odōmōmo aedāni.

13 Botō waodāni nāni tede bai tede bopa, āmīnitawo. Wængonguī anquedoidi
 nāni tede bai tede bopa, ante tomīnitawo. Īñæmpa mōnō wadāni ĩnānite
 waadedāmaī inte tedemō ĩnīnque ampoincade ōnonque ampoī bai ĩmaīmpa. Waad-
 edāmaī inte tedemō ĩnīnque adoyōmō pōnō wo pōnō wo pōnō wæcainta bai mōnō
 adobaī ōnonque tedewēmō ĩmaīmōmpa.

² Wængonguī Ōnōwoca pōnōngā ænīnque botō tōmengā beyæ nē apænebo ĩmopa,
 ante tomīnitawo. Waodāni nāni wē wodonte ēñengainō tōmānō ante edonque pōnī
 ate ēñēmopa, ante tomīnitawo. Waodāni nāni nanguī ēñēnō ante adīnque tōmānō
 ante ēñēmopa, ante tomīnitawo. Edæ nē wede pōnēmīni inte mīnitō ānanquidi
 incæ āmīni ēñente cabænte gotawo. Īñæmpa mǎnīnō tōmānō waa pōnī cæmō incæ
 mōnō wadāni ĩnānite waadedāmaī inte cæmō ĩnīnque wæætē ōnōmonque edæ mōnō
 babāīmpa.

³ Ōmæpodāni ĩnānite botō mǎincoo tōmāā nēnempote godōmopa, ante
 tomīnitawo. Wængonguī beyæ ante cæyōmote wadāni botō baō botō ēñayō incæ
 iya tancæ cædāni ate wædīnque botō piyænē cæbaīmopa, ante mīnitō, Waa cæbopa,
 ante tomīnitawo. Īñæmpa mǎnīī tōmāā waa cædīnque mōnō waadedāmaī inte cæmō
 ĩnīnque mōnō waa cædō beyæ ænāmaī ĩmaīmōmpa.

⁴ Nē waadete pōnēngā iñōmō tōmengā piñāmaī inte edæ piyænē cædīnque godō
 waadete cæcampa. Wadāni gomonga cædīnque godōmenque nanguī ænāni ad-
 īnque nē waadecā wæætē waadete pōnēnīnque piīnte wædāmaī inte piyænē cæ-
 campa. Nāmā nānō cædīnō ante pōnēnīnque nē waadete pōnēngā iñōmō, Botō
 gomonga cæbopa, ante tededāmaī ingampa. Tōmēmoque waēmō ĩmopa, ante nāmā
 waa adāmaī ingampa. ⁵ Wacā tæcæ cæyongante nē waadete pōnēngā iñōmō, Tāno
 cæbote, ante wææ cædāmaī ingampa. Nāmā nānō æīnēnō ante cædāmaī inte tō-
 mengā wadāni beyænque cæcampa. Wæætē wīī iñontobæ ænguī bacampa. Wadāni
 wēnæ wēnæ cædāni ate wædīnque tōmengā nē waadecā ĩnōngā inte wæætē piyænē
 cæcampa.

⁶ ĩnīnque, Wacā wēnæ wēnæ cæcampa, ante tededāni ēñente wædīnque nē
 waadete pōnēngā iñōmō mǎnīnō ante todāmaī ingampa. Wæætē, Wacā nōīngā cæ-
 campa, ante tededāni ēñēnīnque tōmengā watapæ pōnī tocampa. ⁷ Æbāmē cædāni
 incæ nē waadete pōnēngā iñōmō piyænē cædīnque tōmānāni ĩnānite wææ gom-
 pocampa. Wæætē, Waa cædānīpa, ānāni ēñēnīnque tōmengā, Nāwangā ĩmpa, ante
 do ēñēngampa. Æbāmē ba incæte tōmengā, Ayæ ate watapæ bacæīmpa, ante cōwē
 pōnēnīnque wæntædāmaī inte ee cæcampa.

⁸ Mōnō waadete pōnēmāmo iñōmō cōwē dæ badāmaī ingæīmpa. Wæætē Wæn-
 gonguī iīncayæ ate, Idæwaa, angā ĩnīnque ĩnguīpoga tōmengā beyæ mōnō apænedō

guiquënë edæ dæ angæimpa. Wadāni nāni tede bai mōnō tededō incæ pæ wēēnecæimpa. Inguipoga nanguī adinque mōnō ēñēnō ante Wængonguī, Idæwaa, ancæcæimpa. ⁹ Nōwo mōnō ēñēnō iñōmō pancaā ēñēninqe pancaā wæætē oda cæmompā. Wængonguī beyæ mōnō apænedō iñōmō pancaā apænedinque māninqe apænemompā. ¹⁰ Iñinque bayedē guiquënë Wængonguī nānō apænedō ædæmō ēñēninqe mōnō nōingā pōni odōmonte apænecæmōimpa. Oda cæte mōnō ēñēnō ante, Idæwaa, āninqe Wængonguī māniñedē edæ mōnō wīi eyepæ apænete wædō ante, Idæwaa, ancæcæimpa.

¹¹ Botō iñōmō wēñæmoyedē wēñængā nānō tede bai tededinque wēñængā nānō ocai ēñēnō bai ēñengaimo inte wēñængā, Īimai impa, ante nānō pōnēnō bai botō māniñedē adobai pōnengaboimpa. Nōwo guiquënë picæmo badinque wēñæmoyedē botō cægaiñō ante ñimpo cæbopa. ¹² Awocawænta wēmō ate bai cædinque mōnō ñōwo Wængonguī Ōnōwoca nānō odōmōnō ante edæ wīi edonque amompā. Ayæ ate guiquënë mōnō awincadō awinca edonque pōni acæimpa. Botō ñōwo pancaā adinque oda cæte ēñēmo ĩmopa. Ayæ ate guiquënë Wængonguī pōnō odōmongā adinque tōmengā botō ĩmote edonque pōni acā bai botō adobai tōmāā eyepæ pōni acæboimpa.

¹³ Iñinque mōnō entawēnoncoo ante adinque mēnonque go adodonque mānim-podonque ayæ ongompā. Mōnō wede pōnēnō ante ædæmō entawengæimpa. Wat-apæ bacæimpa, ante mōnō pōnēnō ante ædæmō entawengæimpa. Mōnō waadete pōnēnō ante ædæmō entawengæimpa. Iñinque mānimpodonque ayæ ongō incæte mōnō waadete pōnēnō iñōmō edæ ñænænō pōni ĩ ĩninqe mōnō māniñō ante tāno ædæmō entawengæimpa.

Wadāni nāni tede bai æbānō tedequīi, ante

14 Iñinque mīnitō, Nē waadete pōnēmō bacæimpa, ante māniñonque ante pogodo gote bai nanguī cæedāni. Ayæ adobai, Wængonguī Ōnōwoca mōnō ĩmonte nānō pōnōnō bai mōnō eyepæ ēwocadinque cæcæimpa, ante nanguī æi-nente wæedāni. Māniñō Wængonguī Ōnōwoca nānō pōnōnoncoo ate adinque mīnitō, Wængonguī beyæ nē apænemō mōnō tāno adodonque ante bacæimpa, ante godōmenque æi-nente wædinque cæedāni. ² Edæ wadāni nāni tede bai æcānō tededā tōmengā wīi waodāni ĩnānite apænecampa. Wængonguinque ingante apænecampa. Edæ tōmengā ōnōwocaque tedecā ĩninqe tōmengā ingante Wængonguī æbānō awēmō apænecāā, ante ædō cæte ēñenguīnāni. ³ Wængonguī beyæ nē apænecā guiquënë waodāni ĩnānite waadete pōnēninqe ĩmai cæcæte ante apænecā ēñēnānipa. Mīnitō tæi piñāmīni mīni entawenguinque wede pōnencæmīn-impā, ante apænecampa. Ayæ, Wæwente quēwēmīni incæ mīnitō wampo bawē-nente tæi piñænte cōwē cæcæmīnimpā, ante tōmengā Wængonguī beyæ ante pōnō apænecampa. ⁴ Wadāni nāni tede bai nē tedecā guiquënë, Tōmēmo tæi piñæmo botō entawenguinque ante nangūi ēñencæboimpa, ante nāmā beyænque ante tedecampa. Wængonguī beyæ nē apænecā guiquënë Codito ingante nāni godongāmæ pōnencabo beyæ ante apænedinque, Mīnitō tæi piñænte mīni entawenguinque ēñencæmīnimpā, ante apænecampa.

⁵ Iñinque mīnitō tōmāmīni wadāni nāni tede bai apænemīni adinque botō wædænque tobaimopa. Wæætē tōmāmīni Wængonguī beyæ apænemīni adinque botō godōmenque watapæ tobaimopa. Wængonguī beyæ nē apænecā iñōmō

ñænængä iñongä wacä tededö nē tedecä guiquënë wædangä ingampa. Incæte, Codito ingante mīni godongämæ pönencabo tæi piñænte entawencæminimpa, ante cædinque tōmengä wacä tededö tedete ate, iīmaī ante tedetabopa, ante mīnitō tededö adodō ante edonque apænecä iñinque tōmengä adobaī ñænængä iñongä iñaingampa. ⁶ Iñänäni ēñēedäni. Wængonguī nänō wē wodönō incæ tōmengä nänō nō ēñēnō incæ tōmengä nänō nō odömönō incæ ante botō mīnitō weca pöninque odōmonte apænebo ēñēninque mīnitō godōmenque pönēmaimīnīpa. Wængonguī iīmaī cæcæcäimpa, ante apænebo ēñēninque mīnitō guññente wædinque waa cæbaimīnīpa. Wæætē mīnitō weca pöninque botō wadäni nāni tedebaī tedete apænebo baī mīnitō ædō cæte godōmenque nē pönēmīni baquēñēmīni.

⁷ Edæ gobæ ongonde aa pedinque ðnonque ante pedäni ēñēninque mönō wæætē, Ædemē ante pedänīpa, ante ædō cæte ēñenguīi. Nē ampoinca ampodäni adobaī ämotamīni inämaī ðnonquedō ante ampodäni ēñēninque mönō, Ædemē ante ampodänīpa, ante ædō cæte ēñenguīi. ⁸ Ayæ tontado adobaī, Wæatedö wæætē cæcæimpa, ante todompeta nāni ancadeca we ööninque idiquibæ we öongä iñinque wadäni, Æbämē cæcæte ante we öongä, ante wædinque oda cæte ee ongonde wæatedö wæætē cædämaī imainänīpa. ⁹ Ayæ mīni cabo adobaī wīi edonque apænemīni ēñēninque wadäni, Æbämē ante tedecä, ante wædinque oda cæte wæbainänīpa. Woboyæ mämoque iñæmpa tedewēmaimīnīpa.

¹⁰ Waodäni inguipoga tōmäo quēwēninque nangui nāni tededoncoo tededänīpa. Näwangä impa. Incæte wadäni nāni tededö wadäni nāni tededö tōmäo tedequinō i iñinque adodeque incæ ðnonque tedete inämaī impa. ¹¹ Iñinque wacä apænecä ēñēninque botō, Æbänō ante tedecä, ante ēñēnämaī imo adinque tōmengä wæætē, Wabi inte wīi ēñēmīpa, ancædongäimpa. Tōmengä ingante botō adobaī, Wabi inte botō tededö wīi tedebīpa, ante ancædōmoimpa. ¹² Iñinque mīnitō, Wængonguī Öñowoca pönō cæcä æninque mönō eyepæ ewocadinque cæcæimpa, ämīnitawo. Mänömainō äninque mīnitō, Wængonguī Öñowoca pönō cæcä ænte ewocadinque cædömō inte mönō Codito ingante mönō godongämæ pönencabo godōmenque tæi piñænte entawengæimpa, ante pönēninque mīnitō, Mäninonque ante botō ewocate cæquinō ante pönongä æncæboimpa, ante täno æññente cædäni.

¹³ Mänömaī beyæ wadäni nāni tede baī nē tedemīni iñömō mīnitō tönñädäni adobaī ēñencædänīpa, ante cædinque Wængonguī ingante iīmaī ante ædäni. Wængonguī ēñēmi. Wadäni nāni tede baī do tededinque botō æbänō ante tedeta-woo, ante bitō odōmonte apænebi ēñēmoe. Mänömainō ante apænebi ēñēninque botō wæætē mönitō tededö adodō ante edonque apænebo ēñēninque mīnitō Wængonguī ingante apænete cædäni. ¹⁴ Wadäni nāni tede baī tededinque Wængonguī ingante apænebo inte botō öñowocaque pönente apænedinque ocai ömædæcabo baī inte apænebaïmpa.

¹⁵ Mänömaī impa, ante adinque æbänō cæquimoo. Edæ öñowoca pönente apænedinque botō ocai adobaī ēñente pönēninque Wængonguī ingante apænecæboimpa. Ayæ Wængonguī ingante waa pönī apænecæte ante öñowoca pönente ämotamīni äninque adobaī ocai ēñente pönēninque ämotamīni ancæboimpa. ¹⁶ Bitō, Wængonguī ingante waa pönī cæcampa, ante öñowocaque pönēninque apænēbitawoo. Iñæmpa Wængonguī ingante waa ate pönēninque öñowocaque pönente apænebi ēñēninque wacä nē öñonganque ingä guiquënë, Bitō æbänō apænebīi, ante ēñēnämaī inte, Ædō cæte Ao anguiimoo, ante wæbaingampa. ¹⁷ Bitō waa ate pönēninque öñowocaque

waa apænebi eñëninque tōmengä wæætë, Bitō æbänö ancæte ante tedebei, ante eñënamai inte ædö cæte godōmenque tæi piñænte entawenguingä. ¹⁸ Botō iñömö, Minitō wadäni nāni tede bai wædænque te deyōmīni botō godōmenque nanguī tede-bopa, ante Wængonguī ingante waa ate pönëninque apænebopa. ¹⁹ Incæte Codito ingante mōnō pōnencabo tōnō godongāmæ pōninque botō wadäni nāni tede bai tæne tino mūido ganca tedequī incæ wīi tededinque wæætë, Wadäni eñencædän-impā, ante mēnea pōni edonque apænedinque waa tobaïmopa.

²⁰ Iñänāni eñëedāni. Tæcæ eñadāni iñömö wënæ wënæ mōnō cæpāmo ante eñënamai inānīpa. Minitō adobaï mäninō wënæ wënæ mōnō cæpāmo ante eñënamai inte bai pōnëedāni. Wæætë ocai mōnō pōnënō guiquënë mīnitō mäninō ante wëñänāni que wædænque nāni encadō bai wīi pōnëninque wæætë picænāni nāni nanguī encadō bai adobaï nanguī encate pōnëedāni. ²¹ Dodāni mōnō Awënë beyæ ante wæ ænīnque iūmai ante yewæmongadänimpā. “Wadäni nāni tede bai nē tededāni inānite botō ämo eñëninque tōmënāni wæætë botō quināni inānite apænecædänimpā. Incæte iñāni guiquënë botō imote cōwë eñënamai inguināni awædö, ante mōnō Awënë angampa,” ante yewæmongatimpā.

²² Iñinque, Wadäni nāni tede bai tedemīni eñëninque nē pōnënāni wædāmai iñönāni nē pōnënāmai ināni guiquënë mänōmai tedemīni eñëninque guñente wæcædänimpā, ante cædinque Wængonguī Önöwoca pōnō cægacäimpā. Wæætë Wængonguī beyæ ante edonque apænemīni eñëninque nē pōnënāmai ināni wædāmai iñönāni nē pōnënāni guiquënë do eñencædänimpā, ante cædinque Wængonguī Önöwoca pōnō cægacäimpā. ²³ Codito ingante mīni pōnencabo godongāmæ pōninque tōmämīni wadäni nāni tede bai wadäni nāni tede bai tedemīni adinque ayæ pōnāni guiquënë nē eñënamai ināni incæ nē pōnënāmai ināni incæ æbänö anguināni. Mänōmainonque tedemīni eñëninque tōmënāni wæætë, Minitō ömædæcamīni inte önonque tedewëmīnīpa, ante wæbaïnānīpa.

²⁴ Tōmämīni wæætë Wængonguī beyæ edonque apæneyōmīni nē pōnënāmai ingä incæ nē eñënamai ingä incæ ponte eñëninque tōmämīni mīni apænedö beyæ tōmengä, Botō wënæ wënæ cætābopa, ante wæbaingampa. Ayæ Wængonguī beyæ ämīni eñente wædinque tōmengä, Botō näwangä wënæ wënæ cædōmo inte wentamö mongænte awædö, ante nāmā apænte ämaingampa. ²⁵ Ayæ tōmengä mimōno nānō wentamö wë wodōnincoo da tadonte ate bai edonque ate wædinque tōmengä ædæ wæænte guidōmëmæ ñongæninque Wængonguī ingante, Bitō adobique nē waa cæbi imīpa, ante waa apænebaingampa. Ayæ mīnitō imīnite, Näwangä Wængonguī Önöwoca tōnō äawocaque bai ewocamīnīpa, ante apænebaingampa.

Quiëmë cæmīni incæ nöingä pōnente ædæmō cæedāni

²⁶ Mänōmai i inīnque iñänāni, mōnō æbänö cæquīi. Wængonguī Önöwoca pōnō cæcä ænīnque eyepæ inte mīnitō tōmämīni godongāmæ pōninque iūmai cæmīni incæmīnīmpā. Adocanque ämotamīni adodeque angä ingampa. Wacä odōmoncæte ante adodeque apænecä ingampa. Wacä ingante Wængonguī edonque odōmonte apænecä eñëningä inte tōmengä adodö ante adodeque ante odōmonte apænecä ingampa. Wacä guiquënë wadäni nāni tede bai adodeque tedecä ingampa. Tōmengä æbänö ante tedecä, ante wacä do eñëninque mīnitō tededö wæætë edonque apænecä ingampa. Mänōmai wæde wæde ante nē apænemīni inte mīnitō tōmämīni, Godongāmæ tæi piñænte entawengäimpā, ante iūmai cæte tedecæmīn-

impa. ²⁷Wadāni nāni tede baī tedeyongā wacā adotedæ wææ tededāmaī incæcāimpa. Māningā iinque tedecā ate wacā tedecæcāimpa. Ayæ wæætē wacā, Tedecæboimpa, angā Ao āmīni tedecā ate idæwaa. Mānimpodānique tedete nīne cædāni adinque wacā ēñēninque, Æbānō ante tededānii, ante mīnitō tededō edonque apænecā ēñencæmīnimpā. ²⁸Codito ingante mīni pōnencabo weca nē ēñente adodō apænequēnengā dæ angā iinque edæ wadāni nāni tede baī nē tedeīnente wacā iñōmō wæætē ee adinque tededāmaī inte pæ wēēnecæcāimpa. Tōmengā nāmā incæ ōnōwēnenque tedete Wængonguī ingante tedecæcāimpa.

²⁹Wængonguī beyæ nē apænedāni adobaī mengāa pōni apænedāni ate idæwaa. Mānimpodānique apænedāni ēñēninque mīnitō, Nō ante apænedānii, idiquibæ ante apænedānii, ante apænte ante ēñencæmīnimpā. ³⁰Ayæ adocanque tæcæ apænee gōñongā wacā nē ēñēē congā ingante Wængonguī Ōnōwoca iñontobæ apænecā ēñēninque tōmengā, Botō apænecæboimpa, angā ēñēninque nē apænedingā wæætē apocænē edæ ēamonca ēñēē concæcāimpa. ³¹Edæ Wængonguī beyæ apænedinque adocanque tāno apænete nīne cæcā ate wæætē wacā wæætē wacā apænete nīne cæcæcāimpa. Mānōmaī cædinque mīnitō godongāmæ ēñente badinque wampo bawēnente ongoncæmīnimpā. ³²Wængonguī beyæ nē apænedāni iñōmō tōmēnāni nāmā ōnōwoca wææ āninque ōnōwēnenque wædāmaī inte ocai pōnente apænedānimpā. ³³Edæ Wængonguī incæ nē gānē pōnēnongā inte Yæ yæ wapiticæ godō tededāmaī ingampa cæmīnii.

Wængonguī quīnāni Codito ingante nāni pōnencabo tōmānāni wayōmō nāni cabo wayōmō nāni cabo godongāmæ pōninque nāni cæī baī cædinque, ³⁴mīnitō adobaī Codito ingante mīni pōnencabo godongāmæ pōñōmīni onquiyænāni inānite āmīni tededāmaī incædānimpā. Edæ, Apocænē ēñēmæwedāni, ante Mōitee wodi nānō wææ angāī baī cædinque onquiyænāni wæatedō wæætē ānāmaī inte onguīñænāni nāni ānonque ēñēninque edæ ēñēē concædānimpā. ³⁵Æbānō ante apænedānii, ante ēñencæte ante wædinque onquiyængā oncōnē gote ate angā ēñēninque tōmengā nānōgængā wæætē adodō apænecā ēñencæcāimpa. Edæ Codito ingante mīni pōnencabo godongāmæ pōñōmīni onquiyængā iñōmō, Guīñēnete awædō, āninque ee tededāmaī incæcāimpa.

³⁶Īnæmpa, Wængonguī nānō angāinō ante mīnitō adomīnique dicæ mā pōnēninque odōmōmīnitawogaa. Wadāni ēñēnāmaī iñōnānite mīnitō dicæ adomīnique Wængonguī nānō apænedō ante ēñēmīnitawogaa. ³⁷Bitō, Wængonguī beyæ nē apænebo ĩmopa, āmitawo. Wængonguī Ōnōwoca pōnō cæcā āninque botō eyepæ ēwocadinque nē nanguī cæbo ĩmopa, āmitawo. Mānōmaī ēwocabi inte do ēñēmi ininque bitō, Mōnō Awēnē nānō wææ angāinō ante Pabodo māninonque ante yewæmongampa, ante, Nāwangā impa, ante apænebaīmipā. ³⁸Wæætē māninō ante æcānō ēñēnāmaī ina tōmengā ingante wæætē mōnō ēñēnāmaī ingæīmpa.

³⁹Īñānāni, Mānōmaī impa, ante pōnēninque mīnitō, Wængonguī beyæ apænecæīmpa, ante cæcæte ante cōwē nanguī cædāni. Ayæ, Pancadāniya wadāni nāni tede baī apænedānimpā, ante adinque mīnitō Baa ānāmaī iedāni. ⁴⁰Incæte quīēmē cæmīni incæ mīni pōnencabo mīni godongāmæ watapæ quēwenguinque ante nōingā pōnente ædæmō cæedāni.

Codito ñāni ömæmongacäimpa, ante

15 Ñowo botö tönñamini eñeedāni. Codito ingantedö ante botö do watapæ apænebo eñëninque mīnitö mänineque ante Ao ante wede pönëninque edæ tæi ongömīnitapa. Ñowo guiquënë mīnitö, Mänine ante æbānō intawoo, ante oda cædāmaī incæmīnimpa, ante botö adodö ante ædæmō odömonte yewæmōmōi aedāni. ²Mänine ante watapæ apænebo eñëninque edæ mīnitö adode ante wede pönëninque tæi ongömīni inte edæ mänine beyænque quëwëmaimīnīpa. Wæætë mänine botö watapæ apænedö ante æmæ pönëmīni īninque mīni pönënimāmo incæ öñömāmoque pōni babaimpa.

³Edæ mönō Codito tömengä nänö pönö cægāinö ante botö eñënë ante botö doyedë, Mänine ante mönö täno pönengäimpa, ante pönö apænebo eñëmīnitapa. Ñowo wæætë, Eñencæmīnimpa, ante botö adode ante yewæmōmo acæmīnimpa. Wængonguī angä eñente nāni yewæmongāinö bai īninque cædinque mönō Codito īñömö wënæ wënæ mönö cægāinö ante teëmë mongænte wæætë wængacäimpa, ante impa.

⁴Ayæ, Wængä ate tömengä baö ini ö ænte māo daga wengadānimpa. Ayæ Wængonguī angä eñente nāni yewæmongāinö bai cædinque Codito mëönaa go adoönæque īñonte do ñāni ömæmonte mīingä quëwengacäimpa, ante mänine ante impa. ⁵Ayæ ñāni ömæmonte quëwënogä inte tömengä dobæ Pegodo weca ponte a ongongä acantapa. Ayæ ate tömengä nänö nē emīñængāināni, Dote, nāni änönāni weca dobæ ponte a ongongä adānitapa. ⁶Ayæ ate mönö tönñadāni quīniento ganca ayæ godömenque nanguī ināni godongämæ ongöñönāni tömengä tömënāni weca do ponte edæ a ongongä adotedæ agadānimpa. Īnāni īñömö pancadāniya ñowo do wængadānimpa. Pancadāniya nanguī ināni nē agāināni incæ ayæ mīināni quëwënanīpa. ⁷Mänināni adāni ate Itota wæætë Tantiago weca a ongongä agacäimpa. Ayæ ate tömengä nänö nē da godongāināni weca adocä Itota ponte a ongongä agadānimpa. Itota mänömaī cægacäimpa, ante botö, Mänine täno pönengäimpa, ante yewæmōmopa.

⁸Botö guiquënë nē wæmpodingä bai inte wæyömete tömengä ñowo pōni botö weca a ongongä atabopa. ⁹Edæ Codito tömengä nänö nē da godongāimo imo incæ botö wadāni tömengä nänö nē da godongāināni bai wīi adobaī imopa. Edæ Itota ingante godongämæ nāni pönencabo inānite nē togænte pangāimo inte botö wädāmo pōni imopa. ¹⁰Edæ æbāmë imo incæte Wængonguī waadete pönö cæcä beyænque botö mänömaī imopa. Edæ tömengä nänö pönö cædö ante botö wīi önonque cæcæte ante æmoimpa. Wæætë wadāni wædænque cæyönāni tömengä waadete pönö cæcä æninque botö godömenque nanguī cætabopa. Incæte botö dicæ tömëmoque adoboque cæbogaa. Wæætë Wængonguī nänö waadete pönö cædö ænimo inte botö tömengä tönö cædinque nanguī cæbo imopa. ¹¹Īninque botö apænebo incæ tömënāni apænedāni incæ mönö Codito tömengä nänö pönö cægāinonque ante tömämōni apænemōnīpa. Mänineque ante apænemōni eñëninque mīnitö mänineque ante pönëmīnitapa.

Do wængāināni incæ ñāni ömæmoncædānimpa, ante

¹²Īninque, Codito do ñāni ömæmongacäimpa, ante apænemōni eñëmīni incæte pancamīniya, Nē wængāināni dicæ ñāni ömæmönāniyaa, ante ædö cæte

ānewēmīnii. ¹³Īnāmpa, Cōwē nāni ōmāēmōnāmaī īnāni baī mōnō Codito incæ adobaī nāni ōmāēmōnāmaī incædongāimpa. ¹⁴Ayæ Codito nāni ōmāēmōnāmaī ingā baī tōmengā waa pōnī nānō pōnō cægāinō ante quīnante apānequēnēmōnii. Edæ ōnonque pōnī bacædōnimpa. Ayæ ōnonquedō ante apānemōni baī mīnitō mānīne ante pōnēmīni incæ ædō cæte quēwenguēnēmīnii. ¹⁵Mōnitō godōmenque Wængonguī ingante ante apānedinque, Codito ingante Wængonguī incæ angā nāni ōmāēmōngacāimpa, ante apānetamōnīpa. Īnīnque, Nē wængāināni cōwē nāni ōmāēmōnāmaī īnānīpa, ante mīni ānewēnō īñōmō nāwangā ī baī mōnitō Wængonguī nānō cægāinō ante babæ wapiticæ ante edæ apānecædōmōnīpa. Edæ, Cōwē nāni ōmāēmōnāmaī īnānīpa, ante mīni ānewēnō nāwangā ī baī Wængonguī, Nāni ōmāēmōe, ante ædō cæte anguēnengāā.

¹⁶Īnāmpa, Nāni ōmāēmōnāmaī īnānīpa, ante mīni ānewēnō nāwangā ī baī Codito incæ adobaī nāni ōmāēmōnāmaī incægacāimpa. ¹⁷Ayæ Codito nāni ōmāēmōnāmaī ingā baī mīnitō mīni wede pōnēnō incæ ōnonque pōnī pōnente incædōnimpa. Īnīnque wentamō mīni mongāēnō ædō cæte nā mēnongaquēnēmīnii. Mīni wēnæ wēnæ cædinō beyæ wentamō mongāente wæcædōmīnīpa. ¹⁸Mānīnō ante mīni ānewēnō nāwangā ī baī Codito nempo quēwēnīnque do wængāināni incæ do mempoga wænīnque ædō cæte quēwenguēnēnānii. Quēwēnāmaī incædōnānīpa. ¹⁹Codito pōnō ængā beyænque mōnō adopoque wænīnque wæætē wænāmaī quēwengæīmpa, ante mōnō inguīpogaque pōnēnīnque wæmo baī wadāni wædænque wæwēñōnāni mōnō godōmenque nanguī wæwenguēnē incædōnimpa.

²⁰Incæte Codito dobæ nāni ōmāēmōngacāī apa ānewēmīnii. Edæ waodāni tānomō amiñayonte tā pedāni baī cædinque Wængonguī adobaī, Do wængāināni īnānīte āmo nāni ōmāēmoncædānīpa, ante cæcæte ante cædinque Codito Tānocā ingante do angā ēñēnīnque nāni ōmāēmōngacāīmpa. Nāwangā impa, ante āmo ēñēmaīmīnīpa. ²¹Edæ waocā incæ adocanque ēñēnāmaī cæcā beyænque mōnō wænguīmāmo pongatīmpa. Ayæ nē wænguēnēmō inte wæyōmonte Nōwocā Waocā ēñagaingā inte wænīnque nāni ōmāēmōngā beyænque mōnō nāni ōmāēmonte quēwenguīmāmo adobaī pongatīmpa. ²²Edæ māmæ Adāō wodi tōmengā tōnō tōmāmō godongāmæ nē wænguēnēmō bagaimō inte mōnō tōmāmō adobaī Codito tōnō godongāmæ nē nāni ōmāēmōnguīmō bagamōīmpa. ²³Incæte to amiñayedē tānomō nāni tā pedōmō baī īnongā inte mōnō Codito adobaī Tānocā īnongā inte edæ tāno nāni ōmāēmōngacāīmpa. Codito nempo nē quēwēnōmō guīquēnē mōnō ayāmō īnōmō inte edæ tōmengā nānō ponguīōnæ īnīnque ba ate mōnō māniñedē ate nē nāni ōmāēmōnguīmō īmōmpa.

²⁴Māniñedē ate inguīpoga awēnē odayeidi nempo ongoncoo incæ Codito tōmancoo ō ænte ōmāe ēwencæcāīmpa. Nānānāni nāni ānōmāmo adobaī tōmāmāmo ōmāe ēwencæcāīmpa. Tæī piñānāni nāni nanguī cædoncoo incæ Codito adocā incæ tōmancoo wido cæcæcāīmpa. Ayæ adocā nē Awēnē Odeye īnongā inte tōmengā nempo ongoncoo wæætē edæ Mæmpo Wængonguī nempo edæ pædæ godongā ænīnque Mæmpo Wængonguīnque tōmenganque adocanque Awēnē Odeye īnongā incæcāīmpa. Māniñedē ate edæ nōwo mōnō quēwēmāmo īñōmō edæ īnīnque baquīnō anguēnē. ²⁵Incæte Wængonguī Codito ingante, Bitō īmite nē piinte cægāināni tōmānāni īnānīte mō gongæncæbiīmpa, ante cædinque tōmengā ōnōwa gāānē nānō wææntodonganca edæ adocā Codito incæ mānīnō nānō īnīnque cægānca nē Awēnē īnongā ingāmpa.

²⁶ Ayä tömengä ingante në püinte cädäni inänite ämæwo bæ tacä adinque adoque pöni mönö wænguimämo incæ ayä ongö adinque Wængongui, Mänimämo dä bacäimpa, ante mäo ömæe ewencäcäimpa. ²⁷ Tömengä nempo Wængongui tömancoo pædæ godongä æninque tömengä në Awënë bacäcäimpa, ante do yewæmongatimpa. Mänömainö ante yewæmonte ongö incæte Wængongui në pædæ godöongä inte ædö cæte, Nämä pædæ godömopa, anguingää, ante edonque acäimpa. ²⁸ Ayä ate Wængongui Wengä incæ, Mæmpo Wængongui botö nempo tömancoo në pædæ pönongä inte tömengä adocanque pöni Tæiyä Awënë badinque tömenganque tömancoo ênempocäcäimpa, ante cæcäcäimpa. Mänömaï cæte ate tömengä adobaï Mæmpo Wængongui nempo quëwëninque Mæmpo nänö änonque ante ênente cæcäcäimpa.

²⁹ Pancadäniya edæ, Do wængainäni beyænque cæmönipa, ante cædinque tömënäni beyæ æpænë guidänipa. Ìninque, Ñäni ömæmönämaï ingäeimpa, ante mini änewënö näwangä i bai tömënäni æbänö cæquënëni inäni. Edæ, Ñäni ömæmönämaï ingäeimpa, ante näwangä i bai edæ tömënäni në wængainäni beyæ quinante æpænë guiquënëni. ³⁰ Ayä mini änewënö näwangä i bai mönitö ïñömö quinante möni wantæ ïñö wantæ ïñö wodo wænguinö ante wæquënëmönii. ³¹ Botö ïimö ïñö ïimö ïñö do wæwocabo ïnömö ïmopa, ante näwangä ämopa. Botö mönö Awënë Itota Codito nempo quëwëninque mïnitö ïmïnite ante pönëninque watapæ tobopa, ante näwangä antawoo. Edæ botö tönïnamini ïñömïnite botö mäninö ante näwangä änimo inte, Wæwocabo ïmopa, ante adobaï, Näwangä impa, ante ämo êñëmaimïnipa. ³² Waomö mönö æinënö æncæte ante botö epetoidi babæidi bai inäni tönö guëa wæætedö wæætë cæbo bai önonque cæte incädönimpa. Edæ, Do wængainäni ñäni ömæmönämaï incädänimpa, ante näwangä i bai botö, “Ïimö ate mönö æmæwo wænguinque ante cænte bete tocäimpa,” ante näni änewënö bai ante ee quëwencädömoimpa.

³³ Ìnämpa mänömainö ante tedewënäni êñëninque mïnitö wæætë oda cädämaï ïmæwedäni. Edæ do yewæmöninque, “Wïwa cädäni tönö guëa cædinque bitö adobaï wapiticæ quëwëninque godongämæ cæbipa.” ³⁴ Ante wææ änäni êñëedäni. Edæ, mïnitö wënæ wënæ cæmïni adinque Wængongui ingante ante êñënämaï inäni ïñömö oda cæbainänipa. Mänömaï beyæ mïnitö guingo ïmonte wæquënëmini ïnömïni inte nö cæte quëwëninque edæ wënæ wënæ cädämaï ïedäni.

Do wængainäni ïmaï ñäni ömæmoncädänimpa, ante

³⁵ Bitö, Do wængainäni æbänö cæte ñäni ömæmonguinäni, ante ämitawo. Ayä, Ñäni ömæmöninque mönö baö quinö bai êñate ponguimö, ante êñencæte ante wæbitawo. ³⁶ Ìnämpa önonquedö ante wæbi awædö. Edæ waocä tömëmö quiyacä ate yabæque ñömäate ate tä bocate pædimö bai mönö baö adobaï inte ñömængäeimpa. ³⁷ Ìnämpa todigo incæ wawæ incæ bitö, Tä bocate pæcäeimpa, ante cædinque do pædiwæ tömëwæ ænämaï inte tömëmonque ænte godö quiyabi ate tä bocate pæpa. ³⁸ Incæte, Tömëwæ æbänö ïwæ pæquiwæ, ante nämä nänö angainö bai cædinque Wængouinque pönö badongä ate tä bocate pæpa. Wamö tä bocate pædinque æbänö incaquiï, wamö æbänö incaquiï, ante do êñengainäni inte Wængongui pönö badongä ate wainca wainca incapa.

³⁹ Tömännö baö wïi adoyö bai êñompa. Mönö waomö baö wayö êñamompa. Ööingäidi baö wayö êñädänipa. Ayamöidi baö wayö êñädänipa. Gæyæidi baö wayö

ēñadānīpa. ⁴⁰ Ayæ öönædē quēwēnāni wayō mongæññōnāni inguipoga quēwēmō iñōmō wayō ēñamompa. Īnīnque öönædē quēwēnāni waa nāni ēñadō wayō iñonte inguipoga quēwēmō waa pōnī mōnō ēñayō guiquēnē wīi adobaī ēñamō ĩmompā. ⁴¹ Woyowotæ apāicā iñōmō itædē nænque nānō apāi baī wīi apāicampā. Pōnōmenque pōnī apāicampā. Nēmōidi guiquēnē wadō baī apāidānīpa. Edæ nēmōidi incæ pancadāniya ñāmōñnāni inte wædænque apāiyōnāni pancadāniya waa pōnī ēmōnāni inte guñæ nanguī apāidānīpa.

⁴² Mānīī quiyadīmō yabæque ñōmāate ate tā bocate pædīmō baī mōnō adopoque wæmō ate mōnō baō adobaī aquiñō inte ñōmæmpā. Wæætē ĩncayæ ate mōnō baō ñōmāadāmai inguinque wæætē ñāni òmæmonguimō ĩmōmpā. ⁴³ Ayæ mōnō guīñēñate wægaiñō wido cæte ate mōnō waa pōnī ēñāquinque ñāni òmæmongæimpā. Edæ mōnō aquiñō wido cædinque mōnō tæi piñæñō baaquinque ñāni òmæmongæimpā. ⁴⁴ Edæ inguipogaque quēwēnīnque mōnō ēñayō wido cæte ate mōnō öönædē pōnīwoca ēñate ēwocadinque mōnō waiñō pōnī ēñate ñāni òmæmongæimpā.

⁴⁵ “Adāō wodi tānocā ĩnongā inte nē ēwocacā badinque quēwengacāimpā,” ante yewæmongatimpā. Ayæ adobaī Adāō wodi baī Ñōwocā mōnō Codito incæ nē ēwocacā inte quēwēnīnque mōnō ĩmote pōnongā ænīnque ēwocate quēwēmompā. ⁴⁶ Inguipogaque nē quēwengā guiquēnē tāno pongacāimpā. Mempoga nē Quēwēnongā guiquēnē ñōwoque ayæ pōningā inte nē Quēwengā ĩngampā. ⁴⁷ Tānocā ĩngante badoncæte ante Wængonguī onguipoi guīdīmōi ænīnque badongacāimpā. Ñōwocā guiquēnē öönædē quēwengāingā inte pongacāimpā. ⁴⁸ Inguipogaque ante quēwēnāni guiquēnē inguipoga tāno quēwengāingā baī adobaī ĩnānīpa. Öönædē mōnō goquincabo guiquēnē öönædē quēwente Pongāingā baī adobaī ĩmompā.

⁴⁹ Inguipogaque quēwengā nānō ēñayō baī mōnō adobaī ñōwo ēñamompā. Īncayæ ate guiquēnē öönædē quēwente nē Pongāingā nānō ēñayō baī mōnō adobaī ēñāquīmō ĩmompā.

⁵⁰ Botō tōññāmīni apænebo ēñēedāni. Adopoque ēñāgāingā inte Wængonguī Awēnē Odeye nempo ædō cæte guīite quēwengūingāā. Nē aquiñō ñōmænguīñō ēñadongā incæ tōmēngā mempoga ēñadāmai inte ædō cæte baō ñōmāadāmai iñō ēñāquingāā. ⁵¹ Mōnō waocabo wēēnēñedē mōnō ēñēñāmai ĩngaiñō ante botō tæcæ ēñēñimo inte ñōwo edonque apænebo ēñēedāni.

Wīi tōmāmō wænguīmō ĩmompā. Incæte tōmāmō ĩñontobæ wayonque ēñāquīmō ĩmompā. ⁵² Edæ todompeta mōnō ancadeca æmæwo pōnī nanguī öönāni ate mōnō awīnca adopoque bomō cæyōmonte ĩñontobæ bacæimpā. Edæ todompeta tæcæ we öönōnāni do wængāināni incæ ñōmænāmai nāni ĩnguinque ñāni òmæmoncædānīmpā. Māñēñedē edæ wayonque pōnī mōnō tōmāmō ēñacæmōimpā. ⁵³ Edæ mōnō baō mōnō aquiñō ñōmænguīñonque wido cæte ate mōnō ñōmænāmai ĩngūñonque ēñāquinque ĩmpā. Ayæ mōnō aquiñō wænguīñō ēwente ate waiñonque mōnō wænāmai ĩngūñō ēñacæimpā. ⁵⁴ Mōnō ñōmænguīñō ēñamō adīnque Codito waiñō pōnongā ænte ēñādinque mōnō baō ñōmænāmai ĩngæimpā. Ayæ mōnō wænguīñō ēñamō adīnque tōmēngā mōnō wænāmai ĩngūñō ante waiñō pōnī pōnongā ēñacæimpā. Māñōmai cæcā ate dodāni nāni yewæmonte angaiñō tōmāā ĩnīnque cæte ĩngæimpā. Edæ ĩīmai ante yewæmongadānīmpā. “Mōnō Codito nē tæi piñæñongā inte mōnō wænguīmāmo godō òmæe ēwēnīnque gānā cæcæcāimpā. ⁵⁵ Īnīnque

ōnonque bagai inte mōnō wænguimāmo iñōmō dicæ tæi piñante cæpa æmæwo wænguimōō. Mōnō wænguimāmo incæ dicæ daapa emiñæmpa gui wænguimōō.”

⁵⁶ Mōnō wænæ wænæ cægainō beyænque mōnō daapa guiite bai pante wæquinque nē wænguënēmō ingamōimpa. Ayæ ēñēnāmai cæyōmonte Wængongui wææ angā beyænque mōnō nē pante wæquinque nē wænguënēmō bagamōimpa. ⁵⁷ Wæætē mōnō Awēnē Itota Codito gānā cædinque mōnō wænguënēmāmo ante godō ōmæe ēwengā beyænque Wængongui mōnō imonte pōnō cæcā ate gānā cæmōimpa. In-
inque, Mānōmai waa pōni cæcampa, ante pōnēninque mōnō Wængongui ingante waa ate pōnēninque apænecæimpa.

⁵⁸ Mānōmai beyæ botō nē waadete tōniñamini ēñēdāni. Minitō, Mōnō imonte bæ tadāmai incædānimpā, ante adiyæ tæi ongonte wææ cæedāni. Edæ, Mōnō Awēnē nempo quēwēninque nanguī cæmō ininque mōnō cædinō iñōmō edæ cōwē ēwēnā-
mai ingæimpa, ante pōnēninque minitō mōnō Awēnē beyæ ante cōwē godōmenque gomonga cæcæminimpā, ämopa.

Wængongui quīnāni beyæ iūmai cæte godongæimpa, ante

16 Ñōwo iñōmō minitō godonte æinta ante, Wængongui quīnāni beyæ impa, ante mini godonguēnēnō ante apænebo ēñēdāni. Gadatiabæ iñōmō Itota ingante godongāmæ nāni pōnencabo inānite do ānimo inte botō minitō imīnite adobaī ante iūmai ämo cæedāni. ² Minitō tōmāmīni, Botō ænincoo æpodō i, ante adinque, Panca Wængongui quīnāni quī baquimpā, ante cædinque Wængongui itædē iñō pancacooga nānēnē cō cædinque wacā Wængongui itædē iñō pancacooga nānēnē cō cædinque ee mæedāni. Ininque wæætē wæætē cō cæte eyepæ māmīni adinque botō minitō weca ponte adinque, Godōmenque cōō cæedāni, ante ānāmai inguēnēmo imopa. ³ Edæ botō minitō weca ponte āñōmo minitō, Iñāni nō cædōnāni inte mōnitō godōnincoo ænte māo godoncædānimpā, ante odōmōmīni adinque botō wæætē tōmēnāni beyæ cadota ante yewæmoncæboimpā. Ayæ cadota tōnō minitō pōnōnoncoo tōnō botō iñāni inānite pædæ godōninque da godōmo ænte māo Eedo-
tadēē gote nēnempocædānimpā. ⁴ Ayæ Wængongui Ao angā ate botō tōmēnāni bai adobaī gobo adinque tōmēnāni botō tōnō godongāmæ edæ gobainānīpa.

Iūmai gocæboimpā, ante

⁵ Cōwē Mäatedōniabæ wodo pænta gocæboimpā. Ininque mānimæ tāno wodo pænta gote ate botō ayæ wæætē minitō weca poncæboimpā. ⁶ Ayæ minitō weca pōn-
inque wabānō wantæ iñō quēwente goquīmo. Æbāmē cæcæboimpā. Edæ, Quēwente ate ædōmē gomonga gocæ cæyōmo minitō botō tōnō godongāmæ waa cæmīni ate waa gocæboimpā, ante pōnēninque botō wabānō godōmenque quēwēninque tōmāā mōnō yoguīntedæ incæ minitō weca quēwencæboimpā. ⁷ Edæ, Botō wodo pænta gocæ cædinque minitō weca ñōwo pōmo bai wantæ iñō ēñāquinque incædōnimpā, ante pōnente wædinque botō wīi ñōwo pōinēmo imopa. Wæætē, Wængongui Ao angā ate botō iincayæ ate minitō weca ponte wantæpiyæ quēwēninque tocæboimpā, ante pōnēmopa. ⁸ Wæætē mōni oodeocabo ææmæ Pentecotee mōni ānōmæ iinque beganca botō Epeto adoyōmō quēwencæboimpā. ⁹ Edæ Epeto iñōmō quēwēnāni wede pōnente bacædānimpā, ante botō guiite apænēquinque odemō bai wi ænete bai ongō abopa. Ayæ adobaī, Nē piinte cædāni nanguī iñāni mæ ongōnānīpa, ante adinque botō adoyōmō quēwēninque nanguī wææ apænecæboimpā.

¹⁰ Tımoteo mınıtö weca wabänö ponguingä. Pongä inınque mınıtö wæætë, Mönıtö weca guıñenämaı inte quëwencæbiımpa, äınıque tömengä ingante waa cæedäni. Edæ botö nê cæbo ımo baı tömengä adobaı Wængonguı beyænque nê cæcä ingampa. ¹¹ İınıque, Tımoteo önonque cæcampa, ante tedewënëmaı inte mınıtö tömengä ingante Baa änämaı incæmınımpa. Wæætë waadete cædıne da pönömıni ate tömengä piyænê cæte botö weca adodö poncæcäımpa, ämopa. Edæ, Mönö tönıñadäni tönö Tımoteo godongämæ poncæcäımpa, ante pönëınıque botö wänö cömopa.

¹² Botö mönö tönıñacä Apodo ingante guıquënë, Mönö tönıñadäni tönö bıto coodintoidi weca êñate pöe, ante ancaa ämo incæte tömengä wæætë, Nöwo wıı goquımo, ante Baa angantapa. Incæte Wængonguı Ao angä ate tömengä ııncayæ ate mınıtö weca cöwê poncæcäımpa.

Waa quëwencæmınımpa, ante

¹³ Mınıtö guıquënë cöwä ate nämä wææ aaedäni. Wede pönëmıni inte tæı gongænte ongödäni. Æmæwo pægaimıni inte tæı piñante entawëınıque guıñenämaı inte ee cæedäni. ¹⁴ Ayæ tömää quıëmê cæmıni inte waadete pönëınıque cæedäni ämopa.

¹⁵ Botö tönıñamıni mınıtö ıımaı ante do êñëmıni. Acayabæ ıñömö tåno pönengainäni inte Etepänä näni quëwencabo ıñömö, Wængonguı quınäni inänite nê cæmöni bacæmönımpa, ante nöwo cædäni cæmıni. ¹⁶ İınıque mınıtö Wængonguı quınäni beyæ nê cædınäni inänite Ao äınıque piyænê cædıne tömënëni näni änö baı do êñente cæedäni. Ayæ, Wadäni adobaı, Mönö tönö godongämæ nanguı cædäni, ante adıne mınıtö tömënëni näni änö baı do êñente cæedäni.

¹⁷ Etepänä tönö Podotönato ayæ Acaico botö weca pönıne mınıtö botö beyæ mını cæınënë ante do cædäni ate nanguı totabopa. ¹⁸ Edæ tömënëni pönö apænedäni êñëınıque mınıtö wampo pönente tæı piñante êwocamınıtawo. Ayæ adobaı pönö apænedäni êñëınıque mönıtö wampo pönente tæı piñante êwocamönıpa. Mänömaı nê pönö cædınäni inänite mınıtö wæætë waa ate pönëınıque cæquënëmıni imınıpa.

¹⁹ Atıabæ ıñömö Codito ingante godongämæ näni pönencabo näni cabo näni cabo tömänäni mınıtö imınite ante pönëınıque, Waa quëwencæmınımpa, ante apænedäni. Aquıdæ tönö Pidica näna gæncaya adobaı ayæ tömëna oncönê Codito ingante pönente godongämæ pönıne näni pönencabo adobaı mınıtö imınite waadete pönëınıque, Mönö Awënë nempo waa quëwencæmınımpa, änäni. ²⁰ Mönö tönıñadäni tömänäni, Waa quëwencæmınımpa, ante apænedäni. Mınıtö guıquënë mını cabo godongämæ pö bee tëınıque waadete pönente waa apæneedäni, ämopa.

²¹ Botö Pabodobo ıñömö tæcæ tömëmo önompoca yewæmönıne, Waa quëwencæmınımpa, ante tömëmo yewæmömopa.

²² Æcänö mönö Awënë ingante waadete pönënëmaı ina ıñömö tömengä nänö wængıne mänömaı cæcampa töö. Botö ıñömö wæætë, Mönıtö Awënë imı pöe, ante wæbopa.

²³ Mönö Awënë Itota waadete pönö cæcä æınıque mınıtö tömengä nänö waadete pönö cædö entawëınıque waa quëwencæmınımpa. ²⁴ Codito Itota nempo mönö quëwencabo imompa, ante pönëınıque botö mınıtö imınite waadete pönëmopa. Mänıne ante yewæmömopa.

2 Coodintoidi

inänite Pabodo cadota ante ayænta nänö yewæmongainta

Waa quëwencæminimpa, ante

1 Wængongui pönö angä beyæ Itota Codito botö Pabodobo imote da godongä godongaimo inte botö mönö tönifacä Timoteo tönö guëa apænemöna ate botö iimaï ante yewæmömopa. Coodinto iñömö quëwëmini inte minitö iñömö Codito ingante mini godongämæ pönencabo incæ acæminimpa, ante yewæmömopa. Ayæ Acayabæ tömäo iñömö quëwente Wængongui quinäni inte tömënanï adobaï adota acæðänimpa, ante yewæmömopa. ²Mönö Awënë Itota Codito tönö Mæmpo Wængongui tönö guëa waadete pönö cæda adinque minitö gänë pönente waa quëwencæminimpa, ämönapa, ante yewæmömopa.

Codito iimaï waadete pönö cæcampa, ante

³Mönö Awënë Itota Codito Wæmpocä iñongante Itota iñömö adocä ingante, Botö Wængongui inongä ingampa. Ayæ Itota Wængongui adocä inongä inte tömengä mönö wæwënö ante adinque godongämæ wæte bai pönö waadete apænecä ëñëningue mönö wampo pönëmö imompa. Mänömaï beyæ, Itota Mæmpo Wængongui cöwë waa cæcampa, ante mönö watapæ apænecæimpa. ⁴Adocä Wængongui mönö imonte äninque, Wënæ wënæ wæwëmini adinque botö waadete pönö apænebo ëñëningue minitö wampo pönëminitapa. İninque wadäni wënæ wënæ wæwënäni adinque minitö botö apænedö ante waadete godö apænemini ëñëningue tömënanï wæætë wampo pönencæðänimpa, ante botö minitö iminite pönö cætabopa, Wængongui angampa.

⁵Edæ iimaï beyæ mänömaï angampa. Codito në nantate wægaingä beyæ nantate wæwëningue mönö tömengä tönö äanque bai nantate wæwëmompa. Ayæ adobaï nantate wæwëmö adinque adocä Codito waadete pönö apænecä ëñëningue mönö tömengä tönö äanque bai ëwocadinque wampo pönëmompa. ⁶Mönitö nantate wæwëmöni aminitawo. Edæ mönitö nantate wæwente apænemöni beyæ Wængongui minitö iminite wæætë pönö waadete apænecampa. Apænecä ëñëningue minitö wæætë wampo pönëningue wænämaï quëwencæminimpa, ante Wængongui cæcampa. Ayæ mönitö wæwëñömönite tömengä pönö waadete apænecä ëñente wampo pönëmöni aminitawo. Edæ minitö nantate wæwëmini inte wampo pönencæminimpa, ante Wængongui mänömaï cæcampa. Ayæ wampo pönëmini badinque minitö iincayæ ate mönitö nantate wæwënö bai adobaï nantate wæwëmini incæte piyænë cæte ee cæte quëwencæminimpa, ante Wængongui pönö cæcampa. ⁷Ayæ mönitö tönö äanque bai minitö nantate wæwëminitawo. Edæ tömengä waadete pönö apænecä ëñëmini ate minitö adobaï mönitö tönö äanque bai wampo pönenguimini iminipa. Ante do ëñëningue mönitö, Näwangä minitö watapæ quëwencæminimpa, ante do pönëmönipa.

⁸Iñänäni, mönitö Atiabæ quëwëningue æbänö wënæ wënæ bate wætämönii, ante nõwo yewæmömo aedäni. Tæï piñæmöni inämaï inte mönitö godömenque teëmë mongænte bai nanguï wënæ wënæ bate wædinque, Nangæ bate wæn-

guī wæ, ante wætamōnipa. ⁹Wængonguī do angā wænguēnēmōni imōnipa, ante nāmāneque pōnente wætamōnipa. Incæte mōnitō, Tōmēmōni nāmā tæi pīnāenō beyænque quēwencāmōnimpa, ante pōnēnāmaī incāmōnimpa, ante odōmoncæte ante Wængonguī pōnō cæcā wætamōnipa. Wæætē tōmengā, Do wængaināni quēwencædānimpa, ante botō nē āmo iñōmote mīnitō wæætē botō imote wede pōnente quēwencāmīnimpa, ante cæcæte ante Wængonguī mănōmaī pōnō cæcā wætamōnipa. ¹⁰Mōnitō mănīnō mōni oo wænguinque ante wæyōmōnite tōmengā do bæi ongonte ængā beyænque quēwentamōnipa. Ayæ ate wæyōmōnite tōmengā ængā beyænque quēwencāmōnimpa. Ayæ, Adocā wæætē wæætē ængā beyænque quēwencāmōnimpa, ante pōnēninque mōnitō tōmengā ingante wede pōnente tomōnipa. ¹¹Īnque mīnitō iñacabo gongænte bai mōnitō beyæ Wængonguī ingante apænemīni ēñēninque tōmengā cōwē bæi ongonte ængā beyænque quēwencāmōnimpa. Mănōmaī cæcā adinque nangui ināni wæætē Wængonguī ingante waa ate pōnente iīmaī ante apænecædānimpa. Wængonguī ēñēmi. Nanguī ināni apænedāni ēñēninque bitō Pabodoidi beyæ pōnō waa cæbi amōnipa, ante apænequināni inānipa.

Coodinto iñōmō quīnante pōnāmaī iīmoī, Pabodo angampa

¹²Mōnitō iīmaī ante nāmā waa ate pōnēninque apænemōnipa. Wængonguī quīmōni inōmōni inte mōnitō tōmengā, Tæiyæ waēmō ewocacāmīnimpa, ante ænte entawēmōnipa. Mănōmaī beyæ Wængonguī nō cæcā bai mōnitō adobaī inguipoga quēwēninque nō cæte quēwēmōnipa. Ayæ mīnitō weca pōninque mōnitō godōmenque waa cætāmōnipa. Mănōmaī cædinque mōnitō inguipoga quēwēnānique nāni ēñēnō beyænque dicæ cætāmōniyaa. Wæætē mīmō entawēmōni inte nāmā apænte āninque mōnitō Wængonguī waadete pōnō apænecā ēñēninque eyepæ cætāmōnipa, ante tomōnipa. ¹³Mīnitō acāmīnimpa, ante yewæmōninque mōnitō dicæ idiquibæ ante yewæmōmōniyaa. Wæætē, Edonque adinque do ēñencāmīnimpa, ante edonque yewæmōmōni abaīmīnipa. Ayæ botō, Mīnitō nāwangā godōmenque ēñencāmīnimpa, ante iīmaī ante pōnēmopa. ¹⁴Mōnitō æbānō imōnii, ante mīnitō pancaa ante do ēñēmīnipa. Ayæ, Mōnō Awēnē Itota tōmengā nānō ponguīōnæ iinque bayonte mōnitō mīnitō imīnite adinque, Mīnitō nē wede pōnengaīmīni imīnipa, ante adinque tocāmōnimpa, ante do ēñēmīnitawo. Ayæ mānīōnæ bayonte mōnitō imōnite adinque mīnitō adobaī, Waa nē cægaīmīni imīnipa, ante tocāmīnimpa, ante āmo ēñēmaīmīnipa.

¹⁵Mănōmaī impa, ante pōnēninque botō, iīmaī cæcæboimpa, ante pōnentabopa. Wayōmō ayæ godāmaī inte botō tāno mīnitō weca ponte waadete apænecæboimpa. Apænebo ēñēninque mīnitō wæætē mempoga tocāmīnimpa, ante iīmaī cædimō intabopa. ¹⁶Mīnitō weca tāno ponte ēñadinque godōmenque godinque botō Māat-edōniabæ gote pōninque wæætē mīnitō weca adodō ocæ ēmænte poncæ cædimō intabopa. Ayæ pōmo ate mīnitō botō imote godongāmæ cædinque da godōmīni godōmenque Oodeabæ gocæ cædimō intabopa. ¹⁷Incæte botō, Mănōmaī cæquīmo imopa, ante pōnēninque dicæ ōnonque ante pōnentawogaa. Mănōmaī pōinēmo inte botō nīmpo cæte pōnāmaī imo adinque mīnitō, Pabodo æmæ pōnente, Wīi pōinente wabānō wīi pongā, ante pōnēmīnitawo. Īnæmpa inguipogaque quēwēnāni mānōmaīnō ante nāni æmæ pōnēnō bai botō iñōmō edæ dicæ adobaī pōnentawogaa.

¹⁸ Wængonguī nāwangā mōnō imonte cōwē pōnēninque nē aacā ingampa, ante nō pōnī impa. Mānōmainō ante nō pōnī ī baī mīnitō imīnite mōnitō apānedō īñōmō adobaī nō pōnī impa. Īnīnque mōnitō ædō cæte wadō ante apānequīmōnii. ¹⁹ Tidibānō tōnō Tīmoteo botō tōnō mīnitō weca pōninque, Wængonguī Wengā Itota Codito ingampa, ante nō impa, ante apānemōni ēñēmīnitawo. Īnīnque mōnitō Itota Codito nempo quēwēninque nē Ao āmōni inte ædō cæte æmæ pōnente baī wadō ante apānequīmōnii. ²⁰ Īmaī impa. Wængonguī, Cōwē cæcæboimpa, ante æpogamē wæætē wæætē angacāimpa. Wæætē wæætē angā incæte Codito īñōmō edæ cōwē Ao ānīnque, Wængonguī nānō angainō tōmānō īnīnque cæcæimpa, ante cæcampa. Īnīnque mōnitō tōmengā tōnō cædinque, Wængonguī nāō apāite baī ēmōñongante tōmānāni tōmengā ingante waa acædānīmpa, ante cædinque, Ao, mānōmaī impa, ante, Amēē, ante watapæ apānemōnīpa. ²¹ Wængonguī incæ mōnitō imōnite apānte ænīnque ayæ mīnitō imīnite apānte ænīnque, Mīnitō Codito nempo quēwēninque nē tæī pīñāmīni bacæmīnīmpa, ante mōnō tōmāmō imonte pōnō ōni pæte baī cædinque īmaī cæcampa. ²² Tōmengā ēmōwo yewæmōnte baī cædinque, Botō quīmīni imīnīpa, ante pōnō cæcampa. Ayæ, Īncayæ ate mīni godōmenque nangūi ængūinque mīnitō nōwo botō Ōnōwoca ingante ænte ēwocædāni, ante tōmengā Ōnōwoca ingante nōwo da pōnongā ænte ēwocāmīnīpa.

²³ Īnīnque Coodinto īñōmō botō quīnante wæætē pōnāmaī ingaboī. Edæ wēnæ wēnæ cæmīni adīnque mīnitō imīnite nē panguēnēmo incæ botō, Wīī pāinente awædō, ante wīī pontabopa. Wængonguī ayongante botō, Mānōmaī impa, ante nō apānebo ēñēmaīmīnīpa. ²⁴ Īmaī ante wede pōnencæmīnīmpa, ante mōnitō dicæ nē wææ āmōni imōniyaa. Wæætē edæ, Mīnitō mīni wede pōnēnō beyænque tæī ongōnīnque edæ nangūi cæmīnīpa, ante adīnque mōnitō wæætē, Mīnitō watapæ tocæmīnīmpa, ante cædinque mīnitō tōnō godongāmæ cæmōnīpa.

2 Botō wēēnēnedē mīnitō weca ēñacæ pōninque nangūi āmo wæmīnitapa. Īnīnque, Wīī wæætē āmo wæcæmīnīmpa, ante nōwo ēñacæ pōnāmaī incæboimpa, ante nāmāneque pōnēninque antabopa. ² Edæ pīīmo wæwēmīni baī æcānō wæætē, Tocæbiimpa, ante botō imote waadete pōnente apānequēnengāā. Īnāmpa botō pīīmo beyæ nē wæwēnīmīnīnque ongōmīni baī botō imote nē waadete pōnente apānequēnengā īñōmō edæ dæ ancædongāimpa. ³ Botō quīēmē beyæ tobo adīnque mīnitō godongāmæ watapæ toquēnēmīni imīnīpa, ante pōnentabopa. Mīnitō botō beyæ ānīnque, Pabodo mōnō weca pongā adīnque mōnō cæmō tocæcāimpa, ante nē cæquēnēmīni imīnīpa, ante awædō. Īnīnque, Mīnitō weca pōninque botō mīnitō wæwēnō ante wædāmaī incæboimpa, ante cædinque botō, Botō cadota ante yewæmōmo adīnque mīnitō ēñente cæcæmīnīmpa, ante wæbopa. ⁴ Botō nangūi caate wædōmo inte mīmōnoque pōnente wæwēnīnque yabæque adobaī Ca ca nangūi pōnente wædinque mānōmainō ante wæbopa. Incæte botō, Mīnitō wæwencæmīnīmpa, ante dicæ āmogaa. Wæætē, Botō æbānō mīnitō imīnite nangūi waadete pōnēnōmopa, ante ēñencæmīnīmpa, ante odōmoncæte ante yewæmōmopa.

Nē wīwa cæcā ingante æbānō godō waadete nīmpo cæquīī

⁵ Adocanque wīwa cæcā adīnque botō tōmengā nānō wīwa cædō beyæ wæwēmo incæte mīnitō tōmāmīni wædænque incæ nangūi incæ wæwēmīni adobaī imīnīpa. Botō, Tōmengā ingante pīīnāmaī incæboimpa, ante pōnēninque, Wædænque wæwēmīnīpa, ante apānebopa. ⁶ Nē ēñēnāmaī cædingā ingante mīnitō pancāmīniya

wodo tōmāmīni do pāmīnitapa. Īnīnque botō, Idæwaa pāmīnīpa, āmopa. ⁷Tōmēngā, Ancaa pāmīni awædō, ante godōmenque wæwente bacantawo. Īnīnque mīnitō pōnō nīmpo cædinque tōmēngā ingante, Idæwaa pāmōni wæbīpa, ante ædæmō waadete apænemīni ēñēnīnque tōmēngā īnīnque wædinque wampo pōnencæcāīmpa. ⁸Mīnitō wæætē, Bitō īmite nāwangā waadete pōnēmōnīpa, ante adodō apænemīni ēñencæcāīmpa, ante botō mīnitō īmīnite nanguī āmopa. ⁹Botō ānō ante æbānō tōmānō ante ēñente cæmīnīi, ante ēñencæte ante botō wēēnēñedē yewæmontabopa. Eyepæ cæmīni ate wædinque botō, Eyepæ cæmīnīpa, āmopa. ¹⁰Nē ēñēnāmaī cæcā ingante mīnitō nīmpo cæmīni ee gocantawo. Mānōmaī cæmīni īnīnque botō nīwo adobaī nīmpo cæbopa. Waocā æcāmenque ēñēnāmaī cæcā adīnque godō pōnō nīmpo cæbo īnīnque botō Codito ayongante mīnitō beyænque ante mānōmaī godō nīmpo cæbo īntabopa. ¹¹Īnāmpa Tatāna incæ angā ēñente beyænque mōnō oda cæte wæquinque edæ godōmenque pīmaīmōmpa, ante aquēnē quēwēedāni. Tatāna æbānō, Oda cæte wæcādānīmpa, ante cæcampa, ante edæ do ēñēmōmpa.

Tito beyæ ante Pabodo wæcampa

¹²Botō Todoa nāni quēwēñōmō tāno pōnīnque, Mōnō Codito ingantedō ante watapæ apænecæte ante cæyōmo mōnō Awēnē, Botō beyæ guiite apænee, ante odemō wi ænete baī do cæcā atabopa. ¹³Incæte botō tōnīñacā Tito dæ angā wædinque botō, Ædō cæte īñōmō a ongonte apænequīmoo, ante tōmēnāni īnānite, Gobopa, ante Māatedōniabæ gocæte ante wadæ gotabopa.

Codito nempo quēwēnīnque tæī ēmōmōnīpa, ante

¹⁴Nē tæī ēmōngā inte mōnō Codito īñōmō nē pīinte cædāni īnānite gānā cæcampa. Īnīnque mōnitō Codito nempo quēwēñōmōnīte Wængonguī, Nē tæī ēmōngā ingante waa acædānīmpa, ante cædinque mōnitō īmōnīte nē tæī ēmōngā mīñæ ænte māocā dao dao godīnque mōnitō tōmēngā nānō ēmōnō baī adobaī tæī ēmōmōnīpa. Ayæ oguī wa woboyæ wodo wodo cædinque tōmāo māo oguī wa baī Wængonguī adobaī cædinque mōnitō īmōnīte angā ēñēnīnque mōnitō wæætē, Mōnō Codito æbānō ingāā, ante wayōmō wayōmō māo apænemōni ēñēnānīpa. Wængonguī mānōmaī cæcā beyæ mōnō Wængonguī ingante waa ate pōnēnīnque apænecæīmpa.

¹⁵Īmaī edæ īmpa. Codito ængā beyænque nē quēwēnguīnāni weca quēwēmōni incæ nē wænguīnāni weca quēwēmōni incæ mōnitō Codito nempo quēwēnīnque tōmēngā nānō oguī wamōnedō baī mōnitō adobaī, Wængonguī wē ongonte baī tocæcāīmpa, ante oguī wamōnete baī apænēmōnīpa. ¹⁶Mōnitō öō wa wamōnete baī cædinque nē wænguīnāni īnānite tōmēnāni nāni wænguīmāmo ante apænemōni ēñēnīnque tōmēnāni nāni wænguīnque wē ongonte ocado cæte baī ēñēnānīpa. Wæætē oguī wamōnete baī mōnitō nē quēwēnguīnāni īnānite guīquēnē tōmēnāni nāni quēwēnguīmāmo ante apænemōni ēñēnīnque tōmēnāni wæætē nāni quēwēnguīnque wē ongonte ocado cæte baī ēñēnānīpa.

Īnīnque mānīnō mōnitō cæquēnēnō ante æcānō eyepæ cæquīngāā. ¹⁷Edæ nanguī īnāni nāmā beyænque ante æncæte ante cædinque Wængonguī nānō apænedō ante apænēwēnāni baī mōnitō wīī adobaī wēnæ wēnæ cæcæte ante apænemōni īmōnīpa. Wæætē Wængonguī mōnitō īmōnīte da godongā godīnque māo nē apænemōni inte mōnitō Wængonguī ayongā mōnō Codito nempo quēwēnīnque nō pōnente apænēmōnīpa.

Wængonguī mīine pōnō angā beyænque quëwëmompā

3 Mōnitō imōnitedō ante pōnëninque mīnitō, Pabodoidi, Waa cæmōni aedāni, ante tedewënānīpa, ante wëenëñedë ämīnitawo. Ayæ, Nōwo wæætë adodō ante tedewënānīpa, ante pīimīnitawo. Mōnitō iñæmpā nāmanque ante, Waa cæmōni aedāni, ante dicæ ämōniyaa. Wadāni mōnitō imōnite waa acædānīmpā, ante cædinque pancadāniya guiquënë mīnitō imīnite äninque, Cadota ante pōnō yewæmōedāni, änāni ëñëninque yewæmōmīni ate tōmënāni ænte mǎo odōmōnāni adānīpa. Ayæ wadāni inānite adobaī, Cadota, änāni ëñente yewæmōnāni æninque mīnitō imīnite odōmōnānīpa. Mōnitō guiquënë, Cadota ante pōnō yewæmōedāni, ante dicæ ämōniyaa. ²Wæætë mīnitō guiquënë waa quëwëmīni adinque wadāni, Pabodoidi tōmënāni inānite apænëdāni beyænque coodintoidi wede pōnënāni inte waa quëwënāni amōnīpa, ante pōnëninque cadota ate baī do ëñënānīpa. Mǎnōmaī pōnō cæmīni æninque mōnitō cadota nǎæante odōmonte baī cædinque, Coodintoidi æbānō waa cædānīi, ante tōmānāni inānite odōmōmōni adinque ëñënānīpa. ³Īninque, Pabodoidi apænëdāni beyænque waa cædānīpa, ante edonque acædānīmpā, ante cædinque Codito iñōmō Wængonguī nē Quëwengā Önōwoca ingante da pōnongā ænte ëwocamīnīpa. Mǎnōmaī cædinque Codito cadota ante yewæmonte baī pōnō cædinque wīi tōmengonca yewæmongampā. Wīi dicaboga yewæmōninque tōmengā Önōwoca ingante mīnitō baonga da pōnongā ænte ëwocamīnīpa.

⁴Codito godongāmæ cæcā beyænque mōnitō Wængonguī ayongā nōingā ante apænëmōnīpa, ante pōnëninque mōnitō guīñënedāmaī inte do edæ apænëmōnīpa. ⁵Mōnitō nāmanque ante, Æbānō waa cæmōnīi, ante eyepæ imōnīpa diyæ apænte anguimōnīi. Wæætë Wængonguinque pōnō godongāmæ cæcā ate mōnitō eyepæ badinque cæmōnīpa. ⁶Wængonguī, Botō pōnō cæbo ate mīnitō Ao ämīni ĩninque mōnō godongāmæ waa cæte quëwengæīmpā, ante cōwë angampā. Tōmengā doyedë iñōmō, Botō wææ angainō ante ëñente cædinque quëwencæmīnīmpā, ante nānō wææ angaine ante nōwo wæætë änāmaī ingampā. Mǎnīne ante nōwo ganca wææ angā baī mōnō wænguinque incædōnīmpā. Nōwo guiquënë Wængonguī wæætë, Botō Önōwoca ingante ænte ëwocadinque quëwencæmīnīmpā, ante mīine ante apænecā ëñëninque mōnō quëwenguinque Wængonguī Önōwoca ingante ænte ëwocamompā edæ. Mōnitō iñōmō tōmengā Önōwoca ingante nē ëwocamōni inte eyepæ badinque mīine Wængonguī nōwo nānō pōnō apænëde ante nē apænëmōni imōnīpa.

⁷Wængonguī, ĩmaī cædāni, ante dicaboga wææ yewæmongā ate mōnō ëñënāmaī imō beyænque mǎnīne tōmengā nānō wææ yewæmongaine beyænque mōnō wænguimāmo bagatīmpā. Incæte mǎnīne beyæ edæ nǎo nangui apāigatīmpā. Īninque mǎnīne ænte godōmenque wææ äninque Mōitee wodi awinca nǎo apāite baī ëmongacāīmpā. Mǎnīi nǎo wodëmæmō ëmongā incæte idægoidi tōmengā awinca adinque, Ædō cæte Mōitee awinca cōwā aquimōnīi, ante wægadānīmpā.

⁸Mōnitō guiquënë, Wængonguī Önōwoca ingante ænte mōnō quëwengæīmpā, ante mōni apænëdō beyænque quīëmë baī godōmenque nangui apāite baī apāicæīmpā. ⁹Mōnō apænte tente wænguinque edæ mǎnīne pedæne ante ëñënāmaī cægāmōīmpā. Incæte mǎnīne ante nānō wææ angainō beyænque Mōitee wodi awinca nǎo apāite baī ëmongacāīmpā. Īninque nōwo iñōmō, Mōnō nō cæte quëwenguinque ante Wængonguī Önōwoca ingante ængæīmpā, ante mōni apænëdō

guiquënë não quiëmë bai godömenque nanguï nãwante bai ënepa. ¹⁰ Wængongui Tãiyæ Waëmö Önöwoca ingante ante möni apænedö iñömö godömenque não nãno apäidö beyænque Möitee wodi nãno wææ angainö guiquënë pönömenque apäidique edæ wodëmäa badinque edæ dæ bapa. ¹¹ Edæ mänine mönö wodëmäa baquënëmämo incæ não apäite bai iñonte Möitee wodi ænte apænegacäimpa. Wængongui ñowo nãno pönö æne guiquënë cöwë wodëmäa badämaï ëne inte godömenque nanguï guinæ nãwante bai ënepa.

¹² Ìniquë, Wængongui Tãiyæ Waëmö Önöwoca pönö cæcä beyænque mönö nö cæte watapæ quëwængäimpa, ante pönente quëwëmöni inte mönitö guiñenedämaï inte do apænemönipa. ¹³ Möitee wodi guiquënë, Não apäi bai botö ëmönö incæ wodëmäa bamönömote idægoidi adämaï incädänimpa, ante cædinqe weocoo ñane cæmongacäimpa. Mönitö guiquënë Möitee wodi nãno ñane cæmongaï bai cædämaï ïmöni inte edonque apænemönipa. ¹⁴ Mäninta, Botö wææ angainö ante ëñente cædinqe quëwencæminimpa, ante Wængongui nãno pedænta ante adinqe idægoidi do nãni ñane cæmongaincoo ñowo ganca edæ ñane cæmonte bai ëmönänipa. Ìniquë tömënäni ocai ömæcadäni bai bagadänimpa. Edæ Codito nempo quëwënänique mänincoo wi cæmonte bai ëmönäni inte tömënänique edonque adäni inänipa. Ìniquë idægoidi wæætë Codito nempo quëwënämaï inäni inte ayæ edæ wi cæmönämaï inte wædänipa. ¹⁵ Ìniquë idægoidi ñowo ganca mimö bee otawente bai inönäni inte Möitee wodi nãno yewæmongainta adinqe ëñenämaï inänipa.

¹⁶ Incæte Awënë gämänö æcänö pöna tömengä Möitee wodi nãno wi cæmönö bai badinque do wi cætawente bai bacampa. ¹⁷ Mönö Awënë incæ Wængongui Önöwoca ingampa. Ayæ waocä mönö Awënë Önöwoca ingante ëwocacä ïniquë tömengä wi cætawente bai entawente quëwëwongä inte wii tee mönete wæcä bai ingampa. ¹⁸ Mönö tömämö iñömö awinca wi cæmonte bai ëmönömö inte mönö awocawænta bai bamompa. Ìniquë wadäni mönö ïmonte adinqe, Mönö Awënë æbänö não apäite bai ëmongää, ante awocawænta ate bai edonque acädänimpa. Ayæ godömenque ayæ godömenque mönö não apäidö mönö ëwocaquinque mönö Awënë nãno ëwocadö bai mönö ayæ godömenque ayæ godömenque ëwocamö ïmompä. Mönö Awënë incæ Wængongui Önöwoca ïnongä inte mänömaï pönö cæcä entawëmompä.

4 Wængongui, Botö pönö cægainö ante mïnitö në apænemïni incæminimpa, ante waadete pönö angä beyænque mönitö mäninö ante në apænemöni bagaimöni inte ñowo wæ guemönämaï inte cöwë apænemönipa. ² Wadäni guiquënë tömënäni nãni guingo ïmonte wæquinque awëmö cædänipa. Mönitö iñömö tömënäni nãni cæwënö bai cædämaï incæmönimpa, ante do änimöni inte babæ cædämaï ïmönipa. Wængongui nãno apænedö ante idiquibæ apænedämaï ïmönipa. Wæætë Wængongui ayongä mönitö tömengä nö nãno apænægainö ante edonque pöni odömonte apænemöni ëñëninque tömänäni mimö entawënäni ïniquë edæ, Pabodoidi nö ante cædänipa, ante apænebainänipa. ³ Incæte mönö Codito ingantedö ante watapæ möni apænedö iñömö ñane cædete bai intawo. Ìñæmpa ñane cædete bai ï ïniquë në wë womonte wænguïnäni beyænque ñane cædete bai impa. ⁴ Wængongui nãno ëmönö në ëmönongä inte mönö Codito iñömö mönö beyæ não apäite bai cæcampa, ante watapæ mönö ëñente pönönö ante apænemönipa. Nöwoguipogaque quëwënäni beyæ guiquënë tömënäni awënë wængongui bai Tatäna në cæcä ingampa. Tömengä iñömö mänine watapæ möni apænedö ante piiniquë, Në pönënämaï inäni adämaï incädänimpa, ante tömënäni awinca ñane cæmonte bai wææ cæcampa.

⁵Mönitö iñömö, Nämä incæ waa cæmönipa, ante tededāmaï imönipa. Wæætë, Itota Codito incæ mönö Awënë ingampa, ante mönitö, Tömengä beyænque mönitö mīnitö imīnite nē cæmōni imönipa, ante māninqe ante apænemönipa. ⁶Wëmö iñömö ñäö apäicæimpa, ante Wængonguï incæ badongacæimpa. Adocä ñäö ante nē angaingä inte ñowo wæætë mönitö mīmōno tica ēnente baï cædinque iūmaï ante odō-mongä amönipa. Tömengä iñömö, Botö æbänö guinæ nāwante baï emōmoo, ante mīnitö Codito awinca adinque edonque pōni acæmīnimpā, ante pōnö tica ēnente baï odōmongä amönipa.

Itota ingante mönö wede pōnēnō beyænque quëwëmö

⁷Nanguï ñäö apāite baï ewocamōni incæ önoncadedē mante baï edæ ewocamönipa. Edæ daigænē cængæmoncadenque baï mönitö baö mongæñömönite Wængonguï, Wüi mīnitö nämä tæi piñænö beyænque ewocamīnipa, wæætë botö tæi piñænö beyænque ewocamīnipa, ante acædānimpā, ante badongampa. İninqe tö-mengä tæi piñænte pōnö badongä æninqe mönitö ñäö apäidö möni mänö iñömö önoncadedē mante baï ewocamönipa. ⁸Mönitö imönite tömänö māmö mö ongonte baï cædāni wæmōni incæ gueogæ godāmaï imönipa. Æbänö cæte quëwëmö imöö, ante wæmōni incæ mönitö guīñente wædāmaï imönipa. ⁹Anca togænte pānāni wæyömōni Wængonguï mönitö imönite cōwë emö cæte godāmaï ingampa. Ayæ wænoncæte ante bæ tadāni incæte æmæwo wænāmaï imönipa.

¹⁰Itota tömengä nänö quëwënö pōnongä æmōni beyænque mönitö, Baö ayæ mongænte quëwëmōni acædānimpā, ante cæmönipa. Tömengä nänö wængainö baï mönitö adobaï wæætë wæætë wænte baï baö mongæmönipa. ¹¹Mönitö nē quëwëmōni iñömönite wadāni wæætë mönitö imönite bæi ongonte æninqe, Itota beyænque wæncæmīnimpā, ante nanguï cædānipa. İninqe mönitö baö ñömænguīñö ëñayömönite wadāni, Itota tömengä nänö quëwënö ëñate beyænque ayæ quëwënānipa, ante edonque acædānimpā, ante mönitö wæncæ cæte baï ëñate wæmönipa. ¹²İninqe mönitö möni wænguimāmo beyæ ante wæyömōni mīnitö wæætë mīni quëwënguimāmo ëñate quëwëmīnipa.

¹³Docä do apænedinque, Botö nē wede pōnēmo inte apænetabopa, ante yewæ-mongacæimpa. Tömengä wede nänö pōnengainö baï adobaï ewocadinque mönitö nē wede pōnēmōni inte adobaï apænemönipa. ¹⁴İmāinö ante ëñëninque wede pōnēmōni inte mönitö apænemönipa. Itota ingante, Ñāni ömæmōe, ante nē cæ-gaingä adocä mönitö imönite angä ate mönitö Itota tönö godongāmæ ñāni ömæ-moncæmönimpā, ante do ëñëmönipa. Ayæ mīnitö tönö mönitö tömāmö iñö-monte Wængonguï ænte māmö gönongä ate mönö tömengä weca godongāmæ gongænguimö imompā. Mänömainö ante do ëñëmōni inte mönitö nē wede pōnēmōni inte apænemōni imönipa. ¹⁵Wængonguï godömenque nanguï ināni inānite waadete pōnö cæcä ate tömënāni wæætë Wængonguï ingante waa ate pōnë-ninqe apænecædānimpā. Ayæ mänömaï pōnö cæcä adinque, Wængonguï ñäö apāite baï emönongä inte mänömaï cæcampa, ante mönö tömāmö watapæ apænecæimpa. İninqe, Mänömaï bacæimpa, ante mīnitö beyæ ante mönitö tömää edæ cæmönipa.

¹⁶Mänömaï beyæ mönitö, Æbänö cæquimōnii, ante wædāmaï imönipa. Edæ iimö iñö iimö iñö mönö baö godömenque wænguīñö baï mongæñömö mönö önö-woca wæætë iimö iñö godömenque iimö iñö godömenque miiwoca badonte baï ewocamompā. ¹⁷İñæmpā wënæ wënæ mönö wæwënö incæ wantæ iñö wodëmāa

põni badinque wodæi bai bapa. Incæte mænii mõno wæwënö beyæ mõno godömenque nãö apäite bai ewocacæimpa. Ìninqe mõno wæwënö wodæi põni inte dæ bayö mõno nãö apäidö mõno ewocadö wæætë cöwë wodëmäa badämaï ingæimpa. Wæætë mõno watapæ quëwenguinque godömenque nanguï apäite bai bacæimpa. ¹⁸Inguipogaque mõno quëwënö guiquënë wantæ iñö dæ gocoopa. Öönädë nõwo mõno adämaï incoo guiquënë cöwë dæ badämaï inte ongongæimpa. Ìninqe inguipogaque mõno quëwënö ante mõno adämaï inte bai pönengæimpa. Wæætë öönädë mõno adämaï incoo ante mõno cöwë ate bai pönengæimpa.

5 Oncontai wido cæquintai bai mõno æmontai mongænte quëwëmompä. Ìninqe mænintai wido cæmö incæte Wængongui wæætë, Öönädë müntai müni cöwë owoquintai, ante do mänongacäimpa. Mænintai iñömö waocä önompoca mänonämaï intai iñonte mõno öönädë æite owoquimö imompä, ante do ëñëmompä. ²Nõwo iñömö mõno wido cæquintai mongæninque ö ö ante nantate wæwëmompä. Mänömaï beyæ mõno öönädë æidinqe mõno owoquintai ëñacæte ante wæmompä. ³Edæ, Baö ömaamö inte wæcæ wæ, ante guïñëwocate wædinque mõno, Müntai ëñacæimpa, ante wæmompä. ⁴Mönö iintaique ëñadinque, Baö ömaamö inte wædämaï incæmönimpä, ante guïñëwocate wæmompä. Mönö wænguintai mongænte nantate wæmö inte ö ö ante wæmompä. Wængongui, Minitö ëñate quëwenguin-taique, ante yabæque wini caate bai pönongä ëñayömö mõno wængüënëñö edæ dæ bacæimpa, ante æncæte ante wæmompä.

⁵Nõwo ämo ëñëedäni. Wængongui incæ edæ, Müni müntai wëñate mongænguinque, ante mõno imonte badongacäimpa. Ayæ, Minitö müntai cöwë pönömo æncæminimpä, ante, Näwangä impä, ante odömoncæte ante Wængongui tömengä Önöwoca ingante nõwo da pönongä æmompä. Ìninqe tömengä Önöwoca ingante ænte ewocadinque mõno, Müntai ëñate mongænguinque ewocamompä, ante do ëñëmompä.

⁶Mänömaï beyæ mõnitö cöwë, Wængongui cæcæcäimpa, ante wede pönente tomönipa. Oncönë owote bai iintaidë mõno quëwenganca mõno Awënë oncönë owodämaï imompä, ante do ëñente wædinque, ⁷mönitö mäninö ante ayæ adämaï ëmömöni inte wii möni adinö beyæ quëwëmönipa. Wæætë möni wede pönënö beyænque quëwëmönipa. ⁸Ìninqe edæ, Wængongui cöwë cæcæcäimpa, ante wede pönëmöni inte mõnitö, Ìntaidë owodämaï inte wæætë mõno Awënë oncönë gote owote waa tobaimpä, ante pönëmönipa. ⁹Ìninqe oncönë owote bai tomöni incæ oncönë owodämaï inte bai wæmöni incæ mõnitö, Mönö Awënë waa tocæcäimpa, ante cædinque cöwë nö cæte quëwëmönipa. ¹⁰Codito tömengä nänö apænte anguimpäa gäänë mõno tömämö ponte edæ a ongongüënëmö imompä. Mönö edæ inguipoga iintai ëñate quëwëninque mõno cædö ante do againgä inte tömengä iñömö apænte ancæcäimpa. Edæ waa cægaimö imö adinque tömengä mõno imonte edæ eyepæ põni pædæ pönongä ænguimö imaimompä. Wæætë edæ wænæ wænæ cægaimö imö adinque tömengä wæætë eyepæ põni pangä wæbaimompä.

Wængongui piyänë cædinque, Pöedäni, angampa

¹¹Ìninqe mõno Awënë ingante guïñente wæmöni inte mõnitö waodäni inänite godö waadete apænëmönipa. Codito gämænö pöninque watapæ quëwengæimpa, ante pönencädänimpä, ante mõnitö godö waadete apænëmönipa. Edæ, Mönitö æbänö ewocamönii, ante Wængongui do edonque acampä. Ayæ adobaï munitö mimö

entawēmīni inte mōnitō ēwocadō ante edonque amīni īninque botō waa tobaīmopa. ¹²Mānōmaīnō ante apānedinque mōnitō, Waēmō pōnī īmōnīpa, ante nāmā ante dicæ āmōniyaa. Wæætē īīmaī ante apānemōnīpa. Pancadāniya īñōmō mōnitō awincaque adinque, Pabodoidi æbānō ēwocadānīi, ante adāmaī īnāni inte tōmēnāni nāni adōnonque ante pōnēninque nāmā ængō cæte baī todānīpa. Mīnitō guiquēnē, Mōnitō æbānō ēwocamōnīi, ante do amīnitapa. Īninque tōmēnāni mōnitō īmōnite ante pīinte ānāni ēñēninque mīnitō wæætē edæ, Pabodoidi nō ēwocadāni inte waa cædāni amōnīpa, ante wææ apānecāmīnīpa, ante cæbopa. ¹³Edæ ōmæcamōni baī cæmōni incæte Wængonguī beyænque ante mānōmaī cæmōnīpa. Wæætē nō pōnente cæmōni incæ mīnitō beyæ ante cæmōnīpa.

¹⁴Īīmaīnō ante pōnente wædinque edæ mānōmaī cæmōnīpa. Tōmāmō beyæ adocanque wængacāimpa, ante adinque mōnitō, Mōnō tōmāmō do wængamōimpa, ante edonque ēñēmōnīpa. Īninque, Mōnō Codito nanguī waadete pōnengā inte pōnō cæcampa, ante pōnēninque mōnitō ædō cæte wapiticæ cæquīmōnīi. ¹⁵Mōnō Codito īñōmō tōmāmō beyæ wæninque, Mīnitō idæwaa nāmā beyænque quēwēmīnīpa, ante wængacāimpa. Ayæ, Botō nē wænte nāni ōmæmongaimo īñōmote mīnitō botō beyæ ante quēwencāmīnīpa, ante cædinque tōmengā tōmāmō beyæ wængacāimpa. ¹⁶Mānōmaī impa, ante pōnēninque mōnitō nōwo iincayæ ate waodāni īnānite adinque, Inguipogaque ēñate quēwēnānīpa, ante pōnēnāmaī īmōnīpa. Edæ mōnō Codito incæ inguipoga ēñate quēwēñongante mōnitō mānōmaīnō ante pōnengāimōni incæte mōnitō nōwo wæætē mānōmaīnō ante wīi pōnēmōnīpa. ¹⁷Īninque Codito nempo æcānō quēwēnaa tōmengā ingante Wængonguī mīingā badongā ate mīingā bate quēwengampa. Tōmengā nānō inguipogaque nānō quēwēnimāmo edæ dæ gotimpa. Nōwo wæætē edæ mīimāmoque ēwocacampa.

¹⁸Mānīnō botō ānō ante tōmānō nē pōnō badongā īñōmō edæ Wængonguī adocanque ingampa. Tōmengā īñōmō, Mīnitō ēñēnāmaī cæmīni incæte Codito pōnō cæcā beyænque botō piyænē cæcæboimpa, angampa. Īninque botō piyænē cæbo adinque mīnitō botō gāmænō pōedāni, angampa. Ayæ mōnitō īmōnite pōnō angā ēñēninque mōnitō wæætē edæ wadāni īnānite, Wængonguī piyænē cædinque, Pōedāni, angampa, ante nē cæmōni batamōnīpa. ¹⁹Īninque īīmaī ante apānemōnīpa. Codito tōnō godongāmæ cædinque Wængonguī īñōmō piyænē cædinque, Inguipoga quēwēmīni tōmāmīni botō gāmænō pōedāni, angampa. Pōmīni adinque botō, Æpogadō wēnæ wēnæ cæmīnitawo, ante tee mante adāmaī inte pīināmaī incæboimpa, angampa.

Tōmengā mānōmaī angā ēñēninque mōnitō wæætē mānīne ante nē waadete apānemōni badinque edæ, Wængonguī piyænē cæcā adinque pōedāni, ante apānemōnīpa. ²⁰Īninque Wængonguī mōnitō īmōnite āninque, Mīnitō wæætē botō beyæ wadāni īnānite waadete apānemīni ēñēninque poncædānīpa, angā ēñēninque mōnitō wæætē Codito beyænque nē waadete apānemōni bamōnīpa. Īninque mīnitō īmīnite waadete pōnō apānedinque mōnitō, Wængonguī gāmænō pōedāni, ante Codito beyænque ante apānemōnīpa. ²¹Wængonguī, Mīnitō Codito nō nānō ēwocadō ænte ēwocacāmīnīpa, ante pōnō cædinque Codito ingante angā ēñēninque tōmengā īñōmō edæ wēnæ wēnæ ēwocadāmaī inte wæætē edæ mōnō beyæ ante nē wēnæ wēnæ cæcā baī badinque mōnō wentamō ēwocadō incæ mongængacāimpa. Īninque mōnitō tōmengā nempo quēwēninque nō pōnī tōmengā nānō ēwocadō wæætē ænte ēwocamōmpa.

6 Tömengä tönö godongämä nē cämöni inte mönitö mīnitö imīnite iūmaī ante waadete apānemōnīpa. Wængonguī waadete pönö cæcä æmīni inte mīnitö wī ōnonque oda cæcæte ante æncæmīnīpa, ante nanguī æmōni ēñēmaimīnīpa. ²Edæ Wængonguī do angacāimpa,

“Mīnitö imīnite botö waadete pönö cæyedē mänīñedē mīnitö apānemīni ēñentabopa.

Ayæ, Mīni quëwenguīönæ impa, ante Codito nänö bæi ongonte æñedē botö mänīñedē mīnitö beyæ pönö cægaboimpa.”

Ante yewæmongatimpa. Īnīnque botö iūmaī ämo ēñēedāni. Wængonguī tömengä nänö waadete pönö cæyedē do ba apa quëwēmīni. Codito edæ ængä beyænque mīni quëwenguīönæ ĩñömö edæ do batimpa cämīni.

³Mönö quëwenguīnö ante adocanque incæ Wængonguī beyæ möni apānedö ante pīñāmaī incæcāimpa, ante wææ cædinque mönitö ĩñömö idiquibæ cædāmaī ĩmōnīpa. ⁴Wæætē mīnitö, Pabodoidi Wængonguī beyæ nē cædāni ĩnānīpa, ante acæmīnīpa, ante odōmoncæte ante mönitö cōwē iūmaī cämōnīpa. Cōwē nantate wæmōni incæ wænæ wænæ cædāni wæmōni incæ mö ongonte wææ cædāni wæmōni incæ æbāmenque wæmōni incæte mönitö cōwē wæntæye badāmaī inte ee cämōnīpa. Ædö cæte quëwenguīi, ante wæmōni incæ Wængonguī beyæ nē cämōni inte mönitö godōmenque cämōni aedāni. ⁵Ayæ tæi tæi pānāni wæmōni incæ tee mönedāni wæmōni incæ Yæ yæ ante mönitö ĩmōnite wido cædāni incæte mönitö wæætē Wængonguī ingante nē cämōni inte edæ nanguī cämōnīpa. Ayæ woyowotæ nanguī cædinque mönitö möwo mönāmaī inte cämōni incæ cænguī cænāmaī inte gëwænte wædinque cämōni incæ mönitö godōmenque cämōni aedāni.

⁶Mänōmaī cædinque mönitö wentamö mongænāmaī inte cämōnīpa. Ayæ wadāni æbāmenque cædāni incæ mönitö nō ēñēmōni inte edæ piyænē cæte pīinte änāmaī ĩmōnīpa. Wæætē waadete cämōnīpa. Edæ Wængonguī Tæiyæ Waëmö Ōnōwoca nempo quëwēnīnque nāwangä waadete pönēmōnīpa. ⁷Wængonguī nänö tæi pīñænö ewocadinque mönitö Wængonguī nō nänö angainö ante apānemōnīpa. Ayæ tontadoidi guëädö guëa wænoncæte ante tipæmäa næænāni bai cædinque mönitö nō pōni cæcæte ante Wængonguī nänö tæi pīñænö ante eyepæ næænte bai cämōnīpa.

⁸Mönitö ĩmōnite waa adāni incæ wīwa adāni incæte mönitö Wængonguī beyænque ante cämōnīpa. Pabodoidi waa pōni cædānīpa, ante nō apānedāni incæ wæætē, Pabodoidi wænæ wænæ cædānīpa, ante tedewәнāni incæ mönitö cōwē godōmenque cämōnīpa. Pabodoidi babæ cædānīpa, ante pīñāni incæte mönitö nōingä pōnente Wængonguī beyænque ante cämōni aedāni. ⁹Edæ tōmānāni mönitö ĩmōnite do edonque pōni adāni incæ adāmaī inte bai cædinque, Ōnōmīnique imīnīpa, ante tededānīpa. Wæncæ cämōni incæte ee quëwēmōnīpa. Pānāni wæmōni incæte mönitö ĩmōnite wænönāmaī ĩnānīpa. ¹⁰Wæwēmōni incæte mönitö cōwē mīmōno watapæ towocamōnīpa. Mönitö māincoo ömæpomōni incæ wadāni ĩnānite godö cämōni ænīnque tömēnāni māincoo nanguī pōni ænte bai eyepæ pōni entawәнānīpa. Edæ nē ömæpomōni inte wæmōni incæte mönitö tōmancoo pōni entawēmōni inte Wængonguī ingante nē cämōni ĩmōni aedāni.

¹¹Coodintoidi ēñēedāni. Mīnitö imīnite mönitö edonque pōni apānetamōnīpa. Mīnitö imīnite nanguī pōni waadete pönēmōnīpa. ¹²Mönitö dicæ pæ gompote mīnitö imīnite waadedāmaī ĩmōniyaa. Wæætē edæ tömēmīni pæ gompodinque edæ mönitö ĩmōnite waadedāmaī imīni inte wæwēmīnīpa. ¹³Īnīnque botö wëñæmīni bai

iñöminite iimaï ämopa. Minitö iminite waadete pönömöni adinque minitö näëmæ waadete pönëedäni.

Wængongui nê Quëwengä nänö owocö bai imompa, ante

¹⁴ Guëa mangæ mangæ woquïna, ante wagada tönö bodo guëa goti wëmencadämaï iedäni, ante do yewæmongatimpa cæminii. Pönënämaï inäni tönö godongämæ cädämaï iedäni. Inæmpa nê nö cæcä tönö guëa äantawente bai nê ëñënämaï cæcä guiquënê dicæ adobaï entawengäa. Ayæ ñäö entawengä tönö guëa gocæte ante cædinque nê wëmö entawengä inömö mimö ñäö entawengampa diyæ guëa goquingäa. ¹⁵ Codito nänö pönënö ante edæ wënæ awënê Bediado inömö edæ adodö ante pöngampa diyæ guëa cæquingäa. Nê wede pönengä nänö pönënö ante nê pönënämaï ingä inömö edæ adobaï pöngampa diyæ adobaï quëwenguingäa. ¹⁶ Ayæ, Wængongui impa, ante waodäni nänö badöinca æninque edæ näwä Wængongui tæiyæ waëmö oncönê ædö cæte mangui cö cæquii. Mönö guiquënê Wængongui nê Quëwengä nänö tæiyæ waëmö owoquincö bai inömonte tömengä Önöwoca mönonga pö guite owocampa. Ininque tömënäni tönö mönö ædö cæte godongämæ cæquii. Wængongui incæ, Mänömaï impa, ante ancæte ante iimaï angacäimpa. “Waodäni weca owodique botö tömënäni tönö godongämæ cægoncæboimpa. Botö tömënäni Wængongui inömote tömënäni wæætê botö quinäni incädänimpa,” angacäimpa.

¹⁷ Mänömainö ante apænedinque mönö Awënê adobaï ante,

“Wadäni inänite taayænte pönninque nänënê ponte quëwëedäni, angampa.

Wentamö i adinque gampodämaï iedäni.

Mänömaï cæminii adinque botö minitö iminite, Pöedäni, ante ee æncæboimpa.

¹⁸ Æninque, Minitö Wæmpobo inömo inte botö,

onguïñæmïni incæ onquiyæmïni incæ, Botö wëmïni iminipa, ante æncæboimpa, ante nê Tæi Piñænongä inte Awënê Wængongui angampa.”

Ante Wængongui beyæ yewæmongatimpa.

7 Ininque botö nê waademïni ëñëedäni. Mönö inömö, Wængongui, Cöwê cæcæboimpa, ante nänö angainö ante do ëñengamöimpa. Ininque baonga wentamö mönö ëñädö tönö mimö mönö wentamö entawënö adobaï ñä mënongate bai cædinque edæ mönö tæiyæ waëmö ëwocate quëwengäimpa. Ayæ, Wængongui ingampa, ante guïñente wædinque mönö, Cöwê nö cæte waa quëwengäimpa, ante nanguï cæcäimpa.

Coodintoidi Codito gämänö pönänipa

² Mönitö dicæ wacä ingante wënæ wënæ cæmöniyaa. Wacä wentamö nänö mongænguinque mönitö dicæ wënæ wënæ cæmöniyaa. Dicæ wapiticæ apænedinque wacä qui ö æmöniyaa. Ininque, Pabodoidi mänömaï cädämaï inänipa, ante adinque minitö wæætê mönitö imönite waadete pönënninque ëñëedäni, ämopa. ³ Mänömainö ante ämo incæte botö, Mini pante wæquinque, ante dicæ apænte ämogaa. Edæ botö do antabopa. Minitö tönö möni quëwenguinque incæ minitö tönö möni wænguinque incæ mönitö minitö tönö äanque bai entawente minitö iminite cöwê waadete pönëmönipa, antabopa. ⁴ Edæ, Minitö nö pönente cæminii iminipa, ante pönëmopa. Mönitö apænemöni ëñënninque minitö nê waa cæminii baminitapa, ante adinque botö mönitö apænëdö ante nanguï tobopa. Minitö mänömaï cæminii

imīnīpa, ante ēñente wædīnque botō gancaē pōnēmopa. Īnīnque mōnītō wēnā wēnā inte wæwēmōnī incæte botō wæætē godōmenque watapæ tobopa.

⁵Īmaī edæ Māatedōniabæ pōnīnque cætāmōnīpa. Āmætæ æmætæ gote apænecæte ante cæyōmōnīte wadānī bæ ta bæ ta cædānī wædīnque mōnītō ædō cæte guēmanguīmōnīi. Edæ nanguī pīinte cædānī wædīnque mōnītō baonga nantate wædīnque ōnōwoca adobaī guīñente wæwocatāmōnīpa. ⁶Incæte mōnītō wæwēñōmōnīte, Nē wæwēnānī gancaē bacædānīpa, ante nē pōnō cæcā īnongā Wængonguī īñōmō Tito ingante da pōnongā pongā adīnque mōnītō wæætē gancaē pōnentāmōnīpa. ⁷Tōmengā ponte a ongongā beyæ gancaē pōnēñōmōnīte tōmengā, Coodintoidi botō ĩmote waa cædānī adīnque botō wæætē gancaē pōnentabopa, ante apænecā ēñente mōnītō godōmenque totāmōnīpa. Ayæ botō ĩmote ante apænēdīnque tōmengā, Bitō ĩmite ante nanguī aīnente wædīnque coodintoidi Ca ca wædānīpa. Tōmēnānī īñōmō, Mōnō ñōwo Pabodo beyæ ante nanguī cæcæīmpa, ante wædānīpa, ante Tito tedecā ēñēnīnque botō godōmenque nanguī totabopa.

⁸Botō doyedē cadota ante yewæmōnīnque da godōmo ænīnque mīnītō wæwente bamīnitawo. Nāwangā botō cadota beyæ wæwente bamīnitapa, ante wædīnque botō, Quīnante mǎnōmaī yewæmōmoī, ante wætabopa. Incæte ayæ ate, Coodintoidi wantæ īñō wæwēnīnque ñōwo īñōmō edæ wæwēnāmaī īnānīpa, ante adīnque botō ñōwo edæ, Nō cædīnque yewæmōmoīmpa, ante piyænē cæbopa. ⁹Edæ mīnītō wæwēmīnī beyæ todāmaī īnīmo inte botō wæætē, Mīnī wēnā wēnā cædīnō ñīmpo cædīnque mīnītō Codito gāmænō mīnī pongūnque wæwente bamīnitapa, ante adīnque mǎnōmaī beyænque totabopa. Edæ Wængonguī nānō ānōnō mīnī ēñēnīnque wæwente bamīnī īnīnque mōnītō cædō beyæ dicæ wæmīnīyaa.

¹⁰Edæ Wængonguī nānō ānōnō ante wæwēmō baī mōnō ocæ ēmænte ponte quēwenguīnque impa. Īnīnque, Quīnante mǎnōmaī wæwēmōī, ante wædāmaī ĩmōmpa. Wæætē inguīpoga mōnō quēwenguīmāmo ante wæwēmō baī mōnō wængūnque impa. ¹¹Edæ Wængonguī nānō ānōnō ante do wæwēnīmīnī inte mīnītō ñōwo, Mǎnīnō mōnī wæwēnō beyæ æbānō entawēmōnīi, ante nāmā aedānī. Edæ mǎnōmaī wæwēmīnī inte mīnītō, Mōnō ee ongōnāmaī inte cæcæīmpa, ante do cæmīnitapa. Cædīnque, Mōnō pōnencabo wentamō mongænāmaī īngæīmpa, ante nanguī cædīnque mīnītō nē wēnā wēnā cædīngā ingante edæ do pīīmīnitapa. Ayæ, Pabodo æbānō angūngāā, ante guīñente wæmīnī incæte botō ĩmote ante aīnente wæmīnitapa. Ayæ, Nē wēnā wēnā cædīngā ingante mōnō nō ante pangæīmpa, ante do cæmīnitapa. Mǎnōmaī eyepæ cædīmīnī inte mīnītō wentamō mongænāmaī ĩmīnīpa, ante edonque abaimpa.

¹²Īnīnque mīnītō ĩmīnīte yewæmōnīnque botō nē wēnā wēnā cædīngā beyæ ante wīī yewæmontabopa. Tōmengā wēnā wēnā cæcā wædīngā beyæ ante adobaī yewæmōnāmaī intabopa. Wæætē mīnītō Wængonguī ayongā nāmā adīnque, Mōnītō Pabodoidi īnānīte waadete amōnīpa, ante, Nāwangā impa, ante edonque acæmīnīmpa, ante botō mīnītō beyænque ante yewæmontabopa. ¹³Mīnītō mǎnōmaī cæmīnī adīnque mōnītō wēēnēñedē nē wæwēmōnī inte ñōwo īñōmō gancaē pōnēmōnīpa.

Mīnītō waa cæmīnī beyæ wēēnēñedē wæwēnīngā inte Tito adobaī gancaē pōnente ñōwo watapæ pōnengampa, ante adīnque mōnītō do gancaē pōnēmōnī inte ñōwo godōmenque nanguī tomōnī ĩmōnīpa. ¹⁴Botō do īñōñedē Tito ingante apænēdīnque, Coodintoidi waa cædānī abopa, antabopa. Ñōwo mīnītō waa cæmīnī adīnque botō, Tito ingante botō apænēdīnō nō impa, ante adīnque botō guingo

imönämaï imopa. Edæ botö mīnitö imīnite nōinö ante apænetawo. Edæ mīnitö imīnite nōinö ante apænebo bai botö Tito ingante, Coodintoidi waa cædānīpa, ante apænedinque adobaï nōinö ante apænetabopa. ¹⁵ Ayæ Tito iñömö, Coodintoidi tömänāni botö imote waa adinque guiñente wædānitapa. Ayæ, Pöe, ānīnque tömēnāni botö apænebo ēñēnīnque Ao ante ēñente cædānitapa, ante pönēnīnque tömengä mīnitö imīnite godömenque waadete pönengampa. ¹⁶ Ayæ, Mīnitö cōwē waa cæmīni imīnīpa, ante pönēnīnque edæ botö adobaï watapæ tobopa.

Mönö godömenque nanguï godongæimpa, ante

8 Nōwo botö tōniñadāni apænebo ēñēedāni. Mäatedōniabæ iñömö Codito ingante godongämæ nāni pönencabo wayömö nāni cabo wayömö nāni cabo ongöñōnānīte Wængonguï Önōwoca pönö apæneca ēñēnīnque tömēnāni wæætē waadete cædinque iïmaï cædānīpa. ² Nanguï wēnæ wēnæ nantate wæwēnāni incæ tömēnāni cōwē piyænē cæte watapæ todānīpa. İnīnque ömæpodāni incæte tömēnāni nanguï mänāni bai cædinque, Wængonguï quīnāni quī, ante godömenque todīnque nanguï gomonga godönānitapa. ³ Tömēnāni edæ nāni godonguēnēnö ganca do godönīnque ayæ godömenque nanguï godönāni adimo inte botö, Nāwangä impa, ante apænebopa. Ayæ edæ tömēnāni nāni nāmā pönēnö bai cædinque, ⁴ Wængonguï quīnāni beyæ impa, ante mönitö wadāni tönö godongämæ godoncæmönīmpa, ante tömēnāni mönitö imönite nanguï ānīnque anca ānānitapa. ⁵ Mönitö guiquēnē, Mäatedōniabæ quēwēnāni tömēnāni nāni godonte æintaque godonguīnāni inānīpa, ante edæ pönentamönīpa. Incæte tömēnāni, Wængonguï quīmōni imönīpa, ante edæ Wængonguï ingante nāmā godönīnque ayæ, Mīnitö imīnite nē cæmōni bacæmönīmpa, ānīnque mönitö imönite edæ adobaï nāmā pönönānitapa. Ayæ mönitö pönēnö ganca adobaï godönīnque tömēnāni nāni godonte æinta ayæ godömenque godönānitapa.

⁶ Mäatedōniabæ quēwēnāni mänōmaï cædāni adinque mönitö Tito ingante iïmaï antamönīpa. Bitö doyedē āmi ēñēnīnque coodintoidi waadete pönēnīnque tæcæ godoncæ cædānitapa cæbii. Nōwo wæætē āmi ēñēnīnque tömēnāni nē waadete godönāni badīnque eyepæ godoncædānīmpa, ante mönitö Tito ingante nanguï antamönīpa. ⁷ Mīnitö iñömö wede pönēmīni inte edæ nē waa pōni apænēmīni imīnīpa. Ayæ godömenque gomonga ēñēmīni inte mīnitö, Mönö cōwē cæcæimpa, ante nanguï cædömīni imīnīpa. Ayæ mönitö imönite nē waadete pönēmīni imīnīpa. Mänōmaï tömänö ante do cædömīni inte mīnitö nōwo adobaï, Wængonguï quī, ante mönö nē waadete godömö bacæimpa, ante edæ nanguï cæedāni, ämopa.

⁸ Mänōmainö ānīnque botö, Cædāni, ante wææ ānāmaï imopa. Wæætē, Mīnitö æbānö cæmīnīi, ante ēñencæte ante cædinque botö wadāni nāni nanguï cædinö ante apænetabopa. Mänōmainö ante apænedinque botö, Mīnitö adobaï tömēnāni nāni cæbaï nanguï waadete pönente cæmīnitawo, ante acæte ante cædinque, Nē godömīni baedāni, antabopa. ⁹ Mīnitö do ēñēmīnīpa. Mönö Awēnē Itota Codito öönädē quēwēnīnque nanguï gomonga enempogaingä inte mönö imonte waadete pönēnīnque iïmaï ante pönö cægacäimpa. Botö ömæpobo babo beyænque mīnitö nanguï wæætē entawencæmīnīmpa, ante cædinque tömengä edæ mīnitö beyænque ante inguipoga pönīnque edæ ömæpocä bagacäimpa.

¹⁰ Ayæ, Mänīnö mīni godonguīnö ante æbānö cæquēnēmīni imīnīi, ante botö nāmā pönēnīnque iïmaï ämopa. Wadepo inōnedē wadāni godönāmaï iñönāni mīnitö

iñömö edæ do tano godömīnitawo. Mönö godongæimpa, ante edæ mīnitö cöwë tano cæinēmīni imīnitawo. ¹¹ Īnīnque, Mönö godongæimpa, ante quingæ ānīmīni inte ñowo edæ iinque cæedāni. Mīni ēadincoo adīnque mīnitö, Eyepæ inte botö pancacooga godoncæboimpa, ante mīni ānīncoo edæ godömīni adīnque, Eyepæ godömīnīpa, ante acæimpa. ¹² Edæ æcānö godöinengä tömengä nānö godonte æinta tōmanta adīnque, Æpotadö botö godonguēnēmo imoo, ante adīnque mānīmpotaque godōninque idæwaa. Godōmenque nanguī mangampa diyæ nanguī godonguingää.

¹³ Mänömaī ānīnque botö, Wadāni pönōmenque godōninque guēmāñōnāni mīnitö wæætë mīni eyepote wæquinque godōmenque nanguī godoncæmīnīpa, ante dicæ āmogaa. ¹⁴ Wæætë, Cöwë eyepæ bacæimpa, ante āmopa. Edæ mānīncoo ñowo eyepæ mānīnque mīnitö nē ænguēnente wædāni inānite godömīni ænānīpa. Īnīnque iincayæ ate mīnitö wæætë nē ænguēnēmīni bamīni ate tōmēnāni wæætë eyepæ mante ate mīnitö imīnīte pönōnāni æñōmīni adopo adopo edæ eyepæ babaimpa. Mänōmainö ancæte ante āmopa. ¹⁵ Edæ do yewæmongatimpa. “Cænguī gomonga wæampo æningä incæ tömengä nānö ænguēnenganca ænte bai mānīnque godōmenque mānāmai ingantapa. Wæætë edæ wædænque wæampo æningä guiquēnē tömengä nānö ænguēnenganca eyepæ ænte bai eyepæ mangantapa.” Ante nāni yewæmongainö bai iinque bacæimpa, ante mīnitö imīnīte āmopa.

Mīnitö weca Titoidi poncædānīpa, ante

¹⁶ Botö cöwë, Coodintoidi beyæ cæcæimpa, ante mīnitö imīnīte waadete pönēmopa. Ayæ, Wængonguī pönö apænecä ēñēnīnque Tito iñömö botö pönēmö bai adobai pönente cæcampa, ante adīnque botö wæætë Wængonguī ingante waa ate pönēnīnque apænebopa. ¹⁷ Edæ mönitö, Coodintoidi weca goe, āmōni ēñēnīnque edæ Tito do Ao ante pongä aedāni. Incæte wīi mönitö ānīnö beyænque pongampa. Wæætë nāmanque pōinente wædinque tömengä nanguī todīnque mīnitö weca pongampa.

¹⁸ Ayæ Tito tönö wacä mönö tōniñacä ingante da pönōmōni pongampa. Īngä Tito tönö nē pongä iñömö tömengä Codito ingantedö ante watapæ möni apænedö ante nē apænecä ingampa. Īnīnque Codito ingante godongāmæ nāni pönencabo wayömö nāni cabo wayömö nāni cabo tōmānāni tömengä ingante waa ate waa apænedānīpa. ¹⁹ Codito ingante nāni pönencabo incæ adocä ingante apænte ænīnque, Pabodoidi tönö gocæbiimpa, ante da godōnāni ate tömengä mönitö tönö godongāmæ goqingä ingampa. Edæ mönitö, Mönö Awēnē ñāo apāite bai ëmongä ingampa, ante acædānīpa, ante cædinque ayæ, Mönitö wadāni beyæ cæinēmōnīpa, ante acædānīpa, ante cædinque mīnitö da godonguīncoo ænte goquīmōni imōnīpa. Mänōmaī cæcæte ante goyōmōni, Tömengä godongāmæ gote cæcæcæimpa, ante da godōnāni gocæcæimpa. ²⁰ Edæ wadāni, Pabodoidi babæ cædānīpa, ante ānāmai incædānīpa, ante wææ cædinque mönitö nō pōni cædinque nanguī pōni mīnitö godonguīncoo ænte godīnque pædæ godoncæmōnīpa. ²¹ Edæ, Mönitö Wængonguī ayongä nō cæmōni inte waodāni ayōnāni adobai edonque pōni cædinque nō pōni cæcæimpa, ante cæmōnīpa.

²² Ayæ wacä mönö tōniñacä iñongante mönitö æpogamē cöwä ayōmōni tömengä cöwë tōmää nō cæcä inongampa. Ayæ ñowo tömengä, Coodintoidi nō cædānīpa, ante pönengä inte godōmenque waa cædongä ingampa. Mänōmaī ingampa, ante adīnque mönitö ñowo tömengä ingante da godōmōni godīnque tömengä iñāna tönö

mīnitō weca poncæcāimpa. ²³Tito iñōmō botō tōnō godongāmæ cōwē cæcampa. Īnque mīnitō beyæ guëa nē cæmōna imōnapa. Codito ingante nāni godongāmæ pōnencabo incæ mōnitō tōniñada Tito tōnō wada inate da godōnāni godinque tōmēnāni, Mōnō Codito ingante waa acædānīmpa, ante nanguī cæda inapa. ²⁴Īnāni inānite apænedinque mōnitō, Coodintoidi nē waa cædāni inānīpa, ante do apænetamōnīpa. Īnque mīnitō eyepæ godōmīni adinque tōmēnāni, Nāwangā impa, ante edonque acædānīmpa. Ayæ adobaī, Mīnitō waadete pōnō cæmīni adinque Pabodoidi wæætē mīnitō imīnite waa adānīpa, ante acædānīmpa, ante cædāni. Mānōmaī cæmīni adinque Codito ingante godongāmæ nāni pōnencabo wayōmō nāni cabo wayōmō nāni cabo tōmānāni adobaīnō ante edonque acædānīmpa.

Mōnō wædāmaī eyepæ pōnī godongæimpa, ante

9 Nōwo māninō, Wængonguī quīnāni beyæ mīnitō godoncæmīnīmpa, ante botō idæwaa yewæmōmopa. ²Edæ, Mīnitō wædāmaī inte do cæmīnīpa, ante ēñēnīnque botō Māatedōniabæ quēwēnāni inānite apænedinque, Acayabæ quēwēnāni iñōmō wadepo inōñedē do godoncæte ante cædōnānīmpa, ante do apænetabopa. Apænebo ēñēnīnque tōmēnāni wodo tōmānāni, Æ Acayabæ quēwēnāni nāni quingæ cæbaī mōnō adobaī cæcæimpa, ante cædānīpa.

³Incæte botō nōwo mōnō tōniñadāni inānite da godōmo pōnīnque tōmēnāni mīnitō imīnite apænedāni ēñēnīnque mīnitō wæætē eyepæ godoncæmīnīmpa. Mānōmaī cæmīni ate botō babæ apænedāmaī imoi, ante edonque ēñengæimpa. ⁴Īnæmpa Māatedōniabæ quēwēnāni botō tōnō godongāmæ ponte ayōnāni mīnitō wīī eyepæ cæmīni adinque tōmēnāni wæætē, Mīnitō dicæ cæmīniyaa, ante badete tobaīnānīpa. Ayæ mōnitō guiquēnē, Coodintoidi iīnque cæcædānīmpa, ante nē ānīmōni inte odadete guingo imonte wæbaīmōnīpa. Mīnitō adobaī, Mōni cæquēnēnō cædāmaī imōnīpa, ante guingo imonte wæbaīmīnīpa. ⁵Īnque mīnitō, Godoncæmōnīmpa, ante mīni ānīnō baī eyepæ godoncæmīnīmpa. Ante cædinque botō mōnō tōniñadāni inānite ānīnque, Mīnitō gote apænemīni ēñēnīnque coodintoidi ædæmō pōnente cæcædānīmpa, ante da pōnōmo pōnāni aedāni. Īnque mīnitō tōnō godongāmæ cædāni ate mīnitō ædæmō pōnēnīnque, Botō wææ gompodāmaī inte waa todinque godōmopa, ante godoncæmīnīmpa.

⁶Īmaī ante pōnēdāni. Wædænque quiyadingā iñōmō amiñaimō wædænque pete æncæcāimpa. Nanguī quiyadingā guiquēnē amiñaimō nanguī pete æncæcāimpa. ⁷Wadāni quī, ante æcānō watapæ todinque godōnaa, ante adinque Wængonguī tōmengā ingante waadete pōnengampa. Īnque wadāni wææ ānāmaī iñōnāni mīnitō, Botō æpotadō godonguīmo, ante pōnēnīnque tōmāmīni wædāmaī inte mīni ānīmpota adopota godōnīnque do godonguēnēmīni imīnīpa. ⁸Ayæ, Eyepæ pōnī ēamīni inte mīnitō quīēmē cæmīni incæ tōmānāni beyæ ante cōwē godō waa cæcæmīnīmpa, ante Wængonguī cæcampa. Īnque, Mīnitō eyepæ ænte ēadinque mānōmaī cæcæmīnīmpa, ante tōmengā nanguī cædongā inte cōwē eyede tate baī waadete pōnō cæcā ingampa. ⁹Edæ docā ingante ante iīmaī ante yewæmongatīmpa. “Yepanca quiyacā baī iñongā inte tōmengā, Ōmæpodāni quī, ante wayōmō wayōmō godongantapa.

Īnque tōmengā nō nānō cædinō iñōmō edæ cōwē ewēnāmaī ongongæimpa.”

¹⁰Ante yewæmongatīmpa. Nē quiyacā ingante Wængonguī, Tōmēmō quiyaquīmō, ante eyepæ pōnōnīnque adobaī, Cænguī, ante tōmāmō imonte eyepæ pōnongā ænte

cæmompā. Mīnitō iñōmō eyepæ ēamīni inte wacā ingā wacā ingā quiyate bai nēnem-pocæmīnimpā, ante cædinque Wængonguī mīni godonganca da pōnōninque godō-menque gomonga da pōnongā æncæmīnimpā. Mānōmaī eyepæ da pōnongā æninque mīnitō wæætē nō cædinque wadāni nanguī iñāni iñānite nēnempomīni æninque tōmēnāni wæætē amiñāimō tā pete bai watapæ quēwencædānimpā. ¹¹ Mīnitō pæ gompodāmaī inte wadāni iñānite cōwē pædæ godoncæmīnimpā, ante cædinque mīnitō imīnite Wængonguī nanguī pōni pōnongā æncæmīnimpā. Æninque mīnitō pæ gompodāmaī inte pædæ godō pædæ godō cæmīni adinque mōnitō wæætē, Coodintoidi mānōmaī cædānīpā, ante tedemōni ēñēninque wadāni wæætē Wængonguī ingante waa ate pōnēninque apænecædānimpā.

¹² Wadāni quī, ante do godōmīni æninque Wængonguī quīnāni tōmēnāni nāni ænguēñēnō ante eyepæ pōni æncædānimpā. Ayæ mīni godōnō æninque tōmēnāni mīmōno eyede tate bai Wængonguī ingante waa ate pōnēninque nanguī apænecædānimpā. ¹³ Mōnō Codito ingantedō ante watapæ ēñēninque mīnitō Ao ante do pōnēmīnitapā. Īninque Wængonguī nānō ānōnō ante do ēñente cædinque mīnitō, Ōmæpodāni quī, ante pædæ godōmīni æninque nē ænāni wæætē Wængonguī ingante, Bitō ñāo bai nō pōni cæbi ate coodintoidi bitō ānōnō ante ēñente cædānīpā, ante watapæ apænecædānimpā. Ayæ nē ænīnāni inte adodāni godōmenque apæned-inque, Nē ōmæpodāni tōmānāni iñānite da godōninque coodintoidi iñōmō mōnitō imōnite adobaī eyepæ pōnōnāni æmōnīpā, ante Wængonguī ingante godōmenque waa ate apænecædānimpā. ¹⁴ Ayæ, Coodintoidi iñānite Wængonguī godōmenque nanguī waadete pōnō cæcā beyænque tōmēnāni waa cædāni iñānīpā, ante pōnēninque nē ænīnāni iñōmō edæ mīnitō imīnite waadete pōnēninque mīnitō beyæ ante Wængonguī ingante apænecædānimpā.

¹⁵ Wængonguī iñōmō godōmenque waa cædinque mōnō Codito ingante da pōnongā ængamōimpā. Īninque mōnō, Wængonguī, bitō waa pōni pōnō cægabi-impā, ante mōnitō ædō cæte eyepæ inte waa ate pōnente apænequīmōnīi, ante mōnō Wængonguī ingante apænecæimpā.

Pabodo, Itota nānō nē da godōnīmo ĩmopa, angampa

10 Mīnitō, Wayōmonque quēwēninque Pabodo nanguī pīinte angampa, ante pōnēmīnitawo. Wæætē mōnitō weca pōninque awincadō awinca adinque tō-mengā guīñēnete wædinque pæ wēēnecampa, ante pōnēmīnitawo. Īñampa mīni ānōmo mānīmotō inte ĩmaī āmopa. Codito iñōmō edæ gānē pōnengā ĩnongā inte pōnō piyānē cæcantawo. Botō adobaī ñōwo piyānē cædinque mīnitō imīnite pōnō waadete apænebopa. ² Pabodoidi iñōmō inguipogaque ante pōnente cædānīpā, ante pancadāniya odadete ānewēnānīpā. Tōmēnāni iñānite botō guīñēnedāmaī inte nanguī ancæboimpā. Mīnitō guīquēnē adobaī odadete āmīni ĩninque botō mīnitō weca pōninque pīinte anguēñēmo ĩmaīmopa. Īninque, Wīi pīinte anguīmo bacæboimpā, ante wææ cæcæte ante botō ñōwo mīnitō imīnite, Ee aquēnē quēwēmīnīi, ante waadete pōnente yewāmōmopa.

³ Edæ inguipoga quēwēmōni incæte mōnitō Wængonguī beyæ ante wæætēdō wæætē cæcæte ante cædinque inguipogaque quēwēnāni nāni wæætēdō wæætē cæi bai cædāmaī ĩmōnīpā. ⁴ Wæætē edæ mōnitō Wængonguī beyæ ante wæætēdō wæætē cæcæte ante cædinque inguipogaque quēwēnāni nāni wænoncaquincoo næænāmaī inte cæmōnīpā. Wæætē Wængonguī tōmengā nānō tæi pīñāmāmo ænte mīmōno

entawëninque eyepæ næænte bai badinque mõnitõ tõmënäni nãni tæi mãenõincõ bæ tate bai cædinque wæætedõ wæætë nãni godõ änewënõ ante wido cæte bai cæmõnipa. ⁵ Wængongui ingante pönënãmai ingæimpa, ante në pönëwënãni inte ængæ gantidinque tõmënãni iñõmõ, Wadãni tõmãnãni adobai Wængongui ingante pönënãmai incæðänimpa, ante cædinque babæ wapiticæ cæðänipa. Mãnii babæ wapiticæ nãni cæðõnõ ante mõnitõ wæætë bæ tate wido cæmõnipa. Edæ, Codito ingante mõnõ ëñengæimpa, ante nõ apænemõni ëñëninque wadãni idiquibæ pönëwënãni iñõnãni mõnitõ wæætë mãninõ nãni pönëwënõ tõmãnõ õ ænte bai wido cæmõnipa. ⁶ Ayæ mìnitõ æðæmõ në ëñente cæmĩni bamĩni ate adocanque incæ ëñënãmai cæcã adinque mõnitõ wæætë tõmengã ingante do panguimõni imõnipa.

⁷ Æbãnõ i, ante edonque ongõ abaiminipa. Pancamĩniya, Botõ nãwangã Codito nempo quëwëmo imopa, ante pönëmĩnitawo. Mìnitõ mãnõmai pönëmĩni inte godõmenque iĩmai ante pönenguënëmĩni iminipa. Botõ Codito nempo quëwëmo imo bai Pabodoidi adobai Codito nempo quëwënãni inãnipa, ante nãwangã impa, ante pönenguënëmĩni iminipa. ⁸ Ìnãmpa Wængongui mõnitõ imõnite äninque, Mìnitõ në ämĩni badinque coodintoidi inãnite bæ tate wido cæðãmai incæminimpa. Wæætë æðæmõ ämĩni ëñëninque coodintoidi wæætë oncõ tæi mãnonte bai gongæncæðänimpa, ante cæðãni, ante Wængongui pönõ angã ëñëninque mõnitõ në ämõni batamõnipa. Ìnque botõ, Në ämo inte nãmã tocæboimpa, ante tedebo incæte guĩñenedãmai tedecæboimpa.

⁹ Botõ, Cadota ante botõ yewæmõinta adinque mìnitõ guĩñente wæcæminimpa, ante dicæ ämogaa. ¹⁰ Pancamĩniya, Pabodo tæi piñænongã bai inte cadota ante yewæmõninque nanguĩ angã awæðõ, ante wæminipa. Wæætë edæ adocã incæ mõnitõ weca ponte ongõninque edæ aquĩ ingã amõnipa. Tõmengã nãnõ tedepãmo õnõmãmoque bai impa, ante pönëmĩni awæðõ. ¹¹ Ìnãmpa, Tæi piñæmõni inte cadota ante në yewæmõmõni incæ mõnitõ adomõni inte mìnitõ weca ponte ongõninque adobai tæi piñænte cæcæmõnimpa, ämo ëñëmaimĩnipa.

¹² Pancadãniya nãmã incæ, Waëmõ põni imopa, ante tededãni incæte tõmënãni nãmã nãni tede bai mõnitõ æðõ cæte adobainõ ante tedequimõnii. Tõmënãni iñõmõ, Ægancadõ waa cæbo eyepæ inguĩ, ante nãmã nãni cægancaque ante adinque edæ, Eyepæ cætãbopa, ante pönëwënãnipa. Tõmënãni nãni cæðõ ante, Waa cætawo, ante tee mancæte ante, Do botõ cæðinõ bai adobai cæbopa, ante adinque, Eyepæ impa, ante pönëwënãnipa. Mãnõmai nãmã nãni pönëwënonque ante cædinque tõmënãni ëñënãmai inte oda cæte cæðänipa.

¹³ Mõnitõ guiquënë, Ìngancaque goedãni, ante Wængongui nãnõ angancaque cõwë gomõnipa. Ìnque tõmengã, Coodintoidi ganca godinque apænëedãni, angã ëñëninque mõnitõ do gote apænëdinque, Mãnìngancaque waa cæmõnipa, ante nãmã waa ate tedemõnipa. Godõmenque ante tededãmai imõnipa. ¹⁴ Mìnitõ ganca pönãmai inte bai mõnitõ, Coodintoidi weca gote do cætãmõnipa, ante tedemõni bai babæ wapiticæ incæðõnimpa. Incæte mìnitõ ganca do põninque Codito ingantedõ ante mõnitõ watapæ mõni ëñënõ ante apænëtamõnipa. Ìnque edæ, Mãnìnganca cætãmõnipa, ante mãninque ante tedemõnipa. ¹⁵ Ayæ wadãni nãni cæðinõ ante adinque mõnitõ, Tõmëmõni cæðinõ impa, ante änãmai imõnipa. Wæætë mìnitõ godõmenque godõmenque wede pönëñõmĩni mõnitõ wæætë adodõ mìnitõ weca ponte quëwëninque godõmenque gomonga cæyõmõni mõnõ watapæ bacæimpa, ante pönëmõnipa. ¹⁶ Ayæ mìnitõ weca iinque cædinque mõnitõ godõmenque gomonga

godinque mönō Codito ingantedō ante watapæ möni ëñënō ante apænecæmönimpa, ante pönëmönipa. Mänömaï cædinque mönitō wacä nänō cædiñömō ante, Mönitō mänñömō cætamönipa, ante tededämaï incæmönimpa.

¹⁷Æcänō, Botō waëmō pönī inōmo inte waa cæbopa, ante toinëna tömengä wæætë, Mönō Awënë waëmō pönī inongä inte pönō waa cæcampa, ante toquënegä ingampa. ¹⁸Edæ, Waëmō inōmo imopa, ante nämä änogä ingante Wængonguï waa adämaï ingampa. Wæætë, Ìngä waëmō inongä ingampa, ante mönō Awënë nänō änogä ingante ante Wængonguï wæætë waa acampa.

Wængonguï beyä, ante pancadäniya babæ apänedänipa

11 Ñowo botō adodeque önonque tedete bai yewæmōmo adinque mīnitō ee amīni ïnīnque botō waa tobaïmopa. Wadō ämo, Mīnitō ee ayöminī edæ botō önonque tedete bai do yewæmōmopa. Ìnīnque ïmaï ante odömoncæte ante yewæmōmoï aedäni. ²Wængonguï wææ gompocä bai botō adobaï mīnitō beyä ante wææ gompote ämopa. Mīnitō baquēcä mönämaingä bai ïñöminite Codito ængä beyænque mīni pönencabo tömengä nempo nö cæte quëwencæmīnīmpa, ante pædæ godoncæte ante cædinque botō tömengä adocanque ingante, Bitō quinäni ïnänite æe, antabopa. ³Mīnitō nöingä cædinque wacä miñä godämaï inte Codito ingante waadete pönëmīni incæte botō, Mīnitō oda cæmīni wæcæ wæ, ante guñente wæbopa. Eba wodi ingante Tæntæbo nanguï ëñengä inte babæ cædinque apænecä ëñëninque tömengä nänō oda cægai bai mīnitō wīi adobaï oda cæcæmīnīmpa, ante botō wææ ante apænebopa.

⁴Mönitō, Itota ingante pönengäïmpa, ante do apænemöni ëñëmīnitapa. Incæte wacä mīnitō weca pönīnque näwä Itota ingante apänedämaï inte, Wacä Itota ingante pönëedäni, ante babæ apæneyongante mīnitō edæ ëñëë cömīni awædō. Adobaï Wængonguï Önöwoca do ængai mīni ïñöminite wacä önöwoca pö guiyongante mīnitō ee æmīni guicä awædō. Ayæ wadäni mönō Codito ingante ante apänedämaï ïnäni inte, Wacä ængä beyä quëwengäïmpa, ante babæ apæneyönäni mīnitō edæ ëñëë cömīni awædō. ⁵Mänömainō ante nē tededäni ïñömō nämä ante pönëninque, Nē gode ämöni inte mönitō ñænæmöni pönī imönipa, ante edæ babæ änewënanīpa. Tömënanī näwangä ñænænäni ïnäni bai botō dicæ wædämo inguëñëmogaa, ante pönëmopa. ⁶Botō æbänō tedeboo, ante ëñëninque mīnitō ïñömō, Önönepämoque tedecampa, ante pīimīnitawo. Incæte botō ædæmō adīmo inte nē ëñënimō inte apænebopa. Pabodo mänömaï inongä inte apænecampa, ante acæmīnīmpa, ante mönitō cöwë mīnitō imīnite edonque odömömöni amīnitapa.

⁷Mīnitō imīnite ængö cæte bai cæcæte ante botō Wængonguï ingantedō ante watapæ apænebo beyä ænämaï intabopa. Mänömaï ænämaï inte botō nämä edæ pīinte bai cædinque dicæ wiwa cætabogaa. ⁸Codito ingante godongämæ näni pönencabo wayömō näni cabo wayömō näni cabo da pönönäni ö ænīnque botō mänīntaque godonte ænte quëwëninque mīnitō beyä cætabopa. ⁹Ayæ mīnitō weca ongönīnque botō quiëmë æinente wæbo incæ edæ waa atabopa. Wadäni edæ mönō tönñadäni incæ Mäatedöniabæ quëwente pönīnque tömënanī botō ænguëñënō ante eyepæ pönönäni æntabopa. Ìnīnque coodintoidi botō änō beyä wædämaï incädänīmpa, ante wææ cædinque botō ïñömō edæ, Pönömīni æmoedäni, ante cöwë änämaï intabopa. Ayæ iincayæ ate cöwë änämaï incæboïmpa. ¹⁰Mönō Codito nö nänō apänedō ante ëñente entawëmo inte ämopa. Botō, Mänömaï cædinque waa cæbopa,

ante cōwē edæ tedeyōmote mīnitō Acayabæ quēwēmīni inte edæ wææ cædāmaī incæmīnīmpa. ¹¹ Quīnante mǎnōmaī ante tedeboī. Mīnitō īmīnite waadedāmaī inte mǎnōmaī ante tedeboī. Īnǎmpa botō æbānō mīnitō īmīnite waadete pōnēmoo, ante do agaīngā inte Wængonguī tōmengā ancæcāīmpa.

¹² Wadāni guiquēnē, Mōnitō Codito nānō nē godongaīmōni īmōnīpa, ante nē ānāni guiquēnē, Æbānō cæte odōmōmōni adīnque wadāni Pabodoidi īnānite waa adō baī mōnitō īmōnīte adobaī waa acædānīmpa, ante wædānīpa. Īnīnque botō īñōmō, Īnāni mǎnōmaīnō ante odōmōnāmaī incædānīmpa, ante mǎnōmaī tedete wææ cæbo inte edæ cōwē godōmenque wææ cæcæboīmpa. ¹³ Tōmēnāni īñōmō edæ, Wadāni oda cæcædānīmpa, ante awēmō cædāni īnānīpa. Mōnō Codito tōmēnāni īnānite da godōnāmaī īngā incæte tōmēnāni īñōmō edæ, Codito nānō da godongaīmōni īmōnīpa, ante babæ apænedānīpa. Ayæ edæ mōnitō Codito nānō da godongaīmōni mōni ēmōnō baī ōnōmoque ēmōnīnque babæ cædānīpa. ¹⁴ Mīnitō, Tōmēnāni quīnante wacā baī ēmōnānīi, ante wæmīnitawo. Īnǎmpa tōmēnāni awēnē Tatāna incæ babæ cædīnque Wængonguī anquedoidi nāō nāni ēmōnō baī nāō ēmonte baī ēmongampa. ¹⁵ Īnīnque Tatāna beyæ nē cædāni īñōmō tōmēnāni awēnē Tatāna nānō babæ cædō baī adobaī babæ cædīnque, Nē nō Cædongā īngante nē cæmōni īmōnīpa, ante ōnōmoque ēmōnānīpa. Īnīnque tōmēnāni nē ōnōmoque ēmōnāni inte ōnonque ēwente baquīnānidō anguēnē.

Æbānō caate wæboo, ante Pabodo yewæmongampa

¹⁶ Botō nōwo adodō ante yewæmōmopa. Mīnitō, Pabodo ocai ōmædæcacā īnongā inte ōnonque tedecampa, āmīnitawo. Mǎnōmaīnō ante ānāmaī īmæwedāni. Incæte wacā ocai ōmædæcacā tedeyongante mīnitō ee amīni tedecā baī botō adobaī ocai ōmædæcabo inte baī, Nāmā waa cæbo īmopa, ante adodeque tedebo īnīnque ee amīni tedeboedāni. ¹⁷ Botō nōwo mǎnōmaī nāmā waa ate baī tedete yewæmōnīnque mōnō Awēnē nānō āmaī wīī yewæmōmopa. Wæætē ocai ōmædæcacā mā nānō pōnente tede baī adobaī ōnonque tedete baī yewæmōmopa. ¹⁸ Pancadāniya nanguī īnāni incæ, Mōnitō nāmā waa cæmōnīpa, ante edæ īnguīpogaque quēwēnāni tededāni baī adobaī tededānīpa. Tōmēnāni mǎnōmaī tededāni īnīnque botō adobaī, Nāmā waa cæbopa, ante tedecæboīmpa. ¹⁹ Nē ēñēmōni īmōnīpa, ante nē āmīni inte mīnitō īñōmō ocai ōmædæcadāni ōnonque tedeyōnānite ee ēñēē cōmīnīpa tōō. ²⁰ Wacā edæ mīnitō īmīnite bæī ongongā wædīnque mīnitō tōmengā īngante ee nē cæmīni bawēmīni awædō. Wacā babæ wapitīcæ cædīnque mīnitō quī īnguēnē incæ ō ængā incæte mīnitō edæ ee amīnīpa. Wacā mīnitō awēnē baī nāmā ængō cæte angā incæ ee ēñēmīnīpa. Wacā mīnitō īmīnite pōnō tamongā incæte mīnitō ee ate wæmīni awædō. ²¹ Botō wæætē aqūīmo inte, Tōmēnāni nāni nanguī cædō baī ædō cæte cæquīmoo, ante botō guīngo īmonguīnque ōnonque tedebopa tōō.

Tōmēnāni nāmanque waa adīnque edæ guīñēnāmaī inte tededānitawo. Botō adobaī nāmanque waa adīnque edæ guīñēnāmaī inte tedecæboīmpa. Incæte mǎnōmaī tededīnque botō ōnonque badete tote baī tedebopa. ²² Tōmēnāni guiquēnē ebedeoidi īnānitawo, ante pōnēmīni. Botō īñōmō edæ tōmēnāni nāni īmaī adobo īmopa. Tōmēnāni idægoidi īnānitawo. Edæ botō tōmēnāni nāni īmaī adobo īmopa. Tōmēnāni Abadāō wodi pæīnāni īnānitawo. Edæ botō tōmēnāni nāni īnō baī adobo Abadāō wodi pæīmo īmopa. ²³ Mōnō Codito beyæ nē cædōnāni īnānīpa, ante pōnēmīni. Botō edæ tōmēnāni nāni īmaī inte edæ gomonga īmopa. Incæte mǎnō-

mainö ante tedinque botö ocai ömædæcacä bai inte önonque tedebo. Tömëni inänite adopoque adopoque wædænque cæyönäni botö godömenque nanguï cægaboimpa. Tömëni inänite wædænque tee mönedäni wæyönäni botö imote godömenque wæætë wæætë tee mönedäni wægaboimpa. Tömëni inänite wædænque tæi pänäni wæyönäni botö imote godömenque nanguï tæi pänäni wægaboimpa. Ayæ botö wæætë wæætë wodo wængaboimpa.

²⁴ Oodeoidi æmontaimenca wodo coadenta ganca adoyedë nani cöwë tæi päimpoga botö imote adoyedë mänimpoga tæi tæi päinque önonpo æmæmpogoncaque wæætë adopoga adopoga tæi tæi pänäni wægaboimpa. ²⁵ Ayæ cantaca mempoga go adopoque botö imote tæi tæi pänäni wægaboimpa. Ayæ adopoque botö imote dicaca tacadäni wangë wængaboimpa. Ayæ wipodë wogaa godinque mempoga go adopoque wipo tente tobæmpo wægaboimpa. Edæ wii eyepë gote botö tömää itädë tömää woyowotä tæcæpæno pöni wæwogaboimpa. ²⁶ Wayömö wayömö botö ancaa godinque wætabopa. Önö æpæmpo wodo bete wæntabopa. Në ö ænäni incæ botö guidëni incæ wadäni incæ wodo wænönäni wæmo adinque botö wænguinque ante wægaboimpa. Ayæ tömëni nani quëwënmö quëwëninque, Önomæca quëwëninque, gæwapæno owodinque botö wænguinque ante wægaboimpa. Ayæ wadäni incæ, Mönö pönencabo imopma, ante babæ änäni adinque botö inömö edæ, Babæ cædäni wæncæ wæ, ante wægaboï aedäni. ²⁷ Botö pancaönaa tömää woyowotä miimo inte nanguï cædinque wægaboimpa. Tepæ pancaönaa gæwænte wægaboimpa. Pancaönaa cængui dæ ä ate gue ænente wægaboimpa. Edæ æpogamë pöni cænämaï inte wægaboimpa. Pancayedëna botö weocoo ömaabo inte yoguite wægaboimpa.

²⁸ Mänömaï wædömo inte botö, Codito ingante godongämæ nani pönencabo tömancabodäniya nani wædö ante æbänö cæquimoo, ante wædinque iimö inö iimö inö nanguï cæbopa. ²⁹ Edæ wacä aquingä inte wæcä ininque botö adobai aquimoo inte bai wæbopa. Ayæ, Wænæ wænæ cæ, änäni ëñëninque adocanque oda cæcä ëñente wædinque botö ædö cæte wæwënamäi inguimoo.

³⁰ Ininque, Nämä tæëmö inte cæbopa, ante tededämaï incæboimpa. Wæætë, Æbänö aquimoo inte cæbopa, ante acädänimpa, ante botö mäninonque ante tedecæboimpa. ³¹ Wængongui inömö mönö Awënë Itota Wæmpocä inongä inte edæ tömengä adocä inömö Itota Wængongui ingampa. Tömengä wæmö pöni inongä inte cöwë waa pöni cæcampa, ante mönö tömengä ingante cöwë apænecæimpa. Tömengä inömö edæ, Pabodo nö angampa, ante do ëñengampa. ³² Ayæ iimaï cædäni wægaboimpa. Adeto Tidiabæ awënë nänö inöñedë mänñedë botö imote bæi ongoncæte ante cædinque tömengä nänö ëmiñængä wædænque awënë inömö iimaï cæcantapa. Tömengä wadäni inänite angä ëñëninque tömëni wæætë Daämaco inömö tömëni nani wini wææ cæincö boyæ yabædemö gäänë wänö cöñönäni, ³³ botö tönö cædäni guiquënë Daämaco nani wini wææ cæincö boyæ cæimpiticæ inö otodë nã cædete botö imote pædæ wæænönäni ti wææ aamö cæte wodii winongaboimpa.

Pabodo, Iimaï wiimonte bai atabopa, angampa

12 Önonque tedebo incæte botö, Waa cætabopa, ante cöwë tedequënemo imopma. Ininque botö nōwo edæ, Wiimonte bai ayömo mönö awënë mä pöni odömongä atabopa, ante yewæmoncæboimpa. Ayæ tömengä, Æbänö i, ante

edonque pōni nānō odōmōnōnō ante godōmenque yewæmoncæ cæbopa. ²Codito nempo nē quēwēmo iñōmote Wængonguī do catodote wadepo iñonte botō imote oōnādē wænōmēnæcaōnæ mæicā æigaboimpa. Incæte wacā æicā ate baī nāmā incæ agaboimpa. Wabānō ōnōwocaque inte æigaboī. Iñtai ēñate wabānō inque inte æigaboī, ante botō adāmaī imopa. Wængonguinque nē ænte mæigaingā inte tōmenganque ēñengampa. ³Edæ baō ēñate æibo incæ baō ōmaabo inte æibo incæ Wængonguinque ēñēñongā botō, Iñmaī ingatimpa, ante māninque ēñē-mopa. ⁴Wæmōnādē tōmengā ōmæ iñōmō Wængonguī ænte mæicā æigaboimpa. Māniñōmāi waa pōni apænedāni ēñēmo incæte tōmengā, Iñōmō mōni apænedō ante mīni waocabo apænedāmaī incæminimpa, ante wææ angā ēñēninque botō waobo inte ædō cæte apænequīmoo.

⁵Iñinque wacā mǎnōmaī oōnādē æite ēñengā iñinque botō, Tōmengā waa pōni cæcampa, ante do apænebaīmopa. Wæætē nāmā botō waa cædōnō ante apænedāmaī incæboimpa. Incæte, Tōmēmo aquīmo inte ōnonque cætābopa, ante māniñonque ante botō nāmā waa ate baī apænecaōboimpa. ⁶Waa cægaboimpa, ante tedebo iñinque botō wīi ocai ōmæcabo inte edæ tedebaīmopa. Iñæmpa nāwangā waa cægāimo iñōmo inte botō nō ante edæ tedebaīmopa. Incæte botō wædænque apænete pōnōmenque cæyōmote æcāmenque incæ, Pabodo godōmenque waa pōni cæcampa, ante ānāmaī incæcāimpa, ante wææ cædinque botō waa cægāinō ante tededāmaī inte edæ pæ wēnebopa.

⁷Wængonguī mā nānō odōmongāinō æbānō waa pōni ingateī, ante wadāni adāmaī iñōnāni botō adoboque atabopa. Iñinque, Pabodo, Botō adoboque nē agāimo imopa, ante nāmā waa adāmaī incæcāimpa, ante wææ cædinque Wængonguī angā ate Tatāna botō imote pōnō da boo codongate oca oca coingā baī cæcā wætābopa. ⁸Mānōmaī cæcā wædinque botō mempoga go adopoque Wængonguī Awēnē ingante apænedinque, Botō daa cogate baī wæyōmote o tongaate baī cæbi quēwē-moe, ante nanguī ante wætābopa. ⁹Ca wæyōmote mōnō Awēnē wæætē, “Nē aquīi pōni iñāni iñōnānite botō tæī piñæmāmo eyepæ pōni pōnōmo æninque tōmēnānique wæætē tæī piñænte entawencædānimpā. Iñinque bitō nē aquīimi imi beyænque botō waadete pōnō cædō iñōmō edæ eyepæ pōni impa.”

Iñinque mōnō Codito nānō tæī piñænte cæpāmo ænte entawencæte ante cædinque botō iñōmō edæ, Nāmā aquīmo inte botō wædinō beyæ ante botō nāmā waa ate tobopa, ante tededinque godōmenque tocæboimpa. ¹⁰Æyedēnō aquīmo imōi māniñēdē edæ tæī ewocaboimpa. Mānōmaī beyæ aquīmo inte botō Codito beyænque nanguī tobopa. Badete tote piñte cædāni wæbo incæte botō piyænē cædinque tobopa. Ancaā nanguī caate wædinque nangæ babo incæ, togænte pānāni wæbo incæ, Ædō cæte quēwenguīmoo, ante wæbo incæ māniñō tōmāā beyæ wædōmo inte botō Codito beyænque ante piyænē cæte nanguī tobopa.

Coodintoidi æbāmē cædāni, ante wæbopa, Pabodo angā

¹¹Ocai ōmædæcacā ingā baī Pabodo ōnonque tedete yewæmongampa, ante pōnēmīnitawo. Iñæmpa tōmēmīni botō beyæ wææ apænedāmaī imīni beyænque botō tōmēmo nāmā wææ cæcæte ante cædinque mānōmaī tedete yewæmōmopa. Wadāni nē gode ānāni guiquēnē nāmā nāni waa acabo iñānīpa. Incæte tōmēnāni nāwangā nāænānāni iñāni iñinque botō iñōmō dicæ wædāmo imogaa. Iñinque mīnitō tōmēmīni, Pabodo waa cæcā ingampa, ante tedequēnēmīni imīnīpa tōō.

¹²Wacä mīnitō weca pōninque æbānō cæcā ate mīnitō, ĩngā ĩñōmō mōnō Codito nānō nē da godongaingā ingampa, ante ēñēmīnī. ĩmaī impa. Tōmengā, Ĕñencæmīnīmpa, ante mā pōnī cæcā ate do ēñēmīnīpa. Tōmengā bamōnengæ nanguī odōmongā ate ēñēmīnīpa. Wadāni cædāmaī ĩñōnāni tōmengā tæī pīñænte cæcā ate wædinque mīnitō wæætē edæ, Codito nānō nē da godongaingā ingampa, ante do ēñēmīnīpa. ĩnīnque botō mīnitō weca quēwēnīnque edæ Codito nānō nē da godongaingā mā cæte nāni odōmōnī baī adobaī odōmōnīnque edæ wæntædāmaī inte ee cæbo abaimīnīpa. ¹³ĩnīnque wadāni Codito ingante nāni godongāmæ pōnencabo ĩnānite waa cædinque botō mīnitō ĩmīnite dicæ pōnōmenque cætabogaa. Wabānō mīnitō ĩmīnite, Pōnōmīni æmoedāni, ante ānāmaī inte botō mīnitō ĩmīnite wīwa cæbopææ.

¹⁴Botō do mīnitō weca mempoga pōnīmo inte nōwo wæætē poncæ cæbopa. Pōninque botō mīnitō māincoo ante ānāmaī incæboīmpa. Wæætē, Mīnitō botō wēmīni bacæmīnīmpa, ante cæbopa. Wēñænāni tōmēnāni mæmpoidī beyæ ante dicæ godonguēnēnāni ĩnāniyaa. Wæætē edæ mæmpoidī ĩñōmō wēñænāni beyæ ante nē godonguēnēnāni ĩnānīpa. ¹⁵ĩnīnque, Mīnitō quēwencæmīnīmpa, ante botō māincoo tōmancoo godōnīnque waa tocæboīmpa. Ayæ, Mīnitō quēwencæmīnīmpa, ante cæte wæmo ĩnīnque waa tobaimopa. Botō mænōmaī mīnitō ĩmīnite gomonga waadete pōnēmo ĩnīnque mīnitō wæætē botō ĩmote pōnōmenque waadete pōnēmīni ĩmīnitawo.

¹⁶Incæte edæ idæwaa āmopa. Mīnitō māincoo ante botō ānāmaī intabopa. Incæte mīnitō, Pabodo nē wēnæ wēnæ pōnengā inte awēmō æncæte ante babæ cæcampa, ante pōnēwēmīni awædō. ¹⁷Wadāni ĩnānite mīnitō weca da godōnīnque botō awēmō æntawo, ante pōnēmīnitawo. ¹⁸Tito ingante, Coodintoidi weca ate pōe, nanguī ānīnque botō wacā mōnō tōnīñacā tōnō tōmengā tōnō da godōmo guēa godatapa. ĩnīnque Tito mīnitō weca pōninque dicæ wīwa cædinque māincoo ō ængantawogaa. ĩñæmpa tōmengā tōnō botō guēa āawocaque baī ēwocamōna inte mōnatō guēa cægōmōna adīnque mīnitō adāmaī inte baī tedewēmīni awædō.

¹⁹Mīnitō, Pabodoidi nāmā wææ cæcæte ante apænedānīpa, ante pōnēmīni awædō. ĩñæmpa mōnō Codito nempo quēwēnōmo inte mōnitō Wængonguī ayongante apænetamōnīpa. Edæ, Botō nē waademīni ĩmīni inte mīnitō tæī pīñænte bacæmīnīmpa, ante cædinque mōnitō mænōmainō ante apænetamōnīpa. ²⁰Botō ĩñōmō edæ mīnitō waa cæmīni acæte ante ponte ayōmo mīnitō wadō cæmīni baī botō nanguī wæcædōmoīmpa, ante guīñente wæbopa. Ayæ mīnitō wæætē, Pabodo waa cæcæte ante pongampa, ante pōnēñōmīni botō wadō cæbo baī mīnitō nanguī wæcædōmīnīmpa, ante pōnente wædinque botō, Mōnō mænōmaī wædāmaī ĩngæīmpa, ante wææ cæcæte ante cæbopa. Edæ mīnitō wæætēdō wæætē piinte amīnitawo. Wacā ingante waa cædāni wædinque mīnitō godō piinte amīnitawo. ĩñontobæ ængūī bamīnitawo. Nāmanque pōnente cæmīnitawo. Wacā ingante piīnīnque godō babæ ante tedewēmīnitawo. Godō wæntaa wæntaa āmīnitawo. Nāmā waa adīnque cæmīnitawo. Wīī ēñente cædinque mīnitō Yæ yæ tedemīnitawo. Mānīnō tōmānō wabānō cæmīnīni, ante guīñente wædinque botō mænōmainō ante edæ yewæmontabopa.

²¹ĩnīnque botō ponte ayōmo pancamīniya wēēñēdē mīni cægāī baī nōwo adobaī cæmīni adīnque botō guingo imonte wæconguēnēmo ante awædō. Edæ pancamīniya wēēñēdē wentamō mīni mongæñō ee mongæmīni adīnque botō Ca ca wæbaī-

mopa. Wëenëñedë mîni godö towengainö ayä towëmîni intawo. Wëenëñedë ëñëñä-mai inte mîni wiwa cædinö ayä cæmîni intawo. Edæ wentamö mongæmîni inte guingo imönämai imîni inte pancamîniya Wængongui gämænö ocä ëmænte pönä-mai imînipa, ante guiñente wæbopa.

Idæwaa mäninque yewæmömopa, ante

13 Botö mînitö weca mempoga do pongaimo inte nõwo wæætë poncæ cæbopa. Ìmaï ante do yewæmongatimpa. Nö nõ æbänö cætimpä, ante ëñencæte ante waoda mënaa incæ mengäa go adocanque incæ nè adinani inte adodö ante apænedäni ëñëñinque do apænte angæimpa, ante nani yewæmongainö ante ëñëñinque cæcæboimpa. ²Wëenëñedë wënæ wënæ cædinäni tönö wadäni tömänäni inänite botö mînitö weca doyedë pöninque, Ämo ëñëedäni, ante wææ äninque nõwo wæætë wayömö ongöninque adodö ante wææ ante yewæmömopa. Ayä ate wæætë mînitö weca ponte ongöninque tömanga apænte äninque adodäni inänite ata cæpodämai incæboimpa.

³Pabodo wabänö mönö Codito tönö godongämæ cæte apænecäa, ante wæmînitawo. Mäninö ante mîni wædö ante edæ, Næwangä impa, ante odömoncæte ante botö mänömai apænte ancæboimpa. Mönö Codito incæ botö tönö godongämæ nè cædongä inöömö tömengä inöömö aquiingä inämai inte mînitö imînite apænte angä abaimînipa. Tömengä inöömö nangui täi piñængä inte mînitö weca cæcä apa änewëmîni. ⁴Næwangä impa. Mönö Codito adocä incæ aquiingä bai inte cæyongante waodäni wæætë nænquedimæ cæte mäo timpodäni wængacäimpa. Incæte Wængongui nänö täi piñænö beyænque adocä nani ömæmonte quëwengampa. Mönitö adobaï tömengä nempo quëwëninque aquiimöni inte edæ Wængongui nänö täi piñænö beyænque mönö Codito tönö godongämæ quëwëninque mînitö beyä ante cæquiimöni imönipa.

⁵Mînitö tömëmîni inöömö, Æbänö wede pönëmo imoo, ante nämä waa aedäni. Mîni cædinö adinque, Æbänö nöingä cæbo imoo, ante aedäni. Ìnæmpa, Itota Codito ingante entawëmompä, ante ëñëñämai imînitawo. Wabänö mînitö pancamîniya nämä adinque, Botö nöingä cædämaïmo inte edæ wede pönënamäimo inte awædö, ante ëñencæte ante aquënëmîni imînipa. ⁶Ayä nämä mîni a bai mönitö imönite adobaï apænte adinque mînitö, Pabodoidi guiquënë nöingä cædönäni inte nè wede pönëñäni inänipa, ante edonque amîni waa tobaïmopa. ⁷Mînitö beyä ante mönitö Wængongui ingante apænedinque, Coodintoidi cöwë wënæ wënæ cædämai incædänimpa, ante apænëmönipa. Incæte mönitö, Mînitö wënæ wënæ cædämai imîni ate wadäni, Pabodoidi ædämö cædäni beyænque impa, ante mönitö imönite waa acædänimpa, ante wiï cæmönipa. Wæætë wadäni, Pabodoidi wiï eyepæ cædänipa, ante piïnte äñäni incæte mînitö wæætë nöingä cæcæmînimpa, ante mönitö mäninonque ante cöwë cæmönipa.

⁸Edæ Wængongui nöingä nänö äñö ante nè cæmöni inte mönitö adode ante ædö cæte wido cæquiimöni. ⁹Ïninque mönitö æyedëmë aquiimöni inöömöni mînitö wæætë täi piñænte cæmîni adinque mönitö nangui tomönipa. Mînitö beyä edæ Wængongui ingante apænedinque mönitö, Coodintoidi eyepæ entawëninque picänäni bai nõ cæcædänimpa, ante apænëmönipa. ¹⁰Botö imote apænedinque Wængongui, Bitö wadäni inänite bæ tadämai inte täi mäenonte bai pönö cæcæbiimpa, ante pönö cæcä ate botö täi piñæmo badinque nè ämo batäbopa. Nè ämo imo

incæte botö mīnitö weca ponte ayömo wīwa cæmīni adinque pīinte panguēnēmo īnāmaī incæboimpa, ante wææ cædinque botö ñowo wayömö quēwēninque, Nāmā apænte äedāni, ante wææ yewæmömopa.

¹¹ Īñānāni, māninque ante ñowo yewæmömopa. Mīnitö eyepæ entawēninque, Mönö picænāni baī badinque nõ cæcæimpa, ante nanguī cæedāni, ämopa. Wæn-tædāmaī inte tæi pīñænte cæedāni. Mīni cabo incæ adoyömö pönēninque gänē pönente quēwēedāni. Wængonguī incæ nē Waadecā inte nē gänē entawengā inte mīnitö tönö cōwē quēwencæcäimpa, ämopa. ¹² Mīni cabo incæ godongämæ pō bee tēninque waadete pönente waa apæneedāni. ¹³ Wængonguī quīnāni eye-queī quēwēnāni īñömö, Mīnitö waa quēwencæmīnimpa, ante apænedāni ēñente yewæmömopa.

¹⁴ Mīnitö tōmāmīni mōnō Awēnē Itota Codito waadete nānō pōnō cægāinō ante entawencæmīnimpa, ämopa. Mæmpo Wængonguī tōmengā nānō waadete pōnēnō ante entawencæmīnimpa, ämopa. Wængonguī Tæiyæ Waēmö Öñowoca tönö ää-wocaque baī ewocadinque tōmāmīni godongämæ waa quēwencæmīnimpa, ante botö Pabodobo māninque ante yewæmömopa.

Gadataidi

inänite Pabodo nänö cadota ante yewæmongainta

Gadataidi inänite Pabodo, Waa quëwëedäni, angampa

1 Botö Pabodobo inömo inte, Minitö acæminimpa, ante yewæmömopa. Mæmpo Wængongui incæ Itota Codito ingante, Nāni ömæmöe, angä nāni ömæmongacäimpa. Mæmpocä inömo Itota Codito tönö guëa cædinque botö imote da godonga gotabopa. Ininque botö dicæ waodänique änāni ëñente gotabogaa. Botö imote edæ dicæ waocunque da godongä gotabogaa. ²Minitö Gadatiabæ wayömö wacabo wayömö wacabo quëwëmini inte Codito ingante mini godongämæ pönencabo inömini inte edæ ëñencæminimpa, ante mönitö möni pönencabo tömämöni iimai ante apænemönipa.

³Wængongui mönö Mæmpo tönö mönö Awënë Itota Codito godongämæ pönö waadete cæda ate minitö gänë pönente waa quëwencæminimpa, ämönipa. ⁴Adocä mönö Mæmpo Wængongui inömo, Minitö pedænguipogaque wiwa cæte mini wæwëñömö edæ abæ tawænte ponte bai botö gämænö ponte quëwëedäni, angampa. Ininque, Wængongui nänö angainö bai cæcæminimpa, ante cædinque mönö Awënë Itota Codito mönö imonte ö æncæte ante cægacäimpa. Mini wænæ wænæ cæpæmo mongæncæboimpa, ante tömengä nämä wepæ pædæ godonte bai cædinque pönö ængä beyænque mönö wæætë quëwëmompä. ⁵Edæ pedænguipoga inönte miingui-poga bayonte edæ, Mänömaï bacäimpa, ante në angaingä inongä inte mönö Mæmpo Wængongui inömo edæ cöwë nāö apäite bai waëmö pönï emönongä ingänö angüënë. Mänömaï impa, ante botö, Amëë, ämopa.

Codito ingantedö ante watapæ ëñengäimpa

⁶Minitö inömo æbämë pönï cæmini awædö. Mönö Codito waadete pönö cæcä beyænque minitö Wængongui añecä pöminitawo. Nöwo guiquënë në añecä inongante quimæ panguimæ gomīni. Wadāni, Quëwengui taadö wadö inompa, ante tededäni ëñëninque minitö do Ao änewëmini awædö. ⁷Inæmpa wadö incæ wī quëwenguinö inompa. Wæætë edæ, Minitö oda cæcæminimpa, ante cædinque wadāni pancadāniya, Codito ingantedö ante watapæ möni apænedö ante edæ, Idiquibæ bacäimpa, ante cædāni apa ëñëwëminii.

⁸Mönitö Codito ingantedö ante watapæ apænemöni ëñëminitapa. Incæte mönitö adomöni incæ wadö ante apænemöni bai Wængongui wæætë pönö piinte apænte angä wæquimönidö angüënë. Ayæ adobai Wængongui anquedo incæ öönædë owod-inque wææ pöninque wadö ante apæncä bai Wængongui tömengä ingante wæætë godö piinte apænte angä wæquingänö angüënë. ⁹Edæ doyedë möni äninö bai botö nöwo wæætë adodö ante ämopa. Codito ingantedö ante watapæ apænemöni ëñëninque minitö Ao äminitawo. Ininque mäninö ante æcämenque pönënamāi inte wadö ante apæncä ëñëninque Wængongui tömengä ingante wæætë godö piinte apænte angä wæquingänö angüënë.

¹⁰Botö dicæ, Minitö waomīnique botö imote Ao ancæminimpa, ante apænebogaa. Wængonguinque, Ao ancæcäimpa, ante apænebo aedāni. Ayæ, Waomīnique

tocæminimpa, ante dicæ cæbogaa. Waomînique tocæminimpa, ante cæbo inte bai edæ Codito ingante nê cædômo inâmai incædômoimpa.

Pabodo Wængonguinque da godongä gotabopa, angampa

¹¹ Botö tönînamîni êñeedâni. Codito ingantedö ante watapæ botö apænedö iñômö edæ wiî waodânique nâni mâ pönengainö impa, ante âmo êñeedâni. ¹² Mânîñö ante waocanque dicæ pönö apæneçä êñente æntabogaa. Waocanque dicæ odömonte apæneçä êñëninque apænetabogaa. Wæætê Itota Codito edonque odömonte apæneçä êñëninque botö nê âmo inte adodö ante apænebopa.

¹³ Oodeobo inômö inte botö iñômö edæ möni oodeocabo pönengainö ante wëenêñedê mânînonque ante êñëninque quëwengaboî aedâni. Botö mânîñedê edæ Codito ingante nâni godongämæ pönencabo inânite wido cæcæte ante cædinque ancaa togænte edæ nanguî pönî pâmo wægadânimpa, ante do êñëminîpa. ¹⁴ Ayæ botö tönö guëa pægainâni incæ nanguî inâni guiquënë möni oodeocabo möni êñengainö ante wædænque êñente cæyönâni botö iñômö godömenque nanguî pönî êñente cægaboimpa. Edæ mönitö mæmæidi nâni odömonte angainö ante botö, Mönö Ao ante adodö êñente cæte quëwengæimpa, ante nanguî cæbo ingaboimpa.

¹⁵ Incæte botö badä cæncadê ongöñömote Wængongui, Botö beyæ cæcæbiimpa, âninque edæ mânîñedê botö ïmote apænte ængaingä inte ñowo botö ïmote pönö waadedinque añecantapa. Ayæ ñowo pönî tömengä nâmä nânö pönënö ante cæte todinque edæ, ¹⁶ botö ïmote pönö angantapa. Bitö oodeoidi inâmai inâni inânite apænebi êñëninque tömënâni botö Wengä ingante edonque ate bai ëwocacædänimpa, ante tâno botö ïmote edonque odömongä adinque botö tömengä Wengä ingante do ëwocabo inte apænebo êñëñânitapa. Ìninque botö waocä ingante, Æbânö cæquimoo, ante edæ änâmai intabopa. ¹⁷ Botö ïmote da godongä ate botö Codito tâno nânö nê da godongainâni inânite apæneçæte ante Eedotadêë iñômö æidâmai intabopa. Wæætê edæ wadæ godinque botö wayömö Adabiabæ do godinque ayæ ate Daâmaco iñômö ocæ ëmænte gotabopa.

¹⁸ Ayæ wadepo mënepoga go adodepoque iinque go ate botö Pegodo weca mä êñacæte ante Eedotadêë æidinque mëa Wængongui itadê tömengä weca quëwentabopa. ¹⁹ Ayæ wadâni Itota nânö nê da godongainâni iñönânite botö adocanque ingante mönö Awënë Itota biwî Tantiago ingante adinque wadâni inânite adâmai intabopa. ²⁰ Mânömainö ante botö Wængongui ayongä babæ änâmai inte nâwangä ante yewæmömo aedâni.

²¹ Mânîi gote êñate ate botö Tidiabæ godinque godömenque Tiditiabæ gotabopa. ²² Ìninque Oodeabæ quëwente Codito ingante nâni godongämæ pönencabo mönö Codito nempo nê quëwënâni iñômö botö awinca cöwê adâmai inâni inte önöwënenque pönengadânimpa. ²³ Tömënâni iñômö iïmainö ante önömoncaque êñengadânimpa. “Wëenêñedê mönö ïmote nê togænte pangaingä iñômö mönö pönente quëwenguine ante, Mânîine ante wido cæcæimpa, angantawo. Ñowo guiquënë tömengä, Wido cæquine, ante nânö angaine incæ adode ante edæ watapæ apæneçä êñëñânîpa,” ante tededâni êñengadânimpa. ²⁴ Ìninque, Pabodo ñowo waa cæcampa, ante adinque tömënâni Wængongui ingante apænedinque, Bitö waëmö pönî ëmönömi inte nê waa cæbi ïmîpa, ante watapæ apænegadânimpa.

Itota nänö nē da godongainäni Pabodo ingante Ao änäni

2 Ayæ mänii pö godinque iincayæ ate catodote wadepo go ate botö Bedēnabee tönö Eedotadēē iñömö adodö æidinqe Tito ingante mäomöna gocantapa. ²Wængongui do botö imote apænete bai edonque odömongä adinqe botö Eedotadēē iñömö æidinqe iimaï ante apænetabopa. Botö iñömö oodeoidi inämaï inäni weca godinque, Codito ingantedö ante cöwē watapæ apænebopa, ante botö ñænænäninque inänite awēmö apænebo ëñenänitapa. Mänömaï cædinque botö, Æbänö cæboï, ante adodö adodö ante apænebo ëñeninqe tömënäni pünämaï incædänimpa, ante cætabopa.

³Ayæ, Botö tönö guëa pöningä Tito ingante adinqe pancadäniya, Ìngä iñömö Guidiego inongä iñongante ämini ëö togæncædänimpa, ante piinte änäni incæte nē änäni guiquënë, Eö togæedäni, ante änämaï inänitapa. ⁴Eö togængæimpa, ante nē piinte änäni nani wææ angainö ante mönitö iñömö Codito Itota gä pe æmpote æængä beyænque abæ tawænte ee gote bai quëwëmönipa. Mänömaï iñömönte pancadäniya, Æbänö quëwënäni, ante edæ awēmö acæte ante cædinque edæ, Mönö caipæ imompä, ante bai babæ cædinque mönitö weca pönäni wætämönipa. Ayæ edæ mönitö tömënäni nani wææ änö beyænque nē cæte quëwëmöni bacæmönimpa, ante cædinque tömënäni godömenque, Cæedäni cæedäni, ante wææ änewënäni wætämönipa. ⁵Incæte edæ, Mönö Codito ingantedö ante watapæ möni apænedö näwangä ante impä, ante minitö oda cædämaï incæminimpa, ante wææ cædinque mönitö wantæ iñö incæ nē wææ änewënäni inänite ëñente cædämaï intämönipa.

⁶Ñænænäni inänipa, ante wadäni nani nē waa adönäni iñömö æbämë ëmönänii, ante botö iñömö edæ wædämaï imopa. Edæ Wængongui incæ waocä ingante apænte acæte ante cædinque adämaï ingampa. Mimönoque acampa. Ìninqe botö idæwaa apænebo ate iñäni incæ ædö cæte godömenque apænequinäni. ⁷Ìnæmpä iñäni incæ edæ do ëñenänitapa. Pegodo ingante mönö Awënë incæ pönö angä ate tömengä oodeoidi inänite mönö Awënë ingantedö ante nē watapæ apænecä ingampa. Botö imote adobaï mönö Awënë incæ pönö angä ate botö wæætë oodeoidi inämaï inäni inänite nē apænebo imopa. Ìninqe botö mänömainö ante apænebo ate nē änäni iñömö, Pegodo cæcä bai Pabodo adobaï cæcampa, ante do ëñenänitapa. ⁸Pegodo oodeoidi weca gote cæyongante Wængongui tömengä tönö godongämæ cæcä bai botö guiquënë oodeoidi inämaï inäni weca edæ gote cæyömote adocä incæ botö tönö adobaï edæ godongämæ cæcampa, ante do ëñenänitapa.

⁹Tantiago, Pegodo, Wäö iñömö nē tæi ëmönäni inänipa, ante adinqe wadäni, Gönöniiwæ onguitanca bai inänipa, ante apænedänipa. Ìninqe botö apænebo ëñeninqe mäninäni, Onguitancadi, nani änäni iñömö edæ, Pabodo ingante Wængongui mänömaï pönö waadete cæcampa, ante adinqe botö imote ayæ Bedēnabee ingante, Mönitö töninämina iminapa, ante tömëmæ inö pædæ pompote bæi ongompodänitapa. Ayæ, Mönitö oodeoidi weca gote apæneyömöni minitö wæætë oodeoidi inämaï inäni weca gote apænecæminimpa, ante godongämæ Ao änänitapa. ¹⁰Ayæ, Minitö nē ömaadäni inte wædäni inänite ante cöwë pönëninque waa cæcæminimpa, äninque mäninque ante wææ änänitapa. Mäninö nani äninö incæ botö cöwë pönëninque edæ nanguï cæinente wæbo intabopa.

Pegodo ingante Pabodo angä wæcampa

¹¹ Ayæ Pegodo Antioquiya iñömö pöningue wii nö cæcä adinque botö tömengä awinca waa adinque, Bitö pante wæquinque wënæ wënæ cæbi imipa, ämo wæcantapa. ¹² İmaï edæ Pegodo cæcä inongäimpa. Tæcæ Antioquiya pöningue tömengä oodeoidi inämaï inäni weca wæætë wæætë pö guiï pö guiï ongöningue godongämæ cænonngäimpa. Incæte Tantiago nänö da pönöninäni pönäni ate Pegodo iñömö edæ, Mönö ëö togængäimpa, ante nê änönäni piünäni wæcæ wæ, ante guiïñenongä inte edæ oodeoidi inämaï inäni weca ñöwo cænämaï inte edæ gomonga gote cænonngäimpa. ¹³ Mänömaï wadonque cædingä inte ñöwo wadonque cæyon-gante tömengä tönö oodeoidi tömänäni wadonque cædinäni inte edæ ñöwo wæætë wadonque cædänipa, ante adinque Bedënabee incæ oda cæte wapiticæ cæcantapa.

¹⁴ İninqe edæ Codito ingantedö ante watapæ mönö ëñënö nö pönï i incæte tömënäni nö cædämaï inte wapiticæ cædänipa, ante adinque botö tömänäni ayönäni edæ Pegodo ingante iïmaï ante ämo wæcantapa. “Bitö iñömö oodeobi inömi inte edæ oodeo inämaï inäni bai ñimpo cæte quëwëningue edæ wii oodeoidi nani wææ angainö ante ëñente quëwëmipa. Incæte bitö, Oodeo inämaï inäni incæ oodeoidi nani wææ angainö ante ëñente quëwencædänimpa, ante quimæ wææ änewëmii,” ämo wæcantapa.

Mönö pönënö beyænque mönö tömämö quëwëmompä

¹⁵ Oodeoidi inämaï inäni nani ëñënämaï quëwencabo bai inämaï imöni inte mönitö iñömö edæ oodeomöni nê ëñagaimöni imönipa. ¹⁶ Incæte edæ iïmaï ante do ëñëmönipa. İmaï cæedäni, ante Möitee wodi nänö wææ angainö ante ëñente cæcä beyænque waocä dicæ Wængongui ayongä edæ nö cæcä baquingää. Wæætë Itota Codito ingante wede nänö pönënö beyænque waocä nö cæcä bacampa, ante mönitö do ëñëmönipa. İninqe, Waocä æcämenque incæ mäninö Möitee wodi nänö wææ angainö ante tömengä nänö ëñente cædö beyænque edæ nö cæcä badämaï incæcäimpa, ante do ëñëmöni inte mönitö adobaï, Ædö cæte mäninö beyænque nö cæmöni baquimönii, ante ëñëmönipa. Wæætë, Codito ingante möni wede pönënö beyænque nö cæmöni bacæte ante mönitö adobaï tömengä ingante wede pönëmönipa.

¹⁷ İninqe mönitö oodeoidi imöni iñömö, Mönö Codito nempo quëwëningue Wængongui ayongä mönö nö cæmö bacäimpa, ante cæmönipa. Mänömainö ante cædinque mönitö nê wënæ wënæ cæmöni inte wæmöni incæte dicæ Codito angä beyæ wënæ wënæ cætamöniyaa. ¹⁸ Mäninö Möitee wodi nänö wææ angainö ante ëñente cæte quëwengäimpa, ante botö pönengainö ante do wido cægaboimpa. Mänömainö ante botö pönengainö ante nê wido cægaimo inte botö ædö cæte wæætë adodö ænte bai cædinque, Mäninö ante ëñente mönö quëwengäimpa, ante anguimoo. Mänömainö ante ämo inte bai botö Wængongui nänö wææ angainö ante edæ nê ëñënämaï imo bacædömoimpa. ¹⁹ Edæ, Wængongui nänö wææ angainö ante ædö cæte tömänö ante ëñente cæquimoo, ante botö wædö beyænque nê wæwocaimo bagaboimpa. İninqe botö nê wæwocagaimo inömo inte mänine ante ëñente cæcæte ante quinante wæquimoo. Wæætë edæ Wængongui beyænque ante botö quëwenguingue imopa.

²⁰ Mönö Codito ingante awäa timpodäni wëñongante botö tömengä tönö godongämæ wænte bai bagaboimpa. İninqe botö baonga ëñate quëwëmo incæte botö wii tömëmo quëwenguimämo ëwocate quëwëmopa. Wæætë Codito nänö

quëwenguimämo ëwocate quëwëmopa. Ìninqe adocä Codito Wængonguï Wengä botö imote waadete pönëninque nämä tömengä wepæ ante, Wængonguï qui, ante botö beyæ pædæ godongä adinque botö baö ëñate quëwëninque tömengä ingante wede pönëninque quëwëmopa. ²¹ Ìninqe, Ìimaï cædäni, ante Möitee wodi nänö wææ angainö ante ëñente cædinque mänömainö cæmö beyænque ñä mënongate nö entawëmö bamö bai mönö Codito önonque pöni wæncægacäimpa. Mänömaï beyæ Wængonguï nänö pönö waadete cægainö ante botö Ao ante ö æninque cöwë wido cædämaï imopa.

Mönö pönëno beyænque mönö quëwengäimpa, ante

3 Gadataidi önonque pöni mini cæcabo inömini inte ëñëedäni. Æcänö wadö ante apænecä ëñëninque minitö dowante bai önonque tedewëminipa. Ìñæmpa botö doyedë, Itota ingante æbänö awäa timpodäni wængacäi, ante botö edonque pöni odömonte apænëbo ëñëninque minitö önöwënenque ante bai do pönëminitapa. ² Adodeque ämo ate apænëmini ëñëmoedäni. Minitö Wængonguï Önöwoca ingante æbänö cæte æminii. Möitee wodi wææ nänö angainö ante ëñente mini cædö beyæ minitö tömengä ingante æminitawogaa. Wæætë edæ mönitö apænëmöni ëñëninque wede pönëmini inte æminitawo.

³ Ìñæmpa mimö ömædë imini inte ëñënämaï incædö. Minitö wëenëñedë mä pöni pönëninque Wængonguï Önöwoca tönö në cægäimini inte ñöwo wæætë edæ ömæwocamini inte bai edæ baonga ëñadinque nämanque cædinque iinque cæminii.

⁴ Wængonguï nanguï pöni pönö cæcä caate wædinque minitö önonque beyæ caate wæminitawo. Tömengä dicæ önonquedö ante cæcæte ante pönö cæcä wæminiyaa.

⁵ Wængonguï tömengä Önöwoca ingante da pönöninque minitö weca bamöngæ pöni cæcampa. Quinante mänömaï cæcää. Edæ, Möitee wodi nänö wææ angainö ante ëñente mini cædö beyæ ante dicæ cæcää. Wæætë mönitö apænëmöni mini ëñente pönëno beyæ Wængonguï tömengä Önöwoca ingante da pönöninque minitö weca bamöngæ pöni pönö cæcä æminipa.

⁶ Wængonguï apænecä ëñëninque Abadäo wodi, Nöingä ante apænecampa, ante wede pönengacäimpa. Ìninqe tömengä wede nänö pönëno beyænque Wængonguï, Botö ayömo Abadäo inömö në nö cæte quëwëngongä ingampa, angacäimpa, ante yewæmongatimpa. ⁷ Mänömainö ante adinque minitö iimaï ante ëñëedäni. Mönö në wede pönëmö inömö Abadäo wodi pæimö bai adomö imompa, ante ëñente pönëedäni. ⁸ Wængonguï, Oodeoidi inämaï inäni inca wede nani pönëno beyænque botö ayömo edæ në nö cæte quëwënanäni bacædänimpa, ante badoncæcäimpa, ante dodäni edonque adinque Wængonguï beyæ yewæmongadänimpa. Ayæ Abadäo wodi ingante apænëdinque tömengä, “Botö bitö imite pönö waa pöni cæbo æmi iinque bitö beyænque wadäni nani cabo wadäni nani cabo tömancabodäniya edæ watapæ quëwenguinänidö angüënë,” ante apænëgacäimpa. Mänömaï impa, ante yewæmöninque dodäni wëenëñedë pöni Wængonguï waa pöni nänö cæquinö ante yewæmongadänimpa. ⁹ Abadäo wodi cöwë ædæmö cæte pönengaingä inöngante Wængonguï pönö waa pöni cægacäimpa. Mönö në wede pönëmö inömonte tömengä adobai pönö waa pöni cæcä æninque mönö inömö edæ Abadäo wodi tönö godongämæ watapæ quëwëmö imönö angüënë.

¹⁰ Wæætë edæ, “Wææ ante botö yewæmongainta adinque æcänö tömänö ante dicæ cæcää tömengä inömö Wængonguï piinte angä wæwocaingä ingänö angüënë,”

ante Möitee wodi incæ do yewæmongacäimpa. Īninque Wængongui edæ nänö wææ angainö ante waodäni, Botö ëñente cædö beyænque quëwencæboimpa, ante nê anewënäni incæ wīi eyepæ ëñente cædäni ĩnönäni inte tömënäni tömänäni ĩnänite Wængongui piinte angä wæwocainäni ĩnänidö angüënë. ¹¹ Ayæ wacä Wængongui beyæ yewæmöninque, “Nê nö cæte quëwëngä incæ tömengä nänö wede pönënö beyænque quëwencæcäimpa,” angacäimpa. Īninque ĩmaï ante mönö edonque ëñengäimpa. Möitee wodi nänö wææ angainö ante ëñente cæte beyænque waocä dicæ Wængongui ayongä nê nö cæcä badinque quëwengüngä. ¹² Wængongui nänö wææ angainö ante ëñente quëwëngäimpa, ante nê cædönäni ĩñömö tömënäni dicæ nänö wede pönënö beyæ quëwëñaniyaa. Wæætë, “Mäninö ante nê ëñente cæcä ĩñömö tömengä nänö ëñente cædö beyænque quëwencæcäimpa,” ante Möitee wodi nänö yewæmonte angainö bai impa.

¹³ Ayæ adobai, “Æcänö ingante awäa wodoncædäni a ongöna tömengä ingante Wængongui piingä wæwocaingä ingänö angüënë,” ante Möitee wodi yewæmongacäimpa. Īninque Wængongui nänö wææ angainö ante wīi eyepæ ëñente cæmö beyæ mönö wæwocaimö inte wæyömonte mönö Codito ĩñömö, Abæ tawænte gote bai quëwencæminimpa, ante cædinque mönö beyæ wæætë wæwocaingä badinque edæ awäa wæninque a ongongacäimpa. ¹⁴ Abadäo wodi ingante Wængongui waa pönö cægacäimpa. Ayæ, minitö oodeoidi ĩnämäi ĩñöminite Itota Codito pönö cæcä beyænque Abadäo tönö godongämæ watapæ quëwencæminimpa, ante Wængongui adobai pönö waa cæcampa. Mänömaï bacäimpa, ante cædinque Codito tömämö ĩmonte, Minitö wede pönëninque botö Öñowoca ingante ænte ëwocacæminimpa, ante cædinque mönö ĩmonte æncæte ante nämä wepæ godonte ængä beyænque quëwëmompä.

Wængongui täno, Cæquimo, aninque ayæ ate wææ angacäimpa

¹⁵ Botö töninamini ëñeedäni. Botö, Waomö mönö cæi bai Wængongui mönö beyæ wodo adobai cæcampa, ante odömoncæte ante ĩmaï ante yewæmömo aedäni. Waoda, Mõna guëa cæcaya ĩmõnapa, ante Ao äna ate adocanque inte ædö cæte wadö ante cæquëngä. Ayæ, Mönö godömenque cæcäimpa, ante waocä adocanque inte ædö cæte edæ ante cæquëngä. Nõwo edæ ämo ëñeedäni. Wængongui, Mönö godongämæ cæcabo bacäimpa, ante botö pönö cæcæboimpa, angä ëñëninque mönö Ao ante cæquëñö ĩñömö edæ wodo adobai impa. ¹⁶ Mæmæ Abadäo wodi ingante apænedinque Wængongui, Bitö Pæingä ingante botö cöwë pönö waa cæcæboimpa, angacäimpa. Mänömaï äninque tömengä Abadäo wodi ingante, “Bitö pæinäni,” ante änamäi ingacäimpa. Wæætë, “Bitö Pæingä ingante pönö cæcæboimpa,” äninque Abadäo wodi Pæingä adocanque Codito ingante ante pönëninque angacäimpa.

¹⁷ Mänömainö ante apænedinque botö ĩmainö ante odömoncæte ante apænetabopa. Abadäo wodi ingante Wængongui, Botö pönö cæbo ate minitö Ao äminö ĩninque mönö godongämæ waa cæcäimpa, ante wëñëñedë cægacäimpa. Ayæ wantæpiyæ coatodo tiento todëinta wadepo go ate Möitee wodi ingante apænedinque adocä, ĩmaï cædäni, ante pönö wææ ängongäimpa. Īninque Wængongui wantæpiyæ ate wææ äninque do nänö angäine ante wëä godönämäi ingacäimpa. Edæ, Cöwë pönö cæcæboimpa, ante doyedë nê angaingä inte tömengä nõwo wææ äninque mänine ante dicæ wëä godongantawogaa. ¹⁸ Möitee wodi nänö wææ angainö ëñente cæmö beyænque mönö ængüëncöo do æmö bai

Wængongui, Cöwë pönö cæcæboimpa, ante önonque ancægacäimpa. Incæte Wængongui pönö waadete cædinque mäemæ Abadäo wodi ingante apænedinque, Cöwë pönömo æncæminimpa, ante nänö angainö bai cædinque do cægacäimpa.

¹⁹ Ìninque, Cöwë pönömo æedäni, ante nê angaingä inte Wængongui quïnante ñöwo wæætë, Ìimaï cæedäni, ante wææ angacäi. Ìnæmpa tömengä, Minitö botö änö ante ëñënamäi cædinque wënæ wënæ mïni cædinö edonque bacæäimpa, ante odömoncæte ante wææ angacäimpa. Mänömaï cædinque tömengä, Abadäo wodi Pæingä botö nê angaingä incæ tömengä nänö ponganca mïnitö ëñente cædinque quëwencæminimpa, ante wææ angacäimpa. Mänine nänö wææ angaine ëñente cæcædänimpa, ante Wængongui tömengä anquedoidi inänite da pönongä pöninque tömëñäni Möitee wodi ingante mämö odömönäni agacäimpa. Tömengä ññömö tæcæguedë ongonte bai nê anguingä badinque Wængongui nänö angaine ante idægoidi inänite wæætë angä ëñengadänimpa. ²⁰ Ñöwo apænebo ëñeedäni. Adocanque eyepæ cæcä adinque tömengä beyæ ancæte ante wacä tæcæguedë ongönämaï imaingampa. Wængongui ññömö, Cöwë pönö cæcæboimpa, nê angaingä inte adocanque incæ eyepæ cædongä ingampa.

Ìimaï cæedäni, ante quïnante angacäi, ante

²¹ Ìninque Wængongui, Cöwë pönö cæcæboimpa, ante nê angaingä inte wan-tæpiyæ ate, Ìimaï cæedäni, ante wææ äninque tömengä doyedë nänö angaine dicæ wëä godongantawogaa. Edæ tömengä mönö imonte apænedinque, Botö wææ angainö beyæ quëwencæminimpa, ante mänine pönongä ænte quëwëmö bai mänine beyænque edæ nê nö quëwëmö bacædömöimpa. Wæætë edæ wii mänömaï impa. Wængongui, Cöwë pönö cæcæboimpa, angä ëñëninque mönö quëwenguinque edæ nê nö cæmö bamompa. ²² Ìninque Wængongui, Cöwë pönömo æncædänimpa, ante nê angaingä inte ñmaï ante cæcampa. Botö angaincoo ante Itota Codito ingante nê pönëñäni inänite da pönömo ate tömëñäni wede nani pönëñö beyænque ænte ëwocacædänimpa, ante ñmaï cæcampa. Tömengä mönö inguipoga tömäo quëwëmö mönö wënæ wënæ cædimämo adinque mönö imonte pönö tee mönete bai cæcä ongömompa. Mänömaï pönö cæcä ongongaimö ññömönte Wængongui mönö wede pönencabo adomonque ññömönte tömengä nänö angaincoo ante pönongä ænte ëwocamompa. Wængongui, Mänömaï cæbopa, ante apænecä ëñëninque yewæmongadänimpa.

²³ Doyedë ññömö mönö, Möitee wodi nänö wææ angainö tömänö ante mönö ædö cæte eyepæ cæquii, ante tee mönete bai wægämöimpa. Edæ Itota Codito mönö nê wede pönëñongä edonque pöni nänö ponte a ongonganca mönö tee mönete bai wægämöimpa. ²⁴ Ìninque, Minitö Codito ingante wede pönëninque nê nö cæmini bacæminimpa, ante cædinque Wængongui Codito gämænö töö æmænte bai cædinque wææ angacäimpa. Mänömaï i ñninque tömengä nänö wææ angainö beyænque mönö wapiticæ godämaï inte Codito gämænö pongämöimpa. ²⁵ Ayæ ñöwo ññömö, Mönö nê wede pönëñongä do pongäimpa, ante adinque Wængongui ñöwo wæætë wææ änämaï ingampa.

²⁶ Minitö Itota Codito ingante wede pönëmïni inte tömämïni Wængongui wëñämïni iminipa. ²⁷ Edæ tömämïni mönö Codito tönö godongämæ guiite bai æpænë guiidinque tömengä nänö ëwocadö adodö ëwocadinque tömengä nempo quëwëminipa. ²⁸ Tömengä nempo adocabomö ññömö inte mönö adocanque ingant-

edö ante apænedinque, Oodeocä ingampa, ante änämaï ingæïmpa. Ayæ wacä ingantedö ante adobaï, Guidiego ingampa, ante änämaï ingæïmpa. Ayæ, Waocä nänö nê ö æningä inte awënë beyænque cæte nê quëwengä ingampa, ante mönö änämaï ingæïmpa. Wacä ingantedö ante, Abæ tawænte gocä ingampa, ante mönö änämaï ingæïmpa. Ayæ adocanque ingantedö ante, Onguiñængä ingampa, ante mönö änämaï ingæïmpa. Ìñæmpa Codito Itota nempo quëwëninque adocabomö imompa. ²⁹ Ayæ mïnitö ìñömö Codito nempo quëwëmïni inte mæmæ Abadäo wodi pæimïni bai imïnipa. Ìninqe Wængonguï nänö, Cöwë pönömo æncæmïnimpa, ante nänö angaincoo ante mïnitö nê ænguimïni imïnipa.

4 Mäninö ante yewæmöninque botö, Waodäni æbänö cædäni, ante odömöninque ìmaï ante apænecæte ante yewæmömopa. Wæmpocä wængä ate tömengä wengä ìñömö wæmpocä nänö ëadincoo nê ænguingä ingampa. Ìninqe wæmpocä ayæ mïingä quëwengäñedë mänincoo tömancoo do ænte bai tömengä wengä nê ëacä ingampa. Incæte tömengä wengä tömancoo nê ëacä incæ edæ tömengä wëñængäñedë guiquënë wæmpocä beyænque cæte nê quëwengä bai inongä ingampa. ² Ìninqe wæmpocä do äninque, Ìïönæ iinque bayonte botö wengä do picængä badinque nämä nê angä bacæcäïmpa, ante nänö angaiönæ iinque baganca nê aadäni inänite wæmpocä angä ëñëninque tömënäni wæætë wëñængä ingante wææ aadänipa. Ayæ, Wëñængä nänö manguincoo ante æbänö cæquiï, ante nê aadänique änäni ëñente wëñængä incæ cæcampa.

³ Mönö ìñömö doyedë mäningä wëñængä bai adobaï picæmö ìnämaï mönö ingäñedë inguipogaque näni wææ angainonque ante ëñente cægamöïmpa. Waocä beyænque cæte nê quëwengä bai mönö adobaï inguipogaque näni wææ angainonque ante ëñencæte ante cædinque mäninö beyænque cæte nê quëwëmö bai inte wægamöïmpa.

⁴ Incæte Mæmpo Wængonguï ìñömö, Ìïönæ da pönömo poncæcäïmpa, ante doyedë nänö angaiönæ iinque bayonte tömengä Wengä ingante da pönongä pongacäïmpa. Ìngä Wëñængä ingante onquiyængä mangä ëñadinque tömengä Wængonguï nänö wææ angainö ante nê ëñente cæquëngä nänö baquinque pægacäïmpa. ⁵ Ìninqe mönö Möitee wodi nänö wææ angainö beyæ tee mönete bai wæyömonte adocä Wængonguï Wengä incæ, Minitö abæ tawænte bai picæmïni badinque näwä wëmïni bate quëwencæmïnimpa, ante mönö imonte ængä beyænque mönö abæ tawænte bai quëwëmompa. ⁶ Mæmpo Wængonguï ìñömö, Minitö näwä wëmïni imïni beyæ, ante tömengä Wengä Önöwoca ingante mönonga da pönongantapa. Ìninqe tömengä Önöwoca ìñömö, “Mæmpo, botö Wæmpo,” ante nê apænecä inongä inte mönö mïmönë owodinque adodö ante mönö beyæ apænecampa. ⁷ Ìninqe bitö ìñömö bitö imite nê wææ angaingä beyænque idæwaa cæte quëwengäimï inte ñöwo abæ tawænte bai æmæwo pædimi inte näwä wëmi inömi imïpa. Ayæ näwä wëmi ìñömite Wængonguï pönö cæcä ate bitö tömengä nänö ëagaincoo ante nê ænguimï babipa.

Nê pönëmïni æbämë cæte quëwëmïni, ante wæcampa

⁸ Wængonguïidi ìnämaï ìñönänite wadäni ìñömö, Wængonguïidi inänipa, ante babæ apænedänipa. Minitö wëenëñedë Wængonguï ingante mïni adämaï ìñedë, Wængonguïidi, ante tömënäni babæ ante näni nê änönäni beyænque cæte nê quëwëmïni inte ñæ cæyænte bai wægamïnimpa. ⁹ Nöwo ìñömö mïnitö Wængonguï

ingante ate bai në pönëmini imini inte ædö cæte wapiticæ ante ëñëminii. Æ wadö ante godömenque ämo. Wængongui incæ minitö iminite do ate pönengaingä ingä incæte minitö ædö cæte inguipogaque quëwënäni nani önonquedö ante wææ angainö ante ëñente quëwëminii. Ìnæmpa, Mänine nani wææ angainö ante wæætë ëñengæimpa, äninque mini nã cæpote wæquinque ämini awædö. ¹⁰ Edæ Wængongui änämaï iñongante minitö mä pönëninque, Wængongui beyæ, ante mönö iïönæ cædämaï inte ongöninque ææmæ cæte becæimpa, änewëminipa. Ayæ, Ìi apäicä iñonte adobaï, iintedæ iñonte adobaï, iïnepo iñonte adobaï, Wængongui beyæ, ante mönö cædämaï inte ææmæ cæte becæimpa, ante önonque pöni ante cæminipa töö. ¹¹ Ìninque, Minitö ëñënämaï inte mini wæquinque cæminipa, ante adinque botö minitö beyæ ante guiñente wæbopa. Botö pönö nanguï cæbo incæte edæ önonque wabänö cægaboimpa, ante wæbopa.

¹² Botö tönñanamini ëñëdäni. Botö wëenënedë minitö bai Möitee wodi nänö wææ angainö në cæbo bai inte wæbo aminitawo. Wæætë botö në wææ angaingä ingante idæwaa ëñente cædinque abæ tawænte gobo bai minitö adobaï cæmini waa tobaimopa. Minitö dicæ botö imote wënæ wënæ cæminitawogaa. ¹³ Wëenënedë wënæ wënæ mänimo inte botö mänömaï beyæ minitö weca pöninque mönö Codito ingantedö ante watapæ apænedinque mä apænebo ëñëminitapa. ¹⁴ Ìninque mänömaï wënæ wënæ bate pömo ate wædimini incæte minitö guiñëñate wædämaï inte towæ tänongadämaï iminitapa. Wæætë edæ botö imote adinque minitö, Wængongui anquedo ingampa, ante pörente bai cædinque watapæ todinque, Pöe, äminitapa. Ayæ edæ, Itota Codito ingampa, ante pörente bai cædinque, Pöe, äminitapa. ¹⁵ Minitö mänñinedë watapæ mini todinö bai nöwo guiquënë quimæ todämaï iminii. Minitö mänñinedë edæ eyepæ inte bai nämä awinca o togæmöninque botö imo pönö mine timoncædöminipa, ante pönëninque apænebopa.

¹⁶ Ìnæmpa minitö iminite näwangä apænebo beyænque minitö nöwo wæætë botö imote piinte baminitawo. ¹⁷ Wadäni iñömö, Mönitö gämænö ponte ëñëedäni, ante nanguï cædäni iñömö minitö iminite wënæ wënæ cæcæte ante änewënanipa. Tömënäni iñömö, Pabodoidi inänite ëñënämaï inte minitö wæætë mönitö tönö godongämæ cædinque mönitö cæinënouque ante ämöni ëñëninque cæcæminipa, ante babæ cædänipa.

¹⁸ Wacä nänö cæinënö ante godongämæ cæmini cöwë waa imaimpa. Näwangä impa. Incæte tömengä nänö waa cæquënënonque ante cæcä adinque minitö, Mäninonque edæ cæcæimpa, ante nanguï cæquënëmini iminipa. Ayæ edæ botö minitö weca quëwëmoyedë cæmini bai minitö botö dæ ämo iñedë cöwë adobaï cæmini waa imaimpa. ¹⁹ Botö wëmini ëñëedäni. Yædëmadä inte nantate wædä bai botö iñömö wæætë nantate wædinque edæ, Minitö mimönë Codito ingante ædæmö entawencæminipa, ante nanguï pöni cædinque wæbopa. ²⁰ Edæ, Minitö æbämë cæminii, ante ëñënämaï imo inte botö minitö weca pöninque wiï gobæ tedete botö änö bai tededinque wæætë wadö bai tedecæte ante pöinente nanguï wæbopa.

Tada wodi tönö tömënä inante në cægaingä Agada

²¹ Minitö, Möitee wodi nänö wææ angainö ante mönö ëñengæimpa, ante në ämini inte apænëmini ëñëmoedäni. Minitö wææ ante tömengä nänö yewæmongainta incæ adämaï inte ëñënämaï iminitawo. ²² Ìimaï ante yewæmongatimpa. Abadäö wodi iñömö wëñäna onguñäna mënaa inate tapæigacäimpa. Adocanque guiquënë

nänöogængä beyænque në cæte quëwengä wëñængä iñongä wacä guiquënë näwä nänöogængä wëñængä ingacäimpa. ²³ Në cæte quëwengä wëñængä guiquënë cöwë mönö ëñadö bai adobai önonque ëñagacäimpa. Näwä nänöogængä wëñængä guiquënë Wængongui, Cöwë pönömo æncæbiimpa, ante nänö äñinö beyænque ëñagacäimpa.

²⁴ Wængongui iñömö, Botö pönö cæbo ate minitö Ao ämïni iñinque mönö godongämæ waa cæcäimpa, ante mempoga apænegacäimpa. Iñinque, Wængongui mënea nänö apænegainö æbänö inei, ante ëñencæte ante mönö mänina onquiyæna inate adinque pönengäimpa. Wængongui iñömö adopoque apænegacæte ante Tinaiquidi wæente ongöñinque wææ angacäimpa. Mänineque tömengä nänö wææ angäineque ante në ëñente cædäni iñömö Agada wodi wëñäni mänine beyænque në cæte quëwëñäni bai näni baquinque ëñadänipa. ²⁵ Mäningä Agada tömengä näni wencabo iñömö wacä ingante në cædönäni inte cæningä ñä cæyænte bai inte wægadänipa. Iñinque Adabiabæ ongonquidi Tinaiquidi ongöñinque Wængongui wææ angä ate mönö iñömö Agada bai wacä ingante në cæmö bagamöimpa. Edæ Agada wodi näni wencabo wacä beyænque në cæte quëwëñäni inte näni wægäinö bai ñöwo Eedotadëë quëwëñäni adobai wacä beyænque në cæte quëwëñäni bai inönäni inte wæwente quëwëñänipa. ²⁶ Eedotadëë inguipoga ongöñömö bai mönö öönädë æite Eedotadëë bai iñömö ongongäimpa. Mäniñömö Eedotadëë näni äñömö mönö badä Tada wodi bai impa. Tada iñömö wii wacä ingante në cæcä bai iñönante mönö tömënä wëmö bai imompa. ²⁷ Edæ iimai ante Wængongui beyæ yewæmongatimpa, “Bitö owæntabi ëñëmi. Wëñæ mänämai iñimi inte bitö, iñcayæ ate mancæboimpa, ante watapæ tocæbiimpa.

Bitö wëñæ nantadämai iñimi inte, Botö iñcayæ ate toquinque impa, ante yedæ ancæbiimpa.

Edæ nänöogængä ëmö cæte gocä ate adocanque inte wëñæ mänämai iñongante, Wængongui, Botö pönömo æncæbiimpa, angä ëñengä inte owæmpocä iñömö godömenque nangui wëñænäni inänite mäñongä nänöogængä ëacä guiquënë wëñænäni wædænque mancæcäimpa,” ante yewæmongatimpa.

²⁸ Botö tönïñamïni, ëñëedäni. Wængongui, Bitö wëñængä cöwë pönömo æncæbiimpa, ante nänö angäinö beyænque Itæca wodi ëñagacäimpa. Wængongui, Cöwë cæcæboimpa, ante minitö iminite adobai angä beyænque minitö mempoga ëñad-inque tömengä wëmïni bagamïnimpa. ²⁹ Mäniñedë iñömö Wængongui Öñöwoca beyænque ëñacä iñongante Itæca ingante önonque në ëñagaingä Itimædo guiquënë piinte cægacäimpa. Mänömai nänö piinte cægai bai inguipogaque quëwëñäni Wængongui wëñäni inänite ñöwo adobai cædänipa. ³⁰ Iñinque Wængongui æbänö angä ëñente yewæmongadäni. Iimai impa. “Näwä nänöogængä wëñængä mæmpocä ëad-incoo æñongä nänöogængä beyænque cæte në quëwengä wëñængä wæætë æñämai incæcäimpa. Iñinque në cæte quëwengä näna wencaya inate mönö wido cæcäimpa.” Ante yewæmongatimpa. ³¹ Iñinque botö tönïñamïni ëñëedäni. Mönö iñömö näwä nänöogængä wëñæmö bai inömö inte mönö nänöogængä beyænque në cæte quëwengä wëñæmö bai wii inömö imompa, ante ämo ëñëedäni.

Abæ tawænte bai mönö quëwëñö ante

5 Mönö iñe Möitee wodi nänö wææ angäinö ante ëñente në cæmö inte ñä cæyænte bai wæyömonte Codito, Abæ tawænte bai inte quëwencæmïnimpa,

ante pönö ö ænte ñimpo cæcä beyænque mönö abæ tawænte gote bai ee quëwëmö ïmompä. Ìninqe mìnito ïñömö në abæ tawænte gogaïmìni inte tæi ongöningue edæ wæætë mänine beyænque ñä cæyænte bai badämaï ïedäni.

² Ìñänäni, botö Pabodobo apænebo ëñenguënë quëwëmìni. Mìnito, Mönö ëö togæïmö inte quëwengæïmpä, ante cæmìni ïninqe ædö cæte Codito ængä beyænque quëwenguënëmìni. Ìñæmpä mänömaï cæmìni ïninqe Codito mìnito beyæ ædö cæte pönö cæquingää. ³ Bitö, Botö ëö togæïmo inte quëwencæboïmpä, ante cæbitawo. Edæ botö bitö ïmite ïmaï ante apænebo ëñëe. Bitö quëwencæte ante cædinque ëö togæïmi babi ïninqe Möitee wodi nänö wææ angäinö tömännö ante bitö ëñente cæte quëwenguënëmi babaïmipa töö. ⁴ Pancamìniya, Nö cæmö mönö baquinque Möitee wodi nänö wææ angäinö ante ëñente cæcæïmpä, ante ämìnitawo. Ìñæmpä mänömaï ante në ämìni inte mìnito mönö Codito ingante do pango cæte bai cæmìnipa töö. Edæ pango cæte nänënë goyöminite tömengä ædö cæte pönö waadete cæquingää. ⁵ Mönito guiquënë, Wængonguï ayongä mönö në nö entawëmö bacæmöïmpä, ante nanguï pönì æinente wänö cöñömönite Wængonguï Önowoca pönö apæneca ëñëningue mönito, Mönö në nö entawëmö badinque wat-apæ bacæïmpä, ante wede pönëmönipa. ⁶ Edæ Codito Itota nempo quëwëningue ëö togæïmö ïmö incæ bagæmö ïmö incæ tömämö adobaï önömonque ïnömö ïmompä. Wæætë edæ Codito ingante wede pönëningue në waadete pönëmö ïñömö mäninö mönö pönënë beyænque waa pönì entawëmompä.

⁷ Mìnito guiquënë wëñëñedë godongämæ pogodo gote bai nanguï cædinque waa cæmìnitapa. Edæ ñöwo guiquënë mìnito waa pönì pogodo gote bai cæyöminì æcämë wææ äna ëñënimìni inte wæætë Wængonguï nö ante nänö apænegäinö ante ëñënamäi cæmìnitawo. ⁸ Wængonguï mìnito ïmìnite në aa pegaingä inte tömengä ïñömö edæ, Ëñënamäi cæedäni, ante dicæ wææ angantawogaa. ⁹ Edæ, “Yedæ æmpocæïmpä, ante cædinque guiyä pönì da wente ate päö cæquïmo tömäo guipæñö päö yedæ æmpopa,” ante pönëningue ïmaï ante ëñengæïmpä. Adocanque wapiticæ wææ angä ëñëningue nanguï ïnäni wæætë oda cæte wæcædäniimpä. ¹⁰ Mönö Awënë nempo mönö quëwencabo ïmompä, ante pönëningue botö, Mìnito botö pönënë bai pönëmìni inte wïi wapiticæ ante pönenguïmìni ïmìnipa, ante pönëmopa. Wæætë edæ æcämenque mìnito ïmìnite wapiticæ ante wææ angää, ante adinque Wængonguï në apænte angä ingante cöwë godö pangä wæcæcäïmpä.

¹¹ Botö tönìnamìni ëñëedäni. Botö Itota awäa wængacäïmpä, ante apænebo ëñëningue, Ëö togæïmìni baedäni, ante në änäni ïñömö botö ïmote cöwë püininqe pänäni wæbo aedäni. Incæte botö tömënäni nänì änö bai, Ëö togæïmìni baedäni, ante ämo bai tömënäni botö ïmote wïi bæi ongöningue pancædönänimpä. Edæ mänömainö ämo bai tömënäni wæætë püinämäi ïnäni inte, Pabodo Itota nänö wængaiwæ ante apæneca awædö, ante tee tëwate bai oda cædämaï incædönänimpä. ¹² Mìnito ïmìnite në wapiticæ ante wææ änäni ïñömö nämä wido togænte bai cædinque nämä ta ñænte Codito ingante në pönëmìni weca pönämäi ïnäni inte waa ïmaïmpä, ante awædö.

¹³ Mìnito botö tönìnamìni abæ tawænte gote quëwencæmìnimpä, ante mönö Awënë mìnito ïmìnite apænte aa pegacäïmpä. Incæte mìnito, Abæ tawænte godimöni inte inguipogaque möni cæinënë ante godömenque cæcæmìnimpä, ante cædämaï ïedäni. Wæætë edæ wadäni ïnänite godö waadete pönëningue tömënäni beyæ ante cæedäni. ¹⁴ Edæ Itota, “Nämä bitö waadete pönënë bai pönëningue bitö

wacā ingante adobaī edæ waadete pönencæbiimpa,” angacäimpa. Īine adodeque ēñente cæmō ĩninqe Wængonguī nänō wææ angainō incæ tōmänō ante do nē cæmō edæ babaĩmompā. ¹⁵ Edæ babæidi bai nãemæ pocante bai cædinque nãemæ gãwãĩ cænte bai cæmĩni bai mĩnitō nãemæ wido cædinque wantæ biquēnēmĩnidō anguēnē, ante apa quēwēmĩni.

Mönō Wængonguī Ōnōwoca nempo quēwengãimpa, ante

¹⁶ Nōwo ämo ēñeedäni. Wængonguī Ōnōwoca ēwocadinque quēwēedäni. Mänō-maī quēwēninque mĩnitō inguipogaque mĩni cæinēwēnō ante wĩ ēñēninque nãmā beyænque ante cædãmaī inguĩmĩni ĩminipa. ¹⁷ Edæ inguipogaque mönō cæinēwēnō ante adinque Wængonguī Ōnōwoca ĩñōmō edæ Baa angampa. Ayæ wæætē æcãnō inguipogaque mönō cæinēwēnō ante cæte quēwēna tōmengã Wængonguī Ōnōwoca ingante nãemæ Baa angampa. ĩninqe mönō inguipogaque cæinēwēnō ante wæyōmō Wængonguī Ōnōwoca guiquēnē, Wadō cæedäni, angampa. Mänōmaī beyæ mĩnitō mĩmōnē wæatedō wæætē ante bai entawēmĩni inte mĩnitō nãmā mĩni änō ante ædō cæte cæquĩmĩni. ¹⁸ Incæte mĩnitō ĩmĩnite Wængonguī Ōnōwoca nōinō tōō æmænte mäocã gomĩni inte mĩnitō Mōĩtee wodi nänō wææ angainō ante do abæ tawænte gomĩni ĩminipa.

¹⁹ Inguipogaque mönō cæinēwēnō ante ēñēninque nē cædäni ĩñōmō æbãnō cædäni, ante edonque abaimpa. Edæ ĩmaī impa. Tömēnāni nänōogængã ĩnãmā ĩñongante do godō guëa towēnānipa. Wentamō pönēwēninque cædānipa. Ōnonque guĩñēnãdãmāĩ inte nãmā baonque pönēwēninque towēnānipa. ²⁰ Wængonguĩidi ĩnānipa, ante badōninque ædæ wæante waa adānipa. Idō bai yewæninque ōnonque tedewēnānipa. Piĩnte quēwēnānipa. Tiyænō tiyæ tedewēnānipa. Wacã godōmenque ængã ate wædinque piĩnte awēnānipa. Ænguī bawēnānipa. Nãmā waa tobote, ante änewēnānipa. Wæatedō wæætē äninque nãwæ godānipa. Wadō ante nāni cabo wadō ante nāni cabo badinque wæatedō wæætē cædānipa. ²¹ Wacã gomonga ængã ingante godō piĩnte adānipa. Tĩ nãmæ nanguī bedinque dowænte badānipa. Ayæ nanguī pōnĩ godōmenque bedinque nanguī pōnĩ cæninque guĩñēnãdãmāĩ inte towēnānipa. Ayæ godōmenque quĩēmē bai nē cæināni ĩnānipa. Mänōmaī cæte quēwēnāni ĩñōmō Wængonguī Awēnē Odeye nempo ædō cæte edæ guiquĩnāni, ante do botō äninō bai nōwo wæætē ämo ēñeedäni.

²² Wængonguī Ōnōwoca ingante ēñente nē cæmō guiquēnē mönō waincawæ incate bai ĩmaī cæmompā. Waadete pönēmompā. Watapæ tomompā. Gänē entawente pönēmompā. Ee cæte piĩnãmāĩ ĩmompā. Waadete cæmompā. Wadäni beyæ ante waa pōnĩ cæmompā. Wæntædãmāĩ inte cōwē cæmompā. ²³ Gänē pönēninque ædæmō cæmompā. Nãmā wææ äninque nō cæmō ĩmompā. Wængonguī Ōnōwoca ingante ēñēninque mänōmaī cæmō adinque Wængonguī mönō cædōnō ante wææ änãmāĩ ingampa. ²⁴ Mönō Codito quimō ĩñōmō inte mönō baō tōmengã tōnō awænēmæ timpote bai wængaĩmō ĩninqe inguipogaque mönō cæinēwengainō adobaī awæ timpote bai ĩñonte mönō abæ tawænte bai godimo inte baonque ante mönō cæinēwēnō ante ēñēnãmāĩ inte cæmompā. ²⁵ Edæ Wængonguī Ōnōwoca ængã beyænque quēwēmō inte mönō tōmengã Ōnōwoca tōnō guëa godongãmæ cægonte bai quēwengãimpa. ²⁶ Mänōmaī quēwēninque mönō nãmā waa adãmāĩ ingãimpa. Edæ wacã tōnō guëa wæatedō wæætē änãmāĩ ingãimpa. Wacã gomonga ængã ingante mönō godō piĩnte adãmāĩ ingãimpa.

Mönö wacä ingä wacä ingä iñacabo cæcäimpa, ante

6 Botö tönñamini eñeedäni. Wacä eñenāmaī cædinque oda cæte wæcantawo. Ìn-
 inque mīnitō Wængonguī Ònōwoca ingante mīni ewocacabo iñömō, Māningä
 nē oda cædingä inte Wængonguī taadonque adodō pō gocæcäimpa, ante cædinque
 tōmengä ingante ædæmō cædäni. Mänōmaī cædinque nē apæneçä guiquenē, Botö
 adobaī eñenāmaī cæinente wīī bacæboimpa, ante pönente wædinque nāmā wææ
 cædäni. ²Wacä teëmente mongænte baī entawengä ate wædinque mīnitō mönō
 Codito nänō, Ìmaī cæedäni, angainō eñente cædinque tōmengä nänō mongæncōo
 iñacabo mongænte baī cædinque waa cædäni.

³Æcänō ònonganque ina inte, Botö ñænæmo inōmo imopa, ante pönena, tōmengä
 iñömō nāmā babæ apænete baī oda cæte pönengampa. ⁴Ìn-
 inque adocanque nāmā nänō cæinō cōwä adinque adocanque nāmā nänō cæinō cōwä adinque tōmāmīni,
 Tömëmo æbänō cæboo, ante nāmā apænte angüenēmīni iminipa. Mänōmaī cæd-
 inque wacä nänō cæinō adāmaī inte waocä nāmā nänō cæinonque cōwä adinque
 apænte äninque, Tömëmo nō cæbo imopa, ante adinque tobaingampa. ⁵Edæ ado-
 canque nāmā nänō cæquënönō ante teëmente mongænte baī cædinque adocanque
 nāmā nänō cæquënönō ante teëmente mongænte baī cædinque tōmāmīni eyepæ
 cæbaiminipa.

⁶Ayæ Wængonguī nänō apænedō ante wacä apæneçä eñëninque nē eñengä iñömō
 tōmengä määncoo pancacooga waincooga æninque nē apæneçä ingante eyepæ pædæ
 godongä æncæcäimpa.

⁷Tömëmō tā bocate pæte incayō waocä wäänä adomō baī tā pete ængampa.
 Mänōmaī ingæimpa, ante nē angaingä inte Wængonguī iñæmpa oda cæcampa diyæ
 waocä wamō ænguingä. Ìn-
 inque, Waocä æbänō cæcää, ante adinque Wængonguī
 pönō cæcä ate waocä nänō cægäi baī adobaī ænte wæcæcäimpa. Åmo eñëninque
 mīnitō wīī wacä wapiticæ nänō apænedō beyæ oda cæquënēmīnidō angüenē. ⁸Edæ
 mīnte pædimō baī tā pete ængä baī cædinque imæcaque ante nāmā pönente nē
 cæcä guiquenē adobaī imæcaque nänō ñömænguinque æncæcäimpa. Wæætē Wæn-
 gonguī Ònōwocaque ante pönëninque nē cæcä guiquenē Wængonguī Ònōwoca pönō
 cæcä beyænque tōmengä nänō cōwë wænāmaī quëwenguinque æncæcäimpa. ⁹Ìn-
 inque mönō wæntæye badāmaī inte wadäni beyæ godömenque waa cæcäimpa.
 Ñimpo cædāmaī imō ininque edæ Wængonguī, Ìñedē æncæmīnimpā, ante nänō an-
 gäñedē iinque bayonte mäniñedē mönō edæ tā pete baī eyepæ pönī æmaimompa.
¹⁰Mänōmaī beyæ mönō eyepæ imō iñedē tōmānāni inānite mönō waa cæcäimpa.
 Ayæ wadäni nē wede pönëñāni iñönānite mönō, Adomō imompa, ante pönëninque
 tōmëñāni inānite godömenque nangui cædinque waa cæcäimpa.

Waa quëwencæmīnimpā, ante

¹¹Botö ònompoca yewæmōninque tōmëmo ñænæmōmo yewæmōmoī aedäni.
¹²Codito mönō beyæ awāa wængacäimpa, ante nē pönëñāni incæ pancadāniya,
 Mänine ante eñëninque oodeoidi piñāni wæcæ wæ, ante nāmā wææ cæcæte ante
 cædānimpā. Ìn-
 inque tōmëñāni, Eö togænte cæmōni ininque oodeoidi wæætē mönitō
 imōnite waa acædānimpā, ante cædinque mīnitō imīnite, Eö togæimīni bacæmīn-
 impā, änānimpā. ¹³Nē eö togæñāni incæ edæ Wængonguī nänō wææ angainō ante
 dicæ eñente cædāniyaa. Incæte tōmëñāni, Mōnitō änō baī mīnitō do eö togæimīni

bamini ate wadani mönitö imönite waa acædanimpa, ante cædinque minitö iminite, Eö togæimini baedäni, ante cædänipa.

¹⁴ Botö quiquënë quiëmenque ante, Waa aedäni, ante dicæ ämogaa. Ìñæmpa imæcaque ante botö cæinëmämo ante botö, Codito nänö wængaiwäa tente bai wæinëmämo impa, ante bai cædinque edæ mänimämo ante æmæwo wido cætabopa. Ayæ tömëmo adobaï Codito tönö äanque bai awäa wænte bai ingaïmo inte edæ imæcaque botö cæinënö ante cædämaï inömo imopa. Ìninqe, Mönö Awënë Itota Codito awäa wæninque mönö beyæ waa pönö pönö cægacäimpa, ante pönente wædinque botö mäniwænque tömengä nänö wængaiwænque ante waa ate apænedinque edæ wade ante cöwë waa ate tededämaï incæboimpa, ämopa. ¹⁵ Ìninqe eö togæimö incæ bagäamö incæ önonque pönö edæ impa. Edæ Itota Codito badongä beyænque mönö mïimö quëwëmompa. ¹⁶ Mänömainö ante pönente cæmini inöminite Wængonguï pönö waadete piyænë cæcä adinque minitö gänë pönente waa cæcæminimpa. Idægoidi iminipa, ante Wængonguï në nänö angaïmini incæ minitö mänömaï cæte quëwencæminimpa.

¹⁷ Botö Itota beyæ ante cæyömö wadani pänäni wædimö inte botö do baonga ämogate ee ëñabo inömotë ñowo iincayæ ate minitö tömämimi edæ ee amini quëwëmoedäni. ¹⁸ Botö töninämimi waa quëwencæminimpa, ämopa. Mönö Awënë Itota Codito pönö waadete apænecä ëñëninque minitö mimönë adobaï waadete entawencæminimpa. Mäninque ante yewämömopa, ante Amëë ämopa.

Epetoidi

inänite Pabodo nänö cadota ante yewæmongainta

Waa quëwencæminimpa, ante

1 Wængongui angä ëñëninque Itota Codito botö imote da godongä gogaïmo inte botö Pabodobo inömö inte yewæmömopa. Epeto inömö quëwëmini incæ minitö Wængongui quimïni inte Itota Codito nempo quëwëninque në ædæmö cæte pönëmini inöminite botö, Minitö acæminimpa, ante yewæmömopa. ²Mönö Mæmpo Wængongui tönö mönö Awënë Itota Codito piyänë cæte waadete pönö cæda ate minitö gänë pönëninque waa quëwencæminimpa, ante yewæmömopa.

Codito nempo quëwëninque mönö eyepæ ëwocamompa

³Mönö Awënë Itota Codito Wæmpocä inongante Itota inömö adocä ingant-edö ante, Botö Wængongui inongä ingampa, ante apænecäimpa. Inique mönö inömö Codito tönö do öönæde æite bai tömengä nempo quëwëñomonte adocä Itota Wængongui incæ tæiyæ waëmoncoo në ëwocagaingä inte pönö cæcä æninque mönö tömengä nänö ëwocadoncoo tömancoo bai adobai eyepæ pönï ænte ëwocamompa. Mänömaï cæcä adinque mönö tömengä ingante apænedinque, Bitö waa pönï cæbi æmönipa, ante watapæ apænecäimpa. ⁴Tömengä inömö edæ, Codito nempo quëwëninque minitö botö ayömo edæ tæiyæ waëmö ëwocamïni inte edæ wentamö mongænämaï incæminimpa, ante tömengä inguipoga nänö badönämaï inëde incæ mönö imonte pönö apænte ængacäimpa. Ayæ mönö imonte waadete pönëninque tömengä, ⁵Botö pæpogate bai æmo beyænque minitö inömö Itota Codito nempo quëwëninque botö wëmïni baquimïni incæminimpa, ante cædinque tocæboimpa, angacäimpa. Inique tömengä doyedë nänö angainö bai cædinque pönö angä ate mönö Wængongui wëmö cöwë baquënëmö ingamöimpa.

⁶Edæ nanguï waadete pönö cædinque tömengä nänö në Waadecä ingante da pönongä æmompä. Mänömaï beyæ mönö inömö tömengä ingante, Bitö ñäö apæite bai emönömi inte mänömaï waadete pönö cæbi æmönipa, ante watapæ apænecäimpa. ⁷Edæ tömengä nänö në Waadecä inömö mönö imonte æncæte ante nämä wepæ godonte ængä beyænque mönö abæ tawænte quëwëmompä. Ayæ adobai tömengä wepæ inte ñä mënongacä beyænque ëñënämaï mönö cædö ante Wængongui nanguï waadete pönö cædinque ñimpo cæcä quëwëmöimpa. ⁸Tömengä inömö edæ, Æbänö i, ante tömänö ante në ëñënogä inte, Æbänö cæquïi, ante edæ nöingä ëñëninque mönö beyæ ante godömenque nanguï pönö cæcä æmöimpa. ⁹Ayæ edæ, Codito tönö guëa cædinque nämä botö änö bai cæte tocæboimpa, ante Wængongui angacäimpa. Tömengä mänömainö ante nänö wëmö inömö angainö ante mönitö imönite ñöwo edonque pönï odömonte apænecä ëñëmönipa. ¹⁰Tömengä, inëde cæcæboimpa, æninque tömengä nänö angäinëde inique ba ate tömengä nänö angainö bai edæ inique cæcæcäimpa. Edæ öönæde ongoncoo tönö inguipoga ongoncoo tömancoo tæ gæte mämö adocanque nempo Codito Awënë nempo godömo æncæcäimpa, ante cæcampä.

¹¹ Nämä pönente nänö angainö bai tömänö ante adobai pönī nē cædongä inte Wængongui, İımaı cæcæboımpa, ante pönente ate cöwë cæcampa. İınıque tömengä, Codito nempo quëwëñäni inänite æncæboımpa, ante nänö pönente angainö bai cædinque, Minitö Codito nempo quëwenguımını incæminımpa, ante pönëninque mönitö imönite apænte ængacäımpa. ¹² Mönitö, Codito beyæ watapæ bacæımpa, ante täno pönëmöni inönönte tömengä, Botö nãö emönö ante watapæ apænemını bacæminımpa, ante mönitö imönite pönö apænte ængacäımpa.

¹³ Ayæ, Codito pönö ængä beyænque minitö quëwencæminımpa, ante Wængongui watapæ nänö apænëgainö ante eñente pönëninque minitö epeteomını adobai Codito nempo quëwëminı imınıpa. Wede pönëmını adınque Wængongui, Botö wëmını imınıpa, ante edonque acæımpa, ante odömoncæte ante tömengä emöwo ante mınıtonga yewæmonte bai cædinque tömengä Tæiyæ Waëmö Önöwoca ingante da pönongä ænte ewocaminıpa. ¹⁴ Edæ Wængongui, Botö quımını inöminı inte minitö abæ tawænte mını goyedë minitö ænguıncö mänıñedë ate eyepæ pönı æncæminımpa, angampa. Äınıque tömengä, Nö pönı impa, ante eñencæminımpa, ante cædinque tömengä Önöwoca ingante nöwo da pönongä ænte ewocamompa. İınıque pancacooga do ænte bai ewocamö inte mönö, İıncayæ ate mönö tömancö ænguıncö impa, ante edonque eñengæımpa. Tömengä mänömaı cæcä adınque mönö, Wængongui bitö godömenque nãö apäıte bai bitö emonguıncö mänömaı cæbıpa, ante watapæ apænecæımpa.

Nö eñänäni bacædänımpa, ante Pabodo apænecampa

¹⁵ Botö inönö, Epeteoidi mönö Awënë Itota ingante wede pönänäni inänıpa, ante tededäni eñentabopa. Ayæ adobai, Wængongui quınäni tömänäni inänite epeteoidi inönö waadete pönänäni inänıpa, ante eñënımo inte, ¹⁶ botö nımpo cædamäi inte Wængongui ingante cöwë waa ate pönëninque apænëbopa. Ayæ minitö beyæ ante cöwë apænëbopa. ¹⁷ Itota Codito mönö Awënë inongante Wængongui inönö adocä Codito Wængongui inongä ingampa. Ayæ nē Mæmpocä inongä inte tömengä nãö emönongä ingampa. Tömengä ingante apænëdinque botö, Bitö Önöwoca ingante da pönömi æınıque epeteoidi inönö nē eñänäni bacædänımpa, ante apænëbopa. Ayæ, Bitö Önöwoca pönö odömongä adınque epeteoidi wæætë Itota Codito ingante do ate bai ædæmö pönencædänımpa, ante botö minitö beyæ ante Wængongui ingante cöwë apænëbopa.

¹⁸ Wængongui pönö cæcä beyænque watapæ bacæımpa, ante minitö pönente tocæminımpa, ante cædinque Wængongui minitö imınite aa pegacäımpa. Ayæ adobai, Mönö tömengä quımö inte tæiyæ waëmö bayömonte tömengä nänö godömenque nãö emonguıncö mönö imonte ængacäımpa. Mänıne mënea edæ näwangä inepa, ante minitö eñencæminımpa, ante botö, Wængongui bitö tömënëni mımönë tica ënente bai odömonte apænëbi ate do eñencædänımpa, ante Wængongui ingante apænëbopa. ¹⁹ Mönö nē pönëmö inönönte Wængongui nänö pönö cæquınö ante tömengä nänö tæi pıñämämo æpodö İ, ante mönö ædö cæte tee mante aquiı. Incæte minitö, Mänımämo ante æpodö İ, ante epeteoidi eñencædänımpa, ante botö Wængongui ingante apænëbopa. Edæ, Tömengä nänö tæi pıñämämo inönö æbänö İ, ante eñencæte ante mönö, Tömengä gomonga tæi pıñænongä inte İımaı cægacäımpa, ante eñengæımpa.

²⁰Nē tæi piñænongā inte Wængongui angā ate mōnō Codito iñōmō do wæn-ingā inte edæ do ñāni òmæmongacäimpa. Ayæ godōmenque tæi piñæninque Codito ingante öönædē ænte mæidinque Wængongui tōmēmæ iñō angā Codito tæ contagacäimpa. ²¹Edæ æcāmenque pedænguipoga iñonte miinguipoga iñonte ñænængā inte nē angā inaa, æcāmenque nē awënë inaa, æcāmenque tæi piñænte on-gongā inaa, æcāmenque ingante, Awënë ingampa, ante godō pemōnāni mānināni tōmānāni öñōnānique incädänimpa. Mōnō Codito adocanque ingante ogæ æænonte bai cædinque Wængongui angā ate tōmengā wæætē Tæiyæ Awënë bacä acäimpa. ²²Ayæ Wængongui tōmāo iñōmō ongoncoo Codito öñōwaca iñō pōnō wææntodōn-ique edæ, Bitō edæ Tæiyæ Awënë iñōmi inte edæ æmonga pōni ongoncæbiimpa, angacäimpa. Ayæ, Bitō imite godongāmæ nē pōnēnāni tōmēnāni Ocamō bai iñōmite, ²³tōmēnāni wæætē bitō baō bai adoyonque bai incädänimpa. Codito ingante mänō-mainō ante apænedinque Wængongui, Bitō nē Awënë iñōmi inte tōmāo iñōmō ongoncoo tōmancoo bitō nempo ongoncooque bacäimpa. Ayæ bitō imite nē pōnēnāni iñōmō bacoo ināni yebænāni ininque bitō enempodō eyede pōni bacäimpa, ante Wængongui Codito ingante pōnō cægacäimpa.

Wængongui nānō waadete pōnēnō beyænque quëwēmō

2 Minitō guiquënë wēnēñedē ēñēnāmai cæte quëwēmīni inte wænæ wænæ mīni cædō beyæ dobæ edæ wæwocäimīni ingamīnimpa. ²Nē inguipogaque ante pōnēnāni taadō adodō cægonte bai mīnitō māniñedē edæ wænæ wænæ cæte quëwengamīnimpa. Ayæ wænæidi tæi piñænte nāni owocabo awēmō iñōmō nāni cægōnō adodō gote bai mīnitō tōmēnāni awënë miñæ tee empote godinque wænæ wænæ cægamīnimpa. Nōwo incæ Wængongui nānō änō ante nē ēñēnāmai cæte quëwēnāni guiquënë adocä wænæ awënë nānō pōnēwēnō ante ēñente ewocadinque cædanipa. ³Wēnēñedē tōmēnāni tōnō godongāmæ quëwēninque mōnō tōmāmō adobai imæcaque ante pōnēninque mōnō towēmāmoque ante quëwengamōimpa. Quiēmenque ante towencæte ante mōnō cæinēwēnō ante cædinque mōnō ocaidē ædēmenque pōnēninque mōnō cæinēwēnonque cæte quëwengamōimpa. Ininque wadāni nāni tente wæquēñēnō bai mōnō adobai imæcaque ante pōnente nē cæmō iñōmō inte edæ Wængongui nānō piinte panguēñēmāmo ante edæ do tente wæquēñēmō ingamōimpa.

⁴Mänōmai ingaimō iñōmonte Wængongui mōnō imonte nangui waadete pōnēn-ique iñāni nangui waadedongā inte pōnō waa cægacäimpa. ⁵Mōnō ēñēnā-mai cægainō beyæ ante wæwocate wæyōmonte tōmengā pōnō cæcä beyænque mōnō Codito tōnō godongāmæ quëwēmompa. Minitō edæ Wængongui nānō waadete pōnō cægainō beyænque quëwēmīni iminipa. ⁶Wængongui angā Codito ñāni òmæmōñongā mōnō tōmengā tōnō godongāmæ ñāni òmæmonte bai miimō badinque quëwengamōimpa. Ayæ mōnō tōmengā nempo quëwēmō iñōmonte Wængongui iñōmō Itota Codito ingante ææntodōninque mōnō imonte öönædē ææntodonte Itota tōnō pōnō gōnongā tæ contate bai ongōmompā. ⁷Mänōmai Itota Codito nempo quëwēñōmonte Wængongui iñōmō, Botō pōnō waadete cæd-inque godōmenque gomonga cæbo acädänimpa, ante cægacäimpa. Ayæ, Miinguipo badōmo ate botō māniñedē ate odōmōmo adinque tōmānāni, Wængongui nānō waadete pōnō cæganca wadāni dicæ adoganca cædāniyaa, ante wæcädänimpa, ante cæcæte ante mänōmai cægacäimpa.

⁸Edæ Wængongui nänö waadete pönö cægainö beyænque minitö mini quëwenguinque wede pönëmini baminitapa. Incæte minitö dicæ nämä mini cæinö beyænque nê wede pönëmini baminitawogaa. Wæætê edæ Wængongui pönongä æninquë minitö nê wede pönëmini baminitapa. ⁹Îninquë, Nâmanque cæte quëwëmo aedäni, ante mönö edæ ânämaï ingæïmpa. Înämpa wii mönö cædö beyæ quëwëmopa. ¹⁰Edæ Wængongui nänö nê badongaimö inömö imopa. Ayæ, Codito nempo nê quëwënäni îmaï cædinque waa cæcædäni, ante tömengä wëëñedê mönö cæquënêntö ante eyepæ badongacäïmpa. Îninquë mönö imonte badöninque tömengä, Codito Itota nempo quëwëninque minitö mini waa cæquënêntö ante edæ cæte quëwencæminimpa, ante pönö badongä bagamöïmpa.

Codito beyænque gancaë pönëmopa, ante

¹¹Mänömaï beyæ minitö, Doyedê îmaï ingatimpa, ante pönëedäni. Oodeoidi inömö önopoca æmontaique ëö togæinäni inte nämantage ante edæ, “Nê ëö togæimöni imönipa,” ante pemonte bai apënëdanipa. Wæætê minitö oodeomini inämaï nê ëñagaimini inöminite, “Bagäamini iminipææ,” ante mäninäni piïwënäni wægaminimpa. Îninquë minitö mäniñedê æbänö ingaimini inöminii, ante yewämömo ate pönëedäni. ¹²Mäniñedê edæ mönö Codito nempo quëwënämaï ingaimini inte minitö möni idægocabo nempo adobaï edæ quëwënämaï inte nänênê quëwengaminimpa. Îninquë Wængongui, Îmaï cöwê pönö cæcæboimpa, ante nänö angainö ante mönitö godongämæ Ao ante ëñente quëwëñömönite minitö wæætê gobæ nänênê quëwëninque Wængongui nänö angainö ante edæ ænämaï ingaminimpa. Watapæ bacæïmpa, ante mönitö pönênö ante minitö inömö nänênê quëwente ædö cæte watapæ pönente toquimiiii. Gobæ quëwëninque minitö Wængongui nempo edæ quëwënämaï ingaminimpa. ¹³Incæte minitö gobæ nê quëwënomini inöminite Itota Codito nämä wepæ godonte æninquë minitö iminite ænte mämongä eyequeï pöni pöninque minitö ñöwo tömengä nempo quëwëminipa.

¹⁴Wëëñedê mönitö tönö minitö guëadö guëa cædömö ingaimö inte mönö, Nänênê incæminimpa, ante wææ cæ impa tæcæguedê wææ gönonte bai cægamöïmpa. Codito inömö nê piyænê cædongä inte, Wææ cæ impa, mönö änopma bæ tate wido cæte bai cædinque mönö imonte äänömonque badongä bamöïmpa. Îninquë tömengä mimmönê nê piyænê cæte entawëñongä ingä beyænque mönö adobaï gänê pönëmopa. ¹⁵Edæ Wængongui, Îmaï cæedäni, ante wade wade ante nänö wææ angainö ante ëñëninque dodäni godömenque wææ angadäni. Mönö Codito inömö inguipoga pöninque mänine ante tömänö ante ëñente cæte quëwengacäïmpa. Ayæ, Idæwaa wææ ante impa, ante bai cædinque tömengä mänine ante nämä baonga mongænte wëñinque tee moncate bai cægacäïmpa.

Mänömaï cædinque tömengä, Minitö mencaboga inte nänênê quëwëmini incæte ñöwo piyænê cæte botö nempo godongämæ quëwencæminimpa, ante cædinque mönö imonte ænte wempo cægacäïmpa. Îninquë mönö edæ piyænê cæte quëwenguinque edæ äänömonque bagamöïmpa. ¹⁶Itota Codito ingante awäa timpodäni wængä ininquë tömengä mönö guëadö guëa piïnte cægaimämo ante ænte mongænte wido cæte bai wængä beyænque mönö piyænê cæmö bagamöïmpa. Ayæ ado tömengä awäa nänö wængainö beyænque mönö tömämö adocabomö bamö adinque Wængongui wæætê piyænê cædinque mönö imonte Ao äninque ængacäïmpa. ¹⁷Minitö guiquënê gobæ nänênê quëwëñömönite mönitö guiquënê Wængongui weca

eyequei quēwēñömönite Codito iñömö inguipoga pöninge mönö tōmāmö imonte apänedinque, Piyänē cæte gänē pönente quēwēedāni, ante pönö apä necä ēñenta-mompa. ¹⁸Tömengä nänö pönö cægäinö beyænque möni oodeocabo adobaï mīnitö wamīni adobaï mönö tōmāmö Wængonguï Önöwoca adowocaque ingante ewocamö inte mönö Wæmpocä weca tōmāmö do pōmompā.

¹⁹İnīnque mönitö Wængonguï quīmōni do bagai möni inte Wængonguï nempo quēwēmōni ingaimōni bai Codito nänö pönö cægäinö beyænque mīnitö adobaï mönitö tönö adocabomīni do badinque edæ Wængonguï nempo quēwēmīni imīnīpa. İnīnque mīnitö nōwo idæwaa wamīni ingamīnīpa. Wīi wabæca quēwente bai edæ tōmēmīni oncōnē ponte owote bai mīnitö nōwo Wængonguï nempo quēwēmīnīpa.

²⁰Woadāni dica tāno gönöninque tānooca wänömēnæca mænönāni bai Wængonguï adobaï cædinque Itota Codito ingante tāno gönongä ongönongante tōmengäa godö mænonte bai cædinque mönö imonte iūmaï cædinque pönö gönongä gongæ-mompa. Codito nänö nē da godongaimōni tönö tōmengä beyæ nē apänemōni tönö iñömönite Wængonguï mönitö imönite æninque wänömēnæca gönongä gongæñömönite wadāni inānite gä æänö tæi mænonte bai gönongä gongænānīpa.

²¹Codito nempo quēwēñömönite Wængonguï mönitö imönite adocooga gö cæte bai pönö tæi mænongä ate mönitö æicö bai bacö bai bamönīpa. Edæ Wængonguï Tæiyæ Waemö Önöwoca ingante aænque bai ewocadinque mönitö godongämæ Awenē tæiyæ waemö oncö bai bamönīpa. ²²Bayömönite mīnitö adobaï tōmengä nempo ongönömīnīte Wængonguï mīnitö imīnīte æninque mönitö tönö godongämæ māmö adocooga gö cæte tæi mænonte bai cædinque, Mīnitö botö Önöwoca tönö äawocaque bai ewocadinque botö owoquincö bai bamīnīpa, ante pönö badongacāimpa.

Oodeoidi ināmaï ināni inānite apä necæ gotabopa, ante

3 Māninö beyæ iūmaï ante apänebopa. Botö Pabodobo iñömö Codito beyæ ante oodeomīni ināmaï imīni imīnīte apä necæte ante cæyömote botö imote edæ tee mönedāni wädōmo inte yewæmōmopa.

²Mīnitö oodeomīni ināmaï imīni iñömö iūmaï ante wabänö ēñēmīnitawo. Wængonguï pönö angä ēñēninque botö mīnitö beyæ tōmengä nänö waadete cædönö ante nē apänequēnēmo batabopa. ³Māninö ante botö, Wængonguï awemö nänö cægäinö ante botö imote edonque odōmongä atabopa, ante do wædænque yewæmōmo amīnitawo. Edæ adodö ante nōwo yewæmōmopa. ⁴İnīnque mänōmainö ante botö do yewæmönīnta adinque mīnitö, Mönö Codito awemö nänö cægäinö ante Pabodo do ate bai ēñengampa, ante ēñēmaimīnīpa. ⁵Mōnitö wæmæidi nāni quēwēnedē nē quēwengāināni iñömö, Mönö Codito iūncayæ ate pöninge æbänö awemö cæquingäa, ante ēñēnāmaï inte wægadānīpa. Nōwo guiquēnē Codito beyæ nē apänedāni tönö mönitö tōmengä nänö nē da godönimōni tæiyæ waemö bamōni iñömönite Wængonguï Önöwoca māninö ante edonque odōmonte apä necä ēñēmönīpa.

⁶Iūmaï ante impa. Mönitö Wængonguï nänö pönonguincoo nē ænguimōni iñömönite mīnitö oodeoidi ināmaï imīni inte mönitö tönö adocabomīni badinque edæ mönitö tönö godongämæ nē ænguimīni adobaï bamīnīpa. Ayæ, Itota Codito tönö pönö cædinque Wængonguï nänö, Cōwē cæcæboimpa, ante angäinö

do cægacaimpa, ante watapæ pönëninque mīnitō mōnitō tōnō edæ godongāmæ quëwencæminimpa.

⁷ Wængonguī nē tæi pīñængā inte waadete pōnō nanguī cæcā adinque edæ tōmengā beyæ nē cæbo badinque botō Codito ingantedō ante nē watapæ apænebo batabopa. ⁸ Mōnō tōmāmō Wængonguī quīmō iñōmonte botō iñōmō wamīni bai wīi imopa. Botō adoboque wædāmo pōnī imo incæte Wængonguī waadete cædinque pōnō angā ëñëmo inte botō mīnitō imīnite nē apænebo batabopa. Codito nānō pōnō cægainō ante æpodō ī, ante mōnō ædō cæte tee mante ëñenguīi. Incæte Wængonguī waadete pōnō cæcā beyænque botō iñōmō Codito waa pōnī nānō pōnō cægainō ante edæ oodeo ināmaī imīni imīnite nē apænequënëmo batabopa. ⁹ Ayæ Wængonguī tōmancoo nē badongaingā inte wëëñëdë nāmanque entawëninque awëmō nānō wë wodongäinō ante botō imote odōmonte apænecantapa. Ayæ, Pabodo mäninō ante edonque odōmonte apænequënengā ingampa, ante tōmänāni ëñencædänimpa, ante pōnō apænecā æntabopa.

¹⁰ Codito ingante mōnō godongāmæ pōnencabo iñōmonte tōmengā wadō wadō ante tōmänō ante nē ëñengaingā inte mōnō tōnō godongāmæ cæcampa. Mōnō tōnō mänōmaī cædinque tōmengā, Botō wadō wadō ante tōmänō ante botō ëñengainō ante adinque oönædë quëwënāni awënëidi tōnō māniñōmō nē änāni tōnō wæcædänimpa, ante cægacäimpa. ¹¹ Wëëñëdë pedämāmō iñonte Wængonguī, Cæbo ate awënëidi incæ wæcædänimpa, ante cōwë pōnengacäimpa. Nōwo iñōmō tōmengā mäninō ante nānō pōnengainō ante tōmengā mōnō Awënë Itota Codito tōnō godongāmæ cædinque do cægacäimpa. ¹² Codito nempo nē quëwëmō inte mōnō tōmengā ingante wede mōnō pōnënō beyænque guiñënāmaī inte Wængonguī weca do pōninque apænemompa. ¹³ Mänōmaī impa, ante edæ mīnitō do ëñëmīnīpa. Ininque botō mīnitō beyæ ante cædinque botō caate wædō ante pōnëninque mīnitō wæætë wædāmaī iedāni. Wæætë, Mōnitō godōmenque nāō bai ëmoncæmōnimpā, ante Pabodo caate wæcampa, ante pōnëninque mīnitō wædāmaī incæmīnimpā ämopa.

Codito nānō pōnënō ante

¹⁴ Mäninō beyæ mōnō Awënë Itota Codito Wæmpocā iñongante botō tōmengā öñōwaca inō da guicapodinique apænebopa. ¹⁵ Tōmengā iñōmō edæ adocanque nāwā Wæmpocā ingampa. Ininque inguiipoga quëwëmō incæ oönædë quëwënāni incæ tōmengā ingante, Mæmpo, ante nē tedemō iñōmō mōnō tōmengā tōnō mōnō wæmpocabo bai imompa.

¹⁶ Ininque mōnō Wæmpocā ingante apænedinique botō mīnitō beyæ ante iūmaī ante apænebopa. Wængonguī bitō nē nāō bai entawëmi inōmi inte bitō Tæiyæ Waëmō Öñōwoca ingante epeteoidi inānite da pōnōmi æninque tōmënāni wæætë edæ mimō tæi pīñænte entawencædänimpa, ante apænebopa. ¹⁷ Ayæ, Mōnō Codito adobaī mīnitō weca pōñongante mīnitō mimōnë wede pōnëninque tōmengā ingante ædämō entawencæmīnimpā, ante mōnō Wæmpocā ingante apænebopa. Ayæ, Awæ ædämō guiwa inte tōmëmæ äwäate pæwæ bai cædinque mīnitō iñōmō adobaī tōmengā nānō waadete pōnëmāmō entawëninque edæ mimōnë tæi ongōmīni bacæmīnimpā. ¹⁸ Ayæ mōnitō Wængonguī quīmōni tōnō mīnitō adocabomīni inte tæi pīñämīni badinque, Itota Codito nānō waadete pōnënō ante ægancadō owoo, ante ëñencædänimpa, ämopa. Ayæ, Tōmengā nānō waadete pōnënō iñōmō edæ yepanca pōnī owopa, oopānō pōnī owopa, æibæ pōnī owopa, wincamō pōnī owopa, ante

ēñencädänimpa, ante apänebopa. ¹⁹ Ayä edæ, Mönö Codito waadete nänö pönënö æbänö gomonga pönī owoo, ante mönö ædö cæte ēñenguī, ante mönö wædö incæte mīnitö mäninö ante ēñencæminimpa. Ayä edæ, Mäninö ante ēñēmīni inte mīnitö Wængonguī nänö nanguī entawënö edæ eyepæ pönī entawencæminimpa, ante botö mönö Wæmpocä ingante apänebopa.

²⁰ Mönö änö ante ayä mönö pönënö ante eyepæ cædongä inte Wængonguī iñömö mönö imonte tæi piñante nänö cæpāmo ganca cædinque nanguī gomonga cæcä ingampa. Ininque nōwo iñömö mönö Wængonguī ingante waa ate pönente apäñecæimpa. ²¹ Edæ do wænte æigaināni tönö ayä ate ēñate quëwenguināni tönö mönö tömämö Codito ingante godongämæ mönö pönencabo inömö inte Itota Codito ingante ewocadinque mönö godongämæ apäñecæimpa. Mæmpo Wængonguī ēñēmi. Bitö adobique nāö emongaimi inömi imipa, ante mönö nimpö cædāmai inte cöwë waa ate apäñecæimpa. Mänömai impa, ante botö, Amëë, ämopa.

Codito nempo quëwëninque adocabomö imoppa

4 Waa cæte quëwencæminimpa, ante Wængonguī aa pecantapa, ante ēñēmīni inte mīnitö tömengä nänö änonque ante ēñente cædinque quëwencæminimpa. Botö mönö Awënë beyä tee mönete wæcömo incæ ämo ēñeedäni. ² Mīnitö nämä ængö cædāmai inte, Önömoque bai imopa, ante pönëninque wadäni inänite edæ ædæmö cædäni. Æiquedö waa cæquinānii, ante wædāmai inte edæ piyänë cæte quëwëedäni. Ayä wadäni mīnitö iminīte wënæ wënæ cædäni wædinque tömënanī inänite wæætë piināmai inte ædæmö waadete cædäni. ³ Mīnitö, Mönö pönencabo piyänë cædinque cöwë adodö ante pönente edæ Wængonguī Önöwoca tönö äanque bai ee ewocacæimpa, ante nanguī cædinque wacä ingä wacä ingä edæ waa cædäni.

⁴ Mönö Awënë pönö cæcä ate watapæ bacæimpa, ante mīnitö adodeque ante pönente tocæminimpa, ante Wængonguī mīnitö iminīte edæ adodeque ante aa pegacæimpa. Ininque mänine, Watapæ bacæimpa, ante mīni pönëne adodeque i bai Wængonguī Önöwoca edæ adobaī adowocaque inte quëwengampa. Tömengä adowocaque nempo quëwëñömö inte mönö adobaī edæ adocabomonque inömö imoppa. ⁵ Mönö Awënë edæ adocanque pönī inongä iñongante tömengä ingante mönö wede pönënö adobaī adodeque pönī inepa. Ayä adodö ante pönëninque æpänë guidinque mönö adopäñenque guite bai guitamoppa. ⁶ Wængonguī adocanque pönī inongä inte tömengä tömämö Wæmpocä adocanque ingampa. Tömengä iñömö edæ Tæiyä Awënë pönī inongä inte tömämö imonte nē aacä ingampa. Tömengä adocanque pönī nempo quëwëñömönte tömengä wæætë mönö tömämö mimönë quëwengampa.

⁷ Incæte mönö Codito, Mimönë bitö entawenganca ænte cæe, ante tee mante bai cædinque adocanque ingante waadete pönö cædinque wacä ingante waadete pönö cædinque edæ tömämö imonte tömengä nänö pönö cæcoo eyepæ pönongä äninque entawëmoppa. ⁸ Codito mänömai cæcæcæimpa, ante pönëninque awënë Dabii wodi iīmai ante yewæmongacæimpa.

“Tömengä æibæ æicæ cædinque wadäni inänite bæi ongonte nā cæyænte tömengä miñä ænte mäëicä æigadänimpa.

Ayä æidinque tömengä mönö waocabo iñömönte, Mīnitö entawenguinö, ante eyepæ pædæ pönongä ænte entawengamöimpa,”
ante Dabii nänö yewæmönöte angainö bai impa.

⁹Mänine, “Æigacäimpa,” ante nāni angaine iñömö quinate yewæmongatīi. Edæ, Tömengä inguipoga tadömengadæ do wææningä inte æigacäimpa, ante odömoncæte ante yewæmongatimpa. ¹⁰Në wæængaingä inongä iñömö adocä do öönædë gömonga æidique inguipoga tömäo öönædë tömäo tömäo iñömö edæ godömenque æibæ pöni quëwengä inongä ingampa. ¹¹Tömengä tömancoo në enemocä inongä inte adocä mönö waomö imonte pönö angä ænte entawëninque mönö iïmai cæmö bamöimpa. Pancamöniya imönite tömengä angä ëñëninque tömengä nänö në da godongaïmöni batamönipa. Pancamöniya guiquënë Wængonguï waa pöni nänö pönö cægainö ante në apænemöni batamönipa. Pancamöniya guiquënë Wængonguï beyä në apænemöni batamönipa. Pancadäniya guiquënë në aadäni badänitapa. Ayæ pancadäniya guiquënë në odömonte apænedäni badänitapa. ¹²Mänömai pönö cædinque mönö Codito mönö ocamö bai inongä inte, Botö baö bai adoyonque bai inäni iñömö ñancæ äate bai täi piñänäni ewocacädänimpa, ante pönö cægacäimpa. Mönö imonte tömengä, Minitö Wængonguï quimini inömini inte tömänäni inänite në cæmini inte godö cacæminimpa, ante pönö cægacäimpa.

¹³Mini wede pönëno ante minitö tömämini adoyömö ante pönencæminimpa, ante mönö Codito pönö cægacäimpa. Ayæ, Botö Wængonguï Wëmo iñömote minitö botö imote ate bai pönencæminimpa, ante tömengä pönö cæcampa. Ayæ æmæwo pæmini bai mini baquinque minitö botö entawënö ædæmö entawencæminimpa, ante Codito edæ da pönongä eyepæ æmompä. ¹⁴Ïniquë æmæwo pædimö inte wëñæmö inämai imö ïniquë mönö edæ oda cædämai ingäimpa. Wadäni guiquënë mä pönëninque, Æbänö cæmö ate oda cæquinänii, ante edæ nämæneque tedewënänipa. Tömënäni iñömö edæ babæ cæcæte ante cædinque waa cæte bai cædäni ataque-däni. Woboyæ ædæ go ædæ go pæmænte bai cædinque tömënäni wadö ante odömonte tedewënänipa. Mänömai wido piñænte bai cædäni incæte mönö iñömö Codito nänö entawënoncoo ænte entawëninque ää mænämai ingäimpa.

¹⁵Wæætë Wængonguï, Näwangä pöni impa, ante nänö apænegaïnö ante mönö tömänäni inänite waadete pönëninque apænecæimpa. Mänömai cædinque mönö Codito baö bai iñömönte tömengä në Ocamö bai inte pönö angä beyænque mönö ñancæ äadinque godömenque picæmö bamompä. ¹⁶Mönö baonga wepæ eyepæ ëñadinque ñancæ äadinque täi piñænte pæte quëwëmompä. Adobaï mönö Codito baö tönö adoyonque bai inömö inte mönö tömengä nänö apænedö ante ëñënömo inte ñancæ äate pæte bai quëwëmompä. Ayæ wæætë ocai encamö inte mönö pæ pagænguinque wangö tënämai oguincai bamë impa. Ayæ adobaï mönö Codito nänö waadete pönëno ante mimönë entawëmö inte mönö wacä ingä wacä ingä godö aamö inte mönö pönencabo incæ edæ täi piñænte entawëmompä.

Codito nempo mönö iïmai quëwëmompä, ante

¹⁷Ïniquë mönö Awënë nempo quëwënömo inte botö nö ämo ëñëedäni. Wadäni në ëñënämai inäni önonquedö ante pönëninque quëwënänipa. Minitö guiquënë adobaï quëwengaïmini inte ñöwo wæætë ñimpo cædinque mänömai cædämai inguënë quëwëminii. ¹⁸Tömënäni guiquënë mimö ënëänäniya diyæ Wængonguï weca ponguïnänii. Mimö ömædënäni inte tömënäni ocai ëñënämai badäni beyænque Wængonguï weca pönämai inänipa. Edæ wentamö mongæninque tömënäni ocai wëmö encadäni inte idiquibæ ante pönëänäniya. ¹⁹Ïnänäni iñömö tömënäni nani cæquënëno ante ñimpo cædinque ñöwo wæætë guïñënämai inte baö nani towëinënö

ante cæcæte ante nāmā pædæ godonte baī edæ cædānīpa. Edæ, Quiēmē wīwa cæquiī, ante mānīnonque cæcæte ante godōmenque cæinente wædānīpa.

²⁰ Wæætē mīnitō guiquēnē, Mōnō Codito æbānō ingāā, ante pōnēnīque edæ wīī tōmēnāni nāni cæinēwēnō baī mīni cæquinque edæ pōnēmīnitapa. ²¹ Tōmengā apænecā edæ wīī ēñēmīnitawo. Īnæmpa, Wængonguī nō pōnī nānō apænegaīnō ēñēnīque Itota ĩñōmō mīmōnē entawengampa, ante mīnitō tōmengā nempo quēwēñōmīnite tōmengā mǎnōmāinō ante adodō ante edæ do odōmonte apænecā ēñēmīnitapa. ²² Mīnitō wēēnēñedē mīni cæte quēwengāinō ante tōmengā ĩmaī ante odōmonte apænecāīmpa. Babæ pōnente mīni cæinente wæwēnō beyē mīnitō mīmōnē wentamō mongænte wæwēmīni inte do mīni entawengāinō ante edæ wido cæedāni, ante odōmonte apænecāīmpa. ²³ Edæ mempoga ēñagaīmīni inte mīnitō ēñēnō do mīī pōnī encamīni inte mīīnonque ante pōnencæmīnīmpa, ante odōmonte apænecā ēñēmīnitapa. ²⁴ Ayæ, Botō pōnō badōmo ate mīnitō botō baī tæiyæ waēmō ēwocadinque nō pōnī cæte quēwencæmīnīmpa, ante Wængonguī pōnō badongā ate mīnitō mīīmīni bagamīnīmpa. Īnīque tōmengā, Mānīnō Wængonguī nō pōnī nānō entawēnō ænīque mīnitō ædæmō entawencæmīnīmpa, ante odōmonte apænecā do ēñēmīnitapa.

²⁵ Mǎnōmaī beyæ mīnitō tōmāmīni, Mōnō adocabomō ĩmōmpa, ante adīnque babæ mīni tedewēnīnō ante nīmpo cædinque wacā ingante wacā ingante nāwangā ante apænēedāni.

²⁶ Ænguī bamīni incæte mīnitō piyænē cædinque wacā ingante wēnæ wēnæ cædāmaī ee aedāni. Edæ gāwadecæ ganca nanguī piīnīnque edæ mīni wæquinque ĩmaīmpa. ²⁷ Mǎnōmaī cædinque mīnitō, Wēnæ incæ pōnō cæcā ate botō ænguī batabopa, ante pōnente wædinque nōwo wæætē, Wēnæ botō weca pōnāmaī incæcāīmpa, ante nāmā wææ cæedāni.

²⁸ Nē awēmō æningā ĩñōmō nōwo edæ ee cædinque awēmō ænāmaī incæcāīmpa. Wæætē, Botō ōnompoca nanguī cædinque ænte quēwēnīnque nē ænguēñēnāni ĩnānite adobaī godōmo æncædānīmpa, ante cæcæcāīmpa.

²⁹ Mīnitō nāmā ōnōne wææ aadinque wīwa ante tededāmaī ĩedāni. Wæætē edæ, Wadāni æbānō ante ēñenguēñēnāni ĩnānīi, ante pōnēnīnque mīnitō, Tōmēnāni tæī piñænte entawencædānīmpa, ante cædinque nē ēñēnāni beyænque ante waadete godō cædinque apænēedāni. ³⁰ Wængonguī Tæiyæ Waēmō Ōnōwoca ĩñōmō mīnī-tonga pō guīdīnque, Botō æmo beyænque mīnitō ĩncayæ ate æmæwo abæ tawænte gote baī quēwencæmīnīmpa, ante odōmoncæte ante yewæmonte baī cægacāīmpa. Īnīnque mīnitō, Wēnæ wēnæ mōni cædō beyæ ante Wængonguī Ōnōwoca wæwente badāmaī incæcāīmpa, ante wææ cædinque edæ ēñente cæedāni.

³¹ Ayæ, Wīī waēmō awædō, ante mīni piūwēnīnō ante edæ nīmpo cæedāni. Āīmō ante mīni pōnēwēmāmo adobaī nīmpo cædinque ænguī pōnī mīni badīmāmo edæ nīmpo cæedāni. Yæ ante mīni piīnte ogæ tedewēmāmo, wacā ingante ante mīni piīnte tedewēmāmo edæ nīmpo cæedāni. Ayæ piīnte cæquinque ante mīni entawēnīnō ante tōmānō edæ wido cæedāni. ³² Wæætē godongāmæ waadete cædinque wacā caate wæcā adīnque mīnitō godongāmæ Ca ca wæcæmīnīmpa. Ayæ Codito ængā beyænque Wængonguī mīnitō ĩmīnite pōnō nīmpo cæcampa cæmīnīi. Tōmengā nīmpo cæcā quēwēmīni baī mīnitō adobaī cædinque wadāni wēnæ wēnæ cæyōnānite wacā ingā wacā ingā nīmpo cæmīni quēwēnānīi.

Wængonguī wēmīni, iīmaī cæte quēwēedāni, ante

5 Īnīnque Wængonguī wēmīni iīnōmō mīnitō tōmengā nānō nē waademīni iīnōmīni inte Wæmpocā nānō cæi bai ante cōwā adīnque adobaī cæedāni. ²Baō, Wængonguī quī, ante godōnīnque, Oguī wacæīmpa, ante iya tānāni bai cædīnque Codito mōnō īmonte waadete pōnēnīnque edæ adobaī cægacāīmpa. Tōmengā iīnōmō, Botō Wængonguī quīmo īmopa, ante nāmā wepæ pædæ godōnīnque mōnō īmonte wæætē ængacāīmpa. Īnīnque tōmengā nānō waadete pōnēnō bai mīnitō adobaī waadete pōnēnīnque quēwēedāni.

³Wæætē edæ mīni pōnencabo iīnōmīnīte waocā adocanque incæ nānōogængā iīnāmaī iīngante godō guēa mōnāmaī iēdāni. Wentamō mongæ wæcæ wæ, ante edæ wīwa cædāmaī iēdāni. Nanguī māīncoo ante æīnente wædāmaī iēdāni. Mānīnō tōmānō cædāmaī iīmīni inte mānīnō ante edæ adopoque incæ tededāmaī imæwedāni. Edæ Wængonguī quīmīni tæiyæ waēmō entawēmīni inte mīnitō mānīnō tōmānō cædāmaī incæmīnīmpa. ⁴Wentamō ante nāni pōnēwēnō bai mīnitō wæætē adobainō ante pōnēnāmaī iēdāni. Ōnonque ante nāni tedewēnō bai mīnitō wæætē adobaī tededāmaī iēdāni. Wēnæ wēnæ ante pōnente nāni badete towēnō bai mīnitō wæætē adobaī badete todāmaī iēdāni. Īñæmpa Wængonguī quīmīni iīnōmīni inte mīnitō mānīnō ante wīi pōnenguēnēmīni iīmīnīpa. Wæætē Wængonguī ingante waa ate pōnēnīnque apænequēnēmīni iīmīnīpa.

⁵Awēnē Odeye Wængonguī nempo ayæ Awēnē Odeye Codito nempo edæ ædānidō nē guīte ænguīnāni iīnānīi. Nānōogængā iīnāmaī iīngante nē towēnāni tōnō wentamō pōnente nē cædāni iīnōmō tōmēnāni edæ dicæ guīte ænguīnānīyaa. Ayæ māīncoo ante wacā quī nē æīnente wæwēnāni iīnōmō edæ, Māīncoo incæ mōnitō wængonguī impa, ante bai cædāni iīnōnāni inte tōmēnāni adobaī edæ guīte ænāmaī incædānīmpa. Ante āmo ēñēedāni. ⁶Wadāni, Mīnitō oda cæcæmīnīmpa, ante ōnonquedō ante tedete cæyōnānīte mīnitō wæætē tōmēnāni nāni tededō ante edæ ēñēnāmaī iēdāni. Edæ tōmēnāni ēñēnāmaī inte nāni wēnæ wēnæ cædō beyæ Wængonguī ænguī badīnque tōmēnāni iīnānīte pancæcāīmpa. ⁷Īnīnque mīnitō gooque gomō adīnque tōmēnāni tōnō godongāmæ cædāmaī iēdāni.

⁸Mīnitō iīnōmō wēēnēnedē wentamō mongæmīni ingaīmīni inte ñōwo wæætē edæ mōnō Awēnē nempo quēwēnīnque edæ ñāō bai entawēmīnīpa. Īnīnque Mæmpo nānō ñāō ēmōnō bai entawēmīni inte mīnitō ñāō iīnōmō cægonte bai edæ waa quēwēedāni. ⁹Edæ waiwæ waincate bai cædīnque mōnō wadāni iīnānīte godō waa cæquinque mōnō edæ ñāō iīnōmō quēwēmōmpa. Ayæ nō pōnī mōnō cæquinque nāwangā pōnī ante mōnō apænequinque edæ ñāō iīnōmō quēwēmōmpa. ¹⁰Ayæ, Æbānō cæmō ate mōnō Awēnē, Waa cæmīni abopa, ante apænequīngā, ante ēñencæte ante cædīnque do ēñēnīmi inte tōmengā nānō waa adonque cæedāni. ¹¹Wadāni wēmo iīnōmō ōnonque nāni cædō ante adīnque mīnitō iīnōmō edæ gooque gomō aedāni. Ayæ tīca ēnente bai cædīnque, Tōmēnāni nāni cædō wēnæ wēnæ impa, ante edonque odōmōmīni acædānīmpa. ¹²Awēmō nāni cædō beyæ guīngo imonte wæquēnēnāni iīnōnāni mōnō iīnōmō edæ guīñēnete wædīnque mānīnō ante edæ tededāmaī ingæīmpa. ¹³Wæætē edæ, Awēmō iīnōmō æbānō cædānīi, ante tōmānō ante edæ tīca ēnente edonque acæīmpa. ¹⁴Ñāō beyænque edæ edonque amōmpa. Mānōmaī ī beyæ iīmaī ante āmotamīni ante bai apænedānīpa. “Bitō wangæ mōīmi inte ñāni ōmæmonte ængæ gantie.

Edæ ængæ gantiyömite

Codito incæ pönö tica ënente bai cæcä ate ñäö entawencæbiimpa,” ante apænedänipa.

¹⁵ Mänömai beyæ minitö ocäi ömæcamini inämai inömini inte wæætë ocäi në encamini inte cædinque, Æbänö waa cæte quëwenguimo, ante nämä waa ate waa cæedäni. ¹⁶ Wadäni ñöwo incæ godömenque wiwa cædänipa cæminii. Eyepæ iñonte mïni cæquënenonque ante edæ do cæedäni. ¹⁷ Edæ wëñænäni owempote cædäni bai minitö adobai cædämai iedäni. Wæætë, Wængongui æbänö angantawo, ante ëñëninque mäninonque ante ëñente cæedäni. ¹⁸ Waodäni biinömæ nani ämæ bedinque dowænte badinque godömenque pönënamai cædinque tömëñäni nani ewente wæwenguinque bewëñänipa. Ininque minitö iñömö bete dowænte badämai iedäni. Wæætë Wængongui Önöwoca ingante ædæmö ewocate quëwëedäni. ¹⁹ Ämotamini ante bai godongämæ watapæ ante tedeedäni. Awënë Dabii wodi nänö ämotamini angaintaa adinque edæ adodö æedäni. Ayæ minitö nämä mä pönëninque, iïmai Wængongui beyæ mönö ämotamini angæimpa, ante adodö æedäni. Wængongui Önöwoca angä ëñente ewocadinque tömengä ämotamini nänö änönö ante adodö æedäni. Mimöno ämotamini ante bai pönëninque minitö mönö Awënë ingante watapæ pöñente æedäni. ²⁰ Æbämë bayonte minitö tömänö beyæ ante edæ Mæmpo Wængongui ingante cöwë waa ate pönëninque mönö Awënë Codito emöwo ante apæneedäni.

Mæmpoidi nani wencabo iïmai quëwencædänimpa

²¹ Mönö Codito ingante guñente wædinque minitö wi nämä mïni pönënonque bai cædinque wæætë edæ, Në änäni æbänö änänii, ante Ao ate nöinö ante cæedäni.

²² Onquiyæmïni ëñeedäni. Minitö, Mönö Awënë nänö angainö bai mönö ëñente cæcæimpa, ante tömëmïni nänöogænäni inänite Ao ante ëñente cæedäni. ²³ Edæ Codito ingante mönö godongämæ pönencabo iñömonte mönö Codito adocä iñömö, Quëwencæminimpa, ante në Ængaingä inongä ingampa. Tömengä tönö mönö adoyonque bai iñömonte tömengä iñömö mönö Ocamö bai inongä ingampa. Ayæ onquiyængä tönö onguiñængä adobai adoyonque bai iñöñate onguiñængä iñömö në ocamö bai inongä ingampa. ²⁴ Ininque Codito ingante mönö godongämæ pönencabo incæ tömengä ingante Ao ante ëñente cæmö bai onquiyænäni adobai tömëñäni nänöogænäni inänite cöwë edæ Ao ante ëñente cæquëñänäni inänipa.

²⁵ Wæætë onguiñæmïni ëñeedäni. Minitö Codito nänö waadete pönëno bai tömëmïni nänöogænäni inänite adobai waadete pönëedäni. Tömengä ingante mönö godongämæ pönencabo iñömonte tömengä iñömö mönö imonte waadete pönëninque mönö imonte æncæte ante pönö cædinque nämä wepæ godongacäimpa. ²⁶ Ayæ, Wængongui nänö apænedö waëmömæ imæ bai iñöñonte minitö iñömö mäninö ante ëñëninque tæiyæ waëmö ewocate quëwencæminimpa, ante mönö Codito adocä mönö imonte edæ ñä mënongate bai cægacäimpa. ²⁷ Mänömai tæiyæ waëmö badinque mönö wentamö mongænämai inte Codito ingante mönö pönencabo adocabomö iñömonte tömengä iñömö edæ nänöogængä ænte bai cædinque mönö pönencabo imonte, Bitö, ante apænegacäimpa. Ayæ mönö cabo iñömonte tömengä, Bitö idiquibæ entawëñämai iñömite ædö cæte bitö imite piunte anguii, ante pönö cægacäimpa. Ayæ wæætë edæ, Nä mënongate bai tæiyæ waëmö emömi ininque mönö edæ guëa ñäö apäite bai emongæimpa, ante Codito nänöogængä ænte bai mönö imonte pönö ængacäimpa.

²⁸ Onguiñænani iñömö adobaï tömënani, Botö baö, ante nani pönë bai tömënani nänöogænani inänite adobaï waadete edæ pönenguëñænani inänipa. Æcänö tömengä nänöogængä ingante waadete pönëna iñömö tömengä nämä baö ante waadete pönente bai edæ cæcampa. ²⁹ Ìñæmpa waocä nämä baö cöwë piinämaï ingampa. Wæætë, Botö baö, ante edæ pæ gompodique pönö aacampa. Ayæ adobaï Codito ingante mönö godongämæ pönencabo iñömonte edæ tömengä adobaï, Botö baö, ante bai cædinqe mönö imonte wææ gompodique pönö aacampa. ³⁰ Edæ mönö Codito në Ocamö bai inongä inte në angä iñongante mönö wæætë tömengä tönö adoyonque bai inte ëñente quëwëmompa. ³¹ “Mänömaï beyæ onguiñængä mæmpo tönö badä inate ëmö cæte godinque onquiyængä ingante, Botö nänöogængä, ante æmæwo monte quëwencæcäimpa. Mënaa inina incæ tömëna wæætë nana gæncaya badinque adocanque bai bacædaimpa,” ante yewæmongatimpa.

³² Mänömainö ante nani yewæmongainö ante edæ wë wodonte bai i iñonte wii tömänö ante ëñëmompa. Incæte, Codito ingante mönö godongämæ pönencabo iñömonte mönö tömengä tönö adocanque bai imöimpa, ante minitö ëñencæminimpa, ante botö apænëtabopa. ³³ Incæte onguiñæmi nämä bitö waadete pönënonganca tömëmi nänöogængä ingante edæ adoganca waadete pönencæbiimpa. Onquiyæmi adobaï, Botö nänöogængä ingampa, ante adinque edæ ëñente cæcæbiimpa.

6 Wëñæmini guiquënë ëñëedäni. Minitö mönö Awënë nempo quëwënömini inte tömëmini mæmpoidi inänite edæ ædæmö ëñente cæedäni. Æcänö edæ mänömaï cædaa tömengä edæ nö pönï cæcampa. ² “Wæmpocä ingante wäänä inante waa adinque tömëna inate godö waadete cæe,” ante Wængongui incæ wææ angacäimpa. Tömengä wade nänö wææ angainö äninque, Mini waa quëwenguinque cæcæminimpa, ante apænëdämaï ingaingä inte nõwo iine ante wææ äninque, Mini waa quëwenguinque cæcæminimpa, ante mä apænëgacäimpa. ³ Edæ iine ante wææ äninque tömengä, “Mänömaï cæmini ininque minitö watapæ quëwëninque iimæca wantæpiyæ quëwencæminimpa,” ante mä apænëgacäimpa.

⁴ Wæmpomini guiquënë ëñëedäni. Minitö wënäni wii äinäni bacædanimpa, ante wææ cædinqe minitö tömënani inänite piinte cædämaï iedäni. Wæætë, Mönö Awënë wææ aadinque mönö imonte päninque odömonte apænëcampa, ante adinque minitö tömengä nänö cæi bai adobaï cædinqe wëñænani inänite ædæmö wææ aadinque mönö Awënë nänö apænëdö ante odömonte apænëmini ate tömënani waa pæcædanimpa.

⁵ Waodäni minitö iminite ö ænani inte tömënani beyænque cæte në quëwëmini iñöminite apænëbo ëñëedäni. Iimæca minitö awënëidi inänite minitö waa adinque guiñente wædinqe tömënani nani änö ante ëñente cæedäni. Minitö Codito angä ëñente mimönë nö pönente cæminitawo. Ìninque edæ iimæca awënë angä ëñente edæ adobaï mimönë nö pönente cæedäni. ⁶ Minitö edæ, Awënë botö imote waa acæcäimpa, ante tömengä ayongante ëñente cæminitawo. Ìñæmpa awënë dæ goyongante adobaï cöwë ëñente cæedäni. Codito botö imote në godonte Ængaingä ingante në cæte quëwëmö imompa, ante pönëninque minitö edæ Wængongui nänö äñönö ante mimönoque pönente cæedäni.

⁷ Minitö mimöno piyænë cædinqe iimäi ante pönente cæedäni. Iimæca awënë ingante cædinqe botö wii waocä beyænque ante cæbopa. Wæætë Wængongui Awënë beyænque ante botö iimæca awënë ingante cæbopa, ante pönëninque pæ piñænte bai cæedäni. ⁸ Minitö iimäi ante edæ do ëñëminipa. Minitö wacä nänö ö æñimini

inte tömengä beyænque në cæte quëwëmini incæ abæ tawænte ee gote bai nämä beyænque cæte quëwëmini incæ minitö iminite mönö Awënë iñömö, Bitö ægancadó waa cæbii, ante adinque wæætë eyepæ pönï pædæ pönongä ænguimini iminipa.

⁹Wacä ingante në ö æmini guiquënë ëñeedäni. Mini në ö ængainäni inänite adobaï waa cæedäni. Tömëmini Awënë incæ tömënäni Awënë adocä inongä inte öönädë owocampa cæminii. Tömengä iñömö wacä ingante wadö wacä ingante wadö ate pönente cædämaï ingampa. Mänömainö ante do ëñëmini inte minitö beyænque cæte në quëwënäni inänite edæ pünte äninque edæ pæmënënamäï iedäni.

Täinta wëñate bai mönö täi piñænte ëwocacäimpa

¹⁰Ñowo iïmaï yewæmöninque botö idæwaa yewæmömopa. Minitö mönö Awënë nempo në quëwënömini iñöminite tömengä nänö täi piñænö pædæ pönongä æninque täi piñænte entawente quëwëedäni. ¹¹Minitö wææ caaquincoo, ante Wængonguï eyepæ pönï nänö da pönönincoo tömancoo æninque wëñate bai cædinque täi ongöedäni. Edæ mänincoo tömancoo wëñate ongöñömini wënæ awënë, Oda cæcæminimpa, ante nanguï ëñente cæcä incæte minitö wæætë oda cædämaï inte edæ täi ongoncæminimpa.

¹²Edæ wii waodäni inänite mönö guëadó guëa cæcäimpa. Wæætë wënæidi awënëidi tönö wënæidi inänite në änäni iñönänite mönö tömënäni inänite wæætë guëadó guëa cæcäimpa. Inguipoga wëmö iñömö täi piñænte ënempodäni tönö öönädë iñömö wënæcoo në wiwa ëwocate cædäni tönö mänimpodäni mämö ti gotodoncæ cæyönänite mönö wæætë guëadó guëa cæcäimpa. ¹³Ïninque tömënäni piïnte mämö näni wiwa cæönæ iinque bayonte mönö wodii winönämaï inte tömënäni inänite wæætë da godongäimpa. Ante ayæ, Tömää edæ eyepæ cæte ate mönö edæ tæ go wæænämaï inte adiyæ ongongäimpa, ante cædinque minitö Wængonguï nänö, Wææ caaquincoo, ante täinta bai nänö da pönönincoo edæ do eyepæ æninque tömancoo edæ da wëñaedäni.

¹⁴Wëñadinque edæ wodii winönämaï inte edæ næ gongænte täi ongöedäni. Edæ, Täi wææ caaquincoo, ante pönö täi pacadeyænte bai cædinque minitö Wængonguï nänö nö pönënö entawëninque adobaï nö entawente quëwëedäni. Tæcætawë inö tæineta mini wææ wodontawëinta ante wëñate bai cædinque Wængonguï tæiyæ waëmö nänö cædö ante edæ entawente täi cæte ongöedäni. ¹⁵Mönö Codito pönö cæcä beyænque mönö godongämæ piyænë cæcäimpa, ante watapæ mönö ëñënö beyæ pogodo gote apænecæte ante cædinque minitö awæncata täi wææ cæwainta wëwate bai cædinque gänë pönente cæedäni.

¹⁶Yabæque pönï wææ cæquinta täinta bai næænte bai cædinque mini wede pönënö ædæmö entawëninque quëwëedäni. Ïninque në wiwa cædongä ponte gonga encado bai to piyæncate bai cædinque, Minitö oda cæcæminimpa, ante cæcä ate minitö mini wede pönënö beyænque tömengä wiwa nänö änö ante edæ ëñënamäï incæminimpa. ¹⁷Ayæ, Ocamö incainta täinta bai impa, ante wææ wencate bai cædinque minitö Codito pönö ængä beyænque mini quëwenguinö ante ænte entawencæminimpa. Minitö yaëmë wææ næænte bai cædinque Wængonguï Önöwoca apænecä ëñëninque näni yewæmongainta ate ædæmö ëñëninque edæ cöwë entawëedäni.

¹⁸Ayæ Wængonguï Önöwoca ingante ëwocadinque minitö tömengä ingante, Wængonguï bitö cöwë cæcæbiimpa, ante godömenque nanguï apænedinque ñine

cædāmaī iedāni. Mānōmaī cæcæte ante mīnitō mīimīni ongōnīnque wæntæte badāmaī inte Wængonguī quīnāni tōmānāni beyæ ante cōwē apæneedāni. ¹⁹ Ayæ botō beyæ ante adobaī apænemīni ēñēnīnque Wængonguī pōnō cæcā ate botō edonque tedecæboīmpa, āmopa. Edæ Codito ingantedō ante wēēnēñedē mōnō ēñēnāmaī ingaīne ante botō ñōwo watapæ ēñēnīnque guīñēnedāmaī inte apænebo ēñencædānīmpa, āmopa. Mānōmaīnō ante mīnitō Wængonguī ingante apæneedāni, āmopa. ²⁰ Mānīne ante botō wadāni weca nē gote apænebo beyænque ñōwo gæguīncamē encaīpobo inte wæbopa. Īnīnque, Mānīne ante nē apænequēnengā inte Pabodo cōwē guīñēnedāmaī inte apænecæcāīmpa, ante mīnitō botō beyæ ante apæneedāni.

Waa quēwencæmīnīmpa, ante

²¹ Botō Pabodo ĩñōmō æbānō quēwēmoo, ante, Quīnō baī cæboo, ante ēñencæte ante wæmīnitawo. Edæ Tiquico mōnō tōnīñacā mōnō nē waadecā ĩnongā inte tōmengā ñōwo pōnīnque mīnitō ĩmīnite mānīnō tōmānō ante apænecā ēñencæmīnīmpa. Tōmengā ĩñōmō mōnō Awēnē nempo quēwēnīnque tōmengā beyæ nē cædongā inte cōwē nē pōnengā inte ædæmō cæcā acæīmpa. ²² Īnīnque, Pabodoidi æbānō quēwēnānīi, ante tōmengā pōnō apænecā ēñēnīnque mīnitō wampo pōnēnīnque tæī piñænte entawencæmīnīmpa. Ante cædīnque botō, Ædæmō apænebi ēñencædānīmpa, ante tōmengā ingante mīnitō weca da godōmo pongā aedāni.

²³ Mæmpo Wængonguī tōnō mōnō Awēnē Itota Codito mīnitō ĩmīnite waadete pōnō cæda ate mīnitō mīni caipæ incæ gānē entawēnīnque wede pōnēnīnque godongāmæ edæ waadete pōnencæmīnīmpa, āmopa. ²⁴ Æcānō mōnō Awēnē Itota Codito ingante cōwē waadete pōnente ñīmpo cædāmaī ĩna ĩñōmō tōmengā ingante Wængonguī pōnō waadete cæcæcāīmpa, ante botō Wængonguī ingante apænebopa. Mānīnque ante yewæmōmopa.

Pidipenteidi

inänite Pabodo nänö cadota ante yewæmongainta

Waa quëwëedäni, ante

1 Itota Codito ingante në cæmõna inte botõ tönõ Tímoteo guëa apænemõna in-
inque botõ Pabodobo adoboque yewæmõmopa. Minitõ Pidipoto inõmõ quëwën-
inque Wængonguï quimìni inõmìni inte Itota Codito nempo në quëwëmìni inõmìnite
botõ, Acæmìnimpa, ante yewæmõmopa. Mìni pønencabo beyænque ante pan-
camìniya në aamìni inõmìnite pancamìniya guiquënë në cæmìni inõmìnite pan-
camìniya guiquënë önõmìnique inõmìnite botõ edæ, Tömämìni edæ acæmìnimpa,
ante yewæmõmopa. ²Mönõ Mæmpo Wængonguï mönõ Awënë Itota Codito tönõ
waadete pönõ cæda ate gänë pönëninque waa quëwëedäni, ämopa.

Në pönëmìni beyæ Wængonguï ingante apænebopa, ante

³Æyedemë mìnito imìnite ante pönëmo inte botõ Wængonguï ingante waa ate
pönëninque apænebopa. ⁴Ininque mìnito beyæ ante Wængonguï ingante wantæ
inõ wantæ inõ apænedinque botõ, Waa quëwëmìnipa, ante watapæ todinque
apænebopa. ⁵Edæ, Botõ täno goyedë mìnito godongämæ cæmìnitapa. Ayæ, Mönõ
Codito ingantedõ ante mìnito nõwo ganca godõmenque watapæ apænemìnipa,
ante pönëninque botõ, Wængonguï bitõ pönõ cæbi ate pidipenteidi waa cædånipa,
ante apænebopa. ⁶Mìnito botõ ayõmo tæiyæ waemõ entawencæmìnimpa, ante në
mä badongaingä inongä inte Wængonguï nõwo Itota Codito nänõ ponguinganca
godõmenque pönõ badõninque cõwë iinque badongä ate mìnito ædæmõ pæimìni
bacæmìnimpa. Mänõmaï impa, ante botõ, Næwangä impa, ante do ënëmopa.

⁷Mönõ Codito ingantedõ ante watapæ möni ënëninõ ante botõ wææ än-
inque, Næwangä impa, ante apænebopa. Mänine botõ apæneede beyænque pan-
cayedëña botõ imote tee mönedäni wæbopa. Incæte tee mönedäni wæbo incæ,
Næwangä impa, ante wææ ämo incæ Wængonguï nänõ waadete pönõ cægainõ
ante ænte entawëñõmo mìnito adobaï mäninõ ante æninque botõ tönõ godongämæ
entawëmìnipa. Ininque, Mönõ mäninõ ante åanque baï entawëmõ imompa, ante
mìnito imìnite waadete pönëninque botõ, Mìnito ædæmõ pæimìni bacæmìnimpa,
ante nõingä cæte pönëmopa. ⁸Itota Codito mönõ imonte nanguï waadete pöneng-
gantawo. Edæ tömengä waadete nänõ pönënõ ante entawëninque botõ mìnito
imìnite waadete pönëmopa, ante adinque Wængonguï incæ, Pabodo næwangä
mìnito imìnite nanguï waadete pönengampa, ante apænebaingampa.

⁹Ininque mìnito beyæ ante botõ Wængonguï ingante iïmaï ante apænebopa. Mìni
waadete pønencabo inõmìnite Wængonguï pönõ cæcä ate godõmenque waadete pøn-
encæmìnimpa. Ayæ waadete pönëmìni inte mìnito, Quinõ wënæ wënæ i, Quinõ
waa i, ante edonque adinque nõ apænte ämìni bacæmìnimpa. ¹⁰Mönõ æbänõ cæte
waa quëwenguiï, ante edonque adinque mìnito Ao ante waa quëwëninque Itota
Codito nänõ ponguinganca wentamõ mongænåmaï inte tee tewardåmaï imìni in-
cæmìnimpa. ¹¹Ayæ Itota Codito pönõ cæcä ate mìnito nõ cædinque waa quëwëmìni
adinque wadäni Wængonguï ingante waa ate pönëninque apænecædånimpa, ante

botō Wængonguī ingante apænebopa. Ayæ mīnitō mǎnōmaī inte waa cæmīni ad-
inque tōmǎnāni wæætē Wængonguī ingante apænedinque, Wængonguī ēñēmi. Bitō
ñāō baī ēmōnōmi inte waa pōni cæbipa, ante apænecedānimpa, ante cædinque botō
mīnitō beyæ ante Wængonguī ingante apænebopa.

Pabodo, Codito beyænque quēwēmopa, angampa

¹² Īñānāni apænebo ēñēedāni. Mǎnōmaī cædāni botō wædō incæ wīi ōnonque
cætimpa. Wæætē, Codito beyænque Pabodo caate wæcampa, ante adinque wadāni
godōmenque nanguī ināni Codito ingantedō ante watapæ mōni apænedō ēñēninque
wede pōnēnāni badānipa. ¹³ Edæ, Codito ēmōwo apæneceā beyænque Pabodo in-
gante tee mōnedānipa, ante tededāni ēñēninque odōmāno tæiyæ awēnē oncō wææ
wǎnōnāni incæ wadāni wayōmō quēwēnāni incæ tōmǎnāni do ēñēnānipa. ¹⁴ Mōnō
Awēnē nempo quēwēnāni incæ, Pabodo tee mōnete wæcampa, ante wædinque
wodo tōmǎnāni godōmenque wede pōnente badānipa. Īninque wede pōnēninque
tæi pīñante entawēninque tōmēnāni guīñēnāmaī inte Wængonguī nānō apænedō
ante godōmenque apænedānipa.

¹⁵ Pancadāniya, Pabodo miñæ godōmenque nanguī ināni godānipa, ante pōnō
pīinte adinque Codito ēmōwo ante apænedāni incæte botō imote guēadō guēa
pīincæte ante apænedānipa. Mǎnōmaī i incæte wadāni guiquēnē, Pabodo tōnō mōnō
godongāmæ cæcæimpa, ante gānē pōnēninque Codito ēmōwo ante apænedānipa.
¹⁶ Nē gānē pōnente apænedāni guiquēnē, Codito ingantedō ante watapæ mīni
ēñēnīnō ante Pabodo wææ ancæcæimpa, ante botō imote godō gō cæcampa, ante
do ēñēnānipa. Īninque tōmēnāni botō imote waadete pōnēninque apænedānipa.
¹⁷ Nē wæatedō wæætē tededāni guiquēnē, Pabodo tee mōnete wæyongante mōnō
apænete tomō wæcā tocæi, ante cædānipa. Tōmēnāni nāmā beyænque ante
cædāni incæte waa cæte baī cædinque Codito ēmōwo ante apænedānipa. ¹⁸ In-
cæte pancadāniya nāmā beyænque ante apænedāni incæ pancadāniya nō pōnente
apænedāni incæ mǎnīnāni tōmǎnāni Codito nānō cægāinō ante nāwangā ante do
edæ apænedānipa. Mǎnōmaī impa, ante pōnēninque botō watapæ tobopa.

Ayæ iīmaī ante pōnēninque cōwē godōmenque nanguī tocæboimpa. ¹⁹ Mīnitō
Wængonguī ingante botō beyæ nanguī apænemīni ēñēninque Itota Codito Ōnōwoca
pōnō cæcæcæimpa, ante ēñente tobopa. Īninque ñōwo botō caate wædō ante edæ iin-
cayæ ate ñimpo cædāni ate edæ botō abæ tawænte gote quēwenguinque edæ impa,
ante do ēñēninque tobopa. ²⁰ Botō wēñēñedē botō cæbo baī ñōwo adobaī cæinēmo
imopa. Īntai ēñate mīimō quēwēmo incæ baonque wǎnōnāni wæmo incæ, Mōnō
Codito ingante waa acædānimpa, ante cædinque botō cōwē guīñēnāmaī inte tæi
ongōninque nanguī cædinque watapæ edæ bacæboimpa, ante pōnēmopa. ²¹ Edæ in-
guipoga quēwēmo incæ botō Codito ingante entawēninque tōmengā beyænque ante
quēwēmopa. Wæætē wæmo incæ tōmengā beyæ botō godōmenque nanguī entawen-
guīmo imopa.

²² Incæte, Waiwæ nanguī incate baī botō cæquinque inguipoga ayæ quēwen-
guēnēmo imopa, ante pōnēninque botō, Æbānō anguīmoo, ante ēñencæte
ante wæbopa. Edæ, Wæncæboimpa, ante anguēnēmo imoo. Wæætē, Ayæ
quēwencæboimpa, ante anguēnēmo imoo. Edæ, Æbānō anguēnēmo imoo, ante botō
edæ ēñēnāmaī imopa. ²³ Edæ wada bæi ongonte æmatæ tōō æmatæ tōō godōna
wæcā baī wædōmo inte botō, Ædōnō gāmānō goquīmoo, ante wæbopa. Codito

weca godömenque waëmö pönī quëwencæboimpa, ante botö wadæ goinëmo ïmopa. ²⁴Incæte inguipoga quëwëninque mīnitö beyænque ante cæquënëmo inte botö ædö cæte wayömö goquïmoo. ²⁵Ante pönente wædinque botö, Mīnitö mönö pönënö ante godömenque wede pönëninque watapæ tote quëwencæmīnimpa, ante cæquïmo ïmopa, ante ëñëmopa. Ayæ, Nöwo wænāmaï inte botö mīnitö weca quëwenguïmo ïmopa, ante do ëñëmopa. ²⁶Ïnque botö mīmo inte mīnitö weca pömo adinque mīnitö Itota Codito ingante waa adinque botö beyænque nanguï tocæmīnimpa.

²⁷Codito ingantedö ante watapæ mönö ëñëninö beyæ ante mönö waa cæquënëmö ïmopa, ante ëñëmīni inte mīnitö edæ waa cæte quëwëedäni. Mänömaï cæmīni ïnque botö önömoncaque ëñëmo incæ mīnitö weca ponte abo incæ, Pidipenteidi adoyömö pönëninque tæï ongönänipa, ante tededäni ëñëninque tobaïmopa. Ayæ, Codito ingantedö ante watapæ mönö ëñëninö ante wadäni ëñencædänimpa, ante pidipenteidi ïñacabo cædinque nanguï cædänipa, ante botö edæ ëñente tobaïmopa. ²⁸Ayæ piinte cædäni incæte mīnitö wæætë guïñënāmaï inte tæï ongöminipa, ante adinque botö tobaïmopa. Mīnitö mänömaï guïñënāmaï inte tæï ongöminī ate wædinque nē piinte änäni wæætë, Mönitö wænguinque impa, ante wæcædänimpa. Nē pönëmīni mīni quëwenguinque impa, ante adinque tömënäni godömenque wæcædänimpa. Edæ Wængonguï ængä beyænque quëwencæmīnimpa.

²⁹Wængonguï waadete pönö cæcä ate mīnitö Codito ingante wede pönëmīnitawo. Edæ adocä pönö cæcä ate mīnitö Codito beyænque cædinque cöwë caate wæquimīni ïmīnipa. ³⁰Pabodobo doyedë Codito beyæ ante wææ ancæte ante caate wætabopa, ante amīnitawo. Nöwo godömenque wææ cædinque caate wæbopa, ante önömoncaque ëñëmīnitawo. Ïnque botö wææ äninque caate wæbo baï mīnitö adobaï botö tönö godongämæ wææ äninque caate wæmīni ïmīnipa.

Codito önonganque bayongante Wængonguï da æænongä

2 Mönö Codito nempo quëwëninque mīnitö wampo pönëmīnitawo. Tömengä waadete pönengä beyænque gancæ pönëmīnitawo. Mönö Codito Önöwoca tönö ääwocaque baï ëwocadinque godongämæ watapæ quëwëmīnitawo. Nē wæcä ingante godö waadete pönëmīnitawo. Adocanque wæwengä adinque mīnitö äanque baï wæwëninque tömengä beyæ cæmīnitawo. ²Mänömaï ï ïnque adodonque pönëninque mīnitö waa waademīni adinque botö watapæ pönī tobaïmopa. Tömämīni äanque baï ëwocadinque, Mönö adoyömö cæcæïmpa, ante godongämæ cæmīni adinque botö godömenque nanguï watapæ tobaïmopa. ³Ïnque mīnitö nämanque ante pönëninque, Botö ïmote waa acædänimpa, ante cædāmaï iedäni. Yæcado ongoncæboimpa, ante cædāmaï iedäni. Wæætë, Botö önömoque baï ïñö-mote wadäni wæætë waa pönī inänipa, ante pönëninque wadänique inänite ængö cæedäni. ⁴Nämä mīni cæinënö ante cædinque mīnitö wīi mäniinonque ante cædinque wæætë edæ wadäni näni cæinënö adobaï ante cæedäni.

⁵Mänömaï cædinque mīnitö Itota Codito nänö pönengainö baï adodö ante pönëedäni.

⁶Tömengä ïñömö cöwë näwä Wængonguï ïnongä ingampa. Incæte, Botö näwä Wængonguïmo ingaïmo inte

Mæmpo Wængonguï ganca botö ingainö ante ñimpo cædāmaï incæboimpa, ante tömengä änāmaï ingacäimpa.

⁷ Wæætē edæ, Māninō botō ingainō incæ botō edæ ñimpo cæcæboimpa, āninquē wææ,

önonganque bai bagacäimpa.

Ayæ, Wængongui ingante nē cædōmo edæ bacæboimpa, ante badinque wææ, tömengä waomō mönō emönō bai nänō emonguinque waocä eñagacäimpa.

⁸ Mänömai eñate pæte wææ tömengä önonganque inte bai cæyongä Wæmpocä, Bitō wænguinō taadō gocæbiimpa, angä eñëninque edæ Ao ante goyongante wææ, tömengä nänō guñëñaquinque awæ ñænquedimæ cæte mao timpodäni wææ tiwadäni ate tömengä caate wægöninque wææ bacaa edæ wængacäimpa.

⁹ Mänömai cæcä adinque Wængongui wæætē tömengä ingante æmonga pönī da ææñongacäimpa.

Ayæ wadäni emöwo önöwoque emönäni bai tömengä Tæiyæ Awënë ñongä inte wii adobaï önöwoque bai emoncæcäimpa, ante cædinque Wængongui edæ, Itota Codito ingampa, ante pönō pemongacäimpa.

¹⁰ Edæ öönædē quëwënäni incæ inguipoga quëwënäni incæ guimonga quëwënäni incæ

tömänäni edæ Itota emöwo eñente waa adinque

da guicapocädänimpa, ante Wængongui tömengä ingante pönō pemongacäimpa.

¹¹ Ayæ, Itota Codito ingante adinque tömänäni,

Mönō Tæiyæ Awënë ñongä ingampa, ante edæ Ao ancädänimpa, ante Wæmpocä cægacäimpa.

Mänömai cæcä adinque, Mæmpo Wængongui waa pönī cæcampa, ante mönō edæ watapæ apænecäimpa.

Nëmoncoo äo äo cædote bai nöinō cæte quëwëedäni

¹² Mänömai beyæ botō nē waademini iñöminite botō apænebo eñëedäni. Minitō weca botō quëwënedē minitō do eñente cædimini inte ñöwo botō wayömō quëwëmo incæ godömenque eñente cæmini abopa. Ñinque cöwë mini eñente cædinō bai adobaï cædinque ñöwo mönō watapæ quëwënguñō taadonque gocæte ante cædinque, Oda cæte wæcæ wæ, ante cöwä aquënë quëwëminii. ¹³ Wii cæinente awædō, ante wæminitawo. Edæ Wængonguinque apænecä eñente entawëninque minitō tömengä waa pönī nänō äno ante nē eñente cæinëmini bamnipa. Oda cæte awædō, ante wæminitawo. Adocä Wængonguinque mongæcadæ mongæcadæ cæcä ate tæi piñæmini bate ate eyepæ cæminipa.

¹⁴ Ñinque, Wii cæinente awædō, ante änämai inte minitō piyänë cæte mini cæquënëno ante do cædäni. ¹⁵ Edæ mänömai cæmini adinque wadäni, Wentamō mongänämai iminipa, ante abainäni. Ayæ inguipogaque quëwënäni eñënamai inte idiquibæ pönente cæyönäni minitō wæætē Wængongui wëñæmini inömini inte tömënäni weca quëwëninque nëmoncoo äo äo cædote bai nöingä cæte quëwencæminimpa. ¹⁶ Edæ, Codito pönō cæcä beyænque mönō quëwengäimpa, ante edonque apænëmini eñencädänimpa. Ñinque, Doyedē botō apænedō ante minitō nē eñente cæminipa, ante adinque botō nangui todinque iïmai ante pönëmpo. Minitō beyæ pæ pagænte cædōmo incæte botō wii önönque cæboimpa. Wæætē mönō Codito nänō ponguionæ iñonte botō, Minitō nö apænëminitapa, ante adinque botō tocæboimpa. ¹⁷ Ayæ, Wængongui qui, ante baō godöninque woadäni baonga tepæ gao caadänipa. Minitō iñömō wede pönëmini inte, Wæn-

gonguī quī, ante nāmā godō cæyōmīni botō quēwenguīmāmo incæ mīni godōnin-cooga gao caate bai ba edæ waa tobaīmopa. Mīnitō tōnō godongāmæ edæ tobaimpa. ¹⁸Mīnitō adobaī, Pabodo mōnō beyæ cæcampa, ante tocæminimpa. Edæ mōnō edæ godongāmæ tocæimpa.

Tímoteo tōnō Epapododito

¹⁹Mīnitō æbānō quēwēmīni, ante ēñēninque Tímoteo wæætē apæncēā ēñente tocæboimpa, ante cædinque botō, Itota Codito Ao angā ate Tímoteo ingante oo da pōnōmo mīnitō weca poncæcäimpa, ante pōnēmopa. ²⁰Mīnitō æbānō quēwēmīni, ante wæyōmo tōmengā adocanque mīnitō beyæ ante botō tōnō guëa wæcampa. Wadāni guiquēnē mīnitō beyæ ante wædāmaī inānīpa. ²¹Tōmānāni edæ nāmā beyanque ante cæinente wædinque Itota Codito nānō ānōnō ante wīī cæinēnāni inānīpa. ²²Cōwā ayōmīni, Tímoteo iñōmō cōwē waa cæcampa, ante do ēñēmīnī-tapa. Ayæ mōnō Codito ingantedō ante watapæ apænedinque Tímoteo tōnō mōna wencaya bai guëa cæmōnāpa, ante do ēñēmīnī-tapa. ²³Īnīnque, Botō imote awēnēidi æbānō apænte anguīnāni, ante ēñente ate botō Tímoteo ingante māniñedē ate mīnitō weca do da pōnōmo poncæcäimpa, ante pōnēmopa. ²⁴Ayæ mōnō Tæiyæ Awēnē Ao angā ate tōmēmo do pōmaīmopa.

²⁵Ayæ Epapododito mōnō tōniñacā incæ botō tōnō guëa cæmōna imōnāpa. Wadāni piinte cædāni adinque mōnatō guëa wææ cæmōnāpa. Tōmengā ingante mīnitō, Pabodo beyæ ante godō cæcæbiimpa, ante do da pōnōmīni ponte cæcā æntabopa. Tōmengā ingante ñōwo wæætē adodō mīnitō weca edæ da pōnōmo ponguēnengā ingampa, ante pōnēmopa. ²⁶Adocā Epapododito iñōmō mīnitō pidipenteidi imīnite acæte ante edæ nanguī wæcampa. Ayæ, Epapododito daicawo gawængampa, ante apænedāni ēñēninque pidipenteidi do wædānīpa, ante ēñente wædinque tōmengā wæætē mīnitō beyæ ante nanguī wæwente bacampa. ²⁷Nāwangā impa edæ. Tōmengā daicawo gawænte wodo wængantapa. Incæte Wængonguī tōmengā ingante waadete pōnō gampocā waa bacantapa. Mānōmaī cædinque Wængonguī botō beyæ adobaī ante pōnēninque, Pabodo wīī godōmenque wæcæcäimpa, ante pōnengā inte edæ Epapododito ingante gampocā waa bacantapa.

²⁸Mānōmaī beyæ, Epapododito wæætē pongā adinque tocæminimpa, ante cædinque ayæ, Mīnitō tomīni adinque botō wæwēnāmaī bacæboimpa, ante cædinque botō tōmengā ingante ñōwo da godoncæboimpa, ämopa. ²⁹Pongā ate mīnitō, Mōnō Awēnē nempo quēwēnōmi inte pōe, ānīnque Epapododito ingante waa adinque godongāmæ watapæ tote cæedāni. Ayæ wadāni tōmengā bai adobaī waa cædānīpa, ante adinque tōmēnāni inānite waa adinque waa cæedāni. ³⁰Mīnitō, Pabodo beyæ ædō cæte cæquīmōni, ante, Gobæ awædō, ante wæyōmīnite Epapododito iñōmō edæ, Wæmo incæ cōwē cæcæboimpa, ante mīnitō cæquēnēnō ante cæcantapa. Codito beyæ ante cæcæte ante edæ tōmengā wodo wængantapa cæmīni. Tōmengā ingante edæ waa cæedāni, ämopa.

Tæī piñænte cæcæimpa, ante

3 Ñōwo iñōmō botō tōniñamīni ēñeedāni. Mōnō Awēnē nempo quēwēninque mīni watapæ toquinque imīnīpa. Mīnitō oda cædāmaī incæminimpa, ante botō adodō adodō ante anca yewæmōmo incæte wædāmaī imopa.

²Īimai āmopa. Wadāni īñömö, Mönö eö togænte quëwengäïmpa, ante nē ānewēnāni inte guintaidi bai wēnæ wēnæ cædinque nāmā baö eö eö towēnānīpa. Ante adinque mīnitö tōmēnāni inānite gomö adinque wææ cæedāni. ³Edæ tōmēnāni inānite ee adinque Wængonguī mōnō ïmonte wæætē pōnō eö togænte bai cædinque mōnō wentamö mongæñö do wido cægacäïmpa. Wængonguī Ōñowoca ingante ænte ewocamö ïñömö inte mōnonque edæ, Wængonguī ingampa, ante tōmengä beyæ cæmoppa. Itota Codito nempo quëwēmö inte mōnonque wīi inguipoga beyænque quëwēmö ïmoppa, ante mōnō tōmengä ingante waa ate apænemoppa. ⁴Tōmēnāni guiquēñē inguipogaque ante pōñēninque, Mōnitö cædö beyænque quëwencæmōn-ïmpa, ante pōñewēnānīpa. Tōmēnāni nāni pōñewēñö bai adobaï pōñente bai botö, Tōmēnāni wædænque cæyōnāni botö godōmenque nanguī cædōmo ïmopa, ante pōñewencædōmoïmpa. Edæ, Nanguī botö cædö beyænque quëwencæboïmpa, ante pōñewencædōmoïmpa.

⁵Edæ tōmēnāni nē eö togæñāni inānitawo. Botö ïñömö adobaï ïmopa. Tæcæ ēñayōmote ònonpo æmæmpoque go mēōnaa go adoñnæque mānimpoñnæ ïñonte botö ïmote do eö togænāni wægaboïmpa. Tōmēnāni idægoidi inānitawo. Botö ïñömö idægo wodi pæïmo ïñömo inte tōmengä nāñömocä Beencaminö wodi pæïmo ïñömo ïmopa. Tōmēnāni ebedeoidi inānitawo. Botö ïñömö ebedeobo ēñagäïmo inte nāwä ebedeobo ïñömo ïmopa. Tōmēnāni Paditeoidi inānitawogaa. Edæ botö Paditeobo ïñömo inte Mōitee wodi nāñö wææ angainö ante mōni Paditeocabo wædö ante tōmää ēñente cædōmo ïmoï aedāni. ⁶Ayæ tōmēnāni, Wængonguī beyæ nanguī cæcæïmpa, ante apænedānitawo. Edæ, Wængonguī beyæ cæbote, ante edæ botö ïñömö doyedē Codito ingante nāni pōñengaincabo inānite ancaa togænte pancæte ante cægaboï aedāni. Ayæ oodeoidi guiquēñē, Mōnitö wææ angainö ante nē ēñente cædānique nē nō cædāni inānīpa, ante āñānitawo. Botö ïñömö edæ māñinonque ante cōwē cædōmo inte wentamö mongæñāmaï ïñömo ïmopa.

⁷Doyedē ïñömö botö māñōmaï godōmenque waa cædīmo inte, Botö toquinque waa pōñi cægaboïmpa, ante pōñewentabopa. Nōwo guiquēñē botö waa cægainö ante, Ōnonquedö ante cægaboï, ante do ēñēmopa. ⁸Ayæ wææ, Itota Codito botö Awēñē ingante adīmo inte botö tōmengä ingante pōñēninque tōmengä tōñö godōmenque waa pōñi quëwencæboïmpa, ante botö, Wëñēñedē botö entawengaincoo botö waa againcoo incæ edæ ewenguincooque ïmpa, ante pōñēmopa. Edæ Codito beyæ ante cæyōmo botö wëñē māñincoo tōmancoo edæ dæ ba wætabopa. ïñinque, Codito ingante godōmenque ewocacæboïmpa, ante nanguī cædinque botö, Wëñē botö entawengainö ompotacoo bai ïmpa, ante wido cæbopa.

⁹Edæ, Īimai cæedāni, ante nāni wææ angainö ante ēñente cæbo incæte Wængonguī ayongante botö ædö cæte māñinö beyænque nō entawēmo baquimoo. Wæætē Codito mōnō nē nō cædongä ingante wede pōñēmo inte tōmengä nempo quëwēñōmote Wængonguī pōnō badongä ate nō cæbo bacæboïmpa, ante nanguī cæbopa. ¹⁰Mönö Codito ingante ate bai pōñencæboïmpa, ante cæbopa. Ayæ tōmengä adocä nanguī tæï piñænīnque ñāni òmæmongacäïmpa, ante wede pōñēninque botö māñinö tōmengä nē ñāni òmæmongaingä nāñö tæï piñænö bai adobaï entawencæboïmpa, ante cæbopa. Ayæ adobaï, Tōmengä caate nāñö wængai bai botö tōmengä beyæ wæncæboïmpa, ante pōñēninque botö tōmengä tōñö godongāmæ caate wænte bai tōmengä nāñö ewocadö bai ewocacæboïmpa, ante cæbopa.

¹¹ Mänömaï cædinque botö, Tömengä wænte ate nãni ömæmonte nänö quëwengai bai botö adobai wænte ate nãni ömæmoncæboimpa, ante nanguï cæbopa.

Mänömaï bacæboimpa, ante nanguï cæbopa, ante

¹² Mänömainö ante apænedinque botö, Codito nänö entawëno bai do entawë-mopa, ante dicæ apænebogaa. Picænani bai do badinque nö cædinque oda cædämaï imopa, ante dicæ apænebogaa. Incæte Itota Codito incæ edæ, Botö ëwocadö bai adobai ëwocacæbiimpa, ante botö imote do bæi ongongacäimpa. Ininque botö wæætë, Tömengä waa pönï nänö ëwocadö bai adobai ëwocacæboimpa, ante bæi ongongacæte ante nanguï cæbopa. ¹³ Inãnani ëñeedäni. Botö Codito nänö ëwocadö ante dicæ eyepæ æmogaa, ante wæbopa. Incæte, Eyepæ ænãmaï imopa, ante adinque wæwënãmaï imopa. Wæætë, Inçayæ ate Codito nänö ëwocadö bai ædæmö ëwocacæboimpa, ante cædinque botö mäninonque ante pönëninque pogodo gote bai cöwë cæbopa. ¹⁴ Wængonguï do, Bitö Itota Codito nempo quëwënömi inte eyepæ cædinque æmonga ponte æe, ante botö imote aa pegacäimpa. Ininque tömengä, Pædæ pönömo æncæbiimpa, ante nänö angaincoo ante ænte ëwocacæte ante botö gänä cæcæte ante pogodo gote bai edæ nanguï cæbopa.

¹⁵ Mönö æmæwo picæmö badömö inñömö tömämö adobainö ante pönenguënëmö imopa. Pancaminia guiquënë mänömainö ante wii pönëmini adinque Wængonguï, Minitö æbänö nö pönenguënëmini iminii, ante pönö odömongä ate ëñencæminimpa. ¹⁶ Mönö do ëñente quëwenganca mäninganca mönö cöwë nö cæte quëwengæimpa.

¹⁷ Inãnani ëñeedäni. Botö Pabodobo æbänö cæboo, ante adinque minitö botö cædö bai adobai godongämæ cæedäni. Ayæ, Mönitö cæmöni bai minitö adobai cæedäni, ante odömömöni bai pancadäniya adobai cædäni adinque minitö inñömö, Adobai cæcæimpa, ante tömënäni inãnite cöwä aedäni. ¹⁸ Minitö iminute wantæ wantæ inñö wantæ wantæ inñö apænedimo inte botö nöwo Ca ca wædinque adodö ante iïmaï ante godömenque apænebopa. Mönö Codito awäa wængä incæte nanguï inãni tömengä ingante Baa äninque tömengä nänö wængaiwæ ante piinte bai cædänipa, ante awædö. ¹⁹ Tömënäni nani ömæe ëwente wæquinque mänömaï cædänipa. Cænguï beyænque ante pönente quëwënänipa. Wënæ wënæ nani cædö beyæ guingo imonte wæquënënanï incæ tömënäni wæætë guinñadãmaï inte edæ, Waa pönï cæmönipa, ante nãmä incæ waa adänipa. Edæ inguipoga beyænque ante cæinente wædänipa.

²⁰ Mönö inñömö mempoga ëñagaimö inte mönö öönædë ömæ do ëamö edæ imopa. Ininque mönö Awënë Itota Codito, Quëwencæminimpa, ante në Ængaingä ingante nanguï ainente wædinque mönö, Tömengä æyedënö öönædë edæ wææ ponguingää, ante wänö cömompa. ²¹ Tömengä inñömö tæi piñænongä inte tömancoo edæ bæ tadinque ö æninque Tæiyæ Awënë incæcäimpa. Ininque, Mönö quëwenguinãmaï aquinñö ëñamompa, ante adinque tömengä tæi piñænongä inte, Botö baö bai tæiinö mongæncæminimpa, ante badongä ëñaquimö imopa.

Mönö Awënë nempo quëwëninque watapæ tocæimpa

4 Wængonguï botö imote poganta pönö wencate bai cædinque, Bitö waa apænebi ëñente beyænque pidipenteidi ëñente waa cædäni abopa, angä ëñëninque botö minitö beyæ ante watapæ tobopa. Minitö iminute ædæmö waadedinque botö,

Æyedēnō bee tenguimoo, ante wæbopa. Īnque botō nē waademini āmo ēñēedāni. Mānīnō botō ānīnō ēñente cædinque mīnitō mōnō Awēnē nempo quēwēninque tæi ongōedāni.

²Nōwo Eodia, Tintique, mīna onquiyæncaya iminate āmo ēñēeda. Mōnō Awēnē nempo quēwēninque mīnatō piyænē cæte adodonce ante cæbæweda, āmopa.

³Botō mōnō Awēnē ingantedō ante watapæ apæneceate ante nanguī cæyōmote Codēmente tōnō wadāni botō tōnō iñacabo cædānitapa. Wængonguī, Nāni quēwenguīnta, ante tōmengā nānō yewæmongaintaa tōmēnāni ēmōwo dobæ yewæwēmonte mæ ōnōmpa. Tōmēnāni botō tōnō cæyōnāni ĩna onquiyæna Eodia tōnō Tintique iñōmō botō tōnō adobaī iñacabo nanguī cæda inatapa. Īnque bitō cōwē botō tōnō guēa cædōmi iñōmite bitō imite āmopa. ĩna inate bitō waadete apænebi ēñēninque piyænē cæte quēwencædaimpa.

⁴Ayæ tōmāmini iminite, Mōnō Awēnē nempo quēwēninque watapæ tote quēwēedāni, āmopa. Edæ, Watapæ pōni tote quēwēedāni, ante adodō ante āmo ēñēedāni. ⁵Mōnō Awēnē edæ oo pōni poncæcāimpa cæminii. Ee ædæmō cæte quēwēñōmini tōmānāni waadete mīni cædōnō ante edonque acædānimpa.

⁶Ayæ, Quiēmē bacæ wæ, ante mīni wædō ante guiñente wædāmaī iedāni. Wængonguinque ingante apæneedāni. Apænedinque, Wængonguī, bitō pōnō cæbi ate eyepæ inte quēwencæmōnimpa, ante quiēmē mīni æncæ wædō incæ ante apæneceamīnimpa. Ayæ tōmengā pōnō cæcā adinque mīnitō, Bitō pōnō cæbi waa æmōnipa, ante Wængonguī ingante wæætē waa ate pōnente apæneedāni. ⁷Ayæ, Wængonguī piyænē cædinque pōnō aacā beyæ mīnitō Itota Codito nempo quēwēninque piyænē cædinque mīmōnē wædāmaī inte nō pōnēninque quēwencæmīnimpa. Edæ mōnō, Æbāmē cæte Wængonguī pōnō piyænē cæte aacāā, ante mōnō wao-cabo ēñēnāmaī imō incæte tōmengā cōwē godōmenque aacā ate wædāmaī inte quēwēmōmpa.

Quīnō waa ī, ante mānīnonque ante pōnēē cōedāni, ante

⁸Īnānāni ēñēedāni. Mīnitō æbānō ante pōnēē conguēnēmīni imīnipa, ante yewæmōninque botō nōwo æmæwo pōni yewæmōmoī aedāni. Nāwangā nāni apænedō ante pōnēē cōedāni. Æbānō waa cæquiī, æbānō nō cæquiī, ante pōnēē cōedāni. Quiēnō nō ī, ante mānīnō ante pōnēē cōedāni. Mōnō æbānō waadete pōnenguī, ante pōnēninque mōnō waa adoncoo ante adobaī pōnēē cōedāni. Wadāni waa nāni cædinō ante pōnēē cōedāni. Mānōmaī cædāni ate wadāni waa adānitawo. Īnque tōmēnāni nāni waa adinō ante mīnitō mānīnō ante pōnēē cōedāni. Īnque, Quiēmē waa pōni ī, ante adinque mānīnonque ante pōnēē cōedāni.

⁹Botō odōmōnte apænebo ēñēmīnitawo. Īnque botō pōnō apænebo ēñēninque mīni ēñēnīnō bai tōmānō ante edæ cæedāni. Botō pædæ pōnōmo æmīnitawo. Īnque botō pædæ pōnōmo mīni ænīnō incæ ee mæedāni. Botō entawēnō ante, Æbānō entawēmoo, ante edonque amīnitawo. Īnque botō entawēnō mīni adinō bai mīnitō adobaī entawēninque edæ waa cæedāni. Mānōmaī cæmīni adinque Wængonguī nē gānē pōnēnōngā inte mīnitō tōnō godongāmæ quēwēninque pōnō cæcā ate mīnitō wæætē gānē pōnēmīni bacæmīnimpa.

Pidipenteidi mini pönöni waa æntabopa, Pabodo angampa

¹⁰ Botö wædö ante mīnitö doyedē pönö cædimīni inte nōwo wæætē tæcæ pōnente wædinque wæætē pönö cæmīni æninque botö, Mönö Awēnē beyænque pönö cæminīpa, ante adinque nanguī waa tobopa. Edæ botö wædö ante cōwē waadete pönēmīni incæte mīnitö da pönoncæ cæyömīnite wææ cæte ī æiquedö da pönonguimīni. ¹¹ Incæte mänömaī apænedinque botö wīī ænguēnēmo inte apænetabopa. Edæ wædænque ëabo incæ nanguī ëabo incæ quīēmē ëabo incæ botö, Æbänö quēwenguī, ante do ëñēmo inte edæ piyænē cæte wædämaī cōwē quēwēmopa. ¹² Ömæpobo wædimo inte botö, Ömaadāni æbänö quēwēnānī, ante do ëñēmopa. Adobaī nanguī ëate quēwēnimo inte botö, Nanguī ëadāni æbänö quēwēnānī, ante do ëñēmopa. Edæ tōmo cæmo incæ, gæwænte wæbo incæ, nanguī ëabo incæ, ömæpobo incæ mäninö tōmānö ante wægaimo inte botö mänömaī ingaimo beyænque ëñente batabopa. Ìninque æyömömē quēwēmo incæ quīēmē baī quēwēmo incæ piyænē cæte wædämaī quēwēmopa. ¹³ Edæ quīēmē beyæ wæbo incæ mōnö Codito pönö cæcä ate botö wæætē edæ eyepæ entawēninque tōmäa edæ cæbopa.

¹⁴ Incæte botö ömæpobo inte wæyömote mīnitö pönö cæmīni waa æntabopa. ¹⁵ Ayæ adobaī mōnö Codito ingantedö ante watapæ möni apænedö ante tæcæ ëñēmīni ate botö Mäatedöniabæ iinque apænedinque wadæ goyömote wadāni Codito ingante nāni godongämæ pönencabo pönönāmaī iñönānite mīnitö adomīnique da pönömīni æntabopa, ante mīnitö pidipenteidi do ëñēmīnīpa. ¹⁶ Edæ, Tetadōnica nāni quēwēñömö quēwēninque Pabodo ömæpocä bacampa, ante ted- edāni ëñente wædinque mīnitö wīī adopoque wæætē wæætē da pönömīni æntabopa.

¹⁷ Botö dicæ botö æncæ wædö ante apænetabopa. Wæætē, Pidipenteidi wadāni inānite nē godönāni inānīpa, ante adinque Wængonguī wæætē mīnitö imīnite godōmenque pönongä æncæmīnīpa, ante apænetabopa. ¹⁸ Ìninque botö iñömö idæwaa æntabopa. Botö ænguēnēnö æninque godōmenque nanguī ænte ëabopa. Edæ, Pabodo quī, ante mīni da pönönincoo Epapododito wæætē botö imote pædæ pönongä æninque botö eyepæ pōnī ëate quēwēmopa. Mīnitö, Wængonguī quī, ante oguī waquī baī pönö iya tante baī cædinque, Pabodo quī, ante da pönömīni adinque, Waa pōnī pönömīnīpa, ante Wængonguī incæ waa acampa. ¹⁹ Botö Wængonguī ñäö baī entawēninque tæī ëmongä inongä inte tōmengä nänö ëadoncoo iñömö edæ bacoo pōnī ongompa. Ìninque, Mīnitö ænguēnēmīni imīnīpa, ante adinque tōmengä Itota Codito beyænque cædinque eyepæ pōnī edæ da pönongä æncæmīnīpa.

²⁰ Mönö Wængonguī mōnö Mæmpo iñongante, Bitö waëmö pōnī inōmī imīpa, ante mōnö cōwē watapæ apænecæimpa. Edæ nōwopāmo incæ mümāmo incæ mōnö cōwē mänömaī apæncæimpa. Mänömaī impa, æninque botö, Amëë, ämopa.

Mäninque ante yewæmömopa, ante

²¹ Wængonguī quīnāni Itota Codito nempo quēwēnönāni iñönānite mīnitö, Waa quēwencæmīnīpa, ante botö beyæ ancæmīnīpa. Ayæ botö tönö godongämæ ongönāni incæ, Mīnitö æbänö quēwēmīnī, ante wædānīpa. ²² Edæ Tæiyæ Awēnē Tetædo oncönē quēwēnāni tönö wadāni Odömā iñömö wayömö quēwēnāni tönö Wængonguī quīnāni incæ tōmānāni adobaī mīnitö imīnite, Waa quēwencæmīnīpa, änānīpa.

²³ Mönö Awënë Itota Codito mīnitō imīnite waadete pönö cæcæcäimpa, ämopa.
Mäninque ante yewämömopa.

Codotenteidi

inänite Pabodo nänö cadota ante yewæmongainta

Waa quëwencæminimpa, ante

1 Wængongui angä ëñëninque Itota Codito botö imote da godongä gogaïmo inte botö Pabodobo inömo inte yewæmömopa. Mönö töninacä Timoteo tönö guëa tedete ate botö, Acæminimpa, ante yewæmömopa. ²Mönitö töninamini ëñëedäni. Codota inömo quëwëninque Wængongui quimini inte minitö mönö Codito nempo quëwëninque ædæmö cæte pönëmini inöminite botö iïmai ante yewæmömopa. Mönö Mæmpo Wængongui tönö mönö Awënë Itota Codito waadete pönö cæda ænte entawëninque minitö ganë pönëninque watapæ quëwencæminimpa, ämopa.

Në pönënanï beyæ Pabodo Wængongui ingante apænecä

³Mönö Awënë Itota Codito Wæmpocä inongante mönitö minitö beyæ ante apænedinque Wængongui ingante waa ate pönente apænemönipa. ⁴Edæ, Minitö Itota Codito ingante wede pönëmini iminipa, ante do ëñëmönipa. Ayæ, Wængongui quinäni inänite tömänäni inänite minitö waadete pönëminipa, ante mönitö do ëñëmönipa. ⁵Edæ, Öönædë æidinque minitö watapæ quëwenguinque impa, ante edæ Codito do badongampa. Mänömainö ante, Nawangä impa, ante watapæ mini ëñënö ante minitö godömenque wede pönëmini badinque godongämæ waadete pönëmini iminipa. Ininque, Minitö mänömai iminipa, ante adinque mönitö wæætë Wængongui ingante waa ate pönëninque apænemönipa.

⁶Doyedë minitö weca ponte apænedinque mönitö, Mönö Codito ingantedö ante watapæ apænemöni ëñëninque minitö, Wængongui nawangä waadete pönö cæ-campa, ante do ëñëminitapa. Mänömainö ante mini ëñëniönæ incæ minitö wain-cawæ nanguï incawæ bai tæcæ badinque nõwo ganca nanguï apænëmini ëñëninque wadäni minitö weca në pönënanï tæiyænäni badäni. Ayæ tæiyænäni badäni bai mönö pönencabo adobai tömämæca tæiyæmö pönï bamompa. ⁷Epapada möni në waadedongä incæ, Codito waa pönï nänö pönö cægainö ante do odömönte apænecä ëñëminitapa. Tömengä inömo Itota Codito beyæ në cæcä inongä inte mönö imönite pönëninque ædæmö cæcä ingampa. ⁸Ayæ mönitö imönite apænedinque tö-mengä, Codotenteidi inömo Wængongui Önöwoca nempo quëwëninque në waadete pönënanï inänipa, ante do apænecä ëñentamönipa.

⁹Mänömai beyæ mönitö, Minitö æbänö imini, ante tæcæ ëñëninque minitö beyæ ante Wængongui ingante apænedinque ñimpo cædämai inte cöwë apænemönipa. Edæ, Wængongui æbänö angää, ante minitö ëñente ëwocacæminimpa, ante mönitö, Wængongui ëñëmi. Bitö ëñënö ante apænëbi ëñente ëwocadinque Codotenteidi wæætë, Æbänö waa cæte quëwenguï, ante ëñencædänimpa, ante apænemönipa. ¹⁰Wængongui apænecä ëñëninque minitö, Mönö Awënë tocæcäimpa, ante cæd-inque tömengä nänö waa cædö bai minitö adobai waa pönï cæcæminimpa, ante apænemönipa. Ayæ Wængongui ingante minitö doyedë æmæ ate bai æmæ pönënimini inte nõwo wæætë ædæmö ate bai ædæmö pönencæminimpa. Ayæ waa incawæ bai minitö adobai bate cædinque nõ mini waa cæquëñënonque

cæcæminimpa, ante apænemõnipa. ¹¹ Wængongui ñäo emõninqe tæ piñænogä inte pönö cæcä ate minitö edæ tömengä nänö tæi piñænö bai adobai tæi piñæmini ewocacæminimpa, ante apænemõnipa. Ayæ, Tömengä mänömaï pönö cæcä ænte ewocamini inte minitö wæntæye badämaï inte ee cædinque piyænë cæte ee cæcæminimpa, ante amõnipa. Ayæ watapæ todinque, ¹² minitö mönö Mæmpo ingante waa ate pönëninque apænecæminimpa, ante mönitö Wængongui ingante apænemõnipa.

Edæ Wængongui quimõni imõni bai tömengä minitö iminite pönö badongä ate minitö tömengä quimõni do bamnipa. Ìninqe minitö tömengä ñäo emömamodë mönitö tönö godongämæ pönõminite tömengä nangui pönö pönongä æninque minitö mönitö tönö godongämæ nè æamini incæminimpa. ¹³ Edæ nè wemö enempodongä nempo wæwëñomonte Wængongui wæætë mönö imonte gä pe æmpote ö æninque, Botö Wengä botö nè Waadedongä iñömö nè Awënë Odeye iñongante minitö tömengä nempo quëwencæminimpa, ante mämongä pongamõimpa. ¹⁴ Tömengä Wengä nämä wepæ petæ petæ wææ beyænque mönö wënæ wënæ cægainö ante Wængongui pönö ñimpo cæcä æninque mönö abæ tawænte bai quëwëmompä.

Codito wængä beyænque Wængongui piyænë cæcampa

¹⁵ Mönö adämaï ingaingä Wængongui æbänö emongäa, ante adämaï iñomonte Wængongui Wengä iñömö Mæmpocä bai nè emongä inte mönö weca pöninque, Mæmpocä æbänö emongäa, ante do odömongacäimpa. Wëenënedë Wængongui nänö badönämaï ingäñedë adocä incæ Bamoncadengä bai inongä inte do quëwengacäimpa. ¹⁶ Ìninqe Mæmpocä pönö angä ëñëninque tömengä Wengä incæ tömancoo edæ badongacäimpa. Mönö nè adincoo incæ mönö adämaï incoo awëmö ongoncoo incæ adocä tömancoo badongacäimpa. Awënëidi incæ nè änäni incæ, awënëidi nani enempodö incæ nè tæi piñænäni incæ, öönädë owodönäni incæ inguipoga quëwënönäni incæ mäninäni edæ tömänäni inänite Mæmpocä pönö angä ëñëninque Wængongui Wengä iñömö badongacäimpa. Badõñongante Wæmpocä, Bitö qui bacäimpa, angä Ao ante badongacäimpa. ¹⁷ Adocä Wængongui Wengä incæ Tånocä quëwengaingä ingampa. Tömengä pönö angä beyænque tömengä nänö badongaincoo iñömö adoyömö pönente bai cædinque tömengä nempo godongämæ gongænte cægompä.

¹⁸ Ayæ tömengä nè Önoncamö bai nè angä iñongante mönö tömengä ingante mönö godongämæ pönencabo wæætë tömengä tönö adoyonque bai iñömö imompä. Adocä tömengä nänö Tæiyæ Awënë baquinque nè badongaingä inongä inte tånocä pönö ingacäimpa. Ayæ æmonga pönö nänö ongonguinque tömengä wænte ate tånocä nè ñäni ömæmongaingä inongä ingampa. ¹⁹ Edæ, Botö entawënö incæ botö Wengä tömänö entawencæcäimpa, ante pönö cædinque Mæmpocä iñömö nangui togacäimpa. ²⁰ Ayæ tömengä Wengä wepæ awäa gowete wædinque wængä beyænque Wængongui mönö tömämö beyæ pönö cædinque piyænë cægacäimpa. Tömengä Wengä tönö mänömaï pönö cæcä beyænque mönö inguipoga tömäo quëwëmö tönö öönädë tömäo quëwënäni tönö tömengä ingante Ao æninque tömengä tönö godongämæ piyænë cæte quëwëmö adinque Wængongui iñömö nangui togacäimpa.

²¹ Ayæ minitö guiquënë Wængongui ingante näwæ pämente gogaïmini inte wïwa cædimini inte ocaidë nè piinte bagaïmini iñõminite, ²² Wængongui wæætë, Adocä Codito tömengä baö ewënente wængä beyænque minitö botö quimõni badinque

botō ayōmo tæiyæ waēmō entawencæminimpa, ante cæcampa. Īninqe tōmengā nā mēnongacā ate mīnitō tōmengā ayongā wentamō mongænāmai ĩmīni adinqe, Wænæ wænæ cæbitapa, ante ædō cæte piinte anguii. ²³ Edæ mīnitō tæi mænonte bai ongōninqe do mīni wede pōnēnonque ante cōwē godōmenque pōnēmīni ĩninqe tōmengā weca ponte ongōmaimīnīpa. Mōnitō mōnō Codito ingantedō ante mōnō pōnēnō beyæ mōnō watapæ bacæimpa, ante apænemōni ēñēmīnitawo. Mānīne ante nīmpo cædāmai ĩmīni inte mīnitō tōmengā weca cōwē ongōmaimīnīpa. Mānīne mīni ēñēnīne ante mōnitō nōwo inguipoga tōmāo quēwēnāni ĩnānīte apænemōni ēñēnānīpa. Mānīne beyænque ante botō Pabodobo nē cæbo batabopa.

Mōnō pōnencabo beyæ botō nē cæbo batabopa, ante

²⁴ Mīnitō beyæ nangui cædinque nantate wædīmo incæte botō nangui tobopa. Ayæ Codito beyæ ante godōmenque wæquēnēmō inte botō tōmengā tōnō guēa baonque nantate wæbopa. Codito mōnō Ōnoncamō bai nē angā ĩnongante mōnō tōmengā ingante mōnō godongāmæ pōnencabo ĩnōmō tōmengā tōnō adoyonque bai ĩmōmpa. Botō ĩnōmō edæ mōnō cabo beyænque caate wæbopa. ²⁵ Ayæ, Codito ingante nē pōnēnāni beyæ bitō nē cæbi badinqe botō angāine ante adodō adodō ante tōmānō ante edonque pōni apænēbi ēñencædānīpa, ante Wængongui angā ēñēninqe botō mīnitō beyæ nē cæquēnēmō do bagaboimpa.

²⁶ Mānīne Wængongui nānō angāine ante wantæpiyæ wē wodonte bai ĩnōnte mōnō mæmæidi cōwē ēñēnāmai ingadānīpa. Nōwo guiquēnē Wængongui tōmengā quimō ĩnōmonte mānīne ante edonque pōni odōmonte apænecā ēñēmōmpa. ²⁷ Īninqe mōnitō ĩmōnīte āninqe, Waa pōni botō angāine ante mīni waocabo wēēnēdē mīni ēñēnāmai ingāine ante mīnitō nōwo tæcæ ēñēmīni inte oodeoidi ĩnāmai ĩnāni ĩnānīte odōmonte apænēmīni ēñencædānīpa, ante Wængongui cæcampa. Mānōmai beyæ mānīne ante apænemōni ēñēninqe mīni waa pōni nāō bai entawenguinque ēñencæminīpa. Edæ, Mīnitō mōnō Codito ingante ēwocadinque mīni nāō ēmāmōdē æiyōmīni watapæ bacæimpa, ante mōnō pōnēnō ante mānīneque ĩpa.

²⁸ Mōnō Codito tōmengā nānō ēñēnō ante entawēninqe mōnitō adocā ingante mōnō Codito ingante ante apænemōnīpa. Tōmengā nempo quēwēninqe mīnitō picænāni bai nē ēñēmīni bayōmīnīte Wængongui mīnitō ĩmīnīte waa acæcāimpa, ante mōnitō tōmānāni ĩnānīte waadete odōmonte apænemōnīpa. Ayæ, Ēñenguēnē quēwēedāni, ante tōmānāni ĩnānīte wææ ante apænemōnīpa. ²⁹ Mōnō Codito nānō tæi piñænō pōnongā ante entawēninqe botō, Nē ēñēmīni bacæminīpa, ante cædinque tæi pæ pagænte cōwē nangui cæbo ĩmōpa.

2 Botō mīnitō beyæ nangui cædinque Daoditea ĩnōmō quēwēnāni beyæ adobai nangui cæbo aedāni. Ayæ wadāni botō awinca adāmai ĩnāni beyæ adobai tæi pæ pagænte cædinque nangui cæbopa, ante apænēbo ēñēedāni. ² Botō, Tōmānāni wæwēnāmai inte wampo pōnēninqe godongāmæ waadete pōnēninqe adocabodāni bai bacædānīpa, ante ædæmō cæbopa. Edæ, Mānōmai badinqe tōmēnāni Codito nānō ēñēnō ædæmō pōni nāni entawenguinque ĩpa, ante pōnēninqe cæbopa. Ayæ, Mānōmai badinqe tōmēnāni Wængongui nānō nē wē wodongaingā ingante Codito ingante edonque acædānīpa, ante botō mānōmai beyæ ante ædæmō pōni odōmonte apænēbopa. ³ Edæ, Æbānō ĩ, ante, Æbānō waa cæquii, ante Wængonguinque nānō nō pōnēnō incæ mōnō Codito mānīnō tōmānō ante

ēñēninque waēmō pōnī incoo baī wē wodonte mante baī entawengampa. ⁴Mänō-mainō ante apānedinque botō, Mīnitō oda cādāmaī incāmīnīmpa, ante yewā-monte apānebopa. Edæ wadāni waa pōnī tededāni incæ babæ wapiticæ odōmon-cæte ante tededāni īnāni adinque ēñēnāmaī īedāni, ante wææ āmopa. ⁵Edæ wayōmō quēwēmo incæ mīnitō weca owote baī botō ōnōwoca pōnēmopa. Īnīnque botō ayōmo mīnitō mōnō Codito ingante wede pōnente tæī piñante ongōninque īñacabo cædinque tōingā pōnī cāmīnīpa, ante pōnēmopa. Mänōmaī īmīnīpa, ante ate baī adinque botō nanguī tobopa.

Codito nempo quēwēninque mīimō quēwēmōmpa, ante

⁶Mänōmaī beyæ botō īmaī āmopa. Mīnitō Itota Codito ingante mōnō Awēnē ingante Ao ante do æmīnitawo. Īnīnque tōmengā ingante do Ao ante ænīmīni inte mīnitō nōwo adobaī tōmengā ingante cōwē Ao ante tōmengā nempo quēwēedāni. ⁷Mīnitō waomīni incæ awæ tæīmōwæ ædæmō guiwate pæwæ baī Codito nempo quēwēninque cōwē godōmenque picāmīni bacāmīnīmpa. Ayæ mōnitō odōmonte apānemōni mīni ēñēnō baī cædinque godōmenque wede pōnēninque tæī piñante ongōedāni. Ayæ Wængonguī ingante waa ate pōnēninque watapæ apāneedāni.

⁸Wadāni mā pōnente ōnonquedō ante apānedāni ēñente wædinque mīnitō, Mōnō īmonte ō æncæte ante babæ apānedānīpa, ānīnque wææ cæedāni. Edæ tōmēnāni dicæ Codito nānō odōmonte apānegāinō ante apānedāniyaa. Wæætē waodānīque nāni odōmonte apānegāinonque ante Ao ānīnque tōmēnāni inguipogaque ante nē pōnēnāni nāni pōnēnō baīnonque ante cædānīpa tōō.

⁹Edæ Wængonguī tōmengā nānō entawēnoncoo incæ mōnō Codito Waocā nē ēñā-gaingā īnongā inte mānīncoo tōmancoo entawēninque nāmā baonga ēñacampa. ¹⁰Ōōnædē awēnēīdi incæ inguipoga awēnēīdi incæ nanguī īnāni īñōnāni mōnō Codito adocanque Nænængā pōnī īnongā inte Tæiyæ Awēnē īnongā ingampa. Incæte tōmengā nempo quēwēmīni inte mīnitō tōmengā nānō entawēnō incæ ædæmō entawēmīnīpa. ¹¹Īnīnque tōmengā nempo quēwēninque mīnitō wao ōnom-poca ēō togænāmaī īmīni incæte mōnō Codito īñōmō ēō togænte baī cædinque mīnitō baonque ante mīni wīwa cægāinō ante wido cæcā ate mīnitō tæiyæ waēmō entawente quēwēmīnīpa. ¹²Wængonguī nē tæī piñænongā inte Itota ingante angā nāni ōmæmongacāīmpa, ante wede pōnēmīni inte mīnitō, Itota tōnō godongāmæ nāñe wænte baī īmōmpa, ante apānē guīmīnitapa. Ayæ adobaī adocā nē tæī piñænongā ingante wede pōnēninque mīnitō apānē guīidinque Itota tōnō nāni ōmæmonte godongāmæ tao gongænte quēwēmīnīpa.

¹³Doyedē ēñēnāmaī cædinque do wænguēnēmīni ingāimīni inte mīnitō inguipogaque ante mīni cæinēwēnō ante ee mongæñōmīnite Wængonguī angā ate mīnitō Itota tōnō nāni ōmæmonte quēwengāmīnīmpa. Edæ wēnæ wēnæ mīni cægāinō ante adinque Wængonguī pōnō nīmpo cæcā quēwēmīnīpa. ¹⁴Mīnitō pante wæquinque ēñēnāmaī cāmīnīpa, ante Wængonguī wade wade ante wææ angā ēñēninque dodāni adodō adodō ante yewāmōnāni ate wægāmōīmpa. Mänōmaī mōnō īmonte ancaa wææ ānāni wæmō adinque Codito īñōmō mānīnecoo mōnō wægāinecoo ante wēā godonte baī cæcā ate dæ batīmpa. Edæ awæ timpodāni wæninque Itota Codito mānīnō ante do teēmente mongæ māō wido cægacāīmpa. ¹⁵Ayæ mānīwāa wænīnque adocā tæī ēmongā inte wēnæīdi awēnēīdi tōnō nē ānāni nāni wænonguēnēnca-

coo gä pe æmpote ö æninque tömengä, Wænoncaincoo nææminipa wænonguimīnii, ante bai wadāni ayönānite badete tote bai cægacäimpa.

Öönädē mönō entawēnō ante æncæte ante cæedāni, ante

¹⁶ Mönō ee aquenēnō incæ bitō quīmæ cæmii, Quīmæ bebi, ante pönō apænte piinte änānitawo. Wængonguī beyæ ante ææmæ cæcæimpa, ante apænte ancæ piinānitawo. Wacä māmō i ate becæimpa, ante wææ änānitawo. Guëmanguiönæ incæ quīmæ cæbii, ante mīnitō imīnite apænte pancæ cædānitawo. Edæ æcāmenque mänōmainō ante apænte ancæ cæyönānite mīnitō wæætē, Tömēnāni nāni wææ äninō ante Codito wæä godonte bai cægacäimpa, ante pönēninque guiñente wædāmaī incæminipa. ¹⁷ Cænguī cænte bai bequī bete bai mönō önowoca beyæ Codito incæ mönō guëmanguimāmo bai inongä ingampa. İninque Codito ingante ænte entawēninque mönō æbānō cænte bai guëmante bai quēwenguūi, ante odömoncæte ante cædinque dodāni inömö öwocodenganque odömonte bai cædinque wææ angadānimpā. Mänōmaī beyænque tömēnāni, İmaī cæedāni, İmaī beedāni, İmaī guëmæedāni, ante wææ angadānimpā.

¹⁸ Pancadāniya mä pönēninque, Önömonque bai inömö inte mönō anquedoidi inānite waa adinque waa cæcæimpa, ante babæ ante wææ ænewēnānipa. Ayæ mönitō änō bai cædāmaī ininque edæ mīnitō ænte entawēnō ænāmaī inte wæbaiminipa, ante ænewēñōnāni mīnitō wæætē guiñente wædāmaī iedāni. Edæ, Mönitō ate bai do adimōni inte ämöni ëñeedāni, ante tömēnāni Codito Önowoca ingante ewocadāmaī ināni inte mä pönēninque ænewēnānipa. Edæ, Nämāneque ante pönēninque tömēnāni, Mönitō adomōnique waa cæmöni imōnipa, ante nāmā waa adānipa. ¹⁹ Mönō ocai encamō inte cænguī cæninque mönō baonga wepæmē tömāo gogadinque pæmompā. Ayæ adobaī mönō ocai encadinque oguëmē tönō baö beyæ cōñe pö cōñe pö cæmompā. Mönō pönencabo adobaī Codito tönō adoyonque bai inömonte tömengä Önoncamō bai inongä inte nē angä ingampa. Mönō mänōmaī imō incæte tömēnāni wæætē nē Önoncamō bai inongä ingante Baa äninque nāmā wido tote wææññō bai edæ wadæ godānipa. İninque wææññō bai ināni incæ mīnitō imīnite wææ änāni apa quēwēmīnii.

²⁰ Wēñēñedē inguipogaque ante nāni wææ angainō ante nē ëñengaimīni incæte ñowo wæætē Codito tönō godongāmæ wænīmīni inte mīnitō wænte bai imīni inte mänīne ante ædō cæte ëñenguimīnii. Inguipogaque quēwēmīni imīnipa diyæ mänīne ante ëñente cæquēñēmīni inguimīnii. ²¹ “Gampodāmaī, Yædæ bedāmaī, Bæi ongönāmaī,” ante tömēnāni nāni wææ ænewēnō ante quīnante ëñente cæmīnii. ²² İñæmpā waodānique edæ, Gampodāmaī, ante nāni änoncoo inömö tæcæ ænte cæyōmīni edæ dobæ wote ba apa ëñewēmīnii. Inguipogaque quēwēnāni nāni ænewengainō ante ëñēninque tömēnāni wææ änānipa. Dodāni nāni odömonte apænegainō ante ëñēninque wææ änānipa. ²³ Tömēnāni, Önömonque bai inömö inte mönō anquedoidi inānite waa adinque waa cæcæimpa, ante wææ ænewēnānipa. Ayæ mä pönēninque, Cædāmaī, Cædāmaī, ante nāmā baö incæ pānānipa. İñāni ocai encadōnāni inte wææ änānipa, ante pönēninque wadāni edæ wæætē oda cædānipa. İñæmpā, Cædāmaī, Cædāmaī, ante nāni wææ ænewēnō wīi eyepæ i ininque nē ëñēnāni inguipogaque nāni cæinewēnō ante godōmenque wīwa cædānipa, ante ämo ëñēmaimīnipa.

3 İninque mönō Codito nē ñāni ömæmongaingä tönō nē ñāni ömæmongaimīni inte mīnitō æmonga ongoncoo edæ æinente pönēedāni. Codito ñowo Mæmpo Wæn-

gonguī tōmēmængä inō æi tæ contate ongongampa, ante pōnēninque edæ mīnitō, Æmonga pōni nē quēwengä tōmengä nānō entawēnō bai adobaī entawengæimpa, ante æinente wædinque quēwēedāni. ²Inguipogaque mōnō quēwēmāmo ante edæ wædāmaī inte wæætē æmonga mōnō quēwenguīnō ante cōwē pōnente quēwēedāni. ³Edæ do wænte bai ingaīmīni inte mīnitō nōwo Codito tōnō Wængonguī nempo awēmō quēwēñōmīnite mīnitō quēwenguīnō ante wīi edonque acæimpa. ⁴Mōnō Codito mīnitō quēwenguīnō ante nē pōnongaingä inte ponte a ongōñongä māniñedē tōmengä nāō entawēninque nānō tæi emōmāmodē mīnitō adobaī tōmengä tōnō a ongōmīni acæimpa.

Inguipogaque ante wægaimō inte mōnō mīimō quēwēmō

⁵Mānōmaī impa, ante wædinque mīnitō inguipogaque ante mīni cæinēwēnō ante wænonte bai æmæwo wido cæedāni. Nānōogængä ināmaī iñongante godō mōnāmaī ee aedāni. Wīwa mīni pōnēwēnō ante æmæwo wido cæedāni. Wacā ingante mīni toinente wædō ante æmæwo wido cæedāni. Wīwa mīni cæinēwēnō ante æmæwo wido cædinque ee ate quēwēedāni. Mīni māincooque ante æinēwēnō ante æmæwo wido cæte ñimpo cæedāni. Edæ māincoo ante æinente nē wæcā iñōmō tōmengä, Māincoo incæ botō wængonguī impa, ante bai wæcā apa cæmīni. ⁶Nē ēñēnāmaī cædāni inguipogaque nāni cæinēwēnonque ante cæyōnānite Wængonguī nānō piin-guimāmo oo ponguīnō anguēnē. ⁷Mīnitō incæ doyedē inguipogaque ante quēwēn-ique adobaī mīni cæinēwēnonque ante cægaimīni imīnīpa. ⁸Nōwo guiquēnē æng-ūi badāmaī iedāni. Äimīni badāmaī iedāni. Piinte cædāmaī iedāni. Babæ godō wēnæ wēnæ ānewēnāmaī iedāni. Wīwa apænedāmaī iedāni. Wæætē, Idæwaa wēnæ wēnæ cæte awædō, ante māniñō tōmānō ñimpo cæte ee aedāni. ⁹Wēēnēñedē mīni entawengaimāmo ante wido cædinque māniñedē mīni cægainō ante adobaī nē wido cædimīni inte nōwo iñōmō edæ wacā ingä wacā ingä babæ wapiticæ apænedāmaī iedāni.

¹⁰Wæætē mīimīni edæ quēwencæmīnīpa, ante Wængonguī do pōnō badongä entawēmīnīpa. Ayæ māniñō ante nē Badongaingä iñōmō cōwē pōnō odōmonte apænecā ēñēninque mīnitō mīimīni quēwēmīni inte tōmengä nānō entawēnō bai godōmenque godōmenque adobaī entawēmīni bamīnīpa. ¹¹Mōnō Codito nempo adoyōmō pōni iñōmō inte mōnō guidiegoidi incæ oodeoidi incæ adomō iñōmō imōmpa. Nē ēō togæināni incæ bagaadāni incæ adomō iñōmō imōmpa. Waodāni incæ cowodēidi incæ adomō iñōmō imōmpa. Wacā beyænque nē cæte quēwēnāni incæ abæ tawænte ee gote bai nāmā beyænque nē cæmōni incæ mōnō tōmāmō adomō pōni iñōmō imōmpa. Edæ mōnō tōmāmō Codito adocanque nempo quēwēn-ique tōmengä adocanque ingante nē ewocamō imōmpa.

¹²Wængonguī, Mīnitō botō quimīni badinque tæiyæ waēmō bacæmīnīpa, ante mīnitō imīnite waadete pōnēninque do apænte ængacæimpa. Ìninque tōmengä nānō nē apænte ængaimīni inte mīnitō wadāni inānite waadete pōnente godō waa cæedāni. Nāmā önōmoque bai imōpa, ante pōnēedāni. Wadāni inānite ædæmō cæedāni. Æiquedō waa cæquīnāni, ante wædāmaī inte piyænē cæte quēwēedāni. ¹³Ayæ wacā nānō cæinēnō ante cæcā adinque mīnitō piināmaī ee amīni cæcæedāni. Wacā adobaī mīnitō imīnite wīwa cæcā ate wædinque mīnitō godō ñimpo cæmīni quēwencæcæimpa. Edæ mōnō imonte mōnō Awēnē nānō ñimpo cægai bai mīnitō adobaī piināmaī inte godō ñimpo cæedāni. ¹⁴Ayæ, Adocabomō mōnō baquinque

mönö waadete pönengäimpa, ante pönëninque mīnitō tāno wadāni inānite waadete pönëninque ayä tōmënāni inānite mīni godōmenque cæquënönō ante cædāni. ¹⁵Mīnitō adocabomīni badinque piyänē cæte quëwencæmīnimpa, ante Wængonguī mīnitō imīnite aa pegacäimpa cæmīni. Mönö Awënë Codito nānō piyänē cædō pönongä æninque mīnitō piyänē cæte quëwëedāni. Ayæ Wængonguī ingante cōwë waa ate pönente quëwëedāni.

¹⁶Mönö Codito nānō apænegaïnō ante ëñëninque mīnitō ædæmō entawëninque nanguī ëñente baedāni. Ininque nanguī ëñëmīni badinque mīni cabo incæ wacä ingä wacä ingä godongämæ odōmonte apæneedāni. Ayæ nanguī ëñëmīni inte mīnitō wacä ingä wacä ingä waadete pönëninque, İmaī cæcäimpa, ante apæneedāni. Ayæ dodāni Wængonguī ingante waa adinque ämotamīni ante nāni yewæmongainta adinque mīnitō wæætë adodō tee empote äedāni. Ayæ Itota Codito nānō cægäinō ante pönëninque ämotamīni äedāni. Ayæ adobai Wængonguī Önöwoca pönō apænecä ëñente ëwocadinque mīnitō ämotamīni ante adodō tee empote äedāni. Mänömaī ämotamīni äninque Wængonguī ingante cōwë waa ate pönëninque äedāni. ¹⁷Ayæ æbämenque ante apænemīni incæ æbämenque cæmīni incæ mīnitō, Mönö Awënë Itota ëmōwo beyæ impa, ante tōmäa cæedāni. Ayæ tōmengä pönō cæcä beyænque mīnitō eyepæ inte Mæmpo Wængonguī weca pöninque tōmengä ingante waa ate pönëninque apæneedāni.

Mönö godongämæ quëwencabo İmaī cæte quëwengäimpa

¹⁸Onquiyæmīni ëñeedāni. Mönö Awënë nempo quëwëninque mönö ëñente cæcäimpa, ante wædinque mīnitō nänöogænāni inānite Ao ante ëñente cæedāni. ¹⁹Onguīñämīni ëñeedāni. Mīnitō nänöogænāni inānite ædæmō waadete pönëninque tōmënāni inānite pīinte cædāmaī İedāni.

²⁰Wëñämīni ëñeedāni. Mīnitō mæmpoidi inānite ædæmō ëñente cæedāni. Edæ mänömaī cæmīni adinque mönö Awënë, Waa pönī cæbi abopa, ancæcäimpa. ²¹Wæmpomīni ëñeedāni. Mīnitō, Ancaa ämo bai botō wëñængä ænguī badinque guingo imonte wæquëngä, ante pönente wædinque wæætë wëñænāni inānite nanguī änāmaī inte waadete pönō cæedāni.

²²Wacä nānō nē ö ænimīni inte tōmengä beyænque nē cæte quëwëmīni İñömō ëñeedāni. Mīnitō imīnite nē ö ængaingä ingante nē cæmīni inte mīnitō tōmengä nānō ä bai tōmäa ëñente cæedāni. Edæ, Awënë Wængonguī incæ botō İmote cōwë acampa diyæ, ante guīñente wædinque mīnitō imīnite nē ö ængaingä nānō ayedë incæ tōmengä nānō adāmaī İnedë incæ cōwë ëñente cæedāni. Waodānique botō İmote waa acædänimpa, ante pönënämaī inte mīnitō nō pönëninque cōwë ëñente cæedāni. ²³Æbämenque cædinque mīnitō, Wīi waocä beyænque ante cædinque botō Wængonguī Awënë beyænque ante cæcæboimpa, ante pönëninque tæi ëwocadinque ee cæedāni. ²⁴Mönö Awënë İñömō tōmengä do nānō angäinō bai cædinque mīnitō cægäinō beyæ ante eyepæ pönī pönongä æncæmīnimpa. Mänömainō ante pönente cæedāni. Edæ, Mönö Awënë Codito ingante adocanique ingante nē cæmīni imīnīpa, ante ämo ëñëmaimīnīpa. ²⁵Nē wënæ wënæ cæcä guiquënë tōmengä nānō wënæ wënæ cægainganca eyepæ æncæcäimpa. Edæ Wængonguī İñömō wacä ingante wadō wacä ingante wadō ate pönënämaī inte tōmämō İmote apænte äninque pönō nō pönī paga cæcæcäimpa.

4 Awënëidi ëñëedäni. Minitö waocä ingante në ö änimïni inte ëñëedäni ämopa. Edä munitö Awënëidi imïni bai munitö imïnite në Ængaingä incæ adobai munitö Awënë inongä inte öönædë quëwengampa cämïni. Minitö beyænque cæte në quëwënäni inänite munitö nöingä cædinque tömënäni näni ængüenönö ante adinque eyepæ pædæ godömïni æncædänimpa.

²Wængonguï ingante cöwë apænedinque, Tömengä æbänö cæcää, ante cöwä adinque tömengä ingante waa ate pönëninque apæneedäni. ³Codito æbänö cæcää, ante dodäni näni ëñënämaï ingäine incæ botö mänine ante do ëñënimo inte apænebo beyænque botö imote tee mönedäni wæbopa. Incæte mönitö mänine ante apæneyömöni munitö wæætë mönitö beyæ ante Wængonguï ingante apænedinque iïmai ante apæneedäni ämopa. Wængonguï ëñëmi. Bitö wi ænete bai cæbi ate Pabodoidi näni apænebo wadäni mïmönë guicæimpa, ante apæneedäni. ⁴Codito æbänö cæcää, ante botö edonque apænequënemo imopa. Ininque munitö botö beyæ ante apænedinque, Pabodo edonque apænececäimpa, ante Wængonguï ingante apæneedäni ämopa. ⁵Wadäni inänite bee tëninque munitö ocai encamini inte ëñente cædäni. Pönënämaï inäni do ëñencædänimpa, ante waa apænete cædäni. ⁶Ayæ Wængonguï waadete pönö apæneceä ëñëninque munitö adobai wadäni inänite waadete pönö apænedinque waa pönï apæneedäni. Wadäni, Æbänö iï, ante ëñencæte ante wæyönänite munitö wæætë nö pönï ëñëmïni inte nöingä apænemïni ëñencædänimpa.

Waa quëwencämïnimpa, änänipa

⁷Botö Pabodobo æbänö quëwëmoo, ante në ëñëningä inte Tiquico nïwo munitö weca pöninque mäninö ante apæneceä ëñencämïnimpa. Tömengä mönö tönïñacä bai iïngante mönitö tömengä ingante waa waadete pönëmönipa. Tömengä mönö Awënë nempo quëwëninque mönitö tönö godongämæ cæcä inongä inte mönö pönencabo tömämö imonte pönëninque mönö beyæ cöwë ædæmö cæcä ingampa. ⁸Minitö, Pabodoidi æbänö quëwënänii, ante ëñencæte ante wämïnitawo. Edæ, Tiquico mäninö ante apænedinque munitö imïnite ædæmö apæneceä ëñëninque munitö wampo pönencämïnimpa, ante cædinque botö nïwo tömengä ingante munitö weca da godömo pongä aedäni. ⁹Tiquico goyongä tömengä tönö Önetimo mïni cabo në inongä incæ guëa gocæcäimpa. Önetimo cöwë ædæmö cæte në pönengä ingampa, ante adinque mönitö tömengä ingante waadete pönëmönipa. Ininque tömëna iïömö, Pabodoidi weca æbänö cædänii, ante tömänö ante apænedä ëñencämïnimpa.

¹⁰Botö tönö guëa tee mönete ongongä Aditadoco iïömö tömengä munitö imïnite, Waa quëwëedäni, angampa. Ayæ Bedënahee nänö wænquicä Mäadoco adobai, Waa quëwencämïnimpa, angampa. Tömengä ingante æbänö waa cæquiï, ante do ämo ëñëmïnitapa. Ininque tömengä pongä adinque waa cædäni. ¹¹Ayæ wacä Itota Yoto näni änongä adobai, Waa quëwencämïnimpa, angampa. Botö Wængonguï Awënë Odeye nempo quëwënäni beyæ cæyömo oodeoidi incæ wadäni cædämaï iïönänite mäninäninque botö tönö godongämæ cædinque pönö ædæmö cædäni æninque botö wampo pönentabopa.

¹²Ayæ mïni cabo inongä inte Epapada iïömö tömengä Itota Codito ingante në cædongä inte adobai, Waa quëwëedäni, angampa. Tömengä Wængonguï ingante nangui apænedinque, Codotenteidi inänite bitö godö cæbi ate tömënäni picænäni

baï bacædänimpa. Ayæ bitö angainö tömänö ante eñente cædäni inte tömënäni tæï piñænte ewocacædänimpa, ante tömengä mïnitö beyæ ante cöwë apænecampa. ¹³Mïnitö beyæ tömengä nanguï cæcampa. Daoditea iñömö näni pönencabo beyæ adobaï Yedapodi iñömö näni pönencabo beyæ adobaï tömengä nanguï cæcampa, ante botö näwangä apænebo eñeedäni. ¹⁴Ayæ, Waa bacædänimpa, ante mönö në cædongä tömengä emöwo Odoca tömengä iñömö mönö në waadecä ingampa. Tömengä tönö Deëma, Waa quëwencæmïnimpa, ante adobaï änapa. ¹⁵Ayæ botö Pabodobo beyæ ante wæætë Daoditea iñömö mönö tönïñadäni inänite mïnitö, Waa quëwëedäni, äedäni. Diimpa inante, Waa quëwëedä, äedäni. Ayæ Codito ingante näni pönencabo tömënä oncönë godongämæ ponte apæneyönänite mïnitö wæætë botö beyæ apænedinque, Pabodo, Waa quëwëedäni, angampa, äedäni.

¹⁶Ayæ iïnta botö cadota ante yewæmöinta iïnque adinque mïnitö, Daoditea iñömö Codito ingante näni godongämæ pönencabo adobaï acædänimpa, ante cædinque da godömini ænte acædänimpa. Ayæ daoditeaidi inänite botö cadota ante yewæmöninta adobaï ämini da pönönäni äninque aedäni.

¹⁷Ayæ Adoquipo ingante apænedinque, Bitö mönö Awënë pönö angä eñënimmi inte bitö cæquënënö ante tömää ædæmö cæe, äedäni. ¹⁸Botö Pabodobo tömëmo önompoca yewæmöninque, Waa quëwëedäni, ante tömëmo emöwo ante yewæmömopa. Botö æbänö yæguincamë encapote wæboï, ante pönëninque mïnitö Wængonguï ingante apæneedäni ämopa. Wængonguï waadete nänö pönö cædö ænte entawencæmïnimpa, ante mäninque ante yewæmömopa.

1 Tetadönitenteidi

inänite Pabodo cadota ante tänota nänö yewæmongainta

Pabodo, Waa quëwëedäni, ante apænecäimpa

1 Botö Pabodobo inömo imopa. Mönö töninäda Tidibänö tönö Timoteo tönö godongämæ apænete ate yewæmömo aedäni. Mönö Mæmpo Wængongui nempo ayæ mönö Awënë Itota Codito nempo quëwëninque minitö Tetadönica inömö quëwëninque Codito ingante godongämæ mini pönencabo ëñeedäni. Mönö Wængongui waadete pönö cæcä ate minitö gänë entawencæminimpa, ante yewæmömönipa.

Tetadönitenteidi näni wede pönönö

²Mönitö möni apæneyedë minitö tömämini beyæ ante Wængongui ingante cöwë waa ate pönëninque apænemönipa. ³Minitö Itota ingante æbänö wede pönente cæmini iminipa, ante ayæ tömengä ingante waadete pönëninque æbänö cæmini iminipa, ante cöwë apænemönipa. Ayæ minitö wæwëmini incæ, Mönö Awënë Itota Codito pongä ate watapæ bacäimpa, ante pönëninque æbänö wæntæye inämaï ee cæmini iminipa, ante adinque mönitö Wængongui mönö Mæmpo weca æyedëmë ponte apænedinque cöwë mäninö ante pönëninque apænemönipa. ⁴Mönitö töninämini, minitö Wængongui nänö në waademini inömini inte ëñeedäni. Tömengä minitö iminite apænte ængacäimpa, ante do ëñëmönipa. ⁵Edæ Itota ingantedö ante mönitö watapæ möni apænedö ante wii önonquedö ante apænetamönipa. Wæætë Wængongui nämä tæi piñænte në angä beyænque mönitö minitö iminite apænedinque Awënë inte bai apænetamönipa. Wængongui Önöwoca mönitö tönö godongämæ cæcä beyænque mönitö mäninö möni watapæ apænedö ante, Nö impa, ante ædæmö pönëninque apænetamönipa. Mänömaï apænemöni ëñëmüni adinque mönitö, Wængongui minitö iminite apænte ængacäimpa, ante do ëñëmönipa. Ayæ minitö weca quëwëninque mönitö æbänö minitö beyæ ante quëwentamönii, ante do ëñëmünipa.

⁶Wængongui Önöwoca watapæ nänö topämo ante pönongä ænimüni inte minitö nanguï caate wæmini incæte Wængongui nänö angainö ante ëñëninque Ao ante æminitapa. Mönitö æbänö cæmönii, ante adinque Awënë Itota Codito æbänö cæcäa, ante adinque minitö adobai möni cæbai cæmini baminitapa. ⁷Ininque Mäatedönia bæ quëwënanäni tönö Acayabæ quëwënanäni inömö Itota Codito ingante në pönënanäni inönäni inte tömënanäni tömänäni müni cædi adinque müni cæbai adobai cædanitapa. ⁸Minitö wede pönëninque apænemüni beyænque Wængongui nänö angainö ante Mäatedönia bæ quëwënanäni tönö Acayabæ quëwënanäni ëñënanäni incæte wii mänii mëñömongaque inömö quëwënanäni ëñënanäni. Wæætë ædömë quëwënanäni inönänite wadäni minitö Wængongui ingante müni wede pönëmämo ante tededäni do ëñënanäni.

Ininque mönitö mänii beyæ quüante godömenque apænequüi. ⁹Edæ, Mönitö minitö weca ëñacæ pöninque apænemöni ëñëninque minitö æbänö watapæ ëñëmünitapa, ante mäninäni në pönënanäni incæ apænedäni ëñëmönipa. Ayæ adodäni minitö

iminitedö ante iimaï ante apænedänipa. Minitö, Mönitö wængonguiidi impa, ante mîni cönönincacoo incæ ëmö cæte wadæ pöninge mönö Wængongui gämænö pömînitapa, ante apænedäni ëñëmönipa. Ayæ, Nâwä Wængongui nè Quëwëongä ingante ëñente cæcæmönimpa, ante pömînitapa, ante apænedäni ëñëmönipa. ¹⁰ Ayæ tömengä Wengä öönædë nè quëwëongä inte ocæ ëmænte poncæcäimpa, ante mînitö wänö cömîni iminipa, ante apænedäni ëñëmönipa. Tömengä do wængaingä iñongante Wængongui, Nâni ömæmöe, angä nè nâni ömæmongaingä ingampa. In-
 inge Wængongui mönö imonte nänö pïnte panguimämo ante wæyömonte tö-
 mengä Wengä iñömö ængä beyænque quëwenguimö imompa.

Pabodo Tetadönica iñömö nänö cædö

2 Mönitö tönînamîni ëñeedäni. Mönitö mînitö weca möni ëñacæ pönedë möni cædinö wîi önonque impa, ante mînitö do ëñëmînimpa. ² Mönitö do mîni ëñëninö bai mönitö wëenëñedë Pidipoto iñömö quëwëñömönite mänîñömö quëwëñäni mönitö imönite wënæ wënæ cædäni beyænque wæwente intamönipa. Adodäni mönitö imönite, Minitö wënæ wënæ cæmîni iminipa, ante tedewëñäni ëñëninge wætämönipa, ante mînitö adobai ëñëmînimpa. Ayæ mînitö weca ponte quëwëñömönite waodäni tæiyænäni mönitö imönite Baa ante, Minitö apænedä-
 maï incæmînimpa, ante wææ änäni incæte Wængongui mönitö tönö godongämæ
 cæcä beyænque tömengä ingantedö ante watapæ möni apænedö ante mînitö imînite
 guiñëñämaï apænetamönipa.

³ Edæ mönitö, Wængongui ingante pönëmîni iñingue waa imaimpa, ante mînitö imînite nanguï apænemöni inte wîi babæ wapiticæ pönëninge apænemönipa. Wîi wentamö entawëninge pönente apænemönipa cæmîni. Ayæ adobai, Minitö oda cæcæmînimpa, ante cædämaï inte mönitö wîi wapiticæ apænemönipa. ⁴ Wæætë Wængongui mönitö imönite apænedingue, Waa cæmîni abopa, äninge, Minitö Itota ingantedö ante botö watapæ apænedö ante nè apænemîni ëñencædänimpa, ante angä ëñëninge mönitö nè apænemöni imönipa. Mönitö, Waodäni mönitö imönite waa acædänimpa, ante cædämaï inte wæætë, Wængonguinge mönitö imönite waa acæcäimpa, ante cædîninge apænemönipa. Edæ tömengä, Æbänö entawëmîni, ante mönö entawëñömö ante nè acä ingampa. ⁵ Wadäni nämä beyænque ante, Waa tedemöni ëñëninge mönitö imönite wæætë pönö cæcædänimpa, ante babæ cædäni bai mönitö iñömö dicæ mänömainö ante mînitö imînite babæ cætamöniyaa. Mänömainö ante do ëñëmînimpa. Ayæ, Mönitö wîi mînitö godonte äinta ante beyæ apænetamönipa, ante do ëñëmînimpa. Æbänö cætamönipa, ante Wængongui nè acä ingampa. ⁶ Waodäni mönitö imönite waa acædänimpa, ante mönitö dicæ ämönitawogaa.

Ayæ, Minitö incæ wadäni incæ mönitö imönite waa acædänimpa, ante dicæ ämönitawogaa. ⁷ Edæ, Itota Codito nänö da godongaimöni inömöni inte mönitö mînitö imînite, Pönömîni äninge quëwencæmönimpa, ämöni bai waa incædön-
 impa. Wæætë mînitö weca quëwëninge mönitö wäänä nänö wëñænäni guiyanäni
 inänite ædæmö cædä bai adobai mînitö imînite cætamönipa. ⁸ Minitö imînite nan-
 guï pöni waadete pönëmöni inte mönitö, Itota ingantedö ante Wængongui nänö wat-
 apæ apænedö ante mînitö imînite apænedingue watapæ totamönipa. Ayæ mînitö nö
 möni nè waademîni iñömînite mönitö mînitö beyæ quëwentamönipa. Ayæ mînitö
 beyæ wæmöni incæ adobai watapæ tobaïmönipa. ⁹ Mönitö tönînamîni ëñeedäni.

Nangui pōni mōni cædinō ante mīnitō do ēñēmīnīpa. Itota ingantedō ante Wængongui nānō watapæ apænedō ante mōnitō mīnitō weca quēwente apænedīnque, Mōni quēwengæīmpa, ante wīi eyepæ godō wædō ante dicæ antamōniyaa. Wæætē edæ, Mīnitō wædāmaī incæmīnīmpa, ante mōnitō itadē incæ woyowotæ incæ tōmēmōni nangui cædinque ænte quēwentamōnīpa.

¹⁰ Mīnitō nē wede pōnēmīni weca quēwēnīnque mōnitō tæiyæ waēmō ewocamōni inte nō cæte quēwēñōmōnite mīnitō, Wēnæ wēnæ cæmīnīpa, ante ædō cæte anguīmīni. Wæætē mōnitō cædinō adīnque mīnitō, Mōnitō æbānō quēwēmōni imōni, ante do amīni inte nē apænēmīni imīnīpa. Wængongui adobaī ante do acā ingampa. ¹¹ Edæ waocā mæmpocā tōmēngā wēñænāni iñōnānite tōmēngā, Mīnitō ēñenguīmīni, ante odōmongā baī mōnitō adobaī mīnitō tōmāmīni iñōmīnite adocanque adocanque ingante, Bitō ēñenguīmīni, ante odōmonte apænetamōnīpa. Mānōmaī cætāmōnīpa, ante mīnitō do ēñēmīnīpa. ¹² Mīni quēwēnō adīnque Wængongui tocæcāīmpa, ante cædinque mīnitō tæiyæ waēmō quēwencæmīnīmpa, ante mōnitō nangui apænetamōnīpa. Ayæ, mīnitō mānōmaī cæte quēwencæmīnīmpa, ante waadete apænetamōnīpa. Ayæ adobaī mōnitō wæætē wæætē apænedīnque mīnitō imīnite adodō ante ancaa apænetamōnīpa. Wængongui iñōmō, Botō Awēnē Odeye nempo quēwēnīnque mīnitō botō ñāō emōñōmō botō tōnō godongāmæ quēwencæmīnīmpa, ante tōmēngā mīnitō imīnite aa pedīnque apænte ængampa.

¹³ Ayæ adobaī mōnitō Wængongui nānō angaiñō ante mīnitō imīnite apænēmōni ēñēnīnque mīnitō ō ænte do pōnēmīnitapa. Nāwangā Wængongui nānō angaiñō impa, ante adīnque mīnitō, Wīi waodānīque nāni angaiñō impa, ante pōnēnīnque wæætē, Nāwangā Wængongui nānō angaiñō impa, ante pōnēnīnque ō æmīnitapa. Iñīnque mīnitō nē wede pōnēmīni inte Wængongui nānō angaiñō entawēmīni beyænque nangui cæmīni imīnīpa, ante ēñēnīnque mōnitō Wængongui ingante cōwē waa ate pōnente apænēmōnīpa. ¹⁴ Oodeabæ iñōmō Wængongui ingante godongāmæ nāni pōnencabo iñōmō tōmēngā nempo quēwēñōnānite oodeoidi tōmēnāni inānite togænte pānāni wædāni baī mīnitō mōnitō tōniñāmīni iñōmīni mīnitō ōmæ iñōmō nē quēwēnāni incæ mīnitō imīnite adobaī cædāni wæmīnitapa. Mānōmaī cædāni wædinque mīnitō Oodeabæ iñōmō Wængongui ingante godongāmæ nāni pōnencabo wædāni baī adobaī wæmīni bamīnitapa.

¹⁵ Oodeoidi iñōmō Wængongui beyæ nē apænēgaiñāni inānite wænōnāni wængadānīmpa. Ayæ ate tōmēnāni pæināni iñōmō Itota Codito ingante wænōnāni wængacāīmpa. Ayæ ñōwodāni adocabodāni incæ mōnitō imōnite adobaī togænte wido cædānitapa. Mānīnāni nāni cædinō adīnque Wængongui tōmēnāni inānite ædō cæte waa aquingāā. Adodāni incæ waodāni tōmānāni inānite piinte quēwēnōnānīmpa tōō. ¹⁶ Edæ oodeoidi ināmaī ināni inānite, Codito ængā beyænque mīnitō quēwencæmīnīmpa, ante apænedāmaī incæmīnīmpa, ante cæcæte ante mānīnāni oodeoidi incæ mōnitō imōnite Baa ānīnque wææ cædānīpa tōō. Mānōmaī cōwē wēnæ wēnæ cædinque tōmēnāni wæætē wæætē nāni wēnæ wēnæ cædincoo idæwaa cædānīpa. Idæwaa i iñīnque Wængongui nānō ængui bate piimāmo tōmēnāniya do pongatīmpa.

Tetadönitenteidi weca Pabodo ēñacæ pōinente wæcampa

¹⁷ Incæte mōnitō tōniñāmīni ēñēedāni. Tōmēnāni ānāni beyæ mōnitō mīnitō imīnite emō cæte godīnque wīi wantæpiyæ ante gotāmōnīpa. Godīnque mīnitō

iminite adāmai imōni incæte mōnitō mīnitō beyæ ante cōwē pōnentamōnīpa. Mīnitō iminite nanguī ainente wæmōni inte mōnitō, Æbānō cæte goquimōnīi, ante pōnēn-
 inque nanguī cætāmōnīpa. ¹⁸Edæ mīnitō weca pōnente wætāmōnīpa. Botō Pa-
 bodobo inōmo inte wæætē wæætē nō pōinēmo intabōpa. Mōnitō pōinēmōni incæte
 Tatāna wæætē mōnitō imōnite wææ cæcā wætāmōnīpa. ¹⁹Mōnō Itota Codito nānō
 ponguīōnæ tōmengā weca ongōninque mōnitō æbānō ante beyæ watapæ bacæimpa,
 ante pōnēmōni imōnīi. Wīi mīnitō beyænque toquimōnīi. Edæ nē pōnēmīni inōmīni
 inte mīnitō do mōni nē watapæ todōmīni imīnitapa. Ayæ waodāni tæi emonte gānā
 cædinque poganta ænte todāni bai mīnitō beyænque ante mōnitō nē toquimōni
 imōnīpa. ²⁰Nāwangā impa. Waa pōni cæmīni ininque mīnitō mōni nē waa amīni
 inōmīni inte mōni nē watapæ todōmīni imīnīpa.

3 Mānōmai beyæ mōnitō, Mīnitō iminite adāmai inte awædō, āninque, Ædō cæte
 godōmenque wānō cōmōni inguimōnīi, ante pōnēninque mōnatō adomōnaque
 Atēna iñōmō ongonguēnēmōna imōnāpa, ante pōnente wætāmōnāpa. ²Ayæ Timo-
 teo nē mōnō tōniñacā ingante mīnitō weca ante da pōnōmōna pongantapa. Tōmengā
 iñōmō Wængonguī tōnō godongāmæ cædongā iñongante Itota mōnō Codito in-
 gantedō ante mōnō watapæ apænedō ante ēñencædānīmpa, ante odōmonte apæne-
 dongā ingampa. Tōmengā mīnitō iminite, Mīni wede pōnēnō ante tæi ongonte
 quēwēedāni, ante ayæ, Wampo pōnēninque tæi piñænte cæedāni, ante ædæmō
 apænecæcāimpā, ante mōnatō tōmengā ingante da pōnōmōna pongantapa. ³Wadāni
 mīnitō iminite quiēmē cædāni caate wæmīni incæte tōmāmīni wadō pōnēnāmai inte
 nīmpo cædāmai incæmīnīmpa, ante cædinque Tīmoteo ingante da pōnōmōna pon-
 gantapa. Mōnō imonte cōwē mānōmai cædāni caate wæquēnēmō imōmpa, ante
 mīnitō do edonque pōni ēñēmīnīpa. ⁴Ayæ mīnitō weca mōni quēwēñedē mōnitō
 mīnitō iminite apænedinque,

Mōnō imonte quiēmē bai togænte panguinānidō anguēnē, ante wæætē wæætē
 apænetamōnīpa. Edæ mīnitō ēñēnō bai mānīnō do batīmpa. ⁵Mānōmai beyæ botō,
 Ædō cæte godōmenque wānō cōmo inguimoo, ante, Mīni wede pōnēnō æbānō impa,
 ante botō ēñencæboimpā, ante Tīmoteo ingante da pōnōmo pongantapa. Wēnæ
 awēnē, Oda cæe, ante nē ānewēnongā iñōmō mīnitō iminite, Oda cæedāni, angā
 ēñēninque mīnitō wabānō ēñēmīnīmpa, ante botō ancaī guñente wætābōpa. Mānō-
 mai ēñente cæmīni ininque mōnitō cædinō wo ewente babāimpā, ante pōnentābōpa.

⁶Incæte Tīmoteo mīnitō weca quēwēninque nōwoque mōnitō weca ocæ emænte
 pongantapa. Mīni wede pōnēnō ante apænedinque tōmengā, Wede pōnēnānīpa, an-
 gantapa. Ayæ, Nē waadete pōnēnāni inānīpa, ante apænecā ēñentāmōnāpa. Mīnitō
 mōnatō beyæ cōwē waa pōnēmīni imīnīpa, ante tōmengā apænecā ēñentāmō-
 nāpa. Ayæ mōnatō mīnitō iminite ainēmōna inte wæmōna bai mīnitō adōbai mō-
 natō imōnate ainēmīni inte wæmīni imīnīpa, angantapa. ⁷Mānōmai beyæ mōnitō
 tōniñāmīni ēñēedāni. Quiēmē beyæ wæmōna incæ ayæ mōnatō imōnate togænte
 pānāni wæwēmōna incæte mōnatō mīni wede pōnēnō beyænque wæætē wampo
 pōnente batāmōnāpa. ⁸Mīnitō mōnō Awēnē ingante nīmpo cædāmai pōnēmīni
 beyænque mōnatō nōwo wampo pōnente bai quēwēmōna imōnāpa. ⁹Mōnatō mōnō
 Mæmpo Wængonguī weca ongōninque mīnitō beyæ nanguī watapæ tomōna inte
 wæætē apænēmōnāpa. Incæte mīnitō beyæ ante Wængonguī ingante ædō cæte waa
 ate pōnente eyepæ apænequimōnaa. ¹⁰Mīnitō mīni wede pōnēnō ante æbānō ayæ
 wīi eyepæ pōnēmīnīi, ante wæmōnīpa. Ininque, Mīnitō iminite wæætē adinque

mönitö odömonte apäнемöni eñëninque minitö eyepä pöncæminimpa, ante cæd-
inque mönitö woyowotä itädë Wængongui ingante nö nangui pöni apäнемöni
imönipa.

¹¹ Wængongui mönö Mæmpo incæ mönö Awënë Itota Codito tönö möni go-
quïnö ante töinö pinonte bai cæda ate minitö weca gocæmönimpa. ¹² Mönitö
minitö iminite godömenque waadete pönëmöni bai mönö Awënë Itota pönö cæcä
ate minitö adobaï minitö weca wacä ingä wacä ingä godömenque godömenque
waadete pöncæminimpa, ämönipa. Ayä waodäni tömänäni inänite godömenque
waadete pöncæminimpa, ämönipa. ¹³ Tömengä pönö cæcä beyænque minitö
täimö entawente incæminimpa, ämönipa. Edæ mönö Awënë Itota quïnäni në täiyä
waëmö ewocädäni tömänäni tömengä tönö godongämä poncædänimpa. Tömänäni
näni pönedë minitö inömö Wængongui mönö Mæmpo weca pömini adinque tö-
mengä ædö cæte, Wënæ wënæ cæmini iminipa, ante anguingää. Minitö täiyä
waëmö ewocamini incæminimpa, ämönipa.

Wængongui waa acæcäimpa, ante mönö quëwënö ante

4 Mönitö töninamini eñëedäni. Adodeque ayä apänequimöni imönipa. Mini
quëwënö ante Wængongui waa acæcäimpa, ante mönitö, ïimaï quëwëedäni,
ante do wææ odömonte apäнемöni eñëminitawo. Ìninqe minitö Ao ante
quëwënömini iminipa. Nöwo inömö mönitö Awënë Itota emöwo ante apänedinque
minitö iminite, Mäninonque ante gomonga cæte quëwencæminimpa, ante ancaa
apäнемönipa.

² Awënë Itota nänö änö ante eñente cædinque mönitö minitö iminite wææ än-
inque, ïimaï cædäni, antamönipa. Mäninö möni wææ ante odömonte apänedö
ante minitö do eñëniminipa. ³ Wængongui nänö änö inömö ïimaï impa. Minitö
inömö täiyä waëmö ewocate quëwenguënëmini iminipa. Wacä nänöogä ingante
godö towente cædämaï inte edæ önonque mini nänöogænque quëwenguënëmini
iminipa. ⁴ Onguiñämäni tömämäni inömö, Botö moncæboimpa, ante cædinque
minitö, Æbänö cæte nänöogä æmo ate Wængongui tönö waodäni waa aquinäni,
ante eñenguënëmini iminipa. Minitö, Täiyä waëmö ewocadinque ængäimpa, ante
eñenguënëmini iminipa. ⁵ Wii wadäni bai, Wængongui ingante æbänö ingaingä in-
gää, ante eñënamäi inäni bai onquiyænque ante näni towënonque ante pönënamäi
quëwencæminimpa. ⁶ Mäninö ante në pönengä inömö, Botö töninacä nänöogängä
ingampa, ante pönëninque tömengä nänöogä ingante towente cædämaï ininque tö-
mengä ingante wënæ wënæ cædämaï incæcäimpa.

Ïimaï wënæ wënæ cædäni inänite Awënë Itota pancæcäimpa. Wëenëñedë mäninö
ante minitö iminite apänedinque do wææ angamönimpa. ⁷ Edæ Wængongui mönö
imonte wii, Towencæminimpa, ante apänte ængacäimpa. Wæætë, Minitö täiyä
waëmö ewocate quëwencæminimpa, ante tömengä mönö imonte apänte æng-
acäimpa. ⁸ Mänömaï beyä æcänö mäninö ante Pabodo nänö, ïimaï cædäni, ante
nänö wææ odömonte apänedö eñëninque Baa äna inömö tömengä wii waodäni
inänite eñënamäi inte Baa angä ingampa. Wæætë Wængongui minitö iminite
nänö Täiyä Waëmö Önöwoca në pönongä ingante eñënamäi inte Baa angä apa
quëwëminii.

⁹ Mini pöncæcabo mini töninadäni inönänite mini waadete pönënö ante mönitö
quïnante yewæmonguimöni. Edæ minitö tömëmini iminite, Wacä ingä wacä ingä

waadete pönencæminimpa, ante Wængongui odömönte apæneca ëñëminitapa töö. ¹⁰Nö impa. Mäatedöniabæ tömämæ iñömö mönö pönencabo mönö töninädäni tömänäni inänite do waadete pönëmini iminipa. Incæte möni töninämäni, Minitö mäninö ante gomonga cæte quëwencæminimpa, ante ancaa apænemönipa. ¹¹Minitö piyænë cæte quëwencæminimpa. Wadäni, Æbänö cæquënänäni inänii, ante cöwë änämaï incæminimpa. Ayæ, Wæntæye inämaï inte mïni önompoca cæte quëwencæminimpa. Mäninö do möni apænedö bai minitö, Cæinëmönipa, ante cæcæminimpa, ämönipa. ¹²Mänömaï cæmïni bai iimö iñö iimö iñö mïni quëwënö adinque wadäni në pönënamäi inäni wæætë minitö iminite waa acädänimpa. Ayæ adobai minitö waodäni inänite, Pönömini æncæmönimpa, ante änewënamäi quëwencæminimpa.

Mönö Awënë Itota nänö ocæ ëmænte ponguïönæ

¹³Mönitö töninämäni ëñëdäni. Në æmæwo wængainäni iñömö æbänö baquïnäni, ante minitö ëñencæminimpa, ante yewæmömönipa. Wadäni, Mönö nänö ömæmongæimpa, ante pönënamäi inäni inte wæwënäni bai minitö wii adobai wæwëmini incæminimpa, ante yewæmömönipa. ¹⁴Itota æmæwo wæningä incæ nänö ömæmonte inongäimpa, ante pönëmö imompä. Itota ingante pönente në wængainäni iñönänite Wængongui iñömö mäninäni inänite Itota tönö tömengä weca ænte mämongä poncædänimpa, ante adobai pönëmompä.

¹⁵Wængongui nänö apænedö bai mönitö iimäi ante minitö iminite apænemönipa. Awënë Itota nänö ponguïönæ mönö në miimö quëwëmö inte ayæ ongömö iñömö mönö wii täno tömengä weca gocæmöimpa. Wæætë tömengä ingante pönëninque në æmæwo wængainäni inte mäninäni iñömö täno goquïnänidö angüënë. ¹⁶Edæ mönö Awënë Wængongui nänö wææ änonque ante yedæ äñongä Wængongui anquedoidi täiyæ awënë aa pecæcäimpa. Wængongui todompeta nänö ancadeca adocanque we we öonca cæyongä mönö Awënë Codito incæ öönædë quëwente pö wææncæcäimpa. Pö wææñongä tömengä ingante në pönente wængainäni tömënäni täno nänö ömæmoncædänimpa. ¹⁷Ayæ ate Wængongui cæcä beyænque mönö në miimö quëwëmö inte ayæ ongömö iñömö mönö tömënäni tönö godongämæ boguimancodë æicæmöimpa. Boguimancodë æidinque mönö Awënë öönædë inö wææ pöñongante mönö tömengä ingante bee tencæmöimpa. Æinque cöwë Awënë weca quëwencæmöimpa. ¹⁸Mänömaï beyæ, Mönö Awënë Codito incæ öönædë quëwente pö wææncæcäimpa, ante pönëninque wampo pönencædänimpa, ante cædinque minitö wacä ingä wacä ingä ædæmö apæneedäni.

5 Nöwo mönitö töninämäni ëñëdäni. Æönædö mänii baquii, ante minitö iminite ædö cæte yewæmonguimönii. ²Edæ mönö Awënë Itota nänö ponguïönæ iñömö në awëmö ængä woyowotæ iñontobæ pö guicä bai iñontobæ baquïnö angüënë, ante minitö tömëmini waa ëñëminipa edæ. ³Waodäni, Mönö piyænë cæte guinänämaï quëwëmompä, ante nänö tedeyedë ënengä iñontobæ wëñæ nantate wacä bai tömënäni adobai iñontobæ nänö ömæ ëwenguïnö baquïnö angüënë. Æinque ædö cæte wodii winonguïnänii.

⁴Incæte minitö mönitö töninämäni ëñëdäni. Mänöönæ nänö wæwente öönæ në awëmö ænongä pö guicä bai iñontobæ iinque bayonte minitö wii wëmö iñömö quëwëmini inte guinänämaï incæminimpa. ⁵Minitö Wængongui wëñämäni imini iinque nänö iñömö tömämäni quëwëmini iminipa. Mönö cöwë wentamö iñömö

cædonāni bai wīi imōimpa. ⁶Mānōmaī beyæ mōnō wīi wadāni mō nōnāni bai mongæimpa. Wæætē mōnō nāni omæmōninque nāmā wææ ante quēwēmō ingæimpa. ⁷Edæ tōmēnāni nē mōnāni iñōmō woyowotæ mōnāni inānīpa. Ayæ wadāni tī nāmæ bedinque nē quidi quidi dowænte ināni iñōmō woyowotæ bete badānīpa. ⁸Incæte mōnō nāō iñōmō cægōmō inte nāmā wææ ante quēwēmō ingæimpa. Tæineta wææ wēnate bai cædinque Itota ingante mōnō wede pōnēnō ante mōnō waadete pōnēnō ante mōnō entawente quēwengæimpa. Tæineta ocabogata wææ encate bai cædinque mōnō edæ, Wængonguī ængā beyænque quēwencæmōimpa, ante pōnēnō ante mōnō ēwocate quēwengæimpa. ⁹Edæ Wængonguī nānō ænguī bate pīnguimāmo ante tōmengā, Wīi wæwencæminīpa, ante mōnō imonte apænte ængacæimpa. Wæætē mōnō Awēnē Itota beyæ tōmengā mōnō imonte ængā beyænque quēwencæmōimpa. ¹⁰Tōmengā, Botō tōnō quēwencæminīpa, ante mōnō beyæ wængacæimpa. Inīnque mīi imō incæ wænte imō incæ mōnō cōwē tōmengā weca quēwencæmōimpa. ¹¹Mānōmaī beyæ mīnitō iñōmō do cæminī bai gomonga cæedāni. Wampo pōnencædānīpa, ante cædinque mīnitō wacā ingā wacā ingā ædæmō apænedinque, Æmæwo pægaimīni inte tæi pīnænte cæedāni, ante odōmonte apæneedāni.

Mōnō tōniñadāni inānite Pabodo nānō ānō

¹²Nōwo mōnitō tōniñamīni ēñeedāni. Mīnitō imīnite iūmaī apænemōnīpa. Mīnitō weca nē nanguī odōmonte apæneedāni iñōnānite mīnitō tōmēnāni inānite waa acæminīpa, amōnīpa. Edæ Awēnē Itota apænte nānō ænīnāni inte tōmēnāni, Mīnitō iūmaī waa quēwēedāni, ante mīnitō imīnite nē aadāni inānīpa. ¹³Tōmēnāni nāni cædō beyænque mīnitō tōmēnāni inānite godōmenque nanguī waa amīni inte waadete pōneedāni. Mīnitō wacā ingā wacā ingā piyænē cæte quēwēedāni.

¹⁴Mōnitō tōniñamīni ēñeedāni. Mīnitō imīnite iūmaī ante ancaa amōnīpa. Wæntæye ināni inānite wææ ante apæneedāni. Guīñente ināni wampo pōnencædānīpa, ante tōmēnāni inānite ædæmō apæneedāni. Æmæ pōnēnāni tōnō godongāmæ cæedāni. Wadāni tōmānāni inānite mīnitō waadete ee cæedāni amōnīpa.

¹⁵Æcāmenque ingante wadāni wēnæ wēnæ cædāni adinque mīnitō Baa amīni beyænque mānīnāni wæætēdō wæætē nāmæ wēnæ wēnæ cædāmaī incædānīpa. Wæætē wacā ingā wacā ingā cōwē waa cæcæmōnīpa, ante pōnēninque cæedāni. Ayæ wadāni tōmānāni inānite adobaī cæedāni.

¹⁶Mīnitō cōwē watapæ tote quēwēedāni. ¹⁷Wængonguī ingante woyowotæ itædē apænete quēwēedāni. ¹⁸Mīni quēwenganca quīēmē bai ba incæte mīnitō cōwē Wængonguī ingante waa ate pōnēninque apæneedāni. Edæ Itota Codito nempo nē quēwēmīni inte mānīnō ante mīnitō beyæ ante Wængonguī nānō ānō impa.

¹⁹Wængonguī Ōnōwoca nānō cæinō adinque mīnitō tōmengā ingante ædō cæte, Cædāmaī iē, ante wææ anguimīni. ²⁰Wængonguī beyæ nē apæneedāni nāni apænedō ēñēninque mīnitō badete todāmaī quēwēedāni. ²¹Wæætē woadāni nāni apænedō tōmānō ante ēñēninque, Æbānō i, ante edonque ēñengæimpa, ante cædinque mīnitō, Nō nāni ānō i, Babæ nāni ānō i, ante pōnēninque do ēñencæminīpa. Waa ānō impa, ante ēñēninque mīnitō mānīnō ante ō ænte bai quēwēedāni. ²²Quīēmē wēnæ wēnæ cæquīi, ante adinque mīnitō Baa ante gomō aedāni.

²³Wængonguī incæ nē piyænē cædongā inte pōnō cæcā beyænque ædæmō tæiyæ waēmō entawēmīni incæminīpa. Awēnē Itota mōnō Codito tōmengā nānō

ponguinganca mīnitō iñōmō Wængonguī pōnō cæcä ate mīnitō mīmō incæ önö-woca incæ baonga incæ wënæ wënæ cædāmaī incæmīnimpa. ²⁴Wængonguī nānō nē apænte ænimīni iñōmīnite tōmengä mīnitō imīnite cōwē pōnēninque tōmengä nānō änō bai ædæmō cæcæcäimpa.

Pabodo, Waa quëwencæmīnimpa, angampa

²⁵Mōnitō tōniñamīni iñōmō ëñëedāni. Mīnitō mōnitō beyæ ante Wængonguī ingante apæneedāni. ²⁶Mīnitō pōnencabo iñōmīnite mōnitō tōmāmīni waa quëwencæmīnimpa, ante waadete pōnēninque ämōnipa. ²⁷Edæ Awënë Itota ëñëñongä botō mīnitō imīnite wææ ante, Ìi yewæmōinta adinque mīnitō mīni pōnencabo iñōmīnite adocanque ingante ämīni tōmānāni ëñëñōnāni tōmengä adotaa adinque apænecä ëñencædānimpa, ämopa. ²⁸Awënë Itota mönō Codito mīnitō imīnite waadete pōnō cæcæcäimpa, ante botō mäninque ante yewæmōmopa.

2 Tetadönitenteidi

inänite Pabodo cadota ante ayænta nänö yewæmongainta

Pabodo, Waa quëwëedäni, ante apænecampa

1 Botö Pabodobo inömo imopa. Mönö töninada Tidibänö tönö Timoteo tönö godongämæ apænete ate yewæmomo aedäni. Tetadönica inömo quëwëmini inte Codito ingante godongämæ mini pönencabo inömini inte ëñeedäni. Minitö mönö Mæmpo Wængonguï nempo ayæ mönö Awënë Itota Codito nempo quëwëmini iminipa. ²Mönö Mæmpo Wængonguï tönö mönö Awënë Itota Codito waadete pönö cæda ate minitö gänë entawencæminimpa, ante yewæmömönipa.

Itota Codito pongä ate Wængonguï apænte pancæcäimpa

³Mönitö töninämäni ëñeedäni. Mini wede pönëno godömenque pæte bai impa, ante ayæ tömämäni wacä ingä wacä ingä mini waadete pönëno waa pönï pæte bai iminipa. Mänömaï beyæ mönitö minitö beyæ ante Wængonguï ingante cöwë waa ate pönëninque apænequënëmöni imönipa. ⁴Wadäni minitö iminite quiëmë togæwëninque wënæ wënæ cædäni caate wæmini incæ quiëmë beyæ wæwëmini incæ minitö wëntæye inämaï inte ee cæminipa. Mänömaï beyæ Wængonguï ingante godongämæ nani pönencabo wayömö wayömö quëwëñönänite mönitö incæ mini cæinö ante waa adinque cöwë apænemönipa. Ayæ mini wede pönëno ante cöwë apænemönipa. ⁵Mäninö ante beyæ Wængonguï apænte nänö panguinö ante, Tömengä cöwë nö panguingänö angüenë, ante do ëñëmompä. Mänömaï beyæ minitö Wængonguï Awënë Odeye nempo guicæte ante eyepæ waa pönï bacæminimpa. Minitö do mäninö Wængonguï nempo mini öönædë quëwënguïnö beyæ wæwente quëwëminipa.

⁶Wængonguï në nö cædongä ingampa. Edæ wadäni minitö iminite wënæ wënæ cædäni ate wæwëmini inömini tömengä wæætë tömënäni inänite wënæ wënæ cæcä ate wæwëncædänimpa. ⁷Ayæ minitö në wæwëmini inöminite pönö cædinque tömengä mönitö imönite adobaï pönö cæcä ate tömämö mönö wæwënämaï baquimö imoppa.

Mönö Awënë Itota tönö tömengä anquedoidi në tæï piñante cædäni tönö öönædë ongonte pö gonga bæcote bai godongämæ wææñönäni tömämö ayömö mänömaï bacæimpa. ⁸Mönö Awënë Itota ingantedö ante mönö watapæ apænedö ante në ëñënämaï cædäni inömo, Wængonguï æbänö ingaingä ingää, ante ëñënämaï inäni inönänite tömengä mäninäni inänite pante cæcæcäimpa. ⁹Wængonguï adodäni inänite päninque æmæwo wo ewencæcäimpa. Tömënäni inömo Awënë Itota weca tömengä nänö tæï piñämämo wæmö pönï nänö emöñömö mäniñömö pö guidämaï incædänimpa, ante Wængonguï wææ cæcæcäimpa. ¹⁰Awënë Itota nänö ponguïönæ Wængonguï mänömaï cæcæcäimpa. Mäniönæ Itota quinäni inömo në tæiyæ wæmö ewocate quëwënäni inte tömengä ingante waa acædänimpa, ante poncæcäimpa. Ayæ tömengä në pönënäni weca pöñongante tömënäni tömänäni, Tömengä waa pönï cæcä amönipa, ante watapæ ancædänimpa, ante cæcæte ante poncæcäimpa. Ayæ minitö adobaï mönitö apænedö ante ëñëninque pönëmini inte tömengä quimäni inömo mönitö tönö adobaï cæcæminimpa, ante cæcæte ante poncæcäimpa.

¹¹Mänömaï beyä mönitö mīnitö beyä ante woyowotä itädē Wængonguï ingante apænemönipa. Wængonguï, Mīni quēwenguinö ante quēwencæminimpa, ante mīnitö imīnite apænte ængä ininque mönitö, Mīnitö eyepä waa pōni bacæminimpa, ante mönō Mæmpo Wængonguï ingante apænemönipa. Mīnitö, Mönitö waa cæcæmönimpa, ante mīni änö bai tömänö ante Wængonguï nänö tæi piñämämo inte iinque cæcæcäimpa, ante apænemönipa. Ayä mīni wede pönēnō beyä mīnitö cæquinö tömänö ante tömengä adobaï iinque cæcæcäimpa. ¹²Mönö Awēnē Itota pönö cæcä beyænque mīnitö waa pōni cæmīni adinque wadāni tömengä emōwo ante waa ate apænecædänimpa. Ayä tömengä mänömaï cæcä beyænque wadāni, Mīnitö waa quēwēmīni imīnipa, ante mīnitö imīnite waa acædänimpa. Mönö Mæmpo Wængonguï tönö mönō Awēnē Itota waadete pönö cæda bai mänömaï bacæimpa, ante mönitö mäninö ante Wængonguï ingante apænemönipa.

Mönö Awēnē Itota nänö ponguïönæ æbänö baquïi, ante

2 Mönitö tōniñamini ēñēdāni. Mönö Awēnē Itota Codito nänö ponguïönö ante ämönipa. Ayä tömengä æbänö, Botö weca pōedāni, ante gæcä goquimö imompa, ante apænedinque mīnitö imīnite iïmaï ämönipa. ²Mīnitö weca quēwēnāni pancadāniya iñömö, Mönö Awēnē nänö ponguïönæ do batimpa, ante änāni ēñēinque mīnitö idiquibæ pönēnāmaï bacæminimpa, ämönipa. Edæ mönitö Wængonguï beyä nē apænemöni inte möni apæneyedē incæ möni odömōnte apæneyedē incæ möni yewämōintaa yewämōñedē incæ æyedēmē incæ apænemönipa, ante mänināni iñömö mönitö imönitedö ante apænedinque, Pabodoidi mäninö ante apænedāni inānipa, ante tededāni ēñēinque mīnitö guïñente wädāmaï iedāni ämönipa. ³Æcāmenque angä æbāmē nänö änö ēñēinque mīnitö oda cæte godāmaï iedāni.

Edæ woadāni tæiyænāni Wængonguï ingante Baa ante wadæ godāni ate wacä nē wiwa cæcä inte pongä acæimpa. Ayä tömengä pongä ate mönō Awēnē nänö ponguïönæ bacæimpa. Māningä nē wiwa cædongä iñömö Wængonguï æmæwo nänö nē wo ewenguingä ingampa. ⁴Æcāmenque ingante, Wængonguï ingampa, ante woadāni waa adinque ædæ wææninque apænedāni incæ ayä quïēmē adinque, Wængonguï impa, ante waa adinque apænedāni incæ māningä nē wiwa cædongä iñömö wængonguïidi nāni nē änönāni tömänāni inānite Baa äninque nāmä ængö cæte bai cæcä inongampa. Wængonguï oncö tæiyæ waemö oncönē adocä pö guïite tæe contadinque, Botö tömēmō wængonguïmo inōmo imopa, angä ingampa.

⁵Botö mīnitö weca quēwēñedē mäninö ante mīnitö imīnite apænetabopa. Wīi ēñēmīnitawo. ⁶Adocä nē wiwa cædongä iñömö Wængonguï nänö äönæ māniönæque edonque pongä acædänimpa. Iinque quīnō beyä ante māningä ayä pönāmaï ingää, ante mīnitö ñowo do ēñēmīnipa. ⁷Adocä awēmö nänö wiwa cæpāmo incæ do ēñente cædāni inte woadāni tæiyænāni quïēmē wiwa i, ante do cædānipa. Incæte tömēnāni inānite, Wīwa cædāmaï iedāni, ante nē wææ cædongä iñömö adodö ante godömenque wææ cæcä ingampa. Nē wææ cæcä ingante guiquēnē wacä wæætē, Māninganca idæwaa, äninque ö ængä wadæ gocæcäimpa. ⁸Māniñedē nē wiwa cædongä iñömö edonque pongä acædänimpa. Incæte Awēnē Itota pöninque tömengä nänö öö guēmämāmo inte māningä ingante wæñongä wænguingä ingampa. Tömengä ñäö apāite emönongä inte pongä adinque nē wiwa cædongä guiquēnē æmæwo wo ewente bacæcäimpa. ⁹Wīwa cædongä ingante Tatāna nänö

tæi piñämämo inte da pönongä ponguingä ingampa. Tömengä nänö mä cæ bai quiëmë bamönengä cæcä adinque waodäni, Æbänö cæcää, ante oda cæte gocädänimpa. ¹⁰ Ayæ quiëmë wënæ wënæ nänö cæpämö beyæ nê æmæwo wo ewente baquinäni iñömö oda cæte godänipa. Edæ Wængongui näwangä nänö angainö ante waadete pönënamai iñönänite Wængongui tömënäni inänite, Quëwencæminimpa, ante ædö cæte ænguingää. Mänömai beyæ tömënäni æmæwo wo ewente bacädänimpa.

¹¹ Mänömai beyæ, Tömënäni nê wiwa cædongä wapiticæ nänö angainö ante pönencädänimpa, ante cædinque Wængongui tæi piñænte cæcä beyænque tömënäni babæ ante pönente oda cædänipa. ¹² Edæ Wængongui näwangä nänö angainö ante nê pönënamai inänäni inte wæætë, Mönö wentamö mongæmämö incæ waa impa, ante watapæ todinäni iñönänite Wængongui mäninäni tömänäni inänite apænte ante pancæte ante mänömai cæcampa.

Wængongui, Quëwencæminimpa, ante nê apænte æninäni

¹³ Mönitö töninämäni minitö mönö Awënë Itota nänö nê waademini inte ëñeedäni. Inguipoga badönämai iñedë Wængongui minitö iminite do, Quëwencæminimpa, ante apænte ængacäimpa, ante mönitö minitö beyæ ante tömengä ingante waa ate pönëninque cöwë apænequënëmöni imönipa. Tömengä iñömö, Botö Önöwoca pönö cæcä ate tæiyæ waëmö ewocamini inte minitö näwangä botö angainö ante pönëmäni beyæ quëwencæminimpa, ante minitö iminite ængacäimpa. ¹⁴ Itota ingantedö ante mönitö watapæ apænedö beyæ Wængongui, Quëwencæminimpa, ante minitö iminite apænte ængacäimpa. Tömengä, Awënë Itota Codito nää nänö emönö bai minitö adobai nää bai entawencæminimpa, ante cædinque minitö iminite apænte ængacäimpa.

¹⁵ Mönitö töninämäni ëñeedäni. Mänömai beyæ tæi ongonte quëwëedäni. Edæ mönitö önöne inte tedemöni ëñënimäni incæ yewæmointa yewæmömöni adinque ëñënimäni incæ minitö mönitö odömönte apænedinö ante ñimpo cædämai quëwëedäni. ¹⁶ Mönö Mæmpo Wængongui mönö imonte nê waadecä inte pönö ædæmö cæcä ate mönö, Tömengä weca cöwë quëwenguimö imompa, ante pönëninque wampo pönëmö inte quëwëmompa. Ayæ, Waa bacäimpa, ante mönö pönëmompa. Ininque tömengä tönö mönö Awënë Itota Codito, Iimäi cæcædaimpa, ante ämönipa. ¹⁷ Tömëna ædæmö apænedä beyænque minitö wampo pönëninque tæi ongonte quëwencæminimpa. Ayæ tömëna cæda beyænque minitö æmæwo pægaimini inte tömää mini waa cædö ante mini waa änö ante tæi piñænte cæcæminimpa.

Minitö mönitö beyæ ante Wængongui ingante apæneedäni

3 Adodeque ante iinque yewæmömönipa. Mönitö töninämäni ëñeedäni. Minitö mönitö beyæ ante Wængongui ingante iimäi apæneedäni. Mönitö wayömö wayömö gote möni apæneyömö mönö Awënë nänö angainö ante nangui inäni quingä ëñencädänimpa, ante apæneedäni. Ayæ, Minitö bai wadäni adobai ii änö ante Wængongui ingante waa ate pönëninque æncädänimpa, ante mäninö ante Wængongui ingante apæneedäni. ² Wadäni nê wënæ wënæ cædäni inte wiwa cædäni iñömö tömënäni mönitö imönite wënæ wënæ cædämai, ante mänii beyæ ante minitö adobai Wængongui ingante apæneedäni. Edæ wi wadäni tömänäni pönënanäni inänipa.

³Incaete mönō Awēnē cōwē ædæmō aacā inongā ingampa. Tömengā pönō cæcā ate mīnitō æmæwo pægaīmīni inte tæi pīnænte cæcæmīnīmpa. Ayæ, Tatāna mīnitō imīnite wēnæ wēnæ cædāmaī incæcāīmpa, ante Wængonguī adobaī aacā incæcāīmpa. ⁴Mīnitō imīnite möni wææ änō ante ēñēnīnque do cæmīni incæ godōmenque adodō cæcæmīnīmpa, ante Wængonguī pönō cæcæcāīmpa, ante mönitō do pönēmōnīpa. ⁵Wængonguī nānō waadete pönēnō ante ēñencæmīnīmpa, ante mönō Awēnē taadō ēñente odōmonte baī pönō odōmongā ate mīnitō mīmōnē ēñencæmīnīmpa. Itota Codito pönō cæcā beyænque mīnitō wæntæye ināmaī inte ee cæcæmīnīmpa.

Cæcæte ante mönō cæquēnēnō

⁶Mōnitō tōnīnāmīni ēñēdāni. Mōnitō mönō Awēnē Itota Codito emōwo ante mīnitō imīnite wææ amōnīpa. Mōnō tōnīnādāni pancadāniya wæntæye ināni adīnque ayæ möni odōmonte apænedō mīni ēñente ænīnō baī quēwēnāmaī ināni adīnque mīnitō iñōmō mānīnāni tōmānāni inānite gomō aedāni.

⁷Mōnitō cægaī baī mīnitō æbānō adobaī cæquēnēmīni imīnīpa, ante edæ tōmēmīni do ēñēmīnīpa. Mōnitō mīnitō weca quēwēñedē wæntæye ināmaī quēwentamōnīpa. ⁸Ayæ adobaī æcāmenque cænguī ante nāni pönōnī ænīnque mönitō ononque ænāmaī inte wæætē paga cæte cæntamōnīpa. Ayæ, Mīnitō cængūnīnque ante pönēnīnque wædāmaī incæmīnīmpa, ante mönitō, Tōmēmōni cænguī cæncæmōnīmpa, ante woyowotæ itædē nanguī cædīnque quēwentamōnīpa. ⁹Mōnitō mīnitō imīnite, Möni quēwengæīmpa, ante, Cænguī tōnō mönitō owoquīncō pönōmīni æncæmōnīmpa, ante änāmaī intamōnīpa. Mōnitō mānōmaī ante baī waa incædōnīmpa. Wæætē æbānō mönitō cætāmōnīi, ante adīnque mīnitō adobaī cæcæmīnīmpa, ante cætāmōnīpa. ¹⁰Edæ möni mīnitō weca quēwēñedē incæ mönitō mīnitō imīnite, Iīmaī cæedāni, ante wææ antamōnīpa. Adocanque nē mönō cæquēnēnō ante, Wīi cæinēmo, angā iñongante mīnitō tōmengā ingante cænguī godōnāmaī inguēnēmīni imīnīpa.

¹¹Mīnitō weca pancadāniya ononque cædāmaī a ongonte quēwēnāni inānīpa, ante änāni ēñēmōnīpa. Adodāni nē Baa ænīnque cædāmaī ināni inte wæætē, Wadāni æbānō quēwēnāni, ante godō wæntæ godō wæntæ tededāni inānīpa. ¹²Mōnitō mānīnāni inānite mönō Awēnē Itota Codito emōwo ænīnque, Mīnitō iīmō iñō iīmō iñō nanguī cæte quēwēedāni, ante wææ amōnīpa. Tōmēmīni cæte beyænque mīnitō cænguī ante cæncæmīnīmpa, ante ancaa apænēmōni imōnīpa.

¹³Mōnitō tōnīnāmīni mīnitō guīquēnē, Quīēmē waa impa, ante wæntædāmaī inte cōwē cæedāni. ¹⁴Mōnitō mīnitō imīnite iī yewæmōintaa möni yewæmongainō ate adocanque ēñēnāmaī cæcā inīnque, Tömengā æcānō ingāā, ante aedāni. Ayæ tōmengā guingo imonte wæcæcāīmpa, ante tōmengā ingante gomō aedāni. ¹⁵Mīnitō adocā ingante, Wīi wacā ingampa, ante pönēnīnque wæætē tōmēmīni biwīidi inānite ante baī tōmengā ingante wææ amīni ēñencæcāīmpa.

Waa quēwencæmīnīmpa, ante Pabodo angampa

¹⁶Mōnō Awēnē Itota nē piyænē cædongā incæ tōmengā pönō cæcā ate mīnitō æbāmenque bamīni incæ cōwē piyænē cæte quēwencæmīnīmpa. Mōnō Awēnē mīnitō tōmāmīni weca a ongoncæcāīmpa, amōpa. ¹⁷Botō Pabodobo nōwo tōmēmō onom-poca yewæmōnīnque, Mīnitō imīnite waa pönēmōpa, ante yewæmōmo aedāni. Pa-

bodo nänö yewämöinta impa, ante eñencæminimpa, ante cædinque botö tömanta yewämöninque mänömaï bai yewämömopa. ¹⁸Mönö Awënë Itota Codito mīnitö imīnite waadete pönö cæcæcäimpa, ante botö mäninque ante yewämömopa.

1 Tímoteo

ingante Pabodo cadota ante tänota nänö yewæmongainta

Tímoteo ingante Pabodo yewæmongampa

1 Botö Pabodobo inömo imopa. Itota Codito nänö në da godongaimo imopa. Itota Codito waa põni nänö inö bai mönö adobaï bacæmömopa, ante põnemompa. Ininque Itota Codito mönö në põnenongä tönö Wængongui mönö imonte në Ængaingä tönö botö imote äna ëñëñomote da godöna godïmo imopa. ²Tímoteo ëñëmi, Bitö acæbiimpa, ante bitö imite yewæmömopa. Edæ mönö wede põnenö ante apænebo në ëñëñimi inte bitö Itota Codito quimi badinque näwä botö wëmi bai inömi imipa. Ininque botö, Mæmpo Wængongui tönö Awënë Itota mönö Codito tönö bitö imite waadete põnö waa cæda ate bitö gänë entawencæbiimpa, ämopa.

Wadäni wapiticæ näni odömonte apænedö

³Botö Mäatedöniabæ iñömö põninque bitö imite, Epeto iñömö ee ongöe, nanguï antabopa. Mäniñömö wadäni babæ wapiticæ näni odömonte apænedö ante në odömonte apænedönäni inänite bitö, Minitö godömenque mäninö ante odömonte apænedämaï iedäni, ante ämi ëñencädänimpa. Mänömainö ante do botö äninö bai ñöwo adodö ante bitö imite ämopa. ⁴Ayæ, Dodäni önonque ante näni tedegainö ante põnenämaï quëwëedäni, ante bitö ancæbiimpa. Ayæ adobaï tömënäni wæmæidi tæiyänäni ante põneninque, Æmönänidö ingainäni, ante ancaa änewëñönäni bitö tömënäni inänite, Minitö mäninö ante põnenämaï iedäni, ancæbiimpa. Edæ mäninö näni tedewëno beyæ tömënäni, Æbänö i, ante nanguï wæætedö wææte änewëñänipa töö. Wææte edæ, Wængongui nänö cædö ante wede põneninque mönö cæquëñënö quiquëñë tömënäni näni tedewëno beyæ põnömenque cætimpa.

⁵Mänömainö ante äninque botö, Tömënäni mimö iïmaï entawëninque waadete põnencädänimpa, ante ämopa. Edæ mimö wæmö põni entawëninque tömënäni Wængongui ingante wede näni põnenö beyæ waadete põnencädänimpa. Ayæ adobaï nämä apænte adinque wentamö mongænämaï entawëñäni inte tömënäni waadete põnencädänimpa. ⁶Iñæmpa pancadäniya mäninö ante ëñëninque Baa ante ñimpo cæte wadæ godinque önonque ante quëwëñänipa. ⁷Möitee wodi nänö wææ yewæmongainö ante odömonte apæneinëmönipa, ante në äñäni incæ tömënäni näni odömonte apæneyedë quinö apænedänii, ante ëñëñämaï inänipa töö. Adobaï quïëmë ante apænedinque tömënäni, iïmaï impa, iïmaï impa, ante apænedäni incæte ëñëñämaï inäni inte apænedänipa.

⁸Möitee wodi nänö wææ yewæmongainö ante adinque nöingä cæmö ininque mäninö tömengä nänö wææ angainö iñömö waa ante imaimpa, ante do ëñëmompa. ⁹Möitee wodi nänö wææ yewæmongainö ante Wængongui wii në nö cädäni beyæ põnö wææ angacäimpa. Wææte në ëñëñämaï cädäni tönö wadäni mäninö ante ëñëñäni incæ në godömenque wënæ wënæ cädäni tönö tömënäni beyæ põnö wææ angacäimpa, ante do ëñëmompa. Ayæ adobaï Wængongui ingante Baa ante në quëwëñäni tönö wënæ wënæ cädäni beyæ wææ angatimpa. Në tæiyæ wæmö entawëñämaï inönäni beyæ ayæ adobaï Wængongui ingante në badete todönäni

beyä wææ angatimpa. Mæmpocä ingante wäänä inante nê wænönäni beyä ayä adobaï waocä ingante nê piinte wænönäni beyä wææ angatimpa. ¹⁰Nänöogängä inämaï iñongante nê towänäni beyä ayä adobaï onguiñænäni nänä onguiñæncaya guëa towänäni beyä wææ angatimpa. Nê cæte quëwengä bacæcäimpa, ante waocä ingante nê godonte äänäni beyä ayä adobaï nê babæ änäni beyä wææ angatimpa. Wadäni inänite, Nö ämönipa ëñëedäni, ante nê babæ änewënäni beyä ayä adobaï nö odömonte apænedö inca nê wadö ante cædäni beyä wææ angatimpa. Mäninäni tömänäni ëñencædänimpa, ante Wængonguï mäninö ante pönö wææ angacäimpa, ante ëñëmompä.

¹¹Edæ Wængonguï ñäö apäite ëmongampa, ante odömonte apæñecæbiimpa, ante tömengä nê waa inongä inte edæ tömengä watapæ nänö apænedö ante pönongä æntabopa. Ayä nö nänö odömonte apænedö ante Wængonguï nänö pönö angainö ante adodö änö impä.

Wængonguï waadete nänö pönö cædö ante

¹²Itota Codito mönö Awënë pönö cæcä beyænque botö täi ewocabo batabopa. Tömengä iñömö botö imote waa adinque, Bitö nê pönëmi inte cöwë ædæmö cæbi imipa. Ininque bitö botö beyä wadäni inänite nê cæbi bacæbiimpa, ante pönö cægacäimpa. Mänömaï beyä botö tömengä ingante waa ate pönente apænebopa.

¹³Botö wëñëñedë Itota Codito ingante nê godö babæ ante änewengäimo imopa. Tömengä ingante nê pönënäni inänite wënæ wënæ cæquïmo, ante nê togænömo inte botö nê piinte quëwengäimo imopa. Incæte botö nê pönënämaï inömo inte, Quinö cæquï, ante ëñënämaï inte cæbo adinque Wængonguï, Quëwencæbiimpa, ante pönö waadete waa cægacäimpa. ¹⁴Mönö Awënë botö imo nanguï waadete pönö cæcä adinque botö Itota Codito nempo quëwëninque nê wede pönëmo badinque nê waadete pönëmo bagaboimpa.

¹⁵Ïmaï ante nö pönï nänï änö näwangä ante impä, ante ämo ëñëmaïminipa. Itota Codito iñömö, Wënæ wënæ cæminï iminite æmo beyænque quëwenguïminï, ante inguipoga wææ pongacäimpa. Tömengä mänömaï cæcä incæte wadäni wënæ wënæ cædäni iñönäni botö tömëmoque godömenque wënæ wënæ nê cægäimo imopa.

¹⁶Mänömaï beyænque tömëmoque godömenque wënæ wënæ cægäimo iñömote Itota Codito pönö waadete angä beyænque quëwengaboimpa. Wëñëñedë botö bai nê wënæ wënæ cægäinäni inänite adinque Itota Codito, Botö weca cöwë wantæpiyæ nänï quëwenguinque pancadäniya botö imote pönenguïnäni inänipa, ante do ëñengacäimpa. Ininque tömengä, Botö nê waadete cædinque ee abo imopa, ante tömënäni inänite odömoncæte ante cædinque tömengä botö Pabodobo imote mänömaï pönö waadete waa cægacäimpa.

¹⁷Mönö Wængonguï iñömö cöwë wänämaï nê quëwengäingä inongä inte tömengä iincayæ ate adobaï cöwë wänämaï inte Awënë Odeye inongä ingampa. Tömengä awëmö iñömö quëwënongä iñongante mönö waocabo tömengä ingante ædö cæte aquï. Tömengä wæætë tömää nê ëñengaingä inongä ingampa. Ininque tömengä adocanque Wængonguï inongä iñongante mönö tömengä ingante cöwë waa aquïmö angüënë. Tömengä ingante, Bitö ñäö bai ëmömi inömi imipa, ante apænedinque mönö ñine cædämaï inte cöwë watapæ angäimpa. Cöwë iïmaï babaimpa, ante Amëë, ämopa.

¹⁸Tímoteo, botó wēmi ēñēmi. Nē pōnēnāni wēēnēñedē Wængonguī beyæ apæned-inque bitó ïmitedō ante nāni angaiñō bai adobaiñō ante apænedinque botó ïmai ämopa. Edæ tōmēnāni nāni angaiñō ante ēñente cædinque bitó tontadoidi nāni cæbai adobai bitó cæquēnēnō ante guññēnāmai inte wæætē tæi ewocate nanguī cæcæbiimpa. ¹⁹Wængonguī ingante cōwē wede pōnente incæbiimpa. Adobai mīmō entawēmi inte nāmā apænte pōnēninque wentamō mongænāmai inte bitó cōwē quēwencæbiimpa. Edæ mīni pōnencabo ïñōmīnite pancadāniya nāmā apænte änāmai ïnāni inte Codito ingante nāni pōnēniñō ante dobæ ñimpo cæte wadæ godänimpa. ²⁰Ïmēneo tōnō Adecantodo adobai Wængonguī ingante ñimpo cædinque wadæ godatapa. Ìninqe, Tömēna, Wængonguī ingante mönō wēnæ wēnæ ante babæ änāmai ingæiimpa, ante ēñencædaimpa, ante cædinque tōmēna ïnate Tatāna nempo pædæ godontabopa.

Wængonguī ingante mönō ïmai apænecæiimpa

2 Mīni pōnencabo ïñōmīnite botó tāno ïmai ämopa. Wængonguī ingante mīni apæneyedē quiēmē mīni æinēnō ante apænecæmīniimpa. Tömengä ingante waa ate pōnente apænedinque waodāni tōmānāni beyæ ante apænecæmīniimpa ämopa. ²Awēñe odeyeidi incæ pōnōmenque awēñēidi tōmānāni incæ mönō ïmonte waa aayōnāni mönō piyænē cæte quēwengæiimpa, ante cædinque mīnitō tōmēnāni beyæ ante Wængonguī ingante apænecæmīniimpa. Edæ Wængonguī ingante mönō cæquēnēnō ante ayæ waodāni ïnānite mönō cæquēnēnō ante mönō waa cæte quēwencæmōiimpa, ante Wængonguī ingante awēñēidi beyæ ante apænecæmīniimpa. ³Mänōmainō ante mönō apænedō ïñōmō waa impa. Wængonguī mönō ïmonte nē Ængäingä ïnongä inte mäninō mönō apænedō ante waa acampa. ⁴Waodāni tōmānāni nāwangä botó angaiñō ante ēñencædänimpa, ante Wængonguī pōnō ængä beyænque quēwencædänimpa, ante nē waa cæinēnongä ingampa.

⁵Edæ adocanque Wængonguī ïnongä ingacæiimpa. Tömengä waodāni ïnānite adinque, Wadāni bai ïnānipa, ante nāñēñē quēwengacæiimpa. Ìninqe Itota Codito nē Waocä ēñagaingä inte tæcæguedē adocanque nē pongä inte, Waodāni Wængonguī guiddēnāni badinque adoyōmō bee tente godongāmæ quēwencædänimpa, ante pōnō cægacæiimpa. ⁶Tömengä ïñōmō mönō ïmonte ante godonte æncæte ante cædinque nāmā wepæ incæ godoncæte ante nē pongä ingacæiimpa. Wængonguī, Ìñonæ, ante nāñō angaiñonæ incæ ïinque bayonte mäninō Codito nāñō cægaiñō ante, Nō impa, ante tōmānāni ïnānite nē odōmongä ingacæiimpa. ⁷Mäninō ante bitó nē apænebi bacæbiimpa, ante Wængonguī botó ïmote angä ēñēninque botó tōmengä nāñō nē da godōmo batabopa, ante nāwangä ämopa. Edæ babæ änāmai ïmopa. Ayæ nāwangä mönō pōnēnō ante Wængonguī, Wadāni oodeoidi ïnāmai ïnāni adobai pōnencædänimpa, ante cædinque botó ïmote angä ēñēninque botó tōmengä nāñō nē odōmonte apænedōmo ïmopa.

⁸Wayōmō wayōmō godongāmæ mīni pōnencabo ongonte mīnitō onguññæmīni ïñōmō nē piñnāmai ïmīni inte Wængonguī ingante apænemīni adinque botó waa tobaïmopa. Wadāni ïnānite nē piinte wæætēdō wæætē änāmai inte wæætē tæiyæ waēmō entawēmīni inte Wængonguī ingante pædæ æmpote apænecæmīniimpa, ante aïnēmopa.

⁹Ayæ onquiyæmīni ïñōmō waēmō weocoo mongæmīni incæte mīnitō, Botó waēmō weocoo mongæmo adinque wadāni botó ïmote waa acædänimpa, ante

änämaï inte nämä baö ante guññenate pönëninque weocoo ædæmö wëñate mongæncæminimpa. Minitö ocaguï que que cæmini incæte oodo badöi tönö pededamö nani ämö wente cædämaï incæminimpa. Waëmoncoo nani nanguï godonte ænincoo nani waa acoo ante minitö mongænämaï incæminimpa. ¹⁰ Wæætë edæ Wængonguï ingante, Bitö Wængonguï Awënë imidö anguënë, ante nê watapæ apænemini imïni ïnque minitö miini apænei bai cædinque miini waa cæquënënö ante pönencæminimpa. Mänömainö ante pönente quëwencæminimpa, ante adobaï ainëmopa. ¹¹ Wadäni apæneyönäni minitö onquiyæmini tededämaï inte ëamonca ongonte ëñencæminimpa. Ayæ nê ämöni möni änö ante ëñëninque wadö pönënaï maï inte do ëñente cæcæminimpa, ämopa.

¹² Godongämæ miini pönencabo weca ongonte minitö onquiyæmini ïñömö odömonte apænedämaï incæminimpa, ante botö wææ ämopa. Ayæ adobaï onguïñæmini iminite onquiyæmini ïñömö, ïmaï cæedäni, ante änämaï incæminimpa, ante wææ ämopa. Wæætë tededämaï ëñencæminimpa. ¹³ Wængonguï edæ onguïñængä Adäö ingante täno badöninque ayæ onquiyængä Eba ingante badongacäimpa. ¹⁴ Ayæ Tatäna wii Adäö ingante wapiticæ mäocä oda cægacäi. Wæætë Eba ingante æpiticæmë mäocä oda cædinque do wënæ wënæ cæcä bagacäimpa. ¹⁵ Incæte onquiyænäni Wængonguï ingante godömenque pönëninque cöwë waadete pönënanï inönäni inte nê nö pönente tæiyæ waëmö entawënäni ïnque tömënäni wëñænäni inänite mäñönänite Wængonguï wææ aacä beyænque quëwencædänimpa, ämopa.

Godongämæ mönö pönencabo ïñömonte nê aadäni

3 ïmaï ante nani änö nö pönï ante impa. Godongämæ mönö pönencabo ïñömonte, Aacæboimpa, ante nê angä ïñömö tömengä waa cæquïnö ante pönö cæinengä ingampa. ² Incæte wadäni, Wënæ wënæ cæcä ingampa, ante änämaï incædänimpa, ante cædinque nê aacä wæætë waa quëwenguënengä ingampa. Edæ tömengä nänöögænä adodanque nê manguiwengä incæcäimpa. Tömengä töö pönente nö quëwengä incæcäimpa. Nöinö cæcæimpa, ante pönëninque nämä wææ ante nê cæcä incæcäimpa. Waodäni botö imote waa acædänimpa, ante cædinque waa quëwencæcäimpa. Waodäni inänite, Botö oncönë pö cæedäni, ante cöwë nê watapæ angä incæcäimpa. Ayæ tömengä nê waa odömonte apænecä incæcäimpa. ³ Nê aacä ti nämæ bete beyæ quidi quidi dowænämaï quëwenguënengä ingampa. Wacä ingä do piinte cædämaï ïnongä inte wæætë ædæmö cæcä inte quëwencæcäimpa. Tömengä piyænë cæcä incæcäimpa. Tömengä godonte nani äinta ante waadete pönente wädämaï incæcäimpa ämopa.

⁴ Nê aacä tönö godongämæ quëwënäni inänite tömengä waa aaquënegä ingampa. Tömengä wëñænäni inänite ædæmö aacä beyæ tömënäni wæætë tömengä ingante waa adinque tömengä nänö änö ante ëñente cæte quëwencædänimpa. ⁵ Edæ nê aacä tönö godongämæ quëwënäni inänite tömengä wii waa aacä ïnque Codito ingante godongämæ mönö pönencabo ïñömonte ædö cæte waa aacä inguingä.

⁶ Itota Codito ingante ñowo tæcæ pönëningä wii nê aacä baquënegä ingampa. Edæ mänömaï ïnongä ïñongante minitö, Nê aabi imipa, ämini ïnque tömengä nämä incæ, Adoboque waa cæbo imopa, ante pönengä ïmaingampa. Wënæ awënë mänömaï pönengä beyænque Wængonguï tömengä ingante apænte nänö panguïnö bai nê aacä ingante adobaï apænte pämaingampa. ⁷ Ayæ adobaï Itota Codito ingante nê pönënaïmaï inäni nê aacä ingante adinque, Tömengä nê waa cæcä ingampa,

ante acædänimpa, ante cædinqe tömengä waa quëwenguënegä ingampa. Tömengä waa cædämaï ingä adinqe tömënanï wæætë, Tömengä wënæ wënæ cæcä ingampa, ante pïimainänipa. Tömengä waa cædämaï ingä pïinänï ïninqe wënæ awënë ïñömö, Tömengä oda cæcæcäimpa, ante godö cæcä ate tömengä do wënæ wënæ cæcä babaingampa.

Mönö pönencabo tönö godongämä nê cædäni

⁸Mönö pönencabo tönö godongämä nê cædäni ïñömö adobaï, Mönö eyepæ cæte quëwëmö ïninqe wadäni mönö ïmonte waa acædänimpa, ante cædinqe waa quëwenguënenänï inänipa. Nê cædäni nämä nänï änö bai ante nö cæcædänimpa. Tömënanï yowepæ wædænque tï nämä biñömä nänï ämæ wïï nanguï becædänimpa. Babæ cæmöni incæte godonte nänï äinta cöwë godömenque æncæmönimpa, ante wadäni nänï pönëwënonque ante ïinänï wæætë mäninö ante pönënamä incædänimpa. ⁹Edæ nämä apænte pönëninque wentamö mongënamäi entawënanï inte tömënanï Wængonguï nänö wë wodonte angainö ante tæcæ ëñëninque tömënanï, Nö pönï mönö pönëno impa, ante cöwë wede pönenguënenänï inänipa. ¹⁰Ayæ mäninänï inänite minitö, Quinö cæmïni iminiï, ante ëñencæte ante cöwä acæminimpa. Ayömïni tömënanï cöwë waa cæte quëwënanï adinqe minitö wæætë tömënanï inänite, Minitö mönö pönencabo tönö godongämä nê cæmïni bacæminimpa, ante ämïni bacædänimpa.

¹¹Tömënanï nänöogæidi inänite wadäni waa acædänimpa, ante cædinqe adobaï eyepæ cæte waa quëwenguënenänï inänipa. Mäninänï ïñömö wadäni inänitedö ante babæ änämaï incædänimpa. Wæætë adodäni cöwë töö pönente nö quëwënanï incædänimpa. Tömënanï cöwë pönëninque, ïïmaï cæcæmönimpa, ante nänï äninö bai ædæmö cæcædänimpa. ¹²Mönö pönencabo tönö godongämä nê cæcä ïñömö tömengä nänöogænä adodanque nê manguïwengä incæcäimpa. Tömengä wëñænänï inänite ayæ tömengä tönö godongämä quëwënanï inänite tömengä nê waa aaquënegä ingampa. ¹³Mönö pönencabo tönö godongämä nê cædäni ïñömö, Nê waa cædinänï inänipa, ante adinqe mönö tömënanï inänite waa ämompä. Ayæ mänömaï waa cædinänï inte mäninänï, Itota Codito ingante pönëedäni, ante guïñënamäi apænecædänimpa.

Wë wodonte nänï angainö edonque pönï batimpa, ante

¹⁴Quingæ bitö weca acæ poncæboimpa, ante pönëmö incæte botö, ïïmaï cæe, ante bitö ïmite yewämömopa. ¹⁵Botö wæætë wïï quingæ pömo ïninqe bitö, Mönö Wængonguï tönö godongämä quëwencabo ïñömö inte mönö æbänö cæquïï, ante bitö ëñencæbiimpa, ante yewämömopa. Edæ Wængonguï nê Quëwengaingä quimö ïñömö inte mönö Codito ingante godongämä mönö pönencabo ïñömö mönö cobacædewæ tæi ongö bai tömengä nö nänö angainö ante ñimpo cædämaï inte wæætë wææ cæmö ïmompä. ¹⁶ïïmaï ante nö pönï impa. Wængonguï ayongä mönö æbänö waa cæte quëwenguïï, ante Wængonguï wë wodonte nö nänö angainö incæ ñöwoyedë edonque pönï mönö ëñëno ïñömö waa pönï impa. ïïmaï impa.

Wængonguï inguipoga ïñömö ponte ëñadinqe Waocä bacä agadänimpa. Tömengä ingantedö ante Wængonguï Önöwoca, Mäningä waëmö quëwënongä ingampa, angacäimpa.

Tömengä ingante Wængonguï anquedoidi do agadänimpa.

Wabæca wabæca nāni quëwencabo inānite Itota nānō cægainō ante apænegatimpa. Tömämæ quëwënāni pancadāniya tömengä ingante pönente bagadānimpā. Ayæ tömengä nāō bai ëmōninque öönädë iñömö ocæ ëmænte gogacāimpā. Mänömainō ante nāni ämotamini änö bai impā.

Në pönënāni pancadāniya wadæ goquïnāni inānimpā, ante

4 Wængongui Önöwoca iīmaī ante edonque pōni apænecampa. Iīnque iñönæidi bayonte Codito ingante në pönënāni incæ pancadāniya nimpō cæte tömengä ingante pönënāmaī bacädānimpā. Iīnque önöwocaidi incæ në, Wapiticæ oda cæcädānimpā, ante në wënæ wënæ cædönāni miñæ tee empo gocädānimpā. Goyönāni wënæidi nāni odömōnte apænewënö ëñente cæquïnāni inānimpā. ²Në babæ änāni në wadö tedete wadö cædāni iñömö tömënāni mäninö wënæidi nāni odömōnte apænewënö ante në odömōnte apænedāni inānimpā. Iīnāni guiquënë tömënāni nāmā nāni apænte pönënö ante ömætawënāni inte wënæ wënæ nāni cædinö ante wädāmaī quëwënānimpā. ³Mänināni iñömö waodāni inānite wææ äninque, Minitö, Botö nänöogängä, ante onquiyängä ingante mönāmaī iedāni, änānimpā. Ayæ adobai mönö waa cængui adinque pancaa ante, Cænāmaī iedāni, ante wææ änānimpā. Iñæmpā Wængongui edæ tömäā cængui badongacāimpā. Tömengä, Botö imote waa ate pönente apænedinque në pönënāni iñömö botö nö angainö ante ëñënönāni inte cængui ænte cæncädānimpā, angampa.

⁴Edæ Wængongui nānö badongaincoo tömancoo waa pōni i iñonte mönö Wængongui ingante waa ate pönente apænedinque tömäā cængui æmō iīnque pancaa ante ædö cæte Baa ante ænāmaī inguii. ⁵Iñæmpā Wængongui nānö angainö beyænque ayæ tömengä ingante waa ate pönente apænemö beyænque tömäā cængui iñömö tæiyæ waëmö cængui bapā.

Itota Codito ingante në waa cæcä

⁶Bitö godongämæ mīni pönencabo iñömīnite bitö mäninö botö änö ëñëninque bitö tönīñadāni inānite wæætë odömömi iīnque Itota Codito beyæ në waa cæquimi incæbiimpā. Ayæ Wængongui nānö angainö ante mönö pönënö ante ëñente quëwëninque bitö waa mönö odömōnte apænedö ante në ëñente cædimi inte edæ tömo cænte bai në nö cæbi incæbiimpā.

⁷Babæidi bai në tedewënāni inānite ëñënāmaī inte bitö onquiyænāni picænāni incæ önonquedö ante nāni tedewëninö ante ëñënāmaī incæbiimpā. Wæætë, Wængongui ayongä mönö waa cæte quëwencæte ante cædinque bitö iñömö tæi ewocabo badinque cæcæboimpā, ante godömenque godömenque cæcæbiimpā. ⁸Mönö baö tæämö bacæimpā, ante cædinque mönö nimpō cädāmaī inte adodö adodö cæmompā. Mäninonque ante mönö cædö guiquënë wædænque waa impā. Wæætë Wængongui ayongä mönö waa cæte quëwëmö iīnque mönö nïwoyedë waa quëwëninque adobai iīncayæ ate waa quëwenguimö incæmöimpā. Iīnque mäninö ante mönö cæquinö iñömö tömäā beyæ nö waa pōni i iīnque, Mönö tæi ewocaquimö, ante cædinque mönö nimpō cädāmaī inte adodö adodö cæcæimpā.

⁹Mänömainö ante nö pōni nāni änö nāwangä ante impā, ante ämo ëñëmaimīnimpā. ¹⁰Mänömaī beyæ tæi piñæninque nangui cæmö imompā. Edæ, Wængongui në Quëwengängä beyænque mönö watapæ quëwengæimpā, ante pönengaimö imompā. Tömengä iñömö mönö waocabo tömämö imonte, Quëwenguimīni,

ante nē Ængaingā incæ tōmengā ingante nē pōnēmō iñōmonte nō ængā beyænque mōnō quēwengæimpa.

¹¹ Mānīnō botō ānō ante bitō tōmēnāni inānite, Īmaī cæedāni, ante odōmonte apānecæbiimpa, āmopa. ¹² Bitō wīi picæmi incæte æcāmenque iñongante bitō, Botō imote piinte adāmaī incæcāimpa, ante pōnente quēwencæbiimpa. Wæætē edæ bitō Wængonguī ingante nē pōnēnāni beyæ ante, Botō cæbaī tōmēnāni adobaī cæcædān-impā, ante Īmaī cæcæbiimpa. Apānebi incæ waa cæte quēwēmi incæ waadete pōnēmi incæ wede pōnēmi ĩmi incæ nō pōnente waa cæbi incæ bitō, Botō baī bacædānimpā, ante cædinque bitō cædō ante odōmōmi adinque tōmēnāni adobaī cæcædānimpā. ¹³ Botō pōnāmaī inguinganca bitō ongōñōmō iñōmō Wængonguī angā ēñente nāni yewæmongainō adinque adodō ante ædæmō apānebi ēñencædān-impā. Ayæ Wængonguī ingantedō ante apānebi inte odōmonte apānebi ēñencædān-impā. Mānīnonque cæte ongoncæbiimpa. ¹⁴ Mini pōnencabo iñōmīnite nē aadāni nāni Picāncabo iñōmō bitonga gampo cædinque Wængonguī beyæ apānedinque bitō imite, Bitō nē aabi badinque nē odōmonte apānebi bacæbiimpa, ante pōnō apānedānitapa. Īnīnque bitō do nē aabi badinque nē odōmonte apānebi bagaimi inte godōmenque godōmenque cæcæbiimpa.

¹⁵ Edæ waodāni tōmānāni bitō æbānō godōmenque waa cæbi ĩmi adinque ēñencædānimpā, ante cædinque bitō mānīnonque ante pōnēninque godōmenque godōmenque cæcæbiimpa. ¹⁶ Bitō quēwēnō ante, Æbānō quēwēmoo, ante nāmā wææ acæbiimpa. Ayæ bitō odōmonte apānedō ante, Botō nō pōnēninque odō-
monte apānecæboimpa, ante wææ cæcæbiimpa. Edæ mǎnōmaī cæte wæntædāmaī inte cōwē cæcæbiimpa. Bitō mǎnōmaī cæbi ĩnīnque tōmēmi nāmā incæ wantæpiyæ quēwencæbiimpa. Bitō odōmonte apāneyōmi nē ēñēnāni iñōmō adobaī bitō cædō beyænque wantæpiyæ quēwencædānimpā.

Nē pōnēnāni inānite æbānō cæcæbiimpa, ante

5 Onguīñægā picægā wēnæ wēnæ cæcā incæte tōmengā ingante piinte ānā-
maī incæbiimpa. Wæætē tōmēmi mæmpocā ingante ante baī tōmengā in-
gante waadete āmi ēñencæcāimpa. Edēnīnāni iñōmō tōmēmi biwīdi inānite
ante baī tōmēnāni inānite waadete āmi ēñencædānimpā. ² Onquiyænāni picænāni
iñōmō tōmēmi wānā inante ante baī bitō tōmēnāni inānite adobaī waadete
āmi ēñencædānimpā. Ayæ baquedāni iñōmō tōmēmi biwinqueidi inānite ante baī
tōmēnāni inānite waēmō mīmōnē waadete ancæbiimpa.

³ Owæmpoināni nē nāwangā ōmæpodāni inte quēwēnānipa, ante tōmēnāni
inānite waa adinque pōnō cæcæbiimpa. ⁴ Incæte owæmpoingā wēñænāni
næægā ĩnīnque nānōmōidi næægā ĩnīnque mānīnāni wæætē tōmengā beyæ
cæquēnēnānipa. Edæ mānīnāni tāno tōmēnāni tōnō godongāmæ quēwēnāni inānite
waa adinque nāēmæ nāni cæquēnēnō ante, Æbānō cæquīi, ante ēñente cæcædān-
impā. Mānōmaī cædinque tōmēnāni mæmpōidi tōnō mæmæidi tōmēnāni inānite
waadete nāni cædi baī ĩnāni adobaī mæmpōidi tōnō mæmæidi inānite nāēmæ
waadete cæcædānimpā. Edæ mānōmaī cædāni adinque Wængonguī waa acæcāimpa.
⁵ Nē nō ōmæpocā ĩnogā inte adodanque quēwengā ĩnīnque tōmengā nē owæmp-
poingā ĩnogā inte Wængonguī beyænque watapæ quēwengæimpa, ante pōnengā
ingampa. Itædē incæ woyowotæ incæ tōmengā ĩmpo cædāmaī inte, Botō beyæ
cæquīmi, ante Wængonguī ingante apānete quēwengampa. ⁶ Wæætē owæmpoingā

tote quëwengäimpa, ante nämanque pönente në quëwëongä guiquënë tömengä mü quëwengä incæte do wænte bai ingampa töö.

⁷Tömënanï inänitedö ante wënæ wënæ änämaï incädänimpa, ante wææ cæd-
inque bitö mäninö botö änö ante adodö ante ämi ëñencädänimpa. ⁸Æcänö gui-
idënanï inänite pönö cädämaï inaa ayæ tömengä nänï wencabo inänite pönö cädä-
maï inaa tömengä iñömö Wængonguï nänö angainö mönö pönëno ante do Baa än-
inque wü ëñente cæcampa. Ayæ në pönënamäi ingä wënæ wënæ cæcä iñongante
mäningä iñömö godömenque wënæ wënæ cæcä ingampa töö.

⁹Owæmpoinä do tetenta wadepo ganca godömenque në picænä inönä inte tömënä
nänöogängä wodi ingante në möninanque quëwënä ingadäimpa, ante adinque bitö,
Wængonguï qui, ante mönö godonte äñinta mäninä owæmpoinä në ænguinä in-
cädäimpa, ante tömënä ëmöwo ante yewæmoncæbiimpa. ¹⁰Edæ tömënä wëñänäni
inänite waa cädä pädäni inänitawo. Wadäni inänite tömënä, Botö oncönë pö
beedäni, ante waa apænedä inantawo. Wængonguï quinäni iñönänite tömënä nämä
pönënamäi inte waa cædantawo. Në wæwënanï inänite adinque tömënä tömënanï
tönö godongämæ cædantawo. Ayæ, Quiëmë waa cæcäimpa, ante mäninonque ante
pönëninque cæte quëwënantawo. Mänömaï quëwënä adinque woadäni, Mäninä
nöinä waa cädä inönampa, ante do ëñänäni inänitawo, ante adinque bitö wæætë
tömënä ëmöwo ante yewæmoncæbiimpa. Ayæ wadäni mäninä bai iñönänite bitö,
Wængonguï qui, ante mönö godonte äñinta mänimpodänique në ænguinäni in-
cädänimpa, ante tömënanï ëmöwo ante yewæmoncæbiimpa.

¹¹Wæætë edæ owæmpoinäni wü picænäni iñönänite bitö tömënanï ëmöwo ante
yewæmönämaï inte Baa ancæbiimpa. Ayæ toinente wæwëninque Codito ingante
ñimpo cæte wadæ godinque wæætë, Wacä nänöogängä ingante möinëmopa, ante
quëwënanïpa. ¹²Edæ tömënanï Codito ingante, Botö bitö beyænque cæcæboimpa,
ante täno nänï angainö ante ñimpo cädäni beyæ Wængonguï apænte pangä
wæcädänimpa. ¹³Ayæ godömenque iïmaï cädänipa. Tömënanï cädämaï inte wæn-
tæye badinque adobaï wacönë wacönë acæte ante önonque godäni inänipa töö. Ayæ
wü önonque wæntæyedänique badinque tömënanï, Wadäni æbänö cädänii, ante
gote adinque wadäni nänï cädönö ante godö wæntæ godö wæntæ tededäni inänipa.
Edæ wü nänï angüenënö ante do änewënanïpa. ¹⁴Mänömaï beyæ botö owæmp-
oinäni wü picænäni inänite iïmaï ämopa. Minitö wæætë möninqwe wëñänäni
mäedäni. Ayæ oncönë mïni cæquënëno ante cädäni. Wadäni edæ mönö imontedö
ante wënæ wënæ nänï tedewënö ante tededämaï incädänimpa, ante minitö mänö-
maï cæte waa quëwëedäni, ämopa. ¹⁵Iñampa owæmpoinäni pancadäniya do Itota
Codito ingante ëmö cæte godinque Tatäna miñæ tee empocæ godänitapa töö.

¹⁶Onquiyängä në pönengä iñömö tömengä guidënanï owæmpoinäni næängä in-
inque tömengä tömënanï beyæ cæcæcäimpa. Codito ingante godongämæ mïni pö-
nencabo iñöminite tömengä, Botö guidënanï inänite godöminï æncädänimpa, ante
änämaï incæcäimpa. Mänömaï cædinque Codito ingante mïni godongämæ pönen-
cabo wæætë, Owæmpoinäni näwangä ömæpodäni inänipa, ante adinque tömënanï
inänite godöminï æncädänimpa, ämopa.

¹⁷Wængonguï ingante godongämæ mïni pöñencabo iñöminite në aadäni nänï
Picæncabo iñömö nö waa aadäni iñönänite minitö tömënanï inänite waa aquënëminï
imïnipa. Mäninäni Wængonguï nänö angainö ante në apænedäni inte ayæ në
ödömonte apænedäni iñönänite minitö godömenque nanguï waa acæminïpa.

¹⁸ Edæ Wængongui iimainö ante apænecä ëñëninque yewæmongadänimpa. “Wagada onguiñængä në cæcä inte tömentapo æ yacæimpa, ante ämi pinä pinä gäwate cægöñongä bitö tömengä önöne wææ wodönedämaï inte ee abi cæncæcäimpa,” ante yewæmongatimpa. Ayæ godömenque iimaï ante impa. “Në cæcä iñömö tömengä nänö cædinö beyæ ante në ænguënegä ingampa.” Mänömaï yewæmongadänimpa.

¹⁹ Godongämæ miini pönencabo iñömiini waocä adocanque iñömö bitö imite apænedinque, Mäningä në aacä Picængä iñömö wënæ wënæ cæcantapa töö, ante äñongante bitö ëñënämaï incæbiimpa. Wæætë waoda mënaa në babæ wapiticæ änämaï ina inte bitö imite apænedinque, Tömengä në wënæ wënæ cæcantapa, ante adodö apæneda ëñëninque bitö në äna inate ëñencæbiimpa. Ayæ waodäni mengäa go adocanque adobaï adodö apænedäni ëñëninque bitö në änäni inänite ëñencæbiimpa.

²⁰ Në wënæ wënæ cædönäni incæ ñimpo cædämaï inänipa, ante adinque bitö wæætë godongämæ ongönäni ëñëñönäni mäninäni inänite nanguï ancæbiimpa. Godongämæ ongönäni ëñëñönäni bitö mänömaï ämi ininque tömënäni wæætë guiñëninque, Wënæ wënæ mönö cæquinö ante cædämaï incæmöimpa, ante pönencædänimpa.

²¹ Mönö Wængongui ayongä Itota Codito ayongä Wængongui nänö apænte æninäni anquedoidi ayönäni botö iimaï ämopa. Mäninö botö äninö ante ëñente cædinque bitö, Adoyömö pöni inänipa, ante tömänäni inänite adoyömö godö cæbi incæbiimpa. Wii adocanque ingante, Botö në waa adimi imipa, ante tömengä ingante wadö cædämaï incæbiimpa. ²² Æcämenque ingante, Mönö pönencabo beyæ bitö në cæbi baquimi, ante pönëmi inte bitö tömengäa quingæ gampo cædämaï ie. Edæ quingæ gampo cæbi në cæcä badinque edæ tömengä wënæ wënæ cæcä ininque bitö adobaï tömengä tönö wënæ wënæ cæbi baquënëmi imipa. Bitö tömëmique godömenque wënæ wënæ nani cæpämö ante tömänö ante Baa ante waa cæte quëwëe.

²³ Bitö cæinca cædente wæbitawo. Ayæ wantæ wantæ iñö wantæ wantæ iñö wënæ wënæ inte wæbitawo. Ininque wii æpænque bee ämopa. Wæætë biinömæ wædænque bete quëwencæbiimpa.

²⁴ Wængongui nänö apænte anguiönæ badämaï iñedë incæ waodäni pancadäniya wënæ wënæ nani cægäinö do edonque pöni impa. Wadäni guiquënë wënæ wënæ nani cægäinö wë wodonte i incæ mänïñedë edonque pöni baquinö anguënë. ²⁵ Ayæ adobaï waodäni waa nani cægäinö do edonque pöni impa. Ayæ ñöwoyedë pancaaa waa nani cægäinö wii edonque pöni i incæte wii cöwë wë wodonte ingæimpa. Wæætë edonque pöni aquinö anguënë.

6 Waodäni awënëidi nani në ö æninäni inte awënëidi beyænque cæte ñä cæyænte bai në quëwënäni iñömö tömënäni tömänäni awënëidi inänite waa ëñente cæcædänimpa. Iñempa tömënäni në pönënäni inte wii waa ëñente cædäni bai wadäni wæætë Wængongui ëmowo ante wënæ wënæ ante babæ anguënëñänimpa. Adobaï mönö odömonte apænedinö ante, Wënæ wënæ impa, ante anguënëñänimpa. ² Tömënäni awënëidi iñömö në pönënäni inäni beyænque në cædäni iñömö, Botö tönïñacanque inongä inte botö awënë iñömö önonganque ingä awädö, ante piinämaï incædänimpa. Wæætë edæ në cædäni iñömö, Botö cæbo në ængä iñömö në pönengä inongä inte Wængongui nänö në waadecä ingampa, ante adinque tömënäni awënëidi inänite godömenque waa ëñente cæcædänimpa.

Nāwā mǎincoo ante

Īninqe Tímoteo ēñēmī. Mǎnīnō ante tōmēnāni īnānite odōmonte apānedinque bitō adodō adodō ante ancaa ancæbiimpa, āmopa. ³Pancadāniya wadō ante odōmonte apānedinque mōnō Awēnē Itota Codito nō pōnī nānō angainō ante Baa ānānīpa. Ayæ mōnō odōmonte apānedō ante tōmēnāni Wængonguī ayongā mōnō waa cæte quēwenguēnēnō ante Baa ānānīpa. Īninqe æcānō mǎnōmaī Baa āna īñōmō ⁴tōmengā nāmā incæ, Botō gomonga waa ēñēmopa, ante nē pōnēnongā ingā incæte tōmāā ēñēnāmaingā ingampa. Tōmengā nāmanque nānō pōnēwēnō ante wæatedō wæatē tededinque, Ædedō ī, ante wacā tōnō guēadō guēa āinēwente wæcampa. Tōmengā mǎnōmaī tedecā beyænque wadāni nē gomonga ēñengā ingante godō pīinte adānīpa. Godongāmæ wadodō wadō pīinte tedewēnānīpa. Wacā ingā wacā ingā, Bitō wēnæ wēnæ cæbi īmīpa, ante ānewēnānīpa. Nāmā nāni wēnæ wēnæ pōnēnonque ante, Wadāni wēnæ wēnæ cādānīpa, ante pōnēwēnānīpa. ⁵Ayæ ocaidē pōnente wentamō encadāni inte tōmēnāni Wængonguī nāwangā nānō angainō incæ ēñēnāmaī badānīpa. Īninqe nāni cabo incæ wacā ingā wacā ingā guēadō guēa apānete nāni pīincabo īnānīpa. Ayæ mǎnīnāni adobaī, Wængonguī ayongā waa cæte quēwēmō beyænque nanguī ēate baquīmō, ante pōnēwēnānīpa.

⁶Īnāmpa mǎincoo quincōomē ēacā incæte, Mǎninqe ēabopa, ante piyænē cæte quēwēnongā īñōmō tōmengā Wængonguī ayongā waa cæte quēwengā beyænque watapæ quēwēnongā inte nō nanguī ēacā ingampa. ⁷Edæ mōnō īi inguipoga īñōmō ōmaamō pontamōmpa. Adobaī ōmaamō inte tao goquīmō īmōmpa. ⁸Incæte mōnō cænguī tōnō weocoo ēamō inte mǎninqe beyæ mōnō watapæ quēwenguīnque īmōmpa. ⁹Wadāni guiquēnē, Mǎincoo nanguī ēainēmōnīpa, ante quēwēnāni inte tōmēnāni wēnæ wēnæ nāni cæinēmāmo badīnque oda cæte goquīnānidō anguēnē. Mǎnōmaī cædinque tōmēnāni, Quīnō ōnonque impa, ante æinente badānīpa. Ayæ wēnæ wēnæ nāni baquinque edæ æinēwēnāni inte quīēmē incæ tōmēnāni æmæwo ōmāe nāni ēwenguīnonque gocādānīpa. ¹⁰Wadāni nāni godonte æinta waadete pōnente nāni wædō beyæ wadō wadō nāni wēnæ wēnæ cæpāmo pompa. Edæ pancadāniya, Mōnō godonte ænguinta ængæīmpa, ante pōnēninqe tōmēnāni nāni wede pōnenguēnēnō nīmpo cæte wadæ godinque nāmā nāni cædō beyænque nanguī wæwente badānitapa.

Mōnō wede pōnēnō ante mōnō tæī ēwocate cæcæīmpa

¹¹Bitō guiquēnē Wængonguīnque ingante nē cædōmi inte mǎnīnō tōmānō ante nīmpo cæte wodii gote baī quēwencæbiimpa, āmopa. Wæatē mōnō nō cæquēnēnō ante cæte quēwencæbiimpa. Wængonguī ayongā mōnō waa cæte quēwengæīmpa, ante cæcæbiimpa. Mōnō wede pōnēmāmo, ante godōmenque pōnente quēwencæbiimpa. Waodāni īnānite godōmenque waadete pōnencæte ante cæcæbiimpa. Ayæ tæī pīñante entawēninqe wæntæye badāmaī inte ee cæcæbiimpa. Cōwē ædæmō cæte quēwencæbiimpa. ¹²Wængonguī ingante mōnō wede pōnēnō ante mōnō cæquēnēnō ante bitō tæī ēwocate cæcæbiimpa. Mōnō wænāmaī quēwenguīnō goquīmō, ante pōnente nīmpo cædāmaī incæbiimpa. Edæ waodāni tæiyænāni ēñēñōnāni, bitō, Wængonguī ingante wede pōnente babopa, ante āñōmi Wængonguī edæ, Mǎnīnō quēwenguīnō gocæbiimpa, ante bitō īmite apænte aa pecantapa. ¹³Wængonguī pōnō cæcā beyænque quingāmenque incæ tōmānāni quēwēnāni īnānīpa. Itota

Codito iñömö Pontio Pidato ingante apænedinque, Quinö nö impa, ante edonque pöni apænegaingä ingampa. Edæ Wængongui tönö Itota Codito mänömainö ingaina iñöna botö tömöna ayöna bitö imite, iimai cæe, ämopa. ¹⁴ Mönö Awënë Itota Codito nänö ocæ emænte ponguinganca bitö mäninö botö wæe änö tömänö ante waa ëñente cæcæbiimpa, ämopa. Bitö ëñente cædö adinque wadäni ædö cæte, Wænæ wænæ impa, ante anguinäni, ante pönente cöwë waa pöni cæcæbiimpa. Mänömai ante ämopa.

¹⁵ Wængongui nänö ainenguionæ bayonte Itota ocæ emænte poncæcäimpa. Mönö Awënë Wængongui iñömö tömengä adocanque Wængonguinque ingaingä inte nê waa pöni inongä ingampa. Tömënanï awënë odeyedi iñönänite tömengä Tæiyæ Awënë Odeye inongä ingampa. Ayæ tömengä iñömö awënëidi tömänäni Awënë inongä ingampa. ¹⁶ Tömengä adocanque nê wantæpiyæ wænämai inongä inte nê Quëwengä ingaingä ingampa. Tömengä tömää nãö iñömö quëwënongä iñongante waodäni ædö cæte tömengä weca goquinäni. Tömengä mönö waocabo mönö nê adämai ingaingä ingampa. Edæ tömengä ingante mönö ædö cæte aquiï. Tömen-ganque ingante waodäni tömänäni waa aquinänidö angüënë. Tömen-ganque cöwë nê tæi piñænongä inte quingämenque quëwënanï iñönänite tömengä tömänäni Awënë inguingänö angüënë. Mänömai babaiimpa, ante, Amëe, ämopa.

¹⁷ Inguipogaque mäincoo nê nanguï ëadäni inänite bitö iimai ancæbiimpa. Nanguï ëamöni inte mönitö godömenque waa pöni imönipa, ante pönënamäi iedäni. Iñæmpa mäincoo mönö ëadincoo iñömö quingæ dæ ä apa quëwënanï. Inique mïni mäincooque ante wïi mänincooque ante pönëedäni. Wæætë, Wængonguinque beyænque watapæ quëwengæimpa, ante pönëedäni, ancæbiimpa, ämopa. Edæ, Mönö qui quinö dæ ä, ante wæmö adinque tömengä mönö imonte, Mïni watapæ quëwënguinque, ante tömää nê pönongä ænguimö imompa. ¹⁸ Mäninäni nê nanguï ëadäni inänite bitö, Mïnitö quinö waa cæquiï, ante mäninonque cæcæmïnimpa, ancæbiimpa. Waa mïni cæquinö ante mïnitö nanguï cæte quëwëncæmïnimpa. Ayæ do Ao ante mïnitö mäincoo mïni ëadincoo pancacooga pædæ godömini æncædänie, ancæbiimpa, ämopa. ¹⁹ Mäninö bai nê cædönänique, Mönö nämä beyæ ëaquincoo, ante öönædë iñömö do cö cæte bai cædänipa. Mänömai cædinque tömënanï, Nö pöni mönö quëwënguinque impa, ante iincayæ ate æncædänimpa.

Tímoteo ingante, Pabodo iinque wæe angampa

²⁰ Tímoteo ëñëmi. Wængongui, Wæe aacæbiimpa, ante bitö imite quinö pönongä bitö ö æninö ante wæe ae. Tæiyæ waëmö ëwocadämai inte wadäni önonquedö ante nani änönö ante ëñënamäi ië. Adobai wadäni, Mönitö ëñente ate nanguï encaimöni imönipa, ante nê babæ änäni iñönänite bitö wadodö wadö nani änewënö ante ëñënamäi ië. ²¹ Tömënanï nani änewënö ante pönëninque waodäni pancadäniya Wængongui ingante nani pönëninö ante do ñimpo cædinque wadæ godinäni inäni.

Wængongui bitö imite waadete pönö cæcæcäimpa, ante botö mäninque ante yewämömopa.

2 Tímoteo

ingante Pabodo cadota ante ayacenta nänö yewæmongainta

Tímoteo ingante Pabodo yewæmongampa

1 Botö Pabodobo inömo imopa. Wængongui nänö änö bai Itota Codito nänö në da godongaïmo imopa. Itota Codito nempo quëwënönäni iñönänite Wængongui, Minitö wantæpiyæ mini quëwenguinö ante pönömo ænguimini iminipa, angacäïmpa. Mänömaï beyæ tömengä botö imo, Mäninö ante apænebi ëñencädän-ïmpa, angä ëñëninque botö tömengä nänö në da godongaïmo imopa. ²Tímoteo ëñëmi. Bitö botö wëmi bai inömi inte botö në waadebi inömi imipa. Bitö acæbi-ïmpa, ante bitö imite yewæmömopa. Mönö Mæmpo Wængongui tönö Awënë Itota mönö Codito tönö bitö imite waadete pönö waa cæda ate bitö gänë entawencæbi-ïmpa, ämopa.

Itota Codito waa pönï nänö ingainö ante

³Wëenëñedë botö wæmæïdi nani cægaï bai botö adobaï nämä apænte pönente adinque wentamö mongænämaï entawëmo inte Wængongui beyæ në cæbo imopa. Botö itadë incæ woyowotæ incæ bitö beyæ ante mäningä Wængongui ingante botö apæneyedë adocä ingante cöwë waa ate pönente apænebopa. ⁴Botö bitö æbänö wëñapæ tamömitapa, ante pönëninque, Botö watapæ tocæboïmpa, ante bitö imite aïnente imopa. ⁵Bitö Wængongui ingante nö wede pönëmi imipa, ante adimo inte botö adodö ante wæætë pönëmopa. Edæ bitö ñæñæ Doida bitö wäänä Eönita tönö tömëna täno Wængongui ingante nö wede pönente näna ingai bai bitö iñömö ñowo adobaï imipa, ante do ëñëmopa.

⁶Mänömaï beyæ bitö imite iïmaï ämopa. Wængongui nänö cædonö ante bitö cæcæbiïmpa, ante botö bitonga gampo cæyömo Wængongui pönö cæcä æninque ëwocabi imipa. Ininque mäninö bitö ëwocadö beyænque bitö godömenque godömenque cæcæbiïmpa. ⁷Wængongui tömengä Tæiyæ Waëmö Önöwoca ingante mönö imonte pönongä æmö ininque mönö wii tömengä beyæ guñente ëwocamompa. Wæætë mäniwoca beyæ tæi ëwocamö imompa. Ayæ adowoca ingante ëwocadinque waodäni inänite waadete pönëmö imompa. Adowoca beyæ mönö, Nöinö cæcæïmpa, ante pönëninque nämä wææ ante cæmö imompa.

⁸Mönö Awënë Itota Codito nänö angainö bitö ëñëninö ante bitö guingo imönämaï inte apæncæbiïmpa. Botö adobaï, Tömengä nänö angainö botö ëñëninö ante botö apænebo beyæ botö imote tee mönedäni wæyömote bitö mäninö adinque guingo imönämaï inte apæncæbiïmpa. Wæætë botö tönö Itota ingantedö ante möna watapæ apænedö ante apænedinque bitö Wængongui nänö tæi piñæmämo ante ëwocadinque botö tönö adobaï guëa caate wæcæbiïmpa. ⁹Wængongui, Quëwencæminimipa, ante mönö imonte æninque, Minitö tæiyæ waëmö entawente quëwencæminimipa, ante mönö imonte aa pegacäïmpa. Mänömaï cædinque tömengä wii mönö waa cædinö beyænque wæætë tömengä nänö aïnenö ante cægacäïmpa. Ayæ wëenëñedë inguipoga badönämaï iñedë tömengä, Itota Codito beyænque, ante pönëninque mönö imonte waadete pönö cægacäïmpa. Mäninö nänö waadete pönö cægainö

beyænque tömengä mönö imonte æninqe aa pegacäimpa. ¹⁰Incæte nōwoyedë mönö imonte, Quëwenguimīni, ante nē Ængaingä Itota Codito pongä ininqe tömengä waadete nänö pönö cægäinö ante edonque odömongantapa. Ayæ Itota ingantedö ante mönö watapæ apænedö beyæ tömengä, Mīnitö mempoga wænāmaï incæminimpa, ante cædinque wantæpiyæ wænāmaï mönö quëwenguimāmo ante edonque odömongacäimpa.

¹¹Wængonguï botö imote apænedinque, Itota ingantedö ante watapæ botö apænedö ante bitö apænebi ëñencædänimpa, angantapa. Angä ëñëninque botö adobaï tömengä nänö nē da godömo imo inte ayæ nē odömonte apænebo imopa.

¹²Mänīi beyæ botö mänömaï wæwente quëwëmopa. Incæte, Æcänö ingante nē wede pönëmo imopa, ante do ëñëmo inte botö guingo imönāmaï imopa. Edæ botö quīnö tömengä ingante godönimo incæ tömengä mäninö æninqe nanguï tæi ewocacä inongä inte tömengä nänö apænte anguïönæ ganca wææ cæcæcäimpa. Mäninö ante botö ædæmö ëñëmopa.

¹³Botö bitö imite odömonte apænebo bitö ëñëninö ante bitö nīmpo cædāmaï ee nææncæbiimpa. Wæætë, Mäninö nö ante mönö adodö adodö ante odömonte apænedö impa, ante bitö adobaï adodö ante odömonte apænebiimpa. Mönö Itota Codito nempo quëwëmi inte wede pönëninque waadete pönente odömonte apænebiimpa. ¹⁴Wængonguï, Wææ aacæbiimpa, ante bitö imite pönongä ænīmi inte bitö tömengä waa pönī nänö pönongäinö ante wææ aacæbiimpa. Edæ mönö Wængonguï Önöwoca tönö ewocate quëwëmompä. Ininqe bitö tömengä tönö cædinque wææ aacæbiimpa.

¹⁵Atiabæ quëwënäni iñömö tömänäni botö imote ëmö cæte godänitapa, ante bitö do ëñëmipa. Edæ Piguëdo tönö Edömogænæ incæ tömënäni tönö botö imote ëmö cæte godatapa. ¹⁶Önetipodo guiquënë botö wæwëmo adinque tömengä wæætë wæætë pönö cæcä beyænque botö wampo pönentabopa. Ayæ adobaï botö imote yæguincamë inte nā cæyænte tee mönedäni wæyömote tömengä guingo imönāmaï ingacäimpa. Ininqe tömengä tönö godongämæ quëwënäni inänite mönö Awënë Itota Codito waadete pönö waa cæcæcäimpa, ämopa. ¹⁷Edæ Odömä nāni quëwëñömö iñömö pöninque Önetipodo botö imo ante nanguï diqui diqui mininque ate ate iinque mingacäimpa. ¹⁸Botö Epeto nāni quëwëñömö mänīñömö quëwëñömote tömengä æbänö botö beyæ pönö nanguï cæcantapa, ante bitö do ædæmö ëñëmipa. Mänömaï beyæ botö iinque baquïönæ iñonte Wængonguï tömengä ingante pönö waadete waa cæcæcäimpa, ämopa.

Itota Codito beyæ waa tontado baï cæcæcäimpa

2 Ayæ bitö botö wëmi baï inömi inte ëñëmi. Itota Codito nempo quëwëñömite tömengä waadete pönö cæcä beyænque bitö tæi ewocabi incæbiimpa, ämopa. ²Wadäni tæiyænäni ëñëñönäni botö æbänö ante apænebo bitö ëñëninö ante bitö wæætë wadäni nē pönënäni inte cöwë ædæmö cædäni iñönänite adodö ante odömonte apænebi ëñencædänimpa. Eñëninque tömënäni nē nö cædönäni inte adobaï wadäni inänite odömonte apænequinäni inänipa, ante tömënäni inänite ämi gocædänimpa.

³Bitö Itota Codito beyæ waa tontado baï inömi inte bitö wæwëmi incæ ee ongonte godömenque cæcæbiimpa, ämopa. ⁴Wacä tontado badinque nänö cæyedë tömengä, Botö awënë botö imote waa acæcäimpa, ante tömengä nänö änonque

ante ēñente cæcæboimpa, āninqe wadāni tontado ināmai ināni nāni cæbaī cædāmai inongā ingampa. ⁵Gānā cæcæte ante nē owempocā iñōmō, Cōwē nāni cægāi baī owempoedāni, ante nāni wææ angainō ante ēñente cæcā ininqe tōmenganque godōmenque waa owempodinqe gānā cædinque poganta æmaingampa. ⁶Amiña bayedē pancamonga pancamonga æñōnāni gōnea ante nē nanguī cæcā iñōmō tōmengā tāno ænguēnengā ingampa. ⁷Māninō imæca quēwēnāni nāni cæ baī ante mēnea go adodeque botō āninō ante pōnēñōmi mōnō Awēnē edæ bitō imite odōmongā ēñēninque bitō edonque pōñi ēñencæbiimpa.

⁸Itota Codito awēnē Dabii wodi nānō pæingā inongā inte do wæninque nē nāni ōmæmongaingā ingante ante pōnencæbiimpa. Māninō ante watapæ botō apænedō impa. ⁹Mānine beyænque botō caate wæwēmo imopa. Edæ nē wēnæ wēnæ cæcā ingante tee mōnecōnē nā cæyænāni baī botō imote adobaī mānine botō apænedō beyænque nā cædāni wæbopa. Incæte Wængonguī nānō angainō ædō cæte nā cæyænte inguī. ¹⁰Mānōmai beyæ Wængonguī nānō apænte ænināni beyænque ante cæyōmote wadāni anca wēnæ wēnæ cædāni wæbo incæte botō nīmpo cædāmai inte godōmenque cæbopa. Edæ Wængonguī nānō nāō apāiyōmō nāni cōwē quēwenguinque mānināni Itota Codito ængā beyænque tōmengā nempo quēwencædānimpa, ante cædinque botō wæwēmo incæte godōmenque cæbopa.

¹¹Īmai ante nāni ānō nāwangā ante impa.

Mōnō Itota Codito tōnō godongāmæ wængaimō inte adobaī tōmengā tōnō cōwē wænāmai quēwencæmōimpa.

¹²Mōnō tōmengā tōnō nīmpo cædāmai inte ee cæte wæwēmo inte adobaī tōmengā tōnō nē awēñēidi badinqe godongāmæ aacæmōimpa.

Mōnō, Tōmengā ingā dicæ abogaa, āmō ininqe tōmengā adobaī nāēmæ mōnō imonte, Dicæ abogaa, āmaingampa.

¹³Mōnō wede pōnēnō ante ædæmō cædāmai imō incæte tōmengā guiquēnē mōnō imonte cōwē pōnēninque cōwē ædæmō cædongā ingampa.

Īnæmpa tōmengā iñōmō nāmā nānō ingainō ante nīmpo cædāmai inongā inte tōmengā wadō ante pōnēnāmai ingampa.

Wængonguī bitō imi, Waa cæbi abopa, anguingā, ante

¹⁴Wadāni inānite apænedinqe bitō, Māninō ante pōnēdāni, ante wæætē wæætē ancæbiimpa. Mōnō Wængonguī ayongā ĩmai ante wææ ante nanguī apænebi ēñencædānimpa. Minitō, Ædedō ī, ante wadodō wadō ante piinte tededāmai incæminimpa. Īnæmpa mānōmai baī āninqe mōnō ānō iñōmō ōnonque ante impa. Ayæ mānōmai ante tedemō ēñēninque nē ēñēnāni iñōmō æmæ pōnente babainānīpa, ante bitō wææ ancæbiimpa, āmopa. ¹⁵Bitō Wængonguī ayongā, Botō nē waa cæbo incæboimpa, ante nanguī cæcæbiimpa. Nē cæbo inte guingo imōnāmai incæboimpa, ante cædinque Wængonguī nō nānō angainō ante tōmēmi nē ædæmō ēñente entawēninque māninonque ante tōinō ante wadāni inānite waa odōmante apænecæbiimpa. ¹⁶Tæiyæ waēmō ēwocadāmai inte wadāni ōnonquedō ante tedeyōnāni bitō tōmēnāni inānite ēñēnāmai inte nānēnē wadæ goe. Edæ mānināni Wængonguī ingante emō cædinque cōwē godōmenque wīwa nāni cæquinque wadæ godānīpa. ¹⁷Baō nōmæiñōmō aca podinqe nanguī godōmenque baayō baī mānināni nāni odōmante apænewēnō adobaī wodo wodo go ininqe wadāni tæiyænāni ēñēninque oda cæcædānimpa.

Mānināni nāni tedewencabo iñōnāni ĩmēneo tōnō Pideto adodaque ĩnapa. ¹⁸Tōmēna Wængonguĩ nāwangā nānō angainō ante ñimpo cæte wadæ godina ĩnapa. Ayæ, Mōnō ñāni òmæmōnō iñōmō ĩinque bagatimpa, ante tedewēna ēñēninque wadāni pancadāniya nāni wede pōnēnō incæ wido cæte bai quēwēnānīpa. ¹⁹Incæte Wængonguĩ nāwangā nānō angainō mōnō pōnēnō iñōmō tæi gōnonte bai cōwē ongompā. Māninō ante mēnea ante ĩmaĩ yewæmonte bai ongompā. Edæ Wængonguĩ Awēnē tōmengā quīnāni ædānidō ĩnānīi, ante do ēñengampā. Ayæ tōmengā ēmōwo ante, Botō Awēnē ĩnongā ingampā, ante nē ānāni iñōmō tōmēnāni tōmānāni, Mōnō wīwa cædimāmo ante wæte wædinque wadæ goquēnēnāni ĩnānīpa.

²⁰Nē ēacā oncōnē ñænæncōnē tōmengā nānō waa cō cæincade iñōmō oodo ĩnte padata ĩnte nāni badōincade mæ ongompā. Adobai wacade awæmpaincade daicade ĩncade mæ ongompā. Pancacadea iñōmō wæmoncooque da wēincade ĩncadepā. Wacade guiquēnē òmæpocooque da wēincade ĩncadepā. ²¹Waocā wēnæ wēnæ nānō entawēnō ante ñimpo cædinque nāmā ñā mēnongate bai quēwengā ĩnīnque tōmengā iñōmō wæmoncooque da wēincade bai ĩnongā ĩnte Wængonguĩ beyæ waa cæcā ĩmaingampā. Tōmengā tæiyæ wæmō ēwocate quēwengā babaingampā. ĩnīnque tōmengā Awēnē nānō ānō ante do cæcā ĩmaingampā. Ayæ, Quīnō waa cæquīnō ĩ, ante tōmengā do cæcā ĩmaingampā.

²²Edēnīnāni wīwa nāni cæinēnō ante bitō ñimpo cæte wodii gote bai quēwencæbiimpa. Wæætē waodāni mīmō ñā mēnongate entawēnāni ĩnte Wængonguĩ ingante nē apænedāni tōnō bitō nō cæquēnēnō ante cæte quēwencæbiimpa. Mōnō wede pōnēnō ante godōmenque pōnente quēwencæbiimpa. Waodāni ĩnānite godōmenque waadete pōnencæte ante cæcæbiimpa. Ayæ mōnō piyænē cæte quēwenguīmāmo ante pōnēninque cæcæbiimpa. ²³Ōnonquedō ante apænedīnque nē, Ædedō ĩ, ante wacā tōnō guēadō guēa tedewengā mānōmaĩ tedecā beyænque wadodō wadō piĩnte tedewēnānīpa, ante do ēñēmīpa. ĩnīnque tōmēnāni nē pōnēnāmaĩ ĩnāni ĩnte ōnonquedō ante apæneyōnāni bitō tōmēnāni tōnō godongāmæ apænedāmaĩ ĩncæbiimpa.

²⁴Mōnō Awēnē ingante nē cæcā iñōmō tōmengā wadāni tōnō wadodō wadō piĩnte tededāmaĩ ĩncæcāimpa. Wæætē tōmānāni ĩnānite ædæmō cæcæcāimpa. Ayæ wadāni tōmengā ingante wēnæ wēnæ cædāni adīnque tōmengā wæætē piĩnāmaĩ ĩnte piyænē cæcæcāimpa. Ayæ tōmengā nē waa odōmonte apænecā ĩncæcāimpa. ²⁵Tōmengā apænecā ēñēninque nē ēñēnāni iñōmō Baa ante wadō ānāni ĩnānite tōmengā ædæmō cæte, ĩmaĩ ĩmpā, ante odōmonte apænecā ēñēncædānīmpā. Edæ Wængonguĩ pōnō cæcā ate tōmēnāni nāmā incæ, Wēnæ wēnæ cæmō awædō, ante wædinque tōmengā nāwangā nānō angainō ante ēñēncædānīmpā, ante pōnente cæcæcāimpa. ²⁶Ayæ tōmēnāni ēñēnāmaĩ encadāni incæ nē ēñēnguīnāni wæætē bacædānīmpā, ante pōnente cæcæcāimpa. Wēnæ iñōmō tōmēnāni ĩnānite bæi ongōnīnque tōmengā, Botō ānō ēñēnte quēwencæminīmpā, ante godō cæcā ate tōmengā nānō nē bæi ongōnāni wæætē aamō cæte wodii gocædānīmpā, ante adobai pōnente cæcæcāimpa.

ĩnīnque bayedē waodāni æbānō quēwenguīnānīi, ante

3 Tímoteo ēñēmī. ĩnīnque ēōnæ bacæ cæyedē wēnæ wēnæ ba wæquīnō anguēnē. ²Māñīnedē edæ waodāni nāmanque waadete pōnenguīnāni ĩnānīpa. Tōmēnāni nāni godonte ænīnta waadete pōnente nāni wædō ante quēwenguīnāni ĩnānīpa. Tōmēnāni nāmanque, Botō gomonga waa cæbo ĩmopa, ante pōnenguīnāni ĩnānīpa. Wængonguĩ ingante godō wēnæ wēnæ ante babæ anguīnāni ĩnānīpa. Wadāni ĩnānite

badete toquínani inánipa. Wēñænāni incæ wæmpoda inate ēñēnāmaī cæquínani inánipa. Wadāni pōnō waa cædāni incæte tōmēnāni nē waa cædāni inānite wæætē waa cædāmaī inguínani inánipa. Ayæ tæiyæ wæmō entawēnāmaī inguínanimpa. ³Adobaī waadete pōnēnāmaī quēwenguínani inánipa. Mānīnāni inānite wēnæ wēnæ cædāni adinque tōmēnāni wæætē pīinīnque nīmpo cædāmaī inte wēnæ wēnæ cæquínani inánipa. Wadāni inānitedō ante babæ ante ānewenguínani inánipa. Tōmēnāni nāni cæinēwēnō ante nāmā wææ ānāmaī inte do cæquínani inánipa. Ayæ wadāni inānite ædæmō cædāmaī inte pīinte cæquínani inánipa. Wadāni, Quínō waa impa, ante pīinguínani inánipa. ⁴Tōmēnāni nāni guidēnāni incæ, Wēnæ wēnæ bate wæcædānimpa, ante godō odōmonguínani inánipa. Tōmēnāni pōnēnāmaī inte do wēnæ wēnæ cæquínani inánipa. Tōmēnāni nāmā incæ, Botō gomonga waa ēñē-mopa, ante pōnēwenguínani inánipa. Wængonguī ingante waadete pōnēnāmaī inguínani inte wæætē tote quēwengæimpa, ante nāmanque waadete pōnenguínani inánipa. ⁵Tōmēnāni Wængonguī ayongā waa cæte quēwēnāni baī adobaī cædāni incæte Wængonguī nānō tæī pīñāmāmo pīiwēnīnque nāmanque cæte quēwēnānīpa tōō.

Īnīnque bitō mānīnāni inānite gomō ae. ⁶Mānōmaī baī cædāni ĩñōmō waa apænedīnque waodāni oncōnē wāānē guidānīpa. Onquiyænāni wīī tæīmō entawēnāni inte tōmēnāni nāni wēnæ wēnæ cædī teēmēmō mongænte baī ĩnāni ĩñōnānite oncōnē nē guidāni ĩñōmō, Onquiyænāni mōnitō apænedō ante ēñente cæcædānimpa, ante cædāni ate onquiyænāni wæætē oda cæte godānīpa. Mānīnāni onquiyænāni ĩñōmō, Quiēmē nāni wēnæ wēnæ cæinēmāmo, ante wadō gote wadō gote oda cædānīpa. ⁷Tōmēnāni cōwē ēñencæte ante cædāni incæte wapiti wapiti cædāni ĩnīnque Wængonguī nāwangā nānō angāinō ante cōwē ēñente badāmaī inánipa. ⁸Wēēnēñedē Mōitee wodi Equitobæ tæiyæ awēnē ingante apæneyongā Aānee tōnō Aāmodee nē idōna inte Mōitee ingante pīinīnque, Ōnonque angampa, āna ingadaimpa. Īnīnque bayedē nē wēnæ wēnæ cædāni guiquēnē ĩina ĩnōna nāna cægāī baī adobaī cædīnque Wængonguī nāwangā nānō angāinō ante Baa ante wadō ānāni inánipa. Tōmēnāni ocaidē pōnente wentamō encadāni inte oda cæte godānīpa. Īnīnque Wængonguī ingante mōnō pōnēmāmo incæ dicæ pōnēnāniyaa. Wængonguī tōmēnāni inānite Baa ancæcāimpa. ⁹Īñæmpa ædō cæte godōmenque cæquínānīi. Mānīna nē idōna nāna ōnonque cægāinō ante edonque agadāni baī tōmēnāni nāni ōnonque cædīnō ante waodāni tōmānāni adobaī edonque pōnī acædānimpa.

Tímoteo ingante Pabodo ĩnīnque wææ angampa

¹⁰Bitō ĩñōmō, Æbānō botō odōmonte apæneboo, ante, Æbānō waa quēwēmoo, ante, Æbānō pōnente ante, ĩīmaī cæcæboimpa, ante cæboo, ante bitō tōmānō ante do ēñēmīpa. Ayæ Wængonguī ingante botō pōnēmāmo ante waodāni inānite botō ee cæpāmo ante botō waadete pōnēmāmo ante botō wæntædāmaī inte cæpāmo ante bitō adobaī do ēñēmīpa. ¹¹Ayæ botō ĩmote togænte pānāni botō wæpāmo ante ayæ botō wæwēmāmo ante bitō do ēñēmīpa. Wadāni quīēmē wēnæ wēnæ cæcæte ante botō ĩmote togænte pānāni wæbo incæ botō wæntæye ĩnāmaī intabopa. Antioquiya ĩñōmō Icōnio ĩñōmō adobaī Ditada nāni quēwēñōmō mānīñōmō wēnæ wēnæ cædāni wæbo incæte mōnō Awēnē ō ængā beyænque ayæ quēwēmō ĩmopa. ¹²Nō ante impa. Æcānō, Botō Itota Codito nempo quēwēmō inte Wængonguī ayongā waa cæte quēwēncæboimpa, ante āna tōmengā ingante togæwēnīnque wēnæ wēnæ

cædāni wæquingā ingampa. ¹³ Waodāni wēnæ wēnæ cædāni tōnō, Oda cæcædān-
 impa, ante nē cædāni iñōmō tōmēnāni nē wēnæ wēnæ cædināni inte godōmenque
 wēnæ wēnæ cæquīnāni inānīpa. Edæ mānīnāni inānite wapiticæ māodāni oda cæte
 cædināni inte tōmēnāni wæætē wadāni inānite adodō, Æpiticæmē oda cæquīnānidō,
 ante cæcædānīpa.

¹⁴ Bitō guiquēnē æbānō ēñēnīmi inte, Nō impa, ante pōnēnīnque cōwē ñīmpo
 cædāmaī incæbiīpa. Edæ bitō īmi ædānidō odōmonte apænedānīi, ante do
 ēñēmīpa. ¹⁵ Wængonguī angā ēñente tæiyæ waēmō nāni yewæmongainō ante
 bitō wēñæmiyedē mā ēñēnīnque ñōwo ganca do ēñēmitawo. Mānīnō ante nāni
 yewæmongainta ate ēñēnīnque bitō Itota Codito ingante pōnēñōmi tōmengā ængā
 beyænque quēwencæbiīpa.

¹⁶ Wængonguī pōnō apæncæ ēñēnīnque waodāni tōmēnāni nāni ēñēnonque ante
 Wængonguī beyæ yewæmongadānīpa. Tōmēnāni Wængonguī nānō odōmonte
 apænegainō ante nāni yewæmongainta adīnque mōnō, Æbānō waa impa, ante ēñēn-
 īnque mōnō odōmonte apæncæiīpa. Wængonguī angā ēñente nāni yewæmon-
 gainta adīnque, Quīnō mōnō wēnæ wēnæ cædinō īi, ante mōnō do ēñēnīnque nē
 wēnæ wēnæ cæcā ingante mōnō wææ angæiīpa. Ayæ Wængonguī angā ēñente
 nāni yewæmongainta adīnque nē oda cæte wæcā ingante, Mōnō nōinō cæquēnēnō
 iīmaī impa, ante mōnō odōmonte apæncæiīpa. Nō cæte quēwencæmīnīpa,
 ante odōmonte apænete ongō ate mōnō ēñēnō ante mōnō waodāni inānite odō-
 monte apæncæiīpa. ¹⁷ Edæ Wængonguī beyæ nē odōmonte apæncæcā iñōmō eye-
 pæ ēñengā inte tōmengā nānō waa cæquīmāmo tōmāmāmo ante cæcæcāiīpa, ante
 odōmonte apæncæcæte ante yewæmongadānīpa.

4 Waodāni mīināni quēwēnāni incæ do wængaināni incæ tōmānāni inānite mōnō
 Itota Codito nē apænte anguingā inte tōmengā Awēnē Odeye badīnque ponte a
 ongonā acæiīpa. Tōmengā ayongā ayæ mōnō Mæmpo Wængonguī ayongā botō
 bitō īmite, iīmaī cæe, āmopa. ² Wængonguī nānō angainō ante apænebi ēñencædān-
 impa. Waodāni Ao ante, Ēñēinēmōni ante ānāni incæ Baa ante ēñēnāmaī ināni incæ
 bitō cōwē apænebi ēñēnānie. Wængonguī nānō angainō ante oda cæte wædāni ad-
 īnque bitō, Mōnō nōinō cæquēnēnō ante cæcæmīnīpa, ancæbiīpa. Wēnæ wēnæ
 cædāni inānite, Ædō cæte mānōmaī cæmīnīi, ante nanguī ancæbiīpa. Ayæ adobaī,
 Wampo pōncædānīpa, ante ædæmō apænebi ēñencædānīpa. Mānīnō tōmānō
 cædinque nanguī waadete ee cædinque adodō adodō ante odōmonte apænebi
 ēñencædānīpa.

³ Īncayæ ate nō odōmonte mōnō apænedō ante waodāni Baa anguīnāni inānīpa.
 Mānīnō ante ēñēnāmaī incæmōnīpa, ante ānāni inte tōmēnāni wæætē, Mōnō
 ēñēinēnonque ante odōmonte apæneedāni, ante nē odōmonte apænedōnāni nanguī
 ināni inānite diqui diqui mīnte acædānīpa. Mānīnquedō ante ēñencæmōnīpa,
 ante anguīnāni inānīpa. ⁴ Mānīnāni nāwangā angainō ante ēñēnāmaī inte wadæ god-
 īnque wæætē ōnonquedō ante dodāni nāni angainō ante ēñente cæquīnāni inānīpa.
⁵ Bitō guiquēnē tōmēmi quēwenganca æbāmē baquīī incæ godōmenque cæcæbi-
 impa. Caate wæbi incæte bitō ñīmpo cædāmaī inte godōmenque cæcæbiīpa. Wæn-
 gonguī waa pōnī nānō apænedō ante apænebi ēñencædānīpa. Bitō cæquēnēnō
 tōmāā īinque cæcæbiīpa.

⁶ Wængonguī quī, ante nāni godōnō baī botō adobaī iñōmote wantæ iñonte
 wænōnāni wæncæboīpa. Edæ botō wænguīōnæ oo pōnī impa. ⁷ Botō tæī ewocabo

inte Awënë Itota beyæ botö cæquënënö waa pöni iinque cætabopa. Gänä cæcæte ante nê pogodo godäni næ gongænämaï nâni iinque goganca godäni bai botö adobai tømëmo quëwenganca wæntæye inämaï inte iinque cætabopa. Mönö wede pönënö ante botö ñimpo cædämaï inte cöwë pönentabopa. ⁸Mönö Awënë nê nõ apænte anguingä iñömö tømengä nânö apænte anguiönæ iñonte tømengä, Bitö nõ pönente waa cædämi inte bitö waa cædinta ante poganta æncæbiimpa, ante botö imote pönongä æncæboimpa. Wiï botö adoboque iñömote pönongä æncæboimpa. Wadäni adobai tømengä nânö pongä aquionæ ante nanguï ainente nê wänö cönäni inäni adinque tømengä, Minitö nõ cæte quëwënimini inte minitö waa cædinta ante poganta æncæminimpa, ante tømënäni tømänäni inänite pönongä æncædänimpa.

Tímoteo quïnö cæcæcäimpa, ante

⁹Bitö eyepæ inte botö weca quingæ pöe, ämopa. ¹⁰Deëma iñömö inguipogaque ante botö imote ëmö cæte Tetadönica nâni quëwëñömö gocantapa. Ayæ Quedetente iñömö Gadatiabæ iñömö gocantapa. Adobai Tito Dadamatiabæ iñömö gocantapa. ¹¹Odoca adocanque botö weca ongongampa. Mäadoco ingante adinque tømengä ingante botö weca ænte mämömi pongäi. Edæ botö cæquënënö ante cæyömote tømengä botö tönö guëa nanguï cæcä ingampa. ¹²Ayæ Tiquico ingante botö Epeto iñömö da godömo gocantapa. ¹³Botö yacoo ocoi ä weocoo Todoa iñömö Cadopo oncönë botö ëmö cæte pönincoo bitö ponte ate ænte pöe. Adobai botö dibodocoo ænte mämömi æmoe. Botö tæïnetacoo yewæmöintacoo, ante godömenque wæbopa. Mäninta cöwë mämömi æncæboimpa, ämopa.

¹⁴Adecantodo tæïneta nê badongä inongä iñömö botö imote nanguï wënæ wënæ cæcä wætabopa. Mänömaï cæcä adinque Wængongui edæ tømengä nânö wënæ wënæ cædinganca mäninganca tømengä ingante wæætë pancæcäimpa, ämopa. ¹⁵Mäningä bitö imite adobai wënæ wënæ cædämaï incæcäimpa, ante bitö adobai wææ cæcæbiimpa. Edæ mönö odömonte apænedö ante tømengä cöwë Baa ante wadö ante quëwënongå ingampa.

¹⁶Botö imote nê apænte änogä weca ænte mäodäni gote ongöninque botö nämä incæ wææ ancæte ante mä apæneyömo æcänö botö tönö godongämæ äna edæ dæ änäni wætabopa. Tømänäni edæ botö imote ëmö cæte wadæ godänitapa. Mänömaï nâni cædinö beyæ Wængongui tømënäni inänite piinämaï incæcäimpa, ämopa. ¹⁷Incæte, Wadäni wiï oodeoidi inäni tømämæ quëwënäni Wængongui waa pöni nânö apænedö ante ëñencædänimpa, ante cædinque mönö Awënë iñömö botö gäänë ongöninque botö tönö godongämæ cæcä beyænque tæi ewocabo inte apænetabopa. Ìimæca awënë nempo wæwente quëwëñömote mönö Awënë wæætë gä pe æmpote ö ængä beyænque quëwëmpopa. ¹⁸Mänömaï bai cædinque botö imote quiëmë wënæ wënæ cædäni wæbo incæ mönö Awënë Odeye botö imote ænguingä beyænque quëwencæboimpa. Adobai tømengä öönædë nânö aayömo botö imote adimongä ænte mäicä æite goquimo imopa. Wængongui ñäö apäite bai ëmönongä ingante mönö cöwë waa acæimpa, ämopa. Mänömaï babaimpa, ante Amëë, ante ämopa.

Tímoteo ingante Pabodo, Waa quëwencæbiimpa, angampa

¹⁹Pidica tönö Aquidæ nâna gæncaya waa quëwencædaimpa, ämopa. Bitö tømëna inate adodö apænebi ëñënae. Adobai Onetipodo tönö godongämæ quëwënäni waa quëwencædänimpa, ämopa. Bitö tømënäni inänite adodö apænebi ëñënanie.

²⁰Edaato Coodinto iñömö ayä a ongongantapa. Ayä Todopimo në wënä wënä iñongä botö tömengä ingante Miideto iñömö emö cæte gotabopa. ²¹Bitö eyepä inte cöönædepo badämaï iñedë botö weca quingä pöe, ämopa. Eobodo iñömö tömengä, Bitö waa quëwencæbiimpa, angä ëñëninque botö bitö imite adodö ämo ëñëe. Podænta tönö Diino ayä Codaodia tönö möni pönencabo tömämöni bitö imite, Waa quëwencæbiimpa, ämönipa.

²²Mönö Awënë Itota Codito bitö tönö ongonte incæcäimpa, ämopa. Ayä Wængonguï bitö imite waadete pönö cæcæcäimpa, ante mäninque ante yewämömopa.

Tito

ingante Pabodo cadota ante nänö yewëmongainta

Tito ingante Pabodo yewëmongampa

1 Botö Pabodobo inömo imopa. Wængongui ingante në cæbo inömote Itota Codito, Bitö Wængongui nänö në apænte æninäni inänite apænebi ëñencædän-
impa, ante da godongä ate botö tömengä nänö në da godongaimo imopa. Tömengä, Tömënanäni botö imote nänäni wede pönëno ante godömenque wede pönencædän-
impa, ante cæcæbiimpa, ante da godongä gotabopa. Ayæ, Wængongui näwangä nänö angainö ante ëñente entawëninque tömënanäni tömengä ayongä waa cæte
quëwencædänimpa, ante cædinque Itota Codito botö imote da godongä godimo imopa. ²Edæ, Ìncayæ ate mönö wænämaï quëwenguinö gocæmöimpa, ante ëñen-
inque pönencædänimpa, ante Wængongui në babæ änämaï inongä inte wëenënedë
inguipoga badönämaï inëdë iïmaï angacäimpa. Mini wænämaï quëwenguimämo
ante pönömo æninque minitö wæætë wantæpiyæ cöwë quëwencæminimpa, ante cæ-
gacäimpa. ³Mänömaï cædinque tömengä, Ìinëdë cæcæboimpa, ante nänö angainëdë
iinque bayedë tömengä nänö angainö ante edonque pönö odömonte apænegacäimpa.
Edæ, Quëwencæminimpa, ante mönö imonte në Ængaingä inte Wængongui mäninö
nänö angainö ante, Bitö odömonte apænebi ëñencædänimpa, ante botö imote angä
ëñëñömote da godongä godimo imopa.

⁴Tito ëñëmi. Bitö acæbiimpa, ante yewëmömopa. Edæ godongämæ mönö wede
pönëno ante apænebo në ëñëmi inte bitö Itota Codito quimi badinque botö näwä
wëmi bai inömi imipa. Ìinque botö, Mæmpo Wængongui tönö Itota Codito mönö
imonte në Ængaingä tönö waadete pönö cæda ate bitö gänë entawencæbiimpa,
ämopa.

Cædeta nänäni änöwænë inömö Tito nänö cædö ante

⁵Cædeta nänäni änöwænë inömö botö cæquënëno ante wiï eyepæ cæbo adinque
botö, Bitö godömenque quëwëninque tömänö iinque cæcæbiimpa, ante botö bitö
imite ëmö cæte gotabopa. Adobaï wayömö wayömö nänäni quëwëñömö godinque
bitö botö äninö bai cædinque, Mini pönencabo inöminite iïnäni në aadäni Picænäni
bacædänimpa, ante cæcæbiimpa, ante cædinque botö bitö imite mäninömö ëmö
cæte gotabopa. ⁶Wadäni, Në aacä Picængä wënæ wënæ cæcä ingampa, ante änä-
maï incædänimpa, ante wææ cædinque në aacä Picængä wæætë waa quëwen-
guënegä ingampa. Edæ tömengä nänöogænä adodanque në manguiwengä in-
cæcäimpa. Tömengä wëñænäni Itota Codito ingante në pönënanäni incædänimpa. Ayæ
tömënanäni inänite adinque, Babæidi bai quëwënanäni inänipa, ante ayæ, Æñänämaï
cæte quëwënanäni, ante wadäni änämaï incædänimpa, ante në aacä Picængä inömö
wææ aacæcäimpa.

⁷Mönö pönencabo inömonte në aacä ingante Wængongui, Botö cædö ante cæcæbi-
impa, ante pönö angä ëñëninque tömengä Wængongui beyæ ante në cæcä ingampa.
Ìinque woadäni, Në aacä wënæ wënæ cæcä ingampa, ante änämaï incædänimpa,
ante wææ cædinque në aacä wæætë cöwë waa quëwenguënegä ingampa. Wadäni

tömengä ingante apänedäni incæ tömengä wæætë, Botö ædö cæte ëñenguïmoo, ante änämaï incæcäïmpa. Tömengä wïi quingæ piïnte bacæcäïmpa. Tömengä tï nämä nè nanguï bewengä inämaï incæcäïmpa. Tömengä piyänë cæcä incæcäïmpa. Babæ cæbo incæte godonte näni æïnta cöwë godömenque æncæboïmpa, ante wadäni näni pönëwënonque ante nè aacä iñömö mäninö ante pönënämaï incæcäïmpa. ⁸ Wadäni inänite, Botö oncönë pö cæedäni, ante cöwë nè watapæ angä incæcäïmpa. Ayæ, Quïnö waa ïmpa, ante mäninonque cæinengä incæcäïmpa. Nöinö cæcæïmpa, ante pönëninque nämä wææ ante cæcä incæcäïmpa. Wængonguï nänö cædö ante cöwë cædongä inte nè aacä wæætë nämä wææ äninque nämä nänö cæinëwënö ante cædämaï incæcäïmpa.

⁹ Ayæ adobaï Wængonguï nö pönï nänö angainö ante möni odömonte apänegainö baï adobaï entawëninque tömengä ñïmpo cædämaï quëwenguënegä ingampa. Edæ mönö pönencabo iñömömonte tömengä ædæmö apänedinque nö pönï mönö odömonte apänedö ante odömonte apänegæcäïmpa. Tömengä odömonte apänegä ëñëninque pancadäniya, Baa ante wadö änäni incæ tömengä wæætë tömënäni inänite, Mäninö ante mini odömonte apänedinö wapiticæ i apa quëwëminii, ante nè aacä inongä inte wææ ancæcäïmpa, ämopa.

¹⁰ Edæ nè odömonte apänedäni inänite, Mönitö ëñënämaï cæinëmönipa, ante nè änäni tæiyänäni inänipa. Tömënäni iñömö önonquedö ante tedewënonäni inte, Wadäni oda cæcædänïmpa, ante nè cædönäni inänipa töö. Pancadäniya, Mönö ëö togænte quëwengæïmpa, ante nè pönënäni näni cæcabo iñömö godömenque nanguï pönï mänömaï babæ cæte quëwënanipa. ¹¹ Tömënäni, Babæ cæmöni incæte mönitö odömonte apänedö beyænque godonte näni æïnta cöwë æncæmönïmpa, ante pönente cædänipa. Mönö odömonte apänedämaï ingüënenö ante odömonte apänedäni ëñëninque nè ëñënäni pancadäniya tömënäni näni godongämæ quëwencabo tönö oda cæte wædänipa cæbii. Edæ mäninö tömënäni babæ cæte näni odömonte apänewënö ante odömonte apänedämaï incædänïmpa, ante bitö, Apocænë ingüëne quëwëedäni, ante wææ ante cæquënemï ïmpa.

¹² Edæ Cædetabæ iñömö näni quëwencabo incæ adocanque tömënäni wængonguïidi beyæ nè apänegä iñömö iïmaï ante apänegacäïmpa. “Cædetabæ quëwënanäni iñömö cöwë babæ ante quëwënanäni inte babæidi baï wïwa cædänipa. Tömënäni wæntæye inäni incæ cæowæodäni inte cænänipa töö.” ¹³ Mäninö ante tömengä nänö angainö näwangä ante ïmpa. Ìninque Itota ingante nè pönënäni incæ oda cæte wædäni adinque bitö, Nö pönënäni incædänïmpa, ante tömënäni inänite nanguï ancæbiïmpa. ¹⁴ Ayæ, Oodeoidi dodäni näni önonquedö ante angainö ante pönënämaï incædänïmpa, ante bitö tömënäni inänite nanguï ancæbiïmpa. Ayæ wadäni Wængonguï näwangä nänö angainö ante Baa ante ëñënämaï inönäni incæ wadö ante wææ änewëñönäni bitö wæætë nè pönënäni inänite, Mäninö tömënäni näni wææ änewënö ante mïnitö ëñente cædämaï iedäni, ante nanguï ancæbiïmpa, ämopa.

¹⁵ Edæ nè waëmö entawente quëwënanäni ïninque edæ tömënäni ayönäni quincoomë i incæ tömancoo edæ waëmoncoo ïmaïmpa. Wadäni guiquënë nè wentamö entawente quëwënanäni inte Itota ingante pönënämaï inäni ïninque edæ tömënäni ayönäni quincoomë i incæ tömäancoo edæ wïi waëmoncoo ïmaïmpa. Ìñæmpa adodäni nämä näni apænte pönëno incæ wentamö entawente quëwënanäni inte tömënäni näni ocaidë pönëno adobaï wentamö encadäni inänipa töö. ¹⁶ Ìinäni

īñōmō Wængonguī ingante, ate bai pōnēmōni īmōnipa, ante ānāni incæte tōmēnāni cædō beyænque, Īnāni Wængonguī ingante nē Baa ānāni īnānipa, ante edonque pōnī bapa. Mānīnāni Wængonguī ingante ēñēnāmaī cædōnāni inte edæ mōnō waa cæquēnēnō ante ædō cæte cæquīnānīi. Īnīnque tōmēnāni mōnō nē baacā bai īñōnāni īnānipa.

Nō pōnī mōnō odōmonte apænedō

2 Bitō wæætē nō pōnī mōnō odōmonte apænedō ante odōmonte apænecebīimpa. ²Onguīñænāni picænāni īnānite īmaī ante odōmonte apænebi ēñencædānīimpa. Tōmēnāni tī nāmæ nanguī bete quidi quidi dowænte badāmaī incædānīimpa. Waodāni mōnitō īmōnite waa acædānīimpa, ante onguīñænāni picænāni īñōmō nē eyepæ cæte quēwenguēñēnānīimpa. Nōīnō cæcæīimpa, ante pōnēnīnque nāmā wææ ante cæte quēwencædānīimpa. Itota ingante mōnō pōnēnō ante waodāni īnānite mōnō waadete pōnēnō ante tōmēnāni nōingā cædinque quēwencædānīimpa. Wæntædāmaī inte ee mōnō cædō ante tōmēnāni adobaī nōingā cædinque quēwēnāni incædānīimpa, ante bitō odōmonte apænebi ēñencædānīimpa, āmopa.

³Ayæ onquiyænāni picænāni īnānite adobaī īmaī ante odōmonte apænebi ēñencædānīimpa. Tōmēnāni, Wængonguī nānō angainō bai mōnō tæiyæ waēmō entawengæīimpa, ante quēwencædānīimpa. Wadāni īnānitedō ante babæ ānāmaī incædānīimpa. Wadāni nanguī yowepæ wædænque tī nāmæ bīinōmæ nāni āmæ ante, Beboe beboe, ante nē bedāni bai īināni īñōmō adobaī cæte quēwēnāmaī incædānīimpa. Adodāni, Quīnō waa impa, ante mānīnō ante odōmonte apænecebīimpa, ante bitō onquiyænāni picænāni īnānite odōmonte apænebi ēñencædānīimpa, āmopa.

⁴Mānōmaī cæte quēwēnāni inte tōmēnāni wæætē onquiyænāni wīi picænāni īnānite, Īmaī cæedāni, ante ānīnque, Mīnitō nānōogæīdi īnānite waadete pōnēnīnque mīnitō wēñænāni īnānite adobaī waadete pōnente quēwēedāni, ante odōmonte apænedāni ēñencædānīimpa. ⁵Ayæ adobaī onquiyænāni wīi picænāni īnānite odōmonte apænedīnque, Nōīnō cæcæīimpa, ante pōnēnīnque mīnitō nāmā wææ ante cæte quēwencæmīnīimpa. Mīnitō oncōnē mīni cæquēnēnō cōwē cædinque wadāni īnānite ædæmō cæte quēwencæmīnīimpa. Ayæ, Mīnitō nānōogæīdi nāni ānō ante ēñente cæedāni, āmi ēñente odōmonte apænecebīimpa. Edæ onquiyænāni picænāni mānōmaīnō ante odōmonte apænedāni ēñēnīnque onquiyænāni wīi picænāni wæætē waa cæte quēwēnāni adīnque wadāni Wængonguī nānō angainō ante ædō cæte, Wēnæ wēnæ impa, ante babæ anguīnānīi.

⁶Onguīñænāni wīi picænāni īnāni īñōmō adobaī tōmēnāni, Nōīnō cæcæīimpa, ante pōnēnīnque nāmā wææ ante cæte quēwencædānīimpa, ante ædæmō apænebi ēñencædānīimpa. ⁷Bitō tōmēnāni beyæ ante, Botō cæbai tōmēnāni adobaī cæcædānīimpa, ante bitō quīēmē cæbi incæ cōwē waa cæe. Ayæ bitō odōmonte apænedō incæ nōingā ante odōmonte apænedīnque bitō ōnōneque ānāmaī incæbīimpa. ⁸Ayæ bitō īmite nē Baa ante wadō ānāni wæætē mōnō īmonte ante apænedīnque, Mōnitō ædō cæte wēnæ wēnæ anguīmōnīi, ante wædinque edæ guingo imonte wæcædānīimpa, ante cædinque bitō tōmēnāni īnānite nōingā ante odōmonte apænecebīimpa. Edæ mānōmaī nōīnō odōmonte apænebi ēñēnīnque nē ēñēnāni wæætē, Wēnæ wēnæ odōmonte apænedīnō impa, ante ānāmaī incædānīimpa.

⁹Waodāni inānite ö ännāni ate awēnēidi beyænque cæte nē quēwēnāni bate wæyönānite bitö tōmēnāni inānite iīmaī ante odōmonte apænebi ēñencädānimpa. Edæ tōmēnāni awēnēidi nāni änö ante tōmānō ēñente cæcädānimpa. Adobaī tōmēnāni, Mōnitö imōnite adinque awēnēidi tocädānimpa, ante cæcädānimpa. Ayæ tōmēnāni awēnēidi ännāni ēñēninque wæatedö wæætē ännāmaī incädānimpa. ¹⁰Adodāni iñömö awēmö ännāmaī quēwēnāni inte wæætē, Mōnitö cōwē nō ēñente cæmōni imōnipa, ante adinque mōnitö awēnēidi wæætē, Waa cæmīni imīnipa, ante pōnencädānipa, ante nē cädāni iñömö waa cæcädānimpa. Tōmēnāni quiēmē cädāni incæ cōwē waa cädāni adinque wadāni Wængonguī mōnō imonte nē Ængaingä ingante nāni odōmonte apænegañö waa impa, ante pōnencädānimpa, ante bitö nē cädāni inānite mänömainö ante odōmonte apænecæbiimpa, ämopa.

¹¹Edæ waodāni quīnānidö ināni incæte mōnō Mæmpo Wængonguī tōmānāni inānite waadete pōnō cædinque, Botö ämo beyænque quēwenguīmīni, ante odōmongä ininque edonque pōni ba agadānimpa. ¹²Tōmengä nānō waadete pōnō cædönö ante edonque pōni adinque mōnō iīmaī ante ēñēmö imompa. Wængonguī ingante wapiticæ pōnēninque mōnō cædö ante mōnō Baa ante ñimpo cæte quēwengæimpa. Inguipoga ante nāni wēnæ wēnæ cæinēwēnō ante mōnō Baa ante ñimpo cæte quēwengæimpa. Nōwoyedē mōnō, Nōiñö cæcæimpa, ante pōnēninque nāmā wææ ante cæte quēwengæimpa. Wængonguī ayongä waa cæte quēwēninque ¹³mōnō Itota Codito nānō pōönæ watapæ mōnō toquiönæ ante wänö cömö imompa. Edæ Itota Codito adocä mōnō Wængonguī mōnō nē tæi pīñæñongä inongä inte mōnō imonte nē Ængaingä ingacäimpa. Tōmengä iñömö nē ñäö apāite baī emōnongä inte poncæcäimpa, ante wänö cōmompā. ¹⁴Mōnō wiwa cægaiñö tōmānō adinque tōmengä iñömö, Botö ämo beyænque quēwenguīmīni, ante nāmā wepæ godōninque wængacäimpa. Ayæ tōmengä, Botö tōmēmo beyæ ante mīnitö imīnite ñä mēnongate baī cæyōmote mīnitö botö quīmīni badinque, Quīnō waa impa, ante cæinente bacæmīnimpa, ante cægacäimpa.

¹⁵Ayæ mäninonque ante odōmonte apænedinque bitö waodāni inānite, ædæmō apænebi ēñencädānimpa. Wadāni wēnæ wēnæ cädāni iñönānite tōmēnāni inānite, Ædö cæte mänömaī cæmīni, ante nanguī äninque awēnē baī inte apænebi ēñencädānimpa. Bitö imite, Ædö cæte awēnē baī cæbii, ante pīinte anguīnāni, ante pōnente quēwencæbiimpa.

Nē pōnēmö, Quīnō waa impa, ante mōnō cæquēñenö

3 Bitö weca nē pōnēnāni iñönānite do mōnitö angaiñö nāni ēñēniñö incæ bitö tōmēnāni inānite adodö ante apænebi ēñencädānimpa. Nē aadāni tönö gobiedōno beyæ nē ännāni inānite ēñēninque mīnitö tōmēnāni nāni änö ante ēñente cæcæmīnimpa, ante apænebi ēñencädānimpa. Ayæ, Quīnō waa i, ante mäninö do cæcæmīnimpa, ante apænebi ēñencädānimpa. ²Ayæ æcæmenque ingante wēnæ wēnæ ante babæ ännāmaī incæmīnimpa. Piyænē cæte quēwēninque mīnitö wadāni tönö wadodö wadö tedete pīināmaī incæmīnimpa. Waodāni tōmānāni inānite mīnitö ædæmō cæte quēwencæmīnimpa, ante bitö mänömainö ante apænebi ēñencädānimpa.

³Edæ wēñēñedē mōnō adobaī ocai ömædæca ingaimö inte ēñēnāmaī cæte quēwengamöimpa. Mōnō wapiticæ pōnēninque oda cæte quēwengamöimpa. Quiēmē mōnō wēnæ wēnæ cæinēñö ante cæte quēwengamöimpa. Quiēmē

nāmanque pönente, Waa tote quëwengäïmpa, ante cædinqe mönö cöwë ñïmpo cædāmaï inte quëwengamöïmpa. Waodāni inānite cöwë wiwa pönente quëwengamöïmpa. Wadāni godömenque ëadāni adinqe godö piinte agamöïmpa. Wadāni mönö imonte piññönāni mönö wacā ingā wacā ingā piinte quëwengamöïmpa. ⁴Incæte mönö Wængonguï mönö imonte, Quëwenguimïni, ante nē Ængaingā pöninqe tömengä nänö waadete pönëmāmo ante ayæ tömengä nänö ædæmö cædömāmo ante do odömongacäïmpa. ⁵Tömengä wii mönö nō cægäinö beyænque, Quëwenguimïni, ante mönö imonte ængacäïmpa. Wæætë tömengä nänö waadete pönö waa cæinënö beyænque mönö imonte, Quëwenguimïni, ante ængacäïmpa. Minitö mempoga ëñacæminïmpa, ante Wængonguï mönö mimö mënongacä entawëmpa. Ayæ Wængonguï mönö imonte æñongä tömengä Tæiyæ Waëmö Önöwoca pönö cæcä beyænque mönö mimö entawente quëwëmpa. ⁶Itota Codito mönö imonte, Quëwenguimïni, ante nē Ængaingā beyænque Wængonguï iñömö mönö imonte eyepæ pönï pönö cædinqe tömengä Önöwoca ingante angä pö guicä ate entawente quëwëmpa. ⁷Ïninqe Wængonguï waadete pönö cæcä ate mönö tömengä ayongä nō cæte quëwengaimö imompā. Ayæ tömengä nänö waadete pönö cægäinö beyænque nē ænguimö inte mönö, Wänāmaï quëwengäïmpa, ante ee pönente quëwëmpa.

⁸Mänömainö ante nō ante impa. Edæ Wængonguï ingante do pönënāni iñömö, Quinö waa i, ante nāni pönënonque cöwë cæcædänïmpa, ante bitö mäninö ante wæætë wæætë adodö ante apænebi ëñencædänïmpa, ämopa. Mäninö ante waa pönï i ïninqe tömänāni beyæ adodö ante waa ingäïmpa. ⁹Wæætë, Æbänö i, ante nanguï wæatedö wæætë önonquedö ante tedewënāni baï bitö iñömö tömënāni baï tededāmaï incæbiïmpa. Dodāni, Æmönänidö ingaināni, ante ancaa nāni änewënö ante pönënāmaï incæbiïmpa. Ayæ wæætë godö wæætë godö tedewënāni ëñëninque bitö wæætë tededāmaï incæbiïmpa. Ayæ idægoidi nāni wææ angäinö ante godongämæ wadodö wadö piinte tedewëññönāni bitö iñömö iñnāni tönö tededāmaï incæbiïmpa. Edæ mänömaï nāni tededö iñömö önonque tedete i ïninqe edæ æcāmenque beyæ waa impa, ante dæ ampa cæbii.

¹⁰Mini pönencabo incæ adocanque mänömaï tedewengä beyænque wadāni nänëneto nänënë godinqe wacabo wacabo badāni adinqe bitö wæætë nē tedewënongå ingante adopoque wææ ämi ëñencæcäïmpa. Adopoque wææ ämi ate tömengä ëñënāmaï inte gomonga adobaï cæte tedewengä adinqe bitö tömengä ingante wæætë wææ ämi wæcæcäïmpa. Mänömaï mempoga wææ ämi ëñëninque tömengä ñïmpo cædāmaï inte gomonga tedewengä ate wædinqe bitö tömengä ingante Baa äninque gomö ae. ¹¹Edæ mänömaï cædongä iñömö tömengä idiquibæ pönënongå inte nē wënæ wënæ cæcä ingampa. Tömengä nämä nänö apænte panguinque mänömaï cæcampa, ante do ëñëmipa.

Tito quinö cæcæcäïmpa, ante

¹²Botö cöönædepo iñonte Nincopodi nāni quëwëñmö quëwencæboïmpa, ante pönentabopa. Ïninqe Adotëma incæ Tiquico incæ æcänö bitö weca goquïnaa, ante pönëninque botö adocanque ingante ämo go pöñongä bitö eyepæ inte botö weca quingæ pöe, ämopa. ¹³Abogado inte nē cæcä Teëna tönö Apodo gocæ cæyöñate tömëna nāna goquïñö ante nāna ænguënënö wii eyepæ ëada adinqe bitö pædæ godömi ænte godæe. ¹⁴Mönö tönö godongämæ nē pönënāni iñömö wii önonque

cæte quëwencædänimpa. Wæætë edæ wadäni wii eyepæ ëadäni adinque tömënäni pædæ godönäni æncædänimpa, ante cædinque bitö apænebi ëñëninque tömënäni wæætë, Quinö waa i, ante adinque mäninonque ante cæte quëwencædänimpa.

Waa quëwencæminimpa, ante Pabodo yewæmongampa

¹⁵ Botö tönö në ongonäni tömänäni bitö imite, Waa quëwencæbiimpa, ante apænedänipa, ante botö, Bitö acæbiimpa, ante yewæmömopa. Mönitö imönite në waadete pönënäni inänite bitö, Waa quëwencæminimpa, ante mönitö beyæ ante apænebi ëñencædänimpa. Wængongui minitö tömämäni iminite waadete pönö cæcæcäimpa, ante mäninque ante botö yewæmömopa.

Pidemöö

ingante Pabodo cadota ante nänö yewëmongainta

Pidemöö ingante Pabodo yewëmongampa

1 Botö Pabodobo inömo inte Itota Codito ingantedö ante apënebo beyænque botö imote tee mönedäni tee mönegaïmo imopa. Mönö töninacä Timoteo tönö yewëmömönapa. Pidemöö möna në waadebi inömi inte mönatö tönö godongämæ cædömi inömite mönatö, Bitö acæbiimpa, ante yewëmömönapa. ² Bitö oncönë inömo Itota Codito ingante mïni pönencabo godongämæ pönöminite mönatö mïnitö iminite adobaï yewëmömöna acæminimpa. Ayæ mönö mængä Apia tönö Ado- quipo mönitö tönö godongämæ në tontado bai cædongä tönö tömëna acædaimpa, ante yewëmömönapa. ³ Mönö Mæmpo Wængongui tönö Awënë Itota Codito tönö godongämæ waadete pönö cæda ate mïnitö gänë entawencæminimpa, ämönapa.

Pidemöö në waadete pönengä inte wede pönengä ingä

⁴⁻⁵ Bitö Awënë Itota ingante wede pönëmi imipa, ante tömengä quinäni inönäni inänite waadete pönëmi imipa, ante bitö imitedö ante änäni ëñëniimo inte botö bitö beyæ ante Wængongui ingante botö apëneyedë adocä ingante cöwë waa ate pönente apënebopa. ⁶ Mäninö Itota Codito ingante bitö wede pönëni ante wädäni inänite cöwë apënebi ëñëninque tömënäni, Mönö tömengä waa pönï nänö entawënon- coo incæ quincoodö entawëmö imöö, ante ædæmö ëñente bacædänimpa, ante nan- guï cæcæbiimpa, ante botö bitö beyæ ante Wængongui ingante apënebopa. ⁷ Botö töninabi ëñëmi. Itota Codito quinäni inönäni inänite bitö waadete pönente cæbi ate tömënäni gancaë entawente todänitapa, ante apënedäni ëñëninque botö nanguï watapæ todinque wampo pönentabopa.

Pabodo Önetimo beyæ ante Pidemöö ingante angampa

⁸ Mänömaï beyæ mönö Awënë Codito botö imote angä ëñëninque botö awënë bai äninque bitö cæquenënë ante, İmaï cæe, ante guinänämaï inte bitö imite wææ ämo bai waa incædönimpa. ⁹ Incæte botö wææ änämaï inte wæætë mönö waadete pönëmämo beyænque ædæmö apënebopa. Botö Pabodobo inömo inte në picæmo imopa. Ayæ nïowo botö Itota Codito ingantedö ante apënebo beyænque botö imote tee mönedäni tee mönegaïmo inte ämopa. ¹⁰ İninque botö wengä onguinængä Önetimo beyæ ante bitö imite ædæmö apënebopa. Edæ tee mönecönë botö quëwënedë Önetimo ingante apënebo ëñëninque tömengä në pönengä bad- inque botö wengä bai bacä æntabopa cæbii.

¹¹ Wëenënedë tömengä bitö beyæ waa cædämaï inte önonque quëwengacäimpa. Incæte tömengä nïowo inömo bitö beyæ incæ botö beyæ incæ në waa cæcä bacäimpa. ¹² Tömengä botö në waadecä ingä incæte tömengä ingante botö bitö weca ocæ ëmænte da godömo poncæcäimpa. ¹³ Itota ingantedö ante mönö watapæ apënedö beyænque botö imote tee mönedäni ongöninque botö, Pidemöö dæ äñonte Önetimo inömo tömengä beyæ botö weca ongöninque botö tönö guëa cæcæcäimpa, ante pönëninque äinentabopa. ¹⁴ Incæte æbämenque pönö waa cæbi incæ wïi botö

wææ änö beyænque cæcæbiimpa. Wæætë tömëmique pönente cæcæbiimpa, ante cætabopa. Bitö ëñënamai inte Ao änämai iñömite botö ædö cæte Önetimo ingante, Bitö botö weca ongoncæbiimpa, ante angüimoo. ¹⁵ Önetimo bitö imite wantæyö wodii godingä inte ñowo adodö pöñongante bitö tömengä ingante wæætë æñömi tömengä cöwë bitö tönö quëwencæcäimpa. Wabänö mänii ante beyænque wantæyö wodii gocantawo. ¹⁶ Tömengä ingante bitö godonte ænte mämi ate tömengä bitö beyænque cæte nê quëwëningä ingä incæte tömengä ñowo wii nê cæte quëwënanique bai inongä ingampa. Wæætë edæ Itota Codito ingante pönengä badinque tömengä ñowo godömenque bitö töninäcä inongä inte bitö nê waadecä ingampa. Edæ tömengä botö nê nangui waadecä ingampa. Ayæ wii bitö nê cædonganque inongä inte tömengä wæætë mönö Awënë quingä ingampa. Mänömai beyæ tömengä godömenque bitö nê waadecä inongä ingampa.

¹⁷ Ìnrique bitö, Pabodo tönö guëa cämöna imönapa, ante pönëmi inique bitö botö imote æmi bai Önetimo ingante adobai æmaimipa. ¹⁸ Bitö imite wënæ wënæ cæcantawo. Bitö imi quiëmë ante æninque wæætë pönönämai ingantawo. Ìnrique tömengä nänö pönönämai ininö ante bitö botö imote wæætë, Pönömi æmoe, ämi ëñëninque botö pædæ pönömo æmaimipa. ¹⁹ Botö Pabodobo inömo inte tömëmo önopoca inte imainö ante yewämömopa. Tömengä quinö nänö pönönämai ininö ante botö wæætë tömänö pönömo æncæbiimpa. Botö edæ bitö imite wii Itota Codito ingantedö ante odömonte apænebo bai bitö ayæ pönënamai inte quëwencædömiimpa. Ìnrique botö apænedö beyæ bitö botö imote wæætë pönönämai ingä bai inömi imipa. Incæte botö mänömai beyæ bitö imite wii ancæboimpa. ²⁰ Botö töninäbi ëñëmi. Mönö Awënë beyænque bitö botö beyæ pönö cædinque Önetimo ingante waadete pönencæbiimpa, ante wæbopa. Edæ mönö Codito nempo quëwëmöna inique bitö waadete pönente cæbi ate botö gancaë entawente tocæboimpa, ämopa.

²¹ Bitö cöwë ëñente cæquimi imipa, ante do ëñënimö inte botö, Bitö acæbiimpa, ante yewämömopa. Edæ botö änö ëñente cædinque bitö godömenque cæquimi imipa, ante ëñëmopa. ²² Ìnrique adodeque ayæ äinëmopa. Minitö botö beyæ ante Wængongui ingante mini apænedö beyæ botö imote ñimpo cædäni ate bitö weca acæ poncæboimpa, ante pönëmopa. Ìnrique bitö oncönë adocönë botö owoquincö ante tömäa ædæmö cö cæquimi, ämopa.

Pidemöö ingante Pabodo, Waa quëwencæbiimpa, angä

²³ Epapada botö bai adobai Itota Codito beyænque nani nê tee mönegaingä iñömö tömengä botö imote, Pidemöö waa quëwencæcäimpa, ante angä ëñëninque botö bitö imite yewämömopa. ²⁴ Mäadoco tönö Aditadoco ayæ Deëma tönö Odoca botö tönö godongämæ cædäni iñömö adobai botö imote, Pidemöö waa quëwencæcäimpa, ante änäni ëñëninque botö bitö imite yewämömopa.

²⁵ Mönö Awënë Itota Codito bitö imite waadete pönö cæcæcäimpa. Mäninque ante botö yewämömopa.

Ebedeoidi

inänite cadota ante näni yewæmongainta

Wængongui beyæ tömengä Wengä pönö apænecäimpa

1 Wængongui wëenënedë wantæ wantæ iñö apænedinque wantæ iñö wadö bai cædinque wantæ iñö wadö bai cædinque tömengä beyæ nê apænedäni inänite tæmpo pönö apænecä ëñengadänimpa. Eñëninque tömënäni wæætë adodö ante mönö mëmæidi inänite tæmpo apænecadänimpa.

²Nöwo guiquënë mäninö ante Wængongui dodäni inänite nänö apænecäiönæ idæwaa bayonte tömengä apænecä ëñëninque tömengä Wengä wæætë mönö imonte pönö apænecäimpa. Wëenë pönü inguiipoga dæ iï ëmönæ dæ äñonte Wæmpocä tömengä Wengä ingante, Badöe, angä ëñente cæyongä tömengä nänö cædö beyæ Wæmpocä tömancoo badongacäimpa. Mänömai beyæ nê badongä iñongante Mæmpo Wængongui wæætë, Tömancoo nê ænguingä iñömö botö Wengä adocanque nê ænguingä ingampa ämopa, angacäimpa. ³Mæmpocä nê tæi ëmönongä inte ñäö ëmongä iñongä tömengä Wengä iñömö adobai nê tæi ëmönongä inte ñäö ëmongä ingampa. Iñinque, Wængongui Wengä nö pönü entawëninque nänö quëwengainö bai Mæmpocä iñömö edæ adobai pönü entawënonongä inte edæ nöingä cæte quëwengä ingampa, ante mönö edonque ëñengäimpa. Iñinguiipo incæ iï ëmönæ incæ a ongoncoo incæ awëmö iñömö ongoncoo incæ tömengä Wengä adocä tæi piñænte nänö angäinö beyænque tömancoo edæ nöwo ganca cöwë ongoncoo incoopa. Ayæ nämä wepæ godonte wæninque adocä iñömö wënæ wënæ mönö cæpämö ante ñä mënongacäimpa. Mänömai nê ñä mënongaingä iñongä inte tömengä do æidinque Wængongui nê tæi ëmongä tömëmængä iñö tæ contadinque ongongampa.

Tömengä ñænængä iñongä anquedoidi pönömenque inäni

⁴Mänömai æi contadinque tömengä nê ñænængä iñongante Wængongui iñömö, Bitö ëmowo bitö cöwë ænguënegaiwo, ante pemongacäimpa. Wængongui anquedoidi guiquënë wi adobai ñænænäni iñönänite Wængongui tömënäni inänite adobai ante pemönämai ingacäimpa. ⁵Edæ anquedoidi iñönänite æcämenque ingante Wængongui dicæ,

“Botö Wëmi inömi imipa.

Nöwoönæ bitö Mæmpobo babopa,”

Ante angantawogaa. Ayæ adobai,

“Botö tömengä Mæmpobo incæboimpa.

Iñinque tömengä botö Wengä incæcäimpa,” ante anquedo ingante änämai ingacäimpa.

⁶Wæætë tömengä Wengä Tänäcä iñongante inguiipoga da pönöninque Wængongui, “Botö anquedoidi tömänäni iingä önöwa iñö ædæ wææninque, Bitö Wængongui Wëmi imidö angüënë, ante watapæ apænecadänimpa,” ante apænecäimpa.

⁷Ayæ wæætë anquedoidi inänitedö ante apænedinque,

“Tömengä godö cæcä ate tömengä anquedoidi iñömö woboyæ nangui päëmæ bai quingæ pönü cæcadänimpa.

Ayæ tömengä godö cæcä ate tömengä beyæ nê waa cædäni iñömö gonga bæcoguënëwate bai nangui cæcædänimpa.”

⁸ Ante apænedinque tömengä Wengä ingante guiquënë Wængongui incæ iïmai angacäimpa.

“Bitö nê Wængongui inömi inte ëñëmi. Awënë Odeye badinque Awënë containpaa tæ contagaïmi inte bitö ñimpo cædämai inte cöwë Awënë Odeyebi inömi inte ongoncæbiimpa.

Ïnque Awënë Odeyebi inömi inte bitö nempo quëwënäni inänite nö pönï cæte aadinque yaëmë töëmë pönï næænte bai nê ämi incæbiimpa.

⁹ Nê Wængonguïmo inömo inte botö iñömö bitö Awënë Wængonguïmo imopa. Ïn-
inque botö, Nö cæte mönö quëwenguïnö ante nê waadebi inömi inte bitö ëñëna-
mai nani cæinö ante edæ wï ainëmi imipa.

Mänömai imi ante adinque botö iïmai pönö cæbopa. Bitö tönö godongämæ ongönäni
Awënë badinque bitö watapæ tocæbiimpa, ante cædinque botö,
oguinguipæ pönö gao caate bai nangui cægaboimpa.”

¹⁰ Ante Mæmpo Wængongui angacäimpa. Ayæ adobai tömengä Wengä ingante
apænedinque,

“Bitö Tæiyæ Awënë inömi inte wëñëñedë pönï inguipo mä cö cæte bai cædinque
tömëmi badongabiimpa, angacäimpa.

Ayæ öönædë ongoncoo adobai tömëmi bitö öonmpoca badongaincoo inte
ongoncoopa.

¹¹ Mänincoo guiquënë iïncayæ ate wido cæte bai bayonte

Bitö guiquënë cöwë ongonguïmi imipa.

Mänincoo guiquënë mönö weocoo pedæncoo woincoo bai bayonte,

¹² waocä yacooque æninque topo cæcä bai cædinque bitö wæætë bitö badongaincoo
ænte topo cæte bai cæcæbiimpa.

Wæætë miincoo wëñacä bai cædinque bitö wæætë tömancoo miincoo badömi
ongongæimpa.

Bitö iñömö do bitö ingai bai adobai cöwë inguïmi imipa.

Bitö quëwenguïmämo cöwë inguinö anguënë.”

¹³ Äninque Wængongui tömengä Wengä ingante iïmai angacäimpa.

“Botö tömëmæ inö tæ contate ongönömite,

botö bitö imite nê piïnte cædäni inänite bæ tabo tæ wæænäni ate bitö tæi emömi
inte pinä gäwate bai godö cæbi wæcædänimpa,” angacäimpa.

Tömengä Wengä ingante mänömainö ante nê angaingä inte Wængongui dicæ an-
quedoidi inänite adobai angantawogaa. ¹⁴ Ïñæmpa Wængongui anquedoidi iñömö
baö ömaadäni inte Wængongui beyæ nê waa cædäni inänipa. Mänömai iñönänite
tömengä, Botö æmo beyænque nê quëwënäni beyæ minitö godö cæcæminimpa, ante
da pönongä pöninque tömënäni mönö beyæ pönö waa cædänipa.

Wængongui ængä beyænque quëwëmompa, ante

2 Mänömai beyæ mönö Awënë apænecä ëñëninque mönö ëñengainö ante mönö
ñimpo cædämai inguinque ante mönö wede pönente ædæmö ëñente cæcæimpa.

² Edæ anquedoidi incæ Wængongui beyæ apæneyönäni tömënäni nani änö ante
dodäni wæætë nê ëñente cæquënëñäni ingadänimpa. Ïnque æcänö wï ëñën-

inque wapiti cæda tōmengä nē tente wæquēnengä iñongante dodāni nō cædinque pangadānimpa.

³ Iñānāni ēñēedāni. Wængongui nānō, Quēwencæminimpa, ante angainō ante æcānō mōnō imonte tāno apænecantawo, ante pōnēedāni. Wængongui Awēnē iñongä incæ tānocā apænegaingä inte, Botō tōmēmo æmo beyænque quēwencæminimpa, ante apænegacäimpa. Ayæ Wængongui nānō apænegaingä ēñente Ao äninque wadāni godōmenque mōnō imonte, Nāwangä impa, ante apānedāni ēñēnimō inte mōnō ædæmō ēñengæimpa. Edæ ēñēnāmaï inte bai ñimpo cæmō iñinque Wængongui dicæ pānāmaï inte ata cæpocampa quēwenguimō.

⁴ Iñinque, Quēwencæminimpa, ante nāwangä botō äno ante ēñencædānimpa, ante cædinque Wængongui godōmenque cægacäimpa. Tōmengä, Æcānō tōnō cæquimoo, ante, Æyōmōnō cæquimoo, ante, Æyedēnō cæquimoo, ante nāmā nānō angainō bai cædinque iïmaï pōnō cægacäimpa. Tōmengä, Botō mä cæbo ate waodāni ēñencædānimpa, ante nanguï cægacäimpa. Ayæ, Æbānō cæcää, ante wæcædānimpa, ante tæï piñæninque wadō wadō cædinque bamōnengæ edæ nanguï cægacäimpa. Tōmengä Önōwoca ingante da pōnongä pōninque tōmengä wæætē Wængongui nānō angaināni inānite pōnō cæcä æninque tōmēnāni tōmānāni Wængongui Önōwoca nānō pōnongä ænganca cægadānimpa. Iñinque Wængongui mānōmaï pōnō cæcä adimō incæ mōnō ēñēnāmaï cæmō bai tōmengä wæætē mōnō imonte ædō cæte ata cæpoquēnengä.

Itota Codito tōmengä tōññadāni bai adobaï bagacäimpa

⁵ Ayæ miinguipoga Awēnē nempo mōnō quēwenguimāmo ante apænemōnipa. Iñinque miinguipoga mōni änonguipoga Wængongui, Æcāmenque ingante ämo awēnē baquingä, ante cædinque, Anquedoidi incæ awēnēidi bacædānimpa, ante dicæ angantawogaa. ⁶ Wacä wataa yewæmōninque iïmaï ante Wængongui ingante ämotamini ante bai yewæmongacäimpa.

“Wængongui ēñēmi. Waomōni önōmōnique iñōmōnite bitō ædō cæte waadete cæbii. Wao wēmōni ēñagaimōni iñōmōnite bitō ædō cæte pōnō waadete cæbii.

⁷ Anquedoidi inānite æmonga ææntodōninque bitō waocä ingante gao wænō gö cæbi ate tōmengä wantæ iñō pōnōmenque ongongantapa.

Ayæ, Waocä nē tæï emōnongä inte ñäo emōñongante wadāni tōmengä ingante waa acædānimpa, ante pōnō badongabiimpa.

⁸ Edæ bitō badongaincoo tōmancoo waocä nempo pōnōmi æninque waocä tæï emongä inte nē angä bagacäimpa.”

Ante nānō yewæmongaine bai cædinque Wængongui tōmengä nānō badongaincoo tōmancoo Waocä nempo pōnongä æninque Waocä nē angä bayongä wacoo wayōmō ongoncoo edæ dæ ampa. Incæte, Tōmengä nempo tōmancoo do ongompa, ante mōnō ñōwo ganca ayæ adāmaï imompa. ⁹ Doyedē mōnō waocabo iñōmonte Wængongui waadete pōnō cædinque Itota ingante angä ēñēninque tōmengä wæætē mōnō tōmāmō wænguimāmo beyæ ante cōwē wæwocate wæquingä bagacäimpa. Mānōmaï cædinque Wængongui anquedoidi inānite æmonga ææntodōninque, Itota wæætē caate wæncæcäimpa, ante cædinque tōmengä ingante gao wænō iñōmō gōnongä ongongacäimpa. Incæte Itota caate wængä beyæ Wængongui poganta tæiyæ waēmō da wencate bai cædinque, Itota nē tæï emōnongä inte ñäo emongä

adinque wadāni tōmengā ingante waa acædānimpa, ante pōnō cægacāimpa. Īninqe Itota Tæiyæ Awënë wencate ongongā ingante do amompa.

¹⁰Tōmancoo nē badongaingā inongā inte Wængonguī tōmancoo nē ěnempodongā inte ĩmaī angacāimpa. Botō Wēmi ěñēmi. Wadāni incæ botō wēnāni nanguī ināni quēwencædānimpa, ante nē badōmi bitō baquinque caate wæcæbiimpa. Mānōmaī caate bitō wædō beyænque ædæmō picæmi bate nē ěñēnīmi inte bitō botō wēnāni inānite nāō ĩñōmō ænte māmōmi poncædānimpa. Pōninque tōmēnāni botō nāō ěmōmo baī adobaī nāō ěmoncædānimpa, ante Wængonguī nō pōnī cægacāimpa.

¹¹Itota mōnō imonte, Tæiyæ waēmō ěwocate quēwencæminimpa, ante nē badongā ĩnongā mōnō tōmengā tōnō adomō mōnō cabo imompa. Mānōmaī imō beyæ tōmengā mōnō imonte ante apænedinque, Botō tōniñamīni imīnīpa, ante guīñenedāmaī tedecampa. ¹²Īmaī ante apænecampa.

“Wængonguī ěñēmi. Bitō ěmōwo ante botō tōniñadāni inānite apænebo ěñencædānimpa.

Tōmēnāni godongāmæ ongonte ěñēñōnāni botō, Wængonguī ĩñōmō Tæiyæ Waēmō inongā inte waa pōnī cæcā abopa, ante ämotamīni ante baī ancæboimpa.”

¹³Ayæ adobaī apænedinque,

“Wængonguī ingante botō wede pōnente quēwencæboimpa,” angacāimpa.

Ayæ wæætē adobaī apænedinque,

“Wængonguī botō imote apænedinque, Bitō wēnāni, ante pōnongā ænōmo inte botō, Mōni wencabo mæ ongōmōni aedāni, ämopa.”

Itota incæ Wængonguī beyæ nāni yewæmongainō baī adobaī apænecampa.

¹⁴Mōnō wænguimāmo ante wēnæ awënë incæ nē angā ĩnongante Itota, Botō nāñe wæninqe tōmengā ingante edæ ömæe ěwencæboimpa, ante ĩmaī cægacāimpa. Mōnō Itota wēñæmō ĩnōmō inte mōnō baō tōnō wepæ nōmænguīñō ěñamō baī tōmengā nānō wænguinque adobaī nōmænguīñō ěñagacāimpa. Īninqe tōmengā nāmā nānō wænō beyænque wēnæ awënë ingante bæ tacā ate tōmengā wæætē piñænāmaī aquīi bate nē angā ināmaī ingampa. ¹⁵Ayæ wēnæ awënë nempo nā cæyænte baī quēwēninqe mōnō wænguimāmo ante guīñente wæyōmonte Itota mōnō beyæ ante wæætē wæninqe mōnō imonte gā pe æmpote ö ængā beyænque quēwēmompa.

¹⁶Edæ wīi anquedoidi inānite ænte pæ mancæte ante cædinque tōmengā wæætē Abadāō wodi pæimō ĩñōmonte mōnō imonte pōnō æninqe pæ mangampa.

¹⁷Mānīnō beyæ Wængonguī, Bitō tōniñadāni baī adobaī badinque bitō, Wængonguī quī, ante nē nō Pōnōmi Nænæmi pōnī incæbiimpa. Ayæ bitō tōniñadāni inānite cōwē pōnēninqe waadete pōnō waa cædinque ædæmō aacæbiimpa, ante tōmengā ingante da pōnongā pongacāimpa. Ayæ adobaī, Bitō tōmēnāni wēnæ wēnæ nāni cædō beyæ nāmā wepæ godoncæbiimpa, ante cædinque Wængonguī Itota ingante da pōnongā pōninqe tōmengā mōnō ěñamō baī adobaī ěñadinque waomō mōnō ĩnōmō baī adobaī badinque Waoçā inongā ingacāimpa. ¹⁸Mōnō inguipoga quēwēninqe wēnæ wēnæ mōnō cæinēnō beyæ wæwēmompa. Wēnæ awënë, Itota oda cædinque Wængonguī ingante ěñēnāmaī cæcæcāimpa, ante cæyongā Itota ĩñōmō mōnō wæwēnō baī adobaī wæwengā incæte oda cædāmaī ingacāimpa. Īninqe wēnæ wēnæ cæinente wæwēñōmonte tōmengā adobaī do wægāingā inte, Mīnitō tæi piñænte ongōninqe oda cædāmaī incæmīnīmpa, ante pōnō tōō æmænte cæcampa.

Itota Ñænængä iñongä Möitee wodi wædangä ingacäimpa

3 Mönitö imönite aa pedinque Wængonguï minitö iminite adobai aa pedinque, Tæiyæ waëmö entawencæminimpa, ante badongacäimpa. Ìnque botö tönñamini ëñeedäni. Itota iñömö Wængonguï nänö në da pönongaingä ingacäimpa, ante mönö pönönö ante mönö, Näwangä impa, ante apænemompa. Ayæ, Wængonguï quï, ante në Godongä Ñænængä pönï iñömö Itota adocä ingampa, ante mönö pönönö ante, Näwangä impa, ante apænemompa. Ìnque minitö guiquënë, Itota æbänö ingacäimpa, ante önöwënenque pönente quëwenguënëmini iminipa. ²Wængonguï angä ëñëninque Möitee wodi guiquënë tömengä ingante cöwë pönente cædinque Wængonguï tönö nani godongämæ quëwencabo inänite ædæmö cæte aagacäimpa. Tömengä nö cæte nänö aagai bai adobai cædinque Itota iñömö Wængonguï angä ëñëninque tömengä ingante cöwë pönente cædinque tömengä tönö mönö godongämæ quëwencabo imonte ædæmö cæte aacantapa.

³Edæ, Oncö waa ongompa, ante waa amö incæ mönö oncö në badöningä ingante godömenque waa ate apænecäimpa. Adobai, Möitee wodi në waa aacä ingacäimpa, ante tömengä ingante waa amö incæ mönö edæ Itota në badongaingä ingante godömenque nanguï waa ate apænecäimpa. ⁴Wacö oncö guiquënë wii tömenque ongompa. Edæ wacö mänongå ate oncö edæ ongö aminipa. Inguipo incæ adobai öönædë ongoncoo adobai wii tömenque ongoncoopa. Mänincoo tömancoo Wængonguï nänö badongaincooque ongoncoo acäimpa. ⁵Möitee wodi guiquënë Awënë Wængonguï ingante në cæcä inongä inte tömengä tönö nani godongämæ quëwencabo inänite cöwë pönëninque ædæmö cæte aagacäimpa. Mänömai cædinque tömengä, Wængonguï æbänö iincayæ ate apænëquingää, ante odömöninque, Näwangä impa, ante apænegacäimpa. ⁶Mönö Codito guiquënë Wæmpocä Wengä Onguüñængä inongä inte Wæmpocä tönö nani godongämæ quëwencabo inänite cöwë pönente nöingä pönï cæte pönö aacampa. Edæ mönö guiquënë, Codito waa pönï pönö cæcä beyenque watapæ bacäimpa, ante mönö pönönö ante wadäni ëñëñönäni waa tote apænemompa. Ìnque mönö guüñënamai inte mäninö mönö pönönö ante ædæmö entawëninque iinque baganca ñimpo cædämai imö ñinque tömengä tönö mönö godongämæ quëwencabo imaïmompä.

Wængonguï quïnäni nani guëmanguïmämo ante

⁷Mänömai beyæ Wængonguï Tæiyæ Waëmö Önöwoca nänö angainö ante mönö ëñente cæcäimpa. Tömengä nänö apænëgainö ante iïmainö ante yewæmongatimpa.

“Ñöwoönæ incæ tömengä apænecä ëñëninque,

⁸minitö, Mimö ömædë bawënamai incæmönimpa, ante cædinque Baa änämai iedäni.

Dodäni iñömö, Wido cæcäimpa, ante nani önömæca quëwente cæyedë, Wængonguï ingampa diyæ panguingää, ante pönëninque wiwa cægadänimpa. Mänömai cædinque tömënanäni Baa ante mimö ömædënanäni nani bawengai bai minitö adobai bawënamai iedäni.

⁹Minitö mëmæidi mäniñömö quëwëninque botö imote wiwa cædäni wægaboimpa. Incæte botö mäniñedë coadenta wadepo iñonte waa cæbo agadänimpa.

¹⁰Mäniñedë quëwënanäni mänömai cædäni beyæ botö tömënanäni inänite püinque iïmai angaboimpa.

‘Botō taadō goquēnēnāni incæ taadō cōwē adāmaī ināni inte tōmēnāni ancaa oda cædinque mīmō ōmædēnāni inte baī wadō godānīpa.’

¹¹ Ānīnque botō ænguī badīnque, Botō nē Quēwēmo ingaīmo inte nōingā āmopa, ānīnque, Guēmædāni, ante botō angaiñōmō tōmēnāni cōwē guīte guēmānāmaī incædānīmpa, angaboīmpa.”

Ante Wængonguī nānō angaiñō ante yewæmongadānīmpa.

¹² Īnānāni ēñēdāni. Mīni pōnencabo īñōmīnīte mīnitō wacā ingā wacā ingā waa adīnque adocanque incæ wēnæ wēnæ entawengā badīnque wīya æmænte Wængonguī nē Quēwengā ingante ēmō cæte godāmaī incæcāīmpa, ante wææ aedāni. ¹³ Nōwoōnæ, ante nē angā nānō angaiñōnæ īñōmō ayæ ñōwo ganca ēñæpa. Īnīnque mīnitō ñōwoōnæ incæ wacā ingā wacā ingā ædæmō apænedīnque, Æcāmenque incæ wīwa nāni cædō beyænque oda cæte wædinque mīmō ōmædengā badāmaī incæcāīmpa, ante cædinque īimō īñō īimō īñō godongāmæ īñacabo cædinque tæī ongōedāni. ¹⁴ Edæ mōnō wēēñēdē wede pōnengamōīmpa. Ñōwo adobaī pōnēnīnque īinque baganca wede pōnēmō īinque mōnō Codito nempo godongāmæ quēwēmaīmōmpa.

¹⁵ Īnīnque adode ante pōnente cæcæīmpa.

“Ñōwoōnæ incæ tōmengā apæñecā ēñēnīnque mīnitō, Mōnitō mīmō ōmædēmōni bawēnāmaī incæmōnīmpa, ante wææ cædinque Baa ānāmaī iedāni.

Edæ dodāni, Wido cæcæīmpa, ante cædinque edæ Baa ante mīmō ōmædēnāni nāni bawengai baī mīnitō adobaī bawēnāmaī iedāni.”

¹⁶ Wængonguī angā ōnōmoncaque ēñēnīnque, Wido cæcæīmpa, ante ædānidō cægadānīi. Edæ Mōitee wodi Equitobæ nānō nē ænte gogaīnāni adodāni incæ, Wido cæcæīmpa, ante cægadānīmpa. ¹⁷ Ayæ adobaī Wængonguī coadenta wadepo īñonte ædānidō inānīte pīīnīnque ænguī bagacāi. Edæ nē ēñēnāmaī inte wēnæ wēnæ cædāni inānīte Wængonguī pīinte ænguī bacā ate tōmēnāni baō ingai ōnōmæca yabæque wæænte ōñongatīmpa. ¹⁸ Ayæ, Pō guīte guēmædāni, ante botō angaiñōmō cōwē guīte guēmānāmaī incædānīmpa, ante Wængonguī, Botō nē Quēwēmo inōmo inte nōingā angaboīmpa, angacāīmpa. Edæ ædānidō inānīte mānōmaī angacāi. Edæ nē ēñēnāmaī cædāni inānīte mānōmaī angacāīmpa. ¹⁹ Īnīnque nē pōnēnāmaī ināni inte tōmēnāni nāni pōnēnāmaī inō beyænque guīdāmaī ingadānīmpa.

4 Botō nempo guīdīnque guēmancæmīnīmpa, ante wēēñēdē nānō angaiñō ante Wængonguī ñōwo incæ adodō ante cōwē angampa. Mānōmaī beyæ mīni pōnencabo tōmāmīni tōmengā nempo guīdīnque guēmanguēnēmīni īñōmīnīte adocanque incæ oda cædāmaī incæcāīmpa, ante cædinque mōnō godongāmæ waa adīnque wææ aacæīmpa. ² Edæ dodāni inānīte Wængonguī ingantedō ante watapæ nāni apænegaiñō baī mōnō imonte adobaī ante watapæ apænedāni ēñēmōmpa. Incæte dodāni guīquēñē ōnōmoncaque ēñēnīnque wede pōnēnāni beyænque guēmānāmaī inte wægadānīmpa. ³ Mōnō nē wede pōnēmō imō guīquēñē Wængonguī nempo guīdīnque mīmōñē do guēmāmōmpa. Edæ Wængonguī nempo mōnō guēmanguēñē ante botō ānīnta adotaa īimāñō ante yewæmōnte ongō baī batīmpa.

“Botō ænguī badīnque, Botō nē Quēwēmo ingaīmo inte āmopa, ānīnque,

Pö guite guëmædäni, ante botö angaiñömö tömënäni cöwë guidämaï incädän-
impa, angaboimpa.”

Ante Wængongui beyä ante yewæmongadänimpa. Incæte doyedë inguipoga iï
ëmönæ badöningue Wængongui tömengä nänö cæquënënö ante iinque badöningue,
Idæwaa, angacäimpa. ⁴Wængongui önompo æmæmpoque go adoönæque iñonte
iinque cædinque iimö wæiyö nänö guëmangaïönæ ingatimpa, ante iïmaï ante wataa
yewæmonte ongompa.

“Önompo æmæmpoque go adoönæque iñonte iinque cædinque iimö wæiyö ñimpo
cædinque Wængongui guëmangacäimpa.”

⁵Ayæ botö äninta adotaa iïmaï ante yewæmonte ongompa.

“Pö guite guëmædäni, ante botö äñömö tömënäni cöwë guidämaï incädänimpa,”
angampa, ante yewæmongatimpa.

⁶Iinque Wængongui nänö pönö cædö ante watapæ ante apæ necä ëñëningue dodäni
iñömö önömoncaque ëñënäni inte tömënäni nänäni ëñënämaï cægainö beyä guidä-
maï ingadänimpa. Iinque, Wængongui tömengä nänö angainö iinque cæcäimpa,
ante cædinque iincayæ quëwënäni pancadäniya cöwë guiquënënäni inönänimpa.

⁷Mänömaï beyä, Æönædö ëñenguënëmini iminii, ante odömoncæte ante cædinque
Wængongui, “Ñöwoönæ,” ante awënë Dabii ingante wantæpiyæ ate apæ necä ëñen-
gacäimpa. Iinque mäninö botö do ante yewæmömo mini adinö bai ante Dabii wodi
iïmainö ante yewæmongacäimpa.

“Ñöwoönæ incæ tömengä apæ necä ëñëningue mïnitö, Mïmö ömædëmöni
bawënämaï incæmönimpa, ante cædinque Baa änämaï iedäni,” ante
yewæmongacäimpa.

⁸Edæ docä Ootowee wodi tömënäni inänite doyedë manguicä guidique Cä-
naämæ quëwengadänimpa. Incæte tömënäni mäniömæ do guidänäni inte näwangä
guëmänäni bai Wængongui iincayæ ate, Ñöwoönæ guëmancæmïnimpa, ante wæætë
änämaï incædongäimpa. ⁹Iinque mönö Wængongui quïmö iñömö edæ guëman-
guiïönæ guëmante bai mönö tömengä nempo quëwëningue mïmönë guëmäninque
cætawente wædämaï ingäimpa. ¹⁰Wængongui iinque badöningue tömengä nänö
cæquënënö tömää cædinque ñimpo cædinque guëmangacäimpa. Tömengä nänö
ñimpo cæte guëmangaï bai waocä iñömö Wængongui nempo guidique në guë-
mangä iñömö adobaï tömengä nänö cæquënënö ante, Tömänö do cætimpä, ante
adinque ñimpo cædinque guëmangampa. ¹¹Dodäni nänäni ëñënämaï cægaï bai ñö-
wodäni adobaï cædäni iinque tömënäni nänäni tæ go wæænguinque cæbaïnänipa.
Mänömaï i iinque, Adocanque incæ mänömaï cæte tæ go wæænämäi incæcäimpa,
ante wææ cædinque mönö tömämö, Wængongui nempo guite mïmönë guë-
mangäimpa, ante nanguï cæcäimpa.

¹²Wængongui nänö äñö iñömö mïine quëwëne inte tæi piyænë ënepa. Edæ yaëmë
yægamë tipængaa engamë bamencaa guiibæ watii co bai Wængongui nänö äñö
iñömö adobaï cædinque mönö önöwoca incæ do cote bai guiipa. Ayæ bamë tadö-
mengadämë tæi guïñænte bamii edonque a bai Wængongui nänö äñö iñömö adobaï
mönö mïmö incæ tadömengadæ tæi guïñænte bai cædinque mönö pönënö ante mönö
cæinënö ante do edonque ba adinque adode incæ apænte bai ampa. ¹³Wængongui
në apænte änongå iñongante mönö nämä incæ, Æbänö cægamöni, ante tömengä
ingante töingä apænequënëmö imompa. Edæ, Wængongui ayongä tömengä nänö
badongaincoo tömancoo edæ gä ængate ömægacoo bai inte wodönämaï ongompa.

Wængonguī ingante nē Godongā Ñænængā Itota ingampa

¹⁴Mönö beyæ, Wængonguī quī, ante nē Godongā Ñænængā pōnī iñōmō Wængonguī Wengā Itota ingampa. Tömengā iñōmō nāmā wepæ godonte do wængaingā inte ñāni òmæmōnīnque òönædē æite ongongampa. Ìnīnque mönō, Tömengā ingante wede pōnēmōnīpa, ante nē apænemō inte mönō wede pōnēnō ante ædæmō pæ mangæīmpa. ¹⁵Wængonguī quī, ante mönō beyæ nē Godongā Ñænængā pōnī ñongā iñōmō wænæ wænæ cædāmaī ingacāīmpa. Incæte aquīī imō inte wæmō adīnque tōmengā wæætē, Botō Waobo ēñadinque aquīī bate wægāīmo inte, Aquīī mīni wædō æbānō ī, ante do edæ ēñēmopa, angampa. Edæ wænæ awēnē tōmengā ingante, Wænæ wænæ cæe, angā do wægāingā inte tōmengā mönō wænæ wænæ cæīnēnō, Æbānō ī, ante do ēñengampa. ¹⁶Ìnīnque mönō Awēnē iñōmō nangūī waadete pōnengā inte Awēnē contāīmpaa ongongampa cæmōō. Mönō wænæ wænæ cædīnō ante tōmengā pōnō ñīmpo cæcæcāīmpa, ante cædīnque mönō tōmengā weca ponte apænecæīmpa. Mönō caate wæyēdē tōmengā pōnō tōō æmæante cæcæcāīmpa, ante mönō tōmengā weca ponte apænecæīmpa. Mānōmaī Awēnē ongompaa gāānē pōnīnque mönō guīñēnāmaī inte apænemō ēñēnīnque tōmengā waadete pōnō waa cæcā ængæīmpa.

5 Wængonguī quī, ante bitō botō imote nē pōnōmī ñænæmī pōnī bacæbiīmpa, ante æcānō ingante Wængonguī angā bacāā.

Edæ waocā adocanque ingante apænte ænīnque Wængonguī angā ate tōmengā iñōmō nē waocā ñongā inte waodāni beyæ Wængonguī weca cæcampa. Ìnīnque waodāni iīngā weca pōnīnque, Wængonguī quī, ante pædæ pōnōnāni ænīnque tōmengā wæætē Wængonguī ingante godongampa. Ayæ, Wænæ wænæ cæmōnī incæte Wængonguī waadete pōnō ñīmpo cæcæcāīmpa, ante cædīnque waodāni, Wængonguī quī, ante cæningā ænte pōnīnque pædæ pōnōnāni ængampa. Ænīnque nē godongā ñænængā iñōmō nē waocā ñongā incæte cæningā ingante ænte wænōnīnque nē ænte pōnāni nāni wænæ wænæ cædīnō beyæ ante baō iya tangampa. ²Ìnīnque wadāni, Æbāmē īmpa, ante ēñēnāmaī nāni wædō ante nē godongā ñænængā iñōmō nē waocā ñongā inte adobaī pancaa ēñēnāmaī inte wæcampa. Ayæ oda cæte nāni wædō ante tōmengā adobaī oda cæte wæcampa. Ìnīnque wadāni baī aquīīngā ñongā inte tōmengā gānē pōnēnīnque wadāni ñānīte ædæmō cæte odōmongā adānīpa. ³Mānōmaī ñongā inte tōmengā wadāni wænæ wænæ nāni cædīnō beyæ ante, Wængonguī quī, ante iya tānīnque adobaī, Botō nāmā wænæ wænæ cædīnō beyæ godōmpa, ante iya tante Wængonguī ingante godongampa.

⁴Waocā nāmā incæ, Botō, Wængonguī quī, ante nē godōmo ñænæmo bayōmote wadāni botō imote waa acædānīmpa, ante ædō cæte angūīngā. Ìñæmpa Wængonguī angā beyænque Aadōō wodi nē godongā ñænængā bacā baī wadāni adobaī Wængonguī angā beyænque nē godōnāni ñænænāni badānīpa. ⁵Codito incæ, Nē godōmo ñænæmo badīnque nē tæī ēmōmo inte ñāō ēmōmo acædānīmpa, ante nāmā ante wīī angacāīmpa. Wængonguī incæ tōmengā ingante, “Bitō botō Wēmi iñōmī īmpa.

Ñōwoōnæ bitō Wæmpobo babopa.”

⁶Angacāīmpa. Ayæ godōmenque Wængonguī nānō angāīnō ante wataa yewæmongatīmpa.

“Wængonguī quī, ante nē pōnongā Mēequitedeco nānō cōwē ingāī baī,

bitō adobaī nīmpo cædāmaī inte nē Pōnōmi cōwē incæbiimpa,” ante Codito ingante angacāimpa.

⁷Codito iñōmō Waocā ēñate quēwēninque Ca ca wædinque Yæ yæ āninque Wængonguī ingante nanguī apænecācāimpa. Wængonguī bitō adobique eyepæ īmi inte wææ āmi iñinque botō wænāmaī imaīmopa, angacāimpa. Incæte, Bitō, Wæe, āmi ate botō wæncæboimpa, ante nānō Ao āninō beyænque Wængonguī tōmengā ingante do ēñengacāimpa. ⁸Wæmpocā Wēñængā iñongā incæte Itota nānō caate wæwēmāmo beyænque Wængonguī nānō ānō ante ædæmō ēñente cædinque picængā bagacāimpa. ⁹Tōmengā nānō ānō ante nē ēñente cædōmō iñōmō tōmengā ædæmō ēñēninque picængā bagaingā inte edæ mōnō imonte ængā beyænque mōnō cōwē wænāmaī inte quēwēmōmpa. ¹⁰Tōmengā ingante Wængonguī apænte æninque, Mēequitedeco nē pōnongā ñænængā pōnī nānō ingaī bai bitō adobaī botō imote nē Pōnōmi Ñænæmi pōnī iñōmi imipa, angacāimpa.

Mōnō wede pōnēnō ante Baa ānāmaī ingæimpa, ante

¹¹Māninō ante botō mīnitō imīnite godōmenque nanguī apænequēnēmo imopa. Incæte, Æiquedō ēñenguimīnii, ante pōnente wædinque botō, Æbānō cæte apænebo ēñenguimīnii, ante wæbopa. ¹²Iñæmpa mīnitō doyedē mīni ēñengainō ante ñōwo nē odōmōmīni baquēnēmīni imīnīpa. Incæte wacā wæætē mīnitō imīnite Wængonguī nānō angainō ante adodeque adodeque ante odōmōnte apænecā ēñenguēnēmīni adodō bamīni awædō. Edæ wēñænāni nē goömæ gānāni bai wæætē bamīni iñōmīnite botō ædō cæte tæēmō cænguī godonte bai apænebo ēñenguimīnii. ¹³Goömæ nē gangā bai ingā iñōmō tōmengā wēñængā bai iñongante mōnitō, Æbānō nō cæquīi, ante odōmōnte apænemōni incæte tōmengā iñōmō cōwē ēñēnāmaī ingampa. ¹⁴Wæætē æcānō cōwē waa cæda ina iñōmō tōmengā, Quīnō waa īi, ante, Quīnō wēnæ wēnæ īi, ante wæætē wæætē ante cædinque do ēñente badīnque picængā bai bacampa. Iñinque ædæmō picænāni nē badāni beyænque mōni nō odōmōnte apænēdō iñōmō cænguī tæēmō bai ongompa.

6 Mōnō Codito inguipoga quēwēninque æbānō cægacāi, ante do ēñēmōmpa. Mōnō wænguīnō goquinque wēnæ wēnæ cæmōmpa, ante wædinque, Idæwaa wēnæ wēnæ cætābopa, ante mōnō Wængonguī gāmænō æbānō cæte ocæ ēmænte ponguīi, ante do ēñēmōmpa. Tōmengā ingante æbānō cæte pōnenguīi, ante do ēñēmōmpa. Iñinque mānīnō tōmānō ante do ēñēnīmō inte mōnō mānīnō ante idæwaa tedetāmpa. Wæætē, Æbānō cæte godōmenque picæmō bai ēñente baquīi, ante mōnō ñōwo apænecācāimpa. ²Adobaī, Æpænē quīnante guīquīi, ante, Ōnompoca quīnante godō gampoquīi, ante do ēñēmō inte mōnō mānīnō ante godōmenque tededāmaī ingæimpa. Ayæ, Wænte ate ñāni mōnō ōmæmongæimpa, ante do ēñēmō iñinque, Wængonguī cōwē apænte ancæcāimpa, ante do ēñēmō iñinque mōnō mānīnō ante ñōwo godōmenque tededāmaī ingæimpa. ³Iñinque Wængonguī Ao angā ate botō mānīnō mīnitō do ēñēnīnō ante tededāmaī incæboimpa. Mīnitō ēñēnāmaī iñinō ante wæætē nanguī apænebo ēñencæmīnīmpa.

⁴Wængonguī mōnō mīmōnē pōnō tīca ēnente bai cædinque edonque odōmōnte apænecā ēñēninque mōnō ñāō bai entawēmōmpa. Tōmengā ōönædē waa pōnī nānō da pōnongaincoo do ænte quēwēmōmpa. Ayæ tōmengā Tæiyæ Waēmō Ōnōwoca ingante da pōnongā æninque mōnō tōmengā tōnō āanque bai ewocamōmpa. Mānōmaī ewocamō incæte pancadāniya wadæ godāni inte edæ ædō cæte, Wēnæ wēnæ cæte

awædō, ante ocæ emænte ponguīnānii. ⁵Tömēnāni iñōmō, Wængonguī nānō änō waa pōnī impa, ante do ēñēnīnāni inte ayæ, Wængonguī mīnguipo nānō badōñedē māñīnedē mīimāmoque ba ate tæi piñænte cæcæimpa, ante do ēñēnānīpa. ⁶Incæte māñinō nāni wede pōnēnīnō ante Baa ante wadæ godāni bai tōmēnāni edæ ædō cæte iincayæ ate, Idæwaa wēnæ wēnæ cæte awædō, ante ocæ emænte ponguīnānii. Īñæmpa dodāni Wængonguī Wengā ingante awæ timpote wænōnāni bai cædinque iñāni wæætē tōmengā ingante adodō wænonte bai cædānīpa. Ayæ tōmēnāni nāni æmæwo ewente wæquinque tōmānāni ayōnāni Wængonguī Wengā ingante badete tote bai cædānīpa.

⁷Edæ cōnæ wantæ wantæ cæ ate waodāni cōne inguipoga tōmēmō quiyadāni wææ pæte incapa. Incate amīmō ba ate nē quiyadīnāni nanguī tā pete eyepæ ænāni iñinque Wængonguī wæætē onguipo tōmenguipo waa pæ ate adinque, Waa pæguipo abopa, angampa. Adobai tōmengā nānō änō ante wantæ wantæ iñō apānedāni ēñēnīnque waodāni gānē pōnēnāni badinque wadāni inānite waadete cædāni ate Wængonguī māñināni inānite, Minitō waa ēñente cæmīni abopa, ante pōnō waa cæcampa. ⁸Ömentacoque pæguipo daacamenque pæguipo guiquēnē nānō æmæwo tante ewenguinque önonguipoque impa. Māninguipo iya tanguī bai waocā adobai Wængonguī nānō änō ante nē Baa angā iñōmō tōmengā nānō æmæwo ewenguinque Baa angampa.

Watapæ bacæimpa, ante pōnēnīnque tæi ongōmompā

⁹Īñānāni ēñēedāni. Wadāni māñōmaī iñānīpa, ante yewæmōmōni incæte mōnitō ayōmōni mīnitō wīi tōmēnāni bai imīni amōnīpa. Wæætē Codito ængā beyænque nē quēwenguīmīni inōmīni inte mīnitō cōwē waa cæmīni imīni amōnīpa. ¹⁰Edæ mīnitō cōwē waa cædinque Wængonguī ingante waadete pōnēnīnque tōmengā quīnāni beyæ godō waa cægaimīni inte nōwo godōmenque cæmīnīpa, ante adingā inte Wængonguī dicæ mīni cædō ante pōnēnāmaī inguingāā. Wæætē nē nō cædongā inte tōmengā mīni cædō ante cōwē pōnengampa. ¹¹Codito beyænque watapæ bacæimpa, ante mīnitō wede pōnēmīnīpa. Īnīnque mīnitō māñinō mīni wede pōnēnō ante iñinque baganca wede pōnencæte ante cædinque mīni waadete pōnō cægainō bai adobai iñinque baganca cōwē cædāni, amōnīpa. ¹²Edæ nē wede pōnēnāni wæntæye iñāmaī ināni iñōmō edæ Wængonguī, Pōnōmo æedāni, ante nānō angaincoo cōwē æncædānīmpa. Mīnitō iñōmō, Tōmēnāni æbānō cædānīi, ante adinque tōmēnāni nāni cædō bai adobai cædinque wæntæye iñāmaī inte Wængonguī nānō angaincoo adobai æncæmīnīmpa, amōnīpa.

¹³Wængonguī, Botō änō bai cōwē cæcæboimpa, ante Abadāo wodi ingante angacæimpa. Māñōmainō ante nāwangā impa, ante Abadāo ēñencæcæimpa, ante cædinque tōmengā, Wacā emōwo godōmenque tæi piñængā emōwo ante apānebo ēñēnīnque do ēñencæcæimpa, ante cæyongante wacā nē tæi piñængā guiquēnē edæ dæ angacæimpa. Īnīnque Wængonguī iñōmō nāmā emōwo ante apānedinque, Wængonguīmo nē Quēwēmo inte nōingā ante amo ēñēe, ānīnque iīmaī angacæimpa. ¹⁴“Botō bitō imīte pōnō waa cæbo ate bitō pæiñāni nanguī yebānīnque bacoo bacædānīmpa. Botō Wængonguīmo nē Quēwēmo inte amōpa.” ¹⁵Ante do angā ēñēngā ingā inte Abadāo wodi wæntæpiyæ ænāmaī inte wānō cōñongante Wængonguī tōmengā nānō angainō bai pōnō cæcā ængacæimpa.

¹⁶ Waodāni guiquēnē, Nāwangā āmopa, ante ēñencædānimpa, ante cædinque wacā ēmōwo godōmenque tæi piñængā ēmōwo apānedinque ānānīpa. Mānōmaī cædinque waocā, Botō godōmenque nē tæi piñængā tōnō guēa cæte bai ānimo inte ædō cæte babæ ante wadō cæquimoo, ante bai apāneyongante wacā Ao angā ate tōmēna nāna guēa cæcaya badapa.

¹⁷ Wængongui iñōmō, Botō wadō bai ānāmaī inōmo inte māniī botō angainō bai cōwē cæcæboimpa, angacāimpa. Ayæ, Mānōmaī impa, ante botō angaincoo nē ænguīnāni ædæmō ēñencædānimpa, ante cædinque Wængongui nāmā ēmōwo apānedinque, Botō Wængonguimo nē Quēwēnōmo inte nāwangā āmopa, angacāimpa.

¹⁸ Tōmengā, Botō pōnō cæbo beyænque watapæ bacæimpa, ante nānō angainō ante æncæte ante mōnō Wængongui gāmænō do wodi winonte pōmōimpa. Īnīnque tōmengā weca do pōnimō iñōmonte tōmengā wæætē, Mēnea beyæ mōnō watapæ bacæimpa, angampa. Ayæ, Minitō wampo pōnēnīnque edæ botō tōnō edæ godōmenque cæcæminimpa, ante tōmengā ædæmō apānecampa. Mēnea ante apānebo ēñēedāni. Botō Wængonguimo inōmo inte nāmā Wængongui ēmōwo apānebo beyæ nē ēñēmini inte mīnitō mānīne beyæ pōnencæminimpa. Ayæ godōmenque wade ante, Wængongui incæ ædō cæte babæ wapiticæ anguingā, ante pōnencæminimpa. Mānōmaī Wængongui mēnea ante cægacāimpa.

¹⁹ Īnīnque wipo gæguincamē inte tæi nānoncadodāni ate wāi wocæ bai mōnō iñōmō edæ, Mānīne mēnea beyæ watapæ bacæimpa, ante mōnō wede pōnēnō beyæ tæi ongōmō inte mōnō ædō cæte wadæ goquiī. Mōnō wede pōnēnō beyænque edæ Wængongui oncōnē weocoo wææ owoyōmo tadōmengadæncōnē guiī oōnædē nā cæte bai ī Īnīnque mōnō ōnōwoca iñōmō edæ tæi ongōnte bai ēwocamōmpa. ²⁰ Itota iñōmō tāno beyænte oōnædē æidinque mōnō beyæ ante mānīncōnē do wāānē guīgacāimpa. Īnīnque Mēequitedeco nē godongā nānængā nānō ingai bai badīnque Itota, Wængongui qui, ante nāmā wepæ nē Godongā Nānængā pōni ĩnongā inte edæ cōwē ongōngampa.

Mēequitedeco bai Itota nē Godongā Nānængā ingampa

7 Mēequitedeco guiquēnē Tadēē nāni āñōmō quēwēnāni awēnē odeye ĩnongā inte tōmengā, Wængongui Æibæ pōni nē Quēwengā qui, ante nē godongā ingacāimpa. Īnongante Abadāo wodi wadāni awēnē odeyeidi ĩnānite wænōnte pōñongante Mēequitedeco eyepæ pō bee tēnīnque, Abadāo ēñēmi, angantapa. Bitō ĩmite Wængongui pōnō waa cæcæcāimpa. ² Ante pōnō waa apāneyongante Abadāo iñōmō awēnēidi wodi nāni mangaincoo tōmengā nānō ō ænīncoo bacoo pōni incoo adīnque ōnōmpo tipæmpoga mānīmpocato cabo tī gæte cō cædinque, Wængongui qui, ānīnque Mēequitedeco ingante adocatoque pædæ godongā ængacāimpa.

Mēequitedeco nē awēnē odeye iñongante tōmengā ēmōwo pemonte bai cædinque wadāni, “Awēnē ĩnongā inte tōmengā nē nō cæcā ingampa,” ante angadānimpa. Ayæ, Tadēē “Gānē pōnēñōmō” nāni angaiñōmō quēwēnāni awēnē odeye ingampa, ante pōnēnīnque tōmēnāni, “Awēnē odeye ĩnongā inte tōmengā nē gānē pōnengā ingampa,” ante wawo pemongadānimpa. ³ Tōmengā badā ōmaacā ingā bai, tōmengā wæmpocā ōmaacā ingā bai, tōmengā nānō ēñagāiōnæ ōmaacā ingā bai, tōmengā nānō wængāiōnæ ōmaacā ingā bai ante dodāni tōmengā ingantedō ante yewæmongadānimpa. Mānōmaī ī ĩnīnque mōnō, Wængongui Wengā nānō cōwē ingai

baï Mëequitedeco adobaï, Wængongui qui, ante në cöwë godongä ingampa, ante pönengäïmpa.

⁴Tömengä ñænængä pönï ingacäïmpa, ante botö iïmaï ante apänebo pönëdäni. Wængongui qui, ante në godongä ñænængä pönï Mëequitedeco ingampa, ante pönëninque mönö wæmæ Abadäö wodi incæ tömengä nänö ö ænincoo önompo tipæmpoga mänimpocato ongö adinque adocatoque æninque Mëequitedeco ñænængä ingante pædæ godongä ængacäïmpa. ⁵Mönö Abadäö wodi pæimö iïömö tömancabomö iïömö incæte adocabodäniya mönö tönïñadäni Debiidi pancadäniya guiquënë, Wængongui qui, ante në godönäni bagadänimpa. Bayönänite Möitee wodi tömënäni inänite iïmaï angacäïmpa. Minitö tönïñadäni inänite äminï ëñëninque tömënäni wæætë tömënäni nänï ænincoo önompo tipæmpoga mänimpocato ongö adinque adocatoque pædæ pönönäni æncæminimpa, ante wææ angä ëñëninque tömënäni, Wængongui qui bacäïmpa, ante në ænäni inänipa. ⁶Mëequitedeco guiquënë Debiidi wodi pæingä inämaï ingaingä incæte adocatoque angä ëñëninque Abadäö wodi pædæ godongä ængacäïmpa. Do iïömö Wængongui incæ Abadäö ingante apänedinque, Bitö qui, ante botö cöwë pönömo æncæbiimpa, angacäïmpa. Incæte wantæpiyæ ate Wængongui nänö në angaingä iïongante Abadäö ingante apänedinque Mëequitedeco iïömö, Wængongui bitö imite pönö waa cæcæcäïmpa, ante pönö waa apänegacäïmpa.

⁷Mönö ayömö guiquënë, Ñænænäni inönäni iïömö tömënäni, önönäni inänite në godö waa apänedäni inänipa, ante do ëñënimö inte mönö wadö ante ædö cæte pönenguii. Ìninque, Abadäö wodi önonganque iïongante Mëequitedeco në ñænængä inongä inte edæ mänömaï waa apänegacäïmpa, ante mönö edonque ëñëmompä. ⁸Mäninäni Debiidi guiquënë në ñömæintai ëñadäni inänipa. Incæte tömënäni inänite wadäni, Wængongui qui bacäïmpa, ante adocatoque cöwë pönönäni ænäni. Ìngä Mëequitedeco guiquënë ñömæintai ëñadämaï baï ingaingä inte në quëwengä ingampa, ante yewæmongatimpa. Tömengä mänömaï në quëwengä baï iïongante Abadäö wodi tömengä ingante, Wængongui qui, ante adocatoque godongä ængacäïmpa.

⁹Mänömaï impa, ante pönëninque botö, Ëñencæminimpa, ante ñöwo godömenque yewæmömö aedäni. Tömënäni nänï æninö önompo tipæmpoga ganca mänimpocato ongö adinque, Wængongui qui, ante adocatoque pædæ godöñönäni Debiidi nänï pæincabo incæ në ænäni inönänimpa. Incæte Debiidi wodi wæmpocoo ingaingä inongä inte Abadäö wodi adocatoque do godongä ininque tömengä pæingä inguingä Debiidi iïömö wæmpocoo tönö äanque baï adocatoque do godonte baï ayæ ate ëñate quëwengacäïmpa. ¹⁰Edæ Abadäö wodi nänö pæinäni Debiidi inänipa. Ìninque Debiidi ayæ ëñadämaï iïongante tömengä wæmpocoo Abadäö wodi ingante Mëequitedeco pö bee tente adocatoque æninque Debiidi nänö ænguënecoo incæ pancacooga adobaï ængacäïmpa.

¹¹Wængongui doyedë angä ëñëninque Debiidi pancadäniya, Wængongui qui, ante në godönäni bagadänimpa. Ayæ Wængongui, iïmaï cæedäni, ante angä ëñente yewæmöninque Debiidi wæætë wadäni inänite odömonte apänedäni ëñengadänimpa. Incæte Debiidi, Wængongui qui, ante nänï godönö beyænque mönö Wængongui ayongä mönö ædæmö pædäni baï edæ dicæ entawente bamongaa. Ìnämpa mäninäni nänï godönö beyænque në picænäni baï bamö baï ñöwo wacä në Godongä ingante Wængongui da pönönämaï incædongäïmpa. Ayæ, Wængongui qui, ante

nē Pōnongā incæcäimpa, ante Codito ingante da pōnōninque Wængonguī, Debii wodi pæingā Aadōō nānō pōnongai bai Codito adobai pōnoncæcäimpa, ante änāmai inte wæætē, Mēequitedeco nānō pōnongai bai cædinque Codito pōnongā beyænque wadāni botō ayōmō nē nō cædāni bacædānimpa, angacäimpa. ¹² Ayæ, Wængonguī quī, ante nāni godoncabo iñōnānite Wængonguī, Idæwaa cæmīnīpa, āninque wacā ingante, Bitō wæætē botō imote nē Pōnōmi bacæbiimpa, angacäimpa. Ayæ wacā mănōmai nē Godongā bacā beyæ Wængonguī, Īmai cædāni, ante nānō wææ angainō ante wæā godonte bai cædinque wade āninque wææ angā ingacäimpa.

¹³ Īninque Wængonguī nōwo, Nē Pōnōmi bacæbiimpa, ante nānō nē angaingā iñōmō Debiidi nāni cabo ināmai inte wæætē wacabocā inongā ingampa. Incæte nōwocā Codito guidēnāni iñōmō, Wængonguī quī, ante nāni iya tāimppa cōwē godōnāmai inōnānimpa. ¹⁴ Edæ, Wængonguī quī, ante oodaaidi nāni cabo nē godōnāni incædānimpa, ante Mōitee wodi dicæ angacāiñaa. Incæte, Mōnō Awēnē iñōmō Oodaa wodi pæingā ingacäimpa, ante edonque acäimpa. ¹⁵ Īninque Mēequitedeco nānō ingai bai wacā wæætē, Wængonguī quī, ante nē Godongā bacā adīmō inte mōnō godōmenque edonque ēñengäimpa. ¹⁶ Edæ Nōwocā tōmengā mæmæidi wīi nē godōnāni ingadānimpa. Īninque, Bitō mæmæidi nāni godongai bai bitō adobai godonte ēñē, ante ædō cæte anguii. Wīi tōmengā mæmæidi nāni cægai bai cædinque tōmengā nē Godongā bagacäimpa. Wæætē cōwē nē wænāmai Quēwenguingā inte tōmengā nāmā nānō tæi piñænō beyænque nē Godongā bagacäimpa. ¹⁷ Edæ tōmengā ingante apænedinque Wængonguī,

“Mēequitedeco, Wængonguī quī, ante nē pōnongā cōwē nānō ingai bai, bitō adobai nīmpo cædāmai inte nē Pōnōmi cōwē incæbiimpa,” ante apænegacäimpa.

¹⁸ Īninque, Īmai cædāni, ante Mōitee wodi wēenēnedē nānō wææ angaine incæ aquīne inte önōneque bai iñonte wæā godonte bai bagatimpa. ¹⁹ Edæ Mōitee wodi, Īmai cædāni, ante nānō wææ angainō ēñente beyænque mōnō Wængonguī ayongā ædæmō pædāni bai dicæ entawente baquimōō. Wængonguī wæætē, Codito pōnō cæcā beyænque watapæ quēwencæmīniipa, ante nōwo pōnō apænegacäimpa. Īninque, Mănōmai impa, ante pōnēninque mōnō Wængonguī weca pōmōmpa.

²⁰ Wængonguī wīi ōnonque angacäimpa. Wæætē tōmengā nāmā emōwo apænedinque, Botō Wængonguīmo nē Quēwēnōmo inte nāwangā āmōpa, āninque Codito ingante angā ate tōmengā wæætē, Wængonguī quī, ante nē Godongā bagacäimpa. Wæætē wadāni inānite guiquēnē tōmengā wīi nāmā emōwo apænedinque, Nāwangā āmōpa, ante änāmai ingā incæte tōmēnāni ōnonque, Wængonguī quī, ante nē godōnāni bagadānimpa. ²¹ Codito ingante guiquēnē Wængonguī Īmai ante apænegacäimpa.

“Bitō nīmpo cædāmai inte, Wængonguī quī, ante nē Pōnōmi cōwē incæbiimpa.

Ante botō nē Tæiyæ Awēnē inōmo inte nōingā āninque iincayæ ate wadō ante cōwē änāmai incæboimpa.”

²² Wængonguī, Itota botō imote nē Pōnongā inongā inte mīnitō beyæ cæcā ate mīnitō Ao āmīni Īninque mōnō godongāmæ waa cæcäimpa, āninque Wængonguī mōnō imonte nōwo godōmenque waa pōni apænegacäimpa. Īninque Wængonguī mănōmai nāmā emōwo apænedinque, Nāwangā āmōpa, āninque Itota nānō nē angaingā iñongante mōnō Itota ingante pōnēninque, Wængonguī nānō angainō bai cōwē cæcäcäimpa, ante do ēñēmōmpa. ²³ Mānīnāni guiquēnē nē nōmæintai ēñā-

gaināni inte ædō cæte ñimpo cædāmaī inte Wængongui ingante nē godōnāni cōwē inguinānii. Ìninqe wīi adocanque nē godongā ingacāimpa. Wacā wacā nē godōnāni bagadānimpa. ²⁴ Itota ññōmō nē wænāmaī quēwēnongā inte tōmengā, Wængongui qui, ante nē Godongā ñnongā inte cōwē quēwengampa. ²⁵ Edæ tōmengā nē wænāmaī Quēwēnongā inte Wængongui ingante mōnō beyæ ante cōwē apænedinque, Botō bitō gāmænō nē māmōmo pōnāni ñānite bitō pōnō waa cæcæbiimpa, ante ñimpo cædāmaī inte cōwē apænecampa. Wængongui ingante cōwē apænecā ñnongā inte tōmengā cōwē quēwēninque ædæmō pōnō ængā beyænque mōnō wæætē cōwē wænāmaī quēwenguimō imompa.

²⁶ Wadāni nāni ēñēnāmaī cæcabo baī wīi ñnongā inte Itota ññōmō tæiyæ waēmō ñnongā ingampa. Wentamō mongænāmaī ñnongā ñnongante tōmengā ingante ædō cæte pīinte apænte anguinānii. Mānōmaī ingā adinque Wængongui tōmengā ingante òōnædē æmonga pōni ængō cæcā ongongampa. Ìninqe tōmengā adocanque pōni, Wængongui qui, ante nē nō Godongā Ñænægā pōni ñnongā inte mōnō wædō ante eyepæ pōni pōnō cæcampa. ²⁷ Wadāni nē godōnāni ñænænāni pōni ñnāni guiquēnē tōmēnāni tāno godōninque nāmā nāni wænæ wænæ cædō beyæ ante, Wængongui botō imote waa acæcāimpa, ante cæningā wepæ ñimō ññō ñimō ññō godōnānīpa. Ayæ ate wadāni nāni wænæ wænæ cædō beyæ adobaī godōnānīpa. Itota guiquēnē wænæ wænæ nāni cædō baī cædāmaī ñnongā inte nāmā beyænque godōnāmaī ingacāimpa. Ayæ wamō mōnō wænæ wænæ cædō beyæ wæætē wæætē godōnāmaī inte tōmengā eyepæ ñnongā inte adopoque pōni godongacāimpa. Ìninqe tōmengā nāmā wepæ godōninque eyepæ pōni godongā adinque Wængongui wæætē mōnō imonte waa acampa.

²⁸ Mōitee wodi nānō wææ angainō ante ēñente cædinque waodāni aquīi ñnāni nāni cabo ññōnānite pancadāniya ñānite ānāni Wængongui ingante nē godōnāni ñænænāni do badānīpa. Wængongui guiquēnē ñncayæ ate nāmā emōwo apænedinque, Botō Wengā ædæmō Picægā nē ēñengā bagaingā ingante āmo ate tōmengā nē Pōnongā Ñænægā bacæcāimpa. Botō Wængonguimō nē Quēwēnōmo inte nāwangā āmopa, angacāimpa.

Wængongui ñōwo nānō angainō ante Itota ñninqe cæcā

8 Mānōmainō ante quīnante yewæmōmōnii. Edæ, Mōnō wædō beyæ ante, Wængongui qui, ante nē Godongā Ñænægā pōni inte ongongampa, ante, Nāwangā impa, ante edonque ēñencæminimpa, ante yewæmōmōnīpa. Tōmengā ññōmō òōnædē æidinque Awēnē Wængongui tōmēmægā ñnō tā contadinque Tæiyæ Awēnē inte ongongampa, ante yewæmōmōni adinque ēñencæminimpa. ² Mānōmaī ñnongā inte tōmengā wīi waocā nānō mænongaincōnē cæcampa. Wæætē Wængongui, Owocæboimpa, ante tæiyæ waēmō nānō mænongaincōnē Itota ññōmō mōnō beyæ ante, Wængongui qui, ante nē Godongā Ñænægā pōni inte cæcampa.

³ Inguipoga quēwēnāni guiquēnē adocanque ingante, Wængongui qui, ante bitō nē godōmi ñænæmi pōni bacæbiimpa, ānāni badinque tōmengā nē tā nē tā cædinque mæncoo cōwē godonguēnægā ingampa. Ìninqe māningā Itota guiquēnē adobaī nē Godongā Ñænægā pōni ñnongā inte adobaī godonguēnægā ingampa. ⁴ Edæ, ñncōoque godoncæminimpa, ante Mōitee wodi wææ angā ēñente cædinque inguipoga nē godōnāni guiquēnē do eyepæ pōni godōnāni ñnānīpa. Ìninqe tōmēnāni nāni godō

baī Itota iñōmō ædō cæte godonguēnengā inguingā. Inguipogaque quēwengā inte baī tōmengā iñōmō edæ Wængonguī ingante nē godongā ināmaī incædongāimpa.

⁵Tōmēnāni guiquēnē, Wængonguī oōnædē nānō owocō cōwē ongō baī inguipoga adobaī mænonte mānincō owocodenganque baī iñonte acæimpa, ante adobaī pōnī mænongadānīmpa. Mānōmaī mænōninque tōmēnāni mānincōnenque, Wængonguī quī, ante nē godōnāni inte cædānīpa. Īnīnque Wængonguī, Adobaī pōnī mænōincō ongongæimpa, ante cædinque Mōitee wodi nē mænonguingā ingante doyedē angacāimpa. “Mōitee ēñēmi. Bitō, Æbānō mænonguīī, ante, Æbānō badonguīī, ante botō onquiyabo iñōmō bee tente odōmōmo adinque badoncæbiīmpa. Bitō cōwā adinque botō odōmōnō baī iīncō adobaī mænōninque iīncōnē ongoncoo tōmancoo adobaī pōnī badoncæbiīmpa,” angacāimpa. ⁶Wængonguī, Botō Mōitee tōnō wææ ānīnque, Īmaī cædāni, āmo ate Ao āmīni iīnīnque mōnō godongāmæ waa cæte quēwengæimpa, ante wēēnēñedē nānō angainō wædænque waa ingatīmpa. Nōwo guiquēnē tōmengā, Itota ængā beyænque quēwēmīni inte Ao āmīni iīnīnque mīnitō botō tōnō godongāmæ waa cæte quēwencæmīnīmpa, ante nānō ānō iñōmō godōmenque waa pōnī impa. Edæ Wængonguī nānō ānō iīnīnque bacæimpa, ante Itota incæ nō cægacāimpa. Ayæ adobaī mānīnō nē godōnāni nāni cædō guiquēnē wædænque waa iñonte Itota nānō nō cædō guiquēnē godōmenque waa pōnī impa.

⁷Mānīne edæ, Mōnō godongāmæ waa cæte quēwengæimpa, ante Wængonguī wēēnēñedē nānō angāine iñōmō mōnō quēwenguīnō ante eyepā ī baī Wængonguī nōwo wade ante ānāmaī incædongāimpa. ⁸Incæte waodāni wentamō mongænāni adīnque Wængonguī doyedē apænedīnque,

“Botō pōnō cæbo ate mīnitō Ao āmīni iīnīnque mōnō godongāmæ waa cæte quēwengæimpa,
Ante botō nē Awēnē iñōmo inte idægoidi inānite oodaaidi inānite iīncayæ ate mīine
ante mā pōnī apænecæboīmpa.

⁹Mæmæīdi doyedē Equitobæ quēwēñōnānite botō tōō æmænte ænte poncæte ante cædinque,

tōmēnāni inānite, Mōnō godongāmæ waa cæcæīmpa, āñōmote tōmēnāni wæætē
pango cæte gogadānīmpa.

Pango cæte godāni ate botō wæætē dadi ēmæmonte tōmēnāni inānite adāmaī
ingaboīmpa.

Mānōmaī beyæ botō wēēnēñedē botō angainō baī

nōwo wæætē adobainō ante ānāmaī incæboīmpa, ante botō nē Awēnēmo iñōmo inte
āmopa.

¹⁰Mānīñedē ate edæ idægoidi inānite botō,

īmaī pōnō cæbo ate mīnitō Ao āmīni iīnīnque

mōnō godongāmæ waa cæte quēwengæimpa, ānīnque edæ iīmaī cæcæboīmpa.

īmaī cædāni, ante botō wææ ānō ante godō apænebo ēñēnīnque

mānīne ante mīmōnē yewæmonte baī entawēnīnque

tōmēnāni nē wede pōnēnāni incædānīmpa.

Tōmēmo tōmēnāni Wængonguīmo iñōmote tōmēnāni wæætē botō quīnāni
incædānīmpa.

¹¹Mānīñedē botō angāñedē ba ate edæ waocā tōmengā guīdengā ingante

ayæ wacā ingante odōmonte apænedīnque,

Bitō Wængonguī ingante ate baī pōnencæbiīmpa, ante quīnante anguingā.

Īnæmpa māniñedē ate guiyanga pōni inongā incæ n̄ænængā pōni inongā incæ tōmēnāni tōmānāni botō imote do adinque pōnencædānimpa.

¹² Edæ tōmēnāni ēñēnāmaī nāni cædō ante botō pānāmaī inte waadete godō n̄impo cæcæboimpa.

Ayæ tōmēnāni wēnæ wēnæ nāni cægainō ante adāmaī inte bai botō pōnēnāmaī incæboimpa,” ante Wængonguī ap̄ænægacāimpa.

¹³ Āninqe n̄owo, Āmo beyænque quēwēmīni inte mīnitō Ao āmīni ininque mōnō godongāmæ waa cæte quēwengæimpa, ante mā pōni āninqe Wængonguī wēēnēñedē, Īmaī cædāni, ante nānō wææ angaine ante, Woīne inte eyepæ ĩnāmaī ingaine ēnepa, ante bai cæcampa. Woīne ĩñōmō oo dæ baquīne ēnepa.

Wængonguī Tæiyæ Waēmō oncō bai æmontaicō impa

9 Wængonguī wēēnēñedē dodāni inānite, Botō pōnō cæbo ate mīnitō Ao āmīni ininque mōnō godongāmæ waa cæte quēwengæimpa, angacāimpa. Īninqe tōmengā nānō wææ angainō bai cædinque tōmēnāni, Wængonguī ingampa, ante tōmengā beyæ cæquēnēnāni ingadānimpa. Ayæ inguipoga tōmengā owoquincō tæiyæ waēmō oncō mænōninqe tōmengā weca pōninqe cæquēnēnāni ingadānimpa. ² Angā ēñēninqe dodāni, Wængonguī nānō owoquincō, ante æmontaicō badōninqe weocoo odemontai wodōnedinque mencōnea badongadānimpa. Yabæcōnē, Tæiyæ Waēmō Oncō impa, ante nāni ancōnē ĩñōmō māniñōmō gongapæncade doyæncade tæiyæ tī wodōnoquī encadocade ongongatimpa. Ayæ awæmpaa badōninqe tōmēnāni, Wængonguī beyæ tæiyæ waēmō pāo ōñongæimpa, ante cædinque mānimpaa pāo n̄o cædāni ōñongatimpa.

³ Weocoo wacoo nāni guimongademō wodōñōmō guimongacō ĩñōmō Tæiyæ Waēmōncō Pōni nāni angaincō ingatimpa. ⁴ Mānincōnē oguī wacæimpa, ante cædinque, Oguī waquī iya tangæimpa, ante awæmpa oodo nāni pōnō tee bæimpa badonte cō cædāni ongongatimpa. Ayæ, Mōnō godongāmæ waa cæcæimpa, ante wææ āninqe Wængonguī nānō yewæmongainca Tæiyæ Waēmōncōnē Pōni ongongæimpa, ante cædinque awæmpa badōninqe oodo yabæpa tee baadinque cæncadempa adobaī tee baate nāni cōnōimpa ongongatimpa. Ayæ oodo æninqe aca podonte wamoncade bai bædinque tōmēnāni ōnōmæca nāni cængaimō Mānāā nāni angaimō æninqe oodo nāni bædincadedē da wēninqe mānincade wæætē oodo ēmompaa cæncadē ĩnō da wente cō cæte mangadānimpa. Ayæ adobaī Aadōo wodi nānō ongonto tā bocagainto æninqe ado oodo ēmompaa cæncadē ĩnō da wente n̄o cædāni ōñongatimpa. Ayæ Wængonguī dicaboga nānō, Īmaī cædāni, ante yewæmongaine adoyōmō ongongæimpa, ante cædinque mānınca æninqe ado oodo ēmompaa cæncadē ĩnō da wēninqe cō cædāni ongongatimpa.

⁵ Mānimpaa yædopaa waomīni mīni wēnæ wēnæ cædō beyæ wepæ godonte impa, ante Wængonguī, Botō pōnō waadeimpa impapa, angacāimpa. Ayæ Wængonguī nē n̄āo ēmongā weca nē owoda ĩñōmō adobaī n̄āo bai ēmōna ĩñōnate tōmēna nāna ēmōnō bai dodāni adobaī badonte oodo ēmompaa æmatā æmatā tæi goncædāni ongongatimpa. Ayæ tōmēna oōmā tiyæmāa pōmēna gānē ĩñōmō Wængonguī, Botō pōnō waadeimpa, ante nānō angaimpa ōñongatimpa. Mānimpacoo æbānō impaa, ante māninqe n̄owo yewæmōmōnīpa.

⁶ Tōmancoo mānōmaī cōō cædāni ongōnonte, Wængonguī quī, ante nē godōnāninqe ĩmō ĩñō ĩmō ĩñō yabæcōnē pō guīdinque, Wængonguī ingampa, ante

cægadänimpa. ⁷ Guiimongacönë guiquënë në godongä ñænængä iñömö wadepo iñö adopoque wadepo iñö adopoque pö guiidinque tömengä adocanque guiidongäimpa. Incæte tömengä në godongä ñænængä pöni inongä incæ wepæ næænämaï inte ædö cæte guiquingä. Edæ wepæ cöwë ænte guiidinque tömengä nämä beyæ godö pipo pipo cædinque, Wadäni ëñënämaï inte nani wënæ wënæ cægainö incæ ñä mënongacäimpa, ante tömënäni beyæ adobaï godö pipo pipo cædongäimpa. ⁸ Mänincö æmontaicö ayæ ongöñedë Tæiyæ Waëmoncönë Pöni wii önonque guiiadänimpa. Wængongui nänö owodö æidö mäniñedë adobaï wii edonque ingatimpa, ante odömoncæte ante Wængongui Tæiyæ Waëmö Önöwoca angä guiidämaï ingadänimpa.

⁹ Mänömainö ante odömöninque tömengä mönö ñöwomö imonte wæætë, ïmaï ante ëñencæminimpa, ante cægacäimpa. Waocä, Wentamö mongænte awædö, ante në wædongä inte waëmö iñömö pöninque, Wængongui qui, ante baö iya tanguï tönö bequi cænguï godongampa. Mänömaï ancaa godongä incæte tömengä mimö nämä nänö apænte entawënö ñä mënongadämaï inte wentamö ayæ mongænte entawëningäimpa. ¹⁰ Mänömaï cænguinque bequinque ante wææ äninque, Æbänö cæte godonguii, ante ayæ, Æpænenque æbänö cæte mënongaquii, ante dodäni mänincooque ante nani wææ angainö ante ëñente cægadänimpa. Ìninque, Waguipo iinque bayonte önöwoca ædæmö mënongate quëwengäëimpa, ante miinguipo iinque bagancaque tömënäni mänincooque ante cædönänimpa.

¹¹ Wapämö mini waa quëwenguinque pömämö, ante badoncæte ante mönö Codito iñömö, Wængongui qui, ante në Godongä Ñænængä pöni inongä inte do pongacäimpa. Pöninque tömengä waodäni önonpoca nani mäñongaincönë guiidämaï inte Wængongui nänö badongainguipoga cædämaï ingacäimpa. Wæætë adodö go æidinque tömengä öönædë Wængongui nänö owocönë ñænæncönë guiidinque näwä owocönë cægacäimpa. ¹² Caboda wepæ næænte guiidämaï inte wagada wë wepæ næænte guiidämaï inte mönö Codito iñömö edæ nämä wepæ godöninque öönædë Tæiyæ Waëmoncönë Pöni æmæwo guiiacäimpa. Ìninque tömengä ængä beyænque mönö æmæwo pöni abæ tawænte bai cöwë quëwëmompä.

¹³ Nömæi incæ gampodinque, do wæningä baö incæ gampodinque waocä näate bai wædongä inte edæ Wængongui weca ædö cæte ponguingä. Wæætë, Tömengä waiñacä bate poncæcäimpa, ante cædinque, Wængongui qui, ante në godönäni iñömö caboda wepæ tönö wagada onguiñængä wepæ æninque në näadingä baonga pipo pipo cædänipa. Ayæ wagada baquecä ingante wænonte në täninque gönaique adobaï æninque tömengä baonga pipo pipo cædinque, Bitö në näadimi inte waiñabi babipa, ante cægadänimpa.

¹⁴ Mönö Codito guiquënë Tæiyæ Waëmö inongä inte në cöwë Quëwengä Önöwoca tönö guëa cædinque Wængongui ingante, Bitö quimo imopa, ante nämä wepæ godongacäimpa. Tömengä wepæ iñömö wii cæningä wepæ bai inte godömenque eyepæ pöni wepæ imæmpä. Ìninque mönö wænguinque wënæ wënæ cæyömonte tömengä, Minitö mimö entawëmini inte ñä mënongate entawente nämä apænte pömente quëwencæminimpa, ante nämä wepæ do godongacäimpa. Ayæ mönö wënæ wënæ cægainö ante wadæ cædinque godömenque pönö cæcä ate mönö Wængongui në Quëwengä ingante në cæmö badinque cæmompä.

¹⁵ Wængongui miine ante apænedinque, Mönö godongämæ waa cæte quëwengäëimpa, äñongante mönö waocabo wæætë ëñënämaï inte wënæ wënæ cæmö adinque Codito iñömö mönö wënæ wënæ cægainö beyæ ante wæætë

wængä beyænque mönō abæ tawænte bai quëwëmompä. Nöwo iñömō Wængongui miiñe ante apäenedinque, Botō pönō cæbo ate mīnitō Ao ämīni iñinque mīni ænguincōo æmæwo æninque mīnitō cōwë mante quëwencæmīnimpä, ante aa pecä pongamōnimpä. Iñinque mönō Codito wæætë, Wængongui nänō angaincōo æncæmīnimpä, ante cædinque iñinque cæcä ate mönō nē pönīmō inte do ænte quëwëmompä.

¹⁶ Waocä, Nänë wæmo adinque botō mäincoo iñi iñänique æncædänimpä, ante ëmōwo ëmōwo yewæmongä adinque wadäni wæætë, Näwangä æmæwo wængäimpä, ante ëñente ate, Nē wængaingä nänō ante yewæmongainō bai bacäimpä, ante iñinque cædänipä. ¹⁷ Iñæmpä, Iñäni qui bacäimpä, ante yewæmongä incæte nē yewæmōningä mīingä quëwëñongante tōmengä mäincoo ædō cæte tōmënäni qui baquii. Wæætë tōmengä æmæwo wængä ate mänñēdë ate tōmengä nänō yewæmongai bai iñinque cædänipä.

¹⁸ Mänōmai beyæ wëñēñedë Wængongui, Mönō godongämæ waa cæcäimpä, ante yewæmongä ate dodäni cæningä wænonte ate wepæ gowete ate godongämæ Ao äninque iñinque cægadänimpä. ¹⁹ Wængongui, Iñimai cædäni, nänō wææ angainō tōmanta adinque Möitee wodi iñömō tōmänäni inänite apäñecä ëñänäni ate wepæ gowete ate cægacäimpä. Wagada wënäni wepæ tönō caboda wepæ æninque æpæ tönō ænte wempo cædëninque iitopowæ näni äwæ yæpængō æninque obega ocagui opatawämæ näni guipæningui ænte pä dacadinque wepæ näni wempo cædëñimänë bee podonte Möitee iñömō, Mäninta adinque ëñengäimpä, ante cædinque mänintaa wepæ pipo pipo cægacäimpä. Ayæ nē ëñëñänäni tōmänäni baonga wepæ pipo pipo cædinque tōmengä iñimai angacäimpä. ²⁰ “Wængongui, Botō pönō ämo ëñëñinque mīnitō Ao ante ëñente cæmīni iñinque mönō godongämæ waa cæcäimpä, ante nänō wææ angainō beyænque ii wepæ impä. Iñinque ii wepæ ëmontaa adinque mönō Ao ante mänñe ante ëñente cæcäimpä,” ante Möitee wodi apäñecäimpä. ²¹ Ayæ æmontaiconga wepæ pipo pipo cædinque tōmengä mänincönë Wængongui beyæ näni cæincooga wepæ pipo pipo cægacäimpä. ²² Ayæ wodo tōmancooga ante Wængongui, Wepæ tönō ñä mënongacäimpä, äninque wææ angä cægadänimpä.

Iñæmpä wepæ gowedämai iñonte mönō wënæ wënæ cæmō adinque Wængongui nē panguëñengä inte ædō cæte pönō ata cæpoqingä.

Codito wepæ beyænque mönō mīmō mënongacäimpä

²³ Öönädë ongoncoo bai inguipoga näni adobai badongaincōo incæ cæningä wænonte ate wepæ tönō ñä mënongaquëñänäni ingadänimpä. Wæætë näwä öönädë Wængongui weca gote mönō ongonguinque mönō adocanque nē waëmō pōni inongä wepæ beyænque ñä mënongaquëñëmō imompä. ²⁴ Edæ öönädë Wængongui nänō owocönë bai ante waodäni öñompoca näni tæiyæ waëmō pōni badongaincönë mönō Codito guidämai ingacäimpä. Wæætë öönädë incæ æidinque tōmengä mönō beyæ ante Wængongui weca guidinque a ongongampä.

²⁵ Wængongui qui, ante inguipoga nē godongä ñænængä pōni inongä guiquënë wii nämä wepæ ænte pōninque cæningä wepæ incæ ænte pōninque wadepo iñō adopoque wadepo iñō adopoque Tæiyæ Waëmoncönë Pōni guicampä. Mönō Codito guiquënë inguipoga nē quëwengä bai wii adobai inongä inte wii wæætë wæætë godoncæte ante öönädë æi guigacäimpä. Wæætë öönädë adopoque æi guidinque

tömengä nämä wepæ adopoque godongacäimpa. ²⁶Edæ inguipoga nē quēwēnāni nāni cæi bai cæcä bai tömengä Wængongui inguipoga nānō badōñedē mā caate wædinque wantæ wantæ iñō cædinque ñōwo ganca tæmpo caate wæcædongäimpa. Wæætē mönō waocabo tömāmō pedænguipoga mönō quēwēnō wodo iinque bayonte tömengä ñōwo pōni adopoque pōni pōninque wēnæ wēnæ mönō cædō ante æmæwo wido wido cæcæte ante nämä wepæ godongacäimpa.

²⁷Mönō waocabo guiquēnē nē wænguimō iñōmo inte adopoque wænte ate Wængongui weca pō gongæñōmonte tömengä apænte ancæcäimpa. ²⁸Mönō waocabo nangui imō iñōmonte mönō Codito iñōmō wēnæ wēnæ mönō cædō ante mongæn- inque adopoque nämä godōninque wængacäimpa. Ayæ wæætē pōninque tömengä wii mönō wēnæ wēnæ cædō mongæncæte ante poncæcäimpa. Wæætē tömengä nānō ponguinō ante nē wānō cōmō iñōmonte tömengä, Quēwencæminimpa, ante mönō imonte æncæte ante poncæcäimpa.

10 Iincayæ ate nē Ponguingä iñōmō, Wængongui qui, ante nämä wepæ eyepæ godoncæcäimpa, ante odōmoncæte ante cædinque Wængongui, iimāi cæte cæningä wepæ pönöedāni, ante do wææ angacäimpa. Incæte mǎnii wepæ Wængongui nānō wææ angaimæ iñōmō wii eyepæ godongui ængui impa. Iinque mǎnimæ tömengä nānō wææ angaimæ beyænque waocä ædō cæte ædæmō ēñente picængä bai baquingä. Iñæmpa idægoidi iñōmō wadepo iñō wadepo iñō wepæ an- caa godōninque Wængongui weca pō ædæ wææninque, Bitō Tæiyæ Waëmō imidō anguēnē, ante apænecæte ante pōnāni incæte tömēnāni tömengä nānō wææ an- gainō beyænque picænāni bai dicæ badāniyaa. ²Tömengä nānō wææ angainō eyepæ i bai tömēnāni adopoque godōninque idæwaa godoncædōnānimpa. Edæ, Wængongui ingampa, ante nē cædāni iñōmō mǎninque godōninque ædæmō ñā mēnon- gate bacædōnānimpa. Ayæ iincayæ ate tömēnāni, Wentamō entawente wængui wæ, ante nämä apænte wædāmaï incædōnānimpa.

³Edæ wii mǎnōmaï impa. Wæætē, Botō wēnæ wēnæ cæte awædō, ante wæætē wæætē nāni pōnente wæquinque tömēnāni wadepo iñō wadepo iñō godōnōnān- impa. ⁴Edæ, Möni wēnæ wēnæ cægäinō ante mēnongacäimpa, ante godōñōnāni wagada onguinæ wepæ tönō caboda wepæ eyepæ imæmpa diyæ mēnongaquii.

⁵Cæningä wepæ wii eyepæ impa, ante wædinque Codito inguipoga pōninque iimāi ante apænægacäimpa.

“Wængongui ēñēmi. Cæningä baō nāni wænonte pōnōnō tönō cængui bequi nāni,

Wængongui qui, ante pōnōnō adinque bitō edæ wii æinēmi ingabiimpa.

Wæætē botō Waobo baquinque bitō botō baō ante badongabiimpa.

⁶Wadāni, Wængongui qui, ante iya tāmōni ate Wængongui waa acæcäimpa, ante tāñōnāni bitō wii tobi ingabiimpa. Tömēnāni, Wēnæ wēnæ möni cædō ante

Wængongui pōnō wido cæcæcäimpa, ante pōnōñōnānite bitō Baa angabiimpa.

⁷Ante adinque botō, ‘Wængongui ēñēmi. Dodāni botō imotedō ante yewæmōninque, Tömengä inguipoga pōninque iimāi cæcæcäimpa,

ante nāni yewæmongainō bai cædinque botō bitō äñō ēñente cæcæte ante pōninque a ongōmoi æe,’ antabopa,”

⁸Möitee wodi guiquēnē, Cænināni inānite wænōninque mīnitō, Wængongui qui, ante pædæ godōninque cængui tönō bequi godoncæminimpa, ante wææ angacäimpa. Incæte mönō Codito Mæmpocä ingante tāno apænedinque, Wadāni cæningä nāni wænonte pōnōnō tönō cængui bequi nāni, Wængongui qui, ante pōnōnō

adinque bitö wīi äinēmi ingabiimpa. Wængonguī quī, ante iya tāmōni ate Wængonguī waa acæcäimpa, ante ayæ, Wënæ wënæ möni cædö ante Wængonguī pönö wido cæcæcäimpa, ante pönö tãññāni bitö Baa ante wīi tobi ingabiimpa, ante Codito apænægacäimpa. ⁹ Ayæ, “Bitö änö cæcæte ante pöninque a ongōmoī ae,” angacäimpa. Äninqe tömengä, ĩine botö angainö ĩñömö ædæmō æñenguine bate ongongäimpa, ante cædinque Möitee wodi wëñëñedë nänö angaine ante da godonte bai cægacäimpa. ¹⁰ Ayæ Wængonguī nänö änö ante nē æñente cæcä inte Itota Codito, Wængonguī quī, ante baonga ëñadinque adopoque wæninque nämä wepæ eyepæ godongä beyænque mönö wæætë Wængonguī ayongä tæiyæ waëmö ewocamö bate quëwëmompä.

¹¹ Wængonguī quī, ante nē godönāni guiquënë tömānāni ĩmō ĩñö ĩmō ĩñö adiyæ gongænte Wængonguī beyæ ante cædānīpa. Mänömaī wæætë wæætë godöninque ado ado godönāni beyænque tömēnāni wënæ wënæ nāni cædö ante ædö cæte wido cæte baquīi. ¹² Mäningä mönö beyæ nē nö Godongaingä guiquënë adopoque godöninque ĩnque baganca eyepæ pōni godöninque Wængonguī tömēmängä inö æi tæ contate ongongampa. ¹³ Mänömaī ongöninque, Botö imote piinte cædāni inānite Wængonguī æyedēnō botö nempo pönongä æninqe botö tæi emömö inte nē ämo baquīmoo, ante Codito ñowo ganca wänö congampa. ¹⁴ Edæ tömengä pönö badongä ate mönö tæiyæ waëmö ewocate quëwëmö bayömonte tömengä adoque pōni nänö godongainö beyænque, Ædæmō picæmīni bacæminimpa, ante do badongacäimpa. ¹⁵ Mäninö ante Wængonguī Tæiyæ Waëmö Önöwoca mönö imonte adobai apænecampa. Tömengä täno apænægacäimpa.

¹⁶ “Mönö Awënë ĩmaī angacäimpa. Mäniñedë ate ĩncayæ ate, botö pönö cæbo ate Ao änāni ĩninqe mönö godongämæ waa cæte quëwengäimpa, ante ĩnque cæcæte ante ĩmaī cæcæboimpa, angacäimpa. Botö pönö apænebo ëñëninque tömēnāni, ĩmaī cæedāni, ante botö wææ angainö incæ mīmönë entawencædānīpa.

Botö pönö apænebo ëñëninque mänine ante ocai encate ëñencædānīpa.

¹⁷ Ayæ, Wënæ wënæ nāni cædö ante ñimpo cædinque botö pönēnāmaī incæboimpa.

Ëñēnāmaī nāni cædö ante botö wæætë wæætë änāmaī incæboimpa,” angampa.

¹⁸ ĩninqe tömengä pönö ñimpo cæcä ate mönö edæ, Wënæ wënæ mönö cædö beyæ pänāmaī incæcäimpa, ante quīnante godömenque godonguīi. ĩñampa tömengä dobæ ñimpo cægacäimpa.

Mönö Wængonguī weca pongäimpa, ante

¹⁹ ĩñānāni ëñëedāni. Tæiyæ Waëmö Pōni Oncönë pö guite bai mönö Itota wepæ beyænque guīñēnāmaī inte Wængonguī weca do guiquënemö imompä. ²⁰ Weocoo mänincönë nāni wææ cægaincoo wægo tē bai Itota baö adobai wangö cote ingatimpä. Mänömaī beyæ odemö miinemö wi ænete bai ĩ adinque mönö quëwenguinēmi guīdinque Wængonguī weca edæ do guīimompä. ²¹ Wængonguī nänö godongämæ owocabo ĩñömönte, Wængonguī quī, ante nē Godongä Ñænängä pōni inongä ĩñömö adocä Itota ĩñömö mönö imonte nē aacä inongä ingampa. ²² Mänömaī beyæ mönö Wængonguī weca pö guicäimpa. Wëñëñedë wentamö mönö entawënö ante Itota nämä wepæ inte ñā mēnongacä ate mönö nämä apænte nö cæinēmi guicäimpa. Ayæ mönö baö waëmömæ äate bai emömö ĩninqe mönö, Wængonguī tömengä nänö änö bai cōwë ædæmō cæcæcäimpa, ante wede pönëninque mönö

guiñēnāmaī inte tōmengā weca do guicæimpa. ²³ Botō cōwē pōnō cæcæboimpa, ante nē angaingā iñōmō nē ædæmō cæcā ingampa, ante adinque mōnō, Tōmengā nānō ānō bai cæcā beyænque watapæ bacæimpa, ante mōnō pōnēnō ante cōwē wido cædāmaī inte mōnō pōnengæimpa.

²⁴ Ayæ, Mōnō pōnencabo tōmāmō waadete pōnēninque waa cæte quēwengæimpa, ante cæcæte ante pōnente adinque mōnō wacā ingā wacā ingā iūmaī godō cæcæimpa. ²⁵ Pancadāniya Wængonguī ingante godongāmæ apænecæte ante pōnāmaī inte wadæ godāni incæte tōmēnāni nāni cæī bai mōnō adobai cædāmaī ingæimpa. Wæætē, Codito nānō ponguīōnæ oo pōni impa, ate pōnente wædinque mōnō pōnencabo iñōmōnte mōnō wacā ingā wacā ingā edæ waadete apænedinque, Wængonguī gāmænō pōninque watapæ quēwēmīni incæmīnimpā, ante apænecæimpa.

²⁶ Wængonguī nō nānō ānō ante do ēñēnīmō inte mōnō, Wīī ēñēinēwædō, āninque godōmenque wēnæ wēnæ cæmō iñinque edæ wēnæ wēnæ mōnō cædō ante mēnongaquīmæ ante edæ wepæ dæ ā bai babaimpa. ²⁷ Wæætē mānōmaī ancaa ēñēnāmaī cæmō iñinque mōnō Wængonguī nānō apænte ante panguīmāmoque ante guiñente wæcōmaimompa. Edæ mōnō Baa ante godōmenque wēnæ wēnæ cæmō iñinque Wængonguī ingante nē piīnāni nāni gonte wænguīmāmoque ante, Mōnō adobai gonte wæncæ wæ, ante guiñente wæcōmaimompa. ²⁸ Mōitee wodi nānō wææ angainō ante, Wīī ēñēinēwædō, ante adocanque nē angā iñongante Waoda mēnaa ina incæ waodāni mengāa go adocanque iñāni incæ, Mānōmainō ante apænecā ēñentamōnipa, ante apænedāni ēñēninque nē āningā ingante waadedāmaī inte godō wænongadānimpā.

²⁹ Iñinque adocanque Wængonguī Wengā ingante piñā gāwate bai cædinque Baa angā adinque tōmengā ingante Wængonguī ædō cæte pānāmaī inguingāā. Wængonguī, Botō pōnō æmo ate mīnitō Ao āmīni iñinque mōnō godongāmæ waa cæte quēwengæimpa, ante nānō angainō iñinque bacæimpa, ante cædinque Itota nāmā wepæ inte mōnō iñmōnte nā mēnongacā beyæ tōmengā ayongā tæiyæ waēmō ēwocamō bagamōimpa. Incæte adocanque Itota nānō nē nā mēnongadingā iñongā inte, Itota wepæ wīī waēmō i awædō, ante piīngā adinque Wængonguī ædō cæte apænte ante pānāmaī inguingāā. Ayæ Wængonguī Ōnōwoca nē waadete pōnō cædongā iñongante adocanque badete tocā adinque Wængonguī tōmengā ingante ædō cæte pānāmaī inguingāā. Edæ Mōitee wodi nānō wææ angainō ante Baa ānāni iñānite wædænque pāninque Wængonguī iñāni iñānite godōmenque nanguī pōni pancæcāimpa, ante pōnēmīniyaa.

³⁰ Wængonguī, “Botō tōmēmo nē panguīmo iñmopa. Wīwa nāni cædinō beyæ eyepæ pōni godō pāmo wæcædānimpā,” angacāimpa. Ayæ, “Botō nē Awēnē iñōmo inte botō quīnāni iñānite apænte ancæboimpa,” angacāimpa. Mōnō iñōmō, Mānōmainō ante nē apænte pancæ angaingā ingante æbānō ingāā, ante do ēñēmompa. ³¹ Edæ Wængonguī nē Quēwengā iñongā inte edæ ænguī badinque bæi ongonte pangā wæcæ wæ, ante mōnō nanguī guiñēñate wæcæimpa.

³² Wēēnēdē Wængonguī apænecā ēñēmīni inte mīnitō tæcæ nāō bai entawēmīni ate wadāni pō piīnte guēadō guēa cæyōnāni mīnitō mīni caate wæquinque tæī ongōninque godōmenque cæmīnitapa. Mānōmaī mīni cædinō ante nōwo pōnēdāni. ³³ Pancayedēna iñōmō nē piīnte cædāni tōmānāni ayōnāni mīnitō iñmīnite badete todinque pānānitapa. Pancayedēna guiquēnē mīnitō tōniñadāni adobai caate wæyōnānite mīnitō, Adocabomōni iñmōnipa, ante bai cædinque nē caate wædāni

tönö godongämä ongömīnitapa. ³⁴Wadāni inānite tee mōnedāni adinque mīnitō tōmēnāni tee mōnete nāni wədō ante pōnēninque tōmēnāni tönö godongämä wēmīnitapa. Ayä, Mōnō māincoo öönädē godōmenque waa pōni ongoncoo inte cōwē ongongäimpa, ante ēñēmīni iñōmīnite wadāni inguiḡoga mīnitō ēadincoo ö äñāni adinque mīnitō wädāmaī inte watapä tomīnitapa. ³⁵İnīnque, Mōnō wede pōnēnō beyänque eyepä pōni ænguimō imōmpa, ante ēñēninque mānīnō mīni wede pōnēnō ante wido cädāmaī iedāni. ³⁶Ayä, Wængonguī nānō ānō ante ēñente cāmōni ate tōmengä, Pōnōmo æncāmīnimpa, ante nānō angaincoo ante cōwē pōnongä æncāmōnimpa, ante cædinque mīnitō wæntädāmaī inte ee cæquēnēmīni imīnīpa. ³⁷Edæ Wængonguī beyä ante do yewæmongatimpa.

“Wantæ wantæ ate nē Ponguingä mōnō ānongä iñōmō do poncæcäimpa.

Edæ tōmengä nānō angaiōnæ iinque bayonte

tōmengä eyepä pōni poncæcäimpa.

³⁸Nē nō cæte quēwēnongä incæ tōmengä nānō wede pōnēnō beyänque quēwēncæcäimpa.

Adocä wæætē guīñente wædinque wodii winongä adinque,

botō tōmengä ingante adinque wīi tobaiimopa,” ante Wængonguī beyä yewæmongatimpa.

³⁹Mōnō guiquēnē tōmēnāni nāni cæi bai cädāmaī inōmō inte wīi guīñente wädōmō inte wodii winōnāmaī imōmpa. Edæ wodii winōnte bai mōnō æmæwo ewente baquēnēmō imōmpa. Wæætē edæ tōmengä ængä beyänque mōnō quēwēnūnque tōmengä ingante wede pōnēmō imōmpa.

Mōnō wede pōnēnō ante

11 Wængonguī pōnō cæcä ate watapä bacäimpa, ante mōnō pōnēnō ante mōnō, Wængonguī ayä cädāmaī ingä incæte cōwē cæquingä ingampa, ante wede pōnēmōmpa. Awinca adāmaī emōmō incæ mōnō mīmōno wede pōnēninque awinca do ate emōnte bai ewocamō inte mōnō, Nāwangä bacäimpa, ante do ēñēmō imōmpa. ²Dodāni wede pōnēnāni iñōnānite Wængonguī, Mīni wede pōnēnō beyänque botō mīnitō imīnite waa abopa, ante apænecacäimpa.

³Wængonguī inguiḡo tönō iimōnæ tōmāo badoncæte ante cæyongä quīēmē impa ænte badonguingä. İñæmpa dæ angatimpa. İnīnque mōnō nē acoo dæ āñonte mānīncoo äñāmaī inte tōmengä wæætē mā pōnēninque angä beyänque mōnō nē acoo do bagatimpa. Mānōmaī ingatimpa, ante wede pōnēninque mōnō Ao ämōmpa.

Dodāni nāni wede pōnengainō

Abedo wodi

⁴Abedo wodi iñōmō Wængonguī nānō angainō ante wede pōnēninque, Wængonguī quī, ante nō cæte godōninque Cāinō wodi wæætē önōmonque nānō godōnō bai wīi godongacäimpa. Tōmengä mānōmaī wede pōnente cæcä adinque Wængonguī, Abedo bitō nō cæte pōnōmi æmōpa, ante apænecacäimpa. İnīnque do wænte gogaingä inongä incæte Abedo wodi, Botō wede pōnente cægaī bai adobaī wede pōnente cædāni, ante nōwo ganca ayä apænēte bai apænecampa.

Ēnoco wodi

⁵Ēnoco wodi guiquēnē nē wede pōnengā iñongante Wængonguī, Ēnoco ēñēmi. Bitō botō nē waa adōmi inte bitō wænguēnēmāmo ante wædāmaī inte pōe, āninqe inque iñongante ō ænte wo ææntodongā æigacāimpa. Æite gocā ate wādāni ancaā diqui diqui mīninqe Wængonguī nānō nē wo æntodongā ingante adāmaī ingadān-
impa. Edæ tōmengā ingante Wængonguī ayæ ææntodōnāmaī iñongante wādāni, Ēnoco wede pōnengā ingante Wængonguī waa acampa, ante do ēñēnōnānīmpa.
⁶Edæ Wængonguī weca poncæte ante cædinque waocā, Wængonguī nē Quëwengā ingampa, ante wede pōnenguēnengā ingampa. Ayæ adobaī, Wængonguī ingante nē diqui diqui mīmō iñōmonte tōmengā, Pōe, āninqe pōnō waa cæcampa, ante wede pōnēninqe nē poncæ cæcā pongampa. Mānōmaīnō ante nē wede pōnēnānīque Wængonguī weca pōnānīpa. Mānīnō ante nē wede pōnēnāmaī ingā guiquēnē tō-
mengā ingante Wængonguī ædō cæte waa aquingāā. Edæ waa adāmaī ingampa.

Docā Nōwee wodi

⁷Nōwee wodi Docā nāni ānongā guiquēnē, Æbānō baquīī, ante adāmaī iñon-
gante Wængonguī, Nōwee ēñēmi. Bitō adāmaī imāmo oo pongæimpa cæbīi. Angā ēñēnte guīñēnte wædinque nē wede pōnengā inte tōmengā nāni wencabo nāni guīite quëwenguīnque wipo ñænængade impo incæ ñænæ oncō baī badongā ate guīite quëwengadānīmpa. Nē wede pōnēnānīque nāni nō entawēnō baī adobaī nō nānō entawenguīnque Nōwee wodi wede pōnente cægacāimpa. Īninqe tōmengā adocanque wede pōnēnīnque mānōmaī cædingā iñongante wādāni guiquēnē nāni apænte wænguinque Baa angadānīmpa.

Abadāo wodi

⁸Abadāo wodi guiquēnē tōmengā wede pōnengā iñongante Wængonguī, Abadāo ēñēmi. Botō pōnōmo bitō ænguīmæ ante botō odōmōmo goe. Angā ēñēninqe, Æbæmē impa, ante adāmaī inongā inte Abadāo wede pōnēninqe ēñēnte cæd-
inque do gogacāimpa. ⁹Mānōmaī wede pōnēnīnque wādāni nēmæ gote wacā inongā inte wantæ iñō quëwengā baī inte æmontaicōnē owogacāimpa. Ayæ Wængonguī nānō angaīmæ nē ænguīna inōna inte tōmengā wengā Itæca wodi adobaī tōmengā wengā Aacobo wodi adobaī wantæ iñō quëwente baī æmontaicōnenque owote quëwengadāimpā. ¹⁰Wængonguī doyedē pōnī, Waodāni nāni oōnædē quëwen-
guīñōmō ante botō īīmaī badoncæboimpā, ante nāmā nānō pōnēnō baī tæī gōnonte mænongacāimpā. Abadāo iñōmō, Botō mānīī iñōmō owocæboimpā, ante nē wæ-
dongā inte wede pōnēnīnque piyænē cædinque æmontaicōnenque owote inguipoga quëwengacāimpā.

¹¹Mōnō imonte pōnēnīnque nē ædæmō aacā inongā inte Wængonguī iñōmō tō-
mengā nānō ānīnō baī cōwē cæcæcāimpā, ante nē wede pōnēnā iñōmō Tada wodi ingadāimpā. Mānōmaī beyæ tōmēnā owæntadā iñōnante Wængonguī pōnō cæcā æninqe tōmēnā picængadedā inōnā inte tæī piñænīnque yædēmadā bate wēñængā mangadāimpā. ¹²Abadāo wodi wede pōnēnīnque tæī piñænte tapæicā ate wēñængā ēñagacāimpā. Īninqe adocanque picængadecā inte nē wænte baī inongā inte wede pōnengā beyænque mōnō tōmengā nānō pæīmō yebænīnque nēmoncoo oōnædē owocoo nanguī pōnī ī baī mōnō iñōmō adobaī nanguī pōnī imompā. Ēmōnaicoo

gāwapæ yæwedeca õñoncoo nanguĩ pōnĩ i baĩ mōnō tōmengä pæimō imō adobai nanguĩ pōnĩ iñōmonte mōnō, Mānimpomō imompa, ante ædō cæte anguiĩ.

¹³Mānīnāni tōmānāni wede pōnente quēwēnōnāni inte wængadānimpa. Wængongui nānō, Pōnō cæcæboimpa, angaincoo ayæ ænāmaĩ ināni inte tōmēnāni gobæ ongoncoo gomō ate baĩ, Cōwē æncæmōnimpa, ante wede pōnente piyænē cæte quēwængadānimpa. Wadāni nēmæ wabæca quēwente baĩ quēwēninque tōmēnāni, Wīi mōnitō òmæ iñonte mōnitō wamōni inte quēwēmōnīpa, ante inguipoga owogadānimpa. ¹⁴Mānōmainō ante nē ānāni iñōmō, Tōmēmōni òmæ ante diqui diqui mēmōni imōnīpa, ante quēwēnānīpa. ¹⁵Dodāni iñōmō do nāni emō cæte pongāimæ ante pōnente wædāni inte baĩ tōmēnāni do adodō gocædōnānimpa. ¹⁶Wæætē adodō mānīōmæ nāni quēwengāimæ wīi goinēninque tōmēnāni, Mōnō õñnædē godōmenque wæmōmæ pōnī gote quēwengæimpa, ante goinente wægadānimpa. Ininque wadāni Wængongui ingante, Bitō nē wæmōmæ goinente wædāni tōmēnāni Wængonguimi imīpa cæbii, ante ānāni incæ tōmengä wæætē, Iñæmpa nē wædōnāni tōmēnāni quēwenguĩñōmō nāni wædō ante botō do eyepæ mænongaboimpa, ānīnque guiñēnāmaĩ inte nanguĩ tocampa.

Abadäo tōnō Itæca

¹⁷Wængongui, Abadäo æbānō botō imote ēñente cæquiringä, ante acæte ante angä ēñēninque Abadäo wodi nē wede pōnēnongä inte tōmengä wengä Itæca ingante, Wængongui qui, ante godongacāimpa. Edæ Abadäo ingante doyedē apænēdinque Wængongui, Bitō pæināni nanguĩ ināni inte iimæ æncædānimpa, ante do angä ēñengacāimpa. Incæte Wængongui mānōmainō angä ante nē ēñēningä incæ tōmengä wengä adocanque pōnī inongä inte Abadäo, Wængongui quingä ingampa, ante godoncæ cægacāimpa. ¹⁸Adocä tōmengä wengä ingantedō ante Wængongui doyedē Abadäo ingante apænēdinque, Bitō wengä Itæca pæinānique inānitedō ante botō, Abadäo pæināni inānīpa, angacāimpa. ¹⁹Incæte Itæca wodi adocanque pōnī iñongante Abadäo wodi, Botō wengä do wængä incæte Wængongui, Nāni òmæmōe, angä ininque do nāni òmæmōmaingampa, ante wede pōnēninque godoncæ cægacāimpa. Wængongui guiquēnē, Ee ae, ante wææ angä beyænque tōmengä wengä ingante wænōnāmaĩ ingacāimpa. Ininque Itæca wodi do wæningä inte baĩ nāni òmæmonte baĩ ayæ quēwengacāimpa.

Itæca, Aacobo, Ootee

²⁰Itæca wodi adobai, Wængongui æbānō cæquiringä, ante wede nānō pōnēnō beyænque ēñēningä inte edæ picængadecä badinque Aacobo wodi tōnō Etawoo wodi inate apænēdinque, Wængongui minatō iminate iimāi pōnō waa cæcæcāimpa, ante waa apænēgacāimpa.

²¹Aacobo wodi iñōmō, Wængongui æbānō cæquiringä, ante wede nānō pōnēnō beyænque do ēñēningä inte wæncæ cæte õñōninque tōmengä nānōmoda Ootee wodi wēna inate, Minatō iminate Wængongui pōnō waa cæcæcāimpa, ante waa apænēgacāimpa. Ayæ ongontoca da cæte ongonte ædæ wæænīnque, Wængongui bitō wæmō pōnī inōmi inte cæquimidō anguēnē, ante watapæ apænēgacāimpa.

²²Ootee wodi guiquēnē, Wantæ iñō wæncæboimpa, ānīnque, Mōnō idægocabo mōnō pæināni incæ Equitobæ wantæpiyæ quēwēnāni ate Wængongui ænte māocä wadæ gocædānimpa, ante tōmengä nānō wede pōnēnō beyænque ēñēninque iĩ-

maï angacäimpa. Godinque botö bayetoca ingai ee ænte næænte godinque da wencæminimpa, angacäimpa.

Möitee wodi

²³ Möitee wodi mæmpoda guiquënë wëñængä ëñacä ate, Wii önonganque ingampa. Waëmö wëñængä awädö, ante adinque iïmaï cægadäimpa. Mäniñedë Equitobæ awënë odeye iñömö, Onguiñængä ëñacä adinque do wæñongæimpa, angä incæte tömëna guïñënamai inte tömëna wede nana pönënö beyænque wëñængä Möitee ingante apäicä mengäa go adocanque mämonque wë wodonte mangadäimpa.

²⁴ Möitee wodi guiquënë picängä bayongante wadäni, Awënë Padaönö wengä wææ Möitee badä ingampa, ante Möitee ingante waa ayönäni tömengä wæætë Wængongui ingante nê wede pönëningä inte edæ Baa angacäimpa. ²⁵ Wæætë edæ, Botö caate wæquinque botö Wængongui quinäni tönö godongämæ cæcæboimpa, ante cædinque Möitee wodi, Equitoidi nani wiwa cæte töinö adinque botö wantæ iñö incæ wii töinente awädö, ante wido cægacäimpa. ²⁶ Wængongui iincayæ ate eyepæ pöni pönongä æncæboimpa, ante wede pönëninque tömengä mäninö ante mimöno gomö ate bai pönengacäimpa. Ayæ Equitobæ quëwënäni wæmoncoo pöni nani mäincoo ante adinque, Önoncooque ëwenguincooque i awädö, ante Möitee edæ Baa angacäimpa. Wæætë edæ piinte badete todäni wæcä incæte tömengä, Codito beyænque impa, ante pönëninque godömenque waa pöni togacäimpa.

²⁷ Tömengä iñömö, Awënë odeye Padaönö ængui badinque piingä wæcæ wæ, ante guïñente wädämai inte wæætë wede pönëninque Equitobæ ëmö cæte gogacäimpa. Ayæ Wængongui nê Quëwengä mönö awinca adämai inongä ingante Möitee wodi iñömö nê awinca gomö acä bai ëmongä inte wæntæye badämai inte godömenque cægacäimpa. ²⁸ Ayæ, Bamoncadë ëñadäni inänite nê ëwëningä incæ godö wænoncæcäimpa, ante Wængongui angä ëñëninque Möitee wodi wæætë, Nê ëwëningä nänö wodo pænta goqui ingäimpa, ante wede pönëninque cægacäimpa. Tömengä wadäni idægoidi tönö Patowa ææmæ mönö cæmæ bai mä cængacäimpa. Ayæ, Nê ëwëningä incæ mönö idægocabo bamoncadë ëñadäni inänite wænönämai incæcäimpa, ante wææ cæcæte ante cædinque Möitee nê wede pönëningä inte wadäni tönö godongämæ odemompaa wepæ öni paagacäimpa.

²⁹ Idægoidi guiquënë wede pönëninque gäwapæ Opatawæmæ nani ämæ goyæ go næ gongæmæ ate tæcæguedëmæ pöni tao gogadänimpa. Equitoidi guiquënë, Taadö bapa, mönö taocæimpa, ante cæyönänite æpæmpo becadote wængadänimpa.

Adacaba wodi

³⁰ Idægoidi nani wede pönënö beyænque Eedicoo nani quëwëñömö yabæque nani wææ cægainca incæ näwæ cabænte wæængatimpa. Edæ idægoidi önonmpo æmæmpoque go mëönaa mänimpoönæ iñönte yabæque godongämæ cægonte godäni ate cabænte wæængatimpa. ³¹ Onquiyängä Adacaba iñömö mäincoo beyæ ante nê towente nê quëwengä inongä incæte tömengä wede nänö pönënö beyænque iïmaï cæte miingä quëwengacäimpa. Idægoda mënaa, Eedicoo iñömö æbänö quëwëñänii, ante acæte ante awëmö pö guida adinque Adacaba wodi, Ee pöeda, angä beyænque idægoidi wæætë ëñënamai inäni inänite wænöninque tömengä ingante ata cæpodäni quëwengacäimpa.

Wadāni nāni wede pōnengainō

³² Quinante godōmenque ante apānequimoo. Īnāni nē wede pōnēnāni nāni cægāinō ante botō æiquedō apānequimoo. Guedeōnō wodi tōnō Badaco wodi ingadaimpa. Ayæ wææ Tantōō wodi tōnō Yepetee wodi ingadaimpa. Ayæ wææ Awēnē Dabii wodi tōnō Tāmoedo wodi ingadaimpa. Mānināni tōnō Wængonguī beyæ nē apānegaināni wodi tōmānāni wede nāni pōnēnō beyænque ĩmaī cædinque nanguī cægadānimpā.

³³ Nē wede pōnēnāni ĩnōmō tæi ēmonte badinque wabæca awēnē odeyeidi nempo quēwēnāni ĩnānite bæ tadinque wido cægadānimpā. Pancadāniya wede pōnēninque wadāni beyæ wææ āninque nō cægadānimpā. Wacā, Cæcæboimpā, āninque do cæquēnengā incæ wīi cæcā ĩninque nē pōnēnāni pancadāniya, Bitō ānō cæcæbiimpā, ānāni ēnēninque do cægacāimpā. Pancadāniya nāni wede pōnēnō beyænque mēñeidi incæ ecadāmaī ĩnāni bagadānimpā. ³⁴ Gongā nanguī wo bæco adinque pancadāniya wede nāni pōnēnō beyænque mōnæ ēmongatimpā. Wadāni yaēmenca tamencacæ cædāni wædinque nē pōnēnāni pancadāniya aamō cædinque miināni quēwengadānimpā. Aquīi pōni ĩnināni inte nē wede pōnēnāni pancadāniya tæi piñænte bagadānimpā. Wabæca tontadoidi wænoncæ pōnāni adinque nē pōnēnāni pancadāniya wæætē tæi piñæninque wido cædāni gogadānimpā. ³⁵ Tōmēnāni guīdēnāni nāñe wænāni ate onquiyænāni wede nāni pōnēnō beyænque do wænīnāni quēwēnāni ate ængadānimpā.

Nāni caate wægāinō

Ayæ adobaī nē pōnēnāni ĩnānite wīwa cædāni caate wæyōnānite wacā, Ata cæpobo goquīmi, angā incæte nē caate wædōnāni pancadāniya wæætē, Ee abi caate wæwēmoe, ānānitapa. Tōmēnāni, Botō ĩncayæ ate nāni ōmæmōninque caate botō wædō beyænque godōmenque waa quēwencæboimpā, ante wææ āninque Ao ānāmaī ingadānimpā. ³⁶ Tōmēnāni nāni wede pōnēnō beyæ pancadāniya ĩnānite wadāni badete togadānimpā. Wadāni ĩnānite wæætē tæi tæi pangadānimpā. Wadāni ĩnānite wæætē yaēmengō nā cæyænīnque tee mōnedāni wægadānimpā. ³⁷ Pancadāniya ĩnānite dicaca tacadāni wængadānimpā. Pancadāniya ĩnānite ta wiyænāni wængadānimpā. Pancadāniya ĩnānite yaēmenca yedāni wængadānimpā. Pancadāniya obega æmontai tōnō caboda æmontai badōninque māninque wēñate mongæinque ōmæpodāni inte wæyōnānite wadāni togænte pāninque wīwa cægadānimpā. ³⁸ Tōmēnāni nē wede pōnēnāni inte waa pōni ĩnāni ĩnōnānite inguipogaque quēwēnāni wæætē wīi tōmēnāni bai ĩnāni inte wēnæ wēnæ cægadānimpā. Nē pōnēnāni ĩnōmō pancadāniya, Æyōmōmē gote quēwenguimoo, ante pōnente wædinque wodii winonte ōnōmæca wayōmō godinque ānanquidi wayōmō godinque oncontatodē guīdinque pancadāniya wē womōñōnāni pancadāniya onguipodē ææ wote wē womongadānimpā.

³⁹ ĩninque Wængonguī tōmēnāni ĩnānite, Wede mīni pōnēnō adinque botō waa tobopa, ante apānegacāimpā. Incæte tōmengā nānō, Pōnō waa cæcæboimpā, angāinō ante tōmēnāni māniñedē ayæ ænāmaī ingadānimpā. ⁴⁰ Edæ tōmēnāni adodāninque wīi æncædānimpā, angacāimpā. Wæætē Codito godōmenque pōnongā æninque mōnō watapæ quēwēñōmonte tōmēnāni mōnō tōnō godongāmæ æninque ædæmō

picænāni bai bacædānimpa, ante Wængonguī mōnō imonte waa cædinque tōmēnāni beyæ adobaī waa cægacāimpa.

Itota ingante mōnō cōwē adinque quēwengāimpa, ante

12 Īnque boguimā bacoo owo bai mānināni ĩñōmō, Wængonguī cōwē pōnō cæcæcāimpa, ante nē wede pōnengaināni ĩñōmō adobaī bacoo ongōnānīpa. Edæ, Mōnitō wede pōnente mōni cægāi bai mīnitō adobaī wede pōnēninque ĩmaī cædāni, ante a ongonte bai apænedānīpa cæmōō. Tōmēnāni quingæ pogodo gocæte ante cædāni teēmencoo gā āadāni bai cædinque mōnō adobaī oda caate mōnō wædoncoo ante ĩnimpō cæcæimpa. Wēnæ wēnæ mōnō cægaincoo ante, Anca cæte awædō, āninque mōnō wido cæcæimpa. Ayæ taadō ante Itota nānō odōmongānonque ante mōnō edæ wæntædāmaī inte tæi piñænīnque pogodo gocæimpa. ²Mōnō wede pōnente æite godō taadō ante tōmengā ĩñōmō nē tāno beyænte gogaingā ingampa. Tōmengā adocā incæ mōnō wede pōnēnō ante, Cōwē mānōmaī bacæimpa, ante ædæmō badongaingā ingampa. Tōmengā ĩñōmō wadāni tōmengā ingante awæ timpodāni wæyongante badete todāni adinque tōmengā, Mānōmaī cædāni botō caate wædō beyænque botō iincayæ ate watapæ tocæboimpa, ante nē ēñeningā inte piyænē cædinque caate wædinque wængacāimpa. Tōmengā ñōwo ĩñōmō ñāni ōmæmonte æite godinque Awēnē Wængonguī nānō contaimpaa tōmēmængā ĩnō tæ contate Awēnē bate ongōñongā mōnō adocā Itota ingante æmō ate bai pōnēninque edæ tōmengā miñæ tee empote pogodo gocæimpa.

³Tōmengā ĩñōmō nē wīwa cædāni nanguī piinte cædāni wæcā incæte piyænē cægacāimpa. Īnque mīnitō ĩñōmō, Wæntædāmaī inte mīmō nangæ batawēnāmaī ingæimpa, ante cædinque, Tōmengā æbānō cægacāi, ante pōnēdāni. ⁴Ñōwo ganca mīnitō wēnæ wēnæ mīni cæinente wædō ante wido cæcæte ante mīnitō wænguī beyæ wepæ dicæ gowete cæmīniyaa. ⁵Ayæ Wængonguī mōnō wampo pōnencæmōimpa, ante mōnō imonte, Botō wēmīni godōmenque cæcæmīnīpa, ante æbānō pōnō angacāi, ante mīnitō dicæ pōnēmīniyaa. Īmaī angacāimpa, ante yewæmongatīpa.

“Botō wēmi ēñēmi. Mōnō Awēnē bitō ĩmite, Ēñente cæcæbiimpa, ante pangā wædinque,

bitō wæætē badete todāmaī incæbiimpa.

Bitō ĩmite, Ēñenguēnē quēwēe, angā ēñente wædinque wæwēnāmaī incæbiimpa.

⁶Īnampa tōmengā nānō nē waadete pōnēnānique ĩnānite pāninque mōnō Awēnē ĩñōmō, Ēñencæmīnīpa, ante cæcampa.

Botō wēmīni, ante nānō nē ængainānique ĩnānite tōmengā pangampa.”

⁷Ante yewæmongatīpa cæmīni. Mīnitō caate wēmīni ĩmīnitawo. Īnampa wēñænāni ĩnānite wæmpoidi dicæ pānāmaī inguīnāniyaa. Mæmpo Wængonguī ĩñōmō adobaī, Botō wēmīni ĩmīnīpa, ante edonque acæimpa, ante nanguī āninque pangā caate wēmīnīpa. Īnque tōmengā pangā wædinque mīnitō wæætē, Mōnō ēñente quēwenguīnque ante Mæmpo Wængonguī pangampa, ante piyænē cæte ee amīni pancæcāimpa. ⁸Tōmengā wēñæmō ĩñōmonte tōmengā tōmāmō imonte edæ nanguī pante angampa. Incæte mīnitō pancamīniya ĩmīnite tōmengā pante ānāmaī ingantawo. Īnque mīnitō, Wīi Wængonguī wēmōni ĩmōnīpa. Wacā wēmōni ĩmōnīpa, ante wæquēnēmīni ĩmīnīpa.

⁹Mönö mæmpoidi waodänique inönäni inte nanguï äninque pänäni adinque mönö, Mæmpocä inongä inte tömengä nänö cæquënenonque cædinque mönö imonte waa cæte pangantapa, ante tömënäni inänite waa atamompa. Mönö Mæmpo Wængonguï adobaï mönö imonte nanguï äninque pangä adinque mönö quëwenguinque mönö tömengä ingante godömenque Ao ante ëñente cæcäimpa. ¹⁰Mönö mæmpoidi guiquënë, Æbänö pönö waa cæquïmoo, ante pönente ate mönö imonte edæ, Æñencæminimpa, ante wantæ iñö nanguï änäni ëñente cætamompa. Wængonguï iñömö edæ, Tæiyæ waëmö botö ëwocabo baï minitö adobaï tæiyæ waëmö ëwocadinque watapæ quëwencæminimpa, ante cædinque mönö waa quëwenguinque ante pönö pangampa. ¹¹Æcämenque mönö imonte nanguï äninque päna incæ tömengä pangä ate mönö caate wædinque dicæ quingæ watapæ tomongaa. Ænampa, Caate awædö, ante cöwë ämompä. Wæætë iincayæ ate edæ doyedë nani pänö beyänque mönö nê ëñente badömo ate mönö nö cæmö badinque gänë pönente entawëmompä.

Mönö wæquinque Wængonguï apænecä ëñënëmaï imompä

¹²Äninque minitö guëpænte wædimini inte edæ tæï piñænique wæntädämaï inte nanguï cædäni. Önoncapo nanguï guëcapote wædimini inte edæ guëcapodämaï inte ængæ gantite pogodo gote baï nanguï cædäni. ¹³Mönö cægonguïnö, ante minitö taadö ante enga womini mæmö ba ate nê podä cædinäni incæ podä cædämaï inte tömënäni nani waa baquinque mäninönö töinö gote waa cægongcædänimpa, ante godö waadete cædäni.

¹⁴Mönö godongämæ piyänë cæte quëwengäimpa, ante minitö nanguï tæï piñænique waodäni tömänäni inänite gänë pönente cædäni. Ayæ, Æcänö tæiyæ waëmö ëwocadämaï ingä tömengä iñömö mönö Awënë ingante cöwë adämaï incæcäimpa, ante pönente wædinque minitö, Mönö tömämö Wængonguï ayongä tæiyæ waëmö ëwocate quëwengäimpa, ante nanguï cædäni. ¹⁵Wængonguï pönö waadete nänö cædö ante mönö tömämö ænte entawengäimpa, ante cædinque minitö cöwä adinque, Adocanque incæ ömætawengä inämaï incæcäimpa, ante wææ cædäni. Adocanque wæwente nänö quëwënö beyæ piïnte bate tedecä ëñëninque minitö, Wadäni nani wentamö mongænguinque adobaï piïnte badämaï incædänimpa, ante wææ cædinque nê piingä ingante godö wææ äedäni. ¹⁶Ayæ mini cabo incæ, Nänöogængä inämaï iñongante adocanque incæ godö mönämäi incæcäimpa, ante cöwä adinque wææ cædäni.

Etawoo wodi iñömö tömengä bamoncadengä inongä inte nänö nanguï ænguënencoo ante piïnte baï cædinque cænguinque æncæte ante tömancoo godonte beyæ adopoque ænte cængacäimpa. Minitö guiquënë, Inguipogaque ante ænte to wædö, ante Etawoo wodi nänö pönëwente cægainö baï adocanque incæ cædämaï incæcäimpa, ante edæ wææ cædäni. ¹⁷Bamoncadengä inte nänö ænguënencoo ante do piïnte baï godöningä inte Etawoo wodi iincayæ ate, Pönömi æmoe, äñongante mæmpocä wæætë Baa angacäimpa, ante do ëñëminipa. Edæ Ca ca wædinque tömengä, Æbänö cæte ænguïmoo, ante ancaa angä incæte mæmpocä do Baa äningä inte ñowo wæætë wadö ante ædö cæte anguingä.

¹⁸Onquiyabo Wængonguï nänö gonga tänongä bæcobo ñænoque dodäni ponte godongämæ ongonte cægönäni baï minitö wïi onquiyabo ñænoque pöminipa. Tömënäni wëmö mä mämönte baï iñömö wini cai pæmæmämo iñömö nani ponte

wægaññömö bai mīnitō wīi pōmīnīpa. ¹⁹ Todompeta nāni ancadeca nanguī we öömāmo dodāni nāni ēñente wægaīmāmo bai mīnitō wīi adōpāmo ēñēmīnīpa. Wængonguī wææ ante nānō tedepāmo tōmēnāni nāni ēñente wægaīmāmo bai mīnitō wīi adōpāmo ēñēmīnīpa. Mānīmāmo ēñente guñente wædinque tōmēnāni, Idæwaa āmīpa. Ædō cæte godōmenque ēñenguīmōnīi, ante wægadānīpa. ²⁰ Edæ “Cæn- ingā incæ onquiyaboga ponte cægongā adinque mīnitō tæi tacamīni wæncæcāīpa,” ante wææ āñongante tōmēnāni ancai guñente wædinque, Wængonguī nānō wææ angāinō ante mōnitō ædō cæte ædæmō ēñente cæquīmōnīi, ante wægadānīpa. ²¹ Onquiyaboga nāni ate guñēmāmo adinque Mōitee wodi incæ, “Ancai guñente botō do do wæate bai wæbopa,” angacāīpa.

²² Mīnitō guiquēnē Tīnoquīdi nāni ānonquīdi do ponte bai ēwocāmīnīpa. Edæ Wængonguī nē Quēwengā öönædē Eedotadēē bai nānō wæmō pōnī owoyōmō mīnitō māññōmō do ponte bai ēwocāmīnīpa. Wængonguī anquedoidi æpodō mīido ganca īnōnāni inte nanguī pōnī īnāni godongāmæ pō bee tente tōmēnāni nāni wat- apæ ongōññōmō mīnitō māññōmō do ponte bai ēwocāmīnīpa. ²³ Mōnō Codito in- gante godongāmæ mōnō pōnencabo īññōmō bamoncadēnāni nē ænguīmō bayōmonte mōnō ēmōwo ante öönædē yewæmōintaa do yewæmonte ongōmpa. Īnīnque mīnitō adocabomīni badinque Wængonguī weca mōnō waocabo tōmāmō īmonte nē apænte anguingā weca do pōmīni īmīnīpa. Nē nō cæte quēwengāināni wænte goyōnānite Wængonguī īnque badongā ate do ædæmō picænāni bai badānīpa. Tōmēnāni önō- woca weca mīnitō do ponte bai ēwocāmīnīpa. ²⁴ Wængonguī, Botō pōnō cæbo ate mīnitō Ao āmīni īnīnque mōnō godongāmæ waa cæte quēwengæīpa, ante nānō angāinō ante Itota, Īnque bacæīpa, ante ædæmō badongacāīpa. Mīnitō īññōmō nē badongāingā weca do pōmīni īmīnīpa. Abedo wodi wepæ onguīpoiya gowecā adinque Wængonguī wæætē nē wænōningā ingante, Botō weca ongōnāmaī gob- āwe, angacāīpa. Itota wepæ wīi Abedo wodi wepæ bai īmæ adinque Wængonguī wæætē, Itota wepæ petæ petæ gowedīmæ beyænque botō weca pōedāni, ante cæ- gacāīpa. Mānīmæ Itota wepæ nānō petæ petæ gowegāññōmō mīnitō do ponte bai ēwocāmīnīpa.

²⁵ Mānōmaī wæmō pōnī īññōmō do pōmīni inte mīnitō nē apænecā ingante Baa ānāmaī iedāni. Onquiyabo godongāmæ ongōnāni guiquēnē inguīpoga wææ an- gaingā ingante Baa ānīnāni īññōnānite tōmengā ata cæpodāmaī inte pangacāīpa cæmīnīi. Öönædē ongōnte nē wææ angaingā ingante ēñēnāmaī inte dadī ēmænte wadæ gomō bai mōnō godōmenque pante wæquēnēmō īññōmonte tōmengā cōwē ata cæpodāmaī incæcāīpa.

²⁶ Māññēdē tōmengā nānō tedepāmo beyænque inguīpo wançæ wançæ cæ- gatīpa. Nōwo īññōmō tōmengā, “Botō īncayæ ate inguīpo adopoque pōnī wançæ wançæ cædinque öönædē adobai wançæ wançæ edæ cæcæboīpa,” angacāīpa. ²⁷ Tōmengā, “Īncayæ ate adopoque pōnī cæcæboīpa,” angacāīpa, ante pōñē- inque mōnō īmaī ante ēñengæīpa. Tōmengā adopoque wançæ wançæ cæcā ate tōmengā nānō badongaincoo oo pōnī ongoncoo īññōmō tōmancoo adoyedē ēwente bacæīpa. Quincoodō oo ongōnāmaī tæi ongoncoo ī māññōcoo ayæ a on- gongæīpa, ²⁸ Īnīnque mōnō Awēnē Odeye nempo quēwēmō īññōmō wançæ wançæ cædāmaī inte tæi ongonguīmō īmōmpa, ante pōñēnīnque mōnō Wængonguī ingante waa ate pōñente apænecæīpa. Mānōmaī cædinque Wængonguī ñāō bai nānō tæi

ēmōmāmo ate guīñente wædinqe tōmengā beyæ cæcæimpa. ²⁹Edæ mōnō Wængonguī iñōmō edæ gonga wo bæcoqui bai ingänō anguēnē, ante āmo ēñēmaimīnīpa.

Iīmaī cæmō adinqe Wængonguī waa tocæcæimpa, ante

13 Mīnitō iñōmō, Mōnō caipæ īmōmpa, ante mīni waadete pōnēnō bai cædinqe cōwē godongāmæ waadete pōnente cædāni. ²Tōmānāni inānite edæ, Pōedāni, ante waadete cædāni. Mānōmaī cædinqe pancadāniya, Botō weca ædānidō ēñacæ pōnānī, ante ēñēnāmaī ināni incæte do waa cædāni ate edæ, Æ, Wængonguī nānō da pōnōnāni anquedoidi incæ botō weca pōnānitapa, ante tæcæ abopa, ante todānīpa.

³Tee mōnete ongōnāni tōnō botō godongāmæ tee mōnete wæcōmo bai īmōpa, ante pōnēninqe mīnitō tōmēnāni inānite ante cōwē pōnēedāni. Pancadāniya inānite wadāni wīwa godō cædāni ate caate wæwēñōnāni mīnitō adobaī pōnēninqe, Mōnō baō adobaī ēñāmō inte tōmēnāni tōnō godongāmæ caate wæmō bai īmōmpa, ante tōmēnāni inānite cōwē pōnēedāni.

⁴Nānōgængā ināmaī iñongante waocā nē godō guēa mongā tōnō nē godō wīwa towēnāni iñōnānite Wængonguī mānīnāni tōmānāni inānite do apænte ante pancæcæimpa cæmīnī. Mīna gæncaya adomīnaque guēa moncæmīnāimpa. Ayæ ñānōnāni mōninqe nāna gæncaya quēwēna ate, Waa impa, ante mōnō waa acæīmpa.

⁵Wængonguī incæ, “Mīnitō imīnite cōwē ēmō cæte godāmaī inte botō cōwē aacæboīmpa,” angacæīmpa. Mānōmaī beyæ mīnitō godonte æinta ante æīnente wædāmaī inte mīni ēadincooque ēadinqe piyænē cæte quēwēedāni. ⁶Īninqe Wængonguī beyæ iīmaī ante nāni yewæmongainō bai ante mōnō wede pōnente apænemōmpa.

“Mōnō Awēnē botō tōnō godongāmæ cæcā adinqe botō, Waocā ædō cæte botō imote wēnæ wēnæ cæquingāā, ante ēñēmo inte guīñēnāmaī incæboīmpa.”

⁷Nē aadāni iñōmō mīnitō imīnite Wængonguī nānō ānō ante nē apænedāni inānite ante pōnēninqe mīnitō, Tōmēnāni iñōmō waa cædinqe edæ watapæ quēwēnānīpa, ante pōnēedāni. Ayæ tōmēnāni nāni wede pōnēnō bai adobaī wede pōnēedāni.

⁸Itota Codito iñōmō wēēnēñedē nānō ingaī bai ingā ñōwoōnæ adobaī ingā inte tōmengā adocā iīncayæ ate cōwē adobaī incæcæīmpa.

⁹Wadāni, Wacā taadō odōmōte apænebo ēñēe, āñōnānite tōmēnāni mīñæ godāmaī iedāni. Īñæmpa tōmēnāni cæguinqe ante, Æbānō waa pōnī cō cæquīī, ante wææ ānāni incæte mānīī cænguīncoo beyæ tōmēnāni wīī godōmenque watapæ quēwēnānīpa. Īninqe mānīncoo cænte beyæ mōnō mīmō ædō cæte tæī piñænte entawengūīī. Wæætē edæ Wængonguī nānō waadete pōnō cædō beyænque mōnō tæī piñænte entawengæīmpa. ¹⁰Æmontaicōnē cædinqe, Wængonguī qui, ante nē godōnāni iñōmō tōmēnāni nāni iya tāīmpaa godōninqe pancaa cænguī ænte nē cænguēnēnāni inōnāni incæte tōmēnāni mōnō Codito mōnō beyæ nāmā nānō wepæ godongainō quiquēnē ædō cæte ænguīnānīī.

¹¹Cænīnāni inānite wænōnāni ate nē godongā ñæñængā pōnī īnongā iñōmō wepænque æninqe, Wēnæ wēnæ mōnī cædinō ante Wængonguī pōnō ñā mēnongacæcæīmpa, ante cædinqe Tæiyæ Waēmō Pōnī Oncōnē wāānē guīidinqe godongampa. Godongā ate baonque, Wentamō mongænte awædō, ante

æninque tømënäni nãni quëwëñömö yabæque mão iya tangadänimpa. ¹²Itota adobaï, Botö wepæ pönö mënongabo ate botö quïmini ïñömö tæiyæ waëmö ewocate quëwencæminimpa, ante cædinque wentamö mönö entawënö ænte teëmë mongænte godinque tømënäni quëwëñömö wææ cædinemö tao godinque yabæque pönï guïñëñate wædinque caate wængacäimpa cæmöö. ¹³Tömengä yabæque pönï guïñëñate wædinque nänö tao gogaï baï mönö adoyömö tömengä weca tao gote ado guïñëñate wæcæimpa. ¹⁴Ïnæmpa inguipoga mönö quëwëñömö tæï ongompa diyæ wantæpiyæ quëwenguï. Wæætë öönædë ïncayæ ate edæ mönö cöwë quëwenguïñömö ante æinente wædinque wänö cömopa.

¹⁵Ïninque, Wængonguï qui, ante cænguï godönäni baï cædinque mönö ïñömö edæ, Itota ëmowo beyænque quëwëmönipa, ante nê apænemö inte tömengä ëmowo ante Wængonguï ingante apænedinque, Bitö tæï ëmömi inte waa pönï cæbipa, ante watapæ apænecäimpa. ¹⁶Ayæ ñimpo cædämaï inte mïnitö wadäni ïnänite cöwë waa cædäni. Ayæ wadäni ïnänite mïni mänincoo godö nënempomini æncædänimpa. Mïnitö mänömaï, Wængonguï qui, ante godonte baï cædinque nënempomini adinque Wængonguï mïni godönö ante waa acampa. ¹⁷Mïnitö, Mönö ïmonte nê änäni ïnänite mönö Ao ante ëñengäimpa, ante pönëninque nê aadäni ïnänite cöwë ëñente cædäni. Tømënäni, Æbänö cæboo, ante adinque Wængonguï apænte ancæcäimpa, ante ëñëninque guïñente wædäni inte nö cædinque aadänipa cæminii. Tømënäni mänömaï aadinque watapæ tote quëwencædänimpa, ante mïnitö wæætë tømënäni nãni änönö ante ëñente cædäni. Mïnitö wæætë ëñënämaï ïmïni adinque tømënäni wæætë edæ, Ædö cæte aaquïmönii, ante wæwente badäni ïninque mïnitö adobaï todämaï ïmaïminipa.

¹⁸Mönitö beyæ ante Wængonguï ingante apæneedäni. Mönitö mïmö entawëmönï inte wentamö entawënämaï ïmönipa, ante nãmä apænte pönëmönipa. Edæ, Quiëmë cæmö incæ mönö cöwë nö cæte quëwengäimpa, ante cæmönipa. ¹⁹Botö mïnitö weca ocæ ëmænte pönëmopa. Ïninque mïnitö Wængonguï ingante apænedinque, Wængonguï, bitö pönö cæbi ate Pabodo mönitö weca poncæcäimpa, ante apæneedäni, ante nanguï ämopa.

Mïnitö ïmïnite Wængonguï waa cæcæcäimpa, ante

²⁰Wængonguï inguipoga nänö badönämaï ïñedë wëñëñedë pönï äninque edæ, Mönö godongämæ waa cæte quëwengäimpa, ante tömengä nänö angainö baï cöwë nê badongäingä inte ïmaï pönö cægacäimpa. Edæ mönö obegaidi baï ïñömöte Awënë Itota ïñömö mönö ïmonte nê Aacä ñænängä ïnogä inte tömengä wepæ gowegaimæ eyepæ pönï godongä ate Wængonguï tömengä ingante, Eyepæ ï, äninque, Ñäni ömæmoe, angä ñäni ömæmongacäimpa. Mänömaï gänë pönente nê cægäingä inte Wængonguï ïñömö, ²¹waa pönï pönongä ænte eyepæ entawëninque mïnitö ïñömö tömengä nänö änö baï cæcæminimpa. Tömengä Itota Codito tönö godongämæ cædinque pönö cæcä æninque mönö tömengä nänö waa adoncooque entawengäimpa, ämopa. Itota Codito ïñömö ñowopämo incæ ïncayæmämo incæ cöwë nê tæï ëmönongä inte ñäö ëmongä amönipa, ante mönö tömengä ingante cöwë watapæ apænecäimpa. Mänömaï ingäimpa, ante botö, Amëë, ämopa.

²²Ïnänäni ëñeedäni. Botö mäninö tömänö ante apænecæte ante wædænque pönï yewæmömopa. Ïninque mäninö botö ædæmö apænedinö ante mïnitö piyænë cædinque ëñeedäni, ämopa. ²³Mönö tönïñacä Tïmoteo tee mönete wæyongante

ñōwo ñimpo cædāni gocantapa, ante apænebo ēñēedāni. Tōmengä botō weca quingæ pongä ñinque botō tōmengä tōnō guëa mīnitō weca ēñacæ pōmāimōnapa. ²⁴Mōnitō beyæ apænedinque mīnitō ñimnite nē aadāni ñānīte, Waa quēwencæmīn-impā, ante apæneedāni. Ayæ adobaï Wængonguï quīnāni tōmānāni ñānīte, Waa quēwencæmīnimpā, ante mōnitō beyæ æedāni. Ayæ, Mīnitō ñimnite ante apænedinque Itadiabæ quēwēnāni adobaï, Mīnitō waa quēwencæmīnimpā, ante apænedānīpa, ante ämo ēñēedāni. ²⁵Mīnitō tōmāmīni ñimnite Wængonguï pōnō waadete cæcæcāimpā. Mānīnque ante yewæmōmopa.

Tantiago

cadota ante nänö yewæmongainta

Tantiago iimaï yewæmongacäimpa

1 Botö Tantiagobo iñömö Mæmpo Wængongui tönö mönö Awënë Itota Codito inate nê cædömo imopa. Idægoidi mini cabo tipæmpoga go mencabominiya inte wabæca nani quëwencabo wabæca nani quëwencabo weca pangocæte godimini iñöminite botö waa pönëmo inte iï yewæmöntaa yewæmömopa.

Wængongui nänö ëñëmämo ante mönö ængæimpa, ante

² Botö tönïñamini ëñëedäni. Quïëmë beyæ wæwente bamini incæ minitö æyedëmë mänömaï bamini ininque edæ mäniñedë incæ cöwë, Mönö watapæ toquinque impa, ante pönëedäni. ³ Mini wede pönënö æbänö i, ante edonque acäimpa, ante cædäni ate caate wæmini incæte minitö, Mönö caate wædö beyænque mönö godömenque pædinque wæntæye inämaï inte ee cæquimö imompa, ante do ëñëminipa. ⁴ Ìnque, Mönö æmæwo pæcäimpa, ante cædinque minitö wæntæye inämaï inte ee cæedäni. Mänömaï cæte pæmini ininque, Mini cædimämo æbänö cæmini iminii, ante adinque edæ, Tömänö waëmö cæmini iminipa, ante abaimpa.

⁵ Minitö weca æcänö nänö ëñëmämo wii eyepæ ina adinque tömengä, Pönömi ëñëmoe, ante Wængongui ingante apænequëngampa. Apæneyongä Wængongui wæætë pönö cæcä æncæcäimpa. Edæ Wængongui iñömö nê, Pönömi æmoe, ante änogä ingante wæætë pïinte änämaï inte godönongä ingampa. Ayæ tömänäni inänite pönö cædinque tömäa godönongä ingampa. ⁶ Ìnæmpa nê angä iñömö wede pönenguëngä inte wii æmæ pönëninque apænecæcäimpa. Edæ nê æmæ pönengä iñömö gäwapæ æpæ woboyæ pæmæninque mä conta mä conta gopæ ocæmæ pö cæpæ nänö cægaimæ bai tömengä adobai gocä ingampa. ⁷ Mäningä iñömö Wængongui pönongä æncæboimpa, ante ædö cæte iimaï ante pönenguingä. Wængongui edæ tömengä ingante tömäa godönämaï incæcäimpa. ⁸ Tömengä mënongä pönente quëwengä ingampa. Æbänö cæcäa, ante ëñënämaï inongä inte ædö cæte waa cæquingä.

⁹ Adocanque mönö tönïñacä incæ imæca quëwënäni nani ëadincöo nê wii eyepæ ëacä incæte tömengä Wængongui pönö cæcä beyænque, Æbänö ëaboo, ante pönëninque watapæ toquëngä ingampa. ¹⁰ Wacä mönö tönïñacä guiquënë imæca quëwënäni nani ëadincöo nê ëacä incæte tömengä wæætë, Botö önömoque imopa, ante pönëninque watapæ toquëngä ingampa. Edæ ongai önönque podod-inque guiñë wæmpa bai tömengä adobai wæncæcäimpa. ¹¹ Edæ nænque tamö ti näwäñonte awæ guingo icate to aminte æmæwo wæmpa. Ongai yædoï gueo odote wæninque nänö waëmö ënodï wo ëwente bapa bai nê ëacä iñömö adobai ingampa. Tömengä godonte æ godonte æ tæcæ cædinque quingæ wæni que edæ dæ anguingä.

Mönö caate wæpämö

¹² Wængongui ingante nê waadedäni inänite tömengä wæætë, Mini cöwë quëwenguinta, ante poganta bai minitö iminute pönömo æncæminipa, ante angacäimpa.

Mäninta Wængonguī weca cōwē mönō quēwenguinō impa. İnıneque waocā caate wæcā incæte tōmengā wæntæye badāmaī ingā iñōmō tōmengā nānō toquinque. Wæntæye ināmaī inte ee cæcā adınque Wængonguī, Mıni cōwē quēwenguinta, ante tōmengā nānō angainō baī māningā ingante pōnongā æncæcāimpa. ¹³ Waocā nānō cæinēwente wædō beyæ, Wænæ wænæ cæboe, ante cædinque tōmengā, Wængonguī botō imote, Wænæ wænæ cæcæbiımpa, ante ingampa, ante wıī anguēnengā ingampa. Edæ Wængonguī ingante, Wænæ wænæ cæcæbiımpa, ante waocā ædō cæte anguıngā. Wængonguī wæætē wadāni inānite, Wænæ wænæ cæcæmınpa, ante ānāmaī inongā ingampa cæminıi. ¹⁴ Æcāmenque incæ, Wænæ wænæ botō cæınente wædō incæ ante waēmō impa, ante pōnēnıneque tōmengā do wænæ wænæ mönō cæınente wædō beyænque wænæ wænæ cæınengā ingampa. ¹⁵ Yædēmadā wēñengā pæcā adınque ēñaquıngā baī mönō cæinēwente wæpāmo adobaī entawente pætawēmō inıneque mönō do wænæ wænæ cæmompa. Ayæ wænæ wænæ mönō cæpāmo beyæ mönō æmæwo wænguinque impa.

¹⁶ Botō nē waadete tōniñamıni ēñeedāni. Mınitō nāmā incæ oda cædāmaī incæmınpa. ¹⁷ Önonque mönō ænō ante mönō waēmō ñāō emōnoncoo tōmancoo incæ mönō Mæmpo Wængonguı öönædē owote nē pōnōnongā ingampa. Mæmpo Wængonguı öönædē owodınque apäidāni ināni badongacāimpa. Adocā nænque wēmō cæbaī wayōmō wayōmō go baī entawēnāmaıngā ingampa. Tōmengā wæætē adodonque ingaingā ingampa. ¹⁸ Botō cæinēmopa, ante nē angaingā inte Wængonguı, Nāwangā botō angainō beyænque mınitō botō wēñæmıni bacæmınpa, ante wānā mangā baī cædinque mönō imonte pōnō badongacāimpa. Tōmengā nānō badongaincoo tōmancoo iñonte mönō tānomō inōmō imompā.

Wængonguı ingante mönō nō ēñente cædō

¹⁹ Botō nē waadete tōniñamıni ēñeedāni. Wacā ānongā mınitō tōmāmıni quıngæ ēñenguēnēmıni imınpa. Mınitō wæætē quıngæ apænedāmaī inte adobaī quıngæ pıınte ināmaī inguēnēmıni imınpa. ²⁰ Wængonguı, Nō cæte quēwēedāni, ante waa nānō cæinēmāmo ante waocā nānō pıımāmo beyæ wıī edæ cæcampa. ²¹ Mänōmaī beyæ mınitō wentamō entawēnıneque mıni wıwa cædō tōmāā ñımpo cæedāni. Adobaī quıēmē mıni wænæ wænæ cæpāmo tōmāmāmo ñımpo cæte iedāni. Ayæ Wængonguı nānō angainō ante mınitō mımōnē nānō mıngainō ante Ao ante gānē pōnente æncæmınpa. Edæ iı angainō beyænque mınitō quēwencæmınpa.

²² Mınitō, Nāmā incæ oda cædāmaī ingæımpa, ante cædinque Wængonguı nānō angainō ante wıī önonque ēñēmıneque inte wæætē, Æbānō ante i, ante ēñente cæedāni. ²³⁻²⁴ Waocā nāmā awıncā awocawæntā adınque nāmā ate ate wadæ godınque, Quıno baī intawo, ante nānō adıncā do oda cæte wæcampa. Mänōmaī oda cæte wæcā baī Wængonguı nānō angainō ante nē ēñenganque wıī ēñente cæcā iñōmō tōmengā adobaī oda cæte wæcā ingampa. ²⁵ Wængonguı nöıngā nānō wææ angainō ante nāni yewæmongainō ante nē ædæmō cōwē acā guıquēnē tōmengā iñōmō nānō ēñēnıno ante wıī pōnente badāmaī inte wæætē cōwē ēñente cæcā inıneque tōmengā mänōmaī cædinque nānō toquinque cæcampa. Wængonguı nöıngā nānō wææ angainō beyænque waocā ñımpo cæte quēwengā ingampa.

²⁶ Wængonguı ingante botō nē ēñente cæbo imopa, ante pōnengā incæte tōmengā önonguēnēwa ñā cæguēnēwate baī cædāmaī inte wæætē wıwa tedecā inıneque tōmengā nāmā incæ oda cæte gobaingampa. Ayæ Wængonguı ingante botō ēñente

cæbo ïmopa, ante tømengä nänö äno ante önonque angä ïmaingampa. ²⁷ Nöwadäni tönö owæmpoinäni näni wæwēnedē mönö tømēnāni tönö godongāmæ cæcæïmpa. Ayæ adobaï ïmæcaque ante quēwēnāni nāni wēnæ wēnæ cædimāmo baï mönö, Wentamö badāmaï ingæïmpa, ante wææ cæcæïmpa. Mänömaï cæmö ïninqe mönö Mæmpo Wængonguï ayongante mönö wapiticæ cædāmaï inte wæætē nö ēñente cæmö ïmopa.

Wacä ingante wadö wadö ate pönente cædāmaï ingæïmpa

2 Botö tönïñamini ēñeedäni. Mönö Awēnē Itota Codito nāö ēmonte nē apäi-gaingä ingante nē pönēmīni inte waodäni ïnänite wadö wadö ate pönente cædāmaï ïedäni. ² ïmaï nāni cæbaï ante önöwēnenque pönēedäni. Edæ onguïñængä nē äcä ïñömö tømengä nänö öngongompo timpöi oodo badöi wempocä ïninqe waëmoncoo mongængä inte mīni a ongönömö guï pongampa. Ayæ onguïñængä nē wīi eyepæ äcä ïñömö pedæncoo mongængä inte mīni a ongönömö adobaï pongampa. ³ Adinqe mīnitö waëmoncoo mongængä ingante, “Bitö ïñömö waa tæ contaimpaa tæ contae,” ante apænemīni iminitawo. Wæætē wīi eyepæ äcä ingante, “Bitö mänïñömö adiyæ ongöe. Botö önöwa ïñömö tepataa tæ contae,” ante apænemīni iminitawo. ⁴ Mänömaï apænedinqe mīnitö weca wīi godongāmæ wadö wadö ate pönente cæbaïmīnitawo. Ayæ wēnæ wēnæ pönēninqe apænte ämīni babaimīnitawo.

⁵ Botö nē waadete tönïñamini ēñeedäni. Wængonguï Awēnē Odeye ingante nē waadedäni ïnänite tømengä, Botö pönö cæbo ate mīnitö botö nempo cöwē quēwencæmīnimpa, angacäïmpa. ïmæca quēwēnāni weca mäincoo wīi eyepæ äädäni ïñönänite tømengä, Mīni wede pönēnö nanguï ewocadinque mīnitö botö angainö baï botö nempo quēwencæmīnimpa, ante tømēnāni ïnänite wīi apænte ængantawo. ⁶ Mīnitö wæætē wīi eyepæ äcä ingante piunte tedemīni ate tømengä guingo imonte badingä ingampa. ïñæmpa nē äädäni guiquēnē mīnitö imīnite nāni wēnæ wēnæ cædinö beyænque wīi wæmīnitawo. Ayæ adodäni mīnitö imīnite apænte anguïnāni weca godoncæte ante wīi ænte godänitawo. ⁷ Ayæ mīnitö, Coditoidi imönipa, ante Codito waa pönï emöwo ante emömīni ïñöminite tømēnāni adodäni incæ mänïwo ante babæ äninqe nē wēnæ wēnæ änāni wīi ïnänitawo.

⁸ Wængonguï angä ēñēninqe nāni yewæmongainö ante adinqe mīnitö waa pönï Awēnē nänö wææ angainö ante nö ēñente cæmīni ïninqe waa cæbaïmīni imīnipa. ïmaï ante yewæmonte impa. “Bitö nämä ante pönente, Nämä waadebo ïmopa, ante nämä bitö waadete pönenganca wadäni ïnänite adoganca waadete pönēe.” ⁹ Mänömaï cædinque mīnitö mäincoo äcä ingante waa cæmīni incæte wīi eyepæ äcä ingante wadö wadö ate pönēmīni inte wiwa ämīni ïninqe wēnæ wēnæ cæmīni imaimīnipa. Ayæ Wængonguï nänö wææ angainö önonque wido cæte baï cædimīni inte mīnitö wentamö mongæmīni imaimīnipa. ¹⁰ Wængonguï beyæ Möi-tee wodi nänö wææ yewæmongainö ante tömänö ante æcämenque nē ēñente cæcä incæte mäninö adodonque pönï incæ ēñēnāmaï cæcä inte tømengä mäninö tömänö ante önonque wido cæte baï cædingä inte wentamö mongængä ingampa. ¹¹ Edæ Wængonguï, “Nänöogæ ïnämaï ïñongante godö guëa mönämaï ïedäni,” ante nē angaingä inte tømengä adocä godömenque iïmaï angacäïmpa, “Wacä ingä wænönāmaï ïedäni.” Mīnitö wacä nänöogæ ïñongante godö guëa mönämaï imīni incæte wacä in-

gante wænömīni īnīnque mīnitō Wængonguī nānō wææ angainō ōnonque wido cæte bai cædimīni inte wentamō mongæmīni īmaīmīnīpa.

¹²Wængonguī nānō apænte anguiōnæ mōnō īmonte tōmengā nānō wææ angainō beyænque waocā nīmpo cæte quēwengā ingampa. Mānīnō nānō wææ angainō beyænque waocā nīmpo cæte quēwengā ingampa. Īnīnque mīnitō tedemīni incæ cæmīni incæ, Cōwē mǎnōmaī impa, ante pōnēnīnque tedecæmīnīmpa. Adobai ante cæcæmīnīmpa. ¹³Wadāni wæwēnāni īñōnānite æcāmenque wīi waadete godō waa cædingā ingāā, ante Wængonguī wæætē tōmengā ingante godō waadete waa cædāmaī inte apænte ānīnque pancæcāmpa. Wadāni wæwēnāni īnānite æcāmenque guiquēnē nē godō waadete waa cædingā īñongante Wængonguī wæætē tōmengā ingante nānō apænte anguiōnæ godō waadete waa cæcæcāmpa.

Wængonguī ingante pōnēnīnque mōnō cæquēnēnō

¹⁴Botō tōnīñamīni ēñeedāni. Waocā, Botō Wængonguī ingante wede pōnēmo īmopa, angā incæte tōmengā nānō waa cædinō wæætē dæ ā īnīnque tōmengā mānīnō, Wede pōnēmopa, ante nānō ānō beyænque ædō cæte wænāmaī quēwengu-ingāā. ¹⁵Īmaī nāni cæbai ante ōnōwēnenque pōñeedāni. Wængonguī ingante wede pōngengā īñōmō onguiñængā incæ onquiængā incæ æcāmenque incæ tōmengā weocoo tōnō cænguī ōmaacā ingampa, ¹⁶adinque mīnitō weca adocanque tōmengā ingante, “Waa goe, āmopa. Bitō, Yoguidāmaī, ante weocoo wēñae, cænguī eyepæ ænīnque cæe,” ante angā incæte nē ōmaacā nānō ænguēnēnō ante edæ tōmengā ingante godōnāmaī īnīnque tōmengā waa cæcantawogaa. ¹⁷Adobai īmaī impa. Mōnō waa cædinō dæ ā īnīnque Wængonguī ingante mōnō wede pōnēnō incæ ōnonque bapa.

¹⁸Incæte wacā īmaī anguingā. “Bitō Wængonguī ingante tōmēmī wede pōnēnō ēabi īmīpa. Botō guiquēnē tōmēmō waa cædinō ēabo īmopa,” ante āñongā botō wæætē, Bitō nē cædāmaī īnōmī inte Wængonguī ingante bitō wede pōnēnō ante botō īmote odōmōmī aboe, āmopa. Odōmōmī adīnque botō guiquēnē botō cædinō ante odōmōmō adīnque bitō wæætē botō wede pōnēnō edonque pōnī abaīmīpa. ¹⁹Wængonguī nāwangā adocanque ingaingā ingampa. Bitō mǎnōmaīnō ante pōnēmī inte waa pōnī pōnēmī īmīpa. Wēnæidi diyæ adodō ante pōnēnānīpa tōō. Incæte ancaī guīñente do do wāate wædānīpa. ²⁰Bitō mǎnōmaīnō ante nē ōnonque tedebi īmī ēñēe. Botō, Mōnō waa cædāmaī īmō īnīnque Wængonguī ingante mōnō wede pōnēnō incæ ōnonque īmaīmpa, ante odōmōmō ate bitō edæ Ao ante ēñenguīmīyaa. ²¹Edæ mōnō docā Abadāō wodi Wængonguī nānō āmaī cædinque tōmengā wengā onguiñængā Itæca ingante ænīnque iya tāīmoga cōnōnīnque wænōncæ cæyongante Wængonguī adīnque, Bitō nō cæte entawēmī āmopa, ante apānegacāmpa. Abadāō wodi nānō cædinō beyænque Wængonguī mǎnōmaī angacāmpa. ²²Bitō ēñēnāmaī īmitawo. Abadāō wodi edæ Wængonguī ingante wede pōnēnīnque ēñente cægacāmpa. Wīi ēñente cægaingā inte bai tōmengā Wængonguī ingante nānō wede pōngengānō ōnonque pōnēmaingā incægacāmpa. Ayæ waa nānō cægainō beyæ Abadāō wodi nānō wede pōngengānō eyepæ pōnī bagatīmpa. ²³Wængonguī angā ēñente nāni yewæmongānō bai īnīnque batīmpa. Īmaī ante impa. “Abadāō īñōmō Wængonguī, Botō īmaī pōnō cæcæboīmpa, ante nānō angainō ante pōngengacāmpa. Īnīnque Wængonguī, Mǎnōmaī pōnēmī beyæ bitō botō ayōmō nō cæte entawēmī īmīpa,” ante tōmengā ingante wæætē pōnō angacāmpa. Ayæ Abadāō, Wængonguī æmīgo ingampa, ante angadānīmpa.

²⁴ Bitō ēñēnāmaī imitawo. Waocā Wængonguī ingante wīī nānō wede pōnēnō beyænque wæætē, Tōmengā æbānō waa cæcā, ante adinque Wængonguī tōmengā ingante, Bitō nō cæte entawēmi abopa, ante cæcā ingampa. ²⁵ Idægoidi, Ōmæ awēmō ate pōeda, ante mēnaa inate da godōnāni gote pōñōnate Adacaba wodi nē towente quēwengā incæ, Botō oncōnē guīeda, ante tōmēna inate wē wodon-gacāimpa. Ayæ, Wadāni tōmēna inate bæi ongōnāmaī incædānimpa, ante, Wadō taadō goeda, ante da godongā gogadainpa. Mānōmaī cæcā adinque Wængonguī, Bitō cædinō beyænque bitō botō ayōmo nō cæte entawēmi imipa, ante Adacaba ingante adobainō ante pōnō angacāimpa. ²⁶ Mōnō baō ōmæwocacā inte do wænte ī bai Wængonguī ingante mōnō waa cædāmaī wede pōnēnō adobaī do wæningā bai inte edæ ōnonque impa.

Mōnō ōnonguēnēwa

3 Botō tōniñamini ēñēdāni. Minitō weca wīī tæiyænāni, Nē odōmonte apænemōni bacæmōnimpa, ante bainente wæquēnēnāni incædānimpa. Edæ wadāni inānite pōnōmenque apænte āninqe Wængonguī wæætē mōnō nē odōmonte apænemō iñōmonte, Æbānō odōmonte apæneminii, ante mōnō imonte godōmenque apænte āninqe pancæcāimpa. Minitō do ēñēminipa. ² Mōnō tōmāmō nanguī ægodawate tæī go wæninqe bai oda cæmō imompa. Nē tedecā iñōmō tōmengā, Æbānō ante tedeboo, ante tōmengā ōnonguēnēwa cōwē wææ aadinqe tōmengā wēnæ wēnæ ānāmaī ininqe nōingā cæbaingā ingampa. Ayæ wēnæ wēnæ cædāmaī incæboimpa, ante nāmā baonga tōmāo wææ aate quēwēnongā ingampa.

³ Cabayo mōnō imonte ēñente cæcæcāimpa, ante tæinta badōinta ōnōne da wēnemō ate, Cabayo baō tōmānō incæ iñāimæ iñāimæ gocæcāimpa, ante cæmō ininqe cabayo do ēñente gocampa. ⁴ Īimainō ante nænængade wipo ante adobaī ante pōnēdāni. Nænængade pōni wipo incæ woboyæ nanguī pæmænte gopa incæte wipo nē dadongā nānō cæinēnō bai, Ædōnō dadiimæ ædōnō dadiimæ wiyate goquiī, ante guiyā awæmpa inte wiyate cæcā gopa. ⁵ Ayæ adobaī mōnō baō tōmāo ēñayōmō mōnō ōnonguēnēwa guiyā enguēnēwamō imompa. Incæte mōnō ōnonguēnēwa inte tededinqe, Mōnō nanguī cæmompā, ante tedewēmompā. Nænængade pōni ōmædē incæ amimō bayedē guiyā gonga beyæ ōmædē tōmāo gonga bæcodote bapa. ⁶ Ayæ mōnō ōnonguēnēwa adobaī gonga bæcodote bai tedepa. Mōnō baō tōmāo ēñayōmō mōnō ōnonguēnēwa tōmāo mōnō wiwa tedewenguinque wēnæ wēnæ enguēnēwamō imompa. Waomō incæ māninguēnēwa beyænque mōnō baō tōmāo inte ēñēnāmaī cæmompā. Ayæ gonga wacæ tæñōmonte bæcododāni bai ado ōnonguēnēwa beyæ mōnō quēwenganca tōmanganca wo ēwente imompa. Edæ ii gonga tadōmengadænguipodē ōñonte ō ænte wacæ tæñōmonte bæcodote bai cædinque wēnæ incæ mōnō imonte cæcā beyænque mōnō wiwa tedewēmō imompa.

⁷ Babæidi incæ ōmā ēadāni incæ tæntæidi incæ æpænē quēwēnāni incæ quingānōidi incæ tōmānāni inānite waocā, Botō pæpogate cænināni bacæminimpa, ante cæcā ingampa. Waocā doyedē nānō cægai beyænque cænināni bate quēwengadānimpā. ⁸ Īñæmpa æcānō, Mōnō ōnonguēnēwa pæpogate bai bacæimpa, ante cædaa edæ dæ angampa. Edæ, Babæidi cōwē incæmōnimpā, ante cænināni badāmaī ināni bai mōnō ōnonguēnēwa adobaī wēnæ wēnæ ī ininqe ædō cæte waa tedemō. Wæætē mōnō ōnonguēnēwa nanguī wænguimæ enguēnēwamō bai imompa.

⁹Māninguēnēwa inte mōnō Mæmpo Wængonguī ingante, Bitō tæiyæ waēmō imidō anguēnē, ante waa apænemompa. Wæætē waodāni Wængonguī tōmengā nānō ingai bai nānō nē badongaināni iñōnānite tōmēnāni inānite ante mōnō adoguēnēwa inte wēnæ wēnæ apænemompa. ¹⁰Ado ōnōne incæ wade wade ante mēnea ante apænemompa. Adodeque ante waa impa. Adodeque ante wēnæ wēnæ impa. Botō tōniñamini ēñēedāni. Māninō bai mōnō edæ wīi cæquēnēmō ingæimpa. ¹¹Æpæ tayōmō ado tayōmō ædō cæte waēmōmæ wentamōmæ āññōmonque ta goquīmææ. ¹²Botō tōniñamini ēñēedāni. Igowæ nāni āwæ incayō odibomō nāni ānōmō ædō cæte incaquiī. Yowewæ incayō iigo mæñeca ædō cæte incaquiī. Adobai ado tayōmō ædō cæte waēmōmæ wentamōmæ āññōmonque ta goquīmææ.

Mōnō nō ēñēmāmo

¹³Minitō weca æcānō nō ēñengā ingantawo. Tōmengā iñōmō, Nō ēñēmo imopa, ante wadāni ēñencādānimpa, ante cædinque tōmengā nānō waa quēwēnō inte odō-moncæcāimpa. Ayæ tōmengā nō ēñengā incæ, Botō ōnōmoque imopa, ante pōnēn-
 inque tōmengā nānō cædinō beyæ odōmongā acādānimpa. ¹⁴Minitō guiquēnē wacā quincōo adinque piinte entawēmīni ayæ nāmanque ante, Mōnō ñænāemō bad-
 inque waa quēwengæimpa, ante pōnente entawēmīni ininque mīnitō nō ēñēmīni
 incæ, Mōnō waa cæmompa, ante ædō cæte anguīmīnī. Ayæ mænōmaī bai godō-
 menque entawēmīni ininque nāwangā mīni anguēnēnō ante edæ Baa ānāmaī iedāni.
¹⁵Māninō ēñēmāmo wīi Wængonguī nānō nō ēñēmāmo ī. Wæætē īi inguipogaque
 ante quēwengā inte waocā mā pōnēnīnque wēnæ nānō ēñēmāmo ante entawengā
 ingampa. ¹⁶Edæ waocā æyedēmē wacā quincōo adinque piinte entawengā ayæ
 nāmanque ante, Botō ñænāemō badinque waa quēwencæboimpa, ante pōnente
 entawengā iñōmō tōmengā ædō cæte tōingā pōnente cæcāā. Īñæmpa quiēmē nāni
 wēnæ wēnæ cæpāmo ante cæcampa.

¹⁷Waocā Wængonguī nānō nō ēñēmāmo ante nē entawengā guiquēnē waēmō
 entawengā ingampa. Ayæ wacā ingante cōwē piyænē cæte quēwēnongā ingampa.
 Tōmengā nē waadete pōnengā inte wacā ingante waa ēñēnongā ingampa. Wacā
 ingante ēñente cædongā ingampa. Tōmengā, Wæwēnāmaī incæbiimpa, ante wacā
 ingante godō waadete waa cædongā ingampa. Ayæ, Quinō waa inguīī, ante māninō
 ante cædongā ingampa. Nē waodāni inānite wadō wadō ate pōnente cædāmaī
 inte tōmengā nō pōnente quēwēnongā ingampa. ¹⁸Wadāni inānite, Botō piyænē
 cæcæboimpa, ante nē cæcā iñōmō tōmengā nānō piyænē cædinō beyæ tōmēmō nē
 minongā bai ingampa. Tōmengā nānō piyænē cædinō beyæ waodāni wæætē, Quinō
 nō cæte impa, ante cædāni ininque tōmengā edæ amiñayedē tōmēmō tā pete ængā
 bai incæcāimpa.

Inguipoga nāni quincōo ante pōnēnāmaī incæmōimpa

4 Mīni cabo quinō beyæ ante guēa wæætēdō wæætē piīnīnque wæætē godō wæætē
 godō ānewēmīnitawo. Mīnitō nāmā wadō wadō mīni cæinēnō ante entawente
 guēa cæte quēwēmīni beyænque cōwē godongāmæ mīni piinte quēwenguīnque
 imīnīpa tōō. ²Mīnitō æinente wæmīni incæte ænāmaī imīnīpa. Īnīnque nē ēacā in-
 gante wænōmīni incæ tōmengā nānō quincōo ante æinēmīni incæte mīni æinēnō,
 ante ænāmaī imīnīpa. Mānōmaī beyæ mīnitō wæætē godō wæætē godō ānewēn-
 inque guēa wæætēdō wæætē piīnīnque guēadō guēa cæte quēwēmīni imīnīpa. Mīni

änö ante mīnitō, Pönōmi æmōnie, ante mīnitō Wængonguī ingante apænedāmai imīni inte mīni ænāmai quëwenguinque impa. ³Mīnitō Wængonguī ingante mīni änö ante apænemīni incæte wënæ wënæ ante pönëninque apænemīni beyæ ænāmai imīnipa. Edæ Wængonguī nänö pönōni æninque mönō edæ nāmanque pönente tote quëwengæimpa, ante æinente wæmīni inte ænāmai imīnipa töö.

⁴Waocä nänöogæ ingante wido cæcä bai mīnitō adobai Wængonguī ingante wido cæmīni imīnipa. Mīnitō ëñënāmai imīnitawo. Inguipoga nāni quincōo ante mönō pönëno beyæ mönō Wængonguī ingante piinte imōmpa. Incæte, Inguipoga nāni quincōo ante nē pönencæboimpa, ante æcänö angä Wængonguī ingante piinte bacæcäimpa. ⁵Wængonguī angä ëñëninque nāni yewæmongainō iīmai ante önonquedō ante intawogaa. “Wængonguī cæcä beyænque mönō tömengä Önöwoca ingante ëwocate quëwëmō imōmpa. Ìninqe mænīwoca mönō imonte waadete pönëninque, Botō imote waadete pönenguënemīni imīnipa, ante wæætë edæ godō piinte acä ingampa.” ⁶Incæte tömengä mönō imonte godömenque waadete pönö cædinqe mönō tönö godongämæ cædongä ingampa. Mänömai beyæ Wængonguī angä ëñente nāni yewæmongainō iīmai ante impa. “Nāmanque ante, Mönitō gomonga waa cæmöni imönipa, ante nē pönënanī inänite Wængonguī Baa angampa. Wæætë edæ, Mönitō önömönique bai imönipa, ante nē änāni inänite tömengä pönö waadete cæcampa.”

⁷Mänömai beyæ mīnitō Wængonguī ingante ëñente cædäni. Wënæ ingante Baa ante quëwëedäni. Baa ämīni ìninqe tömengä nänëñë wodii winömaingampa. ⁸Wængonguī gämænö pöedäni. Pömīni ate tömengä wæætë mīnitō weca poncæcäimpa. Mīnitō wënæ wënæ cæmīni inömīni inte önonpo mempote bai waëmō pönī quëwëedäni. Ayæ, Wængonguī ingante waadete pönëmopa, ante ämīni incæ adobai inguipoga nāni quincōo pönëmīni inte mīnitō mënonga ante pönente quëwënömīni imīnipa. Ìninqe edæ mīmō ñä mënongate bai cædinqe töingä pönente entawëmīni baedäni. ⁹Mīni nāmä wënæ wënæ cædīnō ante pönëninque mīnitō, Ancaa wæwente awædö, ante wæedäni. Mīnitō Ca ca tote quëwënö ñimpo cædinqe Ca ca wædinqe edæ wæwente quëwëedäni. ¹⁰Mīnitō incæ, Wënæ wënæ cæmönipa, ante önömönique imönipa, ante Wængonguī ingante äñömīni tömengä wæætë, Wadäni mīnitō imīnite waa acædänimpa, ante mīnitō imīnite ængö cæte bai cæqingänö angüënë.

Mönö tönñacä ingante apænte änāmai incæmöimpa

¹¹Botō tönñamīni ëñëedäni. Mīnitō wacä ingä wacä ingä wënæ wënæ ante apænedāmai iedäni. Æcänö tömengä tönñacä ingantedö ante wënæ wënæ äna ayæ tömengä ingante, Wënæ wënæ cæbipa, ante æcänö apænte äna ina mäningä Wængonguī nänö wææ angainö incæ wënæ wënæ ante apænecampa. Ayæ Wængonguī nänö wææ angainö ante wënæ wënæ impa, ante apænte angampa. Wīi tömengä nänö ëñente cæquinque Wængonguī nänö wææ angainö ante apænte angampa. Wæætë edæ, Mäninö ante nē apænte ämo imopa, ante bai cæcampa. ¹²Wængonguī tömenganque nänö wææ angainö ante nē angaingä ingampa. Mänömai beyæ tömengä adocanque nē apænte anguingä ìnongäimpa. Adocä pönö cæcä beyænque, Botō ämo beyænque quëwenguināni, ante cædongä ingampa. Adobai tömengä apænte angä beyænque, Wadäni wo ëwente bacædänimpa, ante cædongä ingampa. Bitō guiquënë nē angaimi imipa diyæ wacä ingante apænte angüënëmi imii.

Baänæ ate æbänö baquüi, ante Wængonguinque ëñengä

¹³ Minitö ñowo botö imote ëñeedäni. Minitö në iimaï ante tedemini iminipa. “Ñöwoönæ incæ baänæ ate incæ mönitö ii wadäni quëwëñömö goquimöni imönipa, ante mäniñömö godinque adoque wadepo iñonte mönitö godonte ænguinta æncæte ante cæquimöni imönipa,” ante ämini iminipa. ¹⁴ Ìñæmpa, Baänæ ate æbänö bacæimpa, ante tömää ëñenämaï iminipa. Cöwë quëwenguimompa diyæ ëñenguimöö. Awænæcaque owo boguimä nænque tamöningue quingæ dæ ba baï mönö quëwëñö adobaï do dæ bacæimpa. ¹⁵ Minitö guiquënë iimaï ante angüenëmini iminipa. “Wængongui Ao angä ininque mönitö quëwenguimöni imönipa. Ayæ Ao angä ininque mönitö ii waa cæqui cæcæmönimpa.” ¹⁶ Ìñæmpa minitö, Tömëmönique äninque cæcæmönimpa, ante pönëningue tedete quëwëñömöni iminipa. Mäniñö ante tömänö wënæ wënæ impa. ¹⁷ Waocä, Æbänö waa impa, ante ëñengä incæte cædämaï ingä inte mäningä wënæ wënæ cæcä ingampa.

Mäincoo në ëadäni nani pönenguënönö

5 Minitö mäincoo në ëamini iñömö ñowo ëñeedäni. Minitö nanguï Ca ca wæedäni. Edæ, Mönö caate wæquinque nanguï ingæimpa, ante tedecöningue Ca ca wæcæminimpa. ² Minitö mäincoo ëadincoo do wote batimpa. Ayæ minitö wæmoncoo tömancoo cayæ ade cænimpa. ³ Minitö oodo tönö padata täinta to tamöningue baï batimpa. Mäniï to tamöni beyæ mini wënæ wënæ cædinö edonque pöni odömönte ingæimpa. Ayæ quincöomë gonga bæcodöñömö concædinque æmæwo gonte ba baï minitö ii to tamöni beyæ mini baö incæ adobaï æmæwo gonte ba baï bacæimpa. Ìñæmpa iimæca wodo iinque bayedë incæ tömëmöni mäincoo ëadincoo do wote baquincoo gæte da wente cæminipææ.

⁴ Aedäni. Wadäni edæ tömëmöni quëwencodencöo cædinäni iñönänite minitö, Paga, ante mini godongüenenta pæ gompodinque godönämaï iminitapa. Ìninque ænämaï inäni minitö iminitedö ante piunte wædinque, Në ëadäni iñömö, Mönitö cædinö beyæ ante dicæ pönönäni æntamöniyaa, ante wædönänimpa. Mönö Awënë në adocanque Tömää Cægaingä iñömö në cædinäni nani wædinö do ëñëningä ingampa. ⁵ Ìmæca quëwëñedë minitö quincöo wæmoncoo tömancoo mante quëwëmöni inte minitö cöwë, Nämä möni watapæ tote quëwengæimpa, ante quëwënimöni iminipa. Waocä nänö wænongä wængüönæ iñonte cæningä nänö wænguinque oguimo pöni ba baï minitö cæningä baï adobaï oguimo pöni bamini iminitapa töö. Mäniönæ edæ do batimpa. ⁶ Wadäni nö cæte quëwëñäni minitö iminite Baa änämaï iñönänite minitö iñömö, Mini pante wæquinque wënæ wënæ cædänipa, ante wapiticæ apænte ämini inte tömënäni inänite wænömöni wænänitapa.

Mönö ee cæpämö ayæ Wængongui ingante mönö apënedö

⁷ Mänömaï beyæ botö töninämöni ëñeedäni. Minitö mönö Awënë nänö ponguin-ganca ante wæntædämaï inte ee cæte wänö cönöedäni. Aedäni, Në quiyacä tömëmö wæante ate onguipo cöñe ba ate, Tä bocate pæqui, ante cöönæ tedænque ee ongongampa. Cöönæ tedæ iinque baganca amiña bayedë wæmö pöni nänö tömëmön-coo tä pete gæcæte ante wii ee ongongantawo. ⁸ Mönö Awënë nänö pongüönæ oo pöni impa, ante minitö adobaï ee cæte wänö cönöedäni.

⁹ Botö töninamini eneedäni. Minitö wacä ingä wacä ingä wæætedö wææte, Wiwa cæcampa, ante godö änämaï iedäni. Minitö mänömaï cæmini ininque Wængongui wææte minitö iminite apænte ante pämaingampa. Edæ mönö Apænte Anguingä oo poncæcäimpa cæminii. ¹⁰ Botö töninamini eneedäni. Wëenënedë Wængongui beyæ nê apænegaïnäni inömö tömengä emöwo apænedinque wæwënäni incæte wæntædämaï inte ee cæte quëwengadänimpa, ante pönëninque minitö tömënäni nani cægaï baï adobaï cæedäni. ¹¹ Wadäni wæwënäni incæte wæntæye inämaï inte ee cædäni ininque nani toquinque impa, ante mönö pönënö ante do enëminipa. Docä Coba wodi inömö tömengä nanguï pönï wæwengä incæte wæntædämaï inte piïnämaï ingacäimpa. Mäninö ante do enënimini inte ayæ tömengä nänö wæwënedë iinque ba ate Wængongui æbänö tömengä ingante nanguï godongä ængaingä ingacäimpa, ante adobaï enëminitawo. Edæ waodäni wæwënäni inönänite mönö Awënë Wængongui ædæmö waadete waa cædongä ingampa.

¹² Botö töninamini eneedäni. Wadö mini pönënö ante pönömenque pönëninque minitö iïmaï ante godömenque pönëedäni. Minitö änö näwangä impa, ante wadäni pönencädänimpa, ante cædinque, Botö änö nöingä baquinö angüenë, ante änämaï iedäni. Edæ, Öönæ beyænque imæca beyænque quiëmë beyænque mönö apænemönö näwangä baquinö angüenë, ante tömänö ante edæ apænedämaï iedäni. Minitö wææte Ao äinëmini inte “Ao” ante mäninque æedäni. Ayæ minitö Baa äinëmini inte “Baa” ante mäninque æedäni. Edæ wiï mänömaï cæmini ininque Wængongui wææte minitö iminite apænte ante pämaingampa.

¹³ Minitö wæwëmini ininque Wængongui ingante apænequënëmini iminipa. Minitö watapæ tomïni ininque Wængongui ingante, Bitö tæiyæ waëmö imidö angüenë, ante ämotamini ancæminimpa. ¹⁴ Æcänö minitö weca wënæ wënæ ina inömö tömengä Codito ingante mini godongämæ pönencabo inöminite nê aadäni nani Picæncabo mini änäni inänite, Pöedäni, ante aa pequënegä ingampa. Aa pecä pönäni ate tömënäni Awënë Itota emöwo ante apænedinque wædænque ogui wapæ æninque nê wënæ wënæ inongä ingante oo paacädänimpa. Ayæ adoyedë wënæ wënæ inongä ingante nani oo paayedë tömengä beyæ ante Wængongui ingante apænecädänimpa. ¹⁵ Ayæ, Wængongui ingante apæneyömonte tömengä enëngampa, ante wede pönëninque apænemö beyænque waocä nê wënæ wënæ iningä incæ edæ gancaë bacæcäimpa. Wængongui tömengä ingante pönö cæcä ate waa ba nani ömæmoncæcäimpa. Ayæ adocä nänö wënæ wënæ cædinö beyæ wënæ wënæ ingä ininque Wængongui tömengä nänö wënæ wënæ cædinö adinque nimpö cæcä quëwëmaingampa. ¹⁶ Mänömaï beyæ minitö wacä ingante wacä ingante apænedinque, Botö wiwa cædimö inte wæbopa, ante æedäni. Mänömaï cædinque minitö, Gancaë bacæmönimpa, ante wacä beyæ ante wacä beyæ ante Wængongui ingante apænëedäni. Waocä nê nö cæte quëwënogä inömö Wængongui ingante apænedinque edæ tæï piñante apænecä ingampa. Mäningä nänö apænedö beyænque Wængongui cæcæcäimpa. ¹⁷ Ediya wodi mönö waomö imö baï tömengä adobaï ingacäimpa. Incæte tömengä Wængongui ingante, Cöönæ ämi cædämaï ingæimpa, ante ædæmö apænecä ate mëa go adoque tæcæ wadepo ganca edæ cöönæ cædämaï ingatimpa. ¹⁸ Ayæ ate tömengä, Cöönæ ämi cæcæimpa, ante Wængongui ingante wææte apænecäcäimpa. Apænecä ate öönædë inö wææ cöönæ cægatimpa. Cöönæ wææ cæ ate onguipoga tömëmö do tä bocate pægatimpa.

¹⁹ Botō tōniñamīni ēñēedāni. Mīnitō weca æcāmenque nō taadō oda cæte gocā adinque wacā tōmengā ingante ocæ ēmænte māmongā ponguēnengā ingampa. ²⁰ Īmaī pōñēedāni. Nē wēnæ wēnæ cæcā wapiticæ taadō gocā adinque æcāmenque tōmengā ingante nō taadō inō ocæ ēmænte nē māmongā ingāā tōmengā māmongā beyænque nē wapiticæ gocā iñōmō æmæwo nānō wænguēnēnō ñimpo cæte edæ quēwencæcāimpa. Ayæ nanguī pōñi nānō wēnæ wēnæ cædinō incæ wadæ cæte ingæimpa, ämopa. Mäñinque ante yewæmōmopa.

1 Pegodo

cadota ante nänö tänota yewæmongainta

Waa quëwencæminimpa, ante

1 Botö Pegodobo Itota Codito nänö në da godongaïmo inömo inte në yewæmömo ïmopa. Minitö ïñömö tömëmini ömæ quëwënämaï ïmini inte näwæ godinque wadäni nëmæ ponte quëwëmini inte pancaminiya Pontobæ quëwëñömini wamini guiquënë Gadatiabæ quëwëminipa. Wamini Capadotiabæ quëwëñömini wamini guiquënë Atiabæ quëwëminipa. Wamini guiquënë Bitiniabæ quëwëminipa. Mänömaï wayömö wayömö quëwëmini ïñöminite botö, Acæminimpa, ante yewæmömopa. ²Mæmpo Wængongui ïñömö minitö iminite wëenëñedë pönï do adinque, Minitö Itota Codito ingante në ëñente cæmini bacæminimpa, ante apænte ængacäïmpa. Ayæ, Botö ayömo minitö tæiyæ waëmö ëwocamini bacæminimpa, ante cædinque Wængongui Önöwoca incæ Itota wepæ inte pönö ñä mënongacäïmpa. Mänömaï cæcä bagaimini ïñöminite botö ñöwo ïñömö edæ, Wængongui nangui waadete pönö cæcä ate minitö në gänë pönëmini bacæminimpa, ante yewæmömopa.

Watapæ bacäïmpa, ante pönëninque quëwëmpa, ante

³Itota Codito Wæmpocä ïñongante Itota incæ, Botö Wængonguimi inömi ïmipa, ante Wængongui ingante waa apænecampa. Adocä ïñömö mönö Awënë Itota Codito wænte öñöñongante, Näni ömæmöe, angä ñäni ömæmongacäïmpa. Tömengä ñäni ömæmongä beyænque Wængongui mönö imonte adobaï pönö cæcä ate mönö mepoga ëñate baï inömo inte edæ, Mönö miimö quëwëninque watapæ quëwengäïmpa, ante pönente quëwëmpa. Ìninqe mönö ïñömö Wængongui ingante apænedinque, Bitö tæï ëmönömi inte waa pönï cæbi æmönipa, ante edæ watapæ apænecäïmpa. ⁴Ayæ Wængongui, Ìncayæ ate mini ænguincö, ante öönædë do edæ cö cæte mangampa. Mänincoo ïñömö ñömäadamaï incoo ïninqe cöwë wentamö badämaï incoo inte edæ wodämaï inguincö ingäïmpa. ⁵Ìnguipo pedænguipo ïninqe bayedë edæ Wængongui pönö ængä beyænque mönö cöwë quëwenguinö ante edonque pönï acäïmpa. Ìninqe minitö wede pönëmini beyænque minitö quëwenguimämo ïninqe baquinganca Wængongui në tæï piñænongä inte edæ minitö iminite wææ gompocampa.

⁶Minitö ñöwo wantæ ïñö incæ quiëmë beyænque wënæ wënæ bate wæmini incæte Wængongui pönö wææ gompocä beyænque edæ watapæ tomini iminipa. ⁷Oodo waëmö bamongäïmpa, ante waodäni gongapamö godö aca podönäni ate oodoque badinque waëmonca pönï ongoncäpa. Incæte oodo ïñömö ïncayæ ate ömæe ëwente ate edæ dæ bacäïmpa. Oodo mini æñinonca waëmonca ï ïñönte mini wede pönëñö ïñömö edæ godömenque waëmö pönï impa. Ìninqe mini wede pönëñö ïñömö wii wido cæqui impa. Cöwë edæ ongongäïmpa. Wætätë, Mini wentamö entawëninö edæ dæ go ate mini wede pönënonque edæ waëmö pönï entawencæminimpa, ante cædinque Wængongui pönö angä ate minitö gonga gonte caate baï wæminipa. Mänömaï mini caate wädö beyænque edæ godömenque wede pönëmini baminipa. Ìninqe Itota Codito mönö weca ponte a ongöñongante minitö cöwë wede pönëmini inte

tömengä önöwa gäänē ædæ wæante apænedinque, Nē tæi emönömi inte bitö waa pöni cæbi æmönipa, ante watapæ apænegadänimpa, ante Wængongui cæcampa.

⁸ Itota Codito ingante minitö awinca adāmaī inīmīni incæte tömengä ingante cöwē waadete pönēmīnīpa. Edæ nōwo ganca adāmaī inīmīni inte minitö tömengä ingante wede pönēninque mīni nāō bai entawengūnque watapæ todirque æbāmē ante tomīni imīnīpa. ⁹ Önöwoca mīni ewocate quēwengūnō ante æncæte ante wede pönēmīni inte minitö nōwo inōmō edæ do æmīni imīnīpa.

¹⁰ Wængongui beyæ nē apænegaināni inōmō, İncayæ ate quēwengūnāni inānite Wængongui pönō cæcā beyænque quēwencädänimpa, ante nōwomīni imīnitedō ante apænegadänimpa. Mänömainō ante apænedāni incæte tömēnāni, Ædānidō inānite ante Wængongui apænegāā, ante ēñēnāmaī inte ēñencæte ante nanguī cægadänimpa. ¹¹ Codito Önöwoca tömēnāni önöwoca quēwēninque pönō apænedinque, İncayæ ate Codito nanguī caate wæcæcäimpa, angacäimpa. Ayæ, Caate wædingä inte tömengä wæætē nāō bai entawengä inte tæi emongä edæ bacæcäimpa, ante pönō apænegä ēñēninque tömēnāni wæætē adodō ante apænegadänimpa. Incæte tömēnāni, Æyedēnō Codito mänömaī cæquingäā, ante ēñencæte ante wægadänimpa. Æbānō ba ate mänömaī cæquingäā, ante ēñencæte ante edæ nanguī cægadänimpa.

¹² Nōwo inōmō Wængongui öönæde quēwēninque tömengä Tæiyæ Waemö Önöwoca ingante mōnitonga da pönongä pöninque apænegä ēñēninque mōnitö wæætē Codito ingantedō ante minitö imīnite watapæ apænemōni ēñēmīnitapa. Mänīne adode ante Wængongui beyæ nē apænegaināni inōmō, Codito waa cæcæcäimpa, ante apænegadänimpa. Incæte Wængongui tömēnāni inānite apænedinque, Wī tömēmīni beyæ ante apænēmīnīpa, angacäimpa. İncayæ ate quēwēnāni beyæ ante apænēmīnīpa, ante tömēnāni inānite angacäimpa. Mäninō ante Wængongui beyæ ante æbānō apænedāni, ante ēñēnāmaī ināni inte Wængongui anquedoidi incæ, Waodāni beyæ Wængongui æbāmē waa pönī cæcäā, ante ēñēinente wædänīpa.

Wængongui, Tæiyæ waemö ewocaedäni, angampa

¹³ Mänömaī beyæ minitö, Mönō nanguī cæcäimpa, ante edæ täno pönente ate cæedäni. Nämä wææ gompotawente bai ēñente cæedäni. Itota Codito ponte a ongöninque mönō imonte waadete pönō cæcā ate watapæ bacæimpa, ante edæ mäninonque ante cöwē pönente cæedäni. ¹⁴ Wēñänāni wæmpoidi inānite nāni ēñente cæbai edæ minitö adobai ēñente cæedäni. Minitö ēñēnāmaī inēde mīni cæinewēnō ante do cægaminimpa. Nōwo inōmō nē ēñēmīni badinque mīni ēñēnāmaī inēde mīni cæinewēnō ante edæ cædāmaī iedāni. ¹⁵ Minitö imīnite nē apænte aa pegaingä inōmō edæ tæiyæ waemö ewocadongä ingampa cæminii. Quiēmē cædinque edæ tömengä bai adobai tæiyæ waemö ewocadinque edæ tömäā cæedäni. ¹⁶ Wængongui incæ, “Botö tæiyæ waemö ewocabo imopa cæminii. Botö ewocabo bai minitö adobai edæ tæiyæ waemö ewocacæminimpa,” angampa, ante yewæmongatimpa.

¹⁷ Tömämō imonte adoyömō pönī cædinque mönō Mæmpo inōmō mönō cædinō ante cöwä adinque nöingä pönī ante apænte angampa. İninque, Botö Wæmpo, ante nē apænēmīni inōmīni inte minitö inōmō edæ nē nöingä ante apænte angä ingante edæ guiñente wædinque quēwēedäni. Inguipoga quēwēninque minitö, Wabæca bai ongonte awædō, äninque, Wængongui weca edæ mönō ömæ ingäimpa, ante pö-

nente quëwëedäni. ¹⁸ Edæ, Dodäni näni quëwengai bai adobai quëwengäimpa, ante änäni ëñëninque mïnitö Ao ante önonque pönï cæte quëwengamïnïmpa. Mänömai quëwëñöminite Codito wæætë, Mïnitö abæ tawænte bai quëwencämïnïmpa, ante cædinque edæ, Quïnö godongantawo, ante mïnitö do ëñëmïnïpa. Ìñæmpa oodo incæ padata incæ mönö, Woquincoo, ancoo ïñonte tömengä dicæ mänincooque godongantawogaa.

¹⁹ Wæætë quipi wë, Codotedo, näni änogä ïñömö quenta mongænämai wentamö ëñädämai ïmai Codito adobai ïnogä inte edæ tömengä nämä wepæ tæiyæ waëmö wepæ godonte ængä beyænque quëwëmïnïpa. ²⁰ Inguipoga badoncæte ante cædinque Wængonguï ayæ gö cædämai ingäñedë wëñëñedë pönï incæ Codito ingante edæ, Mänömai cæcæbiïmpa, ante do apænte ængacäïmpa. Codito mïnitö beyæ ante edæ ñowo pönï incæ inguipoga pöninque ongongantapa. ²¹ Inguipoga pöninque tömengä do wænte öñöñongante Wængonguï, Ñäni ömæmoe, angä ñäni ömæmongacäïmpa. Ayæ tömengä ingante godömenque godö æäntodongä ate tömengä ñäö entawënogä inte tömengä nänö tæï ëmonguinque edæ æite gogacäïmpa. Wængonguï mänömai në cægaingä ïñongante Codito mïnitö imïnite pönö cæcä beyænque mïnitö wæætë Wængonguï ingante pönëmïnitapa. Mänömai beyæ mïnitö, Wængonguï pönö cæcä beyænque watapæ bacäïmpa, ante pönëninque tömengä ingante wede pönëmïni bamïnitapa.

²² Wængonguï nö nänö änö ante ëñente cædinque mïnitö mïmö ñä mënongate bai badinque mïnitö tönïñädäni ïnänite në waadete pönëmïni bagamïnïmpa. Ñowo ïñömö mïmöno nö pönëninque mïnitö godongämæ ædæmö waadete pönëninque wacä ingä wacä ingä godö waa cæedäni. ²³ Edæ waomö mönö yate pönïwoca wæwocauï ïñonte wïi mäninö beyænque mempoga ëñagamïnïpa. Wæætë Wængonguï nänö äñönö mïi quëwenguïnö ïñömö edæ wodämai inte cöwë ongongäïmpa. Mäninö Wængonguï nänö äñönö beyænque mïnitö mempoga ëñagamïnïpa. ²⁴ Edæ, “Waomö gaguïmænque bai ïñömonte gaguïmä do to aminca bai mönö adobai aquïi pönï ïñömö inte wæwocamompa.

Waëmö pönï mönö ëmönö ïñömö edæ ongai waëmö ængado bai ïñonte ongai edæ do guïñë wæno bai mönö ëmönö adobai bacäïmpa.

²⁵ Incæte Wængonguï nänö änö ïñömö edæ cöwë wodämai ongongäïmpa.”

Ante edæ ämotamïni ante bai Wængonguï beyæ näni yewæmongainö bai ïmpa. Mäninö Wængonguï nänö äñönö ante mïnitö imïnite do watapæ apænemöni ëñëmïnitapa.

2 Mäninö beyæ mïnitö piïnte mïni pönëwënö edæ ñïmpo cæedäni. Wacä adämai ïñongante babæ mïni cædö ante edæ cædämai ñïmpo cæedäni. Mïnitö wadö apænete wadö mïni cædö ante ñïmpo cæedäni. Mänömai cæte mïni quëwëninö ante edæ æmæwo ñïmpo cæedäni. Wacä gomonga ængä ingante godö piïnte adämai ïedäni. Wacä ingantedö ante babæ ante mïni piïnte änewënö ante edæ ñïmpo cæedäni. ² Wëñænäni tæcæ ëñädinäni inte goömæ gäinente wædäni bai mïnitö adobai Wængonguï nänö apænedonque ante ëñencæte ante wæedäni. Edæ tömengä ængä beyænque mïnitö në quëwëmïni inte mïnitö öñowoca ædæmö picämïni mïni pæquinque edæ tömengä nänö apænedö ante edæ goömæ waëmömæ beïnente bai ëñencæte ante wæedäni. ³ Waëmepæ ïmpa, ante adinque wëñængä goömæ wæætë wæætë becä bai mïnitö adobai, Mönö Awënë waingä pönï ingampa, ante do adimïni inte tömengä weca wæætë wæætë ponte bete bai edæ ëñëedäni.

Nē quēwengā inongā inte Codito wainca bai ingampa, ante

⁴Oncō dicaca mænoncæte ante cædinque waodāni, Wīwa inca awædō, ante pancacaa wido cædāni bai waodāni pancadāniya mōnō Awēnē ingante adobaī wido cædānīpa. Wængonguī guiquēnē mōnō Awēnē nē quēwengā ingante waa adinque, Botō owocō mænonguinca wainca pōnī bai tōmengā ingampa, ante tōmengā ingante apænte æninque ee mangampa. Īnīnque mīnitō ĩñōmō tōmengā weca pōñōmīnite tōmengā, ⁵Mīnitō mīīmīni quēwēñōmīni Wængonguī mīnitō ĩmīnite ænte cabo tingæte adoconque mænonte bai cædinque edæ, Botō Ōnōwoca owoquincō, ante badongā quēwēmīnīpa. Quēwēñōmīnite godōmenque tæiyæ waēmō badongā badīmīni inte edæ mīnitō ĩñōmō edæ Wængonguī Ōnōwoca tōnō äawocaque bai ēwocadinque, Wængonguī quī, ante nē godōmīni bamīnīpa. Īnīnque mīnitō Itota Codito ēmōwo ante apænedinque, Wængonguī quī, ante godōmīni ate tōmengā edæ waa ængampa. ⁶Edæ Wængonguī apænecā ēñēninque ĩmaī ante do yewæmongadānīpa.

“Tīonoquidi dæguimonga mænoncæte ante cædinque dica tånoca gö cæte bai cædinque,

Botō nē waa adongā ingante ænte pōnō Tånocā pōnī gōnōmo gongæncæcāimpa.

Tōmengā ingante nē wede pōnengā ingante wadāni ædō cæte bæ taquināni guingo ĩmonte wæquingāā,” angacāimpa.

⁷Mīni pōnencabo ĩñōmō, Tånocā nē ongongā ĩñōmō waingā pōnī ingampa, ante adinque tōmengā ingante æninque ee māmīnīpa. Wīi pōnēnāni guiquēnē tōmengā ingante Baa ānānīpa.

“Nē mænōnāni nāni wido cædinca inca

ñænænca pōnī gōnōninca bate tånoca inte tæi gongæncapa,”

ante Wængonguī beyæ nāni yewæmongainō bai cædānīpa. ⁸Ayæ adobaī,

“Dīcaa nē tao tencawa tæ go wæængā bai ĩnāni inte

tōmēnāni nē Tånocā ingante pīnte adinque tæ go wæænte bai oda cædānīpa.”

Ante yewæmongatimpa. Tōmengā nānō angainō ante ēñēnāmaī nāni cædō beyæ oda cædinque tæ edæ go wæænānīpa. Tōmēnāni edæ mānīnonque cædinque nē tæ go wæænguēñēnāni cōwē ingadānīpa.

⁹Wængonguī nānō nē apænte ængāimīni guiquēnē wēmō ĩñōmō quēwēñōmīnite tōmengā aa pedinque, Botō weca botō waēmō pōnī nāō ēmōñōmō pōedāni, ante cægacāimpa. Mānōmainō cægāingā ĩñongante mīnitō, Bitō Wængonguī Waēmō pōnī ēmōnōmi inte waa pōnī cæbi edæ æmōnīpa, ante anguēñēmīni ĩmīnīpa. Mānōmainō ante watapæ ancæmīnīpa, ante cædinque tōmengā mīnitō ĩmīnite do apænte ængacāimpa. Īnīnque mīnitō Awēnē wēmīni ĩnōmīni inte, Wængonguī quī, ante mīnicabo nē godōmīni bai bamīnīpa. Wængonguī, Botō quīmīni ĩmīnīpa, ānīnque tæiyæ waēmō badongā bagāimīni inte mīnitō Wængonguī nempo nē quēwēmīni ĩmīnīpa. ¹⁰Mīnitō wēñēñedē adocabomīni ĩnāmaī ingāmīnīpa. Nōwo guiquēnē Wængonguī tōnō godongāmā quēwēmīni inte edæ adocabomīni ĩmīnīpa. Wēñēñedē guiquēnē tōmengā mīnitō ĩmīnite pōnō waadete cædāmaī ingacāimpa. Nōwo guiquēnē tōmengā pōnō waadete waa cæcā ate quēwēmīnīpa.

Wængonguī ingante nē cæmō ïmopa, ante quēwēedāni

¹¹ Botō nē waademīni edæ ēñēedāni. Mīnitō inguipoga quēwēmīni incæte inguipo wīi tōmēmīni òmæ bai ïmpa. Wæætē wabæca quēwente bai quēwēmīni inte mīnitō ònōwoca wentamō mongæñāmaī ingæïmpa, ante edæ wææ cædinque mīnitō baonque ante mīni cæinēwēnō ante ñimpo cædinque edæ cædāmaī ïedāni ämopa. ¹² Nē ēñēñāmaī ïnāni weca quēwēninque mīnitō wæætē waa cæte quēwēedāni. Tōmēñāni guiquēñē mīnitō ïmīnite pīninque, Wēnæ wēnæ cæmīnīpa, ante babæ äñānitawo. Incæte mīnitō waa cæmīni ïninque tōmēñāni, Waa cæcampa, ante do abainānīpa. ïninque Wængonguī Awēñē nānō apænte äñedē tōmēñāni do agaiñāni inte Wængonguī ingante, Bitō ñāō bai òmōi inte cæbi ate bitō wēñāni waa cædāni amōnīpa, ämañānīpa. ïninque tōmēñāni waa adinque waa apænecædānīmpa, ante cædinque mīnitō ñōwo incæ waa cæte quēwēedāni.

¹³ Waodāni ïnānite wadāni edæ, Awēñēidi ïnānīpa, ante godō gōñōñāni ongōñānīpa. Æcāmē ingante äñāni bayōñānite mīnitō wæætē Wængonguī Awēñē beyænque ante cædinque tōmēñāni ïnānite edæ ēñente Ao ante cæedāni. Adocanque ingante, Awēñē Odeye, äninque godō gōñōñāni ate mīnitō ïñōmō, Tōmengä tæiyæ awēñē inte nē angä ïnogä ingampa, ante adinque tōmengä ingante ēñente cæedāni. ¹⁴ Ayæ pancabaa awēñēidi gobedōnadodoidi mīni äñōñāni ïnānite godō gōñōninque awēñē odeye wæætē ïīmaī angampa. Mīnitō wēnæ wēnæ cædāni ïnānite edæ godō päedāni. Ayæ waa cædāni adinque mīnitō, Waa cæmīni ïmīnīpa, äninque edæ godō waa cæedāni, ante gobedōnadodoidi ïnānite godō gōñongä ongōñānīpa cæmīnīi. Mīnitō tōmēñāni ïnānite adobai ēñente cæedāni. ¹⁵ Eñēñāmaī ïnāni wīwa tedeñōñānite mīnitō waa cæmīni ate wædinque tōmēñāni ædō cæte godōmenque wīwa tedequīñānīi. ïninque, Tōmēñāni pæ wēenedinque tededāmaī incædānīmpa, ante cædinque mīnitō ïñōmō edæ waa cæte quēwēedāni, ante edæ Wængonguī angampa cæmīnīi.

¹⁶ Tōmengä ñimpo cæcä quēwēmīni inte mīnitō, Wacä wææ äñāmaī ïñongante botō æbāñō cæte waa quēwenguimoo, ante adinque nāmä wææ ante cæedāni. Incæte mīnitō wacä wææ äñāmaī ingä beyænque awēmō wēnæ wēnæ cæmīnitawo. Edæ cædāmaī ïedāni. Wæætē Wængonguī ñimpo cæcä quēwēmīni inte mīnitō tōmengä ingante nē cæmīni inte edæ ēñente cæte quēwēedāni. ¹⁷ Tōmāñāni ïnānite mīnitō, Waodāni ïnānīpa, ante edæ waa aedāni. Mīni pōñencabo ïñōmīnite edæ godongāmæ waadete pōñēedāni. Wængonguī ingante, Wængonguī ingampa, ante guññente wæedāni. Awēñē odeye ingante, Tæiyæ awēñē ingampa, ante edæ waa aedāni.

Codito æbāñō caate wægacāi, ante pōñēedāni, ante

¹⁸ Pancamīniya ïmīnite wadāni ò äñāni wædimīni inte mīnitō tōmēñāni beyænque cæmīni bamīnīpa. ïninque nē ò äñāni ïñōmō pōñō waa cædāni incæ pōñō pīinte cædāni incæ mīnitō wæætē, Botō awēñē ingampa, ante piyænē cædinque tōmēñāni nāni anganque edæ ēñente cæedāni. ¹⁹ Edæ waocä wēnæ wēnæ cædāmaī ïnogä inte quīēmē beyænque wæwente caate wæcä incæte tōmengä, Wængonguī acampa, ante pōñēninque nangæ batawēñāmaī ingä ïninque edæ waa ïmaimpa.

²⁰ Wæætē mīnitō wēnæ wēnæ cæmīni beyæ pāñāni ate mīnitō piyænē cæmīni ïninque Wængonguī māññō beyænque dicæ waa aquingāa. Waa adāmaī ïmaingampa.

Wæætē waa cæmīni beyænque pānāni caate wædinque mīnitō piyǣnē cæte ee cæmīni adinque Wængonguī edæ, Waa cæbipa, āmaingampa. ²¹ Botō caate wædōnō adodō taadō tee empote pōedāni, ānīnque mīnitō beyǣ Codito caate wægacāimpa cæmīnīi. Botō caate cægongainō adodonque cægonte wæcæmīnīmpa, ante mīnitō īmīnite do aa pecā pongamīnīmpa. ²² Tōmengā īñōmō edæ cōwē wēnæ wēnæ cædāmaī ingacāimpa. Ayǣ cōwā ayōnāni tōmengā dicæ babæ ante cæcā agadāniyaa. ²³ Tōmengā ingante piinte badete toyōnāni tōmengā wæatedō wæætē piināmaī ingacāimpa. Caate wædinque tōmengā wæætē piinte ānāmaī ingacāimpa. Wæætē, Nē nō apænte ānongā Wængonguī incæ botō beyǣ cæcæcāimpa, ante pōnēnīnque piyǣnē edæ cægacāimpa. ²⁴ Mīnitō wēnæ wēnæ mīni cægaincoo ante Baa ānīnque mongǣnāmaī inte nō pōnī cæte quēwencæmīnīmpa, ante cædinque tōmengā nāmā baonga teēmē mongǣñongante tōmengā ingante awāa timpodāni edæ wængacāimpa. Īnīnque tōmengā mongænte nānō wængainō beyǣ mōnō wæætē mānīnō wēnæ wēnæ mōnō cægainō ante wænte bai īñōmō inte nō pōnī cæcæte ante quēwēmō inguēnēmō imōmpa. Tōmengā ingante tæi pānāni nānō āmogate wægainō beyænque mīnitō wæætē gancaē bamīnīpa. ²⁵ Edæ obegaidi pāmænte godāni bai ingaimīni inte mīnitō ñōwo nē aacā weca adodō ocā ēmænte pōmīni adinque tōmengā īñōmō edæ mīnitō ōnōwoca beyǣ ante wææ aacā ēwocamīnīpa.

Mīna gæncaya īmaī quēwencæmīnīmpa, ante

3 Onquiyæmīni ēñeedāni. Mīnitō nānōogǣnāni nāni ānonque ante Ao ante ēñente cæedāni. Mīni nānōogǣnāni pancadāniya Wængonguī nānō ānō ante pōnēnāmaī īnānitawo. Mānōmaī ī ĩnīnque mīnitō īñōmō, Wīi mōnitō tededō beyǣ pōnāni inte tōmēnāni wæætē ēñente mōni cædinō ante adinque Wængonguī gāmǣnō poncædānīmpa, ante cædinque piyǣnē cæte edæ tōmēnāni īnānite ēñente cæedāni. ² Mīnitō Wængonguī ingante guīñente wædinque waēmō entawēmīni inte ēñente cæte waa quēwēmīni adinque tōmēnāni wæætē Wængonguī ingante Ao ante pōmainānīpa. ³ Mīnitō, Waēmō pōnī bacæboīmpa, ante cædinque ocaguī waa pōnī wao wincate oodo mongænte wamoncoo mongænte weocoo waēmōncoo wēñate mongæmīnitawo. Īñæmpa mānōmaī cæmīni beyænque mīnitō dicæ waimīni bamīniyaa. ⁴ Wæætē tōmēmīni waa entawēnō beyænque waimīni pōnī baquēnēmīni īmīnīpa. Mīnitō ōnōwoca gānē pōnēnīnque ædāmō cæmīni beyǣ mīni waa entawēnō edæ wodāmaī inte godōmenque waēmō pōnī ongongǣīmpa. Mānīnō mīni waēmō entawēnō bai ante æncæte ante edæ quīēmē impa diyǣ godonte ænguīi. Incæte Wængonguī mānīnō ante adinque, Waēmō pōnī entawēmi abopa, ante nanguī tocampa.

⁵ Dodāni pōnī mōnō wængānāidi īñōmō, Wængonguī pōnō cæcā beyænque waa bacāīmpa, ante wede pōnēnīnque tæiyǣ waēmō entawengadānīmpa. Tōmēnāni waēmō pōnī bacæte ante tōmēnāni ōnōwoca gānē pōnēnīnque ædāmō waadete cægadānīmpa. Tōmēnāni nānōogǣidi nāni ānonque ante ēñēnīnque Ao ante cægadānīmpa. ⁶ Dodā ñǣñǣnā Tada wodi īñōmō Abadāo wodi ingante ēñente cædinque tōmengā ingante, Nē āmi īmīpa, angacāīmpa. Mīnitō īñōmō tōmēnā nānā cægāi bai waa cædinque mīni guīñente wæpāmo æbāmē ba incæte guīñente wædāmaī īmīni ĩnīnque nāwangā nō tōmēnā nānōmomīni babāimīnīpa.

⁷ Onguīñæmīni guīquēnē ēñeedāni. Mīnitō gǣnāni tōnō quēwēnīnque tōmēnāni beyǣ ante cōwē pōnēnīnque waa cæedāni. Botō gǣngā onquiyǣngā ĩnongā inte

aquingä ingä incæte möna guëa cæcaya imönapa, ante ëñente wædinque mînitö gænäni inänite edæ cöwë waa aedäni. Ayä, Möna gæncaya Wængongui ingante apäneyömöna tömengä do ëñencæcäimpa, ante cædinque iïmai pönente cædäni. Wængongui inömö, Mîna quëwenguimämo, ante waadete pönö cæcä beyænque möna guëa ænguincaya imönapa, ante edæ ëñente cædäni.

Mîni waa cædö beyænque caate wæquimîni, ante

⁸Tömämîni guiquënë ëñeedäni. Mînitö adoyömö pönëninque Ao ante cædäni. Në Ca ca wæcä tönö edæ adoyömö Ca ca pönente wædäni. Mönö pönencabo imompa, ante cædinque godongämæ waadete pönëedäni. Wacä caate wæcä adinque mînitö tömengä tönö guëa wæte bai pönëedäni. Nämä ængö cædämai imîni inte mînitö wæætë edæ, Önömonque bai inömö imompa, ante piyënë cæte quëwëedäni. ⁹Wënæ wënæ cædäni wæmîni incæte, Botö wæætë wënæ wënæ cæbo wæcä tocäi, ante cædämai iedäni. Wiwa änäni wæmîni inte, Botö wæætë wiwa ämo wæcä tocäi, ante cædämai iedäni. Wæætë edæ, Tömënäni waa quëwencædänimpa, ante cædinque mînitö tömënäni inänite waa apänedinque godö waa cædäni. Mänömai cæcæminimpa, ante Wængongui mînitö imînite waa cædinque pönö aa pegacäimpa cæmîni.

¹⁰Edæ iïmai ante Wængongui beyä ante yewæmongatimpa,

“Wacä tömengä nänö quëwenguimämo ante nangui æinente wædinque,

Tæönæ waa quëwente tocäi, ante në angä inömö

tömengä inömö wënæ wënæ tededämai inte babæ wapiticä änämai inte tæönæ quëwente tocæcäimpa.

¹¹Tæönæ quëwencæte ante cædinque tömengä wënæ wënæ nänö cæinö ante ëmö cædinque dadi ëmäninque waa edæ cæquëngä ingampa.

Ayä tömengä piyënë cædinque, Mönö tömämö godongämæ gänë pönente quëwengæimpa, ante nangui cæquëngä ingampa.

¹²Mönö Awënë awinca ëmongä inte në nö cædäni gämænö adinque tömënäni inänite cöwë aacampa.

Ayä, Botö imote æbänö ante apänedäni, ante tömengä ëamonca ongonte cöwë ëñengampa.

Wënæ wënæ cædäni inänite guiquënë tömengä pïinque awincaque acampa,”
ante yewæmongatimpa cæmîni.

¹³Mînitö waa cæcæte ante edæ nangui cæinëmîni bamîni adinque æcänö wæætë mînitö imînite wënæ wënæ cæquingä. ¹⁴Incæte mînitö nö pönî mîni cædö beyænque caate wæmîni ininque edæ mîni waa quëwente toquinque imaimpa. Ininque iïmai ante nâni yewæmongainö bai cædäni. Tömënäni nâni guïñente wæpämö beyä ante mînitö inömö edæ guïñente wædämai iedäni. Edæ guïñënte wædämai iedäni.

¹⁵Wæætë, Tæiyä Waëmö Awënë inongä ingampa, ante wede pönëninque edæ Codito ingante mimöno entawëedäni. Ayä, Watapæ bacäimpa, ante mînitö quïnante pönëmîni, ante ëñencæte ante wadäni äñönänite mînitö wæætë a ongönämai inte iïnonque ante edæ do apänemîni incæminimpa. Codito mönitö Awënë pönö cæcä beyænque mönitö, Watapæ bacäimpa, ante wede pönëmönipa, ante mäninonque ante do apänemîni edæ ëñencædänimpa. ¹⁶Inäni inömö ëñencæte ante änänipa, ante pönëninque mînitö, Botö wentamö entawënämai incæboimpa, ante nämä apænte cædinque guïñente wædinque tömënäni inänite ædämö

apænemini ēñencædānīpa. Mānōmaī cæyōmīni wadāni guiquēnē mīnitō Codito nempo quēwēnīnque mīni waa cædōnō ante pīīnīnque babæ ante todānitawo. Īnīnque mīnitō wentamō entawēnāmaī inte ædæmō apænemini adīnque tōmēnāni wæætē, Mōnitō babæ ante tedetamōnīpa, ante ēñēnīnque guīñēnete wæcædānīpa.

¹⁷ Mīnitō wēnæ wēnæ cæmīni beyæ caate wæmīni ĩnīnque ōnonque ĩmaīpa. Wæætē, Wængonguī, Caate wæcæmīnīpa, angā ĩnīnque mīnitō waa pōnī mīni cædō beyænque caate wæmīni ĩnīnque edæ godōmenque waa ĩmaīpa. ¹⁸ Mīnitō nō cædāmaī ĩñōmīnīte Codito ĩñōmō mōnō nē nō cædongā inte mīnitō ĩmīnīte Wængonguī weca ænte poncæte ante cædīnque wēnæ wēnæ mīni cædō beyænque adopoque caate wængacāīpa. Tōmengā baō ēñayongante tōmengā ingante wænōnāni wængā ate Wængonguī Ōnōwoca angā ate nāni ōmæmonte edæ mīngā quēwengampa. ¹⁹ Ayæ adobaī Wængonguī Ōnōwoca tōmengā ingante ænte māocā godīnque tōmengā nē wænte gogaināni ōnōwocaco tee mōnete ongoncoo weca gote apænecā ēñengadānīpa. ²⁰ Mānīnāni nē tee mōnete ongōnāni ĩnānīte Nōwee wodi Docā nāni ānongā doyedē ancaā apænecā incæte tōmēnāni ēñēnāmaī inte cægadānīpa. Mānīnāni nē ēñēnāmaī cægaināni ĩñōnānīte Codito nōwo tōmēnāni weca gote apænecāīpa. Wængonguī ĩñōmō, Wipo nānængade pōnī ĩmpo incæ oncō baī mænoncæbīīpa, ante Nōwee ingante do angaingā inte, Īnīnque mænoncæcāīpa, ante ee wānō congacāīpa. Incæte mānīnāni ēñēnāmaī cæyōnāni ocho ganca ĩnāni mānīpodānīque æpæno yædopāa wogaa gote quēwengadānīpa.

²¹ Mānīmæno edæ wogaa godīnque tōmēnāni nāni quēwengāī baī mīnitō adobaī æpænē guīdīnque quēwēmīnīpa. Incæte wīī baonque mēnongate beyæ quēwēmīnīpa. Wæætē mīnitō, Wængonguī ayongā botō mīmō nā mēnongate entawēmo inte quēwēmōpa, ante nāmā apænte pōnēnīnque æpænē guīmīnīpa. Edæ guīdīnque mīni ængā gantidō baī Itota Codito nāni ōmæmonte quēwengā beyænque mīnitō adobaī nāni ōmæmonte quēwēmīnīpa. ²² Tōmengā ĩñōmō do ōōnædē æite Awēnē badīnque Wængonguī tōmēmængā ĩnō edæ tæ contayongante anquedoidī incæ nē ānāni incæ nē tæī pīñænte cædāni incæ tōmēnāni tōmānāni edæ tōmengā nānō ānō ante ēñente cædānīpa cæmīnīi.

Wængonguī nānō pōnō cæganca mōnō cæcæīpa

4 Nē caate wædingā ĩñōmō, Botō idæwaa wēnæ wēnæ cæte awædō, ante tōmengā wīwa nānō cædīnō ante do wido cæcampa. Īnīnque mīnitō, Codito incæ baonga quēwēnīnque caate wægacāīpa, ante pōnēnīnque, Botō baonga caate wædīnque ēñente badīnque botō wēnæ wēnæ cædīnō ante wido cæcæboīpa, ante piyænē cæte tæī ongōedāni. ² Edæ nē caate wædingā ĩñōmō, Mōnō waocabo baonque ante mōnō cæinēwēnō ante botō ĩñōmō cædāmaī incæboīpa, ante pōnēnīnque edæ nīmpo cædīnque inguīpoga tōmengā nānō quēwenguīnganca Wængonguī nānō ānōnonque ante ēñente quēwengampa. ³ Ēñēnāmaī ĩnāni cæinēnte wæwente nāni ānōnō ante ēñente mīnitō wēēñēdē adobaī quīngāmē baī cæte quēwengāmīnīpa. Edæ baonque ante mīni toīnente wæwēnonque ante do cædīnque mīnitō tōmēnāni nāni cæī baī cædīnque edæ tī nāmæ bete quīdī quīdī dowænīnque beowæo inte cæowæo inte Yæ yæ angāmīnīpa. Ayæ mīnitō tōmēmīni badōnīnca incæ adīnque, Mōnitō wængonguī īngampa, ante ædæ wænte tedewengāmīnīpa. Nōwo ĩñōmō mīnitō mānōmaī cæte idæwaa cæmīni awædō.

⁴Tömēnāni iñōmō baonque ante nāni godō toinēwēnō ante cæcæte ante pogodo gote bai cædinque mīnitō imīnite, Ponguēnē quēwēnānii, ante ancaa ānānīpa. Mīnitō gomō adinque tōmēnāni tōnō godongāmæ godāmaī imīni adinque tōmēnāni wæætē, Quiimæ awincaque gomō awēmīnii, ante edæ piinte ānewēnānīpa. ⁵Incæte mōnō waocabo mīimō quēwēmō incæ do wænte gogaināni incæ tōmāmō imonte nē oo apænte anguingā iñōmō edæ Wængonguī inongā ingampa. Īnīnque tōmengā, Æbānō cægāmīnii, ante angā ēñente wædinque mǎnōmaī cægaināni wæætē aamō cædāmaī inte tōmēnāni nāni cægainō ante edæ do apænequīnāni inānīpa. ⁶Mǎnōmaī beyæ do wængaināni inānīte mōnō Codito ingantedō ante watapæ apænegatīmpa. Tōmēnāni baō ēñate quēwēñōnānīte waodāni apænte ānīnque pānāni incæte Wængonguī wæætē, Tōmēnāni ōnōwoca ēwocadinque quēwencædānīmpa, ante tōmengā waa pōnī nānō cægainō beyænque nāni quēwenguīnō ante godō apænecā ēñegadānīmpa.

⁷Ñōwo iñōmō tōmancoo edæ oo iinque baquīnō anguēnē. Mǎnōmaī impa, ante ēñente wāmīni inte mīnitō, Mōnō tōingā pōnente Wængonguī ingante apænecāīmpa, ante cædinque nāmā wææ aadinque ocai encate pōnēedāni. ⁸Wēnæ wēnæ cæmō incæte waadete pōnēmō iinque mōnō waadete cædō beyænque wadāni piyænē cæte piināmaī inānīpa. Mǎnōmaī impa, ante pōnēnīnque mīnitō nē wede pōnēmīni inōmīni inte cōwē waadete pōnente cæedāni. ⁹Edæ wadāni inānīte, Pōedāni, ānīnque wacā ingā wacā ingā pædæ godōnīnque edæ, Tōmēmō quī impa, ante wædāmaī iedāni.

¹⁰Wængonguī, Botō pōnō waadete cæbo ate mīnitō ado botō waadete cædōnō ante ænte ēwocadinque godō waadete cæedāni, ante adocanque ingante wadō wacā ingante wadō pōnō waadete cæcā ænte ēwocāmīnīpa. Īnīnque mīnitō tōmāmīni mīni ænte ēwocaganca cædinque mīni pōnencabo beyæ godongāmæ waa cæquēnēmīni imīnīpa. ¹¹Wængonguī pōnō cæcā ænīnque æcānō nānō apænequīnganca ēwocacā tōmengā Wængonguī nānō apænedonque ante apænequēngā ingampa. Æcānō wadāni beyæ ante nānō nē cæquīnganca ēwocacā tōmengā Wængonguī nānō tæī piñānonque entawēnīnque waa cæquēngā ingampa. Mǎnōmaī cædinque mīnitō waa cæmīni adinque mōnō tōmāmō Itota Codito ēmōwo apænedīnque Wængonguī ingante, Bitō waēmō pōnī inōmi inte waa cæbīpa, ante apænecāīmpa. Tōmengā iñōmō nē tæī ēmōnongā inte ñāō ēmōnīnque nē nanguī cædongā ingampa, ante mōnō pedænguīpoga quēwēmō incæ iincayæ ponte mīinguīpoga quēwēmō incæ cōwē watapæ pōnī apænecāīmpa. Mǎnōmaī baquīnō anguēnē, ante botō, Amēē, āmopa.

Codito nempo quēwēnīnque caate wæcāmīnīmpa, ante

¹²Botō nē waademīni ēñēedāni. Mīnitō ñōwo incæ gonga gonte caate bai wāmīni incæte, Quiēmē beyæ mǎnōmaī caate wæboī, ante guīñente wædāmaī iedāni. Edæ wīī ōnonque caate wāmīnīpa. ¹³Wæætē, Codito nānō caate wægānonque godongāmæ ñōwo caate wāmōnīpa, ante pōnēnīnque watapæ toedāni. Mǎnōmaī caate wædinque tomīni iinīnque Codito ñāō apāite bai nānō pōñedē godōmenque gomonga watapæ toquīmīni imāimīnīpa. ¹⁴Mīnitō imīnīte wadāni piinte ānīnque, Codito ēmōwo ōnonquedō waa adinque wæcantedō abi, ante badete todāni iinīnque Wængonguī wæætē, Watapæ quēwencāmīnīmpa, ante pōnongā ænīnque mīnitō tōmengā Ōnōwoca nē ñāō ēmōnongā ingante ēwocāmīni beyæ toquēnēmīni imīnīpa.

¹⁵ Wacä ingante në godö wæningä ingante do pänäni wæcampa. Wacä qui në awëmö ængä ingante në wænæ wænæ cæcä ingante adobaï pänäni wæcampa. Adocunque në cæquënegä inte änämaï iñongante wacä iñontobæ godö önonque cæcä ate në önonque cæcä ingante pänäni wæcampa. Minitö wæætë nämä wææ aadique tömënäni näni cædö bai cædämaï imini inique caate wæmini incæte ædö cæte mïni wïwa cædö beyæ pänäni caate wæquënemïni. Edæ dæ angüënë.

¹⁶ Wæætë wadäni mïnitö iminite, Wææ, Codito ëmïñæmi imipææ, ante piinte cædäni caate wæmini incæte mïnitö guingo imonte wædämaï iedäni. Wæætë edæ Wængongui ingante apænedinque edæ, Bitö ñäö ëmömi inte pönö pemonte bai cæbi æninue mönitö Codito ëmöwo ëmonte bai adobaï ëmömönipa, ante waa apæneedäni.

¹⁷ Edæ iïmaï impa. Wængongui tönö mönö godongämæ owocabo iñömonte tömengä oo apænte ancæcäimpa. Inique mönö imonte täno apænte angä inique tömengä wadäni inänite guiquënë æbänö cæquingä. Tömengä ingantedö ante wat-apæ apænedäni ate në ëñente cædämaï inäni inänite apænte äninque Wængongui quingämë bai nanguï pangä wæquinäni. ¹⁸ Ayæ Wængongui beyæ näni yewæmongainö bai impa. Në nö cæcä wodo wængüënegä iñongante Wængongui tingæ ængä beyænque quëwëñongä Wængongui ingante ëñänämaï ingä guiquënë tömengä ædö cæte quëwenguingä. Në wænæ wænæ cæcä adobaï edæ ædö cæte quëwenguingä. ¹⁹ Minitö iñömö Wængongui nänö äninö beyænque caate wæmïnitawo. Inique mänömaï beyænque mïnitö, Mönö imonte në badongaingä cöwë pönëninque ædæmö aaquingä ingampa, ante pönëninque nämä mïnitö önöwoca tömengä nempo godöninque piyænë cæte godömenque waa cæquënemïni iminipa.

Mïni pönencabo æbänö cæte quëwengäimpa, ante

5 Mïni pönencabo iñömïnite pancamïniya në aamïni Picæmïni mönö ämïni iminipa. Botö iñömö adobaï në aabo Picæmo inömo inte, Mönö në Picæncabo, ante mïnitö iminite ædæmö apænedinque ämopa. Codito caate wæcä në agaïmo inte botö edæ waadete ämopa. Ayæ Codito ñäö bai nänö ëmönö edonque pönï nänö ödö-monguinö ante botö tömengä tönö ñäö bai entawëmo inömo inte edæ, Eñencæmïn-impä, ante nanguï ämopa. ² Codito ingante në pönënanï iñömö mïnitö nempo cænïnäni bai ongöñönänite mïnitö tömënäni inänite në aamïni iminipa. Wængongui, Në pönënanï inänite aacæmïnimpä, angä ëñëninque mïnitö wæætë Baa ämöni inique Wængongui pangä wæcæ wæ, ante guïñente wæmïnitawo. Inämpa wï guïñente beyænque aacæmïnimpä. Wæætë Wængongui, Minitö do Ao ante aacæmïn-impä, ante tömengä nänö änönonque ante edæ ëñente cæte edæ tömënäni inänite ædæmö aedäni. Ayæ edæ godonte äinta ante äinente wæmïnitawo. Inämpa wï æncæte ante wædinque mïnitö edæ, Në pönënanï beyænque nanguï cænente wædinque cæcæboimpä, ante piyænë cæte aedäni. ³ Waodäni në cænïnäni bai mïnitö nempo ongöñönänite mïnitö wæætë imæca awëneïdi näni piinte ämaï wï adobaï piinte äedäni. Wæætë edæ, Mönö waa cæte quëwëmö adinque tömënäni mönö bai adobaï waa cæte quëwencædänimpä, ante cædinque edæ waa cæedäni.

⁴ Mänömaï cæmïni inique mönö në Aadongä Nænængä pönï inongä iñömö iin-cayæ ponte a ongöninque poganta ñäö ëmonta cöwë wodämaï inta pædæ pönonte bai cædinque mïnitö iminite, Minitö në aamïni inte botö ñäö ëmonte ongöñömö ponte quëwencæmïnimpä, ancæcäimpa.

⁵Tæcæ æmæwo pæimīni guiquēnē ēñēedāni. Godōmenque picænāni nāni āninō ēñēninque edæ Ao ante cædāni. Ayæ gānē entawente pōnēninque, Ōnōmōnique bai mōnitō īmōnipa, ante pōnēninque wacā nānō āninō ante ēñēninque Ao ante cæedāni. Edæ iīmaī ante yewæmōnte ongōmpa.

“Nāmanque ante, Mōnitō gomōnga waa cæmōni īmōnipa, ante nē pōnēnāni inānite edæ Wængonguī Baa angōmpa. Wæætē edæ, Mōnitō ōnōmōnique bai īmōnipa, ante nē ānāni inānite tōmengā pōnō waadete cæcampa.”

⁶Ante yewæmōngatimpa cæmīni. Iīncayæ ate eyepæ pōni bayōnte Wængonguī incæ mōnitō īmōnite ængō cæcā ongoncæmōnimpa, ante cædinque mīnitō ñōwo iñōmō nē tæi piñængā ōnōnempo ongōninque nāmā ængō cædāmaī iedāni. ⁷Codito mōnō imōnte waadete pōnente cæcampa, ante ēñente wædinque mīnitō guīñente mīni wædō ante tōmengā wo cæmīni mongængā ate mīnitō guīñēnāmaī ininque wæætē guēmancæmīnimpa.

⁸Nāmā incæ edæ wææ aedāni. Wēnæidi awēnē iñōmō edæ mēñebo nē piinte angā bai inongā inte, Æcānō ingante ecate cænguīmoo, ante nē piinte cædongā inte awēmō diqui diqui mingōmpa cæmīni. Ee aedāni. ⁹Mīnitō caate wæmīni incæte, Mōnō tōniñadāni inguipoga tōmāmæ quēwēninque adobai edæ caate wædānipa, ante do ēñēmīni inte Codito ingante wede pōnēninque adiyæ næ gongæninque wēnæ awēnē ingante cōwē Baa æedāni. ¹⁰Mānōmaī cædinque wantæ iñō caate wæmīni ate Wængonguī nē waadete pōnō cædongā inte mīnitō imīnite pōnō cæcā ate edæ ganca bacæmīnimpa. Ayæ godōmenque pōnō cædinque tōmengā mīnitō imīnite pōnō tæi gōnongā ate mīnitō tæi piñænte entawēninque wæntædāmaī inte edæ cōwē tæi ongoncæmīnimpa. Tōmengā adocā iñōmō ñāō bai cōwē emōnongā inte mīnitō imīnite aa pedinque, Mīnitō Codito nempo nē quēwēnōmīni inte botō ñāō emōnte ongōñōmō pō guīite quēwēedāni, angacāimpa. ¹¹Tōmengā iñōmō cōwē tæi emōninque nē nanguī cædongā ingōmpa, ante mōnō pedænguipoga quēwēmō incæ iīncayæ ponte mīnguipoga quēwēmō incæ cōwē watapæ pōni apænecæimpa. Mānōmaī baquinō anguēnē, ante botō, Amēē, āmōpa.

Waa quēwencæmīnimpa, ante

¹²Botō tōniñacā bai inongā inte Tidibānō iñōmō cōwē pōnēninque ædæmō cæcā ingōmpa, ante adinque botō tōmengā tōnō godongāmæ cædinque, Mīnitō acæmīnimpa, ante cadota ante ocanta yewæmōmōpa. Iī cadota adinque mīnitō ganca pōnēninque nanguī cæcæmīnimpa, ante cædinque botō Pegodobo iñōmō, Wængonguī nāwangā mānōmaī pōnō waadete cæcampa, ante yewæmōmōpa cæmīni. Tōmengā nānō waadete cædonque ante entawēninque edæ mīnitō adiyæ tæi gongænte ongōedāni, āmōpa.

¹³Mīnitō imīnite apænte æninque Codito iñōmō Babidōnia iñōmō tōmengā ingante nāni godongāmæ pōnencabo inānite adobai apænte ængacāimpa. Tōmēnāni iñōmō mīnitō imīnite, Waa quēwencæmīnimpa, ante apænedānipa. Botō wengā bai inongā inte Māadoco adobai, Waa quēwencæmīnimpa, angōmpa. ¹⁴Mīni pōnencabo adobai godongāmæ waadete pōnēninque, Wængonguī bitō imite waa cæcæcāimpa, ante wacā ingā wacā ingā apæneedāni.

Codito nempo quēwēmīni inte tōmāmīni gānē pōnente quēwencæmīnimpa, ante botō Pegodobo imo yewæmōmōpa.

2 Pegodo

cadota ante nänö aycenta yewcëmongainta

Wængonguī mīnitō īminite waa cæcæcäimpa, ante

1 Botō Timönō Pegodo īnōmo inte Itota Codito ingante nē cædōmō īñōmote tōmengä botō imote da godongä godinque botō tōmengä beyæ nē apænebo bagaboimpa. Mönō Wængonguī inongä inte Itota Codito īñōmō mönō imonte, Quëwencæminimpa, ante nē Ængaingä ingampa. Tōmengä īñōmō mōnitō imōnite pōnō cædinque, Mīni wede pōnēnō ante waa pōni entawencæminimpa, ante pōnongä ænimōni inte entawēmōnīpa. Ayæ adobaī tōmengä nē nō pōni cædongä inte mīnitō imīnite pōnongä æninque mīnitō mōnitō entawēnō bai ado mīni wede pōnēnō ante edæ waa pōni entawēmīnīpa. Īninque mīnitō imīnite botō, Acæminimpa, ante yewæmōmopa. ²Mīnitō Wængonguī ingante pōnēninque Itota Codito mönō Awēnē ingante adobaī pōnēninque tōmēna īnate edæ ate bai pōnencæminimpa, ämopa. Ayæ tōmēna godōmenque pōnō cæda ate mīnitō tōmēna nāna gänē pōnēnō ante edæ eyepæ pōni entawencæminimpa, ante botō yewæmōmopa.

Codito nänō nē ēmīñæmō inte mönō īīmaī entawēmōmpa

³Itota Codito īñōmō, Nē waa cæbo inte botō nāō ēmōmo īñōmote pōedāni, ante mönō imonte do aa pecä pōmōmpa. Mänōmaī Itota Codito weca pōñōmōnte tōmengä Wængonguī nänō tæi pīñæmāmo entawēnongä inte, Quëwēedāni, āninque eyepæ pōnō cæcä ænte quëwēninque mönō tōmengä awınca ate bai pōnēninque tōmengä nänō waa cædō bai edæ adobaī mönō waa cæmō bamōmpa. ⁴Tōmengä nē waa cædongä inte edæ nāō bai ēmōninque, Botō godōmenque nanguī cædinque waa pōni edæ pōnō cæcæboimpa, ante edæ wæætē wæætē angacäimpa. Īninque mīnitō īñōmō tōmengä nänō angäinō ante wede pōnēñōmīnite Wængonguī tōmengä nänō entawēnō pōnongä æninque mīnitō Wængonguī nänō entawēnō bai adobaī entawencæminimpa. Ayæ mānīne ante wede pōnēninque mīnitō inguipoga quëwēninque wēnæ wēnæ mönō cæinente wægäinō ante, Ñōmænte bacæ wæ, ante wædinque Baa ante edæ aamō cæcæminimpa.

⁵Codito mänōmaī pōnō cæcä beyæ mīnitō wede pōnēmīni inte nē waa cæmīni bacæte ante cōwē edæ pæ pagænte cæedāni. Ayæ wææ nē waa cæmīni badinque Æbänō cæte nō cæquīi, ante ēñēmīni bacæte ante nanguī cæedāni. ⁶Ayæ wææ mänōmainō ante mīnitō nē ēñēmīni badinque godōmenque nanguī cædinque nāmā wææ aamīni bacæte ante cæedāni. Ayæ wææ nāmā wææ aamīni badinque wæætē nē wæntædāmaī inte ee cæmīni bacæte ante cæedāni. Ayæ wææ nē wæntædāmaī inte ee cæmīni badinque mīnitō wæætē Wængonguī nänō ante entawēnō bai entawēninque tōmengä nänō cædō cæte quëwencæte ante cæedāni. ⁷Ayæ wææ Wængonguī nänō cædō bai cæte quëwēmīni badinque mīnitō ayæ, Mönō caipæ, ante godongämæ mīni waa cæcabo bacæte ante cæedāni. Ayæ wææ mīni godongämæ waa cæcabo bamīni inte mīnitō ayæ waodāni tōmānāni inānite waadete pōnēninque godō waa cæmīni bacæte ante cæedāni.

⁸Mänömaï wede pönëninque tæï ongöninque waadete pönëninque Wængongui nänö cædö ante godömenque godömenque entawente cæmini ininque minitö mönö Awënë Itota Codito ingante ate bai në pönëmini inte edæ tömengä beyæ mini cæquënönö ante oda cæte wädämaï imaiminipa. Wæætë edæ awæ nanguï inca bai minitö adobai mini cæquënönö ante do cæcæminimpa. ⁹Wæætë mäninö tömänö ante entawënämaï ingä guiquënë tömengä möwoyata bai ëmönongä inte ingui-pogaque waa adinque öönædë iñömö gobæ i ædö cæte aquingäa. Tömengä nänö wënæ wënæ cægainö nã do mënongate impa, ante pönënämaï inte önonque quëwengampa. ¹⁰Iñänäni ëñeedäni. Wængongui minitö iminite do apænte æninque aa pegacäimpa cæminii. Minitö, Wængongui nänö änönonque ante ëñente entawëninque mönö cöwë tæï gongænte ongongäimpa, ante nanguï cæedäni. Edæ mänö-mainonque ante cæmini inte minitö oda cædämaï inte tæï ongoncæminimpa. ¹¹Ayæ iincayæ ate nãne wæmini ate mönö Awënë Odeye Itota Codito iñömö minitö iminite ææntodongä goyöminite tömengä, Pö guidäni, ante watapæ æmæwo mangucä guite cöwë quëwencæminimpa.

¹²Minitö mäninö ante do ëñëninque mini nö pöni ëñönö ante ædæmö entawente tæï ongömini incæte botö, Godömenque cöwë pönencæminimpa, ante cædinque adodö adodö ante apænebo ëñencæminimpa. ¹³Edæ botö, Minitö oda cædämaï inte cöwë pönencæminimpa, ante cædinque botö baonga botö quëwenganca wæætë wæætë apænedinque nö cæte apænebopa, ante pönëmopa. ¹⁴Edæ mönö Awënë Itota Codito botö imote edonque apænedinque, Bitö oo pöni wæninque botö weca ææ poncæbiimpa, angacäimpa. ¹⁵Angä ëñengäimo inte botö, Nöwo botö yewæmöninö ante adinque entawëmini inte minitö iñömö botö gobo ate cöwë pönencæminimpa, ante cædinque nöwo incæ tæï piñæninque nanguï cæcæboimpa.

Itota Codito Tæiyæ Awënë nänö ëmönö atamönipa

¹⁶Mönö Awënë Itota Codito iñömö tæï piñængä ingä inte oo poncæcäimpa, ante minitö iminite apænedinque mönitö dicæ wadäni nãni mä apænewönö ante apænetamöniyaa. Wæætë edæ, Tömengä në Awënë inongä inte mönö Tæiyæ Awënë nänö ëmönö incæ ëmongampa, ante në agaimöni inte mönitö, Nawangä agamönimpa, ante apænemöni ëñëminitapa. ¹⁷Edæ Awënë nänö nãö apäite bai ongöñömö ongonte apænedinque Mæmpo Wængongui incæ, “Iingä botö Wengä inongä inte botö në waadecä ingampa. Tömengä ingante adinque botö waa tobopa,” ante apænegacäimpa. Ayæ Itota ingante waa adinque tömengä në nãö ëmongä ingante odömongä agamönipa. ¹⁸Änanquidi tömengä tæiyæ waëmö ëmonte nänö ongöñömö godongämæ ongöninque mönitö mäninö ante Wængongui öönædë tedecä ëñentamönipa.

¹⁹Wængongui beyæ në apænëgainäni nãni yewæmongainö bai mönitö adobai edonque agaimöni inte, Nawangä iñonte yewæmongadänimpa, ante apænemöni ëñenguënëmini iminipa. Mäninö nãni angainö wëmö iñömö nãö apäite tica ënente bai i apa quëwëminii. Oque pönente iñonte, Wadaamö æængäimpa, ante wänö cönäni bai minitö adobai mini nãö entawenguinque ante Itota Codito nänö ponguïönæ ante edæ wänö cöninque wede pönëmini ininque waa imaimpa. ²⁰Iñänäni ëñeedäni. Dodäni Wængongui beyæ në apænëgainäni incæ, Wængongui æbänö ante apænecä ëñente yewæmonguimoo, ante pönëninque dicæ mä pönëninque adodeque incæ yewæmongadäniyaa. ²¹Wii nãmanque pönëninque yewæmon-

gadānīmpa. Wæætē Wængonguī Tæiyæ Waēmō Ōnōwoca nempo quēwēñōnānite tōmengā pōnō apānecā ēñēnīnque Wængonguī nānō apānedonque ante apānegadānīmpa, ante āmo ēñēmaīmīnīpa.

Nē babæ odōmonte apānedāni iīmaī cædānīpa, ante

2 Doyedē pancadāniya, Wængonguī beyæ apānebopa, ānīnque babæ apānegadānīmpa. Nōwo iñōmō wadāni adobaī awēmō cædinque, Mīni cabo oda cæte ēwente wæcāmīnīpa, ante cædinque babæ ante odōmonte apānequīnāni mīnitō weca do ongōnānīpa. Mōnō Tæiyæ Awēnē incæ tōmēnāni inānite āncæte ante nāmā wepæ nē godongaingā iñongante tōmēnāni wæætē nāni quingæ ōmæe ēwenguīnque edæ Baa ānānīpa cāmīnī. ² Pancāmīniya nangūī iīmīni incæ mīni guīfente wæquinque tōmēnāni nāni wentamō mongænte goquīnō incæ tee empote goquīmīni iīmīnīpa, ante awædō. Mānīnō godīnque mōnō nōingā ēñēnōnō ante pīinte cæyōmīni wadāni adobaī mānīī taadō nōinō iñonte godō babæ ānīnque wēnæ wēnæ ānāni baquīnānīmpa, ante awædō. ³ Nē babæ odōmonte apānedāni iñōmō mīnitō māincoo ante ō āinēwente wæwēnāni inte nāmāneque nāni pōnēwēnō ante tededāni ēñēnīnque mīnitō do oda cæyōmīnīte tōmēnāni wæætē ō āmainānīpa, ante awædō. Mōnō nē pangā ōnōcadopo do ongongaināni inānīpa. Mōnō nē pangā iñōmō, Ōo nāni ēwenguīnque mānōmaī cædānīpa, ante apāente āncæte ante pīīnīnque edæ mōwo mōnāmaī mīingā inte a ongongampa.

⁴ Anquedoidi incæ ēñēnāmaī cædāni ate Wængonguī ata cæpodāmaī ingacāīmpa. Wæætē, Tōmēnāni nāni apāente tente wæquinganca ontatodē wēmō mæ māmonte baī iñōmō guī tee mōnete ongōncædānīmpa, ante cædinque tōmengā angā ēñēnte tōmēnāni nāni owogaīñōmō tadōmengadæ pōnī dobæ go guīgadānīmpa. ⁵ Ayæ doyedē tōmengā nānō nē badongaināni inguīpoga quēwēñōnānite Wængonguī tōmēnāni inānite ata cæpodāmaī inte angā ate nē ēñēnāmaī ināni iñōmō edæ æpæmpo bete wængadānīmpa. Wæætē Nōwee wodi Docā nāni ānongā guīquēnē, Mōnō nō cæte quēwengæīmpa, ante nē apānegaingā iñongante Wængonguī tōmengā tōnō tiæte ganca ināni mānīmpodānīque inānite wææ aacā quēwengadānīmpa. ⁶ Ayæ, Todōmā tōnō Gōmoda iñōmō quēwēnāni inānite, Mīni apāente wido cæquinque, ante tōmēnāni quēwēñōmō iya tānīnque wido cæcā gōnaīboque bate contagatīmpa. Mānōmaī cædinque Wængonguī, Botō īmote ēñēnāmaī iīmīni mīni adobaī tente wæquinque cāmīnīpa, ante wadāni inānite odōmoncæte ante cægacāīmpa. ⁷ Ayæ ēñēnāmaī inte cædāni baonque towente quēwēnāni adīnque Dooto wodi iñōmō nē nō cægainānte, Wentamō pōnī mongænte quēwēnāni awædō, ante wædongā inte adoyōmō quēwēñōngante Wængonguī tōmengā ingante tōō āmænte ō ængā beyænque quēwengacāīmpa.

⁸ Tōmengā waa cæquinque nō entawēnongā inte tōmēnāni weca quēwente ayongā iīmō iñō iīmō iñō ēñēnāmaī cædāni adīnque tōmengā, Ancaa ate awædō, Ancaa ēñēnte awædō, ante wæwēñōngante Wængonguī tōmengā ingante do ō ængā beyænque quēwengacāīmpa. ⁹ Mānōmaī cædinque Wængonguī, Botō mīñæ nē pōnāni caate wædāni adīnque botō do ēñēnte cædinque āmo ate quēwēnānīpa. Wæætē wīwa cædāni inānite botō apāente angūiōnæ ganca mō ongōnte baī mānīnque nōwo incæ wæætē wæætē pāmo wædānīpa, ante Wængonguī cæcampa. Inīnque, Nō ēñēnte Wængonguī cæcampa, ante mōnō edonque ēñengæīmpa. ¹⁰ Mānīī babæ ante nē odōmonte apānewēnāni iñōmō tōmēnāni baonque ante towēinente

nāni entawēmāmo ante nē cādāni inōnāni inte edæ awēnēidi inānite, Wīi ēñēinē wædō, ante pīnānīpa. Mānōmāinō ante nē pīinte ānāni inānite godōmenque pancæte ante Wængonguī mō ongonte bai mangampa. Tömēnāni inōmō nāmā ængō cædinque guiñēnedāmaī inte edæ nē ñāō entawente tæi ēmōnāni inānite godō wēnæ wēnæ apænedinque edæ babæ ante tedewēnānīpa. ¹¹ Ināmpa anquedoidi tæi pīñānāni inte godōmenque ñāñānāni inōnāni incæ Wængonguī ayongante guiñēnete wædinque nē ñāō entawente tæi ēmōnāni inānite pīinte apænte ānāmaī inānīpa.

¹² Nē babæ ante odōmōnāni guiquēnē tömēnāni nāni nē adāmaī inō ante mā pōnēninque wēnæ wēnæ apænedinque babæ ante tedewēnānīpa. Babæidi òmæwocādāni inte nāni togænte ecate ēwenguinque ònonque pōni cægōnāni bai nē babæ odōmōnāni inōmō edæ adobaī ēñēnāmaī ināni inte tömēnāni nāni wænguinque babæ cædinque quingāmē bai quēwēnānīpa. ¹³ Tömēnāni wādāni inānite godō wīwa cādāni ininque ināni wæætē nāemæ godō cādāni wæcādānīmpa. Tömēnāni inōmō, Itædē incæ mōnō baonque pōnente towengæimpa, ante cādānīpa. Mīnitō waadete pōnēninque godongāmæ cæñōmīni tömēnāni adoyōmō pōninque cæowæo incædō beowæo incædō inte cæyōnāni wentamō nāni mongænō beyænque mīni cabo wæætē baate bai ēñāmīni badinque wentamō tæ encaā tæ encaā ēmonte bamīni awædō.

¹⁴ Wacā onquiyængā awinca adinque cōwē godō towēinente wædāni inte tömēnāni inōmō ñimpo cædāmaī cōwē wīwa cæinente wædānīpa. Wacā aquī pīñānāmaī ingā adinque tömēnāni, Mōnitō tōnō godongāmæ ponte wēnæ wēnæ cæcæcāimpa, ante cædinque godō waa cæte bai babæ cādānīpa. Botō quī botō quī, ante nē æinente wædāni inōnānite Wængonguī inōmō, Tömēnāni nāni wæwocaincabo inānīpa, ante pīinte angampa. ¹⁵ Taadō tōinō oda cædinque edæ docā Beodo wodi wengā Badāo wodi miñæ tömēnāni tee empote godānīpa. Tömēngā Badāo inōmō, Nō cædāmaī imo incæte botō māincooque ænte tobote, ante bai cægacāimpa. ¹⁶ Tömēngā Wængonguī beyæ nē apæneccā incæ ocai òmæcacā bai inte wapiticæ ēñēnāmaī cæyongante babetadecā iningā incæ bodo incæ inñontobæ wao bai tededinque Badāo ingante wææ angacāimpa.

¹⁷ Māniī nōwodāni nē babæ odōmōnāni inōmō æpæ taquēñēñōmō æpæ dæ ā bai edæ ònōnāni que inte odōmōnānīpa. Boguīmancoo wīni cai mongænte ònonque ænte poncoo bai tömēnāni adobaī ināni inte ònonque cādānīpa. Mānōmaī cādāni beyæ Wængonguī, Tömēnāni nāni ongonte wæquiñōmō, ante mæ māmōnte bai inōmō badongacāimpa.

¹⁸ Edæ tömēnāni ogæ tededinque, Botō godōmenque waa pōni cæbo aedāni, ante ònonquedō ante tedewēnānīpa. Wādāni wapiticæ cæte quēwēnāni nempo adocanque wodo aamō cæyongante māniñāni nē babæ odōmōnāni inōmō, Bitō mōnitō miñæ wæætē pōninque baonque bitō cæinēwēnō ante guiñēñadāmaī inte cæte tocæbiimpa, ante waa cæte bai godō babæ cādānīpa. ¹⁹ Mīni ædæmō aamō cæte mōnedāmaī quēwenguinque mōnitō miñæ pōedāni, ante babæ ānewēnānīpa. Incæte nē babæ odōmōnāni incæ tömēnāni nāni wīwa cædonque beyænque cæte quēwēnāni beyænque nāemæ ñā cæyænte bai inte wædānīpa. Edæ quiēmenque ante waocā ēñente cæcāā tömēngā māniñō nānō ēñente cædō beyænque nē cæte quēwēnongā inte nāemæ ñāō cæyænte bai inte wæcampa.

²⁰ Inguipoga ñōmænguēñēmāmo beyæ tee mōnete bai quēwēniñāni inte tömēnāni mōnō Awēñē Itota Codito mōnō imonte nē Ængaingā ingante do ate bai pōnēn-

inque edæ abæ tawænāni inānitapa. Mānōmaī abæ tawænte godināni inte tōmēnāni inguipoga ante nāni cæinente wæpāmo beyænque wæætē adodō go goyo cæte ægodawate tæ wææntodonte baī wædāni ininque tōmēnāni godōmenque nāni wēnæ wēnæ wæwenguinque imaimpa. ²¹Nōinō taadō do adināni inte tōmēnāni nāni godōmenque wæwenguinque emō cæte godānīpa. Wængonguī tæiyæ wæmō nānō wææ angainō ante odōmōnāni nāni do ēñēninō ante Baa ante wadæ godāni inōmō godōmenque wēnæ wēnæ nāni wæquinque impa. Ininque māninō taadō ante tōmēnāni cōwē adāmaī ināni inte baī tōmēnāni beyæ godōmenque waa incædōn-impā. ²²Tōmēnāni nōinō taadō emō cæte godināni nāni cædō baī ante iimainō ante nāwangā ante badete todānīpa. “Guinta awæ wēningā adodō cængampa. Odæ wængānā inōmō æpæ pantate ate onguipoipæ wēango wēango nangampa.”

Mönō Awēnē wæætē adodō poncæcāimpa, ante

3 Botō nē waadedōmini ēñēdāni. Minitō mōwo mōnāmaī inte nōingā ante pōnencæminimpa, ante botō, Mānōmaī impa, ante mentaa yewæmōninque adodō adodō ante yewæmōmo aedāni. ²Tæiyæ wæmō entawēnāni Wængonguī beyæ ante apænedinque nāni yewæmongainō ante nē adimini inte minitō wæætē pōnencæmin-impā, ante cæbopa. Mönō Awēnē mōnō imonte nē Ængaingā inte adobaī ante wææ angacāimpa. Tōmengā nānō da godongaimōni inōmō tōmengā nānō wææ angainō ante apænemōni ēñēmīni inte minitō wæætē adodō ante pōnencæminimpa, ante cædinque yewæmōmopa.

³Iīmaī ante tāno apænebo ēñencæminimpa. Mönō waocabo inguipoga mōnō quēwēmāmo wodo iinque bayonte nē badete todāni cōwē poncædānimpā. Pōninque tōmēnāni badete todinque nāmā nāni wēnæ wēnæ cæinēnō ante edæ do cæquināni inānīpa. ⁴Tōmēnāni iīmaī ante badete tocædānimpā. “Codito nānō ponguinque impa, ante wædānitedō abi. Ināmpa Wængonguī nānō badongāñedē inguipo nānō cægāi baī mæmæidi wodi wænte godāni ate nōwo ganca adobaī inte cæ apa guīñēwēmīni,” ante badete toquināni inte poncædānimpā. Apænebo ēñēdāni. ⁵Wængonguī ināmpa adodeque angā beyænque oōnædē owocoo edæ do bagatimpā. Adodeque angā beyænque onguipo æpæ tæcæpæno odæ yate ongōñonte tōmengā æpæ tōnō badongā ongompa. Mānōmaī impa, ante edonque i incæte tōmēnāni, Mönō Baa angæimpa, ante beyænque adāmaī inte baī pōnēnāmaī inānīpa. ⁶Ado æpæ inguipoga mæ ä beyænque Nōwee wodi quēwengāñedē māninguipo nānō ingāi dæ badinque waguipo baī bagatimpā, ante edæ nōwodāni inōmō adobaī pōnēnāmaī inānīpa. ⁷Ayæ adobaī Wængonguī adodeque angā beyænque oōnædē owocoo tōnō iinguipo nōwo mini cægonguipo edæ iya tanguinque ongompa. Tōmengā, Botō imote nē Baa ānāni inānite botō apænte pante wido cæquiōnæ ganca māniī oōnæ tōnō iinguipo ongompa, angampa.

⁸Botō nē waademīni edæ ēñēdāni. Mönō Awēnē ayongante adoōnæque incæ edæ, Miido ganca wadepo baī impa, ante acampa. Miido ganca wadepo inōnte mōnō Awēnē ayongante, Adoōnæque baī impa, ante acampa. Mānōmainō ante adodeque incæ minitō cōwē ēñente pōnēdāni, āmopa. ⁹Mönō Awēnē, Cōwē pōnō cæbo æncæminimpa, ante nānō angainō ante pancadāniya, Æiquedō mōnō Awēnē cæquingā, ante wædānīpa. Mönō Awēnē ināmpa wīi wæntæye ingampa. Wæætē, Adocanque wænāmaī incæcāimpa. Wæætē tōmānāni, Idæwaa wēnæ wēnæ cæte awædō, ante botō gāmænō poncædānimpā, ante cædinque tōmengā māninō

beyænque ee cædāmaī ingampa. Īninqe tōmengā, Mīnitō wæætē botō gāmæñō æiquedō ponguīmīnī, ante wānō cōninqe edæ ee pōnāmaī ingampa.

¹⁰Incæte nē awēmō ò ængā ĩñontobæ nānō pōmaī mōnō Awēnē nānō poncæ cæōnæ ĩñōmō adobaī ĩñontobæ ponguīnō anguēnē. Nanguī tæi tæi tēninqe òōnædē owocoo incæ ĩñontobæ dæ goquīnō anguēnē. Gongā nāni angā nanguī pōnī bæco ĩninqe edæ Wængonguī nānō badongaincoo tōmancoo edæ aca podinqe edæ ewente bacæimpa. Inguipoga tōmāo ongoncoo dæ ba ĩninqe inguipo òñōmæca pōnī baquīnō anguēnē. ¹¹Tōmancoo edæ mānōmaī ewenguincooqwe impa, ante adinqe edæ mīnitō ĩñōmō, Æbānō quēwenguī, ante pōnēmīni. Wængonguī nānō cædō baī cōwē cædinque tæiyæ waēmō quēwenguēnēmō ĩmōmpa. ¹²Wængonguī nānō ponguīōnæ ĩñōmō edæ æyedēnō ponguī, ante wānō cōninqe, Quingæ pōnī pongæimpa, ante mōnō nanguī cæcæimpa. Māniōnæ ĩñonte edæ òōnæ incæ gongā bæcote ewente bayonte Wængonguī nānō badongaincoo incæ nanguī ocoi āninqe tōmancoo aca podinqe ewente baquīnō anguēnē. ¹³Picæōnæ tōnō pedænguipo òmæe ewēninqe Wængonguī wæætē, Botō mīiōnæque tōnō mīinguipoque pōnō badoncæboimpa, ante nānō angainō baī do badoncæcæimpa. Īninqe mōnō ĩñōmō, Mīiōnæ tōnō mīinguipo ĩñōmō mōnō nō pōnī cæte quēwengæimpa, ante nanguī ānente wæmōmpa.

¹⁴Botō nē waadedōmīni ēñēedāni. Mānōmaī bacæimpa, ante nē ānente wæmīni ĩnte mīnitō ĩñōmō edæ, Mōnō māniñedē wentamō entawēnāmaī ĩmō adinqe Wængonguī pīnāmaī incæcæimpa, ante nanguī cædinque edæ nāmā wææ aadedāni. Ayæ tōmengā, Botō ayōmo waēmō ewocamīni ĩninqe edæ mōnō godongāmæ piyænē cæte quēwengæimpa, ante pōnō cæcæcæimpa, ante edæ nanguī cæedāni. ¹⁵Mōnō quēwenguinque ante mōnō Awēnē edæ ee ongonte pōnāmaī ingampa, ante pōnēedāni. Wængonguī pōnō cæcā ate ocai nē encacā bate pōnēninqe mōnō tōniñacā Pabodo mōnō nē waadecā ĩnte adobainō ante mīnitō ĩmīnite edæ, Acæmīnīmpa, ante yewæmongantapa. ¹⁶Wængonguī mōnō quēwenguinque ante ee pōnāmaī ingampa, ante cadota ante yewæmōninqe Pabodo adobainō ante edæ cōwē yewæmongampa. Tōmengā nānō yewæmōninta pancataa wīi edonque ĩ adinqe nē ēñēnāmaī ĩnāni tōnō aquīi pīñænāmaī ĩnāni ĩñōmō edæ oda cædinque wapiticæ odōmōnānīpa. Tōmēnāni edæ Wængonguī angā ēñente nāni yewæmongainta tōmantaa adobaī adinqe tōmēnāni nāni æmæwo ewenguinque edæ wapiticæ odōmōnānīpa.

¹⁷Botō nē waademīni ēñēedāni. Mānōmaī impa, ante do ēñēmīni ĩñōmīnite Wængonguī nānō wææ angainō ante ēñēnāmaī cædāni ĩnāni guiquēnē mīnitō ĩmīnite tōō æmante wapiticæ ænte gocæ cædāni ate wædinque mīnitō wæætē tōmēnāni mīñæ godāmaī ĩedāni. Wæætē edæ Tæiyæ Awēnē nempo quēwēmīni ĩnte, Tæi gowæænāmaī incæboimpa, ante nāmā wææ aadedāni. ¹⁸Mōnō Tæiyæ Awēnē Itota Codito ængā beyænque mōnō quēwēmōmpa. Īninqe tōmengā waadete pōnō cæcā ate mīnitō tōmengā ingante ate baī pōnēninqe wadāni ĩnānite godōmenque waadete godō cæmīni baedāni. Tōmengā ĩñōmō edæ ñōwopāmo ĩñonte wapāmo mīimāmo ĩñonte edæ cōwē tæi emongā ĩnongā ĩnte ñāō apāite baī emongampa, ante adinqe mōnō ñīmpo cædāmaī ĩnte tōmengā ingante cōwē waa acæimpa. Mānōmaī baquīnō anguēnē, ante botō, Amēē, āmōpa.

1 Wäö

cadota ante nänö tänota yewämongainta

Mini quëwenguinö ante në pönongä

1 Æcänö wëenënedë Wængonguï nänö badongäinödë do ingacäimpa, ante mäninö ante apänemönipa. Wængonguï nänö Angainö ante në ëmongaingä inömö Itota adocä, Mini quëwenguinö ante në pönongä ingacäimpa. Mönitö inömö mäningä apänecä ëñëningue tömengä ingante awinca inte në adimöni imönipa. Adocä ingante cöwä adinque mönitö tömengä ingante në gampodimöni imönipa. Ininque möni në ëñëningä ingante ante, awinca inte möni në adingä ingante ante, möni në cöwä adingä ingante ante, möni në gampodingä ingantedö ante apänemönipa. ²Edæ Itota në quëwengaingä inömö edonque pöni a ongoncäimpa. Mönitö tömengä ingante në adimöni imönipa. Mäningä ingante ante, Näwangä quëwengaingä ingampa, ante apänemöni imönipa. Ayæ mönö Mæmpo Wængonguï tönö guëa cöwë quëwengaingä inömö tömengä mönö weca ponte a ongoncä atamönipa. Ininque minitö iminite mäningä ingante ante apänemöni ëñencæminimpa. ³Ayæ mönö Mæmpo Wængonguï tönö tömengä Wengä onguinængä Itota Codito tönö mönitö godongämæ cæmöni imönipa. Ininque, Minitö adobai mönitö tönö godongämæ cæcæminimpa, ante cædinque mönitö möni në adingä ingante ante, möni në ëñëningä ingante ante minitö iminite apänemöni ëñencæminimpa. ⁴Mönö eyepæ watapæ toquinque ante mäninö ante minitö iminite yewämömönipa.

Wængonguï nãö apäite bai inongä ingampa

⁵Tömengä nänö angainö möni ëñëninö æbänö i, ante mönitö iimaï ante minitö iminite apänemöni ëñencæminimpa. Wængonguï nãö apäite bai inongä ingampa. Ininque tömengä wentamö nänö entawënö edæ dæ ampa. ⁶Wentamö inömö në cægömö ininque mönö, Tömengä tönö godongämæ cæmönipa, ante ämö ininque mönö edæ në babæ ämö imaïmompä töö. Ayæ mänömaï cæmö ininque mönö, Quinö nöingä impa, ante cædämaï imaïmompä. ⁷Wængonguï nãö apäiyömö mäninömö ongoncä bai mönö adobai nãö inömö cægömö ininque mönö wacä ingä wacä ingä godongämæ cæbaimompä. Ayæ nãö inömö cægömö ininque mönö wënæ wënæ cægäinö tömäädinque tömengä Wengä Itota nämä wepæ inte mönö imonte mënongacä ate mënongacä imaimompä.

⁸Mönö, Botö wënæ wënæ cæpämö dæ ampa, ante ämö ininque mönö nämä inçæ oda cæte wapiticæ go bai cæbaimompä. Ayæ mänömaï äninque mönö, Quinö nöingä i, ante ewocädämaï quëwëmaïmompä töö. ⁹Wæætë edæ Wængonguï mönö imonte cöwë pönëningue në ædæmö cæcä inongä ingampa. Ayæ në nö cæcä inongante mönö tömengä ingante, Botö nämä wënæ wënæ cædimö inte awædö, ante ämö ëñëningue tömengä wæætë piinämaï inte mönö imonte pönö nimpö cæcä quëwencæmöimpa. Ayæ wiwa mönö cæte quëwënö tömäädinque tömengä wæætë mönö imonte mënongacæcäimpa. ¹⁰Mönö, Botö cöwë wënæ wënæ cædämaï ingäimo imopa, ante ämö ininque Wængonguï ingantedö ante, Babæ änoncä ingänö,

ante ämaimompa. Ayæ mänömaï ämö ininque tömengä nänö angainö ewocadämaï quëwëmaimompa töö.

Mönö Codito wææ angä beyænque mönö quëwenguinque

2 Botö wëñämïni bai imïni ëñeedäni. Mïnitö wënæ wënæ cædämaï incæmïnimpa, ante iïmaï ante cædinque yewæmömopa. Incæte adocanque wënæ wënæ cæcantawo. Tömengä beyæ wacä, Mæmpo Wængongui pänämaï incæcäimpa, ante mönö në wææ ängongä incæ mæ ongongampa. Mäningä iñömö në Nö Cæcä inongä inte Itota Codito inongä ingampa. ² Ayæ idægoidi, Mönö wënæ wënæ cægainö ante mönö imö Wængongui piïnämaï incæcäimpa, ante cædinque cæningä wænönäni nänö wængaï bai mäninganque adobaï mönö wënæ wënæ cægai beyæ wængacäimpa. Ayæ wïi önonque mönö wënæ wënæ cægai nonque beyænque wæætë tömämæ quëwënäni nani wënæ wënæ cægai beyæ adobaï wængacäimpa.

³ Mönö Wængongui ingaingä ingante ate bai pönëmöö, ante æbänö cæte ëñenguïi. Edæ, iïmaï cæedäni, ante Wængongui nänö wææ angainö ante ëñente cæmö ininque mönö edæ, Wængongui ingante ate bai në pönëmö imompa, ante do ædæmö ëñëmaimompa. ⁴ Waocä iñömö, Wængongui ingaingä ingante ate bai pönëmö imopa, ante në angä incæte tömengä Wængongui nänö, iïmaï cæedäni, ante wææ nänö angainö ante ëñënämaï cæcä ininque mäningä në babæ ängongä ingampa. Ayæ Wængongui nöingä nänö angainö ante ewocadämaï quëwengampa töö. ⁵ Wæætë, Wængongui nänö angainö ante æcänö ëñente cæda iñömö mäningä ingante Wængongui pönö cæcä beyænque tömengä Wængongui waadete nänö pönënö ante eyepæ entawente quëwengampa. Ininque Wængongui nänö angainö ante ëñente cæmö inte mönö, Tömengä nempo quëwëmö imompa, ante ædæmö ëñëmompa. ⁶ Ininque æcämenque, Botö tömengä nempo në quëwëmö imopa, ante në angä iñömö tömengä Itota nänö quëwente cægöni bai adobaï quëwente cægonguënë ingampa.

Itota, iïmaï cæedäni, ante ñöwo nänö wææ änö

⁷ Botö në waademini ëñeedäni. Mïnitö imïnite, iïmaï cæedäni, ante wïi botö tömëmö wææ änö ante ñöwo yewæmömopa. Wæætë Itota do nänö wææ angainö ante wëñëñedë mïni ëñente ængainö ante adodö ante yewæmömo aedäni. Iï tömengä do nänö wææ angainö iñömö mïnitö imïnite möni apænedö mïni ëñëninö impa. ⁸ Incæte mïnitö imïnite Itota, iïmaï cæedäni, ante ñöwo nänö wææ änö yewæmömopa. Tömengä tönö mïnitö quëwente cædinö beyænque, Mäninö nö pöni impa, ante edonque pöni acäimpa. Edæ mönö wëmö iñömö wodëmäa tæcæ bacæ cæyö nö ñäö iñömö tatodonte do apäite impa.

⁹ Botö ñäö iñömö quëwëmö imopa, ante në angä incæte tömengä nänö tönïñacä ingante në piingä ingä ininque tömengä wëmö iñömö ayæ quëwengampa. ¹⁰ Æcänö guiquënë nänö tönïñacä ingante në waadete pönengä tömengä ñäö iñömö në quëwengä ingampa. Tömengä ñäö iñömö quëwëninque quïëmë beyænque edæ tëwate goquingä. Edæ dæ ampa. ¹¹ Wæætë æcänö nänö tönïñacä ingante në piingä wëmö iñömö quëwengampa. Tömengä wëmö iñömö cægongä inte compocæ compocæ gocä ingampa. Wëmö iñömö quëwëninque babetamongä bagaingä inte tömengä ædönö gocä, ante ëñënämaï ingampa.

¹² Wëñämïni ëñeedäni. Edæ Itota Codito ëmöwo beyænque mïni wënæ wënæ cægainö ante ñimpo cæte quëwëmïni imïnipa, ante adinque botö mïnitö imïnite

yewämömpa. ¹³Mæmpomîni êñeedâni. Mînitö edæ, Wëenênedê nê ingaingä ingante do ate bai pönengaimîni imîni beyænque botö mînitö imînite yewämömpa. Onguiñämîni tæcæ pæmîni êñeedâni. Mînitö edæ godömenque tæi emöminî imîni inte wënæ awënë ingante Baa ante gänä cæmîni beyænque botö mînitö imînite yewämömpa. Wëñämîni êñeedâni. Mînitö edæ mönö Mæmpo Wængongui ingante do ate bai pönengaimîni imîni beyænque botö mînitö imînite yewämömpa.

¹⁴Mæmpomîni êñeedâni. Mînitö edæ wëenênedê nê ingaingä ingante do ate bai pönengaimîni imîni beyænque botö mînitö imînite yewämömpa. Onguiñämîni tæcæ pæmîni êñeedâni. Mînitö edæ tæi emöminî inte ayæ Wængongui nânö angainö cöwê ewocate quëwëmîni imînipa. Adobai mînitö edæ wënæ ingante godömenque tæi emöminî inte Baa ante gänä cæmînipa. Mänömaï beyæ botö mînitö imînite yewämömpa.

¹⁵Inguipogaque ante nâni quëwëmâmo ante waadete pönênâmaï iedâni. Inguipoga quëwënâni quiëmê wënæ wënæ nâni cæpâmo ante tömämâmo ante adobai waadete pönênâmaï iedâni. Ayæ æcänö iï inguipogaque ante nâni quëwëmâmo ante waadete pönente ina mäningä mönö Mæmpo Wængongui nânö waadete pönênö ewocadâmaï quëwengä ingampa. ¹⁶Iï inguipoga iñömö æbänö i, ante acæimpa. Edæ wënæ wënæ cædâni quiëmê beyæ nâni æinente wædö i, awinca inte adinque nâni æinente wædö i, ante wii mönö Mæmpo Wængongui pönö cæcä ate æinênânipa. Tömênâni, Mäincoo nanguï ëamöni imöni aedâni, ante cædânipa. Ayæ, Nanguï cæmöni aedâni, ante cædânipa. Incæte tömäâ mäniï nâni æinênö wii mönö Mæmpo Wængongui pönö cæcä ate æinente badânipa. Wæætê inguipoga iñömö nê mä cædâni inte quiëmê wënæ wënæ nâni cæpâmo ante adinque wadâni dobæ wënæ wënæ cæinênâni badânipa. ¹⁷Inguipoga mönö quëwëñömö incæ mäninguipogaque ante quëwënâni nâni cæinênö incæ oo pönî dæ baquinö anguënê. Wæætê waocä, Wængongui nânö angainö ante nê êñente cæcä inte wantæpiyæ wênâmaï quëwencæcäimpa.

Quinö nöingä ante impa, quinö babæ ante impa

¹⁸Wëñämîni êñeedâni. Iinque baquiönæ mönö äönæ oo batimpa. Mänïönæ iñonte Codito ingante wacä nê piinte cæcä iñömö, Botö Codito imopa, ante nê änewënongå ponguingä, ante êñemînitapa. Edæ mäninö mîni êñêninö bai ñowoönæ incæ nanguï inâni Codito ingante nê piinte cædâni iñömö, Botö Codito imopa, ante nê änewënonâni inte edæ do pönânitapa. Mänömaï i iinque edæ, Iinque baquiönæ do bapa, ante mönö êñengæimpa. ¹⁹Mäninâni iñömö mönö imonte emö cæte godânitapa. Incæte tömênâni wii nö mönö pönencabo adocabo inâmaï inânitapa. Edæ mönö pönencabo adocabodâni ininâni inte bai tömênâni edæ wadæ godâmaï inte mönö tönö ayæ a ongoncædönânimpa. Wæætê do godâni adinque mönö, Mäninâni tömânâni mönö cabo inâmaï inânitapa, ante edonque pönî acæimpa.

²⁰Edæ ogui wapæ gadoncadâni encadâni bai mönö Tæiyæ Waëmö inongä iñömö edæ tömengä Önöwoca ingante mînitonga angä pö guicä ate mînitö tömämîni tömengä ingante entawëninque, Quinö nö i, ante êñemînipa. ²¹Mînitö imînite yewämöninque botö dicæ, Mînitö, Quinö nö i, ante êñênâmaï imînipa, ante yewämömogaa. Wæætê edæ, Mînitö, Quinö nö i, ante êñemînipa, ante adinque botö mänömaï beyæ ante yewämömpa. Ayæ babæ nâni äninö tönö Wængongui nöingä nânö angainö tönö ædö cæte guëa inguinaa, ante êñemîni adinque botö

mänömaï beyæ ante yewæmömopa. ²² Babæ ante nê änewënongå æcänö ingantawo. Edæ Itota incæ wii mönö Codito ingaingä ingampa, ante nê angä iñömö tömengä nê babæ änewënongå ingampa. Mäningä wæætë, Botö Codito inömo imopa, ante Codito ingante nê piinte cæcä ingampa. Tömengä edæ mönö Mæmpo Wængongui tönö tömengä Wengä Itota Codito nana Mæmpocaya inate Baa angampa. ²³ Ii Wengä onguiñængä ingante Baa äninque, Itota incæ wii mönö Codito ingaingä ingampa, ante nê änanï iñömö ædö cæte Mæmpo Wængongui nempo quëwënonäni inguinäni. Wæætë tömengä Wengä ingante æcänö Ao äninque, Itota mönö Codito ingaingä ingampa, ante nê angä guiquënë tömengä Mæmpo Wængongui nempo nê quëwënongå ingampa.

²⁴ Minitö guiquënë, Quinö angainö, ante wënenëdë mini ëñengainö ante ñowo godömenque minitö mimönë entawente quëwëedäni. Mäninö ante godömenque entawëmini inte minitö Itota Codito tömengä Mæmpo Wængongui nana Mæmpocaya tömëna nempo cöwë quëwenguimini iminipa. ²⁵ Mönö imonte Wængongui, Cöwë cæcæboimpa, ante cædinque iïmaï angacäimpa. Minitö wantæpiyæ cöwë wänämaï quëwencæminimpa.

²⁶ Wadäni, Minitö incæ oda cæcæminimpa, ante nê cædäni iñönänite botö minitö iminite mäninö ante yewæmömopa. ²⁷ Codito tömengä Önöwoca ingante do pönongä ëwocaminipa. Tömengä ingante cöwë ëwocamini iñöminite wacä ædö cæte minitö iminite odömonte apænequingä. Tömengä Önöwoca incæ tömänö ante odömonte apæneçä ëñencæminimpa. Ayæ tömengä nänö odömonte apænedö iñömö nö pönï i iñinque edæ wii babæ äninö impa. Iñinque minitö tömengä mänömaï nänö odömonte apænedinö bai cædinque godömenque mönö Itota Codito nempo quëwëedäni.

²⁸ Mänömaï beyæ botö wëñæmïni bai imini ëñëedäni. Tömengä nempo godömenque quëwëedäni. Edæ, Tömengä pongä mönö aquiönæ mönö guññënamäi ingæimpa, ante cædinque ayæ, Tömengä ponguiönæ mönö tömengä weca ongöninque guingo imönämaï ingæimpa, ante cædinque godömenque tömengä nempo quëwëedäni. ²⁹ Edæ minitö, Itota Codito nö nänö cæte ingainö ante ëñëmini iñinque edæ minitö iïmaï ante adobai do ëñëmaïminipa. Quinö waa impa, ante nê cædönäni tömänäni mempoga ëñagainäni inte Wængongui wënäni inänipa.

Wængongui wënäni

3 Mönö Mæmpo Wængongui incæ æbänö mönö imonte nangui pönï nê waadete pönënongå inte cægacäimpa, ante apænebo ëñëedäni. Edæ mönö imonte, Botö wëmini imini ämopa, ante angacäimpa. Iñinque näwangä mänimönö imompa. Inguipogaque quëwënanï iñömö, Mönö Mæmpo Wængongui ingante wii adinque pönënamäi inänitapa. Mänömaï beyæ mönö imonte adobai adämaï inäni inte bai pönënamäi inänipa. ² Botö nê waademini ëñëedäni. Nöwoyedë Wængongui wëmö inömo inte mönö ayæ ate æbänö baquimöö, ante ayæ wii edonque amompa. Wæætë, tömengä nänö pöönæ mönö aquiönæ tömengä nänö ingai bai mönö adobai bacæimpa, ante ædæmö ëñëmompa. Edæ tömengä æbänö ingaingä ingää, ante mönö edonque acæimpa. ³ Edæ, Tömengä beyænque mänömaï bacæimpa, ante nê pönente todäni tömänäni, Itota Codito tæiyæ waëmö nänö ingai bai mönö adobai tæiyæ waëmö bacæimpa, ante nämä incæ cædänipa.

⁴Në wënæ wënæ cædäni tōmänäni Wængonguī nänö, ĩmaī cædäni, ante nāni yewæmongainö ante Baa ante në ëñënamai cædäni inänipa. Edæ wënæ wënæ nāni cægainö incæ Wængonguinque ingante Baa ante nāni angainö impa. Māninö ante nö ante impa. ⁵Minitö do ëñëminipa. Tömengä edæ mōnō wënæ wënæ cægainö ante mōnō imonte, Nīmpo cæbo quëwenguimīni, ante cæcæte ante cædinque ëñagacäimpa. Ayæ tōmengä wënæ wënæ cædō entawënämaingä ingampa. ⁶Ayæ edæ tōmengä nempo në quëwënönäni tōmänäni wīi godōmenque wënæ wënæ cædäni inänipa. Godōmenque në wënæ wënæ cædönäni guiquënë tōmengä ingante adāmai inönäni inte pōnënamai ĩninäni inänipa tōö. ⁷Wëñæmīni ëñëedäni. Wacä mīnitö iminite, Wapiticæ gote oda cæquimīni, ante në mäocæ cæcä ingante gomō aedäni. Wæætë, Quīnō waa impa, ante në cæcä guiquënë tōmengä Itota Codito nö nänö cæte ingai bai adobai nö cædongä inongampa. ⁸Në wënæ wënæ cæcä guiquënë wënæ päingä bai inte adocä nempo quëwengampa. Edæ wëñëñedë wënæ awënë nänö wënæ wënæ cægai bai cōwë wënæ wënæ cæcampa. Mänōmai beyæ Wængonguī Wengä ĩñōmō wënæ awënë nänö wënæ wënæ cægainö ante wo ewencæte ante inguipoga ponte ëñagacäimpa.

⁹Wængonguī wënäni tōmänäni wīi godōmenque wënæ wënæ cæquinäni inänipa. Edæ tōmēmō guīdimō bai minte bai cædinque Wængonguī nänö quëwënö ante da pōnongä æninque tōmënäni cōwë entawente quëwënänipa. Tōmënäni edæ Wængonguī wënäni inte ædō cæte godōmenque wënæ wënæ cæquinänii. ¹⁰Æcänō, Quīnō waa impa, ante nö cædāmai ĩnaa tōmengä wīi Wængonguī wengä ingampa. Ayæ æcänō tōmengä nänö tōniñacä ingante në waadete pōnënamai ĩnaa tōmengä adobai wīi Wængonguī wengä ingampa. Wængonguī wënäni ædānidō ĩnāni, ante ayæ, Wënæ wënäni ædānidō ĩnāni, ante mōnō mänōmai beyænque edonque pōni ëñëmōmpa.

Wacä ingä wacä ingä mōnō waadete pōnengäimpa, ante

¹¹Minitö mä mīni pōnëñedë mīni ëñengainö ĩmaī ante impa. Wacä ingä wacä ingä mōnō waadete pōnengäimpa. ¹²Minitö Cäinō wodi bai wīi ĩedäni. Māningä edæ wënæ nänö päingä bai ingaingä inte tōmengä nänö tōniñacä ingante näëmæ wænongä wængacäimpa. Ayæ quīnante tōmengä ingante wænongacäi. Edæ tōmengä nämä nänö cæinō wënæ wënæ cæinonque ĩñonte, Tömengä tōniñacä nänö cæinō wæætë nö cæinonque i, ante adinque mänōmai beyænque Cäinō wodi tōmengä nänö tōniñacä ingante wænongacäimpa.

¹³Botö tōniñamīni ëñëedäni. Inguipogaque quëwënäni mīnitö iminite ancaa pīināni adinque mīnitö wæætë, Quīnante pīināni, ante wædāmai ĩedäni. ¹⁴Mōnō tōniñadäni inänite në waadete pōnēmō beyænque, Mōnō në wænguënēmō inte mōnō wæætë mīi quëwēmō imōmpa, ante edonque ëñëmōmpa. Në waadete pōnënamai ingä guiquënë tōmengä ĩñōmō mōnō wænguënēmāmo cōwë ëmō cædāmai ingampa tōö. ¹⁵Æcänō tōmengä tōniñacä ingante pīina tōmengä ĩñōmō në wænongä bai ingampa tōö. Ayæ, Në wænongä ĩnongä inte tōmengä nänö wantæpiyæ wænāmai quëwenguimāmo ante ædō cæte entawente quëwengingää, ante do ëñëminipa. ¹⁶Nāwangä waadete pōnëninque æbänō cæquīi, ante mōnō ĩmaī ante ëñengäimpa. Edæ, Itota Codito nämä incæ mōnō beyænque wængacäimpa, ante adinque mōnō, Mänōmai waadete pōnente cæquī impa, ante ëñëmōmpa. ĩninque mōnō adobai mōnō tōniñadäni beyænque ante mōnō nämä incæ Ao äninque wænguënēmō

imompa. ¹⁷Mäincoo nē ēacā iñömö tömengä tōniñacā nānō quēwenguinō ante wīi eyepäē ēacā acā incāte tömengä ingante waadete cädāmaī ingantawo. Edä nē ēacā incä ædō cæte Wængonguī nānō waadete pōnēnō entawengä ingantawogaa. ¹⁸Wēñämīni ēñēedāni. Mōnō, Waodāni inānite botō waadete pōnēmo imopa, ante tedemō incāte wīi māninō önōne mōnō tededō beyä mōnō nōingä cæte waadete pōnēmō imompa. Wæætē edä waodāni beyä godō cædinque mōnō nōingä waadete pōnengäimpa.

Wængonguī weca ongonte mōnō guiñēnāmaī ingäimpa

¹⁹Mānōmaī cæmopma, ante adinque mōnō, Wængonguī nōingä nānō angainō baī quēwēmō imompa, ante do ēñēmopma. Ayä adobaī, Tömengä weca mōnō a ongōñedē nāmā guiñēnāmaī incæmōimpa, ante ēñēmopma. ²⁰Botō pante wæquinque wēnæ wēnæ cæbopa, ante mīmōnē nāmā apænte ämō incæte iūmaī ante adobaī ēñēmopma. Wængonguī edä wīi mōnō mīmōnē ēñēnō baī inongä inte tömengä godōmenque nē ēñēnongä ingampa. Ayä tömengä tömäā ēñengaingä ingampa.

²¹Botō nē waademīni ēñēedāni. Botō pante wæquinque wēnæ wēnæ cæbopa, ante mīmōnē nāmā apænte änāmaī imō ininque mōnō Wængonguī weca ongōninque guiñēnāmaī imaīmopma. ²²Ayä tömengä, iūmaī cæedāni, ante nānō wææ angainō ante ēñente cæmō ininque ayä, Cæmō adinque tömengä tocæcäimpa, ante cæmō ininque tömengä ingante quīēmē beyä ante ämō tömengä wæætē pōnō cæcä æ-maīmopma. ²³Tömengä nānō wææ angainō iūmaī impa. Botō Wengä Itota Codito emōwo ante pōñēedāni. Ayä tömengä mōnō imonte, Botō wææ angainō baī wacā ingä wacā ingä waadete pōñēedāni. ²⁴Mānōmainō ante Wængonguī nānō wææ angainō ante nē ēñente cædāni iñömö tömēnāni tömengä nempo quēwēnōnāni inānipa. Ayä adobaī tömēnāni tömengä ingante entawēnānipa. Wængonguī tömengä Önōwoca ingante pōnongä æñimō inte mōnō māningä tömengä nānō pōnon-gaiwoca beyä, Wængonguī ingante entawēmō imompa, ante do ēñēmopma.

Æcänō önōwoca ingante ewocadāni, ante

4 Botō nē waademīni ēñēedāni. Wadāni, Wængonguī Önōwoca incä mōni-tonga pō guicā ininque ewocamōni imōnipa, ante nē änāni incāte mīnitō wīi tömēnāni nāni änō pōñēedāni. Wæætē, Tömēnāni önōwoca Wængonguī weca owodique pōwocacantawo, ante ēñencæte ante apænte aedāni. Edä Wængonguī beyænque nē apænemōnipa, ante nē babæ anewēnōnāni nanguī ināni imæca quēwēnāni weca godānipa. ²Mīnitō edä, Māniwoca nāwangä Wængonguī Önōwoca ingantawoo, ante ēñencæte ante iūmaī ante edonque pōni ēñencæminimpa. Edä, Itota Codito Waocā ēñate pongaingä ingacäimpa, ante änāni adinque mīnitō, Tömēnāni tömānāni Wængonguī weca nē pōwocacā ingante nē ewocadāni inānipa, ante ēñencæminimpa. ³Wæætē Itota ingantedō ante adodō ante nē änāmaī ināni guiquēnē tömēnāni tömānāni edä Wængonguī weca pōwocacā ingante ewocadāmaī inānipa. Tömēnāni nāni nē ewocadongä iñömö tömengä, Itota Codito Waocā ēñate pongaingä ingacäimpa, ante änāmaī ingampa. Māningä iñömö Codito ingante nē piinte cædongä iñömö tömengä poncæcäimpa, ante mīni nē ēñēningä ingampa. Nōwoonæ incä tömengä do inguipoga mōnō quēwēñömō iñömö pongä ataqeedāni.

⁴Wēñæmīni ēñēedāni. Wadāni, Codito ingante nē pūinte cædōnāni iñōnānite mīnitō Wængonguī quīmīni imīni inte godōmenque tæi emōmīni imīnīpa. Edæ Wængonguī Ōnōwoca mīni nē ewocadongā iñōmō tōmengā godōmenque nangūi tæi emongā iñongante wēnæ inguipogaque quēwēnāni nāni nē ewocadongā guiquēnē wædænque tæi emongā ingampa. Īnīnque mīnitō mānīnāni nē babæ ānewēnōnāni inānite Baa ante cædīnque godōmenque tæi emōmīni inte gānā cædīmīni imīnīpa. ⁵Mānīnāni inguipoga beyænque quēwēnāni inte mānōmaī beyæ inguipoga quēwēnāni nāni pōnente ānō baī tededāni iñōnānite inguipogaque ante quēwēnāni adodāni inte tōmēnāni inānite ēñēnānīpa tōō. ⁶Mōnitō Wængonguī quīmōni imōni iñōmōnite, Wængonguī ingante nē ate pōnengā iñōmō tōmengā mōnitō imōnite ēñengampa. Wæætē Wængonguī wengā ināmaī inongā guiquēnē tōmengā mōnō imonte ēñēnāmaī ingampa. Mānōmaī ī inīnque edæ waocā adocanque ōnōwoca nōingā angā ingante ewocadongā incæ wacā ōnōwoca babæ angā ingante ewocadongā incæ mōnō mānīnō beyænque, Æwocadō īi, ante edonque pōni ēñēmōmpa.

Wængonguī waadete pōnengaingā inte

⁷Botō nē waademīni ēñēedāni. Mōnō wacā ingā wacā ingā waadete pōnengæīmpa. Edæ mōnō waadete pōnēnō incæ Wængonguī nānō da pōnongainō impa. Tōmānāni, Nē waadete pōnēnāni iñōmō Wængonguī wēñænāni nāni mēmpoga ēñagaincabo inōnāni inte Wængonguī ingaingā ingante ate baī pōnēnānīpa. ⁸Wæætē nē waadete pōnēnāmaī ināni guiquēnē tōmēnāni Wængonguī ingante wīi ate baī pōnēnāni inānīpa. Edæ Wængonguī nē waadete pōnengaingā ingampa. ⁹Mōnō imonte Wængonguī nānō waadete pōnēmāmo īīmaī cæte odōmongacāīmpa. Tōmengā edæ, Botō Wengā beyænque quēwēncæmīnīmpa, ante cædīnque tōmengā Wengā adocanque ingante inguipoga mōnō quēwēñōmō da pōnongā pongacāīmpa. ¹⁰Æbānō waadete pōnenguīi, ante īīmaī impa. Mōnō wīi Wængonguī ingante waadete pōnēnīmō imōmpa. Wæætē tōmengā mōnō imonte waadete pōnengā ingaingā ingampa. Ayæ, Mōnō wēnæ wēnæ cægāinō ante mōnō imonte Wængonguī pīnāmaī incæcāīmpa, ante idægoidi cæningā ingante wænōnāni nānō wengāi baī Wængonguī adobaī mōnō wēnæ wēnæ cægāinō beyænque tōmengā Wengā ingante da pōnongā pōnīnque mōnō beyæ wæætē wængacāīmpa.

¹¹Botō nē waademīni ēñēedāni. Wængonguī edæ mōnō imonte mānōmaī nē waadete pōnengaingā ingampa, ante adīnque mōnō adobaī wacā ingā wacā ingā waadete pōnenguēnēmō imōmpa. ¹²Mōnō waocabo tōmāmō Wængonguī ingante cōwē adāmaī imōmpa. Incæte mōnō wacā ingā wacā ingā waadete pōnēmō inīnque Wængonguī ingante entawente quēwēmaimōmpa. Ayæ adobaī wacā ingā wacā ingā waadete pōnēmō inīnque tōmengā pōnō cæcā beyænque mōnō tōmengā nānō waadete pōnēnō ante eyepæ entawente quēwēmōmpa. ¹³Mōnō tōmengā nēmpo quēwēmō inte tōmengā ingante adobaī mōnō entawente quēwēmōmpa. Wængonguī tōmengā Ōnōwoca ingante mōnō imonte pōnongā ængamōīmpa. Mānōmaī beyæ mōnō mānīnō ante do ēñēmōmpa. ¹⁴Mæmpo Wængonguī tōmengā Wengā ingante ānīnque, Inguipoga quēwēnāni tōmānāni inānite bitō æmi beyænque quēwēnguīnāni, ante cæcæbiīmpa, ante da pōnongā pongantapa. Pongā adīnque mōnitō nē adīmōni inte wadāni inānite mānīnō ante apænēmōni ēñēncædānīmpa. ¹⁵Æcānō, Itota Codito Wængonguī Wengā ingaingā ingampa, ante āna iñōmō tōmengā Wæn-

gonguï ingante entawente quëwengampa. Tömengä adobaï Wængonguï nempo quëwengä ingampa.

¹⁶ Ayä mänii beyä Wængonguï mönö imonte waadete pönengampa, ante mönö nē ēñēnömö inte edä ædæmö pönēmö imompa. Wængonguï iñömö nē waadete pönengaingä ingampa. Tömänäni nē waadete pönente quëwēnāni iñömö tömēnāni Wængonguï nempo quëwēnānipa. Wængonguï ingante adobaï tömēnāni entawente quëwēnānipa. ¹⁷ Wængonguï nänö waadete pönēnö ante ædæmö entawēmö inique mönö godongämä waadete pönēmö beyä tömengä apante anguiönæ iñonte guññēnāmaï inguimö imompa. Edä Mæmpo Wængonguï nempo Itota nänö quëwengäi bai mönö imæca quëwēninque adobaï quëwēmö inte mänñēdē guññēnāmaï inguimö imompa. ¹⁸ Nē waadete pönengä iñömö tömengä guññēnāmaï ingampa. Wæætē edä tömengä nänö waadete pönēnö æmæwo pæte bai eyepæ ba inique tömengä nē waadete pönengä inongä inte ædö cæte guññenguingää. Nē guññengä guiquēnē tömengä nänö pante wæwenguinö incæ do pante bai wæwengä ingampa. Tömengä nänö waadete pönēnö ante wii eyepæ ba inique tömengä æmæwo pædāmaï bai ingampa.

¹⁹ Wængonguï edä mönö imonte täno waadete pönengacäimpa. Mänömaï beyä mönö wæætē waadete pönēmö imompa. ²⁰ Botö Wængonguï ingante nē waadete pönēmö imopa, ante nē angä iñömö tömengä wæætē tömengä tönññacä ingante nē piinte ingä inique tömengä babæ änewēnongä ingampa. Edä mäningä nänö tönññacä ingante nē adingä incæ tömengä ingante waadete pönēnāmaï ingä incæte adocä Wængonguï ingante nē adāmaï iningä incæ ædö cæte tömengä ingante waadete pönenguingää. ²¹ Ayä, İimaï cædäni, ante Itota Codito mönö imonte iimaï angacäimpa. Tömämäni Wængonguï ingante nē waadete pönēmäni inte mññitö tönññadäni inänite adobaï waadete pönengüenēmäni imññipa.

Inguipogaque näni quëwēnö ante mönö Baa angäimpa

5 Tömänäni Itota ingantedö ante, Mönö Codito ingaingä ingampa, ante nē pönēnāni inte Wængonguï wēnāni näni mempoga ēñagaincabo inänipa. Ayä tömänäni Mæmpocä ingante nē waadete pönēnāni iñömö tömēnāni adobaï tömengä Wengä ingante waadete pönēnānipa. ² Mönö Wængonguï wēnāni inänite waadete pönēmö imöö, ante ēñencæte ante iimaï ante do ēñēmompa. Wængonguï ingante waadete pönēmö inique ayä tömengä, İimaï cædäni, ante nänö wææ angainö ante ēñente cæmö inique mönö, Nē waadete pönēmö imompa, ante ēñēmaïmompa. ³ Wængonguï ingante mönö waadete pönēnö iñömö iimaï ante impa. Wængonguï, İimaï cædäni, ante nänö wææ angainö ante mönö ēñente cæcäimpa. Edä mäninö ante, İimaï cædäni, ante nänö wææ angainö ante ēñente cædññique mönö wii teēmē mongænte bai baquinque cæmompa. ⁴ Edä Wængonguï wēmö mempoga mönö ēñagaincabo iñömö mönö tömämö inguipogaque ante näni quëwēnö ante Baa äññique godömenque täi emonte gänä cæmompa. Inguipogaque ante näni quëwēnö ante mönö godömenque täi emömämö iñömö iimaï ante impa. Wængonguï ingante mönö wede pönēnö beyænque mönö godömenque täi emömö inte gänä cæmompa. ⁵ Inguipogaque ante näni quëwēnö ante Baa ancæte ante æcänö godömenque täi emongä inte gänä cæcantawoo. Edä Itota Wængonguï Wengä ingaingä ingampa, ante nē pönenganque tömengä godömenque täi emönongä ingampa.

Wængonguī Wengä ingantedö ante nö ante impa

⁶Në æpænë guite pongaingä iñömö nämä wepæ petæ petæ wæante në gogaingä iñömö mäningä iñömö Itota Codito inongä ingacäimpa. Tömengä wii æpænenque inte pongacäi wæatë æpænë inte ayæ nämä wepæ inte pongacäimpa. Ayæ Wængonguī Önöwoca incæ tömenganque mäninö ante, Nö ante impa, ante në apæneçä ingacäimpa. Edæ Wængonguī Önöwoca në nöingä inongä ingampa. ⁷Edæ mäa go adoque inäni mänimpodäni, Nö impa, ante apænete bai në änäni inänipa. ⁸Edæ Wængonguī Önöwoca incæ æpæ incæ wepæ incæ mäa go adoque mänimpodäni incæ, Nö impa, ante në apænedäni mäe öñompa. Mänimpodäni iñömö quiëmë äninque adodö ante në apænedäni inänipa. ⁹Quiëmë ante waocä incæ, Nö impa, ante nänö apænedinö ante do ëñëmompa. Quiëmë ante, Nö impa, ante Wængonguī nänö apænegainö guiquënë godömenque waa pönī impa. Edæ Wængonguī tömenganque nänö apænegainö impa. Edæ tömengä Wengä ingantedö ante Wængonguī, Nö pönī impa, ante nänö apænegainö impa töö. ¹⁰Æcänö Wængonguī Wengä onguiñængä ingante në wede pönëna iñömö tömengä, Nö impa, ante Wængonguī nänö apænegainö ante entawente quëwengampa. Wæatë edæ æcänö Wængonguī nänö apænegainö ante wii pönëna guiquënë tömengä Wængonguī ingantedö ante, Babæ änongå ingänö, ante në angä ingampa. Edæ Wængonguī tömengä Wengä ingantedö ante, Nö impa, ante nänö apænegainö ante mäningä iñömö pönënamäi ingampa töö. ¹¹Ayæ mäninö ante tömengä, Nö impa, ante nänö apænegainö ante iimaī ante impa. Mönö imonte Wængonguī, Mini wantæpiyæ cöwë quëwenguinö, ante pönongä æntamompa. Mäninö mönö quëwenguinö ante tömengä Wengä në quëwënongå inte mönö imonte pönongä ænimö inte entawente quëwëmompa. ¹²Tömengä Wengä nempo në quëwengä iñömö tömengä wantæpiyæ nänö quëwenguinö do entawente quëwengampa. Wængonguī Wengä nempo në quëwënamäi ingä guiquënë tömengä wæatë wantæpiyæ nänö quëwenguinö ænämäi ingampa.

Wäö iinque nänö angainö

¹³Minitö Wængonguī Wengä ëmowo ante në pönëmini iñöminite botö mäninö ante yewämömo aedäni. Minitö edæ wantæpiyæ cöwë mini quëwenguinö do entawente quëwëmini iñöminite botö, Æñencæminimpa, ante yewämömpa.

¹⁴Iimaī beyænque Wængonguī weca guiñënamäi pömö imompa. Mönö quiëmë æncæte ante tömengä ingante apænedinque tömengä nänö änö bai ante apænemö ininque tömengä mönö imonte ëñëmaingampa. ¹⁵Ayæ, Mönö imonte në ëñënongå ingampa, ante ëñëmö ininque mönö, Quiëmë ante apænemö ëñëninque tömengä mäninö mönö äninö ante do pönongä æmö imompa, ante ëñëmaimompa.

¹⁶Minitö mini töninacä wënæ wënæ cæcä incæ wii tömengä nänö æmæwo wænguinque wënæ wënæ cæcä aminitawo. Mänömaī cæyongante në adingä iñömö mäningä beyæ ante Wængonguī ingante apæneçæcäimpa. Apæneçä ëñëninque Wængonguī tömengä ingante wantæpiyæ nänö quëwenguinö pönongä æncæcäimpa. Edæ pancadäniya wënæ wënæ nänö cædincoo mongænäni incæ wii tömënäni nänö æmæwo wænguinque wënæ wënæ cædänipa, ante botö mäninäni inänitedö ante apænebopa. Wæatë edæ waocä Wængonguī Taiyæ Waëmö Önöwoca ingante ancaa Baa Baa äninque tömengä nänö æmæwo wænguinque në wënæ wënæ cæcä ingampa. Ininque botö, Mänömaī Baa äninque në wënæ wënæ cædingä beyæ ante Wængonguī

ingante apäñecäimpa, ante änämaï imopa. ¹⁷ Quiëmë wīwa cæmō mäninō tōmänō wēnæ wēnæ mōnō cædō impa. Wæætë wēnæ wēnæ cæmō incæte wīi tōmänō mōnō wēnæ wēnæ cædō beyæ mōnō nē wænguënëmō bamompa. Panca beyænque nē wænguënëmō bamompa.

¹⁸ Wængonguï wēnāni nāni mempoga ëñagaincabo iñömō godömenque wēnæ wēnæ cædāmaï inānīpa, ante ëñēmompa. Edæ Wængonguï Wengä ëñagaingä inte tōmēnāni inānite wææ cædongä ingampa. Ayæ wēnæ incæ tōmēnāni inānite gam-podāmaï inongä ingampa. ¹⁹ Wængonguï wēmō imō imompa, ante ëñēmompa. Wæætë wadāni edæ inguipogaque ante nē quēwēnāni guiquēnē tōmēnāni tōmänāni wēnæ awēnē nempo quēwēnānīpa, ante ëñēmompa. ²⁰ Wængonguï Wengä do pongä ingacäimpa. Ayæ Wængonguï nē nöingä ingaingä ingante ate baï pōñencämīnīmpa, ante cædinque tōmengä mōnō imō pōnō odōmongä ate ëñēmompa. Tōmengä mänō-maï cæcampa, ante adobaï ëñēmompa. Ayæ tōmengä nē nöingä ingaingä iñongante mōnō tōmengä Wengä Itota Codito nempo quēwēmompa. Itota Codito nō Wængonguï ingaingä ingampa. Ayæ tōmengä wantæpiyæ cōwē nē quēwengä ingaingä inte pōnō cæcä beyænque mōnō adobaï wantæpiyæ quēwēmō imompa. ²¹ Botō wēñämīni baï imīni ëñēedāni. Wadāni, Mōnitō wængonguūidi impa, ante nāni cōñōnincoo weca godāmaï iedāni, ämopa. Mänīnque ante yewämömopa.

2 Wäö

cadota ante nänö ayänta yewcëmongainta

Nöinö mönö änö ante ayä mönö waadete pönönö ante

1 Minitö Wængongui ingante mīni pönencabo iñöminite botö nē aabo Picämo mīni änömo inte yewcëmömopa. Minitö badä nāni wencabo bai iñöminite tömengä mīnitö imīnite apēnte ængacäimpa. Botö mīnitö imīnite nö waadete pönömopa. Wīi botonque waadete pönēmīni inte wæætē mönö Codito nöingä nänö waa pönī angainö ante nē ēñēnāni adobaī tömēnāni tömānāni nāni nē waadete pönēmīni iñöminite yewcëmōmo aedāni. ²Edæ mönö nē Nöingä nänö waa pönī angainö ante entawente quēwēmö inte mönö cōwē ñimpo cädāmaī entawencämöimpa. ³Nē Mæmpocä Wengä Itota Codito tönö Mæmpo Wængongui tömēna godongämæ waadete pönö cædinque, Quēwencæminimpa, ante mönö imonte waadete waa cæda beyænque mönö gänē entawencämöimpa. Ìniquē mönö nē nö pönēmö inte mäninö ante cōwē entawente quēwēnömö inte mönö wacä ingä wacä ingä waadete pönēmö incämöimpa.

⁴Mæmpo Wængongui mönö imonte nänö, Ìimaī cædāni, ante nänö wææ angainö bai ēñente cædinque mīni pönencabo iñöminī botö, Pancadāniya nöinö cægonte bai quēwēnānīpa, ante ēñēnīmo inte nanguī tobopa. ⁵Nöwo iñömö mīnitö imīnite ämo ēñēedāni. Minitö Wængongui ingante mīni pönencabo iñömö wacä ingä wacä ingä waadete pönēedāni ämopa. Botö ñöwo mänōmaī äninque wīi tömēmo wææ änö ante yewcëmömopa. Wæætē Awēnē do wææ nänö angainö ante wēēnēnedē mönö ēñente ængainö ante adodö ante yewcëmōmo aedāni. ⁶Nē pönēnāni inānite mönö waadete pönönö iimaī impa. Mönö Codito, Ìimaī cædāni, ante nänö wææ angainö ante ēñente cædinque mönö quēwengäimpa. Minitö wēēnēnedē do mīni ēñēninö bai wææ äninque tömengä, Minitö cōwē waadete pönente quēwēedāni, angacäimpa.

Waadāni oda cæcædānīpa, ante nē cædāni

⁷Waadāni edæ oda cæcædānīpa, ante nē cædāni nanguī ināni imæca quēwēnāni weca gote mä ongönānīpa. Mänināni iñömö Itota Codito Waocä ēñate pongaingä ingampa, ante änāmaī nē ināni inānīpa. Æcänö tömēnāni bai nē ingä, Waodāni edæ nāni oda cæquinque, ante nē cæcä ingampa. Ayä, Botö Codito imopa, ante Codito ingante piinte cædongä ingampa. ⁸Minitö iñömö nāmā wææ aedāni. Quiēmē cæcæte ante mīni cædinö ante mīnitö, Wē womönāmaī ingäimpa, ante cædinque wææ cæedāni. Wæætē mīni cædinö beyä Wængongui nänö pönonguincoo tömancoo eyepæ pönongä æncæte ante cædāni.

⁹Nē pönengä Itota Codito nänö odömonte apænēgainö ante nē ēñēningä incæ wīi godömenque ēñente cædinque wadö ante wadæ gocä iñömö tömengä ædö cæte Wængongui tönö godongämæ quēwengüingä. Wæætē Itota Codito nänö odömonte apænēgainö ante godömenque nē ēñente cædongä iñömö tömengä iñömö Mæmpocä tönö ayä tömengä Wengä tönö godongämæ quēwengampa. ¹⁰Wacä mīnitö weca pöninque mäninö Codito odömonte apænedinö ante odömonte apænedāmaī ingampa, ante adinque mīnitö tömengä ingante, Botö oncönē pö guīie, ante änāmaī

iedäni. Ayä, Waa quëwente pömi, ante änämaï iedäni. ¹¹ Edæ adocä ingante æcänö, Waa quëwente pömi, ante äna tömengä mäningä wënæ wënæ cæyongante tömengä tönö guëa cæte bai cæcampa.

Wäö iinque nänö angaiñö

¹² Botö mïnitö imïnite godömenque nanguï äinente wæbo incæte mincay-onta inte wentamömæ yewæmöimæ inte wïi yewæmöinëmopa. Wæætë mïnitö weca ëñacæ pöinëmo imopa. Ayä mïnitö tönö awincadö awinca adinque botö apæneinëmo imopa. Mänömaï cædinque botö, Mönö godongämæ eyepæ pönï wat-apæ tocæmöimpa, ante cæbopa. ¹³ Mönitö tönïñamini ëñëedäni. Wængonguï ingante möni pönencabo tömengä nänö në ængaïmöni inte mönitö iñömö mini pönencabo iñömïnite, Waa quëwëedäni, ämönipa, ante yewæmömopa.

3 Wäö

cadota ante nänö tömanta yewæmongainta

Gayo ingante Wäö nänö waa apænedö

1 Gayo botö nê waadebi êñëmi. Bitö botö nê nö waadete pönëmi iñömite botö nê aabo Picæmo mini änömo inte, Acæbiimpa, ante yewæmömopa.

² Botö nê waadebi êñëmi. Tömëmi önöwoca incæ waa ewocate quëwëmi bai bitö baonga adobaï waa êñabi quëwencæbiimpa, äninque ayæ, Bitö quëwenguinö ante bitö cöwë waa pönï quëwencæbiimpa, ämopa. ³ Mönö tönïñadäni pancadäniya iñömö pöninque, Gayo iñömö Itota Codito nö pönï nänö angainö ante cöwë nö pönëninque cæcampa, ante apænedänitapa. Ayæ, Gayo ñöwo godömenque nöinö cægonte bai quëwengä ingampa, ante apænedäni êñëninque nanguï pönï totabopa.

⁴ Botö wëmini bai imini iminitedö ante, Itota Codito nö pönï nänö angainö bai tömënäni nöinö cægonte bai quëwënäni inänipa, ante apænedäni êñëninque botö godömenque watapæ toquinque impa.

⁵ Botö nê waadebi êñëmi. Mönö tönïñadäni incæ bitö nê tæcæ adinäni inäni incæte bitö quinö tömënäni beyæ ante cædinque cöwë pönëninque ædæmö cæbi imipa. ⁶ Codito ingante godongämæ möni pönencabo iñömönite mäninäni wæætë, Gayo nê waadete pönengä ingampa, ante mönitö imönite apænedäni êñëntamönipa. Tömënäni Wængonguï ingante nê cædäni inänipa cæbii. Bitö tömënäni inänite godö cæbi äninque gomonga godäni ininque waa imaimpa. ⁷ Edæ tömënäni iñömö Itota ëmöwo beyænque tao godänitapa. Mänömaï goyönänite nê êñënämaï cædäni dicæ pönönäni äñänitawogaa. ⁸ Mänömaï beyæ mönö Wængonguï nöingä nänö angainö ante tömënäni tönö godongämæ cæcæimpa, ante cædinque mäninäni bai inäni mönö oncö pönäni adinque mönö, Pö guiite cænte möedäni, angüenëmö imompa.

Diotedepeto tönö Deëmetedio

⁹ Codito ingante mini pönencabo iñömönite botö minitö iminute do yewæmontabopa. Incæte Diotedepeto iñömö, Botö nê awënë imopa, ante nê cæinëngongä inte mönitö imönite Baa äninque nänënë cæcä ingampa. ¹⁰ Minitö weca botö pöninque tömengä quinö nänö cædö ante edonque pönï apænebo êñencæminimpa. Edæ tömengä mönitö imönitedö ante önonquedö ante wënæ wënæ apænecampa. Ayæ mäninö ante wii eyepæ impa, ante pönente ingä ininque tömengä edæ mönö tönïñadäni pönäni adinque, Pö guiite cænte möedäni, änämaï ingampa töö. Wadäni guiquënë, Pö guiite cænte möedäni, ancæte ante nê cæinënäni inänite tömengä adobaï, Cædämaï iedäni, ante wææ angä ingampa. Ayæ mänömaï cædäni adinque tömengä, Mönitö Codito ingante möni godongämæ pönencabo iñömönite minitö gobæwedäni, angampa cæbii.

¹¹ Botö nê waadebi êñëmi. Quinö wënæ wënæ i adinque bitö adodö cædämaï ie. Wæætë quinö waa i adinque adodö cæe. Quinö waa impa, ante nê cædäni iñömö Wængonguï wënäni inänipa. Quinö wënæ wënæ impa, ante nê cædäni guiquënë Wængonguï ingante adämaï inänipa.

¹²Deëmetedio ingantedö ante tömänäni waa apäenedänipa. Wængongui nöingä nänö quëwëno bai Deëmetedio adobai nöinö cæte quëwënogä ingampa, ante acæimpa. Mönitö adobai tömengä ingante ante waa apänemöni imönipa. Ayæ tömengä ingantedö mönö äninö nö impa, ante do ënëmipa.

Wäö iinque nänö yewæmongainö

¹³Minitö iminite godömenque nanguï äinente wæbo incæ yewæmöingö inte wentamömæ yewæmöimæ inte wii yewæmöinëmopa. ¹⁴Wæætë bitö weca wantæ iinö pöninque botö ainëmo imopa. Pömo ate botö bitö tönö awincadö awinca adinque apænecæmönaimpa.

¹⁵Bitö piyænë cæte quëwencæbiimpa, ämopa. Mönö æmigoidi iinömö quëwënäni bitö imite, Waa quëwencæbiimpa, ante apäenedänimpa. Mönö æmigoidi bitö weca quëwënäni tömänäni inänite wæætë bitö adocanque ingante adocanque ingante apänedinque, Waa quëwencæbiimpa, ante botö beyæ apänebi ëñencädänimpa, ämopa. Mäninque ante yewæmömopa.

Coda

cadota ante nänö yewæmongainta

Waa quëwencæminimpa, ante Coda yewæmongampa

1 Botö Itota Codito ingante në cædömo inte Tantiago töninabo Codaabo inömo imopa. Mæmpo Wængongui minitö iminite waadete pönëninque aa pecä pömini ininque minitö Itota Codito nempo në ongömini inöminite botö, Acæminimpa, ante yewæmömopa. ²Wængongui waadete pönö piyænë cæcä ininque minitö tömengä nänö gänë entawënö ædæmö entawëninque nangui waadete pönente waa cæte quëwencæminimpa, ante yewæmömopa.

Babæ ante në odömonte apænedäni

(2 Pegodo 2.1-7)

³Botö në waadedömini ëñeedäni. Botö, Codito ængä beyænque mönö quëwëmämo æbänö i, ante quingæ yewæmoncæte ante cæyömote wadäni wænæ wænæ cædäni ate wædinque botö, Minitö wææ cæedäni, ante yewæmonguënëmo batabopa. Wængongui quimö inömonte tömengä inömo, Wede mini pönënö ante pönömo æninque minitö cöwë wææ aadäni, ante æmæwo pönï pædæ pönongä ænte entawëmopa. Ininque botö wæætë, Wede mini pönënö ante wææ cæcæminimpa, ante yewæmonguënëmo intabopa. ⁴Wængongui, Botö imote në Baa änäni nänäni pante wæquinque wentamö mongænänipa, ante tömënäni inänite apænte æninque piingampa, ante do yewæmongatimpa. Tömënäni inömo minitö weca do awëmö pönänipa cæminii. Wængongui pönö waadete nänö cægainö ante tömënäni wapiticæ cædinque, Minitö baonque townenque mini cæinënö ante önonque cæcæminimpa, ante cædinque Wængongui waadete pönö cæcampa, ante babæ ante odömonte apænedänipa. Ayæ Itota Codito adocanque mönö Tæiyæ Awënë inongante tömënäni inömo tömengä ingante Baa änänipa.

⁵Minitö wæætë tömänö ante ëñënimini inöminite botö, Do mini ëñëninö ante wæætë wæætë adodö ante pönencæminimpa, ante cædinque adodö ante yewæmoncæ cæbo aedäni. Dodäni Equitobæ quëwëñönänite mönö Awënë ænte mäocä godäni ate tömengä në wede pönënamäi inäni inänite edæ, Ömäe, ante capo wænongä wængadänimpa. ⁶Ayæ anquedoidi në awënëidi inönäni incæ pancadäniya tömënäni nänäni aagainö incæ nimpö cædinque tömënäni nänäni quëwengaiñömö ëmö cædinque wadæ gogadänimpa. Adinque Wængongui, Botö apænte angüönæ iinque bayonte tömënäni inänite botö pancæboimpa, ante ñowo inömo gæguincamenca wodämaï inguimenca tæi goti wininque tömënäni inänite wëmö inömo mangui tee mönete wææ cæcampa. ⁷Ayæ Todömä inömo quëwengainäni tönö Gömoda inömo quëwengainäni eyequei godongämæ nänäni quëwengaincabo nänäni quëwengaincabo tönö adobaï wænæ wænæ cædinque nänöogængä inämaï inongante godö möninque ayæ godömenque quingämë bai wïwa tote quëwengadänimpa. Mänömaï cæte quëwënäni ate Wængongui angä gonga wææ ti wocæno gonte æmæwo wængadänimpa. Mänömaï godö pangä nänäni wængai bai ante odömöninque Wængongui, Në

wënæ wënæ cædāni adobaī gonga cōwē yædæ yædæ bæcoyömō caate wæquīnānidō anguēnē, ante mōnō īmonte odōmoncæte ante cægacāimpa.

⁸ Ayæ wīimonte baī mā pōnente nē odōmonte apænedāni īñōmō ñowo mīnitō weca pōninque dodāni nāni cægai baī adobaī pōni cædānīpa. Wīwa cædinque tōmēnāni wentamō mongænte baī edæ baō ñōmænguī ēñadānīpa. Awēnēidi inānite edæ Baa ānānīpa. Ayæ anquedoidi oōnædē ñāō īñōmō quēwēnāni inānite edæ babæ ānīnque wënæ wënæ ante tedewēnānīpa. ⁹ Incæte anquedo awēnē Mīiguedo incæ tōmēnāni pīinte nāni tedewēnō baī adobaī tededāmai ingacāimpa. Mōitee wodi baō īni adīnque anquedo Mīiguedo tōnō wënæ awēnē īñōmō edæ, Æbānō cæquīi, ante guēadō guēa angadāimpa. Āñōnate Mīiguedo īñōmō, Botō nē apænte anguēnēmo īmopa diyæ anguīmoo, ante pōnēninque guīñente wædinque wënæ awēnē ingante, Wënæ wënæ cæbīpa tōō, ante pīinte ānāmai ingacāimpa. Wæætē, “Wængonguī incæ bitō īmite Baa angā ēñencæbīimpa,” angacāimpa. ¹⁰ Ñōwodāni īñōmō tōmēnāni adāmai inte nāni ēñēnāmai īñōnō ante edæ pīīnīnque do wīwa tedewēnānīpa. Wæætē babæidi nāni ēñēnonque ante ēñēnīnque tōmēnāni mānīnonque ante nāni cædō beyæ wænte nāni ñōmængūinque godōmenque quingāmē baī cædānīpa.

¹¹ Tōmēnāni edæ nāni Ca ca wæquinque baquinō anguēnē. Cainō wodi nānō gogainō incæ edæ do godānīpa. Ayæ Badāō wodi, Nanguī æncæboimpa, ante cædinque tōmengā nānō oda cægainō incæ tōmēnāni īñōmō adodō ante pogodo godīnque, Godōmenque nanguī æncæboimpa, ante oda cædānīpa. Ayæ Codee wodi, Awēnēidi inānite wido cæcæimpa, ante nānō cægainō baī cædinque ñōwodāni nāni wængūinque adobaī cædānīpa.

¹² Mīnitō waadete pōnēninque godongāmē ponte cæñōmīni īināni īñōmō guīñēnāmai inte adoyōmō ponte cænānīpa. Mīnitō tōnō godongāmē ongōnāni beyænque mīni cabo wentamō baate baī ēmōmīni awædō. Tōmēnāni, Nē aawēmōni īmōnīpa, ante babæ apænedīnque nē cænīnāni baī īnāni inānite pædæ godōnāmai īnāni inte tōmēnānīque ade cænte baī cædinque wīi nōinō ante odōmonte apænedānīpa tōō. Ayæ waodāni, Cōōnæ cæ tobāimpa, ante wæyōnānite boguīmancoo cōōnæye ēmōñonte woboyæ pō wido cæ baī cædinque tōmēnāni nāni, Pōnōmōni æncæmīnīpa, ānīnō ante pōnōnāmai inte edæ babæ cædānīpa. Ayæ awæ incayedē ōmæcawæ ī adīnque do bæ wite mēmpoga wænīwæ baī īnāni inte tōmēnāni mēmpoga wænte baī īnāni inte, Pōnōmōni cæncæmīnīpa, ante nē babæ ānewēnāni īnānīpa. ¹³ Ayæ gāwapæno tadōmengadæ ompota ōñōñō mængonta mængonta cædinque ompota yabæ tayōnōi edonque ōñō ai baī tōmēnāni wīwa cæyōnāni wentamō nāni entawēnō adobaī edonque pōni ongō acæimpa. Ayæ nēmō adodonque goquēnē incæ oo tobæ wæænte wēmō ba baī tōmēnāni adobaī oda cæte wapiticæ godāni inte edæ tōmēnāni nāni cōwē tadāmai wæwengūinque mā māmonte baī īñōmō edæ godāni inānīpa.

¹⁴ Ayæ Adāō wodi nānō mōmōidi wææ nānō mōmōidi wææ nānō mōmocā ingaingā inte Ēnoco īñōmō tōmengā Wængonguī beyæ apænedīnque dodāni babæ ante nē odōmonte apænedāni inānitedō ante īimainō ante apænegacāimpa. “Mōnō Awēnē pongā apa quēwēnāni. Ayæ tōmengā quīnāni tæiyæ waēmō īnāni adobaī mīido ganca mānīmpodāni pōñōnānite adopo adopo edæ pō pō cædinque ōnōmpo tipæmpoga mānīmpoga pōnāni inte bacoo īnāni mōnō Awēnē tōnō godongāmē poncædānīpa. ¹⁵ Tōmengā mānōmai pōnīnque edæ tōmāmō īmonte apænte an-cæcāimpa. Wængonguī ingante nē Baa ānāni inānite tōmengā, Mīnitō mīni wæwente

baquinque botō ïmote Baa äninque edæ ëñënamai cæminipa tōō, ancæcäimpa. Ayæ, Mïni nê Baa änoncabo ïnomïni inte mïnitō mïni wæwente baquinque edæ botō ïmote piïnte äninque wiwa äminipa. Ämo ëñëmaimïnipa, ante edonque apëncæte ante mōnō Awënê poncæcäimpa.” Mänōmainō ante Ënoco wodi wëenëñedê pōni angacäimpa. ¹⁶Nōwodäni æbämê cædäni incæ nê babæ ante odōmonte apänedäni ïñömō, Quïmä quëwëë, ante piïninque piyænê cædämai ïnänipa. Taadō ante tōmënäni nämä näni cæinëwënonque ante tee empote godänipa. Botō godōmenque waa pōni cæbo aedäni, ante nämä ængō cædinque tedewënänipa. Ayæ, Wadäni mōnitō wædō ante pōnō cæcædänimpa, ante babæ cædinque tōmënäni wadäni ïnänite waa ate bai tededinque waa pōni cæte bai godō apänedänipa cæmïni.

Nê pönëmïni ïñömō ïimai cæcæminimpa, ante

¹⁷Mïnitō guiquënë botō nê waademïni ëñëedäni. Mōnō Awënê Itota Codito nänō nê da godongainäni incæ, Æbänō baquïi, ante näni apënegainō ante ïmainō ante pönëedäni. ¹⁸Tōmënäni ïñömō mïnitō ïminite apänedinque, “Wodo ïmæca iïnque bayonte edæ wadäni nämä näni toinëwente godōnō ante goquinäni incæ Wængonguï ingante Baa ante badete toquinäni ïnönäni inte edæ do poncædänimpa,” ante apänedäni ëñëmïnitapa. ¹⁹Ïinäni nê badete todäni ïñömō Wængonguï Önōwoca ingante ëwocadämai ïnänite inte edæ nämä näni cæinënō ante ëñente cædänipa. Mïnitō adocabomïni ïñömïnite tōmënäni, Nänëneto nänënë gocæminimpa, ante cædinque pä cæte bai cædäni ïnänipa.

²⁰Botō nê waadedömïni edæ ïimai cædäni. Mïnitō mōnō Tæiyæ Waëmō pōni ïnongä ingante wede pönëmïni inte mäninō mïni wede pönënō incæ dica tæi gö cæte ongonca bai impa. Ante adinque mïnitō oncō dicaboga mænonte bai edæ tæi piñäninque godōmenque cædäni. Ayæ Wængonguï Tæiyæ Waëmō Önōwoca ingante ëwocadinque mïnitō, Tōmengä æbänō angäa, ante ëñëninque mäninonque ante Wængonguï ingante apäneedäni. ²¹Mïnitō, Mōnō Awënê Itota Codito pōnō waadete waa cæcä beyænque mōnō wänämai inte cōwê wantæpiyæ quëwengäimpa, ante æncæte ante wänō cōmïnitawo. Ïinque Wængonguï nê waadete pönengä nempo cōwê waadete pönëninque ongödäni.

²²Pancadäniya guiquënë, Wabänō quëwenguïmoo, ante guïñente wæyönänite mïnitō tōmënäni ïnänite piïnte adämai inte godō waadete waa cædäni. ²³Pancadäniya guiquënë gonga bæcoyōmō oo goquinäni ïmai impa, ante adinque mïnitō wæætê, Quëwencædänimpa, ante odōmonte apänedinque tōmënäni ïnänite ö æmïni beyænque quëwencædänimpa. Wadäni guiquënë wiwa cædäni inte nämä baō wentamō mongænte bai ëñayönänite mïnitō, Nääte wæcæ wæ, ante guïñente wædinque tōmënäni weocoo näni näädincoo incæ gampodämai inte tōmënäni beyæ wæætê waadete godō waa cædäni.

Wængonguï waëmō pōni ëmōnongä ingampa, ante

²⁴Mïnitō tæ go wæænte bai oda cædämai incæminimpa, ante Wængonguinque eyepæ pōni ïnongä inte tōō æmængä ate mïnitō adiyæ ongonte bai wede pönencæminimpa. Ayæ tōmengä adocanque eyepæ pōni cædongä inte pōnō badongä ate mïnitō waimïni bamïni ïinque mïnitō nangui pōni mïni watapæ toquinque tōmengä nänō nãō ëmōñömō ænte mäicä æicæminimpa. ²⁵Wængonguï adocanque pōni ïnongä inte mōnō ïmonte, Quëwencæminimpa, ante nê Ængaingä ingampa.

Īninqe Itota Codito mōnō Awēnē nānō cægāinō beyænque eyepä bate quēwēmō
īñōmō mōnō īimāinō ante apæ necæimpa. Wængonguī ēñēmi. Bitō badongaincoo
dæ āñonte wēēnē imāmoque īñonte ñōwopāmo īñonte wapāmo mīimāmo īnque
bayonte bitō adobique cōwē ñāō entawente tæi emōninque Awēnē nē tæi pñæmi
īnōmi inte tōmāo īñōmō quēwēnāni īnānite nē Ānōmi imidō anguēnē, ante mōnō
apæ necæimpa. Mānōmai baquīnō anguēnē, ante botō, Amēē, āmopa.

Wäo ingante Itota Codito

Nänö Odömongainö

Wäo wīimonte bai nänö adi, ante yewæmongainö

1 Wēēnēnedē quīnō wē wodonte bai ingatimpa, ante Itota Codito nänö odö-mongainö ante yewæmonte impa. Wængongui iñömö, Wantæ iñonte quīnō bai baquīi, ante, Itota tömengä ingante nē cädäni inänite odömoncæcäimpa, ante cædinque Itota Codito ingante edonque odömongä agacäimpa. Ayæ Itota Codito wæætē tömengä anquedo ingante, Bitö Wäo botö nē cæcä weca godinque odömömi acæcäimpa, ante da pönongä ponte odömongä atabopa. ² Botö Wäömo guiquēnē, Quīnō botö adinö tömänö incæ nō impa, ante yewæmömopa. Mäninö Wængongui nänö angainö ante Itota Codito incæ botö imote edonque odömongä adimo inte botö adobai wīimonte bai tömänö botö adinö ante, Nö impa, ante yewæmömopa.

³ Wængongui beyæ botö apænedö ante ii yewæmöintaa yewæmömopa. Mänintaa adinque nē apænedäni nāni toquinque. Ayæ mäninta botö yewæmöninö ante ēñente cädäni nāni toquinque. Edæ iīmaī baquīönæ wantæ iñö oo baquīnō anguēnē.

Godongämæ nāni pönencabo tiæte ganca inäni beyæ Wäo yewæmongampa

⁴ Botö Wäömo inömo imopa. Atiabæ iñömö wayömö wayömö incæ Codito ingante godongämæ mini pönencabo önompo æmæmpoque go mencabominiya acæmin-impä, ante botö yewæmömopa.

Mönö Mæmpo Wængongui wēēnēnedē nē quēwengaingä inte nōwo quēwengä incæ ayæ wantæpiyæ quēwencæcäimpa. Tömengä Önöwoca incæ önompo æmæmpoque go mēwoga önöwocaidi bai ewocadongä inte Wængongui nänö aacæ tæ contayömö tæcætawē inö nē ongongampa. Ininque Mæmpocä tönö tömengä Önöwoca waadete pönö cæda ate mīnitö gänē entawencæminimpa.

⁵ Ayæ adobai Itota Codito edæ Wængongui ingantedö ante cöwē ædæmō pōni apænedongä inte wængä ate täno fiäni ömæmongaingä ingampa. Tömengä tömämæ awēnē odayeidi nāni Tæiyæ Awēnē Odeye inongä ingampa. Tömengä adobai mönō imonte nē waadete pönönongä inte mönō wēnæ wēnæ cægainö adinque tömengä wepæ inte mēnongacäimpa. Tömengä adobai waadete pönö cæcä ate mīnitö gänē entawencæminimpa, ämopa. ⁶ Ayæ Itota, Botö Awēnē Odeyebo nempo quēwēn- inque mīnitö botö tönö godongämæ aamini bacæminimpa, ante pönö badon- gacäimpa. Ayæ, Botö Mæmpo Wængongui ingante cæcæminimpa, ante Itota pönö cæcä ate mönö Wængongui quī, ante nē godömö bagaiimö imompa. Tömengä fiäo bai emöñongante mönö waocabo tömenganque ingante waa acäimpa. Tömenganque cöwē nē tæi piñænongä inte quingämenque quēwēnāni iñönänite tömengä tömänāni Awēnē inongä ingampa, ante mönö cöwē angæimpa, ante Amēē, ante ämopa.

⁷ Eñēedäni, tömengä edæ boguimancodē wææñongante,

tömänāni tömengä ingante acädänimpa.

Tömengä ingä nē timpogaināni incæ adobai tömengä ingante acädänimpa.

Ayæ tömämæ quēwēnāni tömänāni tömengä ingante adinque Ca ca wæcädänimpa.

Mänömaī baquīnō anguēnē, ante

botö, Amëë, ämopa.

⁸Wængongui Awënë adocanque Tömää në Cægaingä inte iimaï angampa. “Botö Tänäbo ingaïmo inte Tömämo inguïmo imopa.” Mänömainö ante në angä iñömö tömengä wëëñedë do quëwengainä inte ñowo quëwengä incæ ayä wantæpiyä quëwencæcäimpa.

Itota Codito në ñäö bai ëmongainä ingante Wäö nänö adö

⁹Botö Wäömo inömo imopa. Minitö tönñabä inte botö minitö tönö Awënë Odeye Itota nempo quëwëninque mönö tömengä tönö godongämä aamö inömo imopa. Botö minitö tönö godongämä wæwëmö imö incæte mönö wæntæye inämaï inte ee cæmompä. Wængongui nänö angainö ante apænedinque ayä, Itota mönö Codito inongä ingampa, ante, Nö impa, ante botö apænedö beyänque botö wää tëiwænë Patömoto iñömö tee mönete bai quëwentabopa.

¹⁰Wængongui Awënë itädë iñonte Wængongui Tæiyä Waëmö Önöwoca incæ botö imote bai ongonde bai cæyongä botö önöñabä inö adocanque tede-pämo todompeta nani ancadeca we öonte bai yedæ të ëñentabopa. ¹¹Ii-maï angantapa. “Bitö quinë wüimonte bai abii, ante yewämöintaa yewämöe. Yewämöninque wayömö wayömö incæ Codito ingante godongämä nani pöncabo önömpo æmæmpoque go mencabodäniya iñönänite tömënanä inänite da godöe,” ante angantapa. “Epeto quëwëñömö quëwënanä Ætämidöna quëwëñömö quëwënanä Pedegämo quëwëñömö quëwënanä Tiatida quëwëñömö quëwënanä Tadoditi quëwëñömö quëwënanä Pidadedepia quëwëñömö quëwënanä ayä Daoditea quëwëñömö quëwënanä Codito ingante godongämä nani pöncabo nani cabo nani cabo iñönänite bitö tömënanä inänite ii bitö yewämöninta da godömi æncädänimpa.”

¹²Äñongante botö, Æcänö äna ëñëmoo, ante dadi ëmænte atabopa. Dadi ëmæñömote yædo concædi tï wodönoincade oodo inte badöincade önömpo æmæmpoque go mëa ganca ongoncade atabopa. ¹³Ayä yædo concædi tï wodönoincade ongöñömö adoyömö tæcæguedë adocanque në Waocä ëñagaingä bai inte ongonä atabopa. Tömengä doyæncoo önöwa ganca incoo mongæninque ayä tæcæënëmä inö pacadeyænta oodo inte badöi ëënëmängä ingantapa. ¹⁴Tömengä ocabo tönö ocagui iñömö dayö näämænta pönï ëmö bai adobai encadinque yoguimö ñäö pönï ëmö bai adobai ñäö bai encacä ingantapa. Ayä tömengä awinca incæ gonga wo bæcote bai ëmongä ingantapa. ¹⁵Tömengä önöwa incæ yaëmenta bodonte nani änö gongapamö guii ocoi äñonte ñäö ëmö bai tömengä adobai ëwacä ingantapa. Tömengä tedeyongä æpæ mä conta goyonte æpæ të bai adobai të ëñentabopa. ¹⁶Tömengä önönempo tömempo incæ nëmöidi æmæmpoque go mëa ganca nëængantapa. Ayä tömengä önöne inö yaëmë tipængaa waingamë engamë ënedinque yædæ tadete ongongantapa. Ayä tömengä awinca incæ nænque nangui tamonte bai ñäö bai ëmongantapa.

¹⁷Tömengä ingä adinque botö tömengä önöwa inö wænte bai tæ gowææntabopa. Tæ gowææñömö tömengä önömpo tömempo inte botö imote gampodinque “Bitö guññänämaï incæbiimpa,” ante äninque edæ, “Tömää badönämaï iñedë botö Do Quëwengäïmo imopa. Ayä tömäa iinque bayedë incæ botö Ayä Pönï në Quëwëmo incæboimpa,” ante angantapa. ¹⁸Edæ “Botö në Quëwengäïmo inömo inte në wænimo incæ ñäni ömæmonte cöwë wantæpiyä quëwëmo inömo imopa. Waodäni

në wænte godināni nāni wænte ongöñömö ongöñönānite botö, Cöwë wænāmaï quëwencæminimpa, ante botö tæï piñæmāmo inte në æmo imopa.

¹⁹“Mänömaï beyæ bitö wiïmonte bai bitö adinö ante quinö ñöwo i, ante quinö iïncayæ ate baquïi, ante yewæmöe ämopa. ²⁰Mänii nëmöidi önompo æmæmpoque go mëa ganca botö önönempo tömempo incæ më öñoncoo bitö adincoo ante, Æbänö i, ante bitö ëñenāmaï inönö ante botö edonque pöni apænebo ëñencæbi-impā. Botö imote godongämæ nāni pönencabo önompo æmæmpoque go menca- bodāniya iñönānite tömēnāni inānite në aadāni bai nëmöidi ināniya. Ayæ yædo concædi ti wodönoincade oodo inte badöincade önompo æmæmpoque go mëa ganca ongoncadeoo bitö adincoo ante, Quinö bai ināni, ante botö adobai bitö imite edonque pöni apænebo ate në ëñēmi bacæbiimpā. Wayömo wayömo incæ botö imote godongämæ nāni pönencabo önompo æmæmpoque go mencabodāniya iñömö tömēnāni yædo concædi ti wodönoincade bai adobai ināniya,” ante Waocä në ëña- gaingä iñömö botö imote apænegacäimpā.

Godongämæ nāni pönencabo tiæte ganca ināni inānite Itota nänö änö

Epeto iñömö quëwēnāni inānite Itota nänö änö

2 Ayæ adocä godömenque apænecantapa.

“Epeto iñömö Wængongui ingante godongämæ nāni pönencabo inānite në aacä acæcäimpā, ante botö änö ante iïmaï yewæmöe ämopa. ‘Botö edæ nëmöidi önompo æmæmpoque go mëa ganca botö önönempo tömempo në nëæmo imo inte botö adobai yædo concædi ti wodönoincade oodo inte badöincade önompo æmæmpoque go mencadea incade ongöñömö adoyömo tæcæguedë në cægömo imopa.

²“Minitö æbänö cæminii, ante do ëñēmopa. Edæ nanguï pöni cædinque minitö wæntæye ināmaï inte ee cæminipa. Minitö wiwa cædāni inānite Baa ante quëwëminipa, ante do ëñēmopa. Ayæ Wængongui nänö në da godon- gaimöni imönipa, ante në änāni incæte ināmaï iñönānite minitö, Nāwangä ināni, ante ëñencæte ante apænte adinque, Tömēnāni babæ änāniya, ante ëñente wæminitapa. ³Minitö wæntæye ināmaï inte ee cæmini iminipa. Ayæ botö emöwo apænete beyænque wæwëmini incæte godömenque godömenque cædinque minitö mimönë nangæ badāmaï iminipa, ante do ëñēmopa.

⁴“Incæte adoque pöni mini cædinö wiï waa abopa. Minitö edæ wiï wëñēñedë bai ædæmö waadete pönëmini iminipa, ante awædö. ⁵Edæ minitö waa cædimini imini incæte ñöwo wæætë wënæ wënæ cæmini bamini awædö. Māninö ante pönëdāni. Mänii mini wënæ wënæ cædinö ante, Ancaa wæwente awædö, ante pönente ñimpo cædinque minitö wëñēñedë mini waa cægai bai adobai cæte quëwëedāni ämopa. Ämo ëñëninque minitö mini wënæ wënæ cædinö ante wædāmaï imini adinque botö minitö weca pömaimopa. Pöninque mini yædo concædi ti wodönoincade nänö ongöñömö ongöñonte botö ö ængui- modö angüēñ. ⁶Incæte adoque mini cædinö guiquēñë waa abopa. Minitö edæ Nincodaitaidi nāni änāni nāni cædö ante adinque piinte iminipa. Botö adobai tömēnāni nāni cædö ante adinque piinte imopa.

⁷“Wayömo wayömo incæ botö imote godongämæ nāni pönencabo inānite Wængongui Önowoca quinö angää, ante tömengä nänö änö ante në ëamonca

imäni inte eñeedäni. Wængongui waa gönea iñömö mäniñömö adowænque quëwenguüwä pædiwä iwæmpa. Tæi emonte në gänä cædäni inänite botö iñömö, Mäniwä inca cæncæminimpa, ante pædæ godoncæboimpa, ante mäninque ämopa,” ante Waocä në eñagaingä iñömö botö imote apænecäimpa.

Ætämidoña iñömö quëwëñäni inänite Itota nänö änö

⁸ Ayä adocä godömenque apænecantapa.

“Ætämidoña iñömö Wængongui ingante godongämä nani pönencabo inänite në aacä acæcäimpa, ante botö änö ante iimai yewæmoe ämopa. ‘Tömää badönämaï iñedë botö Do Quëwengäimo imopa. Ayä tömää iinque bayedë inca botö Ayä Pöni në Quëwëmo incæboimpa. Botö në wænimo inca ñowo wæætë nani ömæmongäimo imopa.

⁹ “Minitö wæwëmini inte adobaï ömæpomini iminipa, ante botö do eñëmopa. Incæte minitö nö ëamini iminipa. Oodeoidi pancadäniya, Mönitö Wængongui ingante möni pönencabo imönipa, ante në äñäni incæte wii mänömaï inänipa. Tömëñäni minitö iminite ancaa piinte babæ änewëñäni inänipa, ante botö do eñëmopa. Mäniñäni iñömö Tatäna ingante nani eñencabo inte mänömaï cædänipa töö. ¹⁰ Minitö quïnö beyæ wæwençæ cæmini imäni incæte guiñëñämaï iedäni. Tatäna incæ, Æbänö cæminii, ante acæte ante cæcä beyænque waodäni pancaminiya iminite tee mönecædänimpa. Önonpo tipæmpoga eönæ iñonte wæwenguümini iminipa. Iinque minitö mini wænguinque wæmini inca cöwë pönëninque ædæmö cædäni. Mänömaï në cæmini iinque botö, Mini cöwë quëwenguinta, ante poganta bai minitö iminite pönömo ämaïminipa.

¹¹ “Wayömö wayömö inca botö imote godongämä nani pönencabo inänite Wængongui Önowoca quïnö angää, ante tömengä nänö änö ante në ëamonca imäni inte eñeedäni. Wadäni adopoque wæninqe nani mempoga wænguiämäo bai tæi emonte në gänä cædäni iñömö wæætë mempoga wænämaï incædänimpa, ante mäninque ämopa,” ante Waocä në eñagaingä iñömö botö imote apænecäimpa.

Pedegämo iñömö quëwëñäni inänite Itota nänö änö

¹² Ayä adocä godömenque apænecantapa.

“Pedegämo iñömö Wængongui ingante godongämä nani pönencabo inänite në aacä acæcäimpa, ante botö änö ante iimai yewæmoe ämopa. ‘Botö edæ yaëmë tipængaa waingamë engamë näæmo imopa.

¹³ “Ædönö quëwëminii, ante botö do eñëmopa. Tatäna containpa ongonte nänö aayömö adoyömö minitö quëwëmini imäni incæte botö imo edæ ñimpo cædämaï quëwëmini iminipa. Mini quëwëñömö Tatäna adoyömö quëwengä iinque, Antipato edæ botö änö ante cöwë pönëninque ædæmö apænedongä iñongante mäniñömö quëwëñäni tömengä ingante wænönäni wængantapa. Tömengä wænëdë inca minitö botö imote edæ, Dicæ pönëmogaa, äñämaï iminipa.

¹⁴ “Incæte panca mini cædinö wii waa abopa. Edæ pancaminiya docä Badöo nänö odömonte apænecäinö ante eñëwëmini awädö. Tömengä iñömö, Badaco godö cæcä beyænque idægoidi tee tëwate bai oda cæcædänimpa, ante cædinque adocä Badaco ingante odömonte apænecä eñente cægacäimpa. Wadäni, Mönitö wængongui cængui impa, ante nani cönöni ante, Minitö cædäni,

ante Badaco iñömö idægoidi inänite odömonte apänegacäimpa. Ayä onquiyänäni tönö godö towente cæedäni, ante odömonte apänegacäimpa.¹⁵ Ayä pancaminiya adobaï Nincodaitaidi nani odömonte apänedö ante ëñewëmini awædö.¹⁶ Mänömaï beyä mini wënæ wënæ cædinö ante, Ancaa wæwente awædö, ante pönente ñimpo cæedäni. Minitö mini wënæ wënæ cædinö ante wædämaï imini adinque botö wantæ iñonte minitö weca pömaïmopa. Pöningue tömënäni nani odömonte apänedö ante në ëñewënäni iñönänite botö önöne incæ yaëmë ënedinque yædæ tædedinque guëadö guëa cæcæboimpa.

¹⁷ “Wayömö wayömö incæ botö imote godongämä nani pönencabo inänite Wængongui Önöwoca quinö angää, ante tömengä nänö änö ante në ëamonca imini inte ëñeedäni. Tæï ëmonte në gänä cædäni inänite cængui mänää nani angainö botö wë wodöni cængui iñonte godömo ænte cæncædänimpa. Adodäni inänite adobaï dica näämæntaca godömo æncædänimpa. Wa ëmöwo ante pemöningue mänincaa yewæmonte ingäimpa. Në ænänique mäniwo ëñenäni inänipa,’ ante mäningue ämopa,” ante Waocä në ëñagaingä iñömö botö imote apänegacäimpa.

Tiatida iñömö quëwënäni inänite Itota nänö änö

¹⁸ Ayä adocä godömenque apäñecantapa.

“Tiatida iñömö Wængongui ingante godongämä nani pönencabo inänite në aacä acæcäimpa, ante botö änö ante iïmaï yewæmöe ämopa. ‘Botö edæ Wængongui Wëmo inömo imopa. Botö awinca incæ gonga wo bæcote bai në ëmömo imopa. Botö önöwa incæ yaëmenta bodonte nani änö bai ñäö bai në ëwabo imopa.

¹⁹ “Minitö æbänö cæminii, ante mini waadete pönönö ante mini wede pönönö ante wadäni inänite mini waa cædö ante botö do ëñëmopa. Minitö wæntæye inämaï inte ee cædinque godongämä cæmini iminipa, ante ayä, Wëñëñedë do waa cædimini inte ñöwo godömenque waa cæmini iminipa, ante adobaï do ëñëmopa.²⁰ Incæte adoque pönï mini cædinö wii waa abopa. Onquiyängä Etabete në ëmongä iñömö edæ, Wængongui beyä në apänebo, ante nämä incæ në angä ingante wido cædämaï imini inte wæætë tömengä ingante ayä godömenque Ao äminipa töö. Ìnæmpa tömengä iñömö botö imote në cædäni inänite nänö odömonte apänedö beyænque oda cæte gocædänimpa, ante cæcä beyä tömënäni onquiyänäni tönö godö towente cædänipa. Wadäni, Mönitö wængongui cængui impa, ante nani cönöni cænänipa töö. Mänömaï cæcædänimpa, ante mäningä onquiyängä odömonte apäñecäimpa.

²¹ “Tömengä nänö towente cædimämo ante, Botö wënæ wënæ cæbo inte ancaa wæwente awædö, ante pönente wabänö ñimpo cæquingää, ante botö tömengä ingante ee pänämaï intabopa. Incæte tömengä nänö wënæ wënæ cædö ante wædämaï quëwengä ingampa.²² Ìninqe botö, Tömengä ingante cæbo beyænque wënæ wënæ bate wæwencæcäimpa, ante cæcæboimpa. Ayä tömengä nänö odömonte apänedinö bai në ëñente cædäni iñömö tömengä tönö nani guëa godö möwëninö ante, Mönitö wënæ wënæ cæmöni inte ancaa wæwente awædö, ante pönente ñimpo cædämaï inäni ininqe tömënäni inänite adobaï botö cæbo beyænque nangui wënæ wënæ bate wæwëmainänipa.²³ Tömengä wënäni inänite wænömo wæncædänimpa. Ìninqe wayömö wayömö incæ botö imote

godongämä nani pönencabo tömancabodäniya iñömö, Botö incæ tömënäni nani mímöno tönö ocaidë, Æbänö pönënäni, ante nē ēñemo inömo imopa, ante ēñencädänimpa. Ayä minitö cædi bai ante adinque botö wæætë adobaï minitö tömämäni iminite cæcæboimpa.

24 “Wamini pancaminiya guiquenë Tiatida iñömö quëwëmini inte mäningä onquiyängä nänö odömonte apænëdö ante minitö nē pönënämaï iminipa. Ayä Tatäna wë wodonte nänö angainö ante ēñënämaï iminitapa. Ininque botö minitö iminite iïmaï ämopa. Minitö teëmë mongæncoo mongænte gote bai wädämaï incämäniimpa, ante wadö ante änämaï incæboimpa. 25 Wæætë botö ocä ëmænte wæænganca minitö edæ do mini pönënö ante ñimpo cädämaï iedäni. Mäningä ämopa.

26 “Inguipoga iinque baganca ædänidö botö änö nē cädönäni inte tæi ëmonte nē gänä cädäni inänite botö pönö cæbo ate tömënäni nämä tæi piñænäni badinque tömämä quëwënäni inänite nē änäni bacädänimpa. 27 Botö Mæmpo botö imote pönö cæcä beyænque Awënë badinque nämä tæi piñænte inte nē ämo bai botö adobaï tömënäni inänite pönö cæbo beyænque awënëidi badinque aacädänimpa. Tæiyä awënë tömengä nempo quëwënäni inänite aacä bai tömengä iñömö tömämä quëwënäni inänite, iïmaï cädäni, ante aacæcäimpa. Dai inte bæte cængämö tæi ænacä nancate bai cædinque tömengä adobaï wabæca wabæca quëwënäni inänite nanguï pante cæcæcäimpa. 28 Mäninäni inänite botö adobaï wadaamö ñäö bayonte apäimö incæ godömo æncädänimpa.

29 “Wayömö wayömö incæ botö imote godongämä nani pönencabo inänite Wængonguï Önöwoca quinä angää, ante tömengä nänö änö ante nē ëamonca imini inte ëñeedäni, ante mäningä ämopa,” ante Waocä nē ëñaingä iñömö botö imote apænægacäimpa.

Tadoditiidi inänite Itota nänö änö

3 Ayä adocä godömenque apænecantapa.

“Tadoditi iñömö Wængonguï ingante godongämä nani pönencabo inänite nē aacä acæcäimpa, ante botö änö ante iïmaï yewæmoe ämopa. ‘Wængonguï Önöwoca incæ önompö æmæmpoque go mëwoga önöwocaidi ëwocadongä ingampa. Botö iñömö tömengä ingante nē ëwocate quëwengaimo inte nëmöidi önompö æmæmpoque go mëa ganca inäni nē næænte ingaimo imopa.

“Ininque, Minitö æbänö cæminii, ante do ëñemopa. Minitö mümini quëwëminipa, ante wadäni apænëdäni incæte minitö wii waa cæte quëwëmini inte do wængainäni bai iminipa töö. 2 Edæ, Botö Wængonguï ayongä mini cædinö wii eyepæ cæminipa, ante adinque botö, Näni ömæmödäni, ante ämopa. Näni ömæmöninque minitö, Ayä müinäni quëwënäni incæ nē wæncæ cädäni bai badäni incæte tömënäni wänämaï inte wæætë tæimö bacädänimpa, ante cädäni. 3 Mänömaï beyä, Quiëmë do ænimini bai iminii, quiëmë ante do ëñëminii, ante mäninö ante wæætë adodö ante pönëedäni. Pönëinque minitö mäninö ante ëñente cädäni. Ayä mini wænæ wænæ cædinö ante, Anca wæwente awädö, ante pönente ñimpo cädäni. Wæætë minitö wii ñäni ömæmonte bai imini ate wædinque botö incæ minitö weca awëmö nē ængä bai pömaimopa. Ayä, Awëmö nē ængä æyedënö ponguingää, ante ëñënämaï inäni

baï botö adobaï minitö ëñënämaï iñömïni minitö weca awëmö ponguïmo apa quëwëminii.

⁴“Incæte Tadoditi iñömö mini quëwencabo iñöminite pancadäniya tömënanï weocoo wentamö nämönämaï baï iñinäni inte në waa cæte quëwënänipa. Mäninäni waa cæte quëwënäni beyæ eyepæ iñönäni inte weocoo näämëntacoo mongæante botö miñæ gocädänimpa. ⁵Në tæï ëmonte gänä cädäni iñömö adobaï weocoo näämëntacoo mongæncädänimpa. Ayæ, Quëwenguinta, ante Wængonguï nänö yewæmongaintaa mäninäni ëmowo do yewæmõi iñinque botö cöwë wadæ cädämaï incæboimpa. Wæætë botö Mæmpo Wængonguï weca ayæ tömengä anquedoidi weca botö, iñäni botö miñæ gogainäni inänipa, ancæboimpa.

⁶“Wayömö wayömö incæ botö imote godongämæ nani pönencabo inänite Wængonguï Önöwoca quïnö angää, ante tömengä nänö änö ante në ëamonca imini inte ëñëdäni, ante mäninque ämopa,” ante Waocä në ëñagaingä iñömö botö imote apænecäimpa.

Pidadedepiadi iñänite Itota nänö änö

⁷Ayæ adocä godömenque apænecantapa.

“Pidadedepia iñömö Wængonguï ingante godongämæ nani pönencabo inänite në aacä acæcäimpa, ante botö änö ante iïmaï yewæmõe ämopa. ‘Botö edæ në Tæiyæ Waëmö ingaïmo imopa. Nö ante cægaïmo inte botö docä Awënë Dabii nänö wi ænequï në näængaïmo imopa. Iñinque quïnö odemö botö wi ænebo incæ mäninemö wacä ædö cæte tee mönequingää. Ayæ quïnö odemö botö tee mönebo incæ mäninemö wacä ædö cæte wi ænequingää.

⁸“Minitö æbänö cæminii, ante do ëñëmopa. Minitö cæcæminimpa, ante botö odemö wi ænete baï cæbo aedäni. Æcänö mäninemö wæætë tee mönequingää. Edæ dæ angampa. Minitö wïi tæï piñæmïni imini incæte botö angainö ante ëñente cæminii inte botö ëmowo ante, Dicæ ëñëmöniyaa, ante änämaï iñimïni iminipa. Botö do ëñëmopa. ⁹Möni oodeocabo imöni incæ pancadäniya, Mönitö Wængonguï ingante möni ëñencabo imönipa, änäni incæte inämaï inänipa. Wæætë tömënanï iñömö babæ anewënäni inänipa. Tatäna ingante nani ëñencabo inänipa töö. Botö godö cæbo ate adodäni minitö weca ponte minitö önöwa gäänë ædæ wæncädänimpa. Ayæ, Botö minitö iminite në waadete pönengäimo imopa, ante botö godö odömömo ëñencädänimpa. ¹⁰Minitö iminite, Ee cædinque wæntæye inämaï iedäni, ante botö angainö ante ëñente në cædimini imini adinque botö wæætë minitö iminite wææ aacæboimpa. Inguipoga quëwënäni tömänäni nani wæwenguimämo ancaa baquinö anguënë. Edæ Tatäna, Æbänö quëwënänii, ante acæte ante cæcä ate nani wæwëñedë botö iñömö, Minitö wæwënämaï incæminimpa, ante minitö iminite wææ aacæboimpa.

¹¹“Botö oo ocæ ëmænte ponguïmo imopa. Wængonguï poganta nänö godonguinta, ante minitö iminite godongä æncæminimpa. Mäninta mini ænguinta iñömö wacä ænämaï incæcäimpa, ante minitö mini entawënö ante godömenque godömenque ñimpo cädämaï iedäni. ¹²Botö cæbo ate waodäni tæï ëmonte në gänä cädäni iñömö tömëmö Wængonguï tæiyæ waëmö oncönë wantæpiyæ quëwenguinänidö anguënë. Tömënanï Wængonguï weca cöwë

quëwente taodämaï incädänimpa. Tömënäniya botö Wængongui ëmowo yewëmoncæboimpa. Mii Eedotadëë nani äñömö iñömö botö Wængongui nänö quëwëñömö iñonte manii tömengä nänö quëwëñömö incæ öönädë inö da pönongä wæængæïmpa. Mänii Wængongui nänö quëwëñömö ëmowo botö adobaï tömënäniya yewëmoncæboimpa. Ayæ botö wawo botö ñowo pemongaiwo adobaï tömënäniya yewëmoncæboimpa.

¹³ “Wayömö wayömö incæ botö imote godongämæ nani pönencabo inänite Wængongui Önöwoca quïnö angää, ante tömengä nänö äñö ante në ëamonca imini inte ëñëedäni, ante mäninque ämopa,” ante Waocä në ëñagaingä iñömö botö imote apænægacäïmpa.

Daoditeaidi inänite Itota nänö äñö

¹⁴ Ayæ adocä godömenque apænecantapa.

“Daoditea iñömö Wængongui ingante godongämæ nani pönencabo inänite në aacä acæcäïmpa, ante botö äñö ante iïmaï yewämöe ämopa. ‘Botö ëmowo Amëë, ante pemongaimo inte botö cöwë, Näwangä impa, ante në cöwë ædæmö apænegaïmo imopa. Wëëñëedë Wængongui nänö badongäñedë mäniñedë botö tömengä tönö godongämæ badongaimo beyænque tömengä nänö badongaincoo tömancoo Awënë badinque botö në ämo imopa.

¹⁵ “Minitö æbänö cæminii, ante do ëñëmopa. Yoguipä bai inämaï imini incæte ocoi ämä bai adobaï inämaï iminipa töö. Iñæmpa yoguipä bai iminipa diyæ waa aquimoo. Edæ ocoi ämä bai iminipa diyæ waa aquimoo. ¹⁶ Minitö yoguipä bai inämaï imini incæte ocoi ämä bai inämaï imini inte wæætë wii eyepæ cæmini inte gänë ämä bai iminipa töö. Mänömaï beyæ botö edæ tömëmo önönë towæ tänonte bai minitö iminite adobaï wido cæcæ cæbo apa quëwëminii. ¹⁷ Minitö, Mönitö nanguï ëamöni imönipa, ante äminipa. Edæ, Tömëmöni mäincoo gæte da wëninque eyepæ ëamönipa, ante äminipa. Iñæmpa mäninö ante wapiticæ pönente äminipa. Minitö mini wæwënö incæ ëñënämaï iminipa töö. Minitö æbänö bate cæminii, ante adinque wadäni, Minitö wodi, ancädänimpa. Ömæpodäni bai imini inte minitö babetamönäni bai imini inte ömaadäni bai imini incæte, Mänömaï imönipa, ante ëñëmünyaa.

¹⁸ “Mänömaï beyæ botö, Iïmaï cædäni, ante waadete ämopa. Botö pönö cæbo beyænque minitö wæætë waa bate bai nanguï cæcæminimpa, ämopa. Mäninö botö pönö cædö iñömö oodo gongapamö aca podonte ate wæmö oodo bate bai impa. Iñinque minitö, Mönitö nanguï ëamöni bacæmönimpa, ante cædinque botö weca ponte tömëmo oodo ante godonte æedäni. Ayæ, Ömaamöni inämaï incæmönimpa, ante guingo imönämaï incæmönimpa, ante minitö botö weocoo näämæntacoo godonte æente mongæedäni. Ayæ minitö, Awinca waa acæïmpa, ante cædinque tömëmo awinca cönömöimæ godonte æninque cönömöedäni.

¹⁹ “Botö në waadete pönënäni inänite botö piïnte ämo inte adobaï pante cæbo imopa cæminii. Minitö nanguï cædinque mini wënæ wënæ cædinö ante, Ancaa wæwente awädö, ante pönente ñimpo cædäni. ²⁰ Ëamonca ëñëedäni. Botö incæ odemö yabæ inö ongonde bai waomini mimöno a ongöninque, Wi ænequï, ante aa peyömo waocä acæamenque incæ ëñëninque odemö wi ænete botö imo, Pö guie, angä ininque botö iñömö edæ tömengä mimönë pö gui-

icæboimpa. Tömengä mimö botö oncö bai iñonte botö tömengä tönö cænte bai cöwë quëwencæboimpa. Ayæ tömengä wæætë botö tönö cænte bai cöwë quëwencæcäimpa. ²¹ Botö tæi ëmonte në gänä cægaïmo inte botö Mæmpo nänö aacæ tæ contaïmpaa tömengä tönö guëa tæ contagaïmo bai në tæi ëmonte në gänä cædäni iñömö adobaï botö tömëmo aacæ tæ contayömo botö tönö godongämæ tæ contacädänimpa, ante ämo adopaa tæ contaquïnäni.

²² “Wayömo wayömo incæ botö imote godongämæ nani pönencabo inänite Wængongui Önöwoca quïnö angää, ante tömengä nänö änö ante tömënäni në ëamonca imïni inte ëñëedäni, ante mäninque ämopa,” ante Waocä në ëña-gaingä iñömö botö imote apænëgacäimpa.

Öönädë iñömö Wængongui ingante watapæ apænädäni

4 Botö Wäömo inömo inte ayæ ate ämö ayömete öönädë inö odemö wi änete atabopa. Todompeta nani anacadeca we öonte yedæ tæ bai tedepämo täno botö ëñëninö iñömö nïwo wæætë adopämo botö imote iïmai äninque, “Iñömö pö æe. Äñömite botö, Ayæ ate quïnö baquënë inguii, ante bitö imite edonque odömömo acæbiïmpa,” angantapa.

² Mäninö ante äñongä Wængongui Önöwoca incæ botö imote bæi ongonte bai cæyongä botö wiïmonte bai adinque iïmai atabopa. Öönädë inö Awënë tæ contaïmpa ayömo adocanque mänïñömö tæ contacä atabopa. ³ Mäningä adoyömo në tæ contadongä iñömö dica nääo bai ëmonca bai adobaï ëmongä ingantapa. Aatape nani äninca bai codönädina nani äninca bai mäninca menca nääo bai inca bai tömengä adobaï ëmongä ingantapa. Awënë tæ contaïmpa iñömö daimë dica bai etëmedada nani äninca ëmonca bai inte æidämæ waïmë pöni gongämënimpa. ⁴ Mänimpa Awënë nänö aacæ tæ contaïmpa waimpacoo bæinticoatodo ganca mänimpopacoo mänïñömö godämæ a ongompapa. Adopacoo iñömö në aadäni në Picænäni bæinticoatodo ganca mänimpodäni tæ contadinque näämæntacoo mongæninque poganta oodo inte badöinta da wencate a ongönänitapa. ⁵ Awënë tæ contaïmpa inö näinte yædæ yædæ ta gote detæbo tæi tæi tæ tëñonte yedæ pöni änimpa. Ayæ Awënë tæ contayömo tæcætawë inö ti wodönoincade önompo æmæmpoque go mencadea wocædöincade-coo a ongönimpa. Wængongui Önöwoca incæ önompo æmæmpoque go mëwoga önöwocaidi bai ëwodongä inte mänincadeco bai ingampa.

⁶ Ayæ Awënë tæ contaïmpaa tæcætawë inö adobaï gäwapæntibæ bai iñonte awocawænta bai inimpa. Ayæ Awënë tæ contaïmpa iñömö miïnäni quëwënäni mënaa go mënaa inäni godämæ a ongönänitapa. Mäninäni iñömö tæcætawë inö önöñabæ inö tömäo awinca ëmönäni atabopa. ⁷ Tänocä miingä quëwengä botö adingä iñömö nëöo bai ëmongampa. Ayæ wacä miingä quëwengä botö adingä iñömö wagada mæmpo bai ëmongampa. Wacä miingä quëwengä botö adingä iñömö tömengä awinca waocä awinca bai ëmongampa. Ayæ tömangä miingä quëwengä botö adingä iñömö guingämöwæ pao pao gocä bai atabopa. ⁸ Mëa go mëa miïnäni quëwënäni incæ adocanque adocanque önompo æmæmpoque go adoguënepænque ëmænte quëwënäni inänipa. Ayæ adodäni inte tömënäni baonga godämæ tömanga nangui pöni awinca ëmonte ænömengadænguënepæ incæ awinca adobaï ëmönänipa. Mäninäni edæ itädë woyowotæ nïmpo cædämaï inte iïmai ante ämotamini äänipa.

“Bitö Tæiyæ Wæmö Awënë imidö, bitö Tæiyæ Wæmö Awënë imidö, ante ämönipa.

Wængongui Awënë bitö adobique Tömää nē Cæbi inte wēēnēnedē do nē quēwengaimi imi nōwobi adobi inōmi inte ayæ wantæpiyæ cōwē quēwencæbiimpa.”

Ante ämotamini ante cōwē änanipa.

⁹Awënë tæ contaimpaa nē tæ contadongä inte nē wantæpiyæ cōwē quēwengaingä ingante apænedinque mēa go mēa mīināni quēwēnāni inōmō iīmaī ante apænedänipa. Bitö nāö emōmi imipa, ante apænedinque tōmēnāni, Bitö imite waa amōnipa. Mōnitö bitö imi waa ate pōnente apænemōnipa, ante apænedänipa.

¹⁰Mänōmaī ante apæneyōnāni nē aadāni nē Picænāni inōmō bæinticoatodo ganca mänimpodāni Awënë tæ contaimpaa nē tæ contadongä inte nē wantæpiyæ cōwē quēwengaingä weca ædæ wææninque tōmengä ingante, Bitö Wængongui Awënë imidö anguēnē, ante watapæ apænedinque tōmēnāni poganta gä æncadinque Awënë tæ contaimpa gäänē cō cædinque iīmaī ante ämotamini ante änanipa.

¹¹“Bitö inōmō mōnitö Wængongui Awënë imidö, ämōnipa. Bitö badöinēnō, ante pōnente ingaimi inte öönädē ongōnāni tōnō inguipoga ongōnāni tōnō tōmānāni inānite badongaimi imipa.

Bitö wii badömi bai tōmānāni badongaināni quēwēnāmaī dæ ancædōnānimpa.

Mänōmaī beyæ bitö eyepæ inōmi inōmite, Bitö nāö emōmidö anguēnē, ante mōnitö bitö imite waa amōnipa.

Bitö nāmā tæi pīñante nē cæbi imidö, ante bitö imite ämōnipa,”
ante ämotamini ante änanipa.

Wængongui Codotedo yewämöinta wi æmpocampa

5 Ayæ Awënë nänö aacæ tæ contaimpaa nē tæ contacä inōmō tōmengä önönempo tōmempo incæ yewämöinta dadi ompointa næængä atabopa. Mäninta tipäataa yewämöinta impa. Adotaa yæwedeta inōmō guinēnca bai inte tee bædinta önompō æmæmpoque go mentaa inimpa. ²Ayæ Wængongui anquedo adocanque nē tæi emongaingä inte yedæ aa pecä atabopa. “Mäninta dadi ompointa wi æmpoquii, ante æcänö nō waa pōni inongä inte eyepæ inte tee bædedinta wāa wāa ænete wi æmpoquingäa,” angantapa. ³Ayæ öönädē incæ inguipoga incæ tadömengadænga incæ cōwä ayōnāni, Æcänö mäninta wi æmpoquingäa, cæncadenta inō æcänö aqingäa, ante edæ dæ angantapa. ⁴Æcänö nō waa pōni inongä inte eyepæ inte dadi ompointaa wi æmpoquingäa inōmō edæ dæ angampa. Cæncadenta inō æcänö aqingäa ante dæ angampa, ante adinque nangui pōni Ca ca wætabopa. ⁵Ca ca wæbo adinque nē aadāni nē Picænāni inōnāni adocanque nē Picængä incæ botö imo, “Wädāmaī ie. Wæætē cōwä ae, angantapa. Adocanque onguinængä inōmō mäninta wi æmpoquingä a ongongampa. Awënë Dabii Pæingä incæ tōmengä inōmō docä Oodaa pæināni nāni cabo inōnte nē nēöo bai tæi emōnongä inte nē gänä cæcä ingaingä ingampa. Tōmengä inōmō edæ eyepæ inte tee bædedinta önompō æmæmpoque go mentaa wi æmpodique dadi ompointa wi æmpocæcäimpa,” angantapa.

⁶Ayæ Wængongui Codotedo nāni wænōnāni nē wæningä bai ingä atabopa. Tōmengä Awënë Wængongui nänö aacæ tæ contayömō tæcæguedē ongōnongä mīināni quēwēnāni mēnaa go mēnaa ināni tōnō nē aadāni nē Picænāni godāmæ a ongōnāni atabopa. Tōmengä inōmō önōmoncawæncōo önompō æmæmpoque go mēwāa emōncadinque awinca önompō æmæmpoque go mēmōnga emōngacäimpa. Edæ Wængongui Önōwoca incæ önompō æmæmpoque go mēwoga önōwocaidi bai

nänö ewocadö bai mänii awincacoo inänipa. Adodäni önöwocaidi inänite ingui-poga da pönongä pöninque tömënäni ingui-poga tömämæ gote cæwodäni inänipa. ⁷Ayæ Wængongui Codotedo inömwö Awënë tæ contayömwö pöninque në tæ contadongä önönempe tömempo inö dadi ompointa nänö nææninta ö ængantapa. ⁸Tö-mengä mäninta ö ængä ate mäa go mäa miinäni quëwënäni tönö në aadäni në Picænäni bæinticoatodo ganca mänimpodäni Wængongui Codotedo weca ponte ædæ wæænänitapa. Inäni tömänäni ampoqui adapa nani änö nææninque owæta oodo inte nani badointa ogui waaqui eyede enga næænänitapa. Wængongui quinäni tömengä ingante nani apænedö inömwö mänii ogui waaqui bai impa. ⁹Tömënäni mä äninque iimaï ante ämotamini ante änanitapa.

“Bitö imite wænönäni në wænimi inte bitö nö waa pöni inömi imipa.

Ininque bitö eyepæ inte dadi ompointa ænte tee bædedinta waa waa ænete wi ampoquimi imipa.

Woadäni nani cabo woadäni nani cabo incæ wadö nani tedecabo wadö nani tedecabo incæ

wacä awënë nani cabo wacä awënë nani cabo incæ wabæca nani quëwencabo wabæca nani quëwencabo incæ woadäni inänite bitö,

Wængongui quimini bacæminimpa, ante cædinque nämä wepæ godonte ængabiimpa.

¹⁰Bitö nempo quëwëninque tömënäni bitö tönö godongämæ aadäni bacædänimpa, ante badongabiimpa.

Mönö Wængongui ingante cæcædänimpa, ante bitö pönö cæbi ate tömënäni,

Mönö Awënë Odeye Wængongui qui, ante në godönäni bagainäni inänipa.

Mäninäni edæ awënëidi badinque ingui-poga quëwënäni inänite aacædänimpa.” ante ämotamini änanitapa.

¹¹Ayæ ayömo Wængongui anquedoidi inömwö bacoo inäni inte ämotamini änäni ëñëninque, Tömënäni æpodö müido ganca inänii, ante botö ædö cæte tee mampote ëñenguimoo. Edæ miinäni quëwënäni tönö në aadäni në Picænäni tönö Awënë tæ contaimpa gäänë tæcæguedë ongönönänite Wængongui anquedoidi inömwö yabæque godämæ gongænte ongönänitapa. ¹²Mäninömwö godämæ ongöninque tömënäni yedæ äninque iimaï ante ämotamini änanitapa.

“Wængongui Codotedo ingante wænönäni në wæningä inte tömengä nö waa pöni inongä inte eyepæ ingampa.

Tömengä edæ tæi piñængä ingänö angüënë.

Tömengä quincodö incæ tömancoo në ëacä inte tömänö ante ëñënongå ingänö angüënë.

Tömengä tæi piñænte inte tömäa nänö cæinënö cædongä ingampa.

Tömengä ingante, Bitö imite waa amönipa. Bitö nãö ëmwömidö angüënë, ante bitö imite watapæ apænemönipa,” änanitapa.

¹³Ayæ Wængongui nänö badongainäni öönædë quëwënäni incæ ingui-poga quëwënäni incæ tadömengadæ quëwënäni incæ gäwapæntibædë quëwënäni incæ tömänäni adoyedë iimaï ante ämotamini ante änäni ëñentabopa.

“Awënë tæ contaimpaa në tæ contadongä ingante ayæ Wængongui Codotedo ingante tömëna inate iimaï ämönipa.

Minatö iminate watapæ ämönipa. Minatö iminate waa amönipa.

Minatö nãö ëmwöminadö angüënë. Minatö tæi piñæmina iminadö angüënë.

Wantæpiyæ iñonte mäninö ante cöwë ancæmönimpa,” ante änänitapa.

¹⁴ Ante äñönäni mäa go mäa miinäni quëwënäni adobaï, “Iimaï baquino anguënë,” ante, “Amëë,” änänitapa. Ayæ nê aadäni nê Picænäni iñömö ædæ wææninqe wat-apæ änänitapa.

Teæ bædinta önonpo æmæmpoque go mentaa

6 Ayæ Wængonguï Codotedo iñömö tee bædinta önonpo æmæmpoque go mentaa incæ yewæmointa dadi ompointa tee bædedinta tänota wi æmpoyongä atabopa. Ayæ mäa go mäa miinäni quëwënäni incæ adocanque iñömö tömengä nänö tede-pämo detæbo tē bai inte botö imote, “Pöe,” ante yedæ angä ëñentabopa. ²Tæcæ ayömo cabayo näämänta ëñacä do a ongongä atabopa. Cabayo inte nê tæ contacä iñömö to piyæncaimpa näængantapa. Tömengä iñömö wadäni inänite guëädö guëa cæte täi ëmongä inte gänä cædongä iñongante Awënë poganta pönönäni æninqe tömengä wæætë guëädö guëa cæcæte ante cabayo mongænte gocantapa.

³ Ayæ Wængonguï Codotedo wæætë tee bædedinta wataa wi æmpoyongante mäa go mäa miinäni quëwënäni incæ wacä iñömö botö imote, “Pöe,” angä ëñentabopa.

⁴ Ayæ wacä cabayo opatawæ gonga ëmö bai ëñacä pongantapa. Waodäni incæ wacä ingä wacä ingä wænoncædänimpa, ante cædinque Wængonguï godö angä beyænque cabayo inte nê tæ contacä iñömö, Inguipoga quëwënäni piyænë cædämaï incædän-impä, ante nê cæcä bacantapa. Ayæ, tömengä ingante nñänä yaëmë bai pönönäni ængantapa.

⁵ Ayæ Wængonguï Codotedo wæætë tee bædedinta wataa wi æmpoyongante mäa go mäa miinäni quëwënäni incæ ayængä iñömö botö imote, “Pöe,” angä ëñentabopa. Tæcæ ayömo cabayo wentamö ëñacä do a ongongä atabopa. Cabayo inte nê tæ contacä iñömö tee manguï önönempo näængä ingantapa. ⁶ Ayæ mäa go mäa miinäni quëwënäni weca tedepämo bai ëñëñömo, “Todigomö tönö tebadamö näni cæn-guimö, ante nanguï näni godonte æimö impä, ancæte ante iimaï angä ëñentabopa. Tömää itädë cædäni ate näni cæganca beyæ todigomö mäa diboda pöni tee manguï ganca mäninqe godonte æncædänimpa. Adobaï tömää itädë cædäni ate näni cæganca beyæ tebadamö önonpo æmæmpoque go adoque diboda tee manguï ganca mäninqe godonte æncædänimpa. Ayæ oginguipæ ante odibomö näni ämö eyepæ pæcäimpa, ante ee aedäni. Biinömæ ante yowe eyepæ pæcäimpa, ante ee aedäni.”

⁷ Ayæ Wængonguï Codotedo wæætë tee bædedinta wataa wi æmpoyongante mäa go mäa miinäni quëwënäni incæ tömengä iñömö botö imote, “Pöe,” angä ëñentabopa. ⁸ Tæcæ ayömo cabayo nämënäa ëñacä do a ongongä atabopa. Cabayo inte nê tæ contacä iñömö tömengä ëmöwo, Nê Wænöinengä, ante pemonte ëmongantapa. Waodäni näni wænte ongöñömö awënë tömengä miñä tee empo pongantapa. Wængonguï Codotedo pönö cæcä beyænque tömëna inguipoga quëwënäni inänite adinque mënaa go mënaa iñönänite adocanque ingante wænöninqe ayæ wadäni mënaa go mënaa iñönänite adocanque ingante wænöninqe nangui inäni inänite nê wænöna badatapa. Tömëna pancadäniya inänite yaëmenca nê wænöna badatapa. Ayæ tömëna godö cæda beyænque waodäni pancadäniya gue ænente näni wænguimämo pö wæncædänimpa. Ayæ tömëna godö cæda beyænque pancadäniya quingä wodonte näni wænguimämo pö wæncædänimpa. Ayæ tömëna godö cæda beyænque pancadäniya babæidi wænönäni beyæ wæncædänimpa.

⁹ Ayä Wængongui Codotedo wæætë tee bædedinta wataa wi æmpoyongante botö, Wængongui qui, ante nani wëmonca iya täimoga ænömengadä inö waodäni önö-wocaidi owodäni atabopa. Mäninäni Wængongui nänö angainö ante nē ēñente cædäni inte, Itota mönö Codito inongä ingampa, ante, Nö ante impa, ante apænedäni beyä tömënäni inänite wænönäni wængainäni inänitapa. ¹⁰ Adodäni yedä äninque iimaï änanitapa, “Awënë Wængongui bitö tömänäni inänite nē Aabi inömi imipa. Edä tæiyä wæmö inömi inte bitö nē nö ante apænebi imipa. Äninque ingui-poga quëwënäni mönitö imönite nē wænöninäni inänite æiquedö apænte anguimii. Ayä mönitö wepæ möni gowepæ beyä ante tömënäni inänite æiquedö pangüimii ämönipa.” ¹¹ Mäninäni tömänäni inänite tömengä doyæncoo näämæntacoo pönongä ænanitapa. Äñönänite, “Wædænque ayä ee ongödäni,” äninque tömengä, “Minitö imönite do wænönäni wæmini bai wadäni mini töniñadäni ayä miinäni quëwënäni inte minitö tönö Wængongui ingante nē cædönäni inänite wænongcædänimpa. Iinäni inänite wænonguënänäni inänipa, ante Wængongui nänö äno bai tömënäni inänite iinque nani wænonganca ee ongödäni,” ämopa, ante angantapa.

¹² Ayä Wængongui Codotedo wæætë tee bædedinta wataa wi æmpoyongä atabopa. Mäniñedë täimö goinque ocæ ocæ gotimpa. Waodäni tömënäni guiidengä wängä ate wæwente beyænque wentamoncoo mongænäni bai nænque iñontobæ adobai wentamö pönö emö batimpa. Apäicä pæibo iñedë incæ wepæ bai opatawæ emö batimpa. ¹³ Ayä nëmoncoo öönædë inö owocoo iñömö wæä tæ ayä waa wæä tæ ayä waa wæä tæ ingui-poga iñömö tæ wæäñinque iigowæmö ayä icadämaï iñonte nanguï woboyä pæmäñonte woga woga cædinque tæ wæænte bai adobai tæ wæänänitapa. ¹⁴ Ayä öönæ incæ mincayonta dadi ompote bai dæ ä batimpa. Ayä tömanquidi tömää wää tæiwænë iñontobæ wayömö gote dæ ä bai inimpa.

¹⁵ Ayä awënë odeyeyidi incæ nænænäni inte nē cædönäni incæ tontadoidi awënëidi incæ nē nanguï éadäni incæ tæi piñænte cædäni incæ tömënäni guiñente badänitapa. Ayä awënë nē godonte æningä beyænque nē cæte quëwënäni incæ nämanque cæte quëwënäni incæ tömënäni tömänäni guiñente badänitapa. Guiñente badinque tömënäni änanquidi æite ontatodë iñömö wë womönänitapa. Ayä onquiyaboga dicabocodë tæcæguedë go guiite wë womönänitapa. ¹⁶ Ayä waodäni inänite aa pete bai tömënäni, “Onquiyaboidi ëñeedäni, dicaboidi ëñeedäni, Awënë tæ contaimpa nē tæ contadongä mönitö imönite adämaï incæcäimpa, ante cædinque minitö mönitonga tæ wæænte beocaedäni,” ante aa pedänitapa. Ayä, “Wængongui Codotedo ængui badinque mönitö imönite pänämaï incæcäimpa, ante cædinque tæ wæænte beocaedäni,” ante aa pedänitapa. ¹⁷ “Edä tömëna nana nanguï pönö ængui baquionæ do ba ininque æcänö ayä quëwëngüingä. Edä dæ ä inguinö angüënë,” ante wædänitapa.

Wængongui anquedo nänö nē yewæmöinäni

7 Ayä ate Wængongui anquedoidi mënaa go mënaa ongönäni atabopa. Adocanque yædæcapæ inö ongöñongante wacä yæwaiñö ongöñongante wacä imatæ betamonca inö ongöñongante tömangä æmatæ betamonca inö a ongongantapa. Äninque, Woboyä mëa go mëa iñonte mönö a ongönö inö ingui-poga go pæmäñämaï, ante cædinque cædänitapa. Tömënäni ömaa iñömö incæ gäwapæntibæ iñömö incæ adobai tömäo awæncoo pæyömö incæ woboyä pæmäñämaï ingæimpa, ante cædänitapa. ² Wacä anquedo nænque tamönö inö pongä atabopa. Tömengä

Wængongui nè Quëwengaingä nänö yewämöingö näænte pongä atabopa. Wængongui anquedoidi mënaa go mënaa inäni inñomö inguipoga incæ gäwapæntibæ incæ wo ëwente cæcædänimpa, ante cædinque Wængongui godö cæcä beyænque tæi piñænäni badänitapa. Mäninäni inänite Wængongui anquedo ñowo pöningä yedæ aa pecantapa. ³“Ee ongöedäni. Edæ minitö inguipoga incæ gäwapæntibæ incæ awæncoo incæ ee wo ëwënämaï inñominite mönitö Wængongui ingante nè cædäni nani önönemö inö tömengä nänö yewämöi ante täno yewæmoncæmönimpa. Yewämömöni ate minitö mäninädë ate wo ëwente cædäni.”

⁴ Ayæ yewämöinäni æpodänidö badänitapa, ante apænecä ëñentabopa. Tömänäni yewämöinäni inte tieno coadenta i coatodo müido ganca inänitapa. Idægoidi nani cabo tipæmpoga go mencabodäniya inñonänite iïmaï yewämöinäni badänitapa.

⁵ Wëñëñedë Oodaa wodi pæinäni nani cabo inñonänite nè yewämöinäni inñomö tipæmpoga go mëa müido ganca inänitapa.

Ayæ Odoheë wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

Ayæ Gado wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

⁶ Ayæ Atedo wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

Ayæ Nempatadii wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

Ayæ Mänatee wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

⁷ Ayæ Timeönö wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

Ayæ Debii wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

Ayæ Itacado wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

⁸ Ayæ Tabodö wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

Ayæ Ootee wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

Ayæ adobaï Beencaminö wodi pæinäni nani cabo inñonänite nè yewämöinäni wæë tipæmpoga go mëa müido ganca inänitapa.

Tæiyænäni näämæntacoo mongænte a ongöninque

⁹ Ayæ ate wæætë ayömö tæiyænäni inäni a ongönäni atabopa. Æpodänidö inänii, ante æcänö tee mampote anguingää. Mäninäni wabæca nani quëwencabo wabæca nani quëwencabo inte tæiyænäni incæ woadäni nani cabo woadäni nani cabo inte tæiyænäni incæ wacä awënë nani cabo wacä awënë nani cabo inte tæiyænäni incæ wadö nani tedecabo wadö nani tedecabo inte tæiyænäni incæ mänömaï inñonäni inte ongönänitapa. Iinäni inñomö näämænta weocoo doyæncoo mongænäni inte yädëmëmää önönemö nææninque Awënë nänö aacæ tæ containpa gäänë ongöninque Wængongui Codotedo weca a ongönänitapa. ¹⁰ Ayæ tömënäni yedæ äninque iïmaï änänitapa.

“Mönö Wængongui iñömö tömengä nänö aacæ tæ contaimpa nē tæ contacä inongä inte

tömengä adocä mönö imonte, Quëwencæminimpa, ante nē Ængä inongä ingampa. Ayæ Wængongui Codotedo adobaï mönö imonte, Quëwencæminimpa, ante nē Ængä inongä ingampa,” äñänitapa.

¹¹Nē aadäni nē Picænäni tönö mäa go mäa miinäni quëwënäni Awënë tæ contaimpa gäänē ongöñönäni Wængongui anquedoidi tömänäni iñömö yabæ inö godämæ ongönänitapa. Wængongui nänö aacæ tæ contayömö gäänē guidömëmæ ædæ wææninqe tömënäni Wængongui ingante, Bitö Wængongui Awënë imidö anguënë, ante watapæ apænedänitapa. ¹²Ayæ äñänitapa.

“Amëë. Mönö Wængongui ingante watapæ apænemönipa.

Ayæ tömengä ñäö ëmongänö anguënë. Tömengä tömänö ante ëñëngä ingänö anguënë.

Tömengä ingante waa adinqe mönitö tömengä ingante waa ate pönente apænemönipa.

Ayæ tömengä täi piñængä ingänö anguënë.

Tömengä täi piñængä inte tömää nänö cæinënö cædongä ingampa.

Wantæpiyæ iñonte cöwë mäninö ante ancæmönimpa.

Mänömaï baquinö anguënë, ante, Amëë,” äñänitapa.

¹³Ayæ nē aadäni nē Picænäni incæ adocanque botö imo äninque, “Iinäni näämæntacoo doyæncoo nē mongænäni iñömö æmönänidö inänitawo. Edæ ædönö quëwëninäni inte pönänitawo,” angantapa. ¹⁴Äñongante botö tömengä ingante, “Awënë bitö tömëmi do ëñëmipa,” antabopa. Äñömote tömengä wæætë, “Mäninäni nangui nänö wæwengäimämo iinque baganca incæ ayæ miinäni quëwënäni inänipa. Edæ tömënäni weocoo doyæncoo, Waëmö pönö bacæimpa, ante Wængongui Codotedo wepænë yamongainäni inänipa,” ante nē aacä nē Picængä apænecantapa.

¹⁵Ayæ adocä godömenque apænecantapa.

“Mänömaï beyæ Wængongui nänö aacæ tæ contaimpa gäänē a ongöninqe tömënäni

itädë incæ woyowotæ incæ Wængongui oncö täiyæ waëmö oncönë tömengä ingante cöwë cædänipa.

Iinque oncontai bai tömënäni wænömënæca wo cæcä bai cædinque mänimpaa nē tæ contadongä iñömö

tömënäni inänite ante wææ aacæcäimpa.

¹⁶Tömënäni cöwë gue ænënämaï tepæ gæwænämaï incædänimpa.

Nænque tömënäniya ti näwänämaï i iinque tömënäni gönämaï incædänimpa.

Quiëmë ocoi ä beyænque tömënäni gonte inämaï inguinänidö anguënë.

¹⁷Edæ Wængongui Codotedo Wængongui nänö aacæ tæ contayömö gäänē nē a ongongä iñömö

tömengä iñömö mäninäni näämæntacoo nē mongænäni inänite nē aacä incæcäimpa. Tömengä edæ tömënäni inänite quëwenguimæ tapæñömö iñömö ænte mäocä goquinäni.

Ayæ Wængongui tömënäni wëñapæ nänö tamonte wædi tömämä wadæ cæmoncæcäimpa,” angantapa.

Tee bædedinta tömanta wi æmpocampa

8 Ayæ Wængongui Codotedo tee bædedinta tömanta wi æmpoyongante öönädë iñömö mëedia ooda ganca nöwæ ongonte batimpa. ² Ayæ anquedoidi önompo æmæmpoque go mëa ganca inäni Wængongui weca në a ongönäni inänite atabopa. Mäninäni inänite tömengä todompeta näni ancade önompo æmæmpoque go mēncadea ganca pædæ godongä ænänitapa. ³ Ayæ wacä anquedo iñömö ogui waaqui iya täincade oodo inte näni badöincade nææninque, Wængongui qui, ante näni iya täimpa gäänë ponte a ongongantapa. Mänimpa oodo inte näni badöimpa Wængongui nänö aacæ tæ contaimpa gäänë ongönimpa. Ayæ, Wængongui quinäni tömengä ingante apæneyönäni bitö ogui waaqui tancæbiimpa, ante cædinque adocä anquedo ingante wacä pöninque nangui ogui waaqui godongä ængantapa. ⁴ Ænte önompo næænte ogui waaqui iya tangä ininque tæëmämämo Wængongui weca æipämoyedë Wængongui quinäni tömengä ingante näni apænepämo guëa adoyömö æipämotimpa. ⁵ Ayæ adocä anquedo iñömö ogui waaqui iya täincade æninque iya täimoga gonga ænte eyede wëninque inguipoga iñömö wææntodongantapa. Wææntodongä ate detæbo tæi tæi tæ goyö yedæ pöni änimpa. Yædæ yædæ näinimpa. Ayæ goinque gotimpa.

Todompeta näni ancade

⁶ Ayæ Wængongui anquedoidi önompo æmæmpoque go mëa ganca inäni todompeta näni ancade önompo æmæmpoque go mēncadea ganca në nææinäni inte todompeta önöne gö cædedinque we we öoncæ cædänitapa.

⁷ Wængongui anquedo tänocä iñömö tömengä todompeta inte we we öongä ate yoguica gonga tönö wepæ adoyömö wempodente bai inguipoga iñömö tæ tæ wæænimpa. Tæ tæ wææ ate inguipoga iñömö pancabaa nangui ömæ iñömö gonte batimpa. Awæncoo iñömö pancacooga incæ adobai nangui incoo gonte wænimpa. Gaguimæncoo iñömö tömancoo gonte batimpa.

⁸ Wængongui anquedo ayængä iñömö tömengä todompeta inte we we öongä ate nænæ onquiyabo emö bai gonga bæcodote bai iñonte wææntodönäni gäwapæntibaa tæi tæi guitimpa. Tæi tæi guii ate gäwapæntibæ iñömö pancatibaa incæ nangui pöni æpæ iñömö wepæ batimpa. ⁹ Ayæ gäwapæntibæ cæncadëmæ inö quëwënäni iñömö pancadäniya incæ nangui inäni wænänitapa. Ayæ nænæ wipocoo pancacooga incæ nangui wo cæwodincoo iñömö wo ewente guitimpa.

¹⁰ Wængongui anquedo ayængä iñömö tömengä todompeta inte we we öongä ate nænæ nömö iñömö cadentato tica wodönote bai öönädë inö owodëmö incæ tæ wææninqe önoncooga iñömö pancacooga incæ nangui æpænë iñömö tæi tæi guitimpa. Æpæ tayömö adobai cæncadëmæ inö tæi tæi guitimpa ¹¹ Mäninëmö emöwo iñömö, Ti Nänëmö, ante näni änëmö impa. Nëmö tæi guiyonte nangui æpæ iñömö moncapæ bai ti nämæ batimpa. Waodäni tæiyænäni iñömö imæ ti nämæ bagaimæ bete wænänitapa.

¹² Wængongui anquedo ayængä iñömö tömengä todompeta inte we we öongä ate nænque pancayömonga tente ba ate apäicä adobai pancayömonga tente ba adinque näna apäidinö iñömö panca wëmö batimpa. Nëmöncoo iñömö pancadäniya incæ nangui inäni wo ewente badäni ate näni apäidinö iñömö panca wëmö batimpa. Itädë iñonte tipæmpoga go mëa ooda ganca iñö mëa go mëa ooda ganca nænque

ñäö apäidämaï inimpa. Ayä woyowotä ñönte tipæmpoga go mäa ooda ganca ñö mäa go mäa ooda ganca apäicä tönö nëmoncoo apäidämaï inänitapa.

¹³ Ayä ayömete guingämöwä öönädë gämänö pao pao godinque ñümaï ante aa pecä ëñentabopa. “Inguipoga quëwënäni nani wæquinque. Nani wæquinque. Nani wæquinque impa, angantapa. Edä Wængonguï anquedoidi mënaa go adocanque inäni inte tömënäni todompeta inte we we öoncä cädäni beyænque inguipoga quëwënäni ñömö nanguï pönï wæwenguinäni bacädänimpa,” ante guingämöwä angantapa.

9 Wængonguï anquedo ayængä ñömö tömengä todompeta inte we we öongä ate wa nëmö öönädë inö owodinque inguipoga tä wæängainëmö ongö atabopa. Mänü nëmö ingante tadömengadænguipo ontatodë wi ænequï godonte inimpa. ² Wi ænequï æninque ontatodë wi ænecä ate tēēmancoo ta æitimpä. Mänü tēēmancoo ñænæ gongapamö tēēmancoo bai inimpa. Ñinque ii tēēmancoo tadömengadænguipo ontatodë ta æiyonte nænque tönö öönæ wentamö pönï badaimpa. ³ Tēēmancodë inö ñäwäi ta pöninque inguipoga ñömö wæænñönänite wacä godö cæcä beyænque tömënäni täimö badinque emëñe inguipoga quëwënäni bai tä guidäni badänitapa. ⁴ Ayä tömënäni inänite, Inguipoga gaguimæncoo incæ gæpæñabocoo incæ awæncoo incæ pæcoo wo ëwënämaï iedäni. Wæätë waodänique önonëmö inö Wængonguï nänö yewämöi inte në yewämönämaï ingainäni inänite adinque minitö tömënäni inänite godö cämïni beyænque nantate wæcädänimpa, ante wacä angantapa. ⁵ Ayä ñäwäiidi inänite edä, Wænöedäni, änämaï ingä inte tömengä, Minitö wæätë tömënäni inänite önompo æmæmpoque apäicä ganca cämïni beyä nanguï pönï wæwencädänimpa, angantapa. Ñinque emëñe tä guï waocä nantate wæcä bai tömënäni nanguï pönï nantate wæwënäni inänitapa.

⁶ Mänïñedë waodäni, Æbänö cæte wænguimoo, ante anca cædinque wænämaï incädänimpa. Wæinëmönipa, ante änäni incæte ædö cæte wæmainänii.

⁷ Ayä ñäwäiidi ñömö tontadoidi cabayoidi guëadö guëa cæte në godäni bai adobai ëmönänitapa. Tömënäni ocaboga awënë poganta oodo inte badöninta bai wencädänitapa. Ayä mäninäni awinca ñömö waodäni awinca bai ëmönänitapa.

⁸ Tömënäni ocaguï ñömö onquiyængä ocaguï bai encadinque tömënäni bagacoo ñömö nëöö бага bai engadänitapa. ⁹ Tömënäni tæcætawë inö täineta inte badöinta bai wææ mongænänitapa. Ayä tontadoidi guëadö guëa wænnoncæte ante cædinque änäni ate cabayoidi pogodo gote awoto bai wëä pönönte nanguï pönï ä bai ñäwäiidi ñömö adobai önonguënepä pao pao godinque ämä godänitapa.

¹⁰ Tömënäni önomiñæ incæ emëñe önomiñæmpa bai ëmiñænänitapa. Tömënäni nani täi piñämämo önomiñæ inö ëmiñænäni inte önompo æmæmpoque apäicä ganca godö cädäni beyä waodäni nanguï pönï wæwënänitapa. ¹¹ Mänü ñäwäiidi ñömö awënë odaye ingante ëñente quëwënänitapa. Mäningä tömënäni awënë ñömö tadömengadænguipo ñömö quëwënäni inänite në aacä anquedo inongä inte tömengä ëmöwo ebledo tededö, Abadoö, nani äwo i ayä, Në Wo Æwengä, ante ëmongä ñinque guidiego tededö, Apodiö, ante pemönänipa.

¹² Täno nani wæquinque do ñinque batimpä. Incæte godömenque mempoga ganca nanguï pönï nani wæquinque ayä baquinö angüñë.

¹³ Wængonguï anquedo ayængä ñömö tömengä todompeta inte we we öongä ate tedepämo tēñö ëñentabopa. Oguï waquï iya täimpa oodo inte badöimpa Wængonguï weca mä ongompä. Mänümoga önömoncawä bai mäa go mäa mä ongöñömo

mäniñömö tedepämo tēñö ēñentabopa. ¹⁴Wængongui anquedo ayängä todom-peta nē näängä ingante iimaï angantapa. “Nänä önonga Eopadatedö nani änonga iñömö anquedoidi mänaa go mänaa inäni iñömö nē nā cæyäninani inänite bitö ñimpo cæe,” angantapa. ¹⁵Edæ mäninani anquedoidi mänaa go mänaa inäni iñömö tömënäni mäninipo iinque ba ate mäniï apäicä iñonte mäniönæ incæ mäniï ooda iñonte dobæ nani cæquinque ante a ongönönänite iimaï angantapa. Waodäni tömänäni iñömö mencabodäniya go adocabodäni quewēñönäni adocabodäni que inänite minitö wænoncæminipa, angantapa. Ayæ ñöwo tömënäni inänite ñimpo cæcä ate tömënäni wænoncæte ante tao godänitapa. ¹⁶Ayæ tontadoidi iñömö cabayo mongäinäni inäni æpodänidö inäni, ante tee mampote dootiento miñöo ganca inänitapa. Mänimpodäni inänipa, ante ēñentabopa.

¹⁷Botö wiimonte bai ayömo cabayoidi tönö nē mongäinäni iñömö iimaï emönäni atabopa. Cabayo nē mongäinäni iñömö tæcætawē inö tæineta nani wæx mongæntacoo pancataa opatawæ gonga gonte bai emontapa. Pancataa wentamö emontapa. Pancataa atopode nani ä bai wiñadæ emö bai emontapa. Cabayoidi ocabo iñömö nëöo ocabo bai encadänitapa. Tömënäni önöne inö gonga tönö tæemä tönö atopode nani öo waadö tadedänitapa. ¹⁸Mäniï gonga tönö tæemä tönö atopode iñömö mëmämoque go adopämoque nani wænömämocoo nē tadedäni inte cabayoidi iñömö waodäni tömänäni mencabodäniya go adocabodäni quewēñönäni adocabodäni que inänite wænönäni wænänitapa. ¹⁹Mäninani cabayoidi tömënäni önöne inte tæi piñænte wænöninque adobai tömënäni önömiñæ inte tæi piñænte wænönänipa. Edæ tömënäni önömiñæ iñömö tæntæ ocabo bai emiñænäni inte waodäni inänite pocænäni wænänitapa.

²⁰Mänimämo wodonte nani wængaimämocoo beyæ ayæ wænämaï quëwënäni inte wæwënäni incæte tömënäni nani wænæ wænæ cægainö ante, Ancaa wæwente awædö, ante pönänämaï inäni inte ñimpo cædämaï inänitapa. Wæætë oodo inte padata inte bodonte inte dica inte awæmpa inte tömënäni nani badonte cönönincoo iñömö adämaï incoo incæte ēñänämaï incoo incæte dao dao godämaï incoo incæte tömënäni, Mönitö wængonguiidi inänipa, ante ædæ wæænte apænedinque ñimpo cædämaï inänitapa. Ayæ adobai wænæidi inänite ædæ wææninque, Minitö mönitö wængonguiidi iminidö anguënë, ante ñimpo cædämaï inte apænedänitapa. ²¹Ayæ mäninani godömenque waodäni inänite piinte wænönäni inte tömënäni miï bete yewænäni inänipa. Nänöogängä inämaï iñongante towente cædönäni inte tömënäni awëmö ö ænäni inänipa. Mänömaï godömenque cædinque tömënäni nani wænæ wænæ cægainö ante, Ancaa wæwente awædö, ante pönänämaï inäni inte ñimpo cædämaï inänitapa.

Wængongui anquedo dadi ompointa guiyanta näängä

10 Ayæ wacä anquedo nē tæi emongä inte öönädë inö wæängä atabopa. Tömengä weocoo mongænte bai boguimancodë pöninque tömengä ocaboga tæcædæca inö daimë godämæ owotapa. Tömengä awinca incæ nænque bai apäidinque tömengä önömënë incæ cobacadewæ gonga gonte emö bai emënengä ingantapa. ²Tömengä önönempo inö dadi ompointa ininta nani wi æmpodinta guiyanta näängä ingantapa. Tömengä önöwa tömëwa gäwapæntibaa cö cæwadinque tömengä dipæwa guiquënë ömaa cö cæwacantapa. ³Mänömaï cö cæwadinque tömengä nëöo ii pepa bai nanguï pöni yedæ aa pecantapa. Aa peyongä detæbo önompo

æmæmpoque go mēa ganca wæætē tæi tēninque tededānitapa. ⁴Detæbo önompo æmæmpoque go mēa ganca ināni iñömö tededāni ēñēninque botö yewæmoncæ cætabopa. Tæcæ yewæmoncæ cæyömo öönädē inö tedepāmo iimaī ante tedecā ēñentabopa. “Iñæmpa önompo æmæmpoque go mēa detæbo nāni tededö æbānō ante tededāni, ante wii ēñenguī i iñinque bitö yewæmönāmaī ie,” angantapa.

⁵Wængonguī anquedo botö adingā iñömö gāwapæntibaa tönö ömaa nē a ongongā iñömö tömengā önompo tömempo öönädē inö pædæ æmpocantapa. ⁶Tömengā tömempo pædæ æmpodinque, Wængonguī ēñēñongā botö änö ante nöingā baquīnō anguēnē, ante iimaī angantapa. Edæ nē wantæpiyæ cōwē quēwengaingā inte öönädē tömää ingui-poga tömää gāwapæntibæ tömää badöninque tömengā adobai öönädē owodāni tömānāni ingui-poga quēwēnāni tömānāni gāwapāa quingānō owodāni tömānāni inānite nē badongaingā inte tömengā emöwo apænēdinque, Botö apænēdö nöingā baquīnō anguēnē, ante nē apænecā iñömö, “Mönö ee ongōñedē do iñinque batimpa, angantapa. ⁷Edæ Wængonguī anquedo tömangā pōni iñömö tömengā todompeta we we öoncæ cæyongante Wængonguī nänö cæinēnō ante wē wodonte bai nänö angainö ante nōwo iñinque cæcæcäimpa. Wængonguī ingante nē cægaināni tömengā beyæ nē apænegaināni iñönānite mäninö nänö cæinēnō ante do apænegaingā inte Wængonguī mäninö bai nōwo iñinque cæcæcäimpa,” angantapa.

⁸Ayæ öönädē inö tedepāmo adopāmo do botö ēñēnō nōwo wæætē botö imote iimaī angā ēñentabopa. “Wængonguī anquedo nē gāwapæntibaa tönö ömaa iñömö a ongongā weca godinque bitö tömengā önönempo dadi ompointa ininta nāni wi æmpodinta nänö nææininta æe,” angantapa. ⁹Angā ēñēninque Wængonguī anquedo weca godinque botö tömengā ingante, Dadi ompointa guiyanta pönömi æmoe, ante äñömo tömengā wæætē botö imo, “Æe. Æninque cæe. Bitö önöne da wēneyömi guiñēmæ bai waēme pōni ingæimpa. Incæte yo mongænte ate cæncadē guiidinque ti nā bacæimpa. Iñinque cædente wæcæbiimpa,” angā ēñentabopa.

¹⁰Wængonguī anquedo önönempo dadi ompointa guiyanta æninque botö ade cæntabopa. Önöne guiñēmæ bai waēme pōni i incæte yo mongænte ate cæncadē guiidinque ti nā badinque cædente wætabopa. ¹¹Ayæ botö imote angantapa. “Wacā awēnē nāni cabo wacā awēnē nāni cabo incæ wabæca nāni quēwencabo wabæca nāni quēwencabo incæ wadö nāni tedecabo wadö nāni tedecabo incæ wabæca wabæca nāni awēnē odeye cabo iñönānite bitö, Mänināni inānite æbānō baquii, ante wæætē Wængonguī beyæ apænecæbiimpa,” ante angantapa.

Wængonguī æbānō cæcää, ante mēnaa apænēdapa

11 Wacā botö imote, Tee manguimpa impa, ante cæwipa bai pædæ pönöninque ayæ botö imote, “Goe, angantapa. Wængonguī oncö tæiyæ waëmö oncönē godinque mänincö tönö, Wængonguī qui, ante nāni iya täimpa tee mæe. Ayæ woadāni adoyömö ædæ wææninque Wængonguī ingante, Bitö Wængonguī Awēnē imidö anguēnē, ante watapæ apænēdāni iñömö æpodānidö ināni, ante tee mampote cæe. ²Wængonguī oncö tæiyæ waëmö oncönē tee mäninque yacö boyāa iñömö tee mänāmaī ie. Edæ mänincö boyāa wadāni oodeoidi ināmaī ināni inānite do godonte intapa. Mänināni edæ coadenta i doo apäicā ganca mänimpoga iñonte Wængonguī nänö tæiyæ waëmö quēwēñömö incæ wo ewente cæcædānimpa. ³Ayæ botö imotedö ante, Botö æbānō cæboo, ante nē, Nö ante impa, ante apænēda iñönate botö godö cæquimo beyænque tömēna tæi piñænte badinque müido dootiento

tetenta eönæ mänimpoönæ iñonte botö beyæ apænecædaimpa. Waodäni wæwente beyænque gömæ ëmoncoo mongænäni bai tömëna adobai gömæ ëmoncoo mongæn-
 inque apænecædaimpa,” ante apænecä ëñentabopa.

⁴Wængongui æbänö cæcää, ante nê, Nö ante impa, ante apæneda iñömö tömëna iñömö Wængongui ingui-poga Awënë iñongante tömengä weca odibowæ nani äwæ mēwaa ongöwæ bai inapa. Ayæ tömengä weca yædo concædi ti wodönoincade men-
 cadea ongoncade bai mänina iñömö adobai inöna inapa. ⁵Wadäni, Tömëna inate wënæ wënæ cæinëmopa, ante cædäni ininque tömëna wæætê nê piinte cædäni inänite gonga wo tadete bai cædinque wænöna wæncædänimpa. Edæ, Tömëna inate wënæ wënæ cæinëmönipa, ante nê cædäni tömänäni mänömai wæncædän-
 impa. ⁶Wængongui godö cæcä beyænque tömëna tæi piñæna badinque, Wæn-
 gongui beyæ möna apæneyedê cöönæ cædämai ingæimpa, ante cædinque öönædê tee mönete bai cæcædaimpa. Ayæ tæi piñæna inöna inte tömëna æyedëmê cæinëna incæ wæætê wæætê cæyönate æpæncoo tömancoo wepænque bacæimpa. Adobai in-
 guipoga tömämæ quëwënäni inänite tömëna cæda ate quiëmê wænömämocoo incæ pö wënæ wënæ bacædänimpa.

⁷Ayæ tömëna, Wængongui æbänö cæcää, ante iinque apæneda ate babæcä bai mönö guiñenongä inte tadömengadænguipo inö tadinque tömëna inate guëadö guëa
 cædinque tæi ëmongä inte gänä cædinque wænongä wæncædaimpa. ⁸Wænna ate tömëna baonque nænængade nani quëwëñömö taadö iñömö öñoncædaimpa. Edæ Todömä iñömö quëwënäni wiwa cædäni bai ayæ Equitobæ quëwënäni wënæ wënæ
 cædäni bai mänii nænængade nani quëwëñömö nê quëwënäni iñömö adobai wënæ wënæ cædänipa. Mänii quëwëñömö adoyömö tömëna Awënë ingante awaa timpote wænönäni wængacäimpa. ⁹Mëönaa go adoönæque go tæcæ itædê iñonte tömëna baö inï acæte ante pöninque wacä awënë nani cabo wacä awënë nani cabo incæ
 waodäni nani cabo waodäni nani cabo incæ wadö nani tedecabo wadö nani tede-
 cabo incæ wabæca wabæca nani quëwencabo incæ waodäni nanguï inäni ponte tömëna baö acædänimpa. Ayæ, Da wënämai ingæimpa, ante wææ cæcædänimpa. ¹⁰Tömëna iñömö Wængongui beyæ nê apænedina inöna inte ingui-poga quëwënäni
 inänite nanguï äna wædinäni inte tömënäni nōwo wæætê watapæ tocædänimpa. In-
 inque tömëna mänömai wænte öñöna ate tömënäni nanguï Yæ yæ todinque wacä ingä wacä ingä, Önonque æe, ante pædæ godönäni æncædänimpa.

¹¹Mëönaa go adoönæque go tæcæ itædê iinque go ate Wængongui edæ, Quëwencæmäina, ante tömengä nänö guëmämämo quëwenguimämo woo öongacä
 ate tömëna iñömö wæætê miina badinque ængæ ganticædaimpa. Ængæ gantiyöna nê adäni guiquënë ancai guiñente wæcædänimpa. ¹²Ancai guiñente ayönäni tömëna öönædê inö tedepämo yedæ ante ëñencædaimpa. “Iñömö pö æeda,” angä ëñen-
 inque tömëna öönædê inö boguimancodê æiyöna tömëna inate nê piinte cædinäni edonque acædänimpa. ¹³Tömëna æiyedê mäniñedê goinque nanguï ocæ ocæ go-
 quimpa. Tömënäni nani quëwëñömö onconcoo bacoo iñonte pancaconga incæ nan-
 guï onconcoo acapowate bogocæ tæ gowæænguimpa. Ado goinque goyedê waodäni tiæte miido ganca wæncædänimpa. Ayæ miinäni quëwënäni ancai guiñeninque, Wængongui öönædê nê quëwëmi imi inte bitö nö tæi piñante imidö angüënë, ante wæcædänimpa.

¹⁴Ayæ mempoga nani wæquinque do iinque batimpa. Incæte godömenque ado-po-
 que nanguï pönï nani wæquinque oo pönï bacæimpa.

Todompeta ämæwoya

¹⁵ Wængongui anquedo tömangä iñömö tömengä todompeta we we öongä ate öönädë inö wadäni nani tedepämo yedæ tedinque iimaï änänitapa.

“Mönö Awënë Wængongui tömengä Codito tönö

ingui-poga Tæiyæ Awënë Odeyeda badinque

wantæpiyæ cöwë aacædaimpa,” änänitapa.

¹⁶ Në aadäni në Picænäni iñömö bæinticoatodo ganca inäni mänimpodäni iñömö

Wængongui weca tömënäni awënë tæ contaimpaa në tæ contadäni inte ñowo

guidömëmæ ædæ wæäninque Wængongui ingante, Bitö Awënë Wængongui imidö

anguënë, ante watapæ apænedänitapa. ¹⁷ Ayæ iimaï apænedinque,

“Awënë Wængongui bitö adobique Tömää në Cædömi inte

wëñëñedë do në quëwengaimi imi ñowobi inömi imipa.

Bitö nämä tæi piñæmi inte ñowo ædæmö në aabi inömi imipa,

ante adinque bitö imite waa ate pönente apænemönipa.

¹⁸ Wabæca wabæca nani quëwencabo incæ tömänäni quëwënäni ængui badänitapa.

Ayæ bitö ængui babi ininque

në wængainäni inänite bitö apænte panguiönæ do batimpa.

Ayæ bitö beyæ në apænedönäni iñömö bitö imite në cædönäni iñönänite

tömënäni inänite bitö, Minitö cædi beyæ paga cæbo æncæminimpa, ante bitö

godonguiönæ dobæ batimpa.

Ayæ bitö quinäni iñönänite bitö ëmowo ante bitö imite në ëñente cædönäni

iñönänite

awënë bai inäni incæ önönänique inäni incæ tömänäni inänite bitö, Minitö cædi

beyæ paga cæbo æncæminimpa, ante bitö godonguiönæ dobæ batimpa.

Ayæ ingui-poga quëwënäni inänite wadäni në wo ëwente cædönäni iñönänite bitö

wo ëwente cæquiönæ do batimpa.”

¹⁹ Ayæ öönädë inö Wængongui tæiyæ waëmö oncö odemö wibænetapa.

Wibæneyö Wængongui, Waodäni æbänö cæte botö tönö godongämæ waa cæte

quëwencædänimpa, ante odömoncæte ante nänö yewæmongainca nani da wencain-

cade iñömö mänincönë mä ongoncade atabopa. Ayömote yædæ yædæ näinimpa.

Yedæ pöni änimpa. Detæbo tæi tæi tēñö yedæ pöni änimpa. Goinque gotimpa. Ayæ

yoguica cöönæ bai nangui cæte wæänimpa.

Onquiyængä tönö dadagöö nani änongå

12 Wængongui, Mä pöni odömömo adinque ëñencædänimpa, ante cædinque

öönädë inö waëmö pöni badongä a owo atabopa. Edæ onquiyængä iñömö

nænque inte wecoo wëñate bai mongæñongä apäicämo incæ tömengä cæncædëwa

ænömengadæwa inö impa. Tömengä, Awënë poganta, ante tipæmpoga go mëa

nëmöidi inte godämæ badöinta wencacantapa. ² Mänigä onquiyængä yædëmadä

ëñengä iñongante wëñængä ëñacæ cæcä wæte wædinque wëñæ nantate Yæ yæ

wæcantapa.

³ Ininque Yæ yæ wæyongante öönädë inö mä pöni Wængongui nänö badöi wadö

bai badöi a owo atabopa. Edæ ñænængade obe bai dadagöö nani änongå opatawæ

ëñacä inte tömengä ocabocoo önompo æmæmpoque go mencaa encacä inte mäniï

ocabocoo awënë pogantacoo önompo æmæmpoque go mentaa wencacä ingan-

tapa. Tömengä önömoncawæ adobaï önompo tipæmpoga ocabocooga encacä ingantapa. ⁴Tömengä önoncaimiñenca picæ cæmiñænique öönädë owodäni nömöidi incæ pancadäniya incæ nangui inäni inänite wææntodongä inguipoga tæ wæænänitapa. Onquiyængä oo pöni iñongante dadagöö, Wëñængä ëñacä ate cæncæboimpa, ante tömengä weca a ongongantapa.

⁵Onquiyængä wëñængä onguiñængä ingante mangä ininque tömengä iñömö nänö Awënë baquinque pæcantapa. Tömengä iñömö tæiyæ awënë tömengä nempo quëwënëni inänite aacä baï adobaï tömämæ quëwënëni inänite, iïmaï cæedäni, ante aacæcäimpa. Mäningä onquiyængä wëñængä ingante wacä ö ænte Wængongui weca ayæ tömengä nänö aacæ tæ contayömö mäniñömö ænte mäicä æicantapa. ⁶Mäniñö bayonte wäänä iñömö önömæca iñömö wodii gocantapa. Tömengä beyæ ante Wængongui nänö eyepæ cæyömö mäniñömö wodii gocantapa. Mäniñömö miido dootiento tetenta ëönæ mänimpoönæ iñonte tömengä quëwente beyæ cængui eyepæ pönönäni cæncæcäimpa, ante Wængongui tömengä nänö owoyömö ante do badongantapa.

⁷Mäniñedë edæ öönädë iñömö guëadö guëa cæte wænönänitapa. Wængongui anquedo Miiguedo nani angaingä iñömö tömengä wadäni anquedoidi awënë inongä ingampa. Tömengä tömënëni tönö dadagöö ingante wido cæcæte ante cæyönäni dadagöö wæætë tömengä anquedoidi tönö wæætedö wæætë guëa cædäni incæte ⁸tömënëni ædö cæte gänä cæquinänii. Edæ ædö cæte öönädë iñömö ayæ quëwenguinänii, ante tömënëni inänite wido cædänitapa. ⁹Tömënëni iñömö ñænængade dadagöö ingante wido cæte wææntodönänitapa. Mäningä dadagöö iñömö wëñëñedë tantæ ingaingä inte tömengä ëmowo Wënæ Tatäna mëwoga ëmongä ingampa. Adocä, Inguipoga quëwënëni tömänäni oda cæcædänimpa, ante në wapiticæ ænte mäocä ingampa. Tömengä ingante ayæ tömengä anquedoidi inänite inguipoga iñömö wido cæte wææntodönänitapa.

¹⁰Ayæ ate öönädë inö tedepämo yedæ ante iïmaï ä ëñentabopa.

“Nöwoönæ mönö Wængongui mönö imonte, Minitö botö æmäwo æmo beyænque quëwenguimini, ante tömengä nänö cæönæ batimpa.

Ayæ tömengä nänö tæï piñænö nöwoönæ ba ininque tömengä adobaï Tæiyæ Awënë Odeye nöwoönæ bacäimpa.

Ayæ tömengä nänö apænte ængaingä mönö Codito adobaï nämä tæï piñænongä inte në angä bacäimpa.

Wënæ guiquënë mönö tönïñadäni inänitedö ante, Wënæ wënæ cædänidö angüënë, ante wapiticæ apænete änewëngä ingampa.

Woyowotæ incæ itädë incæ mönö Wængongui weca a ongöinque tömengä mäniñäni inänitedö ante në wapiticæ änewëngä iñongante tömengä ingante inguipoga iñömö wææntodönäni wæængantapa.

¹¹Wængongui Codotedo wepæ tömengä nänö wænte godongaimæ beyænque tæï ëmönäni badinque

mönö tönïñadäni iñömö wënæ ingante gänä cædänitapa.

Ayæ, Wængongui æbänö cæcää, ante tömënëni nani apænedö beyænque tömënëni tæï ëmönäni badinque wënæ ingante gänä cædänitapa.

Wadäni tömënëni inänite Wængongui beyæ wænönæ cæyönäni tömënëni,

Mönitö guïñënamai wæncæmönimpa, ante në änäni inänitapa.

¹²Mänömaï beyæ minitö öönädë iñömö në quëwëmini inte watapæ tocæminimpa.

Wamini guiquenē inguipoga iñömö æpæntibædē iñömö nē quēwēmīni inte mīni wæquinque ingæimpa.

Edæ wænæ mīnitō weca wææ pō quēwengäimpa.

Tömengä nänö wo ewenguinö oo pōni impa, ante ēñente beyænque äingä pōni bacampa.

Mänömaï beyæ mīnitō guiñenguimāmo baquinque impa.”

Mänömaï ante yedæ angä ēñentabopa.

¹³ Ayæ dadagöö, Botō imote inguipoga iñömö wido cæte wææntodönāni adi wædō, ante wædinque onquiyængä ingante wēñængä onguiñængä nē mäningä ingante bæi ongoncæte ante togængantapa. ¹⁴ Incæte Wængongui, Önömæca iñömö bitō beyæ botō cæyömō pao pao gocæbiimpa, ante cædinque ñænængade guingämöwæ önonguēnepæ bai tipænguēnepāa pönō badongä enguēnepænte bai onquiyængä bacantapa. Inique onquiyængä, Tæntæ botō imote bæi ongönāmaï incæcäimpa, ante Wængongui önömæca tömengä beyæ nänö cæyömō pao pao gocantapa. Mæa go adoque tæcæ wædepo iñonte tömengä mäniñömö quēwente beyæ nänö cængui eyepæ ænte cænguiñömö gocantapa. ¹⁵ Ayæ, Onquiyængä ingante æpæ quingæ mangui bai bæ ta tæi guicæcäimpa, ante cædinque dadagöö tömengä önöne inö önö bai æpæ towæ tadonte bai tao godecantapa. ¹⁶ Dadagöö towæ tadonte bai nänö tao godepæ quingæ pönö onguipo incæ onquiyængä beyæ ante cædinque wi ænete cæyō ada guipæntapa. ¹⁷ Ada guipæ adinque dadagöö iñömö onquiyængä ingante godömenque ængui badinque wædæ godinque, Mäningä onquiyængä wēnāni incæ wædāni inänite guæa cæte wænonguimo, ante gocantapa. Tömēnāni Wængongui nänö, Iïmaï cæedāni, ante wææ angainö ante nē ēñente quēwēnāni inte, Itota æbänö cæcäa, ante nē apænete quēwēnāni inönāni iñömö mäniñāni mäningä onquiyængä wēnāni iñönānite dadagöö, Wænoncæboimpa, ante gocantapa.

Mēnaa mönō guiñēnōna

13 Ayæ dadagöö æpæntibæ yæwedeca emönaiya iñömö ponte a ongongantapa. Ayæ babæcä bai nē guiñēnongä iñömö æpæntibædē quēwente ta pönongä atabopa. Mönō guiñēnongä tömengä ocabocoo önompō æmæmpoque go menca encacä inte tömengä önömoncawæ önompō tipæmpoga ocabocooga inö encacä ingantapa. Awënë pogantacoo tipæmpoga ganca tömengä önömoncawāa da da wencate encacantapa. Ayæ Wængongui emöwo incæ wiwa babæ wapiticæ ante äniwoi tömengä ocabocooga tömancooga inö yewæmonte encacä ingantapa. ² Mäningä mönō guiñēnongä botō nē adingä iñömö mēne bai emönongä incæte tömengä önöwa oto önöwa bai ewacä inte tömengä önöne nēöo önöne bai enecä atabopa. Ayæ dadagöö nämä nänö tæi piñænö ante mönō guiñēnongä ingante pædæ godöninque tömengä nänö aacæ tæ contaimpa pædæ godongä ænte tæ contadinque mönō guiñönongä nē awënë badinque, Iïmaï cæedāni, ante nangui angä bacantapa. ³ Ayæ mönō guiñēnongä adoque ocaboga ämocæte wæncæ cæcä bai ingaingä incæte gämæ cæcate ingantapa.

Tömämæ quēwēnāni mönō guiñēnongä ingante adinque ancai guiñēninque tömānāni tömengä miñæ godānitapa. ⁴ Dadagöö godō cæcä beyænque mönō guiñēnongä iñömö awënë badinque dadagöö bai nē angä do bacä impa, ante adinque tömānāni dadagöö ingante, Bitō Awënë Wængongui bai imidō anguēnē, ante apænedānitapa. Adobai mönō guiñēnongä ingante, Bitō Awënë Wængongui bai

imidō anguēnē, ante apānedānitapa tōō. Mānīnō ante godōmenque iīmaī ānīnque, “Æcānō mōnō guīñēnongā bai ingā iñōmō edæ dæ angampa. Æcānō tōmēngā ingante guēadō guēa cædinque tæi ēmonte gānā cæquingāā.”

⁵Dadagōō godō cæcā beyænque mōnō guīñēnongā iñōmō nāmanque pōnente ānewēnongā badīnque Wængonguī ingantedō ante babæ wapiticæ ante ānewēnīnque, Botō Wængonguī bai iīmopa cæmīnī, ānewēnongantapa. Ayæ awēnē badīnque nē angā badīngā inte mōnō guīñēnongā iñōmō coadenta i doo apāicāa mānīmpoga iñonte, iīmaī cædāni, ante aacantapa. ⁶Ayæ tōmēngā māniñedē Wængonguī ingantedō ante wēnæ wēnæ babæ wapiticæ ante ānewēnongā inte Wængonguī ēmōwo ante tōmēngā nānō quēwēnōmō ante babæ wapiticæ ante ānewēnongantapa. Tōmēnāni oōnædē nē quēwēnāni inānitedō ante adobaī babæ wapiticæ ante ānewēnongantapa. ⁷Tōmēngā Wængonguī quīnāni inānite guēadō guēa cæcæcāimpa, ante cædinque dadagōō godō cæcā beyænque tōmēngā nāmā tæi pīñangā badīnque tōmēnāni inānite tæi ēmongā inte gānā cæcantapa. Ayæ dadagōō godō cæcā beyænque mōnō guīñēnongā iñōmō waodāni nāni cabo waodāni nāni cabo incæ wacā awēnē nāni cabo wacā awēnē nāni cabo incæ wadō nāni tedecabo wadō nāni tedecabo incæ wabæca nāni quēwēncabo wabæca nāni quēwēncabo iñōnānite tōmēngā tōmānāni awēnē badīnque tōmēnāni inānite, iīmaī cædāni, ante nē angā bacantapa.

⁸Mānōmaī beyæ tōmāmæ quēwēnāni iñōmō tōmēngā ingante, Bitō Awēnē Wængonguī bai imidō anguēnē, ante apānecædānimpa. Wængonguī inguipoga nānō badōñedē, Botō Codotedo ingante do wænōnāni wæncæcāimpa, ante do angacāimpa. iīngā Codotedo, Nāni quēwēnguinta, ante nānō yewæmongaintaa ædānidō ēmōwo yewæmōnāmaī ināni iñōmō tōmēnānique mōnō guīñēnongā ingante, Bitō Awēnē Wængonguī bai imidō anguēnē, ante apānecædānimpa.

⁹Nē ēamonca imīni inte ēñēedāni.

¹⁰“Æcāmenque ingante ante apānedīnque Wængonguī, Ao bæi ongonte tee mōnete bai cædāni, angā iīnīnque tōmēngā ingante do bæi ongonte tee mōnecædānimpa. Æcāmenque ingante ante apānedīnque Wængonguī, Ao yaēmenca wænōmīni wæncæcāimpa, angā iīnīnque tōmēngā ingante do yaēmenca wænōnāni wæncæcāimpa.”

Mānōmaī beyæ mīnitō Wængonguī quīmīni iñōmō wæntæye ināmaī inte ee cæcæmīnimpa. Edæ tōmēngā ingante godōmenque wede pōnecæmīnimpa.

¹¹Ayæ ate wacā babæcā bai nē guīñēnongā guīquēnē onguipodē quēwente ta pōñongā atabopa. Codotedoidi oñōmoncawæ mēwāa nāni ēmoncadō bai tōmēngā adobaī encacā ingantapa. Incæte tōmēngā dadagōō bai tedecantapa. ¹²Mōnō guīñēnongā tānocā pōningā nānō ānō beyænque ayængā pōningā iñōmō awēnē badīnque tānocā beyænque ānīnque, iīmaī cædāni, ante nē aacā ingantapa. Tānocā pōningā mōnō guīñēnongā āmocate beyæ nē wæncæ cæcā incæ wæætē gāmæ cæcadingā iñongante ayængā pōningā iñōmō tōmāmæ quēwēnāni inānite angā ēñēnīnque tōmānāni tānocā pōningā ingante, Bitō Awēnē Wængonguī bai imidō anguēnē, ante apānedānitapa. ¹³Māningā mōnō guīñēnongā ayængā pōningā, Mā pōni cæbo adīnque ēñencædānimpa, ante cædinque badongampa. Ayæ godōmenque mā pōni cæcā beyænque waodāni edonque pōni ayōnāni oōnædē inō incæ gonga inguipoga wææ adānitapa.

¹⁴Mönö guiñenongä tänocä pöningä nänö änö beyænque tömengä weca mä cæd-
inque ayængä pöningä iñömö tömämä quëwëñäni inänite oda cæte nani goquiñö
ante mäocä godänitapa. Edæ tömëñäni inänite äninque, Mönö guiñenongä yaë-
menca guiiyömö wæætë gämæ cæcate në miingä quëwëngä nänö ëmönö bai adobai
badöedäni, angä ëñente badonte concædänitapa. ¹⁵Mönö guiñenongä ayængä pön-
ingä iñömö eyepæ cædinue mönö guiñenongä tänocä pöningä nänö ëmönö bai nani
badöñinca incæ, Tedecæcäimpa, ante cæcä ate mäninca incæ oo guëmangantapa.
Tömëñäni nani badöñinca ante waodäni Baa äninque, Bitö Awënë Wængongui bai
imidö angüënë, ante apænedämai inäni inänite mäninca incæ ä beyænque wænönäni
wænänitapa.

¹⁶Ayæ awënëidi bai inäni incæ önönäni incæ maincoo ëadäni incæ main-
coo ömæpodäni incæ wacä godonte æningä beyænque në cæte quëwëñäni incæ
nämanque cæte quëwëñäni incæ mäninäni tömänäni inänite tömengä nänö änö
beyænque önompö tömempo inö yewæmöinäni badänitapa. Wæætë önompö
tömempo inö yewæmönämai inäni inte tömëñäni önönemö inö yewæmöinäni
badänitapa. ¹⁷Tömengä nänö yewæmöi yewæmönämai inäni guiquënë tömëñäni
maincoo ædö cæte godonte ænguñänii. Ædö cæte godonte æñäni weca gote
tömëñäni maincoo ini godonte ænguñänii. Ayæ mäninö ante yewæmöi iñömö mönö
guiñenongä tänocä pöningä ëmöwo impa. Wii tömengä ëmöwo yewæmonte i bai tö-
mengä ëmöwo ante beyæ, Æpodö i, ante yewæmonte impa.

¹⁸Mäninö ante ëñencæte ante nani ëñënö ante eyepæ encadäni inte ëñencædän-
impa. Ocai në encaçä ininque, Mönö guiñenongä tänocä pöningä nänö, Æpodö i,
ante ëñencæte ante cæcæcäimpa. Edæ tömengä, Æpodö i, ante waocä, Æpodö i,
ante adopo impa. Tömengä nänö, Æpodö i, ante teitiento teitenta i tei impa.

144.000 ganca inäni nani ämotamini äinö

14 Ayæ botö ayömote Wængongui Codotedo änanquidi iñömö Tiöno nani an-
quidi mäniñömö a ongongä atabopa. Tömengä weca waodäni tiento coad-
enta i coatodo müido ganca inäni inte Wængongui Codotedo ëmöwo adobai tö-
mengä Mæmpo Wængongui ëmöwo nani önönemö inö në yewæmöinäni inte a
ongönäni atabopa. ²Ayæ botö ëñënömote öönædë inö tedepämo ante ñænæ tēñabo
ante bai detæbo eyequei tē bai ëñëninque adobai waodäni nani adapate nani am-
poque inte tæiyænäni ampoyönäni ante bai tedepämo tē ëñentabopa. ³Tiento coad-
enta i coatodo müido ganca inäni iñömö mä äninque waa ämotamini ante äñänitapa.
Wængongui nänö aacæ tæ contaimpa gäänë ämotamini äñönäni müinäni quëwëñäni
mëa go mëa ganca inäni në aadäni në Picænäni tönö ëñëñänitapa. Tiento coadenta
i coatodo müido ganca inäni inguiyoga quëwëñäni tönö adoyömö quëwëñönäni,
Godonte æmo beyænque quëwënguiimini, ante Wængongui nänö në æninäni
ii ämotamini äinö ante ëñente ancædänimpa. Wadäni guiquënë ædö cæte ëñente
anguñänii.

⁴Iñäni iñömö Wængongui ingante ante waëmö quëwëncæmönimpa, ante cæd-
inque, Onquiyængä, ante në towëñämai ingainäni inänipa. Ininque tömëñäni Wæn-
gongui Codotedo ædönö gocä tömengä miñæ cöwë godänipa. Tömëñäni waodäni
tönö adoyömö quëwëñönäni Itota, Botö wepæ beyænque quëwënguiimini, ante
tömëñäni inänite ængacäimpa. Täno amiña bayedë tä pedinque munitö, Wængongui
qui baquimpa, ante müni cönöni bai mäninäni adobai Wængongui quinäni bad-

inque Wængonguï Codotedo quinäni inänipa. ⁵ Adodäni cöwë babæ änämaï inäni inique wadäni ædö cæte tömënäni inänitedö ante, Babæ änänipa, ante anguïnänii. Tömënäni edæ cöwë wënæ wënæ cædämaï inänipa töö.

Wængonguï anquedoidi mënaa go adocanque näni änö

⁶ Ayæ Wængonguï anquedo wacä iñömö öönædë inö pö pao pao gocä atabopa. Inguipoga nê quëwënäni inänite wabæca näni quëwencabo wabæca näni quëwencabo incæ waodäni näni cabo waodäni näni cabo incæ wadö näni tedecabo wadö näni tedecabo incæ wacä awënë näni cabo wacä awënë näni cabo iñönänite anquedo tömänäni inänite Wængonguï wantæpiyæ cöwë nänö watapæ apænedö ante ëñencædänimpa, ante apæneceæte ante pongantapa. ⁷ Mäningä Wængonguï anquedo iñömö yedæ iïmaï äninque, “Wængonguï apænte nänö anguiönæ do iinque bayonte mäniönæ tömämini mini cægainö ante tömengä apænte ancæcäimpa. Inique tömengä ingante guiñëninque ee aedäni. Adobaï tömengä ingante waa aedäni. Tömengä edæ öönædë incæ inguipoga incæ æpæntibæ incæ æpæ tayömö incæ tömää nê badongaingä ingante munitö, Bitö Awënë Wængonguï imidö anguënë, ante ædæ wææninque watapæ apæneedäni. Mäninque ämopa,” angantapa.

⁸ Mäningä Wængonguï anquedo gocä ate wacä Wængonguï anquedo ayængä pöninque iïmaï angantapa. “Babidönia näni äñömö do wo ëwente batimpa. Babidönia näni waëmö quëwëñömö i incæte do wo ëwente ba aedäni. Mäniñömö nê quëwënäni wënæ wënæ cædinäni iñömö onquiyængä nê towengä baï cædinque biinömæ bete quidi quidi dowæninqe towencædänimpa, ante ti nämæ godonte baï cædänipa. Tömënäni mänömaï godö cædäni beyænque wabæca näni quëwencabo wabæca näni quëwencabo wæætë wënæ wënæ cædänitapa. Mäninque ämopa,” angantapa.

⁹⁻¹⁰ Ayæ mäningä Wængonguï anquedo gocä ate wacä Wængonguï anquedo tömengä pöninque yedæ iïmaï angantapa. “Mönö guiñëningä tänocä pöningä ingante æcänö, Bitö Awënë Wængonguï baï imidö anguënë, ante apæneceä. Ayæ tömengä nänö ëmönö baï näni badöninca gäänë ædæ wææninque æcänö apæneceä. Wængonguï tömënäni inänite nanguï püincæcäimpa. Tömënäni önompo incæ öönemö incæ mönö guiñëningä nänö yewæmöi nê yewæmöinäni adinque Wængonguï adobaï tömënäni inänite nanguï püincæcäimpa.” Äninque Wængonguï anquedo godömenque apæneceantapa. “Mäninäni Wængonguï biinömæ nänö püimæ becædänimpa. Mänimænque æninque tömengä nänö püinte owætadë pe niñængantapa. Mänimænque nê bete baï inäni iñömö nanguï pöni wæwencædänimpa. Wængonguï tæiyæ waëmö anquedoidi weca ayæ Wængonguï Codotedo weca gonga bæcoyömö atopode näni öö wadö gonga bæcoyömö öö wayömö mäniñömö iinäni æmæwo gonte ba baï nanguï wæwencædänimpa,” angantapa.

¹¹ “Ayæ tömënäni gonga bæcoyömö mäniñömö wæwëñönäni näni wæwëmämö tëmä baï cöwë æicöompa. Woyowotæ incæ itædë incæ mäninäni edæ guëmänämaï incædänimpa. Tömënäni iñömö, Mönö guiñëningä tänocä pöningä weca ædæ wææninque, Bitö Awënë Wængonguï baï imidö anguënë, ante nê apænedäni inänipa. Ayæ tömengä nänö ëmönö näni badöninca gäänë ædæ wææninque nê apænedäni adobaï tömengä ëmöwo nänö yewæmöi nê yewæmöinäni inte mäninäni tömänäni wantæpiyæ mänömaï guëmänämaï inte wæwencædänimpa. Mäninque ämopa,” angantapa.

¹²Mänömaï beyä mînitö Wængonguï quimîni iñömö tömengä nänö, iïmaï cædäni, ante nänö wææ angainö ante ëñente cædömîni inte ayä Itota ingante godö-
menque wede pönemîni inte mînitö wæntæye inämaï inte ee cæcæmînimpa.

¹³Ayä ate botö öönædë iñö tedepämo iïmaï ante ëñentabopa. “Bitö iïmaï yewæmoe,” angantapa. “Nöwo ganca ayä ate Awënë Itota ingante pönente në wænäni inte tömënäni nâni toquinque.”

Ante äñongä Wængonguï Tæiyä Waëmö Önöwoca, “Ao ämopa, angampa. Nâni toquinque ingæimpa. Tömënäni nâni nanguï cægäinö iïmpo cæte guëmancædän-
impa. Edæ tömënäni nâni waa cægäinö öönædë iñömö edonque pönî acæimpa,”
ante angantapa.

Inguipoga quëwënäni beyä amiña bai bacæimpa

¹⁴Ayä botö ayömo näämænta boguimä mä owo atabopa. Adocanque Waocä ëña-
gaingä ingä bai iñömö mänii boguimäa tæ contacä atabopa. Tömengä ocaboga
awënë poganta oodo inte badöinta encacä inte tömengä nänö önönempe yaëmë
bai waingamë idämæ engamë næægä atabopa. ¹⁵Ayä ate wacä anquedo Wæn-
gonguï oncö tæiyä waëmö oncönë ta pöninque boguimäa në tæ contacä ingante
iïmaï yedæ ante aa pecantapa. “Inguipoga quëwënäni botö imote në wede pönente
waa cædönäni iñömö në minte pæmö bai inäni inte tömënäni nâni to amiña bayedë
bai impa. Wadæ wadæ pinöninque nâni ö æñedë bai do bayonte bitö yaëmë bai bitö
näæï ænte gote mäninäni inänite wadæ wadæ pinonte bai cædinque ö æe.” ¹⁶Angä
ëñëninque boguimäa në tæ contacä gote inguipoga iñömö tömengä yaëmë bai nänö
näæï inte wadæ wadæ pinonte bai cædinque tömänäni në minte pæmö bai inäni
inänite ö ængantapa.

¹⁷Ayä öönædë iñömö Wængonguï oncö tæiyä waëmö oncönë ongonte ta pön-
inque wacä anquedo adobaï yaëmë bai waingamë idämæ engamë næænte pongan-
tapa. ¹⁸Tömengä pongä ate Wængonguï anquedo wacä pongantapa. Wængonguï
oncö tæiyä waëmö oncönë, Wængonguï quï, ante iya tæe, ante në äñongä inte nâni
iya täimoga gäänë ongöninque ta pöninque yaëmë bai waingamë idämæ në en-
gamë næægä ingante iïmaï yedæ apænecantapa. “Inguipoga tömäo në wænæ wænæ
cædäni iñömö yowecoo bai inänipa. Mäninäni yowe ite bayedë bai inäni adinque
bitö yaëmë bai bitö nææï ænte gote yowecoo wangö tadampote gæte bai cædinque
tömënäni inänite cæe.”

¹⁹Angä ëñëninque Wængonguï anquedo inguipoga iñömö tömengä yaëmë bai
nänö nææï inte wangö tadampote cædinque yowecoo gædäni bai tömengä në
wænæ wænæ cædäni inänite adobaï cæcantapa. Ayä yowepæ ante næænægade
nâni pinä pinä gäwate cæincadedë yowecoo wææntodonte bai cædinque tömengä
wænæ wænæ cædäni inänite Wængonguï piinte nänö päiñömö wido cæcantapa.
²⁰Mänii tömënäni yowecoo ænte pinä pinä gäwate cæincade iñömö tömënäni
nâni quëwëñömö yabæca ongompa. Mäniiñömö tömënäni inänite pinä pinä gäwate
bai cædänitapa. Cæyönäni tömënäni wepæ nanguï pönî gotimpa. Cabayo goto
winediñömö æi ganca tömënäni wepæ mäninganca æi godinque todee tiento
quidömetodo ganca mäninganca nanguï pönî wepæ gotimpa.

Tiæte ganca nāni wæwenguimāmo pompa

15 Ayæ botö ayö mote Wængongui ñöwo wæætë mä pönï odömömo adinque ëñencädänimpa, ante cædinque öönædë inö bamöngægä pönï badongä a owo atabopa. Wængongui anquedoidi önompo æmæmpoque go mënaa ināni iñömö öönædë ongöñönanite tömënāni inānite, Minitö cæmīni beyænque waodāni nāni wæwenguimāmocoo önompo æmæmpoque go mempoga pongæimpa, angä ëñente ænte pönānitapa. Māniï wæwëmmāmocoo æmæwo ba adinque Wængongui nänö ængui panguiāmō eyepæ bapa.

² Ayæ æpæntibæ iñömö awocawænta ëmō bai adinque botö mänintibæ tönö gonga guëa wempodente bæco atabopa. Adotibæ yæwedeca waodāni më ongönānīpa. Mānināni iñömö mönō guññenongä ayæ pöningä ingante ante ayæ tömengä nänö ëmönö bai nāni badöninca ante Baa äninque tömënāni tæï ëmonte gänä cædāni inānitapa. Adodāni tömengä ëmōwo ante, Æpodö i, ante Baa ante yewæmönāmai ināni atabopa. Wængongui tömënāni inānite adapate nāni ampoqui godongä ænte næænte a ongönānīpa. ³ Tömënāni a ongöninque Wængongui ingante nē cægagingä Möitee wodi ämotamīni nänö angaiñö ante ayæ Wængongui Codotedo ämotamīni nänö agaiñö ante iimāi ämotamīni änānīpa.

“Awënë Wængongui bitö adobique Tömää Cægaimi inte bitö mä cædö iñömö waëmö pönï inönö anguënë.

Bitö tömämæ quëwënāni Tæiyæ Awënë Odeyebi imidö anguënë.

Quiëmë cædinque bitö nē nö cæbi imīpa.

⁴ Awënë ëñëmi, Æcämë bitö imite guññenāmai inguingää.

Ayæ bitö ëmōwo ante pönente æcämë waa adāmai inguingää.

Edæ bitö adobique tæiyæ waëmö imīpa.

Tömää bitö nö cædinö edonque pönï ba adinque

wabæca wabæca nāni quëwencabo tömānāni bitö weca ponte ædæ wææninque bitö imi, Bitö Awënë Wængongui imidö anguënë, ante ancädänimpa.”

⁵ Ayæ ate botö ayö mote öönædë iñömö Wængongui tæiyæ waëmö oncö incæ ämontaicö bai inte tömengä nänö nänënë owocö iñömö wi ænete bayö atabopa.

⁶ Wængongui anquedoidi önompo æmæmpoque go mënaa ināni mänincönë ongonte ta pönānitapa. Tömënāni cædāni ate waodāni nāni wæwenguimāmo iñömö önompo æmæmpoque go mempoga pongæimpa. Tömënāni weocoo waëmoncoo nīno nāni ancoo ñäö bai ëmoncoo mongænāni inānīpa. Tömënāni tæcætawë inö pacadeyænta oodo inte nāni badöinta mongæñëmæināni inānīpa.

⁷ Ayæ miināni quëwënāni mënaa go mënaa iñönāni adocanque Wængongui anquedoidi önompo æmæmpoque go mënaa ināni iñönānite owætacoo adotaque adotaque pædæ godongä ænānitapa. Mänintacoo önompo æmæmpoque go mentacoo iñömö oodo inte nāni badöintacoo inte Wængongui nē wantæpiyæ cöwë quëwengagingä ingä nänö ængui pämmāmo eyede ënentapa. ⁸ Wængongui nänö ñäö apäidö beyæ ayæ tömengä nänö tæï piññämāmo beyæ tömengä tæiyæ waëmö oncönë iñömö tëmämāmo eyede më ongompa. Ayæ Wængongui anquedoidi önompo æmæmpoque go mënaa ināni cædāni ate waodāni nāni wæwenguimāmo ante önompo æmæmpoque go mempoga nāni wæwenguinganca iinque baganca æcämenque incæ Wængongui tæiyæ waëmö oncönë guidāmai incädänimpa.

Wængongui nänö ængui panguintacoo

16 Ayæ ate Wængongui tæiyæ waëmö oncönë inö tedepämo yedæ tē ēñentabopa. Nē angä iñömö Wængongui anquedoidi önompo æmæmpoque go mänaa inäni inänite, “Goedäni, äninque, Wængongui owætacoo nänö ængui panguintacoo önompo æmæmpoque go mä ganca incoo näænte gote inguipoga iñömö gao cæedäni,” angä ēñentabopa.

²Wængongui anquedo tänocä godinque tömengä owætadē enē incæ inguipoga gao cæcantapa. Gao cæcä ate mönö guiñenongä ayæ pöningä nänö yewæmōi nē yewæmōinäni inte tömengä nänö emönö bai näni badöinca gäänē ædæ wææn- inque apänedäni iñönänite tömënäni ayaa nantai nömæi tömäo baadinque nantate wædänitapa.

³Wængongui anquedo ayæ nē gocä tömengä owætadē enē incæ æpæntibæ cæn- cadëmæ gao cæcä ate mänimæ iñömö do wæninäni wepæ bai bayonte mänintibædē quëwënäni tömänäni wænänitapa töö.

⁴Wængongui anquedo ayæ nē gocä tömengä owætadē enē incæ æpänen tömänonga gao cædinque æpä tayömö tömänömö gao cæcä ate mänimæ tömämæ wepæ batimpa. ⁵Ayæ ate Wængongui anquedo æpä tömämæ beyæ nē angä inte iimaï apænecä ēñentabopa.

“Mönö Tæiyæ Waëmö inömi ēñëmi, bitö wëenënedē do nē quëwengaimi imi nïwobi adobi inömi imipa.

Mänömaï tömënäni inänite apænte ante päninque bitö nö cædinque apænte pänimi imipa.

⁶Edæ bitö quinäni tönö bitö beyæ nē apænegainäni inänite wænönäni ate tömënäni nē wænäni wepæ näate bagadänimpa. Bitö wæætē nē wænonte näate badäni näni cægaï beyæ wepæ godömi begadänimpa,” angantapa.

⁷Ayæ Wængongui qui, ante näni iya täimoga inö tedepämo tē ēñentabopa. “Ao ämopa. Awënē Wængongui bitö adobique Tömää Cægaïmi inte, Iimaï pancæboimpa, ante bitö apænte angainö bai cædinque tömënäni inänite päninque bitö cöwē nö cæte waa pämpa.”

⁸Wængongui anquedo ayæ nē gocä tömengä owætadē enē incæ nænque mä owoyömö mäniñömö gao cæcantapa. Ayæ waodäni æmontaiya montæ gongate wæcädänimpa, ante cædinque nē godö angä beyænque nænque nangui ti näwä batimpa. ⁹Mänii nangui ti näwante beyæ waodäni montæ gongate badäni incæte tömënäni näni wënæ wënæ cædinö ante, Ancaa wæwente awædö, ante ayæ pönëna- maï inäni inte nimpö cædämaï inte Wængongui ingante waa adämaï inänitapa. Tömënäni, Wængongui cæcä beyænque mönö wæwëmämocoo pönimpa, ante wæd- inque Wængongui ingante piininque tömengä emöwo ante wënæ wënæ babæ ante tedewënänitapa.

¹⁰Wængongui anquedo ayæ nē gocä tömengä owætadē enē incæ mönö guiñenongä tänocä pöningä nänö aacæ tæ containpaa gao cæcä ate tömengä awënē odeye inongä inte nänö aayömö mä mämonte bai batimpa. Waodäni nantate wæd- inque önonguënëwa æo pocænguënëwate wædänitapa. ¹¹Mänömaï wædäni incæte tömënäni näni wënæ wënæ cædinö ante, Ancaa wæwente awædö, ante godömenque

pönänamaï inäni inte ñimpo cädämaï inänitapa. Wæætë nantai baate nantate wæd-
inque Wængongui öönädë quëwëngä ingante piinte badinque wënä wënä babä
ante tedewënanitapa.

¹² Wængongui anquedo ayä nê gocä tömengä owætadë ënë incä ñænä önonga
Eopadatedö nani änonga mäninonga gao cäcä ate awënë odeyeidi nænque tamönö
quëwente nani ponguinö taadö ante önö tömäo amimö batimpa.

¹³ Ayä wënæidi wentamö nani ëwocacabo mënaa go adocanque inäni iñömö
weque bai inäni ta pönäni atabopa. Dadagöö önönë inö adocanque wënä ta pong-
antapa. Mönö guiñëngä tänocä pöningä önönë inö wacä wënä ta pongantapa.
Ayä Wængongui beyä nê apänedömo imopa, ante nê babä apänedongä önönë inö
wacä wënä pongantapa. ¹⁴ Mäninäni wënæidi önöwocaidi inäni inte mä cädäni
inänipa. Iñäni iñömö tömämä awënë odeyeidi weca äñecä godinque tömënäni
inänite apänedinque, Awënë Wængongui adocanque Tömää nê Cægäingä inte nänö
apante anguiönä iñonte munitö godongämä ponte guädö guëa cäcämimipa, ante
cädänipa.

¹⁵ “Mönö Awënë nämä incä iïmaï angantapa. Aedäni. Nê awëmö ængä iñonto-
bæ pongä bai botö adobai änämaï inte poncæboimpa. Æyedënö ponguingä, ante nê
mönämaï ongongä iñömö tömengä wänö cönongä bai inongä inte nänö toquinque.
Edä tömengä, Ömaabo inämaï incæboimpa, ante ayä, Guiñëñate wädämaï in-
cæboimpa, ante tömengä weocoo tömë weca ee mangä inongä ingampa,” angantapa.

¹⁶ Mänii wënæidi önöwocaidi tömämä awënë odeyeidi inänite äñecä gote änäni
ëñëninque awënë odeyeidi iñömö tömënäni tontadoidi tönö Adämaguedöo ebedeo
tededö nani äñömö adoyömö godongämä pönänitapa.

¹⁷ Ayä Wængongui anquedo tömangä nê gocä tömengä owætadë ënë incä
woboyä owoyömö mäniñömö gao cäcä ate öönädë inö Wængongui täiyä waëmö
oncönë tömengä nänö aacä tæ contayömö mäniñömö tedepämo yedä tededinque,
“Nöwo iinque batimpa,” angantapa.

¹⁸ Ayä ate yædä yædä nänimpa. Detæbo tæi tæi tæ goyö yedä pönï änimpa.
Ayä goinque nanguï pönï ocä ocä gotimpa. Waodäni inguipoga nani quëwenganca
tömanganca mäniï goinque bai wa goinque cöwë godämaï inimpa. ¹⁹ Goinque ocä
ocä goyonte tömënäni nani ñænä quëwëñömö incä tænguimä tænguimä godinque
mëñömonga go adoyömonque batimpa. Ayä wabæca nani quëwencabo wabæca
nani quëwencabo incä tömäo nani quëwëñömö onconcoo acapowate bogocä tæ
gowæänimpa. Wængongui adobai, Babidönia nani waëmö quëwëñömö quëwënäni
wënä wënä cädänipa, ante pönente wædinque ængui badinque, Mini wæwen-
guinque impa, ante owæta biinömä nänö püimä eyede ënë godonte bai cædinque
tömënäni inänite nanguï piininque pangantapa. ²⁰ Tömää wää tëiwänë iñömö yogä
guitimpa. Ayä onquiyabocoo adobai dæ bibitapæ batimpa. ²¹ Ayä öönädë inö yo-
guica cöönä bai waodäniya tæi tæi wæänimpa. Mäninca tæi tæi wæäninca ado-
caque incä wodo tiëë diboda tee mä ganca enca impa. Yoguica wënä wënä in-
capa, ante adinque waodäni, Mäninca mönö wënä wënä wæwëmämö impa, än-
inque Wængongui ingante piinte badinque wënä wënä babä ante tedewënanitapa.

Onquiyængä mäincoo beyä nê towente quëwëngä

17 Wængongui anquedoidi önompo æmæmpoque go mëa ganca inäni önompo
æmæmpoque go mëa ganca owætacoo nê näëñäni iñönänite adocanque botö

weca ponte, “Pöe, angantapa. Onquiyängä mäincoo beyä nē towente quēwēnongä iñömö æpæncoo yædopäa nē tæ contacä apænte nänö panguinö ante botö odömömo acæbiimpa. ²Inguipoga awēnē odeyeidi incæ tömengä tönö towengadänimpa. Waodäni inguipoga quēwēnāni incæ adobaī tömengä towēinēnō beyä tömengä biinömæ bete baī quidi quidi dowænte baī pönēnāmaī cægadänimpa,” ante apænecä ēñentabopa.

³Wængonguī Önöwoca incæ botonga pö guiiyongä botö wiimonte baī iimaī atabopa. Wængonguī anquedo adocä iñömö botö imote ö ænte mao önömæca iñömö cönongä ongontabopa. Mäniñömö ongöniñque botö onquiyängä babæcä baī nē guññenongäa mongænte a ongongä atabopa.

Mäningä mönö guññenongä opatawæ ēñadongä inte emöwocoo tömengä baonga godämæ tömengä yewæmōi ēñacä ingantapa. Mäniwocoo Wængonguī ingantedö ante wēnæ wēnæ babæ wapiticæ äniwocoo inönimpa. Mäningä mönö guññenongä nänö ocabocoo önömpo æmæmpoque go mæa encacä inte tömengä nänö önömoncawæncoo önömpo tipæmpoga emoncacä ingantapa. ⁴Onquiyängä iñömö tömengä weocoo awēnēidi waemoncoo nāni mongæncoo tönö opatawæ emoncoo mongængantapa. Tömengä, Botö waemö incæboimpa, ante oodo badöincoo tönö dicamö nāni nanguī godonte ænincoo tönö pededamö nāni ämö mäniimoncoo mongænte ingantapa. Tömengä önönempe owætadē oodo inte badöintadē quimæmē baapæ baī i eyede engapæ næængantapa. Mäningä onquiyängä quiēmē nänö wēnæ wēnæ cæpāmo nänö towente quēwēnō baī mänintadē næængantapa. ⁵Adocä onquiyängä tömengä önönemö inö emöwo yewæmōi emongä ingantapa. Mäniwo wē wodonte baī i incæte iimaī ante impa.

“Babidönia nāni waemö quēwēñömö i incæte onquiyängä nē towengä baī impa.

Waodäni nē godö towēnāni wäänä baī mäningä onquiyängä ingampa.

Ayæ adobaī inguipoga quēwēnāni wiwa nāni cæinēnō ante nē cædäni wäänä baī adocä onquiyängä ingampa.”

Mänömaī tömengä önönemö inö yewæmante emongantapa. ⁶Wængonguī quinäni ingaināni tönö Itota ingante ante apænedäni beyä nē wængaināni tömēnāni wepæ bete baī mäningä onquiyängä quidi quidi dowænte baī ingä botö atabopa. Tömengä ingante adinque botö ancai guññente wætabopa.

⁷Ancai guññente wæyömote Wængonguī anquedo botö imote iimaī angantapa. “Quinante ancai guññente wæbii. Mönö guññenongä iñömö tömengä ocabocoo önömpo æmæmpoque go menca encacä inte tömengä önömoncawæncoo önömpo tipæmpoga emoncacä inongä inte onquiyängä ingante nē mongængä ingampa. Onquiyängä ingante nē mongængä mönö guññenongä tönö onquiyängä tömēna nāna wē wodonte ini æbänö i, ante apænebo ēñēe. ⁸Adocä mönö guññenongä bitö adingä iñömö wēñēñedē quēwengaingä inte ñöwo dæ angä incæte ayæ ate tadömengadænguipodē inö ææ ta poncæcäimpa. Ta pöninque tömengä nänö æmæwo ömæe ewenguinque ingäimpa. Wængonguī, Quēwenguinta, ante inguipoga badönāmaī iñedē nänö yewæmongaintaa inguipoga quēwēnāni tömēnāni emöwo nē yewæmönāmaī ināni iñömö tömēnāni iñömö mönö guññenongä do quēwengaingä ñöwo dæ angä incæte ayæ ate pongä adinque ancai guññente wæcædänimpa,” ante Wængonguī anquedo apænecantapa.

⁹Ayæ tömengä wæætē apænecantapa. “Mäninö ante ēñencæte ante ocai ēñēnō nē encacä inte ēñencæcäimpa. Mönö guññenongä tömengä önömpo æmæmpoque go

mëa ocabocoo iñömö önompo æmæmpoque go mëa änanquidi bai inänipa. Mänii änanquidiboga onquiyängä täe contacä ingampa. Mänii ocabocoo adobai önompo æmæmpoque go mëa awënë odeyeidi bai inänipa. ¹⁰ Mänimpodäni iñönänite önompo æmæmpoque awënë odeyeidi inänite wido cædänitapa. Adocanque awënë odeye iñömö ñowo aacä ingampa. Wacä awënë odeye ayæ pönämaï ingä incæte tömengä pöninque wantæ iñö ongonde aacæcäimpa. ¹¹ Önompo æmæmpoque go mëa ganca awënë odeyeidi näni cabo iñönänite mönö guiñënongå adocä inongä incæte tömënanï beyæ ponguingä ingampa. Tömengä iñömö wëenëhedë nê quëwengaingå incæ ñowo dæ angä inongä inte tömengä nänö æmæwo ömæ ëwenguinque poncæcäimpa,” ante Wængongui anquedo apænecantapa.

¹² Ayæ tömengä wæætë apænecantapa. “Ayæ önompo tipæmpoga önömoncawæncoo bitö adimoncawæncoo iñömö önompo tipæmpoga awënë odeyeidi bai inäni incæte ayæ aadämaï inänipa. Incæte ayæ ate tömënanï inänite änanï ate awënë odeyeidi badinque tömënanï, ñimaï cædäni, ante änanï bacædänimpa. Ayæ mönö guiñënongå tönö tömënanï adoque ooda ganca godongämæ aacædänimpa. ¹³ Tömënanï adodö ante pönënanï inte, Mönö täi piñænö ante guiñënongå ingante godömö æncæcäimpa. Ayæ awënë odeyeidi inömö inte mönö, ñimaï cædäni, ante nê ämö imö bai mönö tömengä ingante ämö nê angä bacæcäimpa.

¹⁴ “Mäninänï Wængongui Codotedo ingante guëadö guëa cæcædänimpa. Incæte tömengä iñömö awënëidi tömänänï Awënë inongä ingampa. Ayæ waodäni awënë odeyeidi iñönänite tömengä Täiyæ Awënë Odeye inongä ingampa. Ñinque tömengä täi ëmönongä inte tömënanï inänite gänä cæcæcäimpa. Tömengä, Botö miñæ tee empo goquimini, ante waodäni inänite aa pedinque apænte nänö nê ængainänï inte tömengä miñæ cöwë ædæmö cæte tee empo godäni inänipa. Mäninänï adobai tömengä tönö godongämæ guëadö guëa cæte wængonguinänï inte täi ëmonte gänä cæcædänimpa,” ante Wængongui anquedo apænecantapa.

¹⁵ Ayæ tömengä wæætë botö imote ñimaï apænecantapa. “Onquiyängä mäincoo beyæ towente quëwënongå inte æpæncoo yædopäa täe contacä abitapa. Mänii æpæncoo iñömö täiyænänï waodäni bai inänipa. Wabæca näni quëwencabo wabæca näni quëwencabo incæ wadö näni tedecabo wadö näni tedecabo incæ waodäni täiyænänï inänipa. Mäninänï tömänänï mäniï æpæncoo bai inänipa. ¹⁶ Ayæ önompo tipæmpoga önömoncawæncoo bai awënë odeyeidi tönö mönö guiñënongå iñömö tömënanï bitö nê adinänï inönänï inte onquiyängä mäincoo beyæ nê towente quëwënongå ingante piñcædänimpa. Piñinque, Tömengä ingante æmæwo ömæ ëwengäimpa, ante cæcædänimpa. Tömengä mäincoo tömancoo ö änanï ate ömaacä inte wæyongante tömengä baö cæninque tömengä ingante æmæwo iya tancædänimpa. ¹⁷ Wængongui, Botö angai bai ñinque baganca tömënanï botö pönëno ante cæcædänimpa, ante godö cæcä beyænque mäninänï awënë odeyeidi näni mimönë adodö ante pönënanipa. Pönëninque tömënanï godongämæ Ao äninque, Mönö guiñënongå aacæcäimpa, ante tömengä ingante, Mönö täi piñænö ante godömö ænguingä, ante godönänï ængantapa.

¹⁸ “Mäningä onquiyängä bitö adingä bai Babidönia näni waëmö quëwëñömö adobai impa. Mäniiñömö awënëidi iñömö tömämæ awënë odeyeidi inänite nê aadäni inänipa,” ante Wængongui anquedo apænecantapa.

Babidönia nani quëwëñömö do wo ëwente batimpa

18 Ayä ate Wængongui anquedo wacä inte öönädë inö wæä pongä atabopa. Tö-mengä tæi piñængä inte nangui angä ingä inte nämä nänö nãö apäite ëmönö inte inguipoga iñömö nãö apäicä atabopa. ²Tömengä nänö tedepämo inte iimaï yedæ aa pedinque,

“Babidönia nani äñömö do wo ëwente batimpa. Babidönia nani waëmö quëwëñömö i incæte do wo ëwente ba aedäni.

Badinque wënæidi nani owoyömö batimpa.

Wënæidi wentamö ëwocadäni tömänäni mäniñömö tee mönincönë bai quëwëñänipa.

Ayamöidi baacäidi tömänäni adobai mäniñömö wææ cæte bai owodänipa.

³Wabæca nani quëwencabo wabæca nani quëwencabo incæ tömänäni

babidöniaidi wiwa nani towëinënö beyä

tömënäni biinömæ bete quidi quidi dowænte bai wädänipa.

Inguipoga awënë odeyeidi incæ babidöniaidi tönö towëñänipa.

Babidönia iñömö quëwëñäni nämanque ante pönente tocæte ante mäincoo nangui pöni ante ëadäni beyænque

inguipoga në godonte äñäni iñömö mäincoo nangui pöni ëadäni badänipa,” ante Wængongui anquedo aa pecantapa.

⁴Ayä öönädë inö wacä tedepämo tedecä ëñentabopa.

“Botö guidëmïni ëñëedäni. Mïnitö tömënäni weca quëwëmïni incæte,

Tömënäni tönö godongämæ wënæ wënæ cädämaï incæmönimpa, ante cædinque wadæ tao pödäni.

Ayä, Wængongui tömënäni inänite päningue mönitö imönite pänämaï incæcäimpa, ante pönente wædinque wodii winonte pödäni.

⁵Tömënäni wënæ wënæ cædimämo iñömö cabo ti gæte cönöningue bacoo pöni ongompa.

Incæte Wængongui mäninäni nani wiwa cædimämo cöwë pönente wæcampa.

⁶Tömënäni nani pönöni bai mïnitö tömënäni inänite adobai godoncæmïnimpa.

Tömënäni nani pönö cædinö beyä mïnitö wæætë adopo godö cædinque mempoga ganca godömenque godö cæmïni wæcädänimpa.

Ti nämæ godönäni bete bai wädänitawo. Mïnitö wæætë tömënäni owætadë ti nämæ adopopæ pe niñante wempo cæðinque,

mempoga pe niñante wempo cædente bai cædinque godömenque ti nämæ godömiini bete wæcädänimpa, angantapa.

⁷Edæ tömënäni nämä incæ, Mönö nænämö imompa, ante pönente nangui waëmö mäincoo ëate quëwëñäni iñönänite

mïnitö wæætë, Tömënäni ægancadö waëmö quëwëñänii, ante adinque

tömënäni inänite adoganca piunte cæmïni nantate wædinque tömënäni wæwente quëwencädänimpa.

Mäninäni iñömö, ‘Awënë odeye nänöogængä bai contate ongömompa. Edæ watapæ quëwëmö imompa.

Wii owæmpoingä bai inömö inte wæwëñämaï cöwë incæmöimpa,’ ante önöwënenque pönente änewëñänipa.

⁸ Mänömainö ante në änäni inte adoque itädë iñonte tömënäni nāni wæwëmāmo iñontobä pö ate nanguï wæcädänimpa.

Mänïönæ tömënäni nāni wænguimāmo nāni wæwenguimāmo nāni gue ænenguimāmo pö wæcädänimpa töö.

Tömënäni onconcoo gonga bæcodocæimpa.

Edæ Wængonguï Awënë iñömö Babidönia iñömö quëwënäni inänite në apænte ante pangä iñömö edæ tömengä tömää cægaingä ingampa,” ante apæncantapa.

⁹ Inguipoga awënë odeyeidi incæ Babidönia quëwënäni tönö towënäni inte tömënäni adobaï Babidönia quëwënäni tönö nanguï wæmō mäincoo godongämæ ænte äate quëwënänipa. Ìninqe Babidönia nāni quëwëñömö gonga bæcodod-inque tēemancoo baca baca æi adinque tömënäni wæwente Ca ca wæcädänimpa.

¹⁰ Babidönia iñömö quëwënäni nanguï pönï nāni wæwënö adinque awënë odeyeidi ancaï guïñëninque, Mänināni tönö godongämæ wæwënāmaï incæmönimpa, ante gomonga a ongöninque wæcädänimpa.

“Babidönia mini wæmō quëwëñömö në quëwëmini mini wæquinque ingæimpa.

Mänïñömö quëwëmini mäincoo nanguï äate inimini inte mini wæquinque.

Wënæ wënæ cæmini iñöminite adoque ooda iñonte Babidönia mini quëwëñömö do apænte pante wo ewente batimpa.” ante wæcädänimpa.

¹¹ Inguipoga mäincoo ænte mante në godonte ænāni iñömö, Edæ æcänö mönö godonguënenco godonte ænguinaa. Nöwo dæ ä, ante wæwente Ca ca wæcädän-impä. ¹² Ìncoo iñömö nāni godonguënenco impä. Oodo tönö padata, dica nāni nanguï godonte ænincacoo tönö pededamö nāni ämoncoo mä ongoncoopa. Adobaï wæmoncoo nïno nāni ancoo tönö awënëidi wæmoncoo nāni mongæncoo ayæ teda nāni ancoo tönö opatawæ incoo mä ongoncoopa. Quiwæmë oguï wawænque i mänïwæ mä ongoncoopa. Edepante бага inte nāni badönincoo tönö awænque nāni nanguï godonte æniwæ inte nāni badönincoo mä ongoncoopa. Yaëmenta bodonte nāni änï inte nāni badönincoo tönö iædo nāni änï inte nāni badönincoo tönö mänömodo nāni anca inte nāni badönincoo iñömö mänincoo tömancoo mä ongoncoopa, ante wæcädänimpa. ¹³ Cänedä nāni antapo tönö oguï waa öni pæcaquï, oguï waquï nāni iya täimö tönö tï nä öni pæquï ayæ oguï wapæ öni pæquïmä, biinömä tönö oginguipæ, wæmō ædina tönö todigomö mänincoo mä ongoncoopa. Cæningäidi tönö obegaidi cabayoidi tönö cabayo inte nā cæte nāni wëä godö awotocoo mä ongoncoopa. Mänincoo tömancoo mä ongoncoopa, ante wæcädänimpa. Ayæ adobaï, Waodāni incæ në cæte quëwencädänimpa, ante cæningäidi baï godonguënëmö intamompä, ante wæcädänimpa. ¹⁴ Mänināni Babidönia quëwënäni inänite iïmaï ancädänimpa.

“Quincamë ante beinente wæmini incæ mäninca tömanca minitö weca nöwo dæ ancapa.

Mini ëadincoo tönö quïnö wæmō mini mäincoo iñömö mänincoo tömancoo nöwo dæ ä ininque minitö

ömæpomini inte cöwë wæætë ænāmaï incæminimpa,” ante ancädänimpa.

¹⁵ Tömënäni mänïñömö quëwënäni inänite mänincoo nāni godönincoo beyæ në ænināni inte në nanguï ëadināni incæ Babidönia iñömö quëwënäni nāni wæwënö adinque, Mänināni tönö godongämæ wæwënāmaï incæmönimpa, ante gomonga a ongöninque ancaï guïñencädänimpa. Ayæ wæwente Ca ca wæcädänimpa. ¹⁶ Ayæ iïmaï yedæ ancädänimpa.

“Babidönia mīni waēmō quēwēñōmō nē quēwēmīni incæ mīni wæquinque ingæimpa.

Edæ mänñōmō quēwēmīni tōmēmīni weocoo waëmoncoo nīno nāni ancoo tōnō awēnēidi waëmoncoo nāni mongæncoo tōnō opatawæncoo mänincooque mongæmīni imīnitapa.

Mīnitō, Mōnō waēmō incæmōimpa, ante odo inte badōincoo tōnō dicamō nāni nanguī godonte ænincoo tōnō pededamō nāni ämō mänimoncoo mongæmīni imīnitapa.

¹⁷ Incæte adoque ooda iñonte mänincoo mīni ëadincoo incæ edæ æmæwo ömæe ewente batimpa, ante nē ænte godönāni edæ wæcædänimpa,” ante angantapa.

Æpæntibædo wipocoo nē tōō tōō cædönāni tōnō, Wipodē nē godāni, wipodē nē cædönāni tōnō, Wipo inte mäncoo godonte ængæimpa, ante nē mæo godāni tōmānāni mänināni gomonga a ongoncædänimpa. ¹⁸ Babidönia nāni quēwēñōmō gonga bæcododinqe tēemancoo baca baca æi adinqe iūmaī yedæ ancædänimpa, “Ii Babidönia nāni waēmō quēwēñōmō bai wayōmō nāni waēmō quēwēñōmō edæ dæ ampa, ante wæcædänimpa,” ante angantapa. ¹⁹ Nē wæwēnāni inte nāni cæi bai onguipo guidimō ænte ocaboga wo ææntodonte wææ guicadinque Ca ca wædinque iūmaī yedæ ancædänimpa,

“Babidönia nāni waēmō quēwēñōmō nē quēwēnāni nāni wæquinque ingæimpa.

Mänñōmō æpæntibædo wipocoo nē ëadāni inte

tömēnāni nāni godōnincoo mänñōmō quēwēnāni inānite godonte æninque tōmānāni nanguī ëadāni badānitapa.

Ayæ adoque ooda iñonte Babidönia nāni quēwēñōmō tōmæo æmæwo ömæe ewente batimpa, ante ancædänimpa,” angantapa.

²⁰ Mäninō ante änāni ate, Tōmāmīni öönædē iñōmō quēwēmīni mänñōmō wo ewente i adinqe watapæ tocæmīnimpa.

Wængonguī quīmīni adobai

Itota nänö nē da godongaimīni tōnō

Wængonguī beyæ nē apænemīni tōnō

mīnitō tōmāmīni mänñōmō wo ewente i adinqe watapæ tocæmīnimpa.

Edæ, Mīnitō imīnite æbänö wēnæ wēnæ cædāni, ante adinqe

Wængonguī tōmēnāni nāni quēwēñōmō quēwēnāni inānite apænte äninque pangä ate tocæmīnimpa, ante angantapa.

²¹ Ayæ Wængonguī anquedo nē tæi ëmongä iñōmō dicabo nāni mö mö equinca bai nænængade dicabo æninque æpæntibæ cæncædēmæ wo guitudōninque iūmaī angantapa.

“Mäninca æpæntibæ cæncædēmæ tæi wo guitudōmo guii bai

Babidönia nāni waēmō quēwēñōmō

wo ewente dæ ba ate cōwē adāmaī incædänimpa.

²² Iinque, Adapate nāni ampogainö incæ ämotamīni nāni angainö incæ

öōña bai nāni we we öongainö incæ todompeta nāni ancadeca nāni we we öongainö incæ mänñōmō cōwē ëñēnāmaī ingæimpa.

Quiēmē badönāni incæ nē badongaināni mänñōmō cōwē dæ ancædänimpa.

Tömēnāni nāni dicabo mö mö equinca inte cæyönāni dicabo dadi dadi cæyedē ä bai mänñōmō cōwē wii ëñenguinānidö anguënē.

²³ Do nāni ti wodönoincade mänñōmō cōwē tica ëñēnāmaī ingæimpa.

Onquiyängä ingante nē monguingä mäninömö cöwē dæ ä mönämaī inguinänidö anguēnē.

Mäninömö maincoo ænte mante nē godonte ænani inömö inguipoga nänänani inte ongogadänimpa.

Ayæ idöidi yewænte bai cædinque mäninömö quëwänani, Waëmö maincoo, ante wapiticæ anewänani beyænque wabæca nani quëwencabo wabæca nani quëwencabo incæ tömänani nani quëwencabo oda cæte gogadänimpa,” angantapa.

²⁴ Wængongui beyæ nē apæneganani inänite wänöninque mäninömö quëwänani incæ Wængongui quinani inänite godömenque wänönani wængadänimpa. Edæ inguipoga wänönani nē wængainani tömänani mäninömö wänönani wænte bai ingadänimpa.

19 Babidönia wo ewente ba ate öönædē inömö waodani tæiyænani adotedæ ogæ tededani bai ëñentabopa.

“Mönö Awënë ingante watapæ apænecæimpa, ante, Adedoya, äninque, Mönö Wængongui mönö imonte, Quëwencæminimpa, ante nē Ængä inongä ingampa.

Tömengä nää ëmongä inongä ingampa. Ayæ tömengä tæi piñængä inongä ingampa. ²Edæ, Wængongui, iimaī pancæboimpa, ante nänö apænte angainö bai cædinque tömengä cöwē nö cæte waa pangampa.

Babidönia inömö onquiyängä maincoo beyæ nē towente quëwëngä bai impa.

Mäninömö quëwänani nē wiwa cædani beyænque inguipoga quëwänani wæætē nē wiwa cædani badani adinque Wængongui mäninömö quëwänani inänite apænte ante pangantapa. Wængongui ingante nē cædinani inänite adodani wänönani adinque tömengä wæætē tömëni inänite wänongä wänänitapa,” ante änänitapa.

³ Ayæ wæætē ogæ tedinque,

“Adedoya,” änänipa.

“Mäninömö tēemancoo cöwē baca baca æicömpa,” ante änänitapa.

⁴ Mäninödē Wængongui nänö tæ contaimpaa tæ contayongante nē aadani nē Picænani bæinticoatodo ganca inani tönö miñani quëwänani mënaa go mënaa inani inömö ædæ wæäninque, Bitö Wængongui Awënë imidö anguēnē, äninque “Amëë, Adedoya,” ante aa pedänitapa. ⁵ Wængongui nänö tæ contaimpa inö tedepämo iimaī tedinque,

“Wængongui ingante nē cæmini inte

tömengä ingante nē guiñente ëñente cæmini inömö

nē awënëidi imini incæ önöminique incæ minitö tömämini,

Mönö Wængongui ingante watapæ apænecæimpa, ante apæneedani,” angantapa.

Wængongui Codotedo monguingä ææmä

⁶ Ayæ adobai waodani tæiyænani adotedæ ogæ tededani bai ëñentabopa. Nänæ tēnabo ä bai detæbo eyequei tē bai ëñentabopa.

“Adedoya,

Mönö Wængongui Awënë Tömää nē Cægaimi inte

bitö nē Awënë badinque aabipa.

⁷ Mönö watapæ pönī entawëninque waa tocæimpa.

Edæ tömengä ingante apäenedinque mönö, Bitö nää emömi imipa, ante angäimpa. Edæ Wængongui Codotedo nänö monguinö oo bacæ cæpa cæminii.

Onquiyängä tömengä ingante monguingä inöömö, Botö nänöogängä inguingä oo poncæcäimpa, ante nämä incæ eyepæ cæte a ongongampa.

⁸Tömengä ingante weocoo nino nani ancoo waemö näämæntacoo nänö wëñaquincöo, ante pönönäni ængä ingampa.

Wængongui quinäni nani nö cægaincoo incæ nino nani ancoo waemö näämæntacoo bai impa.”

⁹Ayæ Wængongui anquedo botö imote angantapa. “Iimaï ante yewæmoe. ‘Wængongui Codotedo monguingä ææmæ pö becädänimpa, ante wente ængä nê ponguinäni nani toquinque.’” Tömengä ayæ godömenque äninque, “Mäninö Wængongui nänö nö angainö impa,” ante angantapa.

¹⁰Ante äñongä botö tömengä önöwa inö ædæ wæäninque tömengä ingante watapæ apænecæte ante cæyömote tömengä wæætë, “Mänömaï cædämaï imäwe, angantapa. Botö önönque bitö bai Wængongui ingante nê cæbo imopa. Edæ bitö töninädäni Itota nänö apænegainö nê ëñente cædäni bai botö adobai Wængongui ingante nê cæbo imopa cæbii. Edæ Wængonguinque ingante ædæ wæäninque, Bitö Wængongui Awënë imidö angüenë, ante apænee,” ante angantapa.

Itota godö odömongä beyænque Wængongui beyæ nê apænedäni inöömö tömengä nänö apænegainö ante ewocadinque apænedänipa.

Näämænta cabayoga nê tæ contacä mongænte pongampa

¹¹Botö ayæ ayömote öönæde wi ænete bai bayö cabayo näämænta ëñacä a onongä atabopa. Cabayo nê tæ contacä mongænte pongä inöngante, Tömengä cöwë pönëninque nê Ædæmö Cædongä inte, Näwangä impa, ante nê Apænegaingä ingampa, ante pemonte ingampa. Wënæ wënæ cædäni inänite tömengä nö apænte ante pänongä ingampa. Ayæ guëadö guëa cædinque tömengä nê nö cædongä ingampa. ¹²Tömengä awinca gonga bæcodote bai ëmongä inte tömengä ocaboga pogantacoo encacä ingampa. Tömengäa emöwo yewæmote iï incæte mäniwo tömenganque nänö ëñëwo impa. Wädäni ædö cæte ëñënguinänii. ¹³Tömengä weocoo yacoo wepænë guipænente mongængampa. Tömengä emöwo inöömö, Wængongui nänö Angainö, ante pemonte ingampa.

¹⁴Öönæde inöömö tontadoidi tömengä miñæ tee empote godänipa. Tömënanäni nino nani ancoo waemö näämæntacoo mongæninque cabayoidi näämænta ëñädäni yabæ tæ contate mongænte godänipa. ¹⁵Cabayoga nê tæ contacä inöömö wabæca nani quëwencabo wabæca nani quëwencabo incæ waodäni inänite yaëmenca pancæte ante äninque tömengä önönë inö yaëmë tipængaa waingamë engamë ënedinque yædæ tadete ongongantapa. Tömengä inöömö nê tæiyæ awënë tömengä nempo quëwënäni inänite aacä bai adobai tömämæ quëwënäni inänite, Iimaï cædäni, ante aacæcäimpa. Yowepæ ante yowecoo nani pinä pinä gäwate cæincadedë pinä pinä gäwate bai cædinque cabayoga nê tæ contacä Wængongui ængui nänö angainö beyænque inöömö tömënanäni inänite piinte pancæcäimpa. Wængongui adocanque Tömää nê Cægaingä ingampa. ¹⁶Cabayoga nê tæ contacä inöömö weocoo yacooga adobai tömengä önontiya iï emöwo yewæmote ëñacampa. “Ayæ waodäni awënë odeyeyidi inönänite tömengä Tæiyæ Awënë Odeye inongä ingampa. Tömengä inöömö awënëidi tömënanäni Awënë inongä ingampa,” ante pemonte ingampa.

¹⁷ Ayä wacä Wængongui anquedo nænque cæncadëmö inö a ongongä atabopa. Tömengä öönädë gämänö në cæwodäni tömänäni inänite yedæ ante aa pedinque, “Adoyömö godongämä pöedäni. Edæ Wængongui tæiyä æämä ante pö cæedäni. ¹⁸ Awënë odeyeydi incæ tontado capitäoidi incæ onguinänäni tæi pinänäni incæ cabayoidi incæ cabayocooga inte në tæ contate godäni incæ iinäni tömänäni wänäni ate tömənäni baö cæncæte ante pöedäni. Waodäni awënë beyænque në cæte quëwänäni incæ në nämä cæte quëwänäni incæ awënëidi incæ önönäni incæ tömänäni baö pö cæedäni,” ante aa pecantapa.

¹⁹ Ayä botö ayömi mönö guinönongä tönö inguipoga awënë odeyeydi tönö tömənäni tontadoidi tönö adoyömö godongämä pöningue, Cabayoga në tæ contacä ingante ayä tömengä tontadoidi inänite mönö guëadö guëa cæcäimpa, ante cädäni atabopa. ²⁰ Incæte guëadö guëa cæyönänite tömənäni näëmä mönö guinönongä ingante bæi ongöninque, Wængongui beyä në apænebo, ante në babæ äningä ingante adobaï bæi ongönänitapa. Në babæ ängongä inönmö mönö guinönongä beyænque mä pönï cæcä inongäimpa. Ininque mönö guinönongä tömengä nänö yewämöi në yewämöinäni inönmö tömengä nänö emönö bæi nänï badöninca gäänë ædæ wææninque në apænedäni inte tömənäni në babæ ängongä nänö mä cædö adinque guinente wædinque oda cædönänipa. Ininque mönö guinönongä tönö në babæ ängongä ayä miina quëwänönate atopode nänï änantibæ gonga bæi nänï bæcodotibæ cæncadëmä wido cædänitapa. ²¹ Tömëna miinæ pönäni inänite guiquënë cabayoga në tæ contacä tömengä önönë inö yaëmenca yædæ tadete ongöninque do wänongä wänänitapa. Ininque në cæwodäni baö ade cænänique tömänäni në wäninäni baö tömo pönï cæwänönäni inänitapa.

Miido wadepo inönnte æbänö baquü

20 Wængongui anquedo wacä inönmö tadömengadænguipo ontatodemö wi ænequï tönö nänömencaimë nænämë önönempo næængä inte öönädë inö ta wæængä atabopa. ² Ta wææninque tömengä dadagöö ingante bæi ongöninque tömengä nänö miido wadepo ganca nã cæyænte ongonguinque ante nã cæyængantapa. Mäningä dadagöö wëenënedë tæntæ në ingaingä inte wænæ awënë Tatäna ingacäimpa. ³ Mäningä ingante nã cæyæninque tadömengadænguipodë wido cædinque ontatodemö wi ænequï inte tee mönedinque tömengä dæca ontatodemö ædämö tee moncäcantapa. Waodäni wabæca nänï quëwencabo ayä wabæca nänï quëwencabo inönänite tömengä, Oda cæte gocædänimpa, ante miido wadepo ganca cædämäi incæcäimpa, ante Wængongui anquedo dadagöö ingante wido cæcantapa. Mänimpodepo iinque ba ate tömengä ingante, Wantæ inö nimpö cæte goquingä, ante nimpö cæcä gocæcäimpa.

⁴ Ayä awënëidi tæ containpacoo botö atabopa. Wængongui Awënë godö angä beyænque awënëidi badinque apænte ante në änäni badinäni inte mänimpaa tæ contadäni inänitapa. Ayä Itota ingante ante apænedinque Wængongui nänö angainö ante apænedäni beyænque tömənäni inänite wangö tamencadäni wængadänimpa. Wangö tamencadäni wængainäni nänï önöwocaidi botö nönwo atabopa. Mäninäni inönmö mönö guinönongä ayä pöningä ingante adinque, Bitö Wængongui Awënë bæi imidö angüënë, ante apænedämäi inte ayä tömengä nänö emönö bæi nänï badöninca gäänë ædæ wæænte apænedämäi ingadänimpa. Ayä tömənäni nänï önönemö inö nänï önompo inö mönö guinönongä ayä pöningä nänö yewämöi yewämönä-

maï ingadänimpa. Adodäni nänäi ömämöninque adoque müido wadepo ganca Itota Codito tönö godongämä aadänitapa.

⁵Mäninäni täno nänäi ömämönäni incæte wadäni guiquënë në wængainäni incæ müido wadepo iinque go ate nänäi ömämönäni incæ. ⁶Täno nänäi ömämönäni iñömö në täiyä wäemö inäni inte nänäi toquinque. Edæ wadäni në wængainäni mempoga ganca nänäi wänguimämo iñonte mäninäni iñömö wänämaï incädänimpa. Wæætë, Wængonguï qui, ante në godönäni bai tömënäni adobai, Wængonguï beyä, ante ayä, Itota Codito beyä, ante cæcädänimpa. Ayä müido wadepo iñonte Itota Codito tönö godongämä aacädänimpa.

Tatäna nänö ämæwo ömäe ewenguinö ante

⁷Tadömengadænguipodë tömengä nänö tee mönecönë nä cæyænte quëwënongå iñongante Tatäna ingante müido wadepo iinque go ate nänäi cæyænäni ta gocæcäimpa. ⁸Ta godinque tömengä inguipoga ämatä go ämatä go godinque Gogobæ nänäi ämæ ganca go Mäogobæ nänäi ämæ ganca gocæcäimpa. Inguipoga tömäo godinque tömengä, Wabæca nänäi quëwencabo ayä wabæca nänäi quëwencabo nänäi oda cæte goquimämo ante cædinque tömënäni inänite, Mönö guëadö guëa cæquinque gocäimpa, ante, Adoyömö godongämä pödäni, ante ancæcäimpa. Æpodänidö inänii, ante tömënäni æpä wedeca emönai bai täiyænäni inguinänidö anguënë.

⁹Mäninäni bogænæ tömäo godäni bai tömënäni adobai inguipoga tömäo gocädänimpa. Wængonguï nänö waadete quëwëñömö tömengä quinäni quëwëñömö godämä gocädänimpa. Goyönäni öönädë inö gonga bæcodote gao wæænönte gonte wæncädänimpa. ¹⁰Ayä wænæ tömënäni inänite, Oda cæte gocädänimpa, ante në cægaingä ingante Wængonguï bæi ongonte atopode nänäi änontibæ gonga bai nänäi bæcodotibæ cæncädämä wido cæcæcäimpa. Edæ mönö guinönongä tönö, Wængonguï beyä në apænebo, ante në babæ äningä tönö tömëna dobæ mäniñömö wido cæte ingadäimpa. Iinque mäninäni itädë woyowotäe mäniñömö quëwente cöwë wantæpiyæ nänäi wæwenguimämo ingäimpa.

Wængonguï Awënë täe containpa näämæntapa

¹¹Ayä awënë täe containpa näænæmpa näämæntapa adinque botö mänimpaa në täe contacä ingä adobai atabopa. Inguipoga tönö öönæ iñömö tömengä ingante ate bai cædinque wodii godinque nänäi ongönömö edæ ædömë gote dæ änimpa.

¹²Ayä në wængainäni tömänäni awënëidi incæ öñönänique incæ mänimpa gäänë a ongönäni atabopa. A ongönönäni mincayontacoo wataa wataa wi æmpote ongoncoopa. Ayä mincayonta wataa Wængonguï, Quëwenguinta, ante tömengä yewæmongaintaa wi æmpote acantapa. Mänii mincayontacoo iñömö, Në wængainäni tömänäni æbänö cægainäni inänii, ante Wængonguï mänintacoo nänö yewæmongainö ante wataa wataa tömanta adinque në wængainäni nänäi cægai ganca, ante tömënäni inänite adoganca apænte ante pangantapa. ¹³Ayä æpæntibæ cæncädämä do wængainäni wæætë ta pönänitapa. Ämæwo wængainäni incæ ta pönänitapa. Tömënäni nänäi wænte ongönömö në ongongainäni inte wadæ ta pönänitapa. Ta pönäni ate, Æbänö cægainäni inänii, ante adinque Wængonguï adocanique adocanique nänö cægai ganca, ante tömengä ingante adoganca apænte ante pangantapa.

¹⁴Mäniñedë ganca ayä baganca wänämaï quëwencädänimpa, ante ayä, Wængainäni nänäi ongönömö adobai dæ bacäimpa, ante cædinque mönö Awënë wæn-

gainäni ämæwo näni wængaimämo tönö näni wænte ongöñömö æpæntibæ gonga bai näni bæcodotibæ cæcadëmæ wido cæcantapa. Mänintibæ mempoga ganca ämæwo näni wænguimämo bai impa. ¹⁵Wængongui, Quëwenguinta, ante nänö yewæmongaintaa adinque, Æcänö ëmowo mänintaa yewæmönämaï i, ante adinque në yewæmönämaï ingainäni inänite mänintibæ cæcadëmæ wido cæcantapa.

Inguipoga münguipo öönæ müönæ

21 Ayæ öönæ müönæ inguipoga münguipo atabopa. Edæ öönæ picæönæ inguipoga picænguipo dæ iinque batimpa. Ayæ æpæntibæ adobai dæ änimpa. ²Ayæ godömenque botö ayömute Wængongui nänö tæiyæ waëmö quëwëñömö müi Eedotadëë näni äñömö öönädë inö ta wææ atabopa. Onquiyängä në moncæ cæcä iñömö, Botö nänöögängä inguingä waa acæcäimpa, ante waëmö weocoo në mongängä bai ii quëwëñömö adobai waëmö pönï ëmö inte ta wææ atabopa.

³Ayæ Awënë tæ contaimpa inö tedepämo yedæ ä ëñentabopa. “Nöwo Wængongui nänö owoquincö waodäni weca ongö iinque tömengä tömënäni tönö quëwenguingä ingampa. Tömënäni tömengä guidënäni bacädänimpa. Ayæ Wængongui incæ, Botö tömëmo minitö Wængonguimo incæboimpa, ante tömënäni weca ongoncæcäimpa. ⁴Tömënäni wëñapæ tamonte wædi tömämæ Wængongui wadæ cæmoncæcäimpa. Mäniñedë ämæwo mönö wänimämo incæ mönö wæwënimämo incæ Ca ca mönö wædimämo incæ nantate mönö wædimämo incæ tömäa mänimämo dæ angæimpa. Edæ wëñëñedë inimämo incæ iinque batimpa,” angantapa.

⁵Ayæ Awënë tæ contaimpaa në tæ contacä iimaï angantapa. “Tömäa inimämo botö nöwo müi cæcæboimpa,” angantapa. Ayæ, “Mänömaïnö ante botö äninö edæ nö pönï ii iinque mäninö ante wede pönengæimpa. Mänömaï beyæ bitö iimaï ante yewæmöe,” angantapa.

⁶Ayæ tömengä wæætë botö imote iimaï äninque, “Dobæ iinque batimpa. Botö Tånobo ingaimo inte Tömämo inguimo imopa. Wëñëñedë tömäa në Badongaimo inte tömäa në iinque Cæbo incæboimpa. Edæ në gæwænäni, Æpæ beinëmönipa, ante në änäni inänite botö æpæ tapæ quëwenguimæ önonque godömo becädänimpa. ⁷Tæi ëmonte në gänä cädäni inänite botö mänincoo botö në godonguincö godömo æncädänimpa. Ayæ botö incæ tömënäni Wængonguimo incæboimpa. Tömënäni wæætë botö wëñænäni bacädänimpa. ⁸Wæætë guñente awädö, ante në änäni tönö në pönënamäi inäni guiquënë, në wiwa cädäni tönö wacä ingante në wänönäni guiquënë, në towente quëwëñäni tönö idöidi në inäni guiquënë, Wængongui impa, ante näni badöninca gäänë ædæ wæäninque në apänedäni tönö në babæ änäni tömänäni guiquënë, mäninäni iñönänite atopode näni änottibæ gonga bai näni bæcodotibæ incæ tömënäni näni wæcöñömö bacæimpa. Müniü näni wænguimämo iñömö mempoga ganca näni ämæwo wænguimämo impa,” angantapa.

Müi Eedotadëë quëwëñömö

⁹Wængongui anquedoidi öonmpo æmæmpoque go mëa ganca inäni öonmpo æmæmpoque go mëa ganca owætacoo waodäni iinque näni wæwenguimämocoo eyede engate intacoo në næænäni iñönänite adocanque botö weca pöninque, “Pöe,” angantapa. “Wængongui Codotedo nänöögängä në baquingä në monguingä iñongante botö bitö imite odömömo acæbiimpa,” angantapa. ¹⁰Ayæ Wængongui Önö-

woca incæ botö imote bæi ongonte bai cæyongante botö wiimonte bai iimaï atabopa. Wængongui anquedo botö imote ö ænte mæo onquiyaboga tæcædæca pönï cönongä ongonte ayömo Wængongui tæiyæ waëmö nänö quëwëñömö Eedotadëë nani äñömö öönædë inö ta wæëñonte tömengä botö imote odömongä atabopa.

¹¹ Mänii quëwëñömö Wængongui nãö emönongä bai apäitimpa. Ayæ dica aatapeca nani anca emö bai awocawænta bai waëmonca inimpa. Waodäni nani nanguï godonte æninca bai nãö apäite bai Eedotadëë inimpa. ¹² Mänii quëwëñömö godämæ tæimö wææ cædi ænówæmö ongönimpa. Ayæ wææ cædi odemoncoo iñömö önompo tipæmpoga go mënemonga wææ cædinemö inimpa. Önompo tipæmpoga go mæa ganca wææ cædinemö incæ wayömö adodemonque Wængongui anquedo adocanque a ongöñongä wayömö adodemonque Wængongui anquedo a ongöñongante anquedoidi önompo tipæmpoga go mæa ganca ongönäitapa. Mäninemö önompo tipæmpoga go mënemonga odemoncooga idægoidi nani cabo tipæmpoga go menca-bodäniya iñönänite tömënäni emöwocoo yewæmonte inimpa. Wayömö odemonga adocaboque emöwo wayömö odemonga adocaboque emöwo yewæmonte inimpa. ¹³ Nænque tamönö inö mæa go adoque odemö inimpa. Nænque wæidö inö mæa go adoque odemö inimpa. Betamonca inö mæa go adoque odemö inimpa. Adobai æmatæ inö mæa go adoque odemö inimpa. ¹⁴ Mänii quëwëñömö wænömænæca mænonte wææ cæqui, ante nani ñönönincacoo iñömö önompo tipæmpoga go menca inimpa. Mänincacoo önompo tipæmpoga go menca incæ Wængongui Codotedo nänö da godongainäni önompo tipæmpoga go mænä inäni tömënäni emöwo incæ adocanque emöwo wacaa adocanque emöwo wacaa yewæmonte ëñacaimpa.

¹⁵ Wængongui anquedo botö imote nê apænedingä iñömö tee manguimpa oodo inte badöimpa nê næængä atabopa. Mänii quëwëñömö tee mancæte ante mänii wææ cædinemoncoo adobai tee mancæte ante mänii wææ cædi adobai tee mancæte ante tömengä tee manguimpa næængantapa. ¹⁶ Mänii quëwëñömö æmatæ adoganca æmatæ adoganca mænonte inimpa. Doyæ inö betamonca inö adoganca inimpa. Tömengä mänii quëwëñömö tee manguimpa inte tee mante doyæ inö ænówæmö inö doo müido dootiento quidömetodo ganca inimpa. Ayæ betamonca iñömö adobai doo müido dootiento quidömetodo ganca i atabopa. ¹⁷ Wængongui anquedo waodäni nani tee mänö bai tee mangä ayongä mänii quëwëñömö wææ cædi tæinebo inö tetenta i coatodo mëetodo ganca inimpa.

¹⁸ Mänii wææ cædi aatapeca nani ånonca inte mænöni impa. Mänii quëwëñömö guiquënë oodo inte awocawænta bai waëmö inte mænöni impa. ¹⁹ Mänii quëwëñömö wænömænæca mænonte wææ cæqui, ante ñönönincacoo iñömö, Waëmö emongæimpa, ante tömënäni quincacoo nani nanguï godonte ænincacoo ænte mämö ñönönincacoo bewodö bewodö cædänitapa.

Tänoca ñönöninca aatapeca nani anca inimpa.

Waca ñönöninca guiquënë tapidoca nani anca inimpa.

Waca ñönöninca guiquënë aagataca nani anca inimpa.

Waca ñönöninca guiquënë etemënaotaca nani anca inimpa.

²⁰ Waca ñönöninca guiquënë ööninteca nani anca inimpa.

Waca ñönöninca guiquënë codönadinaca nani anca inimpa.

Waca ñönöninca guiquënë coditooditoca nani anca inimpa.

Waca ñönöninca guiquënë bedidoca nani anca inimpa.

Waca ñönöninca guiquënë topatioca nani anca inimpa.

Waca ñönöninca guiquënë coditopadataca nani anca inimpa.

Waca ñönöninca guiquënë aatintoca nani anca inimpa.

Waca tómanca guiquënë ámatitaca nani anca inimpa.

Mänimpoca inimpa.

²¹ Mänii wææ cæðinemö iñömö önompo tipæmpoga go mënemonga iñömö pededamö nani ämö önompo tipæmpoga go mëmonga inte mænonte inimpa. Wææ cæðinemö incæ wææ cæðinemö incæ pededamö adomonque adomonque inte mænöninemö inimpa. Mänii quëwëñömö taadö ñænænö godö oodo inte mænöwate taadö awocawænta bai waëmö inimpa.

²² Mönö Wængongui Awënë adocanque Tömää nè Cægaingä tönö Wængongui Codotedo tönö mäniñömö cöwë ongöna ininque godongämæ quëwënäni guiquënë, Mönö Wængongui oncönë guicæimpa, ante quinante anguinäni. Edæ Wængongui tæiyæ waëmö oncö mäniñömö dæ ä atabopa. ²³ Wængongui nè ñäö bai emönongä inte ñäö apäiquingä bai inongäimpa. Ayæ Wængongui Codotedo iñömö nani ti wodönoincade bai i ininque mäniñ quëwëñömö iñömö nænque incæ apäicä incæ quinante godömenque ñäö apäiquii. ²⁴ Wabæca nani quëwencabo ayæ wabæca nani quëwencabo inänite Wængongui ængä beyænque nè quëwënäni inte mäniñanique mäniñ ñäö apäiyömö cægoncæðänimpa. Adobai inguipoga awënë odayeidi waëmoncoo nani eadincöo mäniñömö ænte poncæðänimpa.

²⁵ Mänii quëwëñömö woyowotæ inämaï ingæimpa. Ininque mäniñömö wææ cæðinemoncoo iimö iñö iimö iñö iñonte cöwë tee mönedämaï ingæimpa. ²⁶ Wabæca nani quëwencabo ayæ wabæca nani quëwencabo incæ tömënäni waëmoncoo nani eadincöo mäniñömö ænte poncæðänimpa. Mänii quëwëñömö waa quëwëñömö impa, ante waa ate apænecæðänimpa. ²⁷ Quiëmë wænæ wænæ i mäniñömö cöwë guidämaï ingæimpa. Nè wiwa cæðäni incæ nè babæ änäni incæ mäniñ quëwëñömö guidämaï inguinänidö angüënë. Wæætë Wængongui Codotedo, Quëwenguintaa, ante nänö yewämointaa nè yewämönäni guiquënë tömënäni quëwëñömö guicæðänimpa.

22 Ayæ Wængongui anquedo botö imote önö quëwenguimæ odömongä atabopa. Mänimæ awocawænta bai waëmömæ impa. Wængongui tönö Wængongui Codotedo nana aacæ tæ containpa inö tapæmpa. ² Mäniñömö tadinque mäniñ quëwëñömö taadö ñænænö godö tæcæguedë inö ta gopæmpa. Mäninö æmæ wedeca incæ imæ wedeca incæ awæ quëwenguiwæ pæwæ atabopa. Mäniwæ iñömö tömenca wacä apäicä iñonte wacä apäicä iñonte incapa. Ininque adoque wadepo iñedë önompo tipæmpoga go mëa ganca mänimpoga mäniwæ incayedë impa. Wabæca nani quëwencabo ayæ wabæca nani quëwencabo incæ mänimæca quëwënäni tömänäni mäniwæ öñabocoo beyæ gancæ bacæðänimpa, ante ëñabocoo. ³ Wængongui pante nänö angainö beyænque quincoomë wænæ wænæ bagatii mäniñö mäniñedë dæ angæimpa. Wængongui tönö Wængongui Codotedo nana aacæ tæ containpa mäniñ quëwëñömö mä ongoncæpaimpa. Tömengä ingante nè cæðönäni iñömö tömengä ingante watapæ apænedinque tömengä ingante cæcæðänimpa. ⁴ Tömengä awinca acæðänimpa. Ayæ tömengä emöwo tömënäni önönemö inö yewämönte incæðänimpa. ⁵ Mäniñömö woyowotæ inämaï ingæimpa. Edæ mäniñömö quëwënäni beyæ Wængongui Awënë nè ñäö emönongä inte apäiquingä inongampa. Ininque nænque ñäö apäidö incæ ti wodönoincade ënönö incæ quinante ayæ apäiquii. Ayæ mäniñömö quëwënäni adodäni cöwë wantæpiyæ acæðänimpa.

Itota Codito oo poncæcäimpa

⁶Ayæ Wængongui anquedo botö imote apænedinque, “Mäninö bitö ëñenö nö pönï i inique mäninö ante wede pönengäimpa. Wængongui beyæ nê apænedönäni tömengä Önöwoca ingante ewocadinque apænedänipa. Tömënanï nänï nê ewocadongä Wængongui Awënë iñömö tömengä anquedo ingante apænedinque, Bitö botö imote nê cædönäni weca godinque, Æbänö oo pönï baquimpa, ante odömömi acædänimpa, ante da pönongä pongantapa,” ante botö imote apænecantapa.

⁷Itota Codito, “Aedäni. Botö oo ocæ ëmænte ponguimo imopa. Ii mincayontaa Wængongui beyæ apænedinque nänï yewæmante angainö ante nê ëñente cædäni iñömö nänï toquinque,” ante apænecantapa.

⁸Botö Wäömo inömo imopa. Mäninö Wængongui anquedo nänö äninö ante nê ëñenimo inte botö mänii tömengä nänö odömöninö ante nê adimo inömo imopa. Wængongui anquedo angä ëñëninque ayæ odömongä adinque botö nê odömöningä önöwa inö ædæ wæænte tömengä ingante watapæ apænecæte ante cætabopa. ⁹Cæyömote tömengä wæætë, “Mänömai cædämai imæwe, angantapa. Botö önonque bitö bai Wængongui ingante nê cæbo imopa. Ayæ bitö töniiñadäni Wængongui beyæ nê apænedönäni tönö ii yewæmöintaa nänï angainö ante nê ëñente cædäni tönö botö tömënanï bai adobai Wængongui ingante nê cæbo imopa cæbii. Edæ Wængonguinque ingante ædæ wææninque, Bitö Wængongui Awënë adobique imidö anguënë, ante apænee,” angantapa.

¹⁰Wængongui anquedo godömenque botö imote iimaï angantapa. “Edæ mänömai baquionæ oo pönï ingäimpa cæbii. Ii yewæmöintaa Wængongui beyæ apænedinque nänï angainö ante bitö wê wodönämai inte do apænee. ¹¹Nê wënæ wënæ cædönäni inänite ee abi godömenque wënæ wënæ cæcædänimpa. Tömënanï nänï pönënö wentamö bai nê entawënäni inänite ee abi godömenque nänï pönënö wentamö bai entawencædänimpa. Nê nö cædäni inänite ee abi godömenque nö cæte quëwencædänimpa. Nê tæiyæ waëmö entawënäni inänite ee abi godömenque tæiyæ waëmö entawencædänimpa.”

¹²Itota Codito, “Aedäni. Botö oo ocæ ëmænte ponguimo imopa. Ocæ ëmænte pöninque botö tömëmo godömo nänï ænguincö, ante næænte ponguimo imopa. Tömänäni æbänö cædäni, ante adinque botö tömënanï nänï cægaï ganca ante adoganca godömo æncædänimpa. ¹³Botö Tänobo ingaimo inte Tömämo inguimo imopa. Tömää badönämai iñedë botö Do Quëwengaimo imopa. Ayæ tömää iinque bayedë incæ botö Ayæ Pönï nê Quëwëmo incæboimpa. Wëëñëñedë tömää nê Badongaimo inte tömää nê Iinque Cæbo incæboimpa.”

¹⁴Weocoo yamonte bai mimönë nê mënongate inäni iñömö tömënanï nänï toquinque edæ mänii quëwëñömö wææ cædinemö iñömö go guiquinänï inänipa. Go guidinque tömënanï quëwenguiwæ quëwenguinca bequinäni inänipa. ¹⁵Wiwa cædäni guiquënë mänii quëwëñömö yabæque iñömö ongonte wæquinänï inänipa. Idöidi nê inäni, nê towente quëwënäni, wacä ingante nê wænönäni yabæque ongönänipa. Wængongui impa, ante nänï badöninca gäänë ædæ wææninque nê apænedäni, nê babæ änanï tönö, Babæ äinëmönipa, ante nê änanï tönö tömënanï tömänäni mänii quëwëñömö yabæque iñömö quëwenguinäni inänipa.

¹⁶“Botö Itotabo ingaïmo ïmopa. Mäninö botö angainö ante nö impa, ante botö ïmote godongämä nani pönencabodäni tömänäni inänite apäñecä eññecädänimpa, ante cædinque botö do botö anquedo ingante minitö weca da pönömo pongantapa. Botö docä Awënë Dabii nänö Wæmæncoo ingaïmo inte adobaï nänö Pæïmo inömo ïmopa. Botö wadaamö bai ñäö bayö apäimö bai ïmopa.”

¹⁷Wængongui Tæiyæ Waëmö Öñowoca tönö Wængongui Codotedo nänöogængä nani äñongä, “Pöedäni,” äñapa. Äñöna tömënäni tömëna ïnate në eññänäni inte adobaï, “Pöedäni,” ancædänimpa, ämopa. Në gæwænte inäni tömänäni pö becædänimpa, ämopa. Në beinänäni ïñönänite, Minitö quëwenguimæ, ante önonque pönonguimæ incæ pö ænte becæminimpa, ante ämopa.

¹⁸Ï yewæmöintaa Wængongui beyæ në apænedäni nani angainö ante në eññänäni tömänäni inänite, Ee aedäni, botö wææ ämopa. Edæ mäninö nani angainö ante godömenque wadö äñäni inänite Wængongui pancæcäimpa. Ï yewæmöintaa quïëmë nani pante wæwenguincoo, ante yewæmonte adinque Wængongui në wadö äñäni inänite mänincoo bai godömenque pancæcäimpa. ¹⁹Ayæ Ï yewæmöintaa Wængongui beyæ në apænedäni nani angainö incæ pancædea æninqe në wëä godonte bai cædäni inänite Wængongui quëwenguiwæ quëwenguinca godönämaï incæcäimpa. Tömengä adobaï, Botö tæiyæ waëmö quëwëñömö mäniñömö guiidämaï incæminimpa, ante ancæcäimpa. Mäniï quëwenguiwæ ante mäniï quëwëñömö ante Ï yewæmöintaa yewæmonte impa.

²⁰Mäninö ante, Nö impa, ante në apäñecä ïñömö tömengä ïñömö, “Ao, botö oo ocæ emænte ponguïmo ïmopa,” angantapa. Äñongante botö,

Mänömaï baquinö angüënë, ante, Amëë, äñinque, Awënë Itota pöe, ämopa.

²¹Awënë Itota Wængongui nänö guiidänäni inänite waadete godö cæcæcäimpa. Mänömaï baquinö angüënë, ante botö, Amëë, ante mäninque ämopa.